


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yǎ ndiõxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
872f7754-0986-5ecc-a059-925a708a6939

Contents

SAN MATEO	1
SAN MARCOS	57
SAN LUCAS	91
SAN JUAN	145
LOS HECHOS	182
ROMANOS	231
1 CORINTIOS	254
2 CORINTIOS	277
GÁLATAS	292
EFESIOS	300
FILIPENSES	308
COLOSENSES	314
1 TESALONICENSES	319
2 TESALONICENSES	324
1 TIMOTEO	327
2 TIMOTEO	334
TITO	338
FILEMÓN	341
HEBREOS	343
SANTIAGO	361
1 PEDRO	366
2 PEDRO	372
1 JUAN	376
2 JUAN	381
3 JUAN	382
JUDAS	383
APOCALIPSIS	385

TNÚHU NÍ CHÍDÓ TNÚNÍ TÈ MÀTEÚ

Nchaa cue tée ní xíndecu ndéé sanaha cùtnàhá vátá quixi-gã Xitohó Jesucristú (Lc. 3:23-38)

1 Te ñani tnáhá Xitohó Jesucristú ní cuu ndí Dàví ndíhi ndí Àbráhám, cue tée ní xíndecu ndéé sanaha vihi-gã ñuyíú-a. Te duha ndúu cuendá dava-gã cue tée ní cuu ñani tnáhá-gã ní xíndecu ndéé sanaha.

2 Ndí Àbráhám ní xóo ìª dehe ndí, te ndí-án ní xínani ndí Isàác. Te dehe ndí Isàác-án ní cuu ndí Jácób, te dehe ndí Jácób-án ní cuu ndí Jùdá, te ñu-ni ndí Jácób-án ní cuu tātá dava-gã cue ñani ndí Jùdá-án.

3 Te dehe ndí Jùdá-án ndíhi ñadihi ndí, ndí Tamár ní cuu ndí Fàrés ndíhi ndí Zará. Te dehe ndí Fàrés-án ní cuu ndí Èsróm, te dehe ndí Èsróm-án ní cuu ndí Áram.

4 Te dehe ndí Áram-án ní cuu ndí Aminádáb, te dehe ndí Aminádáb-án ní cuu ndí Nàsón, te dehe ndí Nàsón-án ní cuu ndí Sàlmón.

5 Te ñadihi ndí Sàlmón-án ní xínani-aª Ràháb, te ní xóo ìª dehe-yu ní xínani-dé Bòóz. Te ñadihi ndí Bòóz-án ní xínani-aª Rüt, te ní xóo ìª dehe-yu ní xínani-dé Obéd, te dehe ndí Obéd-án ní cuu ndí Isàí.

6 Te dehe ndí Isàí-án ní cuu ndí Dàví tée ní xíndaha ñaha xii cue ñáyíu isràél. Te dehe ndí Dàví-án ndíhi ñadihi ndí ní cuu ndí Salómón. Te díhna-gã ndí Úriás ní cándeca ndí ñadihi-án te dàtnúni ní naqueheª ñaha ndí Dàví-án.

7 Te dehe ndí Salómón ní cuu ndí Ròboám, te dehe ndí Ròboám-án ní cuu ndí Àbíás, te dehe ndí Àbíás-án ní cuu ndí Àsá.

8 Te dehe ndí Àsá-án ní cuu ndí Josáfát, te dehe ndí Josáfát-án ní cuu ndí Jòrá, te dehe ndí Jòrá-án ní cuu ndí Úziás.

9 Te dehe ndí Úziás-án ní cuu ndí Jótám, te dehe ndí Jótám-án ní cuu ndí Àcáz, te dehe ndí Àcáz-án ní cuu ndí Ezèquiás.

10 Te dehe ndí Ezèquiás-án ní cuu ndí Manásés, te dehe ndí Manásés-án ní cuu ndí Àmón, te dehe ndí Àmón-án ní cuu ndí Jòsiás.

11 Te dehe ndí Jòsiás-án ní cuu ndí Jecóniás. Te ñu-ni ndí Jòsiás-án ní cuu tātá nchaa dava-gã cue ñani ndí Jecóniás-án. Te dàvá-án ní quide yica cuè tée ñuú Babiloniá ndécá-güedé ñáyíu isràél cuáháª ñuú-güedé cuendá yacáª cundecú-yu.

12 Te sātá ní yáha ducaª ní cuu, te ndí Jecóniás ní xóo ìª dehe ndí ndíhi ñadihi ndí,

te tée-án ní xínani-dé Salàtiél. Te dehe ndí Salàtiél-án ní cuu ndí Zorobàbél.

13 Te dehe ndí Zorobàbél-án ní cuu ndí Àbíú, te dehe ndí Àbíú-án ní cuu ndí Eliàquím, te dehe ndí Eliàquím-án ní cuu ndí Àzór.

14 Te dehe ndí Àzór-án ní cuu ndí Sàdóc, te dehe ndí Sàdóc-án ní cuu ndí Àquím, te dehe ndí Àquím-án ní cuu ndí Èliú.

15 Te dehe ndí Èliú-án ní cuu ndí Eleàzár, te dehe ndí Eleàzár-án ní cuu ndí Mátán, te dehe ndí Mátán-án ní cuu ndí Jácób.

16 Te dehe ndí Jácób-án ní cuu ndí Chèé tée ní cuu yíi tá Màriá xíchi ní cuu náná Jèsús Yáa ní tendaha Dütú Ndióxi ní quixi ñuyíú-a.

17 Te sa ní cuu úxúú tnáha cue tée cùu ñani tnáhá ndí Àbráhám ndécú dàvá-án, te dàtnúni ní cacu ndí Dàví ñu-ni ñani tnáhá ndí. Te núú tnáhá méé ndí Àbráhám ndíhi ndí Dàví ní cuu úxícúmi tnáhá-güedé. Te ducaª te sa ní xínu úxícúmi-gã tucu-güedé ní cacu, te dàtnúni ní tñi ñaha cuè tée ñuú Babiloniá xii ñáyíu isràél cuendá ñaha-güedé xii-yu cuáháª ñuú-güedé cuendá yacáª cundecú-yu. Te sātá ní yáha sá dúcáª ní cuu, te ní cacu úxúu tucu cue tée ní cuu ñani tnáhá ndí Àbráhám ndíhi ndí Dàví, te dàtnúni ní cacu Xitohó Jesucristú ñuyíú-a. Te núú tnáhá méé-gã ní cuu úxícúmi tnáhá-güedé.

Ní cacu Jèsús

(Lc. 2:1-7)

18 Te duha ní cuu cùtnàhá ní cacu Xitohó Jesucristú, chí dàvá-án ní xíndecu ìª xíchi cuéchi ní xínani Màriá. Te xíchi-án sa ní cundáá tñuhu sá tnándaha-xi ndíhi ìª tée nani Cheé. Te cùmání-gã tnándaha-xi ndíhi tée-án te Espiritú Yá Ndióxi ní quide ní ngúhuª dehe-xi.

19 Te té Chèé tée cùni cándeca ñaha xii xíchi-án ní cutnúni iní-dé sá ñúhu dehe-xi. Te cùu-dé ìª tée quide ndáá, núu xiáª duuª duuª ní sani iní-dé sá vã tnándaha-gá-dé ndíhi-xi, te dícò-ni sá ña túú ní cãháª-dé chí ní cuini-dé sá vã càháª cuéhé càháª duha ñáyíu cuendá-xi.

20 Te sātá dúcáª ní sani iní-dé te ní ngáva-dé ní xídí-dé, te núú sání-dé ní sáháª ìª espíritú xínu cuéchi núú Yá Ndióxi ní xáhaª-xi xii-dé:

–Yòhó té Chèé tée cùu ñani tnáhá ndí Dàví, yúhu cachi tñuhu-i xii-n sã ña túú nã cani iní-n, tnándaha nahi-ni-n ndíhi tá Màriá cuéi ñúhu dehe-xi, chí mee Espiritú Yá Ndióxi ní quide-xi ducaª ní ngúhuª dehe-xi.

21 Te na càcu dehe-xi-án te danani-n-dé Jèsús. Te ducaª cùnani-dé, chí tée-án cada-dé cuendá sá vã cùndecu-gã cue ñani tnáhá-dé ñáyíu isràél ichi cuéhé ichi duha –duha ní xáhaª espíritú-án xii té Chèé-án núú sání-dé.

22 Te ducaª ní cuu chí ní quee ndáá-xi nàcuáa ní xáhaª Yá Ndióxi xii ìª tée ní cãháª

tnúhu-gá ndéé sanaha. Te téé-án ní chídó tnùnì-dé núú tütú-gá nàcuáa ní xáhaⁿ-gá xii-dé, te duha ní xáhaⁿ-gá:

²³ Cundecu ìⁿ xíchí cuéchí ndéé cuèé-gá.

Te òré ndécú ì-xi vátá nìhì-gá yì-xi te ngúhuⁿ déhe-xi.

Te òré ná cacú déhe-xi te danàni ñàhá-yu Emànuél.

Duha ní xáhaⁿ-gá xii téé-án ní chídó tnùnì-dé núú tütú-gá. Te tnúhu Emànuél-án quèé-xí: Yá Ndiòxí ndécú ndìhì-o. Núú xáⁿ ducaⁿ ní cuu vitna.

²⁴ Te òré ní ndiquú ìní té Chèé-án te ní quide-dé nàcuáa ní xáhaⁿ espíritú-án xii-dé chí ní tnándaha-dé ndìhì tá Màriá.

²⁵ Dico ndì díⁿ ní xíndecú-yu ndéé ní sáá nduu ní cacú déhe-xi. Te òré ní cacú déhe-xi-án te ní dánání ñàha-dé Jèsús.

2

Cue téé cuángoto ñàha xii Jèsús

¹ Te Jèsús ní cacú-gá ìⁿ ñuú nání Bèlén, te ñuú-án yíndèhu-xi distritú Júdeá. Te dàv-áⁿ cúnúu té Hèrodés yíndàha-dé ñáyíu. Te ñuú Jerusalén ní quexio cue téé véxi ndàa xio nàcuáa quène nchíanchii, cue téé túha dàcuaha cuendá nchaa sá ndéé andú.

² Te ndúcu tnúhu-güedé núú ñáyíu ñuú-án, te xáhaⁿ-güedé:

—¿Vá cündèe ìní-ndó càchí tnúhu-ndo ndéé ndécú tèe quíndaha ñàha xii ñáyíu is-ràél-án? Chí ní xini-ndí ní quene chódíní-dé ndàa xio nàcuáa quène nchíanchii, núú xáⁿ véxi-ndí chí cuení-ndí quíni-ndí-dé te chíñuhu-ndí-dé —càchí-güedé xáhaⁿ-güedé xii-yu.

³ Te òré ní níhí tèe cúnúu nani Herodés tnúhu sá ndúcú tnúhu cue téé-án ndéé ndécú tèe quíndaha ñàha xii ñáyíu is-ràél, te ñá túú tnàhí ní cùu váha ìní-dé, te díu-ni ducaⁿ ñà túú ní cùu váha ìní tnàhá nchaa ñáyíu ñuú-án.

⁴ Te ní cana-dé cue tée cùu dútú cúnúu, ndìhì cue téé dàcuaha ñàha xii ñáyíu nchaa tnúhu ní chídó tnùnì ndí Moisés, te ní xicáⁿ tnúhú-dé núú-güedé núú xini-güedé ndéé cacú Crístú tèe tendaha Yá Ndiòxí quixi ñuyúú-a.

⁵ Te ní xáhaⁿ-güedé xii-dé:

—Ìⁿ ñuú yíndèhu distritú Júdeá cacú-dé, te ñuú-án nání-xí Bèlén, chí quee ndáá-xi nàcuáa ní xáhaⁿ Yá Ndiòxí xii ìⁿ téé ní xóo cáháⁿ tnúhu-gá ndéé sanaha. Te duha ndúu tnúhu ní chídó tnùnì-dé núú tütú-gá:

⁶ Ñuú Bèlén cùú-xí ìⁿ ñuú lìhì yíndèhu distritú Júdeá, te ío-gá cúnúu-xi dacúúxí dàva-gá ñuú cúnúu yíndèhu distritú-án,

chí díu ñuú-án quèe ìⁿ téé ío cúnúu.

Te tée cúnúu-án quíndaha-dé ñáyíu cùu cuendá-í ñáyíu is-ràél.

Duha ní xáhaⁿ-gá xii téé ní xóo cáháⁿ tnúhu-gá, te ducaⁿ ní chídó tnùnì-dé núú tütú-gá —càchí-güedé xáhaⁿ-güedé xii té Hèrodés.

⁷ Te sáta dúcáⁿ te té Hèrodés dayuhu ní cana-dé cue téé ndúcu tnúhu núu ndéé ní cacú téé quíndaha ñàha xii ñáyíu is-ràél, te ní xicáⁿ tnúhú-dé núú-güedé ná nduu cùu-xi nduu díhna nuu ní xini-güedé chódíní.

⁸ Te sáta dúcáⁿ te ní xáhaⁿ-dè xii-güedé:

—Chí cuáháⁿ ñuú Bèlén te nducu tnúhu váha-ndo núu ndéé ní cacú téé ducaⁿ quíndaha ñàha xii ñáyíu is-ràél. Te òré ná nànlíhí-ndó-dé te quixi-ndo càchí tnúhu-ndo cuendá quíhíⁿ-í tnàhá-í chíñuhu-í-dé —càchí-dé xáhaⁿ-dè xii-güedé.

⁹ Te sáta dúcáⁿ ní xáhaⁿ tè Hèrodés-án te ní xica-güedé cuáháⁿ-güedé. Te chódíní ní xini-güedé ní quene ndàa xio nàcuáa quène nchíanchii-án yòdo nuu-dì núú-güedé cuáháⁿ. Te ní ngúñí chódíní-án, te núú ní ngúñí-dì-án yíndáá núú ndécú Jèsús.

¹⁰ Te òré ní xini cue téé-án ní ngúñí chódíní-án núú yíndáá ndécú-gá, te ní cudíí víhí ìní-güedé.

¹¹ Te ducaⁿ te ní quexio-güedé ndéé núú cáá vèhe ndecu Jèsús. Te òré cuánguihu-güedé xii vèhe te ní xini-güedé Jèsús ndécú-gá ndìhì náná-gá Màriá. Te ní ngúñí xítí-güedé, te ní ngúña-güedé ní cachí-güedé sá ío cànuu cuu Jèsús. Te dátñùní ní nacaáⁿ-güedé cájá xínehe-güedé, te ní tava-güedé díhúⁿ cuááⁿ, ndìhì dúsa sá ío váha sàháⁿ tnámí nàni insiensú, ndìhì yúcu sá nání mírra ní taxi ndecu-güedé núú Jèsús cuendá cuu-xi ìⁿ táhú sá cùu-xí-gá.

¹² Te Yá Ndiòxí ní cáháⁿ-gá núú sàní-güedé, te xáhaⁿ-gá xii-güedé sá vá náyàha-gá-güedé cáháⁿ ndìhì-güedé té Hèrodés. Núú xáⁿ cue téé-án cuànúhú-güedé íngá ichi, te ñá túú-gá ní náyàha-güedé núú ndécú té Hèrodés.

Cuáháⁿ-yu ndìhì Jèsús nàcióⁿ Ègíptú

¹³ Te sáta ní yàha cuànúhú cue téé ní sángoto ñàha xii Jèsús, te ní quexio ìⁿ espíritú xínú cuèchi núú Yá Ndiòxí núú sàní té Chèé, te xáhaⁿ-xí xii-dé:

—Véxi-í càchí tnúhu-í xii-n sá ndàcòo-n, te ndee-n ñuú-a ndìhì Jèsús, ndìhì náná-gá cunu-ndo quíhíⁿ-ndó nàcióⁿ Ègíptú, chí té Hèrodés tendaha-dé cue téé quixi nanducu ñàha xii Jèsús cuendá cahni ñàha-güedé. Te yàcáⁿ cundecu-ndo ndéé cachí tnúhu-í xii-n ndúu ndixi-ndo —cachí espíritú-án xáhaⁿ-xii xii té Chèé núú sàní-dé.

¹⁴ Te té Chèé-án ní ndacòo-dé, te niú ní xica-dé ndìhì tá Màriá ndécá-yu Jèsús cuáháⁿ nàcióⁿ Ègíptú.

¹⁵ Te nàcióⁿ Ègíptú-án ndécú-yu ní xihí té Hèrodés. Te ducaⁿ ní cuu chí ní quee ndáá-xi nàcuáa ní cachí ìⁿ téé ní xóo cáháⁿ tnúhu

Yá Ndióxi ndéé sanaha ní quide-dé núú-gã ní cáhá-dé yuhu-gã, te duha ní xáha-gã ní cáhá-dé: “Nacióⁿ Ègíptú ndécú Dêhe-í ní cùu, te ní xáhaⁿ-í xii-dé sá ndéé-dé ñuú-áⁿ vâ cùndècu-gã-dé”, duha ní xáha-gã xii téé ní cáháⁿ tnúhu-gã ní quide-dé núú-gã.

Té Hèrodés ní táúchíúⁿ-dè cahni-güedé cue landú

¹⁶ Te cue téé ní sángoto ñaha xii Jesús ní dándàhú-güedé té Hèrodés, chí ñá túú ní nàyáha-güedé cùñaha-güedé sá ní naníhí-güedé Jesús. Te sáta ní cutnùní iní té Hèrodés sá ní dándàhú ñáhá-güedé xii-dé te ní cudééⁿ víhí-dé, te ní tendaha-dé cue téé cuaháⁿ ñuú Belén, ndihí nchaa dava-gã ñuú cáá yàtni xíáⁿ cuendá cahni-güedé mee-ni cuè landú téé. Te ndéé cue landú íchí ní cacu, ndihí ndéé cue landú sa ní nútahá úú cuiá-xi nchaa-güexi cahni-güedé ní xáhaⁿ-dè. Te ducaⁿ ní quide-dé chí ní quide cuendá-dé nàcuáa ndùu tnúhu ní xáhaⁿ cuè téé ní sángoto ñaha xii Jesús nduu ní xiní-güedé chódíní, núu xíáⁿ ducaⁿ ní táúchíúⁿ-dè ní quide cue téé-áⁿ.

¹⁷ Te ducaⁿ ní cuu chí ní quee ndáá-xi nàcuáa ní cachí ndí Jeremiás téé ní xóo cáháⁿ tnúhu Yá Ndióxi ndéé sanaha, te duha ní cachí ndí:

¹⁸ Ní tecú ndáhí víhí ñáyiu ñuú Rámá sá ndìhú iní-yu,

te ñáyiu xindáhyú-áⁿ cùú-yu ñaní tnáhá tá Ràquél, te ndàhyú-yu cuendá sá ní xihí déhe-yu.

Te ñáyiu-áⁿ ñà túú ní cuini-yu dàñá-yu sá ndìhú iní-yu cuendá sá ní xihí déhe-yu.

Duha ní cachí ndí Jeremiás.

¹⁹ Te sáta ní xihí té Hèrodés te ní sáháⁿ tucu espíritú xínú cuèchi núú Yá Ndióxi núú sàní té Chèé òré ndécú-dé nàcióⁿ Ègíptú, te ní xáhaⁿ-xi xii-dé:

²⁰ –Véxi tucu-í càchí tnúhu-í xii-n sá ndácóo-n, te nùhú-n ndihí Jesús ndihí náná-gã ñuú cue ñaní tnáhá-n ñáyiu isràél cundecu-ndo, chí sa ní xihí cue téé cuini cahni ñaha xii Jesús ní cùu –cachí espíritú-áⁿ xáhaⁿ-xi xii té Chèé núú sàní-dé.

²¹ Te té Chèé-áⁿ ní ndacóo-dé, te ní ndee-dé ndihí Jesús ndihí náná-gã cuánuhú-yu ñuú cue ñáyiu isràél ñáyiu cùu ñaní tnáhá-yu.

²² Te té Chèé ní níhí-dé tnúhu sá té Arquèlau ní nucúnutnì-dé núú tātá-dé té Hèrodés distritú Júdeá yíndàha-dé ñáyiu. Te ní yùhú té Chèé-áⁿ, te ñá túú ní cuini-dé quihíⁿ-dé cundecu-dé distritú-áⁿ. Te Yá Ndióxi ní cáháⁿ-gã núú sàní-dé, te ní xáhaⁿ-gã xii-dé sá quihíⁿ-dé distritú Galilea, núu xíáⁿ yácaⁿ cuaháⁿ-yu.

²³ Te òré ní quexió-yu distritú Galilea, te ní sáháⁿ-yu ñⁿ ñuú nání Nàzarét ní xíndecú-yu. Te ducaⁿ ní cuu chí ní quee ndáá-xi nàcuáa ní cachí cue téé ní xóo cáháⁿ tnúhu Yá Ndióxi ndéé sanaha sá Jesús cuu-gã téé ñuú Nazarét.

3

Té Juáá téé dàcuandute ñaha xii ñáyiu càháⁿ-dé tnúhu Yá Ndióxi xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ní cuu, te téé nani Juáá téé dacuandute ñaha xii ñáyiu ní quexió-yu distritú Júdeá càháⁿ-dé tnúhu Yá Ndióxi núú ñáyiu xití yucu-áⁿ.

² Te xáhaⁿ-dè xii-yu:

–Chí dándixi túu iní sá ñà túú quide váha-ndo ndècu-ndo, te daña-ndo nchàa ichi cuehé ichi duha, chí sa ní cuyatni nduu ndíhu ndaha ñaha Yá Ndióxi xii-ndo –càchí-dé xáhaⁿ-dè xii-yu.

³ Te diu cuendá té Juáá-áⁿ ní chídó tnùní ndí Chàíá téé ní xóo cáháⁿ tnúhu Yá Ndióxi ndéé sanaha, te duha ndùu tnúhu ní chídó tnùní ndí cuendá-dé:

Técú càháⁿ níhí ñⁿ téé yìhí xití yucu, te càchí-dé:

“Chí dàñá nchàa ichi cuehé ichi duha ndècu-ndo, te tnii-ndo ichi váha, Te ducaⁿ càda-ndo cuendá cundecu túha-ndo chí véxi Yaá ío cùnuu”, duha quesaha téé-áⁿ.

Duha ndùu tnúhu ní chídó tnùní ndí Chàíá-áⁿ cuendá té Juáá.

⁴ Te té Juáá-áⁿ ní xóo cuihnu-dé dóo idi càméyu, te ñⁿ ñii ní cuu pàñú xití-dé, te ní xóo caxi-dé tíca làngóstá ndihí ndudí ñúñú cuéché.

⁵ Te ñáyiu ñuú Jerusalén, ndihí ñáyiu nchaa ñuú yíndèhu distritú Júdeá, ndihí ñáyiu nchaa ñuú cáá yàtni yúte Jórdán ní sáháⁿ-yu ní xíndedóho-yu nàcuáa ní cáháⁿ té Juáá.

⁶ Te ní nguíta-yu ní náhmá-yu nchaa cuéchi-yu núu Yá Ndióxi. Te òré ducaⁿ ní náhmá-yu te ní dacuandute ñaha té Juáá xii-yu yúte Jórdán.

⁷ Te vâi cue téé cùu fariséu ndihí cue téé cùu saducéu cuaháⁿ-güedé núú ndécú té Juáá cuini-güedé dacuandute ñaha-dé xii-güedé. Te òré ní quexió-güedé núú ndécú-dé, te ní xáhaⁿ-dè xii-güedé:

–¡Nchaa nchòhò cùú-ndó dàtná ñⁿ cóó dèéⁿ chí ío cuihna iní-ndó! ¿Te nása ní cuu núu tnáhá nchòhò ndúcú-ndó nàcuáa cada-ndo càcu nihnu-ndo núu tnùndòho cahnu víhí ta cuyatni ñaha xii-ndo véxi-í?

⁸ Te chí cádá váha vitna cundecu-ndo cuendá ducaⁿ cùtnuní sá ní dàñá-ndó nchàa ichi cuehé ichi duha ndècu-ndo.

⁹ Te vâ càchí-ndó sã ío càhnu cuu-ndo cuendá sá cùú-ndó ñaní tnáhá ndí Abrahám.

Chi cuèi ndéé yúú te ndacu Yá Ndiöxí ndada-gá ñáyiú te cuú-yu ñaní tnàhá ndíi Àbraháam.

¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávidí-xi-áⁿ, chi nchaa yutnu-án tēhndé-xi te cuáŋgee-xi núú ñùhú càyú-xi. Te duha sátnàhá-xi ndoho nchaa ñáyiú ñà túú quide váha-án chi nchaa ñáyiú ñà túú quide váha cuú-yu dátán nchaa yutnu sá ñà túú càváha sávidí-xi.

¹¹ Te na càchí tnúhu ndáá-í xii-ndo sá yùhú dácuañdute-í mee-ni ñáyiú ní dáñá ncháa ichi cuehé ichi duha. Dico nchicúⁿ tucu ingá téé véxi, te téé-án taxi-dé Espiritú Yá Ndiöxí cundecu ndíhi-ndo. Te cuú-xi datná ìⁿ ñùhú, chi ndada ndoo ndada nine-xi iní-ndó. Te téé-án ío-gá cúnúu-dé dácúúxi yùhú, chi yùhú cuú-í ìⁿ téé duuⁿ duuⁿ ñà túú tàú cuita nehe ni chàú-dé dico quide-í chiúⁿ-dé.

¹² Te téé-án sa véxi túha-dé sá cáda ðìⁿ ñaha-dé xii-o dátán quidé ñáyiú ndada ndoo triú, chi ñáyiú-án sa nèhe túha-ná-yu yaxíⁿ-yu òré náñáni cuendá ndada ndoo-yu. Te òré ndadá ndoo-yu triú-án te dàquee ðìⁿ-yu mihi-xi, te tàxúha-yu mee-ná triú-án te sáhmí-yu mihi-xi-án. Te dátán quidé-yu mihi triú-án ducaⁿ sátnahá-xi cada ñaha téé-án xii nchaa ñáyiú ñà túú quide váha, chi daquihíⁿ ñáhá-dé xii-yu núú ñùhú núú càyú, te ñùhú-án ñà túú tnàhí ndàhvá —càchí-dé xáhaⁿ-dè xii-güedé.

Sándute Jesús

(Mr. 1:9-11; Lc. 3:21-22)

¹³ Te Jesús ní quee-gá distritú Galiléa cuáháⁿ-gá yúte Jórdán núú ndécú tè Juáá cuendá dácuañdute ñaha-dé xii-gá.

¹⁴ Te òré ní quexío Jesús núú ndécú tè Juáá, te ñà cuiní-dé dácuañdute ñaha-dé xii-gá ní cuú, te ní xáhaⁿ-dè xii-gá:

—Yùhú tàú-í sá dácuañdute ñaha-n xii-í, te ñà díú dà yùhú dácuañdute ñaha-í xii-n —càchí-dé xáhaⁿ-dè xii-gá.

¹⁵ Te Jesús ní xáhaⁿ-gá xii-dé:

—Queheⁿ daña, chi dacuití xini ñuhu-xi ducaⁿ cada-o nacuaá cundáá-ó núú Yá Ndiöxí —càchí-gá xáhaⁿ-gá xii-dé.

Te tè Juáá-án ní sáháⁿ uuⁿ-dé tnúhu ní xáhaⁿ Jesús xii-dé.

¹⁶ Te ní dácuañdute-dé Jesús. Te òré ní nene-gá xití ndute te ní xini-gá nchi andiú, te ní quee Espiritú Yá Ndiöxí véxi cuuⁿ-xi ngúndecu ndíhi ñaha-xi xii-gá, te dátán cáá ìⁿ lómá cáá Espiritú-án véxi cuuⁿ-xi.

¹⁷ Te òré-án ní tecu ní cáháⁿ Yá Ndiöxí ndéé andiú, te xáhaⁿ-gá xii Jesús:

—Yòhó cuú-n Déhe-í téé ío cuú iní-í te ío cùdí iní ñáhá-í xii-n —càchí-gá xáhaⁿ-gá xii Jesús.

4

Sácuíhná quidé yica-xi cada Jesús sá ñà túú tàú-gá cada-gá ní cuú

(Mr. 1:12-13; Lc. 4:1-13)

¹ Te Espiritú Yá Ndiöxí ndécá-xi Jèsús cuáháⁿ ìⁿ xití yucu cuendá yàcáⁿ cundecu tnaa-gá, te yàcáⁿ quexío sácuíhná coto ndéé ñáhá-xi xii-gá te núú ndisa sá vā cáda-gá ìⁿ sá ñà túú tàú-gá cada-gá.

² Te Jèsús ñà ní xèxi-gá údico nduu údico niú, te ducaⁿ te dátñuni ní xicáⁿ iní-gá caxi-gá.

³ Te sáta dúcáⁿ te ní quexío sácuíhná quidé yica-xi cada Jesús ìⁿ sá ñà túú tàú-gá cada-gá, te xáhaⁿ-xi xii-gá:

—Te núú ndisa sá cuú-n Déhe Yá Ndiöxí te cúñaha xii yúú-a na nduu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tútú Yá Ndiöxí càchí-xi: “Ñà díú mēe-ni paá candeca-xi iní ñáyiú ñuyiú, chi tnàhá nchaa tnúhu càháⁿ Yá Ndiöxí candeca-xi iní-yu”, duha càchí-xi núú tútú-gá —càchí-gá xáhaⁿ-gá xii-xi.

⁵ Te dátñuni sácuíhná-án ndécá ñaha-xi xii-gá cuáháⁿ ñuu Jerusalén, te yàcáⁿ ní xáhaⁿ-xi xii-gá cuasaá-gá díquí véñùhu càhnu sá ío cúnúu núú ñáyiú israhél,

⁶ te dátñuni ní xáhaⁿ túcu-xi xii-gá:

—Te núú ndisa cuú-n Déhe Yá Ndiöxí te cuandèe ndava núú ñùhú cuendá quee ndáá-xi nácuaá càháⁿ-xi núú tútú-gá núú càchí-xi: “Yá Ndiöxí tendaha-gá cue espíritú xínú cuèhi núú-gá quixi-xi cuendá coto ñaha-xi xii-n, te núú ndáhá-xi càundodo-n cuendá sá vā dancuehé yúú sáháⁿ”, duha càchí-xi núú tútú-gá —càchí sácuíhná-án xáhaⁿ-xi xii Jesús.

⁷ Te Jesús ní xáhaⁿ-gá xii-xi:

—Te càchí tucu-xi núú tútú Yá Ndiöxí: “Vā cání iní-n còto ndéé-n Dütú Ndiöxí Yáá cuú Ndiöxí-n cuendá-ni sá cuiní-n sá dácácu nihnu ñaha-gá xii-n ìⁿ sá sání iní-n càda-n”, duha càchí-xi núú tútú-gá —càchí-gá xáhaⁿ-gá xii-xi.

⁸ Te sácuíhná ndécá túcu-xi Jesús cuáháⁿ ìⁿ núú tìndúú dúcú, te uuⁿ-ni ní dánèhé núú ñáhá-xi xii-gá nchaandi túhú nacióⁿ cáá ñuyiú, ndíhi nchaa sá váha ío ìⁿ ìⁿ nacióⁿ-án.

⁹ Te ní xáhaⁿ-xi xii-gá:

—Te núú yòhó nguñí xití-n núú-í chiñuhu ñaha-n xii-í ñà, te taxi cuendá-í nchaa sá ní dánèhé ñáhá-í-a cuu cuendá-n —càchí-xi xáhaⁿ-xi xii-gá.

¹⁰ Te Jesús ní xáhaⁿ-gá xii-xi:

—Xocuiñí yòhó sácuíhná núú ndécú-í-a, chi vá cuú càda-í nácuaá càchí-n, chi núú tútú Yá Ndiöxí càchí-xi: “Chiñuhu-ndo Dütú Ndiöxí Yáá cuú Ndiöxí-ndó, te díu-ni-gá cada-ndo nchaa nacuaá càháⁿ-gá”, duha

càchí-xi núú tütú-gá —càchí-gá xâhaⁿ-gã xii-xi.

¹¹ Te dàtnùni sácúíhna ní dàñá-xi Jèsús ní xica-xi cuáháⁿ-xi. Te sáta dúcáⁿ te ní quexio cue espíritú xínú cuèchi núú Yá Ndiòxi ní xinu cuechi-xi núú Jèsús.

Distritú Galiléa ní chisaha Jèsús chiùⁿ ní táhú Tátá-gã Dútú Ndiòxi cada-gã

(Mr. 1:14-15; Lc. 4:14-15)

¹² Te òré ní níhí Jèsús tnúhu sá ní ngava té Juàá téè dàcuandute ñaha xii ñáiyu veacaá, te ní xica-gá cuáháⁿ-gã distritú Galiléa.

¹³ Te ní ñá túú ní xíndecu-gá ñuú Nazarét, chi ní yáha-gá cuáháⁿ-gã ndéé ñuú Capernaúm yácáⁿ ní xíndecu-gá, te ñuú-áⁿ cáá yàtni yuhu lagúná, te yatni xiáⁿ cáá ñuhu nani Zabolón, ndihi ñuhu nani Neftalí.

¹⁴ Te ducaⁿ ní cuu chi ní quee ndáá-xi nàcuáa ní chídó tnùnì ndíi Cháíá téé ní xóo cáháⁿ tnúhu Yá Ndiòxi ndéé sanaha núú tütú-gá núú càchí-xi:

¹⁵ Ñuhu nani Zabolón, ndihi ñuhu nani Neftalí, ñuhu-án yíndèhu-xi distritú Galiléa,

te xiáⁿ xíndecu cue ñáiyu ñá túú cùu ñáiyu isràél,

te càa-xi yatni yuhu lagúná te ndaa ingá xio yúte Jòrdán cùú-xi.

¹⁶ Te cue ñáiyu-án ndécú-yu ñⁿ núú néé chi ndécú-yu ichi cuèhé ichi duha,

te sáá nduu te cada iní-ndó sá ñáiyu-ánⁿ queé-yu núú ditó chi vá cùndècu-gá-yu ichi cuèhé ichi duha.

Te diu-ni ñáiyu-án cùú-yu ñáiyu ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tnùnì ndíi núú tütú-gá.

¹⁷ Te dàvá-án ní ngúita Jèsús ní dánèhé-gã ñáiyu, te ní xáhaⁿ-gã xii-yu:

—Chí dándixi túu ini sá ñá túú quide váha-ndo ndècu-ndo te dañá-ndo nchàa ichi cuèhé ichi duha, chi sa ní cuyatni nduu ndíhu ndaha ñaha Yá Ndiòxi xii-ndo —càchí-gá xâhaⁿ-gã xii-yu.

Jèsús càháⁿ-gã cùmi tnàhá cue téé tníi chácá

(Mr. 1:16-20; Lc. 5:1-11)

¹⁸ Te Jèsús ñúhú-gã ichi cuáháⁿ-gã tá yáha-gá yuhu làgúná Galiléa, te ní xiní-gá úú tnàhá cue téé xídáquèe-güedé ñunu-güedé xití ndute tníi-güedé chácá, chi quiti tnàhí-án cùú chiùⁿ-güedé tníi-güedé-di. Te ñⁿ-dé nání-dé Xímú, àdi Pelú chi úú diu-dé, te ñani-dé cùú ingá téé ndihi-dé te téé-án nání-dé Ndríxi.

¹⁹ Te Jèsús ní xáhaⁿ-gã xii-güedé:

—Chí dàñá chiùⁿ quide-ndo-án te quixi-ndo chitnahá ñahá-ndó xii-í, te taxi-í ingá núú chiùⁿ cada-ndo chí quíhíⁿ-ndó dàcáháⁿ-ndó ñáiyu cuèndá tuha ñahá-yu xii-í —càchí-gá xâhaⁿ-gã xii-güedé.

²⁰ Te òré-ni-án ní dàñá cuè téé-án ñunu-güedé, te ní tuha-güedé Jèsús.

²¹ Te ní xica tucu Jèsús cuáháⁿ-gã luha-gá, te ní xiní tucu-gá úú-gá tnàhá cue téé tníi chácá. Te ñⁿ téé-án nání-dé Jàcobó, te ñani-dé cùú ingá téé ndihi-dé te téé-án nání-dé Juàá, te ndi ndúú-güedé cùú-güedé déhe té Zebèdeú. Te xixínucóo-güedé ndihi tátá-güedé xití bàrcú xínatícu-güedé ñunu-güedé, te Jèsús ní cana ñaha-gã xii-güedé.

²² Te òré-ni-án ní dándóo-güedé bàrcú-güedé, ndihi tátá-güedé, te ní tuha ñaha-güedé xii-gá.

Jèsús dánèhé-gã cuèhé vñí ñáiyu

(Lc. 6:17-19)

²³ Te Jèsús tá xica ndodo-gã nihí distritú Galiléa cuáháⁿ tá dánèhé-gã ñáiyu tnúhu váha tnúhu sá sánú ichi ñaha xii-yu nàcuáa ndíhu ndaha ñaha Yá Ndiòxi xii-yu. Te ndi tnàhá ñⁿ ñⁿ ñuú sáa-gá te ducaⁿ cuànguihu-gá xití veñúhu dánèhé-gã ñáiyu tnúhu-án. Te ndi dííⁿ ndí dííⁿ núú cuèhé tnàhá ñⁿ ñⁿ ñáiyu dico nchaa-ní-yu ta quide tátna-gã cuáháⁿ.

²⁴ Te ndéé nchaa ñáiyu yíndèhu distritú Siríá ní nihí-yu tnúhu nchaa nàcuáa quide Jèsús. Te ní queé-yu ñuú-yu te ndécá-yu nchaa ñáiyu tnàhá ndi dííⁿ núú cuèhé cuáháⁿ núú ndécú Jèsús. Te cuèí ñáiyu xiyíhí, ndihi ñáiyu ñá túú-gã càndá nihnu, ndihi ñáiyu yíhí ñaha espíritú cùndíhi yucu ñávàha ndécá-yu cuáháⁿ núú-gã, te nchaa-yu ní quide tátna ñaha-gã xii-yu.

²⁵ Te io vài ñáiyu ní chinchícúⁿ ñahá xii Jèsús, chi ní chinchícúⁿ ñahá ñáiyu distritú Galiléa, ndihi ñáiyu nchaa ñuú xindáa Dècápolis, ndihi ñáiyu ñuú Jerusàlén, ndihi cue ñáiyu nchaa ñuú yíndèhu distritú Jùdeá, ndihi ñáiyu xíndecu yatni yúte Jòrdán ndaa xio quene nchícanchii.

5

Jèsús núcõo-gã ñⁿ núú tìndúú dánèhé-gã ñáiyu

¹ Te sáta ní xiní Jèsús sá cuèhé vñí ñáiyu nchícúⁿ ñahá xii-gá, te ní xica-gã cuásaa-gã ñⁿ núú tìndúú te xiáⁿ ní ngóo-gá, te cue téé xica cuu ndihi-gá ní nadúcúⁿ ndéé ñahá-güedé xii-gá.

² Te ní ngúita-gã dánèhé ñahá-gã xii-güedé ndihi cue ñáiyu-án, te xâhaⁿ-gã:

Cuèndá ñáiyu io váha táhú-xi

(Lc. 6:20-23)

³ —Váha táhú nchaa ñáiyu cùtnuni iní-xi sá ño-gá cùmãñi-yu cudíu-yu núú Yá Ndiòxi, chí ñáiyu-án nduu táhú-yu ndíhu ndaha ñaha-gã xii-yu.

4 Váha táhú nchaa ñáiyu ndàhyú sá ndìhú iní-yu, chí Yá Ndióxi cuañaha-gá tnúhu ndee iní cundecu ndihí-yu.

5 Váha táhú nchaa ñáiyu ndàhú iní-xi, chí ñáiyu-áⁿ nduu táhú-yu cundecú-yu ìⁿ xichi núu cuañaha Yá Ndióxi xii-yu.

6 Váha táhú nchaa ñáiyu ò cuiní cada nchaa nàcuáa càháⁿ Yá Ndióxi, chí ñáiyu-áⁿ ò nduu vétú iní-yu.

7 Váha táhú nchaa ñáiyu cundahú iní tnàha ñáiyu-xi, chí ñáiyu-áⁿ ò diu-ni ducaⁿ càda ñaha Yá Ndióxi xii-yu cundahú iní ñáhá-gá.

8 Váha táhú nchaa ñáiyu ní nduu ndoo ní nduu nine iní-xi, chí cue ñáiyu-áⁿ nduu táhú-yu cundecú-yu ndihí Yá Ndióxi.

9 Váha táhú nchaa ñáiyu dóho tnàha ñáiyu-xi nàcuáa cundecu ndihí váha tnàhá-yu, chí cùnnumí sá ñáiyu-áⁿ cuú-yu déhe Yá Ndióxi.

10 Váha táhú nchaa ñáiyu ò ndòho ndecu ñuyú-a sá cuèndá sá quidé-yu nàcuáa càháⁿ Yá Ndióxi, chí ñáiyu-áⁿ nduu táhú-yu ndìhu ndaha ñaha-gá xii-yu.

11 Te cùu-ndo ñáiyu ò váha táhú-xi te núu na cùcuèhé ñáhá ñáiyu, àdi cada úhú ñáhá-yu xii-ndo, àdi dacia díquí ñáhá-yu nándi cuéchi neñúú xii-ndo sá cuèndá-í.

12 Te òré ducaⁿ na càda ñahá-yu xii-ndo te cudí víhí-ní iní-ndó cundecu-ndo, chí ò váha càa sá ndécú àndiu nduu táhú-ndó cundecu ndihí-ndo nduu na saá-ndó yacáⁿ cundecu-ndo, chí diu-ni ducaⁿ ní xóo cada ñaha cuè ñaní tnáhá-yu xii cue te ní xóo càháⁿ tnúhu Yá Ndióxi ní xíndecu ndéé sanaha.

*Cuèndá ñí ndihí cuèndá ñuhú
(Mr. 9:50; Lc. 14:34-35)*

13 Te nchòhó cada iní-ndó sá cuú-ndó dàtná ñí cuèndá ñuyú-a. Te ñí chí nándihí-xi dico núu na ndúu víxiⁿ-xi, te ñá túú-gá nándihí-xi chí dāngoyó-ná-ó, te yàha ñáiyu xèihnú-yu. Te ducaⁿ sátnahá-xi cùu nchòhó chí cùu-ndo dàtná ñí váha te núu na càda váha-ndo, te núu vá càdá váha-ndo te quee tíhú-ndó.

14 Te nchòhó cada iní-ndó sá cuú-ndó dàtná ìⁿ sá dáyehé ndécú ñuyú-a, chí sànu ichi-ndo ñáiyu ichi váha. Te nchòhó xini-ndó sá núu ìⁿ ñúu cáá ìⁿ núú tndúú te vá cuú càchí-ó sá nguiváha-xi.

15 Te ñá túú xini-ó ìⁿ ñáiyu teñuhú-yu ìⁿ linterná te chiváha-yu xití ìⁿ cajá, chí tàxi ndecu-yu núu ñimu cuèndá cutnúní núú nchaa ñáiyu ndécú vehe.

16 Te ducaⁿ càda nchòhó cada váha-ndo dàtná quidé ìⁿ ñuhú dayèhe-xi núú ñáiyu, te ducaⁿ quini ñáiyu nàcuáa quide-ndo ndecu-ndo, te tnàhá-yu cachí-yu sá ò càhu cuu Dútú Ndióxi Yáá cúú Tátá-ndó

ndécú àndiu chí quini-yu sá quidé váha-ndo ndecu-ndo.

Cuèndá tnúhu ní chidó tnùni ndíi Moisés

17 Te vá cáni iní-ndó sá yúhú véxi-í xocàni-í tnúhu ní chidó tnùni ndíi Moisés, te ní vá cáni iní-ndó sá véxi-í xocàni-í tnúhu ní chidó tnùni cue téé ní xóo càháⁿ tnúhu Yá Ndióxi ndéé sanaha, chí yúhú véxi-í sá càdá-í nàcuáa càháⁿ nchaa tnúhu-áⁿ.

18 Te na càchí tnúhu ndáá-í xii-ndo sá tnúhu ní chidó tnùni ndíi Moisés ò ndáá càháⁿ-xi, chí dacuití cùu nchaa nàcuáa càháⁿ-xi. Te yáchí-gá naa àndiu ndìhi ñuyú dàcúúxi sá quée càva ìⁿ tnúhu-áⁿ.

19 Núu xiáⁿ nchaa ñáiyu na càchí sá dáva tnúhu ní chidó tnùni ndíi Moisés ñá túú xini ñuhu-xi chí ñá túú cùnnu-xi, te ñáiyu-áⁿ diu-ni ducaⁿ dānehé-yu nchaa dava-gá tnàha ñáiyú-yu, te sá dúcáⁿ quidé-yu te vá cùnnu víhí-yu núú ndécú Yá Ndióxi táxi tnùni-gá, chí cuú-yu dàtná ìⁿ ñáiyu nchicúⁿ cuí-ñá. Dico nchaa ñáiyu nchicúⁿ nihnu quide nchaa nàcuáa càháⁿ nchaa tnúhu-áⁿ, te diu-ni ducaⁿ dānehé-yu nchaa dava-gá tnàha ñáiyú-yu, te ñáiyu-áⁿ ò cùnnu-yu núú ndécú Yá Ndióxi táxi tnùni-gá.

20 Te na càchí tnúhu-í xii-ndo sá ò xini ñuhu-xi cada-ndo nchaa nàcuáa càháⁿ Yá Ndióxi, te vá càdá-ndó dàtná xiquide cue téé dānehé ñáhá xii ñáiyu nchaa tnúhu ní chidó tnùni ndíi Moisés, ndihí dàtná xiquide cue téé cùu farisèú, chí núu na càda-ndo dàtná xiquide cue téé-áⁿ ñá, te vá ndúú táhú-ndó ndìhu ndaha ñaha Yá Ndióxi xii-ndo.

*Jesús càháⁿ-gá cuèndá ñáiyu cùdééⁿ
(Lc. 12:57-59)*

21 Te nchòhó sa xini-ndó sá ncháá ñáiyu ní cuu ñaní tnáhá-ndó ní xíndecu ndéé sanaha ní ñihí-yu tnúhu sá vá cuú càhni-yu tnàha ñáiyú-yu, chí núu ducaⁿ na càdá-yu te nacháhu-yu cuéchi-yu.

22 Dico vitna na càchí tnúhu-í xii-ndo sá núu ndédani càa-ndo na cudééⁿ-ndó núú tnàha ñáiyu-ndo, te nacháhu-ndo sá dúcáⁿ quide-ndo, àdi núu na cùcuèhé-ndó-yu te núú chítú núú tàcá cundáá cuéchi-ndo te núu ducaⁿ na càda-ndo, àdi núu ná cùu-ndo tnàha ñáiyu-ndo ìⁿ tnúhu véé víhi, te cu-cuéchi víhi xii-ndo chí quíhíⁿ-ndó núú ùhú núú ndàhú.

23 Te xiáⁿ núu nchòhó òré ndécú ndihí-ndo ìⁿ sá cuiní-ndó cuáha-ndo Yá Ndióxi nduu táhú-gá, te òré cuáháⁿ-ndó cuañaha-ndo xi-gá, te òré ní quexio-ndo núú dúcáⁿ cuañaha-ndo xii-gá sá ndúú táhú-gá, te ní ndacu iní-ndó sá ndécú ñáiyu ñá túú cùu váha iní ñáhá xii-ndo cuèndá ìⁿ sá ní cumání núú tnáhá-ndó.

24 Te dāndóo-ndo sá dúcáⁿ nèhe-ndo cuáháⁿ nduu táhú Yá Ndióxi, te díhna-gá

quihíⁿ-ndó nàcáháⁿ cahnú íní tnáhá-ndó ndíhi ñáyiú ñá túú cùu váha íní ñáhá xii-ndo-áⁿ, te dàtnùní ducaⁿ te quihíⁿ-ndó cuáha-ndo Yá Ndióxi sá ndúú tãhú-gã.

²⁵ Te núu íó ìⁿ-ndo ní sáháⁿ ñáyiú núú tée cùchiuⁿ ní sacáⁿ cuéchi-yu cuèndá-ndó cuèndá ìⁿ sá ní quide-ndo, te òré ní naníhi tnáhá-ndó ndíhi-yu cuáháⁿ-ndó núú tée cùchiuⁿ-áⁿ, te nacáháⁿ cahnú íní tnáhá-ndó ndíhi-yu cuèndá sá vá cuáha cuèndá ñáhá-gã-yu xii-ndo núú tée cùchiuⁿ, chí núu ducaⁿ na càdã-yu te tée cùchiuⁿ-áⁿ cuáha cuèndá ñáhá-dé xii-ndo núú cuè tée cùu poleciá, te cue tée-áⁿ chihi ñaha-güedé vecaá xii-ndo.

²⁶ Te na càchi tnáhu ndáá-í xii-ndo sã vá càcu-ndo te núu na ngáva-ndo vecaá ndéé nacháhu-ndo nchãa sã tàu-ndó.

Cuèndá cue ñáyiú ñá túú quide váha

²⁷ Te nchòhó sa xini-ndó nãcuáa ndùu tnáhu ní cáháⁿ cue tée ní xindecu ndéé sanaha, te duha ní cachí-güedé: “Nchaa cue tée vá cúú cãháⁿ ndíhi-güedé ñadíhi te núu ñá díú ñadíhi-güedé cúú-yu, te ñu-ni ducaⁿ tucu nchaa cue ñáyiú ñíhi vá cúú cãháⁿ ndíhi-yu tée te núu ñá díú yí-yu cùu-güedé”, duha ní cachí-güedé.

²⁸ Dico yúhú càchi tnáhu-í xii-ndo sã ndèda-ni càa cue tée na cundehe ìⁿ ñadíhi te núu na càni íní-güedé cundecu díí íní-güedé ndíhi-yu te cada íní-ndó sã dàtná sá sã ní cáháⁿ ndíhi ñaha-güedé xii-yu sá dúcáⁿ ní sani íní-güedé.

²⁹ Te núu ìⁿ xio tinùu-ndo quide-xi quide-ndo nãndi sã cuèhé sã dúhá te tava-ndo, chí váha-gá sã ná cuíta te ñá díú ñíhi ní ndúú yiqui cuñú-ndó quihíⁿ-xi núú ùhú núu ndàhú.

³⁰ Te núu ìⁿ xio ndaha-ndo quide-xi quide-ndo nãndi sã cuèhé sã dúhá te quehndé-ndó, chí váha-gá sã ná cuíta ìⁿ xio ndaha-ndo te ñá díú sã ñíhi ní ndúú yiqui cuñú-ndó quihíⁿ-xi núú ùhú núu ndàhú.

Jesús càháⁿ-gá cuèndá cue ñáyiú dàña tnaha

(Mt. 19:9; Mr. 10:11-12; Lc. 16:18)

³¹ Te nchòhó sa ñaha tucu-ndo nacuáa ní cáháⁿ tucu cue tée ní xindecu ndéé sanaha, te duha ní cachí-güedé: “Te núu ìⁿ tée na dàña tnaha-dé ndíhi ñadíhi-dé, te xini ñuhu-xi cadúha-dé ìⁿ tutú cuáñaha-dé núú cãháⁿ-xi sã ní dàña ñaha-dé”, duha ní cachí-güedé.

³² Dico yúhú càchi tnáhu-í xii-ndo sã cúú dàña ìⁿ tée ñadíhi-dé, te núu cutnuni ndáa íní-dé sã cáháⁿ ndíhi-aⁿ ingá tée. Dico núu ñá túú ducaⁿ quide-aⁿ te ñá túú ndùu váha-xi dàña ñaha-dé. Te núu ñá túú ducaⁿ quide ñadíhi-dé, te cada íní-ó sã méé-dé

ní sanu ichi ñaha-dé xii-aⁿ cáháⁿ ndíhi-aⁿ ingá tée te núu na dàña ñaha-dé. Te tée na nãqueheⁿ ñaha xii ñaha ní dàña ñaha yí-xi-áⁿ, te ñu-ni ñá túú ní quide váha-dé sã dúcáⁿ ní nãqueheⁿ-dé ñaha-áⁿ.

Ñáyiú càcunehe ñaha xii Yá Ndióxi cuèndá cutnuni íní tnaha ñáyiú-yu sã ndáa cada-yu ìⁿ sã sání íni-yu cada-yu

³³ Te sa ñaha tucu-ndo nacuáa ní cáháⁿ tucu cue tée ní xindecu ndéé sanaha, chí cue tée-áⁿ ní cachí-güedé: “Te núu càcunehe-ndo Yá Ndióxi núú tnaha ñáyiú-ndo nacuáa cutnuni íni-yu sã ndáa cada-ndo ìⁿ sã sání íní-ndó càda-ndo, te cada-ndo”, duha ní cáháⁿ dóho tnaha-güedé.

³⁴ Dico yúhú càchi tnáhu-í xii-ndo sã ñá túú nã cacunehe-ndo sã ndáa cada-ndo ìⁿ sã sání íní-ndó càda-ndo. Te ní vá càcú nèhe-ndo andiu chí yacáⁿ cúú-xi núú núcòo Yá Ndióxi táxi tnùní-gã.

³⁵ Te ní vá càcú nèhe-ndo ñuyúú-a, chí tnáhã ñuyúú-a ndècu-gã, te ní vá càcú nèhe-ndo ñuú Jerusalén chí ñuú-áⁿ cúú cuèndá-gã, te ñu-gã cúú-gã Yaa ío cùnuu.

³⁶ Te ní vá càcú nèhe-ndo díquí-ndó chí ñaha-ndo sã ní ìⁿ idi díquí-ndó ñã ndácú-ndó ndàda cuixíⁿ-ndó àdi ndada tnuu-ndo.

³⁷ Te váha-gã sã núu ìⁿ sã sání íní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chí nchaa dava-gã sã chídó-ndó cáháⁿ-ndó òré ducaⁿ sání íní-ndó càda-ndo ìⁿ sã càdá-ndó cùu-xi sã dácàhu íní ñáhã yùcu ñávãha.

Cuèndá ñáyiú nãchinaa sã quidé ñaha tnaha ñáyiú-xi

(Lc. 6:29-30)

³⁸ Te sa ñaha tucu-ndo nacuáa ní cáháⁿ tucu cue tée ní xindecu ndéé sanaha, chí cue tée-áⁿ ní cachí-güedé: “Ñáyiú na càda ñaha tnaha ñáyiú-xi ìⁿ sã ñá túú váha, te nanchòcava-yu nachinaa-yu sã ní quide ñaha tnaha ñáyiú-yu”, duha ní cachí-güedé.

³⁹ Dico yúhú càchi tnáhu-í xii-ndo sã ñá túú ná cada-ndo nchãa cue ñáyiú cuíhna íní-xi te núu quide ñahá-yu ìⁿ sã ñá túú váha xii-ndo. Te núu ní canihá-yu ìⁿ xito te cuíni tucú-yu canihá-yu ingá xito te ñaha-ndo na canihá-yu.

⁴⁰ Àdi ní sacáⁿ cuéchi-yu núú cuè tée cùchiuⁿ cuèndá-ndó, te cuíni-yu quendeé-yu dúhnú-ndó te ñaha-ndo na canehé-yu quihíⁿ, te tnáhã-ni dóo ndíxi ndòdo-ndo ñaha-ndo na canehé-yu quihíⁿ.

⁴¹ Te núu quide yicá-yu caca-ndo dàtná úú kilómetrú cuido-ndo ndáchíuⁿ-yu ña, te chido-ndo úú-gã tucu kilómetrú cuido-ndo ndáchíuⁿ-yu.

42 Te núu ío ì# sá xicáⁿ-yu núu-ndó te cuáñaha-ndo, àdi ío ì# sá sánúu-yu núu-ndó te cuáñaha núu-ndo.

Cuu iní-ó nchàa ñáiyu cùu úhú iní ñáhá xii-ó

(Lc. 6:27-28, 32-36)

43 Te sa náha tucu-ndo nacuaá ní cachí tucu cue téé ní xíndecu ndéé sanaha, chí cue téé-áⁿ ní cachí-güedé: “Cuu iní-ndó cué ñáiyu ndécu ndihí váha-ndo, te cuu úhú iní-ndó cué ñáiyu cùu úhú iní ñáhá xii-ndo”, duha ní cachí-güedé.

44 Dico yúhú càchí tñuhu-í xii-ndo sá cúu iní-ndó cué ñáiyu cùu úhú iní ñáhá xii-ndo, te cáháⁿ váha-ndo cuendá cue ñáiyu càháⁿ úhú ñáhá xii-ndo, te cada-ndo sá váha sá cúu-xí cué ñáiyu cùu úhú iní ñáhá xii-ndo, te cáháⁿ ndihí-ndo Yá Ndióxi cuendá cue ñáiyu xícuèhé ñáhá xii-ndo, ndihí cuendá cue ñáiyu quide úhú ñáhá xii-ndo.

45 Te núu na càda-ndo nchaa nacuaá càháⁿ-í-a, te ducaⁿ te cutnùní sá cúu-ndó dèhe Tátá-ndó Dútú Ndióxi Yáá ndécú àndiu. Te ñiu-gá cúu-gá Yáá quidé quène nchíanchii, te ñiu-ni-gá cúu-gá Yáá dácùuⁿ dáu ñuyíú-a, te ducaⁿ quide-gá cuendá cuu-xí sá váha sá cúu-xí cué ñáiyu quide váha, ndihí sá cúu-xí cué ñáiyu ñá túú quide váha.

46 Te núu nchòhó ná cúu iní-ndó mèe-ni ñáiyu na cùu iní ñáhá xii-ndo, te vá càchí-ndó sá Yá Ndióxi taxi-gá sá ndúú tãhú-ndó sá dúcáⁿ quide-ndo, chí cuéi cue téé cuihna iní-xí quide cobrá ñáhá xii cue ñáiyu cuendá impuéstú ducaⁿ xíquide-güedé.

47 Te núu mee-ni ñáiyu ndécu ndihí váha-ndo ío váha cáháⁿ ndihí-ndó-yu, te vá càchí-ndó sá ío váha quide-ndo sá dúcáⁿ quide-ndo, chí cuéi ndéé nchaa ñáiyu ñá túú xini dana cuendá Yá Ndióxi ducaⁿ xíquide-yu.

48 Te duha ndúu tñuhu càháⁿ-í cuendá sá nchòhó cada ndáá-ndó cùndecu-ndo datná quidé ndáá méé Tátá-ndó Dútú Ndióxi Yáá ndécú àndiu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáiyu.

6

Jèsús dánèhé-gá ñáiyu nàcuáa cada-yu sá váha

1 Te Jèsús ndécú-ni-gá dánèhé-gá cue téé xica cuu ndihí-gá ndihí nchaa ñáiyu, te xáhaⁿ-gá:

—Te òré quidé-ndó sá váha te vá cada-ndó núú ñáiyu cuendá-ni sá cuini-ndó cáháⁿ váha-yu cuendá-ndó, chí núu núú ñáiyu ducaⁿ na càda-ndo te Dútú Ndióxi Yáá cúu Tátá-ndó vá táxi-gá sá ndúú tãhú-ndó.

2 Te xiáⁿ núu nchòhó òré chindèe-ndo ñáiyu ndáhú, te vá cùñaha-ndo xii cue ñáiyu sá chindèe-ndo cue ñáiyu ndáhú-áⁿ

datná xíquide cue ñáiyu dándahú méé-xí sá quidé ndáá te ñá ndáá sá quidé ndáá-yu, chí ñáiyu-áⁿ ducaⁿ xíquide-yu òré sàháⁿ-yu veñúhu, chí datécú tñuhu-yu nchaa ñáiyu òré ducaⁿ chindèe-yu ñáiyu ndáhú. Te ñiu-ni ducaⁿ quidé-yu xáháⁿ-yu xii cue ñáiyu sá chindèe-yu cue ñáiyu ndáhú-áⁿ nchaa núu xicá cùu-yu, te ducaⁿ xíquide-yu cuendá cuini-yu cáháⁿ váha ñáiyu cuendá-yu. Te yúhú na càchí tñuhu ndáá-í xii-ndo sá ñá túú ná nduu tãhú ñáiyu-áⁿ núú Yá Ndióxi sá dúcáⁿ quidé-yu chí mee-ni núú tñaha ñáiyu-yu cùdiú-yu.

3 Te nchòhó òré chindèe-ndo ñáiyu ndáhú, te cuéi ñáiyu ío-gá váha ndécu ndihí-ndo dico vá cùñaha-ndo sá dúcáⁿ chindèe-ndo cue ñáiyu ndáhú-áⁿ, te ni cue dava-gá ñáiyu vá cùñaha-ndo.

4 Chí váha-gá sá iní méé-ni-ndó ná cùhuⁿ sá dúcáⁿ chindèe-ndo cue ñáiyu ndáhú-áⁿ. Te núu ducaⁿ na càda-ndo ña, te Dútú Ndióxi Yáá cúu Tátá-ndó taxi-gá sá ndúú tãhú-ndó chí ñiu-ni mee-gá ndéhé-gá nàcuáa quide-ndo ndecu-ndo.

Jèsús dánèhé-gá ñáiyu nàcuáa cáháⁿ ndihí-yu Yá Ndióxi

(Lc. 11:2-4)

5 Te nchòhó òré cáháⁿ ndihí-ndo Yá Ndióxi, te vá cada-ndó datná xíquide cue ñáiyu dándahú méé-xí cachí sá quidé ndáá te ñá ndáá sá quidé ndáá-yu, chí ñáiyu-áⁿ tñahá iní-yu cunutñi-yu cáháⁿ ndihí-yu Yá Ndióxi òré yíñi-yu veñúhu. Te ñiu-ni ducaⁿ xíquide-yu nchaa núu xicá cùu-yu, te ducaⁿ quidé-yu cuendá sá cuini-yu quini ñáiyu nàcuáa xíquide-yu. Te na càchí tñuhu ndáá-í xii-ndo sá ñá túú ná nduu tãhú ñáiyu-áⁿ núú Yá Ndióxi sá dúcáⁿ quidé-yu chí mee-ni núú tñaha ñáiyu-yu cùdiú-yu.

6 Te nchòhó òré cuini-ndó cáháⁿ ndihí-ndo Yá Ndióxi, te ndíhu ndedí nihnu-ndo xití vehe-ndo, chí ñiu-gá cúu Tátá-ndó te ndécu ndihí ñaha-gá xii-ndo, te ñiu-ni mee-gá ndéhé ñaha-gá xii-ndo nàcuáa quide-ndo, te núu ducaⁿ na càda-ndo te taxi-gá sá ndúú tãhú-ndó.

7 Te òré cáháⁿ ndihí-ndo Yá Ndióxi te vá sùúni cuendá-ni dacaá-ndó tñuhu cáháⁿ ndihí-ndo-gá datná xíquide cue ñáiyu ñá túú xini tñuhu-gá, chí ñáiyu-áⁿ sání iní-yu sá tédóho ñaha vihi-gá Yá Ndióxi xii-yu sá dúcáⁿ sùúni dacaá-yu tñuhu cáháⁿ ndihí ñáhá-yu xii-gá dico ñáhá.

8 Dico nchòhó, vá cada-ndó datná xíquide cue ñáiyu-áⁿ, chí mee Tátá-ndó Dútú Ndióxi sa náha-gá ná cúu nchaa sá xini ñuhu-ndo cuéi òré vátá cacáⁿ-gá-ndó núú-gá.

9 Te duha cáháⁿ-ndó òré cáháⁿ ndihí-ndo Yá Ndióxi:

Yòhó Tátá-ndí Dútú Ndióxi Yáá ndécú àndiu,

nchaa ñáyiú na cáháⁿ-yu sá cúú-n Yáá ío yiñúhu.

¹⁰ Te xicáⁿ táhú-ndí núú-n sá ná sàá nduu ndíhu ndàhá-n-yu.

Te cada-n dàtná cáhí iní-n ñuyíú-a dàtná quidé-n àndiu.

¹¹ Te xicáⁿ táhú-ndí núú-n sá táxí-n sá cóhó-ndí sá cáxí-ndí ñⁿ nduu ñⁿ nduu.

¹² Te cada càhnu iní-n nchàa yíca cuéchi-ndí, chí tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

¹³ Te vá dáñá-n dàcaháⁿ ñhá yùcu ñávàha xii-ndí cada-ndí sá ñà túú vâha, chí coto ñàha-n xii-ndí cuendá sá vá dúcáⁿ càda ñàha-xi.

Te ñu-n cùu-n Yáá ío cùnunu nchaa nduu nchaa quíú, te ío càhnu cuu-n, te ñu-ni-n quíndaha ñàha-n xii-ndí ni caa ni quíhíⁿ. Te ducaⁿ na cùnduu.

Duha dànehé ñàhá-í xii-ndo cáháⁿ ndihí-ndo Yá Ndióxi.

¹⁴ Te núu nchòhó quidé càhnu iní-ndó nchàa sá quidé ñàha tnaha ñáyiú-ndo, te ducaⁿ te Tátá-ndó Dútú Ndióxi Yáá ndécú àndiu cada cahnu iní-gá nchaa sá ñà túú vâha quide-ndo tucu.

¹⁵ Dico núu nchòhó vá cáda càhnu iní-ndó nchàa sá quidé ñàha tnaha ñáyiú-ndo ña, te ni Dútú Ndióxi Yáá cúú Tátá-ndó vá cáda càhnu iní-gá nchaa sá quidé-ndó tucu.

Cuendá ñáyiú ñà túú tnàhí ná xéxí àma cáháⁿ ndihí-yu Yá Ndióxi

¹⁶ Te nchòhó, nduu ñà túú tnàhí ná xéxí-ndó cáháⁿ ndihí-ndo Yá Ndióxi, te vá cùndiyí-ndó dàtná xíquide nchaa ñáyiú dàndahú méé-xí cáhí sá quidé ndáá te ñà ndáá sá quidé ndáá-yu, chí ñáyiú-áⁿ ducaⁿ xíquide-yu cuendá sá cuiní-yu cutnùní iní ñáyiú sá ñà túú tnàhí ná xéxí-yu cáháⁿ ndihí-yu Yá Ndióxi. Te yúhú cáhí tnúhu-í xii-ndo sá sá dúcáⁿ quidé-yu te ñà túú ná chindee ñàha-xi xii-yu cuendá níhí-yu ñⁿ sá ndúú táhú-yu núú Yá Ndióxi.

¹⁷ Dico nchòhó, nduu dùcaⁿ quide-ndo ñà túú tnàhí ná xéxí-ndó cáháⁿ ndihí-ndo Yá Ndióxi, te váha váha naquete-ndo núú-ndó, te váha váha chíhí-ndo cùcá

¹⁸ Cuendá sá vá cutnùní iní ñáyiú sá ñà túú ná xéxí-ndó nduu ducaⁿ cáháⁿ ndihí-ndo Yá Ndióxi. Te Dútú Ndióxi Yáá cúú Tátá-ndó ndecu ndihí-ndo ñu-ni mee-gá ndéhé-gá nàcuáa quide-ndo ndecu-ndo, te ñu-gá taxi-gá sá ndúú táhú-ndó.

Cuendá nchaa sá vâha nduu táhú-ó (Lc. 12:33-34)

¹⁹ Te vá caní iní-ndó cùu-ndo ñáyiú cuica nãndí sá cùndecu ndihí-ndo ñuyíú-a chí vá cùdñí-xi, chí dava quee tíquidi, te dava caxi

cudi ñúhu, àdi quíhu ñadúhú vehe-ndo te duhu-güedé.

²⁰ Te váha-gá chí ndúcú nàcuáa cada-ndo cuendá ducaⁿ ngúndecu sá ndúú táhú-ndó àndiu, te xiáⁿ cudí-xi cundecu ndihí-ndo ñi caa ni quíhíⁿ, chí yácaⁿ vá queé-gá tíquidi, te ni vá cáxí-gá cudi ñúhu, te ni vá quíni-gá-ndó ñadúhú duhu-güedé ndachiuⁿ-ndo.

²¹ Te núu cùu-ndo ñáyiú cuica ndecu ñuyíú-a, te ñu-ni nchaa sá ndécú ndihí-ndo ñuyíú-a ñúhu iní-ndó. Àdi cuu-ndo ñáyiú quide nàcuáa ngúndecu sá ndúú táhú-ndó àndiu, te ñu-ni sá ndúú táhú-ndó ndecu andiu-áⁿ ñúhú iní-ndó.

Núú-ó cùu-xi datná ñⁿ ñuhú (Lc. 11:34-36)

²² Te cada iní-ndó sá núú-ndó cùu-xi datná ñⁿ ñuhú. Te núu núú-ndó càvâha te cutnùní iní-ndó ná cúú sá ndécú núú-ndó.

²³ Dico núu cùhú núú-ndó ñà túú cutnùní cundehe-ndo ña, te ñà túú cutnùní iní-ndó ná cúú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ñⁿ núú néé. Te duha nduu tnúhu cáháⁿ-í chí núu sàni váha iní-ndó cuendá Yá Ndióxi ñà, te cùu vii cuu váha iní-ndó ndecu-ndo. Áⁿ te núu ñà túú sàni váha iní-ndó cuendá-gá ñà, te ñà túú tnàhí cùu váha iní-ndó ndecu-ndo. Te sá dúcáⁿ ñà túú sàni váha iní-ndó cuendá-gá te cada iní-ndó sá ndécú-ndó dàtná ñⁿ núú néé.

Vá ndácú ñⁿ téé cunu cuechi-dé núú úú patróóⁿ (Lc. 16:13)

²⁴ Te ni ñⁿ téé xínu cuechi vá ndácú-dé cunu cuechi-dé núú úú patróóⁿ, chí téé-áⁿ cuu váha iní-dé núú ñⁿ patróóⁿ-dé te tnú-dé nchaa tnúhu cáháⁿ patróóⁿ téé cùu váha iní-dé núú-xi-áⁿ. Te núú ñngá tucu patróóⁿ-dé vá cúú váha iní-dé, te ni vá tnú-dé tnúhu cáháⁿ ñngá téé-áⁿ. Te ducaⁿ sãtnahá-xi cùu nchóhó chí vá ndácú-ndó cunu cuechi-ndo núú Yá Ndióxi te cuhuⁿ iní-ndó nchàa sá ío ñuyíú-a.

Yá Ndióxi xító-gã nchaa ñáyiú cùu déhe-gá (Lc. 12:22-31)

²⁵ Te na cáhí tnúhu-í xii-ndo sá vá ío caní iní-ndó núu nása níhí-ndó sá cóhó sá cáxí-ndó, te ni vá ío caní iní-ndó núu nása níhí-ndó dóbó cuíhnu-ndo, chí cùnunu-gá méé-ndó dàcúxí sá nchító-ndó, te ducaⁿ cùnunu-gá yiqui cùñú-ndó dàcúxí dóbó sácúhnu-ndo.

²⁶ Te chí cáda cuendá sá ncháá quiti ndava ñà túú tnàhí ná xítú-güedi, te ni ñà túú ndéé cuáháⁿ-güedi nãtahu-güedi, te ni ñà túú ná nãtãxúha-güedi, te ni ñà túú ndéé cáá yáca-güedi, chí mee Tátá-ó Dútú Ndióxi Yáá ndécú àndiu xito ñàha-gá xii-güedi níhí-güedi sá xéxí-güedi. Te núu cue quiti-áⁿ ducaⁿ

xito ñaha-gá xii-güedi, jte uuⁿ-gá xító ñaha-gá xii nchòhó, chi nchòhó ío-gá cúnunu-ndo dacúúxí cuè quiti-áⁿ!

²⁷ Te cuèi nándi sá sání vihi iní-ndó ndècu-ndo, dico ñá ndácú-ndó càda-ndo nacúaa cuehnu-ndo cuèdicó ìⁿ yiqui-gá.

²⁸ Te vá ío caní iní-ndó núu nása níhí-ndó dóó cuihnu-ndo. Te chí cáda cuèndá nacúaa sàhnu nchaa itá ío yucu, chí nchaa itá-áⁿ ñá túú quide chiuⁿ-xi, te ní ñá túú quèheⁿ-xi idi.

²⁹ Te na càchí tnúhu-í xii-ndo sá ndíi Salómón cuèi ío víi ní xínduu dóó ní xóo cuihnu ndíi, dico ñá túú nùmahá-xi nacúaa càa nchaa itá, chí ío-gá víi càa nchaa itá.

³⁰ Te nchaa itá ío yucu tnaa-ni cùdí-xi, te yichí-xi te sàhmi ñáyi. Te cuèi ducaⁿ dico mee Yá Ndióxi quidé-gá ío víi sàcúnduu-xi. Te núu nchaa itá-áⁿ ducaⁿ quide-gá xító-gá sàcúnduu víi-xi, te xíáⁿ cùtnúni sá ío-gá coto ñaha-gá xii-ndo, dicó-ni sá ñá túú sàndáá váha iní-ndó-gá.

³¹ Te xíáⁿ núu ñá túú xini ñuhu vihi-xi caní iní-ndó núu nása níhí-ndó sá cóhó sá cáxi-ndó, àdi nása níhí-ndó dóó cuihnu-ndo.

³² Chí nchaa ñáyi ñá túú xini nacúaa càháⁿ tnúhu Yá Ndióxi mee-ni nchaa xíáⁿ ñúhú iní-yu. Dico nchòhó chí mee Tátá-ndó Dütú Ndióxi sa ñaha-gá ná cúú sá xini ñúhu-ndo.

³³ Te xíáⁿ núu ío xini ñuhu-xi sá cúhúⁿ iní-ndó sá Yá Ndióxi yíndàha ñaha-gá xii-ndo, te ducaⁿ càda-ndo nchaa nacúaa cuini-gá, te ducaⁿ te taxi-gá nchaa sá xini ñúhu-ndo.

³⁴ Núu xíáⁿ vá ío caní iní-ndó nása cundecu-ndo nduu tneé, chí caní iní-ndó nacúaa càda-ndo cundecu-ndo vitna, chí nduu tnèé-áⁿ te òré-ná te cutnúni núu nása càda-ndo cundecu-ndo. Chí nchòhó sa ñaha-ndo sá ío titní núú sá quidé-xi ìⁿ nduu ìⁿ nduu —duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyi.

7

*Vá càháⁿ cuèhé-ó cuèndá tnàha ñáyi-ó
(Lc. 6:37-38, 41-42)*

¹ Te Jèsús ndècuu-ni-gá dánèhé-gá cue téé xica cuu ndíhi-gá ndíhi nchaa ñáyi, te xàhaⁿ-gá:

—Vá càháⁿ cuèhé-ndó cuèndá tnàha ñáyi-ndo, te ducaⁿ te Yá Ndióxi ñá túú ná tnúhu cúnaha-gá xii-ndo.

² Chí núu na càháⁿ cuèhé-ndó cuèndá tnàha ñáyi-ndo, te Yá Ndióxi ío ìⁿ sá cáda ñaha-gá xii-ndo. Te núu nchòhó ná càháⁿ cuèhé víhí-ndó cuèndá tnàha ñáyi-ndo te Yá Ndióxi ío-gá dandòho ñaha-gá xii-ndo.

³ ¿Te ná cuèndá ndéhe-ndó ìⁿ sá ñá túú váha quide tnàha ñáyi-ndo te mee-ndo víhí-gá quidé-ndó-í? Te sá dúcáⁿ quide-ndo te cada iní-ndó sá ndéhe-ndó dàtná ìⁿ mihi líhli ñúhu núú tnàha ñáyi-ndo te mee-ndo

ñúhu ìⁿ mihi cahnu-gá núú-ndó te ñá túú quide cuèndá-ndó.

⁴ Te núu na nàcanu ichi-ndo tnàha ñáyi-ndo cuèndá sá ñá túú quide váha-yu ndècu-yu, te mee-ndo víhí-gá quidé-ndó ñá, te cada iní-ndó sá xàhaⁿ-ndo xii tnàha ñáyi-ndo sá nátava-ndo mihi líhli ñúhu núú-yu sá dúcáⁿ quide-ndo, te mihi càhnu ñúhu núú mée-ndó ñá túú quide cuèndá-ndó.

⁵ Te sá dúcáⁿ quide-ndo te ío dandahú-ndó mèe-ndo sá quidé ndáá-ndó te ñá ndáá sá quidé ndáá-ndó, te xini ñuhu-xi díhna-gá dàña-ndo nchaa sá ñá túú váha quide-ndo, te dàtnúni ducaⁿ te cuu nacanú ichi-ndo tnàha ñáyi-ndo cuèndá nchaa sá ñá túú váha quidé-yu.

⁶ Te nchaa ñáyi ío sáá iní-xi, te vá cáda yica-ndó-yu cundèdòho-yu tnúhu Yá Ndióxi, chí núu na càda yica-ndó-yu te ngóo-yu cuu úhú iní ñáhá-yu xii-ndo. Te ñáyi-áⁿ cúú-yu dàtná iná chí quiti-áⁿ núu na cuáñaha-o ìⁿ sá cuáñaha-o, te núu ñá túú cùtnúni iní-dí ná cúú xíáⁿ te tni ñaha-dí xii-o. Te cùu tucú-yu dàtná cùchí chí quiti-áⁿ núu na chùcu-o núú-dí yúú váha sá ío víi càa nani pérlá, te dicó-ni cùu sàhá-dí chí ñá túú cùtnúni iní-dí sá cúú-xí yúú váha.

*Cácáⁿ-ó núú Yá Ndióxi núu ná cuini-ó
(Lc. 11:9-13; 6:31)*

⁷ Te na càchí tnúhu-í xii-ndo sá càcáⁿ-ndó núú Yá Ndióxi te núu ná cuini-ndó te taxi-gá, te vá dàña ndéé-ndó càcáⁿ-ndó núú-gá núu ná cuini-ndó te ducaⁿ te níhí-ndó. Te cada iní-ndó sá ní quexio-ndo vehe ìⁿ tnàha ñáyi-ndo te ní càháⁿ-ndó, te ñáyi-áⁿ ní tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chí Yá Ndióxi tedóho ñaha-gá xii-ndo, te taxi-gá sá ná càcáⁿ-ndó núú-gá.

⁸ Chí nchaa ñáyi ducaⁿ xíquide, te Yá Ndióxi tedóho ñaha-gá xii-yu te níhí-yu sá cuini-yu. Te diu-ni ducaⁿ tucu nchaa ñáyi na càcáⁿ núú-gá ìⁿ sá cuini-yu, chí sàñaha-gá sá xicáⁿ-yu núú-gá. Te diu-ni ducaⁿ tucu nchaa ñáyi ñá túú dàña ndéé xicáⁿ núú Yá Ndióxi sá cuini-yu chí níhí-yu.

⁹ Te nchòhó cue téé cùu tátá, ñá túú cùndee iní-ndó cuáñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ pàá núú-ndó càxi-güexi.

¹⁰ Te ní ñá túú cùndee iní-ndó cuáñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó càxi-güexi.

¹¹ Te nchòhó cuèi ndéé dau-na sáá iní-ndó dico sàha-ndo cuè déhe-ndo sá váha xèxi-güexi òré ná cúú sá xicáⁿ-güexi núú-ndó càxi-güexi. Te núu nchòhó ducaⁿ quide-ndo, jte uuⁿ-gá ducaⁿ quide Tátá-ndó Dütú Ndióxi Yáá ndécú àndi, chí taxi-gá sá váha sá cúú-xí-ndó te núu na càcáⁿ-ndó núú-gá!

12 Te nchaa sá vâha cuiñi-ndó càda tñaha ñâyiu-ndo, te cada-ndo tñahá-ndó ndíhi-yu, chí ducaⁿ sànu ichi ñaha tñúhu ní chídó tñuní ndíi Moisés, te ñu-ñi ducaⁿ sànu ichi ñaha tucu nchaa tñúhu ní chídó tñuní cue téé ní xóo cáháⁿ tñúhu Yá Ndióxi ndéé sanaha.

*Yuyèhe cuiñi
(Lc. 13:24)*

13-14 Te xini ñuhu-xi nducu-ndo nacuaa cada-ndo tñi-ndo ichi Yá Ndióxi. Te ichi-gá-áⁿ cúu-xí dàtná ñiⁿ ichi cuiñi, àdi dàtná ñiⁿ yuyèhe cuiñi. Te duha càháⁿ-í chí ío úhú xínu iní-ndó tñi-ndo ichi Yá Ndióxi, te sacú-ni nchòhó cue ñâyiu ndècu ñuyíú-a tñi-ndo ichi-gá. Te nchaa ñâyiu ndècu ichi cuehé ichi duha ta xita nihnú-yu cuháⁿ. Te ichi ndècu-yu-áⁿ cada iní-ndó sá cúu-xí ñiⁿ ichi cahnu ichi quehéⁿ, àdi ñiⁿ yuyèhe quehéⁿ. Te duha càháⁿ-í chí ío vai ñâyiu ndècu-yu ichi-áⁿ.

*Ndi ñiⁿ núu yutnu xini-ó ná yutnu cùu-xi
cuendá sá sávidí-xi
(Lc. 6:43-44)*

15 Te càchí tñúhu-í xii-ndo sá ío quihí iní-ndó cùndecu-ndo cuendá sá vâ dándahú ñáhá cuè téé càchí sá càháⁿ tñúhu Yá Ndióxi te ñá ndáá sá càháⁿ-güedé tñúhu-gá. Chí cue téé-áⁿ sànuu sá quidé-güedé dàtná quidé mbéé quiti ío váha iní-xi, dico ñá ndáá chí ñá túu ñúhu váha iní-güedé, chí quide-güedé dàtná quidé quiti dééⁿ quiti nani yíhi.

16 Te òré quexio-güedé núu ndècu-ndó te cada cuendá-ndó nacuaa quide-güedé cuendá ducaⁿ cùtnuní iní-ndó ná ñâyiu cùu-güedé. Te nchòhó xini-ndó sá ñá túu cùuⁿ ndéhé yoho váha stilé tnu íñu, te ní ñá túu xini-ndó cùuⁿ ngúxí ñiⁿ tnu íñu.

17-18 Te xini tucu-ndo sá ncháá yutnu váha cùuⁿ sávidí váha, te nchaa yutnu váha-áⁿ ñá túu cùuⁿ sávidí sá ñá túu váha. Te nchaa yutnu sá ñá túu váha ñá túu cùuⁿ sávidí váha, chí mee-ni sávidí sá ñá túu váha cùuⁿ.

19 Te nchaa yutnu sá ñá túu cùuⁿ sávidí váha xèhndé-güedé, te cuánguee-xi núu ñùhú cayú-xi. Te ducaⁿ sátnahá-xi váha nchaa cue téé dándahú ñáhá càchí sá càháⁿ tñúhu Yá Ndióxi te ñá ndáá sá càháⁿ-güedé tñúhu-gá, chí quihíⁿ-güedé núu ñùhú núu cayú.

20 Te nchòhó cùtnuní iní-ndó ná ñâyiu cùu cue téé-áⁿ cuendá nchaa sá quidé-güedé.

*Ñá ncháá ñâyiu ngúndecu-yu núu ndècu Yá
Ndióxi táxi tñuní-gá
(Lc. 13:25-27)*

21 Te na càchí tñúhu-í xii-ndo sá ío vai ñâyiu cachí-yu sá yùhú cùu-í Xitohó-yu, dico ñá ncháá-yu nduu táhú-yu cundecú-yu núu ndècu Tãtá-í Dútú Ndióxi táxi tñuní-gá, chí mee-ni ncháa ñâyiu na càda nchaa nacuaa càháⁿ-gá ñâyiu-áⁿ nduu táhú-yu cundecú-yu núu ndècu-gá táxi tñuní-gá.

22 Te na sàá nduu càda ndáá Yá Ndióxi cuèchi nchaa ñâyiu, te vai-yu cùñahá-yu xii-í: “Yóhó Xitohó Jesucristú nchúhú cúu-ndí ñâyiu ní cáháⁿ tñúhu-n nacuaa ní cachí-n, te ñu-ñi-n ní cacunehe-ndí te ní sándáá iní ñáhá ncháa espíritú cùndíhi yucu ñávaha xii-ndí ní quee-xi yiqui cùñú ñâyiu, te ñu-ñi yóhó ní chindee ñàha-n xii-ndí ní ndacu-ndí ní quide-ndí titní núu sá vâ yóo tñahí ndàcu cada”, duha cùñahá-yu xii-í dàvá-áⁿ.

23 Dico yúhú cùñaha-í xii-yu: “Ñá túu tñahí xini ñàhà-í xii nchòhó núu ndéé ñâyiu cùu-ndo, te chí xócuñiⁿ nchaa nchòhó ñâyiu quide nchaa sá cuehé sá dúhá núu ndècu-í-a”, duha cùñaha-í xii-yu.

*Ñiⁿ vehe ndècu cimientú-xi ndíhi ñiⁿ vehe ñá
túu cimientú-xi*

(Mr. 1:22; Lc. 6:47-49)

24 Te nchaa ñâyiu sàcúndedóho tñúhu càháⁿ-í te núu na tñiⁿ-yu, te ñâyiu-áⁿ cúu-yu dàtná ñiⁿ téé ío váha cùtnuní iní-xi. Chí téé-áⁿ ní dácáá-dé ñiⁿ vehe, dico díhna-gá ní xete-dé ndéé ní tnahá-dé yúu cáxiⁿ te dàtnuní ní tava-dé cimientú-xi.

25 Te òré ní cuuⁿ dáú te ní ndee ndute ñuhu, te ní dándáá-xi ndéé núu cáá vehe-áⁿ, dico ñá túu ní ndàcu-xi cuidó-xi. Te ní quene tucu táchí ñihi dico ñá túu ní ndàcu-xi cuidó-xi vehe-áⁿ, te ducaⁿ chí téé ní dácáá vehe-áⁿ ní tava-dé cimientú-xi núu yúu cáxiⁿ. Duha sátnahá-xi cùu nchaa ñâyiu tñiⁿ tñúhu càháⁿ-í.

26 Dico nchaa ñâyiu sàcúndedóho tñúhu càháⁿ-í te ñá túu cuiñi-yu tñiⁿ-yu, ñâyiu-áⁿ cúu-yu dàtná ñiⁿ téé ñá túu tñahí cùtnuní iní-xi. Chí téé-áⁿ ní dácáá-dé ñiⁿ vehe núu yúcu mée-ni ñuhu cúchí.

27 Te òré ní cuuⁿ dáú te ní ndee ndute ñuhu, te ní dándáá-xi ndéé núu cáá vehe-áⁿ, te ní quene táchí ñihi te íi-ni ní xido-xi vehe-áⁿ cuendá sá núu ñuhu cúchí ní sáá. Duha sátnahá-xi cùu nchaa ñâyiu sàcúndedóho tñúhu càháⁿ-í te ñá túu cuiñi-yu tñiⁿ-yu — duha ní dánhé ñáhá Jesús xii cue téé xica cuu ndíhi-gá ndíhi nchaa ñâyiu.

28 Te òré ní ndíhi Jesús sá dúcáⁿ ní cáháⁿ-gá, te nchaa ñâyiu ní xindedóho nchaa tñúhu ní cáháⁿ-gá ío ní cuñúhu-yu nacuaa ní dánhé ñáhá-gá xii-yu.

29 Chí ní cáháⁿ-gá dàtná càháⁿ cue téé cùnuu, te cùnuu ndisa-gá, te ñá túu ní cáháⁿ-gá dàtná càháⁿ nchaa cue téé dàcuaha ñaha xii ñâyiu nchaa tñúhu ní chídó tñuní ndíi Moisés.

8

*Jesús quidé tãta-gá ñiⁿ téé tñahá cuehé sá
dàtèhyú nihnu-xi yiqui cùñú-ó
(Mr. 1:40-45; Lc. 5:12-16)*

¹ Te Jèsús ní xica-gá cuánuu-gá ðíni tñdúú núú ðúcáⁿ ní xíndecu-gá ní ðánèhé-gá ñáyíu-án, te cuéhé víhí ñáyíu nchícúⁿ ñáhá xii-gá cuánuu.

² Te ní quexìo ìⁿ téé tnàhá cuéhé sá dátèhyú nihnu-xi yiqui cùñú-ó núú Jèsús, te ní ngúíñí xítí-dè núú-gá, te xáhaⁿ-dè xii-gá:

—Mèstrú, véxi-í càháⁿ ndàhú-í núú-n núú vá cùndèe iní-n càda tátna ñaha-n xii-í, chí cutnúni iní-í sá ndácú-n —càchí-dé xáhaⁿ-dè xii-gá.

³ Te Jèsús ní dácàà-gá ndaha-gá ní tendaha ñaha-gá xii-dé, te xáhaⁿ-gá:

—Cuu cada tátna ñaha-í xii-n, te vitna ndúha-n —càchí-gá xáhaⁿ-gá xii-dé.

Te òré-ni-án ní xócuiñí cuéhé tnàhá-dé.

⁴ Te Jèsús ní xáhaⁿ tucu-gá xii-dé:

—Te vitna cuanùhú te vá yõo ìⁿ cùñaha-n sá yùhú ní quide tátna ñaha-í xii-n, núú ðütú-ni cuáháⁿ cuendá sá ná quíni ñáhá-dè xii-n sá ní ndúha-n, te cuáñaha-n sá ndúú táhú Yá Ndiòxí dàtná ní cachí ndíi Moisés. Te ducaⁿ càda-n cuendá cutnúni iní ñáyíu sá ní ndúha-n —càchí-gá xáhaⁿ-gá xii téé ní quide tátna-gá-án.

Jèsús quidé tátna-gá ìⁿ téé xínu cuechi núú ìⁿ téé cùu capitáⁿ

(Lc. 7:1-10)

⁵ Te Jèsús ní xica-gá cuáháⁿ-gá ñuu Capèrnaúm. Te òré cuánguihu-gá ñuu-án te ní quexìo ìⁿ téé cùu capitáⁿ càháⁿ ndàhú-dè núú-gá,

⁶ te xáhaⁿ-dè xii-gá:

—Mèstrú, véxi-í càháⁿ ndàhú-í núú-n núú vá cùndèe iní-n càda tátna-n ìⁿ téé xínu cuechi núú-í, chí cùhú-dé te càhú víhí tnàhá-dé, te ío ndòho-dé te ní ñá cùndèe-gá-dé candá nihnu-dé —càchí-dé xáhaⁿ-dè xii-gá.

⁷ Te Jèsús ní xáhaⁿ-gá xii-dé:

—Te na quíhíⁿ-ó càda tátna-í-dé —càchí-gá xáhaⁿ-gá xii-dé.

⁸ Te téé cùu capitáⁿ-án ní xáhaⁿ-dè xii-gá:

—Mèstrú, ñá túú tàú-í sá quíhu-n ndéé xítí vehe-í, chí cùu-í ìⁿ téé cutéxínu sá cùú-xi-n, te càháⁿ-ni sá ndúha téé xínu cuechi núú-í te ndúha-dé.

⁹ Chí yùhú ndècu cue téé tàxi tñuní ñáhá xii-í, te ducaⁿ yùhú tucu ndècu cue sandadú táxi tñuní-í. Te òré xáhaⁿ-í xii ìⁿ-dé quíhíⁿ-dé ìⁿ chiuⁿ te cuáháⁿ-dè, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii ìⁿ téé xínu cuechi núú-í cada-dé ìⁿ chiuⁿ te quide-dé. Núu xíáⁿ yòhó càháⁿ-ni sá ndúha téé xínu cuechi núú-í te ndúha-dé —càchí-dé xáhaⁿ-dè xii Jèsús.

¹⁰ Te Jèsús ío ní cuñúhu-gá sá ðúcáⁿ ní càháⁿ téé cùu capitáⁿ-án, te ní xáhaⁿ-gá xii nchaa ñáyíu nchícúⁿ ñáhá xii-gá:

—Na càchí tñúhu ndáá-í xii-ndo sá vátá quíni-gá-í ní ìⁿ ñáyíu isràél, ñáyíu sùúni ío váha sàndáá iní ñáhá xii Yá Ndiòxí dàtná sàndáá iní ñáhá tée-a xii-gá.

¹¹ Te na càchí tñúhu ndáá tucu-í xii-ndo sá ío cuéhé ñáyíu quixi ndáa xio nacuuáa quène nchíanchii, te ðiu-ni ducaⁿ ío cuéhé tucu-yu quixi ndáa xio nacuuáa quèe tucu nchíanchii. Te nchaa ñáyíu-án naníhí tnàhá-yu ndíhi té Abrahám, ndíhi té Isàac, ndíhi té Jácób núú ndécú Yá Ndiòxí táxi tñuní-gá te yàcáⁿ cundecu ndíhi ñàhá-yu xii-güedé.

¹² Te nchaa ñáyíu tàú nduu táhú cundecu núú ndécú Yá Ndiòxí táxi tñuní-gá ní cùu, ñáyíu-án quee tñú-yu, chí quíhíⁿ-yu ìⁿ xii-chí núú néé núú ío ndohó-yu cundecú-yu, te yàcáⁿ ío ndáhí-yu, te ðicó rùhñú-ná cuu núhu-yu sá sàtú iní-yu cuendá sá ndòhó-yu —càchí-gá xáhaⁿ-gá xii-yu.

¹³ Te Jèsús ní xáhaⁿ tucu-gá xii téé cùu capitáⁿ-án:

—Yòhó téé ndècu ndíhi téé cùhú cuanùhú vehe-n vitna chí ndúha-dé chí ní sàndáá iní-n Yá Ndiòxí —càchí-gá xáhaⁿ-gá xii-dé.

Te ðiu-ni òré ducaⁿ ní xáhaⁿ Jèsús xii téé cùu capitáⁿ-án ní ndúha téé xínu cuechi núú-dé.

Jèsús quidé tátna-gá náná ñadíhí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáháⁿ-gá vehe té Pèlú, te òré ní quexìo-gá vehe-dé te ní xini-gá cáá náná ñadíhí-dé cùhú-aⁿ ñúhu vihi-aⁿ cahni.

¹⁵ Te Jèsús ní tñii-gá ndaha ñaha cùhú-án, te òré-ni-án ní nchíco-aⁿ cahni te ní ndacóo-aⁿ ní xínu cuechi-aⁿ núú-güedé ndíhi-gá.

Jèsús quidé tátna-gá vài ñáyíu cùhú

(Mr. 1:32-34; Lc. 4:40-41)

¹⁶ Te òré ní dàhu nchíanchii te ní quexìo ñáyíu núú ndécú Jèsús, te ndècá-yu vài ñáyíu yíhi ñaha espíritú cùndíhi yucu ñávàha ní sáá núú-gá te ndèca tucu-yu vài ñáyíu tnàhá dava-gá núú cuéhé. Te ìⁿ-ni tñúhu ní càháⁿ Jèsús ní tenàà-gá nchaa espíritú cùndíhi yucu ñávàha yíhi ñaha xii nchaa ñáyíu-án, te ní quee-xi yiqui cùñú-yu cuáháⁿ-xi. Te tnàhá nchaa dava-gá ñáyíu cùhú-án ní quide tátna-gá.

¹⁷ Te ducaⁿ ní cuu chí ní quee ndáá-xi nàcuáa ní càháⁿ ndíi Chàia téé ní xóo càháⁿ tñúhu Yá Ndiòxí ndéé sanaha, te duha ní cachí ndíi: “Mee-gá cada tátna ñaha-gá xii-o, chí ðiu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

Ñáyíu cuíni tuha ñaha xii Jèsús

(Lc. 9:57-62)

¹⁸ Te òré ní xini Jèsús sá ío cuéhé ñáyíu xixúcu núú ndécú-gá, te ní xáhaⁿ-gá xii cue téé xica cuu ndíhi-gá sá quèe-gá ndíhi-güedé

bàrcú cuèndá téhndé-gá ndihi-güedé ndàa ingá xio yuhu làgúná.

¹⁹ Te mei òré-án ní quexio ìn tée dàcuaha ñaha xii cue ñáyi nchaa tnúhu ní chídó tnùni ndí Moisés, te xáhaⁿ-dè xii-gá:

—Mèstrú, cuini-í canchicúⁿ ñàhá-í xii-n ndèni ní cuu na quihíⁿ—càchí-dé xáhaⁿ-dè xii-gá.

²⁰ Te Jèsús ní xáhaⁿ-gá xii-dé:

—Nchaa ñucui chi ndècu yaú cúu vèhe-güedi saquihí-güedi, te nchaa cue quitu ndáva caa tacá-güedi díqui yutnu. Dico yúhú Tée cùu ñani tnáhá-ndó ncháa-ndo chí ñá túú ndèe cáá vèhe-í ñuyúú-a ndetatú-í—càchí-gá xáhaⁿ-gá xii-dé.

²¹ Te ìn tée ní chitnahá ñàhá xii Jèsús ní xáhaⁿ-dè xii-gá:

—Jèsús, dañá na nùhú-í cundetu-í cuú tātá-í te chindúxi-í-dé dàtnùni quixi-í chitnahá ñàhá dùcaⁿ-ná-í xii-n—càchí-dé xáhaⁿ-dè xii-gá.

²² Te Jèsús ní xáhaⁿ-gá xii-dé:

—Daña ñáyi ñá túú sàndáá iní ñàhá xii-í ná chindúxi tnàha meé-yu, chí ñáyi-án cúu-yu dàtná ñáyi ní xihí cuéi ndècu-ni-yu núú ñuyúú-a, te yohó canchicúⁿ ñàhá-ní xii-í—càchí-gá xáhaⁿ-gá xii-dé.

Jèsús ngánt-gá táchí ndihi ndute làgúná

(Mr. 4:35-41; Lc. 8:22-25)

²³ Te sáta dúcáⁿ te Jèsús cuánguee-gá bàrcú ndihi cue tée xica cuu ndihi-gá, te ní xica bàrcú-án cuáháⁿ-xi.

²⁴ Te nini ñuhu bàrcú-án ichi cuáháⁿ-xi núú ndute ní xidí Jèsús, te ní ngúita-xi níhi víhi quene táchí, te ta nàdachitú-xi ndute xití bàrcú cuáháⁿ.

²⁵ Te cue tée xica cuu ndihi-gá cuáháⁿ-güedé núú cáá-gá xidí-gá, te xáhaⁿ-güedé xii-gá:

—jMèstrú, ndiquúú iní chí dàcácu ñaha-n xii-o chí quée naa-o cuini-xi!—càchí-güedé xáhaⁿ-güedé xii-gá.

²⁶ Te Jèsús ní xáhaⁿ-gá xii-güedé:

—¿Ná cuèndá ndéé ducaⁿ ìo yùhú-ndó? ¿Náa ñá túú sàndáá iní ñàhá ndísa-ndo xii-í-án?—càchí-gá xáhaⁿ-gá xii-güedé.

Te Jèsús ní ndacoo-gá te ní tenàá-gá táchí-án ndihi ndute-án, te ní ngúñí táchí-án te ní nucúndecu nahi-ná ndute làgúná-án.

²⁷ Te nchaa cue tée ñuhu xití bàrcú-án ní cuñuhu-güedé sá dúcáⁿ ní quide-gá ní xiní-güedé, te ní xitnáha-güedé:

—¿Te ná tée cùu tée-a núu duha ní cáháⁿ-ni-dé te ní ngúñí táchí te ní nucúndecu nahi-ni ndute làgúná-a-í?—càchí-güedé xitnáha-güedé.

Cue tée ñuú Gàdará cue tée yíhi ñaha espíritu cundíhi yucu ñávaha
(Mr. 5:1-20; Lc. 8:26-39)

²⁸ Te òré ní quèxio Jèsús ndàa ingá xio yuhu làgúná yucu cue tée ñuú Gàdará, te úú tnàhá cue tée quide vehe núú yindúxi ndíyi ní quee-güedé cuáháⁿ-güedé núú ndécú Jèsús, te ndi nduú-güedé yíhi ñaha espíritu cundíhi yucu ñávaha xii-güedé, te ío màñá-güedé chí vá yòo tnàhi dàña-güedé yáha yatni núú ndécú-güedé.

²⁹ Te cue espíritu yíhi ñaha xii-güedé-án ní quide-xi níhi ní cáháⁿ-güedé, te xáhaⁿ-güedé xii-gá:

—¿Ná cuèndá véxi-ò Jèsús Déhe Dútú Ndìoxí chidácá ñàhá-n xii-ndí? ¿Áⁿ sáma véxi-n dàndoho ñaha-n xii-ndí? Te vátá sáa-gá nduu dùcaⁿ cada-n—càchí-güedé xáhaⁿ-güedé xii-gá.

³⁰ Te yatni xiáⁿ xíxica cuu vai cuchí xíxexi-güedi.

³¹ Te cue espíritu cundíhi yucu ñávaha yíhi ñaha xii cue tée-án ní cáháⁿ ndàhú-xi núú Jèsús, te xáhaⁿ-xi:

—Te núu vá dàñá-gá-n quihí-ndí yiqui cùñú cue tée-a, te cáháⁿ ndàhú-ndí núú-n sá dàña-n na quihíⁿ-ndí quihu-ndí yiqui cùñú nchaa cùchí-án—càchí cue espíritu-án xáhaⁿ-xi xii-gá.

³² Te Jèsús ní xáhaⁿ-gá xii cue espíritu cundíhi yucu ñávaha-án:

—Chí táquèe yiqui cùñú cue tée-án te quihíⁿ-ndó núu ndéé ichi quihíⁿ-ndó—càchí-gá xáhaⁿ-gá xii nchaa espíritu-án.

Te cue espíritu cundíhi yucu ñávaha-án ní quee-xi yiqui cùñú cue tée-án, te cuáháⁿ-xi cuánguihu-xi nchaa cuchí-án. Te cue quití-án ní xinú-güedi duha ní quée-güedi ndàa núú dèhvá yuhu làgúná-án, te ní ngaunilhu-güedi xití ndute, te ní ndihi-güedi ní cáhá.

³³ Te cue tée xito ñaha xii nchaa cuchí-án ní yùhú-güedé te ní xinú-güedé, te ní sáháⁿ-güedé ní cani-güedé cuèndú núú cué ñáyi ndècu xití ñuú nchaa nàcuáa ní cuu cuèndá cue tée ní xihí ñaha ncháa espíritu cundíhi yucu ñávaha-án.

³⁴ Te nchaa ñáyi ñuú-án ní quee-yu cuáháⁿ-yu núú ndécú Jèsús. Te òré ní quexiò-yu núú ndécú-gá te ní cáháⁿ ndàhú-yu núú-gá sá ná quèe-gá yucu ñuú-yu nùhú-gá.

9

Jèsús quidé tātna-gá ìn tée cùhú ñá cúu-gá candá nihnu

(Mr. 2:1-12; Lc. 5:17-26)

¹ Te sáta dúcáⁿ ní cuu te Jèsús cuánde-gá bàrcú cuáháⁿ-gá ní natehndé-gá ndàa ingá xio yuhu làgúná. Te xiáⁿ ní ndexio-gá ñuú núú quidé ñuú-gá.

² Te xiáⁿ ndécú-gá ní quexìo cue téé nchìdo-güedé ìⁿ téé cùhú ñá cùú-gá candá nihnu ñùhu-dé xító, te Jèsús ní cutnùnì iní-gá sá sàndáá ndisa iní ñáhá-güedé xii-gá núu ní xáhaⁿ-gá xii téé cùhú-áⁿ:

—Yòhò téé cùhú vá ndìhú-gá iní-n, chí sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

³ Te sá dúcáⁿ ní cáháⁿ-gá núu xiáⁿ cue téé dàcuaha ñaha xii ñáiyu nchaa tnúhu ní chído tnùnì ndí Moisés ní sani iní-güedé: “Téé-a cáháⁿ cuéhé-dé cuendá Yá Ndióxi”, duha ní sani iní-güedé.

⁴ Te Jèsús ní cutnùnì iní-gá nàcuáa sàni iní-güedé núu ní xáhaⁿ-gá xii-güedé:

—¿Ná cuendá ducaⁿ sàni cuehé sání dùha iní-ndó?

⁵ Te sá dúhá ní xáhaⁿ-í xii téé cùhú-a sá ní quide càhnu iní-í nchaa yíca cuéchi-dé, te xiáⁿ nchòhó ñá túú cùtnunì iní-ndó núu ndáá cáháⁿ-í àdi ñá ndáá. Dico núu cùu-í-dé sá ndácòo-dé te caca-dé, te cutnùnì ndáá iní-ndó núu ndáá cáháⁿ-í àdi ñá ndáá, chí cundehe núu-ndó nàcuáa cada-í.

⁶ Te vitna na càda-í nàcuáa cutnùnì iní-ndó nchàa-ndo sá yùhú Téé cùu ñani tnáhá-ndó nchàa-ndo ndecu ndìhi-í tnúhu ndee iní ñuyíú-a sá cadá càhnu iní-í nchaa cuéchi ñáiyu —càchí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii téé cùhú-áⁿ:
—Ndacóo, te ndocani-n xító ñùhu-n véxi-áⁿ te nùhú-n vèhe-n —càchí-gá xáhaⁿ-gá xii-dé.

⁷ Te òrè-ni-áⁿ ní ndúha téé cùhú-áⁿ te ní ndacòo-dé te ní ndocani-dé xító ñùhu-dé ní quexìo-áⁿ te ní xica-dé cuànuhú-dé vèhe-dé.

⁸ Te nchaa ñáiyu xíndecu-áⁿ ìo ní cuñúhu-yu sá dúcáⁿ ní quide Jèsús ní xiní-yu, te ní cachí-yu sá ìo càhnu cuu Yá Ndióxi cuendá sá ní sáñaha-gá xii Jèsús tnúhu ndee ìni cada-gá nchaa sá vā yòo tnàhì ndàcu cada.

Jèsús càháⁿ-gá ìⁿ téé nàni Mateú chitnahá ñáhá-dé xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcòo ìⁿ téé nàni Mateú quidé còbrá-dé ñáiyu chí còbràdòr impuèstú cùú-dé, te ní xáhaⁿ-gá xii-dé:

—Màteú, néhé chitnahá ñáhá-n xii-í —càchí-gá xáhaⁿ-gá xii-dé.

Te té Màteú-áⁿ ní ndacuíñí-dé ní chitnahá ñáhá-dé xii-gá.

¹⁰ Te ìⁿ xito ndècu Jèsús ìⁿ vèhe, te yìhì-gá mèsá ndìhi cue téé xica cuu ndìhi-gá xéxi ndìhi ñaha-gá xii-güedé. Te tnàhá cue téé cuihna iní-xi quide còbrá ñáhá xii ñáiyu cuendá impuèstú yíhì ndìhi-gá mèsá, te tnàhá tucu dava-gá cue téé ndècu ichi cuehé ichi duha yìhì ndìhi-gá mèsá.

¹¹ Te sá ní xiní cue téé cùu fariséú xéxi Jèsús ndìhi nchaa cue téé-áⁿ, te ní xicáⁿ tnúhú-güedé núu cuè téé xica cuu ndìhi-gá, te xáhaⁿ-güedé:

—¿Ná cuendá ducaⁿ quide téé cùu mestrú-ndó xéxi-dé ndìhi cue téé cuihna iní-xi quide còbrá ñáhá xii ñáiyu cuendá impuèstú, ndìhi nchaa dava-gá cue téé ndècu ichi cuehé ichi duha-í? —càchí-güedé xáhaⁿ-güedé.

¹²⁻¹³ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue téé xica cuu ndìhi-gá, núu ní xáhaⁿ-gá xii-güedé:

—Nchaa ñáiyu ñá túú cùhú chí ñá túú xiní ñùhú-yu ñátátná, dico nchaa ñáiyu cùhú chí xiní ñùhú-yu ñátátná. Te yùhú véxi-í cáháⁿ-í ñáiyu cùtnunì iní-xi sá ndécú cuéchi-xi cuendá dàñá-yu nchaa sá cuehé sá dúhá quidé-yu, te ñá túú véxi-í cáháⁿ-í ñáiyu càchí sá ñá túú ndècu cuéchi-xi. Te chí cadá cuendá váha nàcuáa cáháⁿ Yá Ndióxi núu tütú-gá núu càchí-xi: “Yùhú cuìní-í sá cùndàhù iní-ndó cuè tnaha ñáiyu-ndo, te ñá díú mèe-ni sá càhni-ndó quiti nduu táhù-í”, duha càchí-gá núu tütú-gá —càchí Jèsús xáhaⁿ-gá xii-güedé.

Cue téé ndècu tnúhu núu Jèsús cuendá ñáiyu ñá túú tnàhì ná xéxi áma càháⁿ ndìhi-yu Yá Ndióxi

(Mr. 2:18-22; Lc. 5:33-39)

¹⁴ Te cue téé xica cuu ndìhi té Juàá téé dàcuandute ñaha xii ñáiyu ní sáháⁿ-güedé núu ndécú Jèsús, te xicáⁿ tnúhú-güedé núu-gá, te xáhaⁿ-güedé:

—Cuìní-ndí cachí tnúhu-n nã cuendá nchúhú, ndìhi cue téé cùu fariséú ñá túú tnàhì ná xéxi-ndí áma càháⁿ ndìhi-ndí Yá Ndióxi, te cue téé xica cuu ndìhi-n ñá túú dùcaⁿ quide-güedé —càchí-güedé xáhaⁿ-güedé xii-gá.

¹⁵ Te Jèsús ní xáhaⁿ-gá xii-güedé:

—Nchòhó xiní-ndó sá vā cùú cùñaha-o xii ñáiyu ñùhu vico tnàndaha sá vā cùú caxí-yu ñini ndècu ndìhi ñaha téé tnàndaha xii-yu, dico sáá nduu vā cùndècu ndìhi ñaha-gá téé tnàndaha-áⁿ xii-yu, te dàvā-áⁿ te cahni iní-yu vā caxí-yu cuendá sá ndìhú iní-yu.

¹⁶ Te ni vā yòo dàndée luha dóo sáá ìⁿ dóo sa ní cuu tùhú víhì, chí dóo sáá-áⁿ nàndiyi-xi te uuⁿ-gá ndata-xi dóo sá ní cuu tùhú-áⁿ.

¹⁷ Te ni vā yòo chíhì ndidí sáá xití ìⁿ lamba sa ní cuu tùhú víhì, chí núu yoo ducaⁿ na càda te ndava lamba sa ní cuu tùhú-áⁿ chí ìo níhì yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdà-yu, núu xiáⁿ xiní ñùhu-xi quée ndidí sáá-áⁿ xití ìⁿ lamba saa cuendá ducaⁿ ñá túú ná cuu cováha-xi —càchí-gá xáhaⁿ-gá xii-güedé.

Cuendá déhe yoco té Jairú ndihi cuendá ññ
ñaha ní tnándeé dóó Jèsús
(Mr. 5:21-43; Lc. 8:40-56)

18 Te cáháⁿ dúcáⁿ-ní Jèsús ní quexio ññ tée cūnuu núú ndécú-gá, ññ tée táxi tñuní veñúhu, te ní ngúñí xítí-dé núú-gá cáháⁿ ndàhú-dé, te xáhaⁿ-dè xii-gá:

—Véxi-í cáháⁿ ndàhú-í núú-n nūu vá cūndèe iní-n quíhíⁿ-ó vèhe-í dandòto-n déhe yoco-í chi ní xíhí-xi tnávíí, te yúhú cútñuní iní-í sá núu quíhíⁿ-n tēndaha-n yiqui cuñú-xi te ndoto-xi —cächí-dé xáhaⁿ-dè xii-gá.

19 Te Jèsús ní xica-gá cuáháⁿ-gá ndihi-dé ndihi cue tée xica cuu ndihi-gá.

20 Te ichi ññhu-gá cuáháⁿ-gá ní sáháⁿ ññ ñadhí ní tnándeé-aⁿ yuhu dōó-gá ndàa sátá-gá, te ñaha-áⁿ sa ní cuu úxúú cuáá sá cùhú-aⁿ ngòyo ñaha níñí xii-aⁿ.

21 Te ducaⁿ ní quide-aⁿ chi ní sani iní-aⁿ sá núu ndacu-aⁿ tnándeé-aⁿ cuédicó luha yuhu dóó Jèsús te ndúha-aⁿ ní sani iní-aⁿ.

22 Te Jèsús ní nchócótó-gá ndàa sátá-gá te ní xini-gá ñadhí-áⁿ, te ní xáhaⁿ-gá:

—Yòhó ñaha cùhú, vá ndihí-gá iní-n vitna chi sa ní ndúha-n, chi ní sándáá iní ñáhá-n xii-í —cächí-gá xáhaⁿ-gá xii-aⁿ.

Te òré-ni-áⁿ ní ndúha ñaha cùhú-áⁿ.

23 Te òré ní quexio Jèsús vehe tée cūnuu taxi tñuní veñúhu-áⁿ, te ní xini-gá xíndáhí vihí ññyiu, te xíndecu músicú.

24 Te ní xáhaⁿ-gá xii-yu:

—Chí táquèe xítí vehe-a, chi xíchí-a ñá túú ní xíhí-xi chí dicó xidí-xi —cächí-gá xáhaⁿ-gá xii-yu.

Te ní sácú ndeé ñáhá-yu xii-gá sá dúcáⁿ ní cáháⁿ-gá, chí sá cúú-xi mèe-yu te ní xíhí ndisa xíchí-áⁿ.

25 Te ññyiu-áⁿ ní quee-yu te cuánguihu Jèsús núú cándodo xíchí ní xíhí-áⁿ, te ní tññ-gá ndaha-xi te òré-ni-áⁿ ní ndacóo-xi.

26 Te nchaa ññú cáá yàtni xíaⁿ ní níhí ññyiu tññhu nàcuáa ní quide Jèsús.

Jèsús quidé táma-gá núú úú tnàhá cue tée cuáá

27 Te sátá dúcáⁿ ní cuu te ní xica Jèsús cuánuhú-gá, te ichi ññhu-gá ní chinchícúⁿ ñáhá úú tnàhá cue tée cuáá xii-gá, te níhí cáháⁿ-güedé, te xáhaⁿ-güedé xii-gá:

—Yòhó Jèsús, tée cūu ññaní tnàhá ndíi Dávíí, cundàhú iní ñáhá xii-ndí —cächí-güedé xáhaⁿ-güedé xii-gá.

28 Te òré ní nasáá Jèsús núú quidé vèhe-gá, te cue tée cuáá-áⁿ ní quexio-güedé ndeé núú-gá, te ní xicáⁿ tññhú-gá núú-güedé, te xáhaⁿ-gá:

—¿Sándáá iní-ndó sá yùhú ndacu-í cada tátna-í núú-ndó-áⁿ? —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Sándáá iní-ndí sá díú yòhó Jèsús ndacu-n cada tátna-n núú-ndí —cächí-güedé xáhaⁿ-güedé xii-gá.

29 Te Jèsús ní dácáá-gá ndaha-gá ní tēndaha-gá núú-güedé, te ní xáhaⁿ-gá xii-güedé:

—Te vitna, ndúha núú-ndó chí ní sándáá iní-ndó sá díú yùhú ndacu-í cada tátna-í núú-ndó —cächí-gá xáhaⁿ-gá xii-güedé.

30 Te òré-ni-áⁿ ní ndúha núú-güedé, te Jèsús ní cáháⁿ vihí-gá dóho-güedé cuendá sá vá cáháⁿ-güedé nàcuáa ní cuu ní ndúha núú-güedé.

31 Te cue tée-áⁿ òré ní ndee-güedé núú ndécú Jèsús, te ní ngúita-ni-güedé ní caní-güedé cuendú núú ññyiu nàcuáa ní quide ñaha-gá xii-güedé. Te nchaa dáva-gá ññú cáá yàtni xíaⁿ ní sáháⁿ-güedé ní caní-güedé cuendú núú ññyiu nàcuáa ní quide ñaha Jèsús xii-güedé.

Jèsús quidé tátna-gá ññ tée ññhí

32 Te íchí ní ndee cue tée ní ndúha núú-xi-áⁿ núú ndécú Jèsús, te ní quexio ññ úú ññyiu ndécá-yu ññ tée ññhí yíhí ñaha espíritú cundíhi yucu ññávaha.

33 Te Jèsús ní queññuhu-gá espíritú cundíhi yucu ññávaha yíhí ñaha xii tée-áⁿ, te òré-ni-áⁿ ní cuu ní nacáháⁿ-dè. Te nchaa ññyiu xíndecu-áⁿ ññ ní cuññuhu-yu, te ní xítnàhá-yu:

—Ñá túú tnàhí xini-ó ññ tée duha cada ññú nchoo cué ññyiu isráél ní cūu —cächí-yu xítnàhá-yu.

34 Te cue tée cūu fariséú ní ngúita-güedé xítnàha-güedé:

—Tée-a chí sácúlná chíndèe ñaha-xi xii-dé queññuhu-dé nchaa espíritú yíhí ñaha xii ññyiu te díu-ní sácúlná-áⁿ táxi tññn-í-xi nchaa espíritú-áⁿ —cächí-güedé xítnàha-güedé.

Jèsús cundàhú iní-gá ññyiu

35 Te Jèsús cuáháⁿ-gá nchaa ññú náhnú ndíhí nchaa ññú líhli, te ndí tnàhá ññ ññú ññú sáá-gá te ducaⁿ cuánguihu-gá ññ ññ veñúhu cāa nchaa ññú-áⁿ dánèhè-gá ññyiu tññhu váha, tññhu sá sánú ichi ñaha xii-yu nàcuáa ndáhu ndaha ñaha Yá Ndióxi xii-yu. Te ducaⁿ-ni ta quide tátna-gá nchaa ññyiu cùhú cuáháⁿ cuéí ndí dííⁿ ndí dííⁿ núú cuéhé tnàhá-yu ññ ññ-yu.

36 Te sá ní xini Jèsús sá ññ vài ññyiu nchicúⁿ ñáhá xii-gá, te ní cundàhú iní ñáhá-gá xii-yu chí ññ ndíhú iní-yu, te vá yòo nèhe cuendá ñáhá xii-yu, te cūu-yu dàtná cue mbéé cue quiti ñá túú tòli-xi.

37 Te Jèsús ní xáhaⁿ-gá xii cue tée xica cuu ndíhí-gá:

—Nchòhó xini-ndó sá òré ná sáá nduu cūu nchaa sá xítú ññyiu te ññ vài cuu. Te na cächí tññhu ndáá-í xii-ndo sá dàtná ññ vài sá xítú ññyiu cūu, ducaⁿ ññ vài ññyiu cūmání

cudedóho tnúhu-í, te ío sacú ñáiyu dàcuaha ñaha xii-yu.

³⁸ Núu xiáⁿ xíní ñùhu-xi cacaⁿ-ndó núú Yá Ndióxi Yaá cúú Xitohó-ndó ndihí-yu cuendá sá ná dàcahaⁿ-gá iní-yu cáháⁿ-yu tnúhu-gá núú ncháa dava-gá tnàha ñáiyu-yu cùmání cudedóho tnúhu-gá —càchí-gá xáhaⁿ-gá xii-güedé.

10

Jesús sãñaha-gã ndi ùxúú ndee iní xii ndi ùxúú cue téé xica cuu ndihí-gã

(Mr. 3:13-19; Lc. 6:12-16)

¹ Te Jesús ní cana-gá ndi ùxúú cue téé xica cuu ndihí-gá, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé nchaa espíritú cundihí yucu ñávãha yíhi ñaha xii ñáiyu, ndihí cuendá sá cádá tátna-güedé nchaa dava-gá ñáiyu cùhú cuéi nándi núú cuéhé tnàhá-yu.

² Te duha xinani ndi ùxúú cue téé-áⁿ: téé cùnno-gá nání-dé Xímú, àdi Pelú chí úú diu-dé, te ñaní-dé cúú tã Ndríxí, te tnàhá téé-áⁿ cúú-dé téé xica cuu ndihí Jesús, ndihí té Jacobó ndihí ñaní té Jacobó-áⁿ tãe ñani Juaa, te ndi ndúú cue téé-áⁿ cúú-güedé déhe té Zebèdeú.

³ Te tnàhá té Lípé xícá cùu ndihí-gá, ndihí té Bartolomé, ndihí té Máxi, ndihí té Mátéu téé cùu cobrador impuestú ní cùu, ndihí té Jacobó déhe té Àlféú, ndihí té Lèbeú téé dãnani-güedé Tãdeú,

⁴ ndihí té Xímú téé ní cundihí cue téé cananístá, ndihí té Judás Iscarioté téé ní sáá nduu ní sáha cuendá ñáhá xii Jesús núú cué téé cùu úhú iní ñáhá xii-gá.

Jesús téndãha-gã ndi ùxúú cue téé xica cuu ndihí-gã quíhiⁿ-güedé cáháⁿ-güedé tnúhu-gã núú ñáiyu

(Mr. 6:7-13; Lc. 9:1-6)

⁵⁻⁶ Te Jesús ní xáhaⁿ-gã xii ndi ùxúú cue téé xica cuu ndihí-gá sá quíhiⁿ-güedé cáháⁿ-güedé tnúhu-gá núú ñáiyu, te cùmání-gã caca-güedé quíhiⁿ-güedé, te ní xáhaⁿ-gã xii-güedé:

—Na càchí tnúhu-í xii-ndo sã méé-ñí ñúú núú xíndecu cue ñáiyu isráel quíhiⁿ-ndó cáháⁿ-ndó tnúhu-í, te vá quíhiⁿ-ndó ní ñúú ñúú yíndèhu distritú Sãmariá, te ní vá quíhiⁿ-ndó dáva-gá ñúú núú xíndecu ñáiyu ñá túú cùu ñáiyu isráel. Te cue ñáiyu isráel-áⁿ cùu-yu dàtná cue mbéé cue quítí ní xíta chí ta xíta nihnú-yu cuáháⁿ.

⁷ Te cúñaha-ndo xii-yu sá sã ní cuyatni nduu ndíhu ndaha ñaha Yá Ndióxi xii-yu.

⁸ Te cada tátna-ndo ncháa ñáiyu cùhú cuéi ñáiyu tnàhá cuéhé sã dátèhyú nihnu-xi yiqui cùñu-yu, te queñuhu-ndo ncháa espíritú cundihí yucu ñávãha yíhi ñaha xii

ñáiyu, te dandòto-ndo cue ñáiyu sa ní xíhí, te vá cacáⁿ-ndó yáhu-ndo núú ñáiyu òré cada-ndo ncháa chiuⁿ-áⁿ, chí sa ñaha-ndo sá dicó ducaⁿ ní taxi-í tnúhu ndee iní ndécú ndihí-ndo.

⁹ Te vá cánèhe-ndo díhúⁿ cuu ichi-ndo,

¹⁰ te ní vá cánèhe-ndo ñunu cuhuⁿ ndachiuⁿ-ndo, te ní vá cánèhe-ndo ingá ichi dóó-ndó nãdáma-ndo, te ní vá cánèhe-ndo úú-gá chàu-ndó chí diu-ni chàu yíhi-ndó-áⁿ xiáⁿ-ni quíhi-ndo, te ní vá cánèhe-ndo tatnu, te ducaⁿ càda-ndo chí nchòhó sa ñaha-ndo sá ncháá ñáiyu quide chiuⁿ te diu-ni cuendá chiuⁿ quidé-yu nihí-yu sá xéxi-yu.

¹¹ Te ndi tnàhá ñúú ná quèxio-ndo te nducu-ndo ñáiyu cùtnuní iní-ndó sã cúú-yu ñáiyu váha, te vehe ñáiyu-áⁿ cundecu-ndo ndéé sáá nduu ndèe-ndo ñúú-áⁿ.

¹² Te òré quèxio-ndo vehé-yu te cúñaha-ndo xii-yu: “Yá Ndióxi chíndèe chitúu ñaha-gã xii-ndo ndècu-ndo”, duha cúñaha-ndo xii-yu.

¹³ Te núu ní cáháⁿ váha ndihí ñáhá-yu xii-ndo, te cuu-xi sá váha sá cúú-xi-yu cuendá tnúhu ní xáhaⁿ-ndo-áⁿ, dico núú ñá túú ní cáháⁿ váha ndihí ñáhá-yu xii-ndo, te cúñaha-ndo xii-yu sá vá cúú-xi sá váha xii-yu tnúhu ní xáhaⁿ-ndo-áⁿ.

¹⁴ Te núu ní sáá-ndó ñúú àdi ñúú vehe, te núu ñá túú ní cáháⁿ ndihí ñaha váha-yu xii-ndo te ní ñá túú ní cùnín-yu cudedóho-yu tnúhu cáháⁿ-ndó te ndee-ndo ñúú-áⁿ àdi vehe-áⁿ, te naquidi-ndo tícá chúhmá ní tnúú sáhá-ndó cuendá ná cùtnuní iní-yu sá ñá túú quide váha-yu.

¹⁵ Te na càchí tnúhu ndáá-í xii-ndo sã sáá nduu te ío-gá dandòho ñaha Yá Ndióxi xii ñáiyu ducaⁿ na càda ñaha xii-ndo-áⁿ dàcúúxi ñáiyu ní xíndecu ñúú Sòdomá ndihí ñúú Gòmorra.

Ndoho tnàhá-ó cundecu-o ichi Xitohó Jesu-cristú

¹⁶ Te cada iní-ndó sã cúú-ndó dàtná cue mbéé cue quítí cuáháⁿ núú ío yíhi. Te ducaⁿ sãtnahá-xi cùu-ndo chí yúhú tendaha ñaha-í xii-ndo quíhiⁿ-ndó núú xíndecu cue ñáiyu cuihna iní-xi, te ío váha cuáha-ndo cuendá nãcuáa cada-ndo dàtná quidé cóó, dico cunduu váha iní-ndó ñá túú ná cada-ndo dàtná quidé lómá.

¹⁷ Te quíhi iní-ndó chí cue ñáiyu na cùu úhú iní ñáhá xii-ndo, te cuáha cuendá ñáhá-yu xii-ndo núú cué téé cùchiuⁿ, te caniha-güedé xii-ndo xítí veñúhu-güedé.

¹⁸ Te dava tucu ñáiyu cu úhú iní ñáhá xii-ndo candeca ñáhá-yu xii-ndo quíhiⁿ núú cué téé cùnno yindaha nacióⁿ, àdi núú dáva-gá cue téé cùnno sá cuendá-í. Te nchòhó nihí-ndó nãcuáa cada-ndo cáháⁿ váha-ndo

cuendá-í núú-güedé ndihí núú cuè ñáiyu ñá túú cùu ñáiyu isráel.

¹⁹⁻²⁰ Dico òré cuáha cuendá ñáhá-yu xii-ndo núú ncháa cue téé-án, te vá cání iní-ndó núú nása cunduu tnúhu cáháⁿ-ndó núú-güedé, chí òré-ná te níhí-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chí mee Espíritú Yá Ndióxi Yáá cúú Tátá-ndó dàcahú iní ñáhá-xí xii-ndo nacuaa cunduu tnúhu cáháⁿ-ndó.

²¹ Te dava cue téé cuáha cuendá-güedé ñaní-güedé núú cuè téé cùchiuⁿ cuendá cahni ñaha-güedé, te dava cue téé cùu tátá ñu-ni ducaⁿ càda-güedé déhe-güedé, te ñu-ni ducaⁿ càda ñaha dava cue ñáiyu cùu déhe xii tátá-yu ndihí náná-yu, chí cuáha cuendá ñáhá-yu núú cuè téé cùchiuⁿ cuendá cahni ñaha-güedé xii-yu.

²² Te nchòhó chí nchaa ñáiyu ngüita-yu cuu úhú iní ñáhá-yu xii-ndo sá cuendá-í. Te núu na càda ndee-ni iní-ndó càncicúⁿ nihnu-ni-ndo ichi-í cuèi nándi sá ná càda ñáhá-yu xii-ndo ndéé ná sàà nduu vá cùndecu-gá-ndó ñuyúú-a ña, te nduu táhú-ndó cùndecu-ndo ni caa ni quíhíⁿ ndihí Yá Ndióxi.

²³ Te núu ñuⁿ ñuú cuíni-güedé tnúⁿ ñaha-güedé xii-ndo càda úhú ñáhá-güedé sá cuendá-í, te cunu-ndo núú-güedé quíhíⁿ-ndó ñngá ñuú. Te na càchí tnúhu ndáá-í xii-ndo sá cùmání-gá quíhíⁿ-ndó ncháa dava-gá ñuú núú xíndecu ñáiyu isráel cáháⁿ-ndó tnúhu-í, te sa quixi tucu yúhú, Téé cùu ñani tnáhá-ndó ncháa-ndo ñuyúú-a.

²⁴⁻²⁵ Te nchòhó xini-ndó sá ni ñuⁿ téé dàcuaha ñá túú cùnuu-dé dàcúúxí mèstrú-dé, te núú mèstrú téé-án nándi yáha-dé ndécú-dé te táu-dé nduu vétú iní-dé te núú tnáhá-dé yáha-dé dàtná yáha mèstrú-dé-án. Te ñu-ni ducaⁿ sátnhá tucu-xi cùu ñuⁿ téé xinu cuechi, chí ñá túú cùnuu-dé dàcúúxí pàtróoⁿ-dè, te nchaa sá yáha pàtróoⁿ-dè-án te táu-dé nduu vétú iní-dé te núú tnáhá-dé yáha-dé dàtná yáha pàtróoⁿ-dè-án. Te núu yúhú Yáá táxi tnùnì ñáhá xii-ndo cachí-yu sá cùu-í sácúíhná, te uuⁿ-gá ducaⁿ cùñáhá-yu xii nchòhó cue téé cùndihí-í.

Vá yúhú-ó cuendá nchaa sá càdá ñaha ñáiyu xii-o

(Lc. 12:2-7)

²⁶ Te nchòhó vá yúhú-ndó núú ñáiyu. Chí nchaa tnúhu sá cúú yúhu ni cuu vá cúú yúhu-gá, chí nchaa dacutíí sá queé tñu-xi núú ñáiyu.

²⁷ Te nchaa tnúhu sá càchí tnúhu-í xii-ndo núú mèé núú ñuⁿ-ó, cùu-xi tnúhu sá ndúú yúhu ni cuu datúu-ndo núú cuè ñáiyu cuèi núú chítú núú tacá.

²⁸ Te xini ñuhu-xi sá vá yúhú-ndó cuè ñáiyu cuèi na càhni ñahá-yu xii-ndo, chí ñu-ni

yiqui cùñú-ndó ndacú-yu cahni-yu, dico ñá túú nágá ndacú-yu cada ñáhá-yu xii-ndo. Te táu-ndó sá Yá Ndióxi yúhú-ndó chí Yáá-án ndacu-gá danáa-gá yiqui cùñú-ndó, te ndacu-gá daquihíⁿ ñáhá-gá xii-ndo núú úhú núú ndàhu.

²⁹ Te nchòhó xini-ndó sá ndéé úú tnáhá tìlaá cùyáhu-di núú ñuⁿ-ní díhúⁿ, te ni ñuⁿ-di ñá túú xihí cùtexinu-di chí ndéé núu mee Yá Ndióxi Yáá cúú Tátá-ndó ná càchí-gá te xihí-di.

³⁰ Dico nchòhó chí ío-gá néhé cuendá ñáhá Yá Ndióxi xii-ndo chí ndéé idi díquí-ndó yíndehu.

³¹ Núu xíáⁿ càchí-í sá vá yúhú-ndó chí cùnuu-gá-ndó dàcúúxí tìlaá cuèi vai vihi-güedé.

Nchaa ñáiyu datúu núú tnaha ñáiyu-xi sá ndécú ndihí-yu Xitohó Jesucristú
(Lc. 12:8-9)

³² Te na càchí tnúhu-í xii-ndo sá ncháá ñáiyu na datúu núú tnaha ñáiyu-xi sá ndécú ndihí ñáhá-yu xii-í, te ducaⁿ te tnáhá yúhú datúu-í núú Tátá-í Dútú Ndióxi Yáá ndécú àndiu sá ndécú ndihí-í-yu.

³³ Dico nchaa ñáiyu na cùñaha xii tnaha ñáiyu-xi sá ñá túú ndécú ndihí ñáhá-yu xii-í, te ñu-ni ducaⁿ càda yúhú tucu chí cùñaha-í xii Tátá-í Dútú Ndióxi Yáá ndécú àndiu sá ñá túú ndécú ndihí-í-yu.

Ñá túú cùu ñuⁿuu ñáiyu

(Lc. 12:51-53; 14:26-27)

³⁴ Te na càchí tnúhu-í xii-ndo sá vá cání iní-ndó sá yúhú véxi-í ñuyúú-a te cuu ñuⁿuu-gá ñáiyu cundecú-yu, chí da ngüita-yu vá cúú ñuⁿuu-gá-yu cundecú-yu, te ducaⁿ chí nchaa ñáiyu vá quindáá iní ñáhá xii-í ñáiyu-án ngóo-yu cuu úhú iní-yu nchaa ñáiyu quindáá iní ñáhá xii-í.

³⁵ Te dava cue téé xíndecu tátá-xi te ngóo-güedé cuu úhú iní-güedé tátá-güedé, te ñu-ni ducaⁿ càda cue ñáiyu díhí xíndecu náná-xi, chí ngóo-yu cuu úhú iní-yu náná-yu, te ñu-ni ducaⁿ càda tucu cue ñáiyu cùu sánu, chí ngóo-yu cuu úhú iní-yu náná yíí-yu.

³⁶ Te ndi mèé-yu vehé-yu ngóo-yu vá cúú ñuⁿuu-gá-yu cundecú-yu.

³⁷ Te na càchí tnúhu tucu-í xii-ndo sá ncháá ñáiyu ío-gá ná cùu iní tátá-xi àdi náná-xi dàcúúxí yúhú, te ñáiyu-án ñá túú táu-yu cundecu ndihí ñáhá-yu xii-í, te nchaa ñáiyu ío-gá ná cùu iní déhe ducuⁿ-xi, àdi déhe yoco-xi dàcúúxí yúhú, te ñu-ni ducaⁿ ñá túú táu-yu cundecu ndihí ñáhá-yu xii-í.

³⁸ Te nchaa ñáiyu vá càncicúⁿ nihnu ñaha xii-í cuendá sá yúhú-yu ndohó-yu dàtná ndoho-í ñáiyu-án ñá túú táu-yu cundecu ndihí ñáhá-yu xii-í.

³⁹ Te cue ñáiyu na yùhú cuú sá cuendá-í te ñáiyu-án cuíta nihnú-yu, dico nchaa ñáiyu vá yùhú cuú sá cuendá-í, te ñáiyu-án nduu táhũ-yu cundecú-yu ni caa ni quíhⁱⁿ ndíhi Yá Ndióxi.

*Cuendá sá ndúú táhú-ó
(Mr. 9:41)*

⁴⁰ Te nchaa ñáiyu na quèheⁿ cuendá ñáhá xii-ndo te cada iní-yu sá tnàhá yùhú ní queheⁿ cuendá-yu. Te nchaa ñáiyu na quèheⁿ cuendá ñáhá xii-í, te cada iní-yu sá tnàhá Tàtà-í Dútu Ndióxi Yá ní tendaha ñaha xii-í véxi-í ñuyúyú-a ní queheⁿ cuendá-yu.

⁴¹ Te nchaa ñáiyu na quèheⁿ cuendá ñⁱⁿ tée càháⁿ tnúhu Yá Ndióxi cuendá sá quidé-dé chiúⁿ-gá, te dàtná-ni càa táhú cuáñaha-gã nduu táhú tée ducaⁿ càháⁿ tnúhu-gá-án, ñu-ni ducaⁿ cunduu táhú cuáñaha-gã nduu táhú ñáiyu ducaⁿ na quèheⁿ cuendá ñáhá xii-dé. Te nchaa ñáiyu na quèheⁿ cuendá ñⁱⁿ tée quide váha cuendá sá dúcáⁿ quide váha-dé, te dàtná-ni càa táhú nduu táhú tée-án ñu-ni ducaⁿ cunduu táhú nduu táhú ñáiyu na quèheⁿ cuendá ñáhá xii-dé.

⁴² Te nchaa ñáiyu na cuáñaha ñⁱⁿ yaxiⁿ ndute coho ñⁱⁿ ñáiyu cùu cuendá-í cuendá sá ní tuha ñáhá-yu xii-í cuéi ñá túú cùnuu víhí-yu, te ñáiyu ducaⁿ na cuáñaha ndúte-án ñíhí-yu sá ndúú táhũ-yu núú Yá Ndióxi — càchí Jesús xáhaⁿ-gã xii-güedé.

11

Jesús càháⁿ ndíhi-gá cue tée xica cuu ndíhi té Juàá

(Lc. 7:18-35)

¹ Te sátá ní yáha ducaⁿ ní xáhaⁿ Jesús xii ndi úxúu cue tée xica cuu ndíhi-gá, te ní xica-gá cuáháⁿ-gã nchaa ñuú cáa yàtni xiáⁿ dánèhé-gã ñáiyu tnúhu-gá.

² Te té Juàá yíhi-dé vecaá te ní níhí-dé tnúhu nchaa nàcuáa quide Xitohó Jesucristú. Te sátá dúcáⁿ te ní tendaha-dé ñⁱⁿ úú cue tée xica cuu ndíhi-dé cuáháⁿ-güedé núú ndécú Jesús.

³ Te órè ní quexìo-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ té Juàá xii-güedé, te xáhaⁿ-güedé xii-gã:

—Véxi-ndí xicáⁿ tnúhú-ndí núú-n ñuú sá díú-n cùu-n Cristú Yá ní tendaha Yá Ndióxi véxi ñuyúyú-a, àdi sá cündetu nahí-ní-ndí mei Yáa-án — càchí-güedé xáhaⁿ-güedé xii-gã.

⁴ Te Jesús ní xáhaⁿ-gã xii-güedé:

—Chí cuánùhú te caní-ndo cuendú núú té Juàá nchaa sá ní xiní-ndó quide-í, ndíhi nchaa nàcuáa ndúu tnúhu ní càháⁿ-í ní xíndedóho-ndo.

⁵ Te cuáñaha-ndo xii-dé sá quidé tãtna-í núú cué ñáiyu cuáa, te quide tãtna-í cue ñáiyu yacua, ndíhi cue ñáiyu tnàhá cuéhé

sá dátèhyú nihnu-xi yiqui cùñú-yu, ndíhi cue ñáiyu doho, nchaa ñáiyu-án quidé tãtna-í, te ndúha-yu, te ndéé tnàhá cue ñáiyu sa ní xíhí dándòto-í cuáñaha-ndo. Te cuáñaha tùcu-ndo xii-dé sá ndécuu-í dánèhé-í nchaa ñáiyu ndàhú, tnúhu sá sánú ichi ñaha xii-yu nàcuáa naníhí táhú-yu.

⁶ Te cuáñaha tùcu-ndo xii-dé sá ño váha táhú nchaa ñáiyu ñá túú quide sáa iní-xi nchaa tnúhu càháⁿ-í, duha cuáñaha-ndo xii-dé — càchí-gã xáhaⁿ-gã xii-güedé.

⁷ Te sátá ní yáha-güedé cuámuhú-güedé te ní ngúta Jesús ní càháⁿ-gã núú ñáiyu cuendá té Juàá, te xáhaⁿ-gã xii-yu:

—Nchòhó ní sáháⁿ ndéhé-ndó ñⁱⁿ tée ndécú xití yucu, te tée-án ñá túú sàni ñⁱⁿ saní úú iní-dé, chí ñá túú quide-dé dàtná quidé nchaa ité nàhnú cuáháⁿ-xi duha cuáháⁿ-xi dàcáⁿ órè quené tãchí.

⁸ Te ní ñá túú ní sáháⁿ ndéhé-ndó ñⁱⁿ tée nihnu dóo váha dóo víi càa. Te nchòhó xiní-ndó sá ncháá ñáiyu nihnu dóo váha dóo víi càa xíndecú-yu vehe cue tée cùnuu yíndaha ñáiyu.

⁹ Dico nchòhó chí ní sándéhé-ndó ñⁱⁿ tée càháⁿ tnúhu Yá Ndióxi, te ndáá sá díú ñⁱⁿ tée càháⁿ tnúhu-gá cùú-dé, te cùnuu-gá-dé dàcúúxi dàva-gá cue tée càháⁿ tnúhu-gá.

¹⁰ Te ñu cuendá té Juàá-án càháⁿ-xi núú tùtú Yá Ndióxi nàcuáa ní xáhaⁿ-gã xii Cristú, te duha ní xáhaⁿ-gã:

Tendaha-í ñⁱⁿ tée càháⁿ-dé tnúhu-í codonúu-dé núú-n,

cuendá dàtúha-dé ñáiyu cuendá quíndáa iní-yu tnúhu-n.

Duha ní xáhaⁿ-gã, te ducaⁿ ní ngódó tnúni núú tùtú-gã.

¹¹ Te na càchí tnúhu ndáá-í xii-ndo sá ní ñⁱⁿ cue tée ñuyúyú-a ñá túú cùnuu-güedé dàtná cùnúu té Juàá tée dàcuandute ñaha xii ñáiyu. Te nchaa ñáiyu sa ta ndíhu ndaha ñaha Yá Ndióxi vitna cuáháⁿ cùnúu-gã-ni tucú-yu dàcúúxi té Juàá cuéi cùú-yu ñáiyu ñá túú cùnuu dàcúúxi dàva-gã ñáiyu yíndaha-gã.

¹² Te ndéé cùtnàhá ní ngúta té Juàá tée dàcuandute ñaha xii ñáiyu càháⁿ-dé tnúhu Yá Ndióxi ñuyúyú-a, ndéé dàva-án ní ngúta ñáiyu cuíni-yu sá ndíhu ndaha ñaha Yá Ndióxi xii-yu te ndécú ndéé-yu quidé-yu nàcuáa ndíhu ndaha ñaha-gã xii-yu.

¹³ Te nchaa cue tée ní xóo càháⁿ tnúhu Yá Ndióxi ndéé sanaha ní càháⁿ-güedé sá díú-gã ndíhu ndaha-gã cue ñáiyu, te ñu-ni ducaⁿ ní càháⁿ tucu ndí Moisés ní ngódó tnúni núú tùtú ndíi. Te ñu-ni ducaⁿ cùnuu nchaa tnúhu-án càháⁿ-xi nàcuáa ndíhu ndaha Yá Ndióxi ñáiyu ndéé ní sáa nduu ní ngúta té Juàá càháⁿ-dé tnúhu-gã ñuyúyú-a.

¹⁴ Te na càchí tnúhu-í xii-ndo sá càdá cuendá-ndó, chí núú tùtú Yá Ndióxi càchí-xi

sá ndíxí tē Èliás, te diu núú tē Èliás-án ní quide tē Juáá.

¹⁵ Te nchaa nchòhò ñáiyu ndédóhò nchaa tnúhu càháⁿ-í-a te ío váha chí cuáha cuèndá.

¹⁶ Te na càchí tnúhu tucu-í xii-ndo nàcuáa sàtnahá-xi cùu ñáiyu ndècu vitna. Chí ñáiyu-án cùu-yu dàtná cue landú sácòo núú yáhu dàdiquí-güexi te níhi càháⁿ-güexi, te xitnáha-güexi ndí mee landú-güexi:

¹⁷ “Ní tiú-ndí yáá ndíhi vílu te ñá túú ní cùni-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, càchí-güexi xitnáha-güexi. Te ducaⁿ sàtnahá-xi cùu ñáiyu ndècu vitna,

¹⁸ chí tē Juáá ío ndáhú ní xóo caxi-dé, te ní ñá túú ní xóo coho-dé ndudí ndéhé yoho yáha stilé sá sá ní nduu-xi ndidí, te sá ducáⁿ ní xóo cada-dé te ní cachí-yu sá ní xíndecu ndíhi-dé espíritú cundíhi yucu ñávaha.

¹⁹ Te sáta ní quèxio yúhú Tée cùu ñani tnáhá-ndó nchàa-ndo, te xèxi-í xíhi-í quidè-í, te càchí-yu sá yúhú cùu-í ìⁿ tée xèxi víhi te xíhi víhi, te càchí tucú-yu sá cùu-í tée xica cuu ndíhi cue tée cuihna iní-xi quide cobrá ñáhá xíi-yu cuèndá impuèstú ndíhi nchaa dava-gá cue tée ndècu íchí cuehé íchí duha, duha càchí-yu. Te ñáiyu ní tnahá tnúhu ndíhi Yá Ndióxi, ñáiyu-án quidè-yu sá váha nàcuáa cutnùní sá mée-gá ío ndècu ndíhi-gá sá xini tnùnì-gá—càchí-gá xáhaⁿ-gá xii-yu.

Cuèndá ñáiyu dava ñuú ñá túú sàndáá iní tnúhu Xitohó Jesucristú

(Lc. 10:13-15)

²⁰ Te Jèsús ní ngüíta-gá càháⁿ-gá dóho nchaa ñáiyu ñuú núú ío-gá vai núú sá vá yóo tnáhi ndàcu cada ní quide-gá, chí nchaa ñáiyu ñuú-án ñá túú cuiní-yu ndixi túu iní-yu sá ñá túú quide váha-yu ndècú-yu, te xáhaⁿ-gá xii-yu:

²¹—¡Ndáhú nchòhò cue ñáiyu ñuú Corázini! Te ndáhú nchòhò cue ñáiyu ñuú Bètsaidá! Chí núú dicó ñuú Tírú ndíhi ñuú Sidón ní quide-í nchaa sá vá yóo tnáhi ndàcu cada datná ní quide-í ñuú-ndó-á ní xini-ndó ñá, te sá ndéé ama-gá cuihnu-yu dóo ndáhú te cunu cóo-yu núú yáá cuèndá sá ndíxí cuèchi iní-yu sá ñá túú quide váha-yu ní cùu.

²² Dico sáá nduu te ío-gá dandòho ñaha Yá Ndióxi xii-ndo dàcúxí ñáiyu ñuú Tírú ndíhi ñáiyu ñuú Sidón.

²³ Te nchòhò cue ñáiyu ñuú Capèrnaúm ío quide cahnu-ndo mee-ndo, te quide iní-ndó sá sá cuánda-ná-ndó àndiu, dico ñáhá chí núú ùhú núú ndáhú nduu táhú-ndó cùndecu-ndo. Te núú dicó ñuú Sòdomá ní quide-í nchaa sá vá yóo tnáhi ndàcu cada datná ní quide-í ñuú-ndó ní xini-ndó ñá, te ñáiyu-án vá náá-yu chí cundecu-ní-yu ndéé vitna ní cùu.

²⁴ Te na càchí tnúhu-í xii-ndo sá sáá nduu te ío-gá dandòho ñaha Yá Ndióxi

xii-ndo dàcúxí ñáiyu ñuú Sòdomá—càchí-gá xáhaⁿ-gá xii nchaa ñáiyu ñuú-án.

Jèsús cuiní-gá sá túhá ñaha ñáiyu xii-gá
(Lc. 10:21-22)

²⁵ Te sáta xíáⁿ te Jèsús ní ngüíta-gá càháⁿ ndíhi-gá Tàtá-gá Dútú Ndióxi, te xáhaⁿ-gá:

—Yòhó Tàtá-í Dútú Ndióxi, ío chíñuhu ñaha-í xii-n chí diu-n tàxi tnùnì-n àndiu ndíhi ñuyú-u, te dānehé-n cuè ñáiyu nchaa tnúhu váha, te diu-ni ñáiyu-án cùu-yu ñáiyu ñá túú cutnùnì iní-xi nchaa tnúhu càháⁿ cue tée càchí sá ío túha, te nchaa tnúhu váha-án ñá túú dàtúu-n núú ñáiyu càchí sá ío túha te ío váha sáá díquí-xi.

²⁶ Chí ducaⁿ cuiní-n cùnduu—càchí-gá xáhaⁿ-gá xii Tàtá-gá.

²⁷ Te xáhaⁿ-gá xii nchaa ñáiyu xíndecu-án:

—Mee Tàtá-í Dútú Ndióxi ní cachí-gá sá cùnùu-í núú nchàandi túhú sá ío. Te vá yóo ìⁿ-gá xini nàcuáa sàni iní yúhú Déhe Dútú Ndióxi, chí ìⁿdi dí-ni mee-gá xini-gá nàcuáa sàni iní-í, te mee-í xini-í nàcuáa sàni iní mée-gá. Te nchaa ñáiyu càchí iní-í sá quini-yu nàcuáa sàni iní Tàtá-í Dútú Ndióxi te xitnúhu-í-yu, te vá yóo ìⁿ-gá xini chí diu-ni ñáiyu ducaⁿ xitnúhu-í-án xini-yu.

²⁸ Te nchaa nchòhò ñáiyu ñá túú ndècu váha, ñáiyu ñá túú níhi nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cùndecu váha iní-ndó.

²⁹ Te cuu víi cuu váha iní-ndó tnii-ndo nchaa tnúhu càháⁿ-í, te ío dacuáha-ndo, te ducaⁿ càda-ndo chí yúhú ío àndiu iní-í, te ío ndáhú iní-í. Te núu ducaⁿ na càda-ndo te ío váha cuu iní-ndó cùndecu-ndo.

³⁰ Te tnii-ndo nchaa tnúhu càháⁿ-í chí ñá túú cùu-xi ìⁿ sá véé, chí cada iní-ndó sá cúu-xi dàtná ìⁿ chíuⁿ ñamá—càchí-gá xáhaⁿ-gá xii-yu.

12

Cue tée xica cuu ndíhi Jèsús sàhnú-güedé yoco triú nduu ndetatú ñáiyu

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetatú ñáiyu ñúhu Jèsús íchí ndíhi cue tée xica cuu ndíhi-gá, te ta yáha-gá ndíhi-güedé ìⁿ xichi núú cáá triú te xixíhí-güedé docó núu xíáⁿ ní ngüíta-güedé sàhnú-güedé yoco triú-án, te ndíhi ndaha-güedé quíⁿ-güedé quée triú-án tá xèxi-güedé cuaháⁿ.

² Te cue tée cùu fariséu ní xini-güedé nàcuáa quide cue tée xica cuu ndíhi Jèsús, núu ní xáhaⁿ-güedé xii-gá:

—¿Ná cuèndá ducaⁿ quide cue tée xica cuu ndíhi-n sàhnú-güedé yoco triú, te vitna cùu-xi nduu ndetatú-i? Te ñá túú táu-güedé ducaⁿ càda-güedé—càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—¿Náa ñá túú dàcuaha-ndo núú tütú Yá Ndiöxi núú càháⁿ-xi nácuáa ní quide ndíi Dàvíí cúnàhá ní xíhí ndíi docó ndíhi cue téé ní xica cuu ndíhi ndíi-áⁿ?

4 Chi ndíi-áⁿ ní quíhu ndíi vehe Yá Ndiöxi ní queheⁿ ndíi pàá ní cuu í ndécú-áⁿ ní xexi ndíi ndíhi cue téé ní xica cuu ndíhi ndíi, te ñá túú tàú ndíi sá dúcáⁿ càda ndíi ndíhi cue téé-áⁿ ní cùu, chi mee-ni cuè dútú tàú-güedé caxi-güedé pàá-áⁿ ní cùu.

5 ¿Te náa ñá túú xini-ndó nácuáa càháⁿ-xi núú tütú ndíi Moisés sá ncháá cuè dútú vā ndetátú-güedé nduu cùu-xi nduu ndetátú-áⁿ? Te ñá díú ìⁿ cuèchi cùu-xi sá dúcáⁿ ñá túú ndetátú-güedé nduu cùu-xi nduu ndetátú.

6 Te na càchi tñúhu-í xii-ndo sã yùhú cùu-í téé ío-gá cùnùu ndecu ndíhi-ndo dacúúxi vèñúhu sá ío cùnùu.

7 Dico nchòhó chi ñá tècú tñùnì-ndó nácuáa càháⁿ Yá Ndiöxi núú tütú-gá núú càchí-xi: “Yùhú cuiní-í sá cùndàhú iní-ndó cuè tñaha ñáyiù-ndo te ñá díú mèe-ni sá càhnì-ndó quèti nduu tãhù-í”, duha càchí-gá núú tütú-gá. Te núú dicó nchòhó tècú tñùnì-ndó ñá, te vā càháⁿ cuèhé-ndó cuendá nchaa ñáyiù ñá túú ndecu cuèchi-xi.

8 Te yùhú Téé cùu ñaní tñáhá-ndó nchàa-ndo, tñáhá-í ndécú ndíhi-í tñúhu ndee iní sá cùu-í nchaa ñáyiù nácuáa cadá-yu nduu ndetátú-ó-á —càchí-gá xàháⁿ-gã xii-güedé.

*Ìⁿ téé ní yíchi ìⁿ xio ndaha-xi
(Mr. 3:1-6; Lc. 6:6-11)*

9 Te Jèsús ní xica-gá cuáháⁿ-gá, te cuànguihu-gá xití ìⁿ vèñúhu.

10 Te xiáⁿ ndécú ìⁿ téé ní yíchi ìⁿ xio ndaha-dé. Te dava cue téé xĩndecu-áⁿ ndúcú-güedé nácuáa cada-güedé cacáⁿ cuèchi-güedé cuendá-gá núú cuè téé cùnùu, te ní xicáⁿ tñúhú-güedé núú-gã, te xàháⁿ-güedé:

—Càchí tñúhu xii-ndí nùu cuu cada tátna-o ìⁿ téé cùhú nduu cùu-xi nduu ndetátú-ó-á ñáhá —càchí-güedé xàháⁿ-güedé xii-gá.

11 Te Jèsús ní xàháⁿ-gã xii-güedé:

—Te nchòhó òré ná ngàunihu ìⁿ mbéé-ndó ìⁿ déhvá cùnùu te nàtava-ndo-di cuèí cùu-xi nduu ndetátú-ó.

12 Te ìⁿ ñáyiù ío-gá cùnùu-yu dàcúúxi ìⁿ mbéé, núú xiáⁿ tàú-ó sã cadá-ó sã vãha sã cùu-xi-yu cuèí cùu-xi nduu ndetátú-ó —càchí-gá xàháⁿ-gã xii-güedé.

13 Te dàtnùnì ní xàháⁿ-gã xii téé cùhú ndaha-xi-áⁿ:

—Ndacani ndaha-n —càchí-gá xàháⁿ-gã xii-dé.

Te téé-áⁿ ní ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé.

14 Te cue téé cùu fariséú ní ndee-güedé xití vèñúhu, te ní ngúita-güedé ndátñúhu-güedé nùu nása cada-güedé cahni-güedé Jèsús.

Nácuáa sa ndèé tñunì cuendá Jèsús

15 Te sáta ní cutnùnì iní Jèsús nácuáa cuiní-güedé cada ñaha-güedé xii-gá te ní xica-gá cuáháⁿ-gá, te ío vài ñáyiù nchicúⁿ ñáhá xii-gá cuáháⁿ, te tñáhá cue ñáyiù cùhú nchicúⁿ ñáhá xii-gá cuáháⁿ, te ní quide tátna-gá cue ñáyiù-áⁿ.

16 Te ní xàháⁿ-gã xii-yu sã vã càháⁿ-yu yoo cùu-gá.

17 Te ducaⁿ ní cuu chi ní quee ndáá-xi nácuáa ní xàháⁿ Yá Ndiöxi xii ndíi Chàia téé ní xóo càháⁿ tñúhu-gá ndéé sanaha ní chidó tñùnì ndíi núú tütú-gá, te duha nduu tñúhu ní xàháⁿ-gã:

18 Téé-a cùu-dé téé ní sani iní-í sá cùnùu cuèchi-dé nùu-í,

te ío cùu iní-í-dé, te cùdíí iní-í-dé.

Te yùhú cuãñaha-í Espiritú-í cundecu ndíhi-dé,

te diu-dé cúñaha-dé xii nchaa ñáyiù ñuyúí sã yùhú ío ndáá quidé-í.

19 Te vā dácáá-dé tñúhu càháⁿ-dé ndíhi ñáyiù, te ní vā cáná sàa-dé òré càháⁿ-dé,

te ní vā yòo níhí tñúhu nása càháⁿ-dé cuhuⁿ-dé ichi.

20 Te ní ñá túú nã cada-dé cue ñáyiù cùu datná ìⁿ tñu ndóó sá cuiní-xi tñáhnú, te diu-ni ñáyiù-áⁿ cúú tucú-yu dàtná ìⁿ mèchá cãndíl sã ío quène ñúhmá te cuiní-xi ndahvá.

Te ducaⁿ sãtnahá-xi cùu ñáyiù-áⁿ chi ñá túú níhí ndéé-yu cundecu-yu sã cùu-xi-í,

te mee-ni sã vãha cada ñaha-dé xii-yu,

te diu-ni ducaⁿ càda-dé ndéé sáá nduu cutnùnì iní nchaa ñáyiù sã ío ndáá quidé-dé.

21 Te nchaa ñáyiù níhí ñuyúí ío cundee cùu cahnu iní ñáhá-yu xii-dé.

Duha ní xàháⁿ-gã xii ndíi Chàia ní chidó tñùnì ndíi núú tütú-gá.

Càchí-güedé sá ndécú ndíhi Jesús espíritú cùndíhi yucu ñávãha

(Mr. 3:20-30; Lc. 11:14-23; 12:10)

22 Te ní quexio ìⁿ úu cue téé núú ndécú Jèsús, te ndéca-güedé ìⁿ téé ñíhí te cuáhá-dé, te yíhi ñaha espíritú cùndíhi yucu ñávãha xii-dé, te Jèsús ní queñuhu-gá espíritú cùndíhi yucu ñávãha yíhi ñaha xii-dé, te òré-ni-áⁿ ní cuu ní nacáháⁿ-dé te ní ndúha núú-dé.

23 Te nchaa ñáyiù xĩndecu-áⁿ ío ní cuñúhu-yu sã dúcáⁿ ní quide-gá, te ní xitnàhá-yu:

—Váa téé-a cùu-dé ñaní tñáhá ndíi Dàvíí téé tendaha Yá Ndiöxi quixi ñuyúí-a —càchí-yu xitnàhá-yu.

24 Te cue tée cùu fariséu ní tecú dóho-güedé nàcuáa ndùu tnúhu xítñahá-yu, núu xiáⁿ ní xítñaha-güedé:

—Tée-a ndèñuhu-dé nchaa espíritú cúndíhi sácúíhná yíhi ñaha xii ñáyiú, chí ñu-ni sácúíhná-án chindée ñaha-xi xii-dé te ñu-ni-xi tàxi tnuní-xi nchaa espíritú-án — duha ní xítñaha-güedé.

25 Te Jèsús ní cutnùnì iní-gá nàcuáa ndùu tnúhu ní xítñaha-güedé, núu ní xáhaⁿ-gá xii-güedé:

—Te nchòhò xini-ndó sá nùu ñⁿ tée yindaha ñⁿ nacióⁿ vá cúú ñⁿnuu-dé ndíhi cue tée cúndíhi-dé, te vá cúdii-dé cunu-dé. Te ñu-ni ducaⁿ sátnahá tucu-xi cùu tucu cue tée cùchiuⁿ ñⁿ ñuú, chí núu vá cúú ñⁿnuu-güedé cundecu-güedé, te vá cúdii-güedé cundecu-güedé taxi tnùnì-güedé. Te ñu-ni ducaⁿ sátnahá tucu-xi cùu cue ñáyiú xñdecu ñⁿ-ni vèhe, chí núu vá cúú ñⁿnuú-yu cundecú-yu te vá cúdii-yu cundecu cahnú-yu.

26 Te núu sácúíhná ducaⁿ quide-xi queñuhu-xi cue espíritú cúndíhi-xi yíhi ñaha xii ñáyiú ña, te ñá túú cùu ñⁿnuu-xi ndecu-xi te núu ducaⁿ, te vá cúdii sácúíhná-án cundecu-xi taxi tnùnì-xi te núu ducaⁿ quide-xi.

27 Te duha càháⁿ-í chí nchòhò càchí-ndó sá chindée ñaha sácúíhná xii-í queñuhu-í nchaa espíritú cúndíhi-xi yíhi ñaha xii ñáyiú. Te núu yúhú quide cuendá-ndó sá sácúíhná chindée ñaha-xi xii-í, te xini ñuhu-xi cada cuendá-ndó yòo chindée ñaha xii cue tée xica cuu ndíhi-ndo queñuhu-güedé nchaa espíritú cúndíhi yucu ñávaha yíhi ñaha xii ñáyiú. Te mee-güedé càchí-güedé sá nchòhò ñá túú càháⁿ ndáá-ndó sá dúcáⁿ càháⁿ-ndó.

28 Dico yúhú chí Espíritú Yá Ndióxi chindée ñaha-xi xii-í queñuhu-í nchaa espíritú cúndíhi sácúíhná yíhi ñaha xii ñáyiú, te sá dúcáⁿ chindée ñaha Espíritú-gá xii-í, xiáⁿ cútñuní sá sá ní sáá nduu cuini-gá ndíhu ndaha ñaha-gá xii-ndo.

29 Te nchòhò xini-ndó sá cue ñadúhú chí vá ndácú-güedé cuendá-ni quíhu-güedé duhu-güedé vehe ñⁿ tée ío ndee, chí díhna-gá xini ñuhu-xi tñi-güedé tée-án dacùtu ñaha-güedé xii-dé dátñuní ducaⁿ te ndacu-güedé duhu-güedé nchaa sá ndécú ndíhi-dé.

30 Te nchaa ñáyiú ñá túú cúndíhi ñaha xii-í, te cùu úhú iní ñáhá-yu. Te nchaa ñáyiú ñá túú chindée ñaha xii-í, te dàquee tíhú-yu chiúⁿ quide-í.

31 Te na càchí tnúhu-í xii-ndo sá ncháá ñáyiú quide nchaa sá cuèhé sá dúhá cuu cada càhnu iní ñáhá Yá Ndióxi xii-yu, te ñu-ni ducaⁿ cùu cada cahnu iní-gá nchaa tnúhu cuèhé tnúhu duha càháⁿ-yu. Dico cue ñáyiú

na càháⁿ úhú cuendá Espíritú-gá, te ñáyiú-án vá cádá càhnu iní ñáhá tnàhí-gá xii-yu.

32 Te nchaa ñáyiú na càháⁿ úhú cuendá yúhú Tée cùu ñani tnáhá-yu ncháá-yu, te cuu cada càhnu iní ñáhá Yá Ndióxi xii-yu. Dico cue ñáyiú na càháⁿ úhú cuendá Espíritú-gá te vá cádá càhnu iní ñáhá tnàhí-gá xii-yu cuèi vitna ndècu vívú-yu, te cuèi na cùu-yu.

Ndi díⁿ núu yutnu xini-ó ná yutnu cùu-xi cuendá sá sávidí-xi

(Lc. 6:43-45)

33 Te nchòhò xini-ndó sá ndi díⁿ núu yutnu xini-ó ná yutnu cùu-xi cuendá sá sávidí-xi, te xini-ó sá ncháá yutnu váha cùuⁿ mee-ni sávidí váha, dico nchaa yutnu sá ñá túú váha te cùuⁿ mee-ni sávidí sá ñá túú váha. Te duha càháⁿ-í cuendá cada cuendá váha-ndo nàcuáa ndùu chiúⁿ quide-ndo ñⁿ-ndo cuendá ducaⁿ cùtnuní ná ñáyiú cùu-ndo.

34 Dico nchòhò cúu-ndó dátñá ñⁿ cóo dééⁿ chí ío cuíhna iní-ndó, te vá cánì iní-ndó sá ndácú-ndó càháⁿ-ndó ñⁿ tnúhu váha, chí ío cuíhna iní-ndó. Te nchòhò xini-ndó sá ncháá ñáyiú càháⁿ-yu nani véxi iní-yu.

35 Te nchaa ñáyiú váha iní-xi càháⁿ-yu tnúhu váha, chí ñu-ni tnúhu váha-án ñúhú iní-yu. Te nchaa ñáyiú cuíhna iní-xi càháⁿ-yu tnúhu cuèhé tnúhu duha, chí ñu-ni tnúhu cuèhé tnúhu duha-án ñúhú iní-yu.

36 Te na càchí tnúhu-í xii-ndo sá ná sáá nduu càda ndáá Yá Ndióxi cuéchi nchaa nchòhò ñáyiú ndècu ñuyú-á, te nchaa tnúhu cuèhé tnúhu duha càháⁿ-ndó càháⁿ-gá sá ñá túú ní quide váha-ndo sá dúcáⁿ ní càháⁿ-ndó tnúhu-án.

37 Te nàcuáa ndùu tnúhu ní càháⁿ-ndó ñⁿ ñⁿ-ndo, te ducaⁿ càháⁿ Yá Ndióxi te núu ndècu cuéchi-ndo ádi ñá túú ndècu cuéchi-ndo. Te núu ñá túú cuéchi-ndo te cácu-ndo, dico núu ndècu cuéchi-ndo te vá cácu-ndo —càchí-gá xáhaⁿ-gá xii cue tée cùu fariséu-án.

Cue tée cuini sá cádá Jèsús ñⁿ sá vā yōo tnàhí ndàcu cada

(Mr. 8:12; Lc. 11:29-32)

38 Te cue tée cùu fariséu, ndíhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés xáhaⁿ-güedé xii Jèsús:

—Mèstru, cuini-ndí cada-n ñⁿ sá vā yōo tnàhí ndàcu cada cuendá ducaⁿ cùtnuní iní-ndí sá Yá Ndióxi chindée ñaha-gá xii-n — càchí-güedé xáhaⁿ-güedé xii-gá.

39 Te Jèsús ní xáhaⁿ-gá xii-güedé:

—Ñáyiú ndècu ichi cuèhé ichi duha ñá túú cuini-yu tñi-yu tnúhu càháⁿ Yá Ndióxi, te ñáyiú-án cuini-yu cada-í ñⁿ sá vā yōo tnàhí ndàcu cada nacúáa cutnùnì iní-yu núu ndáá sá Yá Ndióxi chindée ñaha-gá xii-í. Dico yúhú chí ñá túú nágá cada-í quini-yu, chí sá

nihí-yu tnúhu nàcuáa ní yáha ndíi Jónás téé ní xóo cáháⁿ tnúhu Yá Ndióxi ndéé sanaha, te ñu-ni ducaⁿ yáha yúhú tucu.

⁴⁰ Chi ndíi Jónás-áⁿ ní xúhuⁿ ndíi úní nduu úní níu xití ñⁿ chácá cáhnú vñhi nani bal-lená. Te ñu-ni ducaⁿ yáha yúhú Téé cùu ñani tnáhá-ndó nchaa-ndo, chi úní nduu úní níu cuhuⁿ-í xití ñuhu.

⁴¹ Te na sáá nduu càda ndáá Yá Ndióxi cuéchi nchaa ñáyiu ndècu ñuyú-a, te dàvá-áⁿ cachí nchaa ñáyiu ñuú Nínivé sá ñá túú ní quide ndáá nchaa ñáyiu ndècu vitna, te ducaⁿ cáháⁿ-yu chi mée-yu ní dàñá-yu ichi cuéhé ichi duha cúnàhá ní sáháⁿ ndíi Jónás ñuú-yu ní cáháⁿ ndíi tnúhu Yá Ndióxi núú-yu. Dico vitna iha ndècu ndíhi ñaha-ndo xii yúhú, te ñu-ni ío-gá cúnú-í dàcúxí ndíi Jónás.

⁴² Te nduu càda ndáá Yá Ndióxi cuéchi nchaa ñáyiu, te dàvá-áⁿ quini-ndó ñⁿ ñadihi ñaha ní xindaha ñⁿ nacióⁿ cáá ndaa xio datni núú quéné nchíanchii, te ñaha-áⁿ ío xica ní xindecu-aⁿ te ní sáháⁿ-aⁿ ní xindedóho-aⁿ nchaa tnúhu ní cáháⁿ ndíi Salómón, chi ndíi-áⁿ ío ní sáá sá xini tnúni ndíi. Te tnáhá ñaha-áⁿ cáháⁿ-aⁿ sá ñá túú ní quide ndáá nchaa ñáyiu ndècu vitna. Dico vitna iha ndècu ndíhi ñaha-ndo xii yúhú, te ñu-ni ío-gá cúnú-í dàcúxí ndíi Salómón.

Espirítu cundíhi yucu ñávaha sá nánchóava xito cùu uu
(Lc. 11:24-26)

⁴³ Te òré ná quée ñaha ñⁿ espirítu cundíhi yucu ñávaha xii ñⁿ ñáyiu, te cuáháⁿ-xi ndúcu-xi ñⁿ xichí núú cundècu-xi te ñá nihí-xi te ní sani iní-xi:

⁴⁴ “Váha-gá nùhu tucu-í núú ní xindecu-í”, duha ní sani iní-xi. Te cuánuhú-xi, te òré ní nasáá-xi, te ní xini-xi sá cáá ñni ñáyiu-áⁿ dàtná cáá-ná ñⁿ vehe ní natíhú ní nduu víi-ná te vá yóo-gá ndécú.

⁴⁵ Te sáta dúcáⁿ te ní xica-xi cuáháⁿ-xi cuándúcu-xi úsá tnáhá espirítu cundíhi-xi sá nèhé víhi-gá xiquide. Te òré ní nihí-xi cue espirítu-áⁿ te ndéca ñaha-xi cuáháⁿ cuendá ngúndecu ndíhi-xi ñáyiu-áⁿ. Te ñáyiu-áⁿ uuⁿ-gá nándi yáha-yu dàcúxí ndéé díhna. Te ñu-ni ducaⁿ sátnahá-xi yáha nchaa ñáyiu cuíhna ñni-xi ndècu ñuyú-a vitna —cachí-gá xáhaⁿ-gá xii-güedé.

Cue ñani Jesús ndíhi náná-gá
(Mr. 3:31-35; Lc. 8:19-21)

⁴⁶ Te cáháⁿ dúcáⁿ-ní Jesús ní quexìo náná-gá ndíhi cue ñani-gá cuini-yu cáháⁿ ndíhi ñáhá-yu xii-gá, te ní ngúnu tñi-yu ndaa quehé vehe núú ndécú-gá.

⁴⁷ Te ñⁿ cue ñáyiu xindecu-áⁿ ní xáháⁿ-yu xii-gá:

—Ní quexìo náná-n ndíhi cue ñani-n xínutñi-yu quehé, te cuini-yu cáháⁿ ndíhi

ñáhá-yu xii-n —cachí ñáyiu-áⁿ xáháⁿ-yu xii-gá.

⁴⁸ Te ní xáhaⁿ-gá xii ñáyiu ducaⁿ xáhaⁿ xii-gá-áⁿ:

—Te cachí tnúhu yóndi-gá ñáyiu cùu datná náná-í ndíhi dàtná cue ñani-í —cachí-gá xáhaⁿ-gá xii ñáyiu-áⁿ.

⁴⁹ Te ní dánèhé ñáhá-gá nchaa cue téé xica cuu ndíhi-gá, te ní xáhaⁿ-gá xii ñáyiu-áⁿ:

—Cue téé-a cùu-güedé dàtná náná-í, ndíhi dàtná cue ñani-í.

⁵⁰ Te nchaa ñáyiu na càda nchaa nacuaá cáháⁿ Tàtá-í Dútú Ndióxi Yáá ndécú àndiu, te ñáyiu-áⁿ cùu-yu dàtná náná-í, ndíhi dàtná cue ñani-í, ndíhi dàtná cue cùha-í —cachí-gá xáhaⁿ-gá xii ñáyiu ducaⁿ ní dáyáha tnúhu núú-gá-áⁿ.

13

Nacuáa quide téé cuángacáⁿ triú
(Mr. 4:1-9; Lc. 8:4-8)

¹ Te ñu-ni nduu-áⁿ ní quee Jesús vehe núú ndécú-gá, te ní xica-gá cuáháⁿ-gá ní ngóo-gá yuhu làgúna.

² Te ío cuéhé ñáyiu ní tacá núú ndécú-gá. Te sá dúcáⁿ ío cuéhé ñáyiu núú ní quée-gá xití ñⁿ bàrcú nùtnñi xití ndute làgúna-áⁿ, te núú xíáⁿ ní ngóo-gá, te nchaa ñáyiu-áⁿ xixúcu-yu yuhu làgúna-áⁿ.

³ Te Jesús ní ngúita-gá ní cani-gá titni cuendú núu-yu nacuaá tecú tnúni-yu nchaa nacuaá nduu tnúhu-gá, te xáhaⁿ-gá xii-yu:

—Ñⁿ téé cuángacáⁿ-dé triú,

⁴ te òré ní ngúita-dé ñangoyo-dé triú-áⁿ, te dava ní quene ndava ní ngava ndéé ichi, te ní xini cue tílaá te ní nadatácá-güedi.

⁵ Te dava ní ngava ñuhu yadi núú yíhi víhi yúu, te ndíhi-ni ní xinu-xi chi ñá túú càvivi ñuhu.

⁶ Dico òré ní nayehé te ñá túú ní cundee iní-xi chi ní yíchi-xi, chi ñá túú ní nihí quíhiⁿ cúnú yóho-xi.

⁷ Te dava ní ngava núú yúcu ndíquiⁿ tnu iñu, te ñⁿnuu-ni ní xinu-xi ndíhi tnu iñu. Te tnu iñu-áⁿ ní sahnu-xi te ní dánáá-xi nchaa triú sá ní xinu-áⁿ.

⁸ Dico dava-gá triú ní ngava núú ndécú ñuhu cocóⁿ te xíáⁿ ío váha ní cuu, chi núú ñⁿ-ní triú-áⁿ te dava yoco-xi ní ngúhi ócó úxí triú-xi, te dava yoco-xi ní ngúhi únídico triú-xi, te dava yoco-xi ní ngúhi ñⁿ ciendú triú-xi.

⁹ Te vitna nchaa nchòhó ñáyiu ní xindedóho tnúhu ní cáháⁿ-í-a, te ío váha chí cuáha cuendá —cachí-gá xáhaⁿ-gá xii-yu.

Cue téé xica cuu ndíhi Jesús ndécú tnúhu-güedé núú-gá ná cuendá cani-gá cuendú núú ñáyiu
(Mr. 4:10-12; Lc. 8:9-10)

10 Te cue tée xica cuu ndihi Jesús ní sáháⁿ-güedé ndéé núú-gá, te xáhaⁿ-güedé xii-gá:

—Ndücu tnúhu-ndí núú-n núu ná cuendá ducaⁿ mée-ni cuendú caní-n núú ñáiyu —cáchi-güedé xáhaⁿ-güedé xii-gá.

11 Te ní xáhaⁿ-gá xii-güedé:

—Nchòhó chí sa cáchi tnúhu Yá Ndióxi xii-ndo ñⁿ sá vátá quini-gá-ndó, chí cáchi tnúhu-gá nàcuáa quide-gá ndíhu ndaha-gá ñáiyu, dico dava-gá ñáiyu chí ñá túú ná xáhaⁿ-gá xii-yu.

12 Te nchaa ñáiyu sa təcú tnúni te uuⁿ-gá cuita tecú tnúni-yu quíhíⁿ, te nchaa ñáiyu ñá túú təcú tnúni te uuⁿ-gá v təcú tnúni-yu.

13 Te xiáⁿ núu duha caní-i mee-ni cuendú núú-yu, chí cuéi na quini-yu nchaa nàcuáa cuu dico ní vá cútñúni iní-yu ná cuendá ducaⁿ cuu, te cuéi na cündedóho-yu dico ní vá təcú tnúni-yu.

14 Te díu cuendá ñáiyu-áⁿ ní xáhaⁿ Yá Ndióxi xii ndíi Chaiá tée ní xóo cáháⁿ tnúhu-gá ndéé sanaha ní chidó tnúni ndíi núú túú-gá núú cáchi-xi:

Nchaa nchòhó cündedóho-ndo tnúhu cáháⁿ-í, dico ní vá təcú tnúni-ndó, te cuéi na quini-ndó nchaa nàcuáa cada-xi, dico ní vá cútñúni iní-ndó ná cuendá ducaⁿ quide-xi.

15 Te ducaⁿ chí cuu-ndo ñáiyu ío sàá iní-xi, te cuu-ndo ñáiyu ñá túú təcú tnúni tnúhu cáháⁿ-í,

te cuu tucu-ndo datná cue ñáiyu cuáá chí ñá túú cuini-ndó cada cuendá-ndó tnúhu-í,

te ní ñá túú cuini-ndó cündedóho-ndo,

te ní ñá túú cuini-ndó təcú tnúni-ndó,

te ní ñá túú cuini-ndó nàtuha ñaha-ndo xii-í cuendá cada cháhu iní-í nchaa yíca cuéchi-ndo nàcuáa ío váha cuu iní-ndó cündecu-ndo.

Duha ní xáhaⁿ Yá Ndióxi xii ndíi Chaiá ní chidó tnúni ndíi núú túú-gá.

16 Dico nchòhó chí ío váha táhú-ndó chí cútñúni iní-ndó nchaa nàcuáa quide-í, te cútñúni tucu iní-ndó nchaa nàcuáa ndúu tnúhu cáháⁿ-í.

17 Te na cáchi tnúhu ndáá-í xii-ndo sá ío vai cue tée ní xóo cáháⁿ tnúhu Yá Ndióxi ndéé sanaha ndihi nchaa dava-gá ñáiyu váha iní-xi ní cuini-yu cündehé-yu nchaa sá ndéhé-ndó vitna quide-í dico ñá túú ní xini-yu, te ní cuini tucu-yu cündedóho-yu nchaa tnúhu ndédóho-ndo vitna cáháⁿ-í te ñá túú ní xíndedóho-yu.

Jesús cáháⁿ-gá nàcuáa quèe-xi cuendá tée cuángacáⁿ triú

(Mr. 4:13-20; Lc. 8:11-15)

18 Te vitna cündedóho váha-ndo na cáchi tnúhu-í xii-ndo nàcuáa quèe-xi cuendú tée cuángacáⁿ triú ní caní-í núú-ndó.

19 Te triú sá ní quene ndava ní ngava ndéé ichi, xiáⁿ cúú-xí datná ñáiyu ní xíndedóho tnúhu sá cáháⁿ nàcuáa ndíhu ndaha ñaha Yá Ndióxi xii-yu, dico ñá túú ní cuini-yu tñí-yu, chí sácúihná cuáháⁿ-xi nàdatuhú-xi iní-yu cuendá sá vá cánchezúⁿ nihnú-yu nàcuáa cáháⁿ tnúhu-áⁿ.

20 Te triú sá ní ngava ñuhu yadi núú yíhi vihi yúú-áⁿ, xiáⁿ cúú-xí datná ñáiyu ní xíndedóho tnúhu Yá Ndióxi te díi iní ní tñí-yu tnúhu-gá,

21 dico òrè ná ngúita ñáiyu cúcuèhé ñáhá-yu xii-yu àdi nándi-gá sá yáha-yu sá cuendá tnúhu-gá, te ñá cündéè iní-yu chí dàñá-yu tnúhu-gá cuendá sá ñá túú nihí ndéè-yu.

22 Te triú sá ní ngava núú yúcu ndíquíⁿ tnu iñu-áⁿ, xiáⁿ cúú-xí datná ñáiyu ní tecú dóho-xi tnúhu Yá Ndióxi dico cuéè cuéè ní nacuaaá-yu tnúhu-gá, chí cuendá mee-ni sá ío ñuyú-a ñuhu iní-yu, ndihi cuendá sá ío sàni iní-yu cuu cuicá-yu, te mee-ni nchaa xiáⁿ ñúhú iní-yu te ñá túú ñuhu iní-yu tnúhu sá ní xíndedóho-yu-áⁿ nàcuáa cada váha-yu cundecú-yu.

23 Dico triú sá ní ngava núú ndécú ñuhu cocoⁿ-áⁿ, xiáⁿ cúú-xí datná ñáiyu ní xíndedóho tnúhu Yá Ndióxi te quide-yu nàcuáa cáháⁿ tnúhu-gá. Te cada iní-ndó sá ñáiyu-áⁿ cúú-yu datná triú sá ní ngúihí yoco-xi óco úxi triú-xi, ndihi triú sá ní ngúihí yoco-xi únidico triú-xi, ndihi triú sá ní ngúihí yoco-xi ñⁿ cièndú triú-xi. Ducaⁿ sàtnahá-xi cúú-yu chí ío váha quide-yu —cáchi-gá xáhaⁿ-gá xii-güedé.

Cuendá nchaa chúhú sá ñá túú váha xínu xití triú

24 Te Jesús ní caní-gá ñⁿ cuendú núú ñáiyu nàcuáa tecú tnúni-yu tnúhu-gá, te xáhaⁿ-gá xii-yu:

—Te vitna na caní-í ñⁿ cuendú núú-ndó nàcuáa tecú tnúni-ndó nàcuáa cada-xi òrè ndíhu ndaha ñaha Yá Ndióxi xii ñáiyu. ñⁿ tée ío váha triú ní sacáⁿ-dé núú ñúhú-dé.

25 Dico xití niú ní sáháⁿ ñⁿ tée cuu úhú iní ñáhá xii-dé, te ní dāngoyo-dé ndíquíⁿ yúcu sá ñá túú váha núú ní sacáⁿ-dé triú-áⁿ.

26 Te òrè vitna váha váha ní ngúita-xi quène yoco nchaa triú-áⁿ, te ní xínu coyo nchaa yúcu sá ñá túú váha-áⁿ.

27 Te cue tée xínu cuechi núú tée ní sacáⁿ triú-áⁿ ní xitñúhu ñaha-güedé xii-dé sá dúcáⁿ ní xínu chúhú sá ñá túú váha-áⁿ núú triú-dé, te xáhaⁿ-güedé: “Patróoⁿ, ¿nása ní cuu núu ní xínu chúhú sá ñá túú váha núú triú-n, te ío váha càa triú ní sacáⁿ-n ní cuu?”, cáchi-güedé xáhaⁿ-güedé.

28 Te tée cuu patróoⁿ-güedé-áⁿ ní xáhaⁿ-dè xii-güedé: “Ñⁿ tée cuu úhú iní ñáhá ñahi xii-í ducaⁿ ní quide-dé ní sáháⁿ-dé ní dāngoyo-dé

ndíquíⁿ cùhú sã ñã túú vãha-áⁿ núú triú-í núú ducaⁿ ní xínu coyo-xí", cãchí-dé xãhaⁿ-dê xii-güedé. Te cue téé xínu cuechi núú-dê ní xãhaⁿ-güedé xii-dé: "Te núú cuñí-n te quíhíⁿ-ndí tnuhu-ndí nchaa cùhú sã ñã túú vãha ní xínu núú triú-n", cãchí-güedé xãhaⁿ-güedé xii-dé.

²⁹ Te téé cùu xítóhó triú-áⁿ ní xãhaⁿ-dê xii cue téé xínu cuechi núú-dê-áⁿ: "Ñáhá, vá quíhíⁿ-ndó tnuhu-ndo, chí òré tnuhu-ndo te tnãhá-ni triú quene chí càa víhi cùhú-áⁿ."

³⁰ Vãha-gá chí dáñã ná cuihmu nahi ndéé ná cùu triú, te dàtnúni nducu-í cue téé quíhíⁿ-güedé tnuhu-güedé nchaa cùhú sã ñã túú vãha-áⁿ, te dacutu nuhni-güedé te cahmi-güedé, te dàtnúni nãquehndé-güedé triú nacani-güedé te nataxúha-güedé xití yacá-í", cãchí-dé xãhaⁿ-dê xii-güedé —duha ní cani Jesús cuendú núú-yu.

*Cuendá ndíquíⁿ yutnu nani mostázá
(Mr. 4:30-32; Lc. 13:18-19)*

³¹ Te Jesús ní cani tucu-gá ingá cuendú núú ñáyiú nãcuáa tecú tnúni-yu tnúhu-gá, te xãhaⁿ-gã xii-yu:

—Na càni-í ìⁿ cuendú núú-ndó nãcuáa tecú tnúni-ndó nãcuáa cada-xi òré ndíhu ndaha ñaha Yá Ndióxi xii ñáyiú. ìⁿ téé ní queheⁿ-dé ndíquíⁿ yutnu nani mostázá te ñehé-dé cuaháⁿ ní sacáⁿ-dé núú ñúhú-dê.

³² Te ndíquíⁿ yutnu-áⁿ io chàhu, dico òré ná xínu-xi te sãhnu-gá-xi dàcúúxi nchaa cùhú, te cue quiti ndava núú tàchí cãdúha-güedé tacá-güedé núú dìtè-xi —cãchí-gã xãhaⁿ-gã xii-yu.

*Nãcuáa quide levadurá
(Lc. 13:20-21)*

³³ Te Jesús ní xãhaⁿ tucu-gá xii ñáyiú:

—Te na cãchí tnúhu tucu-í xii-ndo nãcuáa cada-xi òré ndíhu ndaha ñaha Yá Ndióxi xii ñáyiú. ìⁿ ñadihí ní chíhi-aⁿ levadurá úní arròbã yuchi triú, te levadurá-áⁿ ní quide-xi ní ndaa ñihí yusaⁿ-áⁿ —cãchí-gã xãhaⁿ-gã xii-yu.

*Mee-ni cuendú ní cani Jesús núú ñáyiú
(Mr. 4:33-34)*

³⁴ Te mee-ni cuendú ní cani Jesús núú ñáyiú ndi tnãhá òré ní dánèhé ñãhá-gã xii-yu tnúhu-gá.

³⁵ Te ducaⁿ ní quide-gá chí ní quee ndáá-xi nãcuáa ní chídó tnúni ìⁿ téé ní xóo cãháⁿ tnúhu Yá Ndióxi ndéé sanaha núú tütú-gá núú cãchí-xi:

Mee-ni cuendú cani-í núú ñáyiú òré danèhé-í-yu tnúhu-í cuendá tecú tnúni-yu,

te nchaa tnúhu sã vãtã yõo-gã cundedóho danèhé-í-yu, te nchaa tnúhu-áⁿ ndúú yùhu-xi ndéé cútñahá ní ngáva ñuyúú.

Duha ní chídó tnúni téé-áⁿ núú tütú-gá.

*Jèsús càháⁿ-gã nãcuáa quèe-xi cuendá
cùhú sã ñã túú vãha càa xití triú*

³⁶ Te Jesús ní dándacá-gã ñáyiú te cuánuhú-gá vehe, te cue téé xica cuu ndíhi-gá ní xãhaⁿ-güedé xii-gã:

—Cachí tnúhu xii-ndí nása quèe-xi cuendá cùhú sã ñã túú vãha càa xití triú —cãchí-güedé xãhaⁿ-güedé xii-gã.

³⁷ Te Jesús ní xãhaⁿ-gã xii-güedé:

—Téé cãchí-í ní sacáⁿ triú cãvãha-áⁿ cùú yùhú Téé cùu ñani tnãhá-ndó nchaa-ndo.

³⁸ Te nchaa núú ní sacáⁿ téé-áⁿ triú cùú-xí ñuyúú. Te tatã vãha-áⁿ cùú-xí cuè ñáyiú yindaha ñaha Yá Ndióxi. Te nchaa cùhú sã ñã túú vãha-áⁿ cùú-xí ñáyiú yindaha ñaha sãcuñhá.

³⁹ Te téé ní dãngoyo ndíquíⁿ cùhú sã ñã túú vãha núú triú-áⁿ cùú-dê mee sãcuñhá. Te nduu nãtehndé-nã triú-áⁿ cùú-xí nduu ndíhi nihnu-ná nchaa sã ío ñuyúú-a. Te nchaa ñáyiú nãquehndé triú-áⁿ cùú-yu mee-ni cuè espíritú xínu cuèchi núú Yá Ndióxi.

⁴⁰ Te dàtnã cada cue téé quíhíⁿ tnuhu nchaa cùhú sã ñã túú vãha-áⁿ dacutu nuhni-güedé te cahmi-güedé, ducaⁿ sãtnahá-xi yãha nchaa ñáyiú cündíhi yucu ñávãha na sãá nduu.

⁴¹ Te yùhú Téé cùu ñani tnãhá-ndó nchaa-ndo tendaha-í nchaa espíritú xínu cuèchi núú-í quíhíⁿ-xi nadatãcá-xi nchaa ñáyiú sãnu ichi cue tnaha ñáyiú-xi ichi cuèhé ichi duha, ndíhi nchaa dava-gã ñáyiú ñã túú quide váha, te nchaa ñáyiú-áⁿ xindécú-yu nchaa núú ndécú cuè ñáyiú yindaha-í.

⁴² Te cue espíritú-áⁿ daquihíⁿ-xi cue ñáyiú-áⁿ núú ñúhú núú càyú, te yacáⁿ ío ndáhyú-yu te dicó rúhñú-nã cuu núhu-yu sã satú iní-yu sã ndóhó-yu.

⁴³ Te nchaa ñáyiú quide nchaa nacuaa cuñí Tãtã-yu Dútú Ndióxi, ñáyiú-áⁿ ío cunúú-yu cundécú-yu núú ndécú-gã táxi tnúni-gã, chí cuú-yu dàtnã nchãchii dayèhé-yu cundécú-yu núú ndécú-gã. Te nchaa nchóhó ñáyiú ndédóho nchaa tnúhu càháⁿ-í-a, te ío váha chí cuãha cuendá —cãchí-gã xãhaⁿ-gã xii-güedé.

Cuendá ìⁿ sã ño ndèyãhu

⁴⁴ Te Jesús xãhaⁿ tucu-gá xii-güedé:

—Na càni tucu-í ingá cuendú núú-ndó nãcuáa tecú tnúni-ndó nãcuáa cada-xi òré ndíhu ndaha ñaha Yá Ndióxi xii ñáyiú. ìⁿ téé ní naníhí-dê ìⁿ sã ño ndèyãhu yindúxi ìⁿ xichi, te ní nachindúxi tucu-dé ñu-ni núú ní naníhí-dê-áⁿ, te ío ní cudíⁿ iní-dé sã dúcãⁿ ní naníhí-dê xíãⁿ. Te ní xica-dé cuánuhú-dé te ní nadico-dé nchaa sã ndécú ndíhi-dé, te ní nacuaaⁿ-dé ñuhu núú dúcãⁿ ní naníhí-dê xíãⁿ.

Cuendá ìⁿ sã ño ndèyãhu nani péráa

45 Te na caní tucu-í ingá cuèndú núú-ndó nàcuáa tecú tnùn-ndó nàcuáa cada-xi òré ndíhu ndaha ñaha Yá Ndiòxi xii ñáiyu. Ìn tée quide ndáhú ndúcú-dè sá nání pèrlá sá ïo ndèyáhu.

46 Te ní naníhí-dè ñáiyu ndècu ndíhi ìn pèrlá sá ïo-gá ndèyáhu, te ní xica-dé cuánuhú-dé te ní nadico-dè nchaa sá ndécú ndíhi-dé, te ní sáhá-dé ní saa-dé pèrlá sá ïo-gá ndèyáhu-án.

Cuèndá ñunu tní-güedé chácá

47 Te na caní tucu-í ingá cuèndú núú-ndó nàcuáa tecú tnùn-ndó nàcuáa cada-xi òré ndíhu ndaha ñaha Yá Ndiòxi xii ñáiyu. Cue tée tní chácá ní dáquèe-güedé ñunu-güedé xití ndute lámár tní-güedé chácá, te dàcá nuu dàcá nihnu chácá cuànguee-güedi xití ñunu-án.

48 Te òré ní cutnùn-í iní-güedé sá ní chítú ñunu-güedé, te ní natava-güedé ní nene yuhu lámár, te ní nguíta-güedé nácaxi-güedé nchaa chácá-án. Te nchaa chácá váha dàquèe-güedé-di xití tídihi, te nchaa chácá nèhé dāngoyo-güedé-di.

49 Te dàtná ní quide cue tée-án ducaⁿ càda cue espíritú xínú cuèchi núú Yá Ndiòxi ná sáá nduu vá cündècu-gá nchaa sá ïo ñuyú-a, chi cue espíritú-án daquèe dñ-xi nchaa ñáiyu ní quide váha tnuú nchaa ñáiyu ñá túú ní quide váha.

50 Te nchaa ñáiyu ñá túú ní quide váha-án daquèhí ñáhá-xi xii yu núú ñuhú núú càyú, te yácá ïo ndáhyú-yu, te dicó rúhñú-ná cuu núhu-yu sá sàtú iní-yu cuèndá sá ndóhó-yu —càchí-gá xáhaⁿ-gá xii cue tée xica cuu ndíhi-gá.

Cuèndá cue tée ndècu ndíhi sá ní quee túu díhna ndíhi sá ní quee túu saa

51 Te Jèsús ní xícáⁿ tnúhú-gá núú-güedé, te xáhaⁿ-gá xii-güedé:

—¿Ní tecú tnùn-ndó nàcuáa ndùu nchaa tnúhu ní cáhá-í-án? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Ní tecú tnùn-ndí —càchí-güedé xáhaⁿ-güedé xii-gá.

52 Te ní xáhaⁿ tucu Jèsús xii-güedé:

—Te núu ìn tée dàcuaha ñaha xii ñáiyu nchaa tnúhu ní chídó tnùn ndí Moisés ná cutnùn-í iní-dé nàcuáa quide Yá Ndiòxi ndíhu ndaha-gá ñáiyu, te tée-án cúú-dè dàtná ìn tée cùu xitohó vehe. Te tée cùu xitohó vehe-án ní queñuhu-dé nchaa sá ní quee túu díhna ndècu ndíhi-dé, ndíhi nchaa sá ní quee túu saa. Te ducaⁿ sàtnahá-xi cùu tée-án te núu na cutnùn-í iní-dé nàcuáa quide Yá Ndiòxi ndíhu ndaha-gá ñáiyu —càchí-gá xáhaⁿ-gá xii-güedé.

Jèsús ndécú-gá ñuu núú ní sahnú-gá

(Mr. 6:1-6; Lc. 4:16-30)

53 Te sàtá ní yáha ducaⁿ ní caní Jèsús cuèndú núú-güedé, te ní xica-gá cuánuhú-gá.

54 Te ní ndexlo-gá ñuu núú cúú ñuu-gá, te cuánguihu-gá xití veñuhu càa núú-án te ní nguíta-gá dánèhé-gá ñáiyu. Te nchaa ñáiyu ndèdóho nchaa tnúhu càháⁿ-gá xicunúhu-yu, te xitnahá-yu:

—¿Nása ní cuu núu ïo váha cutnùn-í iní tée-a nàcuáa cunduu tnúhu cáháⁿ-dè, te quide-dé nchaa sá vá yóo tnàhí ndàcu cada-í?

55 Te dicó déhe tée cùu carpinterú ndíhi tá Mária cúú-dé, te ñani-dé cúú té Jacobó, ndíhi té Chèé, ndíhi té Ximú, ndíhi té Judás.

56 Te cue cúha-dé ndécú ndíhi ñahá-yu xii-o ñuu-a. ¿Te nása ní quide-dé núu ndéé dàcáⁿ ïo váha cutnùn-í iní-dé nàcuáa cunduu tnúhu cáháⁿ-dè-í? —càchí-yu xitnahá-yu.

57 Te ñá túú ní cuini-yu cáháⁿ ndíhi váha-yu Jèsús, dico mee-gá ní xáhaⁿ-gá xii-yu:

—Te núu ìn tée cáháⁿ tnúhu Yá Ndiòxi ná násáá-dé ñuu-dé, te nchaa ñáiyu ñuu-dé-án ndíhi nchaa ñáiyu cùu ndimee-dé ñá túú nèhé-yu sá yíñuhu núú-dé, dico cue ñáiyu nchaa dava-gá ñuu chi nèhé-yu sá yíñuhu núú-dé —càchí-gá xáhaⁿ-gá xii-yu.

58 Te ñá túú ní quide Jèsús titní núú sá vá yóo tnàhí ndàcu cada ñuu-án, chi ñá túú ní cuini-yu quindáá iní ñahá-yu xii-gá.

14

Nàcuáa ní cuu ní xihí té Juáá tée dàcuandute ñaha xii ñáiyu

(Mr. 6:14-29; Lc. 9:7-9)

1 Te diu-ní dàvá-án ní níhí té Hèrodés tnúhu nchaa nàcuáa quide Jèsús, te té Hèrodés-án cúú-dé tée tàxi tnùn-í distritú Galilea.

2 Te ní xáhaⁿ-dè xii nchaa cue tée ndècu ndíhi-dé:

—Tée dii cuèndú-xi níhí-ó-án cùu-dé té Juáá tée dàcuandute ñaha xii ñáiyu, tée ní xihí ní cùu te ní ndoto-dé núu dàcáⁿ ndácú-dé quidè-dé nchaa sá vá yóo tnàhí ndàcu cada —càchí-dé xáhaⁿ-dè xii-güedé.

3 Te ducaⁿ ní cáháⁿ té Hèrodés chi mee-dé ní táuchíú-dè ní tní ñaha-güedé xii té Juáá, te ní dácútú ñaha-güedé xii-dé, te ní chíhi ñaha-güedé vecaá. Te ducaⁿ ní quide té Hèrodés-án sá cuèndá ñaha nani Herodiás, ñaha ní cándeca ñani-dé té Lìpé, te ní naqueheⁿ ñaha-dè xii-aⁿ ndèca ñaha-dé.

4 Te té Juáá ní xáhaⁿ-dè xii té Hèrodés:

—Ñá túú ní quide váha-n dūha ní naqueheⁿ-n ñaha ní cándeca ñani-n —duha ní xáhaⁿ té Juáá xii té Hèrodés.

5 Te sá dúcáⁿ ní xáhaⁿ té Juáá-án xii té Hèrodés, te ní cuini té Hèrodés-án cahni-dé té Juáá-án, dico ñá túú ní cùyí-dé chí ní

yùhú-dé núú cuè ñáiyu, chi nchaá-yu ní cutnúni íni-yu sá tē Juáá cúú-dē ìᵀ tée cáháⁿ tnúhu Yá Ndióxi.

⁶ Te ìᵀ nduu ní quide té Hèrodés vico vehe-dé ní quide càhnu-dé nduu ní cacu-dé. Te ndècu ìᵀ déhe yoco ñaha nani Herodiás-án, te xíchí-án ní quihu-xi xití vehe núú cúú vico-án ní xita saha-xi. Te núcóo té Hèrodés ndihi cue tée ní cáháⁿ-dé ndéhé-güedé, te ío ní cudíí ìni-dé nàcuáa ní xita xíchí-án.

⁷ Te té Hèrodés-án ní cacunehe-dé ndéé Yá Ndióxi nàcuáa cutnúni íni xíchí-án sá ndàá cuañaha-dé ñuu ná cúú sá ná càcáⁿ-xi núú-dé.

⁸ Te xíchí-án ní dácáhu íni ñáhá náná-xi xii-xi ná cúú sá càcáⁿ-xi núú té Hèrodés, núú xiáⁿ ní xáhaⁿ-xi xii-dé:

—Cuiní-í quehndé-n díquí tē Juáá tée dàcuandute ñaha xii ñáiyu te taxi-n, dico na cùhuⁿ ìᵀ xití cóhó taxi-n —càchí-xi xáhaⁿ-xi xii-dé.

⁹ Te sá dúcáⁿ ní xáhaⁿ-xi, te ní cundiýí té Hèrodés, dico ñá túú ní níhi-dé nása cada-dé, chí ndédóho ñáiyu òré ní cacunehe-dé Yá Ndióxi sá ndàá cuañaha-dé ìᵀ sá ná càcáⁿ-xi núú-dé. Te ní quide-dé nàcuáa ní xáhaⁿ-xi.

¹⁰ Chí ní táuchíuⁿ-dē ní sáháⁿ cue tée ní xehndé-güedé díquí tē Juáá òré yíhi-dé ve-caá.

¹¹ Te ní chihi-güedé díquí-dé ìᵀ xití cóhó te nēhe-güedé cuánuhú ní sáñaha-güedé xii xíchí-án, te xíchí-án ní nacuañaha-xi xii náná-xi.

¹² Te cue tée xica cuu ndihi té Juáá-án ní sáháⁿ-güedé ní naqueheⁿ-güedé yiqui cuñú-dé ní chindúxi-güedé, te dàtnùni ní sáháⁿ-güedé ní xáhaⁿ-güedé xii Jesús nàcuáa ní cuu.

Jesús dácàxi-gá úhúⁿ mīl cue tē te ðiⁿ ñáiyu ðiⁿ ndihi landú

(Mr. 6:30-44; Lc. 9:10-17; Jn. 6:1-14)

¹³ Te Jesús ní níhi-gá tnúhu nàcuáa ní cuu ní xíhi té Juáá. Te sáta xiáⁿ te cuánguee-gá ìᵀ bàrcú cuáháⁿ-gá ìᵀ xichi núú ñá túú ñáiyu ndècu, dico nchaa ñáiyu xīndecu nchaa ñuu cáá yàtni xiáⁿ ní níhi-yu tnúhu sá cuáháⁿ-gá, te ní queé-yu ñuu-yu xica sahá-yu cuáháⁿ núú quidé-yu cuèndá quexio Jesús.

¹⁴ Te òré ní quexio Jesús núú cuáháⁿ-gá, te ní quene-gá bàrcú, te ní xiní-gá cuéhé víhi ñáiyu xīxúcu-yu xiáⁿ, te ní cundáhu íni ñáhá-gá xii-yu, te ní quide tátna-gá nchaa ñáiyu cùhú ndihi-yu.

¹⁵ Te sáta ní cuua te ní sáháⁿ cue tée xica cuu ndihi Jesús núú-gá, te xáhaⁿ-güedé xii-gá:

—Sa ní cuu dandàca-n nchaa ñáiyu-a chi sa ní cuua, te na quihiⁿ-yu nchaa ñuu cáá yàtni iha cuaáⁿ-yu sá càxi-yu, chí núú ndécú-ó iha

ñá túú tnáhi ná ío —càchí-güedé xáhaⁿ-güedé xii-gá.

¹⁶ Te Jesús ní xáhaⁿ-gá xii-güedé:

—Ñáhá, vá dándaca-í-yu, váha-gá mee-ndo chí cuañaha sá ná càxi-yu —càchí-gá xáhaⁿ-gá xii-güedé.

¹⁷ Te ní xáhaⁿ-güedé xii-gá:

—Ñá túú nágá ndécú ndihi-ndí, chí úhúⁿ duha-ná pàa ndihi úú-nà chácá ndécú ndihi-ndí —càchí-güedé xáhaⁿ-güedé xii-gá.

¹⁸ Te Jesús ní xáhaⁿ-gá xii-güedé:

—Chí cánēhe paá-án ndihi chácá-án táquixi iha —cachí-gá xáhaⁿ-gá xii-güedé.

¹⁹ Te Jesús ní xáhaⁿ-gá xii nchaa ñáiyu sá ná ngóo-yu nchaá-yu núú ité cuíí cáa xiáⁿ, te ní queheⁿ-gá ndí úhúⁿ pàa-án ndihi ndí ndúú chácá-án te ní ndacoto-gá andiu, te ní ndacáⁿ táhú-gá núú Yá Ndióxi, te dàtnùni ní táhú cuèchi-gá pàa-án te ní sáñaha-gá xii cue tée xica cuu ndihi-gá ní dácáñhu-güedé cue ñáiyu ní xexí-yu.

²⁰ Te nchaá-yu ní xexí-yu ní ndahá xití-yu. Te sáta ní túhú cóhó-yu te ní nadatácá-güedé nchaa sá ní quendóo, te ní chítú ùxúú tnáhi tídihi mee-ni sá ní quendóo.

²¹ Te nchaa ñáiyu ní xexí-án ní xínu úhúⁿ mīl mee-ni cuè tée chí mee-ni cuè tée-án ní quiúndehu, te ðiⁿ cue ñáiyu ðiⁿ ndihi cue landú.

Jesús xicá-gá núú ndute

(Mr. 6:45-52; Jn. 6:16-21)

²² Te òré-ni-án ní xáhaⁿ Jesús xii cue tée xica cuu ndihi-gá sá quēe-güedé bàrcú téhndé-güedé ndàa ingá xio yuhu làgúná, te mee-gá quendóo-gá cada ndee íni tnáhá-gá ndihi cue ñáiyu.

²³ Te sáta ní yáha ní quide ndee íni tnáhá-gá ndihi cue ñáiyu, te medi-gá ní xica-gá cuáasa-gá ìᵀ tindúú cáá yàtni xiáⁿ cuèndá cáháⁿ ndihi-gá Yá Ndióxi, te ðiu-ni medi-gá ndécú xiáⁿ ní cundiquíⁿ.

²⁴ Te bàrcú sá ñúhú cuè tée xica cuu ndihi-gá-án sa cuáháⁿ-xi ndee cuádava xití làgúná-án, te níhi víhi quene táchí ndàa ichi cuáháⁿ-xi, te dàcandau ndeé-xi ndute nchaa ðiⁿ-xi.

²⁵ Te tàcuíhndá váhi-gá tá xica Jesús núú ndute cuáháⁿ tá cüyatni-gá bàrcú-án.

²⁶ Te cue tée xica cuu ndihi-gá ní xiní ñáhá-güedé xii-gá tá xica-gá núú ndute cuáháⁿ, te ní yùhú-güedé te níhi ní cáháⁿ-güedé te xitnàha-güedé:

—jhiⁿ àlmá! —càchí-güedé xitnàha-güedé.

²⁷ Te Jesús ní cáháⁿ-gá, te xáhaⁿ-gá xii-güedé:

—Ñíí cunduu-ndo vā yùhú-ndó, chí yùhú cúú-í —càchí-gá xáhaⁿ-gá xii-güedé.

²⁸ Te té Pélú ní xáhaⁿ-dē xii-gá:

—Mèstrú, te núu ðiu-n te tauchìuⁿ sá tnáhá-í ná càca-í núu ndute quixi tnahá ñáhá-í xii-n —càchí-dé xáhaⁿ-gã xii-gá.

²⁹ Te Jèsús ní xáhaⁿ-gã xii-dé:

—Taquixi —cachí-gã xáhaⁿ-gã xii-dé.

Te té Pèlú ní nuu-dé núu bàrcú, te ní ngüíta-dé tá xica-dé núu ndute cuáháⁿ cuátnahá ñáhá-dé xii-gá.

³⁰ Te ní cutnùní iní-dé sá ïo níhi xico táchí, te ní ngüíta-dé yühú-dé. Te òré-ni-áⁿ tá quèe naa-dé xití ndute cuáháⁿ ní cùu, te níhi ní càháⁿ-dé xáhaⁿ-dè xii Jèsús:

—¡Mèstrú, vá dáña-n quèe naa-í xití ndute! —càchí-dé xáhaⁿ-dè xii-gá.

³¹ Te òré-ni-áⁿ ní tñi Jèsús ndaha-dé, te ní xáhaⁿ-gã xii-dé:

—¿Ná cuèndá ñá túú sàndáá ndisa iní ñáhá-n xii-í sàni ñⁿ sani úú iní-n-i? —càchí-gã xáhaⁿ-gã xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ ní ngüíñí táchí.

³³ Te cue téé ñùhu xití bàrcú-áⁿ ní ngüíñí xití-güedé núu-gã, te xáhaⁿ-güedé xii-gá:

—Sá ndáá sá cuítí sã díú yòhó cúu-n Déhe Dütú Ndióxi —càchí-güedé xáhaⁿ-güedé xii-gá.

Jèsús quidé tãtna-gã ñáyiú cùhú ñⁿ xichi núu nání Gènesarét

(Mr: 6:53-56)

³⁴ Te ní quexio Jèsús ndihi cue téé xica cuu ndihi-gã ndàa ingá xio yuhu làgúná, te núu ní quexio-gã ndihi-güedé-áⁿ nání-xi Gènesarét.

³⁵ Te nchaa ñáyiú xìndecu xiáⁿ ní cutnùní iní-yu sá díú-gã ní quexio, te ní dàtécú tnùhu-yu nchaa dava-gã ñáyiú xìndecu yatni xiáⁿ sã ní quexio-gã. Te ndècá-yu nchaa ñáyiú cùhú ndécú ndihí-yu cuáháⁿ núu ndécú Jèsús.

³⁶ Te nchaa ñáyiú cùhú-áⁿ ní ngüíta-yu càháⁿ ndáhú-yu núu Jèsús sá ná dàña-gã tnándeé-yu cuèdicó luha yuhu dõó-gã cuèndá ndúha-yu, te cue ñáyiú cùhú, ñáyiú ní tnándeé yuhu dõó-gã ní ndúha-yu.

15

Cuèndá nchaa sá quidé-xi ngündecu cuéchi ñáyiú

(Mr: 7:1-23)

¹ Te sá tá dúcáⁿ te ñⁿ úú cue téé cùu fariséú ní quee-güedé ñuú Jerusálén, ndihi cue téé dàcuaha ñaha xii ñáyiú nchaa tnùhu ní chidó tnùní ndíi Moisés ní quexio-güedé núu ndécú Jèsús, te xáhaⁿ-güedé xii-gá:

² —¿Ná cuèndá cue téé xica cuu ndihí-n ñá túú nàquete-güedé ndaha-güedé òré caxi-güedé nàcuáa ní cachí cue ñani tnáhá-ó ní xìndecu ndéé sanaha-i? —càchí-güedé xáhaⁿ-güedé xii-gá.

³ Te Jèsús ní xáhaⁿ-gã xii-güedé:

—Te nchòhó tucu, ¿ná cuèndá ñá túú quide-ndo nacuáa ní cachí Yá Ndióxi cada-ndo, núu da nàcuáa ta quide cue téé ñuyúú-a quide-ndo-i?

⁴ Te Yá Ndióxi càchí-gã núu tùtú-gá: “Canehe-ndo sã yáñùhu núu tãtã-ndó ndihí núu náná-ndó”, càchí-gã. Te càchí tucu-gã ingá xichi núu tùtú-gá: “Nchaa ñáyiú na càháⁿ úhú tãtã-xi àdi náná-xi te cahni ñaha-güedé xii-yu”, duha càchí-gã núu tùtú-gá.

⁵ Dico nchòhó càchí-ndó sã cuè ñáyiú chi cuu cùñhá-yu xii tãtã-yu àdi náná-yu: “Vá cúú chindee ñaha-ndí xii-n, chi sã táxí-ndí xii-n ní cùu, xiáⁿ ní nduu cuèndá Yá Ndióxi”, cuu duha cùñhá ñáyiú xii tãtã-yu àdi náná-yu càchí-ndó.

⁶ Te càchí-ndó sã cuè ñáyiú ducaⁿ na cùñhá xii tãtã-xi àdi náná-xi te ñá túú-gã tãtã-yu chindéé-yu ní tãtã-yu ní náná-yu. Te ducaⁿ quide-ndo chi ní dáquéé tihú-ndó nàcuáa ní cachí Yá Ndióxi cada-ndo, te mee-ni nàcuáa ta quide cue téé ñuyúú-a véxi nchicúⁿ nihnu-ndo quide-ndo.

⁷ ¡Te nchòhó cúu-ndó ñáyiú ío dándahú méé-xi, chi càchí-ndó sã quidé ndáá-ndó te ñá ndáá sã quidé ndáá-ndó! Te ní quee ndáá-xi nàcuáa ní chidó tnùní ndíi Chaiá téé ní xóo càháⁿ tnùhu Yá Ndióxi ndéé sanaha núu tùtú-gã núu càháⁿ-xi nàcuáa ní càháⁿ-gã cuèndá-ndó, te duha ní cachí-gã:

⁸ Ñáyiú-a càchí-yu sá ío cahnu cuu-í dico dicó-ni yuhu càháⁿ-yu,

chi duuⁿ duuⁿ ñá túú ñùhu iní ñáhá-yu xii-í.

⁹ Te áúⁿ nã cuu chññu ñáhá-yu xii-í chi ñá túú vèdana ndéé nándihí-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnùhu sã ní cahu iní cue ñáyiú ñuyúú-a càháⁿ-yu.

Duha ní chidó tnùní ndíi Chaiá núu tùtú Yá Ndióxi nàcuáa ní càháⁿ-gã cuèndá-ndó —càchí-gã xáhaⁿ-gã xii-güedé.

¹⁰ Te ní xáhaⁿ-gã xii cue ñáyiú:

—Chí táquixi ndehe iha, te cundedóho váha-ndo tnùhu na càháⁿ-í, te ío váha cuáha-ndo cuèndá.

¹¹ Nchaa sá xéxi-ndó chi ñá túú nã quidé-xi iní-ndó, dico nchaa sá cuèhé sá dúhá sàni iní-ndó càháⁿ-ndó nchaa xiáⁿ quidé-xi ndéu cuéchi-ndo —càchí-gã xáhaⁿ-gã xii-yu.

¹² Te cue téé xica cuu ndihí-gã ní sáháⁿ-güedé ndéé núu-gã, te xáhaⁿ-güedé xii-gá:

—Véxi-ndí càchí tnùhu-ndí xii-n sã cuè téé cùu fariséú ñá túú cùu váha iní-güedé cuèndá tnùhu ní càháⁿ-n —càchí-güedé xáhaⁿ-güedé xii-gá.

¹³ Te ní xáhaⁿ-gã xii-güedé:

—Nchaa ñáiyu ñá túú cüu cuendá Tãtà-í Dútú Ndióxi cuita nihnú-yu, chí ñáiyu-án cüu-yu dàtná nchaa cùhú sã ñá túú nàndíhi te tñuhu ñáiyu.

¹⁴ Te vá cáda cuendá-ndó nàcuáa cáháⁿ cue tée-án, chí cüu-güedé dàtná cue ñáiyu cuáá sácuita nehe tnáha. Te nchóhó xini-ndó sã núu ñáiyu cuáá ná cuitá nehe tucú-yu ingá ñáiyu cuáá, te ndi ndüu-yu quée-yu déhva —cächí-gá xáhaⁿ-gã xii-güedé.

¹⁵ Te té Pèlú ní xáhaⁿ-dè xii-gá:
—Cächí tñuhu xii-ndí nàcuáa quée-xi tñuhu ní cáháⁿ-n-án —cächí-dé xáhaⁿ-dè xii-gá.

¹⁶ Te Jesús ní xáhaⁿ-gã:
—¿Náa tnáhá nchóhó ñá túú ní təcú tñuni-ndó nàcuáa ndüu tñuhu ní cáháⁿ-í núu ñáiyu-án ñá?

¹⁷ Nchaa sá xéxi-yu cuánguee-xi xiti-yu, te dàtnüni náyáha ñaha-xi xii-yu.

¹⁸ Dico nchaa tñuhu cuéhé tñuhu duha cáháⁿ-yu xiáⁿ véxi quene-xi ini-yu, te diu nchaa xiáⁿ quidé-xi ndecu cuéchi-yu.

¹⁹ Te ini-yu-án cácu nihnu nchaa sá cuéhé sá dúhá, chí sáni cuéhé sáni dúha ini-yu, te sàhni-yu tnáha ñáiyu-yu, te cue tée cáháⁿ ndihi-güedé ñáiyu díhi te ñá díú ñadíhi-güedé cüu-yu. Te diu-ni ducaⁿ quide cue ñáiyu díhi cáháⁿ ndihi-yu cue tée te ñá díú yíi-yu cüu-güedé, te cuéi tée te cuéi ñadíhi mee-ni ìchi díi ini cúdii ini-yu cundecú-yu, te dùhu ndachiuⁿ tnáhá-yu, te dàcuandehndé-yu, te cáháⁿ cuéhé-yu cuendá tnáha ñáiyu-yu.

²⁰ Te nchaa xiáⁿ quidé-xi ndecu cuéchi-yu, dico ñá díú sã ñá túú ndáhu-yu dàtná ní cachí cue tée ndéé sanaha, chí xiáⁿ ñá túú quide-xi cuendá ngündecu cuéchi-yu —cächí-gá xáhaⁿ-gã xii-güedé.

Hiⁿ ñadíhi ñaha cüu ñani tnáhá ñáiyu canànea ní sàndáa ini-án Jesús
(Mr: 7:24-30)

²¹ Te Jesús ní xica-gá cuáháⁿ-gá ní sáa-gá yucu cue tée ñuú Tirú, ndihi yucu cue tée ñuú Sidón.

²² Te ñá ñadíhi ñaha cüu ñani tnáhá ñáiyu canànea ndécú yàtni-aⁿ xiáⁿ, te níhi ta cáháⁿ-aⁿ ní quexio núu ndécú Jesús, te xáhaⁿ-aⁿ xii-gá:

—jMèstrú, ñani tnáhá ndii Dàvíi, cundàhú ini ñáhá xii-í cada tãtna-n déhe yoco-í! Chí yíhi ñaha espíritu cündíhi yucu ñávaha xii-xi te ío dándoho ñaha-xi —cachí-aⁿ xáhaⁿ xii-gá.

²³ Dico Jesús ñá túú tnáhi ní cáháⁿ-gã, te cue tée xica cuu ndihi-gá ní sáháⁿ-güedé núu-gã, te xáhaⁿ-güedé xii-gá:

—Cúñaha xii ñaha-án ná nùhu-aⁿ, chí ío níhi cáháⁿ-aⁿ nchícúⁿ ñáhá-án xii-o —cachí-güedé xáhaⁿ-güedé xii-gá.

²⁴ Te Jesús ní xáhaⁿ-gã xii-güedé:
—Yá Ndióxi ní tendaha ñaha-gá xii-í véxi-í mee-ni ñuú núu xindecu cue ñáiyu israhél, chí

ñáiyu-án cüu-yu dàtná cue mbéé cue quiti ní xita, chí ta xita nihnú-yu cuáháⁿ —cächí-gá xáhaⁿ-gã xii-güedé.

²⁵ Te ñadíhi-án ní sáháⁿ-aⁿ ndéé núu Jèsús ní ngüíni xiti-án, te xáhaⁿ-aⁿ xii-gá:

—jMèstrú, chindee ñaha xii-í! —cachí-aⁿ xáhaⁿ-aⁿ xii-gá.

²⁶ Te Jesús ní xáhaⁿ-gã xii-aⁿ:

—Vá cüu chindee-í cue ñáiyu ñá túú cüu ñáiyu israhél, chí ñá-ni cüu-xi núu na quèheⁿ-o paá cüu cuendá cue landú te cuáha-o iná caxi-í —cachí-gá xáhaⁿ-gã xii-aⁿ.

²⁷ Dico ñaha-án ní xáhaⁿ-aⁿ xii-gá:

—Ndáá cáháⁿ-n, dico cue iná chí nàdatacá-güedi sá ngóyo yùhu cóho xitohó-güedi —cachí-aⁿ xáhaⁿ-aⁿ xii-gá.

²⁸ Te Jesús ní xáhaⁿ-gã xii-aⁿ:

—jYòhó ñaha cùhú déhe-xi, ío váha sàndáa ini ñáhá-n xii-í! Te na càda-í nàcuáa cuiniⁿ —cachí-gá xáhaⁿ-gã xii-aⁿ.

Te òre-ni-án ní ndúha déhe-aⁿ.

Jèsús quidé tãma-gá vai ñáiyu cùhú

²⁹ Te sáta dúcáⁿ ní cuu te Jesús ní xica-gá cuáháⁿ-gá ní yáha-gá yuhu làgúná distritú Galiléa, te cuasaá-gá ñá tindúu te xiáⁿ ní ngóo-gá.

³⁰ Te xiáⁿ núcóo-gá ní quexio cuéhé víhi ñáiyu, te ndécá-yu ñáiyu yacua, ndihi ñáiyu ní yíchi ñá xio ndaha-xi, ndihi ñáiyu cuáa, ndihi ñáiyu ñíhi, te vai dava-gá cue ñáiyu cùhú tnáhá dava-gá núu cuéhé ndécá-yu ní quexio núu ndécú-gã. Te ní taxi ndecu ñáhá-yu núu Jesús te ní quide tãtna ñaha-gã xii-yu te ní ndúha-yu.

³¹ Te nchaa ñáiyu xindecu-án ío ní cuñuhu-yu sá dúcáⁿ ní xini-yu ní cuu ní nacáháⁿ nchaa ñáiyu ñíhi, ndihi cuendá sã ní ndúha nchaa cue ñáiyu yacua, ndihi cuendá sã ní ndúha cue ñáiyu ní yíchi ñá xio ndaha-xi, ndihi cuendá sã ní ndúha núu cué ñáiyu cuáa. Te nchaá-yu ní cachí-yu sá ío càhnu cuu Yá Ndióxi Yáa cüu Ndióxi cue ñáiyu israhél.

Jèsús dácaxi-gá cúmi ml cue tée te diⁿ ñáiyu díhi ndihi landú

(Mr: 8:1-10)

³² Te Jesús ní cana-gá cue tée xica cuu ndihi-gá, te ní xáhaⁿ-gã xii-güedé:

—Yúhu cundàhú ini-í nchaa ñáiyu-a, chí sa ní cuu úní nduu ndecu ndihi ñáhá-yu xii-o iha, te ñá túú tnáhi-gá sá caxi-yu, te ñá túú cuini-í natendaha-í-yu nùhú tnámá-yu vehé-yu, chí ná ndéé cuáháⁿ cuneé-yu docó ìchi —cachí-gá xáhaⁿ-gã xii-güedé.

³³ Te ní xáhaⁿ-güedé xii-gá:

—¿Te ndéé níhi-ó sã cuñaha-o càxi nchaa ñáiyu-a, te ío cuéhé-yu te ñá túú ná ío iha chí cüu-xi xiti yucu-i? —cachí-güedé xáhaⁿ-güedé xii-gá.

³⁴ Te Jèsús ní xícáⁿ tnúhú-gá núú-güedé, te xáhaⁿ-gá:

—¿Ná daha-gá pàá ndécú ndihi-ndo-i? — cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tnàhá pàá ndihi ìⁿ úú-gá chácá —cachí-güedé xáhaⁿ-güedé xii-gá.

³⁵ Te Jèsús ní xáhaⁿ-gá xii nchaa ñáyiú sá ná ngóo-yu nchaá-yu, te ní ngóo-yu.

³⁶ Te ní queheⁿ-gá ndi úsá pàá-áⁿ ndi ìⁿ úú-gá chácá-áⁿ, te ní ndacáⁿ táhú-gá núú Yá Ndiòxí, te dátùnì ní táhú cuèchi-gá pàá-áⁿ ndihi chácá-áⁿ te ní sáñaha-gá xii cue téé xica cuu ndihi-gá ní dácáñhũ-güedé nchaa ñáyiú-áⁿ.

³⁷ Te nchaá-yu ní xexí-yu ní ndahá xití-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú úsá tnàhá tídihí mee-ni sá ní quendóo-áⁿ.

³⁸ Te núú ncháá ñáyiú ní xexi te ní xínu cúmí mìl mee-ni cuè téé chi ñiú-ni cue téé-áⁿ ní quíúndehu, te ñiú cue ñáyiú ñihí ndihi cue landú.

³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñúú Màgdala.

16

Cue téé cùu fariséú ndihi cue téé cùu saducéú xáhaⁿ-güedé xii Jèsús cada-gá ìⁿ sá vǎ yǎo tnàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xító ndèé ñàhá-güedé xii-gá, te xáhaⁿ-güedé sá ná cádá-gá ìⁿ sá vǎ yǎo tnàhí ndàcu cada cundehe-güedé nàcuáa cutnùnì iní-güedé núú ndáá sá Yá Ndiòxí ní tendaha ñàha-gá xii-gá véxi-gá ñuyúú-a.

² Te Jèsús ní xáhaⁿ-gá xii-güedé:

—Nchòhó chi òrè tá cuàa cuáháⁿ te ndàcoto-ndo andiú, te cächí-ndó: “Ío váha cada-xi tneé chi càa vícò tícuèhé andiú”, duha cächí-ndó.

³ Te òrè dátneé ndàcòto tucu-ndo andiú, te cächí-ndó: “Vǎ cádá váha-xi nduu vitna chi tícuèhé andiú, te càa vícò”, duha cächí-ndó. ¡Dico nchòhó cùú-ndó ñáyiú ío dándahú méé-xí sǎ quidé ndáá te ñá ndáá sǎ quidé ndáá-ndó! Te cutnùnì iní-ndó nàcuáa quide-xi andiú, dico ñá túú cutnùnì iní-ndó nàcuáa quèe-xi nchaa sǎ quidé Yá Ndiòxí vitna.

⁴ Dico nchaa nchòhó ñáyiú ndècu ñuyúú vitna ío cuihna iní-ndó, te ñá túú cuiñí-ndó càda ndáá-ndó núú Yá Ndiòxí, te cuiñí-ndó càda-í ìⁿ sá vǎ yǎo tnàhí ndàcu cada dico ñá túú nǎgá cada-í, chi ñiú-ni nàcuáa ní quide Yá Ndiòxí ndíi Jónás ñiú-ni ducaⁿ càda tucu-gá vitna —cächí-gá xáhaⁿ-gá xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuèndá cue téé cùu fariséú ndihi cuèndá cue téé cùu saducéú

(Mr. 8:14-21)

⁵ Te òrè ní quexìo ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá ní cunaa-güedé canehe-güedé pàá quíhíⁿ caxi-güedé.

⁶ Te Jèsús ní cáháⁿ-gá dóho-güedé, te xáhaⁿ-gá xii-güedé:

—Ná cächí tnúhu-í xii-ndo sǎ ío quíhí iní-ndó cùndecu-ndo, te vǎ cádá cuèndá tnàhí-ndo lèvadurá cue téé cùu fariséú ndihi cue téé cùu saducéú —cächí-gá xáhaⁿ-gá xii-güedé.

⁷ Te ní nguíta-güedé xítnàha-güedé:

—Cuèndá sǎ ñá túú ní cǎnehe-o pàá quixi xiǎⁿ duha cǎháⁿ-gá —cächí-güedé xítnàha-güedé.

⁸ Te Jèsús ní cutnùnì iní-gá nàcuáa ndiú tnúhu xítnàha-güedé, núú ní xáhaⁿ-gá xii-güedé:

—Nchòhó chi ñá túú sàndáá iní ñàhá váha-ndo xi-í núu xiǎⁿ da sǎ ñá túú ní cǎnehe-ndo pàá quixi cǎháⁿ-ndó.

⁹ Te náa ñá ndácú iní-ndó sǎ núú ùhúⁿ-ni pàá, te ní taxi-í ní dácáñhũ-ndo ní xexi ùhúⁿ mìl cue téé, chi ñiú-ni cue téé-áⁿ ní quíúndehu, te sátá ní túhú cóhó-güedé te ní chítú tíni tídihí mee-ni sǎ ní quendóo-áⁿ? Te ñá tècú tnùnì-ndó nàcuáa quèe-xi nàcuáa ní quide-í.

¹⁰ Te náa ñá ndácú tucu iní-ndó sǎ núú úsá-ni pàá te ní taxi-í ní dácáñhũ tucu-ndo ní xexi cùmí mìl cue téé, chi ñiú-ni cue téé-áⁿ ní quíúndehu, te sátá ní túhú cóhó-güedé te ní nadatácá-ndó nchaa sǎ ní quendóo, te ní chítú tíni tídihí mee-ni sǎ ní quendóo-áⁿ?

¹¹ Dico nchòhó chi ñá túú ní quide cuèndá-ndó nàcuáa ndiú tnúhu cǎháⁿ-í òrè ní cächí-í sǎ vǎ quèhéⁿ cuèndá-ndó lèvadurá cue téé cùu fariséú ndihi cue téé cùu saducéú, chi ñá díú cuèndá pàá ní cǎháⁿ-í —cächí-gá xáhaⁿ-gá xii-güedé.

¹² Te sátá dúcáⁿ ní xáhaⁿ Jèsús xii cue téé xica cuu ndihi-gá, te ní tecú tnùnì-güedé sǎ xáhaⁿ-gá xii-güedé sǎ vǎ tníú-güedé tnúhu cǎháⁿ cue téé cùu fariséú ndihi cue téé cùu saducéú, te ñá díú cuèndá levadurá sǎ quíhu yuchi cuáha pàá ní cǎháⁿ-gá.

Té Pèùú xáhaⁿ-dè xii Jèsús sǎ díú-gǎ cùú-gǎ Cristú

(Mr. 8:27-30; Lc. 9:18-21)

¹³ Te Jèsús ní quexìo-gá yucu cue téé ñúú Cèsareá Filipú, te ní xícáⁿ tnúhú-gá núú cuè téé xica cuu ndihi-gá, te xáhaⁿ-gá xii-güedé:

—¿Yoo cùu yúhú Téé cùu ñani tnàhá-ndó nchaa-ndo cächí cue ñáyiú-va? —cächí-gá xáhaⁿ-gá xii-güedé.

14 Te ní xáhaⁿ-güedé xii-gá:

—Davá-yu cächí-yu sá cúu-n ndii Juàà téé ní xóo dacuàndute ñaha xii ñáyi, te davá-yu cächí-yu sá cúu-n tē Èliás, te davá-yu cächí-yu sá cúu-n ndii Jeremías téé ní xóo cáháⁿ tnúhu Yá Ndióxi ndéé sanaha, àdi cuu-n ingá téé ní xóo cáháⁿ tnúhu-gá ndéé sanaha, duha cächí-yu —cächí-güedé xáhaⁿ-güedé xii-gá.

15 Te Jèsús ní xicáⁿ tnúhú tùcu-gá núu-güedé, te xáhaⁿ-gá xii-güedé:

—Te nchòhó, zyoo sàni iní-ndó cùu-í-i? —cächí-gá xáhaⁿ-gá xii-güedé.

16 Te té Ximú, àdi Pelú chi úú ñu-dé, ní xáhaⁿ-dè xii-gá:

—Yòhó cúu-n Cristú Yaa ní tendaha Yá Ndióxi véxi ñuyúú-a, te diu Yá Ndióxi cúu-gá Yaa ndécú nchàa nduu nchaa quúú, te yòhó cúu-n Dèhe-gá —cächí-dé xáhaⁿ-dè xii-gá.

17 Te Jèsús ní xáhaⁿ-gá xii-dé:

—Yòhó té Ximú déhe té Jónás, ío váha tǎhú-n chi mee Tǎtǎ-í Dútú Ndióxi ní dácáhú iní ñáhá-gá xii-n nàcuáa cunduu tnúhu cáháⁿ-n, te ñá díú ñi ñáyi ñuyúú-a ducaⁿ ní dácahu iní ñáhá-yu xii-n tnúhu-án.

18 Te yúhú xáhaⁿ-í Pelú xii-n, te tnúhu-án quée-xí yúú, chi quée ndáá-xi nàcuáa ñani-n, chi cuu-n ñi téé vá cání ñi caní úú iní-xi canu ichi-n cué ñáyi nàcuáa cundecu ndihí ñáhá-yu xii-í. Te nchaa ñáyi cùu cuendá-í vá ndácú yùcu ñávaha dacuíta nihnu ñaha-xi xii-yu.

19 Te yúhú taxi-í tnúhu ndee iní cundecu ndihí-n cuendá cunuu-n núú cué ñáyi yindaha ñaha Yá Ndióxi, te nchaa sá ná cáháⁿ-n sá cúu-xí sá váha, te diu-ni ducaⁿ cáháⁿ Yá Ndióxi, te nchaa sá ná cáháⁿ-n sá ñá túú cùu-xi sá váha, te diu-ni ducaⁿ cáháⁿ tucu-gá, chi quide-n nacuáa cuini-gá —cächí-gá xáhaⁿ-gá xii-dé.

20 Te sáta dúcáⁿ te ní xáhaⁿ Jèsús xii cue téé xica cuu ndihí-gá sá vǎ yóo cùñaha-güedé sá díú-gá cúu-gá Cristú Yaa ní tendaha Yá Ndióxi véxi ñuyúú-a.

*Jèsús càháⁿ-gá sá cáhni ñaha-güedé xii-gá
(Mr. 8:31-9:1; Lc. 9:22-27)*

21 Te ndéé davá-án ní ngúita Jèsús xáhaⁿ-gá xii cue téé xica cuu ndihí-gá:

—Dacuítí sá quihíⁿ-í ñuu Jerusálén, te yacáⁿ cue téé cùu sacuéhé núú ñáyi isràél, ndihí cue dútú cúnúu, ndihí cue téé dàcuaha ñaha xii ñáyi nchaa tnúhu ní chídó tnúni ndii Moisés, nchaa cue téé-án ío dandòho ñaha-güedé xii-í, te cahni ñaha-güedé, dico nduu úní sá cùu-í te ndoto-í —cächí-gá xáhaⁿ-gá xii-güedé.

22 Te té Pelú ní cana-dé Jèsús ñi xio, te ní ngúita-dé ténáá ñáhá-dè xii-gá, te xáhaⁿ-dè:

—jsá vǎ cächí Ndióxi sá dúcáⁿ ndòho-n chi ñá túú tàu-n sá dúcáⁿ ndòho-n! —cächí-dé xáhaⁿ-dè xii-gá.

23 Te ndáa sáta Jèsús nútní té Pelú òré ducaⁿ xáhaⁿ-dè xii-gá núu ní nchócuilhu-gá, te xáhaⁿ-gá xii-dé:

—jXocúñi yòhó yucu ñávaha núu-í-a chi dicó quidé tñèñu-n! Chi ñá túú sàni iní-ò dàtná sání iní Yá Ndióxi chi ñi-ni sàni iní-ò ndihí dava-gá cue ñáyi ndècu ñuyúú-a —cächí-gá xáhaⁿ-gá xii-dé.

24 Te sáta dúcáⁿ te ní xáhaⁿ-gá xii nchaa cue téé xica cuu ndihí-gá:

—Nchaa ñáyi cuini chitnahá ñáhá xii-í, te xini ñuhu-xi dañá-yu vá cadá-gá-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuéi na ndòhó-yu dàtná ndoho-í.

25 Te nchaa ñáyi cuini sá ñá túú tnàhí ná yáha cundecu ñuyúú-a cuíta nihnú-yu, dico nchaa ñáyi ñá túú tnàhí yúhú cuéi nándi sá ná yáha-yu cundecu-yu ñuyúú-a sá cuendá-í, te ñáyi-án nanihí tǎhú-yu.

26 Te cuéi nchaandi túhú sá ío ñuyúú-a na nihí ñáyi cundecu ndihí-yu, dico núu diu nchaa xǎⁿ ná càda cuíta nihnú-yu te ñá túú vèdana nàndihí-xi sá dúcáⁿ ndècu ndihí-yu nchaa xǎⁿ. Te ní ñi sá ío ñuyúú-a vá chindèe ñaha-xi xii-yu cuendá nanihí tǎhú-yu.

27 Te ndáa quée-xí tnúhu càháⁿ-í, chi na quixi tucu yúhú Téé cùu ñani tnáhá-yu nchaa-yu, te davá-án quini-yu sá ío càhnu cuu-í dàtná càhnu cuu Tǎtǎ-í Dútú Ndióxi, te quixi-í ndihí cue espíritú xínú cuéhi núú-gá, te davá-án cuáha-í nchaa ñáyi sá ndúú tǎhú-yu nàcuáa nduu sá ní quidé-yu ñi ñi-yu.

28 Te na cächí tnúhu ndáá-í xii-ndo sá ío dava nchòhó ñáyi ndècu iha vitna vá cùu-ni-ndo, chi cundecu-ni-ndo ndéé quini-ndó quixi tucu yúhú Téé cùu ñani tnáhá-ndó nchaa-ndo taxi tñuni-í nchaa ñáyi —cächí-gá xáhaⁿ-gá xii-güedé.

17

*Ní nadáma dóo Jèsús ndihí núú-gá
(Mr. 9:2-13; Lc. 9:28-36)*

1 Te núú ññú nduu sá dúcáⁿ ní cáháⁿ Jèsús, te ní xica-gá cuásaá-gá ñi yucu dúcúⁿ, te ndèca-gá té Pelú, ndihí té Jacóbo, ndihí té Juàá ñani té Jacóbo-án cuásaá. Te úní tnàhí-ni cue téé-án ndécá-gá cuásaá.

2 Te yucu-án ndécú-gá ní nadáma núú-gá ndihí dóo-gá, te núú-gá súúni dátáaⁿ-xi dàtná quidé-xi núú nchicanhii, te dóo-gá súúni ní nduu cuixíⁿ dàtná cáá ñuhú cuixíⁿ.

3 Te òré-ni-án ní xini-güedé ndii Moisés ndihí té Èliás nútní-güedé ndihí-gá ndátñuhu ndihí ñaha-güedé xii-gá.

4 Te té Pelú ní xáhaⁿ-dè xii Jèsús:

—Mèstrú, ¡yáha ní cuu sá ndécú-ó ìha vitna! Te núu cuiní-n, te na dàcaa-ndí úní tnàhá vehe tnuvixíⁿ, te ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xáhaⁿ-dè xii-gá.

⁵ Te nini dúcáⁿ caháⁿ té Pèlú ní quexio ìⁿ vícú núú ndécú-güedè ní dádáhu ñaha-xi xii-güedé te súúni chàhnchí. Te xití vícú-áⁿ ní tecú ní cáháⁿ Yá Ndióxi, te xáhaⁿ-gá xii-güedé:

—Tée-a cùu-dé Déhe-í tée ío cùu iní-í, te ío cùd^{hí} iní-í-dé, te cundedóho-ndo nchàa tnúhu cáháⁿ-dè —duha ní xáhaⁿ-gá xii-güedé.

⁶ Te sá dúcáⁿ ní cáháⁿ Yá Ndióxi ní tecú dóho cue tée xica cuu ndihi Jesús te ío ní yùhú-güedé, te ní ngüíñí xití-güedé te ní nuu núú-güedé ndàa núú ñúhú.

⁷ Te Jèsús cuáháⁿ-gá núú xíndecu cue tée xica cuu ndihi-gá, te ní tendaha ñaha-gá, te xáhaⁿ-gá xii-güedé:

—Chí ndácuñí, vá yùhú-ndó —càchí-gá xáhaⁿ-gá xii-güedé.

⁸ Te òré ní ndanehe núú-güedé, te ñá túú-gá ní xini-güedé cue tée úú-áⁿ chí mee-ná Jèsús.

⁹ Te òré cuánuu ndihi ñaha Jèsús xii-güedé tindúú-áⁿ, te ní xáhaⁿ-gá xii-güedé:

—Vá yóo cùñaha-ndo ní ìⁿ sá ní xini-ndó núú ní sáá-ó-á, te cuu cáháⁿ-ndó dico ndéé ná yáha ndoto yùhú Tée cùu ñani tnàhá-ndó nchàa-ndo sá cùu-í —càchí-gá xáhaⁿ-gá xii-güedé.

¹⁰ Te cue tée xica cuu ndihi-gá ní xáhaⁿ-güedé xii-gá:

—Cuiní-ndí cachí tnúhu-n ná cuendá cue tée dàcuaha ñaha xii ñáyiu nchaa tnúhu ní chídó tnúni ndí Moisés càchí-güedé sá dñha-gá té Èliás quixi, te dàtnúni quixi Yaá tendaha Yá Ndióxi quixi ñuyú-a —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Ndáá sá códo núu ìⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nàcuáa cùu.

¹² Te na cachí tnúhu-í xii-ndo vitna sá sá ní quixi tée ní quide dàtná ní xóo cada té Èliás, te cue ñáyiu ñá túú ní cùtnuní iní-yu sá díú-dé, te ní quide ñahá-yu xii-dé nchaa nàcuáa ní quixi iní mèè-yu, te ñu-ni ducaⁿ cada ñaha tucú-yu xii yùhú Tée cùu ñani tnàhá-yu nchaa-yu, chí dandóho ñahá-yu xii-í —càchí-gá xáhaⁿ-gá xii-güedé.

¹³ Te cue tée xica cuu ndihi-gá ní cùtnuní iní-güedé sá cuendá ndí Juáá tée ní xóo dacuàndute ñaha xii ñáyiu ní cáháⁿ-gá.

Jèsús quidé tātna-gá ìⁿ tée cuechi tnàhá cuhé xiyíhí

(Mr. 9:14-29; Lc. 9:37-43)

¹⁴ Te Jèsús ní nasáá-gá ndihi cue tée ní sáá ndihi-gá tindúú-áⁿ núú xíndecu vai ñáyiu, te

ní quexio ìⁿ tée núú-gá ní ngüíñí xití-dé, te xáhaⁿ-dè xii-gá:

¹⁵ —Mèstrú, cundáhu iní déhe-í chí tnàhá-dé cuhéé xiyíhí, te ío dāndoho ñaha-xi xii-dé, te ní cuu vai xito daquée ñaha-xi núú ñùhú xii-dé, te ní cuu vai tucu xito dangauñihu ñaha-xi ndute xii-dé.

¹⁶ Te sa ndeca-í-dé ní quixi núú cuè tée xica cuu ndihi-n dico ñá túú ní ndacu-güedé cada tātna ñaha-güedé xii-dé —càchí-dé xáhaⁿ-dè xii-gá.

¹⁷ Te Jèsús ní xáhaⁿ-gá xii nchaa ñáyiu xíndecu-áⁿ:

—Nchaa nchóho ñáyiu ndècu ñuyú-a, ío sáá iní-ndó chí ñá túú cuiní-ndó quindáá iní-ndó Yá Ndióxi, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gá cada-ndo-í? Te chí cāndeca tée cùhú-áⁿ táquixi iha —càchí-gá xáhaⁿ-gá xii-yu.

¹⁸ Te Jèsús ní tenáá-gá espíritú cùndihi yucu ñávaha yíhi ñaha xii tée-áⁿ, te ní quee ñaha-xi xii-dé, te òré-ni-áⁿ ní ndúha-dé.

¹⁹ Te sáta dúcáⁿ te òré ndécú mée Jesús ndihi cue tée xica cuu ndihi-gá, te ní xicáⁿ tnúhú-güedé núú-gá, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndacu-ndí queñuhu-ndí espíritú cùndihi yucu ñávaha yíhi ñaha xii tée-áⁿ —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gá xii-güedé:

—Te ñá túú ní ndacu-ndo, chí ñá túú sàndáá ndisa iní-ndó Yá Ndióxi. Te na cachí tnúhu ndáá-í xii-ndo sá ñuu nchóho quindáá ndisa iní-ndó Yá Ndióxi cuèdicó luha líi dàtná líhli ndíquíⁿ yutnu nani mostázá, te ducaⁿ te cuu cùñaha-ndo xii ìⁿ tindúú xocuñí-xi núú ndécú-xí te xocuñí-xi. Te nchaa núú sá váha ndacu-ndo cada-ndo te núu na quindáá iní ndisa-ndo Yá Ndióxi.

²¹ Te xini ñuhu-xi sá ío cáháⁿ ndihi-ndo-gá te ñá túú tnàhí ná caxi-ndo cāháⁿ ndihi-ndo-gá, te ducaⁿ te ndacu-ndo queñuhu-ndo espíritú cùndihi yucu ñávaha yíhi ñaha xii ñáyiu, dàtná cúu espíritú sá yíhí ñaha xii tée-áⁿ ní cùu —càchí-gá xáhaⁿ-gá xii-güedé.

Jèsús càháⁿ tucu-gá sá cāhni ñaha-güedé xii-gá

(Mr. 9:30-32; Lc. 9:43-45)

²² Te nini xica cuu Jesús ndihi cue tée xica cuu ndihi-gá distritú Galilea, te ní xáhaⁿ-gá xii-güedé:

—Yùhú Tée cùu ñani tnàhá-ndó nchàa-ndo sáá ìⁿ nduu te cuáha cuendá ñahá-güedé xii-í núú cuè tée cùu úhú iní ñahá,

²³ te cāhni ñaha-güedé xii-í dico nduu úní sá cùu-í te ndoto-í —càchí-gá xáhaⁿ-gá xii-güedé.

Te sá dúcáⁿ ní xáhaⁿ-gá xii-güedé, te ío ní ndíhu iní-güedé.

Díhúⁿ cuendá veñúhu

²⁴ Te òré ní quexio Jesús ndihi cue tée xica cuu ndihi-gá ñúu Capèrnaúm, te cue tée quide cobrá díhúⁿ cuendá veñúhu ní sáháⁿ-güedé ní cáháⁿ ndihi-güedé té Pèlú, te xáhaⁿ-güedé:

—¿Cháhu mèstrú-ndó úú díhúⁿ sá nání drácmá cuendá veñúhu àⁿ ñáhá? —
càchí-güedé xáhaⁿ-güedé xii-dé.

²⁵ Te té Pèlú ní xáhaⁿ-dè:

—Cháhu-dé —càchí-dé xáhaⁿ-dè xii-güedé.

Te té Pèlú cuànguihu-dé xití vehe núu ndécú Jèsús, te díhna-gá ní cáháⁿ-gá, te xáhaⁿ-gá xii-dé:

—Xímú, ¿nása sàni iní-n, ná cúú ñáyi quide cobrá ñáhá cuè tée yindaha ñáyi ndècu ñuyúú-a cuendá nchaa sá ndúú yáhu ñúu-güedé ndihi cuendá nchaa díhúⁿ sá ngáútnáha, cue ñáyi ñúu-güedé àⁿ cuè ñáyi véxi xica quide cobrá-güedé? —càchí-gá xáhaⁿ-gá xii-dé.

²⁶ Te té Pèlú ní xáhaⁿ-dè xii-gá:

—Cue ñáyi véxi xica quide cobrá-güedé —
càchí-dé xáhaⁿ-dè xii-gá.

Te Jèsús ní xáhaⁿ-gá xii-dé:

—Te núu ducaⁿ te cue ñáyi ñúu-güedé ñá túú ná cháhu-yu te núu ducaⁿ.

²⁷ Dico cuendá sá vǎ yóo dasátú-ó iní-xi, te cuáháⁿ làgúná te dàquée-n sá tñí-n chácá xití ndute, te chácá díhnanuu na tava-n te cundehe-n yúhu-di, chí yíhi ñⁿ díhúⁿ cuixíⁿ. Te díhúⁿ-àⁿ canehe-n quíhíⁿ cháhu-n cuendá-í ndihi cuendá-n, chí díhúⁿ-àⁿ sa tnahá quéyáhu cuendá-ó ndí ndúú-ó —
càchí-gá xáhaⁿ-gá xii-dé.

18

Cue tée ndücu tnúhu núú Jèsús yoo ío-gá cúnúu

(Mr. 9:33-37; Lc. 9:46-48)

¹ Te sátá dúcáⁿ te cue tée xica cuu ndihi Jesús ní sáháⁿ-güedé núu-gá, te xáhaⁿ-güedé xii-gá:

—Cachí tnúhu xii-ndí, yoo ío-gá cúnúu núu cuè ñáyi yindaha ñaha Yá Ndióxi —
càchí-güedé xáhaⁿ-güedé xii-gá.

² Te Jèsús ní cana-gá ñⁿ té líhli te ní sanutnñí ñaha-gá xii-dé cuádava tnuú-güedé.

³ Te xáhaⁿ-gá xii-güedé:

—Na càchí tnúhu ndáá-í xii-ndo sá núu vǎ dáñá-ndó nchaa sá ñá túú váha quide-ndo, te nduu ndàhú iní-ndo dátá ndàhú iní té líhli-a, te vǎ ndúú tǎhú-ndó ndíhu ndaha ñaha Yá Ndióxi xii-ndo.

⁴ Te ñáyi quide datná quidé té líhli-a ndàhú iní-yu, te ñá túú quide cahnú-yu mèe-yu, ñáyi-àⁿ ío cunúu-yu núu ndécú Yá Ndióxi táxi tnúú-í-gá.

⁵ Te nchaa ñáyi na quèheⁿ cuendá ñⁿ landú dátá té líhli-a cuendá sá cúú iní ñáhá-yu xii-í ñá, te cada iní-yu sá yúhú ní queheⁿ cuendá-yu —càchí-gá xáhaⁿ-gá xii-güedé.

Quihi iní-ó vǎ cündècu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xáhaⁿ tucu-gá xii-güedé:

—Te núu ñⁿ tée na dàcaháⁿ-dé cue ñáyi sándáá iní ñáhá xii-í cadá-yu nándi sá cuèhé sá dúhá, te váha-gá sá ná dàcutu ndeé-güedé ñⁿ yúú yódo dúcúⁿ-dè, te dàquée ñaha-güedé xii-dé xití ndute làmár, te ñá díú sá cündècu-dé ducaⁿ càda-dé.

⁷ ¡Te ndàhú ní cuu nchaa ñáyi xñdecu ñuyúú-a, chí coo cue tée dacáháⁿ ñáhá xii-yu cadá-yu nándi sá cuèhé sá dúhá té dacutí sá dúcáⁿ càda-xi! ¡Dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

⁸ Te núu ñⁿ xio ndaha-ndo àdi ñⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chí váha-gá sá nánihí tǎhú-ndó cuéi na cuíta ñⁿ xio ndaha-ndo àdi ñⁿ xio sáhá-ndó, te ñá díú sá quíhíⁿ-ndó níhí ní ndúú-ndó núu ñúhú núú càyú.

⁹ Te núu ñⁿ xio tinúu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chí váha-gá sá nánihí tǎhú-ndó cuéi na cuíta ñⁿ xio tinúu-ndo, te ñá díú sá ndí ndúú xio núu-ndó quíhíⁿ-ndó núú ñúhú núú càyú.

Cuendá ñⁿ mbéé quiti ní xíta

(Lc. 15:3-7)

¹⁰ Te vǎ dàquée tihú-ndó cuè ñáyi cùu cuendá-í cuéi cùu-yu ñáyi ío ndàhú iní-xi. Te na càchí tnúhu-í xii-ndo sá cuè espíritú xínú cuèchi núú Yá Ndióxi, cue espíritú néhé cuendá ñáhá xii-yu ñuyúú-a, nchaa-ni nduu nchaa-ni òré ndécú-xi núú Tàtá-í Dútú Ndióxi Yáá ndécú àndiu.

¹¹ Te ducaⁿ chí yúhú Tée cùu ñaní tnahá-ndó nchaa-ndo véxi-í ñuyúú-a dàcaca nihnu-í ñáyi núú úhú núu ndàhú, ñáyi ta xíta nihnu cuáháⁿ.

¹² ¿Te nása sàni iní-ndó cuendá ñⁿ tée ndècu ñⁿ ciendú mbéé-xi?, chí núu na cuíta ñⁿ-di te dàndóo-dé cùmídíco sǎhúⁿ cùmí-di cundecu-di ñⁿ yucu te quíhíⁿ-dè cúnúndúcú-dé quiti ní xíta-áⁿ.

¹³ Te núu na nánihí-dè-di, te nchóhó sa cùnnumí iní-ndó sá ío-gá cudú iní-dé cuendá quiti ní xíta-áⁿ òré nánihí-dè-di dàcúúxi cùmídíco sǎhúⁿ cùmí quiti ñá túú ní xíta-áⁿ.

¹⁴ Te ducaⁿ sǎtnahá-xi quide Tátá-ó Dútú Ndióxi Yáá ndécú àndiu, chí cuini-gá sá vǎ cuíta ní ñⁿ cue ñáyi cùu cuendá-gá.

Cada càhnu iní-ó sã quidé ñàha tnahã ñáyiu-ó

(Lc. 17:3)

15 Te núu ñá ñáyiu ndècu ndihí-ndo ní quidé-yu ñá sã ñà túú tàù-yu cada-yu sã cúú-xi-ndó, te cãháⁿ-ndó dôho-yu núu mée núú ñá-ndó ndihí-yu cuendá sã ná ndixi cuéchi iní-yu sã ñà túú quidé váha-yu. Te núu ní tñí-yu tñúhu ní xãháⁿ-ndo xii-yu, te ní ndacu-ndo ní nacanu ichi-ndó-yu.

16 Te núu ñá túú ní cuiní-yu tñí-yu tñúhu xãháⁿ-ndo xii-yu, te nducu-ndo ñá àdi úú tñáhã cue tée canehẽ núú-güedé cuendá cundedôho-güedé ñacuáa ndúu tñúhu ndãtñúhu-ndo ndihí-yu.

17 Te tñáhã cue tée-án cãháⁿ-güedé dôho-yu, dico núu ní tñúhu cãháⁿ cue tée-án ñà túú ní cuiní-yu tñí-yu, te dàtúu-ndo núú dàva-gã ñáyiu ndècu ndihí-ndo ichi Xitohó Jesucristú cuendá cutnùní iní-yu ñacuáa quidé ñáyiu-án. Te núu ñáyiu ndècuéchi-án ñà túú ní cuiní-yu tñí-yu tñúhu sã ní xãháⁿ dàva-gã cue ñáyiu ndècu ichi-gã, te cada-ná iní-ndó sã cúú-yu ñáyiu ñà túú ndècu ichi Yá Ndióxi dàtnã cue tée cuihna iní-xi quidé cobrá ñáhã xii ñáyiu cuendá impuestú.

18 Te na cãchí tñúhu ndáá-í xii-ndo sã núu nchòhó ná cãchí-ndó sã ndécú cuéchi ñáyiu, te ñiu-ni ducaⁿ cãháⁿ Yá Ndióxi, àdi cãchí-ndó sã ñà túú cuéchi-yu te ñiu-ni ducaⁿ cãháⁿ tucu-gã, te ducaⁿ chi nchòhó quidé-ndó ñacuáa cãháⁿ-gã.

19 Te na cãchí tñúhu-í xii-ndo sã núu úú tñáhã-ndó cùu ñá-ndó ndo cãháⁿ ndihí-ndo Tãtã-í Dútú Ndióxi Yáa ndécú àndiu xicãⁿ-ndó núú-gã núu ná cúú sã cuiní-ndó, te taxi-gã núu ná cúú sã xicãⁿ-ndó núú-gã.

20 Te núu úú tñáhã-ndó àdi úní tñáhã-ndó ní natacã-ndó ñá xichi cuendá sã ñúhú iní ñáhã-ndó xii-í, te xiãⁿ ndécú ndihí ñaha-í xii-ndo —cãchí-gã xãháⁿ-gã xii-güedé.

21 Te té Pèlú ní sãháⁿ ndehe yatni-dé núú Jèsús, te xãháⁿ-dè xii-gã:

—Mèstrú, cãchí tñúhu xii-í ná daha xito cada càhnu iní-í tñàha ñáyiu-í te núu ñá sã ná cada ñáhã-yu xii-í. ¿Cuèdìcò úsã xito-ã? —cãchí-dé xãháⁿ-dè xii-gã.

22 Te Jèsús ní xãháⁿ-gã xii-dé:

—Yúhú cãchí-í sã ñà díú-ní úsã xito cada càhnu iní-n-yu, chi únídico úxí xito ndihí úsã ndihí úsã xito cada càhnu iní-n-yu —cãchí-gã xãháⁿ-gã xii-dé.

Cuendá tée ñá túú quidé cahnu iní tñàha ñáyiu-xí

23 Te xãháⁿ tucu-gã xii-güedé:

—Na càni-í ñá cuendú núú-ndó ñacuáa tecú tñúní-ndó ñacuáa cada-xi òré ndíhu ndaha ñàha Yá Ndióxi xii ñáyiu. ñá tée yíndaha ñàha xii ñáyiu ní sani iní-dé sã cadã ndáá-dé ndihí

cue tée xinu cuechi núú-dé cuendá nchaa sã tàù-güedé núú-dé.

24 Te òré sa ní ngúndecu túha-dé te ní quexio ñá tée xinu cuechi núú-dé. Te tée-án tàù-dé cuéhé víhí díhúⁿ núú-dé, chi tàù-dé úxí mĩ díhúⁿ sã nání tàlentú.

25 Te tée xinu cuechi-án ñà túú díhúⁿ ndécú ndihí-dé nacháhu-dé sã tàù-dé núú pãtróoⁿ-dè-án, núu xiãⁿ ní táuchíúⁿ tée cùu pãtróoⁿ-dè-án dico ñàha-güedé xii-dé ndihí ñadhí-dé ndihí cue déhe-dé ndihí nchaa sã ndécú ndihí-dé cuendá nchaa-yu cuú-yu ñáyiu ñà túú tñáhã dàñã quee núú chíúⁿ pãtróoⁿ-xi, te ducaⁿ te ndéyãhu sã tàù-dé núú pãtróoⁿ-dè.

26 Te tée xinu cuechi-án ní ngúñí xití-dé núú pãtróoⁿ-dè, te xãháⁿ-dè: “Pãtróoⁿ, cãháⁿ ndáhú-í núú-n sã io ndee io càhnu cada iní-n sã dúhá tàù-í núú-n, te ñà túú ná caní iní-n chí nacháhu-í nchaa sã tàù-í núú-n”, cãchí-dé xãháⁿ-dè xii pãtróoⁿ-dè.

27 Te tée cùu pãtróoⁿ-dè-án ní cundáhú iní ñáhã-dè xii-dé, te ní quide càhnu iní ñáhã-dè, te ní dàñã ñàha-dé canuhú-dé.

28 Te tée xinu cuechi-án ní nanihí-dé ñá tée xinu cuechi ndihí-dé ichi canuhú-dé, te tée ní nanihí-dé-án tàù-dé sacú-ní díhúⁿ núú-dé chí ñá ciendú-ní díhúⁿ denariú tàù-dé. Te ní tñí-dé tée tàù núú-dè-án dácuehñé ñáhã-dè xii-dé, te xãháⁿ-dè: “Nacháhu sã tàù-n núú-í”, cãchí-dé xãháⁿ-dè.

29 Te tée tàù-án ní ngúñí xití-dé núú tée dii núú-xi tàù-dè-án, te xãháⁿ-dè: “Cãháⁿ ndáhú-í núú-n sã cadã càhnu iní ñáhã-n xii-í sã tàù-í núú-n, te nacháhu cué-í nchaa sã tàù-í núú-n”, cãchí-dé xãháⁿ-dè.

30 Dico tée dii núú-xi tàù-dè-án ñà túú ní cuiní-dé cada ndee iní-dé cundetu-dé nacháhu cué tée-án sã tàù-dé, chi ní chíhi ñàha-dè veccá cuendá yacãⁿ quihí-dé ndéé nacháhu-dé nchaa sã tàù-dé.

31 Te dàva-gã cue tée xinu cuechi ní xiní-güedé ñacuáa ní quide tée-án, te ní cudééⁿ-güedé núú-dè, te ní sãháⁿ-güedé ní xitñúhu-güedé tée cùu pãtróoⁿ-güedé sã dúcãⁿ ní quide-dé.

32 Te tée cùu pãtróoⁿ-güedé-án ní cana-dé tée ducaⁿ ní quide-án, te ní xãháⁿ-dè: “Yohó cúú-n ñá tée io cuihna iní-xi xinu cuechi núú-í, chí yúhú ní quide càhnu iní ñáhã-í xii-n cuendá nchaa sã tàù-n núú-í òré ní cãháⁿ ndáhú-n.

33 Te tñáhã yohó tàù-n dùcaⁿ cada-n cada càhnu iní-n tée xinu cuechi ndihí-n núú-í cuendá nchaa sã tàù-dé núú-n dàtnã ní quide ñàha-í xii-n ní quide càhnu iní-í cuendá nchaa sã tàù-n”, cãchí tée cùu pãtróoⁿ-án xãháⁿ-dè xii tée ducaⁿ ní quide-án.

34 Te tée cùu pãtróoⁿ-án ní cudééⁿ víhí-dé sã dúcãⁿ ní quide tée-án, te ní táuchíúⁿ-dè dandòho ñàha-güedé xii-dé ndéé nacháhu-dé

nchaa sá táú-dé —duha ní caní Jèsús cuèndú nùú-güedé.

³⁵ Te xáhaⁿ tùcu-gá xii-güedé:

—Dàtná ní quide téé cùu patróón-áⁿ ní dándóhó-dé téé táú nùú-dé-áⁿ ducaⁿ càda ñaha Tàtá-í Dútú Ndióxi Yáá ndécú ándiu xii-ndo, te nùu vá ní yùhu ní iní-ndó càda cahnu iní-ndó sá quidé ñaha tnahá ñáyi-ndo xii-ndo —càchí-gá xáhaⁿ-gá xii-güedé.

19

Jèsús càháⁿ-gá cuèndá cue ñáyi-ndo dàña tnahá

(Mr. 10:1-12; Lc. 16:18)

¹ Te sáta ní yáha ducaⁿ ní càháⁿ Jèsús, te ní ndee-gá distritú Galiléa cuáháⁿ-gá ndàa ingá xio yúte Jordán yucu distritú Júdeá.

² Te ío cuéhé ñáyi-ndo nchícúⁿ ñháá xii-gá cuáháⁿ, te yácaⁿ ní quide tátna-gá nchaa ñáyi-ndo.

³ Te ní quexio ñⁿ úú cue téé cùu fariséú nùú ndécú Jèsús xító ndéé ñháá-güedé xii-gá nùu nása cunduu tnúhu càháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí nùú-n, ¿cúu daña ñⁿ téé ñadihí-dé nùu ndédani càa ñⁿ sá ñà túú cundáá-yu-áⁿ? —càchí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náa ñà túú dàcuaha-ndo nùú tütú Yá Ndióxi, te diu nùú tütú-gá càháⁿ-xi sá cùtnàhá ní cadúha-gá ñáyi-ndo, te téé ñadihí ní cadúha-gá-áⁿ?

⁵ Te duha càchí tucu-xi nùú tütú Yá Ndióxi nácuáa ní càháⁿ-gá: “Cue téé na ñihí ñadihí-xi te ñihí-ná cada-güedé tátá-güedé ndihí náná-güedé, chí ñadihí-ñá-güedé cuu cuu ndihí-güedé, te cada iní-ndó sá ñⁿ-ná yiqui cùñú cuú-yu cundecú-yu”, duha càchí Yá Ndióxi nùú tütú-gá.

⁶ Te xíáⁿ nùu cada iní-ndó sá cué ñáyi-ndo úú-áⁿ ñⁿ-ná yiqui cùñú cuú-yu, te ñà túú-gá ndí ñⁿ ndí ñⁿ yiqui cùñú cuú-yu. Nùu xíáⁿ ñà túú ndúu váha-xi daña cué téé ñadihí-güedé, chí mee Yá Ndióxi ní càchí-gá sá cúu úú-yu cundecú-yu —càchí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te nùu ducaⁿ, ¿te ná cuèndá ndíi Moisés ní càchí ndíi sá nùu ñⁿ téé cuení-dé daña-dé ñadihí-dé, te cuu cadúha-dé ñⁿ tütú nùú càháⁿ-xi sá ní dàña-dé ñadihí-dé, te ducaⁿ te cuu daña ñaha-dé ní càchí ndíi vãⁿ? —càchí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Te ducaⁿ ní càchí ndíi Moisés sá cúu dàña-ndo ñadihí-ndo, chí nchòhó ío sáá iní-ndó, dico ndéé díhna chí ní tecú

tnúhu nchaa cue téé sá vá dàña-güedé ñadihí-güedé.

⁹ Dico yúhu càchí tnúhu-í xii-ndo sá nùu ñⁿ téé na dàña-dé ñadihí-dé te naqueheⁿ-dé ingá ñadihí te ío nèhé quidé-dé, te nùu ñà díú cuèndá sá càháⁿ ndihí-aⁿ ingá téé ducaⁿ na dàña ñaha-dé. Te sá dúcáⁿ cuèndá-ni na dàña ñⁿ téé ñadihí-dé, te ñⁿ-ni cuéchi cùu-xi ndihí cuéchi quide téé ndéca ñadihí te càháⁿ ndihí-dé ingá ñadihí —càchí-gá xáhaⁿ-gá xii-güedé.

¹⁰ Te cue téé xica cuu ndihí-gá ní xáhaⁿ-güedé xii-gá:

—Te nùu ducaⁿ cùu cuèndá cue téé ndihí ñadihí-güedé, te váha-gá sá vá càndéca cue téé ñadihí —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Ñá ncháá ñáyi-ndo ndúu táhú-yu cundecú-yu, chí mee-ni ñáyi-ndo ní càchí Yá Ndióxi sá dúcáⁿ tnàhí nduu táhú cundecú mee.

¹² Te ío cue téé ducaⁿ tnàhí ní nduu táhú-güedé ndéé òré ní cacu-güedé sá vá càndéca-güedé ñadihí. Te ío cue téé ñà ndácú-güedé candéca-güedé ñadihí cuèndá sá ní quide ñaha dàva-gá cue tnàha téé-güedé xii-güedé. Te dava-güedé ñà túú càndéca-güedé ñadihí chí cuení-güedé sá vá dàña ndéé-güedé cunu cuechi-güedé nùu Yá Ndióxi. Te nchaa cue téé ducaⁿ ní nduu táhú nùu Yá Ndióxi cundecú mee, te váha-ni te nùu na cundecú mee-güedé —càchí-gá xáhaⁿ-gá xii-güedé.

Jèsús xicáⁿ táhú-gá nùu Yá Ndióxi cuèndá landú

(Mr. 10:13-16; Lc. 18:15-17)

¹³ Te ñⁿ úú ñáyi-ndo ndéca-yu landú lihli cuáháⁿ nùú Jèsús, chí cuení-yu sá téndaha ñaha-gá xii-güexi, te cácaⁿ táhú-gá nùu Yá Ndióxi cuèndá-güexi. Te cue téé xica cuu ndihí-gá ní nguíta-güedé ténáa ñháá-güedé xii-yu, te xáhaⁿ-güedé sá vá dúcáⁿ càdà-yu.

¹⁴ Te Jèsús ní xáhaⁿ-gá xii-güedé:

—Chí dàña ná quixi nahi cue landú lihli-áⁿ nùú-í-a, te vá càdí-ndo íchi-güexi, chí dàtná cúú váha iní cue landú lihli-áⁿ ducaⁿ cùu váha iní cue ñáyi-ndo yindaha ñaha Yá Ndióxi —càchí-gá xáhaⁿ-gá xii-güedé.

¹⁵ Te ní tendaha ñaha-gá xii-güexi, te ní xicáⁿ táhú-gá nùu Yá Ndióxi cuèndá-güexi, te sáta dúcáⁿ ní quide-gá te ní xica-gá cuáháⁿ-gá.

Íⁿ téé cuica càháⁿ ndihí-dé Jèsús

(Mr. 10:17-31; Lc. 18:18-30)

¹⁶ Te ñⁿ téé cuechi ní quexio-dé nùú ndécú Jèsús, te xicáⁿ tnúhú-dé nùú-gá, te xáhaⁿ-dé xii-gá:

—Yòhó Mèstrú, cùu-n téé ío váha iní-xi, te cuení-í nùu vá cundéa iní-n càchí tnúhu-n ná cúú sá váha cada-í cuèndá nduu táhú-í

cundecu-í ndihí Yá Ndiöxí ni caa ni quíhíⁿ – cächí-dé xáhaⁿ-dë xii-gá.

¹⁷ Te Jësús ní xáhaⁿ-gá xii-dé:

–¿Te cùtnuní iní-n nácuáa ndüu tnúhu cãháⁿ-n sã yúhú váha iní-ãⁿ?, chi ìⁿndí díí-ni Yá Ndiöxí ío váha iní-gá. Te núu cuíni-n nàníhí tãhú-n te tni-n nchãa tnúhu cãháⁿ Yá Ndiöxí, tnúhu sá sánú ichi ñaha xii ñáyüu nácuáa cadá-yu cundecú-yu –cächí-gá xáhaⁿ-gá xii-dé.

¹⁸ Te tée cuechi-ãⁿ ní xáhaⁿ-dë xii-gá:

–¿Te ndëndida cãa tnúhu cãháⁿ Yá Ndiöxí cada-í-í? –cächí-dé xáhaⁿ-dë xii-gá.

Te Jësús ní xáhaⁿ-gá xii-dé:

–Te duha ní cächí Yá Ndiöxí cada ñáyüu: “Vá cãhni-ndó tnàha ñáyüu-ndo, vá cãháⁿ ndihí-ndo ñãdihí te núu ñã díú ñãdihí-ndó cùu-yu, te ducaⁿ-ni nchòhó cue ñáyüu ñihí tucu vá cãháⁿ ndihí-ndo tée te núu ñã díú yì-ndo cuu-güedé, te vá dühú-ndó sã ndécú ndihí tnaha ñáyüu-ndo, vá dácàcu-ndo cuéchi neñùú sá cùú-xí tnàha ñáyüu-ndo.

¹⁹ Te canehe-ndo sã yíñuhu núu tátã-ndó ndihí núu nãná-ndó, te cundáhú iní-ndó tnàha ñáyüu-ndo dátãa cundãhú iní-ndó mèe-ndo”, duha ní cächí Yá Ndiöxí cada ñáyüu –cächí-gá xáhaⁿ-gá xii-dé.

²⁰ Te tée cuechi-ãⁿ ní xáhaⁿ-dë xii-gá:

–Nchaa xiãⁿ ní ngüita-í quidé-í ndéé cùtnàhá cùú làndú-í, ¿te vitna nágá cùmãni cada-í-í? –cächí-dé xáhaⁿ-dë xii-gá.

²¹ Te Jësús ní xáhaⁿ-gá xii-dé:

–Te núu cuíni-n cùu-n ìⁿ tée ío váha cada ndáa, te cuáhãⁿ dico-n nchãa sã ndécú ndihí-n, te dühúⁿ-n cuãha tãhú-n cué ñáyüu ndáhú, te ducaⁿ te nduu tãhú-n ngündecu váha-n núu ndécú Yá Ndiöxí táxi tnùní-gá. Te sátã ná yãha ducaⁿ cada-n te quixi-n chitnahá ñãhá-n xii-í –cächí-gá xáhaⁿ-gá xii-dé.

²² Te sá dúcãⁿ ní xáhaⁿ Jësús xii-dé te ío ní cundiýí-dé, chi ío cuica-dë, te ní xica-dé cuáhãⁿ-dë.

²³ Te Jësús ní xáhaⁿ-gá xii cue tée xica cuu ndihí-gá:

–Na cächí tnúhu ndáá-í xii-ndo sã ío úhú quíndáa iní ñaha cué ñáyüu cuica xii Yá Ndiöxí cuendá ndíhu ndaha ñaha-gá xii-yu.

²⁴ Te na cächí tnúhu tucu-í xii-ndo sã yáchí-gá yãha ìⁿ cãméyu yaú ìⁿ yiquí ticú dàcúúxí sã quíndáa iní ìⁿ ñáyüu cuica Yá Ndiöxí cuendá ndíhu ndaha ñaha-gá xii-yu –cächí-gá xáhaⁿ-gá xii-güedé.

²⁵ Te sá dúcãⁿ ní cãháⁿ Jësús, xiãⁿ ío ní ngüuhu cue tée xica cuu ndihí-gá, te ní ngüita-güedé xitnãha-güedé:

–¿Yoo naníhí tãhú te núu ducaⁿ vãrⁿ? –cächí-güedé xitnãha-güedé.

²⁶ Te Jësús ní ndacoto-gá núu-güedé, te xáhaⁿ-gá xii-güedé:

–Nchaa ñáyüu ñuyúu-a chi vá ndácú-yu ná cadá-yu nácuáa ndíhu ndaha ñaha Yá Ndiöxí xii-yu, dico mee-gã chi ndacu-gá ndíhu ndaha ñaha-gá xii-yu chi nchaandi tühú sá váha ndàcu-gá quidé-gá –cächí-gá xáhaⁿ-gá xii-güedé.

²⁷ Te Pèlù ní xáhaⁿ-dë xii-gá:

–Nchúhú ní dándóo-ndí nchaa sã ndécú ndihí-ndí, te ní tuha ñaha-ndí xii-n, ¿te ná cùú sã níhí-ndí nduu tãhú-ndí sá dúcãⁿ ní quide-ndí-í? –cächí-dé xáhaⁿ-dë xii-gá.

²⁸ Te Jësús ní xáhaⁿ-gá xii-güedé:

–Na cächí tnúhu ndáá-í xii-ndo sã ná sãá nduu, ndüu saa nchaa sá ío andiu ndihí ñuyúu-a, te dàvã-ãⁿ cunucóo yúhú Tée cùu ñani tnãhá-ndó nchãa-ndo ìⁿ núu xilé váha, te nchaa ñáyüu quini-yu sá ío càhnu cuu-í, te nchòhó cue tée ní tuha ñaha xii-í tnãhá-ndó cùnucóo-ndo núu ìⁿ caa xilé váha ndí ùxúú tnãhá-ndó, te xiãⁿ cunucóo-ndo càda ndáá-ndó cuéchi ndí ùxúú xichi cue ñáyüu isrãél.

²⁹ Te nchaa ñáyüu na dándóo vehe-xi, àdi ñani-xi, àdi cùha-xi, àdi tátã-xi, àdi nãná-xi, àdi ñãdihí-xi, àdi déhe-xi, àdi ñuhu-xi, te núu ducaⁿ na cadá-yu sá cuendá-í te ío-gá cuéhé sã cuãñaha Yá Ndiöxí cundecu ndihí-yu, te ñã díú-ní xiãⁿ chi tnãhá nduu tãhú-yu cundecú-yu ndihí-gá ni caa ni quíhíⁿ.

³⁰ Te dava ñáyüu cùnuu ndecu ichi Yá Ndiöxí vitna, ñáyüu-ãⁿ sãá nduu te vá ío-gá cunúu-yu dátãa cunúu-yu vitna, te dava ñáyüu nchicúⁿ ñã túú cùnuu vitna, ñáyüu-ãⁿ sãá nduu te ío cunúu-yu –cächí-gá xáhaⁿ-gá xii-güedé.

20

Cuendá cue tée quide chiur

¹ Te xáhaⁿ tucu Jësús xii cue tée xica cuu ndihí-gá:

–Na càni-í ìⁿ cuendú núu-ndó cuendá tecú tnùní-ndó nácuáa cada-xi òrè ndíhu ndaha ñaha Yá Ndiöxí xii ñáyüu. ìⁿ tée ní xitu-dé yoho yãha stilé, te ìⁿ nduu ní quee-dé nehé-ni cuándúcú-dë cue tée cada chiurⁿ núu dúcãⁿ ní xitu-dé yoho yãha stilé-ãⁿ.

² Te òrè ní níhí-dé cue tée cada chiurⁿ-ãⁿ, te ní quide ndáá-dé ndihí-güedé sá chãhu ñaha-dë xii-güedé ìⁿ dühúⁿ denàríú ìⁿ nduu. Te sátã dúcãⁿ te ní tendaha ñaha-dé xii-güedé cuáhãⁿ-güedé cada chiurⁿ-güedé núu dúcãⁿ ní xitu-dé yoho yãha stilé-ãⁿ.

³ Te dátñuní ní xica tucu-dé cuáhãⁿ-dë dátãa òrè caá ìⁿ dátñéé cuándúcú-gã-dé cue tée cada chiurⁿ núu ní xitu-dé yoho yãha stilé-ãⁿ, te ní xini-dé xitnutñí ìⁿ úú cue tée núu yãhu te ñã túú nã chiurⁿ xíquide-güedé.

⁴ Te ní xáhaⁿ-dë xii-güedé: “Nã túú cùdana cuyáchí-ndó càda-ndo chiurⁿ-í te chãhu ñaha-í xii-ndo nácuáa tãu-xi cunduu-ãⁿ”,

càchí-dé xáhaⁿ-dë xii-güedé. Te cue té-áⁿ ní sáha-güedé tnúhu cada chiúⁿ-güedé te ní xica-güedé cuáháⁿ-güedé.

⁵ Te téé ní xitu yoho yáha stilé-áⁿ ní xica tucu-dé dàtná òré caúxúú nduu cuándúcú-gá-dé cue téé cada chiúⁿ-dé, te ní níhí tucu-dé cue téé cada chiúⁿ. Te ní quee tucu-dé dàtná òré caá úní sacuaa, te diu-ni ducaⁿ ní quide tucu-dé.

⁶ Te ní quee tucu-dé dàtná òré caá úhúⁿ sacuaa cuándúcú-gá-dé cue téé cada chiúⁿ-dé, te ní xini-dé xínutniiⁿ ìⁿ úú cue téé diu-ni núú yáhu-áⁿ te ñá túú ná chiúⁿ quide-güedé, te ní xáhaⁿ-dë xii-güedé: “Sánuu sá nchòhó ní cuu nchàca vitna ñá túú níhí-ndó chiúⁿ cada-ndo”, càchí-dé xáhaⁿ-dë xii-güedé.

⁷ Te cue téé-áⁿ ní xáhaⁿ-güedé xii-dé: “Ñá túú níhí-ndí chiúⁿ cada-ndí chí vá yò nducu ñaha xii-ndí”, càchí-güedé xáhaⁿ-güedé xii-dé. Te ní xáhaⁿ-dë xii-güedé: “Yúhú taxi-í chiúⁿ cada-ndo, te quíhíⁿ-ndó núú ní xitu-í yoho yáha stilé yàcáⁿ cada chiúⁿ-ndo, te cháhu ñaha-í xii-ndo nácuáa tàú-xi cunduu”, càchí-dé xáhaⁿ-dë xii-güedé.

⁸ Te sáta ní dáhu nchíanchii, te téé dii chiúⁿ-xi-áⁿ ní xáhaⁿ-dë xii téé tàxi tnuní ñáhá xii cue téé quide chiúⁿ-áⁿ: “Cúñaha xii nchaa cue téé quide chiúⁿ-áⁿ ná quíxí-güedé te cháhu-n-güedé, te díhna-gá cue téé nchicúⁿ cuíⁿ-ná cuánguihu núú chíúⁿ ngúíta-n cháhu-n, te ndéé núú ní ndíhí-ná cháhu-n cuè téé cuánguihu díhna nuu-gá núú chíúⁿ”, càchí-dé xáhaⁿ-dë xii téé tàxi tnuní ñáhá xii cue téé quide chiúⁿ-áⁿ.

⁹ Te díhna-gá cue téé cuánguihu caá úhúⁿ sacuaa ní quexio-güedé cuendá cháhu ñaha-dé, te ní cháhu ñaha-dé ìⁿ caa díhúⁿ denariú xii ìⁿ ìⁿ-güedé.

¹⁰ Te sáta ní cháhu-dé dava-gá cue téé ní quide chiúⁿ. Te ndéé núú ní ndíhí-ná ní cháhu-dé cue téé cuánguihu díhna nuu-gá núú chíúⁿ. Te cue téé-áⁿ ní sani iní-güedé sá vái-gá cháhu ñaha-dé xii-güedé, dico ñáhá chí ìⁿ caa-ni díhúⁿ denariú ní cháhu ñaha-dé xii ìⁿ ìⁿ-güedé.

¹¹ Te cue téé-áⁿ ní queheⁿ cuendá-güedé díhúⁿ-güedé dico ñá túú ní quide váha-xi iní-güedé.

¹² Te ní xáhaⁿ-güedé xii téé dii chiúⁿ-xi ní quide-güedé: “¿Ná cuendá cue téé nchicúⁿ cuíⁿ-ná cuánguihu núú chíúⁿ ìⁿ-ní ní cháhu ñaha-n xii-ndí ndíhí-güedé, te ìⁿ-dí oré duha ní quide chiúⁿ-güedé? Te nchúhu nchàca nchaa ní sahní iní-ndí ní quide chiúⁿ-ndí, te ní ndoho-ndí cahni, te ìⁿ-ní ní cháhu ñaha-n xii-ndí ndíhí-güedé”, càchí-güedé xáhaⁿ-güedé xii téé dii chiúⁿ-xi ní quide-güedé.

¹³ Te téé dii chiúⁿ-xi ní quide-güedé-áⁿ ní xáhaⁿ-dë xii ìⁿ téé-áⁿ: “Yòhó, ñá túú quide-í

ìⁿ sá ñá túú tàú-í cada-í sá cúú-xi-n, chi ní quide ndáá-ó sá díú-ní ìⁿ díhúⁿ denariú cháhu ñaha-í xii-n ìⁿ nduu.

¹⁴ Te vitna queheⁿ díhúⁿ cuendá nduu-n te núhú-n, chí yúhú cuini-í sá ìⁿ-ní cháhu ñaha-í xii-n ndíhí cue téé nchicúⁿ cuíⁿ-ná cuánguihu núú chíúⁿ.

¹⁵ Chí yúhú cuu-ni cada-í nání cuini-í ndíhí díhúⁿ-í, ¿adi dico ñá túú quide váha-xi iní-n sá dúhá cundahú iní-í cue téé-áⁿ ducaⁿ cháhu-í-güedé?”, càchí téé cúu patróoⁿ-áⁿ xáhaⁿ-dë xii téé-áⁿ. Duha nduu cuendú cáni-í núú-ndó.

¹⁶ Te duha càháⁿ-í chí dava ñáyiú cunu ndecu ichi Yá Ndióxi vitna sáá nduu te vá cúnúu vihi-gá-yu dàtná cúnúu-yu vitna, te dava ñáyiú ñá túú cunu vitna sáá nduu ío cúnúu-yu. Te ío cuéhé ñáyiú càháⁿ ñáhá Yá Ndióxi xii-yu dico sacú-ni-yu nduu táhú-yu cundecú-yu ndíhí-gá –càchí-gá xáhaⁿ-gá xii-güedé.

Jèsús càháⁿ tucu-gá sá cáhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñuhu Jèsús ichi cuásaá-gá ñuu Jerusalén ndíhí cue téé xica cuu ndíhí-gá, te ní cana ñaha-gá xii-güedé ní naníhí tnáhá-güedé ndíhí-gá, te ta ndátnúhu ndíhí ñaha-gá xii-güedé cuáháⁿ, te xáhaⁿ-gá xii-güedé:

¹⁸ –Vitna ñuhu-o ichi cuásaá-ó ñuu Jerusalén, te yàcáⁿ cuáha cuendá ñáhá-güedé xii yúhú Téé cúu ñani tnáhá-ndó nchàa-ndo núú cuè téé cúu díúú cúnúu, ndíhí núú cuè téé dàcuaha ñaha xii ñáyiú nchaa tnúhu ní chídó tnùní ndí Moisés. Te diu cue téé-áⁿ cúñaha-güedé xii dava-gá cue téé sá cáhni ñaha-güedé xii-í.

¹⁹ Te cuáha cuendá ñáhá-güedé xii-í núú cuè téé ñá túú cúu cue téé israhél, te cue téé-áⁿ cudíqúú ndéé ñáhá-güedé xii-í, te caniha-güedé ndíhí ñii, te dàtnùní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úní sá cúú-í te ndoto-í –càchí-gá xáhaⁿ-gá xii-güedé.

Nána té Jàcobó ndíhí té Juàá cuini-aⁿ sá cúnúu-güedé ndíhí Jèsús

(Mr. 10:35-45)

²⁰ Te cue déhe té Zebèdeú té Jàcobó ndíhí té Juàá ndécá ñaha náná-güedé xii-güedé cuáháⁿ núú ndécú Jèsús, te òré ní quexio-aⁿ ndíhí-güedé núú ndécú-gá te ní ngúñí xiti-áⁿ núú-gá cuendá cuini-aⁿ ndátnúhu ndíhí ñaha-aⁿ xii-gá cuendá sá cúú-xi cuè déhe-aⁿ.

²¹ Te cùmání-gá càháⁿ-aⁿ te ní xicáⁿ tnúhú Jèsús núú-aⁿ, te xáhaⁿ-gá:

–¿Ná cuini-n? –càchí-gá xáhaⁿ-gá xii-aⁿ.

Te ní xáhaⁿ-aⁿ xii-gá:

–Véxi-í càháⁿ ndáhú-í núú-n núu vá cundéé iní-n cúnucóo ìⁿ déhe-í-a xio cùha-n,

te ingá-dé cunucóo-dé xio dàtni-n na saá nduu cùnucóo-n núú táxí tnúni-n —càchí-áⁿ xáhaⁿ-aⁿ xii-gá.

²² Te Jèsús ní xáhaⁿ-gá xii úú cue tée-áⁿ:

—Nchòhò, ñá túú cùtnuní váha iní-ndó nàcuáa nduu sá xicáⁿ-ndó núú-í. ¿Te náa cundee iní-ndó dàndoho ñaha ñáiyu xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xáhaⁿ-güedé xii-gá.

²³ Te Jèsús ní xáhaⁿ-gá xii-güedé:

—Ndáá sá cündée iní-ndó ndòho-ndo nchaa nàcuáa ndòho-í, dico sá dúcáⁿ cuini-ndó sá ñⁿ-ndó cùnucóo-ndo xio cuha-í, te ñⁿ-ndo cùnucóo-ndo xio datni-í, te xiáⁿ chi ñá díú yùhú tàú-í cachí-í núú sá cúú cùnucóo-ndo àdi sá vá cúú cùnucóo-ndo, chi mee Tàtà-í Dútú Ndiòxí cachí-gá te núú ná cúú ñáiyu nduu táhú cunucóo diñi-í dàvá-áⁿ —càchí-gá xáhaⁿ-gá xii-güedé.

²⁴ Te òré ní níhí ùxi-gá cue tée xica cuu ndihi-gá tnúhu nàcuáa nduu sá cuini cue tée úú-áⁿ, te ní cudééⁿ-güedé núú cuè tée úú-áⁿ.

²⁵ Te Jèsús ní cana-gá nchaa cue tée xica cuu ndihi-gá, te ní xáhaⁿ-gá xii-güedé:

—Nchòhò xini-ndó sá cuè tée yindaha nacióⁿ quidé-güedé sá ío cùnucóo-güedé, te nchaa dava-gá cue tée cùnucóo ndihi-güedé quidé-güedé tnàhá-güedé sá ío cùnucóo-güedé.

²⁶ Dico nchòhò chi vá dúcáⁿ càda-ndo, chi núú dava-ndo cuini-ndó cùnucóo-ndo, te xini ñuhu-xi cunu cuechi núú tnàhá-ndó te vá càdá-ndó sá cùnucóo-ndo.

²⁷ Te núú dava-ndo cuini-ndó quène càva-ndo, te cuu-ndo dàtná cue ñáiyu ñá túú tnàhí dàháⁿ quee núú chíúⁿ pàtróóⁿ-xi cunu cuechi núú tnàhá-ndó.

²⁸ Te cada-ndo dàtná quidé yùhú Tée cùu ñani tnàhá-ndó nchàa-ndo, chi yùhú véxi-í ñuyúú-a dico ñá díú sá cúnú cuèchi ñáiyu núú-í chi véxi-í sá cúnú cuèchi-í núú-yu. Te cuú-í ñuyúú-a cuèndá vai-yu cácu nihnú-yu núú ùhú núú ndàhú —càchí-gá xáhaⁿ-gá xii-güedé.

Jèsús quidé tàtna-gá núú úú tnàhá cue tée cuáá

(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndihi cue tée xica cuu ndihi-gá, te cuèhé víhí ñáiyu nchìcúⁿ ñahá xii-gá cuaháⁿ.

³⁰ Te yuhu ichi cuaháⁿ-gá xìnucóo úú tnàhá cue tée cuáá, te cue tée-áⁿ ní cutnùni iní-güedé sá Jèsús ñúhú-gá ichi-áⁿ te ní ngúita-güedé níhí càháⁿ-güedé, te xáhaⁿ-güedé xii-gá:

—¡Yòhò Mèstrú, ñani tnàhá ndí Dàví, cundàhú iní ñahá xii-ndí! —càchí-güedé xáhaⁿ-güedé xii-gá.

³¹ Te cue ñáiyu ténáa ñahá-yu xii-güedé, te xáháⁿ-yu sá ná càdi-güedé yuhu-güedé, dico uuⁿ-gá níhí ní càháⁿ-güedé, te xáhaⁿ-güedé xii-gá:

—¡Yòhò Mèstrú, ñani tnàhá ndí Dàví, cundàhú iní ñahá xii-ndí! —càchí-güedé xáhaⁿ-güedé xii-gá.

³² Te ní ngúitá Jèsús te ní cana ñaha-gá xii-güedé, te ní xicáⁿ tnúhú-gá núú-güedé, te xáhaⁿ-gá:

—¿Ná cuini-ndó càda ñaha-í xii-ndo-í? —càchí-gá xáhaⁿ-gá xii-güedé.

³³ Te ní xáhaⁿ-güedé xii-gá:

—Mèstrú, cuini-ndí sá càdá tàtna-n núú-ndí cuèndá cundehe-ndí —càchí-güedé xáhaⁿ-güedé xii-gá.

³⁴ Te Jèsús ní cundàhú iní ñahá-gá xii-güedé, te ní tendaha-gá núú-güedé. Te òré-ni ní ndúha núú-güedé, te nchìcúⁿ ñahá-güedé xii-gá cuaháⁿ.

21

Jèsús cuánguihu-gá ñuú Jerusàlén

(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jèsús ndihi cue tée xica cuu ndihi-gá ñuú Jerusàlén, te ní quexìo-gá ndihi-güedé yatni vii-ná ñuú Bètfagé, te xiáⁿ cáá yùcu nani Olivú. Te ní ndatnúhu-gá ndihi úú cue tée xica cuu ndihi-gá,

² te ní xáhaⁿ-gá xii-güedé:

—Chí cuaháⁿ ñuú cáá yàtni yacáⁿ, te òré quexìo-ndo yacáⁿ te nanihí-ndó ñⁿ búrru diñí ndètni-di ndihi déhe-di, te nandaxi-ndo-güèdi te candeca-ndo-güèdi quixi.

³ Te núú ío ñáiyu dàdahaⁿ ñaha xii-güedi, te cùñaha-ndo xii-yu sá yùhú Yáá xicá cùu ndihi-ndo xini ñuhu-í-güedi, te ndíhi-ni nattendaha-í-güedi núhú-güedi cùñaha-ndo —càchí-gá xáhaⁿ-gá xii-güedé.

⁴ Te ducaⁿ ní cuu chi ní quee ndáá-xi nàcuáa ní chídó tnùni ñⁿ tée ní xóo càháⁿ tnúhu Yá Ndiòxí ndéé sanaha núú tùtú-gá núú càchí-xi:

⁵ Chí cùñaha cuè ñáiyu ñuú Siòn ná càdá cuèndá-yu, chi véxi tée yindaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ tée ío ndàhú iní-xi.

Duha ní chídó tnùni ñⁿ tée ní xóo càháⁿ tnúhu Yá Ndiòxí ndéé sanaha núú tùtú-gá.

⁶ Te cue tée xica cuu ndihi-gá ní xica-güedé cuaháⁿ-güedé, te ní quide-güedé nàcuáa ní xáhaⁿ-gá xii-güedé cada-güedé.

⁷ Te ní ndexìo-güedé ndécá-güedé ñⁿ búrru diñí ndihi déhe-di, te ní sacáⁿ ndodo-güedé

dóo-güedé sátá-güedi, te dátñunì cuásáá Jèsús sátá ìñ-di ní ngódó ñaha-gá xii-di.

⁸ Te ío cuéhé ñáyiú ta sàcáñ-yu dóó-yu ichi cuáháñ-gá cuendá núú dóo-yu-án yáha-gá ndihi quití yòdo-gá. Te davá-yu xèhndé-yu ndaha yutnu ñúú tá sàcáñ-yu cuáháñ.

⁹ Te nchaa ñáyiú yòdonuu núú-gá ndihi nchaa ñáyiú nchicúñ ndáa sátá-gá ní ngúita-yu níhi càháñ-yu, te càchí-yu:

—Ío càhnu cuu Yaá cúú ñàní tnáhá ndíi Dávii! ¡Te Yá Ndióxi ío na chùndee ñaha-gá chí cùu-gá Yaá ní tendaha Yá Ndióxi véxi quide núú-gá! ¡Te ndéé nchaa sá ío andiu na càchí-xi sá ío càhnu cuu-gá! —duha càchí-yu.

¹⁰ Te òré cuànguihu Jèsús ñúú Jerusálén, te nchaa ñáyiú ñúu-án ní ngúita-yu xícuaá-yu, te davá-yu ní ngúita-yu xitnàhá-yu:

—¿Yoo cùu téé-án? —càchí-yu xitnàhá-yu.

¹¹ Te davá-yu xitnàhá-yu:

—Téé-án cúú-dé Jèsús téé càháñ tnúhu Yá Ndióxi, te cùu-dé téé ñúú Nazàrét ñúú yíndèhu distritú Galiléa —càchí-yu xitnàhá-yu.

Jèsús ñá túú tnáhá ini-gá nàcuáa xíquide ñáyiú xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuànguihu-gá xití veñúhu càhnu sá ío cùnunu, te xití veñúhu-án xíndecu ñáyiú quide ndáhu nádicó-yu, ndihi ñáyiú xisaañ, te nchaañ-yu ní queñuhu ñaha Jèsús xii-yu quehé, te ní dándüá-gá mèsá nchaa ñáyiú dàma díhuñ, ndihi nchaa xilè sácóo nchíhi ñáyiú dico lómá xíndecu xití veñúhu-án.

¹³ Te ní xáhañ-gá xii-yu:

—Núú tütú Yá Ndióxi càháñ-xi nàcuáa ní càháñ-gá, te ní càchí-gá: “Vehe-í cúú-xi núú càháñ ndihi ñaha ñáyiú xii-í”, duha ní càháñ-gá càchí-xi núú tütú-gá. Dico nchòhó quidè-ndó vehe-gá vehe ñadúhú —càchí-gá xáhañ-gá xii-yu.

¹⁴ Te xián ndécú Jèsús ní quexio cue téé cuáá ndihi cue téé yacua, te ní quide tátna ñaha-gá xii-güedé te ní ndúha-güedé.

¹⁵ Te cue dütú cùnunu ndihi cue téé dàcuaha ñaha xii ñáyiú nchaa tnúhu ní chídó tnuní ndíi Moisés ní xini-güedé ní quide Jèsús sá vǎ yóo tnáhi ndácu cada, te ndèdóho tucu-güedé níhi xicáháñ cue landú xití veñúhu càhnu sá ío cùnunu-án, te càchí-güexi: “Ío càhnu cuu Yaá cúú ñàní tnáhá ndíi Dávii”, càchí-güexi. Te ní cudééñ-güedé,

¹⁶ te ní xáhañ-güedé xii Jèsús:

—¿Ndèdóho-n nàcuáa càháñ cue landú-án ñá? —càchí-güedé xáhañ-güedé xii-gá.

Te Jèsús ní xáhañ-gá xii-güedé:

—Ndèdóho-í, te nchòhó náa ñá túú dàcuaha-ndo núú tütú Yá Ndióxi núú càháñ-xi cuendá cue landú-án, te duha càchí-xi:

Yóhó ní quide-n sá cuè landú vitna sàdi, ndihi cue dava-gá landú, chiñuhu ñaha-güexi xii-n nàcuáa tàú-xi cunduu.

Duha càchí-xi núú tütú-gá —càchí-gá xáhañ-gá xii-güedé.

¹⁷ Te xián ní dándóo ñaha Jèsús xii-güedé, te ní xica-gá cuáháñ-gá ñúú Bètaniá, yàcáñ ní xíndecu-gá ñúu-án.

Jèsús xáhañ-gá xii yutnu ngúxi sá vǎ cúúñ-gá sávidí-xi

(Mr. 11:12-14, 20-26)

¹⁸ Te nduu tnéé-án nehé-ni cuáháñ tucu Jèsús ñúú Jerusálén, te ichi ñuhu-gá ní xihí-gá docó.

¹⁹ Te ní xini-gá ññ yutnu ngúxi nútññ ññ xio yuhu ichi, te ní xica-gá cuáháñ ndéhé-gá núu ndéé sávidí-xi, dico ñá túú nǎ ndéé chí mee-ni ndàha-xi ndéé. Te ní xáhañ-gá xii yutnu ngúxi-án:

—¡Vitna te vǎ ññ ndúu-gá cuuñ sávidí-n! —càchí-gá xáhañ-gá xii-xi.

Te òré-ni-án ní yichí yutnu ngúxi-án.

²⁰ Te sá dúcáñ ní cuu ní xini cue téé xica cuu ndihi Jèsús, te ío ní cuñúhu-güedé, te ní xicáñ tnúhú-güedé núú-gá, te xáhañ-güedé:

—¿Ná cuendá ndéé dàcáñ ío ndíhi ní yichí yutnu ngúxi-án-í? —càchí-güedé xáhañ-güedé xii-gá.

²¹ Te Jèsús ní xáhañ-gá xii-güedé:

—Na càchí tnúhu ndáá-í xii-ndo sǎ núu nchòhó quíndáá ndisa ini-ndó Yá Ndióxi, te vǎ caní ññ caní úú ini-ndó, te ñá díú-ní sǎ ní quide-í-a ní xini-ndó ndácu-ndo cada-ndo, chí ndéé tíndúú-a xocuññ-xi núú ndécú-xi te núu cúñaha-ndo sǎ xócuññ-xi te quíhíñ-xi queé-xi xití lámár. Te díu ducañ càda-xi te núu na quíndáá ini-ndó.

²² Te nchaa sá ná càcáñ-ndó núú Yá Ndióxi òré càháñ ndihi-ndo-gá te taxi-gá te núu sàndáá ndisa ini-ndó sǎ táxi-gǎ sǎ xicáñ-ndó núu-gá —càchí-gá xáhañ-gá xii-güedé.

Jèsús ndécú ndíhi-gá tnúhu ndee ini

(Mr. 11:27-33; Lc. 20:1-8)

²³ Te Jèsús cuànguihu-gá xití veñúhu càhnu sá ío cùnunu danehé-gá ñáyiú, te xián ndécú-gá ní quexio cue dütú cùnunu ndíhi cue téé cùu sacuéhé núú ñáyiú isràél, te xáhañ-güedé xii-gá:

—Cuíni-ndí cachí tnúhu-n xii-ndí nása ndúu tnúhu ndee ini ndécú ndíhi-n núu quide-n nándi sǎ quidè-n, ¿te yoo ducañ ní taxi tnúhu ndee ini-án xii-n-í? —càchí-güedé xáhañ-güedé xii-gá.

²⁴ Te Jèsús ní xáhañ-gá xii-güedé:

—Yúhú tnáhá-í cuíni-í càcáñ tnúhu-í ññ sǎ càcáñ tnúhu-í núu-ndó, te núu na càchí tnúhu-ndo te cachí tnúhu-í xii-ndo yóo ní taxi tnúhu ndee ini duha quide-í.

²⁵ Te chí cächí tnúhu xii-í yoo ní táuchíúⁿ ní dácuañdüte ndíi Juää ñáyiú, ¿Yá Ndióxi áⁿ cuè téé ñuyúú-a ní táuchíúⁿ ñucaⁿ ní quide ndíi?, te chí cächí tnúhu —cächí-gá xáhaⁿ-gã xii-güedé.

Te ní ngúta-güedé xitnáha-güedé:

—¿Nása cúnaha-o? Chi núu na cúnaha-o sá Yá Ndióxi ní táuchíúⁿ ñucaⁿ ní quide ndíi Juää ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáháⁿ ndíi vaiⁿ?”, quesaha-dé.

²⁶ Te núu na cúnaha-o sá cuè ñáyiú ñuyúú-a ní táuchíúⁿ ñucaⁿ ní quide ndíi ñá, te cudéé ñáyiú núú-ó, chí nchaá-yu cächí-yu sá Yá Ndióxi ní xáhaⁿ-gã xii ndíi sá cáháⁿ ndíi tnúhu-gá núú ñáyiú —cächí-güedé xitnáha-güedé.

²⁷ Te ní xáhaⁿ-güedé xii Jèsús:

—Ñá túú xiní-ndí yoo ní táuchíúⁿ ñucaⁿ ní dácuañdüte ndíi Juää ñáyiú —cächí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu ducaⁿ te ni yúhú vá cächí tnúhu-í xii-ndo yòo ní taxi tnúhu ndee iní duha quide-í —cächí-gá xáhaⁿ-gã xii-güedé.

Cuendá ñⁿ téé ndíi úú déhe-dé

²⁸ Te Jèsús ní xáhaⁿ tucu-gá xii-güedé:

—Na caní-í ñⁿ cuendú núú-ndó nàcuáa tecú tnúni-ndó tnúhu cáháⁿ-í. ñⁿ téé ndècu úú déhe-dé, te ní xáhaⁿ-dè xii déhe-dé téé sacuéhé-gá: “Yòhó déhe-í, véxi-í cáháⁿ ndáhú-í núú-n núu vá cündée iní-n cuañndaha ñaha-n xii-í cada chiúⁿ-o núú ní xitu-í yoho yàha stilé”, cächí-dé xáhaⁿ-dè.

²⁹ Te ní xáhaⁿ déhe-dé xii-dé: “Vá quíhíⁿ-í cada chiúⁿ-í núú chíúⁿ-n”, cächí-dé xáhaⁿ-dè xii tátá-dé. Dico cuèé ní nacani iní-dé te ní sáháⁿ-dé ní quide chiúⁿ-dé núú chíúⁿ tátá-dé.

³⁰ Te téé-áⁿ ní sáháⁿ tucu-dé ní xáhaⁿ-dè xii déhe-dé téé líhli-gá núu vá cündée iní-dé cuañndaha ñaha-dé, te ní xáhaⁿ déhe-dé-áⁿ xii-dé: “Cuu cuañndaha ñaha-í xii-n”, cächí-dé xáhaⁿ-dè. Dico ñá túú ní sáháⁿ-dé cada chiúⁿ-dè.

³¹ Te vitna chí cáháⁿ núu ndédacáa cue téé úú-áⁿ ní quide-güedé sá cuíni tátá-güedé —cächí-gá xáhaⁿ-gã xii-güedé.

Te ní xáhaⁿ-güedé xii-gá:

—Tée cùu sacuéhé-gá, téé ní cáháⁿ ndíi-dé díhna —cächí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Na cächí tnúhu ndáá-í xii-ndo sá ncháá cuè téé cuihna iní-xi quide cobrá ñháá xii ñáyiú cuendá impuèstú, ndíi cue ñáyiú díhí xíndecu ichi díí iní yáchí-gá ndíhu ndaha ñáha Yá Ndióxi xii cue téé-áⁿ ndíi cue ñáyiú díhí-áⁿ dácúúxí nchòhó.

³² Chi ndíi Juää téé ní xóo dácuañdüte ñaha xii ñáyiú ní cáháⁿ ndíi nàcuáa cadá-yu cundecú-yu, dico nchòhó chí ñá túú cuíni-ndó quíndáá iní-ndó nàcuáa ní cáháⁿ ndíi, dico cue téé cuihna iní-xi quide cobrá ñháá xii ñáyiú cuendá impuèstú, ndíi cue ñáyiú díhí xíndecu ichi díí iní, chí sàndáá iní-güedé ndíhí-yu tnúhu ní cáháⁿ ndíi. Te nchòhó cuèi ndèhe-ndo sá sàndáá iní cue ñáyiú-áⁿ nchaá tnúhu ní cáháⁿ ndíi, dico ñá túú cuíni-ndó ndíxi cuèchi iní-ndó cuendá nchaá sá cuèhé sá dúhá quide-ndo cuendá tñi-ndo tnúhu ní cáháⁿ ndíi —cächí-gá xáhaⁿ-gã xii-güedé.

Cuendá cue téé cuihna iní-xi
(Mr. 12:1-12; Lc. 20:9-19)

³³ Te xáhaⁿ tucu Jèsús xii-güedé:

—Cundédóho-ndo na caní tucu-í ingá cuendú núú-ndó cuendá tecú tnúni-ndó tnúhu cáháⁿ-í. ñⁿ téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vá cúú dañú, te ní cadúha-dé núú quíhí-dé ndéhé yoho yàha stilé-áⁿ òré ná cùu, te ní cadúha-dé ñⁿ xító dùcúⁿ núú cáundòdo cue téé coto nchaá yoho yàha stilé-áⁿ.

Te ní sáá ñⁿ nduu quèe-dé quíngaca cuu xica-dé te ní dándóo ndaha-dé sá ní xitu-dé-áⁿ xii ñⁿ úú cue téé xiní tnáhá ndíi-dé cuendá cada chiúⁿ-güedé, te ní ndatnúhu-güedé sá òré ná cúú te cuu cuendá daga-güedé, te ducaⁿ te ní quee-dé cuáháⁿ-dè.

³⁴ Te sátá ní sáá nduu ní cuu ndéhé nchaá yoho yàha stilé sá ní xitu-dé-áⁿ, te ní xáhaⁿ-dè xii ñⁿ úú cue téé xinú cuechi núú-dé: “Chí cuáháⁿ cácaⁿ-ndó sá cúú cuendá-í núú cuè téé ní dándóo ndaha-í nchaá yoho yàha stilé sá ní xitu-í”, cächí-dé xáhaⁿ-dè xii-güedé.

³⁵ Te cue téé ní dándóo ndaha-dé nchaá yoho yàha stilé sá ní xitu-dé-áⁿ ní tñi-güedé cue téé xinú cuechi núú-dé-áⁿ, te ñⁿ-dé ní caní-güedé, te ñⁿ-dé ní sahni ñaha-güedé, te ingá-dé ní sáñaha-güedé yúú.

³⁶ Te téé ní xitu yoho yàha stilé-áⁿ ní tendaha-dé títní-gá tucu cue téé xinú cuechi núú-dé cuáháⁿ-güedé cuángacáⁿ-güedé sá cúú cuendá-dé núú cuè téé ní dándóo ndaha-dé sá ní xitu-dé-áⁿ, dico díu-ni ducaⁿ ní quide ñaha cue téé-áⁿ xii cue téé xinú cuechi núú-dé-áⁿ.

³⁷ Te téé cùu xítóhó nchaá yoho yàha stilé-áⁿ ní sani iní-dé: “Váha-gá núu tendaha-í déhe-í-a núhú-dé, chí òré quíni ñáhá-güedé xii-dé te canehé-güedé sá yíñúhu núú-dé”, duha ní sani iní-dé. Te ní tendaha-dé déhe-dé cuánuhú-dé.

³⁸ Dico òré ní xiní cue téé quide chiúⁿ-áⁿ déhe téé cùu xítóhó nchaá yoho yàha stilé-áⁿ, te ní xitnáha-güedé: “Tée-áⁿ téé véxi nduu

táhu ñuhu-a ndíhi nchaa sá cáá núu-xi, dico cahni-o-dé te mee-o ndúu táhú-ó sá ndúú táhú-dé”, cächí-güedé xitnáha-güedé.

³⁹ Te ní tñii-güedé téé-án te ndéca ñaha-güedé cuáhán ñⁿ xio yuhu ñuhu-án, te ní sahni ñaha-güedé xii-dé —duha cuáhán cuéndú ní cani Jësús núu-güedé.

⁴⁰ Te ní xáhaⁿ tucu Jësús xii-güedé:

—¿Te nchóhó sa cutnumí iní-ndó nása cada ñaha xitohó ñuhu-án xii cue téé-án ñá? —cächí-gá xáhaⁿ-gá xii-güedé.

⁴¹ Te cue téé-án ní xáhaⁿ-güedé xii-gá:

—Tée cùu xitohó ñuhu-án nñhú-dé, te vá cundàhú iní-dé cue téé cuihna iní-xi-án chí cahni ñaha-dé xii-güedé, te dándóo ndaha-dé ñuhu-dé xii cue téé cutnumí iní-dé cada ndáa cuéndá ndí tnahá cùuⁿ ndéhé nchaa yoho yàha stilé sá ní xitu-dé-án te cuáñaha-güedé xii-dé sá cùu cuéndá-dé —cächí-güedé xáhaⁿ-güedé xii-gá.

⁴² Te Jësús ní xáhaⁿ-gá xii-güedé:

—Te nchóhó, náa ñá túú dácuaaha-ndo núu tütú Yá Ndióxi núu cächí-xi: Yúu sá ní dáqueé tñhú cue téé dácaa vehe, ní cuu-xi yúu cúnúu vitna.

Chí mee Dütú Ndióxi ducaⁿ ní cächí-gá cundúu, te cùu-xi ñⁿ sá lo cùnñuho-o vitna. Duha cächí-xi núu tütú-gá.

⁴³ Te duha cáhán-í chí Yá Ndióxi cada-gá te vá nihí-ndó tñhú ndee iní cundecu ndíhi-ndo cuéndá ndíhu ndaha ñaha-gá xii-ndo, chí tñhú ndee iní-án cundecu ndíhi cue ñáyiú cada ndáa cuéndá ndíhu ndaha ñaha Yá Ndióxi xii-yu.

⁴⁴ Te yúu sá cúnúu-án cùu-xi yühú, te nchaa ñáyiú ñá túú tñhí tñhú-í cùu-yu dátá ñⁿ ñáyiú ndúá núu yúu-án te tñhúú duúⁿ-yu, ádi núu na tàú ñáhá-xí xii-yu, te dacächí duuⁿ ñaha-xi —cächí-gá xáhaⁿ-gá xii-güedé.

⁴⁵ Te sá dúcáⁿ ndúu cuéndú ní cani Jësús te cue téé cùu dütú cúnúu-án, ndíhi cue téé cùu fariséú ní cutnúi iní-güedé sá cuéndá-güedé ní cáhán-gá.

⁴⁶ Te ní cuini-güedé tñhí ñaha-güedé xii-gá òré-án dico ñá túú ní cùyii-güedé, chí ní yühú-güedé cue ñáyiú, chí ní cutnúi iní-yu sá cùu-gá ñⁿ téé cáháⁿ tñhú Yá Ndióxi.

22

Cuéndá ñⁿ vico tñándaha

¹ Te Jësús ní ngúita tucu-gá caní-gá ingá cuéndú núu-güedé, te xáhaⁿ-gá:

² —Na caní tucu-í ingá cuéndú núu-ndó cuéndá tecú tñhú-ndó nácuáa cada-xi òré ndíhu ndaha ñaha Yá Ndióxi xii ñáyiú. ñⁿ téé yindaha ñaha xii ñáyiú ní quide-dé ñⁿ vico ní dátmandaha-dé déhe ducuⁿ-dé.

³ Te ní tendaha-dé cue téé xinu cuechi núu-dé cuáhán-güedé cuángana-güedé cue ñáyiú sa ní cáhán-dé cuhuⁿ vico, dico ñáyiú-án ñá túú ní cuini-yu quíhíⁿ-yu.

⁴ Te ní xáhaⁿ tucu-dé xii dava-gá cue téé xinu cuechi núu-dé: “Quíhíⁿ-ndó cññaha-ndo xii cue ñáyiú sa ní cáhán-í cuhuⁿ vico sá sá ní quide túha-í sá cáxi-yu, te sa ní sahni-í ndicutu ndíhi nchaa dava-gá quiti ní dánucññu-í, te nchaa sa ní quide túha-í, te na quixí-yu cuhúⁿ-yu vico cächí-í cññaha-ndo”, cächí-dé xáhaⁿ-dé xii cue téé xinu cuechi núu-dé-án.

⁵ Dico ní ñⁿ ñáyiú ní cáhán-dé-án ñá túú ní cuini-yu quíhíⁿ-yu cuhúⁿ-yu vico. Chí ñⁿ-yu ní sáhán-yu ní quide chiúⁿ-yu núu ññhú-yu, te ingá-yu ní sáhán-yu ní nadicó-yu núu nándi cùu ndáhú quidé-yu.

⁶ Te dava-gá-yu ní tñhí-yu dava cue téé xinu cuechi núu téé quide vico-án, te ní canihá-yu ndéé ní sahni ñáhá-yu xii-güedé.

⁷ Te téé yindaha ñaha xii ñáyiú quide vico-án ní cudéⁿ víhí-dé sá dúcáⁿ ní quidé-yu, te ní tendaha-dé cue sandádú-dé ní sáhán-güedé ní sahni-güedé cue ñáyiú ducaⁿ ní quide-án, te ní sahmi-güedé nchaa vehe cãa ññu-yu.

⁸ Te sátá dúcáⁿ te ní xáhaⁿ-dé xii dava-gá cue téé xinu cuechi núu-dé: “Nchaa sa ndécu túha, te cue ñáyiú ní cáhán-í cuhuⁿ vico-a ní cùu ñá túú-gá tàú-yu sá cühúⁿ-yu.

⁹ Te chí cuáhán ndéni ní cuu te cáhán-ndó nchaa ñáyiú na nánihí-ndó ichi na quixí-yu cuhúⁿ-yu vico-a”, cächí-dé xáhaⁿ-dé xii-güedé.

¹⁰ Te cue téé xinu cuechi-án ní quee-güedé cuáhán-güedé, te ní cáhán-güedé nchaa ñáyiú ní nanihí-güedé ichi, te cuéi ñáyiú váha iní-xi, te cuéi ñáyiú cuihna iní-xi, te ní chítú-yu núu cùu vico-án.

¹¹ Te sátá dúcáⁿ te téé yindaha ñáyiú quide vico-án ní quíhu-dé xití vehe ní xindéhé-dé cue ñáyiú ññu vico-án, te ní xiní-dé ñⁿ téé ññutnahá tñuú-yu te ñá túú cãa dóó-dé dátá cáa dóó ññhú cué ñáyiú ññu vico-án.

¹² Te ní xáhaⁿ-dé xii téé-án: “¿Tãta, nása ní cuu cuánguihu-ó iha, te ñá túú cãa dóó-n dátá cáa dóó ññhú cué ñáyiú ññu vico tñándaha-í?”, cächí-dé xáhaⁿ-dé xii téé-án. Dico téé-án ñá túú ní nihí-dé tñhú cáhán-dé.

¹³ Te téé yindaha ñáyiú quide vico-án ní xáhaⁿ-dé xii cue ñáyiú xinu cuechi núu mësá: “Chí tñí téé-án te dacütu-ndo-dé, te queññuho-ndo-dé ná quíhíⁿ-dé cundecu-dé ñⁿ xichi núu néé núu lo ndoho-dé, te yacáⁿ lo ndáhyú-dé te dicó rñññ-nã cuu ññuho-dé sá sátú iní-dé sá ndóhó-dé”, cächí-dé xáhaⁿ-dé xii cue ñáyiú xinu cuechi núu mësá-án.

¹⁴ Te duha ndúu cuéndú cáhán-í chí lo cuéhé ñáyiú cáhán ñáhá Yá Ndióxi xii-yu, dico sacú-ni-yu nduu táhú-yu cundecu-yu ndíhi-gá —cächí-gá xáhaⁿ-gá xii-güedé.

Cuéndá impuestú

(Mr. 12:13-17; Lc. 20:20-26)

¹⁵ Te cue tée cùu fariséu ní sáháⁿ-güedé ìⁿ xichi ní ndatnúhu-güedé nàcuáa cada-güedé datícánuu-güedé Jèsús núú tñuhu càháⁿ-gá cuèndá ducaⁿ níhí-güedé nàcuáa cada-güedé cacáⁿ cuèchi-güedé cuèndá-gá.

¹⁶ Te ní tendaha-güedé ìⁿ úú cue tée cùndihí-güedé, ndihí cue tée cùndihí té Hèrodés cuáháⁿ-güedé núú ndécú Jèsús. Te òré ní quexio-güedé núú ndécú-gá, te ní xáhaⁿ-güedé xii-gá:

—Mèstrú, níhí-ndí tñuhu sá ìo ndáá càháⁿ-n, te càháⁿ ndáá-n nàcuáa càháⁿ Yá Ndiòxí cundecu-o ñùyúú-a, te cuèi ndèda-ni càa ñáyiú ìⁿ-ni càháⁿ-n ndihí-yu chi ñá túú quide cuendá-n cuèi ná ñáyiú cùú-yu.

¹⁷ Te cachí tñuhu xii-ndí, núú váha-ni quide-ndí sá cháhu-ndí té Cèsár tée ìo cùnuu cuendá impuèstú áⁿ ñáhá —càchí-güedé xáhaⁿ-güedé xii-gá.

¹⁸ Dico Jèsús ní cutnuni iní-gá sá xító ndéè ñáhá-güedé xii-gá, núú ní xáhaⁿ-gá xii-güedé: —Nchòhó cue tée dàndahú mée-xí sá quidé ndáá te ñá ndáá sá quidé ndáá-ndó, ¿ná cuendá xító ndéè ñáhá-ndó xii-í?

¹⁹ Chí dánèhé ñáhá xii-í ìⁿ díhúⁿ sá cháhu-ndo cuendá impuèstú núú nása càa —cachí-gá xáhaⁿ-gá xii-güedé.

Te ní dánèhé ñáhá-güedé xii-gá ìⁿ díhúⁿ sá nání dènaríú.

²⁰ Te òré ní xini-gá díhúⁿ-áⁿ te ní xicáⁿ tñuhú-gá núú-güedé, te xáhaⁿ-gá:

—Chí cachí tñuhu yoo núú-xi ndéè ndihí yoo díu-xi ndéè —càchí-gá xáhaⁿ-gá xii-güedé.

²¹ Te ní xáhaⁿ-güedé xii-gá:

—Núú té Cèsár ndéè ndihí díu-dé —càchí-güedé xáhaⁿ-güedé xii-gá:

Te Jèsús ní xáhaⁿ-gá xii-güedé:

—Te núú ducaⁿ te chí nàcuáha té Cèsár sá cùú cuendá-dé, te sá cùú cuendá mée Yá Ndiòxí te xíáⁿ nàcuáha-ndo-gá —càchí-gá xáhaⁿ-gá xii-güedé.

²² Te cue tée-áⁿ ìo ní cuñuhu-güedé sá dúcáⁿ ní càháⁿ-gá, te ní natnii-güedé ichi cuánuhú-güedé.

Cuendá cue ñáyiú ndoto

(Mr. 12:18-27; Lc. 20:27-40)

²³ Te díu-ni nduu-áⁿ ní quexio ìⁿ úú cue tée cùu saduceú núú ndécú Jèsús. Te cue tée-áⁿ ñá túú sàndáá iní-güedé sá ndótó cuè ñáyiú ní xihí, te ní xáhaⁿ-güedé xii-gá:

²⁴ —Mèstrú, ndíi Moisés ní cachí ndíi sá núú ìⁿ tée ndècu ñadhí-xi cuú-dé te quendóo ñadhí-dé, te núú ñá túú dèhe-dé ní xóo ndihí-aⁿ te tée cùu ñani-dé naqueheⁿ-dé ñaha ní quendóo quèé-áⁿ cuendá coo dèhe-dé ndihí-aⁿ cuendá ñani-dé tée ní xihí-áⁿ.

²⁵ Te ñuú-ndí-a ní xindecu úsá tñahá cue tée mee-ni ndí ñani-güedé. Te tée díhna ní níhí ñadhí-dé te ñá túú ní cùdí-dé cundecu-dé

chí ní xihí-dé, te ní ìⁿ dèhe-dé ñá túú ní xóo ndihí ñadhí-dé-áⁿ. Te tée cùu úú ní nàqueheⁿ-dé ñaha ní quendóo quèé-áⁿ.

²⁶ Dico ní xihí tucu-dé, te ní ìⁿ tucu dèhe-dé ñá túú ní xóo ndihí ñaha-áⁿ, te díu-ni ducaⁿ ní yáha tée cùu uní, te ní xínu ndi úsá-güedé ní càndeca ñaha-güedé xii ñaha-áⁿ dico díu-ni ducaⁿ ní xihí-güedé.

²⁷ Te ndéé núú ní ndihí-ná te ní xihí tñahá ñadhí-áⁿ.

²⁸ Te na sáá nduu ndòto-güedé ndihí ñaha-áⁿ, ¿te ndèdacaa-güedé ñadhí-güedé cuu-aⁿ-í? Chí ndi úsá-güedé ní càndeca ñaha-güedé xii-aⁿ —càchí-güedé xáhaⁿ-güedé xii-gá.

²⁹ Te Jèsús ní xáhaⁿ-gá xii-güedé:

—Ní xíta nchòhó tñuhu càháⁿ-ndó, chí ñá túú xini-ndó nàcuáa càháⁿ Yá Ndiòxí núú tütú-gá, te ní ñá túú cutnuni iní-ndó sá díú-gá ndácú-gá quidé-gá nchaandi tñúhú sá váha.

³⁰ Te na càchí tñuhu-í xii-ndo sá òré ná sáá nduu ndòto nchaa ñáyiú ní xihí, te dàv-áⁿ v-á yóo-gá dasaⁿ dèhe yoo-xi chí v-á yóo-gá càndeca tñaha, chí cuu-ná-yu dàtná cue espíritú xínu cuèchi núú Yá Ndiòxí.

³¹ ¿Te náa ñá túú quide cuendá-ndó nàcuáa càháⁿ Yá Ndiòxí núú tütú-gá núú càháⁿ-gá cuendá cue ñáyiú ní xihí-áⁿ? Te duha càchí-gá:

³² “Yúhu cùú-í Ndiòxí tē Àbrahám, ndihí té Isàac, ndihí té Jàcób”, duha càchí-gá núú tütú-gá. Te cue tée-áⁿ chí cuèi ní xihí-güedé núú ñùyúú-a, dico sá cùú-xí Yá Ndiòxí chí ndècu vívú-ni-güedé. Chí díu-gá cùú-gá Ndiòxí mee-ni cuè ñáyiú xindecu vívú, te ñá túú cùu-gá Ndiòxí cue ñáyiú ñá túú ndècu vívú —càchí-gá xáhaⁿ-gá xii-güedé.

³³ Te sá dúcáⁿ ní càháⁿ-gá ní xii-gá cue tée-áⁿ, te ìo ní cuñuhu nchaa ñáyiú cuendá sá ìo váha nduu tñuhu ní càháⁿ-gá.

Tñuhu sá ìo-gá cúnùu

(Mr. 12:28-34)

³⁴ Te cue tée cùu fariséu ní xini-güedé ní sadí Jèsús yuhu cue tée cùu saduceú, chí ñá túú ní níhí-gá-güedé tñuhu cùñaha-güedé xii-gá, te cue tée cùu fariséu-áⁿ ní nat-acá-güedé te cuáháⁿ-güedé núú ndécú Jèsús.

³⁵ Te ìⁿ tée cùu fariséu-áⁿ ìo váha cutnuni iní-dé nàcuáa nduu nchaa tñuhu ní chídó tñuni ndíi Moisés te xito ndeé-dé Jèsús, te xáhaⁿ-dè xii-gá:

³⁶ —Mèstrú, cachí tñuhu ndèdacaa tñuhu sá ní chídó tñuni ndíi Moisés ìo-gá cúnùu cada-o —cachí-dé xáhaⁿ-dè xii-gá.

³⁷ Te Jèsús ní xáhaⁿ-gá xii-dé:

—Duha càháⁿ tñuhu sá ìo-gá cúnùu: “Cuu iní-ndó Dítú Ndiòxí Yaa cùú Ndiòxí-ndó ní yuhu ní iní-ndó, te cani iní-ndó càda-ndo datná cuini mée-gá, te mee-ni tñuhu váha

cani iní-ndó nàcuáa cuu vii cuu váha-ndo núú-gá”,

³⁸ duha càháⁿ tnúhu sá ïo-gá cúnùu.

³⁹ Te duha càháⁿ tucu ingá tnúhu cùu uú sá ïo cúnùu, te sa yatni ìⁿ-ni cùu-xi ndìhi tnúhu díhna nuu, te càchí-xi: “Cuu iní-ndó tnàha ñáyiu-ndo dàtná cúú ìni-ndó mèe-ndo”, duha càháⁿ tnúhu cùu uú-áⁿ.

⁴⁰ Te cuèndá úú tnúhu-a ní cáá nchaa tnúhu ní cáháⁿ ndíi Moisés nàcuáa cada ñáyiu, te ñiu-ni cuèndá úú tnúhu-a ní cáá tnúhu ní cáháⁿ nchaa cue téé ní xóo cáháⁿ tnúhu Yá Ndióxi ndéé sanaha —càchí-gá xáhaⁿ-gá xii-güedé.

Yoo cùu Xítohó Jesucristú

(Mr. 12:35-37; Lc. 20:41-44)

⁴¹ Te ndècu ducaⁿ-ni cue téé cùu fariséu núú ndécú Jèsús.

⁴² Te ní xicáⁿ tnúhú-gá núú-güedé, te xáhaⁿ-gá:

—Cuiní-í cachí tnúhu-ndo yòo déhe-xi cùu Cristú Yaá tendaha Yá Ndióxi quixi ñuyú-a —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Déhe ndíi Dàvíí cúú Yáá-áⁿ —càchí-güedé xáhaⁿ-güedé xii-gá.

⁴³ Te Jèsús ní xáhaⁿ-gá xii-güedé:

—¿Te nása càchí-tu-ndo sá déhe ndíi Dàvíí cúú Cristú Yaá tendaha Yá Ndióxi quixi ñuyú-a, te mee ndíi Dàvíí-áⁿ ní dácáhu ìni ñáhá Espiritú Yá Ndióxi xii ndíi, te ní cachí ndíi sá Cristú Yaá tendaha Yá Ndióxi quixi ñuyú-a cùu-gá Xítohó ndíi? Te duha ní cachí ndíi:

⁴⁴ Dútú Ndióxi ní xáhaⁿ-gá xii Yaá cúú Xítohó-í:

“Ngóo xio cùha-í, te yúhú cada-í te nchaa sá cúú ùhú ìni ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndióxi xii Yaá cúú Xítohó-í, càchí ndíi.

⁴⁵ ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gá Xítohó ndíi? —càchí Jèsús xáhaⁿ-gá xii-güedé.

⁴⁶ Te ní ìⁿ-güedé ñá túú-gá ní ñíhí-güedé tnúhu cùñaha-güedé xii-gá. Te ndéé nduu-áⁿ ñá túú-gá ní cùyí-güedé ná tnúhu cacáⁿ tnúhú-güedé núú-gá.

23

Jèsús càháⁿ-gá cuèndá cue téé cùu fariséu ndíhi cuèndá cue téé dàcuaha ñaha xii ñáyiu

(Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gá núú nchaa ñáyiu, ndíhi núú cuè téé xica cuu ndíhi-gá, te xáhaⁿ-gá:

² —Cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíhi cue téé cùu fariséu ndécú ndíhi-güedé tnúhu ndee ìni cáháⁿ-güedé nchaa tnúhu sá ní chídó tnùní ndíi Moisés-áⁿ.

³ Te cada-ndo nàcuáa dànehé ñáhá-güedé xii-ndo, dico vá cáda-ndó dàtná xíquide-güedé, chi tucu ndùu tnúhu càháⁿ-güedé, te tucu quide-güedé.

⁴ Te quide-güedé dàtná quidé ñáyiu dàcuído ìⁿ tnaha ñáyiu-xi ìⁿ sá ïo véé, te mèe-yu ní lùha ñá túú cuiní-yu cuidó-yu. Te ducaⁿ sátnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ní lùha ñá túú cuiní-güedé cada-güedé nàcuáa dànehé ñáhá-güedé xii-ndo.

⁵ Te mee-ni ndùcu-güedé nàcuáa quide-güedé cuèndá quini ñáyiu sá ïo cùu cahnu-güedé. Te ndéé xindá sá ndéé ìⁿ úú tnúhu Yá Ndióxi tneé-güedé ndíhi ndaha-güedé, te tnàhá ìni-güedé sá ïo-gá cunduu quèhèⁿ xindá-áⁿ dàcúúxí xindá dava-gá ñáyiu. Te tnàhá tucu ìni-güedé sá ïo-gá cunduu nàni núú dóo sácùlhu-güedé dàcúúxí dóo sácùlhu dava-gá-yu.

⁶ Te ndí tnahá òré sácóo vico, òré quíhu-güedé mèsá caxi-güedé te ïo-gá quíí ìni-güedé cunucóo-güedé núú xilé núú sácóo cue téé cúnùu-gá, te ñiu-ni ducaⁿ quide tucu-güedé cuéi xití veñùhu.

⁷ Te nchaa núú xicá cùu-güedé cuiní-güedé sá ndíhi tnúhu yíñùhu cáháⁿ ndíhi ñaha ñáyiu xii-güedé, te cuiní tucu-güedé sá cùñahá-yu xii-güedé mèstrú.

⁸ Dico nchòhó vá cùñaha-ndo xii ñáyiu sá cùñahá-yu mèstrú xii-ndo, chi nchòhó ìⁿ-ni cùu-ndo ndecu-ndo, chi ducaⁿ ìⁿ-ni yúhú Yaá ní tendaha Yá Ndióxi véxi ñuyú-a cùu-í Mèstrú ndécú ndíhi ñaha-í xii-ndo.

⁹ Te ìⁿ-ni Dútú Ndióxi Yaá ndécú àndiu cuu-gá Tátá-ndó, núú xíáⁿ vá cáháⁿ-ndó sá dáva cue téé ñuyú-a cùu-güedé tátá-ndó.

¹⁰ Te ní vá cání ìni-ndó càda-ndo nacuaá cáháⁿ ñáyiu sá cúnùu-ndo, chi ìⁿ-ni yúhú Cristú Yaá ní tendaha Yá Ndióxi véxi ñuyú-a cúnùu-í.

¹¹ Te ñáyiu ïo-gá cúnùu ndecu ndíhi-ndo, ñáyiu-áⁿ cúu-yu ñáyiu xinu cuechi núú-ndó.

¹² Te nchaa ñáyiu quide cahnu mee-xi ñáyiu-áⁿ vá cúu-yu ñáyiu cúnùu, te nchaa ñáyiu ñá túú quide cahnu mee-xi ñáyiu-áⁿ cúnùú-yu.

¹³ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíhi nchòhó cue téé cùu fariséu, cùu-ndo cue téé ïo dándahú mée-xí sá quidé ndáá te ñá ndáá sá quidé ndáá-ndó, te ndáhú ní cuu-ndo chi sàdí-ndó ìchi ñáyiu ñá dáñá-ndó ndíhu ndaha ñaha Yá Ndióxi xii-yu, te ní mèe-ndo ñá túú quide-ndo nacuaá ndíhu ndaha ñaha-gá xii-ndo, te ní dáva-gá cue ñáyiu cuiní sá ndíhu ndaha ñaha-gá xii-yu ñá dáñá-ndó.

¹⁴ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés,

ndihi nchòhò cue tée cùu fariséu, cúu-ndo cuè tée ío dándahú mée-xí sá quidé ndáá te ñá ndáá sá quidé ndáá-ndo, te ndáhú ní cuu-ndo chi quèndé-ndo vèhe cue ñáyi quèé, te ío naha càháⁿ ndihi-ndo Yá Ndióxi cuendá cuini-ndo sá vâ yòo cutnùni iní-xi nàcuáa quide-ndo. Te sá dúcáⁿ quide-ndo te ío-gá ndòho-ndo núú ùhú núú ndáhú dàcúxí dàva-gá ñáyi.

¹⁵ Te nchòhò cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndihi nchòhò cue tée cùu fariséu, cúu-ndo cuè tée ío dándahú mée-xí sá quidé ndáá te ñá ndáá sá quidé ndáá-ndo, te ndáhú ní cuu-ndo chi sàhni iní-ndo cuháⁿ-ndo ndèni ní cuu dàcáháⁿ-ndo ñáyi cuendá cuini-ndo tníⁿ-yu ichi ndècu-ndo. Te òrè ná xínu iní-yu tníⁿ-yu ichi ndècu-ndo-án te uuⁿ-gá cuíta ni-ñu-yu dàcúxí mée-ndo.

¹⁶ Te nchòhò cúu-ndo dàtná cue ñáyi cuáá, chi ñá cùtnùni iní-ndo nàcuáa canu ichi-ndo ñáyi, te ndáhú ní cuu-ndo chi càchí-ndo: “Íⁿ ñáyi na càcunehe veñúhu càhnu sá ío cùnno oré cuini-yu cutnùni iní tnàha ñáyi-yu sá ndáá cadá-yu íⁿ sá sání iní-yu cadá-yu, te vâ cúu cuèchi xii-yu cuèí vâ cadá-yu. Dico núu na càcu nehé-yu dñúⁿ cuááⁿ yíhí xití veñúhu-án te cuu cuèchi xii-yu te núu vâ cadá-yu sá ní cachí-yu cadá-yu”, duha càchí-ndo.

¹⁷ Nchòhò cúu-ndo cuè tée ío ní dñúⁿ-xi, te cùu-ndo datná cue ñáyi cuáá chi ñá təcú tnùní-ndo! Te vâ càchí-ndo sá ío-gá cùnno dñúⁿ cuááⁿ dàcúxí veñúhu, chi diu cuendá veñúhu-án ní cuu íi dñúⁿ cuááⁿ-án.

¹⁸ Te càchí-tucu-ndo: “Íⁿ ñáyi na càcunehe xito núú sácódó sá ndúú tǎhú Yá Ndióxi òrè cuini-yu cutnùni iní tnàha ñáyi-yu sá ndáá cadá-yu íⁿ sá sání iní-yu cadá-yu, te vâ cúu cuèchi xii-yu cuèí vâ cadá-yu, dico núu na càcu nehé-yu sá ndúú tǎhú Yá Ndióxi yódó núú xito-án te cuu cuèchi xii-yu te núu vâ cadá-yu sá ní sani iní-yu cadá-yu”, duha càchí-ndo.

¹⁹ Te cùu-ndo cue tée ío ní dñúⁿ-xi, te cùu-ndo datná cue ñáyi cuáá chi ñá təcú tnùní-ndo! Te vâ cání iní-ndo sá ío-gá nándíhi sá ndúú tǎhú Yá Ndióxi sácódó núú xito núú sácódó tnàhí sá ndúú tǎhú-gá-án dàcúxí mée xito-án.

²⁰ Chi nchaa ñáyi ducaⁿ càcunehe xito-án, te tnàhá-ni sá yódó núú-xi càcu nehé-yu òrè ducaⁿ càháⁿ-yu.

²¹ Te nchaa ñáyi ducaⁿ càcunehe veñúhu càhnu sá ío cùnno te ñá díú mée-ni veñúhu càcu nehé-yu òrè ducaⁿ càháⁿ-yu, chi tnàhá-ni Yá Ndióxi Yáa cúu cuendá veñúhu-án càcú nehé-yu òrè ducaⁿ càháⁿ-yu.

²² Te nchaa ñáyi càcunehe andiu cuendá cutnùni iní tnàha ñáyi-yu sá ndáá cadá-yu íⁿ sá sání iní-yu cadá-yu, te ñá díú mée-ni

andiu cacu nehé-yu chi tnàhá-ni núú núcòo Yá Ndióxi táxi tnùní-gá càcú nehé-yu òrè ducaⁿ càháⁿ-yu, te tnàhá mée-gá càcú nehé-yu òrè ducaⁿ càháⁿ-yu.

²³ Te nchòhò cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndihi nchòhò cue tée cùu fariséu, cúu-ndo cuè tée ío dándahú mée-xí sá quidé ndáá te ñá ndáá sá quidé ndáá-ndo. Te cuèí núú ùxi xichi yúcu mენტá nihí-ndo, te sǎñaha-ndo íⁿ xichi xii Yá Ndióxi, te diu-ni ducaⁿ quide-ndo yúcu nání anís, ndihi yúcu nání còminú, dico ndáhú ní cuu-ndo chi ñá túú quide cuendá-ndo nàcuáa càháⁿ nchaa tnúhu sá ío-gá cùnno sanu ichi ñaha xii-ndo, te tnúhu-án càchí-xi sá ío xini ñuhu-xi cada ndáá-ndo cùndecu-ndo, te cundáhú iní-ndo cuè tnaha ñáyi-ndo, te quindáá iní-ndo Yá Ndióxi, te cada-ndo nchaa nacuáa ndúu tnúhu càháⁿ-ndo, te nchaa tnúhu-án cúu-xi tnúhu sá ío cùnno xini ñuhu-xi cada-ndo nacuáa càháⁿ-xi, dico vâ dáñá ndéé-ndo càda-ndo nchaa dava-gá nàcuáa càháⁿ tnúhu sá sánú ichi ñaha xii-ndo.

²⁴ Te nchòhò cúu-ndo dàtná cue ñáyi cuáá, chi ñá túú cùtnùni iní-ndo nàcuáa canu ichi-ndo ñáyi, chi quide cuendá-ndo mée-ni nchaa tnúhu sá ñá túú ío cùnno, dico nchaa tnúhu sá ío-gá cùnno xini ñuhu-xi cada cuendá-ndo ñá túú quide cuendá-ndo!

²⁵ Te nchòhò cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndihi nchòhò cue tée cùu fariséu, cùu-ndo cue tée ío dándahú mée-xí sá quidé ndáá te ñá ndáá sá quidé ndáá-ndo. Te ndáhú ní cuu-ndo chi cùu-ndo datná cue ñáyi nàquete sátá-ni tásáⁿ ndihi sátá-ni còhó te xití-xi càndehe caduha-ni. Te ducaⁿ sǎtnahá-xi cùu-ndo chi mee-ni sá ndécú ndihi tnaha ñáyi-ndo ñuhu iní-ndo, te nándi dándahú-ndo-yu te quèheⁿ-ndo sá ndécú ndihí-yu.

²⁶ Te nchòhò cue tée cùu fariséu, cúu-ndo dàtná cue ñáyi cuáá, chi ñá túú cùtnùni iní-ndo nàcuáa ndúu sá quidé-ndo. Te ío xini ñuhu-xi sá cadá-ndo nàcuáa nduu ndoo nduu nine iní-ndo cuendá ndacu-ndo càda-ndo sá vǎha, te xǎⁿ núu chí cadá dàtná xiquide ñáyi nàquete ndaa xití tásáⁿ ndihi ndaa xití còhó.

²⁷ Te nchòhò cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndihi nchòhò cue tée cùu fariséu, cùu-ndo cue tée ío dándahú mée-xí sá quidé ndáá te ñá ndáá sá quidé ndáá-ndo. Te ndáhú ní cuu-ndo chi cùu-ndo datná núú yíndüxi ndíyí núú ní cuáha vii te ní nacáhyú sá cuixíⁿ, dico xití yaú-án chi càndehe caduha chi mee-ni yiqui ndíyí ñuhu.

²⁸ Te ducaⁿ sãtnahá-xi cùu-ndo chi sãnuu sã cùú-ndó cuè téé váha dico iní-ndó chi mee-ni sã cuèhé sã dúhá ñuhu, te ío dándahú-ndó mèe-ndo sã quidé ndáá-ndó te ñá ndáá sã quidé ndáá-ndó.

²⁹ Te nchòhó cue téé dácuaaha ñaha xii ñáyiu nchaa tnúhu ní chídó tnùnì ndíi Moisés, ndíhi nchòhó cue téé cùu fariséú, cùú-ndó cuè téé ío dándahú méé-xí sã quidé ndáá te ñá ndáá sã quidé ndáá-ndó. Te ndáhú ní cuu-ndo chi càdúha-ndo nchàa núú ní nguindúxi cue téé ní xóo cáháⁿ tnúhu Yá Ndióxi ndéé sanaha, te ío víi quide-ndo nchaa núú sã ní cuáha núú yíndúxi cue ñáyiu ní quide váha ní xíndecu ñuyúú-a.

³⁰ Te càchí-ndó: “Te núú dicó nchoo ní xíndecu-o cùtnáhá ní xíndecu cue ñani tnáhá-ó ndéé sanaha, te vá chítñáhá-ó-güedé cahni-o cuè téé ní xóo cáháⁿ tnúhu Yá Ndióxi dàvá-áⁿ ní cùu”, duha càchí-ndó.

³¹ Te sã dúcáⁿ cáháⁿ-ndó, te xiãⁿ cùtnùnì sã ñiⁿ-ní cùu-ndo ndíhi cue ñani tnáhá-ndó cuè téé ní xíndecu ndéé sanaha, cue téé ní sahni ñaha xii cue téé ní cáháⁿ tnúhu Yá Ndióxi dàvá-áⁿ.

³² Te núú ducaⁿ te chí dákúu cava chùuⁿ ní tausaha-güedé.

³³ ¡Te nchòhó cùú-ndó cuè téé ío cuihna iní-xi, chi cùu-ndo datná cóo dēé! Te nchòhó vá ñihí-ndó nàcuáa cada-ndo cácu nihnu-ndo núú ùhú núú ndàhú.

³⁴ Te cuèndá xiãⁿ núu tendaha-í cue téé cáháⁿ tnúhu Yá Ndióxi quixi núú-ndó, ndíhi cue téé cùu mestrú danéhé ñáhá xii-ndo tnúhu-gá, ndíhi cue téé ío váha cùtnùnì iní-xi cuèndá cáháⁿ-güedé tnúhu-gá núú-ndó. Dico nchòhó chí da cùu ùhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núú cùrúxi, te dava-güedé cani-ndo-güedé xití veñúhu, te ndi tnahá ñuú ndi tnahá ñuú quíhiⁿ-ndó nànducu-ndo-güedé cuèndá cada ùhú iní-ndó-güedé.

³⁵ Te sã dúcáⁿ ná càda-ndo, te ndadíquí-ndó cuè téé ní quide ndáá ní xíndecu ní xihí ní sahni ñaha cuè ñani tnáhá-ndó. Te ndéé ndíi Ábél téé ío váha ní quide ndáá ní xíndecu ní sahni-güedé ndadíquí-ndó, ndíhi nchaa dava-gá cue téé ní sahni-güedé, ndíhi ndéé ndíi Zacaría déhe ndíi Beréquías téé ní sahni-güedé ndéé núú ní ndíhi-ná ndadíquí-ndó, te ndíi-áⁿ ní sahni-güedé mei tnúú veñúhu càhnu sã ío cùnuu ndíhi xito núú sácódo sã ndúú tãhú Yá Ndióxi, te nchaa cue téé-áⁿ ndadíquí-ndó chí datná tnúhu mee-ndo ní sahni-ndo cuè téé-áⁿ, chí ñu-ni ñani tnáhá mèe-ndo ducaⁿ ní sahni ñaha xii-güedé.

³⁶ Te na càchí tnúhu ndáá-í xii-ndo sã nchàa cue téé ní quide ndáá ní xíndecu

ní sahni-güedé, nchaa cue téé-áⁿ ndadíquí nchaa ñáyiu ndècu vitna —cachí-gá xàhaⁿ-gá xii-güedé.

Jèsús càháⁿ-gá cuèndá ñáyiu ñuú Jerusalén (Lc. 13:34-35)

³⁷ Te xàhaⁿ Jèsús xii ñáyiu ñuú Jerusalén:

—Nchòhó ñáyiu ñuú Jerusalén sahni-ndo cue téé ní tendaha Yá Ndióxi véxi cáháⁿ tnúhu-gá núú-ndó, te mee-ni ndíhi yúú sáhni-ndó dàva-güedé. ¡Te yúhú titní xito ní cuini-í coto ñaha-í xii-ndo datná quidé nchúxi xito-güedi déhe-güedi sàquíhi-güedi xití ndíxiⁿ-güedi, dico nchòhó ñá túú ní cuini-ndó, te ñu-ni ducaⁿ sàni iní-í ndéé vitna!

³⁸ Te na càchí tnúhu ndáá-í xii-ndo sã sáá nduu te ío ndàhú yáha ñuú-ndó, te vá cùndècu-gá-ndó.

³⁹ Te na càchí tnúhu tucu-í xii-ndo sã vá quini ñáhá-gá-ndó xii-í, dico sáá nduu quini ñáhá tucu-ndo, te dàvá-áⁿ cachí-ndó: “Ío càhnu cuu Yaa ní tendaha Dútú Ndióxi véxiⁿ”, duha cachí-ndó —cachí-gá xàhaⁿ-gá xii-yu.

24

Jèsús càchí-gá sã ngóyó veñúhu (Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sã ío cùnuu, te mei òré ní queheⁿ-gá ichi quíhiⁿ-gá ñiⁿ xichi, te ní sãndehé yatni cue téé xica cuu ndíhi-gá ñiⁿ-gá, te xàhaⁿ-güedé xii-gá:

—Cundehe veñúhu-a ná ío váha ní sáá —cachí-güedé xàhaⁿ-güedé xii-gá.

² Te Jèsús ní xàhaⁿ-gá xii-güedé:

—Na càchí tnúhu ndáá-í xii-ndo sã nchàá sã ndéhe-ndó-á vitna sáá nduu te vá cùnduu-gá-xi datná cáá-xi vitna, chí ní ñiⁿ-gá yúú vá códo nchíhi tnaha-xi chí ndíhi ngoyo —cachí-gá xàhaⁿ-gá xii-güedé.

Nàcuáa cada-xi nduu ta cùyatni naa ñuyúú-a

(Mr. 13:3-23; Lc. 21:7-24; 17:22-24)

³ Te Jèsús ní sáá-gá ndíhi cue téé xica cuu ndíhi-gá yucu Ólívú, te xiáⁿ ní ngóo-gá te núú núcóo-gá-áⁿ ní sáháⁿ cue téé xica cuu ndíhi-gá, te dayuhu ní xàhaⁿ-güedé xii-gá:

—Cuini-ndí cachí tnúhu-n ná nduu dúcaⁿ cada-xi ngoyo veñúhu càhnu sã ío cùnuu, ndíhi nándi cùu sã cáda-xi òré sa ta cùyatni nduu quixi tucu-n ñuyúú-a, ndíhi òré sa ta cùyatni naa-xi —cachí-güedé xàhaⁿ-güedé xii-gá.

⁴ Te Jèsús ní xàhaⁿ-gá xii-güedé:

—Ío quíhi iní-ndó cùndecu-ndo cuèndá sã vá yóo dandàhú ñáhá xii-ndo.

⁵ Chí ío cuèhé cue téé coo ñuyúú, te danàni-güedé méé-güedé datná nani-í, te cachí-güedé: “Yúhú cùú-í Cristú Yaa ní tendaha Yá Ndióxi véxi ñuyúú-a”, duha

cachí-güedé. Te sá dúcáⁿ cǎháⁿ-güedé te ío vai ñáiyu dandáhú-güedé.

⁶ Te níhí-ndó tnúhu nǎá-güedé ndéni ní cuu, dico vá yùhú-ndó chi dacuitíí sǎ dúcáⁿ càda-xi, dico vátá sǎá-gá nduu nǎa ñuyíú òré ducaⁿ càda-xi.

⁷ Chi cue téé íiⁿ nàcióⁿ nǎá-güedé ndihí cue téé ingá nàcióⁿ, te titní ñuú ngüíta-güedé nǎá-güedé, te titní xichi ñuyíú coo tnamá, te titní tucu xichi ñuyíú quixi cuéhé, te titní tucu xichi ñuyíú ío níhí-tnáa.

⁸ Te nchaa xǎáⁿ ío vai ñáiyu tnúndòho sǎ vítná vǎha vǎha quèsaha sǎ cúú-xí cué ñáiyu xǎndecu ñuyíú.

⁹ Te cue ñáiyu na cùu úhú iní ñáhá xii-ndo cuáha cuéndá ñáhá-yu núú cué téé cùchiuⁿ cuendá caniha-güedé xii-ndo, te dava-ndo càhni ñaha-güedé, te nchaa ñáiyu cuu úhú iní ñáhá-yu xii-ndo sǎ cuéndá-í.

¹⁰ Te dǎvá-áⁿ ío vai ñáiyu dǎná-yu sǎ sǎndáá iní-yu Yá Ndióxi, te ngóo-yu cuu úhú iní tnáhá-yu, te cuáha cuéndá tnáhá-yu núú cué téé cùchiuⁿ.

¹¹ Te ío vai cue téé cachí-güedé sǎ cǎháⁿ-güedé tnúhu Yá Ndióxi te ña ndáá sǎ cǎháⁿ-güedé tnúhu-gá, te ducaⁿ ío vai ñáiyu dandáhú-güedé.

¹² Te dǎvá-áⁿ cunuu mèe-ni nchaa sǎ cuéhé sǎ dúhá càdá-yu, te vai-yu vá cúú iní-gá-yu tnàha ñáiyú-yu.

¹³ Dico nchaa ñáiyu na càda ndee-ni iní canchicúⁿ nihnu ñaha-ni xii-í, ñáiyu-áⁿ nanihí tǎhú-yu.

¹⁴ Te nihí ñuyíú quíhíⁿ ñáiyu cǎháⁿ-yu tnúhu vǎha, tnúhu sǎ cǎháⁿ nǎcuáa ndíhu ndaha ñaha Yá Ndióxi xii ñáiyu, te sátá nǎ níhí nchaa ñáiyu tnúhu-áⁿ te naa ñuyíú.

¹⁵ Te ndíí Dániel téé ní xóo cǎháⁿ tnúhu Yá Ndióxi ndéé sanaha ní chídó tnùnì ndíí cuéndá íiⁿ sǎ dáquèe tihú Yá Ndióxi cundecu íiⁿ xichi núú ní cuu íí, te xǎáⁿ cada-xi sǎ vá cùndècu-gá ní íiⁿ ñáiyu xǎáⁿ. Te cada cuéndá vǎha-ndo nǎcuáa ní cǎháⁿ ndíí, chi nduu na quíni-ndó xǎáⁿ cundecu-xi núú dúcáⁿ ní cuu íí,

¹⁶ Te dǎvá-áⁿ nchaa ñáiyu xǎndecu distritú Jùdeá xíní ñùhu-xi cunú-yu quíhíⁿ-yu xití yucu.

¹⁷ Te nchaa ñáiyu ndáa ndódó díquí vehé-xí vá ndíhu-gá-yu vehé-yu quehéⁿ-yu íiⁿ ndachíuⁿ-yu canehé-yu quíhíⁿ.

¹⁸ Te nchaa ñáiyu cuáháⁿ yucu vá nùhú-gá-yu vehé-yu cúnúquehéⁿ-yu dóo-yu.

¹⁹ Te ndáhú ní cuu nchaa ñáiyu díhí ñùhú dèhe-xi, ndihí cue ñáiyu díhí xǎndeca déhe vitna sǎdi na saá nduu dùcaⁿ cada-xi!

²⁰ Te nchòhó, chí cǎcáⁿ tǎhú núú Yá Ndióxi cuéndá sǎ vá dúcáⁿ ndòho-ndo yóo quidé víxiⁿ-xi, te ní vá dúcáⁿ ndòho-ndo nduu cuu-xi nduu ndetatú-ndó.

²¹ Chi dǎvá-áⁿ coo tnúndòho cahnu vihi ñuyíú, te vátá íiⁿ ndùu-gá coo tnúndòho cahnu vihi-áⁿ ndéé cùtnáhá ní ngáva ñuyíú, chi diu-ni dǎvá-áⁿ coo tnúndòho cahnu vihi-áⁿ, te ní núú cuáháⁿ núú véxi vá cóo-gǎ tnúndòho-áⁿ.

²² Te Yá Ndióxi cǎchí-gá sǎ vá ío vai nduu coo tnúndòho cahnu vihi-áⁿ sǎ cuéndá nchaa ñáiyu ní cǎháⁿ-gá cundecu ndihí-gá. Chi núú vai nduu na coo tnúndòho-áⁿ te vá yóo cácu nihnu.

²³ Te núú ío ñáiyu cǎchí-yu xii-ndo: “Chí cùndèhe íha, chí íha ní quexio Cristú Yáá ní tendaha Yá Ndióxi véxi ñuyíú-a”, àdi cachí-yu: “Chí cùndèhe yacáⁿ chí yacáⁿ ndécú-gǎ”, cǎchí-yu ña. Te vá quíndáá iní-ndó tnúhu cǎháⁿ-yu.

²⁴ Chi coo cue téé cachí-güedé sǎ cúú-güedé Yáá ní tendaha Yá Ndióxi véxi ñuyíú-a, te dava-güedé cachí-güedé sǎ cúú-güedé cue téé cǎháⁿ tnúhu Yá Ndióxi dico ña ndáá sǎ cúú-güedé cue téé cǎháⁿ tnúhu-gá, te cada-güedé titní núú sǎ vá yóo tnáhí ndacu cada cuendá dandáhú-güedé ñáiyu. Te caní iní-güedé dandáhú-güedé ndéé cue ñáiyu ní cǎháⁿ Yá Ndióxi cundecu ndihí-gá.

²⁵ Te duha nduu tnúhu cǎháⁿ-í dátùha ñaha-í xii-ndo.

²⁶ Te núú cǎchí-yu xii-ndo: “Xití yucu-áⁿ ní quexio Yáá ní tendaha Yá Ndióxi véxi ñuyíú-a”, cachí-yu. Te vá quíndáá iní-ndó quíhíⁿ-ndó, àdi cachí-yu: “Vehe-áⁿ ndécú Yáá ní tendaha Yá Ndióxi véxi ñuyíú-a”, cǎchí-yu. Te vá quíndáá iní-ndó tnúhu cǎháⁿ-yu.

²⁷ Chi dátǎa xíní nchaa ñáiyu quíde-xi òré sǎá ndúté dǎyehé-xi ní càa xico ñuyíú ducaⁿ càda-xi òré quixi tucu yùhú Téé cùu ñaní tnáhá-ndó nchàa-ndo chí nchaa-yu quíni ñáhá-yu xii-í.

²⁸ Te nchòhó xíní-ndó sǎ ncháá núú yúcu yíqui cuñú ní xíhí te yacáⁿ tàcǎ nchaa ndixíí xéxi-güedé.

Nǎcuáa cada-xi òré quixi tucu Téé cùu ñaní tnáhá cué ñáiyu

(Mr. 13:24-37; Lc. 21:25-33; 17:26-30, 34-36)

²⁹ Te na yǎha-ni coo tnúndòho cahnu vihi-áⁿ, te vá dǎyehé-gá nchícanchíi, te ní vá dǎyehé-gá yóo, te ngoyo nchaa chódíní ndéé andíu, te quídi-xi andíu

³⁰ nǎcuáa cutnùnì iní ñáiyu sǎ sǎ véxi yùhú Téé cùu ñaní tnáhá-yu nchaa-yu. Te cue ñáiyu nihí ñuyíú ndǎhyú-yu sǎ ndíhú iní-yu òré ducaⁿ càda-xi, te nchaa-yu quíni ñáhá-yu xii-í quee-í andíu quixi-í ichí xití vícò, te quíni-yu sǎ ío càhnu cuu-í, te quíde-í nchaa sǎ vǎha.

³¹ Te tauchiu-í cue espiritú xínú cuèchi núú-í níhi tiú-xi cútú nadatácá-xi nchaa ñáiyu ní cáhá-í chitnahá ñáhá xii-í xíndecu ní cãa xico ñuyú.

³² Te nchòhò sa xini-ndó nàcuáa quide yutnu ngúxi, chi yutnu-án ndúú yùte núú dìtè-xi te nàtáhu ndaha-xi. Te òré duca^a quide-xi te cãchí-ndó sã sã ní cuyatni nuu cahni.

³³ Te ñu-ñi duca^a sãtnahá-xi cada-xi ñuyú-a òré ná quini-ndó càda-xi nchaa nacuáa ní cáhá-í, te cutnùni iní-ndó sã sã ní cuyatni vii-nã nduu nãa ñuyú.

³⁴ Te na cãchí tnúhu ndáá-í xii-ndo sã òré vátá cútú-gã nchaa ñáiyu xíndecu ñuyú-a vitna, te cada-xi nchaa nàcuáa ní cáhá-í.

³⁵ Te andiu ndihi ñuyú-a chi ndihi ni-hnu-xi, dico tnúhu-í chi vá ndíhi nihnu-xi chi cùu-xi tnúhu ndáá cuiti.

³⁶ Dico ñá túú cùtnuní ná nduu quixi tucu-í, te ni ñá túú cùtnuní ná òré chi vá yõo xini, te ni cuè espiritú xínú cuèchi núú Yá Ndióxi ñá túú xini-xi ná nduu quixi-í, te ni mee yúhú Té cùu Déhu Dútú Ndióxi ñá túú xini-í ná nduu quixi tucu-í, chi ñndi dí-ñi mee-gã xini-gã núu ná nduu quixi-í.

³⁷ Te nduu na quixi tucu yúhú Té cùu ñani tnáhá-ndó nchãa-ndo ñuyú-a te cada-xi dátã ní quide-xi cùtnahá ní xíndecu ndi Nõé.

³⁸ Chi nchaa ñáiyu ní xíndecu dàvã-án òré vátá ndáá-gã ndute ñuyú, te xèxi-yu xihí-yu quidé-yu, te davá-yu ió-yu vico tnãndaha, te davá-yu dásã-yu déhe yócó-yu candeca ñaha té, te duca^a-ni xiquidé-yu ndéé ní sáá nduu cuãnguee té Nõé xiti bãrcú.

³⁹ Te ñá túú ní cùtnuní iní-yu nàcuáa cada-xi ñuyú ndéé ní sáá nduu ní ngúita-xi ní cuu^a dáú ní ndaa ndute ñuyú ní dánáá ñaha-xi xii-yu. Te ñu-ñi duca^a sãtnahá tucu-xi cada-xi nduu na quixi tucu yúhú Té cùu ñani tnáhã-yu nchãã-yu ñuyú-a, chi nduu ñá túú ná yíhi iní-yu te quixi tucu-í.

⁴⁰ Te dàvã-án núu úú tnáhá cue té yíhi-güedé xiti yucu, te ñndé ndanchita te ñndé quendó.

⁴¹ Adi úú ñáiyu ñihi nchicó-yu ñndé ni vèhe, te ñndé-yu ndanchita te ñndé-yu quendó.

⁴² Te duha nduu tnúhu càhá-í cuendá nchòhò cundecu túha-ndo, chi ñá túú xini-ndó ná òré quixi tucu yúhú Yáá cùú Xitohó-ndó.

⁴³ Te nchòhò xini-ndó sã núu ñndé cùu xitohó vehe xini-dé ná òré cùú-xi niú quíhu ñadúhu vehe-dé duhu-güedé, te quíhi iní-dé cundecu-dé cuendá sã vá dãnã-dé quíhu ñadúhu-án vehe-dé duhu-güedé, dico ñá túú xini-dé.

⁴⁴ Te duha càhá-í chi nchòhò xini ñndé-yu cundecu túha-ndo, chi na cuáhã^a òré ñá túú

ná yíhi iní-ndó quèxio yúhú Té cùu ñani tnáhã-ndó nchãa-ndo.

*Cuendá ñndé xinu cuechi
(Lc. 12:41-48)*

⁴⁵ Te na cãni-í ñndé cuendú núú-ndó. ñndé té xinu cuechi núú ñndé patróó^a cùú-dé ñndé té io váha təcú tnùni, te quide ndáá-dé ndécú-dé. Te ñndé xito ní dãndõ ndaha ñaha patróó^a-dé xii-dé nchaa cue ñáiyu ndécú vehe-dé cuendá coto ñaha-dé xii-yu cuãñaha-dé sã cãxi-yu òré táu-xi cãxi-yu, te té cùu patróó^a-án ní quee-dé cuáhã^a-dé.

⁴⁶ Te váha táhú té xinu cuechi-án te núu ndécú-dé quidé-dé nchaa nàcuáa ní xãhá^a patróó^a-dé cada-dé mei òré ní nasáá patróó^a-dé-án.

⁴⁷ Te na cãchí tnúhu ndáá-í xii-ndo sã té cùu patróó^a-dé-án cùñaha-dé xii-dé sã quíndaha-dé nchaa sã ndécú ndihi-dé.

⁴⁸ Dico núu té xinu cuechi-án ní cùu-dé ñndé té cuíhna iní-xi, te ngúo-dé caní iní-dé sã cùyãa patróó^a-dé vá nasáá ndihi-dé.

⁴⁹ Te ngúita-dé caní-dé nchaa dava-gã cue ñáiyu xinu cuechi ndihi-dé, te ngúo-dé cãxi-dé coho-dé cada-dé ndihi nchaa cue té quíhu.

⁵⁰ Te ñndé nduu òré ñá túú yíhi iní-dé nasáá patróó^a-dé,

⁵¹ te io dandõho ñaha patróó^a-dé xii-dé, chi daquíhi^a ñáhã-dé xii-dé núu xíndecu cue ñáiyu ní cãchí sã ní quide ndáá te ñá ndãá sã ní quide ndáá-yu. Te duca^a sãtnahá-xi dandõho ñaha Yá Ndióxi xii ñáiyu, chi daquíhi^a ñáhã-gã xii-yu ñndé xichi núú io ndohó-yu te yãcã^a io ndáhyú-yu, te dicó rúhñú-nã cuu núhu-yu sã sãtú iní-yu sã ndóhó-yu —cãchí-gã xãhá^a-gã xii-güedé.

25

Cuendá úxi ñáiyu ñihi

¹ Te xãhá^a tucu Jesús xii-güedé:

—Na cãni-í ñndé cuendú núú-ndó nàcuáa tecú tnùni-ndó nàcuáa cada-xi òré ndíhu ndaha ñaha Yá Ndióxi xii ñáiyu. Te úxi tnáhã ñáiyu ñihi ñáiyu cuechi ní quehé^a-yu linternã-yu, te cuáhã^a-yu ñndé xichi núú cóo vico tnãndaha cuendá cundeté-yu quexio té tnãndaha.

² Te úhú^a ñáiyu cuechi-án io váha cùtnuní iní-yu, te úhú^a-yu ñáhã.

³ Te ndi úhú^a ñáiyu cuechi dũca^a ñá túú cùtnuní iní-xi-án ñá túú ní cãnehé-yu sã ndéé linternã-yu.

⁴ Dico ndi úhú^a ñáiyu cuechi cùtnuní iní-xi-án nêhé-yu sã ndéé linternã-yu.

⁵ Te té tnãndaha-án cùyãa-dé quexio-dé núu ndétú ñáhã-yu-án, te ñndé dũca^a cuyãa-dé ní tñi ñaha sãni xii-yu ní xidi-yu.

⁶ Te cùu-xi datná dava niú níhi ní cáhá^a dava-gã ñáiyu, te cãchí-yu: “Sa véxi

tée tnándaha, chí táquèe quehé queheⁿ cuendá-ndó-dé", cächí-yu.

⁷ Te ndi ùxi ñáyiⁿ cuechi-áⁿ ní ndacóo-yu quide túha-yu lintéⁿá-yu.

⁸ Te ndi ùhúⁿ ñáyiⁿ cuechi ñà túú cùtnuní iní-xi-áⁿ ní xáháⁿ-yu xii cue ndi ùhúⁿ ñáyiⁿ cùtnuní iní-xi-áⁿ: "Chí táxi nùu luha sá ndèe lintéⁿá-ndó ná ndèe lintéⁿá-ndí chí ñà cuíní-xi cáyú mee-ni ndáhvá", cächí-yu xáháⁿ-yu.

⁹ Te cue ñáyiⁿ cuechi cùtnuní iní-xi-áⁿ ní xáháⁿ-yu: "Vá táxi nùu-ndí chí vá tnahá canehe chiⁿ mee-ndí, te váha-gá chí cuaháⁿ cuaaⁿ-ndo núu cue ñáyiⁿ xídícó cuendá sá vá cùmání xii-ndo, te vá cùmání xii nchúhú tucu", cächí-yu xáháⁿ-yu.

¹⁰ Te nini cuaháⁿ ndi ùhúⁿ ñáyiⁿ ducaⁿ ñà túú cùtnuní iní-xi-áⁿ cuanguaaⁿ-yu sá ndèe lintéⁿá-yu ní quexio tée tnándaha. Te ndi ùhúⁿ ñáyiⁿ cuechi cùtnuní iní-xi-áⁿ ní queheⁿ cuendá ñáhá-yu xii-dé, te cuánguihu ndihi ñáhá-yu xii-dé núu cóo víco tnándaha, te sátá dúcáⁿ te ní nandedí yuyèe.

¹¹ Te òré ní nasáá cue ñáyiⁿ cuechi ñáyiⁿ ní ságuaaⁿ sá ndèe lintéⁿá-xi-áⁿ, te ní nguíta-yu càhàⁿ-yu xintutíⁿ-yu ndaa sátá yuyèe ndaa quehé, te xáháⁿ-yu xii tée tnándaha-áⁿ: "¡Táta, nacaáⁿ yuyèe na quíhu-ndí!", cächí-yu xáháⁿ-yu xii-dé.

¹² Te tée tnándaha-áⁿ ní xáháⁿ-dè xii-yu: "Na cächí tnúhu ndáá-í xii-ndo sá nchòhó ñà túú tàhú-ndó quíhu-ndo víco-a, chí ñà túú tnahá tnúhu ndihi ñaha-ndo xii-í", cächí-dé xáháⁿ-dè xii-yu —cächí Jèsús xáháⁿ-gá xii-güedé.

¹³ Te xáháⁿ tucu Jèsús xii-güedé:

—Ío quíhi iní-ndó cùndecu-ndo, chí ñà túú xini-ndó ná nduu, te ni ñà túú xini-ndó ná òré quixi tucu yúhú Tée cùu ñani tnáhá-ndó nchaa-ndo —cächí-gá xáháⁿ-gá xii-güedé.

Cuendá cue tée ní ndóo ndaha díhúⁿ
(Lc. 19:11-27)

¹⁴ Te xáháⁿ tucu Jèsús xii-güedé:

—Na càni tucu-í ingá cuendú núu-ndó nàcuáa tecú tnúni-ndó nàcuáa cada-xi òré ndíhu ndaha ñaha Yá Ndióxi xii ñáyiⁿ. ñⁿ tée sa ñuhu ichi-ná-dé sá cacá-dé quíngaca cuu xica-xi, te ní cana-dé cue tée xinu cuechi núu-dé cuendá dándóo ndaha ñaha-dé díhúⁿ-dè xii-güedé.

¹⁵ Te nàcuáa nduu chiⁿ quide ñⁿ ñⁿ-güedé te ducaⁿ díhúⁿ ní sáñaha-dè xii-güedé, te ñⁿ-dè ní sáñaha-dè ùhúⁿ tnahá díhúⁿ sá ío yahu ñani talentú, te ingá-dé ní sáñaha-dè úú tnahá díhúⁿ-áⁿ, te ingá-dé ní sáñaha-dè díhúⁿ-áⁿ, te dátñuní ní quee-dé cuaháⁿ-dè.

¹⁶ Te tée ní queheⁿ cuendá ùhúⁿ tnahá díhúⁿ sá ñani talentú ní quide-dé ndáhú ndihi-xi te ní níhí tucu-dé ùhúⁿ-gá tucu tnahá díhúⁿ-áⁿ.

¹⁷ Te ñⁿ-ni ducaⁿ ní quide tucu tée ní níhí úú díhúⁿ sá ñani talentú-áⁿ, chí ní quide-dé ndáhú te ní níhí tucu-dé úú-gá tucu tnahá.

¹⁸ Dico tée ní níhí ñⁿ-ni díhúⁿ-áⁿ chí da ní chiváha-dé díhúⁿ patróoⁿ-dè, chí ní xete-dé ñⁿ yáú te ní chindúxi-dé.

¹⁹ Te ní ní quèhé nduu sá ní quee patróoⁿ-güedé-áⁿ ní sángaca cuu-dé, te ní nasáá-dé te ní nguíta-dé quidé ndáá-dé ndihi-güedé cuendá díhúⁿ sá ní dándóo ndaha ñaha-dé xii-güedé.

²⁰ Te tée ní quendóo ndaha ùhúⁿ tnahá díhúⁿ-áⁿ ní xáháⁿ-dè xii patróoⁿ-dè: "Patróoⁿ, náú ùhúⁿ tnahá díhúⁿ sá ní dándóo ndaha ñaha-n xii-í-a, te ní sáháⁿ-í ní quide-índihi-xi ndáhú te ní chidó-xí ùhúⁿ-gá tucu tnahá, te náú-a naqueheⁿ cuendá-n", cächí-dé xáháⁿ-dè xii patróoⁿ-dè.

²¹ Te tée cùu patróoⁿ-dè-áⁿ ní xáháⁿ-dè xii-dé: "Ío váha ní quide-n, te vitna quide ñaha-í xii-n ñⁿ tée váha tée quide ndáá, te sá sácú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gá taxi cuendá ñáhá-í xii-n. Te vitna cuu cundecu-n núu ndécú-í, te ío cudíí iní-ó cùndecu ndihi tnaha-o", cächí tée cùu patróoⁿ-dè-áⁿ xáháⁿ-dè xii-dé.

²² Te sátá dúcáⁿ te tée ní quendóo ndaha úú tnahá díhúⁿ sá ñani talentú-áⁿ ní xáháⁿ-dè xii patróoⁿ-güedé: "Patróoⁿ, náú úú tnahá díhúⁿ sá ní dándóo ndaha ñaha-n-a, te ní sáháⁿ-í ní quide-í ndihi-xi ndáhú, te ní chidó-xí úú-gá tucu tnahá, te náú-a naqueheⁿ cuendá-n", cächí-dé xáháⁿ-dè xii patróoⁿ-güedé.

²³ Te ní xáháⁿ tée cùu patróoⁿ-áⁿ xii-dé: "Ío váha ní quide-n, te vitna quide ñaha-í xii-n ñⁿ tée váha tée quide ndáá, te sá sácú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gá taxi cuendá-í. Te vitna cuu cundecu-n núu ndécú-í, te ío cudíí iní-ó cùndecu ndihi tnaha-o", cächí tée cùu patróoⁿ-áⁿ xáháⁿ-dè xii-dé.

²⁴ Te tée ní ndóo ndaha ñⁿ-ni díhúⁿ-áⁿ ní xáháⁿ-dè xii tée cùu patróoⁿ-dè-áⁿ: "Patróoⁿ, yúhú sa ñaha-í sá yòhó cùú-n ñⁿ tée ndùcu mee-ni sá cùú-xí mèe-xi te tàhu-n chiⁿ cuaháⁿ nchúhú cue tée xinu cuechi núu-n sàcáⁿ-ndí triú, te òré ná nàtaxi tnaha-ndí, te yòhó dicó-ná náqueheⁿ cuendá-n tàxúha-n.

²⁵ Te núu xiáⁿ ní yùhú-í cada-í ndáhú ndihi díhúⁿ-n, te ní sáháⁿ-í ní xete-í ñⁿ yáú te ní chindúxi-í, te náú díhúⁿ-n-áⁿ naqueheⁿ cuendá-n", cächí-dé xáháⁿ-dè xii tée cùu patróoⁿ-áⁿ.

²⁶ Te tée cùu patróoⁿ-áⁿ ní xáháⁿ-dè: "Yòhó cùú-n ñⁿ tée cuíhna iní-xi xinu cuechi núu-í te cuhndu-n, te núu yòhó sání iní-n sá cùú-í ñⁿ tée tàuchiuⁿ cuaháⁿ-ndó sàcáⁿ-ndó triú

te òrè nàtàxi tñaha-ndo, te yúhú dicó-ná náquèheⁿ cuendá-í nàtàxúha-í.

²⁷ Te núu sàni iní-n sã dúcáⁿ quide-í, te dasaⁿ núu-n díhúⁿ-í te cúñaha-n chãhu-yu díquí-xi ní cùu, te òrè ndexio-í te sa ngódó lùha-gá díquí-xi naqueheⁿ-í ní cùu, cachí-dé xãhaⁿ-dè xii téé xinu cuechi-áⁿ.

²⁸ Te téé cùu patróóⁿ-áⁿ ní xãhaⁿ-dè xii dava-gá cue téé ndècu ndihi-dé: “Chí quèndèé ìⁿ díhúⁿ sã nání tàlentú nèhé téé-áⁿ, te cuãha-ndo téé nèhe úxí tñáhá ñiu-ní díhúⁿ-áⁿ.”

²⁹ Chí cue téé sa ndècu ndihi te níhí-gã-güedé cundecu ndihi-güedé, te ní vã níhí-gã-güedé ndèc cundecu nchaa sã cündècu ndihi-güedé. Te cue téé ñá túú nã ndécú ndihi vai, te nchaa sã ndécú ndihi-güedé vã cündècu ndihi-gã-güedé.

³⁰ Te téé xinu cuechi ñá túú vèdana nãndíhí-áⁿ, chí tñáí-dé te daquihíⁿ-ndó-dé ìⁿ xichi núú nées núú ïo ndoho-dé, te yácáⁿ ndáhyú-dé, te dicó rúhñú-nã cuu núhu-dé sã satú iní-dé sã ndóhó-dé”, cachí téé cùu patróóⁿ-áⁿ xãhaⁿ-dè xii-güedé. Duha sãtnahá-xi ndoho nchaa ñáiyu ñá túú quide váha –cachí-gã xãhaⁿ-gã xii-güedé.

Cuendá cue ñáiyu ní quide váha ndihi cuendá cue ñáiyu ñá túú ní quide váha

³¹ Te xãhaⁿ tucu Jesús xii-güedé:

–Te nduu na quixi tucu yúhú Téé cùu ñaní tñáhá-ndó nchãa-ndo, te quixi-í ndihi nchaa cue espíritú xínú cuèchi núú-í, te nchaa ñáiyu quini-yu sã ïo càhnu cuu-í, te dàvã-áⁿ cunucó-í núú táxi tñuní-í, te ïo cuñuhu ñáiyu sã ïo càhnu cuu-í.

³² Te dàvã-áⁿ natacã nchaa ñáiyu xñdecu ní cãa xico ñuyú cundecú-yu núú-í, te cada-í-yu dàtnã quidé ìⁿ toli oré táu ñáí-dé nchaa mbéé ndihi nchaa chivã chí ñáí taxi ndecu-dé nchaa mbéé, te ñáí taxi ndecu-dé nchaa chivã.

³³ Te ducaⁿ sãtnahá-xi cada-í chí nchaa ñáiyu ní quide ndáá núú-í ñáiyu-áⁿ taxi ndecu-í-yu xio cùha-í, te nchaa ñáiyu cuihna iní-xi ñá túú ní cuini cada ndáá núú-í ñáiyu-áⁿ taxi ndecu-í-yu xio dàtni-í.

³⁴ Te ducaⁿ te yúhú téé ïo cùnuu cúñaha-í xii ñáiyu na cündecu xio cùha-í: “Nchaa nchòhó ñáiyu ní quide váha ñaha Tãtà-í Dútú Ndíoxí, chí nèhé chí vitna ní sãá nduu cündecu-ndo núú ndécú-gã táxi tñuní-gã, chí ndéé cútñáhá ní ngáva ñuyú sã ndècu túha tñáhí núú ndécú-gã-áⁿ sã nchòhó nduu táhú-ndó cündecu-ndo.

³⁵ Te ducaⁿ chí òrè xihí-í docó te ní taxi-ndo sã ní xexi-í, te òrè yichí-í ndute te ní taxi-ndo ndüte ní xihí-í, te òrè ñúhú-í ichi te ní taxi-ndo vèhe ní ndetatú-í.

³⁶ Te òrè xíní ñúhu-í dóó cuihnu-í te ní taxi-ndo, te òrè ní cuhú-í te ní quixi coto

ñaha-ndo xii-í, te òrè ní xihí-í vècaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáiyu-áⁿ.

³⁷ Te nchaa ñáiyu ducaⁿ ní quide ndáá-áⁿ cùñáhã-yu xii-í: “Yòhó Yáá cùú Xitohó-ndí, ní ìⁿ xito ñá túú ní tàxi-ndí sã cáxi-n òrè xihí-n dòcò, te ní ìⁿ xito ñá túú ní tàxi-ndí ndute coho-n òrè yichí-n.

³⁸ Te ní ñá túú ní tàxi-ndí vehe ndetatú-n òrè ñúhú-n ichi, te ní ñá túú ní tàxi-ndí dóó cuihnu-n òrè xíní ñúhu-n.

³⁹ Te ní ñá túú ní quixi coto ñaha-ndí xii-n òrè ní cuhú-n, te ní ñá túú ní quixi coto ñaha-ndí xii-n òrè ní xihí-n vècaá”, duha quesáhã-yu cúñáhã-yu xii-í.

⁴⁰ Te yúhú téé cùnuu cúñaha-í xii-yu: “Na càchí tñuhu ndáá-í xii-ndo sã nchãá sã váha ní quide-ndo sã cùú-xí nchãa ñáiyu xñdecu ichi-í cuèi ïo ndàhú xindãa-yu, te sã dúcãⁿ ní quide-ndo sã váha sã cùú-xí-yu, te cada iní-ndó sã mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

⁴¹ Te dàtnuni cúñaha-í xii ñáiyu na cündecu xio datni-í: “Nchaa nchòhó ñáiyu ní xita ni-hnu chí xócuiñí núú ndécú-í-a, chí nchòhó ní nduu táhú-ndó cündecu-ndo núú ñúhú núú càyú, ñiu-ni núú ní quide túhá-í cundecu sãcúíhã ndihi nchaa espíritú cündíhí-xi, te yácãⁿ cundecu-ndo ní caa ní quihíⁿ.”

⁴² Chí yúhú òrè xihí-í docó te ñá túú ní tàxi-ndo sã cáxi-í, te ní òrè yichí-í ndute te ñá túú ní tàxi-ndo ndute coho-í.

⁴³ Te ní òrè ní xúhu-í ichi ñá túú ní tàxi-ndo vehe ndetatú-í, te ní òrè xíní ñúhu-í dóó cuihnu-í te ñá túú ní tàxi-ndo, te ní òrè ní cuhú-í te ñá túú ní quixi-ndo quixi coto ñaha-ndo xii-í, te ní òrè ní xihí-í vècaá te ñá túú ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu.

⁴⁴ Te ñáiyu-áⁿ cùñáhã-yu xii-í: “Yòhó Yáá cùú Xitohó-ndí ní ìⁿ xito ñá túú ní xini-ndí òrè xihí-n dòcò cuendá taxi-ndí sã cáxi-n, te ní ìⁿ xito ñá túú ní xini-ndí òrè yichí-n ndüte cuendá taxi-ndí ndute coho-n, te ní ìⁿ xito ñá túú ní xini-ndí cuhnu-n ichi cuendá taxi-ndí vehe ndetatú-n, te ní ìⁿ xito ñá túú ní xini-ndí òrè xíní ñúhu-n dóó cuendá taxi-ndí dóó cuihnu-n, te ní ìⁿ xito ñá túú ní xini-ndí òrè cùhú-n cuendá quixi coto ñaha-ndí xii-n, te ní ìⁿ xito ñá túú ní xini-ndí quihí-n vècaá cuendá quixi coto ñaha-ndí xii-n”, duha quesáhã-yu cúñáhã-yu xii-í.

⁴⁵ Te yúhú cúñaha-í xii-yu: “Na càchí tñuhu ndáá-í xii-ndo sã sã cuendá sã ñá túú ní quide-ndo ìⁿ sã váha sã cùú-xí cuè ñáiyu ndècu ichi-í cuèi ïo ndàhú xindãa-yu, te sã dúcãⁿ ní quide-ndo ñá túú ní quide-ndo sã váha sã cùú-xí-yu, te cada iní-ndó sã mèe-í

ducaⁿ nĩ quide-ndo ñà túú ní quide-ndo sá vâha sá cúú-xi-í", duha cúñaha-í xii-yu.

⁴⁶ Te nchaa ñâyiu-áⁿ quíhíⁿ-yu núú ùhú núú ndâhú ni caa ni quíhíⁿ. Te nchaa ñâyiu ní quide ndáá núú-í ní xindecu ñuyúú-a, ñâyiu-áⁿ nduu táhú-yu ío váha cundecú-yu ní caa ni quíhíⁿ –câchí-gá xâhaⁿ-gá xii-güedé.

26

Cue tée cùu úhú iní ñáhá xii Jesús ndúú-güedé nâcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sáta ní yáha ducaⁿ nĩ cáháⁿ Jèsús, te ní xâhaⁿ-gá xii cue tée xica cuu ndihí-gá:

² –Nchòhò sa xini-ndó sá cùmání úú-gá nduu te coo vico pascuá, te cächí tnúhu-í xii-ndo sá yúhú Tée cùu ñaní tnáhá-ndó nchâa-ndo tñi ñaha-güedé xii-í, te cuáha cuendá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-áⁿ cuú-í –cächí-gá xâhaⁿ-gá xii-güedé.

³ Te ñi-ni òré cáháⁿ ndihí Jèsús cue tée xica cuu ndihí-gá ní natacá cue tée cùu dútú cúnúu, ndihí cue tée dàcuaha ñaha xii ñâyiu nchaa tnúhu ní chídó tñuní ndíi Moisés, ndihí cue tée cùu sacuéhé núú ñâyiu isràél. Te mei quèhé vehe núú cúú vèchiuⁿ té Caifás tée cùu dútú ío-gá cúnúu ní natacá-güedé.

⁴ Te xiáⁿ ní ndatnúhu-güedé nâcuáa cada-güedé dandáhú-güedé Jesús cuendá tñi ñaha-güedé xii-gá, te cahní ñaha-güedé.

⁵ Te ní xitnáha-güedé:

–Váha-gá sá vá tñi-ó Jèsús mei nduu vico, chí núú ducaⁿ na cada-o te ío dusaⁿ cada ñâyiu –cächí-güedé xitnáha-güedé.

Íⁿ ñadìhí chíhí-áⁿ àcítí díquíⁿ Jesús

(Mr. 14:3-9; Jn. 12:1-8)

⁶ Te ndècu Jesús ñuú Bètaniá vehe ñiⁿ tée nani Xímú, tée ní tnahá cuèhé sá dátèhyú nihnu-xi yiqui cùñú-ó.

⁷ Te xiáⁿ ndécú-gá ní quexio ñiⁿ ñadìhí néhé-áⁿ ñiⁿ sá ní cuáha yúú vâha nani alabasturú, te xití xiáⁿ ñúhú àcítí sáháⁿ tnámí sá ío ndèyáhu. Te yíhí Jesús mèsá xéxi-gá, te ñaha-áⁿ ní sáháⁿ-aⁿ ní sódó-aⁿ àcítí ñúhú xití xiáⁿ díquí-gá.

⁸ Te òré ní xini cue tée xica cuu ndihí Jesús sá ducáⁿ ní quide ñaha-áⁿ te ní cudééⁿ-güedé, te ní ngúíta-güedé xitnáha-güedé:

–Ñá túú quide váha ñaha-áⁿ dàcáⁿ quidé-áⁿ dacuíta-aⁿ acítí-áⁿ.

⁹ Chí váha-gá núú cuyáhu acítí-áⁿ ní cùu chí ío ndèyáhu, te díhúⁿ cuyáhu acítí-áⁿ cuu cuendá cue ñâyiu ndáhú ní cùu –cachí-güedé xitnáha-güedé.

¹⁰ Te Jèsús ní cutnùní iní-gá nâcuáa nduu tnúhu xitnáha-güedé, núú ní xâhaⁿ-gá xii-güedé:

–Vá dásatú-ndó iní ñadìhí-a, chí sá ní quide ñaha-aⁿ xii-í cúú-xi ñiⁿ sá vâha.

¹¹ Chí cue ñâyiu ndáhú ducaⁿ-ni cutnahá ñâyiu-áⁿ tnuú-ndó, dico yúhú chí vá ncháá nduu cundecu ndihí ñaha-í xii-ndo ñuyúú-a.

¹² Te sá dúhá ní quide ñaha ñadìhí-a xii-í ní sódó-aⁿ àcítí díquí-í, te xiáⁿ cada iní-ndó sá sá quide túha-aⁿ yiqui cùñú-í cuendá ngúndúxi-xi.

¹³ Te na cächí tnúhu ndáá-í xii-ndo sá ndèni ní cuu nihí ñuyúú ná cáháⁿ ñâyiu tnúhu-í, te cáháⁿ-yu tnáhá cuendá ñadìhí-a cuendá quini nchaa ñâyiu nâcuáa ní quide-aⁿ te ducaⁿ vá nâcuánaa-yu –cächí-gá xâhaⁿ-gá xii-güedé.

Té Jüdás ndúú-dé nâcuáa cada-dé cuáha cuendá-dé Jesús núú cuè tée cùu úhú iní ñáhá xii-gá

(Mr. 14:10-11; Lc. 22:3-6)

¹⁴ Te sáta ducáⁿ te té Jüdás Iscarioté ní sáháⁿ-dé ní ndatnúhu-dé ndihí cue tée cùu dútú cúnúu. Te núú tnáhá té Jüdás-áⁿ cúú ùxúú cue tée xica cuu ndihí Jesús.

¹⁵ Te ní xâhaⁿ-dé xii cue tée cùu dútú cúnúu-áⁿ:

–¿Ndèdau cháhu ñaha-ndo xii-í te taxi cuendá-í Jesús xii-ndo-í? –cächí-dé xâhaⁿ-dé xii-güedé.

Te cue dútú-áⁿ ní xâhaⁿ-güedé xii-dé sá cuáñaha-güedé ócú úxí díhúⁿ cuixíⁿ, te ñi-ni ducaⁿ ní sáñaha-güedé xii-dé.

¹⁶ Te ndéé òré ní queheⁿ cuendá té Jüdás-áⁿ díhúⁿ, te ní ngúíta-dé ndúú-dé nâcuáa cada-dé cuáha cuendá-dé Jesús núú-güedé.

Cùdini Jesús ndihí cue tée xica cuu ndihí-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Te ní sáá nduu ní quesaha vico xexi ñâyiu pàá sá ñà túú yíhí levadurá ñi-ni vico pascuá, te ní tée xica cuu ndihí Jesús ní sândehe yatni-güedé díñi-gá, te xâhaⁿ-güedé xii-gá:

–Mèstrú, véxi-ndí xicáⁿ tnúhú-ndí núú-n núú ndèe cùiní-n cada túha-ndí cuendá cudíni-o sacuaa nduu vico pascuá –cächí-güedé xâhaⁿ-güedé xii-gá.

¹⁸ Te Jesús ní xâhaⁿ-gá xii-güedé:

–Chí cuáháⁿ xití ñuú-áⁿ, te yàcáⁿ naníhí-ndó ñiⁿ tée cutmuní iní-ndó sá sá xini ñáhá-dé xii-o, te cúñaha-ndo xii-dé: “Yáá cúú Mèstrú cächí-gá sá sá ní cuyatni nduu vá cùndecu-gá ñuyúú-a, te vehe-n cùiní-gá cada-gá vico pascuá ndihí cue tée xica cuu ndihí-gá”, duha cúñaha-ndo xii tée-áⁿ –cächí-gá xâhaⁿ-gá xii-güedé.

19 Te cue tée xica cuu ndihi-gá-án nĩ xica-güedé cuáhán-güedé, te ní quide-güedé nàcuáa ní xáha-gá xii-güedé, te ní quide túha-güedé sá cudini-güedé ndihi-gá sacuaa nduu víco pascuá-án.

20 Te órè sa ní cundiquiⁿ te cuánguihu Jèsús ndihi ndi ùxúú cue tée xica cuu ndihi-gá mèsá cuendá cudini-gá ndihi-güedé.

21 Te nini xèxi-gá ndihi-güedé ní xáha-gá xii-güedé:

—Na càchí tnúhu ndáá-í xii-ndo sá díú ìⁿ nchohó cue tée xica cuu ndihi-í cuáha cuendá ñáhá-ndó xii-í núú cuè tée cùu úhú iní ñáhá —càchí-gá xáha-gá xii-güedé.

22 Te sá dúcáⁿ ní xáha-gá xii-güedé te nchaa-güedé ní nguíta-güedé cündiyí-güedé, te da ìⁿ da ìⁿ-güedé ní nguíta-güedé xáha-güedé xii-gá:

—Mèstrú, ¿ñá díú yùhú ducaⁿ sàni iní-n cada-í-u? —càchí-güedé xáha-güedé xii-gá.

23 Te ní xáha-gá xii-güedé:

—Tée nacaxi ndihi-í ìⁿ-ni cóhó caxi-ndí, tée-án cuáha cuendá ñáhá-dé xii-í núú cuè tée cùu úhú iní ñáhá.

24 Te yúhú Tée cùu ñani tnáhá-ndó nchaa-ndo ñuhu ichi-í cuáhán-í yáha-í nàcuáa càhán-xi núú tütú Yá Ndióxi, dico ndàhú ní cuu tée ducaⁿ na cuáha cuendá ñáhá xii-í núú cuè tée cùu úhú iní ñáhá, chi váha-gá sá vá cáci tée-án cundecu-dé ní cùu, te ñá díú sá nĩ cacu-dé te ducaⁿ càda-dé —càchí-gá xáha-gá xii-güedé.

25 Te sátá dúcáⁿ te ní càhánⁿ té Jüdás tée cuáha cuendá ñáhá xii-gá, te xáha-gá-dé:

—Mèstrú, ¿te náa sàni iní-n sá yùhú cuáha cuendá ñáhá-í xii-n núú cuè tée cùu úhú iní ñáhá xii-n-án? —càchí-dé xáha-gá-dé xii-gá.

Te Jèsús ní xáha-gá xii-dé:

—Diu-n —càchí-gá xáha-gá xii-dé.

26 Te nini cudini cue tée xica cuu ndihi Jèsús ní queheⁿ-gá pàa, te ní ndacáⁿ táhú-gá núú Yá Ndióxi, te dàtnùni ní táhú cuèchi-gá te ní nguíta-gá dácàhñu-gá cue tée xica cuu ndihi-gá-án, te xáha-gá xii-güedé:

—Chí quéhéⁿ pàa-a caxi-ndo, te cada iní-ndó sá yiqui cuñú-í cúú-xí —càchí-gá xáha-gá xii-güedé.

27 Te ní queheⁿ-gá vàsú ñùhú ndudí ndéhé yoha yàha stilé, te ní ndacáⁿ táhú-gá núú Yá Ndióxi, te dàtnùni ní nguíta-gá sàñaha-gá xii-güedé cuendá coho-güedé luha luha sá ñùhú xití-xi, te xáha-gá xii-güedé:

—Chí cóhó nchaa nchohó ndudí ndéhé yoha yàha stilé ñùhú xití vàsú-a.

28 Te cada iní-ndó sá cúú-xí dàtná ñíñi-í sá catí órè cahni ñaha-güedé xii-í, te sá dúcáⁿ cati ñíñi-í xiáⁿ cutnùni ndáá sá Yá Ndióxi cada-gá ingá núú sá váha sá cúú-xí vai ñáyiú dàtná ní cachí-gá cada-gá, te ío vai ñáyiú cada càhnu iní-gá cuèchi-yu.

29 Te na càchí tnúhu-í xii-ndo sá vítná-ná duha xihhi ndihi ñaha-í xii-ndo ndudí ndéhé yoha yàha stilé-a, te vá cóhó ndihi ñaha-gá-í xii-ndo, dico na sàa nduu nànihí tnáhá-ó núú ndécú Tàtà-í Dútú Ndióxi táxi tnùni-gá te dàvá-án cada iní-ndó sá dàtná sá cóhó ndihi ñaha tucu-í xii-ndo chi ío cudí iní-ó —càchí-gá xáha-gá xii-güedé.

Té Pèlú cùñaha-dé xii ñáyiú sá ñà túú xiní-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ìⁿ ndudú ndihi cue tée xica cuu ndihi-gá, te dàtnùni ní xica-gá cuáhán-gá ndihi-güedé yucu Òlivú.

31 Te yacáⁿ ní xáha-gá xii-güedé:

—Na càchí tnúhu-í xii-ndo sá ncháá-ndó dàndóo ñaha-ndo xii-í núú vitna, chi quee ndáá-xi nàcuáa càhán-xi núú tütú Yá Ndióxi núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dé ndihi-güedé cuténuu”, duha càchí-xi núú tütú-gá.

32 Dico na ndòto-í te codonùu-í núú-ndó quíhⁿ distritú Galilea —càchí-gá xáha-gá xii-güedé.

33 Te té Pèlú ní xáha-gá-dé xii-gá:

—Te cuèi nchaa-güedé ná dàndóo ñaha-güedé xii-n, dico yúhú chi vá dàndóo ñaha-í xii-n —càchí-dé xáha-gá-dé xii-gá.

34 Te Jèsús ní xáha-gá xii-dé:

—Na càchí tnúhu ndáá-í xii-n sá núú vitna cùmání-gá cana ìⁿ lili, te úní xito càhán-n núú ñáyiú sá ñà túú xiní ñáhán-xii-í —càchí-gá xáha-gá xii-dé.

35 Te té Pèlú ní xáha-gá-dé xii-gá:

—Cuèi na cùu ndihi ñaha-í xii-n dico vá càhán-í núú ñáyiú sá ñà túú xiní ñáhà-í xii-n —càchí-dé xáha-gá-dé xii-gá.

Te nchaa dava-gá cue tée xica cuu ndihi-gá diu-ni ducaⁿ ní xáha-gá-güedé xii-gá.

Jèsús càhán ndihi-gá Yá Ndióxi ìⁿ xichi núú nání Gètsemaní

(Mr. 14:32-42; Lc. 22:39-46)

36 Te Jèsús ní quexio-gá ndihi cue tée xica cuu ndihi-gá ìⁿ xichi núú nání Gètsemaní, te xiáⁿ ní xáha-gá xii-güedé:

—Chí cúnucóo iha cundetu-ndo na quíhⁿ-í yacáⁿ càhán ndihi-í Yá Ndióxi —càchí-gá xáha-gá xii-güedé.

37 Te ndéca-gá té Pèlú, ndihi ndi nduú déhe té Zebédeú cuáhán, te ní nguíta-xi súúni ndihú iní-gá.

38 Te ní xáha-gá xii cue tée úní-án:

—Súúni ndihú iní-í dàtná sá cùú-í, te chí quéndóo nchòhó iha te vá cùdú-ndó chí yúhú vá cùdú-í —càchí-gá xáha-gá xii-güedé.

39 Te sa ñùnchí luha ní xica ndehe Jèsús núú ndécú-güedé, te ní nguíñi xití-gá te ní nuu núú-gá ndaa núú ñùhú, te ní nguíta-gá

càháⁿ ndihí-gá Tátá-gá Dútú Ndiòxí, te xáhaⁿ-gá:

—Yòhó Tátá mée-í, càháⁿ ndàhú-í núu-n nùu vá cùndèe iní-n tàunihnu ñaha-n xii-í cuendá sá vá ndòhò-í ná sáà òré, dico vá càdá-n nàcuáa càchí iní mée-í, chi cada-n nàcuáa càchí iní mée-n —càchí-gá xáhaⁿ-gá xii Tátá-gá Dútú Ndiòxí.

⁴⁰ Te sátá nǐ yáha ní cáháⁿ ndihí-gá Tátá-gá Dútú Ndiòxí, te cuánuhú-gá núu ní dándòo-gá cue téé úní-án te xixidí-güedé òré ní nasáá-gá, te ní xáhaⁿ-gá xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ìⁿ òré nini càháⁿ ndihí-í Yá Ndiòxí-án?

⁴¹ Te chí quéndòo tucu te cuhuⁿ iní-ndó vá cùdú-ndó, te cáháⁿ ndihí-ndo Yá Ndiòxí cuendá sá vá dácàháⁿ ñáhá yúcu ñávàha xii-ndo cada-ndo sá ñá túu tãú-ndó càda-ndo. Te ximí ndáá-í sá nchòhó cuini-ndó càda-ndo nchaa nacuáa càháⁿ-í dicó-ni sá ñá túu nihí ndéé-ndó —càchí-gá xáhaⁿ-gá xii-güedé.

⁴² Te xito cùu uú cuáháⁿ tucu Jèsús cáháⁿ ndihí-gá Tátá-gá Dútú Ndiòxí, te xáhaⁿ-gá:

—Yòhó Tátá mée-í, te núu vá cùndèe iní-n tàunihnu ñaha-n xii-í cuendá sá vá ndòhò-í, te cada nàcuáa càchí iní mée-n —càchí-gá xáhaⁿ-gá xii Tátá-gá Dútú Ndiòxí.

⁴³ Te òré ní yáha ní cáháⁿ ndihí-gá Tátá-gá Dútú Ndiòxí, te cuánuhú tucu-gá núu xíndecu cue téé úní xíca cùu ndihí-gá-án, te xidí-ni tucu-güedé òré ní nasáá-gá, te ducaⁿ nǐ quide-güedé chí súni ñuhu saní núu-güedé.

⁴⁴ Te ní dándòo ñaha túcu Jèsús xii-güedé xíán, te cuáháⁿ tucu-gá xito cùu úní cáháⁿ ndihí tucu-gá Tátá-gá Dútú Ndiòxí, te diu-ni tnúhu sá sá ní xáhaⁿ-gá xii Tátá-gá Dútú Ndiòxí, diu-ni tnúhu-án ní xáhaⁿ túcu-gá.

⁴⁵ Te sátá nǐ yáha ní cáháⁿ ndihí-gá Tátá-gá Dútú Ndiòxí, te cuánuhú tucu-gá núu ndécú cue téé xica cuu ndihí-gá-án, te òré ní nasáá-gá, te ní xáhaⁿ-gá xii-güedé:

—¿Te náa xidí-ni tucu-ndo? Te sa ní sáà òré cuáha cuendá ñáhá-güedé xii-í núu cuè téé ndècu ichi cuéhé ichi duha.

⁴⁶ Dico vitna chí ndáçòo na quihíⁿ-ó, chi sa véxi téé cuáha cuendá ñáhá xii-í núu cuè téé cùu úhú iní ñáhá —càchí-gá xáhaⁿ-gá xii-güedé.

Ní tni-güedé Jèsús ndécá ñaha-güedé xii-gá cuáhá

(Mr. 14:43-50; Lc. 22:47-53; Jn. 18:2-11)

⁴⁷ Te càháⁿ dúcáⁿ-ní Jèsús ní quexio té Júdás. Te núu tnáhá téé-án cúú ùxúú tnáhá cue téé xica cuu ndihí-gá ní cùu te ducaⁿ nǐ quide-dé. Te ndihí-dé vai cue téé ní quexio te dava-güedé xínehe-güedé machití, te dava-güedé xínehe-güedé carrutí. Te cue téé-án ní tendaha ñaha cue dútú cùnù, ndihí cue téé cùu sacuéhé núu ñayiu isráél.

⁴⁸ Te té Júdás téé cuáha cuendá ñáhá xii-gá-án sa ní xitnúhu-dé cue téé-án nàcuáa cada-dé cuáha cuendá-dé Jèsús núu-güedé, te duha ní xáhaⁿ-dè xii-güedé:

—Cundehe-ndo téé na tøyuhu-í te téé-án tni-ndo-dé chí téé-án cúú-dé téé ndéé iní-ndó —duha ní xáhaⁿ-dè xii-güedé.

⁴⁹ Te sátá dúcáⁿ ní xáhaⁿ-dè xii-güedé, te ní sándehe yatni-dé núu Jèsús, te ní xáhaⁿ-dè xii-gá:

—¿Ràción Mèstrú! —càchí-dé xáhaⁿ-dè xii-gá.

Te ní tøyuhu ñaha-dé xii-gá.

⁵⁰ Te Jèsús ní xáhaⁿ-gá xii-dé:

—Yòhó téé ní chitnahá ñáhá xii-í, ¿ná cuini-n núu véxi-n núu-í? —càchí-gá xáhaⁿ-gá xii-dé.

Te òré-ni-án ní tni ñaha cuè téé ndihí té Júdás-xii xii Jèsús, te ndéca ñaha-güedé xii-gá cuáháⁿ.

⁵¹ Te ìⁿ cue téé ndihí Jèsús ní tava-dé machití-dé, te ní xehndé-ni-dé ìⁿ xio lóho ìⁿ téé xinu cuechi núu dútú cùnùu te ní quendeé duuⁿ lóho-dé.

⁵² Te Jèsús ní xáhaⁿ-gá xii téé ducaⁿ nǐ xehndé lóho téé-án:

—Nachihí machití-n ñi-xi, chi nchaa cue téé na náa ndihí machití cahni-güedé tnàha ñayiu-güedé te diu-ni ndihí machití cuú mée-güedé tucu.

⁵³ Te na càchí tnúhu-í xii-ndo sá núu yúhú cuini-í cácu-í te cáháⁿ ndihí-í Tátá-í Dútú Ndiòxí, te tendaha-gá cuéhé vihí espíritu xínu cuèchi núu-gá quixi-xi dácacu ñaha-xi xii-í.

⁵⁴ Dico núu ducaⁿ na càda-í te vá quée ndáá-xi nàcuáa càháⁿ-xi núu tútú Tátá-í Dútú Ndiòxí núu ndéé tniuní sá dacuití xini ñuhu-xi nándi ndoho-í —càchí-gá xáhaⁿ-gá xii-dé.

⁵⁵ Te Jèsús ní xáhaⁿ-gá xii cue téé ducaⁿ nǐ tni ñaha xii-gá-án:

—Nchaa-ni nduu ní xini-ndó nǐ xóo cunucóo-í xití veñúhu càhnu sá ïo cùnùu ní xóo danèhé-í ñayiu, te ñá túu ní tni ñaha-ndo xii-í, ¿te ná cuendá vitna quide ñaha-na-ndó xii-í dátña quidé-ndó ìⁿ ñadúhú, nèhe-ná-ndó màchití nèhe-ná-ndó càrrutí ní quexio ní tni ñaha-ndo xii-í-í?

⁵⁶ Dico dacuití sá dúhá càda-xi nacuáa quee ndáá-xi nàcuáa ní cáháⁿ cue téé ní xóo cáháⁿ tnúhu Yá Ndiòxí ndéé sanaha nǐ ngódó tniuní núu tútú-gá —càchí-gá xáhaⁿ-gá xii-güedé.

Te nchaa cue téé xica cuu ndihí-gá ní xinu-güedé ní dándòo ñaha-güedé xii-gá.

Jèsús ndécú-gá jundá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue téé ní tni ñaha xii Jèsús ndécá ñaha-güedé xii-gá cuáháⁿ núu té Caifás téé

cùu dùtú cùnù-gá. Te núú ndécú dùtú cùnù-gá-án sa ní tacá cue tée dâcuaha ñaha xii ñáyiu nchaa tnúhu ní chídó tnùnì ndí Moisés, ndíhi cue tée cùu sacuéhé núú ñáyiu isráel cuèndá cada-güedé jündá.

⁵⁸ Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tée cùu dùtú cùnù-gá-án, te xíáⁿ ní ngóo-dé ndíhi cue tée cùu poleciá cuèndá cuini-dé quini-dé nása cada ñaha-güedé xii Jèsús.

⁵⁹ Te cue tée cùu dùtú cùnù, ndíhi cue tée cùu sacuéhé núú ñáyiu isráel, ndíhi nchaa dâva-gá cue tée xîndecu jündá ndúcú-güedé nâcuáa cada-güedé dacâa-güedé ìⁿ cuéchi díquí Jèsús cuéi cùu-xi ìⁿ sá ñã ndáá cuèndá níhi-güedé nâcuáa cada-güedé cahni ñaha-güedé xii-gá.

⁶⁰ Te vâi cue tée ní nguíta-güedé dâcâa-güedé cuéchi díquí-gã, dico ñã túú ní cûndee tnúhu-güedé chi mee-ni tnúhu ndehnde cùu-xi. Te sâtá dúcáⁿ te ní quexio tucu úú tnáhá cue tée dâcuandehnde-güedé,

⁶¹ te xâhaⁿ-güedé xii nchaa cue tée xîndecu jündá:

—Véxi-ndí cächí tnúhu-ndí xii-ndo sã tée-a cächí-dé sã dângoyo-dé veñúhu cãhnu sã ìo cûnuu núú chñúhu-o Yá Ndiöxí, te dandâa-dé ingá veñúhu saa, diu-ni núú cáá tnáhi veñúhu-ãⁿ, te xití úní-ni nduu sa nadaxînu-dé, duha cächí-dé —cächí-güedé xâhaⁿ-güedé.

⁶² Te tée cùu dùtú cùnù-gá-án ní ndacuñí-dé, te xâhaⁿ-dë xii Jèsús:

—¿Ñá cuèndá duha ndùu tnúhu cãháⁿ cue tée-a cuèndá-n? Te cãháⁿ núú nása cunduu tnúhu cãháⁿ-n —cächí-dé xâhaⁿ-dë xii-gá.

⁶³ Dico Jèsús ñã túú tnáhi ní cãháⁿ-gá. Te tée cùu dùtú cùnù-gá-án ní xâhaⁿ tucu-dé xii-gá:

—Yúhú, cácu nèhe-í Yá Ndiöxí chi cuini-í sã cächí tnúhu ndáá-n xii-ndí núu sã díú Cristú Déhe Yá Ndiöxí Yaá ní tendaha-gã véxi ñuyúú-a cùu-n —cächí-dé xâhaⁿ-dë xii-gá.

⁶⁴ Te Jèsús ní xâhaⁿ-gã xii-dé:

—Diu Yaá-án cùu-í dàtná cächí-n-án, te na cächí tnúhu-í xii-ndo sã sãa nduu te quini-ndó yúhú Tée cùu ñani tnáhá-ndó nchâa-ndo cunucóo-í xio cûha Dùtú Ndiöxí Yaá ndácú quide nchaandi; túhú sã vâha. Te dâvâ-án quini ñáhá-ndó xii-í quee-í andiu quixi-í ichi xití vícô —cächí-gá xâhaⁿ-gã xii-dé.

⁶⁵ Te dùtú cùnù-gá-án ní ndátá-dë dóó ñhntú-dë cuèndá sã ñã túú ní tnáhá ñi-dé nâcuáa ní cãháⁿ Jèsús, te ní xâhaⁿ-dë xii nchaa cue tée xîndecu jündá:

—Tée-a cãháⁿ úhú-dé cuèndá Yá Ndiöxí, te vitna ñã túú-gã xíni ñúhu-xi cue tée cãháⁿ ndáá núu ndáá sã ndècuéchi-dé àdi ñã túú ndècuéchi-dé, chi sa ní tecú dóho-o nâcuáa

ndùu tnúhu ní cãháⁿ-dé ní cãháⁿ úhú-dé cuèndá Yá Ndiöxí.

⁶⁶ Te nchaa-ndo chí cãháⁿ vitna núu nása sãni ñi-ndó cunduu cuèndá tée-a —cächí-dé xâhaⁿ-dë xii nchaa cue tée-án.

Te cue tée-án ní xâhaⁿ-güedé:

—Nchúhú cächí-ndí sã tàú-xi cuú-dé chi ndècuéchi-dé —cächí-güedé xâhaⁿ-güedé.

⁶⁷ Te ní nguíta-güedé ní tiú díí ñáhá-güedé xii-gá te ní caniha-güedé, te tnáhá núú-gã ní cani-güedé.

⁶⁸ Te ní cudíquí ndeé ñáhá-güedé xii-gá, te xâhaⁿ-güedé:

—Yohó Tée cächí sã cúú Cristú Yaá ní tendaha Yá Ndiöxí véxi ñuyúú-a, cãháⁿ ná còto yoo ní caniha xii-n —cächí-güedé xâhaⁿ-güedé xii-gá.

Té Pèlú xâhaⁿ-dë xii ñáyiu sã ñã túú xini-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te nini núcóo té Pèlú quehé, te ní sáháⁿ ìⁿ xichí xínú cuéchi vehe-án núú-dë, te xâhaⁿ-xi xii-dé:

—Yohó tnáhá-n cùu-n tée xica cuu ndíhi Jèsús tée distritú Galléa —cächí-xi xâhaⁿ-xi xii-dé.

⁷⁰ Te té Pèlú ñã túú ní ñunuu-dé, te ndédóho nchaa ñáyiu xîndecu-án ní xâhaⁿ-dë xii xichí-ãⁿ:

—Yúhú, ñã túú cùtnuní ñi-í nása ndùu tnúhu cãháⁿ-n —cächí-dé xâhaⁿ-dë xii-xi.

⁷¹ Te ní xica té Pèlú cuáháⁿ-dë ndâa nacuáa nchíi yuyéhe vehe-án, te ní xini ñáhá tucu ingá xichí xínú cuéchi vehe-án, te xâhaⁿ-xi xii nchaa ñáyiu xîndecu-án:

—Tée-a tnáhá-dé xicá cùu-dé ndíhi Jèsús tée ñuu Nazàrét —cächí-xi xâhaⁿ-xi xii-yu.

⁷² Te té Pèlú ní xâhaⁿ-dë:

—Nchacuiti Yá Ndiöxí sã ñã túú xini-í tée cãcunehe-ndo-án —cächí-dé xâhaⁿ-dë xii-yu.

⁷³ Te tnaa-ni ní cuu, te dâva ñáyiu xîndecu xíáⁿ ní xâhaⁿ túcú-yu xii té Pèlú:

—Ndáá sã tnáhá-n xica cuu-n ndíhi tée ndèca-güedé cuãnguihu-ãⁿ, chi ñáyihú cãháⁿ-n —cächí-yu xâháⁿ-yu xii-dé.

⁷⁴ Te té Pèlú ní xâhaⁿ-dë xii-yu:

—Nchacuiti Yá Ndiöxí sã yúhú cãháⁿ ndáá-í sã ñã túú xini-í tée cãcunehe-ndo-án —cächí-dé xâhaⁿ-dë xii-yu.

Te òré-ni-án ní cana ìⁿ líhi.

⁷⁵ Te ní ndacu ñi té Pèlú nâcuáa ní xâhaⁿ Jèsús xii-dé sã cãmáni-gã cana ìⁿ líhi te úní xito cãháⁿ-dë sã ñã túú xini ñáhá-dë xii-gá. Te ní quee-dé tnuú ñáyiu-án cuáháⁿ-dë ìⁿ xio ní ndáhyú víhi-dë ní ndixi cuéchi ñi-dé.

27

Ndèca-güedé Jèsús cuáháⁿ núú té Pilatú (Mr. 15:1; Lc. 23:1-2; Jn. 18:28-32)

1 Te sáta nǐ túndaá te nchaa cue téé cùu dútú cúnùu, ndíhi cue téé cùu sacuéhé nùú ñǎyiu isràél ní ndatnúhu-güedé nàcuáa cada-güedé cahni-güedé Jesús.

2 Te ní dácúrtú ñaha-güedé xii-gá, te ndèca ñaha-güedé cuáháⁿ nùú tè Pilatú téé cùu gobiernú.

Ní xíhi té Jüdás

3 Te té Jüdás téé ní sáha cuèndá ñahá xii Jesús ní cutnúni iní-dé sá cáhni ñaha-güedé xii-gá, te ní ndixi cuéchi iní-dé sá ñá túú ní quide váha-dé sá dúcáⁿ ní quide-dé ní sáha cuèndá ñahá-dé xii-gá nùú cuè téé cùu úhú iní ñahá, te ní xica-dé cuáháⁿ-dé danchòcáva-dé ócò úxí díhúⁿ cuixíⁿ nùú cuè dútú cúnùu-áⁿ, ndíhi nùú cuè téé cùu sacuéhé nùú ñǎyiu isràél, chi ñiu cue téé-áⁿ ní sáñaha-güedé díhúⁿ xii-dé.

4 Te òré ní quexìo té Jüdás-áⁿ nùú ndécú-güedé, te xáhaⁿ-dè xii-güedé:

—Yúhú, ñá túú ní quide váha-í sá dúcáⁿ ní quide-í ní taxi cuèndá-í ñⁿ téé ñá túú tñahí cuéchi-xi cahni-ndo-dé —càchí-dé xáhaⁿ-dè xii-güedé.

Te cue téé-áⁿ ní xáhaⁿ-güedé xii-dé:

—Nchúhú, ñá túú nǎgá cuèndú cuíní-ndí cáháⁿ ndíhi ñaha-ndí xii-n, te mee-n ñaha nùu nása sàni iní-n càda-n —cachí-güedé xáhaⁿ-güedé xii-dé.

5 Te té Jüdás ní dǎngoyo-dé díhúⁿ-áⁿ xití veñúhu càhuu sá ño cúnuu, te ní xica-dé cuáháⁿ-dé ní dácüèhné-dé meé-dé.

6 Te cue dútú cúnùu ní naqueheⁿ-güedé díhúⁿ-áⁿ, te ní xitnáha-güedé:

—Díhúⁿ-a ní quéyáhu cuèndá sá cùú ñⁿ ñǎyiu, nùu xíáⁿ vá cùú nàchihi-o xití càjá nùú ñúhú sá cùú cuèndá Yá Ndióxi —càchí-güedé xitnáha-güedé.

7 Te ní ndatnúhu-güedé te ní cuu ñⁿnuu-güedé cuèndá nacuaaⁿ-güedé ñⁿ xichi nùú cáá ñúhu danani-güedé Núú Cuáha Nchaa Sá Cuáha Ñuhu, te xíáⁿ ní saaⁿ-güedé cuèndá xíáⁿ nguindúxi nchaa ñǎyiu véxi xica.

8 Te ní nadáma ñiu ñuhu-áⁿ, te vitna ñàmani-güedé Nuhu Yáhu Ñíñí, duha ñàmani-güedé.

9 Te ducaⁿ ní cuu chi ní queue ndáá-xi nàcuáa ní cáháⁿ ndí Jeremiás téé ní xóo cáháⁿ tñúhu Yá Ndióxi ndéé sanaha, te duha ní cachí ndí: “Cue téé isràél ní cachí-güedé sá ócò úxí díhúⁿ cuixíⁿ cháhu-güedé cuèndá ñⁿ téé queheⁿ cuèndá-güedé. Te díhúⁿ-áⁿ nàqueheⁿ-güedé,

10 te cuaaⁿ-güedé ñⁿ xichi nùú nání Núú Cuáha Nchaa Sá Cuáha Ñuhu, te ducaⁿ càda-xi chi ducaⁿ ní cachí Yá Ndióxi cunduu”, duha ní cachí ndí Jeremiás-áⁿ.

Jesús ndécú-gá nùú tè Pilatú

(Mr. 15:2-5; Lc. 23:3-5; Jn. 18:33-38)

11 Te Jesús ndécú-gá nùú tè Pilatú téé cùu gobiernú, te téé-áⁿ ní xicáⁿ tñúhú-dé nùú-gá, te xáhaⁿ-dè xii-gá:

—¿Ndáá sá díu-n cùu-n téé yíndaha ñaha xii ñǎyiu isràél-áⁿ? —càchí-dé xáhaⁿ-dè xii-gá.

Te Jesús ní xáhaⁿ-gá xii-dé:

—Diu-í yíndaha-í-yu —càchí-gá xáhaⁿ-gá xii-dé.

12 Te cue dútú cúnùu ndíhi cue téé cùu sacuéhé nùú ñǎyiu isràél sàcáⁿ cuéchi-güedé nùú tè Pilatú cuèndá Jesús, dico mee-gá ní ñⁿ tñúhu ñá túú ní cáháⁿ-gá.

13 Te tè Pilatú ní xáhaⁿ-dè xii-gá:

—Cáháⁿ, ná cuèndá ñá túú càháⁿ-n, te cundehe nǎ ndéé duha títí cuéchi dàca cue téé-a díquí-n —càchí-dé xáhaⁿ-dè xii-gá.

14 Dico Jesús ñá túú tñahí ní cáháⁿ-gá, te tè Pilatú téé cùu gobiernú-áⁿ ño ní cuñúhu-dé sá dúcáⁿ ñá túú tñahí ní cáháⁿ-gá.

Ní quide ndáá-güedé sá cahni-güedé Jesús
(Mr. 15:6-20; Lc. 23:13-25; Jn. 18:38-19:16)

15 Te ndi tñahá nduu víco pascuá dácácu tè Pilatú téé cùu gobiernú-áⁿ ñⁿ téé yíhi vecaá chí ducaⁿ tñahí quide-dé, te mee ñǎyiu càháⁿ-yu te núu ndédacáa téé yíhi vecaá-áⁿ càcu-dé te téé-áⁿ dácácu-dé.

16 Te dàvá-áⁿ yíhi ñⁿ téé nàni Barrabás vecaá, te téé-áⁿ ño cuèndú-dé sá ño nèhé ní quide-dé.

17 Te ní nataká nchaa ñǎyiu, te tè Pilatú ní xicáⁿ tñúhú-dé nùú-yu, te xáhaⁿ-dè:

—¿Ndédacáa nùú úu cue téé-a cuíní-ndó dácácu-í-güedé-í? ¿Té Barrabás áⁿ Jesús téé nàni Cristú? —càchí-dé xáhaⁿ-dè xii-yu.

18 Te ducaⁿ ní cáháⁿ tè Pilatú, chi ní cutnúni iní-dé sá dicó sá cuèdú iní-güedé ducaⁿ ní quide-güedé ní sáha cuèndá ñahá-güedé xii Jesús nùú-dé.

19 Te nini núcóo tè Pilatú nùú xèhndé-dé cuéchi ní tendaha ñàdihí-dé tñúhu cuáháⁿ nùú-dé, te duha ndùu tñúhu ní tendaha-aⁿ: “Vá cáni iní-n nà cada-n téé ní taxi cuèndá ñahá-güedé xii-n, téé ñá túú tñahí cuéchi-xi, chí icuini ño nèhé ní dácóto ñaha saní-í cuèndá-dé”, duha ndùu tñúhu ní xáhaⁿ-aⁿ xii tè Pilatú.

20 Dico cue téé cùu dútú cúnùu, ndíhi cue téé cùu sacuéhé nùú ñǎyiu isràél ní xáhaⁿ-güedé xii ñǎyiu sá ná cuñhá-yu xii tè Pilatú dácácu-dé tè Barrabás te cahni-dé Jesús, te ní quide-yu nàcuáa ní xáhaⁿ-güedé.

21 Te tè Pilatú-áⁿ ní xáhaⁿ tucu-dé xii-yu:

—¿Ndédacáa nùú úu cue téé-a cuíní-ndó dácácu-í? —càchí-dé xáhaⁿ-dè xii-yu.

Te ní xáháⁿ-yu xii-dé:

—Té Barrabás dácácu-n —càchí-yu xáháⁿ-yu xii-dé.

22 Te tè Pilatú ní xicáⁿ tñúhú-dé nùú-yu, te xáhaⁿ-dè:

—¿Te ná cuini-ndó càda-í Jèsús tée nàni Cristú tée cachi sá Yá Ndióxi ní tendaha ñaha xii-dé véxi-dé ñuyú-a-í? —cachi-dé xáhaⁿ-dè xii-yu.

Te nchaá-yu ní cáháⁿ-yu, te xáhãⁿ-yu:

—Cata caa-dé núú cùrúxí —cachi-yu xáhãⁿ-yu xii-dé.

²³ Te té Pilatú ní xáhaⁿ tũcu-dé xii-yu:

—¿Te ná cúú cuèchi ní quide-dé núú ducaⁿ cuini-ndó càda-í-dé-í? —cachi-dé xáhaⁿ-dè xii-yu.

Dico nchaá-yu uuⁿ-gá níhi ní cáháⁿ-yu, te xáhãⁿ-yu xii-dé:

—¿Cata caa-dé núú cùrúxí! —cachi-yu xáhãⁿ-yu xii-dé.

²⁴ Te té Pilatú ní cutnùni iní-dé sá vã nihí-dé nãcuáa cada-dé, chi uuⁿ-gá ní nguíta ñáyiú xĩcuáa-yu, te xiáⁿ ní xicáⁿ-dè ndute ní ndáhã-dè núú nchãa ñáyiú, te ní xáhaⁿ-dè xii-yu:

—Tée-a cùu-dé ñⁿ tée ñã túú tñahí cuèchi-xi, te nchóhó cuini-ndó sã cùu-dé, dico ñiú-ni mee-ndo cuidó yáhu-ndo-dè chi yúhú vá cuidó yáhu-í-dé —cachi-dé xáhaⁿ-dè xii-yu.

²⁵ Te nchaá-yu ní xáhãⁿ-yu xii-dé:

—¿Diu nchúhú ndihí cue déhe-ndí cuidó yáhu-ndí-dé! —cachi-yu xáhãⁿ-yu.

²⁶ Te sátá dúcáⁿ te té Pilatú ní dácãcu-dé té Barrábás, te ní táuchíúⁿ-dè ní cani-güedé Jèsús. Te sátá dúcáⁿ ní quide ñaha-güedé xii-gá, te ní táuchíúⁿ-dè candeca ñaha-güedé xii-gá quíhíⁿ cata caa ñaha-güedé xii-gá núú cùrúxí.

²⁷ Te cue tée cùu sandadú té Pilatú ndécã-güedé Jèsús cuánguihu xití vehe càhnu cuu cuendá-dé, te cue tée cùu sandadú-áⁿ ní cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ.

²⁸ Te xiáⁿ ní taunuu-güedé dóo-gã, te ní dácuihnú ñaha-güedé xii-gá ñⁿ dóo tícuèhé víhí.

²⁹ Te ní cadúha-güedé ñⁿ corónã ñiú ní chihí-güedé díquí-gã, te ní chitnũ-güedé ñⁿ carrutí ndaha cùha-gã, te ní nguíñi xití-güedé núú-gã cúdíquí ndeé ñáhã-güedé xii-gã, te xáhaⁿ-güedé:

—¿Ío càhnu cuu yohó tée yindaha ñaha xii ñáyiú isràél! —cachi-güedé xáhaⁿ-güedé xii-gã.

³⁰ Te ní tiú díí ñáhã-güedé xii-gã, te ní queheⁿ-güedé carrutí sã ní sãñaha-güedé xii-gã te ní ducuu-güedé díquí-gã.

³¹ Te sátã ní yáha ní cudíquí ndeé ñáhã-güedé xii-gã, te ní nataunuu ñaha-güedé xii-gã dóo tícuèhé víhí sã ní dácuihnú ñaha-güedé xii-gã, te ní dándíunuu ñaha-güedé xii-gã dóo méé-gã, te dátñuní ndécã ñaha-güedé cuáhãⁿ núú catá cãa ñaha-güedé xii-gã núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñihu-güedé ndihí-gã ichi, te ní naníhí-güedé ñⁿ tée ñuú Cirené nání-dè Ximú, te tée-áⁿ ní quide yica-güedé ní xido-dé cùrúxí sã nchídó Jèsús.

³³ Te ní sãá-güedé ndihí-gã ñⁿ xichi núú nání Gólgotã, te tñuhu-áⁿ queé-xí: Núú nání yíqui díquí ndíyi, duha quee-xi tñuhu-áⁿ.

³⁴ Te xiáⁿ sãñaha-güedé ndudí úã coho-gã ní cùu, te ñã túú ní xihí-gã chi dico-ni ní xito ndeé-gã.

³⁵ Te ní sata caa ñaha-güedé xii-gã núú cùrúxí, te sátã dúcáⁿ te cue tée cùu sandadú-áⁿ ní xito ndeé-güedé núu ndèdacã-güedé cuu cuendã-güedé dóo-gã. Te ducaⁿ ní cuu chi ní quee ndáá-xi nãcuáa ní cáháⁿ ñⁿ tée ní xóo cáháⁿ tñuhu Yá Ndióxi ndeé sanaha yòdo tñuní núú tütú-gã, te duha cachi-xi: “Ní xito ndeé-güedé núu ndèdacã-güedé cuu cuendã-güedé dóo-gã”, duha ní cachi tée-áⁿ te ducaⁿ ní ngódó tñuní núú tütú-gã.

³⁶ Te sátã dúcáⁿ ní quide-güedé, te ní ngóo-güedé ndeé ñáhã-güedé xii-gã.

³⁷ Te ní taxi ndecu-güedé ñⁿ sã ndeé lètrã ndãa díquí-gã. Te lètrã-áⁿ càháⁿ-xi ná cuendã ducaⁿ ní quide ñaha-güedé xii-gã, te duha càháⁿ lètrã-áⁿ: “Tée-a cùu-dé tée yindaha ñaha xii ñáyiú isràél”, duha cachi-xi.

³⁸ Te tñahã úú cue tée cùu ñadúhú ní sata caa-güedé ñiú-ni núú cùrúxí tucu, te ñⁿ-dè ní sata caa-güedé xio cùu-gã, te ingã-dé ní sata caa-güedé xio dátñi-gã.

³⁹ Te nchaá ñáyiú yãha yatni núú tãcãa-gã-áⁿ, te dácuiçó-yu díquí-yu ndèhe ñáhã-yu xii-gã, te xĩcuèhé ñáhã-yu.

⁴⁰ Te xáhãⁿ-yu xii-gã:

—Yòhó cachi-n sã dãngoyo-n veñúhu càhnu sã ío cùnuu, te dandãa-n ingã veñúhu saa, te xití úní-ni nduu sa nadaxínu-n, te vitna tanúu núú cùrúxí-áⁿ dácãcu-n mee-n te núu ndisa sã Dèhe Yá Ndióxi cúu-n —cachi-yu xáhãⁿ-yu xii-gã.

⁴¹ Te ñiú-ni ducaⁿ cùdíquí ndeé ñáhã cùe tée cùu dütú cùnúu xii-gã, ndihí cue tée dácuaaha ñaha xii ñáyiú nchaá tñuhu ní chídó tñuní ndíi Moisés, ndihí cue tée cùu fariséu, ndihí cue tée cùu sacuéhé núú ñáyiú isràél, te xitñaha-güedé:

⁴² —Tée-a ní ndacu-dé ní dácãcu-dé dava ñáyiú, te mee-dè ñã ndácú-dè dácãcu nihñu-dé méé-dè. Te núu ndisa sã cúu-dè tée yindaha ñaha xii ñáyiú isràél, te na cùndehe-o nuu-dé núú cùrúxí-a cuendã quíndãá iní-ó-dè.

⁴³ Te cachi-dé sã sãndãá iní-dé Yá Ndióxi, te mee-gã ná dácãcu ñaha-gã xii-dé te núu cùndahú iní ñáhã-gã, chi mee-dè cachi-dé sã Dèhe-gã cúu-dè —cachi-güedé xitñaha-güedé.

44 Te ndéé tnàhá cue téé cùu ñadúhú tákàa xio xio ñíhí-gá xícuehé ñáhá-güedé xii-gá.

Ní xíhí Jèsús

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee ñíhí ñuyíú, te ducaⁿ-ní càa ní cuu caá úní sacuaa.

46 Te òré sa ta cùyatni cuu caá úní sacuaa-án, te ñíhí ní cáháⁿ Jèsús, te càchí-gá: —Èlí, Èlí, òláma sabàctani? —càchí-gá.

Te tnúhu-án queé-xí: Ndiòxí mée-í, Ndiòxí mée-í, òná cuendá ní dáñá ñàha-n xii-í?, duha queé-xi tnúhu-án.

47 Te dava cue téé xĩndecu yatni núú tákàa-gá-án ní tecu dóho-güedé nàcuáa ní cáháⁿ-gá, te ní xítñàha-güedé:

—Tée-a càna-dé té Èliás —càchí-güedé xítñàha-güedé.

48 Te òré-ni-án ní quene cunu ñⁿ cue téé xĩndecu-án ní queheⁿ-dé luha cáchí, te ní chindóyo-dé xití ndudí íá, te ní chinenu-dé díqui ñⁿ yutnu càni te ní ndocani-dé ní chíhi-dé yuhu-gá.

49 Te dava-güedé ní xáhaⁿ-güedé xii téé-án:

—Cundetú tnaa na cundehe-o nacoto núu quixi té Èliás dàcácu ñàha-dé xii-dé —càchí-güedé xáhaⁿ-güedé xii téé-án.

50 Te Jèsús ñíhí ní cana saa-gá, te ní xíhí-ní-gá.

51 Te sáta dúcáⁿ te ní ndátá dóó cúú còrtiná xití veñúhu càhnu sá òo cùnno ní queé dava ndáá, te ndàa núu ñínu ní ngúíta-xi ní ndátá, te ní tñáa, te dava cava nàhnu ní táhú.

52 Te dava yaú núú yĩndúxi ñáyíu ní xíhí ní sándáá iní ñáhá xii Yá Ndiòxí ní nacaⁿ te ní ndotó-yu.

53 Te sáta ní yáha ní ndoto Jèsús, te cue ñáyíu ní ndoto-án cuànguihú-yu xití ñúú Jerusalén, te cue ñáyíu ñúú-án òo vai-yu ní xiní-yu cue ñáyíu ducaⁿ ní ndoto-án.

54 Te sá dúcáⁿ nãndi ní quide-xi, ndíhi sá dúcáⁿ ní tñáa xiáⁿ òo ní yùhú téé cùu capitáⁿ ndíhi nchaa dava-gá cue téé ndècu ndíhi-dé ndèé-güedé yiqui cùñú Jèsús, te ní xítñàha-güedé:

—Sá ndàá ndisa sá díú tée-a cùu-dé Déhe Yá Ndiòxí ní cùu —cachí-güedé xítñàha-güedé.

55 Te xica xĩnutñí vai ñáyíu ñíhí ndéhè-yu nchaa nàcuáa ní quide ñàha-güedé xii Jèsús, te ñáyíu-án cùu-yu ñáyíu ní chindèé-yu Jèsús, te ndéé distrítú Galilea ní chinchícúⁿ ñáhá-yu xii-gá.

56 Te tnuú ñáyíu-án tnàhá tá Màriá Magdalená, ndíhi tá Màriá nãná té Jàcobó ndíhi té Chèé, ndíhi nãná cue déhe té Zebèdeú.

Chindúxi-güedé Jèsús

(Mr. 15:42-47; Lc. 23:50-56; Jn. 19:38-42)

57 Te ndècu ñⁿ téé cuica nãni-dé Chèé te cùu-dé téé ñúú Arimàtea, te tnàhá-dé ní tnàhá tnúhu-dé ndíhi Jèsús. Te òré sa ní cuaa,

58 te ní sáháⁿ-dé núú té Pilatú, te xáhaⁿ-dè ñúu vá cundèe iní-dé daña-dè chindúxi-dé yiqui cùñú Jèsús. Te té Pilatú-án ní sáha-dé tnúhu, te ní táuchíúⁿ-dè sá cuáha cuendá-güedé té Chèé-án yiqui cùñú-gá.

59 Te té Chèé-án ní queheⁿ cuendá-dé yiqui cùñú-gá, te ní chidúcúⁿ-nuu-dé ñⁿ dóó cuixíⁿ dóó càndòo.

60 Te sa nchíí ñⁿ yaú sáá ní caáⁿ té Chèé-án ñⁿ yiqui naha càva te xíáⁿ cúú cuendá-dé, te yaú-án ní chíhi-dé yiqui cùñú Jèsús, te dàtnùni ní sadí-dé ñⁿ yúú càhnú yúú quèhéⁿ yuhu yaú-án, te ní xica-dé cuánuhú-dé.

61 Te tnàhá tá Màriá Magdalená, ndíhi ingá xíchí nãní Màriá ní quexiò-yu ní ngóo-yu yatni núú nchíí yaú-án.

Cue téé ndéé yaú núú yíhí yiqui cùñú Jèsús

62 Te sáta ní yáha ní quide túha ñáyíu nchaa sá nãndíhi-yu nduu tnèé nduu ndètátú-yu-án, te díu-ní nduu ndètátú-yu-án ní sáháⁿ cue dútú cùnno, ndíhi cue téé cùu fariséú ní cáháⁿ ndíhi-güedé té Pilatú.

63 Te xáhaⁿ-güedé xii-dé:

—Yòhó té cùnno, véxi-ndí càchí tnúhu-ndí sá ní ndacu iní-ndí sá tée ndehnde ní xíhí-án càchí-dé òré ndècú-gá-dé sá ndúu úní sá cúú-dé, te ndoto-dé.

64 Te tendaha-n cuè téé na quíhíⁿ-güedé cundee-güedé yuhu yaú núú ní chíhi-güedé yiqui cùñú-dé, chí na cuáháⁿ quíhíⁿ cue téé ní xica cue ndíhi-dé duhu-güedé yiqui cùñú-dé, te cùñàha-güedé xii ñáyíu sá ní ndoto-dé. Chí núu ducaⁿ na càda-güedé te òo-gá dandáhú-güedé cue ñáyíu dàcúxí dàtná ní quide mee téé ní xíhí-án —càchí-güedé xáhaⁿ-güedé.

65 Te té Pilatú ní xáhaⁿ-dè xii-güedé:

—Náu cue sandàdú-a candeca-ndo-güedé quíhíⁿ, te cadí váha-ndo ndíhi-güedé yuhu yaú-án nàcuáa tàú-xi cunduu, te na cundèe-güedé nàcuáa sãni iní-ndó cunduu —cachí-dé xáhaⁿ-dè xii-güedé.

66 Te cue téé-án ní xica-güedé cuáháⁿ-güedé, te ní tee-güedé ñⁿ sèñá yúú ndèdí yèhe yaú-án, te ní dándòo-güedé cue sandàdú-án ndèé-güedé yaú-án, te ducaⁿ ní quide-güedé cuendá sá vã yòo quíhíⁿ nacaⁿ yaú-án.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

1 Te sáta ní yáha nduu ndètátú ñáyíu, te ndumìngú nehé víhí-ní ní xica tá Màriá Magdalená ndíhi ingá xíchí nãní Màriá cuàngotó-yu yaú núú ní chíhi-güedé yiqui cùñú Jèsús.

² Te uuⁿni níhi víhi ní tnáa, te òré ducaⁿ ní quide-xi chí ìⁿ espíritu xínú cuèchi núú Yá Ndióxi ní quexìo-xi núú dúcáⁿ nchíi yaú núú ní chíhi-güedé yiqui cùñú Jèsús, te ní xócáni espíritu-áⁿ yúú ndèdí yèhe yaú-áⁿ te ní ngóo-xi núú yúú-áⁿ.

³ Te dátá datásaⁿ-xi òré sáa nduté ducaⁿ datásaⁿ-xi núú espíritu-áⁿ, te dóó níhnú-xi cuixiⁿ quiyí.

⁴ Te òré ducaⁿ ní quide-xi te cue sandàdú ndéé yaú-áⁿ ní quidi ñaha-xi xii-güedé sá ní yùhú-güedé, te ní nduá-güedé, te ní xíta sá xini tnúni-güedé.

⁵ Te espíritu-áⁿ ní xáhaⁿ-xi xii cue ñáiyi dihi cuángoto yaú-áⁿ:

—Nchòhó ñáiyi dihi véxi coto yaú-a, vá yùhú-ndó chí yùhú cùtnúni iní-í sá nchòhó véxi-ndo nànducu-ndo yiqui cùñú Jèsús Yaá ní xihí núú cùrúxi.

⁶ Dico Yaá-áⁿ chí ñá túú-gá ndécú yiqui cùñú-gá iha, chí sa ní ndoto-gá, te diu ducaⁿ ní cachí-gá sá ndótó-gá cùtnhá vátá cùú-gá, te chí táquixi cundehe-ndo núú ní sacá-güedé yiqui cùñú-gá ní cùu te quini-ndó ná ñá túú-gá.

⁷ Te vitna ío ndíhi chí cuàháⁿ núú xíndecu cue téé ní xica cuu ndíhi-gá, te duha cùñaha-ndo xii-güedé: “Ní ndoto Jèsús Yaá ní xihí ní cùu, te codonù-gá núú-ndó quihíⁿ distritú Galiléa te yàcáⁿ quini-ndó-gá”, duha cùñaha-ndo xii-güedé. Duha ndùu tnúhu ní cachí tnúhu-í xii-ndo —cachí espíritu-áⁿ xáhaⁿ-xi xii cue ñáiyi dihi-áⁿ.

⁸ Te cue ñáiyi dihi-áⁿ ní natní-yu ichi, te súuni ndíhi cuánuhú-yu núú xíndecu cue téé ní xica cuu ndíhi Jèsús cuendá nacani tnúhu-yu núú-güedé nàcuáa ní xáhaⁿ espíritu-áⁿ xii-yu, te cuèí ní yùhú-yu dico súuni cùdíí iní-yu.

⁹ Te ichi ñùhú-yu cuánuhú-yu, te na iní-yu ní quexìo Jèsús núú-yu ní dándácoo váha ñaha-gá xii-yu. Te ñáiyi-áⁿ ní ngúíñi xítí-yu núú-gá, te ní numi ñàhá-yu xii-gá, te ní chíñuhu ñàhá-yu.

¹⁰ Te ní xáhaⁿ-gá xii-yu:

—Vá yùhú-ndó, chí cuàháⁿ cùñaha-ndo xii cue téé ní xica cuu ndíhi-í sá ná quihíⁿ-güedé distritú Galiléa, te yàcáⁿ quini ñàhá-güedé xii-í —cachí-gá xáhaⁿ-gá xii-yu.

Nàcuáa ndùu tnúhu ní nacani cue sandàdú

¹¹ Te nini ñùhu cue ñáiyi dihi-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuú cuendá nacani tnúhu-güedé núú cuè téé cùu dútú cùnùu nàcuáa ní cuu.

¹² Te cue téé cùu dútú cùnùu-áⁿ ní quide-güedé jundá ndíhi cue téé cùu sacuéhé núú ñáiyi isràél, te ní ndatnúhu-güedé

nàcuáa cada-güedé, te ní quide ndáá-güedé ndíhi cue sandàdú-áⁿ sá cuñaha-güedé vái díhúⁿ cuendá dacuàndehnde-güedé.

¹³ Te ní xáhaⁿ-güedé xii cue sandàdú-áⁿ:

—Cuini-ndí sá vâ cãháⁿ ndáá-ndó núú ñáiyi nàcuáa ní cuu, chí cùñaha-ndo xii-yu sá òré xidi-ndó ní quixi cue téé ní xica cuu ndíhi-dé ní dúhú-güedé yiqui cùñú-dé néhé-güedé cuàháⁿ, duha cùñaha-ndo xii-yu.

¹⁴ Te núu na níhi té Pilatú téé cùu gobiernú tnúhu nàcuáa cùñaha-ndo xii ñáiyi, te nchúhú cada ndáá-ndí ndíhi-dé cuendá sá ñá túú ná cada ñaha-dé xii-ndo —cachí-güedé xáhaⁿ-güedé xii cue sandàdú-áⁿ.

¹⁵ Te cue sandàdú-áⁿ ní queheⁿ cuendá-güedé díhúⁿ, te ní xica-güedé cuàháⁿ-güedé te ní cãháⁿ-güedé nàcuáa ní xáhaⁿ cuè téé-áⁿ cãháⁿ-güedé. Te nchaa ñáiyi isràél ní níhi-yu tnúhu ní cãháⁿ-güedé-áⁿ, te diu-ni tnúhu-áⁿ cãháⁿ-yu ndéé vitna.

Jèsús xáhaⁿ-gá xii cue téé ní xica cuu ndíhi-gá nàcuáa ndùu chiuⁿ cada-güedé
(Mr. 16:14-18; Lc. 24:36-49; Jn. 20:19-23)

¹⁶ Te ndí ùxi ìⁿ cue téé ní xica cuu ndíhi Jèsús ní xica-güedé cuàháⁿ-güedé ìⁿ yucu cãa distritú Galiléa núú ní xáhaⁿ-gá naníhi tnáhá-güedé ndíhi-gá.

¹⁷ Te òré ní xini-güedé Jèsús te ní chíñuhu ñaha-güedé xii-gá, dico dava-güedé sàni ìⁿ sani úú iní-güedé núu diu-gá àdi ñá díú-gá.

¹⁸ Te Jèsús ní sãdehe yatni-gá ndéé núú-güedé, te ní xáhaⁿ-gá xii-güedé:

—Yùhú ndécú ndíhi-í tnúhu ndee ìni táxi tnúni-í cuèí andíu te cuèí ñuyúú-a.

¹⁹ Te vitna tàuchiu-í sá quihíⁿ-ndó ñihí ñuyúú cãháⁿ-ndó tnúhu-í núú ñáiyi cuendá tuha ñàhá-yu xii-í, te dacuàndute-ndó-yu. Te òré ducaⁿ cada-ndo, te cacunehe-ndo tátá-ó Dútú Ndióxi ndíhi yùhú Yaá cùú Déhe-gá ndíhi Espiritú-gá.

²⁰ Te cùñaha-ndo xii-yu sá ná càdá-yu nchaa nàcuáa sa ní dánèhé ñàhá-í xii-ndo càda-ndo. Te na cachí tnúhu-í sá cùndecu ndíhi ñaha-ni-í xii-ndo ñuyúú-a ndéé ná sáa nduu nãa-xi —cachí-gá xáhaⁿ-gá xii-güedé. Te ducaⁿ na cùnduu.

TNÚHU NÍ CHÍDÓ TNÚNÍ TÉ MÁCÚ

Té Juáá té dácuanđute ñaha xii ñáyiú cáhá-dé tnúhu Yá Ndióxi xiti yucu
(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá cáháⁿ nácuaá naníhí tǎhú-ó tnúhu Xitohó Jesucristú Déhe Yá Ndióxi.

² Te ndii Chàiaá téé ní xóo cáháⁿ tnúhu Yá Ndióxi ndéé sanaha ní chídó tnùnii ndii nácuaá ní xáhaⁿ Yá Ndióxi xii Déhe-gá, te duha ní xáhaⁿ-gǎ:

Tendaha-í ñⁿ téé codonú-dé núú-n, te dátúha-dé ñáyiú cuendá tñi-yu tnúhu-n.

³ Te téé-áⁿ quihi-dé xiti yucu te níhi cáháⁿ-dé cúñaha-dé xii ñáyiú:

“Chí dáñá ncháa ichi cuehé ichi duha ndécú-ndo, te tñi-ndo ichi váha, te ducaⁿ càda-ndo cuendá cundecu túha-ndo, chí véxi Yaá ío cúnunu”, duha cúñaha-dé xii-yu.

Duha ndúu tnúhu ní chídó tnùnii ndii Chàiaá nácuaá ní xáhaⁿ Yá Ndióxi xii Déhe-gá.

⁴ Te téé dii cuendá-xi ní ngódó tnùnii-áⁿ nánii-dé Juáá, te téé-áⁿ ní xíhi-dé xiti yucu ní cáháⁿ-dé tnúhu Yá Ndióxi, te ní xóo dácuanđute-dé ñáyiú, te duha ní xáhaⁿ-dé xii-yu:

—Chí dándixi túu iní sá ñá túú quide váha-ndo ndécú-ndo, te dañá-ndo ncháa ichi cuehé ichi duha te cuandute-ndo, te ducaⁿ te Yá Ndióxi cada càhnu iní-gá nchaa yíca cuéchi-ndo —duha ní xáhaⁿ-dé xii-yu.

⁵ Te nchaa ñáyiú distritú Júdeá, ndihi ñáyiú ñúu Jerusálén ní sáháⁿ-yu ndéé yúte Jórdán núú ndécú té Juáá ní xindedóho-yu nchaa tnúhu ní cáháⁿ-dé. Te cue ñáyiú ní náhmá nchaa yíca cuéchi-xi te ní dácuanđute ñaha-dé xii-yu.

⁶ Te té Juáá-áⁿ ní xihnu-dé dóó idi caméyu, te ñⁿ ñii ní cuu pañú xiti-dé, te ní xóo caxi-dé tíca làngóstá ndihi ndudí ñúñú cuéchi.

⁷ Te ní xáhaⁿ tñu-dé xii ñáyiú:

—Nchícúⁿ ñⁿ téé véxi, te téé-áⁿ ío-gá cúnú-dé dácúxí yuhú, chí yuhú cúú-í ñⁿ téé duuⁿ duuⁿ ñá túú tǎú-í ngúnundeyi-í nandaxi cuédicó ñⁿ nihnu cháú-dé dico quide-í chiúⁿ-dé.

⁸ Te yuhú dácuanđute ñaha-í xii-ndo, dico mee-dé taxi-dé Espiritú Yá Ndióxi cundecu ndihi-ndo —cáchi-dé xáhaⁿ-dé xii-yu.

Sándute Jesús

(Mt. 3:13-17; Lc. 3:21-22)

⁹ Te dàvá-áⁿ ní quee Jesús ñúu Nazàréⁿ ñúu yíndéhu distritú Galileá cuáháⁿ-gá yúte Jórdán. Te yacáⁿ ní dácuanđute ñaha té Juáá xii-gá.

¹⁰ Te òré ní nene-gá xiti ndute, te ní xini-gá nchii andiu, te ní quee Espiritú Yá Ndióxi véxi cuuⁿ-xi ngúndecu ndihi ñaha-xi xii-gá, te dátá cáá ñⁿ lómá cáá Espiritú-áⁿ véxi cuuⁿ-xi.

¹¹ Te òré-áⁿ ní tecú ní cáháⁿ Yá Ndióxi ndéé andiu, te xáhaⁿ-gá xii Jesús:

—Yòhó cúú-n Déhe-í téé ío cúu iní-í te ío cúdí iní ñáhà-í xii-n —cáchi-gá xáhaⁿ-gá.

Sáculhá quidé yica-xi cada Jesús sá ñá túú tǎú-gá cada-gá dico ñá túú ní quide-gá
(Mt. 4:1-11; Lc. 4:1-13)

¹² Te Espiritú Yá Ndióxi ndécá-xi Jesús cuáháⁿ ñⁿ xiti yucu.

¹³ Te xiti yucu-áⁿ ío víhi quiti dééⁿ, te xiáⁿ ndécú Jesús ní ngúta sáculhá quidé yica-xi cada-gá ñⁿ sá ñá túú tǎú-gá cada-gá dico ñá túú ní sándáá iní-gá. Te cue espíritú xínú cuéchi núú Yá Ndióxi ní xinu cuechi-xi núú-gá. Te ní xindecu-gá údico nduu xiti yucu-áⁿ.

Distritú Galileá ní chisaha Jèsús chiúⁿ ní tǎhú Tǎtá-gá Dútú Ndióxi cada-gá
(Mt. 4:12-17; Lc. 4:14-15)

¹⁴ Te sátá ní ngava té Juáá vecaá, te Jesús cuáháⁿ-gá distritú Galileá ðanehé-gá ñáyiú tnúhu váha, tnúhu sá cáháⁿ nácuaá ndíhu ndaha ñaha Yá Ndióxi xii-yu.

¹⁵ Te xáhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndióxi xii-ndo, te chí dáñá ncháa ichi cuehé ichi duha ndécú-ndo, te quindáá iní-ndo tnúhu váha, tnúhu sá cáháⁿ nácuaá naníhí tǎhú-ndo —cáchi-gá xáhaⁿ-gá xii-yu.

Jèsús cáháⁿ-gá cúmi tñáhà cue téé tñiú cháca

(Mt. 4:18-22; Lc. 5:1-11)

¹⁶ Te Jesús ñúhú-gá ichi cuáháⁿ-gá tá yáha-gá yuhu làgúná Galileá, te ní xini-gá té Xímú ndihi ñani-dé té Ndríxi xídáquee-güedé ñunu-güedé xiti ndute tñi-güedé cháca, chí quiti tñahí-áⁿ cúú chiúⁿ-güedé tñi-güedé-í.

¹⁷ Te Jesús ní xáhaⁿ-gá xii-güedé:

—Chí dáñá chiúⁿ quide-ndo-áⁿ, te quixi-ndo chitnahá ñáhá-ndo xii-í te taxi-í ingá núú chiúⁿ cada-ndo chí quihiⁿ-ndo cáháⁿ-ndo ñáyiú cuendá dácuháⁿ-yu tnúhu-í —cáchi-gá xáhaⁿ-gá xii-güedé.

¹⁸ Te òré-ni-áⁿ ní dáñá cué téé-áⁿ ñunu-güedé te ní tuha ñaha-güedé xii-gá.

¹⁹ Te cuáháⁿ-gá luha-gá, te ní xini-gá té Jácobó ndihi ñani-dé té Juáá ñúhú-güedé xiti bàrcú-güedé náticu-güedé ñunu-güedé, te ndi ndúú-güedé cúú-güedé déhe té Zebèdeú.

²⁰ Te ní cana ñaha-gá xii-güedé, te ní dándóo-güedé tǎtá-güedé ndihi cue téé xinu cuechi núú-güedé xiti bàrcú, te ní tuha ñaha-güedé xii-gá.

Īn tée yihi ñaha espíritu cundihí yucu ñávãha

(Lc. 4:31-37)

²¹ Te ní quexio Jesús ndihí cue tée-án ĩn ñuú nání Cãpernaúm, te yácán ndécú-gã ní tnahá nduu ndétatú ñáiyu, te cuãnguihu-gã veñúhu ñáiyu isrãél dãnehé ñáhã-gã xií-yu.

²² Te xicuñúhu vihi-yu nchaa tnúhu cãháⁿ-gã, chi quide-gã sã cúu-gã ĩn Yáá táxí tnúni vihi, te ñã túú dãcuaha ñaha-gã xií-yu dàtnã dãcuaha ñaha cue tée dãcuaha ñaha xií-yu nchaa tnúhu ní chídó tnúni ndí Moisés.

²³ Te xití veñúhu-án ndécú tnahã ĩn tée yihi ñaha ĩn espíritu cundihí yucu ñávãha, te espíritu-án ní quide-xi níhi ní cãháⁿ tée-án, te xãhaⁿ-dẽ xii Jesús:

²⁴ —¿Te ná cuiñi yohó Jesús tée ñuú Nazàrèt cada ñaha-n xii-ndí nõu vëxi-n nõu ndécú-ndí-i? ¿Áⁿ vëxi-n dãnaa ñaha-n xii-ndí? Chi yúhú xiní ñãhá-í xii-n sã cúu-n ĩn tée ñã túú tnahí cuéchi-xi, chi núú Yã Ndióxi ní quee-n vëxi-n ñüyú-a —cãchí-dé xãhaⁿ-dẽ xii-gã.

²⁵ Dico Jesús ní tenãã-gã espíritu cundihí yucu ñávãha-án, te xãhaⁿ-gã:

—¡Cadí yuhu-n, te taquëe yiqui cuiñi tée-án! —cãchí-gã xãhaⁿ-gã xii espíritu-án.

²⁶ Te espíritu cundihí yucu ñávãha-án ní dácũyihí ñáhã-xí xii tée-án, te ní dácánã sãa ñaha-xi, te ní quee-xi yiqui cuiñú-dé cuáhã-xi.

²⁷ Te nchaa ñáiyu xĩndecu-án ïo ní cuiñúhu-yu, te ní xitnahã-yu:

—¿Te nása ndúu-tu sã quidé tée-a? ¿Ndudú sãã cãháⁿ-tu-dé sãnuu? Te quide-dé dàtnã quidé ĩn tée cunuu vihi, chi cãháⁿ-ni-dé te sãndãã iní ñáhã nchãã espíritu cundihí yucu ñávãha —cãchí-yu xitnahã-yu.

²⁸ Te ïo ndihí ní níhi nchaa ñáiyu dava-gã ñuú yĩndèhu distritú Galileá tnúhu nchaa nãcuãã cãháⁿ Jesús ndihí nchaa sã quidé-gã.

Jesús quidé tãtna-gã nãã ñãdihí té Ximú

(Mt. 8:14-15; Lc. 4:38-39)

²⁹ Te òrè ní ndee Jesús veñúhu cue ñáiyu isrãél, te cuáhãⁿ-gã ndihí té Jãcobó ndihí té Juãã vehe té Ximú ndihí té Ndrixí.

³⁰ Te nãã ñãdihí té Ximú cùhú-aⁿ ñùhu vihi-aⁿ cahni, te ndihí-ni ní xãhaⁿ-güedẽ xii Jesús sã cùhú-aⁿ.

³¹ Te ní sãháⁿ-gã núú cáã ñaha cùhú-án te ní tñi-gã ndaha-aⁿ ní ndocani ñaha-gã xii-aⁿ. Te òrè-ni-án ní nchico-aⁿ cahni, te ní ngüta-aⁿ xinu cuechi-aⁿ núú-güedẽ ndihí-gã.

Jesús quidé tãtna-gã vai ñáiyu cùhú

(Mt. 8:16-17; Lc. 4:40-41)

³² Te òrè sa cuiñi-xi cundiçuiⁿ te ní quexio ñáiyu núú ndécú Jesús, te nchaa ñáiyu cùhú ní dátacã-yu ndecã-yu ní sãã núú-gã, te

tnahã cue ñáiyu yihi ñaha espíritu cundihí yucu ñávãha ndecã-yu ní sãã núú-gã.

³³ Te nchaa ñáiyu ñuú-án ní chítú níhñu-yu yuyèhe vehe núú ní quexio Jesús.

³⁴ Te Jesús ní quide tãtna-gã nchaa ñáiyu cùhú cuéi ndi dññⁿ ndí dññⁿ nõu cuéhé tnahã-yu ĩn ĩn-yu, te ní queñihu-gã nchaa espíritu cundihí yucu ñávãha yihi ñaha xii ñáiyu, te ñã túú ní dàña-gã cãháⁿ cue espíritu cundihí yucu ñávãha-án ní ĩn tnúhu, te ducaⁿ ní quide-gã chi cue espíritu-án sa xiní-xi yoo cùu-gã.

Jesús cãháⁿ-gã tnúhu Yã Ndióxi distritú Galileá

(Lc. 4:42-44)

³⁵ Te òrè vátã tũndaã váha-gã ní ndacoo Jesús cuáhãⁿ-gã ĩn xio yuhu ñuú nõu ñã túú ñáiyu ndecu cuendã yácãⁿ cãháⁿ ndihí-gã Yã Ndióxi.

³⁶ Te té Ximú ndihí cue tée cundihí-dé nãndücu ñaha-güedé xii-gã.

³⁷ Te òrè ní naníhí ñáhã-güedé xii-gã, te ní xãhaⁿ-güedé:

—Nchaa ñáiyu nãnducu ñahã-yu xii-n —cãchí-güedé xãhaⁿ-güedé xii-gã.

³⁸ Te ní xãhaⁿ-gã xii-güedé:

—Chí ná quiñi-ó nchãã ñuú xĩndãã yatni-a, chi danèhé-í ñáiyu tnúhu Yã Ndióxi chi ñu cñuⁿ-án vëxi-í —cãchí-gã xãhaⁿ-gã xii-güedé.

³⁹ Te Jesús tá xica ndodo-gã cuáhãⁿ nchaa ñuú yĩndèhu distritú Galileá danèhé-gã ñáiyu, te ndi tnahã ĩn ĩn ñuú sãã-gã te ducaⁿ cuãnguihu-gã veñúhu-yu dãnehé ñáhã-gã xií-yu tnúhu Yã Ndióxi, te cue ñáiyu yihi ñaha espíritu cundihí yucu ñávãha ta queñihu-gã nchaa espíritu-án yiqui cuiñú-yu cuáhãⁿ.

Jesús quidé tãtna-gã ĩn tée tnahã cuéhé sã dátèhyú nihnu-xi yiqui cuiñú-ó

(Mt. 8:1-4; Lc. 5:12-16)

⁴⁰ Te ní quexio ĩn tée tnahã cuéhé sã dátèhyú nihnu-xi yiqui cuiñú-ó nõu Jesús, te ní ngüñí xití-dé núú-gã cãháⁿ ndãhú-dé, te xãhaⁿ-dẽ xii-gã:

—Vëxi-í cãháⁿ ndãhú-í núú-n nõu vá cündee iní-n càda tãtna ñaha-n xii-í chi cùtnuní iní-í sã ndácú-n —cãchí-dé xãhaⁿ-dẽ xii-gã.

⁴¹ Te Jesús ní cundãhú iní ñáhã-gã xii-dé te ní dàcãã-gã ndaha-gã ní tendaha ñaha-gã xii-dé, te xãhaⁿ-gã:

—Cuu cada tãtna ñaha-í xii-n, te vitna ndúha-n —cãchí-gã xãhaⁿ-gã xii-dé.

⁴² Te òrè-ni-án ní xócuiñí cuéhé tnahã-dé.

⁴³⁻⁴⁴ Te Jesús ní cãháⁿ vihi-gã dóho-dé, te xãhaⁿ-gã xii-dé:

—Vitna cuanúhú-na, dico vá yõ ĩn cùñaha-n sã ní quide tãtna ñaha-í xii-n, te núú dütü-ni cuáhãⁿ cuendã sã ná quini

ñáhá-dé xii-n sà ní ndúha-n te cuáha-n-dé sá ndúú tǎhú Yá Ndióxi dátá ní cachí ndí Moisés cuendá ná quini ñáiyu sá ndáá ní ndúha-n —cachí-gá xáhaⁿ-gá xii-dé.

⁴⁵ Te téé ní cuhú-án ní xica-dé cuáháⁿ-dé, te ní ngúita-dé xáhaⁿ-dé xii nchaa ñáiyu ta nàníhí-dé nàcuáa ní quide Jèsús ní quide tátá ñaha-gá xii-dé. Te sá dúcáⁿ ní xité nuu téé-án cuendú nàcuáa ní quide ñaha Jèsús xii-dé ní quide tátá ñaha-gá ní ndúha-dé, te xiáⁿ nuu dayuhu ní xóo quíhu-gá dava ñuu núú lo vai ñáiyu ndèhe ñaha xii-gá, te ní xóo cundecu-gá xití yucu núú ñá túú ñáiyu ndècu. Te nchaa ñuu ní quee ñáiyu ní sáháⁿ-yu núú ndécú-gá ní cáháⁿ ndíhi ñáhá-yu xii-gá.

2

Jèsús quidé tǎta-gá ñⁿ téé cùhú ñá cúú-gǎ candá nihnu

(Mt. 9:1-8; Lc. 5:17-26)

¹ Te sáta ní cuu ñⁿ úú nduu sá ní quee Jèsús ñuu Capèrnaúm te ní nasáa tucu-gá, te cue ñáiyu ní níhi-yu tnúhu sá ní ndexio-gá núú quidé vèhe-gá.

² Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnáhá-gá-yu. Te ní ngúita-gá ní dánèhé ñáhá-gá xii-yu tnúhu Yá Ndióxi.

³ Te òré-án ní quexio cúmi tnáhá cue téé núú ndécú-gá nchídó-güedé ñⁿ téé cùhú ñá cúú-gá candá nihnu-dé.

⁴ Dico ñá túú ní ndàcu-güedé sáa-güedé ndéé núú-gá chí lo cuéhé ñáiyu ndècu. Te xiáⁿ nuu ní sáa-güedé díquí vèhé núú yíhí-gá-án ní caáⁿ-güedé, te ichi ndáa díquí vèhé-án ní dáquèe-güedé téé cùhú-án, te ñuhu-dé ñⁿ xító ní dáquèe ñaha-güedé ndéé núú-gá.

⁵ Te Jèsús sa ní cutnùni iní-gá sá sàndáá iní ñáhá-güedé xii-gá nuu ní xáhaⁿ-gá xii téé cùhú-án:

—Yòhó téé cùhú, sa ní quide càhnu iní-í nchaa cuèchi-n —cachí-gá xáhaⁿ-gá xii-dé.

⁶ Te xiáⁿ xínucóo ñⁿ úú cue téé dàcuaha ñaha xii ñáiyu nchaa tnúhu ní chídó tnùni ndí Moisés, te sá dúcáⁿ ní cáháⁿ Jèsús núú cue téé-án ní sani iní-güedé:

⁷ “Tée-a cáháⁿ cuéhé-dé cuendá Yá Ndióxi duha cáháⁿ-dé, chi vá yóo ñⁿ ndàcu cada cahnu iní nchaa yíca cuèchi ñáiyu chí ñⁿ ddi díí-ni Yá Ndióxi quidé càhnu iní-gá”, duha ní sani iní-güedé.

⁸ Dico òré-ni-án ní cutnùni iní Jèsús nàcuáa sàni iní-güedé, núú ní xáhaⁿ-gá xii-güedé:

—¿Te ná cuendá ducaⁿ sàni iní-ndó-í?

⁹ Te sá dúhá ní xáhaⁿ-í xii téé cùhú-a sá ní quide càhnu iní-í nchaa yíca cuèchi-dé, te xiáⁿ nchòhó ñá túú cutnùni iní-ndó nuu ndáá cáháⁿ-í àdi ñá ndáá. Dico núú cúu-í-dé sá ndácoo-dé, te ndocani-dé xító ñuhu-dé véxi, te caca-dé, te cutnùni ndáá iní-ndó nuu ndáá

cáháⁿ-í àdi ñá ndáá chi cundehe núú-ndó nàcuáa cada-í.

¹⁰ Te vitna na càda-í nàcuáa cutnùni iní-ndó nchaa-ndo sá yùhú Tée cùu ñani tnáhá-ndó nchaa-ndo ndecu ndíhi-í tnúhu ndee iní sá cáda càhnu iní-í nchaa cuèchi ñáiyu ñuyúy-a —cachí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii téé cùhú-án:

¹¹ —Ndacóo te ndocani-n xító ñuhu-n véxi-án, te nùhú-n vèhe-n —cachí-gá xáhaⁿ-gá xii-dé.

¹² Te òré-ni-án ní ndacóo-dé, te ní ndocani-dé xító ñuhu-dé ní quexio-án, te ndèhe nchaa ñáiyu xindecu-án ní ndee-dé tnuú-yu cuáháⁿ-dé. Te sá dúcáⁿ ní quide Jèsús ní quide tátá-gá téé-án, xiáⁿ lo ní cuñúhu nchaa ñáiyu, te ní xitnàhá-yu:

—Càhnu vihi cuu Yá Ndióxi, chí ñá ñⁿ nduu quini-ó dùha cuu datná ní cuu vitna —cachí-yu xitnàhá-yu.

Jèsús cáháⁿ-gá ñⁿ téé nàni Levi

(Mt. 9:9-13; Lc. 5:27-32)

¹³ Te Jèsús cuáháⁿ tucu-gá yuhu làgúná, te ío cuéhé ñáiyu ní sátnáhá ñáhá xii-gá, te ní dánèhé ñáhá-gá xii-yu tnúhu Yá Ndióxi.

¹⁴ Te òré ní yáha ní dánèhé ñáhá-gá xii-yu, te ní naqueheⁿ-gá ichi, te ní yáha yatni-gá ñⁿ xichi núú núcúo ñⁿ téé nàni Levi déhe ñⁿ téé nàni Alfeú quidé còbrá-dé ñáiyu cuendá impuèstú chí còbrádór cúú-dé. Te òré ní xini ñáhá-gá xii-dé, te ní xáhaⁿ-gá:

—Néhe chitnahá ñáhá-n xii-í —cachí-gá xáhaⁿ-gá xii-dé.

Te té Leví-án ní ndacuñí-dé, te ní tuha ñaha-dé xii-gá.

¹⁵ Te té Leví-án cuáháⁿ-dé ndíhi Jèsús vèhe-dé. Te yíhi Jèsús mèsá xéxi-gá ndíhi cue téé xica cuu ndíhi-gá, te tnáhá vai cue téé cuihna iní-xi quide còbrá ñáhá xii ñáiyu cuendá impuèstú, ndíhi dava-gá cue téé ndècu ichi cuéhé ichi duha núcúo ndíhi ñaha-güedé xii-gá xéxi ndíhi ñaha-güedé, te ducaⁿ chí ío vai ñáiyu nchicúⁿ ñáhá xii-gá.

¹⁶ Te sá ní xini cue téé dàcuáha ñaha xii-yu nchaa tnúhu ní chídó tnùni ndí Moisés, ndíhi cue téé cùu fariséu xéxi Jèsús ndíhi nchaa cue téé-án nuu ní xicáⁿ tnúhú-güedé núú cuè téé xica cuu ndíhi-gá, te xáhaⁿ-güedé:

—¿Ná cuendá ducaⁿ quide téé cuu mestrú-ndó xéxi-dé ndíhi cue téé cuihna iní-xi quide còbrá ñáhá xii ñáiyu cuendá impuèstú, ndíhi nchaa dava-gá cue téé ndècu ichi cuéhé ichi duha-í? —cachí-güedé xáhaⁿ-güedé.

¹⁷ Te Jèsús ní tecú dóho-gá nàcuáa nduu tnúhu ní xáhaⁿ-güedé xii cue téé xica cuu ndíhi-gá, núú ní xáhaⁿ-gá xii-güedé:

—Nchaa ñáiyu ñá túú cùhú chí ñá túú xini ñuhú-yu ñátátná, dico nchaa ñáiyu cùhú chí xini ñuhú-yu ñátátná. Te yùhú véxi-í cáháⁿ-í ñáiyu cutnùni iní-xi sá ndécú cuèchi-xi te ñá

túú vëxi-í cãháⁿ-í ñâyiu cãchí sã ñà túú ndècu cuéchi-xi —cãchí-gá xãhaⁿ-gã xii-güedé.

Cuendá cue ñâyiu ñá túú tnãhí ná xéxi áma cãháⁿ ndihí-yu Yá Ndióxi

(Mt. 9:14-17; Lc. 5:33-39)

¹⁸ Te cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tnãhí ná xéxi-güedé áma cãháⁿ ndihí-güedé Yá Ndióxi. Te ñⁿ nduu ducaⁿ xiquide-güedé, te ní sáháⁿ ñâyiu ní xicáⁿ tnúhú-yu núú Jësús, te xãháⁿ-yu xii-gá:

—Cuñí-ndí cachí tnúhu-n ná cuendá cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tnãhí ná xéxi-güedé áma cãháⁿ ndihí-güedé Yá Ndióxi, te cue téé xica cuu ndihi-n ñá túú dùcaⁿ quide-güedé —cãchí-yu xãháⁿ-yu xii-gá.

¹⁹ Te Jësús ní xáhaⁿ-gã xii-yu:

—Nchòhó xini-ndó sã vã cúú cũñaha-o xii ñâyiu ñuhu vico tnãndaha sã vã cúú cãxi-yu nini ndècu ndihi ñaha téé tnãndaha xii-yu.

²⁰ Dico sáá nduu te vã cündècu ndihi ñaha-gá téé tnãndaha-áⁿ xii-yu, te dàvá-áⁿ te cahni iní-yu vã cãxi-yu cuendá sã ndihú iní-yu.

²¹ Te vã yõ ñⁿ dándée luha dóó sáá ñⁿ dóó sa ní cuu túhú vihí, chi dóó sáá-áⁿ nãndiyi-xi te uuⁿ-gá ndata-xi dóó sã ní cuu túhú-áⁿ.

²² Te ni vã yõ ñⁿ chihí ndidí sáá xití ñⁿ lamba sa ní cuu túhú vihí, chi núu yoo ducaⁿ na càda te ndava lamba sa ní cuu túhú-áⁿ, chi ío ñihí yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xíáⁿ xíní ñúhu-xi quée ndidí sáá-áⁿ xití ñⁿ lamba saa —cãchí-gá xãhaⁿ-gã xii-yu.

Cue téé xica cuu ndihi Jësús sãhnú-güedé yoco triú nduu ndetátú ñâyiu

(Mt. 12:1-8; Lc. 6:1-5)

²³ Te ñⁿ nduu cùu-xi nduu ndetátú ñâyiu ñúhu Jësús ichi ndihi cue téé xica cuu ndihi-gá, te ta yãha-gá ndihi-güedé ñⁿ xichi núú cáá triú, te ní ngúíta-güedé sãhnú-güedé yoco triú-áⁿ.

²⁴ Te cue téé cùu fariséú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihi-n sãhnú-güedé yoco triú vitna cùu-xi nduu ndetátú-i? Te ñá túú tàú-güedé ducaⁿ càda-güedé —cãchí-güedé xãhaⁿ-güedé xii-gá.

²⁵ Te ní xáhaⁿ-gã xii-güedé:

—¿Te náa vátá dácũaha tnahi-gá-ndó núú túú Yá Ndióxi núú cãháⁿ-xi nãcuáa ní quide ndí Dãvíí cútñahá ní xihí ndíí docó ndihi cue téé ní xica cuu ndihi ndíí-áⁿ?

²⁶ Te dàvá-áⁿ ní xíndecu ñⁿ téé ní xínani Abiátár ní cuu-dé dútú cúnúu, te ndíí Dãvíí ní quíhu ndíí xití vehe Yá Ndióxi ní queheⁿ ndíí páá ní cuu íí ndécú-áⁿ ní dácãhñu ndíí cue téé ní xica cuu ndihi ndíí ní xexi ndíí ndihi-güedé, te mee-ní cué dútú tàú-güedé

caxi-güedé páá-áⁿ ní cùu —cachí-gá xãhaⁿ-gã xii-güedé.

²⁷ Te ní xáhaⁿ tucu Jësús xii-güedé:

—Mee Yá Ndióxi ní taxi ndecu-gá nduu ndetátú ñâyiu, te ñá túú ní cãchí-gá sã méé-yu nãndi caní iní-yu cadá-yu canehe ñⁿ-yu nduu ndetátú-yu-áⁿ.

²⁸ Te yúhú Téé cùu ñani tnãhá-ndó nchãa-ndo, tnãhá-í ndécú ndihí-í tnúhu ndee iní sã cùu-í nchaa ñâyiu nãcuáa cadá-yu nduu ndetátú-ó-áⁿ —cãchí-gá xãhaⁿ-gã xii-güedé.

3

Ñⁿ téé ní yichí ñⁿ xio ndaha-xi

(Mt. 12:9-14; Lc. 6:6-11)

¹ Te Jësús cuánguihu tucu-gá xití veñúhu, te xití veñúhu-áⁿ ndécú ñⁿ téé ní yichí ñⁿ xio ndaha-dé.

² Te xíaⁿ ndécú cué téé xito dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetátú-güedé ndihi ñâyiu, cuendá ducaⁿ te níhí-güedé nãcuáa cada-güedé cacáⁿ cuéchi-güedé cuendá-gá.

³ Te ní xáhaⁿ-gã xii téé cùhú ndaha-xi-áⁿ:

—Ndacuíñí te ngúnutñí-n cuãdava iha —cãchí-gá xãhaⁿ-gã xii-dé.

⁴ Te ní xicáⁿ tnúhú-gã núú-güedé, te xãhaⁿ-gã:

—Chí cãchí tnúhu ná cúú sã cúú càda-o nduu ndetátú-ó. ¿Sá vãha ñã sã cuèhé? ¿Sá càdá tátna-o ñâyiu cùhú ñã sã cãhni-ó-yu? —cãchí-gá xãhaⁿ-gã xii-güedé.

Dico ní ñⁿ-güedé ñá túú tnãhí ní cãháⁿ-güedé.

⁵ Te Jësús ní xíndéhé vãha-gá núú nchãa-güedé te ní cudééⁿ-gã, te ní ndihú iní-gá chi ío sáá iní-güedé, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n —cãchí-gá xãhaⁿ-gã xii-dé.

Te ní ndocani-dé ndaha-dé, te òré-ni-áⁿ ní ndúha.

⁶ Te cue téé cùu fariséú ní xica-güedé cuáháⁿ-güedé ñⁿ xichi núú ní nanihí tnãhá-güedé ndihi cue téé cündíhí té Hèrodés cuendá ndatnúhu-güedé nása cada-güedé cahni-güedé Jësús.

Cuéhé vihí ñâyiu ní quexio yuhu lagúná

⁷ Te Jësús ní xica-gá cuáháⁿ-gã ndihi cue téé xica cuu ndihi-gá yuhu lagúná distritú Galilea, te ío cuéhé ñâyiu distritú-áⁿ nchicúⁿ ñãhá-yu xii-gá cuáháⁿ.

⁸ Te núú ní quexio-gá-áⁿ ní sáháⁿ ñâyiu distritú Júdeá, ñâyiu ñuu Jerusalén, ñâyiu distritú Idúmeá, ñâyiu xíndecu ndãa ingá xio yúte Jórdán, ndihi ñâyiu xíndecu yatni ñuu Tirú ndihi ñuu Sidón, te ducaⁿ ío vái-yu ní sáháⁿ núú ndécú-gã chi ní níhí-yu tnúhu nchaa nãcuáa quide-gá.

9 Te Jësús ní xáhaⁿ-gã xii cue téé xica cuu ndihí-gá sá cádá túha-güedé ìⁿ bàrcú cuendá caa-gá núú-xi cuendá sá vã dádèhnde ñáhã-yu xii-gá chí ío cuèhè-yu.

10 Te sá dúcãⁿ ní níhí-yu tnúhu sá quidé tátna-gã ñáyíu cùhú, núú xiãⁿ nchaa dava-gã ñáyíu cùhú súúni díco ngõnchíhi tnàhá-yu cuáhãⁿ-yu núú ndécú-gã cuini-yu tnãndéé ñáhã-yu xii-gá cuendá sá cuini-yu ndúha-yu.

11 Te cue ñáyíu yíhi ñaha espíritú cúndíhi yucu ñávãha ní sanu xiti ñaha-xi xii-yu núú Jësús órè ní xini ñáhã-xi xii-gã, te xiãⁿ ní quide níhi ní cáháⁿ-yu, te xáhãⁿ-yu xii Jësús:

—ÿJòhò cúú-n Dèhe Yá Ndiòxí! —càchí-yu xáhãⁿ-yu xii-gã.

12 Te Jësús ní tenãã-gã nchaa espíritú cúndíhi yucu ñávãha-án, te ní xáhaⁿ-gã xii nchaa ñáyíu ní xíhi-xi-án sã vã càháⁿ-yu núú ñáyíu yoo cùu-gã.

Jësús cãxi-gã úxúú tnàhá cue téé dacuàha ñaha xii ñáyíu tnúhu-gã

(Mt. 10:1-4; Lc. 6:12-16)

13 Te sátã dúcãⁿ ní cuu te Jësús ní sáã-gã ìⁿ yucu, te xiãⁿ ndécú-gã ní cana-gã nchaa cue téé càchí iní-gã. Te órè ní quexío nchaa cue téé-án núú-gã,

14 te ní cãxi-gã úxúú tnàhá cue téé caca cuu ndihí-gã, te diu-ní cue téé-án tendaha-gã quíhíⁿ-güedé cáháⁿ-güedé tnúhu-gã núú ñáyíu.

15 Te ní sãñaha-gã xii-güedé tnúhu ndee iní cundecu ndihí-güedé cuendá cada tátna-güedé ñáyíu cùhú, ndihí cuendá queñuhu-güedé nchaa espíritú cúndíhi yucu ñávãha yíhi ñaha xii ñáyíu.

16 Te duha xínani ndi úxúú cue téé-án: ìⁿ-dé nání-dé Xímú, te mee-gã ní taudíu ñaha-gã xii-dé sã cúnãni-dé Pèlú.

17 Te ingã-dé nání-dé Jãcobó, te ingã-dé nání-dé Juãá, te ñani té Jãcobó-án cúú tã Juãá te ndi ndúú-güedé cúú-güedé déhe té Zebèdeú, te ndi ndúú cue téé-án ní dánání ñaha Jësús xii-güedé Boãnergés, te tnúhu-án queé-xi: Cue téé ío yáchí cúdeéⁿ, duha queé-xi tnúhu-án.

18 Te duha xínani dàva-gã-güedé: Té Ndríxí, té Lipé, té Bartolomé, té Mãteú, té Mãxí, té Jãcobó déhe té Àlféu, té Tãdeú, té Xímú téé ní cundíhi cue téé canãristã ní cuú,

19 ndihí té Júdás Iscãrióté téé ní sáã nduu ní sãha cuendá ñáhã xii Jësús núú cuè téé cùu úhú iní ñáhã xii-gã, duha xínani cuè téé ní cãxi Jësús ní xica cuu ndihí-gã.

Càchí-güedé sã ndécú ndihí Jësús yucu ñávãha díco ñã ndãú

(Mt. 12:22-32; Lc. 11:14-23; 12:10)

Te sátã dúcãⁿ te cuáhãⁿ-gã ndihí-güedé núú quidé vèhe-gã.

20 Te ío vai ñáyíu ní tacã-ni tucú-yu xiãⁿ, te ní ñã ní níhí-gã nása cada-gã caxi-gã ndihí cue téé xica cuu ndihí-gã cuendá sã ío vai-yu.

21 Te cue ñáyíu cùu ndi mee Jësús ní níhí-yu tnúhu nchaa nãcuãa cùu, te nchaa ñáyíu ñã cùtnuni váha iní-xi ní cachí-yu sã ní nduu lùcú-gã núu xiãⁿ cuáhãⁿ ñáyíu cùu ndi mee Jësús núú ndécú-gã cuendá candeca ñáhã-yu xii-gã núhú ní cuú.

22 Te cue téé dàcuaha ñaha xii ñáyíu nchaa tnúhu ní chídó tnùni ndíi Moisés véxi ndéé ñuu Jerusãlèn ní cáháⁿ cuèhé-güedé cuendá Jësús, chí ní xítñaha-güedé:

—Téa-n ndecu ndihí-dé sãcuíhnã, te diu xiãⁿ chùndèe ñaha-xi xii-dé queñuhu-dé nchaa espíritú cúndíhi-xi yíhi ñaha xii ñáyíu, te diu-ni-xi tàxi tnuni-xi nchaa espíritú-án — duha ní xítñaha-güedé.

23 Te Jësús ní cana ñaha-gã xii-güedé, te ní caní-gã ìⁿ cuendú núú-güedé nãcuãa tecú tnùni-güedé tnúhu-gã, te xáhãⁿ-gã xii-güedé:

—¿Te nása cada sãcuíhnã queñuhu-xi cue espíritú cúndíhi-xi yíhi ñaha xii ñáyíu-í?

24 Te nchòhó xini-ndó sã núu ìⁿ téé yíndaha ìⁿ nacióⁿ vá cúú ìⁿ-nuu-dé ndihí cue téé cúndíhi-dé, te vá cúdii-dé cunuú-dé.

25 Te diu-ni ducaⁿ sãtnahã-xi cùu tucu ñáyíu xíndecu ìⁿ-ni vèhe, chí núu vá cúú ìⁿ-nuu-yu, te vá cúdii-yu cundecu càhnú-yu.

26 Te núu sãcuíhnã ñã túú cùu ìⁿ-nuu-xi ndihí cue espíritú cúndíhi-xi, te vá cúdii-xi cundecu-xi taxi tnùni-xi te núu ducaⁿ quide-xi.

27 Te nchòhó xini-ndó sã cuè ñadúhú chí vá ndécú-güedé cuendá-ni quíhu-güedé duhu-güedé vèhe ìⁿ téé ío ndee, chí díhna-gã xini ñuhu-xi tñi-güedé téé-án dacútu ñaha-güedé xii-dé dátñuni ducaⁿ te ndacu-güedé duhu-güedé nchaa sã ndécú ndihí-dé.

28 Te na càchí tnúhu ndãá-í xii-ndo sã ncháá sã cuèhé sã dúhá quide ñáyíu, ndihí nchaa tnúhu cuèhé tnúhu duha cáháⁿ-yu cuendá Yã Ndiòxí cuu cada càhnú iní-gã.

29 Díco cue ñáyíu na càháⁿ cuèhé cuendá Espíritú Yã Ndiòxí, ñáyíu-án vã cádá càhnú iní ñáhã tnàhí-gã xii-yu, chí cundecu-ni cuèchi-yu núú-gã ní caa ni quíhíⁿ —càchí-gã xáhãⁿ-gã xii-güedé.

30 Te ducaⁿ ní cáháⁿ-gã chí càchí-güedé sã ndécú ndihí-gã espíritú cúndíhi yucu ñávãha.

Nãná Jësús ndihí cue ñani-gã

(Mt. 12:46-50; Lc. 8:19-21)

31 Te ní quexío nãná Jësús ndihí cue ñani-gã núú ndécú-gã xínutñi-yu quehé, te ní xáhãⁿ-yu xii ìⁿ ñáyíu xíndecu-án sã dáyãha-yu tnúhu núú-gã cuendá quee-gã ndatñuhu ndihí ñaha-gã xii-yu.

32 Te cue ñáyíu xínucóo ní càndéé díhi-gã ní xáhãⁿ-yu xii-gã:

—Náná-n ndihi cue ñani-n ndécú-yu quehé nándücu ñahá-yu xii-n —cächí-yu xáhãⁿ-yu xii-gá.

³³ Te Jèsús ní xáhaⁿ-gá xii-yu:

—Te cachí tnúhu-ndo yòndi-gá ñáyü cùu datná nãná-í ndihi dàtná cue ñani-í —cächí-gá xáhaⁿ-gá xii-yu.

³⁴ Te dàtnüni ní xíndéhé vãha-gá núu nchãa ñáyü xínucóo ní càndéé ñãhã-gá-áⁿ, te ní xáhaⁿ-gá xii-yu:

—Nchaa ñáyü-a cùu-yu dàtná nãná-í ndihi dàtná cue ñani-í.

³⁵ Chi nchaa ñáyü quide nacuaá càháⁿ Yã Ndióxi, ñáyü-áⁿ cùu-yu dàtná cue ñani-í, ndihi dàtná cue cùha-í, ndihi dàtná nãná-í —cächí-gá xáhaⁿ-gá xii-yu.

4

*Nàcuáa quide téé cuángacáⁿ triú
(Mt. 13:1-9; Lc. 8:4-8)*

¹ Te Jèsús ní ngüita-gá dácuaa tucu-gá ñáyü yuhu làgúná. Te cuéhé víhi-yu ní tacá xiáⁿ núu cuásaá-gá núu ñⁿ bàrcú núnüi xití ndute làgúná-áⁿ, te núu xiãⁿ ní ngóo-gá te ní ngüita-gá dánéhé ñáhã-gá xii-yu, te nchaaⁿ-yu xixúcu-yu yuhu làgúná-áⁿ.

² Te ní ngüita-gá ní cani-gá titní cuèndú núu-yu nàcuáa tecú tnüni-yu tnúhu-gá, te xáhaⁿ-gá xii-yu:

³ —Chí cùndédóho váha ñⁿ cuèndú ná cani-í-a. ñⁿ téé cuángacáⁿ-dé triú.

⁴ Te òré ní ngüita-dé dängoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatàcá-güedi.

⁵ Te dava ní ngava ñuhu yadi núu yíhi víhi yúu, te ndihi-ni ní xínu-xi cuèndá sá ñã túú cãvihu ñuhu.

⁶ Dico òré ní nayehé ñã túú ní cùndee iní-xi chí ní yíchi-xi, chí ñã túú ní níhi quíhⁿ cùnú yóho-xi.

⁷ Te dava ní ngava núu yúcu ndíquíⁿ tnu iñu, te ñⁿnuu-ni ní xínu-xi te ní sahnu-xi te tnu iñu-áⁿ ní sahnu-xi te ní dánáá-xi nchãa triú sá ní xínu-áⁿ.

⁸ Dico dava triú-áⁿ ní ngava-xi núu ndécú ñuhu cocoⁿ, te xiãⁿ ní xínu-xi te ní sahnu-xi te ío váha ní cuu, chí núu ñⁿ-ní triú-áⁿ te dava yoco-xi ní ngüihí ócú úxí triú-xi, te dava yoco-xi ní ngüihí únidico triú-xi, te dava yoco-xi ní ngüihí ñⁿ cièndú triú-xi —cächí-gá xáhaⁿ-gá xii-yu.

⁹ Te xáhaⁿ tucu-gá xii-yu:

—Nchaa nchòhò ñáyü ní xíndedóho nchaa tnúhu ní càháⁿ-í-a, te ío váha chí cuãha cuèndá —cächí-gá xáhaⁿ-gá xii-yu.

*Jèsús càháⁿ-gá ná cuèndá ducaⁿ càni-gá
cuèndú*

(Mt. 13:10-17; Lc. 8:9-10)

¹⁰ Te sátá ní ndaca ñáyü-áⁿ te ní quèndó mee-nã Jèsús ndihi cue téé xica cuu ndihi-gá, ndihi ñⁿ úú-nã ñáyü. Te ñáyü-áⁿ ndihi cue téé-áⁿ ní xicáⁿ tnúhü-yu ndihi-güedé núu-gá, núu nása quèe-xi cuèndú ní cani-gá núu-yu ndihi-güedé.

¹¹ Te ní xáhaⁿ-gá:

—Nchòhò chí sa cächí tnúhu Yã Ndióxi xii-ndo ñⁿ sá vátá quini-gá-ndó, chí cächí tnúhu-gá nàcuáa cada-gá ndihu ndaha-gá ñáyü, dico dava-gá ñáyü càni-í mee-ni cuèndú núu-yu.

¹² Chí cuèi na quini-yu nchaa nàcuáa cuu dico ní vã cùtnüni iní-yu ná cuèndá ducaⁿ cùu, ádi cuèi na cùndedóho-yu dico ní vã tecú tnüni-yu. Te ducaⁿ ndòhò-yu cuèndá sá vã quíndáá iní-yu Yã Ndióxi, ndihi cuèndá sá vã cádá càhnu iní-gá nchaa yícá cuèchi-yu —cächí-gá xáhaⁿ-gá xii-yu ndihi-güedé.

*Jèsús càháⁿ-gá nàcuáa quèe-xi cuèndá téé
cuángacáⁿ triú*

(Mt. 13:18-23; Lc. 8:11-15)

¹³ Te ní xáhaⁿ tucu Jèsús xii cue téé xica cuu ndihi-gá, ndihi cue ñáyü-áⁿ:

—Nchòhò, ñã túú ní tecú tnüni-ndó cuèndú ní cani-í núu-ndó, te núu ducaⁿ, ¿te nása tecú tnüni-ndó dãva-gá cuèndú cani-í núu-ndó-í? Te na cächí tnúhu-í xii-ndo nàcuáa quèe-xi cuèndú ní cani-í núu-ndó.

¹⁴ Te téé cuángacáⁿ triú-áⁿ cùu-dé dàtná ñⁿ téé cuáhãⁿ càháⁿ tnúhu Yã Ndióxi núu ñáyü.

¹⁵ Te triú-áⁿ cùu-xí dàtná tnúhu Yã Ndióxi, te triú sá ní quene ndava ní ngava ndéé ichi, xiãⁿ cùu-xí dàtná ñáyü ní tnahã iní-xi tnúhu Yã Ndióxi, dico sácuihnã cuáhãⁿ-xi xòcani-xi tnúhu-gá iní-yu cuèndá sá vã cãnhicúⁿ ní-hnú-yu nàcuáa càháⁿ tnúhu-áⁿ.

¹⁶ Te triú sá ní ngava ñuhu yadi núu yíhi víhi yúu, xiãⁿ cùu-xí dàtná ñáyü ní xíndedóho tnúhu Yã Ndióxi te díi iní ní tnüi-yu tnúhu-gá.

¹⁷ Dico òré ná ngüita ñáyü cùcuéhé ñáhã-yu xii-yu ádi nãndi-gá sá váha-yu sá cuèndá tnúhu-gá, te ñã cùndee iní-yu chí dàñã-yu tnúhu-gá cuèndá sá ñã túú níhi ndéè-yu.

¹⁸ Te triú sá ní ngava núu yúcu ndíquíⁿ tnu iñu xiãⁿ cùu-xí dàtná ñáyü ní tecú dóho-xi tnúhu Yã Ndióxi,

¹⁹ dico cuèé cuèé ní nacuaaná-yu tnúhu-gá, chí cuèndá mee-ni sã cùu-xí mèe-yu ñuhu iní-yu, ndihi cuèndá sã ío sãni iní-yu cuu cuicá-yu, ndihi cuèndá sã ío cùdíi iní-yu nchaa sã ío ñuyúú-a, te ñã túú ñuhu iní-yu tnúhu sá ní xíndedóho-yu-áⁿ nàcuáa cada váha-yu cundecú-yu.

²⁰ Dico triú sá ní ngava núu ndécú ñuhu cocoⁿ, xiãⁿ cùu-xí dàtná ñáyü ní xíndedóho tnúhu Yã Ndióxi te quidé-yu nchaa nàcuáa càháⁿ tnúhu-áⁿ. Te cada iní-ndó sã ñáyü-áⁿ cùu-yu dàtná triú sá ní ngüihí yoco-xi ócú

úxí triú-xi, ndihi triú sá ní ngúhi yoco-xi únídico triú-xi, ndihi triú sá ní ngúhi yoco-xi ìn cièndú triú-xi. Te ducaⁿ sátmahá-xi cùu-yu chí ío váha quidè-yu —càchí-gá xáhaⁿ-gá xii cue téé xica cuu ndihi-gá ndihi cue ñáyiú-áⁿ.

Cuèndá iti
(Lc. 8:16-18)

²¹ Te xáhaⁿ-gá xii nchaa ñáyiú:

—Ñá túú nì ìn ñáyiú tènùhú iti te chiváha-yu ìn xítí quídí, àdi chiváha-yu ìn caha càamá, chí tàxi ndecú-yu ìn núú dùcúⁿ cuèndá cutnùní núú nchàa ñáyiú.

²² Te ni ìn tnúhu sá ñá təcú tnùnì ñáyiú vitna cachí-ó sá vā təcú tnùnì-yu chí dacuítí sá təcú tnùnì-yu, te ni ìn tnúhu sá cachí-ó cùu yuhu vitna vā cùu yùhu chí dacuítí sá quèé tùu-xi núú ñáyiú.

²³ Te nchòhó cue ñáyiú ní xíndedóho nchaa tnúhu ní cáháⁿ-í-a, te ío váha chí ná cuáha cuèndá —càchí-gá xáhaⁿ-gá xii-yu.

²⁴ Te ní xáhaⁿ tucu-gá:

—Ío váha chí cùndedóho tnúhu na cáháⁿ-í-a. Te nàcuáa-ni quide-ndo danehé-ndó ñáyiú tnúhu Yá Ndióxi, te diu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cùú-xi-ndó.

²⁵ Te nchaa nchòhó ñáyiú təcú tnùnì tnúhu Yá Ndióxi, uuⁿ-gá cuita tecú tnùnì-ndó tnúhu-gá quíhíⁿ. Te nchaa nchòhó ñáyiú ñá túú təcú tnùnì tnúhu-gá, te uuⁿ-gá vā təcú tnùnì-ndó —càchí-gá xáhaⁿ-gá xii-yu.

Nàcuáa sàhnu triú

²⁶ Te Jèsús xáhaⁿ tucu-gá:

—Na càni-í ìn cuèndá núú-ndó cuèndá tecú tnùnì-ndó nàcuáa cada-xi òrè ndihu ndaha ñaha Yá Ndióxi xii ñáyiú. Ìn téé cuángacáⁿ-dé triú.

²⁷⁻²⁸ Te sáta ní yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ní quene yoco-xi te ní ngúhi triú-xi, dico téé ní sacáⁿ triú-áⁿ ñá túú xini-dé nása ní sahnu-xi, chí mee ñùhu ní quide-xi ní sahnu triú-áⁿ.

²⁹ Te òrè sa ní ndihi ní cuaaⁿ te ní ngúita téé ní sacáⁿ-áⁿ náquèhndé-dé nátaxi tñaha-dé —càchí-gá xáhaⁿ-gá xii-yu.

Cuèndá ndíquín yutnu nàni mostázá
(Mt. 13:31-32; Lc. 13:18-19)

³⁰ Te xáhaⁿ tucu Jèsús xii-yu:

—Na càni tucu-í ingá cuèndú núú-ndó cuèndá tecú tnùnì-ndó nàcuáa cada-xi òrè ndihu ndaha ñaha Yá Ndióxi xii ñáyiú.

³¹ Ìn yutnu nàni mostázá cùú-xi ìn yutnu sá líhli víhi-gá ndíquín-xi dàcúúxi ndíquín nchaa cùhú,

³² dico òrè ná càcáⁿ-güedé núú ñùhú-güedé, te na xínu-xi te sàhnu-gá-xi dàcúúxi nchaa cùhú, te nchaa ditè-xi ío cùu cahnu-xi, te ndéé cue quiti ndáva núú tàchí sácóo-güedé nchaa núú ditè-xi xínu ndeti-güedé —cachí-gá xáhaⁿ-gá xii-yu.

Ío titní cuèndú ní caní Jèsús núú ñáyiú
(Mt. 13:34-35)

³³ Te ío-gá vāi cuèndú ní caní Jèsús núú ñáyiú cuèndá tecú tnùnì-yu tnúhu Yá Ndióxi, dico dava cuèndú ñá túú ní càni-gá núú-yu, chí ní cutnùnì iní-gá sá vā təcú tnùnì-yu nchaa.

³⁴ Te mee-ni cuèndú ní caní Jèsús núú ñáyiú ndi tñahá òrè ní dánèhé ñahá-gá xii-yu tnúhu-gá. Te òrè ndécú mèe Jèsús ndihi cue téé xica cuu ndihi-gá, te ní xáhaⁿ-gá xii-güedé nàcuáa quèe-xi ìn ìn cuèndú ní caní-gá núú ñáyiú.

Jèsús ngání-gá táchí ndihi ndute làgúná
(Mt. 8:23-27; Lc. 8:22-25)

³⁵ Te diu-ni nduu-áⁿ òrè sa ta cùndiquíⁿ cuáháⁿ ní xáhaⁿ Jèsús xii cue téé xica cuu ndihi-gá:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gá xii-güedé.

³⁶ Te ní quide ndee iní-gá nchaa ñáyiú xixúcu-áⁿ, te diu-ni bàrcú sá ñùhú-gá òrè ní dánèhé-gá ñáyiú tnúhu-gá diu-ni xiáⁿ ní dàcáca cue téé xica cuu ndihi-gá ndécá ñaha-güedé xii-gá cuáháⁿ, te tñahá ìn ùú-gá bàrcú ní xica-xi nchìcú-xi bàrcú ñùhú-gá-áⁿ cuáháⁿ.

³⁷ Te ñùhu bàrcú ñùhú-gá-áⁿ ichi cuáháⁿ-xi núú ndute, te ní quexio ìn táchí ñihi, te ta nàdachitú-xi ndute xití bàrcú-áⁿ cuáháⁿ, te sa cuini-ná-xi quèe naa bàrcú-áⁿ xití ndute ni cùu.

³⁸ Te Jèsús cáá-gá xidí-gá ìn xichi ndàa sáta bàrcú-áⁿ, te yínchihí ìn dóó díquí-gá. Te sá dúcáⁿ cuini-xi quèe naa bàrcú-áⁿ núu ní sáháⁿ-güedé ní ndocani ñaha-güedé xii-gá, te xáhaⁿ-güedé:

—jMèstrú, ndiquíú ìní! ¿Náa ñá túú ndihu iní-n sá tá quèe naa-o cuáháⁿ-áⁿ? —càchí-güedé xáhaⁿ-güedé xii-gá.

³⁹ Te Jèsús ní ndiquíú ìní-gá te ní ndacóo-gá, te ní tenáá-gá táchí-áⁿ, te ní xáhaⁿ-gá xii ndute làgúná:

—jTnaví-ná cuhuⁿ, chí ío dusaⁿ! —càchí-gá xáhaⁿ-gá xii ndute-áⁿ.

Te òrè-ni ní ngúíhí táchí-áⁿ te ní nucúndecu nahi-ná ndute làgúná-áⁿ.

⁴⁰ Te Jèsús ní xáhaⁿ-gá xii-güedé:

—¿Ná cuèndá ndéé dúcáⁿ yùhú-ndó-í? ¿Náa ñá túú sàndáá ìní ñahá ndisa-ndo xii-í-áⁿ? —càchí-gá xáhaⁿ-gá xii-güedé.

⁴¹ Dico mee-güedé chí ío ní yuhú-güedé sá ducaⁿ ní quide-gá ní xini-güedé, te ní xitnàha-güedé:

—¿Te ná téé cùu téé-a núu ní cáháⁿ-ní-dé, te ní ngúíñí táchí te ní nucúndecu nahí ndùte lagúná-a-í? —cáchi-güedé xítñàha-güedé.

5

Íñ téé yíhi ñaha espíritú cúndíhi yucu ñávãha

(Mt. 8:28-34; Lc. 8:26-39)

¹ Te ní sáá Jèsús ndíhi cue téé xica cuu ndíhi-gá ndàa ingá xio yuhu làgúná yucu cue téé ñúú Gàdará.

² Te òré ní que-ne-gá xítí bàrcú te ñⁿ téé yíhi ñaha espíritú cúndíhi yucu ñávãha ní quee-dé núú yíndúxi ndíyi cuáháⁿ-dé núú-gá.

³ Te mee-ní núú yíndúxi ndíyi-áⁿ quidé vèhe-dé, te cuéi dàcutu ñaha-güedé cadená xii-dé dico ñá túú tnàhí ndàcu-güedé núú-dé.

⁴ Te ío títní xito ní dácútú-güedé cadená sáhá-dé ndíhi ndaha-dé dico ní dándavá-ní-dé, te ní xóo dacàchi-gá-dé nchaa cadená-áⁿ, te ñá túú tnàhí ní ndàcu-güedé núú-dé.

⁵ Te cuéi nduu cuéi núú ní xóo cana saa-dé, te váha-ní núú xítí yucu ndècu-dé àdi núú yíndúxi ndíyi dico càna saa nahí-ní-dé, te ío ní xóo dānicuèhé-dé mee-dé ndíhi yúú.

⁶ Te òré ní xini-dé Jèsús te xinu-dé ní sáháⁿ núú-gá, te ní ngúíñí xítí-dé,

⁷ te espíritú yíhi ñaha xii-dé-áⁿ ní quide-xi níhi ní cáháⁿ-dé, te xáhaⁿ-dè xii-gá:

—¿Ná cuendá véxi yòhò Jèsús Déhe Dútú Ndióxi sàdí-n íchi-í? Te cáháⁿ ndàhú-í núú Ndióxi yuhu núú-n sá vã dándòho ñaha-n xii-í —cáchi-dé xáhaⁿ-dè xii-gá.

⁸ Te ducaⁿ ní cáháⁿ-dé cuendá sá Jèsús ní xáhaⁿ-gá xii espíritú cúndíhi yucu ñávãha yíhi ñaha xii-dé-áⁿ sá queé ñaha-xi xii-dé.

⁹ Te Jèsús ní xicáⁿ tnúhú-gá núú-dé, te xáhaⁿ-gá:

—¿Nása nàni-n-í? —cachí-gá xáhaⁿ-gá xii-dé.

Te ní xáhaⁿ-dè:

—Vài Sandadú, duha nàni-í chi ío cuéhé-ndí —cáchi-dé xáhaⁿ-dè xii-gá.

¹⁰ Te cue espíritú cúndíhi yucu ñávãha-áⁿ ní cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi ingá xichi.

¹¹ Te ñu-ní yatni yucu núú ndécú Jèsús-áⁿ yíhi vãi cuchí xixexi-güedi.

¹² Te nchaa cue espíritú-áⁿ ní cáháⁿ ndàhú-xi núú-gá, te xáhaⁿ-xi xii-gá:

—Cáháⁿ ndàhú-ndí núú-n sá dáñá-n quíhu-ndí yiqui cùñú nchaa cùchí-áⁿ —cáchi-xi xáhaⁿ-xi xii-gá.

¹³ Te Jèsús ní xáhaⁿ-gá sá cúú quíhu-xi yiqui cùñú-güedi, te xinu dàtná úú ml-güedi yíhi yucu-áⁿ. Te nchaa espíritú cúndíhi yucu ñávãha yíhi ñaha xii téé-áⁿ ní quee ñaha-xi xii-dé, te cuánguñu-xi yiqui cùñú

nchaa cùchí-áⁿ, te nchaa-güedi ní xinu-güedi duha ní quee-güedi ndàa núú dèhvã yuhu làgúná-áⁿ, te ní ngaunihnu-güedi xítí ndute te ní ndíhi-güedi ní cáhá.

¹⁴ Te òré ní xini cue téé xito cuchí-áⁿ nàcuáa ní cuu te ní xinu-güedé, te ní sáháⁿ-güedé ní cani-güedé cuendú núú cué ñáyiu ndècu xítí ñuú, ndíhi núú cué ñáyiu ndècu xítí yucu. Te nchaa ñáyiu ní níhi tnúhu ní xicá-yu cuáháⁿ ndéhé-yu nàcuáa ní cuu.

¹⁵ Te òré ní quexió-yu núú ndécú Jèsús te ní xini-yu téé ní xíhi ñaha cué espíritú cúndíhi yucu ñávãha-áⁿ núcòo-dé núú sáhá Jèsús, te nihnu-ná-dé dóo-dé te núcòo-ná-dé dàtná ñⁿ ñáyiu váha, te ní yuhú-yu òré ní xini ñáhá-yu xii-dé.

¹⁶ Te nchaa ñáyiu ní xini nàcuáa ní cuu ní ndúha téé yíhi ñaha cue espíritú cúndíhi yucu ñávãha-áⁿ ní cùu ní cani-yu cuendú núú nchaa ñáyiu ní quexio-áⁿ nàcuáa ní cuu ní ndúha téé-áⁿ ndíhi nàcuáa ní cuu cuendá nchaa cùchí-áⁿ.

¹⁷ Te sá dúcáⁿ ní níhi ñáyiu-áⁿ tnúhu nàcuáa ní cuu núu nchaa-yu ní ngúita-yu càháⁿ ndàhú-yu núú Jèsús sá ná quee-gá yucu ñuú-yu nùhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-áⁿ nùhú-gá ní ngúita téé ní xíhi ñaha cué espíritú cúndíhi yucu ñávãha-áⁿ càháⁿ ndàhú-dé núú-gá núu vã cùndèe ini-gá quíhíⁿ ndíhi ñaha-gá xii-dé.

¹⁹ Dico ñá túú ní sàha-gá tnúhu quíhíⁿ ndíhi ñaha-gá xii-dé, te ní xáhaⁿ-gá xii-dé:

—Cuanùhú vehe-n, te cani-n cuendú núú cué ñáyiu sá Yã Ndióxi ní cundàhú ini ñáhá-gá xii-n, te ío càhnu cuu nchaa sá váha ní quide-gá sá cúú-xi-n —cáchi-gá xáhaⁿ-gá xii-dé.

²⁰ Te téé-áⁿ ní xica-dé cuánuhú-dé, te ní sáháⁿ-dé ndi úxi ñuú nání Dècápolis, te ní cani-dé cuendú núú nchaa ñáyiu sá ío càhnu cuu nchaa sá váha ní quide ñaha Jèsús xii-dé, te nchaa-yu ío ní cuñúhu-yu.

Cuendá déhe yoco té Jàirú ndíhi cuendá ñⁿ ñadíhi ní tnándeé dóo Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehndé-gá ndàa ingá xio yuhu làgúná, te ío vãi ñáyiu ní tacá núú ní quexio-gá-áⁿ, te xíáⁿ ndécú-gá

²² ní quexio ñⁿ téé tàxi tnuní veñúhu núú-gá, te téé-áⁿ nání-dé Jàirú, te ní ngúíñí xítí-dé núú-gá.

²³ Te ní ngúita-dé càháⁿ ndàhú-dé núú-gá, te xáhaⁿ-dè xii-gá:

—Ío càhú tnàhá déhe yoco-í cùhú-xi, te ndècu-ná-xi sá cúú-xi, te véxi-í càháⁿ ndàhú-í núú-n núu vã cùndèe ini-n quíhíⁿ-ó

vehe-í tendaha-n-xi cuendá ndúha-xi, te cundecu-xi —cächí-dé xáha^a-dè xii-gá.

²⁴ Te Jèsús ní xica-gá cuáhá^a-gá ndihi téé-án, te ío vai ñáiyu nchicú^a ñháá xii-gá cuáhá^a, te dàdehnde ñaha-ná-yu xii-gá ní cùu.

²⁵ Te tnuú nchaa ñáiyu-á^a ñútnàhá ñ^a ñaha cùhú, te ñaha-án^a sa ní cuu úxúú cuáá sá cùhú-a^a ngòyo ñaha níñí xii-a^a.

²⁶ Te ío ta ndòho-a^a vèxi, te ío cuéhé ñátátná ní cuu ta quide tátna ñaha xii-a^a, te sa ní ndihi nchaa sá ndécú ndhi-a^a ní nadico-a^a cuendá ní níhi-a^a díhú^a ní quehe^a nchaa ñáiyu ní quide tátna ñaha xii-a^a dico ní ñ^a-yu ñá túú ní ndácú-yu ndúha-a^a, chí da uu^a-gá tá cuu cahú-a^a cuáhá^a.

²⁷ Te òré ní níhi-a^a tñúhu cuendá Jèsús, te ní xica-a^a cuáhá^a-a^a núú ndécú-gá. Te òré ní quexio-a^a núú ndécú-gá te ní sáhá^a ndehe yatni-a^a ndàa sátá-gá ní tnándeé-a^a dóó-gá.

²⁸ Te duca^a ní quide-a^a chí ní sani iní-a^a sá nñu ndacu-a^a tnándeé-a^a cuèdicó luha yuhu dóó Jèsús te ndúha-a^a ní sani iní-a^a.

²⁹ Te òré duca^a ní quide-a^a te ñá túú-gá ní ngòyo ñaha-gá níñí xii-a^a, te òré-án^a ní cutnùní iní-a^a sá ní ndúha-a^a cuéhé tnàhá-a^a.

³⁰ Te Jèsús ní cutnùní iní-gá sá ñ^a ñáiyu ní ndúha sá cuendá-gá, núu ní nchócótó-gá ndàa sátá-gá te ní xicá^a tñúhú-gá núu nchàa ñáiyu nchicú^a ñháá xii-gá, te xáha^a-gá xii-yu:

—¿Ndèdacàa-ndo ní tnándeé ñháá xii-í? —cächí-gá xáha^a-gá xii-yu.

³¹ Te cue téé xica cuu ndihi-gá ní xáha^a-güedé xii-gá:

—Mèstrú, ndèhe-n sá vái ñáiyu nchicú^a ñháá xii-n, te texio texio dàdehnde ñháá-yu xii-n te xicá^a tñúhú-gá-n yoo ní tnándeé ñháá xii-n —cachí-güedé xáha^a-güedé xii-gá.

³² Te Jèsús ní xíndhé váha-gá xio xio dñí-gá núu ndèdacàa ñáiyu ní tnándeé ñháá xii-gá.

³³ Te sá dúcá^a ní cutnùní iní ñadhí^a-án nàcuáa ní cuu, núu yùhú yùhú-a^a ní sáhá^a-a^a ní nguñí xití-án núu Jèsús, te ní xáha^a ndáa-a^a xii-gá nàcuáa ndúu cuendá-a^a.

³⁴ Te Jèsús ní xáha^a-gá xii-a^a:

—Yòhó ñaha cùhú ní cùu, ní sándáá iní ñháá-n xii-í, núu ní ndúha-n, te vitna cuanùhú te vá ndihú-gá iní-n, chí vá dúcá^a-gá ndoho-n —cächí-gá xáha^a-gá xii-a^a.

³⁵ Te càhá^a dúcá^a-ní Jèsús ní sáá cue téé xinu cuechi vehe té Jairú téé tàxi tñuni veñúhu-án, te xáha^a-güedé xii-dé:

—Sa ní xihí déhe-n, vá chíchiu^a-gá-n Mèstrú —cächí-güedé xáha^a-güedé xii-dé.

³⁶ Dico Jèsús ñá túú ní quide cuendá-gá nàcuáa ndúu tñúhu ní càhá^a cue téé-án, te ní xáha^a-gá xii téé tàxi tñuni veñúhu-án:

—Ñá túú ñá caní iní-n, quindáá iní ñháá-ní-n xii-í —cächí-gá xáha^a-gá xii-dé.

³⁷ Te Jèsús vá yòo-gá ní cuini-gá canchicú^a ñháá xii-gá quíhí^a, chí té Pèlú-ní, ndihi té Jacobó-ní, ndihi ñani-ní-dé té Juáa cuáhá^a ndihi ñaha-gá xii-güedé.

³⁸ Te òré ní quexio-gá ndihi-güedé vehe téé tàxi tñuni veñúhu-án, te ní xini-gá sá ío vai ñáiyu xíndecu, te suúni dusa^a quidè-yu te níhi xicáhá^a-yu te xíndahí-yu.

³⁹ Te òré cuanguihu-gá xití vehe, te ní xáha^a-gá xii-yu:

—¿Ná cuendá ndéé dúcá^a ío dusa^a quide-ndo, te ndàhyú-ndó? Te xichí-a ñá túú ní xihí-xi chí dicó xidí-xi —cächí-gá xáha^a-gá xii-yu.

⁴⁰ Te ní sácú ndeé ñháá-yu xii-gá sá dúcá^a ní càhá^a-gá, chí sá cuú-xí mèe-yu chí ní xihí ndisa xichí-án. Te òré-án^a ní queñuhu-gá nchaa-yu quehé, te cuanguihu-gá núu cándodo yiqui cuñú xichí ní xihí-án. Te ndèca-gá tátá xichí ní xihí-án ndihi náná-xi cuanguihu, te tnàhá cue téé úní ndihi-gá-án cuanguihu ndihi-gá.

⁴¹ Te ní tñii-gá ndaha xichí ní xihí-án, te ní xáha^a-gá:

—Tálita, cúmi —cächí-gá xáha^a-gá.

Te tñúhu-án queé-xi: Yòhó xichí cuéchi yùhú cächí-í sá ndácóo-n, duha quèe-xi tñúhu-án.

⁴² Te òré-ní-án ní ndoto xichí cuéchi-án ní ndacóo-xi ní nacaca cuu-xi, te ndècu-xi úxúú cuáá-xi. Te ío ní cuñúhu nchaa ñáiyu sá dúcá^a ní dándótó ñaha Jesús xii-xi.

⁴³ Te Jèsús ní càhá^a víhí-gá dóho tátá-xi ndihi náná-xi sá vá yòo ñ^a cuñàhá-yu sá ní dándótó ñaha-gá xii-xi. Te sátá dúcá^a te ní xáha^a-gá xii-yu sá cuñàhá-yu xii-xi sá caxí-xi.

6

Jèsús ndécú-gá ñuú Nazàrét

(Mt. 13:53-58; Lc. 4:16-30)

¹ Te Jèsús ní ndee-gá ñuú núú ní dándótó-gá xichí ní xihí-án, te cuanuhú-gá núú cúú ñuú-gá, te tnàhá cue téé xica cuu ndihi-gá cuanuhú ndihi-gá.

² Te ndècu Jesús ñuú-gá ní tñahá nduu ndètatú ñáiyu. Te nduu-án^a cuanguihu-gá xití veñúhu dàcuaha ñaha-gá xii-yu. Te vai ñáiyu ndèdóho nchaa tñúhu càhá^a-gá, te xicuñúhu víhí-yu, te xitnàhá-yu:

—¿Ndéé ní sáhá^a dàcuahá tèe-a núu ndéé duha váha càhá^a-dè, nása ní quide-dé núu ndéé duha ío váha cùtnuní iní-dé, te ndacu-dé quidè-dé nchaa sá vá yòo tnàhí ndacu cada-í?

³ Te dicó carpinterú cúú-dè, dicó déhe tá Màriá cúú-dè, te ñani-dé cúú té Jacobó, ndihi té Chèé, ndihi té Judás, ndihi té Ximú, te diu-ni cue cùha-dé cúú ñáiyu ndècu ndihi-o ñuú-a —cächí-yu xitnàhá-yu.

Te ñá túú ní cuíní-gá-yu cáháⁿ ndihi váha ñáhá-yu xii-gá.

⁴ Te Jèsús ní xáhaⁿ-gá xii-yu:

–Te núu ìíⁿ téé cáháⁿ tnúhu Yá Ndióxi ná nàsáá-dé ñúú-dé dacuàha-dé ñáiyu tnúhu-gá, te nchaa ñáiyu ñúú-dé-áⁿ, ndihi nchaa ñáiyu ndècu ndihi-dé vehe-dé, ndihi nchaa ñáiyu cùu ndi mee-dé ñá túú nèhé-yu sá yíñùhu núú-dé, dico cue ñáiyu nchaa dava-gá ñúú chi nèhé-yu sá yíñùhu núú-dé –càchí-gá xáhaⁿ-gá xii-yu.

⁵ Te ñá túú ní quide tátna Jèsús vai ñáiyu cuèndá sá ñá túú ní sàndáá iní ñáhá-yu xii-gá, dico ní quide tátna-gá ìíⁿ úú ñáiyu cùhú ní sàndáá iní ñáhá xii-gá. Te ní tendaha ñàha-ni-gá xii-yu te ní ndúha-yu.

⁶ Te ío ní cuñúhu-gá sá dúcáⁿ ñá túú ní cuíní-yu quindáá iní ñáhá-yu xii-gá. Te sátá dúcáⁿ te ní xica-gá cuáháⁿ-gá nchaa dava-gá ñúú lihli càa yatni xiáⁿ cuèndá dacuàha-gá ñáiyu tnúhu-gá.

Jèsús táúchiuⁿ-gá quíhíⁿ cue téé xica cuu ndihi-gá cáháⁿ-güedé tnúhu Yá Ndióxi núú ñáiyu

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndihi-gá, te ní sáñaha-gá xii-güedé tnúhu ndee iní cundecu ndihi-güedé cuèndá queñuhu-güedé nchaa espíritú cundíhi yucu ñávàha yíhi ñaha xii ñáiyu. Te ní xáhaⁿ-gá xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndióxi núú ñáiyu.

⁸⁻⁹ Te cùmání-gá caca-güedé quíhíⁿ-güedé, te ní xáhaⁿ-gá xii-güedé:

–Vá cánèhe-ndo ñunu cuhuⁿ ndachiuⁿ-ndo, te ní vá cánèhe-ndo sá cáxi-ndó, te ní vá cánèhe-ndo díhúⁿ, chi ìíⁿ caa-ni tátnu canehe-ndo, te chàú yíhi-ni-ndó-áⁿ xiáⁿ-ni quíhi-ndo, te vá cánèhe-gá-ndó ìngá ichi dóó-dóó chi diu-ni dóó ñíhú-ndó-áⁿ xiáⁿ tnàhí-ni cuihnu-ndo te ñá túú tnàhí-gá ná canehe-ndo –càchí-gá xáhaⁿ-gá xii-güedé.

¹⁰ Te xáhaⁿ tùcu-gá:

–Te òrè ná sàá-ndó ìíⁿ ñúú, te ío ñáiyu cáháⁿ ñáhá-yu xii-ndo vèhé-yu, te xiáⁿ-ni cundecu-ndo ndéé ná sàá nduu ndèe-ndo ñúú-áⁿ.

¹¹ Te núu ío dava ñúú ñá túú cuíní-yu cáháⁿ ndihi ñaha váha-yu xii-ndo, te ní ñá túú cuíní-yu cundedóho-yu tnúhu cáháⁿ-ndó, te ndee-ni-ndo ñúú-áⁿ te naquidi-ndo tìcáchúhmá ní tñí sáhá-ndó cuèndá ná cutnuní iní-yu sá ñá túú quide váha-yu. Te na càchí tnúhu ndáá-í xii-ndo sá ná sàá nduu càda ndáá Yá Ndióxi cuéchi nchaa ñáiyu, te cue ñáiyu ducaⁿ na càda ñaha xii-ndo-áⁿ ío-gá ndohó-yu dàvá-áⁿ dàcúxí dàtná ndoho cue ñáiyu ñúú Sòdomá ndihi cue ñáiyu ñúú Gòmorrá –càchí-gá xáhaⁿ-gá xii-güedé.

¹² Te cue téé-áⁿ ní xica-güedé cuáháⁿ-güedé te ní nguíta-güedé dàcuàha-güedé cue ñáiyu tnúhu Yá Ndióxi, te xáhaⁿ-güedé xii-yu:

–Chí dándixi túu iní sá ñá túú quide váha-ndo ndècu-ndo, te dañá-ndo nchaa ichi cuehé ichi duha ndècu-ndo. –càchí-güedé xáhaⁿ-güedé xii-yu.

¹³ Te vai espíritú cundíhi yucu ñávàha yíhi ñaha xii ñáiyu ta queñuhu-güedé yiqui cùñú-yu cuáháⁿ, te vai tucu ñáiyu cùhú tá quide tátna-güedé cuáháⁿ chíhí ñàha-güedé acití xii-yu te ndúha-yu.

Nàcuáa ní cuu ní xihí té Juàá téé dàcuandute ñaha xii ñáiyu

(Mt. 14:1-12; Lc. 9:7-9)

¹⁴ Te nchaa xichi ní ñíhí ñáiyu tnúhu nchaa nàcuáa quide Jèsús, te tnàhá té Hèrodés téé yíndaha ñaha xii ñáiyu ní ñíhí-dé tnúhu nchaa nàcuáa quide-gá, te ní cachí-dé:

–Té Juàá téé ní xóo dacuandute ñaha xii ñáiyu ní ndoto núu dàcáⁿ ndácú-dé quidè-dé nchaa sá vá yóo tnàhí ndàcu cada –duha ní cachí-dé.

¹⁵ Te dava ñáiyu càchí-yu sá tè Èliás téé ní xóo cáháⁿ tnúhu Yá Ndióxi ndéé sanaha ní nasáá-dé.

Te davá-yu càchí-yu sá cúú-gá dàtná ìíⁿ téé ní xóo cáháⁿ tnúhu Yá Ndióxi ndéé sanaha.

¹⁶ Te té Hèrodés ní ñíhí-dé tnúhu nchaa nàcuáa cáháⁿ-yu, te ní cachí-dé:

–Diu té Juàá téé ní táúchiúⁿ-í ní xehndé-güedé díquí-xi ní ndoto –càchí-dé.

¹⁷⁻¹⁸ Te duha ní cuu cutnàhá ní sahni té Hèrodés té Juàá, chi dàvá-áⁿ ní naqueheⁿ té Hèrodés-áⁿ ìíⁿ ñaha nàni Herodiás ndécá-dé, te ñaha-áⁿ sà ní cándeca ñaha ñaní-dé té Lipé. Te té Juàá ní xáhaⁿ-dè xii té Hèrodés sá ñá túú ní quide váha-dé sá dúcáⁿ ní naqueheⁿ-dè ñaha ní cándeca ñaní-dé, núu sá cuèndá ñaha-áⁿ ní táúchiúⁿ tè Hèrodés ní tñii-güedé té Juàá ní chíhi ñaha-güedé vecaá, te ní dàcútu ñaha-güedé xii-dé, te ducaⁿ ní quide-dé cuèndá sá ndécá ñaha-dé xii-aⁿ.

¹⁹ Te ñaha nàni Herodiás ndécá tè Hèrodés-áⁿ ío ní cuu úhú iní-aⁿ té Juàá, te ní cuíní-aⁿ cahni-aⁿ-dé, dico ñá túú ní ñíhí-aⁿ nàcuáa cada-aⁿ.

²⁰ Te mee tè Hèrodés chi ní cutnùnì ndáá iní-dé sá té Juàá cúú-dé ìíⁿ téé quide mee-ni sá váha, te quide ndáá-dé núú Yá Ndióxi, te ní xóo yuhú ñáhá-dé núu xiáⁿ ñá túú ní dàña-dé ná cada ñaha ñaha ndeca-dé-áⁿ xii té Juàá. Te té Hèrodés-áⁿ ío ní cudí iní-dé ní xíndedóho-dé nchaa tnúhu ní xáhaⁿ tè Juàá xii-dé, dico ñá túú ní sàni iní-dé duuⁿ duuⁿ tñii-dé tnúhu-áⁿ.

²¹ Te ìíⁿ nduu ní xóo vico vehe té Hèrodés ní quide càhnu-dé nduu ní cacu-dé. Te nduu-áⁿ ní ñíhí ñaha nàni Herodiás-áⁿ nàcuáa cada-aⁿ cuèndá cuú té Juàá. Te nduu-áⁿ ní cáháⁿ té Hèrodés nchaa cue tée cùchiuⁿ, ndihi

nchaa cue tée taxi tnuñí ñáhá xii cue sandadú, ndihi nchaa cue tée cuica ndècu distritú Galilea cuèndá cudìni ndihi ñaha-dé xii-güedé nduu-áñ.

²² Te ndècu iñ déhe yoco ñaha nani Herodiás-án, te xichí-án ní quihu-xi vehe núú cúú vico-án ní xita saha-xi mèi oré yíhí tē Hèrodés mèsá ndihi nchaa cue tée ní cáhá-dé, te ío ní cudíí iní-dé ndihi nchaa cue tée-án nácuáa ní xita xichí-án. Te té Hèrodés ní xáhaⁿ-dē xii-xi:

—Cácañ núú-í núú ná cuñi-n te taxi-í — cáchi-dé xáhaⁿ-dē xii-xi.

²³ Te ní cacunehe-dé ndéé Yá Ndióxi nácuáa cutnùni iní xichí-án sá ndáa cuáñaha-dē núú ná cúú sá ná cácañ-xi núú-dē cuéi ndéé cuádava nchaa sá ndécú ndihi-dé, te núú ná cácañ-xi.

²⁴ Te sá dúcáñ ní xáhaⁿ-dē xii-xi núú ní quee-xi quehé ní xáhaⁿ-xi xii náná-xi:

—Náá, ¿ná cúú sá cácañ-í núú tē Hèrodés? —cáchi-xi xáhaⁿ-xi xii-añ.

Te náná-xi-án ní xáhaⁿ-añ xii-xi:

—Cuáháñ cácañ-n díqui tē Juáá tēe dācuandute ñaha xii ñáyi —cáchi-añ xáhaⁿ-añ.

²⁵ Te ndihi-ni cuándihu xichí-án xití vehe núú yíhí tē Hèrodés-án, te xáhaⁿ-xi xii-dé:

—Cuñi-í sá mèi nduu vitna quehndé-n díqui tē Juáá tēe dācuandute ñaha xii ñáyi te taxi-n, dico ná cuñuñ iñ xití cóhó taxi-n —cáchi-xi xáhaⁿ-xi xii-dé.

²⁶ Te té Hèrodés ní nguíta-dé ndihú víhí iní-dé sá dúcáñ ní xáhaⁿ-xi xii-dé, dico ñá túú ní cùyi-dé cuñaha-dé xii-xi sá vā cúú cuáñaha-dé sá xicáñ-xi, chi cuèndá sá núú nchaa ñáyi ní xáhaⁿ-dē sá cúú cuáñaha-dé núú ná cúú sá ná cácañ-xi, te ní cacunehe-dé ndéé Yá Ndióxi nácuáa cutnùni iní-xi sá ndáa cuáñaha-dé sá ná cácañ-xi núú-dé.

²⁷ Te té Hèrodés-án ndihi-ni ní xáhaⁿ-dē xii iñ sandadú sá quihí-dé quehndé-dé díqui tē Juáá.

²⁸ Te sandadú-án ní xica-dé cuáháñ-dé ve-caá núú yíhí tē Juáá-án, te ní quexio-dé te ní xehndé-ni-dé díqui tē Juáá, te ní chihi-dé iñ xití cóhó te ñehe-dé cuánuhú ní sáha-dé xichí xicáñ-án, te xichí-án ní nacuaña-xi náná-xi.

²⁹ Te òrè ní níhi nchaa cue tée ní xica cuu ndihi ndíi Juáá-án tñuhu sá dúcáñ ní sañi ñaha-güedé xii ndíi, te ní sáháñ-güedé ní ndocani-güedé yiqui cuñú ndíi te ní chindúxi-güedé.

Jèsús dácaxi-gá úhúñ mñ cue tée te ñáyi ñáyi dñí ndihi landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tée ní táuchíuñ Jèsús cuáháñ cáháñ tñuhu Yá Ndióxi núú ñáyi ní ndexio-güedé núú-gá te ní nguíta-güedé nácani tñuhu-güedé nchaa nácuáa ní

quide-güedé ndihi nchaa nácuáa ní dánéhé ñáhá-güedé xii-yu.

³¹ Te Jèsús ní xáhaⁿ-gá xii-güedé:

—Chí ñehé ná quihíⁿ-ó iñ xichi núú ñá túú ñáyi ndetatú-ó —cáchi-gá xáhaⁿ-gá xii-güedé.

Te ducáñ ní xáhaⁿ-gá xii-güedé, chí ío cuéhé ñáyi cuáháñ véxi-yu cúú-yu núú ndécú-gá. Te ní ñá níhi-gá nása cada-gá caxi-gá ndihi cue tée xica cuu ndihi-gá.

³² Te Jèsús cuánguee-gá bārcú ndihi mee-ni cué tée ní táuchíuñ-gá cáháñ tñuhu-gá, te cuáháñ-gá ndihi-güedé iñ xichi núú ñá túú ñáyi ndécú.

³³ Dico vāi ñáyi ní cutnùni iní-yu sá díi-gá ñuhú bārcú-án cuáháñ ndihi cue tée xica cuu ndihi-gá, te nchaa ñuú cáá yātni xíañ ní quee ñáyi xixinú-yu cuáháñ núú ní quide-yu cuèndá quexio Jèsús, te sa ndécú-yu xíañ ní quexio-gá.

³⁴ Te òrè ní quene Jèsús xití bārcú, te ní xini-gá cuéhé víhí ñáyi xixúcu núú ní quexio-gá-án, te ní cundáhu iní ñáhá-gá xii-yu chí ndécú-yu dátñá xindecu cue mbéé cue quiti ñá túú tòli-xi, te ío vāi núú sá ní nguíta-gá ní dācuáhá ñaha-gá xii-yu.

³⁵ Te sátá tá cuáa cuáháñ te ní sáháñ cue tée xica cuu ndihi Jèsús núú-gá, te xáhaⁿ-güedé xii-gá:

—Sa ní cuaa te ñá túú ñáyi ndécú yatni iha.

³⁶ Váha-gá dandāca nchaa ñáyi-a chí na quihíⁿ-yu nchaa vehe càa xití yucu-a, ndihi nchaa ñuú cáá ncháa yatni iha cuaáñ-yu sá caxí-yu —cáchi-güedé xáhaⁿ-güedé xii-gá.

³⁷ Te Jèsús ní xáhaⁿ-gá:

—Mee-ndo chí cuáñaha sá ná caxí-yu —cáchi-gá xáhaⁿ-gá xii-güedé.

Te xáhaⁿ-güedé xii-gá:

—¿Te nása cada-ndí, chí xini ñuhu-xi datñá úú cièndú díhúñ denariú cuèndá cuaañ-ndí sá caxí-yu? —cáchi-güedé xáhaⁿ-güedé xii-gá.

³⁸ Te Jèsús ní xáhaⁿ-gá xii-güedé:

—Chí cuáháñ cundehe-ndo núú ná dāha pāá ndécú ndihi-ndo te cachí tñuhu-ndo —cáchi-gá xáhaⁿ-gá xii-güedé.

Te ní sáháñ ndéhé-güedé núú ná dāha pāá ndécú, te ní xáhaⁿ-güedé xii-gá:

—Úhúñ duha-nā pāá ndihi úú-nā chácá ndécú —cáchi-güedé xáhaⁿ-güedé xii-gá.

³⁹ Te Jèsús ní xáhaⁿ-gá xii nchaa ñáyi sá ná níhi tñáhā-yu cuu tití xichí-yu, te ngóo-yu nchaa núú cūhú cuíí càa xíañ.

⁴⁰ Te nchaañ-yu ní ngóo-yu, te dāva xichí-yu ní ngóo iñ cièndú-yu, te dāva xichí-yu ní ngóo údico úxí-yu.

⁴¹ Te sátá ní ndihi-yu ní ngóo, te ní queheñ Jèsús ndí ùhúñ pāá ndí úú chácá-án, te ní ndacoto-gá andiú te ní ndacáñ táhú-gá núú Yá Ndióxi, te dátñúni ní táhú cuéchi-gá

pàá-án te ní sáñaha-gǎ xii cue tée xica cuu ndihi-gá ní dácáñhu-güedé nchaa ñáyiú-án ní xexí-yu. Te ñu-ni ducaⁿ ní quide tucu-gá úú chácá-án.

⁴² Te nchaa-yu ní xexí-yu ní ndahá xití-yu.

⁴³ Te sáta ní túhú cóhó-yu te ní na-datácá-güedé nchaa sá ní quendóo, te ní chítú ùxúú tnàhá tídihi mee-ni sá ní quendóo núú ùhúⁿ-ni pàá, ndihi núú úú-ni chácá.

⁴⁴ Te nchaa ñáyiú ní xexí-án chi xínu úhúⁿ mĩ mee-ni cuè tée chi ñu-ni cue tée-án ní quíundehu, te ñiⁿ ñáyiú ñiⁿ ndihi cue landú.

Jesús xicá-gǎ núú ndute

(Mt. 14:22-27; Jn. 6:16-21)

⁴⁵ Te òré-ni-án ní xáhaⁿ Jesús xii cue tée xica cuu ndihi-gá sá quèe-güedé bàrcú codonù-güedé quíhíⁿ-güedé ñⁿ ñuú nání Bètsaidá cáá ndàa ingá xio yuhu làgúná núú ndécú-güedé-án, te mee-gǎ quendóo-gǎ cada ndee iní tnàhá-gǎ ndihi cue ñáyiú.

⁴⁶ Te sáta ní yáha ní quide ndee iní tnàhá-gǎ ndihi-yu, te ní xica-gǎ cuáháⁿ-gǎ ñⁿ tindúú cáá yàtni xíáⁿ cuendá cáháⁿ ndihi-gǎ Yá Ndióxi.

⁴⁷ Te òré sa ní cundiquiⁿ te bàrcú sá ñhúú cuè tée xica cuu ndihi-gá sa cuáháⁿ-xi ndéé cuádava xití làgúná-án, te mee-gǎ ndécú-gǎ ñⁿ núú tindúú.

⁴⁸ Te túu ndèhe-gǎ sá súuni ndòho-güedé tá dácaca-güedé bàrcú-án cuáháⁿ, chi cuendá ndàa nacuáa cuáháⁿ-xi-án duha véxi táchí te nàtúndaha-xi. Te ingá nduu-án tàcuíhndá-gǎ sa ní cuyatni vii-ná Jesús bàrcú ñhúú-güedé-án, dico núú ndute tá xica-gǎ cuáháⁿ te luha-ná te yáha ñaha-gǎ xii-güedé ní cùu.

⁴⁹⁻⁵⁰ Te òré ní xini ñháá cuè tée ñhúu bàrcú-án xii-gǎ te ní yuhú-güedé ní cana saa-güedé, chi ní sani iní-güedé sá ñⁿ almá cúú-gǎ. Te ní xáhaⁿ-gǎ xii-güedé:

—ñⁿ cunduu-ndo, vá yuhú-ndó, chi yuhú cùú-í! —càchí-gǎ xáhaⁿ-gǎ xii-güedé.

⁵¹ Te Jesús cuánguee-gǎ xití bàrcú ñhúú-güedé-án, te sáta cuánguee-gǎ te òré-ni ní ngúñí táchí, te ní cuñuhu vihi-güedé.

⁵² Te ducaⁿ chi cue tée-án ñá túú ní cùtnuni iní-güedé nása quide-gǎ, chi ñá túú ní cùtnuni váha iní-güedé nacuáa nduu sá ní quide-gǎ òré ní nadacáyá-gǎ pàá, chi ío ñi ñi quí-güedé.

Jesús quidé tǎtna-gǎ ñáyiú cùhú ñuú Genesàrét

(Mt. 14:34-36)

⁵³ Te ní yáha-güedé ndihi-gǎ ndàa ingá xio yuhu làgúná, te ní sáá-güedé ndihi-gǎ yucu cue tée ñuú Genesàrét. Te yácáⁿ ní dácútu ndéé-güedé bàrcú-güedé yuhu làgúná.

⁵⁴ Te òré ní quene Jesús ndihi cue tée xica cuu ndihi-gǎ xití bàrcú, te nchaa ñáyiú xíndecu-án ní cùtnuni iní-yu sá díú-gǎ.

⁵⁵ Te ñáyiú-án ndihi-ni ní sáháⁿ-yu nchaa núú xíndecu cue ñáyiú cùhú, te cue ñáyiú cùhú-án ní quèe-yu xító nchido ñháá-yu cuáháⁿ ndi tnàhá ñⁿ xichi núú ñihí-yu tnúhu quèxio Jesús.

⁵⁶ Te nchaa ñuú nahnú ndihi nchaa ñuú lĩhi núú cuáháⁿ Jesús, ducaⁿ xíndecá-yu nchaa ñáyiú cùhú cuáháⁿ xití ñuú sàcáⁿ ñháá-yu núú-gǎ cuendá cada tǎtna ñaha-gǎ xii-yu. Te ñu-ni ducaⁿ xiquide-yu nchaa dava-gǎ xichi núú cuáháⁿ-gǎ núú xíndecu cue ñáyiú, te càháⁿ ndáhú-yu núú-gǎ sá ná dáñá-gǎ tnándeé cue ñáyiú cùhú-án cuèdicó luha yuhu dǒó-gǎ cuendá ndúha-yu. Te nchaa ñáyiú cùhú ní tnándeé yuhu dǒó-gǎ ní ndúha-yu.

7

Cuendá nchaa sá quidé-xi ngúndecu cuéchi ñáyiú

(Mt. 15:1-20)

¹ Te ñuú Jerusalén ní quèe cue tée dàcuaha ñaha xii ñáyiú nchaa tnúhu ní chídó tnúni ndíi Moisés, te ní quèxio-güedé núú ndécú Jesús, te tnàhá cue tée cùu fariséú ní quèxio ndihi-güedé.

² Te cue tée-án ní xini-güedé sá dàva cue tée xica cuu ndihi Jesús ñá túú ndàha-güedé dàtná ndáhá mèe cue tée cùu fariséú-án òré caxi-güedé. Te xíáⁿ núu cue tée ní quèxio-án ní cáháⁿ cuèhé-güedé cuendá cue tée xica cuu ndihi-gǎ.

³ Te ducaⁿ chi nchaa cue tée cùu fariséú-án ndihi nchaa ñáyiú isràél nchicúⁿ nihnú-yu quidé-yu dàtná ní xóo cada nchaa cue ñani tnàhá-yu ní xíndecu ndéé sanaha, chi nchaa ñáyiú-án vá cǎxi-yu te núu vá ndáhá-yu dàtná ní xóo ndaha nchaa cue ñani tnàhá-yu ní xíndecu ndéé sanaha-án.

⁴ Te ñáyiú-án ndi tnàhá òré cuáháⁿ-yu núú yáhu te násáá-yu, te ndàhá-yu nàcuáa sàni iní-yu ndùvétú iní Yá Ndióxi, te núu vá dúcáⁿ càdá-yu te vá cǎxi-yu. Te tnàhá náquète-yu vǎsú sá sácúhuⁿ sá xĩhi-yu, ndihi lítu, ndihi cóhó cáá, ndihi càamá. Te nchaa xéhé náquète-yu nàcuáa sàni iní-yu ndùvétú iní Yá Ndióxi. Te ío-gǎ titní sá ní xóo cada nchaa ñáyiú ní xíndecu ndéé sanaha-án nchicúⁿ nihnú-yu quidé-yu.

⁵ Te cue tée cùu fariséú-án, ndihi cue tée dàcuaha ñaha xii ñáyiú nchaa tnúhu ní chídó tnúni ndíi Moisés-án ní xáhaⁿ-güedé xii Jesús:

—¿Ná cuendá cue tée xica cuu ndihi-n ñá túú náquète-güedé ndaha-güedé òré caxi-güedé dàtná ní cachí nchaa cue tée ní xíndecu ndéé sanaha-i? —càchí-güedé xáhaⁿ-güedé xii-gǎ.

⁶ Te Jësús ní xáhaⁿ-gã xii-güedé:

–Nchòhó cùú-ndó cuè téé io dándahú mée-xí chí cächí-ndó sã ïo quide ndáá-ndó te ñã ndáá sá quidé ndáá-ndó. Te ní quee ndáá-xi nãcuáa ní chídó tnùni ndí Chàíá téé ní xóo cáháⁿ tnúhu Yá Ndióxi ndéé sanaha núú tütú-gá núú càháⁿ-xi nãcuáa ní cáháⁿ-gá cuendá-ndó, te duha ní cachí-gá:

Ñáyiú-a cächí-yu sá ïo càhnu cuu-í, dico dícó-ni yuhu càháⁿ-yu,

chí ñã túú ñuhu iní ñáhã-yu xii-í.

⁷ Te àúⁿ nã cuu chĩñuhu ñáhã-yu xii-í, chí ñã túú vèdana ndéé nándĩhi-xi,

chí cue ñáyiú-a dàcuahã-yu cue tnàha ñáyiú-yu nãcuáa cundecú-yu, dico mee-ni tnúhu sã ní cahu iní cue ñáyiú ñuyúú-a càháⁿ-yu.

Duha ní chídó tnùni ndí Chàíá núú tütú Yá Ndióxi nãcuáa ní cáháⁿ-gá cuendá-ndó.

⁸ Te nchòhó ní dáñã-ndó nãcuáa ní cachí Yá Ndióxi cada-ndo, te nchícúⁿ nihnu-ndo quide-ndo nãcuáa ní cahu iní cue ñáyiú ñuyúú-a, chí nãquete-ni-ndo lítu, te nãquete-ni-ndo vasú sácúhuⁿ sã xihí-ndó nãtava-ndo nãcuáa ní xóo cada ñáyiú-án ní xóo naqueté-yu nchaa xiãⁿ, te nándi-gá nchaa núú sá quidé-ndó –cächí Jësús xáhaⁿ-gã xii-güedé.

⁹ Te ní xáhaⁿ tùcu-gá xii-güedé:

–Te nchòhó, ñã túú cuini-ndó càda-ndo nãcuáa cuini Yá Ndióxi, chí mee-ni nãcuáa ní cachí cue téé ní xindecu ndéé sanaha nchícúⁿ nihnu-ndo quide-ndo.

¹⁰ Te ndí Moisés ní cachí ndí sá ncháá ñáyiú canehé-yu sã yĩñuhu núú tãtä-yu ndihí núú nãñã-yu. Te nchaa ñáyiú na càháⁿ úhu cuendá tãtä-yu àdi cuendá nãñã-yu te cahni ñaha-güedé xii-yu ní cachí ndí.

¹¹ Te nchòhó cächí-ndó sã núu ìⁿ téé na cũñaha-dé xii tãtä-dé ndihí nãñã-dé sã sã ní sani iní-dé cuãñaha-dé xii-yu cùu-xi Corbán, te ñã túú-gã xini ñuhu-xi sã cuãñaha-dé xii-yu, te tnúhu Corbán-án quéeé-xi: Sá cùú cuendá Yá Ndióxi.

¹² Te sá dúcãⁿ ná càháⁿ ìⁿ téé-án te nchòhó chindéé tnúhu-ndo-dé cuendá sã vã chindéé-gã-dé tãtä-dé ndihí nãñã-dé.

¹³ Te ducaⁿ quide-ndo chí ní dáquée tíhú-ndó nãcuáa ní cachí Yá Ndióxi cada-ndo, te mee-ni nãcuáa ta quide cue téé ñuyúú-a véxi nchícúⁿ nihnu-ndo quide-ndo, te ñu-ni ducaⁿ ta sãnu ichi tnaha-ndo véxi, te nándi-gá nchaa sã cáhú iní-ndó quide-ndo –cächí-gá xáhaⁿ-gã xii-güedé.

¹⁴ Te Jësús ní xáhaⁿ tùcu-gá xii cue ñáyiú xindecu-án:

–Chí táquixi ndehe iha, te cundéóho váha-ndo tnúhu na càháⁿ-í-a te ïo váha cuáha-ndo cuendá.

¹⁵ Nchaa sá xéxi-ndó chí ñã túú nã quidé-xi iní-ndó, dico nchaa sá cuèhé sá

dúhá sãni iní-ndó quide-ndo, nchaa xiãⁿ quidé-xi ndécu cuéchi-ndo.

¹⁶ Te nchaa nchòhó ñáyiú ndédóho nchaa tnúhu càháⁿ-í-a ïo váha chí cuáha cuendá –cächí-gá xáhaⁿ-gã xii-yu.

¹⁷ Te Jësús ní dándóo-gã nchaa ñáyiú núú xixúcu-yu-án te cuándihu-gá xiti vehe. Te cue téé xica cuu ndihí-gá ní xicãⁿ tnúhú-güedé núú-gá núu nãsa quée-xi cuendú ní cani-gá núú ñáyiú-án.

¹⁸ Te ní xáhaⁿ-gã xii-güedé:

–¿Te náa tnàhá nchòhó ñã túú ní tècu tnùni-ndó cuendú ní cani-í núú ñáyiú-án? Nchaa sá xéxi-yu cuánguee xiti-yu ñã túú quide-xi iní-yu nãcuáa ngúndecu cuéchi-yu.

¹⁹ Chí ñã díú iní-yu cuánguee-xi chí cuánguee ndáá-xi xiti-yu, te nãháha ñaha-xi xii-yu –cächí-gá xáhaⁿ-gã xii-güedé.

Te sá dúcãⁿ ní cáháⁿ-gá te ní dátúu-gá sá cùú càxi-o nchaa núú sã cùú càxi-o.

²⁰ Te ní xáhaⁿ tùcu-gá xii-güedé:

–Nchaa sã cuèhé sá dúhá quide ñáyiú xiãⁿ cácu nihnu-xi iní-yu, te nchaa xiãⁿ quidé-xi ndécu cuéchi-yu.

²¹ Te iní-yu-án cácu nihnu nchaa sã cuèhé sá dúhá, chí sãni cuèhé sãni dùha iní-yu. Te cue téé càháⁿ ndihí-güedé ñadihi te ñã díú ñadihi-güedé cùú-yu, te ñu-ni ducaⁿ quide cue ñáyiú ñihi càháⁿ ndihí-yu téé te ñã díú yí-yu cùu-güedé. Te sãhni-yu cue tnàha ñáyiú-yu, te mee-ni ichi díú iní cùú iní-yu cundecú-yu.

²² Te dùhu ndachiuⁿ tnahã-yu, te xihó-yu cundecu ndihí-yu sã ndécú ndihí tnaha ñáyiú-yu, te ïo quide úhu iní-yu sã cùú-xi tnaha ñáyiú-yu, te ïo dándahú tnahã-yu, te mee-ni nchaa sã cuèhé sã dúhá cùdí iní-yu quidé-yu, te ïo cuédú iní-yu, te ïo yiti yuhú-yu, te ïo quide cahnú-yu mée-yu, te quidé-yu nándi-gá sã ñã túú tãü-yu cadã-yu.

²³ Te nchaa sã cuèhé sã dúhá-án cácu nihnu-xi iní-yu, te nchaa xiãⁿ quidé-xi ndécu cuéchi-yu, te ñã túú cùu-xi sã váha sã cùú-xi iní-yu.

Ìⁿ ñadihi véxi ñuú xicã ní sãndáá iní-aⁿ Jësús

(Mt. 15:21-28)

²⁴ Te ní xica Jësús cuáhãⁿ-gã ndéé yucu cue téé ñuú Tírú, ndihí yucu cue téé ñuú Sidón. Te òré ní quexìo-gá xiãⁿ te cuánguihu-gã ìⁿ vehe te xiãⁿ cundecu-gá, te cuini-gá sã vã quini ñáyiú sã xiãⁿ ndécú-gá ní cùu, dico dai ní nihí-yu tnúhu.

²⁵ Te ìⁿ ñadihi ndécú ìⁿ déhe yoco-aⁿ, te yihí ñaha espíritú cùndihí yucu ñãváha xii-xi, te ñaha-án ïo ndihí ní nihí-aⁿ tnúhu sã ní quexìo Jësús xiãⁿ núu ní sáhãⁿ-aⁿ núú ndécú-gã, te ní ngúñi xiti-án núú-gã.

²⁶ Te ní ngúita-aⁿ càháⁿ ndàhú-aⁿ núú-gă, te xâhaⁿ-aⁿ sâ nûu vâ cûndêe iní-gă queñuhu-gă espíritú cûndîhi yucu ñávâha yîhi ñaha xii déhe-aⁿ. Dico ñá díú ñaha israél cúú-áⁿ chí ñaha ñúú Sirofèniciá cúú-áⁿ te tnúhu griégú cúú tnúhu-aⁿ.

²⁷ Te xiáⁿ nûu ní xâhaⁿ Jèsús xii-aⁿ:

—Daña na càxi tnaa nchaa landú chítú xítí-güexi, te dâtnûni caxi cue iná, chí ñá túú ndûu váha-xi queheⁿ-o sâ xéxi lândú te cuáha-o iná —càchí-gă xâhaⁿ-gă xii-aⁿ.

²⁸ Te ní xâhaⁿ-aⁿ xii-gă:

—Mêstrú, ndáá-ni càháⁿ-n, dico iná chi nàdatacá-güedé sá ngóyó yùhu cóhó lândú —càchí-aⁿ xâhaⁿ-aⁿ xii-gă.

²⁹ Te Jèsús ní xâhaⁿ-gă xii-aⁿ:

—Ío váha ní càháⁿ-n, te cuanùhu te ñá túú-gă ná caní iní-n, chí sa ní quee espíritú cûndîhi yucu ñávâha yîhi ñaha xii déhe-n —càchí-gă xâhaⁿ-gă xii-aⁿ.

³⁰ Te ñaha-áⁿ ní nasáa-aⁿ vehe-aⁿ te càa déhe-aⁿ núú camá, dico ñá túú-gă espíritú cûndîhi yucu ñávâha yîhi ñaha xii-xi chí sa ní quee ñaha-xi.

Jèsús quidé tâtna-gă ñⁿ téé ñá cúú càháⁿ váha te doho-dé

³¹ Te Jèsús ní ndee-gă yucu cue téé ñúú Tírú te ní yáha-gă yucu cue téé ñúú Sídón, ndîhi yucu ndi úxí ñúú nání Dècápolis, te ní sáá-gă ndéé yuhu làgúná distrítú Galilea.

³² Te xiáⁿ ndécú-gă ní quexio ñâyiu ndéé núú-gă ndécá-yu ñⁿ téé ñá cúú càháⁿ váha-dé te doho-dé. Te càháⁿ ndàhú-yu núú-gă sá ná tëndaha ñaha-gă xii-dé cuéndá ndúha-dé.

³³ Te Jèsús ní queñuhu ñaha-gă xii-dé tnuú-yu, te ndèca ñaha-gă cuáháⁿ ñⁿ xio, te ní dáquihu-gă díquí ndáhá-gă yaú lóho-dé, te ní dácânúu-gă díí-gă díquí ndáhá-gă, te ní tendaha-gă yàa-dé.

³⁴ Te ní ndacoto-gă andiu te ní sánuu iní-gă, te ní càháⁿ-gă tnúhu mee-gă, te xâhaⁿ-gă:

—jĚfatá! —càchí-gă xâhaⁿ-gă xii-dé.

Te tnúhu-áⁿ queé-xí: Nacaáⁿ yòhó lóho.

³⁵ Te òré-ni-áⁿ ní nacaáⁿ lóho-dé, te ní nduu váha yàa-dé, te ní cuu càháⁿ váha-dé.

³⁶ Te Jèsús ní càháⁿ víhí-gă dóho ñâyiu ndîhi ñaha xii téé ní quide tâtna-gă-áⁿ sâ vâ yòo ñⁿ cûñàhá-yu sá ní quide tâtna ñaha-gă xii-dé, dico uun-gă ní quidé-yu ní càháⁿ-yu núú ñâyiu sá ní quide tâtna-gă téé-áⁿ.

³⁷ Te nchaá-yu ío ní cuñúhu-yu, te ní xitnàhá-yu:

—Váha víhi quide-dé, chí nchaa-ni ndacu-dé quidé-dé, chí quide tâtna-ni-dé ñâyiu doho, te quide tâtna-ni-dé ñâyiu ñîhí —càchí-yu xitnàhá-yu.

8

Jèsús dácaxi-gă cúmí ml ñâyiu (Mt. 15:32-39)

¹ Te ñⁿ nduu tucu ío cuéhé ñâyiu ní tacá núú ndécú Jèsús, te ñá túú tnàhí sá caxí-yu. Te ní cana-gă cue téé xica cuu ndîhi-gă, te ní xâhaⁿ-gă xii-güedé:

² —Yúhú, cûndahú iní-í nchaa ñâyiu-a chí sa ní cuu úní nduu ndècu ndîhi ñahá-yu xii-o iha, te ñá túú tnàhí ná sá caxí-yu.

³ Te núu na nàtendaha-í-yu núhú tnámă-yu vehé-yu, te cuneé-yu docó ichi, chí davá-yu ío xica ndécú-yu —càchí-gă xâhaⁿ-gă xii-güedé.

⁴ Te ní xâhaⁿ-güedé xii-gă:

—¿Te ndéé ñîhí-ó sâ cuañaha-o càxi nchaa ñâyiu-a, te iha ñá túú ná ío chí cùu-xi xítí yucu-í? —càchí-güedé xâhaⁿ-güedé xii-gă.

⁵ Te Jèsús ní xicáⁿ tnúhú-gă núú-güedé, te xâhaⁿ-gă:

—¿Ná daha-gă pàá ndécú ndîhi-ndo-í? —cachí-gă xâhaⁿ-gă xii-güedé.

Te ní xâhaⁿ-güedé xii-gă:

—Ndècu ndîhi-ndí úsá-gă tnàhá —càchí-güedé xâhaⁿ-güedé xii-gă.

⁶ Te Jèsús ní xâhaⁿ-gă xii nchaa ñâyiu sá ngóo-yu nchaá-yu, te ní ngóo-yu, te ní queheⁿ-gă ndí úsá pàá-áⁿ, te ní ndacáⁿ táhú-gă núú Yá Ndióxi. Te dâtnûni ní táhú cuèchi-gă te ní sáñaha-gă xii cue téé xica cuu ndîhi-gă ní dácâñhu-güedé nchaa ñâyiu-áⁿ.

⁷ Te ndècu ndîhi-güedé ñⁿ úú chácá líhli, te díu-ni ducaⁿ ní quide-gă ní ndacáⁿ táhú-gă núú Yá Ndióxi. Te dâtnûni ní táuchíúⁿ-gă ní dácâñhu ñaha-güedé xii-yu.

⁸ Te nchaá-yu ní xexi-yu ní ndahá xítí-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú úsá tnàhá tídihi mee-ni sâ ní quendóo-áⁿ.

⁹ Te núú ncháá ñâyiu ní xexi-áⁿ xínu dâtná cúmí ml-yu. Te sátá ní yáha ní dácaxí ñaha Jèsús xii-yu te ní dándácá ñaha-gă.

¹⁰ Te dâtnûni cuánguee-gă bàrcú ndîhi cue téé xica cuu ndîhi-gă cuáháⁿ-gă ndîhi-güedé yucu cue téé ñúú Dalmánutá.

Cue téé cùu fariséú xâhaⁿ-güedé xii Jèsús cada-gă ñⁿ sá vâ yòo tnàhí ndacu cada (Mt. 16:1-4; Lc. 12:54-56)

¹¹ Te núú ní quexio Jèsús xiáⁿ ní sáá cue téé cùu fariséú, te ní ngúita-güedé nándi tnúhu xâhaⁿ-güedé xii-gă xitó ndéé ñáhá-güedé. Te xâhaⁿ-güedé sá ná cadá-gă ñⁿ sá vâ yòo tnàhí ndacu cada cundehe-güedé nàcuáa cutnûni iní-güedé núu ndáá sá Yá Ndióxi ní tendaha ñaha-gă xii-gă véxi-gă ñuyúú-a.

¹² Te ní sánuu iní-gă te ní xâhaⁿ-gă xii-güedé:

—Nchaa nchòhó ñâyiu ndècu ñuyúú-a cuiní-ndó cada-í ñⁿ sá vâ yòo tnàhí ndacu cada nacuaá cutnûni iní-ndó núu ndáá sá

Yá Ndióxi chindèe ñaha-gá xii-í. Dico na cächi tnúhu ndáá-í xii-ndo sã vã cáda-í sã cuíni-ndó —cächí-gá xãhaⁿ-gã xii-güedé.

¹³ Te ní dándöo-gá ñáiyu xĩndecu-áⁿ, te cuánde-gá bãrcú ndihi cue tée xica cuu ndihi-gá te cuáhãⁿ-gá ndihi-güedé ndaa ingã xio yuhu lãgúnã.

Nàcuáa quide cue tée cùu fariséu
(Mt. 16:5-12)

¹⁴ Te ní cunaa-güedé canehe-güedé sã cáxi-güedé quíhíⁿ, te ñⁿdii-ni paá ndécú xìtí bãrcú-áⁿ ní nanihí-güedé.

¹⁵ Te Jèsús ní cáháⁿ-gá dóho-güedé, te xãhaⁿ-gã xii-güedé:

—Na cächi tnúhu-í xii-ndo sã ïo quíhí iní-ndó cùndecu-ndo te vã cáda cuendã tñãhí-ndo lèvadurã cue tée cùu fariséu, ndihi levadurã cue tée cùndihí té Hèrodés —cächí-gá xãhaⁿ-gã xii-güedé.

¹⁶ Te ní ngüita-güedé xĩtnãha-güedé:

—Cuendã sã ñã túú ní cãnehe-o paá quixi núu xiãⁿ duha cáháⁿ-gã —cächí-güedé xĩtnãha-güedé.

¹⁷ Te Jèsús ní cutnùnì iní-gá nãcuáa ndùu tnúhu xĩtnãha-güedé, núu ní xãhaⁿ-gã xii-güedé:

—¿Nã cuendã da sã ñã túú ní cãnehe-ndo paá quixi cáháⁿ-ndó? Te ñã díú cuendã paá-áⁿ ní cáháⁿ-í, te dicó-ni sã mée-ndó ñã túú quide cuendã váha-ndo nãcuáa ndùu tnúhu cáháⁿ-í, te ni ñã təcú tnùnì-ndó chi ïo ñi díquí-ndó.

¹⁸ Te cuéi ndèhe-ndo dico ñã túú cùtnunì iní-ndó nã cúú nchãa sã quidè-í, te cuéi ndédóho-ndo nchãa tnúhu cáháⁿ-í dico ñã cùtnùnì iní-ndó nãsa ndùu-xi, te ni ñã ndácú iní-ndó nchãa sã tá quide-í véxi.

¹⁹ Te chí dándacu iní cùtnãhá ní táhú cuèchi-í úhúⁿ-ni paá te ní xexi úhúⁿ mĩl mee-ni cuè tée chí diu-ni cue tée-áⁿ ní quíúndehu. Te chí cächi tnúhu ná daha tídihi ní chítú mee-ni sã ní quendóo òrè ní nãdatãcã-ndó —cächí-gá xãhaⁿ-gã xii-güedé.

Te ní xãhaⁿ-güedé xii-gá:

—Úxúú tñãhá tídihi ní chítú mee-ni sã ní quendóo —cächí-güedé xãhaⁿ-güedé xii-gã.

Te xãhaⁿ tucu-gã:

²⁰ —Te cùtnãhá ní táhú cuèchi tucu-í úsã tñãhá paá ní xexi cúmì mĩl ñáiyu, te chí cächi tnúhu ná daha tucu tídihi ní chítú mee-ni sã ní quendóo —cächí-gá xãhaⁿ-gã xii-güedé.

Te ní xãhaⁿ-güedé xii-gã:

—Úsã tñãhá tídihi ní chítú mee-ni sã ní quendóo —cächí-güedé xãhaⁿ-güedé xii-gã.

²¹ Te Jèsús ní xãhaⁿ tucu-gã xii-güedé:

—Vitna, ¿te sa ní tecú tnùnì-ndó tnúhu ní cáháⁿ-í ãⁿ ñãhá? —cächí-gá xãhaⁿ-gã xii-güedé.

Jèsús quide tãtna-gã ñⁿ tée cuáã ñuu
Bètsaidã

²² Te Jèsús ní sãá-gá ndihi cue tée xica cuu ndihi-gã ñuu Bètsaidã. Te ñuu-áⁿ ndécú-gã ní quexio ñáiyu núu-gã tánèhé-yu ñⁿ tée cuáã, te cáháⁿ ndàhú-yu núu-gã núu vã cùndèe iní-gã tendaha ñaha-gã xii-dé cuendã ndúha núu-dé.

²³ Te Jèsús ní tñi-gã ndaha tée cuáã-áⁿ, te ní queñuhu ñaha-gã tñuu-yu, te ndèca ñaha-gã cuáhãⁿ ñⁿ xio yuhu ñuu. Te yacãⁿ ní dácànù-gã díí-gã núu-dé te ní tendaha ñaha-gã xii-dé, te dátùnì ní xicãⁿ tnúhú-gã núu-dé, te xãhaⁿ-gã:

—¿Cùtnunì núu-n-ãⁿ? —cächí-gá xãhaⁿ-gã xii-dé.

²⁴ Te tée cuáã-áⁿ ní ndonehe núu-dé, te xãhaⁿ-dè xii-gã:

—Cùtnunì núu-í ndèhè-í nchaa cue tée-ãⁿ, dico dà ndãa yutnu cui ndãa-güedé te xica-güedé —cächí-dé xãhaⁿ-dè xii-gã.

²⁵ Te Jèsús ní tendaha tucu-gã núu-dé te ní cuu ní ndacoto váha-gã-dé, te òrè-áⁿ ní ndúha núu-dé. Te nchaandi túhú sã ndéhé-dé ní cutnùnì váha núu-dé nãndi cùu nchaa xiãⁿ.

²⁶ Te ní xãhaⁿ Jèsús xii-dé:

—Vitna te ñã díú dà xìtí ñuu quíhíⁿ-n, te vá yoo ñⁿ cùñaha-n sã yúhú ní quide tãtna-í núu-n ní ndúha —cächí-gá xãhaⁿ-gã xii-dé.

Té Pèlù xãhaⁿ-dè xii Jèsús sã díú-gã cúú-gã
Cristú

(Mt. 16:13-20; Lc. 9:18-21)

²⁷ Te Jèsús ní xica-gã cuáhãⁿ-gã ndihi cue tée xica cuu ndihi-gã nchaa ñuu líhli càa ñuu Cèsareá Filipú, te òrè ñúhú-gã ndihi-güedé ichi te ní xicãⁿ tnúhú-gã núu-güedé, te xãhaⁿ-gã xii-güedé:

—Chí cächi tnúhu nása cáháⁿ ñáiyu cuendã-í. ¿Yoo cùu-í cächi-yu-va? —cächí-gã xãhaⁿ-gã xii-güedé.

²⁸ Te ní xãhaⁿ-güedé xii-gã:

—Davã-yu cächi-yu sã cúú-n ndii Juáã tée ní xoo dacuãndute ñaha xii ñáiyu, te davã-yu cächi-yu sã cúú-n tã Èliãs, te dava tucú-yu cächi-yu sã cúú-n ñⁿ tée ní xoo cáháⁿ tnúhu Yá Ndióxi ndéé sanaha, duha cächi-yu —cächí-güedé xãhaⁿ-güedé xii-gã.

²⁹ Te ní xicãⁿ tnúhú tucu-gã núu-güedé, te xãhaⁿ-gã xii-güedé:

—Te nchóhó, ¿yoo sãni iní-ndó cùu-í-í? —cächí-gã xãhaⁿ-gã xii-güedé.

Te té Pèlù ní xãhaⁿ-dè xii-gã:

—Yòhó cúú-n Cristú Yáã ní tendaha Yá Ndióxi véxi ñuyú-a —cächí-dé xãhaⁿ-dè xii-gã.

³⁰ Te Jèsús ní cáháⁿ-gã dóho-güedé, te xãhaⁿ-gã:

—Vã yoo ñⁿ cùñaha-ndo yoo cuu-í —cächí-gã xãhaⁿ-gã xii-güedé.

*Jesús càháⁿ-gá sá cáhni ñaha-güedé xii-gá
(Mt. 16:21-28; Lc. 9:22-27)*

³¹ Te Jesús ní ngüita-gá xitnühu-gá cue téé xica cuu ndihi-gá ñacuaá yáha-gá, te xáhaⁿ-gá xii-güedé:

—Yúhú Téé cùu ñaní tnáhá-ndó nchàa-ndo chi ío ndoho-í, chi daquèe tihú ñáhá nchàa cue téé cùu sacuéhé núú ñáyiú isràél, ndihi cue dútú cùnù, ndihi cue téé dàcuaha ñaha xii ñáyiú nchaa tnúhu ní chídó tnùnì ní chídó tnùnì ndíi Moisés, nchaa cue téé-áⁿ dàquee tihú ñáhá-güedé xii-í. Te sáá nduu te cahni ñaha-güedé xii-í, dico nduu únú sá cùú-í te ndoto-í —càchí-gá xáhaⁿ-gá xii-güedé.

³² Te ducaⁿ ní cáháⁿ Jesús núú cuè téé xica cuu ndihi-gá ñacuaá tecú tnùnì váha-güedé tnúhu cáháⁿ-gá. Te té Pèlú ní cana ñaha-dé xii-gá ñⁿ xio, te ní ngüita-dé ténàá ñáhá-dé xii-gá ní cùu.

³³ Dico Jesús ndihi-ni ní nchócuñhu-gá ní ndácoto-gá núú nchàa-güedé chi ndàa sátá-gá xĩndecu-güedé, te ní ngüita-gá ténàá-gá té Pèlú, te xáhaⁿ-gá xii-dé:

—Ιησοῦς ἰὸς τοῦ ἰσραὴλ, χὶ δάτνα càháⁿ yucu ñáváha cáháⁿ-n! Chi ñá túú sàni iní-ò dàtná sání iní Yá Ndiòxí, chi ñⁿ-ni sàni iní-ò ndihi dava-gá cue ñáyiú ndècu ñuyúú-a —càchí-gá xáhaⁿ-gá xii-dé.

³⁴ Te Jesús ní cana-gá nchaa cue téé xica cuu ndihi-gá, ndihi nchaa ñáyiú xĩndecu-áⁿ, te ní xáhaⁿ-gá:

—Nchaa ñáyiú cuíni chitnahá ñáhá xii-í, te xini ñuhu-xi vá cáda-gá-yu sá sání iní méé-yu, te ío cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

³⁵ Te nchaa ñáyiú cuíni sá ñà túú tnàhí ná yáha cundecu ñuyúú-a cuíta niñnú-yu, dico nchaa ñáyiú ñá túú tnàhí yúhú cuèi nàndi sá ná yáha-yu cundecu-yu ñuyúú-a sá cuèndá-í, ndihi sá cuèndá tnúhu-í, te ñáyiú-áⁿ naníhí tãhú-yu.

³⁶ Te cuèi nchaandi túhú sá ío ñuyúú-a na nihí ñáyiú cundecu ndihi-yu, dico núu diu nchaa xíáⁿ ná càda cuíta niñnú-yu te ñá túú vèdana nàndihi-xi sá dúcáⁿ ndècu ndihi-yu nchaa xíáⁿ.

³⁷ Te ní ñⁿ sá ío ñuyúú-a vá chĩndèe-xi ñáyiú cuèndá naníhí tãhú-yu.

³⁸ Te nchaa ñáyiú na cùcahaⁿ núú-xi cáháⁿ váha cuèndá-í, ndihi cuèndá tnúhu-í núú nchàa ñáyiú dàquee tihú ñáhá xii Yá Ndiòxí, ñáyiú xĩndecu ichi cuèhé ichi duha, te tnàhá yúhú Téé cùu ñaní tnáhá-yu nchaa-yu cuc-ahaⁿ núú-í núú-yu òré ná quixi tucu-í ndihi cue espíritú xínú cuèchi núú Tàtá-í Dútú Ndiòxí. Te mee-gá cada cutnùnì iní nchaa ñáyiú sá yúhú ío càhnu cuu-í.

9

¹ Te na càchí tnúhu ndáá-í xii-ndo sá ío dava nchòhó ñáyiú xĩndecu iha vitna vá cùú-ni-ndo, chi cundecu-ni-ndo ndéé quini-ndó sáá nduu ndihu ndaha ñaha Yá Ndiòxí xii ñáyiú, te dàvá-áⁿ quini-ndó sá ndácú-gá quidé-gá nchaandi túhú sá váha —càchí-gá xáhaⁿ-gá xii cue téé xica cuu ndihi-gá ndihi cue ñáyiú-áⁿ.

*Jesús ní nadama dóo-gá ndihi núú-gá
(Mt. 17:1-13; Lc. 9:28-36)*

² Te núú ñúú nduu sá dúcáⁿ ní cáháⁿ Jesús te ní xica-gá cuasaá-gá ñⁿ yucu dùcúⁿ, te ndèca-gá té Pèlú, ndihi té Jacobó, ndihi té Juáá cuasaá, te úní tnàhí-ni cue téé-áⁿ ndècá-gá cuasaá. Te yucu-áⁿ ndécú-gá ní nadama núú-gá,

³ te ní nadama dóo-gá. Te dóo-gá-áⁿ sùúnì ní nduu cuixíⁿ quiyí te tãsaⁿ, te ní ñⁿ ñáyiú ñuyúú-a ñá túú ndácú-yu naqueté-yu ñⁿ dóo nduu cuixíⁿ dàtná ní nduu dóo-gá.

⁴ Te ní xini-güedé té Moisés ndihi té Èliás nútni-güedé ndihi-gá ndàtnúhu ndihi ñaha-güedé xii-gá.

⁵ Te té Pèlú ní xáhaⁿ-dè xii Jesús:

—Mèstrú, ¡váha ní cuu sá ndécú-ó lha vitna! Te na dàcaa-ndí úní tnáhá vehe tnuvixiⁿ, te ñⁿ cuu cuèndá-n te ñⁿ cuu cuèndá-áⁿ ní cáháⁿ Yá Ndiòxí ní tecú dóho-güedé, te xáhaⁿ-gá xii-güedé.

⁶ Te ducaⁿ ní cáháⁿ-dé chi ío ní yúhú-güedé, te cuèndá-ni ní cuu yáchí-dé ní cáháⁿ-dè, te ní mèe-dé ñá túú ní cùtnunì iní-dé nása ndèu tnúhu ní cáháⁿ-dè.

⁷ Te òré-áⁿ ní quexio ñⁿ vícò núú ndécú-güedé ndihi Jesús ní dádáhu ñaha-xi xii-güedé ndihi-gá, te xití vícò-áⁿ ní cáháⁿ Yá Ndiòxí ní tecú dóho-güedé, te xáhaⁿ-gá xii-güedé:

—Téa-a cùu-dé Déhe-í téé ío cùu iní-í, te cundèdóho-ndo nchàa tnúhu cáháⁿ-dè —càchí-gá xáhaⁿ-gá xii-güedé.

⁸ Te òré ní quide cuèndá-güedé, te ñá túú-gá ní xini-güedé cue téé úú-áⁿ chi mee-ná Jesús ndécú.

⁹ Te òré cuánuu ndihi ñaha-gá xii-güedé yucu-áⁿ, te ní cáháⁿ-gá dóho-güedé, te xáhaⁿ-gá:

—Vá yòo ñⁿ cùñaha-ndo nchàa sá ní xini-ndó núú ní sáá-ó-á, te cuu cáháⁿ-ndó dico ndéé ná yáha ndoto yúhú Téé cùu ñaní tnáhá-ndó nchàa-ndo sá cùú-í —càchí-gá xáhaⁿ-gá xii-güedé.

¹⁰ Núu xíáⁿ cue téé-áⁿ ní xúhuⁿ nahí-ni iní-güedé nchaa sá ní xini-güedé núú ní sáháⁿ-güedé ndihi Jesús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuèndá ducaⁿ ní cáháⁿ-gá sá ndéé ná yáha ndoto-gá sá cùú-gá te dàtnùnì cáháⁿ-güedé ñacuaá ndèu nchaa sá ní xini-güedé.

¹¹ Te ní xícáⁿ tnúhú-güedé núú Jèsús, te xáhaⁿ-güedé xii-gá:

—¿Cúiní-ndí cachí tnúhu-n ná cuendá cächí cue téé dācuaha ñaha xii ñáyiú nchaa tnúhu ní chídó tnùní ndí Moisés sá dihna-gá té Éliás ndixi-dé te dātñuní quixi Yaá tendaha Yá Ndióxí quixi ñuyúú-a? —cächí-güedé xáhaⁿ-güedé xii-gá.

¹² Te Jèsús ní xáhaⁿ-gá:

—Ndáá sá códó núu ñⁿ téé quixi-dé te cada-dé dātñá ní quide té Éliás, te téé-áⁿ cada ndáá-dé nchaa nācuáa cūu. Dico núú tūtú Yá Ndióxí cáhāⁿ-xi cuendá yúhú Téé cūu ñaní tnáhā-ndó nchāa-ndo sá lo ndoho-í, te daquēe tihú ñáhā ñáyiú xii-í.

¹³ Te na cächí tnúhu-í xii-ndo vitna sá sá ní quixi ñⁿ téé ní quide dātñá ní xóo cada té Éliás, te cue ñáyiú ñá túú ní cānehé-yu sá yíñúhu núú-dé, te ní quide ñáhā-yu xii-dé nchaa nācuáa ní quixi iní méé-yu. Te núú tūtú Yá Ndióxí sa ndèé tnuní nchaa nācuáa yáha-dé, te nchaa xíāⁿ sa ní quide ñaha ñáyiú xii-dé —cächí-gá xáhaⁿ-gá xii-güedé.

Jèsús quidé tātña-gá ñⁿ téé cuechi yíhi ñaha espíritú cündihí yucu ñávāha

(Mt. 17:14-21; Lc. 9:37-43)

¹⁴ Te Jèsús ní ndexio-gá ndihí cue téé úní-áⁿ núú xīndecu dava-gá cue téé xica cuu ndihí-gá, te vai vihi ñáyiú ndècu núú ndécú-güedé-áⁿ, te tnáhā cue téé dācuaha ñaha xii-yu nchaa tnúhu ní chídó tnùní ndí Moisés xīndecu, te cue téé-áⁿ nāndí tnúhu xáhaⁿ-güedé xii cue téé xica cuu ndihí Jèsús.

¹⁵ Te óré ní xini-yu ní ndexio-gá, te nchaaⁿ-yu ío ní cuñúhu-yu, te xīnúú-yu ní sáhāⁿ ní cáhāⁿ ndihí ñáhā-yu xii-gá.

¹⁶ Te ní xícáⁿ tnúhú-gá núú cuè téé xica cuu ndihí-gá núú ná tnúhu ndātñúhu-güedé ndihí cue téé-áⁿ.

¹⁷ Te ñⁿ ñáyiú xīndecu xíāⁿ ní xáhāⁿ-yu xii-gá:

—Mèstrú, ndèca-í déhé-í véxi nānducu ñaha-í xii-n, chí yíhi ñaha espíritú cündihí yucu ñávāha xii-dé, te diu xíāⁿ ní quide ní cuu ñihí-dé.

¹⁸ Te ío ndòho-dé chí súuní ndèni ní cuu ngótñi ñaha-xi xii-dé, te óré ducaⁿ quide ñaha-xi xii-dé te dāndúá ñáhā-xí, te quène tñú yuhu-dé, te cūrúhñú ñuhu-dé, te ndàda ruúⁿ ñáhā-xí xii-dé. Te sa ní xáhaⁿ-í xii cue téé xica cuu ndihí-n sá quèñúhu-güedé espíritú cündihí yucu ñávāha yíhi ñaha xii-dé dico ñá túú ní ndācu-güedé quèñúhu-güedé-xi —cächí ñáyiú-áⁿ xáhāⁿ-yu xii-gá.

¹⁹ Te Jèsús ní xáhaⁿ-gá:

—¿Nchaa nchòhó ñáyiú ndècu ñuyúú-a ío sáá iní-ndó, chí ñá túú cuiní-ndó quindáá iní-ndó Yá Ndióxí, te ní cuu vai nduu quide ndee iní-í nchaa sá quidé-ndó! ¿Te ná ndéé

ama vá dúcáⁿ-gá cada-ndo-í? Te chí cāndèca téé cùhú-áⁿ táquixi iha —cächí-gá xáhaⁿ-gá xii-yu.

²⁰ Te ñáyiú ndihí ñaha xii téé yíhi ñaha espíritú cündihí yucu ñávāha-áⁿ ndécá ñáhā-yu xii-dé cuháⁿ ndéé núú Jèsús, te óré ní xini ñáhā espíritú cündihí yucu ñávāha-áⁿ xii-gá, te ní ngüita-ni-xi sàhni yíhi ñáhā tūcu-xi xii-dé, te ní dāndúá ñáhā-xí xii-dé, te ní ngüita-dé xíchí ñuhu-dé, te quène tñú yuhu-dé.

²¹ Te Jèsús ní xícáⁿ tnúhú-gá núú tātá-dé, te xáhaⁿ-gá xii-dé:

—¿Ná ndéé ama ní ngüita-xi duha ndòho déhe-n? —cächí-gá xáhaⁿ-gá xii-dé.

Te téé-áⁿ ní xáhaⁿ-dè xii-gá:

—Ndéé cütñahá cúú líhli-dé ní ngüita espíritú cündihí yucu ñávāha duha quide ñaha-xi xii-dé.

²² Te ní cütñí xito dāngaunihnu ñaha-xi xii-dé núú ñuhú, te ní cütñí tucu xito dāngaunihnu ñaha-xi xii-dé ndute cuiní-xi cahni ñaha-xi xii-dé. Te ndèca-í-dé véxi núú-n te núú ndacu-n cada tātña-n-dé, te cundáhú iní ñáhā-n xii-ndí chindee ñaha-n —cächí-dé xáhaⁿ-dè xii-gá.

²³ Te Jèsús ní xáhaⁿ-gá:

—Te ná cuendá cächí-n núu ndacu-í cada tātña-í déhe-n, chí nchaa ñáyiú na quindáá iní ñáhā xii-í te nihí-yu sá ná cácaⁿ-yu núú-í —cächí-gá xáhaⁿ-gá xii-dé.

²⁴ Te tātá téé cuechi-áⁿ ñihí ní cáhāⁿ-dé xáhaⁿ-dè xii-gá:

—Sāndáá iní ñáhā-í xii-n, dico chindee ñaha xii-í cuendá ná quindáá iní ñáhā-gá-í xii-n —cächí-dé xáhaⁿ-dè xii-gá.

²⁵ Te Jèsús ndéhé-gá sá ío vai ñáyiú ta tàcá núú ndécú-gá-áⁿ. Te ní tenàá-gá espíritú cündihí yucu ñávāha-áⁿ, te xáhaⁿ-gá xii-xi:

—Yòhó espíritú cündihí yucu ñávāha, ní quide ñihí-n ní quide doho-n téé-a, dico vitna yúhú cächí-í sá quèé-n yìqui cuñú-dé te vá ndíhu-gá-n —cächí-gá xáhaⁿ-gá xii espíritú cündihí yucu ñávāha-áⁿ.

²⁶ Te espíritú cündihí yucu ñávāha-áⁿ ní dácáná sáa ñaha-xi xii téé-áⁿ, te ní sahni yíhi ñáhā tūcu-xi xii-dé, te dātñuní ní quee ñaha-xi xii-dé cuháⁿ-xi, dico téé-áⁿ chí dacāa-ni ndíyí cāa-dé cātúu-dé. Te nchaa ñáyiú xīndecu xíāⁿ cächí-yu sá ní xihí-dé ní cūu.

²⁷ Te Jèsús ní tñi-gá ndaha-dé ní ndo-cani ñaha-gá xii-dé, te ní ndacóo-dé ní nucúnutñi-dé.

²⁸ Te Jèsús cuándihú-gá xití vehe ndihí cue téé xica cuu ndihí-gá, te óré ndéhé-güedé ñá túú-gá ñáyiú, te ní xícáⁿ tnúhú-güedé núú-gá, te xáhaⁿ-güedé xii-gá:

—Cachí tnúhu xii-ndí ná cuèndá ñá túú ní ndácu-ndí queñuhu-ndí espíritú cúndihi yucu ñávaha yihi ñaha xii téé-ã — càchí-güedé xáhaⁿ-güedé xii-gá.

²⁹ Te Jësús ní xáhaⁿ-gá xii-güedé:

—Na càchí tnúhu-í xii-ndo sã núu òré cuiñi-ndó queñuhu-ndo espíritú cúndihi yucu ñávaha yihi ñaha xii ñáyiu dàtná cúú espíritú cúndihi-xi yihi ñaha xii téé-ãⁿ ní cùu ña, te xini ñuhu-xi sá ïo cáháⁿ ndihi-ndo Yá Ndióxi te ñá túú tnàhí ná caxi-ndo cáháⁿ ndihi-ndo-gá, te ducaⁿ te ndacu-ndo queñuhu-ndo espíritú cúndihi yucu ñávaha yihi ñaha xii ñáyiu —càchí-gá xáhaⁿ-gá xii-güedé.

Jësús càháⁿ tucu-gá sá cáhni ñaha-güedé xii-gá

(Mt. 17:22-23; Lc. 9:43-45)

³⁰ Te Jësús ní quee-gá núú ndécú-gá-ãⁿ ndihi cue téé xica cuu ndihi-gá cuáhãⁿ-gá ndihi-güedé distritú Galilea, te cuiñi-gá sá vã quini ñáyiu ndéé ichi cuáhãⁿ-gá.

³¹ Te ducaⁿ ní sani iní-gá, chi mee-gã sa ñaha-gá sá ndáa cada-xi ñacuáa xáhaⁿ-gá xii cue téé xica cuu ndihi-gá, te duha xáhaⁿ-gá xii-güedé:

—Yúhú Téé cùu ñani tnáhã-ndó nchãa-ndo sáã ñⁿ nduu te cuáha cuèndá ñáhã-güedé xii-í núú cuè téé cùu úhú iní ñáhã, te cahni ñaha-güedé xii-í, dico nduu úní sá cùu-í te ndoto-í —càchí-gá xáhaⁿ-gá xii-güedé.

³² Dico ñá túú tnàhí ní tècú tnùni-güedé nása nduu tnúhu ní cáháⁿ-gá, te ni ñá túú ní cùyü-güedé cácaⁿ tnúhú-güedé núú-gá.

Cue téé ndücu tnúhu núú tnáhã núu ndédacã-güedé ïo-gá cùnüu

(Mt. 18:1-5; Lc. 9:46-48)

³³ Te Jësús ní quexio-gá ndihi cue téé xica cuu ndihi-gá ñuu Capernaúm, te òré sa ndècu-gá ñⁿ vehe te ní xicãⁿ tnúhú-gã núú-güedé, te xáhaⁿ-gá xii-güedé:

—¿Nándi cùu tnúhu ta xitnãha-ndo véxi? — càchí-gá xáhaⁿ-gá xii-güedé.

³⁴ Dico ñá túú tnàhí ní cáháⁿ-güedé cùñaha-güedé xii-gá núu ná tnúhu xitnãha-güedé òré ñúhú-güedé ichi. Te ducaⁿ ní quide-güedé chi cuèndá tá ndàtnúhu-güedé núu ndédacã-güedé ïo-gá cùnüu.

³⁵ Te Jësús ní ngóo-gá, te ní xáhaⁿ-gã xii ndi ùxúú cue téé xica cuu ndihi-gá:

—Chí táquixi iha te cundedóho-ndo tnúhu na cáháⁿ-í-a. Te núu ïó dava-ndo cuiñi-ndó cùnüu-ndo, te cada-ndo sã cúú-ndó ñáyiu nchicúⁿ cuiñi-nã, te cunu cuechi-ndo núú tnàha ñáyiu-ndo —càchí-gá xáhaⁿ-gã xii-güedé.

³⁶ Te Jësús ní sanutñi-gá ñⁿ té ñihli cuádava tnuú-güedé, te dàtnùni ní nguídèhé ñáhã-gá xii-dé, te xáhaⁿ-gã xii-güedé:

³⁷ —Nchaa ñáyiu na quèheⁿ cuèndá ñⁿ té ñihli dàtná té ñihli-a cuèndá sã ñúhú ñni ñáhã-yu xii-í ñã, te cada iní-yu sã yúhú ní queheⁿ cuèndá-yu. Te nchaa ñáyiu na quèheⁿ cuèndá ñáhã xii-í te ñã díú-ní mèe-í ní queheⁿ cuèndá-yu, chi tnáhã Tãtà-í Dútu Ndióxi Yáã ní tendaha ñaha xii-í véxi-í ñuyúú-a ní queheⁿ cuèndá-yu —càchí-gá xáhaⁿ-gá xii-güedé.

Nchaa ñáyiu ñã túú cùu úhú iní ñáhã xii-o te cùndihi ñáhã-yu

(Mt. 10:42; Lc. 9:49-50)

³⁸ Te té Juáã ñiu-ni ñⁿ téé xica cuu ndihi-gá ní xáhaⁿ-dè xii-gá:

—Mèstrú, ní xiní-ndí ñⁿ téé càcunehe ñaha-dé xii-n, te queñuhu-dé espíritú cúndihi yucu ñávaha yihi ñaha xii ñáyiu, te nchúhú ñá túú ní dàña-gã-ndí ducaⁿ càda-dé, chi ñá túú xica cuu ndihi ñaha-dé xii-o —càchí-dé xáhaⁿ-dè xii-gá.

³⁹ Te Jësús ní xáhaⁿ-gã xii-güedé:

—Daña-ndo na càda nahi-dé ní cùu, chi ñá túú ni ñⁿ ñáyiu ndihi ndihi-ni ndacu cáháⁿ cuèhé cuèndã-í te núu càcunehe ñáhã-yu xii-í, te quidé-yu sã vã yõo tnàhí ndácu cada.

⁴⁰ Te nchaa ñáyiu ñá túú cùu úhú iní ñáhã xii-o te cùndihi ñáhã-yu.

⁴¹ Te na càchí tnúhu-í xii-ndo sã cuè ñáyiu na tàxi ñⁿ yaxiⁿ ndute coho-ndo cuèndá sã cúú-ndó cuè téé xica cuu ndihi-í, te ñáyiu-ãⁿ sáã nduu te dacuèí sã ñihí-yu sã ndúú tãhú-yu —càchí-gá xáhaⁿ-gã xii-güedé.

Cada cuèndã-ó vã cùndècu-o ichi cuehé ichi duha

(Mt. 18:6-9; Lc. 17:1-2)

⁴² Te xáhaⁿ tucu Jësús xii-güedé:

—Te núu ñⁿ téé na dàcaháⁿ-dé cue ñáyiu sàndáã iní ñáhã xii-í cada-yu nándi sã cuèhé sã dúhá, te váha-gá sã núu na dàcutu ndeé-güedé ñⁿ yúú yódó dúcúⁿ-dè, te dàquée ñaha-güedé xii-dé xiti ndute ñamár, te ñá díú sã cùndècu-dé ducaⁿ càda-dé.

⁴³ Te núu ñⁿ xio ndaha-ndo quide-xi quide-ndo nándi sã cuèhé sã dúhá, te quehndé-ndó cuíta-xi, chi váha-gá sã nánihí tãhú-ndó cuèí na cuíta ñⁿ xio ndaha-ndo te ñá díú sã quihíⁿ-ndó ñihí ní ndúú-ndó núú ùhú núú ndàhú núú dicó sãã ndáhã itã ñuhú ni caa ni quihíⁿ.

⁴⁴ Chi yacãⁿ cúú-xí núú ñã túú tnàhí ndàhvã ñuhú, te ïo ndoho-ndo cùndècu-ndo xíãⁿ ni caa ni quihíⁿ.

⁴⁵ Te núu ñⁿ xio sáhã-ndó quide-xi quide-ndo nándi sã cuèhé sã dúhá, te quehndé-ndó cuíta-xi, chi váha-gá sã nánihí tãhú-ndó cuèí na cuíta ñⁿ xio sáhã-ndó, te ñá díú sã quihíⁿ-ndó ñihí ní ndúú-ndó núú ùhú núú ndàhú núú dicó sãã ndáhã itã ñuhú ni caa ni quihíⁿ.

⁴⁶ Chi yacáⁿ ñá túú tñàhí ndàhvá ñuhú, te ío ndoho-ndo cùndecu-ndo xiáⁿ ni caa ni quíhíⁿ.

⁴⁷ Te núu íiⁿ xio tinúu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndecu-ndo núu ndécú Yá Ndióxi táxi tñuní-gá cuéi na cuíta íiⁿ xio tinúu-ndo, te ñá díú sá ndí ndúu xio núu-ndo quíhíⁿ-ndo núu úhú núu ndàhú.

⁴⁸ Chi yacáⁿ ñá túú tñàhí ndàhvá ñuhú, te ío ndoho-ndo cùndecu-ndo xiáⁿ ni caa ni quíhíⁿ.

⁴⁹ Te dàtná quidé-güedé quiti sàhni-güedé chihí-güedé cuñú-di ñíi te dàqueé-güedé núu ñuhú, ducaⁿ sátnahá-xi ndoho cue ñáyiú chi ío ndohó-yu.

⁵⁰ Te ñíi chi ío váha nándihí-xi, dico núu na ndúu víxi-xi te ñá túú-gá nándihí-xi te ni ñá túú-gá nása cada-o ndúu úhá tucu-xi. Te ío váha cada cuendá-ndo nácuáa cundecu-ndo cuendá cuu-ndo ñáyiú váha, te ducaⁿ te cuu-ndo dàtná ñíi sá ñá túú ndúu víxiⁿ, te ío váha cundecu ndihí tñaha-ndo — cachí-gá xáhaⁿ-gá xii-güedé.

10

Jesús cáháⁿ-gá cuendá cue ñáyiú dàña tñaha

(Mt. 19:1-12; Lc. 16:18)

¹ Te Jesús ní xica-gá cuáháⁿ-gá ní yáha-gá yucu distritú Júdeá ní téhndé-gá ndáa ingá xio yúte Jordán. Te yacáⁿ ndécú-gá ní tacá tucu cuéhé víhí ñáyiú, te ní nguíta-ni tucu-gá dánéhé ñáhá-gá xii-yu tñuhu-gá chi ducaⁿ tñahí quide-gá.

² Te ní quexio íiⁿ úú cue téé cùu fariséú núu ndécú Jesús xíto ndéé ñáhá-güedé xii-gá núu nása cunduu tñuhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñuhú-ndí núu-n núu cuu daña íiⁿ téé ñadhí-dé áⁿ ñáhá —cachí-güedé xáhaⁿ-güedé xii-gá.

³ Te Jesús ní xáhaⁿ-gá xii-güedé:

—Te nchòhó, ¿nása ní cachí ndíi Moisés cada-ndo-i? —cachí-gá xáhaⁿ-gá xii-güedé.

⁴ Te ní xáhaⁿ-güedé xii-gá:

—Ndíi Moisés ní cachí ndíi sá cúu dàña íiⁿ téé ñadhí-dé dicó-ni sá cadúha-dé íiⁿ tutú cuañaha-dé, te núu tutú-án codo tñuní sá ní dáña ñaha-dé, te ducaⁿ te cuu daña-dé ñadhí-dé —cachí-güedé xáhaⁿ-güedé xii-gá.

⁵ Te Jesús ní xáhaⁿ-gá xii-güedé:

—Te ducaⁿ ní chidó tñuní ndíi Moisés cada-ndo cuendá sá ío sáá iní-ndo.

⁶ Dico Yá Ndióxi cútnahá ní cadúha-gá ñuyúú ndihí nchaa sá ío, chi téé ñadhí ní cadúha-gá.

⁷ Te xíáⁿ núu nchaa cue téé na nihí ñadhí-xi, te díiⁿ-ná cada-güedé táta-güedé ndihí náná-güedé, chi mee-ñá ñadhí-güedé cuu cuu ndihí-güedé.

⁸ Te cue ñáyiú úú-án ñá túú-gá ndí díiⁿ ndí díiⁿ yíqui cuñú cúu-yu, chi cada iní-ndo sá íiⁿ-ná yíqui cuñú cúu-yu.

⁹ Te xíáⁿ núu ñá túú ndúu váha-xi daña cué téé ñadhí-güedé, chi mee Yá Ndióxi ní cachí-gá sá cúu tú-yu cundecu-yu ndéé naa ndéé cuú-yu —cachí-gá xáhaⁿ-gá xii-güedé.

¹⁰ Te òré yíhí Jesús ndihí cue téé xica cuu ndihí-gá vehe, te ní xicáⁿ tñuhú-güedé núu-gá nása ndúu tñuhu ní cáháⁿ-gá cuendá cue ñáyiú dàña tñaha.

¹¹ Te Jesús ní xáhaⁿ-gá xii-güedé:

—Te núu íiⁿ téé na dàña-dé ñadhí-dé te naqueheⁿ-dé ingá ñadhí, te ío nehé quidé-dé, te íiⁿ-ni cuéchi cùu-xi ndihí cuéchi quide téé ndéca ñadhí te cáháⁿ ndihí-dé ingá ñadhí.

¹² Te díiⁿ-ni ducaⁿ sátnahá-xi cùu tucu ñáyiú díhí te núu na dàña-yu yí-yu te naquehéⁿ-yu ingá téé, chi íiⁿ-ni cuéchi cùu-xi sá quidé-yu ndihí sá quidé cué ñáyiú díhí ndécú yí-xi, te cáháⁿ ndihí-yu ingá téé —cachí-gá xáhaⁿ-gá xii-yu.

Jesús xicáⁿ táhú-gá núu Yá Ndióxi cuendá landú

(Mt. 19:13-15; Lc. 18:15-17)

¹³ Te íiⁿ úú ñáyiú ndécá-yu landú líhli cuáháⁿ núu Jesús, chi cuini-yu sá tendàha ñaha-gá xii-güexi. Te cue téé xica cuu ndihí-gá ní nguíta-güedé ténàá ñáhá-güedé xii-yu, te xáhaⁿ-güedé sá vá dúcáⁿ cadá-yu.

¹⁴ Te òré ní xini-gá sá dúcáⁿ quide-güedé, te ní cudééⁿ-gá núu-güedé, te xáhaⁿ-gá xii-güedé:

—Chí dáña ná quixi nahi cue landú líhli-án núu-í-a te vá cadí-ndo ichi-güexi, chi dàtná cúu váha iní cue landú líhli-án ducaⁿ cùu váha iní cue ñáyiú yindaha Yá Ndióxi.

¹⁵ Te na cachí tñuhu ndáá-í xii-ndo sá núu vá quindáá iní ñáhá-ndo dàtná quidé cué landú líhli sàndáá iní ñáhá xii-í, te vá ndíhu ndaha ñaha Yá Ndióxi xii-ndo —cachí-gá xáhaⁿ-gá xii-güedé.

¹⁶ Te sáta dúcáⁿ ní xáhaⁿ-gá te ní nguídhé-gá cue landú-án te ní tendaha ñaha-gá xii-güexi, te ní xicáⁿ táhú-gá núu Yá Ndióxi cuendá-güexi.

Íiⁿ téé cuica cáháⁿ ndihí-dé Jesús

(Mt. 19:16-30; Lc. 18:18-30)

¹⁷ Te òré sa ñuhu ichi Jesús caca-gá quíhíⁿ-gá ingá xichi ni cùu ní quexio cunu íiⁿ téé ní nguíñí xítí-dé núu-gá, te xáhaⁿ-dè xii-gá:

—Yòhó Mèstrú, cùu-n téé ío váha iní-xi, te cuini-í núu vá cùndéé iní-n cachí tñuhu-n ná cúu sá cadá-í cuendá nduu táhú-í cundecu-í ndihí Yá Ndióxi ní caa ni quíhíⁿ —cachí-dé xáhaⁿ-dè xii-gá.

¹⁸ Te Jesús ní xáhaⁿ-gá xii-dé:

—¿Te cùtnuní iní-n nàcuáa ndùu tnúhu cáháⁿ-n sá yùhú váha iní-áⁿ? Chi ìⁿndii díi-ni Yá Ndióxi ío váha iní-gá.

¹⁹ Te yòhó xini-n nàcuáa ní cachí Yá Ndióxi cada ñáyi, te duha ní cachí-gá: “Nchòhó cue tée vá cáháⁿ ndihi-ndo ñàdihí te núu ñá díú ñàdihí-ndó cùu-yu, te ducaⁿ-ni nchòhó cue ñáyi dñhi tucu vá cáháⁿ ndihi-ndo tée te núu ñá díú yì-ndo cuu-güedé, te vá cáhni-ndó tnàha ñáyi-ndo, te ni vá dúhú-ndó sá ndécú ndihí-yu, te ni vá dácacu-ndo cuéchi neñúú sá cùu-xí tnàha ñáyi-ndo, te ni vá dácuañdehnde-ndo, te canehe-ndo sá yíñùhu núu tátá-ndó ndihí núu náná-ndó”, duha ní cachí Yá Ndióxi cada ñáyi —cachí-gá xáhaⁿ-gá xii-dé.

²⁰ Te tée-áⁿ ní xáhaⁿ-dè xii-gá:
—Mèstrú, nchaa xiáⁿ ní nguíta-í quidé-í ndéé cùtnàhá cùú lándú-í —cachí-dé xáhaⁿ-dè xii-gá.

²¹ Te Jèsús ní xindéhé ñàha váha-gá xii-dé, te ní cuu váha iní ñàhá-gá, te ní xáhaⁿ-gá xii-dé:

—Dico cùmání ìngá núú sá cadá-n. Vitna te quíhíⁿ-n te dico-n ncháa sá ndécú ndihí-n, te díhúⁿ-n cuáha táhú-n cué ñáyi ndàhú. Te ducaⁿ, te nduu táhú-n núcundecu váha-n núu ndécú Yá Ndióxi táxi tnùní-gá, te sátá ná yáha ducaⁿ càda-n, te quixi-n chitnahá ñàhá-n xii-í cuéi na ndòho-n datná ndoho-í —cachí-gá xáhaⁿ-gá xii-dé.

²² Te sá dúcáⁿ ní xáhaⁿ Jèsús xii-dé te ío ní cundiyí-dé chí ío cuica-dé, te ní xica-dé cuánuhú-dé.

²³ Te ní ndacoto-gá ní candéé dñi-gá, te ní xáhaⁿ-gá xii cue tée xica cuu ndihí-gá:

—Cue ñáyi cuica chí ío úhú quíndáá iní-yu Yá Ndióxi cuendá ndihu ndaha ñàha-gá xii-yu —cachí-gá xáhaⁿ-gá xii-güedé.

²⁴ Te cue tée xica cuu ndihí-gá-áⁿ ío ní cuñúhu-güedé nàcuáa ní cáháⁿ-gá, te ní xáhaⁿ tucu-gá xii-güedé:

—Nchòhó cue tée xica cuu ndihí-í cachí tnúhu tucu-í xii-ndo sá ío úhú quíndáá iní cue ñáyi cuica Yá Ndióxi cuendá ndihu ndaha ñàha-gá xii-yu, chí sàni iní-yu sá ncháa sá ndécú ndihí-yu dácacu nihnu ñàha-xi xii-yu núu úhú núu ndàhú.

²⁵ Te yáchí-gá yáha ìⁿ caméyu yaú ìⁿ yiqui ticú dácúxí sá quíndáá iní ìⁿ ñáyi cuica Yá Ndióxi cuendá ndihu ndaha ñàha-gá xii-yu —cachí-gá xáhaⁿ-gá xii-güedé.

²⁶ Te cue tée xica cuu ndihí-gá ní cuñúhu vihi-güedé sá dúcáⁿ ní cáháⁿ-gá, te ní nguíta-güedé xitnàha-güedé:

—¿Te yoo sa ndacu naníhí táhú te núu ducaⁿ váiⁿ? —cachí-güedé xitnàha-güedé.

²⁷ Te Jèsús ní xindéhé váha ñàha-gá xii-güedé, te ní xáhaⁿ-gá:

—Nchaa ñáyi ñuyú-a chí vá ndácú-yu ná cadá-yu nàcuáa ndihu ndaha ñàha Yá Ndióxi xii-yu, dico mee-gá chí ndacu-gá ndihu ndaha ñàha-gá xii-yu, chí nchaandi túhú sá váha ndàcu-gá quidé-gá —cachí-gá xáhaⁿ-gá xii-güedé.

²⁸ Te té Pèlú ní xáhaⁿ-dè xii-gá:

—Nchúhú ní dándòo-ndí nchaandi túhú sá ndécú ndihí-ndí te ní tuha ñàha-ndí xii-n —cachí-dé xáhaⁿ-dè xii-gá.

²⁹ Te Jèsús ní xáhaⁿ-gá xii-dé:

—Na cachí tnúhu ndáá-í xii-ndo sá ncháa ñáyi na dándóo vehe-xi, ádi ñani-xi, cúha-xi, tátá-xi, náná-xi, déhe-xi, ádi ñuhu-xi, te núu ducaⁿ na cadá-yu sá cuendá-í ndihí sá cuendá tnúhu-í,

³⁰ te ío-gá cuéhé sá cuañaha Yá Ndióxi cundecu ndihí-yu, chí nhí-yu vehé-yu, ñuhú-yu, ñani-yu, cúha-yu, náná-yu, déhe-yu, te ñá díú-ní sá ncháa xiáⁿ nhí-yu cundecu ndihí-yu, chí tnàhá nduu táhú-yu cundecu ndihí ñàhá-yu xii-í ní caa ní quíhíⁿ ná sáá nduu. Dico díhna-gá ndoho tnahá-yu núu ñuyú-a sá cuendá-í.

³¹ Te dava ñáyi cunuu ndecu ichi Yá Ndióxi vitna, ñáyi-áⁿ sáá nduu te vá ío-gá cunúu-yu datná cunúu-yu vitna, te dava ñáyi nchicúⁿ ñá túú cunuu vitna ñáyi-áⁿ sáá nduu te ío cunúu-yu —cachí-gá xáhaⁿ-gá xii-güedé.

Jèsús cáháⁿ tucu-gá sá cáhni ñàha-güedé xii-gá

(Mt. 20:17-19; Lc. 18:31-34)

³² Te ñuhu Jèsús ichi ndihí cue tée xica cuu ndihí-gá cuásaá ndihí ñàha-gá xii-güedé ñuu Jerusalén, te yòdo nuu-gá núu-güedé cuásaá. Te cue tée-áⁿ xicuñúhu-güedé sá dúcáⁿ cuáháⁿ-gá ñuu Jerusalén, te dava cue ñáyi xinchicúⁿ xiyùhú-yu. Te ní taudíⁿ-gá ndí ùxúu cue tée xica cuu ndihí-gá, te ní nguíta-gá cáni-gá cuendú núu-güedé nchaa nàcuáa yáha-gá.

³³ Te xáhaⁿ-gá xii-güedé:

—Vitna ñuhu-o ichi cuásaá-ó ñuu Jerusalén, te yá cáⁿ cuáha cuendá ñàhá-güedé xii yùhú Tée cùu ñani tnàhá-ndó ncháa-ndo núu cué tée cùu dútú cunúu, ndihí núu cué tée dácuaha ñàha xii ñáyi nchaa tnúhu ní chídó tnùní ndí Moisés. Te diu cue tée-áⁿ cuñaha-güedé xii dava-gá cue tée sá cáhni ñàha-güedé xii-í, te cuáha cuendá ñàhá-güedé xii-í núu cué tée ñá túú cùu cue tée isráel.

³⁴ Te cue tée-áⁿ cudíquí ndéé ñàhá-güedé xii-í, te caniha-güedé ndihí ñii, te tíú díí ñàhá-güedé, te cahni ñàha-güedé xii-í dico nduu úní sá cùu-í te ndoto-í —cachí-gá xáhaⁿ-gá xii-güedé.

Té Jàcòbò ndihi té Juàá càháⁿ ndàhú-güedé núú Jèsús sá cádá-gá ìⁿ sá cuini-güedé (Mt. 20:20-28)

³⁵ Te cue déhe té Zebèdeú té Jàcòbò ndihi té Juàá ní quexio-güedé núú Jèsús, te xàhaⁿ-güedé xii-gá:

—Mèstrú, véxi-ndí càháⁿ ndàhú-ndí núú-n núú vá cündèe ini-n càda-n ìⁿ sá cuini-ndí —càchí-güedé xàhaⁿ-güedé xii-gá.

³⁶ Te Jèsús ní xicáⁿ tnúhú-gá núú-güedé, te xàhaⁿ-gá:

—¿Ná cúú sá cuini-ndó càda-l-i? —càchí-gá xàhaⁿ-gá xii-güedé.

³⁷ Te ní xàhaⁿ-güedé xii-gá:

—Cuini-ndí sá òrè ná sàá nduu cündecu-n núú táxi tnúni-n, te ìⁿ-ndí cunucóo-ndí xio cuha-n te ìⁿ-ndí cunucóo-ndí xio dàtni-n —cachí-güedé xàhaⁿ-güedé xii-gá.

³⁸ Te Jèsús ní xàhaⁿ-gá xii-güedé:

—Nchòhó, ñá túú cùtnuni ini-ndó nàcuáa ndùu sá xicáⁿ-ndó núú-í. ¿Te náa cundee ini-ndó dándoho ñaha ñáyiú xii-ndo dàtná dandòho ñahá-yu xii-í, te cundee tùcu ini-ndó càhni ñahá-yu xii-ndo dàtná càhni ñahá-yu xii-í-àn? —càchí-gá xàhaⁿ-gá xii-güedé.

³⁹ Te ní xàhaⁿ-güedé xii-gá:

—Cundee ini-ndí yáha-ndí nchaa nàcuáa càháⁿ-n-àn —càchí-güedé xàhaⁿ-güedé xii-gá.

Te Jèsús ní xàhaⁿ-gá xii-güedé:

—Ndáá sá cündèe ini-ndó ndòho-ndo nchaa nacuaá ndoho-í, te cundee tùcu ini-ndó càhni ñahá-yu xii-ndo, chí yúhú càhni ñahá-yu xii-í.

⁴⁰ Dico sá dúcáⁿ cuini-ndó sá ìⁿ-ndó cunucóo-ndo xio cuha-í te ìⁿ-ndo cunucóo-ndo xio dàtni-í, te xiáⁿ chí ñá díú yúhú tàú-í cachí-í te núú sá cúú cunucóo-ndo àdi sá vá cúú cunucóo-ndo, chí mee Tàtà-í Dútú Ndiòxi cachí-gá te núú ná cúú ñáyiú nduu táhú cunucóo ñiñ-í dàv-áⁿ —càchí-gá xàhaⁿ-gá xii-güedé.

⁴¹ Te òrè ní níhí ùxi-gá cue téé xica cuu ndihi-gá tnúhu nàcuáa ndùu sá cuini té Jàcòbò ndihi ñani-dé té Juàá, te ní cudééⁿ-güedé núú cuè téé úú-áⁿ.

⁴² Te Jèsús ní cana-gá nchaa cue téé xica cuu ndihi-gá-án, te ní xàhaⁿ-gá xii-güedé:

—Nchòhó xini-ndó sá cuè téé yindaha ìⁿ nacióⁿ quide-güedé sá ío cunuú-güedé, te nchaa dava-gá cue téé cündihi-güedé tñahá-güedé quidé-güedé sá ío cunuú-güedé.

⁴³ Dico nchòhó chí vá dúcáⁿ càda-ndo. Chí núú dava-ndo cuini-ndó cunuú-ndo te xini ñuhu-xi cunu cuèchi núú tñahá-ndó te vá càdá-ndó sá cunuú-ndo.

⁴⁴ Te núú dava-ndo cuini-ndó quène cáva-ndo, te cuu-ndo dàtná cue ñáyiú ñá túú tñahí dàhá quee núú chíúⁿ patróóⁿ-xi cunu cuèchi núú tñahá-ndó.

⁴⁵ Te yúhú Téé cùu ñani tñahá-ndó nchaa-ndo, chí ñá túú véxi-í sá cunuú cuèchi ñáyiú núú-í, chí véxi-í sá cunuú cuèchi-í núú-yu. Te cuú-í ñuyiú-a cuèndá vái-yu cácu nihnu núú ùhú núú ndàhú —càchí-gá xàhaⁿ-gá xii-güedé.

Jèsús quidé tātna-gá ìⁿ téé cuàá nani-dé Bartimeú

(Mt. 20:29-34; Lc. 18:35-43)

⁴⁶ Te Jèsús ní quexio-gá ñuu Jericó ndihi cue téé xica cuu ndihi-gá, te ní yáha-gá ndihi-güedé ichi xiti ñuu-áⁿ, te ío cuéhe ñáyiú nchicúⁿ ñahá xii-gá cuáháⁿ te ìⁿ xio yuhu ichi sá ní quee xiti ñuu-áⁿ núcòo ìⁿ téé cuàá nani-dé Bartimeú, te tātá-dé nani-dé Timeú, te téé-áⁿ núcòo-dé yuhu ichi-áⁿ xicáⁿ ndàhú-dé.

⁴⁷ Te téé-áⁿ ní cutnuni ini-dé sá Jèsús téé ñuu Nazàrèt ñúhú-dé ichi, te ní ngúita-dé níhi càháⁿ-dé, te xàhaⁿ-dé xii-gá:

—Jèsús, ñani tñahá ndí Dàvíí, cundàhú ini ñahá xii-í! —càchí-dé xàhaⁿ-dé xii-gá.

⁴⁸ Te vèi ñáyiú tēnaá ñahá-yu xii-dé, te xàhā-yu sá ná càdí-dé yuhu-dé dico uuⁿ-gá níhi ní càháⁿ-dé xàhaⁿ-dé xii-gá:

—Jèsús, ñani tñahá ndí Dàvíí cundàhú ini ñahá xii-í! —càchí-dé xàhaⁿ-dé xii-gá.

⁴⁹ Te Jèsús ní ngúñi-gá te ní xàhaⁿ-gá xii cue téé ndihi-gá:

—Chí cuánguaca téé cuàá-án can-deca-ndo-dé quixi iha —càchí-gá xàhaⁿ-gá.

Te cue téé-áⁿ ní xica-güedé cuánguaca-güedé téé cuàá-án, te òrè ní quexio-güedé núú-dé te ní xàhaⁿ-güedé xii-dé:

—Ndacuíñi te vá ndihú-gá ini-n, na quihíⁿ-ó chí càna ñaha Jesús xii-n —càchí-güedé xàhaⁿ-güedé xii-dé.

⁵⁰ Te téé-áⁿ ní xócáni-dé dóo ndíxi-dé, te ndíhi-n ní ndacuñi-dé te ní xica-dé cuáháⁿ-dé núú Jèsús.

⁵¹ Te òrè ní quexio-dé te ní xicáⁿ tnúhú-gá núú-dé, te xàhaⁿ-gá xii-dé:

—¿Ná cuini-n càda ñaha-í xii-n-i? —càchí-gá xàhaⁿ-gá xii-dé.

Te téé cuàá-án ní xàhaⁿ-dé xii-gá:

—Mèstrú, cuini-í cada tātna-n núú-í cuèndá cundehe-í —càchí-dé xàhaⁿ-dé xii-gá.

⁵² Te Jèsús ní xàhaⁿ-gá xii-dé:

—Cuanúhú vitna, chí sa ní ndúha núú-n chí ní sándáá ini-n Yá Ndiòxi —càchí-gá xàhaⁿ-gá xii-dé.

Te òrè-ni-áⁿ ní ndúha núú-dé te nchicúⁿ-dé Jèsús cuáháⁿ.

11

Jèsús cuánguahu-gá ñuu Jerusálén

(Mt. 21:1-11; Lc. 19:28-40; Jn. 12:12-19)

¹ Te Jèsús ní cuyatni-gá ndihi cue téé xica cuu ndihi-gá ñuu Bètanía, ndihi ñuu Bètfaqé, te xiáⁿ cáá yùcu nani Olívú, te yatni víi-ñá

xiáⁿ cáá ñúú Jerusalén. Te Jèsús ní cana-gá úú-ní tnàhá cue téé xica cuu ndihi-gá.

² Te ní xáhaⁿ-gá xii-güedé:

—Chí cuáháⁿ ñúú cáá yàtni yacáⁿ, te òré quexio-ndo yacáⁿ te naníhí-ndó ìⁿ búrru ndètní-dí, te vátá yóo ìⁿ-gá codo ñàha xii-dí, te nandaxi-ndo-dí te candeca-ndo-dí quíxi.

³ Te núu yoo na càcáⁿ tnúhú núú-ndó nã cuèndá nándaxi-ndo-dí, te cúñaha-ndo sã yúhú Yaá xícá cùu ndihi-ndo xini ñuhu-í-dí, te na yàha caneha chiúⁿ-í-dí te ndíhi-ni nattendaha-í-dí, duha cúñaha-ndo —càchí-gá xáhaⁿ-gá xii-güedé.

⁴ Te cue téé-áⁿ ní xica-güedé cuáháⁿ-güedé, te òré ní quexio-güedé ñúú-áⁿ te ní naníhí-güedé ìⁿ búrru ndètní-dí ìⁿ yutnu nihnu yatni ìⁿ yuyehe vehe caa yatni yuhu ichi, te ní ngúita-güedé nándaxi-güedé-dí.

⁵ Te mei òré nándaxi-güedé-dí ní quexio ñáyiu xáháⁿ-yu xii-güedé:

—¿Ná cuèndá nándaxi-ndo búrru-áⁿ-í? —càchí-yu xáháⁿ-yu xii-güedé.

⁶ Te cue téé-áⁿ ní xáhaⁿ-güedé xii-yu nàcuáa ní xáhaⁿ Jèsús cúñaha-güedé. Te sátá dúcáⁿ te ní dǎñá-yu ndéca-güedé búrru-áⁿ cuáháⁿ núú ndécú Jèsús.

⁷ Te òré ní quexio-güedé ndihi-dí núú ndécú-gá, te ní sacáⁿ ndodo-güedé dóo-güedé sátá-dí, ní ngódó ñàha Jèsús xii-dí.

⁸ Te ío cuéhé ñáyiu ta sàcáⁿ-yu dóo-yu ichi cuáháⁿ-gá cuèndá núú dǒo-yu-áⁿ yàha-gá ndíhi quiti yódo-gá, te davá-yu xèhndé-yu ndaha yutnu ta sacáⁿ-yu cuáháⁿ.

⁹ Te nchaa ñáyiu yódo nuu núú-gá ndihi nchaa ñáyiu nchícuⁿ ndàa sátá-gá ní ngúita-yu níhi càháⁿ-yu, te càchí-yu:

—Ílo càhnu cuu Yaá-a! ¡Te Yá Ndióxi ná chĩndee ñaha-gá, chí ñu-gá cúú-gá Yaá ní tendaha-gá véxi quide núú-gá!

¹⁰ ¡Te ñu-ni Yaá-a cúú-gá Yaá véxi quindaha ñaha xii-o datná ní xóo cada ndí Daví! ¡Te ndéé nchaa sá ío andíu na càchí-xi sá ío càhnu cuu-gá! —duha càchí-yu.

¹¹ Te Jèsús ní quexio-gá ñúú Jerusalén, te cuánguihu-gá xití veñúhu càhnu sá ío cùnunu, te ní xíndéhé váha-gá nchaa sá ndécú xití veñúhu-áⁿ. Te sátá dúcáⁿ te ní ndee-gá cuáháⁿ-gá ñúú Bètanía ndihi ndí úxúú cue téé xica cuu ndihi-gá chí sa ní cuaa.

Jèsús xáhaⁿ-gá xii yutnu ngúxi sá vã cúúⁿ-gá sávidí-xi

(Mt. 21:18-19)

¹² Te nduu tnéé-áⁿ ní quee Jèsús ñúú Bètanía ndihi cue téé xica cuu ndihi-gá, te ichi ñùhu-gá ní xíhí-gá docó.

¹³ Te xica ní xini-gá nútñi ìⁿ yutnu ngúxi, te ní xica-gá cuándéhé-gá núu ndéé sávidí-xi te ñá túú nã ndéé, chí mee-ni ndàha-xi ndéé chí ñá díú yóo sácúndéé sávidí-xi.

¹⁴ Te Jèsús ní xáhaⁿ-gá xii yutnu ngúxi-áⁿ:

—Vitna te vã yóo ìⁿ-gá caxi sávidí-n, chí vã cúúⁿ-gá —càchí-gá xáhaⁿ-gá xii yutnu ngúxi-áⁿ.

Te cue téé xica cuu ndihi-gá ní tecú dóho-güedé nàcuáa ní xáhaⁿ-gá xii yutnu ngúxi-áⁿ.

Jèsús ñá túú tnàhá ini-gá nàcuáa quide ñáyiu xití veñúhu

(Mt. 21:12-17; Lc. 19:45-48; Jn. 2:13-22)

¹⁵ Te Jèsús ní quexio tucu-gá ndihi cue téé xica cuu ndihi-gá ñúú Jerusalén, te cuánguihu tucu-gá xití veñúhu càhnu sá ío cùnunu, te xití veñúhu-áⁿ xĩndecu cue ñáyiu quide ndáhu nádicó-yu, ndihi cue ñáyiu xísaaⁿ. Te nchaa-yu ní queñuhu ñaha Jèsús xii-yu quehé, te ní dándúá-gá mèsá cue ñáyiu dǎma díhúⁿ, ndihi nchaa xilé sácóo nchíhi cue ñáyiu dico lómá xĩndecu xití veñúhu-áⁿ.

¹⁶ Te ñá túú tnàhí-gá ní dǎña-gá yàha cue ñáyiu ndihi nchaa sá nchídó-yu ichi xití veñúhu-áⁿ.

¹⁷ Te ní xáhaⁿ-gá xii-yu:

—Núú tútú Yá Ndióxi càháⁿ-xi nàcuáa ní càháⁿ-gá, te ní cachi-gá: “Vehe-í cúú-xi vehe núú tàcá ñáyiu níhi ñuyúú càháⁿ ndihi ñàhá-yu xii-í”, duha ní càháⁿ-gá càchí-xi núú tútú-gá. Dico nchóhó quidé-ndó vehe-gá vehe ñadúhú —càchí-gá xáhaⁿ-gá xii-yu.

¹⁸ Te nchaa dútú cùnunu, ndihi nchaa cue téé dàcuaha ñaha xii-yu nchaa tñúhu ní chídó tnúni ndíhi Moisés ní tecú dóho-güedé nàcuáa ní càháⁿ-gá te ní ngúita-güedé ndécú-güedé nàcuáa cada-güedé cahni ñaha-güedé xii-gá, chí yúhú-güedé sá ío cunuu-gá, te ducaⁿ chí nchaa ñáyiu ío cùñuhu-yu nchaa tñúhu càháⁿ-gá.

¹⁹ Te òré sa ní cuaa cuíi-nã, te ní quee tucu Jèsús ndihi cue téé xica cuu ndihi-gá ñúú Jerusalén cuáháⁿ-gá ndihi-güedé ingá xichi.

Ní yíhí yutnu ngúxi

(Mt. 21:20-22)

²⁰ Te nduu tnéé nehé-ni ní yàha tucu Jèsús ndihi cue téé xica cuu ndihi-gá núú níhnu yutnu ngúxi, te ní xini-güedé sa ní yíhí níhi ndéé yóho-pi.

²¹ Te té Pélú ní ndacu ini-dé nàcuáa ní xáhaⁿ Jèsús xii yutnu ngúxi-áⁿ, te ní xáhaⁿ-dè xii-gá:

—Mèstrú, cundehe nã ní yíhí yutnu ngúxi sá ní xáhaⁿ-n sã vã cúúⁿ-gá sávidí-xi —càchí-dé xáhaⁿ-dè xii-gá.

²² Te Jèsús ní xáhaⁿ-gá xii-güedé:

—Quindáa ndisa ini-ndó Yá Ndióxi.

²³ Te na càchí tñúhu ndáá-í xii-ndo sã núu nchóhó cúñaha-ndo xii tindúú-a xoçuñí-xi núú ndécú-xi, te quíhíⁿ-xi queé-xi xití lámár. Te ñu ducaⁿ càda-xi te núu nchóhó vã cǎní ìⁿ caní úú ini-ndó, te quindáa ini-ndó sã dúcáⁿ càda-xi.

²⁴ Te xíáⁿ núu càchí tnúhu-í xii-ndo sá ncháa sá ná cácaⁿ-ndó núú Yá Ndióxi óré càháⁿ ndihi-ndo-gá, te taxi-gá te núu nchòhó sàndáá ndisa ini-ndó sá táxi-gá sá xicáⁿ-ndó núú-gá.

²⁵ Te óré càháⁿ ndihi-ndo Yá Ndióxi te dandacu ini-ndó te núu ndècu ñáyiú ñá túú cùu váha ini ñáhá xii-ndo, te cada càhnu ini-ndó-yu cuená ducaⁿ càda cahnu ini ñáhá Tàtá-ndó Dütú Ndióxi Yáá ndécú àndiú xii-ndo cuená nchaa sá ñà túú váha quide-ndo.

²⁶ Dico núu nchòhó vá cáda càhnu ini-ndó sá quidé ñàha tñaha ñáyiú-ndo xii-ndo, te ni Tàtá-ndó Dütú Ndióxi vá cáda càhnu ini ñáhá-gá xii-ndo cuená nchaa sá ñà túú váha quide-ndo —cachí-gá xáhaⁿ-gá xii-güedé.

Jesús ndécú ndihi-gá tnúhu ndee ini
(Mt. 21:23-27; Lc. 20:1-8)

²⁷ Te Jesús ní ndexiú tucu-gá ñúú Jerusalén ndihi cue téé xica cuu ndihi-gá, te cuànguihu tucu-gá xití veñúhu càhnu sá io cùnuu ndihi-güedé. Te xití veñúhu-án yíhí-gá ní quexio cue dütú cùnuu ndihi cue téé dàcuaha ñaha xii ñáyiú nchaa tnúhu ní chídó tnúni ndí Moisés, ndihi cue téé cùu sacuéhé núú ñáyiú isráél.

²⁸ Te xáhaⁿ-güedé xii-gá:

—Cúini-ndí cachí tnúhu-n xii-ndí nása ndúu tnúhu ndee ini ndécú ndihi-n núu quide-n nándi sá quidé-n, ¿te yoo ducaⁿ ní taxi tnúhu ndee ini-án xii-n-i? —cachí-güedé xáhaⁿ-güedé xii-gá.

²⁹ Te Jesús ní xáhaⁿ-gá xii-güedé:

—Yúhú tnàhá-í cúini-í cácaⁿ tnúhu-í ñⁿ sá cácaⁿ tnúhu-í núú-ndó te núu na cachí tnúhu-ndo, te cachí tnúhu-í xii-ndo yòo ní taxi tnúhu ndee ini xii-í duha quide-í.

³⁰ Te chí cachí tnúhu xii-í yoo ní táuchíúⁿ ní dácuaándute ndí Juáá ñáyiú, ¿Yá Ndióxi áⁿ cué téé ñuyúú-a ní táuchíúⁿ ducaⁿ ní quide ndí? Te chí cachí tnúhu —cachí-gá xáhaⁿ-gá xii-güedé.

³¹ Te ní nguíta-güedé xitnàha-güedé:

—¿Nása cùñaha-o? Chi núu na cùñaha-o sá Yá Ndióxi ní táuchíúⁿ ducaⁿ ní quide ndí Juáá ñá, te quesaha-dé: “¿Ná cuená ñá túú ní sàndáá ini-ndó tnúhu ní cáháⁿ ndí vàn?” , quesaha-dé.

³² Te ni vá cúú cùñaha-o sá cué ñáyiú ñuyúú-a ní táuchíúⁿ ducaⁿ ní quide ndí Juáá —cachí-güedé xitnàha-güedé.

Te ducaⁿ ní xitnàha-güedé chi ñá túú ní cùtnúni ini-güedé nása cùñaha-güedé xii-gá, chí xiyúhú-güedé cue ñáyiú chí nchaa ñáyiú-án ní cùtnúni ndáá ini-yu sá Yá Ndióxi ní táuchíúⁿ-gá ducaⁿ ní quide ndí Juáá.

³³ Te ní xáhaⁿ-güedé xii Jesús:

—Ñá túú xini-ndí yoo ní táuchíúⁿ ducaⁿ ní dácuaándute ndí Juáá ñáyiú —cachí-güedé xáhaⁿ-güedé xii-gá.

Te Jesús ní xáhaⁿ-gá xii-güedé:

—Te núu ducaⁿ te ni yúhú vá cachí tnúhu-í xii-ndo yòo ní taxi tnúhu ndee ini duha quide-í —cachí-gá xáhaⁿ-gá xii-güedé.

12

Cuená cue téé cuihna ini-xi
(Mt. 21:33-46; Lc. 20:9-19)

¹ Te Jesús ní nguíta-gá caní-gá ñⁿ cuéndú núú ñáyiú nàcuáa tecu tnúni-yu tnúhu-gá, te xáhaⁿ-gá xii-yu:

—Ñⁿ téé ní nacúxi-dé mee-ni yòho yaha stilé núú ñúhú-dé, te ní chidoco-dé cuená sá vá cúú dàñú, te ní cadúha-dé núú quíhí-dé ndéhé yoho yaha stilé-án óré ná cùu, te ní cadúha-dé ñⁿ xito dúcúⁿ núú cáundóco cue téé coto yoho yaha stilé-án.

Te ní sáá ñⁿ nduu quèe-dé quíngaca cuu xica-dé vai nduu, te ní dándóo ndaha-dé sá ní xitu-dé-án xii ñⁿ úú cue téé càháⁿ ndihi-dé cuená cada chiuⁿ-güedé, te ní ndatnúhu-güedé sá óré ná cúú te cuu cuená daga-güedé te ducaⁿ te ní quee-dé cuáháⁿ-dé.

² Te sáta ní sáá nduu ní cuu ndéhé yoho yaha stilé sá ní xitu-dé-án, te ní xáhaⁿ-dè xii ñⁿ téé xinu cuechi núú-dé: “Cuáháⁿ cácaⁿ-n sá cúú cuená-í núú cué téé ní dándóo ndaha-í nchaa yoho yaha stilé sá ní xitu-í-án”, cachí-dé xáhaⁿ-dè. Te téé xinu cuechi-án ní xica-dé cuáháⁿ-dé.

³ Te cue téé-án ní tñiⁿ-güedé téé xinu cuechi-án, te ní caniha-güedé xii-dé, te dàtnúni ní nacuícúⁿ ñáhá-güedé, te ñá túú tnàhí ná ní sàñaha-güedé.

⁴ Te téé cùu xitohó yoho yaha stilé-án ní tendaha tucu-dé ingá téé xinu cuechi núú-dé cuáháⁿ-dé. Te óré ní quexio téé xinu cuechi-án te cue téé-án ní sáha ñaha-güedé yúú xii-dé, te ní táhú-güedé díquí-dé, te ní xicuéhé ñáhá-güedé xii-dé.

⁵ Te téé cùu xitohó nchaa yoho yaha stilé-án ní tendaha tucu-dé ingá téé xinu cuechi núú-dé cuáháⁿ-dè núú cué téé-án, dico téé-án óré ní quexio-dé te ní sahni ñaha-güedé xii-dé. Te téé cùu xitohó nchaa yoho yaha stilé-án ní tendaha-dé vai-gá cue téé xinu cuechi núú-dé cuáháⁿ ngácáⁿ-güedé sá cúú cuená-dé ní cùu dico díu-ni ducaⁿ ní quide ñaha tucu cue téé ndèe nchaa yoho yaha stilé-án xii-güedé, chí daga-güedé ní caniha-güedé te daga-güedé ní sahni ñaha-güedé.

⁶ Te téé cùu xitohó nchaa yoho yaha stilé-án ndécú ñⁿndii-ná téé tendaha-dé quíhíⁿ núú cué téé ní dándóo ndaha-dé sá ní xitu-dé-án, te téé tendaha-dé-án cúú-dé déhe ducuⁿ-dé, te io cùu ini ñáhá-dé. Te ní

sani iní-dé: “Váha-gá nõu tendaha-ĩ déhe-í-a nõhú-dé, chi òré quini ñáhá-güedé xii-dé te cànehe-güedé sá yíñuhu nõú-dé”, duha ní sani iní-dé. Te ducaⁿ te ní xáhaⁿ-dè xii déhe-dé-án sá nõhú-dé, te té-án caũnuhú-dé cuáháⁿ ngácáⁿ-dè sá cúu cuendá tátá-dé nõú cuè té-ánⁿ.

⁷ Dico òré ní xiní cue téé quide chiuⁿ-án dèhe téé cùu xítóhó nchaá yoho yáha stílè-án, te ní xítnáha-güedé: “Té-án téé véxi nduu táhú ñuhu-a ndihí sá cáá nõú-xi, dico cahni-o-dé te mee-o nduu táhú-ó sá ndúú táhú-dé”, duha ní xítnáha-güedé.

⁸ Te ní tñi-güedé té-án, te ní sahni ñaha-güedé, te ní dáquéné-güedé yiqui cùñú-dé ñⁿ xio yuhu ñuhu nõú cáá yóho yaha stílè-án –duha cuáháⁿ cuendú ní cani Jesús nõú-yu.

⁹ Te Jesús ní xáhaⁿ tucu-gá xii-yu:

–¿Te nchòhó sa cùtnuní iní-ndó nàcuáa cada xítóhó ñuhu-án ãⁿ? Chi nõhú-dé te cahni-dé cue té-án te dàndóo ndaha-dé ñuhu-dé xii cue téé cùtnuní iní-dé cada ndáá –cächí-gá xáhaⁿ-gá xii-yu.

¹⁰ Te xáhaⁿ tucu-gá xii-yu:

–Te nchòhó, náa ñá túú dàcuaha-ndo nõú tütú Yá Ndióxi nõú cächí-xi:

Yúú sá ní dáquéé tìhu cue téé dàcaa vehe, ní cuu-xi yúú cùntuu vitna.

¹¹ Chi mee Yá Ndióxi ducaⁿ ní cächí-gá cundu, te cùu-xi ñⁿ sá ïo cùñuhu-o vitna. Duha cächí-xi nõú tütú-gá –cächí Jesús xáhaⁿ-gá xii-yu.

¹² Te cue téé ní xíndedóho nàcuáa nduu tñuhu ní cáháⁿ-gá ní cuini-güedé tñi ñaha-güedé xii-gá ní cùu, chi ní cutnuni iní-güedé sá cuendá-güedé ní cáháⁿ-gá, dico ní yíhú-güedé tñi ñaha-güedé xii-gá cuendá sá ïo vãi ñáyiú, te ná ïo ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

¹³ Te sátá ní xica-güedé cuáháⁿ-güedé, te ní tendaha-güedé ñⁿ úú cue téé cùu fariséú, ndihí ñⁿ úú cue téé cùndihí té Hèrodés cuáháⁿ-güedé nõú ndécú Jesús ndúcú-güedé nàcuáa cada-güedé daticánuu ñaha-güedé xii-gá nõú tñuhu cáháⁿ-gá.

¹⁴ Te cue té-án ní quexio-güedé nõú Jesús, te xáhaⁿ-güedé xii-gá:

–Mèstrú, cùtnuní iní-ndí sá ïo ndáá cáháⁿ-n, te ñá túú quide cuendá-n nàcuáa cáháⁿ ñáyiú, te cuèi ndédani cáá-yu ñⁿ-ní cáháⁿ-n ndihí-yu chi ñá túú quide cuendá-n cuèi ná ñáyiú cùú-yu, te cáháⁿ ndáá-n nàcuáa cáháⁿ Yá Ndióxi cundecu-o ñüyúú-a. Te cächí tñuhu xii-ndí nõu váha-ni quide-ndí sá cháhu-ndí té Cèsár téé ïo cùnuu cuendá

impuèstú ãⁿ ñáhá –cächí-güedé xáhaⁿ-güedé xii-gá.

¹⁵ Dico Jesús ní cutnuni iní-gá sá xító ndéé ñáhá-güedé xii-gá, nõú ní xáhaⁿ-gá xii-güedé: –¿Ná cuendá ducaⁿ xito ndéé ñáhá-ndó xii-í? Chi dánèhé ñáhá xii-í ñⁿ díhúⁿ sá cháhu-ndo cuendá impuèstú te nõu nása càa –cächí-gá xáhaⁿ-gá xii-güedé.

¹⁶ Te cue té-án ní dánèhé ñáhá-güedé xii-gá ñⁿ díhúⁿ sá cháhu-güedé cuendá impuèstú. Te Jesús ní xáhaⁿ-gá xii-güedé:

–Chí cächí tñuhu xii-í nõu yoo nõú-xi ndéé ndihí yoo ñiú-xi ndéé –cächí-gá xáhaⁿ-gá xii-güedé.

Te ní xáhaⁿ-güedé xii-gá:

–Núú té Cèsár ndéé ndihí ñiú-dé –cächí-güedé xáhaⁿ-güedé xii-gá.

¹⁷ Te Jesús ní xáhaⁿ-gá xii-güedé:

–Te nõu ducaⁿ te chí nàcuáha té Cèsár sá cúu cuendá-dé, te sá cúu cuendá méé Yá Ndióxi te xíáⁿ nàcuáha-ndo-gá –cächí-gá xáhaⁿ-gá xii-güedé.

Te cue té-án ïo ní cuñuhu-güedé sá dúcáⁿ ní cáháⁿ-gá.

Cuendá cue ñáyiú ndoto

(Mt. 22:23-33; Lc. 20:27-40)

¹⁸ Te sátá dúcáⁿ te ní quexio ñⁿ úú cue téé cùu saducéú nõú ndécú Jesús, te cue té-án ñá túú sàndáá iní-güedé sá ndótó cuè ñáyiú ní xíhí, te ní xáhaⁿ-güedé xii-gá:

¹⁹ –Mèstrú, ndíi Moisés cächí ndíi nõú tütú ndíi ndècu vitna sá nõu ñⁿ téé na cùú-dé te quendóo ñadihí-dé, te nõu ñá túú ní xóo déhe-dé ndihí ñadihí-dé-án, te téé cùu ñani-dé naqueheⁿ-dè ñaha ní quendóo quèè-án cuendá coo déhe-dé ndihí-aⁿ cuendá téé ní xíhí-án.

²⁰ Te ní xíndecu úsá tñáhá cue téé mee-ni ndí ñani-güedé. Te téé díhna ní níhí ñadihí-dé, te ñá túú ní cùdí-dé cundecu-dé chi ní xíhí-dé, te ní ñⁿ déhe-dé ñá túú ní xóo ndihí ñadihí-dé.

²¹ Te téé cùu ní naqueheⁿ-dè ñaha ní quendóo quèè-án, dico ní xíhí tucu-dé, te ní ñⁿ tucu déhe-dé ñá túú ní xóo ndihí ñaha-án. Te ñiú-ni ducaⁿ ní xíhí téé cùu uní.

²² Te ní xínu ndi úsá-güedé ní cándeca ñaha-güedé xii ñaha-án, dico ní ñⁿ-güedé ñá túú ní xóo déhe-güedé ndihí-aⁿ, te ní ndihí-güedé ní xíhí te ndéé nõú ní ndihí-ná ní xíhí tñáhá ñadihí-án.

²³ Te na sàá nduu ndòto-güedé ndihí ñaha-án, ¿te ndédacáa-güedé ñadihí-güedé cuu-aⁿ-í? Chi ndi úsá-güedé ní cándeca ñaha-güedé xii-aⁿ –cächí-güedé xáhaⁿ-güedé xii-gá.

²⁴ Te Jesús ní xáhaⁿ-gá xii-güedé:

–Ní xíta nchòhó tñuhu cáháⁿ-ndó, chi ñá túú xini-ndó nàcuáa cáháⁿ Yá Ndióxi nõú

tútú-gá, te ni ñá túú xini-ndó sá díú-gá ndácú-gá quidé-ñá nchaandi túhú sá váha.

²⁵ Te na cächí tnúhu-í xii-ndo sá òré ná sáa nduu ndoto nchaa ñáyiú ní xihí, te ðává-áⁿ vá yõo-gá dasaⁿ ðehe yoco-xi chí vá yõo-gá candeca tnàha, chí na ndòtó-yu te cuu-ná-yu ðàtná cue espíritú xínú cuèchi núú Yá Ndióxi.

²⁶ Te núu nchòhó cuiní-ndó càháⁿ-ndó cuendá nchaa ñáyiú ndoto, te ðíhna-gá dacuàha-ndo nacuaá ní chidó tnúni ndii Moisés núú tütú ndii ní cùu. Chí ðiu núú tütú ndii càháⁿ-xi nàcuáa ní xáhaⁿ Yá Ndióxi xii ndii cútñháá ní càháⁿ ndihi ñaha-gá ìⁿ xichi núú ñihnú tnùtaú nchicúⁿ ñuhú. Te duha ní xáhaⁿ-gá xii ndii: “Yúhú cùu-í Ndióxi tè Àbrahám, ndihi tè Isaac, ndihi tè Jácób”, duha ní xáhaⁿ Yá Ndióxi xii ndii cächí-xi núú tütú ndii.

²⁷ Te Yá Ndióxi ñá túú cùu-gá Ndióxi cue ñáyiú ní xihí, chí cùu-gá Ndióxi cue ñáyiú xindecu vívú, núu xiáⁿ nchòhó ío xíta-ndo tnúhu càháⁿ-ndó. Te sá ðúcáⁿ ní càháⁿ-gá cuendá cue téé-áⁿ, te xiáⁿ cútñúni sá cuèi ní xihí-güedé sá cùu-xí tnàha ñáyiú-güedé, dico ndècu vívú-güedé sá cùu-xí-gá —cächí-gá xáhaⁿ-gá xii-güedé.

Tnúhu sá ìo-gá cúnúu

(Mt. 22:34-40)

²⁸ Te tnàhá ìⁿ téé ðacuaha ñaha xii ñáyiú nchaa tnúhu ní chidó tnúni ndii Moisés ndédóho-dé nchaa tnúhu càháⁿ Jèsús ndihi cue téé cùu saducéu-áⁿ, te ndédóho-dé sá sũúni váha ñihí-gá tnúhu ñàdanhocáva-gá. Te ní sãndehe yatni-dé núú-gá, te xáhaⁿ-dè xii-gá:

—Cächí tnúhu xii-í ndèdacàa tnúhu sá ní càháⁿ Yá Ndióxi ìo-gá cúnúu cuu ðíhna —cächí-dé xáhaⁿ-dè xii-gá.

²⁹ Te Jèsús ní xáhaⁿ-gá xii-dé:

—Duha càháⁿ tnúhu sá ìo-gá cúnúu: “Nchòhó ñáyiú isràél ío váha chí cündédóho tnúhu-a. ìⁿndii díí-ni Yá Ndióxi ndécú, te ðiu-ni-gá cùu-gá Ndióxi-ó.

³⁰ Te cuu iní-ndó Dùtú Ndióxi Yáa cùu Ndióxi-ndó ñi yuhu ñi iní-ndó, te caní iní-ndó càda-ndo ðàtná cuiní mée-gá, te mee-ni tnúhu váha caní iní-ndó cuendá cuu vii cuu váha-ndo núú-gá, te coo iní-ndó càda-ndo nacuaá cuu váha iní-gá”, duha càháⁿ tnúhu sá ìo-gá cúnúu.

³¹ Te duha càháⁿ tucu ingá tnúhu cùu uú sá ío cúnúu: “Cuu iní-ndó tnàha ñáyiú-ndo ðàtná cùu ìni-ndó mèe-ndo”, duha càháⁿ tnúhu cùu uú-áⁿ. Te úú duha-ni tnúhu-a cùu-xi tnúhu sá ìo-gá cúnúu —cächí-gá xáhaⁿ-gá xii-dé.

³² Te téé ðacuaha ñaha xii ñáyiú nchaa tnúhu ní chidó tnúni ndii Moisés ní xáhaⁿ-dè xii-gá:

—Mèstrú, váha-ni càháⁿ-n chí ndáá sá ìⁿndii-ni Yá Ndióxi ndécú, te ñá túú-gá ndéé ndécú ìngá ndióxi.

³³ Te ðàtná ní cächí-n sá ñi yuhu ñi iní-ó cùu iní-ó Yá Ndióxi, te caní iní-ó càda-ndo nacuaá cuu vii cuu váha iní-gá te ío vii ío váha cuu iní-ó ðàtná cuiní mée-gá, te coo iní-ó càda-ndo nacuaá cuu váha iní-gá, te cuu iní-ó cuè tnàha ñáyiú-ndo ðàtná cùu ìni-ó mèe-o. Te nchaa xiáⁿ ìo-gá xini ñúhu-xi cada-o dacúxí sá cuañaha-o quiti cahni-güedé te cáyú-dí nduu táhu ñháá Yá Ndióxi, ndihi ðacúxí nchaa ðava-gá sá sãñaha-o nduu táhu-gá —cächí-dé xáhaⁿ-dè xii-gá.

³⁴ Te sá ðúcáⁿ ío váha nduu tnúhu ní càháⁿ téé-áⁿ, núu ní xáhaⁿ Jèsús xii-dé:

—Luha-ná cùmáni xii-n te ndíhu ndaha ñaha Yá Ndióxi —cächí-gá xáhaⁿ-gá xii-dé.

Te sá ðúcáⁿ ní xáhaⁿ-gá xii téé-áⁿ, núu vá yõo ìⁿ-gá ní cùyi ñágá tnúhu nducu tnúhu-yu núú-gá.

Yoo cùu Xitohó Jesucristú

(Mt. 22:41-46; Lc. 20:41-44)

³⁵ Te Jèsús yihí-gá xiti veñuhu càhnu sá ío cúnúu danehé-gá ñáyiú, te xáhaⁿ-gá xii-yu:

—Cue téé ðacuaha ñaha xii ñáyiú nchaa tnúhu ní chidó tnúni ndii Moisés cächí-güedé sá Cristú Yáa tendaha Yá Ndióxi quixi ñuyúú-a cùu-gá ðehe ndii Dàvií, te ndii-áⁿ ñi cunaha vihi ní xihí ndii. ¿Te ná cuendá ducaⁿ càháⁿ-güedé?

³⁶ Te mee ndii Dàvií-áⁿ ñi ðacáhú ñi ñháá Espíritú Yá Ndióxi xii ndii nàcuáa càháⁿ ndii, te duha ní cächí ndii:

Dútú Ndióxi ní xáhaⁿ-gá xii Yáa cùu Xitohó-í: “Ngóo xio cùha-í,

te yúhú cada-í te nchaa sá cùu úhú ñi ñháá xi-n canehe-xi sá yíñuhu núu-n.”

Duha ní xáhaⁿ Dùtú Ndióxi xii Yáa cùu Xitohó-í.

Duha ní cächí ndii.

³⁷ ¿Te nása cùu Cristú ðehe ndii Dàvií, te mee ndii ní cächí ndii sá cùu-gá Xitohó ndii? —cächí Jèsús xáhaⁿ-gá xii-yu.

Te ío cuèhé ñáyiú ní xindedóho nchaa tnúhu ní càháⁿ-gá, te ío ní cudíí ñi-yu ní xindedóho ñháá-yu xii-gá.

Jèsús càháⁿ-gá cuendá cue téé ðacuaha ñaha xii ñáyiú nchaa tnúhu ní chidó tnúni ndii Moisés

(Mt. 23:1-36; Lc. 11:37-54; 20:45-47)

³⁸ Te òré ðanèhé ñháá Jèsús xii cue ñáyiú, te xáhaⁿ-gá xii-yu:

—Cada cuendá-ndo vá cádá-ndo ðàtná quidé cuè téé ðacuaha ñaha xii ñáyiú nchaa tnúhu ní chidó tnúni ndii Moisés, chí cue téé-áⁿ tnàhá ñi-güedé cuihnu-güedé dóó nání sá sácuihnu cue téé cúnúu-gá te cuiní-güedé sá mée-ni ndihi tnúhu yíñuhu

cáháⁿ ndihí ñaha ñáiyu xii-güedé nchaa núu xicá cùu-güedé.

³⁹ Te nácáxi-güedé xilè sácóo nchihi cue téé cùnuu-gá xití veñúhu sácóo nchihi-güedé. Te ducaⁿ-ni quide-güedé cuéi òré quihu-güedé mésá caxi-güedé òré ndécú-güedé ìⁿ vico, chi mee-ni núu sácóo cue téé cùnuu cuini-güedé coo-güedé.

⁴⁰ Te quèndeé-güedé vehe nchaa ñáiyu quèé, te ío naha cáháⁿ ndihí-güedé Yá Ndióxi dándahú-güedé méé-güedé sá ío quide ndáá-güedé cuèndá sá cuini-güedé cáháⁿ váha ñáiyu cuèndá-güedé. Te sá dúcáⁿ quide-güedé te ío-gá ndoho-güedé núu úhu núu ndáhú dácúuxí dáva-gá ñáiyu —cachí-gá xáhaⁿ-gá xii-yu.

Dihúⁿ nduu táhu Yá Ndióxi ní dáquëe ìⁿ ñaha ndáhú ñaha quèé

(Lc. 21:1-4)

⁴¹ Te núcóo Jèsús xití veñúhu yatni núu ndécú àlcanciá te ndèhe-gá xidáquëe ñáiyu dihúⁿ xití alcanciá-án, te tnáhá cue ñáiyu cuica xidáquëe-yu vai dihúⁿ.

⁴² Te ní quexlo ìⁿ ñaha ndáhú ñaha quèé, te ndèhe-gá ní dáquëe-aⁿ úu tnáhá dihúⁿ còbrí xití alcanciá, te dihúⁿ-án ío sacú yáhu-xi.

⁴³ Te Jèsús ní cana-gá cue téé xica cuu ndihí-gá, te ní xáhaⁿ-gá xii-güedé:

—Na cächí tnúhu ndáá-í xii-ndo sá ñaha ndáhú ñaha quèé-a ío-gá nándihí dihúⁿ ní dáquëe-aⁿ xití alcanciá dácúuxí dihúⁿ ní dáquëe dáva-gá-yu.

⁴⁴ Chi nchaa ñáiyu-án ní dáquëe-yu mee-ná dihúⁿ sá ní quèndóo-ná, dico ñaha quèé-a cuéi ndáhú-aⁿ dico ní dáquëe-aⁿ nihí dihúⁿ sá cuááⁿ sá caxí-án ní cùu —cachí-gá xáhaⁿ-gá xii-güedé.

13

Jèsús cächí-gá sá ngóyó veñúhu

(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sá ío cùnuu, te ìⁿ téé xica cuu ndihí-gá ní xáhaⁿ-dè xii-gá:

—¡Mèstrú, cundehe ná ío vii ní sáá veñúhu-aⁿ ndihí nchaa vehe nèhe tnaha ndihí-xi, te ío vii ndáa nchaa yúu yíhi! —cachí-dé xáhaⁿ-dè xii-gá.

² Te Jèsús ní xáhaⁿ-gá xii-dé:

—Nchaa nàcuáa cãa nchaa vehe sá cùnñúhu-n-a vitna sáá nduu te vá cündüu-gá-xi dàtná cáá-xí vitna, chi ní ìⁿ-gá yúu vá códó nchihi tnaha-xi, chi ndihí ngoyo —cachí-gá xáhaⁿ-gá xii-dé.

Nàcuáa cada-xi nduu ta cüyatni naa ñuyúu
(Mt. 24:3-28; Lc. 21:7-24; 17:22-24)

³ Te Jèsús ní xica-gá ndihí cue téé xica cuu ndihí-gá cuáháⁿ ndihí ñaha-gá xii-güedé yucu nani Olívú, te yucu Olívú-án túu ndáá núu cáá veñúhu càhnu sá ío cùnuu. Te Jèsús

ní quexlo-gá ndihí-güedé yucu Olívú-án, te xiáⁿ ní ngóo-gá te núu núcóo-gá-án ní sáháⁿ té Pèlú ndihí té Jàcob ndihí té Juàá ndihí té Ndríxi, te dayuhu ní xáhaⁿ-güedé xii-gá:

⁴ —Cuini-ndí cachí tnúhu-n ná nduu ducaⁿ cada-xi ngoyo veñúhu càhnu sá ío cùnuu, àdi nándi cùu sá cáda-xi cuèndá cutnúni iní-ndí sá sá ta cuyatni nduu ducaⁿ cada-xi —cachí-güedé xáhaⁿ-güedé xii-gá.

⁵ Te Jèsús ní xáhaⁿ-gá xii-güedé:

—Ío quihi iní-ndó cùndecu-ndo cuèndá sá vã yóo dandáhú ñáhá xii-ndo.

⁶ Chi ío cuéhé cue téé coo ñuyúu te danani-güedé méé-güedé dàtná nani-í, te cachí-güedé: “Yúhú cùu-í Cristú Yáá ní tendaha Yá Ndióxi véxi ñuyúu-a”, duha cachí-güedé. Te sá dúcáⁿ cáháⁿ-güedé te ío vai ñáiyu dandáhú-güedé.

⁷ Te òré ná nihí-ndó tnúhu sá nàá-güedé ndèni ní cuu, te vã yuhú-ndó chi dacutíí sá dúcáⁿ cáda-xi, dico vatá sãa-gá nduu nãa ñuyúu òré ducaⁿ cáda-xi.

⁸ Chi cue téé ìⁿ nacióⁿ nàá-güedé ndihí cue téé ingá nacióⁿ, te titní ñuu ngúita-güedé nàá-güedé, te titní xichi ñuyúu ñihí vñi tnãa, te titní tucu xití ñuyúu coo tnamá, te ío-gá cuéhé sá yãha ñáiyu. Te nchaa sá dúcáⁿ cáda-xi-án cúu-xí tnúndòho sá vitná váha váha quèsaha-xi sácúu-xí cuè ñáiyu ndècu ñuyúu-a.

⁹ Dico nchòhó ío quihi iní-ndó cùndecu-ndo, chi nchaa ñáiyu na cùu úhú iní ñáhá xii-ndo cuáha cuèndá ñáhã-yu xii dáva-ndo núu cuè téé cùchiuⁿ, te candeca ñaha-güedé xii-ndo quihiⁿ xití veñúhu-güedé, te yacáⁿ caniha-güedé xii-ndo. Te quihiⁿ-ndó núu cuè téé yindaha nacióⁿ àdi núu dáva-gá cue téé cùnuu sá cuèndá-í, te nchòhó nihí-ndó nàcuáa cada-ndo cáháⁿ váha-ndo cuèndá-í núu-güedé.

¹⁰ Te cùmání-gá sáá nduu nãa ñuyúu-a te sa cuténuu tnúhu-í ní cãa xico ñuyúu-a, te tnúhu-án cáháⁿ-xi nàcuáa naníhi táhu ñáiyu.

¹¹ Te òré ná càndeca ñaha ñáiyu xii-ndo quihiⁿ núu cuè téé cùchiuⁿ cuáha cuèndá ñáhã-yu, te òré vatá sãa-gá-ndó núu-güedé te vã cání iní-ndó núu nãa cunduu tnúhu cùñaha-ndo xii-güedé. Chi òré-nã te Yá Ndióxi dacàhu iní ñáhã-gá xii-ndo nãsa cunduu tnúhu cùñaha-ndo xii-güedé, te ñu-ni tnúhu sá dácàhu iní ñáhã-gá-án cùñaha-ndo xii-güedé. Te ñã díu mée-ndo cáhãⁿ-ndó chi Espiritú Yá Ndióxi cáhãⁿ-xi yuhu-ndo.

¹² Te dáva cue téé cuáha cuèndá-güedé ñani-güedé núu cuè téé cùchiuⁿ cuèndá cahni ñaha-güedé. Te dáva cue téé cùu tátã ñu-ni ducaⁿ cáda-güedé cuáha cuèndá-güedé dèhe-güedé núu cuè téé cùchiuⁿ. Te dáva cue téé cùu dèhe cuu úhú iní-güedé tátã-güedé ndihí nãná-güedé, te cuáha

cuendá ñáhá-güedě xii-yu núú cuè téé cùchiuⁿ cuendá cahni ñaha-güedě xii-yu.

¹³ Te ío cuéhé ñáyiú cuu úhú iní ñáhá-yu xii-ndo sá cuendá-í, dico nchaa nchòhó ñáyiú na càda ndee-ní iní canchicúⁿ nihnu ñaha-ni xii-í te naníhí táhú-ndó.

¹⁴ Te ndíi Dániél téé ní xóo cáháⁿ tnúhu Yá Ndióxi ndéé sanaha ní chidó tnùní ndíi núú tütú ndíi cuendá ñⁿ sá dáquèe títú Yá Ndióxi cundecu ñⁿ xichi núú ñà túú tãu-xi cundecu-xi, te xiãⁿ cada-xi sá vã cündècu-gá ní ñⁿ ñáyiú xiãⁿ. Te cada cuendá váha-ndo nãcuáa ní cáháⁿ ndíi, chi nduu na quíní-ndó xiãⁿ cundecu-xi ñⁿ xichi núú ñà túú tãu-xi cundecu-xi, te dává-áⁿ nchaa ñáyiú xĩndecu distritú Júdeá xíní ñùhu-xi cunú-yu quíhíⁿ-yu xití yucu.

¹⁵ Te nchaa ñáyiú ndáa ndódó dìquí vehé-xí vã ndíhu-gá-yu vehé-yu quehéⁿ-yu ñⁿ ndachíúⁿ-yu canehé-yu quíhíⁿ.

¹⁶ Te nchaa ñáyiú cuáháⁿ yucu ní vã nùhú-gá-yu vehé-yu cúnúquehéⁿ-yu dóó-yu.

¹⁷ Te ndáhú ní cuu nchaa ñáyiú ñíhí ñùhú dēhe-xi, ndíhí cue ñáyiú ñíhí xĩndeca déhe vitna sãdi na saá nduu ñucaⁿ cada-xi!

¹⁸ Te nchòhó ío chí càcáⁿ táhú nũú Yá Ndióxi cuendá sá vã ñucaⁿ ndòho-ndo yóo quidé víxiⁿ-xi.

¹⁹ Chí dává-áⁿ coo tnúndòho cahnu vihi ñuyú, te vátá ñⁿ ndúu-gá coo tnúndòho cahnu vihi-áⁿ ndéé cùtnahá ní cadúha Yá Ndióxi ñuyú, chí ñúu ní dává-áⁿ coo tnúndòho cahnu vihi-áⁿ, te ní nũú cuáháⁿ núú véxi vã cóo-gá tnúndòho-áⁿ.

²⁰ Te Yá Ndióxi càchí-gá sá vã ío vai nduu coo tnúndòho cahnu vihi-áⁿ ñuyú sá cuendá nchaa ñáyiú ní cáháⁿ-gá cundecu ndíhí-gá. Te núú vai nduu na coo tnúndòho-áⁿ, te vã yóo cácu nihnu.

²¹ Te dává-áⁿ cũñaha ñáyiú xii-ndo: “Chí cündèhe íha, chí íha ní quexio Cristú Yaá ní tendaha Yá Ndióxi véxi ñuyú-a”, duha cũñahá-yu xii-ndo. Àdi quesahá-yu: “Chí cündèhe yacáⁿ chí yacáⁿ ndécú-gá”, quesahá-yu. Te vã quĩndáá iní-ndó tnúhu cáháⁿ-yu.

²² Te coo cue téé danani-güedé méé-güedé dàtná nání-í te cachí-güedé sá cúú-güedé Yaá ní tendaha Yá Ndióxi véxi ñuyú-a. Te dává-güedé cachí-güedé sá cúú-güedé cue téé cáháⁿ tnúhu Yá Ndióxi dico ñá ndáa sá cúú-güedé cue téé cáháⁿ tnúhu-gá, te cada-güedé titní núú sá vã yóo tnáhi ndàcu cada cuendá dandáhú-güedé ñáyiú, te caní iní-güedé dandáhú-güedé ndéé cue ñáyiú ní cáháⁿ Yá Ndióxi cundecu ndíhí-gá.

²³ Te vitna ío váha cuáha-ndo cuendá, te quíhí iní-ndó cündecu-ndo, chí nchaa sa ní dátúha ñaha-í xii-ndo.

Nãcuua cada-xi òré quixi tucu Téé cùu ñani tnáh nchãa ñáyiú

(Mt. 24:29-35, 42-44; Lc. 21:25-36)

²⁴ Te ná yáha-ni coo tnúndòho cahnu vihi-áⁿ, te vã dáyehé-gá nchíanchii te ní vã dáyehé-gá yóo.

²⁵ Te ngoyo nchaa chódíní ndéé andiu, te quidi-xi andiu.

²⁶ Te dává-áⁿ quíní ñáhá nchãa ñáyiú xii yúhú Téé cùu ñani tnáhá-yu nchaá-yu quee-í andiu quixi-í ichi xití vícío, te quíní-yu sá ío cáhu cuu-í, te quide-í nchaa sá váha.

²⁷ Te tendaha-í cue espíritú xínú cuèchi núú-í quíhíⁿ-xi nadatãcá-xi nchaa ñáyiú ní cáháⁿ-í chitnahá ñáhá xii-í xĩndecu ní càa xico ñuyú.

²⁸ Te cundehe-ndo nãcuáa quide yutnu ngúxí, chí yutnu-áⁿ ndúú yùte núú dité-xi te nàtahú ndaha-xi, te òré ñucaⁿ quide-xi te càchí-ndó sá sá ní cuyatni nuu cahni.

²⁹ Te ñucaⁿ sãtnahá-xi cada-xi òré ná quíní-ndó càda-xi nchaa nãcuáa ní cáháⁿ-í, te cutnúní iní-ndó sá sá ní cuyatni víí-nã nduu nãa ñuyú.

³⁰ Te na càchí tnúhu ndáá-í xii-ndo sá òré vátá cúú-gá cue ñáyiú xĩndecu ñuyú-a vitna, te cada-xi nchaa nãcuáa ní cáháⁿ-í.

³¹ Te andiu ndíhí ñuyú-a chí ndíhí nihnu-xi, dico tnúhu-í chí vã ndíhí nihnu-xi chí cúu-xi tnúhu ndáá.

³² Dico ñá túú cùtnuní ná nduu quixi tucu-í, te ní ñà túú cùtnuní ná òré chí vã yóo xíní, te ní cue espíritú xínú cuèchi núú Yá Ndióxi ñá túú xíní-xi ná nduu quixi-í, te ní mée yúhú téé cùu Déhe Dútú Ndióxi ñá túú xíní-í ná nduu quixi tucu-í, chí ñⁿ ñúu díí-ní mee Tãtã-í Dútú Ndióxi xíní-gá núu ná nduu quixi-í.

³³ Te nchòhó xíní ñùhu-xi sá ío quíhí iní-ndó cündecu-ndo, te cáháⁿ ndíhí-ndo Yá Ndióxi, chí ñá túú xíní-ndó ná nduu quixi tucu-í.

³⁴ Te na càchí tnúhu-í xii-ndo cuendá ñⁿ téé cuíní quíngaca cuu xica. Te téé-áⁿ cùmání-gá quee-dé vehe-dé te ní xáhaⁿ-dè xii cue téé xínu cuèchi núú-dé sá ná càdá cuendá-güedé vehe-dé. Te ní sãñaha-dè xii-güedé ndí dííⁿ núú-güedé chiúⁿ cada-güedé. Te ní xáhaⁿ-dè xii téé ndéé yuyèhe sá ná cündecu túha-ni-dé yuyèhe ndéé násãá-dé.

³⁵ Te duha ndúu tnúhu cáháⁿ-í cuendá nchòhó cundecu túha-ndo, chí ñá túú xíní-ndó ná nduu te ní ñà túú xíní-ndó ná òré quixi tucu yúhú Yaá cúú Xitohó-ndó, núu òré sa ní cundiquíⁿ, àdi dává núú, àdi òré sa ní cana uoⁿ líhí, àdi òré sa ta cùditó cuáháⁿ, núu xiãⁿ ío chí cündècu túha.

³⁶ Te duha cáháⁿ-í chí na cuáháⁿ òré ñá túú ná yíhí iní-ndó quèxio-í, te ñá túú ndècu túha-ndo.

³⁷ Te dátaná-ni xáhaⁿ-í xii nchòhó sá cùndècu túha-ndo, te diu-ni ducaⁿ xáhaⁿ-í xii nchaa dava-gá ñáiyu sá cùndècu túha-yu —càchí-gá xáhaⁿ-gá xii-güedé.

14

Ndücu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úu-gá nduu te quesaha víco pascuá, víco xèxi ñáiyu pàá sá ñà túú yíhi levadurá. Te cue dútú cúnúu, ndihi cue téé dàcuaha ñaha xii ñáiyu nchaa tnúhu ní chídó tnúni ndíi Moisés ndúcú-güedé nàcuáa cada-güedé dandáhú-güedé Jèsús cuendá tñii ñaha-güedé xii-gá te cahni ñaha-güedé.

² Te ní xítñaha-güedé:

—Váha-gá sá vá tñii-ó Jèsús mei nduu víco, chí núu ducaⁿ na càda-o te ío dusaⁿ càda ñáiyu —càchí-güedé xítñaha-güedé.

Íiⁿ ñadihí chíhí-án acití díquí Jèsús

(Mt. 26:6-13; Jn. 12:1-8)

³ Te Jèsús ndécú-gá ñuú Bètania vehe íiⁿ téé nani Xímú, téé ní tñahá cuhé sá dátèhyú nihnu-xi yiqui cùñú-ó. Te yíhi Jèsús mèsá xéxi-gá ní quexio íiⁿ ñadihí néhé-án íiⁿ sá ní cuáha yúu váha yúu nání àlabastrú, te xití xiáⁿ ñúhú acití sàháⁿ tñámí sá nání nàrdú sá ío ndèyáhu, te ní táhú-án xiáⁿ te acití ñúhú xití-xi-án ní sódó-aⁿ díquí Jèsús.

⁴ Te íiⁿ úú cue téé xíndecu-án ní cudéⁿ-güedé sá dúcáⁿ ní quide-aⁿ, te ní xítñaha-güedé:

—Ñá túú quide váha ñaha-án dàcáⁿ quide-án, chí íi ní dácúita-aⁿ acití váha-án.

⁵ Chí váha-gá núu cuyáhu acití-án sá úni cièndú díhúⁿ denàriú, te díhúⁿ sá cuyáhu acití-án cuu cuendá ñáiyu ndáhú ní cùu —càchí-güedé xítñaha-güedé.

Te ní tenáa-güedé ñaha-án sá dúcáⁿ ní quide-aⁿ.

⁶ Te Jèsús ní xáhaⁿ-gá xii-güedé:

—Chí dáñá, vá dásátú-ndó íni ñadihí-a, chí sá ní quide ñaha-aⁿ xii-í cùu-xí íiⁿ sá váha.

⁷ Chí cue ñáiyu ndáhú ducaⁿ ní cùtnahá ñáiyu-án tñuú-ndó, te nání òré càchí ní-ndó te chindee-ndó-yu. Dico yúhú chí vá ncháa nduu cundecu ndihi ñaha-í xii-ndo ñuyúú-a.

⁸ Te ñadihí-a ní quide-aⁿ íiⁿ sá váha ndéé není ní ndacu-aⁿ, chí sá dúhá ní quide ñaha-aⁿ xii-í ní chíhi ñaha-aⁿ acití, te xiáⁿ cada íni-ndó sá sá quide túha-aⁿ yiqui cùñú-í cuendá quíndúxi-xi.

⁹ Te na càchí tnúhu ndáa-í xii-ndo sá ndèni ní cuu nihí ñuyúú ná càháⁿ ñáiyu tnúhu-í, te càháⁿ-yu tñahá cuendá ñadihí-a cuendá quini nchaa ñáiyu nàcuáa ní quide-aⁿ, te ducaⁿ vá nàcuanaa-yu —càchí-gá xáhaⁿ-gá xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núu cué téé cùu úhú íni ñáhá xii-gá

(Mt. 26:14-16; Lc. 22:3-6)

¹⁰ Te té Jùdás Iscarioté ní sáháⁿ-dé ní ndatnúhu-dé ndihi cue téé cùu dútú cúnúu sá cuáha cuendá-dé Jèsús núu-güedé, te núu tñahá té Jùdás-án cùu úxúú tñahá cue téé xica cuu ndihi-gá ní cùu.

¹¹ Te òré ducaⁿ ní ndatnúhu-dé ndihi-güedé, te ío ní cudíí íni-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jùdás-án ní ngúita-dé ndúcú-dé nàcuáa cada-dé cuáha cuendá-dé Jèsús núu-güedé.

Cùdini Jèsús ndihi cue téé xica cuu ndihi-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáa nduu ní quesaha víco pascuá, víco ñà túú xèxi ñáiyu pàá sá ñà túú yíhi levadurá, te diu-ni nduu-án sáhní-güedé íiⁿ mbéé líhli xèxi-yu nduu víco pascuá-án. Te cue téé xica cuu ndihi Jèsús ní xicáⁿ tnúhú-güedé núu-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núu-n núu ndéé cáá vehe cuini-n cada túha-ndí sá cùdini-o sacuaa nduu víco pascuá —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gá xii úu-ni tñahá cue téé xica cuu ndihi-gá:

—Chí cuáháⁿ xití ñuú-án, te yàcáⁿ nanihí-ndó íiⁿ téé tanehe yóo ndute, te téé-án càndèndaha-ndo-dé quíhíⁿ.

¹⁴ Te núu ndèdacáa vehe na ndihu-dé te xiáⁿ quíhu-ndo. Te cúñaha-ndo xii xitohó vehe-án: “Yáa cùu Mèstrú càchí-gá sá núu ndèdacáa xichi xití vehe-n cuáñaha núu-n xii-gá cudini-gá ndihi cue téé xica cuu ndihi-gá sacuaa nduu pascuá”, duha cúñaha-ndo.

¹⁵ Te dátñuni danèhé ñáhá-dé xii-ndo íiⁿ quartú càhnú cãa núu ñinu, chí vehe yódo tñaha cuu-xi, te sa ní quide túha-dé nchaa sá nándíhi, te nchòhó dicó-nã comidá cada túha-ndo cùdini-o —càchí-gá xáhaⁿ-gá xii-güedé.

¹⁶ Te cue téé-án ní xica-güedé cuáháⁿ-güedé xití ñuú-án, te nchaa-ni nàcuáa ní xáhaⁿ Jèsús ní cue. Te ní quide túha-güedé sá cùdini-güedé ndihi-gá sacuaa nduu víco pascuá-án.

¹⁷ Te sátá ní cundiquíⁿ te ní quexio Jèsús ndihi ndi úxúú cue téé xica cuu ndihi-gá.

¹⁸ Te cuánguihu-gá mèsá ndihi-güedé cuendá cudini ndihi ñaha-gá xii-güedé, te òré yíhi-gá mèsá ndihi-güedé, te xáhaⁿ-gá xii-güedé:

—Na càchí tnúhu ndáa-í xii-ndo sá íiⁿ nchohó cue téé xèxi ndihi ñaha xii-í cuáha

cuendá ñáhá-ndó núú cuè téé cùu úhú iní ñáhá xii-í —càchí-gá xáhaⁿ-gá xii-güedé.

¹⁹ Te sá dúcáⁿ nǐ xáhaⁿ-gá xii-güedé, te nchaa-güedé ní ngüita-güedé cündiyí-güedé. Te da ìⁿ da ìⁿ-güedé ní ngüita-güedé xicáⁿ tnúhú-güedé núú-gá, te xáhaⁿ-güedé xii-gá:

—¿Ñá díú yúhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gá xii-güedé:

—Diu-ni ìⁿ nchóhó cue téé úxúú xicá cùu ndíhi-í, téé na dàquëndaha còhó òré dàquëndaha-í, téé-áⁿ cuáha cuendá ñáhá-dé xii-í núú cuè téé cùu úhú iní ñáhá.

²¹ Te yúhú Téé cùu ñani tnáhá-ndó nchaa-ndo ñuhu ichi-í cuáháⁿ-í ndoho-í nacuáa càháⁿ-xi núú tütú Yá Ndióxi. Dico ndáhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá, chí váha-gá sá vǎ cácu téé-áⁿ cundecu-dé ní cùu, te ñá díú sǎ ní cacu-dé te ducaⁿ càda-dé —càchí-gá xáhaⁿ-gá xii-güedé.

²² Te nini cùdini cue téé xica cuu ndíhi Jèsús ní queheⁿ-gá pǎá, te ní ndacáⁿ táhú-gá núú Yá Ndióxi, te dàtnúni ní táhú cuèchi-gá, te ní ngüita-gá dácáñhu ñaha-gá xii-güedé, te xáhaⁿ-gá:

—Chí quéhéⁿ pǎá-a caxi-ndo, te cada iní-ndó sǎ cùú-xí dàtnǎ yiqui cùñú-í —càchí-gá xáhaⁿ-gá xii-güedé.

²³ Te ní queheⁿ-gá vǎsú ñúhú ndúdi ndéhé yoho yàha stilé, te ní ndacáⁿ táhú-gá núú Yá Ndióxi, te dàtnúni ní ngüita-gá sǎñaha-gá xii-güedé cuendá coho-güedé luha luha sǎ ñúhú xití-xi, te nchaa-güedé ní xihí.

²⁴ Te ní xáhaⁿ-gá xii-güedé:

—Ndudí ndéhé yoho yàha stilé-a cada iní-ndó sǎ cùú-xí dàtnǎ ñiñí-í sǎ catí òré cahni ñaha-güedé xii-í. Te sá dúcáⁿ càti ñiñí-í xiǎⁿ cutnúní ndáá sǎ Yá Ndióxi cada-gá ingá núú sǎ váha sǎ cùú-xí vǎi ñáyiú dàtnǎ ní cachí-gá cada-gá.

²⁵ Te na càchí tnúhu ndáá-í xii-ndo sǎ vitná-nǎ duha xihí-í ndudí ndéhé yoho yàha stilé-a te vǎ cóhó-gǎ-í, dico na sǎá nduu cundecu-í núú ndécú Yá Ndióxi táxi tnúni-gá, te dàvǎ-áⁿ cada iní-í sǎ dàtnǎ sǎ cóhó tucu-í chí ío cudíí iní-í —càchí-gá xáhaⁿ-gá xii-güedé.

Jèsús càháⁿ-gá sǎ tǎ Pèlú cùñaha-dé xii ñáyiú sǎ ñà túú xini ñáhá-dé xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ìⁿ ndudú ndíhi cue téé xica cuu ndíhi-gá, te dàtnúni ní xica-gá cuáháⁿ-gá ndíhi-güedé yucu Olívú.

²⁷ Te yacáⁿ ní xáhaⁿ-gá xii-güedé:

—Na càchí tnúhu-í xii-ndo sǎ ncháá-ndó dàña nihnu ñaha-ndo xii-í niú vitna, chí quee ndáá-xi nacuáa càháⁿ-xi núú tütú Yá Ndióxi núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dé

ndíhi-güedé cuténuu”, duha càchí-xi núú tütú-gá.

²⁸ Dico na cùú-í te ndoto-í te codonúu-í núú-ndó quihíⁿ distritú Galileá —càchí-gá xáhaⁿ-gá xii-güedé.

²⁹ Te tǎ Pèlú ní xáhaⁿ-dǎ xii-gá:

—Te cuéi nchaa-güedé ná dándóo ñaha-güedé xii-n, dico yúhú chí vǎ dándóo ñaha-í xii-n —càchí-dé xáhaⁿ-dǎ xii-gá.

³⁰ Te Jèsús ní xáhaⁿ-gá xii-dé:

—Na càchí tnúhu ndáá-í xii-n sǎ niú vitna cùmání-gá cana lihí úú xito, te úní xito càháⁿ-n núú ñáyiú sǎ ñà túú xini ñáhá-n xii-í —càchí-gá xáhaⁿ-gá xii-dé.

³¹ Dico tǎ Pèlú ní càháⁿ ñii-dé, te xáhaⁿ-dǎ xii-gá:

—Cuéi na cùu ndíhi ñaha-í xii-n dico vǎ càháⁿ-í núú ñáyiú sǎ ñà túú xini ñáhá-í xii-n —càchí-dé xáhaⁿ-dǎ xii-gá.

Te nchaa dava-gá cue téé xica cuu ndíhi-gá diu-ni ducaⁿ ní xáhaⁿ-güedé xii-gá.

Jèsús càháⁿ ndíhi-gá Yá Ndióxi ìⁿ xichi núú nání Gétsemaní

(Mt. 26:36-46; Lc. 22:39-46)

³² Te Jèsús cuáháⁿ-gá ndíhi cue téé xica cuu ndíhi-gá ìⁿ xichi núú nání Gétsemaní. Te òré ní quexio-gá ndíhi-güedé xiáⁿ, te ní xáhaⁿ-gá xii-güedé:

—Chí cúnúo iha cundetu-ndo na quihíⁿ-í yacáⁿ càháⁿ ndíhi-í Yá Ndióxi —càchí-gá xáhaⁿ-gá xii-güedé.

³³ Te ndéca-gá tǎ Pèlú, ndíhi tǎ Jácobó, ndíhi tǎ Juáá cuáháⁿ, te ñà túú tnáhí-gá cùú váha iní-gá te ní ngüita-xi súuni ndíhú iní-gá.

³⁴ Te ní xáhaⁿ-gá xii cue téé úní-áⁿ:

—Súuni ndíhú iní-í dàtnǎ sǎ cùú-í, te chí quéndóo iha te vǎ cùdú-ndó —càchí-gá xáhaⁿ-gá xii-güedé.

³⁵ Te sǎ ñunchí luha ní xica ndehe Jèsús núú ndécú-güedé, te ní ngáundeiyí-gá ndéé ñuhu càháⁿ ndíhi-gá Tátá-gá Dútú Ndióxi sǎ núu vǎ cündée iní-gá taunihnu ñaha-gá xii-gá cuendá nchaa nacuáa yáha-gá.

³⁶ Te òré càháⁿ ndíhi Jèsús Tátá-gá Dútú Ndióxi, te xáhaⁿ-gá:

—Yòhó tátá mée-í, nchaandi túhú sǎ váha ndacu-n quide-n, te càháⁿ ndáhú-í núú-n núu vǎ cündée iní-n taunihnu ñaha-n xii-í cuendá sǎ vǎ ndóhó-í ná sǎá òré, dico vǎ càdá-n nacuáa càchí iní mée-í chí cada-n nacuáa càchí mee-n —càchí-gá xáhaⁿ-gá xii Tátá-gá Dútú Ndióxi.

³⁷ Te sátá ní yáha ní càháⁿ ndíhi-gá Tátá-gá Dútú Ndióxi, te cuanuhú-güedé núú ní dándóo-gá cue téé úní-áⁿ, te xixidí-güedé òré ní nasáá-gá, te ní xáhaⁿ-gá xii tǎ Pèlú:

—Xímú, ¿náa sama xidí-n? ¿Náa ñà cündée tnahí núú-n vǎ cùdú-ni-n cuèdicó ìⁿ òré-áⁿ? —càchí-gá xáhaⁿ-gá xii-dé.

Te ní xáhaⁿ tucu-gá xii-güedé:

³⁸ —Te chí quéndõo tucu, te cuhuⁿ iní-ndó vâ cùdú-ndó, te cáháⁿ ndihi-ndo Yâ Ndiõxi cuendá sá vâ dácáháⁿ ñáhá yùcu ñávâha xii-ndo càda-ndo sá ñà túú tàù-ndó càda-ndo. Te na càchi tnúhu ndáá-í xii-ndo sá nchòhó cuiní-ndó càda-ndo nchaa nacuaá cáháⁿ-í dicó-ni sá ñà túú ñihí ndéé-ndó —càchí-gá xáhaⁿ-gá xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tâtá-gá Dútú Ndiõxi, te ñu-ndó ní nacuaá ní xáhaⁿ-gá díhna xáhaⁿ tucu-gá.

⁴⁰ Te òré ní yáha ní cáháⁿ ndihi-gá Tâtá-gá Dútú Ndiõxi, te cuánuhú tucu-gá núú xindecu cue téé úní xicá cùu ndihi-gá-án, te xidí-ni tucu-güedé òré ní nasáá-gá, te ducaⁿ ní quide-güedé chí súúni ñùhu saní núú-güedé, te ñà ní ñihí-güedé tnúhu cùñaha-güedé xii-gá òré ní nasáá-gá.

⁴¹ Te ní sáháⁿ tucu-gá xito cùu uní ní cáháⁿ ndihi-gá Tâtá-gá Dútú Ndiõxi, te òré ní nasáá tucu-gá núú xindecu-güedé, te xáhaⁿ-gá xii-güedé:

—¿Te náa xidí-ni tucu-ndo?, te vitna vá cùdú-gá-ndó chí sa ní sáá òré cuáha cuendá ñáhá-güedé xii yúhú Tée cùu ñani tnáhá-ndó ncháa-ndo núú cuè téé ndécu ichi cuehé ichi duha.

⁴² Te vitna chí ndácõo na quíhíⁿ-ó chí sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xáhaⁿ-gá xii-güedé.

Ní tñii-güedé Jèsús ndécá ñàha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te cáháⁿ dúcáⁿ-ní Jèsús ní quexio té Jüdás. Te núú tnáhá téé-án cùú úxúú tnáhá cue téé xica cuu ndihi-gá. Te ndihi-dé vâi cue téé ní quexio, te dava-güedé xínehe-güedé machití te dava-güedé xínehe-güedé carrütí. Te cue téé-án ní tendaha ñàha cue dútú cùnùu ndihi cue téé dàcuaha ñàha xii ñáyiu nchaa tnúhu ní chídó tnùní ndíi Moisés, ndihi cue téé cùu sacuéhé núú ñáyiu isráél.

⁴⁴ Te té Jüdás téé cuáha cuendá ñáhá xii Jèsús sa ní xitnúhu-dé cue téé-án nacuaá cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dé xii-güedé:

—Cundehe-ndo téé na tàyuhu-í, te téé-án tñii-ndo-dé chí téé-án cùú-dé téé ndéé iní-ndó, te ío quíhi iní-ndó cãndeca-ndo-dé quíhíⁿ —duha ní xáhaⁿ-dé xii-güedé.

⁴⁵ Te òré ní quexio té Jüdás ndihi cue téé-án núú ndécú Jèsús, te ní xáhaⁿ-dé xii-gá:

—Mèstrú —càchí-dé xáhaⁿ-dé xii-gá.

Te ní tàyuhu ñàha-dé.

⁴⁶ Te nchaa cue téé ndihi-dé-án ní tñii-güedé Jèsús cuendá candeca ñàha-güedé xii-gá quíhíⁿ.

⁴⁷ Te ñiiⁿ cue téé cùndihi Jèsús ní tava-dé machití-dé, te ní xehndé-ni-dé ñiiⁿ xio lóho

ñiiⁿ téé xinu cuechi núú dútú cùnùu, te ní quendeé duuⁿ lóho téé-án.

⁴⁸ Te Jèsús ní xáhaⁿ-gá xii cue téé ní tñii ñàha xii-gá-án:

—Nchòhó, nèhe-ná-ndó màchití, nèhe-ná-ndó càrruti véxi ní tñii ñàha-ndo xii-í, dàtná quidé-ndó ñiiⁿ ñadúhú quidé ñàha-ndo xii-í.

⁴⁹ Te nchaa-ni nduu ní xiní-ndó ní xindecu-í xití veñúhu càhnu sá ío cùnùu ní xóo danèhé-í ñáyiu, te ñà túú ní tñii ñàha-ndo xii-í. Dico dàcuítí sá dúhá yáha-í cuendá quee ndáá-xi nacuaá cáháⁿ-xi núú tútú Yâ Ndiõxi —càchí-gá xáhaⁿ-gá xii-güedé.

⁵⁰ Te nchaa cue téé xica cuu ndihi-gá ní xinu-güedé ní dándõo ñàha-güedé xii-gá.

Ñiiⁿ téé cuechi ní xinu-dé

⁵¹ Te ñiiⁿ téé cuechi ndéndaha-dé Jèsús cuáháⁿ, te lavichi-dé, ñiiⁿ-ni dóo yadí yidúcúⁿ nuu-dé ñihí-dé, te ní tñii ñàha-güedé xii-dé,

⁵² dico ní ndacu-dé ní quenuñii-dé te ní dándõo-dé dóo yidúcúⁿ nuu-dé-án ní xinu-dé.

Jèsús ndécú-gá jündá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue téé ní tñii ñàha xii Jèsús ndécá ñàha-güedé xii-gá cuáháⁿ núú téé cùu dútú cùnùu-gá. Te xíáⁿ ní tacá nchaa dava-gá cue téé cùu dútú cùnùu, ndihi cue téé cùu sacuéhé núú ñáyiu isráél, ndihi cue téé dàcuaha ñàha xii-yu nchaa tnúhu ní chídó tnùní ndíi Moisés cuendá cada-güedé jündá.

⁵⁴ Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núú ndécú téé cùu dútú cùnùu-gá-án, te xíáⁿ ní ngóo teté-dé yuhu nuhú ndihi cue téé cùu poleciá.

⁵⁵ Te cue téé cùu dútú cùnùu ndihi nchaa dava-gá cue téé xindecu jündá ndúcú-güedé ñáyiu dacáa ñiiⁿ cuéchi díquí Jèsús cuendá ducaⁿ ñihí-güedé nacuaá cada-güedé cahni ñàha-güedé xii-gá, dico ñà túú ní ndacu-güedé.

⁵⁶ Te cuéí vâi ñáyiu dàcaá-yu cuéchi díquí-gá dico mee-ni sá ní cahu iní mèé-yu ní cáháⁿ-yu, chí tucu cáháⁿ ñiiⁿ tucu cáháⁿ ñiiⁿ-yu.

⁵⁷ Te davá-yu ní ndacuñii-yu te ní ngúita-yu dàcaá-yu ñiiⁿ cuéchi neñúú díquí-gá, te xáhãⁿ-yu xii nchaa cue téé cùnùu:

⁵⁸ —Nchúhú ní tecú dóho-ndí càchí-dé sá dãngõyo-dé veñúhu càhnu sá ío cùnùu sá ní dácáa cuè téé ñuyíú-a, te dandáa tucu-dé ingá veñúhu saa, ñu-ndó núú cáá tnáhí veñúhu-án te xití úní-ni nduu sa nadaxinu-dé, te vá cùú-gá-xi veñúhu sá ní dácáa cuè téé ñuyíú-a, duha càchí-dé ní tecú dóho-ndí —càchí-yu xáhãⁿ-yu xii-güedé.

⁵⁹ Dico ni dùca ñá túú ní cùu ìnuú-yu nchaa tnúhu ní cáháⁿ-yu.

⁶⁰ Te tée cùu dútú cùnù-gá ní ndacuñí-dé tnuú nchaa ñáiyu, te xáhaⁿ-dè xii Jèsús:

—¿Ná cuendá duha ndùu tnúhu cáháⁿ ñáiyu-a cuendá-n? Te cáháⁿ nùu nása ndùu tnúhu cáháⁿ-n —càchí-dé xáhaⁿ-dè xii-gá.

⁶¹ Dico Jèsús ñá túú tnàhí ní cáháⁿ-gá. Te tée cùu dútú cùnù-gá-á ní xáhaⁿ tucu-dé xii-gá:

—Cuñí-í cachí tnúhu-n xii-ndí nùu sá díú Cristú Déhe Yá Ndióxi Yáá ní tendaha-gá véxi ñuyúú-a cùu-n. Te díu Yá Ndióxi cúú-gá Yáá quidé cahnú-ndí —càchí-dé xáhaⁿ-dè xii-gá.

⁶² Te Jèsús ní xáhaⁿ-gá xii-dé:

—Diu Yáá-án cùu-í, te na càchí tnúhu-í xii-ndo sá sáá nduu te quini-ndó yúhu Téee cùu ñani tnàhá-ndó nchaa-ndo cunucóo-í xio cùha Dútú Ndióxi Yáá ndácú quide nchaandi túhú sá vaha. Te dàvá-án quini ñàhá-ndó xii-í quee-í andiu quixi-í ichi xití vico —càchí-gá xáhaⁿ-gá xii-dé.

⁶³ Te dútú cùnù-gá-á ní ndátá-dé dóo caní nìhnu-dé cuendá sá ñà túú ní tnàhá iní-dé nàcuáa ní cáháⁿ Jèsús, te ní xáhaⁿ-dè xii nchaa cue téee xindecu jündá:

—Ñá túú-gá xini ñuhu-xi cue téee cáháⁿ nùu ndáá sá ndècuéchi-dé àdi ñá túú ndècuéchi-dé.

⁶⁴ Chi sa ní xindedóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yá Ndióxi, te nchaa-ndó chí cáháⁿ vitna núu nása sàni iní-ndó cunduú cuendá téee-a —càchí-dé xáhaⁿ-dè xii-í-güedé.

Te nchaa-güedé ní cachí-güedé sá ná cùu-dé.

⁶⁵ Te dava-güedé ní nguíta-güedé ní tiú díí ñàhá-güedé xii-gá, te ní dádáhu-güedé núú-gá, te ní nguíta-güedé caniha-güedé xii-gá, te xáhaⁿ-güedé:

—¡Cáháⁿ ná cótó ná cúú tée ní caniha xii-n! —cachí-güedé xáhaⁿ-güedé xii-gá.

Te cue téee cùu poleciá ní cani-güedé núú-gá.

Té Pèlú cáháⁿ-dé núú ñáiyu sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú nñu quide-güedé jündá, chí vehe yodo tnaha cuu-xi, te té Pèlú núcúo-dé quehé vehe-án. Te ìnuú xichí xinu cuèchi núú dútú cùnù-án ní quexio-xi núú núcúo té Pèlú.

⁶⁷ Te òré ní xini ñàhá-xi xii-dé núcúo teté-dé yuhu nùu, te ní xindéhé ñaha váha-xi xii-dé, te xáhaⁿ-xi:

—Yòhó tnàhá-n cùu-n téee xica cuu ndihi Jèsús téee ñuú Nazàrét —càchí-xi xáhaⁿ-xi xii-dé.

⁶⁸ Te té Pèlú ní xáhaⁿ-dè xii-xi:

—Yúhú ñá túú xini-í téee-án, te ní ñà túú cùtunú iní-í nása ndùu tnúhu cáháⁿ-n —càchí-dé xáhaⁿ-dè xii-xi.

Te té Pèlú ní xica-dé cuáháⁿ-dé ndàa nacuaa nchii yuyèhe vehe-án, te ní cana ìnuú líhi.

⁶⁹ Te xichí xinu cuèchi-án ní xini ñàhá tucu-xi xii-dé, te xáhaⁿ-xi xii nchaa ñáiyu xindecu-án:

—Diu téee-án tnàhá-dé xicá cùu-dé ndihi téee ndèca-güedé cuànguihu-a —càchí-xi xáhaⁿ-xi xii-yu.

⁷⁰ Dico té Pèlú ñá túú ní nñuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcáⁿ ní xáhaⁿ xichí-án xii-dé, te ní xáhaⁿ tucu dava cue ñáiyu xindecu-án xii-dé:

—Ndáá sá tnàhá-n cùu-n téee xica cuu ndihi téee ndèca-güedé cuànguihu-án chí cùu-n téee distritú Galileá, te cáháⁿ-n dàtná cáháⁿ-güedé —càchí-yu xáhaⁿ-yu xii-dé.

⁷¹ Te té Pèlú ní xáhaⁿ-dè xii-yu:

—Nchacuiti Yá Ndióxi sá yúhú cáháⁿ ndáá-í sá ñà túú xini-í téee càcunehe-ndo-án —càchí-dé xáhaⁿ-dè xii-yu.

⁷² Te òré-ni-áⁿ ní cana tucu líhi xito cùu uu, te òré-áⁿ ní ndacu iní té Pèlú nàcuáa ní xáhaⁿ Jèsús xii-dé sá cùmání-gá cana ìnuú xití xito te úní xito cáháⁿ-dé núú ñáiyu sá ñà túú xini ñàhá-dé xii-gá. Te òré ducaⁿ ní ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuèchi iní-dé.

15

Jèsús ndécú-gá núú té Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá ní túndaá te cue téee cùu dútú cùnù, ndihi cue téee cùu sacuéhé núú ñáiyu isráél, ndihi cue téee dàcuaha ñaha xii ñáiyu nchaa tnúhu ní chídó tnúni ndíi Moisés, ndihi nchaa dava-gá cue téee cùnùu ní xindecu jündá ní natacá-güedé, te ní dácútrú-güedé Jèsús te ndèca ñaha-güedé xii-gá cuáháⁿ núú té Pèlú.

² Te té Pèlú ní xicáⁿ tnúhú-dé núú Jèsús, te xáhaⁿ-dè xii-gá:

—¿Ndáá sá díú-n cùu-n téee yindaha ñaha xii ñáiyu isráél-án? —càchí-dé xáhaⁿ-dè xii-gá.

Te Jèsús ní xáhaⁿ-gá xii-dé:

—Diu-í yindaha-í-yu —càchí-gá xáhaⁿ-gá xii-dé.

³ Te cue téee cùu dútú cùnù dacia-güedé vai cuèchi díquí-gá.

⁴ Te té Pèlú ní xicáⁿ tnúhú tucu-dé núú-gá, te xáhaⁿ-dè xii-gá:

—Cáháⁿ, ná cuendá ñà cáháⁿ-n te cundehe ná ndéé duha titni cuèchi dàcaa díquí ñàhá cuè téee-a xii-n —càchí-dé xáhaⁿ-dè xii-gá.

⁵ Dico Jèsús ñá túú tnàhí ní cáháⁿ-gá te té Pèlú ío ní cuñúhu-dé sá dúcáⁿ ñà túú tnàhí ní cáháⁿ-gá.

Cue ñáyi u xáhãⁿ-yu xii té Pilatú sá cáhni-dé Jësús

(Mt. 27:15-31; Lc. 23:13-25; Jn. 18:38-19:16)

6 Te ndi tnahá nduu vico pascuá dácäcu té Pilatú ñⁿ tée yihi vecaá chi ducaⁿ tnáhi quide-dé, te mee ñáyi cáháⁿ-yu te núu ndédacáa tée yihi vecaá-áⁿ cácu-dé, te tée-áⁿ dácäcu-dé.

7 Te yihi ñⁿ tée nani Barrabás vecaá ndihi dava-gá cue tée cündihí-dé. Te té Barrabás-áⁿ ní sanu ichi-dé ñáyi ñuú ingá ichi, te ní ngüíta-yu ndihi-dé ní cuu úhú iní-yu cue tée cüchiuⁿ, te ní sahani-dé ndíyi núu xiáⁿ ní chihí ñaha-güedé vecaá xii-dé.

8 Te nchaá ñáyi ní sáháⁿ-yu núu té Pilatú, te cáháⁿ ndáhú-yu núu-dé sá ná cáda náhi-ni-dé dátá quidé-dé.

9 Te té Pilatú ní xáhaⁿ-dè xii-yu:

—¿Cuini-ndó sá dácäcu-í tée yindaha ñaha xii ñáyi isráel-áⁿ? —cächí-dé xáhaⁿ-dè xií-yu.

10 Te ducaⁿ ní cáháⁿ té Pilatú, chi ní cutnúni iní-dé sá dicó sá cuèdú iní cuè dútú cúnúu núu xiáⁿ ducaⁿ ní quide-güedé ní sáha cuendá ñáhá-güedé xii Jësús núu-dé.

11 Te cue dútú cúnúu ní xáhaⁿ-güedé xii nchaá ñáyi sá ná cüñáhá-yu xii té Pilatú dácäcu-dé té Barrabás, te ní quide-yu nacuáa ní xáhaⁿ-güedé.

12 Te té Pilatú ní xicáⁿ tnúhú-dé núu-yu, te xáhaⁿ-dè xií-yu:

—¿Ná cuini-ndó cáda-í tée cächí-ndó yindaha ñaha xii ñáyi isráel-í? —cächí-dé xáhaⁿ-dè xií-yu.

13 Te nchaá-yu níhi ní cáháⁿ-yu, te xáhãⁿ-yu xii-dé:

—¿Cata caa-dé núu cürúxi! —cächí-yu xáhãⁿ-yu xii-dé.

14 Te té Pilatú ní xáhaⁿ-dè xií-yu:

—¿Te ná cúu cuèchi ní quide-dé te núu ducaⁿ cuini-ndó cáda-í-dé-í? —cächí-dé xáhaⁿ-dè xií-yu.

Dico nchaá-yu uuⁿ-gá níhi ní cáháⁿ-yu, te xáhãⁿ-yu xii-dé:

—¿Cata caa-dé núu cürúxi! —cächí-yu xáhãⁿ-yu xii-dé.

15 Te té Pilatú ní quide-dé nacuáa ní xáhãⁿ-yu xii-dé cuendá sá cúdiu-dé núu-yu, te ní dácäcu-dé té Barrabás, te ní táuchíuⁿ-dè ní cani-güedé Jësús ndihi ñií. Te sáta dúcáⁿ ní quide ñaha-güedé xii-gá, te ní táuchíuⁿ-dè candeca ñaha-güedé quíhiⁿ cata caa ñaha-güedé xii-gá núu cürúxi.

16 Te cue tée cúu sandadú ndécá ñaha-güedé xii-gá cuáháⁿ vechiuⁿ, te diu-ni xiáⁿ cúu vèhe tée cúu gobiernú. Te xiáⁿ ní tacá nchaá dava-gá cue tée cúu sandadú.

17 Te xiáⁿ ní dácúihnú ñaha-güedé xii-gá ñⁿ dóo tícuèhé víhi, te ní cadúha-güedé ñⁿ coroná ñu ní chihí-güedé díquí-gá.

18 Te ní ngüíta-güedé níhi cáháⁿ-güedé cúdíquí ndeé ñáhá-güedé xii-gá, te xáhaⁿ-güedé:

—¿Ío cáhnu cuu yohó tée yindaha ñaha xii ñáyi isráel! —cächí-güedé xáhaⁿ-güedé xii-gá.

19 Te cani-güedé díquí-gá ndihi ñⁿ carrütí, te tíu díí ñáhá-güedé xii-gá, te ngüñí xítí-güedé núu-gá quidé-güedé sá néhé-güedé sá yíñhú núu-gá dico ñá ndáa chi dicó cúdíquí ndeé ñáhá-güedé xii-gá.

20 Te sáta dúcáⁿ ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé víhi sá ní dácúihnú ñaha-güedé, te ní dándíunuu ñaha-güedé xii-gá dóo méé-gá. Te dátuní ndécá ñaha-güedé cuáháⁿ núu catá cáa ñaha-güedé xii-gá núu cürúxi.

Sáta caa-güedé Jësús núu cürúxi

(Mt. 27:32-44; Lc. 23:26-43; Jn. 19:17-27)

21 Te ichi cuáháⁿ-güedé ndihi Jësús ní naníhí-güedé ñⁿ tée ñuú Cirené nání-dé Xímú, te déhe-dé cúu ñⁿ tée nani Lijandru, ndihi ingá tée nani Rúfú. Te té Xímú-áⁿ ñúhú-dé ichi duha cuándixi-dé ní sáháⁿ-dé yucu, te ní quide yica-güedé ní xido-dé cürúxi sá nchídó Jësús.

22 Te ndéca-güedé Jësús cuáháⁿ ñⁿ xichi núu nání Gólgotá, te tnúhu-áⁿ queé-xi: ñⁿ xichi núu nání yiqui díquí ndíyi, duha quee-xi tnúhu-áⁿ.

23 Te ní sáñaha-güedé xii-gá ndudí sá ní queé yúcu nání mírri coho-gá ní cúu dico ñá túú ní xihí-gá.

24 Te ní sata caa ñaha-güedé xii-gá núu cürúxi. Te sáta dúcáⁿ te cue tée cúu sandadú-áⁿ ní xito ndeé-güedé núu ndédacáa-güedé cuu cuendá-güedé dóo-gá.

25 Te cúu-xi caá ñⁿ dátneé òré ní sata caa ñaha-güedé xii-gá núu cürúxi.

26 Te ní taxi ndecu-güedé ñⁿ sá ndeé lètrá núu táca-gá. Te lètrá-áⁿ cáháⁿ-xi ná cuendá ducaⁿ ní quide ñaha-güedé xii-gá. Te duha cáháⁿ lètrá-áⁿ: “Tée yindaha ñaha xii ñáyi isráel”, duha cächí-xi.

27 Te tnahá úu cue tée cúu ñadúhú ní sata caa-güedé diu-ni núu cürúxi tucu. Te ñⁿ-dé ní sata caa-güedé xio cùha-gá, te ingá-dé ní sata caa-güedé xio dátá-gá.

28 Te ducaⁿ ní cuu chí ní quee ndáa-xi nacuáa cáháⁿ-xi núu tútu Yá Ndióxi núu cächí-xi: “Ñⁿ-ni ní quide ñaha-güedé xii-gá ndihi cue tée ndecu cuèchi-xi”, duha cächí-xi núu tútu-gá.

²⁹ Te nchaa ñáiyu yáha yatni núú tãcãa-gã dácũcõ-yu díquí-yu te xĩcuèhé ñáhã-yu xii-gã, te xáhãⁿ-yu:

—Te ná cuendá ducaⁿ cãa-n tacaa-n xíaⁿ, te cãchí-n sã dãngoyo-n veñúhu cãhnu sã io cũnuu te dandãa-n ingã veñúhu saa, te xití úní-ní nduu sa nadaxĩnu-n cãchí-n.

³⁰ Te vitna tanùu núú cùrúxí-áⁿ dácãcu-n mée-n —cachí-yu xáhãⁿ-yu xii-gã.

³¹ Te ñũ-ni ducaⁿ ní quide cue tée cùu dútú cùnuu, ndihí cue tée dàcuaha ñaha xii ñáiyu nchaa tñúhu ní chídó tñuní ndíi Moisés, chí ní cudíquí ndéé ñáhã-güedé xii-gã, te ní xítñaha-güedé:

—Tée-a ní ndacu-dé ní dácãcu nihnu-dé ñáiyu, ¿te ná cuendá ñã ndácú-dé dácãcu nihnu-dé mée-dé-i?

³² Te núu ndáá sã díú-dé cùú-dé Cristú Yaa ní tendaha Yã Ndióxi véxi ñuyúú-a quindaha ñaha xii ñáiyu isráel, te na cùndehe-o nuu-dé núú cùrúxí, cuendá quindáá ini-ó-dé —cãchí-güedé xítñaha-güedé.

Te ndéé tñahã cue tée tãcaa xio xio diñi-gã xicuèhé ñáhã-güedé xii-gã.

Ní xihí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee nihí ñuyúú, te ducaⁿ-ní cãa ní cuu ndéé caá úní sacuaa.

³⁴ Te ñũ-ni òré caá úní sacuaa-áⁿ nihí ní cãháⁿ Jèsús, te xáhaⁿ-gã xii Tátã-gã Dútú Ndióxi:

—Elói, Elói, láma sabãctaní —cãchí-gã xáhaⁿ-gã.

Te tñúhu-áⁿ quée-xí: Ndióxi mée-í, Ndióxi mée-í, ná cuendá ní dáñã ñaha-n xii-í, duha quée-xi tñúhu-áⁿ.

³⁵ Te dava cue tée xĩndecu yatni núú tãcãa-gã-áⁿ ní tecú dóho-güedé nãcuáa ní cãháⁿ-gã, te ní xitñaha-güedé:

—Chí cùndedóho chí cãna-dé té Èliás —cãchí-güedé xítñaha-güedé.

³⁶ Te ñⁿ cue tée xĩndecu-áⁿ xĩnú-dé ní sãháⁿ ní chindóyo-dé luha cãchí xití ndudí íá, te ní chinenu-dé díquí ñⁿ yutnu cãni te ní ndocani-dé chíhí-dé yuhu-gã cuendá coho-gã. Te ní xáhaⁿ cuè tée xĩndecu-áⁿ xii tée-áⁿ:

—Cundetú tnaa na cùndehe-o nacoto núu quixi té Èliás nunehe ñaha-dé xii-dé núú cùrúxí —cãchí-güedé xáhaⁿ-güedé xii-dé.

³⁷ Te Jèsús nihí ní canasaa-gã te ní xihí-ni-gã.

³⁸ Te sátã dúcãⁿ te ní ndátã dóó cùú còrtinã xití veñúhu cãhnu sã ño cũnuu ní quée dava ndáá, te ndãa núú ñĩnu ní ngúíta-xi ní ndátã.

³⁹ Te tée cùu capitãⁿ nútñĩ-dé ndãa núú Jèsús, te ndèhe-dé nãcuáa ní quide-gã òré ní xihí-gã, te ní cachí-dé:

—Sã ndáá ndisa sã díú tée-a cùu-dé Déhe Yã Ndióxi ní cùu —duha ní cachí-dé.

⁴⁰ Te xica xĩnutñĩ ñⁿ úú ñáiyu diñí ndèhè-yu nchaa nãcuáa ní quide ñaha-güedé xii Jèsús, te tñahã tá Màriá Magdalená, ndihí tá Salómé, ndihí tá Màriá nãná té Chèé ndihí té Jãcobó tée cãchí-güedé cùú líhli-gã.

⁴¹ Te cue ñáiyu diñí-áⁿ ní xica cuú-yu ndihí Jèsús distritú Galiléa ní xinu cuèchí-yu núú-gã. Te cue ñáiyu diñí-áⁿ nchicúⁿ ñáhã-yu xii-gã ní quexio ndéé ñuú Jerusálén ndihí dava-gã ñáiyu diñí nchicúⁿ ñáhã xii-gã cuáhãⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndetàtú ñáiyu. Te nduu-áⁿ xĩquide túha-yu sã cùú ingã nduu nduu ndetàtú-yu-áⁿ, te ñũ-ni nduu-ã sa ní cuaa víhi,

⁴³ Te ñⁿ tée nãni Chèé tée ñuú Arimãtéa ní cuyí-dé ní sãháⁿ-dé núú té Pilatú, te ní xáhaⁿ-dé sã núu vá cùndèe ini-dé dañã-dé chindúxi-dé yiqui cuñú Jèsús. Te tñahã té Chèé-áⁿ cùú-dé ñⁿ tée cùnuu cundihí-dé cue tée quide jundá, te tñahã-dé ndétú-dé sáá nduu ndíhu ndaha ñaha Yã Ndióxi xii-dé ndihí cue ñáiyu.

⁴⁴ Te té Pilatú ío ní cuñúhu-dé sã dúcãⁿ ño ndihí ní xihí Jèsús, te ní cana-dé tée cùu capitãⁿ ní xicãⁿ tñúhu-dé núú-dé núu ndisa sã sã ní xihí-gã.

⁴⁵ Te tée cùu capitãⁿ-áⁿ ní xáhaⁿ-dè xii té Pilatú sã ndãá ní xihí Jèsús, núu xiãⁿ té Pilatú-áⁿ ní sãha-dé tñúhu chindúxi té Chèé-áⁿ yiqui cuñú-gã.

⁴⁶ Te té Chèé-áⁿ ní saaⁿ-dé ñⁿ dóó vãha, te ní sãháⁿ-dè ní nunehe-dé yiqui cuñú Jèsús núú cùrúxí, te ní chidúcúⁿ-nuu-dé yiqui cuñú-gã dóó vãha sã ní saaⁿ-dè-áⁿ, te dàtñuní nehé-dé yiqui cuñú-gã cuáhãⁿ ní chíhí-dé ñⁿ yáú nchíi yiqui naha cãva, te ní sadi-dé yuhu yáú-áⁿ ndihí ñⁿ yúú quèhèⁿ.

⁴⁷ Te tá Màriá Magdalená, ndihí tá Màriá nãná té Chèé ní xini-yu núú ní chíhí-dé yiqui cuñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sátã ñⁿ cundiquíⁿ nduu ndetàtú ñáiyu, te tá Màriá Magdalená, ndihí tá Salómé, ndihí tá Màriá nãná té Jãcobó ní saãⁿ-yu acití sãháⁿ tñámí cuendá canehé-yu quihíⁿ chíhí-yu yiqui cuñú Jèsús.

² Te ndumíngú nehé-ni òré vitna váha váha ní xinu coto núú nchicanchii ní quexio-yu núú nchíi yáú yihí yiqui cuñú Jèsús.

³ Te ní xitñahã-yu:

—Yoo cúnãha-o xòcãni yúú ndéá yuhu yáú-a, chí vá yõ tñahí ndècu iha —cachí-yu xitñahã-yu.

4 Te òré ní xíndéhé vǎha-yu te ní xíní-yu sá yúú cǎhnú ndèdí yuhu yàú-án ìn xio-ná ndécú.

5 Te cuánguihú-yu xítí yaú-án, te ní xíní-yu nùcáo ìn espíritú xínú cuèchi núú Yá Ndióxi ndàa xio cuhá-yu, te càa-xi datná cáá ìn tée cuèchi, te nihnu-xi ìn dóo cuixíⁿ dóo cání, te ní yùhú-yu òré ní xíní-yu espíritú-án.

6 Te espíritú-án ní xáhaⁿ-xi xii-yu:

—Vá yùhú-ndó, chí yùhú sa cùtnuní iní-í sá nchóhó véxi-ndo nànducu-ndo yiqui cuñú Jèsús téé ñúú Nazàrèt téé ní sahni-güedé núú cùrúxí, dico ñá túú-gǎ yiqui cùñú-dé ndécú ìha chí sa ní ndoto-dé, te chí cùndèhe núú ní sacáⁿ-güedé yiqui cùñú-dé te quini-ndó ñá ñá túú-gǎ-dé.

7 Te chí cuáhánⁿ núú ndécú tǎ Pèlú ndihí dǎva-gǎ cuè téé ní xica cuu ndihí-dé, te duha cùñaha-ndo xii-güedé: “Jèsús codonú-gǎ núú-ndó quihíⁿ distrítú Galileá, te yácáⁿ quini-ndó-gǎ dátá ní cachí-gǎ xii-ndo”, duha cùñaha-ndo xii-güedé —cǎchí espíritú-án xáhaⁿ-xi xii-yu.

8 Te cue ñáyíu òhí-án ìo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ìo ní yùhú-yu, te ñá túú tñáhí ná tñúhu ní xǎháⁿ-yu xii cue ñáyíu ní naníhí-yu ichi cuèndá sá ìo ní yùhú-yu.

*Tá Màriá Magdaléná ní xíní-xi Jèsús
(Jn. 20:11-18)*

9 Te sátá dúcáⁿ ní ndoto Jèsús ndumìngú nehé-ni-án, te díhna nuu-gǎ tá Màriá Magdaléná ní quee túu-gǎ núú-xi, te òu tá Màriá-án cúú-xí xíchí ní xihí ñaha úsá espíritú cùndihí yucu ñávaha ní cùu, te Jèsús ní queñuhu-gǎ nchaa espíritú-án yiqui cùñú-xi.

10 Te xíchí-án ní sáháⁿ-xi ní xitnùhu-xi cue téé ní xica cuu ndihí Jèsús nàcuáa ní cuu, te xíndáhí-güedé sá ndihú iní-güedé òré ní quexio-xi núú ndécú-güedé.

11 Te òré ní xáhaⁿ tá Màriá xii-güedé sá ní ndoto Jèsús ndihí sá ní xíní ñáhá-xí xii-gǎ, te ñá túú ní sàndáá iní-güedé.

*Jèsús ní quee túu-gǎ núú úú cue téé ní xica
cuu ndihí-gǎ*

(Lc. 24:13-35)

12 Te úú tñáhá cue téé ní xica cuu ndihí Jèsús ñúhú-güedé ichi cuáhánⁿ-güedé yucu, te uuⁿ ní quee túu-gǎ núú-güedé, te ní dácótó ñaha-xi xii-güedé sá ñá túú-gǎ cáá-gǎ dátá cáá-gǎ.

13 Te cue téé úú-án ní xica-güedé cuáhánⁿ-güedé ní xitnùhu-güedé nchaa dǎva-gǎ cue téé ní xica cuu ndihí-gǎ sá ní xíní ñáhá-güedé xii-gǎ, dico òu-ní ducaⁿ ñá túú ní sàndáá iní cue téé-án tñúhu ní cǎháⁿ-güedé.

*Jèsús xáhaⁿ-gǎ xii cue téé ní xica cuu
ndihí-gǎ nàcuáa ndiúu chiuⁿ cada-güedé*

(Mt. 28:16-20; Lc. 24:36-49; Jn. 20:19-23)

14 Te ndi úxí ìn cue téé ní xica cuu ndihí Jèsús yihí-güedé mèsá xéxi-güedé, te ní quee túu-gǎ núú-güedé te ní tenáá ñáhá-gǎ xii-güedé cuèndá sá ìo sáá iní-güedé ñá túú sàndáá iní ñáhá vǎha-güedé xii-gǎ, chí ñá túú ní cuñí-güedé quíndáá iní-güedé nàcuáa ní xáhaⁿ ñáyíu ní xíní ñáhá xii-gǎ sátá ní yáha ní ndoto-gǎ.

15 Te ní xáhaⁿ-gǎ xii-güedé:

—Quihíⁿ-ndó nihí ñuyíú cǎháⁿ-ndó núú nchaa ñáyíu tñúhu vǎha tñúhu sá cǎháⁿ nàcuáa naníhí tǎhú-yu.

16 Te nchaa ñáyíu na quíndáá iní tñúhu-án te cuanduté-yu, te naníhí tǎhú-yu, dico nchaa ñáyíu vá quíndáá iní tñúhu-án te cuíta nihnú-yu.

17 Te nchaa ñáyíu na quíndáá iní ñáhá xii-í te cadá-yu sá vá yóo tñáhí ndàcu cada, te cacunehe ñáhá-yu xii-í, te queñuhú-yu nchaa espíritú cùndihí yucu ñávaha yihí ñaha xii ñáyíu. Te uuⁿ ní ndacú-yu cǎháⁿ-yu ingá núú tñúhu sá vǎtá dǎcuáha-gǎ-yu.

18 Te cuèí na tñíⁿ-yu cóo dééⁿ dico ñá túú ná cada ñaha-di xii-yu, te cuèí venenú ná cǎxi-yu dico ñá túú ná tñáhá-yu, te tendáhá-yu cue ñáyíu cùhú te ndúha-yu —cǎchí-gǎ xáhaⁿ-gǎ xii-güedé.

Jèsús cuándaa-gǎ andiú
(Lc. 24:50-53)

19 Te sátá ní yáha ducaⁿ ní xáhaⁿ Jèsús xii cue téé ní xica cuu ndihí-gǎ, te ní ndanchita-gǎ cuándaa-gǎ andiú te ní ngóo-gǎ xio cùha Dútú Ndióxi.

20 Te cue téé-án ní xica-güedé cuáhánⁿ-güedé, te ní ngúíta-güedé cǎháⁿ-güedé tñúhu Xitohó Jesucristú nchaa xichi. Te mee-gǎ ní chindee ñaha-gǎ xii-güedé ní quide-güedé nchaa sá vá yóo tñáhí ndàcu cada cuèndá cùtnuní iní ñáyíu sá ndáa cǎháⁿ-güedé tñúhu-gǎ. Duha ní cuu dǎvá-án.

TNÚHU NÍ CHÍDÓ TNUNÍ TÉ LŪCÁ

Nàcuáa ní ngódo tnuní tnúhu Yá Ndióxi

1 Te vâi ñâyiu chîdo tnuní-yu nchaa nàcuáa ndúu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu.

2 Te ñiu-ni nchaa tnúhu chîdo tnuní-yu-án cúu-xí tnúhu ní cáháⁿ nchaa cue téé ní xini ndáá nàcuáa ní cuu ndéé díhna, cue téé ní cáháⁿ tnúhu Yá Ndióxi.

3 Te yúhu sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núú tûtú sá cúu-xí yohó té Tëofilú chi ío váha cùu iní-í sá cúu-xí-n,

4 te tée-í cuendá cutnùni iní-n sã sã ndàá cúu-xí nchaa sá ní dánèhè ñàhá-güedè xii-n.

Íⁿ espíritú xínú cuèchi núú Yá Ndióxi cáchi-xi sá cácu íⁿ tée cunani Juáá

5 Te cútnàhá ní xindaaha té Hèrodés ñâyiu distritú Judeá dáva-án ní xindecu íⁿ dútú ní xínani-dé Zacàriá, te ní cundihi-dé cue dútú Ábiás. Te ñadihi-dé ní xínani-aⁿ Elisabét, te ñaha-án ní cuu-aⁿ ñani tnàhá ndii Áron.

6 Te ndi ndúu-yu ío ní quide ndáá-yu núú Dútú Ndióxi, chi ní tñi-yu nchaa tnúhu ní cáháⁿ-gá.

7 Te ñá túú nì íⁿ déhe-yu, chi ducaⁿ táhu tá Elisabét sá vâ cóo déhe-aⁿ, te ducaⁿ ndi ndúu-yu ío ní sahnú-yu.

8 Te íⁿ nduu xinu cuechi tucu té Zacàriá ndihi nchaa cue tée cundihi-dé núú Yá Ndióxi xití veñúhu.

9 Te dáva-án ní xito ndeé-güedé cuendá cutnùni iní-güedé núu ndédacàa-güedé quíhu núú nàá xití veñúhu-án cahmi-güedé sá sàháⁿ tnámí, te ní cutnùni sá tē Zacàriá quíhu-dé. Te ducaⁿ ní quide-güedé, chi ducaⁿ tnàhi ní xóo cada nchaa cue dútú dáva-án.

10 Te ñini sàhmi té Zacàriá sá sàháⁿ tnámí núú nàá, te vâi vihi ñâyiu xindecu quehé veñúhu-án cáháⁿ ndihí-yu Yá Ndióxi.

11 Te ní xini té Zacàriá íⁿ espíritú xínú cuèchi núú Yá Ndióxi nùtni-xi xio cùha núú nàá núú càyú sá sàháⁿ tnámí-án.

12 Te òré ní xini té Zacàriá espíritú-án te ñá ní cutnuni iní-dé nása cada-dé chi ío ní yùhú-dé.

13 Te espíritú-án ní xàháⁿ-xi:

–Zacàriá, vá yùhú-n chi Yá Ndióxi ní tedóho-gá tnúhu ní cáháⁿ-n, te vitna coo íⁿ déhe ñadihi-n tá Elisabét te danani-n-dé Juáá.

14 Te ío cudíí iní-n, te ducaⁿ ío vâi ñâyiu cudíí iní-yu na càcu-dé.

15 Te ío cudíu-dé núú Yá Ndióxi, te ní vâ cóhó-dé ndidi te ní vâ cóhó-dé ndudí sá ní natiu, te sa cundecu ndihi-dé Espíritú Yá Ndióxi òré cacu-dé.

16 Te ñiu-dé cada te ío vâi ñâyiu isràèl natuhá-yu ichi Dútú Ndióxi Yáá cúu Ndióxi-ó.

17 Te té Juáá-án codonùu-dé núu-gá, te cundecu ndihi-dé Espíritú-gá, te taxi tnùni-dé dàtná ní quide té Eliás. Te nacanú ichi-dé cue tée cùu sacuéhé cuendá cada-güedé sá váha sá cúu-xí cuè téé cuechi, te cuèi cue tée ío sáá iní-xi, te ñiu-dé cada te tñi-güedé tnúhu váha, tnúhu cáháⁿ ñâyiu quide ndáá. Te ducaⁿ càda-dé cada túha-dé ñâyiu cuendá cunu cuèchí-yu núú Dútú Ndióxi –cáchi-xi xàháⁿ-xi xii-dé.

18 Te té Zacàriá ní ndúcú tnúhu-dé núú espíritú-án, te xàháⁿ-dè:

–¿Te nása cutnùni ndáá iní-í tnúhu cáháⁿ-n-í? Chi yúhu ío ní sahnú-í ndihi ñadihi-í –cáchi-dé xàháⁿ-dè xii-xi.

19 Te espíritú-án ní xàháⁿ-xi:

–Yúhu cùu-í espíritú nani Gábriél, te xinu cuechi-í núú Yá Ndióxi, te mee-gá ní táuchíuⁿ-gá nàhá-í tnúhu-gá véxi cuendá cutnùni iní-n nàcuáa cada ñaha-gá xii-ndo.

20 Te vitna cuu ñihi-n te vâ cáháⁿ-gá-n ndeé ná sáá nduu càcu déhe ñadihi-n, chi ñá túú ní sàndáá-ni iní-n tnúhu ní cáháⁿ-í. Te dacuitíí sáá nduu càda-xi nàcuáa ní cáháⁿ-í-a –cáchi espíritú-án xàháⁿ-xi xii-dé.

21 Te nchaa ñâyiu xindecu quehé ndétú-yu té Zacàriá, te xicuñúhu-yu sá ío cùyaa-dé xití veñúhu.

22 Te òré ní ndee té Zacàriá, te ñá ní cùu-gá cáháⁿ ndihi ñaha-dé xii-yu, te òré-án ní cutnùni iní-yu sá ní xini-dé íⁿ espíritú xínú cuèchi núú Yá Ndióxi xití veñúhu. Te mee-nà ndaha-dé ní quide-dé núu-yu chi ñá ní cùu-gá cáháⁿ-dé.

23 Te ní xinu nduu ní xinu cuechi tē Zacàriá núú Yá Ndióxi xití veñúhu, te cuánuhú-dé vehe-dé.

24 Te sátá dúcáⁿ ní cuu te ñadihi-dé tá Elisabét ní ngúhuⁿ déhe-aⁿ, te úhuⁿ yóó ñá túú tnàhi-gá ní queè-aⁿ caca cuu-aⁿ, te ní cachí-aⁿ:

25 “Mee Dútú Ndióxi duha ní cundáhu iní ñàhá-gá sá cóo íⁿ déhe-í cuendá sá vâ cúu yíchi iní ñàhá ñâyiu xii-í”, duha ní cachí-aⁿ.

Íⁿ espíritú xínú cuèchi núú Yá Ndióxi cáchi-xi sá cácu Jèsús

26-27 Te núú inú yóó sã ní ngúhuⁿ déhe tá Elisabét te ní tendaha tucu Yá Ndióxi espíritú nani Gábriél cuáháⁿ-xi íⁿ ñuu nani Nazarét cuáháⁿ ngoto-xi íⁿ xíchí cuèchí nani Mariá. Te ñuu-án yíndèhu-xi distritú Galilea. Te xíchí-án sa ní cundáá tnúhu sá tnàndaha-xi ndihi íⁿ tée nani Cheé ñani tnàhá ndii Dáví.

28 Te espíritú-án nǐ quǐhu-xi ndéé xití vehe núú ndécú tá Màriá, te nǐ xáhaⁿ-xi:

—ǐCǒvǎha-n-aⁿ! Dútú Ndiǒxǐ ío cùu iní ñáhá-gǎ xii-n te ndécú ndíhi ñaha-gǎ, te ío-gǎ xitó ñaha-gǎ xii-n dàcúxǐ dàva-gǎ ñáyíu díhi —cǎchǐ espíritú-án xáhaⁿ-xi.

29 Dico òré nǐ xini tá Màriá espíritú-án, te ní quíyùhú iní-xi sǎ dúcǎⁿ nǐ cǎháⁿ espíritú-án. Te ní sani iní-xi: “ǐNá cuèndá duha cǎháⁿ-tu espíritú-a-í?”, duha ní sani iní-xi.

30 Te espíritú-án nǐ xáhaⁿ-xi:

—Màriá, vá yùhú-n chi ducaⁿ nǐ nduu táhú-n núu Yá Ndiǒxǐ.

31 Te vitna ngúhuⁿ déhe-n, te na cǎcu-dé te danǎni-n-dé Jèsús.

32 Te ío cunuu-dé, chi Dútú Ndiǒxǐ Yáá ío cunuu cǎchǐ-gǎ sǎ Déhe-gǎ cúú-dé, te díu-gǎ cada te cuu-dé ìⁿ tée cunuu núú ñáyíu isráél dàtná nǐ quide-gǎ ndí Dáví.

33 Te taxi tnùnǐ-dé ñáyíu isráél, te ducaⁿ-ni cunuu-dé nǐ caa nǐ quíhǐⁿ —cǎchǐ-xi xáhaⁿ-xi.

34 Te tá Màriá nǐ xáhaⁿ-xi xii espíritú-án:

—ǐTe nása cuu tnúhu cǎháⁿ-n te ñá túú yǐi-í-í? —cǎchǐ-xi xáhaⁿ-xi.

35 Te ní xáhaⁿ espíritú-án:

—Espíritú Yá Ndiǒxǐ quixi cundecu ndíhi-n, te ducaⁿ Yá Ndiǒxǐ cada-gǎ ìⁿ sǎ váha sǎ cúú-xí-n ná cǎcu déhe-n. Te Yá Ndiǒxǐ cǎchǐ-gǎ sǎ ío cundecu yíñùhu-dé núú-gǎ, chi Déhe-gǎ cúú-dé.

36 Te tnáhá didí-n tá Elisábét ñúhú dēhe-aⁿ cuèí ío ní sahnú-aⁿ, te díu-aⁿ cǎchǐ-yu sǎ vǎ cóo dēhe-aⁿ nǐ cùu, te vitna sa ní cuu íñú yóó ñúhú dēhe-aⁿ.

37 Chi Yá Ndiǒxǐ ndácú-gǎ quidé-gǎ nchaa sǎ vǎ yóo tnáhi ndácu cada —cǎchǐ-xi xáhaⁿ-xi.

38 Te tá Màriá nǐ xáhaⁿ-xi:

—Yúhú ná cúnú cuèchǐ-í núú Dútú Ndiǒxǐ, te mee-gǎ ná cǎdá ñaha-gǎ xii-í nácuáa nǐ cǎchǐ-n —cǎchǐ-xi xáhaⁿ-xi xii espíritú-án.

Te sǎtá dúcǎⁿ te espíritú-án nǐ xica-xi cuáhǎⁿ-xi.

Tá Màriá cuáhǎⁿ ngoto-xi tá Elisábét

39 Te tá Màriá ío ndíhi cuáhǎⁿ-xi ìⁿ ñúu cǎá xití yucu distritú Jùdeá.

40 Te ní sǎá-xi vehe té Zacàriá, te cuánguǐhu-xi ní dǎndácóo váha-xi tá Elisábét.

41 Te òré ní tecú dóho tá Elisábét nǐ cǎháⁿ tá Màriá, te ní candá dēhe-aⁿ xití-aⁿ, te òré-án nǐ ngúndecu ndíhi-aⁿ Espíritú Yá Ndiǒxǐ.

42 Te níhi ní cǎháⁿ-aⁿ, te xáhaⁿ-aⁿ xii tá Màriá:

—Yá Ndiǒxǐ ío xitó ñaha-gǎ xii-n dàcúxǐ dàva-gǎ tnàha díhi-ó, te ducaⁿ-ni xito-gǎ cuèí dēhe-n.

43 ǐTe ná cúú yùhú núu véxi coto ñaha yòhó nǎná Yáá cúú Xitohó-í-í?

44 Chi òré-nǐ ní tecú dóho-í ní cǎháⁿ-n te ní candá-nǐ dēhe-í xití-í sǎ cùdíí iní-dé.

45 Te váha táhú yòhó sǎ ní sǎndáá iní-n, chi dacuítí sǎ cǎdá Dútú Ndiǒxǐ nácuáa ní cǎháⁿ espíritú ní tendaha-gǎ ní quixi ní cǎchǐ tnúhu xii-n nácuáa cada-gǎ —cǎchǐ-aⁿ xáhaⁿ-aⁿ xii tá Màriá.

46 Te ní xáhaⁿ tá Màriá:

Ío cǎhnu cuu Dútú Ndiǒxǐ,

47 ío cùdíí iní-í chi díu-gǎ tauníhu ñaha-gǎ xii-í núú ùhú núú ndáhú.

48 Chi ní ndacu iní ñáhá-gǎ xii yùhú, te dícó ìⁿ xichǐ xínú cuèchǐ núú-gǎ cúú-í,

te vitna te nchaandi túhú ñáyíu cǎchǐ-yu sǎ ío váha táhú-í.

49 Te Yá Ndiǒxǐ cǎndóo caa nine iní-gǎ, te ío cǎhnu ìⁿ sǎ váha ní quide-gǎ sǎ cúú-xi-í.

50 Te cùndahú iní-gǎ nchaa ñáyíu nèhe sǎ yíñùhu núú-gǎ.

Te ducaⁿ-ni cuèí ñáyíu sa ndécú ñuyúú-a ndíhi ñáyíu vitna véxi.

51 Chi ta quide-gǎ nchaa sǎ vǎ yóo tnáhi ndácu cada véxi,

te ta dǎndóo canúú-gǎ cue ñáyíu quide cǎhnu mee-xi.

52 Te cue ñáyíu tàxi tnunǐ ñá túú-gǎ dáñá-gǎ taxi tnùnǐ-yu,

te cue ñáyíu ndáhú ní quide nínu ñaha-gǎ xii-yu.

53 Te cue ñáyíu ndécú ndíhi tnúndóho tnúhu ndáhú ní quide váha ñaha-gǎ xii-yu,

te cue ñáyíu cuica ñá túú ná ní níhǐ-gǎ-yu cundecu ndíhǐ-yu.

54 Te chindee-gǎ ñáyíu isráél, ñáyíu xínú cuechǐ núú-gǎ, te ñá túú dàña níhnu ñaha-gǎ xii-yu, chi cùndahú iní ñáhá-gǎ.

55 Chi ducaⁿ nǐ xáhaⁿ-gǎ xii ndíu Àbrahám, ndíhi cue ñaní tnáhá ndí.

Duha ní xáhaⁿ tá Màriá xii tá Elisábét.

56 Te ní xíndecu tá Màriá dàtná únǐ yóó ndíhi tá Elisábét te dàtnùnǐ cuánuhú-xi vehe-xi.

Ní cacu té Juáá tée dacuàndute ñaha xii ñáyíu

57 Te ní sǎá nduu ní cacu ìⁿ dēhe tée tá Elisábét.

58 Te nchaa ñáyíu ndécú yatni ndíhi-aⁿ, ndíhi nchaa ñaní tnáhá-án nǐ níhǐ-yu tnúhu nácuáa ní chindee ñaha Yá Ndiǒxǐ xii-aⁿ. Te ío ní cùdíí iní-yu cuèndá-aⁿ.

59 Te núú úná nduu sǎ ní cacu dēhe-aⁿ, te ní sǎháⁿ ñáyíu núú ndécú-án cuèndá cuáhǎ-yu sēñá ñíi dēhe-aⁿ. Te cunǐ-yu cunani dēhe-án Zacàriá dàtná nǎní tǎtá ní cùu.

60 Te ní xáhaⁿ nǎná dēhe-áⁿ:

—Ñáhá, chi Juáá cunani-dě —cǎchǐ-aⁿ xáhaⁿ-aⁿ xii-yu.

61 Te ní xáhǎⁿ-yu:

—ǐTe ná cuèndá te ñá túú ní ìⁿ ñaní tnáhá-ndó dūcaⁿ nani-í? —cǎchǐ-yu xáhǎⁿ-yu.

62 Te ní quidé-yu ndàhá-yu núú tǎtá dèhe-áⁿ cuèndá cuiní-yu núú nása cuiní méé-dě cunani dèhe-dé.

63 Te ní xicáⁿ-dé ìⁿ tutú ní chídó tñuní-dé nàcuáa cunani dèhe-dé, te duha ní chídó tñuní-dé: “Juáá cunani-dé”, cǎchí-xi núú tütú ní tee-dé-án. Te nchaa ñáiyu xíndecu-áⁿ ní cuñúhu-yu nàcuáa ní cuu.

64 Te òré-án ní nacáháⁿ té Zacàriá sá ní cuu ñihí-dé ní cùu, te ní nguíta-dé ní cachí-dé sá ìo cǎhnu cuu Yá Ndióxi.

65 Te nchaa ñáiyu xíndecu yatni ndihi-dé ní cuñúhu-yu, te nchaa ñáiyu xíndecu ñihí xití yucu distritú Jùdeá ní ñihí-yu tñúhu nàcuáa ní cuu.

66 Te nchaa ñáiyu-án ìo vai ní sani iní-yu, te ní xítñàhá-yu:

—¿Ná cúú sá cáda tée-án ndéé idá-gá ná cuèhnu-dé? —cǎchí-yu xítñàhá-yu.

Te ducaⁿ ní xítñàhá-yu chi Dútú Ndióxi ndécú ndihi ñaha-gá xii-dé.

Té Zacàriá cǎchí-dé sá ìo cǎhnu cuu Yá Ndióxi

67 Te té Zacàriá tǎtá tē líhli-án ní ngúndecu ndihi-dé Espíritú Yá Ndióxi te ní cǎháⁿ-dé nchaa tñúhu sá ní dánèhé ñáhá-gá, te ní cachí-dé:

68 Ìo cǎhnu cuu Dútú Ndióxi nchoo ñáiyu isràél,

chi ní quixi coto ñaha-gá xii-o, te cùu-o ñáiyu cùu cuèndá-gá, chi dàcácu ñhnu ñaha-gá xii-o vitna.

69 Chi ní tendaha-gá ìⁿ tée véxi-dé dàcácu ñhnu ñaha-dé xii-o núú ùhú núú ndáhú.

Te cùu-dé ñani tñáhá ndí Dàvíí tée ní xinu cuechi núú-gá ndéé sanaha.

70 Te ñu-ni tñúhu ní cǎháⁿ Yá Ndióxi ní cǎháⁿ cue tée ní quide ndáá ní xíndecu núú-gá ñuyúú-a ndéé sanaha.

71 Te ní cachí-güedé sá táunihnu ñaha-gá xii-o núú nchaa ñáiyu cùu ùhú iní ñáhá, ndihi núú nchaa ñáiyu ñá túú cùu quini ndee ñáhá.

72 Te ní xáhaⁿ-gá sá cùndàhú iní ñáhá-gá xii-o, te ducaⁿ càda-gá chi vá nàcuànaa-gá tñúhu ní cǎháⁿ-gá ndihi-güedé.

73 Te ñu ducaⁿ ndùu tñúhu ní xáhaⁿ-gá xii ndí Àbrahám sá

74 táunihnu ñaha-gá xii-o núú nchaa ñáiyu cùu ùhú iní ñáhá, cuèndá sá vá yùhú-ó cùnu cuechi-o núú-gá.

75 Te cada ndáá-ó, te cundecu yíñùhu-o núú-gá ndi nchaa nduu cundecu-o ñuyúú-a.

Duha ní cachí té Zacàriá.

76 Te xáhaⁿ-dè xii tē líhli-án:

Te yohó té líhli, cǎháⁿ ñáiyu cuèndá-n sá cúu-n ìⁿ tée cǎháⁿ tñúhu Dútú Ndióxi Yáá ìo cùnunu,

chi quíhíⁿ-n còdonuu-n núú Yáá cúu Xitohó-ó dātúha-n ñáiyu cuèndá cundecu túha-yu òré quexio-gá.

77 Te cúñaha-n xii ñáiyu isràél sá cuiní-gá cada càhnu iní-gá nchaa cuèchi-yu, te naníhí tñúhu-yu.

78 Te ducaⁿ càda-gá chi ìo cùu iní ñáhá-gá xii-o, chi ndéé andiù ní tendaha-gá ìⁿ tée véxi

cuuⁿ-dé dandixi túu-dé iní-ó cuèndá cutnùni iní-ó nàcuáa ndùu cuèndá Yá Ndióxi.

79 Te ducaⁿ dándixi túu-dé iní nchaa ñáiyu ndècu ichi cuehé ichi duha ta xíta ñhnu cuáháⁿ cuèndá nucúnu ichí-yu ìⁿ ichi váha.

Duha ní xáhaⁿ tē Zacàriá xii dèhe-dé.

80 Te té líhli-án tá sǎhnu-dé, te ta chindee chitúu ñaha Yá Ndióxi xii-dé cuáháⁿ, te ní xíndecu-dé xití yucu ndéé ní sáá nduu ní nguíta-dé ní cǎháⁿ-dé núú cuè ñáiyu isràél tñúhu Yá Ndióxi.

2

Ní cacu Jèsús

(Mt. 1:18-25)

1 Te dàvá-án ní táuchíúⁿ tē Aùgústú Cèsár nucódo tñuní nchaa ñáiyu nàcióⁿ yíndàha-dé.

2 Te xéhé sá ñhnanuu ní nucódo tñuní ñáiyu, te ñu-ni dàvá-án ní cunuu té Cireníú distritú Siríá.

3 Te nchaa ñáiyu ní natacá-yu ñuu núú ní cacú-yu cuèndá nucódo tñuní-yu.

4 Núú xíáⁿ ní quee té Chèé ñuu Nazàrèt ìⁿ ñuu yíndèhu distritú Galiléá, te cuáháⁿ-dé ñuu Bèlén ìⁿ ñuu yíndèhu distritú Jùdeá, chi xíáⁿ ní cuu ñuu ndí Dàvíí, te ñu-ni ñani tñáhá té Chèé-án ní cuu ndí.

5 Núú xíáⁿ cuáháⁿ-dé ndéé ñuu Bèlén nucódo tñuní-dé, te tñáhá tá Màriá xíchí ní cundáá tñúhu sá tñándaha ndihi-dé cuáháⁿ ndihi ñaha-dé, te sa ñúhu déhe-xi.

6 Te ñini cùyaá-yu ñuu Bèlén-án ní sáá òré cacu déhe-xi.

7 Te ní cacu déhe ñhna-xi, te ní chidúúⁿ-nuu-xi dóó, te ní sacáⁿ ñáhá-xi ìⁿ vehe núú cúú vehe quiti, chi ñá túú ní ñihí-yu vehe coó-yu.

Cue espíritú xínú cuèchi núú Yá Ndióxi ndíhí cue toli.

8 Te yatni ñuu-áⁿ xíndecu ìⁿ úú toli ndéé-güedé mbéé-güedé ndécú-güedé majadá níú-án.

9 Te uuⁿ ní quexio ìⁿ espíritú xínú cuèchi núú Yá Ndióxi, te Yá Ndióxi ní quide-gá ní dáyèhé-xi ní cándéé núú xíndecu-güedé, te ní yùhú víhí-güedé.

10 Te ní xáhaⁿ espíritú-áⁿ:

—Vá yùhú-ndó, chi ñaha-í ìⁿ tñúhu váha véxi sá cúu-xi-ndó, te ìo cudíí ñi-ndó ndíhí nchaa ñáiyu.

11 Chi vitna ní cacu ñⁿ tée dàcácu nihnu ñaha xii-ndo núú ùhú núú ndàhú ñuú ndí Dáví, te tée-án cúú-dé Xítohó Jesucristú.

12 Te dàtná ñⁿ sèñá te naníhí-ndó tē líhli-án yídúcúⁿ nuu-dé dóo cáá-dē ñⁿ vehe quití — cachí-xi xáhaⁿ-xi xii-güedé.

13 Te òré-án ní quexio cuéhé víhí espíritú véxi cuuⁿ andíu ní naníhí tnáhá-xí ndíhí espíritú-án, te ní ngúita-xi ní chíñuhu-xi Yá Ndióxi, te cächí-xi:

14 ¡Io càhnu cuu Yá Ndióxi Yáa ndécú andíu, te na cūndecu váha-ní nchaa ñáyíu cūu iní mée-gá!

Duha cächí cue espíritú-án.

15 Te òré cuánda cue espíritú-án andíu, te ní ngúita cue toli-án xitnáha-güedé:

—Na quíhí-ó ñuú Bèlén quíní-ó nàcuáa ní cuu, chí Dútú Ndióxi sa ní cachí tnúhu-gá — cächí-güedé xitnáha-güedé.

16 Te ní tnü-güedé ichi súúni ndíhí cuáháⁿ-güedé, te ní naníhí-güedé tá Màriá ndíhí té Chèé, ndíhí té líhli-án cáá-dē xití ñⁿ vehe quití.

17 Te òré ní xini ñáhá-güedé te ní xáhaⁿ-güedé xii-yu nàcuáa ní xáhaⁿ espíritú-án xii-güedé cuendá té líhli-án.

18 Te nchaa ñáyíu ní tecú dóho-xi ní cuñúhu-yu nàcuáa ní cáháⁿ-güedé.

19 Dico tá Màriá chí ñuhu nahí-ní iní-xi, te dicó-ní sàni iní-xi cuendá nchaa tnúhu-án.

20 Te cue toli-án ní natnü-güedé ichi, te ta xitnáha-güedé cuánuhú sá io càhnu cuu Yá Ndióxi cuendá nchaa tnúhu ní xindedóho-güedé, ndíhí cuendá nchaa sá ní xini-güedé, chí cuendá sá ndàá ní cuu nchaa nàcuáa ní tecú tnúhu-güedé.

Ndecá-yu Jesús cuáháⁿ veñúhu

21 Te núú úná nduu sá ní cacu té líhli-án, te ní sáha-güedé sèñá ñü-dé, te ní dánání ñaha-güedé Jesús xii-dé, diu-ni nàcuáa ní xáhaⁿ espíritú xínú cuèchi núú Yá Ndióxi xii tá Màriá ndéé cūtnáhá vátá ngühuⁿ-gá-dé xití-xi.

22 Te sáta ní tnáhá nduu, ndúu ñíyu nàcuáa cáháⁿ nchaa tnúhu ní chídó tnúni ndí Moisés, te ndecá-yu té líhli-án cuáháⁿ ñuú Jerusalén cuendá quee túu-dé núú Dútú Ndióxi.

23 Te ducaⁿ ní quidé-yu, chí ducaⁿ cáháⁿ-xi núú tütú Yá Ndióxi sá ncháá lándú tée na càcu díhna quetúu-güexi núú-gá cuendá cundecu-ná-güexi cuendá-gá.

24 Te ní quidé-yu nàcuáa cáháⁿ Yá Ndióxi núú tütú-gá núú cächí-xi: “Canehe-ndo úú lómá àdi úú cūcu quíhíⁿ nduu táhú ñáhá Yá Ndióxi”, duha cáháⁿ-gá núú tütú-gá.

25 Te dává-án ndécú ñⁿ tée nàni Mió ñuú Jerusalén. Te io váha iní-dé, te chíñuhu-dé Yá Ndióxi, te ndètu-dé sáá nduu chindee ñaha

Yá Ndióxi xii ñáyíu isràél. Te ndècu ndíhí té Mió-án Espíritú Yá Ndióxi.

26 Te sa ní xáhaⁿ-xi xii-dé sá vā cūú-ni-dé, chí dacutíí quíní-dé Cristú Yáa tendaha Yá Ndióxi quixi ñuyúⁿ-a.

27 Te tée-án ndecá ñaha Espíritú Yá Ndióxi xii-dé cuáháⁿ veñúhu càhnu sá io cūnuu. Te cuáháⁿ-yu ndíhí Jèsús veñúhu-án cuendá cadá-yu ndíhí-gá nàcuáa cáháⁿ tnúhu ní chídó tnúni ndí Moisés.

28 Te òré ní sáa-yu, te té Mió-án ní nguídèhé-dé Jèsús, te ní cáháⁿ-dé sá io càhnu cuu Yá Ndióxi, te ní xáhaⁿ-dē xii-gá:

29 Yòhó Dútú Ndióxi sa ní cuu dañá-n cūú-í vitna,

chí sa ní quide-n nàcuáa ní cachí-n xii yúhú tée xínu cuechi núú-n.

30 Chí sa ní xini núú-í Yáa dàcácu nihnu ñaha xii ñáyíu núú ùhú núú ndàhú vitna.

31 Te Yáa ní tendaha-n véxi núú ndécú nchaa ñáyíu ñuyúⁿ-a.

32 Te cūu-gá dàtná ñⁿ ñuhú, chí dandixi túu-gá iní ñáyíu cuendá cutnùni iní-yu cuendá Yá Ndióxi cuéi ñá díú ñáyíu isràél cūú-yu.

Te diu-gá cada, te canehe ñáyíu dava-gá ñuú sá yíñúhu núú ñáyíu isràél chí diu ñáyíu isràél cūú-yu ñáyíu cūu cuendá-n.

Duha ní xáhaⁿ té Mió xii Yá Ndióxi.

33 Te té Chèé ndíhí náná Jèsús ní cuñúhu-yu tnúhu ní cáháⁿ té Mió cuendá-gá.

34 Te dàtnùni té Mió ní xicáⁿ táhú-dé núú Yá Ndióxi cuendá-yu, te xáhaⁿ-dē xii tá Màriá náná Jèsús:

—Cundedóho tnúhu na cáháⁿ-í-a, té líhli-a ní nduu táhú-dé nacanu ichi-dé dava ñáyíu isràél ichi Yá Ndióxi, te davá-yu vā tnü-yu tnúhu cáháⁿ-dē, te ñáyíu-án cūita nihnú-yu, te cada-dé nàcuáa cutnùni iní ñáyíu sá Yá Ndióxi ní tendaha ñaha-gá xii-dé, dico vā quíndáá iní-yu, chí daquèe tñú ñáhá-yu xii-dé.

35 Te ducaⁿ te cutnùni nàcuáa sàni iní ñⁿ ñáyíu. Dico sá cūú-xí yòhó chí io cada ndàhú-xi iní-n, chí súúni dàtná sá ní nícuèhé iní-n cada-xi — cachí-dé xáhaⁿ-dē xii tá Màriá.

36 Te xiáⁿ ndécú tnáhá ñⁿ ñaha cáháⁿ tnúhu Yá Ndióxi nání-án Aná, te tātá-a ní xínani-dé Fànuél ñani tnáhá ndí Àsér. Te ñaha-án sa ní sahnu víhí-aⁿ, te cuechi-ni-aⁿ ní tnándaha-aⁿ te úsá-ni cuíá ní xíndecu-aⁿ ndíhí yí-aⁿ,

37 te ní quendóo quèé-aⁿ, te sa ñuhu-aⁿ cūmídíco cūmí cuíá-aⁿ. Te ñá túú ní xóo quee-aⁿ veñúhu càhnu sá io cūnuu, chí nduu nùú ní xóo chíñuhu-aⁿ Dútú Ndióxi, te áma ñá túú tnáhí ná ní xóo caxi-aⁿ ní xóo cáháⁿ ndíhí-aⁿ Yá Ndióxi.

38 Te diu-ni òré ndécú-yu ndíhí Jèsús ní quexio-aⁿ núú-yu, te ní ndacáⁿ táhú-án núú Yá Ndióxi cuendá sá ní xini-aⁿ Jèsús,

dãtnùni ní nguíta-aⁿ càháⁿ váha-aⁿ cuèndá-gá núú nchàa ñáyii, ñáyii ndètu quini sáá nduu dàcácu Yá Ndiòxi ñáyii Jerusalén núú tñndòho tñuhu ndàhú.

Cuánuhú-yu ñuú Nazàrèt

³⁹ Te sáta ní quidè-yu nchaa nàcuáa càháⁿ tñuhu Yá Ndiòxi, te cuánuhú-yu ñuú Nazàrèt núú ndécú tñahí-yu, te ñuú-áⁿ yíndèhu-xi distritú Galileá.

⁴⁰ Te té líhli nàni Jesús-áⁿ tá sàhnu-dé, te ta nihí ndéé-dé cuáháⁿ, te ducaⁿ ío váha ta sáá sá xini tñuní-dé cuáháⁿ, chí Yá Ndiòxi ndécú ndihí ñaha-gá xii-dé.

Jèsús ndécú-gá veñúhu

⁴¹ Te ndi tñahá cuía ní xóo quihíⁿ té Chèè ndihí náná Jèsús vico pàscuá ñuú Jerusalén.

⁴² Te cútñahá ní chítú Jèsús úxúú cuía-gá, te cuáháⁿ-yu ndihí-gá ñuú Jerusalén vico pàscuá, chí ducaⁿ tñahí quidè-yu.

⁴³ Te òrè ní yáha vico, te ní natnií-yu ichi cuánuhú-yu, te ní quendóo-gá ñuú Jerusalén, te ní náná-gá, te ní té Chèè ñá túú ní xini ní quendóo-gá.

⁴⁴ Chí ní sani iní-yu sá ñútnahá-gá tñuu nchaa ñáyii ní sáháⁿ vico cuánuhú. Te ní xúhuⁿ-yu ñⁿ nduu ichi ta ndúcu tñuhu-yu-gá núú nchàa ñani tñahá-yu, ndihí núú nchàa ñáyii xini tñahá ndihí-yu,

⁴⁵ Te ñá túú ní nánihí ñahá-yu xii-gá. Núú ní nacuícò-yu cuánuhú tucú-yu ñuú Jerusalén cuèndá yàcáⁿ nanducu ñahá-yu xii-gá.

⁴⁶ Te núú ùni nduu sá ní dana núú ñahá-yu xii-gá, te ní nanihí ñahá-yu núcòo-gá xití veñúhu càhnu sá ío cùnnu tñuu cue téè dàcuaha ñaha xii-yu nchaa tñuhu ní chídó tñuní ndíi Moisés, te ndédòho ñaha-gá xii-güedé, te nándi sá ndúcú tñuhu-gá núú-güedé.

⁴⁷ Te nchaa cue téè xíndedòho ñaha xii-gá xícuñúhu-güedé sá ío váha sáá sá xini tñuní-gá, te ío váha nihí-gá tñuhu nàdanhocáva-gá.

⁴⁸ Te òrè ní xini ñahá té Chèè ndihí náná-gá xii-gá, te ío ní cuñúhu-yu, te ní xáhaⁿ náná-gá xii-gá:

—Yòhó déhe-í, ¿ná cuèndá ducaⁿ ní quide ñaha-n xii-ndí? Te tátà-n ndihí yúhú ndihú iní-ndí xicá nanducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuèndá nándúcu ñaha-ndo? ¿Náa ñá túú xini-ndó sá núú chíúⁿ Tàtá-í tâu-í caca cuu-í-áⁿ? —càchí-gá xáhaⁿ-gá xii-yu.

⁵⁰ Dico mèè-yu ñá túú ní tècú tñuní-yu nàcuáa ní xáhaⁿ-gá.

⁵¹ Te sáta dúcáⁿ te cuánuhú ndihí ñahá-yu xii-gá ñuú Nazàrèt, te ío ní sándáá iní ñahá-gá xii-yu. Te nchaa sá ní quide-gá-áⁿ ní xúhuⁿ nahi-ni iní náná-gá.

⁵² Te Jèsús ducaⁿ-ni ta sàhnu-gá cuáháⁿ, te ta sáa-gá sá xini tñuní-gá cuáháⁿ, te ducaⁿ cùdú-gá núú Yá Ndiòxi, ndihí núú nchàa ñáyii.

3

Té Juáá téè dàcuandute ñaha xii ñáyii cuáháⁿ-dé tñuhu Yá Ndiòxi xití yucu
(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá yíndàha té Tiberiú cuéhé nacióⁿ, te dàvá-áⁿ ní cunuu té Pilatú distritú Judeá, te té Hèrodés ní cunuu-dé distritú Galileá, te ñani-dé té Lipé ní cunuu-dé distritú Itùreá ndihí ingá distritú nani Tràconité, te té Lisaniás ní cunuu-dé distritú Abiliniá.

² Te té Anás ndihí té Cairás ní cuu-güedé dítú cùnnu. Te dàvá-áⁿ ní càháⁿ ndihí ñaha Yá Ndiòxi xii té Juáá déhe té Zacariá xití yucu sá quihíⁿ-dé càháⁿ-dé tñuhu-gá núú ñáyii.

³ Te té Juáá ní yáha-dé nchaa ñuú cáa yàtni yúte Jordán, te xáhaⁿ-dé xii nchaa ñáyii:

—Chí dándixi túu iní sá ñá túú quide váha-ndo, te dañá-ndo nchàa ichi cuehé ichi duha ndécú-ndo, te cuandute-ndo, te ducaⁿ te cada càhnu iní Yá Ndiòxi nchaa yicá cuèchi-ndo —duha ní xáhaⁿ-dé xii-yu.

⁴ Te ducaⁿ ní quide-dé chí ní quee ndáá-xi nàcuáa ní chídó tñuní ndíi Chàia téè ní xóo càháⁿ tñuhu Yá Ndiòxi ndéé sanaha núú tütú ndíi núú càchí-xi:

Tècú càháⁿ níhi ñⁿ téè yìhi xití yucu, te xáhaⁿ-dé xii ñáyii:

“Chí dáñá nchàa ichi cuehé ichi duha ndécú-ndo, te tñi-ndo ichi váha, te ducaⁿ càda-ndo cuendá cundecu túha-ndo, chí véxi Yáa ío cùnnu.

⁵ Te nchaa núú cùnú nachítú, te nchaa tindúú ndihí nchaa yucu ngoyo nihnu cuèndá nduu ndáá, te nchaa ichi ñá túú cuáháⁿ ndáá nduu ndáá, te nchaa ichi ñá túú càváha nduu váha.

⁶ Te nchaa ñáyii ñuyíú-a níhi-yu tñuhu sá Yá Ndiòxi véxi-gá dàcácu nihnu ñaha-gá xii-yu núú ùhú núú ndàhú.”

Duha ní chídó tñuní ndíi Chàia núú tütú ndíi.

⁷ Te òrè ní xica ñáyii cuáháⁿ-yu cuèndá dacuandute ñaha té Juáá xii-yu, te ní xáhaⁿ-dé:

—¡Nchaa nchòhò cúú-ndó dàtná ñⁿ cóó dééⁿ chí ío cuíhna iní-ndó! ¿Te nása ní cuu núú tñahá nchòhò ndúcú-ndó nàcuáa càcu nihnu-ndo núú tñndòho càhnu vihi sá tá cùyatni ñaha xii-ndo véxi-í?

⁸ Te chí càdá váha vitna cuèndá ducaⁿ cùtnuní sá ní dáñá-ndó nchàa ichi cuehé ichi duha ndécú-ndo. Te vá càchí-ndó sá ío càhnu cuu-ndo cuendá sá cúú-ndó ñani tñahá ndíi Àbráhám, chí cuèi ndéé yúú te ndacu Yá Ndiòxi ndada-gá ñáyii te cuú-yu ñani tñahá ndíi Àbráhám.

⁹ Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-án tèhndé-xi te cuánguee-xi núú ñùhú càyú-xi. Te duha sátnahá-xi ndoho nchaa ñáyú ñá túú quide váha, chi nchaa ñáyú ducaⁿ ñá túú quide váha cùu-yu dàtná nchaa yutnu sá ñà túú càváha sávidí-xi. — càchí-dé xáhaⁿ-dè xii-yu.

¹⁰ Te ní xicáⁿ tnúhu-yu núú-dè, te xáháⁿ-yu:

—¿Te nása cada-ndí váiⁿ? —càchí-yu xáháⁿ-yu xii-dé.

¹¹ Te xáhaⁿ-dè:

—Te núu ndédacáa-ndo ndecu ndihi-ndo úú dóo te cuáñaha-ndo ìⁿ xii ñáyú ñá túú ndècu ndihi, àdi núu ndècu ndihi-ndo sá nchitó-ó te cuáha-ndó-yu na càxí-yu — càchí-dé xáhaⁿ-dè xii-yu.

¹² Te ní quexio ìⁿ úú cue tée cuihna iní-xi quide cobrá ñáhá xii ñáyú cuèndá impuèstú cuèndá cuàndute-güedé, te ní xicáⁿ tnúhu-güedé núú tē Juáá, te xáhaⁿ-güedé:

—Mèstrú, ¿te nása cada-ndí cuèndá cuu váha iní Yá Ndióxi-í? —càchí-güedé xáhaⁿ-güedé xii-dé.

¹³ Te tē Juáá ní xáhaⁿ-dè:

—Vá cuidó-ndó càda cobrá-ndó ñáyú — càchí-dé xáhaⁿ-dè xii-güedé.

¹⁴ Te tnàhá ìⁿ úú cue tée cùu sandadú xīndecu-án ní xicáⁿ tnúhú-güedé núú tē Juáá, te xáhaⁿ-güedé:

—Te nchúhu ¿nása cada-ndí cuèndá cuu váha iní Yá Ndióxi-í? —càchí-güedé xáhaⁿ-güedé xii-dé.

Te ní xáhaⁿ tē Juáá:

—Vá quèndéé-ndó sá nèhé tnàha ñáyú-ndo, te ni vā dácàa díquí-ndó-yu ìⁿ sá ñá túú nā quidè-yu, te nduu vétú iní-ndó nàcuáa ñùhu yáhu-ndo —càchí-dé xáhaⁿ-dè xii-güedé.

¹⁵ Te nchaa ñáyú xīndetu sá quixí Cristú sàni ìⁿ sàni úú iní-yu núu sá díú Cristú Yaa tendaha Yá Ndióxi quixí ñuyíú-a cùu te Juáá àdi ñáhá.

¹⁶ Dico tē Juáá ní cáháⁿ ndodo-dé núu-yu nchaa-yu, te xáhaⁿ-dè:

—Na càchí tnúhu ndáá-í xii-ndo sá yúhú véxi-í sá cuèndá-ní dacuàndute ñaha-í xii-ndo dàtná ní cachí Yá Ndióxi, dico nchicúⁿ ingá tée véxi, te tée-án taxi-dé Espiritú Yá Ndióxi cundecu ndihi-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te tée-án ìo-gá cúnúu-dé dàcúúxí yúhú, chi yúhú cùu-í ìⁿ tée duuⁿ duuⁿ ñá túú táu-í nandaxi-í cuèdicó ñii chàú-dé dico quide-í chiúⁿ-dè.

¹⁷ Te tée-án sa véxi túha-dé sá cáda ìⁿ ñaha-dé xii-o dàtná quidè ñáyú ndàda ndoo triú, chi ñáyú-án sa nèhe túha-ná-yu yaxíⁿ-yu òrè nàñani cuèndá ndada ndóo-yu, te òrè ndáda ndóo-yu triú-án te dàquee

díⁿ-yu mihi-xi, te tàxúha-yu mee-nā triú-án, te mihi-xi-án sáhmí-yu. Te dàtná quidè-yu mihi triú-án ducaⁿ sátnahá-xi cada ñaha tée-án xii nchaa ñáyú ñá túú quide váha, chi daquihíⁿ ñáhá-dè xii-yu núú ñùhú núú càyú, te ñuhú-án ñá túú tnàhi ndàhvá —càchí-dé xáhaⁿ-dè xii-yu.

¹⁸ Te titní víhí-gā tnúhu váha ní xáhaⁿ tē Juáá xii-yu òrè ní dásàhú ñáhá-dè.

¹⁹ Te ní cáháⁿ-dè dóho té Hèrodés cuèndá sá ndécá-dè ìⁿ ñaha nani Herodiás ñaha ní cándeca ñani-dé té Lipé, te ní xáhaⁿ-dè cuèndá nchaa dava-gá sá cuèhé sá dúhá quide-dé.

²⁰ Dico tē Hèrodés ñá túú ní quide cuèndá-dé tnúhu ní cáháⁿ tē Juáá, chi nèhé-gá tucu ní quide-dé, chi da vecáá ní chihi-dé tē Juáá.

Sàndute Jesús

(Mt. 3:13-17; Mr. 1:9-11)

²¹ Te òrè dácúandute tē Juáá nchaa ñáyú, te tnàhá Jesús ní dácúandute ñaha-dé xii-gá. Te ñani cáháⁿ ndihi-gá Dútú Ndióxi ní nacaáⁿ andiú,

²² te ní quee Espiritú Yá Ndióxi véxi cuuⁿ túu-xi, te càa-xi datná cáá ìⁿ lómá, te òrè-án ní tecú ní cáháⁿ Yá Ndióxi ndéé andiú, te xáhaⁿ-gá xii Jesús:

—Yòho cúu-n Dèhe-í tée ío cùu iní-í, te ío cùdí ñii ñáhá-í xii-n —càchí-gá xáhaⁿ-gá xii Jesús.

Cue tée ní xīndecu díhna-gá ñuyíú-a dàcúúxí Xitohó Jesucristú

(Mt. 1:1-17)

²³ Te ndècu Jesús dàtná ócú úxí cuiá-gá cútñàhá ní chisaha-gá chiúⁿ ní táhú Tátá-gá Dútú Ndióxi cada-gá. Te ní cuu-gá déhe té Chèé chi ducaⁿ sàni iní ñáyú ñuyíú-a. Te té Chèé-án ní cuu-dé déhe té Èlí,

²⁴ te tée-án ní cuu-dé déhe té Mátát. Te té Mátát-án ní cuu-dé déhe té Lèví, te tée-án ní cuu-dé déhe té Mèlquí. Te té Mèlquí-án ní cuu-dé déhe té Jáná, te tée-án ní cuu-dé déhe té Chèé.

²⁵ Te té Chèé-án ní cuu-dé déhe té Matatías, te tée-án ní cuu-dé déhe té Àmós. Te té Àmós-án ní cuu-dé déhe té Nàhúm, te tée-án ní cuu-dé déhe té Èslí. Te té Èslí-án ní cuu-dé déhe té Nagáí,

²⁶ te tée-án ní cuu-dé déhe té Màát. Te té Màát-án ní cuu-dé déhe té Matatías, te tée-án ní cuu-dé déhe té Semèí. Te té Semèí-án ní cuu-dé déhe té Chèé, te tée-án ní cuu-dé déhe té Jùdá.

²⁷ Te té Jùdá-án ní cuu-dé déhe té Jòaná, te tée-án ní cuu-dé déhe té Rèsá. Te té Rèsá-án ní cuu-dé déhe té Zorobàbél, te tée-án ní cuu-dé déhe té Salatiél. Te té Salatiél-án ní cuu-dé déhe té Nèrí,

²⁸ te tée-án ní cuu-dé déhe té Mèlquí. Te té Mèlquí-án ní cuu-dé déhe té Ádí, te tée-án

ní cuu-dé déhe té Còsám. Te té Còsám-án ní cuu-dé déhe té Elmódám, te té-án ní cuu-dé déhe té Ēr.

²⁹ Te té Ēr-án ní cuu-dé déhe té Jòsué, te té-án ní cuu-dé déhe té Elièzér. Te té Elièzér-án ní cuu-dé déhe té Jòrim, te té-án ní cuu-dé déhe té Mátát.

³⁰ Te té Mátát-án ní cuu-dé déhe té Lèví, te té-án ní cuu-dé déhe té Mió. Te té Mió-án ní cuu-dé déhe té Jùdá, te té-án ní cuu-dé déhe té Chèè. Te té Chèè-án ní cuu-dé déhe té Jònán, te té-án ní cuu-dé déhe té Eliàquím.

³¹ Te té Eliàquím-án ní cuu-dé déhe té Mèléá, te té-án ní cuu-dé déhe té Mainán. Te té Mainán-án ní cuu-dé déhe té Mátátá, te té-án ní cuu-dé déhe té Nátán.

³² Te té Nátán-án ní cuu-dé déhe té Dàvíí, te té-án ní cuu-dé déhe té Isáí. Te té Isáí-án ní cuu-dé déhe té Òbéd, te té-án ní cuu-dé déhe té Bòóz. Te té Bòóz-án ní cuu-dé déhe té Salmón, te té-án ní cuu-dé déhe té Naàson.

³³ Te té Naàson-án ní cuu-dé déhe té Aminádáb, te té-án ní cuu-dé déhe té Áram. Te té Áram-án ní cuu-dé déhe té Èsróm, te té-án ní cuu-dé déhe té Fàrés. Te té Fàrés-án ní cuu-dé déhe té Jùdá,

³⁴ te té-án ní cuu-dé déhe té Jàcób. Te té Jàcób-án ní cuu-dé déhe té Isáác, te té-án ní cuu-dé déhe té Àbrahám. Te té Àbrahám-án ní cuu-dé déhe té Tàrè, te té-án ní cuu-dé déhe té Nàcór.

³⁵ Te té Nàcór-án ní cuu-dé déhe té Sèrùg, te té-án ní cuu-dé déhe té Ragàù. Te té Ragàù-án ní cuu-dé déhe té Pèlég, te té-án ní cuu-dé déhe té Hèbér. Te té Hèbér-án ní cuu-dé déhe té Salá,

³⁶ te té-án ní cuu-dé déhe té Cainán. Te té Cainán-án ní cuu-dé déhe té Arfàxád, te té-án ní cuu-dé déhe té Sèm. Te té Sèm-án ní cuu-dé déhe té Nòé, te té-án ní cuu-dé déhe té Làméc.

³⁷ Te té Làméc-án ní cuu-dé déhe té Matusalén, te té-án ní cuu-dé déhe té Ènóc. Te té Ènóc-án ní cuu-dé déhe té Jàréd, te té-án ní cuu-dé déhe té Mahalàleél. Te té Mahalàleél-án ní cuu-dé déhe té Cainán,

³⁸ te té-án ní cuu-dé déhe té Ènós. Te té Ènós-án ní cuu-dé déhe té Sèt, te té-án ní cuu-dé déhe té Àdán. Te té Àdán-án chí mee Yá Ndiòxí ní cadúha ndaha ñaha-gá xii-dé.

4

Sácuíhná quidé yíca-xi cada Jesús sá ñà túú táu-gá cada-gá ní cùu

(Mt. 4:1-11; Mr. 1:12-13)

¹ Te Jesús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espiritú Yá Ndiòxí, te Espiritú-án ndécá ñaha-xi xii-gá cuáháⁿ ìⁿ xití yucu.

² Te yàcáⁿ ní xindecu-gá údico nduu, te sácuíhná ní cuíni-xi coto ndéè ñáhá-xí xii-gá

te núu ndisa sá vǎ cáda-gá ìⁿ sá ñà túú táu-gá cada-gá. Te ñà túú tñahí ná ní xèxi-gá ndi údico nduu-án, te sátá dúcáⁿ te ní xí cáⁿ iní-gá caxi-gá.

³ Te sácuíhná-án ní xáhaⁿ-xi xii-gá:

—Te núu ndisa sá cùhí n Dèhe Yá Ndiòxí, te cùñaha xii yúú-a na ndùu-xi paá —càchí-xi xáhaⁿ-xi xii-gá.

⁴ Te Jesús ní xáhaⁿ-gá xii-xi:

—Núu tútú Yá Ndiòxí càchí-xi: “Ñá díú mèe-ni paá candeca-xi iní ñáyiu, chí tñahá nchaa tñuhu càháⁿ Yá Ndiòxí candeca-xi iní-yu”, duha càchí-xi núu tútú-gá —càchí-gá xáhaⁿ-gá xii-xi.

⁵ Te dátuní sácuíhná ndécá ñaha-xi xii-gá cuáháⁿ ìⁿ núu tìndúú dùcúⁿ, te uuⁿni ní dánèhè núu ñáhá-xí xii-gá nchaandi túhú nacióⁿ cáá ñùyúú.

⁶ Te ní xáhaⁿ-xi xii-gá:

—Yúhu cada-í, te taxi tñuní-n nchàa-ndi túhú nacióⁿ-a ndihi nchaa sá vǎha íó díu-ni nchaa nacióⁿ-a, te cachí ñáyiu sá ío cùnuu-n, chí yúhu cúu cuendá-í nchaa sá ío nchaa nacióⁿ-a, te ndèdani càa ñáyiu cùu iní-í te cùñaha-í xii-yu taxi tñuní-yu.

⁷ Te núu ní yúhu ní iní-n chíñuhu ñaha-n xii-í ñá, te nchaa taxi-í cuu cuendá-n —càchí-xi xáhaⁿ-xi xii-gá.

⁸ Te Jesús ní xáhaⁿ-gá xii-xi:

—Xocuñí yòhó sácuíhná núu ndécú-í-a, chí vǎ cúu càda-í nácúaa càchí-n chí núu tútú Yá Ndiòxí càchí-xi: “Chíñuhu-ndo Dütú Ndiòxí Yáa cúu Ndiòxí-ndó, te ìⁿ dúi díí-ni-gá cada-ndo nchàa nacúaa càháⁿ-gá”, duha càchí-xi núu tútú-gá —càchí-gá xáhaⁿ-gá xii-xi.

⁹ Te sácuíhná ndécá ñaha tucu-xi xii-gá cuáháⁿ ñuu Jerusalén, te ní xáhaⁿ-xi xii-gá cuásaá-gá díquí veñúhu càhu sá ío cùnuu, te ní xáhaⁿ tucu-xi:

—Te núu ndisa cùu-n Dèhe Yá Ndiòxí te cuandèe ndava ndéè núu ñuhú

¹⁰ cuendá quee ndáá-xi nácúaa càháⁿ-xi núu tútú Yá Ndiòxí núu càchí-xi:

Yá Ndiòxí tendaha-gá cue espíritú xínú cuèchi núu-gá quixi-xi coto ñaha-xi xii-n.

¹¹ Te núu ndáhá-xí caundodo-n cuendá sá vǎ dancuèhè yúú sáhá-n,

duha càchí-xi núu tútú-gá —càchí sácuíhná xáhaⁿ-xi xii-gá.

¹² Te Jesús ní xáhaⁿ-gá xii-xi:

—Te càchí tucu-xi núu tútú Yá Ndiòxí: “Vá cáni iní-n còto ndéé-n Dütú Ndiòxí Yáa cúu Ndiòxí-n núu ndisa sá dácacu nihnu ñaha-gá xii-n cuendá ìⁿ sá sání iní-n càda-n sá cúu-xí mèe-n”, duha càchí-xi núu tútú-gá —càchí-gá xáhaⁿ-gá xii-xi.

¹³ Te sátá dúcáⁿ te sácuíhná ñà túú-gá ní cùtuní iní-xi nása cada-xi Jesús, núu xíáⁿ ní xica-xi cuáháⁿ-xi ní sanaa tnaa-xi.

Distritú Galiléa ní chisaha Jèsús chiúⁿ ní táhú Tátá-gá Dítú Ndióxi cada-gá
(Mt. 4:12-17; Mr. 1:14-15)

14 Te Jèsús cuáháⁿ tucu-gá distritú Galiléa, dico sa ndècu ndihi-gá Espiritú Yá Ndióxi, te ní cãa xico xiáⁿ ní nihí-yu tñuhu nchaa nãcuáa quide-gá.

15 Te ndi tnahá ñuú cuáháⁿ-gá ducaⁿ cuãnguihu-gá veñúhu-yu ðanehé ñhá-gá xii-yu, te nchaa-yu cãchi-yu sã ïo cãhnu cuu-gá.

Jèsús ndécú-gã ñuú Nazàrét
(Mt. 13:53-58; Mr. 6:1-6)

16 Te Jèsús ní sáháⁿ-gá ñuú Nazàrét ñuú núú ní sahnú-gá. Te nduu ndetátú ñáyiú ní quíhu-gá veñúhu, chi ducaⁿ tñahí quide-gá, te ní ngúnutñí-gá ðacuãha-gá tutú ndèé tñuhu Yá Ndióxi.

17 Te ní sãñaha-güedë xii-gá tutú ndèé tñuhu ní cáháⁿ ndí Chaiá té ní xóo cáháⁿ tñuhu Yá Ndióxi ndéé sanaha, te òré ní nandicá-gá núú tütú-án te ní naníhí-gã núú cãchi-xi:

18 Espiritú Yá Ndióxi ndécú ndíhi ñaha-xi xii-í,
chi ní cãchi-gá sã cãháⁿ-í tñuhu-gá sã cúú-xí ñáyiú ndàhú,

ñáyiú vátá cündedóho tñahí-gá.
Te véxi-í cuendá vá ndíhú-gá ñí ñáyiú ñá túú ndècu váha ñí-xi,
te cue ñáyiú sã nèhe váha ñaha-nã yucu ñávãha ðacãcu nihnu-í-yu.

Te cue ñáyiú cuáã nacaáⁿ-í núú-yu, te ñáyiú ndóho dandoho ñaha tñaha ñáyiú-xi taunihnu-í-yu.

19 Te cúñaha-í xii ñáyiú sã saá nduu càda Yá Ndióxi ñí sã váha sã cúú-xí-yu.
Duha cãchi-xi núú tütú ðacuãha-gá.

20 Te Jèsús ní nacadí-gá núú tütú-án, te ní nacuáha-gá ñí tée xínu cuechi veñúhu-án, te ní ngóo-gá. Te nchaa ñáyiú yíhi veñúhu ñá núú núú-yu ndèhe ñahá-yu xii-gá.

21 Te xãhaⁿ-gã xii-yu:
—Mei vitna ní quee ndáá-xi nãcuáa cáháⁿ-xi núú tütú Yá Ndióxi —cãchi-gã xãhaⁿ-gã xii-yu.

22 Te nchaa-yu ní cáháⁿ váha-yu cuendá-gá, te ní cuñúhu-yu tñuhu váha cáháⁿ-gá, te xitñahá-yu:

—¿Te náa ñá díú tée-a cùu-dé déhe té Chéé-ã? —cãchi-yu xitñahá-yu.

23 Te Jèsús ní xãhaⁿ-gã:
—Na cãchi tñuhu ndáá-í xii-ndo sã ñúhú ñí-ndó cúñaha-ndo xii-í ñí tñuhu cütexínu sã cáháⁿ méé-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní nihí-ndí tñuhu nãcuáa ní quide-n ñuú Capèrnaúm, te cada-n tñahá ñuú núú ní sahnú-n”, duha quesaha-ndo —cãchi-gã xãhaⁿ-gã xii-yu.

24 Te ní xãhaⁿ tucu-gá:

—Na cãchi tñuhu ndáá-í xii-ndo sã ní ñí tée cáháⁿ tñuhu Yá Ndióxi ñá túú tñahá ñí ñahá ñáyiú ñuú-dé.

25 Te na cãchi tñuhu ndáá tucu-í xii-ndo sã ïo vai ñáyiú díhi ñáyiú quèé ní xíndecu nãcióⁿ Isràél cütñahá ní xíndecu té Eliás cütñahá ñá túú ní cùuⁿ dáú ñí cuíá dava, te ðávã-án ïo ní ndoho ñáyiú docó nitùhú nãcióⁿ.

26 Dico Yá Ndióxi ñá túú ní tëndaha-gá té Eliás quíhíⁿ-dé vehe ndédani càa ñáyiú díhi-án, chi vehe ñí ñaha ñuú Sàreptá ní xãhaⁿ-gã ní sáháⁿ-dé, te ñuú-án cáá yãtmi-xi ñuú Sidón.

27 Te ní xíndecu tucu ingá tée ní xóo cáháⁿ tñuhu Yá Ndióxi ndéé sanaha, te tée-án ní xínani-dë Elliseú, te ðiu-ni ðávã-án ní xíndecu tucu vai ñáyiú cùhú nãcióⁿ Isràél, ñáyiú ní tñahá cuehé sã dátèhyú nihnu-xi yiqui cùñú-yu dico ñá túú ní ndúha-yu, chi ñí-ndí-ni té Nàamán tée distritú Siríá ní ndúha-dé —cãchi-gã xãhaⁿ-gã xii-yu.

28 Te sã dúcãⁿ ní cáháⁿ-gá te xiáⁿ ní cudééⁿ víhí nchaa ñáyiú yíhi veñúhu-án núú-gá.

29 Te ní queñuhú-yu Jèsús yuhu déhvä tündúú núú cáá ñuú-yu-án cuendá yacãⁿ ðaqueé-yu-gá déhvä ní cùu.

30 Dico Jèsús vii-ni ní quee-gá tnuú-yu cuáháⁿ-gá.

Ñí tée yíhi ñaha espíritú cündíhi yucu ñávãha

(Mr. 1:21-28)

31 Te Jèsús cuáháⁿ-gá ñuú Capèrnaúm, te ñuú-án yíndèhu-xi distritú Galiléa. Te yacãⁿ ndécú-gã ní tñahá nduu ndetátú ñáyiú, te ní ngúita-gá ðacuãha-gá ñáyiú.

32 Te xicuñúhu-yu nchaa nãcuáa ðanehé ñahá-gã xii-yu, chi cáháⁿ-gá ðatná cáháⁿ ñí tée cùnuu, te cùnuu ndísa-gá.

33 Te xití veñúhu yíhi ñí tée yíhi ñaha ñí espíritú cündíhi yucu ñávãha, te espíritú-án ní quide-xi nihí ní cáháⁿ tée-án, te xãhaⁿ-dë xii Jèsús:

34 —¿Te ná cuíni yòhó Jèsús tée ñuú Nazàrét cada ñaha-n xii-ndí ñuú véxi-n núú ndécú-ndí-í? ¿Áⁿ véxi-n ðana ñaha-n xii-ndí? Chi yúhú xini ñahá-í xii-n sã cúú-n ñí tée ñá túú tñahí cuechi-xi chi núú Yá Ndióxi ní quee-n véxi-n ñuúyú-a —cãchi-dé xãhaⁿ-dë xii-gá.

35 Te Jèsús ní tenáá-gá espíritú cündíhi yucu ñávãha-án, te xãhaⁿ-gã:

—¿Cadi yuhu-n, te taquèé yiqui cuñú tée-án! —cãchi-gã xãhaⁿ-gã.

Te espíritú cündíhi yucu ñávãha-án ní ðándüá-xi tée-án ndèé ñuhu tnuú ñáyiú xíndecu-án, te ñá túú-gá ná ní quide ñaha-xi, te ní quee ñaha-xi xii-dé.

³⁶ Te nchaa ñáyi yíndecu-án ní cuñúhu-yu, te ní xítñáhá-yu:

—¿Te nása nduu-tu tnúhu càháⁿ té-ãⁿ ñá? ¡Te càháⁿ-dé dàtná càháⁿ ñⁿ té-ãⁿ tàxi tñuní víhí, chí càháⁿ-ní-dé te nchaa espíritú cùndihí yucu ñávàha quèe-ni-xi yíqui cuñú-yu! —càchí-yu xítñáhá-yu.

³⁷ Te nchaa xichí ní ñhí-yu tnúhu nàcuáa quide Jesús.

Jèsús quidé tãtna-gá nãná ñadhí té Xímú
(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadhí té Xímú-án cùhú-aⁿ ññu vihi-aⁿ cahni, te ní càháⁿ ndàhú-yu núú Jèsús cuendá-aⁿ.

³⁹ Te Jèsús ní sáháⁿ-gá núú ndécú-án, te ní ngúnundeyi-gá te ní xáhaⁿ-gá xii cahni-án sã ná xócuiñí-xi, te ní xócuiñí-ni-xi, te òré-ni-án ní ndúha ñaha cùhú-án, te ducaⁿ ní ndacóo-aⁿ ní xinu cuechi-aⁿ núú-güedé ndihí-gá.

Jèsús quidé tãtna-gá vai ñáyi cùhú
(Mt. 8:16-17; Mr. 1:32-34)

⁴⁰ Te òré ní ngódó tñúú nchíanchii, te nchaa ñáyi yíndecu ndihí ñáyi cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ñⁿ ñáyi cùhú-án, te xáháⁿ-yu xii Jèsús:

⁴¹ Te tñahá dava ñáyi cùhú-án yíhí ñaha espíritú cùndihí yucu ñávàha xii-yu ní cùu, te òré ní quee ñaha-xi xii-yu, te xiáⁿ ní quide-xi níhí ní càháⁿ-yu, te xáháⁿ-yu xii Jèsús:

—Yòhó cúu-n Dèhe Dútú Ndióxí —càchí-yu xáháⁿ-yu xii-gá.

Dico Jèsús níhí ní càháⁿ-gá ní tenáa-gá nchaa espíritú cùndihí yucu ñávàha-án, te xáhaⁿ-gá sã vã dúcán-gá cada-xi, chí sa xini-xi sã díú-gá cúu-gá Crístú Yaa ní tendaha Yã Ndióxí véxi ñuyúú-a.

Jèsús dánèhé-gá ñáyi distritú Galiléa
(Mr. 1:35-39)

⁴² Te ñⁿ nduu ní túndaá-ni ní quee Jèsús ñuu núú ndécú-gá-án cuáháⁿ-gá ñⁿ xichi núú ñã túú ñáyi ndècu. Te cue ñáyi ní ngúíta-yu nànducu ñahá-yu xii-gá te ní naníhí ñahá-yu, te cùni-yu ngani ñahá-yu xii-gá cuendá sã ñã túú-gá ndéé quíhíⁿ-gá ní cùu.

⁴³ Dico ní xáhaⁿ-gá xii-yu:

—Dacuití quíhíⁿ-í cúñaha-í xii nchaa ñáyi dava-gá ñuu tnúhu sã càháⁿ nàcuáa ndíhu ndaha ñaha Yã Ndióxí xii-yu, chí chiúⁿ tñahí-án véxi-í —càchí-gá xáhaⁿ-gá xii-yu.

⁴⁴ Te ní xica cuu Jèsús ní dánèhé-gá ñáyi tnúhu-gá nchaa xití veñúhu ndaa distritú Galiléa.

5

Jèsús ní quide-gá ní ñhí-güedé chácá
(Mt. 4:18-22; Mr. 1:16-20)

¹ Te ñⁿ xito ndècu Jèsús yuhu làgúná Genesàrét, te ío cuéhé ñáyi ní sáá, te ta dàdehnde ñaha-ná-yu xii-gá cuáháⁿ sã cùni-yu cunedóho-yu nchaa tnúhu càháⁿ-gá.

² Te Jèsús ní xini-gá úú bàrcú cue téé tñú chácá xíntñí-xi yatni yuhu làgúná-án, te sa ní quene cue téé ññu xití-xi-án xinaquete-güedé ñunu-güedé.

³ Te Jèsús cuásaá-gá núú ñⁿ bàrcú-án, te bàrcú-án cúu-xi bàrcú té Xímú, te ní xáhaⁿ-gá xii té Xímú-án sã dánundehe-dé-xi luha-gá xití ndute. Te dàtnùni ní ngóo-gá núú bàrcú-án, te xiáⁿ núcúo-gá ní ngúita-gá dánèhé-gá ñáyi.

⁴ Te òré ní túhú ní dánèhé ñahá-gá xii-yu, te ní xáhaⁿ-gá xii té Xímú:

—Daquíhíⁿ bàrcú-a xití làgúná mei núú cùnú-gá, te dàquée-ndo ñunu-ndo tñú-ndo chácá —càchí-gá xáhaⁿ-gá xii-dé.

⁵ Te té Xímú ní xáhaⁿ-dè:

—Mèstrú, ní núú ní quide chiúⁿ-ndí te ní ñⁿ chácá ñã túú ní ñhí-ndí, dico vitna cuendá-ni sã yòhó táuchiuⁿ-n te na dàquée-ndí ñunu-ndí vãⁿ —càchí-dé xáhaⁿ-dè xii-gá.

⁶ Te òré ní dàquée-güedé ñunu-güedé te súúni vai chácá ní ñhí-güedé, te ta ndátá-nã ñunu-güedé cuáháⁿ ní cùu.

⁷ Núú ní quide-güedé ndaha-güedé núú dava-gá cue téé cùndihí-güedé xixúhuⁿ ingá bàrcú cuendá quíhíⁿ-güedé chindee ñaha-güedé. Te cue téé-án ní sáháⁿ-güedé ní chindee tñaha-güedé ní dàchitú-güedé ndi ndúú bàrcú mee-ni chácá, te súúni ní cuu véé núu cùni-na-xi quée naa-güedé ndihí bàrcú ní cùu.

⁸ Te sã dúcáⁿ cùni-xi quée naa bàrcú ní cùu, núu té Xímú, àdi Pelú chí úú diu-dé, ní ngúñí xití-dé núú Jèsús, te xáhaⁿ-dè:

—Xocuiñí yòhó Jèsús núú ndécú-í-a, chí yúhú cúu-í ñⁿ téé ío ndècu cuéchi-xi —càchí-dé xáhaⁿ-dè xii-gá.

⁹ Te ducaⁿ ní càháⁿ-dè chí ní yùhú-dé, te ní cuñúhu-dé ndihí nchaa cue téé ndihí-dé-án cuendá sã ío vai chácá ní ñhí-güedé.

¹⁰ Te tñahá té Jacobó ndihí té Juáa cue déhe té Zebèdeú ío ní cuñúhu-güedé, te diu-ni cue téé cùndihí té Xímú-án cúu-güedé tñahá-güedé. Te Jèsús ní xáhaⁿ-gá xii té Xímú:

—Vã yùhú-n, chí není vitna quíhíⁿ-n dàcaháⁿ-n ñáyi cuendá tuha ñahá-yu xii-í —càchí-gá xáhaⁿ-gá xii-dé.

¹¹ Te ní quene-güedé ndihí bàrcú ndéé ñuhu yichí yuhu làgúná-án. Te òré-án ní dándóo-güedé nchaandi túhú sã ndécú ndihí-güedé, te ní tuha-güedé Jèsús.

Jesús quidé tãtma-gá ñⁿ tée tnàhá cuéhé sã datèhyú nihnu-xi yiqui cuñú-ó
(Mt. 8:1-4; Mr. 1:40-45)

12 Te òré ní quexio Jesús ñⁿ ñuú, te ní quexio ñⁿ tée cùhú tnàhá-dé cuéhé sã datèhyú nihnu-xi yiqui cuñú-ó, te òré ní xiní-dé Jesús te ní sàháⁿ-dé núú ndécú-gá, te ní ngúñí xití-dé núú-gá te ní nuu núú-dé ndàa núú ñúhú te càháⁿ ndàhú-dé, te xàháⁿ-dé xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tátna ñaha-n xii-í, chi cùtnuní iní-í sá ndácú-n —càchí-dé xàháⁿ-dé xii-gá.

13 Te Jesús ní dácáa-gá ndaha-gá ní tendaha ñaha-gá xii-dé, te xàháⁿ-gá:

—Cuu cada tátna ñaha-í xii-n, te vitna te ndúha-n —càchí-gá xàháⁿ-gá xii-dé.

Te òré-ni ní xócuñí cuéhé tnàhá-dé.

14 Te dàtnuní ní xàháⁿ tucu Jesús xii-dé:

—Vá yò ñⁿ cùñaha-n sã ní quide tátna ñaha-í xii-n, núú dütú-ni cuaháⁿ cuendá sá ná quini ñáhá-dé xii-n sã ní ndúha-n te cuáha-n-dé sá ndúú tãhú Yá Ndióxi dàtná ní cachí ndí Moisés cuendá ná quini ñáiyu sá ndàá ní ndúha-n —càchí-gá xàháⁿ-gá xii-dé.

15 Te ducaⁿ ta xité nuu-gá tnúhu nchaa nàcuáa quide Jesús, te ío cuéhé ñáiyu ní xóo tacá nchaa núú ní xíndecu-gá cuendá sá cuini-yu cundèohoyu tnúhu càháⁿ-gá, ndíhi cuendá sá cuini-yu cada tátna ñaha-gá xii-yu.

16 Dico Jesús ní xóo quee nihni-gá tnuú-yu ní xóo quíhiⁿ-gá núú ñà túú ñáiyu ndècu ní xóo càháⁿ ndíhi-gá Yá Ndióxi.

Jesús quidé tãtma-gá ñⁿ tée cùhú ñá cùú-gã candá nihnu

(Mt. 9:1-8; Mr. 2:1-12)

17 Te ñⁿ nduu dànehé-gá ñáiyu, te xíncúo ñⁿ úú cue tée cùu fariséu, ndíhi cue tée dàcuaha ñaha xii ñáiyu nchaa tnúhu ní chídó tnuní ndí Moisés. Te cue tée-áⁿ ní quee-güedé nchaa ñuú yíndèhu distritú Galileá, ndíhi distritú Jüdeá, ndíhi ñuú Jerusalén, te nchaa ñuú-áⁿ ní quee-güedé cuaháⁿ-güedé núú ndécú-gá. Te Yá Ndióxi chíndèe ñaha-gá quidé tátma-gá ñáiyu cùhú.

18 Te ñⁿ úú cue tée nchido-güedé ñⁿ tée cùhú ñá cùú-gá candá nihnu ñúhu-dé xito ní quexio ndíhi ñaha-güedé, te cuini-güedé quíhu ndíhi ñaha-güedé ndéé xití vehe, sáa-güedé ndéé núú Jesús ndíhi tée cùhú-áⁿ.

19 Dico ñá túú ní ñhí-güedé ndéé ichi quíhu-güedé, chi cuendá ío cuéhé ñáiyu ndècu, nuu xíáⁿ ní sáa-güedé díquí véhé-áⁿ ní caáⁿ-güedé te ndàa díquí véhé-áⁿ ní dáquèe-güedé tée cùhú-áⁿ, te ñúhu-ni-dé xito ní dáquèe ñaha-güedé tnuú ñáiyu ní sáa ndéé núú Jesús.

20 Te Jesús ní cutnuni iní-gá sá ní yuhu ní iní-güedé sàndáá iní ñáhá-güedé xii-gá, núú ní xàháⁿ-gá xii tée cùhú-áⁿ:

—Yòhó tée cùhú, sa ní quide càhnu iní-í nchaa cuéchi-n —càchí-gá xàháⁿ-gá xii-dé.

21 Te cue tée dàcuaha ñaha xii-yu nchaa tnúhu ní chídó tnuní ndí Moisés ndíhi cue tée cùu fariséu ní sani iní-güedé: “¿Ná cùú tée-a núú càháⁿ cuéhé-dé cuendá Yá Ndióxi-í? Te vá yò ñⁿ ndàcu cada cahnu iní nchaa yíca cuéchi ñáiyu, chi ñⁿ dítí ní Yá Ndióxi quidé càhnu iní-gá”, duha ní sani iní-güedé.

22 Dico Jesús sa ní cutnuni iní-gá nàcuáa sàni iní-güedé núú ní xàháⁿ-gá xii-güedé:

—¿Te ná cuendá ducaⁿ sàni iní-ndó-í?

23 Te sá dúhá ní xàháⁿ-í xii tée cùhú-a sá cáda càhnu iní-í nchaa yíca cuéchi-dé, te xíáⁿ nchòhó ñá túú cùtnuní iní-ndó núú ndáá càháⁿ-í àdi ñá ndàá. Dico núú cùu-í-dé sá ndácúo-dé, te caca-dé te cutnuni ndáá iní-ndó núú ndáá càháⁿ-í àdi ñá ndàá, chi cundehe núú-ndó nàcuáa cada-í.

24 Te vitna na càda-í nàcuáa cutnuni iní-ndó nchaa-ndo sá yúhú Tée cùu ñani tnáhá-ndó nchaa-ndo ndecu ndíhi-í tnúhu ndee iní sá cáda càhnu iní-í nchaa cuéchi ñáiyu ñuyúú-a —càchí-gá xàháⁿ-gá xii-güedé.

Te sáta dúcáⁿ te ní xàháⁿ-gá xii tée cùhú-áⁿ:

—Ndacóo, te ndocani-n xito ñúhu-n véxi-áⁿ, te nùhú-n vehe-n —càchí-gá xàháⁿ-gá xii-dé.

25 Te òré-ni-áⁿ ní ndúha tée cùhú-áⁿ te ní ndacóo-dé, te ní ndocani-dé xito ñúhu-dé ní quexio-áⁿ, te ní natni-dé ichi ta càháⁿ-dé cuánuhú sá ío càhnu cuu Yá Ndióxi.

26 Te nchaa ñáiyu xíndecu-áⁿ ní cuñúhu-yu, te tnàhá-yu ní cachí-yu sá ío càhnu cuu Yá Ndióxi, te ducaⁿ ío ní yuhú-yu, te ní xítñahá-yu:

—Vitna ní xiní-ó ñⁿ sá ñà túú tnàhí xiní-ó ní cùu —cachí-yu xítñahá-yu.

Jesús caná-gã té Lèví

(Mt. 9:9-13; Mr. 2:13-17)

27 Te sáta dúcáⁿ ní cuu te ní quee Jesús xíáⁿ, te ní xiní-gá ñⁿ tée ñani Leví núcúo-dé ñⁿ xichi quide cobrá-dé ñáiyu cuendá impuèstú, chi cobradór cùú-dé, te ní xàháⁿ-gá xii-dé.

—Néhe chítñahá ñáhá-n xii-í —càchí-gá xàháⁿ-gá xii-dé.

28 Te té Lèví-áⁿ ní ndàcuñí-dé te ní dándóo-dé nchaa sá ndécú ndíhi-dé núú núcúo-dé-áⁿ, te ní tuha-dé Jesús.

29 Te sáta dúcáⁿ te té Lèví-áⁿ ní quide-dé ñⁿ vico càhnu vehe-dé sá cùú-xí Jesús, te ní tacá vau cue tée quide chiúⁿ quide-dé, te nchaa-güedé cuánguihu-güedé mesá ní ngóo-güedé ndíhi dava-gá ñáiyu ní quexio cuendá caxi-güedé ndíhi-yu.

30 Dico cue tée cùu fariséu ndíhi cue tée dàcuaha ñaha xii-yu nchaa tnúhu ní

chídó tnúni ndíi Moisés ní ngúita-güedé xicuhé-güedé cue téé xica cuu ndihi-gá, te xáhaⁿ-güedé:

—¿Ná cuendá xéxi-ndó xihí-ndo ndihi cue téé cuihna iní-xi quide cobrá ñháá xii ñáiyu cuendá impuestú, ndihi nchaa dava-gá cue téé ndècu ichi cuehé ichi duha-i? — cächí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáiyu ñá túu cùhú chí ñá túu xini ñuhú-yu ñátátná, dico nchaa ñáiyu cùhú chí xini ñuhu ñháa-yu.

³² Te yúhú véxi-í càháⁿ-í ñáiyu cùtnuni iní-xi sá ndécú cuéchi-xi cuendá ñháa-yu nchaa sá cuehé sá dúhá quidé-yu, te ñá túu véxi-í càháⁿ-í ñáiyu cächí sá ñá túu ndècu cuéchi-xi —cächí-gá xáhaⁿ-gá xii-güedé.

Cue téé ndücu tnúhu núú Jèsús cuendá ñáiyu ñá túu tnàhí ná xéxi áma càháⁿ ndihí-yu Yá Ndióxi

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túu tnàhí ná xéxi cué téé xica cuu ndihi té Juáá càháⁿ ndihí-güedé Yá Ndióxi, te ñu-ni ducaⁿ quide cue téé xica cuu ndihi nchúhú cue téé cùu fariséu. ¿Te ná cuendá cue téé xica cuu ndihí-n ñá túu ñáiyu quide-güedé núu nchaa-ni nduu xéxi-güedé xihí-güedé quidé-güedé-i? —cächí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchòhó xini-ndó sá vâ cúú cùñaha-o xii cue ñáiyu ñuhu vico tnándaha sá vâ cúú cächí-yu nini ndècu ndihí ñaha téé tnándaha-áⁿ xií-yu.

³⁵ Dico sáá nduu te vâ cùndècu ndihí ñaha-gá téé tnándaha-áⁿ xií-yu, te dàvá-áⁿ te cahni iní-yu vâ cächí-yu sá ndihú iní-yu —cächí-gá xáhaⁿ-gá xii-güedé.

³⁶ Te ní cani-gá ñáiyu cuendú núú ñáiyu nàcuáa tecú tnúni-yu tnúhu-gá, te xáhaⁿ-gá:

—Vâ yóo ñáiyu dándée luha dóo sáá ñáiyu dóo sá ní cuu tühú vihí, chí núu yoo ducaⁿ na càda, te dóo sáá-áⁿ nándiyi-xi te uun-gá ndata-xi dóo sá ní cuu tühú-áⁿ, te luha dóo sáá-áⁿ ñá túu nátaú-xi ndée dóo sá ní cuu tühú-áⁿ.

³⁷ Te ní vâ yóo ñáiyu chíhí ndidí sáá xití ñáiyu lamba sa ní cuu tühú vihí, chí núu yoo ducaⁿ na càda, te ndava lamba sa ní cuu tühú-áⁿ chí ío ñhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ.

³⁸ Núu xiáⁿ xini ñuhu-xi quée ndidí sáá-áⁿ xití ñáiyu lamba saa cuendá ducaⁿ ñá túu ná cuu cováha-xi.

³⁹ Te ní ñáiyu ñá túu tnàhí iní-yu cohó-yu ndidí sáá, te núu díhna-gá ná cohó-yu ndidí sá ní quene díhna-gá, chí cächí-yu sá xihí vâha-gá ndidí sá ní quene díhna-gá-áⁿ dàcúúxi ndidí sáá —cächí-gá xáhaⁿ-gá xii-yu.

6

Cue téé xica cuu ndihí Jèsús sàhnú-güedé yoco triú nduu ndetátú ñáiyu
(Mt. 12:1-8; Mr. 2:23-28)

¹ Te ñáiyu nduu cùu-xi nduu ndetátú ñáiyu ñuhu Jèsús ichi ndihí cue téé xica cuu ndihí-gá, te ta yáha-gá ndihí-güedé ñáiyu xichí núú cáá triú, te ní ngúita-güedé sàhnú-güedé yoco triú-áⁿ te ndihí ndaha-güedé quííⁿ-güedé quée triú tá xéxi-güedé cuhááⁿ.

² Te ñáiyu ñáiyu cue téé cùu fariséu ní xáhaⁿ-güedé xii cue téé xica cuu ndihí-gá:

—¿Te ná cuendá ducaⁿ quide nchòhó ñáiyu sá ñá túu tãú-ó càda-o vitna cuu-xi nduu ndetátú-ó-í? —cächí-güedé xáhaⁿ-güedé.

³ Te Jèsús ní xáhaⁿ-gá xii-güedé:

—¿Te ná ñá túu dàcuaha-ndo núú tütú Yá Ndióxi núú càháⁿ-xi nàcuáa ní quide ndí Dáví cùtnhá ní xihí ndí docó ndihí cue téé ní xica cuu ndihí ndí-áⁿ?

⁴ Chí ní quíhu ndí vehe Yá Ndióxi, te ní quèheⁿ ndí pãá ní cuu íí ndécú-áⁿ ní dácañhu ndí cue téé xica cuu ndihí ndí ní xéxi ndí ndihí-güedé, te ñá túu tãú ndí sá ñáiyu càda ndí ní cùu, chí mee-ni cué dütú tãú-güedé caxi-güedé pãá-áⁿ ní cùu —cächí-gá xáhaⁿ-gá xii-güedé.

⁵ Te ní xáhaⁿ tucu-gá:

—Te yúhú Téé cùu ñaní tnàhá-ndó nchàa-ndo, tnàhá-í ndécú ndihí-í tnúhu ndee iní sá cùu-í nchaa ñáiyu nàcuáa cadá-yu nduu ndetátú-ó-á —cächí-gá xáhaⁿ-gá xii-güedé.

Íí téé ní yichí ñáiyu xio ndaha-xi
(Mt. 12:9-14; Mr. 3:1-6)

⁶ Te ingá nduu ñu-ni nduu ndetátú ñáiyu cuánguihu Jèsús xití veñúhu dànehé-gá ñáiyu. Te xiáⁿ ndécú ñáiyu téé cùhú ní yichí ñáiyu ñáiyu xio ndaha cùha-dé.

⁷ Te cue téé dàcuaha ñaha xii ñáiyu nchaa tnúhu ní chídó tnúni ndí Moisés, ndihí cue téé cùu fariséu ndéhé-güedé núu cada tátna ñaha Jèsús xii téé cùhú-áⁿ nduu ndetátú-güedé-áⁿ cuendá ñhi-güedé nàcuáa cada-güedé cacáⁿ cuéchi-güedé cuendá-gá.

⁸ Dico Jèsús sa ní cùtnúni iní-gá nàcuáa sàni iní-güedé, te ní xáhaⁿ-gá xii téé cùhú ndaha-xi-áⁿ:

—Ndacuíñí te ngúnutñí-n cuádava tnuú-ndí-a —cächí-gá xáhaⁿ-gá xii-dé.

Te téé-áⁿ ní ndacuíñí-dé te ní ngúnutñí-dé cuádava tnuú-güedé ndihí-gá.

⁹ Te dàtnúni Jèsús ní xicáⁿ tnúhú-gá núú cué ñáiyu xincucu-áⁿ, te xáhaⁿ-gá xii-yu:

—Cuñí-í cächí tnúhu-ndo ná cúú sá vâha cada-o nduu ndetátú-ó. ¿Ñáiyu chiuⁿ vâha ádi ñáiyu chiuⁿ cuehé, sá cadá tátna-o ñáiyu cùhú ádi sá cáhni-ó-yu? —cächí-gá xáhaⁿ-gá xii-yu.

10 Te dātnūnī ní ndacoto-gá núŷ-yu nchaá-yu, te ní xáhaⁿ-gá xii téé cūhú ndaha-xi-áⁿ:

—Ndocani ndaha-n —cāchí-gá xáhaⁿ-gá xii-dé.

Te ní ndocani-dé ndaha-dé, te òré-ni ní ndúha.

11 Te cue téé xīndecu-áⁿ sūúni ní cudééⁿ-güedé sá dúcáⁿ ní quide tātna Jēsús téé cūhú-áⁿ, te ní ngúita-güedé ndátnūhu-güedé núu nása cada ñaha-güedé xii-gá.

Jēsús cāxi-gá úxúú tnàhá cue téé dacuàha ñaha xii ñáiyu tnúhu-gá

(Mt. 10:1-4; Mr. 3:13-19)

12 Te sātá dúcáⁿ ní cuu te ní xica Jēsús cuáháⁿ-gá xití yucu cuendá yacáⁿ cáháⁿ ndihi-gá Tātá-gá Dútú Ndióxi, te ní niú ní cáháⁿ ndihi ñaha-gá.

13 Te sātá ní túndaá, te ní cana-gá nchaa cue téé xica cuu ndihi-gá, te ní cāxi-gá úxúú tnàhá-güedé, te cue téé-áⁿ ní xáhaⁿ-gá sá díú-güedé cuu-güedé cue téé quíhíⁿ cáháⁿ tnúhu-gá núú ñáiyu.

14 Te duha xīnani ndi úxúú cue téé-áⁿ. Té Ximú, àdi Pelú chi úú díu-dé, ndihi ñani-dé té Ndríxi, ndihi té Jácobó, ndihi té Juàá, ndihi té Lipé, ndihi té Bartolómé,

15 ndihi té Mátéu, ndihi té Māxí, ndihi té Jácobó déhe té Alféu, ndihi ingá té Ximú téé ní cundihi cue téé canānistá,

16 ndihi té Júdás ñani té Jácobó, ndihi té Júdás Iscarioté téé ní sáá nduu ní sáha cuendá ñahá xii Jēsús núú cué téé cuu úhú iní ñahá xii-gá, duha xīnani cué téé ní cāxi Jēsús ní xica cuu ndihi-gá.

Jēsús dánèhé-gá cuéhé víhí ñáiyu

(Mt. 4:23-25)

17 Te Jēsús cuānuu-gá yucu núú ní sáá-gá-áⁿ, te ní ngava-gá ñⁿ núú ndáá ndihi cue téé xica cuu ndihi-gá, te xíáⁿ ní ngúnutnii-gá. Te xíáⁿ ndécú dāva-gá cue téé xica cuu ndihi-gá ndihi vai ñáiyu ndétu ñahá-yu xii-gá, te ñáiyu-áⁿ véxi-yu nchaa ñúú cáá dístrítú Júdeá, ndihi ñúú Jerusálén, te ndécú ñáiyu véxi ndáa yuhu lamár yatni ñúú Tírú, ndihi ñúú Sidón. Te nchaa ñáiyu-áⁿ ní quexió-yu cuíní-yu cundedóho-yu nchaa tnúhu cáháⁿ Jēsús, ndihi cuendá sá cuíní-yu ndúha-yu nchaa cuéhé tnàhá-yu.

18 Te tnàhá ñáiyu yíhi ñaha espíritu cūndihi yucu ñávaha.

19 Te nchaá-yu cuíní-yu dacáá-yu ndahá-yu tendahá-yu Jēsús ní cuu cuendá sá ní níhi-yu tnúhu sá ndécú ndihi-gá tnúhu ndee iní quidé tātna-gá nchaa ñáiyu cūhú.

Cuendá ñáiyu ío váha táhú-xi

(Mt. 5:1-12)

20 Te Jēsús ní ndacoto-gá núú cué téé xica cuu ndihi-gá, te ní xáhaⁿ-gá:

—Váha táhú nchaa nchòhó cue ñáiyu ndáhú, chi nduu táhú-ndó cūndecu-ndo núú táxí tnūnī Yá Ndióxi.

21 Váha táhú nchaa nchòhó ñáiyu ío cuíní cundedóho tnúhu Yá Ndióxi chi ío víi ío váha cuu iní-ndó.

Váha táhú nchaa nchòhó ñáiyu ndàhyú sá ndihú iní-ndó, chi sáá nduu te cudíí iní-ndó ní caa ní quíhíⁿ.

22 Váha táhú nchaa nchòhó ñáiyu na cuu úhú iní ñahá tnàha ñáiyu-xi, chi sáá nduu te vá dáñá-gá-yu quíhu-ndo venúhu, te cúcuèhé ñahá-yu xii-ndo, te cachí-yu sá ñá díú ñáiyu váha cuu-ndo, te ducaⁿ cada ñahá-yu xii-ndo sá cuendá yúhú Téé cuu ñani tnàhá-ndó ncháa-ndo.

23 Te òré ducaⁿ na cada ñahá-yu xii-ndo te cudíí víhí-ní iní-ndó cūndecu-ndo, chi sáá nduu ndúu táhú-ndó sá ío váha càa ndecu andiú cundecu ndihi-ndo nduu na nasaá-ndó yacáⁿ cundecu-ndo, chi díu-ni ducaⁿ ní xóo cada ñaha cué ñani tnàhá-yu xii cue téé ní xóo cáháⁿ tnúhu Yá Ndióxi ní xīndecu ndéé sanaha.

24 Te ndáhú ní cuu nchaa ñáiyu cuica ñá túú sándáá iní ñahá xii Yá Ndióxi, chi vitna ío váha ndécú-yu, dico sáá nduu te nduu ndáhú-yu.

25 Te ndáhú ní cuu tucu nchaa ñáiyu ñá túú tnàhí ná cūmānī xii-xi vitna, chi sáá nduu quíní-yu tnúndóho tnúhu ndáhú.

Te ndáhú ní cuu nchaa ñáiyu cūdíí iní-xi ndécú ichi cuéhé ichi duha vitna, chi sáá nduu te ndàhyú-yu sá ndihú iní-yu.

26 Te ndáhú ní cuu nchaa ñáiyu na cáháⁿ váha dāva-gá ñáiyu cuendá-xi, chi ducaⁿ ní xóo cáháⁿ váha-yu cuendá nchaa cue téé ní xóo dandáhú ñahá xii ñáiyu ndéé sanaha, chi ní cachí-güedé sá cáháⁿ-güedé tnúhu Yá Ndióxi te ñá ndáá —cāchí-gá xáhaⁿ-gá xii-güedé.

Cuu iní-ó ncháa ñáiyu cuu úhú iní ñahá xii-o

(Mt. 5:38-48; 7:12)

27 Te Jēsús ní xáhaⁿ-gá xii nchaa ñáiyu xīndecu-áⁿ:

—Nchaa nchòhó ñáiyu xīndedóho ñaha cāchí tnúhu-í xii-ndo sá cúú iní-ndó ñáiyu cuu úhú iní ñahá xii-ndo, te cada-ndo sá váha sá cúú-xi-yu cuéi nāndi sá ná cádá ñahá-yu xii-ndo.

28 Te cācáⁿ táhú-ndó núú Yá Ndióxi cuendá ñáiyu cáháⁿ úhú ñahá xii-ndo, ndihi cuendá ñáiyu téé ñaha cuéchi neñúú xii-ndo.

29 Te núu ní canihá-yu xii-ndo ñⁿ xito te cuíní tucú-yu canihá-yu, te dañá-ndo na canihá-yu, àdi núu na quèndéé-yu dóó ndíxi ndòdo-ndo, ndihi dúhñú-ndó, te dañá-ndo na cànehé-yu quíhíⁿ.

30 Te núu xicáⁿ-yu ìⁿ sá nándĩhi-yu núú-ndó te cuãñaha-ndo, àdi quendeé-yu ìⁿ ndachiuⁿ-ndo, te vá nándacáⁿ-ndó núũ-yu.

31 Te nchaa sá váha cuini-ndó càda tñaha ñáiyu-ndo, te cada-ndo tñahá-ndó ndĩhi-yu.

32 Chi núu nchòhó ná cùu iní-ndó mèe-ni ñáiyu cùu iní ñáhá xii-ndo, te vá càchí-ndó sá ìo váha quide-ndo, chi tñahá nchaa ñáiyu ndècu ichi cuehé ichi duha ducaⁿ xiquidé-yu.

33 Àdi mee-ni ñáiyu quide ñaha sá váha xii-ndo quide váha-ndó-yu, te vá càchí-ndó sá ìo váha quide-ndo, chi tñahá nchaa ñáiyu ndècu ichi cuehé ichi duha ducaⁿ xiquidé-yu.

34 Àdi mee-ni ñáiyu sàni iní-ndó nacoto ñaha xii-ndo cuãñaha-ndo ìⁿ sá xicáⁿ-yu núú-ndó, te vá caní iní-ndó sá ìo quide váha-ndo, chi tñahá ñáiyu ndècu ichi cuehé ichi duha dásaⁿ nuú-yu ìⁿ sá néhé váha-yu, te ndètu cahnu-ná-yu nacoto ñaha ñáiyu ní sáha núú-yu-áⁿ.

35 Dico nchòhó xini ñuhu-xi cuu iní-ndó ñáiyu cùu úhú iní ñáhá xii-ndo, te cada-ndo sá váha sá cúú-xí-yu, te cuãñaha nuu-ndo ìⁿ sá ná ndĩhi-yu te núu xicáⁿ-yu núú-ndó, te vá cundètu-ndo nacoto ñahá-yu xii-ndo. Te ducaⁿ te ìo-gá cuehé ñihí-ndó cùndecu ndĩhi-ndo, te cuu ndisa-ndo dèhe Dútú Ndióxi, chi ìo càhnu iní-gá sá cúú-xí nchaa ñáiyu ñá túú ndacáⁿ táhú núú-gá cuendá nchaa sá váha quide-gá, ndihi sá cúú-xí nchaa ñáiyu ndècu ichi cuehé ichi duha.

36 Te cunduu càhnu iní nchòhó tucu datná càhnu iní Tàtá-ó Dútú Ndióxi.

*Vá càháⁿ cuehé-ó cuendá tñaha ñáiyu-ó
(Mt. 7:1-5)*

37 Te vá càháⁿ cuehé-ndó cuendá sá quidé tñaha ñáiyu-ndo, te ducaⁿ te Yá Ndióxi ñá túú ná tñuhu cùñaha-gá xii-ndo. Te vá cùñaha-ndo xii ñáiyu sá quihíⁿ-yu ìⁿ xichi núú ùhú núú ndàhú ndohó-yu cuendá nchaa sá ñá túú váha quidé-yu, te ducaⁿ te Yá Ndióxi vá cùñaha-gá xii-ndo sá tñahá-ndó quihíⁿ-ndó ìⁿ xichi núú ùhú núú ndàhú ndoho-ndo. Te chí cadá càhnu iní nchaa sá quidé-yu, te ducaⁿ te Yá Ndióxi cada càhnu iní ñáhá-gá xii-ndo tucu.

38 Te chí cuãñaha xii ñáiyu núu ná cúú sá xini ñuhu-yu, te datná chitu ìⁿ yicá súúni xidó coyo-ná, ducaⁿ tàxi Yá Ndióxi xii-ndo. Te nánicuáa na cada-ndo cada váha-ndo sá cúú-xí tñaha ñáiyu-ndo, te ñu-ni ducaⁿ càda ñaha Yá Ndióxi xii-ndo –càchí Jèsús xáhaⁿ-gá xii-yu.

39 Te dàtnùni ní caní-gá ìⁿ cuèndú núu-yu nàcuáa tecú tñùni-yu tñuhu-gá, te xáhaⁿ-gá:

–Ìⁿ tée cuáá chi ñá ndácú-dé cuita nehe-dé ingá tée cuáá, chi núu ducaⁿ na càda-güedé te ndi ndúú-güedé ngauni-hnu-güedé déhvá.

40 Te ni ìⁿ landú yihí scuèlá ñá túú cùnuu-gá-güexi dàcúúxi mèstrú-güexi, te ndéé núu na cùtúha váha-güexi, te dàtnùni nùtnahá-güexi tée dānehé ñáhá xii-güexi.

41 Te na càchí tñuhu-í xii-ndo sá nchaa cuèchi quide ñáiyu cùu-xi datná ìⁿ mihi líhli. ¿Te ná cuendá ndéhé-ndó ìⁿ sá ñá túú váha quide tñaha ñáiyu-ndo, te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sá ndéhé-ndó datná ìⁿ mihi líhli ñuhu núú tñaha ñáiyu-ndo, te mee-ndo ñuhu ìⁿ mihi cahnu-gá núú-ndó.

42 Te núu na nàcanu ichi-ndo tñaha ñáiyu-ndo cuendá sá ñá túú quide váha-yu ndècu-yu te mee-ndo vihi-gá quidé-ndó ñá, te cada iní-ndó sá xáhaⁿ-ndo xii-yu sá natáva-ndo mihi líhli ñuhu núú-yu, te mihi càhnu ñuhu núú méé-ndó ñá túú quide cuendá-ndó. ¿Te sá dúcáⁿ quide-ndo te ìo dāndahú-ndó mèe-ndo sá quidé ndāá-ndó te ñá ndāá sá quidé ndāá-ndó! Te xini ñuhu-xi díhna-gá dañā-ndo nchaa sá ñá túú váha quide-ndo, te dàtnùni ducaⁿ te cutnùni váha iní-ndó nàcuáa nàcanu ichi-ndo tñaha ñáiyu-ndo.

*Ndi díⁿ núú yutnu xini-ó nā yutnu cùu-xi
cuendá sá sāvídí-xi*

(Mt. 7:17-20; 12:34-35)

43 Te ñá túú ni ìⁿ yutnu váha te quini-ó cùuⁿ sāvídí sá ñá túú váha, te ni ìⁿ yutnu sá ñá túú váha, te quini-ó cùuⁿ sāvídí váha, chi mee-ni sāvídí sá ñá túú váha cùuⁿ.

44 Te ndi díⁿ núú yutnu xini-ó nā yutnu cùu-xi cuendá sá sāvídí-xi, chi ñá túú xini-ó cùuⁿ ngxixí ìⁿ tñu ñu, te ni ñá túú xini-ó cùuⁿ ndéhé yoho yàha stilé díqui ìⁿ yoho yàha cutexinu.

45 Te nchaa ñáiyu váha iní-xi càháⁿ-yu tñuhu váha, chi ñu-ni tñuhu váha tñahí-áⁿ ñuhú ñu-yu, te nchaa ñáiyu ñá túú váha iní-xi càháⁿ cuehé-yu, chi ñu-ni tñuhu cuehé tñahí-áⁿ ñuhú ñu-yu, chi nchaa sá ñuhú ñu-yu te xiáⁿ càháⁿ-yu.

*Ìⁿ vehe ndècu cimientú-xi ndihi ìⁿ vehe ñá
túú cimientú-xi*

(Mt. 7:24-27)

46 ¿Te ná cuendá càchí-ndó sá yùhú cùu-í Yáá cúú Xitohó-ndó te ñá túú quide-ndo nchaa nacúáa càháⁿ-í-í?

47 Te na càchí tñuhu-í xii-ndo cuendá ñáiyu tñaha ñaha xii-í, chi ñáiyu-áⁿ sácùndedóho-yu nchaa tñuhu càháⁿ-í te tñiⁿ-yu.

48 Te ñáiyu-áⁿ cùu-yu datná ìⁿ tée ní dácáá ìⁿ vehe, chi tée-áⁿ díhna-gá ní xete-dé ndéé ní tñahá-dé yúú caxíⁿ te dàtnùni ní tava-dé cimientú-xi, te óré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, dico ñá túú ní ndàcu-xi cuido-xi, te ducaⁿ chi tée ní dácáá vèhe-áⁿ ní tava-dé cimientú-xi núú yúú caxíⁿ. Duha sātñahá-xi

cùu nchaa ñáiyu sàcúndedóho tnúhu càháⁿ-í te tñí-yu.

⁴⁹ Te ñáiyu sàcúndedóho tnúhu càháⁿ-í te ñá túu tñí-yu, ñáiyu-án cúu-yu dàtná ìⁿ tée ní dácáá ìⁿ vehe, te ñá túu ní tàva-dé cimientú-xi, te òré ní cuuⁿ dáu, te ní ndee ndute ñuhu, te ní ndacáⁿ-xi ndéé núú cáá vèhe-án, te íí-ní ní xido-xi vehe-ánⁿ cuendá sá ñá túu ní quène cimientú-xi. Duha sàtnahá-xi cùu nchaa ñáiyu sàcúndedóho tnúhu-í te ñá túu cuini-yu tñí-yu —càchí-gá xáhaⁿ-gá xii-yu.

7

Jèsús quidé tãtna-gá ìⁿ tée xinu cuechi núú ìⁿ tée cùu capitáⁿ

(Mt. 8:5-13)

¹ Te sáta ní yáha ní cáháⁿ Jèsús ndihi ñáiyu, te cuáháⁿ-gá ñuú Capèrnaúm.

² Te yacáⁿ ndécú ìⁿ tée cùu capitáⁿ, te cùhú ìⁿ tée xinu cuechi núú-dé tée ío-gá cúú iní-dé, te sa ndècu-ná-dé sá cúú-dé.

³ Te òré ní níhí tée cùu capitáⁿ-án tnúhu cuendá Jèsús, te ní tendaha-dé ìⁿ úú cue tée cùu sacuéhé núú ñáiyu isràél cuáháⁿ-güedé cáháⁿ ndàhú-güedé núú-gá núu vá cündèe iní-gá quíhíⁿ-gá cada tátna-gá tée xinu cuechi núú-dé-án.

⁴ Te ní quexío-güedé núú ndécú Jèsús, te ní ngüita-güedé cáháⁿ ndàhú víhí-güedé núú-gá, te xáhaⁿ-güedé:

—Tée cùu capitáⁿ ní cachí-dé véxi-ndí núu vá cündèe iní-n quíhíⁿ-n cada tátna-n ìⁿ tée xinu cuechi núú-dé chí cùhú-dé, te táu ndisa-n cada-n nacuéa cáháⁿ capitáⁿ-án,

⁵ chí tée-án ío cùu iní ñáhá-dé xii nchaa nchúhú ñáiyu isràél te diu-dé ní táuchíúⁿ-dè ní sáá veñúhu-ndí —càchí-güedé xáhaⁿ-güedé xii-gá.

⁶ Te sáta dúcáⁿ te Jèsús ní xica-gá cuáháⁿ-gá ndihi-güedé, te òré tá cüyatni-gá vehe núú ndécú tée cùhú-án cuáháⁿ, te tée cùu capitáⁿ-án ní xáhaⁿ-dè xii ìⁿ úú cue tée cáháⁿ ndihi-dé:

—Quíhíⁿ-ndó cùñaha-ndo xii Yaá cúú Mèstrú sá càchí-í sá ñá túu ná caní iní-gá, chí ñá túu táu-í sá quíhu-gá ndéé xití vehe-í,

⁷ chí ní sá cümü ndúcú mèe-í-gá ñá túu ní cüyí-í. Núu xíáⁿ cùñaha-ndo xii-gá sá ná cáháⁿ-ní-gá sá ndúha tée xinu cuechi núú-í-a te ndúha-dé.

⁸ Chí yúhú ndécú cuè tée tàxi tñuní ñáhá xii-í, te ducaⁿ yúhú tucu ndècu cue sandadú táxi tñuní-í. Te òré xáhaⁿ-í xii ìⁿ-dè quíhíⁿ-dè ìⁿ chüⁿ te cuáháⁿ-dè, te òré xáhaⁿ-í xii ingá-dé quixí-dé te véxi-dé, te òré xáhaⁿ-í xii tée xinu cuechi núú-í cada-dé ìⁿ chüⁿ te quide-dé. Duha càchí-í cùñaha-ndo xii-gá —càchí-dé xáhaⁿ-dè xii cue tée cáháⁿ ndihi-dé-án.

⁹ Te sáta dúcáⁿ ní xáhaⁿ-güedé xii Jèsús, te ní cuñúhu-gá nchaa tnúhu ní cáháⁿ tée cùu capitáⁿ-án, te ní nchócótó-gá núú nchaa ñáiyu nchicúⁿ ñáhá xii-gá cuáháⁿ, te ní xáhaⁿ-gá:

—Na càchí tnúhu ndáá-í xii-ndo sá vátá quini-gá-í ní ìⁿ ñáiyu isràél, ñáiyu ío váha sandáá iní-xi Yá Ndióxi dàtná sandáá iní ñáhá tée-án xii-gá —càchí-gá xáhaⁿ-gá xii-yu.

¹⁰ Te òré ní ndexio cue tée nèhe tnúhu-án ní sáháⁿ núú Jèsús, te sa ní ndúha tée cùhú-án.

Jèsús dándòto-gá dèhe ìⁿ ñaha quèé

¹¹ Te sáta dúcáⁿ ní cuu te ní xica Jèsús cuáháⁿ-gá ìⁿ ñuú nání Nàin, ndihi cue tée xica cuu ndihi-gá, ndihi vài ñáiyu.

¹² Te òré ní sáá-gá yuhu ñuú-án, te ní xiní-gá nchídó-güedé ìⁿ ndíyi cuáháⁿ chindúxi ñaha-güedé, te ndíyi-án cúú dèhe ìⁿ ñaha quèé, te ìⁿ dii ducaⁿ-ní dèhe-aⁿ ndècu ní cuu te ní xihí-dé. Te ío cuéhé ñáiyu cuáháⁿ chindúxi ñaha.

¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gá, te ní xáhaⁿ-gá:

—Vá ndàhyú-n —càchí-gá xáhaⁿ-gá xii-aⁿ.

¹⁴ Te ní dáyatni-gá cajú ñúhú ndíyi-án te ní dácáá-gá ndaha-gá te ní tendaha-gá cajú-án, te ní ngüñí cue tée nchido ñaha-án. Te ní xáhaⁿ-gá xii ndíyi-án:

—Tée cuechi, yúhú càchí-í sá ndácóo-n —càchí-gá xáhaⁿ-gá xii ndíyi-án.

¹⁵ Te tée ní xihí-án ní nucunucóo-dé te ní ngüita-dé cáháⁿ-dè, te Jèsús ní nacuéaha cuendá ñáhá-gá xii-dè ndaha náná-dè.

¹⁶ Te sá dúcáⁿ ní quide Jèsús ní xiní-yu te ío ní yúhú-yu, te ní xítnàhá-yu:

—Ío càhnu cuu Yá Ndióxi chí ìⁿ tée cáháⁿ tnúhu-gá ní quexio núú ndécú-ó —càchí-yu xítnàhá-yu.

Te ní xítnàha tucú-yu:

—Yá Ndióxi véxi-gá chindee ñaha-gá xii nchaa nchoo ñáiyu cùu cuendá-gá —càchí-yu xítnàhá-yu.

¹⁷ Te nchaa ñuú distritú Jùdeá, ndihi dava-gá ñuú ní níhí-yu tnúhu nàcuáa ní quide Jèsús.

Cue tée ní tendaha té Juáá cuáháⁿ núú ndécú Jèsús

(Mt. 11:2-19)

¹⁸ Te cue tée xica cuu ndihi té Juáá ní xáhaⁿ-güedé xii-dé nchaa sá ní quide-gá, núu ní cana-dé úú tnàhá-güedé

¹⁹ cuendá cùñaha-dè quíhíⁿ-güedé nducu tnúhu-güedé núú Jèsús, te núu sá díú-gá cúú-gá Cristú Yaá ní tendaha Yá Ndióxi véxi ñuyú-a àdi sá cündètu nahi-ni-güedé mei Yáá-án.

²⁰ Te òré ní quexio cue tée ní tendaha té Juáá núú ndécú Jèsús, te xáhaⁿ-güedé xii-gá:

—Té Juàá tée dàcuandute ñaha xii ñáiyu ní tendaha ñaha-dé xii-ndí véxi-ndí cácaⁿ tnúhu-ndí núú-n, núú sá díú-n cùu Cristú Yáá quixi ñuyúú-a, àdi sá cùndètu-ndí mei Cristú cächí-dé —cächí-güedé xáhaⁿ-güedé xii-gá.

²¹ Te mei òré ní quexio-güedé-áⁿ ní quide tátna Jèsús vai ñáiyu cùhú, te davá-yu càhú vihi tnàhá-yu, te ndi dííⁿ ndí dííⁿ núú cuèhé tnàhá-yu ìíⁿ ìíⁿ-yu, te cue ñáiyu yìhi ñaha espíritú cùndìhi yucu ñávàha ní queñuhu-gá espíritú-áⁿ yiqui cùñú-yu, te ío vai ñáiyu cuàá ní nacaáⁿ-gá núú-yu.

²² Te Jèsús ní xáhaⁿ-gá xii-güedé:

—Chí cuánùhú te cani-ndo cuèndú núú té Juàá nchaa sá ní xiní-ndó quide-í, ndihi nchaa nàcuáa ndùu tnúhu ní cáháⁿ-í ní xíndedóho-ndo. Te cùñaha-ndo xii-dé sá quide tátna-í núú cuè ñáiyu cuàá, te quide tátna-í cue ñáiyu yacua, ndihi cue ñáiyu tnàhá cuèhé sá dátèhyu nihnu-xi yiqui cùñú-yu, ndihi cue ñáiyu doho, nchaa ñáiyu-áⁿ quide tátna-í te ndúha-yu, te ndéé cue ñáiyu sa ní xíhi dándòto-í cùñaha-ndo xii-dé, te cùñaha tnúu ndó xii-dé sá ndècuu-í dánèhé-í nchaa ñáiyu ndàhú tnúhu sá sánú ichi ñaha xii-yu nàcuáa naníhi tàhú-yu.

²³ Te cùñaha tùcu-ndo xii-dé sá ío váha táhú nchaa ñáiyu ñá túú quide sáá iní nchaa tnúhu càháⁿ-í, duha cùñaha-ndo xii-dé —cächí-gá xáhaⁿ-gá xii-güedé.

²⁴ Te sátá ní yáha-güedé cuánuhú-güedé, te ní ngúíta Jèsús ní cáháⁿ-gá núú ñáiyu cuèndá té Juàá, te xáhaⁿ-gá xii-yu:

—Nchòhó ní sándèhé-ndó ìíⁿ tée ndècu xití yucu, te tée-áⁿ ñá túú sàni ìíⁿ sàni úú iní-dé, chí ñá túú quide-dé dàtná quide nchaa ité nàhnú cuàháⁿ-xi duha cuàháⁿ-xi dàcáⁿ òré quéné tàchí.

²⁵ Te ní ñá túú ní sándèhé-ndó ìíⁿ tée nihnu dóó váha dóó vii càa. Te nchòhó xini-ndó sá ñáiyu sàcúlnu dóó váha dóó vii càa ñá túú ná cùmāni xii-yu, te nchaa ñáiyu-áⁿ ndécü-yu vehe cue tée cùnuu yindaha ñaha xii ñáiyu.

²⁶ Dico nchòhó chí ní sándèhé-ndó ìíⁿ tée cáháⁿ tnúhu Yá Ndiòxí. Te ndáá sá díú tée cáháⁿ tnúhu-gá cuú-dé dico cùnuu-gá-dé dàcúúxí dàva-gá cue tée cáháⁿ tnúhu-gá.

²⁷ Te diu cuèndá té Juàá-áⁿ cáháⁿ-xi núú tùtú Yá Ndiòxí nàcuáa ní xáhaⁿ-gá xii Cristú, te duha ní xáhaⁿ-gá:

Tendaha-í ìíⁿ tée cáháⁿ tnúhu-í codonùu-dé núú-n cuèndá dátúha-dé ñáiyu cuèndá quíndáá iní-yu tnúhu-n.

Duha ní xáhaⁿ-gá, te ducaⁿ ní ngódó tnùní núú tùtú-gá.

²⁸ Te na cächí tnúhu-í xii-ndo sá ní ìíⁿ cue tée ñuyúú-a ñá túú cùnuu-güedé dàtná cùnuu té Juàá tée dàcuandute ñaha xii ñáiyu. Te nchaa ñáiyu sa ta ndihu ndaha ñaha Yá Ndiòxí

vitna cuàháⁿ cùnuu-gá-ni tucú-yu dàcúúxí té Juàá cuèi cùu-yu ñáiyu ñá túú cùnuu dàcúúxí dàva-gá ñáiyu yindaha-gá —cächí Jèsús xáhaⁿ-gá xii-yu.

²⁹ Te sá dúcáⁿ ní cáháⁿ Jèsús, núu nchaa ñáiyu ní dàcuandute té Juàá ní cächí-yu sá ío váha quide Yá Ndiòxí, te diu-ni ducaⁿ ní cáháⁿ cue tée cuihna iní-xi quide cobrá ñáhá xii ñáiyu cuèndá impuèstú, cue tée ní dàcuandute-dé.

³⁰ Dico cue tée cùu fariséú, ndihi cue tée dàcuaha ñaha xii ñáiyu nchaa tnúhu ní chídó tnùní ndíi Moisés, cue tée ñá túú ní dàcuandute té Juàá ñá túú ní tnàhá iní-güedé cada-güedé nchaa sá váha cùni Yá Ndiòxí.

³¹ Te Xítòhó Jesucristú ní xáhaⁿ-gá xii-yu:

—Na cächí tnúhu-í xii-ndo nàcuáa sátnahá-xi cùu ñáiyu ndècu vitna.

³² Chí ñáiyu-áⁿ cùú-yu dàtná cue landú sácóo núú yáhu dàdiqui-güexi te níhi cáháⁿ-güexi, te xitnàha-güexi: “Ní tiú-ndí yáá ndihi vílu te ñá túú ní cùni-ndó càta-ndo. Te ío yica iní ní xita yuhu-ndí te ñá túú ní ndáhyu-ndó”, cächí-güexi xitnàha-güexi. Te ducaⁿ sátnahá-xi cùu ñáiyu ndècu vitna.

³³ Te té Juàá tée ní xóo dacuandute ñaha xii ñáiyu ío ndàhú ní xóo caxi-dé, te ní ñá túú ní xóo coho-dé ndudí ndéhé yoho yàha stilé sá sá ní nduu-xi ndidí, te ní cächí-ndó sá ní xíndecu ndihi-dé espíritú cùndìhi yucu ñávàha.

³⁴ Te sátá ní quexio yúhú Tée cùu ñani tnàhá-ndó nchaa-ndo, te xèxi-í xihí-í ndècù-í te cächí-ndó sá cùu-í tée xèxi vihi te xihí vihi-í. Te cächí tucu-ndo sá cùu-í tée xica cuu ndihi cue tée cuihna iní-xi quide cobrá ñáhá xii ñáiyu cuèndá impuèstú, ndihi nchaa dàva-gá cue tée ndècu ichi cuehé ichi duha, duha cächí-ndó.

³⁵ Te ñáiyu ní tnàhá tnúhu ndihi Yá Ndiòxí, ñáiyu-áⁿ quide-áⁿ cùú-yu nàcuáa cutnùní sá mée-gá ío ndècu ndihi-gá sá xini tnùní-gá —cächí-gá xáhaⁿ-gá xii-yu.

Jèsús ndécü-gá vehe ìíⁿ tée cùu fariséú tée nàni Ximú

³⁶ Te ìíⁿ tée cùu fariséú ní cáháⁿ-dé Jèsús vehe-dé caxi-gá, te òré ní quexio-gá te cuànguihu-gá mèsá.

³⁷ Te xiáⁿ núcòo-gá ní sáá ìíⁿ ñadihí te diu-ni ñaha ñuú-áⁿ cùú-áⁿ, te ndècu-aⁿ ichi díí iní, te sá ní níhí-aⁿ tnúhu sá cuàngaxi Jèsús vehe tée cùu fariséú-áⁿ, núu nèhe-aⁿ ìíⁿ yóo chitu àcítí sàháⁿ tnámí.

³⁸ Te ní ngóo-aⁿ ìíⁿ xio díñi Jèsús, te ní ngúíta-aⁿ ndáhyú-aⁿ te ndihi ndute núu-aⁿ ní naquete-aⁿ sàhá-gá. Te dàtnùní ní nadayichí-aⁿ ndihi idi díquí-aⁿ, te ní teyuhu-aⁿ sàhá-gá, te ní chihí ñaha-aⁿ àcítí sàháⁿ tnámí-áⁿ.

39 Te sa dúcán ní quide-aⁿ ní xiní tée cùu fariséu tée ní cáháⁿ ñáhá xii-gá-áⁿ núu ní sani iní-dé: “Te núu dícó ndisa tée càháⁿ tnúhu Yá Ndióxi cúu tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñayiu cùu-aⁿ, te dícó ñⁿ ñaha ndècu ichi díí iní cúu-áⁿ”, duha ní sani iní-dé.

40 Te Jèsús ní xáhaⁿ-gá xii-dé:
—Xímú, ndècu ñⁿ tnúhu cachí tnúhu-í xii-n —càchí-gá xáhaⁿ-gá xii-dé.

Te tée cùu fariséu-áⁿ xáhaⁿ-dè xii-gá:
—Cachí tnúhu, Mèstrú —càchí-dé xáhaⁿ-dè xii-gá.

41 Te Jèsús ní xáhaⁿ-gá:
—Ní xindecu ñⁿ tée ní xóo dasaⁿ núu díhúⁿ, te ní xítaú úú tnàhá-güedé núu-dé. Te ñⁿ-dé ní sáha-dé úhúⁿ cièndú díhúⁿ denàriú, te ingá-dé ní sáha-dé údico úxi.

42 Te ñá ní ñíhí-güedé nacháhu-güedé núu-dé, te tée ní sánù ñaha-áⁿ ní quide càhnu iní-dé ndi ndúú-güedé. Te vitna cachí-ò tucu te núu ndèda càa-güedé cúu iní ñáhá-gá-güedé xii-dé —càchí-gá xáhaⁿ-gá xii-dé.

43 Te ní xáhaⁿ tè Xímú-áⁿ:
—Sànuu sá tée tàú vèi-gá díhúⁿ ño-gá cúu iní-dé tée ní sánù ñaha díhúⁿ-áⁿ —càchí-dé xáhaⁿ-dè xii-gá.

Te ní xáhaⁿ Jèsús:
—Sá ndáá càháⁿ-n —càchí-gá xáhaⁿ-gá xii-dé.

44-46 Te Jèsús ní ndacoto-gá núu ñadìhí-áⁿ, te ní xáhaⁿ-gá xii té Xímú-áⁿ:

—¿Ndèhe-n nacuaa quide ñadìhí-a ñá? Chi cuànguihu-í vehe-n, dícó ñá túú ní tàxi-n ndute ndoo sàhá-í, te ní ñá túú ní tàyuhu ñaha-n, te ní ñá túú ní chihè-n acití díquí-í, dícó ñadìhí-a ní naquete-aⁿ ndihì ndute núu-aⁿ sàhá-í, te ní nadayìchí-aⁿ ndihì idi díquí-aⁿ, te nuu núu teyuhu-aⁿ sàhá-í, te ní chihè-aⁿ acití sàháⁿ tnámí sàhá-í.

47 Te na càchí tnúhu-í xii-n sá ño cùu iní ñáhá-áⁿ xii-í, te núu xiáⁿ cùtnùní iní-ó sá cuèí ío vèi sá cuèhé sá dúhá ní quide-aⁿ, dícó Yá Ndióxi sá ní quide càhnu iní ñáhá-gá xii-aⁿ. Chi Yá Ndióxi quidé càhnu iní-gá ñayiu cuèí vèi àdi sacú cuèchi-yu, te núu sacú cuèchi-yu te sacú cúu iní ñáhá-yu xii-í —càchí-gá xáhaⁿ-gá xii-dé.

48 Te ní xáhaⁿ-gá xii ñadìhí-áⁿ:
—Sa ní quide càhnu iní-í nchaa cuèchi-n —càchí-gá xáhaⁿ-gá xii-aⁿ.

49 Te cue tée xìnucóo ndihì-gá xitnàha-güedé:

—¿Ná tée cùu tée-a núu nándi sá quidé-dé, te ndé nchaa yíca cuèchi ñayiu quide càhnu iní-dé-í? —càchí-güedé xitnàha-güedé.

50 Te Jèsús ní xáhaⁿ tucu-gá xii ñadìhí-áⁿ:
—Sa ní cácu nihnu-n núu úhú núu ndàhú vitna chi ní sándáá iní ñáhá-n xii-í, te

vitna cuanùhú te ñá túú-gá ná caní iní-n —càchí-gá xáhaⁿ-gá xii-aⁿ.

8

Ñayiu ñíhí ní chindee ñaha xii Jèsús

1 Te sáta dúcáⁿ ní cuu te Jèsús ní xica-gá cuáháⁿ-gá titní víhí ñùú nàhnú, ndihì ñùú líhli dānehé-gá ñayiu nācuāa ndíhu ndaha ñaha Yá Ndióxi xii-yu. Te cuáháⁿ ndihì-gá ndi ùxúú tnàhá cue tée xica cuu ndihì-gá,

2 ndihì ñⁿ úú ñayiu ñíhí ní quide tátna-gá ní xíhí ñaha espíritú cùndihì yucu ñávāha, ndihì ñayiu tnàhá dāva-gá cuèhé úhú ní cùu. Te xíáⁿ tnàhá tucu ñⁿ ñaha nāni Mariá Magdalēná, te ñaha-áⁿ ní xíhí ñaha úsā espíritú cùndihì yucu ñávāha xii-aⁿ ní cùu, te ní quee ñaha-xi.

3 Te tnàhá ñⁿ ñaha nāni Juáná ñadìhí ñⁿ tée nāni Chúza tée ní cunuu ní xinu cuechi vèhe té Hèrodés, ndihì ingá ñaha nāni Susaná nchaa ñayiu-áⁿ ní chindee ñáhá-yu xii-gá ndihì nchaa sá ndécú ndihì-yu, te ñi-ni ducaⁿ ní quide vèi-gá tucu ñayiu nchicúⁿ ñáhá xii-gá cuáháⁿ.

Nācuāa quide tée cuāngacáⁿ triú (Mt. 13:1-9; Mr. 4:1-9)

4 Te ío vèi ñayiu ndaa ñùú ní tacá-yu núu ndécú Jèsús, te ní ngúita-gá ní caní-gá ñⁿ cuèndú núu-yu cuèndá tecú tnùnì-yu tnúhu-gá, te xáhaⁿ-gá xii-yu:

5 —Ñⁿ tée cuāngacáⁿ-dé triú. Te òré ní ngúita-dé dāngoyo-dé triú-áⁿ te dāva ní quee ndāva ní ngāva ndéé ichi, te ní xénihu ñayiu, te ní xiní tūlāá te ní nadatācā-güedí.

6 Te dāva ní ngāva ñuhu yadi núu yíhí víhí yúú, te ní xinu-xi dícó núu sàcú-ni nduu te ní yíhí-xi, chi ñá túú cōhyo yíhí.

7 Te dāva ní ngāva núu yúcu ndéquíⁿ tnu iñu, te ñⁿnuu-ni ní xinu-xi ndihì tnu iñu-áⁿ, te tnu iñu-áⁿ ní dánāá-xi nchāa triú sá ní xinu-áⁿ.

8 Dico dāva triú-áⁿ ní ngāva-xi núu ndécú ñuhu cocoⁿ, te xiáⁿ ní xinu-xi te ní sahnu-xi, te ío váha ní cuu, chi núu ñⁿ-ní triú te ní ngúihì yoco-xi ñⁿ cièndú triú-xi —càchí-gá xáhaⁿ-gá xii-yu.

Te ñíhí ní cáháⁿ-gá ní xáhaⁿ tucu-gá xii-yu:
—Nchaa nchóhó ñayiu ní xindedóho tnúhu ní cáhá-í-a, te ío váha chí cuāha cuèndá —càchí-gá xáhaⁿ-gá xii-yu.

Nācuāa quèe-xi tnúhu ní cáháⁿ Jèsús (Mt. 13:10-17; Mr. 4:10-12)

9 Te cue tée xica cuu ndihì Jèsús ní xicáⁿ tnúhú-güedé núu-gá núu nāsa quèe-xi cuèndú ní caní-gá núu ñayiu.

10 Te ní xáhaⁿ-gá xii-güedé:
—Nchóhó chí sa càchí tnúhu Yá Ndióxi xii-ndo ñⁿ sá vātá quini-gá-ndó, chí càchí

tnúhu-gá nàcuáa cada-gá ndíhu ndaha-gã ñáiyu, dico dawa-gá ñáiyu cani-í mee-ni cuendú núu-yu, chí cuéi na quini-yu nchaa nàcuáa cuu dico ní vá cútñuní iní-yu ná cuendá ducaⁿ cùu, àdi cuéi na cùndedóho-yu dico ní vá tècú tnùnì-yu —càchì-gá xáhaⁿ-gá xii-güedé.

Jesús càháⁿ-gá nàcuáa quèe-xi tnúhu cuendá téé cuángacáⁿ triú

(Mt. 13:18-23; Mr. 4:13-20)

¹¹ Te xáhaⁿ tucu-gá xii-güedé:

—Duha quèe-xi cuendú ní cani-í núu-ndó, chí triú ní sacáⁿ téé-án cùu-xí dàtná tnúhu Yá Ndióxi.

¹² Te triú sá ní quene ndava ní ngava ndéé ichi-án, xiáⁿ cùu-xí dàtná ñáiyu ní quèe iní-xi tnúhu Yá Ndióxi, dico sácuihná cuháⁿ-xi xòcani-xi tnúhu-gá iní-yu cuendá sá vá quindáá iní-yu, te vá nánihí tãhú-yu.

¹³ Te triú sá ní ngava ñuhu yadi núu yíhi vihi yúu, xiáⁿ cùu-xí dàtná ñáiyu ní xíndedóho tnúhu Yá Ndióxi te díi iní ní tñii-yu tnúhu-gá, dico òré ná dàcaháⁿ ñáhá yucu ñávãha xii-yu nándi cadá-yu, te dàña nihnú-yu tnúhu-gá chí ñá ñihí ndéé-yu canchicúⁿ nihnú-yu nàcuáa càháⁿ tnúhu-gá.

¹⁴ Te triú sá ní ngava núu yúcu ndíquiⁿ tnu iñu-án, xiáⁿ cùu-xí dàtná ñáiyu ní tecú dóho-xi tnúhu Yá Ndióxi, dico cuéé cuéé ní nacuaⁿá-yu tnúhu-gá, chí cuendá mee-ni sá cùu-xí mèe-yu ñuhu iní-yu, ndíhi cuendá sá ò sàni iní-yu cuu cuicá-yu, ndíhi cuendá sá ò cùdii iní-yu nchaa sá ò ñuyiú-a núu xiáⁿ àuⁿ nã cuu ní xíndedóho-yu tnúhu-gá.

¹⁵ Dico triú sá ní ngava núu ndécú ñuhu cocoⁿ, xiáⁿ cùu-xí dàtná ñáiyu váha iní-xi ní xíndedóho tnúhu Yá Ndióxi chí ñá túú dàña nihnú-yu, te ñi yùhu ñi iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti

(Mr. 4:21-25)

¹⁶ Te ñá túú ní ñi ñáiyu tẽñuhú-yu ñi ite te dàdãhu-yu, àdi chivãha-yu ñi caha camã, chí tàxi ndecú-yu núu ñinu cuendá cutnùnì núu nchã ñáiyu ndécú vehe.

¹⁷ Te ní ñi tnúhu sá ñã tècú tnùnì ñáiyu vitna vá càchì-ó sã vá tècú tnùnì-yu chí dacuèi sá tècú tnùnì-yu, te ní ñi tnúhu sá càchì-ó cùu yuhu vitna vá cùu yùhu chí dacuítí sã quèé tũu-xi núu ñáiyu.

¹⁸ Te chí cùndedóho váha tnúhu na càháⁿ-í-a. Nchaa ñáiyu sãndáá iní ñáhá xii Yá Ndióxi ío-gá cuita quindáá-gá iní ñáhã-yu xii-gá quíhíⁿ, te nchaa ñáiyu ñã túú sãndáá iní ñáhã xii-gá uuⁿ-gá cuita cuu sãá-gá iní-yu núu-gá quíhíⁿ —càchì-gá xáhaⁿ-gá xii-güedé.

Cue ñani Jesús ndíhi nãhá-gá

(Mt. 12:46-50; Mr. 3:31-35)

¹⁹ Te ní quexio nánã Jesús ndíhi cue ñani-gá vehe núu ndécú-gã, te ñã ndácú-yu càháⁿ ndíhi ñáhã-yu xii-gá chí ò cuéhé ñáiyu ndécú núu ndécú-gã.

²⁰ Te ñi ñáiyu xíndecu-án ní dáyãha-yu tnúhu núu-gá, te xáhãⁿ-yu:

—Ní quexio nánã-n ndíhi cue ñani-n xínutñii-yu quehé, te cuini-yu càháⁿ ndíhi ñáhã-yu xii-n —càchì-yu xáhãⁿ-yu xii-gã.

²¹ Te ní xáhaⁿ-gã:

—Nchaa ñáiyu sácùndedóho tnúhu Yá Ndióxi te quidé-yu nchaa nàcuáa càháⁿ tnúhu-gá, ñáiyu-án cùu-yu dàtná nãná-í ndíhi dàtná cue ñani-í —càchì-gá xáhaⁿ-gá xii ñáiyu ní dáyãha tnúhu núu-gã-án.

Jesús ngáni-gã táchì ndíhi ndute làgúnã

(Mt. 8:23-27; Mr. 4:35-41)

²² Te ñi nduu ní quèé Jesús bàrcú ndíhi cue téé xica cuu ndíhi-gá, te ní xáhaⁿ-gã:

—Chí ná quíhíⁿ-ó ndãa ingã xio yuhu làgúnã —càchì-gá xáhaⁿ-gá xii-güedé.

Te cuháⁿ-güedé ndíhi-gã.

²³ Te ñini ñuhu bàrcú ichi cuháⁿ-xi núu ndute ní xidí Jesús. Te ní ngúita-xi ñihí vihi quene táchì te ta nãdachitú-xi ndute xití bàrcú-án cuáhãⁿ, te sa cuini-nã-xi quèe naa bàrcú-án xití ndute ní cùu.

²⁴ Te ní sáhãⁿ-güedé núu cáá Jesús xidí-gã, te ní xáhaⁿ-güedé xii-gã:

—¡Mèstru, ndiquíú iní chí tà quèe naa-ò cuáhãⁿ! —càchì-güedé xáhaⁿ-güedé xii-gã.

Te Jesús ní ndiquíú iní-gá te ní ndacóo-gã te ní tenãá-gã táchì-án ndíhi ndute làgúnã-án, te ní ngúñi-ni táchì-án te ní nucúndecu nahi-nã ndute làgúnã-án.

²⁵ Te ní xáhaⁿ-gã xii-güedé:

—¿Nãa ñã túú sãndáá iní ñáhã ndisa-ndo xii-í ã? —càchì-gá xáhaⁿ-gã xii-güedé.

Te ní cuñúhu-güedé sá dúcãⁿ ní quide-gã ní xiní-güedé, te ní yùhú-güedé, te ní xitnãha-güedé:

—¿Te ná téé cùu téé-a núu ní càháⁿ-ní-dé te ní ngúñi táchì te ní nucúndecu nahi-ni ndute làgúnã-a-í? —càchì-güedé xitnãha-güedé.

Téé yíhi ñaha cue espíritú cùndíhi yucu ñávãha

(Mt. 8:28-34; Mr. 5:1-20)

²⁶ Te ní sãá-gã ndíhi-güedé yucu cue téé ñuu Gàdarã, te yíhi ndãá-ni ndãa ingã xio làgúnã-án cáá distritú Galileá.

²⁷ Te òré ní quene Jesús xití bàrcú te ní dáyãtni ñaha ñi téé ñuu-án xii-gã, te yíhi ñaha titni espíritú cùndíhi yucu ñávãha xii-dé. Te ní cunaha ñã túú-gã sácuihnu-dé dóo-dé, te ní ñã túú-gã sácúndecu-dé vehe-dé, chí da nchaa núu yínduxi ndíyi quide vehe-dé.

28 Te òré ní xíní-dé Jèsús te ní ngúíńí xítí-dé nùú-gá, te cue espíritú yíhí ñàha xii-dé-án nǐ quide-xi nǐhí ní cáháⁿ-dé, te xáhaⁿ-dè xii-gá:

—¿Ná cuendá véxi-ò Jèsús Déhe Dútú Ndiòxi sàdí-n ìchi-í? Te cáháⁿ ndàhú-í nùú-n sá và dándòho ñaha-n xii-í —càchí-dé xáhaⁿ-dè xii-gá.

29 Te ducaⁿ nǐ cáháⁿ-dé cuendá sá Jèsús ní xáhaⁿ-gǎ xii nchaa espíritú cùndíhí yucu ñávàha yíhí ñaha sá ná quèe ñaha-xi xii-dé. Te nchaa xǎⁿ ní xóo dacàháⁿ-xi iní-dé nándi sá nǐ xóo cada-dé nùu ní xóo dacùtu ñaha-güedé cadèná xii-dé cuendá sá ñà túú-gǎ ná cada-dé, te ní xóo cundeé ñáhá-güedé, dico cuèi ducaⁿ dico ní xóo dandáva-ni-dé cadèná, te cue espíritú cùndíhí yucu ñávàha-án nǐ xóo dacùnu ñaha-xi xii-dé ní xóo quíhíⁿ-dé xítí yucu.

30 Te Jèsús ní xícáⁿ tnúhú-gǎ nùú-dé, te xáhaⁿ-gǎ:

—¿Nása nàni-n-í? —càchí-gǎ xáhaⁿ-gǎ.

Te ní xáhaⁿ-dè:

—Vài Sandadú nàni-í —càchí-dé xáhaⁿ-dè xii-gǎ.

Te ducaⁿ nǐ xáhaⁿ-dè xii-gǎ cuendá sá ío cuéhé espíritú cùndíhí yucu ñávàha yíhí ñaha xii-dé.

31 Te nchaa espíritú-án nǐ cáháⁿ ndàhú-xi nùú Jèsús sá và téndàha ñaha-gǎ xii-xi quíhíⁿ-xi nùú ùhú nùú ndàhú.

32 Te ñu-ni yatni yucu nùú ndécú Jèsús-án yíhí vài cuchí xixexi-güedi, te nchaa espíritú-án nǐ cáháⁿ ndàhú-xi nùú-gǎ sá ná dàña-gǎ quíhu-xi yiqui cùnú nchaa cùchí-án, te Jèsús ní xáhaⁿ-gǎ sá cúú quíhu-xi yiqui cùnú-güedi.

33 Te ní quee ñaha nchàa espíritú-án xii téé-án, te ní quíhu-xi nchaa cùchí-án, te cùchí-án nǐ xinu-güedi duha ní quèe-güedi ndàa nùú dèhvá yuhu làgúná-án, te ní ngau-nihnu-güedi xítí ndute te ní ndíhí-güedi ní cáhá.

34 Te òré ní xíní cue téé xito cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní caní-güedé cuendú nùú cuè ñáyíu ndècu xítí ñuú, ndíhí nùú cuè ñáyíu ndècu xítí yucu.

35 Te nchaa ñáyíu ní níhí tnúhu ní queé-yu cuáháⁿ ndéhé-yu nàcuáa ní cuu. Te òré ní quexió-yu nùú ndécú Jèsús, te ní xíní-yu téé ní xíhí ñaha cuè espíritú cùndíhí yucu ñávàha-án núcòo-dé nùú sáhá Jèsús, te ñhnu-ná-dé dóó-dé, te núcòo-dé dátá ñáyíu váha, te ní yùhú-yu òré ní xíní ñáhá-yu xii-dé.

36 Te nchaa ñáyíu ní xíní nàcuáa ní cuu ní ndúha téé yíhí ñaha cue espíritú cùndíhí yucu ñávàha-án ní cùu ní caní-yu cuendú nùú nchàa ñáyíu ní quexio-án nàcuáa ní cuu

ní ndúha téé-án ndíhí nàcuáa ní cuu cuendá nchaa cùchí-án.

37 Te sá dúcáⁿ nǐ níhí-yu tnúhu nàcuáa ní cuu, nùu nchaa ñáyíu ñuú Gàdará ío ní yùhú-yu te ní ngúíta-yu cáháⁿ ndàhú-yu nùú Jèsús sá ná nùhú-gǎ nùu ndéé ìchi véxi-gǎ. Te sá dúcáⁿ nǐ cáháⁿ-yu nùu cuáháⁿ-gǎ nùú ndécú bàrcú. Te òré ndéé-gǎ bàrcú-án nùhú-gǎ

38 ní ngúíta téé ní xíhí ñaha cuè espíritú cùndíhí yucu ñávàha cáháⁿ ndàhú-dé nùú-gǎ nùu và cùndèe iní-gǎ quíhíⁿ ndíhí ñaha-gǎ xii-dé, dico Jèsús ní quide ndee ìní ñáhá-ni-gǎ xii-dé, te ní xáhaⁿ-gǎ:

39 —Cuanùhu vehe-n, te cani-n cuendú nùú nchàa ñáyíu sá ío càhnu cuu nchaa sá váha ní quide ñaha Yǎ Ndiòxí xii-n —càchí-gǎ xáhaⁿ-gǎ xii-dé.

Te téé-án ní xica-dé cuánuhú-dé te ní ngúíta-dé ní cani-dé cuendú nùú nchàa ñáyíu xíndecu níhí ñuú sá ío càhnu cuu nchaa sá váha ní quide ñaha Jèsús xii-dé.

Cuendá ðehe yoco tǎ Jàirú, ndíhí cuendá ñⁿ ñàdìhí ní tnándeé dóó Jèsús

(Mt. 9:18-26; Mr. 5:21-43)

40 Te òré ní ndexio Jèsús ndàa ingá xio yuhu làgúná, te ñáyíu xíndecu xǎⁿ sa ndètu cahnu ñaha-ná-yu, te ío váha ní cáháⁿ ndíhí ñáhá-yu xii-gǎ òré ní nasáá-gǎ.

41 Te ñⁿ téé tàxi tnuní veñúhu ní quexio-dé nùú ndécú Jèsús, te téé-án nání-dé Jàirú, te ní ngúíńí xítí-dé nùú-gǎ cáháⁿ ndàhú-dé, te xáhaⁿ-dè xii-gǎ:

—Véxi-í cáháⁿ ndàhú-í nùú-n nùu và cùndèe iní-n quíhíⁿ-ó vehe-í cada tátá-n ðehe yoco-í —càchí-dé xáhaⁿ-dè xii-gǎ.

42 Te ducaⁿ nǐ xáhaⁿ-dè chí ndècu ñⁿ dii-ni ðehe yoco-dé, te ndècu-xi dátá ùxúú cuía-xi, te cahú víhí tnàhá-xi cùhú-xi te cùlní-xi cuú-xi. Te Jèsús ní xica-gǎ cuáháⁿ-gǎ ndíhí téé-án, te ío vài ñáyíu nchícúⁿ ñáhá xii-gǎ cuáháⁿ, te dàdehnde ñaha-ná-yu xii-gǎ ní cùu.

43 Te tnúu nchaa ñáyíu-án ñútnàhá ñⁿ ñaha cùhú, te ñaha-án sà ní cuu ùxúú cuía sá cùhú-aⁿ ngóyo ñaha níhí xii-aⁿ, te ío cuéhé dǐhúⁿ nǐ cuu dàndòñuhu-aⁿ chí ní nadico-aⁿ nchàa sá ndécú ndíhí-aⁿ cuendá ní níhí-aⁿ dǐhúⁿ nǐ queheⁿ nchaa ñáyíu ní quide tátá ñaha xii-aⁿ, dico ní ñⁿ-yu ñà túú ní ndàcú-yu ndúha-aⁿ.

44 Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dóó-gǎ te òré-ni-án nǐ ndúha-aⁿ.

45 Te Jèsús ní xícáⁿ tnúhú-gǎ nùú-yu, te xáhaⁿ-gǎ:

—¿Ndédacàa-ndo ní tnándeé ñáhá xii-í? —càchí-gǎ xáhaⁿ-gǎ xii-yu.

9

Te nchaá-yu ní xáhãⁿ-yu sá ní ñⁿ-yu ñá túú ní tnándeé ñáhá xii-gá. Te té Pèlú ndihi cue tée cùndìhi-dé ní xáhaⁿ-güedé xii-gá:

—Mèstrú, ndèhe-n sá vái ñáiyu nchicúⁿ ñáhá xii-n, te xio xio dàdehnde ñáhá-yu, te xicáⁿ tnúhú-gã-n yòo ní tnándeé ñáhá xii-n —càchí-güedé xáhaⁿ-güedé xii-gá.

46 Dico Jèsús ní xáhaⁿ-gã xii-yu:

—Dico ñu ñⁿ-ndo ní tnándeé ñáhá xii-í, chi ní cutnùni iní-í sá ñⁿ ñáiyu cùhú ní tnándeé ñáhá xii-í te ní ndúha-yu —càchí-gã xáhaⁿ-gã xii-yu.

47 Te sáta ní xiní ñaha-áⁿ sã ní cutnùni iní Jèsús sá ní tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüññí xítí-áⁿ núú-gã, te ní náhmá-aⁿ núú-gã, ndihi núú ncháa ñáiyu ná cuendá ducaⁿ ní quide-aⁿ ní tnándeé-aⁿ-gã, ndihi cuendá sá òré-ni-áⁿ ní ndúha-aⁿ.

48 Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñáhá-n xii-í núu ní ndúha-n, te cuanùhú vitna te ñá túú-gã ná caní iní-n —càchí-gã xáhaⁿ-gã xii-aⁿ.

49 Te càháⁿ dúcáⁿ-ní Jèsús ní sáá ñⁿ tée xinu cuechi vehe té Jàirú tée tàxi tunni veñúhu, te xáhaⁿ tée xinu cuechi-áⁿ xii-dé:

—Sa ní xihí déhe-n, vá chíchiuⁿ-gã-n Mèstrú —càchí-dé xáhaⁿ-dé.

50 Te sá dúcáⁿ xáhaⁿ tée xinu cuechi-áⁿ xii té Jàirú ní tecú dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —càchí-gã xáhaⁿ-gã xii-dé.

51 Te òré ní sáá-gã vehe té Jàirú te ñá ní dàña-gã quíhu ñáiyu cùtexínu, núu té Pèlú-ni ndihi té Jàcobó-ni, ndihi té Juáá-ni, ndihi tátá ndihi nãná-ni xíchí ní xihí-áⁿ cuanguihu ndihi-gã xítí vehe.

52 Te nchaa ñáiyu sa xindecu vehe-dé-áⁿ xindáhyú-yu sá ndihú iní-yu cuendá sá ní xihí-xi. Te Jèsús ní xáhaⁿ-gã xii-yu:

—Vá ndáhyú-ndó, chi dicó-ni xidí-xi ñá túú ní xihí-xi —càchí-gã xáhaⁿ-gã xii-yu.

53 Te ní sácú ndeé ñáhá-yu xii-gã, chi sá cútú-xi mée-yu chi ní xihí ndisa xíchí-áⁿ.

54 Te Jèsús ní tñi-gã ndaha xíchí ní xihí-áⁿ, te níhi ní cáháⁿ-gã, te xáhaⁿ-gã:

—Xíchí cuéchi, ndacóo —càchí-gã xáhaⁿ-gã.

55 Te xíchí-áⁿ ní ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuañáhá-yu sá cáxi-xi.

56 Te tátá-xi ndihi nãná-xi súuní ní cuñúhu-yu sá dúcáⁿ ní dándótó ñaha Jèsús xii-xi, te ní xáhaⁿ-gã xii-yu sá vá yóo ñⁿ cùñáhá-yu sá dúcáⁿ ní quide-gã.

Jèsús téndàha-gã ndi ùxiúú cue tée xica cuu ndihi-gã quíhíⁿ-güedé cáháⁿ-güedé tnúhu-gã (Mt. 10:5-15; Mr. 6:7-13)

1 Te Jèsús ní cana-gã ndi ùxiúú cue tée xica cuu ndihi-gã, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cùndìhi yucu ñávaha yihi ñaha xii ñáiyu, ndihi cuendá sá cáda tátna-güedé nchaa ñáiyu cùhú.

2 Te ní xáhaⁿ-gã xii-güedé sá quíhíⁿ-güedé danéhé-güedé ñáiyu nácuaa cada Yá Ndióxi ndihu ndaha ñaha-gã xii-yu, te ducaⁿ cada tátna-güedé cue ñáiyu cùhú.

3 Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Ñá túú tnàhí ná canehe-ndo cùu ichi-ndo, ní tàtnu, ní ñunu, ní sá cáxi-ndó, ní dñhú. Te ní vá cãñe-ndo ingá ichi dóó-ndó, chi ñu-ni dóo níhnú-ndó-áⁿ xiãⁿ tnàhí-ni.

4 Te ndèdani càa vehe na saá-ndó, te xiáⁿ cundecu-ndo ndèé ná saá nduu ndèe-ndo.

5 Te núu ñá túú cuini-yu queheⁿ cuendá ñáhá-yu xii-ndo, te ndee-ndo ñúú-áⁿ, te naquidi-ndo ticá chúhmá ní tñi sáhá-ndó cuendá sá ná cùtnuní iní-yu sá ñá túú quide váha-yu —càchí-gã xáhaⁿ-gã xii-güedé.

6 Te sáta dúcáⁿ ní xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuaa-güedé ñáiyu tnúhu Yá Ndióxi, tnúhu sá cáháⁿ nácuaa naníhi tãhú-yu, te ducaⁿ ta quide tátna-güedé nchaa ñáiyu cùhú cuáháⁿ.

Nácuaa ní cuu ní xihí té Juáá tée dàcuandute ñaha xii ñáiyu

(Mt. 14:1-12; Mr. 6:14-29)

7 Te té Hèrodés tée cùu gobiernú ní níhí-dé tnúhu nchaa nácuaa quide Jèsús, te quiyuhú iní-dé te sàni iní-dé yoo cùu-gã. Te ducaⁿ ní sani iní-dé chi dava ñáiyu càchí-yu sá té Juáá tée ní xóo dacuandute ñaha xii ñáiyu ní ndoto cùu-gã.

8 Te davá-yu càchí-yu sá té Èliás cúu-gã, te davá-yu càchí-yu sá ñⁿ tée ní xóo cáháⁿ tnúhu Yá Ndióxi ndéé sanaha yihi ní ndoto cùu-gã, càchí-yu.

9 Dico té Hèrodés ní cachí-dé:

—Yuhú ní táuchíuⁿ-í ní xehndé-güedé díquí té Juáá. ¿Te yoo cùu tée dii cuendú-xi níhí-a sá súuni cuéhé núú sá quidé-dé vái? —duha ní cachí-dé.

Te té Hèrodés ndúcú-dé nácuaa cada-dé cuendá quini-dé Jèsús.

Jèsús dácaxi-gã úhúⁿ mùl cue tée te ñⁿ ñáiyu ñíhi ndihi landú

(Mt. 14:13-21; Mr. 6:30-44; Jn. 6:1-14)

10 Te nchaa cue tée ní táuchíuⁿ Jèsús cuáháⁿ cáháⁿ tnúhu Yá Ndióxi núu ñáiyu

ní ndexiò-güedé núú-gã te ní ngúíta-güedé nácàni tñuhu-güedé nchaa nàcuáa ní quide-güedé. Te dàtnùní ní xica-gá medi-ni-gá ndéca ñàha-gá xii-güedé cuáháⁿ ìⁿ xichi núú ñà túú ñàyiú ndècu, yatni núú cáá ñúú Bètsaidá.

¹¹ Dico òré ní níhí ñàyiú tñuhu sá cuáháⁿ Jèsús, te nchicúⁿ-yu-gá cuáháⁿ, te òré ní quexiò-yu núú-gã, te ní queheⁿ cuèndá ñàhá-gá xii-yu, te ní dánhèhé ñàhá-gá xii-yu nàcuáa ndíhu ndaha ñàha Yá Ndiòxí xii-yu, te ní quide tátna-gá nchaa ñàyiú cùhú.

¹² Te òré sa ní cuua te ní natacá ndi ùxúú cue tée xica cuu ndihí-gá núú-gã, te ní xàhaⁿ-güedé xii-gá:

—Sa ní cuu dandàca-n nchaa ñàyiú-a, chi sa ní cuua, te na quihíⁿ-yu nchaa vehe càa yatni iha, ndihí nchaa xití ñúú cáá yàtni iha cuaáⁿ-yu sá caxí-yu, te diu-ni yacáⁿ nde-tatú-yu, chi núú ndécú-ó iha ñà túú tñàhí ná ió —càchí-güedé xàhaⁿ-güedé xii-gá.

¹³ Te Jèsús ní xàhaⁿ-gá xii-güedé:
—Mee-ndo chí cuàñaha sá ná caxí-yu —càchí-gá xàhaⁿ-gá xii-güedé.

Te ní xàhaⁿ-güedé xii-gá:
—Ñà túú nágá ndécú ndihí-ndí, chí úhúⁿ duha-ná pàá, ndihí úú-nà chácá ndécú ndihí-ndí, te diu-ni núu quihíⁿ-ndí cuuaⁿ-ndí sá caxí-yu —càchí-güedé xàhaⁿ-güedé xii-gá.

¹⁴ Te xínu dàtná úhúⁿ mìl mee-ni cuè tée, te diiⁿ ñàyiú dihí ndihí landú. Te Jèsús ní xàhaⁿ-gá xii cue tée xica cuu ndihí-gá:

—Chí cuñaha na ngóo ndi údico úxí ndi údico úxí-yu ìⁿ ìⁿ xichi —càchí-gá xàhaⁿ-gá xii-güedé.

¹⁵ Te ducaⁿ nĩ quide-güedé, te ní ngóo-yu nchaá-yu.

¹⁶ Te dàtnùní ní queheⁿ-gá ndi úhúⁿ pàá-áⁿ, ndihí ndi ndúú chácá-áⁿ. Te ní ndacoto-gá andiú, te ní ndacáⁿ táhú-gá núú Yá Ndiòxí, te dàtnùní ní táhú cuèchi-gá pàá-áⁿ ndihí chácá-áⁿ, te ní sàha-gá nchaa cue tée xica cuu ndihí-gá ní dácáñhu ñaha-güedé xii-yu.

¹⁷ Te nchaá-yu ní xexí-yu ní ndahá xití-yu. Te sátá ní tñúh cóhò-yu te ní nadatàcá-güedé nchaa sá nĩ quendóo, te ní chítú ùxúú tñàhí tídihi mee-ni sá nĩ quendóo.

Té Pèlù xàhaⁿ-dè xii Jèsús sá diú-gã cúú-gã Crístú

(Mt. 16:13-19; Mr. 8:27-29)

¹⁸ Te ìⁿ nduu ndècu mee Jèsús ndihí cue tée xica cuu ndihí-gá, te càháⁿ ndihí-gá Yá Ndiòxí, te sátá nĩ yàha ní càháⁿ ndihí-gá Yá Ndiòxí, te ní xicáⁿ tñúhú-gá núú-güedé, te xàhaⁿ-gá xii-güedé:

—¿Yoo cùu yùhú càchí ñàyiú-va? —càchí-gá xàhaⁿ-gá xii-güedé.

¹⁹ Te ní xàhaⁿ-güedé xii-gá:
—Davá-yu càchí-yu sá cúú-n ndii Juáá tée ní xóo dacuàndute ñaha xii ñàyiú, te davá-yu

càchí-yu sá cúú-n tẽ Èliás, te davá-yu càchí-yu sá ìⁿ tée ní xóo càháⁿ tñuhu Yá Ndiòxí ndéé sanaha ní ndoto cùu-n, duha càchí-yu —càchí-güedé xàhaⁿ-güedé xii-gá.

²⁰ Te ní xicáⁿ tñúhú tucu-gá núú-güedé, te xàhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —càchí-gá xàhaⁿ-gá xii-güedé.

Te té Pèlù ní xàhaⁿ-dè xii-gá:

—Yòhò cúú-n Crístú Déhe Dútú Ndiòxí —càchí-dé xàhaⁿ-dè xii-gá.

Jèsús càháⁿ-gá sá càhni ñàha-güedé xii-gá (Mt. 16:20-28; Mr. 8:30-9:1)

²¹ Te ní xàhaⁿ-gá xii-güedé sá vã yòo ìⁿ cúñaha-güedé yoo cùu-gá.

²² Te ní xàhaⁿ-gá xii-güedé:

—Yúhú Tée cùu ñani tñàhá-ndó nchàa-ndo ío cuéhé sá ndòhò-í, chí daquèe tíhú ñàhá cuè tée cùu sacuéhé núú ñàyiú isràèl, ndihí cue dútú cùnù, ndihí cue tée dàcuaha ñaha xii ñàyiú nchaa tñuhu ní chidó tñùní ndii Moisés, te sáá nduu te cahni ñaha-güedé xii-í, dico nduu úní sá cúú-í te ndoto-í —càchí-gá xàhaⁿ-gá xii-güedé.

²³ Te dàtnùní ní xàhaⁿ-gá xii nchaa ñàyiú:

—Nchaa ñàyiú cuini chitnahá ñàhá xii-í, te xini ñuhu-xi vã cadá-gá-yu sá sání iní-méé-yu, te ìⁿ nduu ìⁿ nduu cada ndee iní-yu cundecu túha-yu ndohò-yu cuèndá-í, te cuèi na ndòhò-yu dàtná ndoho-í.

²⁴ Te nchaa ñàyiú cuini sá ñà túú tñàhí ná yàha cundecu ñuyítú-a cuíta nihnú-yu. Dico nchaa ñàyiú ñà túú yùhú cuèi nándi sá ná yàha-yu cundecú-yu ñuyítú-a sá cuèndá-í, te ñàyiú-áⁿ naníhí tãhú-yu.

²⁵ Te cuèi nchaandi túhú sá ío ñuyítú-a na nihí ñàyiú cundecu ndihí-yu, dico núu diu nchaa xiáⁿ ná càda cuíta nihnú-yu te ñà túú vèdana nàndíhi-xi sá dúcáⁿ ndècu ndihí-yu nchaa xiáⁿ.

²⁶ Te nchaa ñàyiú na cùcahaⁿ núú-xi càháⁿ vaha cuèndá-í ndihí cuèndá nchaa tñuhu-í, te tñàhá yùhú Tée cùu ñani tñàhá-ndó nchàa-ndo cucahaⁿ núú-í núú-yu òré quixi tucu-í ndihí cue espíritu xínu cuèchi núú Tãtà-í Dútú Ndiòxí, te mee-gá cada cutnùní iní nchaa ñàyiú sá ío càhnu cuu-í.

²⁷ Te na càchí tñuhu ndáá-í xii-ndo sá ío dava nchòhó ñàyiú ndècu iha vitna vã cúú-ni-ndo, chí cundecu-ni-ndo ndéé quini-ndó sáá nduu ndihu ndaha ñàha Yá Ndiòxí xii ñàyiú —càchí-gá xàhaⁿ-gá xii-yu.

Ní nadàma dóo Jèsús ndihí núú-gã (Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ ní càháⁿ Jèsús, te cuásaá-gá ìⁿ yucu càháⁿ ndihí-gá Yá Ndiòxí, te ndéca-gá té Pèlù, ndihí té Jàcobó, ndihí té Juáá cuásaá.

²⁹ Te nini cãháⁿ ndihi-gá Yã Ndiõxí ní nadãma núú-gã ndihi dóó-gã, te dóó-gã-án sũúni ní nduu cuixíⁿ víhí, te sũúni dátãsaⁿ-xi.

³⁰ Te òré-ni-án ní xini-güedé úú tnáhã cue tée cãháⁿ ndihi-gã, te ìⁿ-dé cúú-dé té Moisés, te ingã-dé cúú-dé té Eliás,

³¹ te sũúni dátãsaⁿ-xi ní cãndéé núú ndécú cuè tée úú-án ndihi-gã, te xĩndatnúhu-güedé nãcuãa ndoho Jèsús cuú-gã ñuú Jerusálén dàtnã ní cachí mée-gã.

³² Te té Pèlù ndihi úú-gã-güedé cuiñí víhí-güedé cúú-güedé, dico ní sañni iní-güedé ñã túú ní xidí-güedé, te ní dãnèhé núú ñãhá-xí xii-güedé sã sũúni vãha cãa núú ndécú Jèsús, ndihi úú cue tée cãháⁿ ndihi-gã-án.

³³ Te òré sa ndücu ndee cue tée úú-án caca-güedé núhú-güedé, te ní xãháⁿ tã Pèlù xii-gã:

—Mèstrú, ¡vãha ní cuu sã ndécú-ó ìha vitna! Te na dàcaa-ndí úní tnáhã vehe tnuvixiⁿ, ìⁿ cuu cuendã-n, te ìⁿ cuu cuendã té Moisés, te ìⁿ cuu cuendã té Eliás —cachí-dé xãháⁿ-dã xii-gã.

Dico té Pèlù chi ní mèe-dé ñã túú ní cutnuni iní-dé nása ndüu tnúhu ní cãháⁿ-dã.

³⁴ Te nini cãháⁿ-dã ní quexio ìⁿ vícò núú ndécú-güedé-án ní dàdãhu ñãha-xi xii-güedé, te ní yühú-güedé sã dúcãⁿ ní quexio vícò-án ní dàdãhu ñãha-xi.

³⁵ Te xití vícò-án ní tecú ní cãháⁿ Yã Ndiõxí, te xãháⁿ-gã xii-güedé:

—Tée-a cùu-dé Déhe-í, tée ío cùu iní-í, te tñi-ndo nchãa tnúhu cãháⁿ-dã —duha ní xãháⁿ-gã xii-güedé.

³⁶ Te sãtã dúcãⁿ ní cãháⁿ Yã Ndiõxí, te ní quide cuendã-güedé sã mèdii-nã Jèsús ndécú-gã xiãⁿ. Te vã yóo ìⁿ ní xãháⁿ-güedé nãcuãa ndüu nchãa sã ní xini-güedé-án.

Jèsús quidé tãtna-gã ìⁿ tée cuechi yìhi ñãha espíritú cündìhi yucu ñãvãha
(Mt. 17:14-21; Mr. 9:14-29)

³⁷ Te ingã nduu-án cuãnuu-gã yucu-án ndihi-güedé, te ío cuéhé ñãyiu cuãháⁿ tnahã ñãhá xii-gã.

³⁸ Te ìⁿ tée ñühu tnahã tnuú-yu-án ní cãháⁿ níhi-dé, te xãháⁿ-dã xii-gã:

—Mèstrú, ío cãháⁿ ndãhú-í núú-n núu vã cündèe iní-n cãda tãtna-n dèhe-í, chi ìⁿ dñi duha-dã ndécú,

³⁹ te yìhi ñãha espíritú cündìhi yucu ñãvãha xii-dé, te òré ná nãtñi ñãha-xi xii-dé, te dàcana saa ñãha-xi, te ndãda ruuⁿ ñãhá-xí xii-dé, te tàva-xi tññ yuhu-dé. Te ío dàndoho ñãha-xi xii-dé, chi ndéé núú ñã cúú-gã, te dàña ñãha tnaa-xi xii-dé.

⁴⁰ Te sa ní cãháⁿ ndãhú-í núú cuè tée xica cuu ndihi-n queñuhu-güedé-xi, dico ñã túú ní ndãcu-güedé —cachí-dé xãháⁿ-dã xii-gã.

⁴¹ Te Jèsús ní xãháⁿ-gã xii nchãa ñãyiu:

—¡Nchaa nchòhò ñãyiu ndècu ñuyú-a ío sãã iní-ndó, chi ñã túú cuiñí-ndó quindãã iní-ndó Yã Ndiõxí! Te ní cuu vã ñduu quide ndee iní-í nchãa sã quidé-ndó, ¿te ná ndéé ama vã dúcãⁿ-gã cada-ndo-í? —cachí-gã xãháⁿ-gã xii-yu.

Te ní xãháⁿ-gã xii tée cùhú déhe-xi-án:

—Taxi déhe-n ìha —cachí-gã xãháⁿ-gã xii-dé.

⁴² Te òré cuãháⁿ tée cuechi-án núú-gã, te espíritú cündìhi yucu ñãvãha-án ní dãndüã ñãhá-xí xii-dé, te sañni yìhi ñãhá tucu-xi xii-dé ní cùu, dico Jèsús níhi ní cãháⁿ-gã ní tenã-gã espíritú-án, te ní quee ñãha-xi xii-dé, te ní nacuãha cuendã ñãhá-gã xii-dé tãtã-dé.

⁴³ Te nchãa-yu ní cuñúhu-yu sã dúcãⁿ ní cuu, te ní cachí-yu sã ío cãhnu cuu Yã Ndiõxí.

Jèsús cãháⁿ tucu-gã sã cúú-gã
(Mt. 17:22-23; Mr. 9:30-32)

Te nini xicuñúhu-yu nãcuãa ní quide Jèsús, te ní xãháⁿ-gã xii cue tée xica cuu ndihi-gã:

⁴⁴ —Nchòhò cundedóho vãha-ndo tnúhu na cãháⁿ-í-a, te vã ná cuãnaa-ndo, chi yühú Tée cùu ñani tnáhã-ndó nchãa-ndo sãã ìⁿ nduu te cuãha cuendã ñãhá-güedé xii-í núú cuè tée cùu úhú iní ñãhá —cachí-gã xãháⁿ-gã xii-güedé.

⁴⁵ Dico cue tée-án ñã túú ní tecú tnüñí-güedé nãcuãa ndüu tnúhu ní xãháⁿ-gã xii-güedé, te ducaⁿ ní yãha-güedé, chi ducaⁿ tnãhí ní cachí-gã sã vã təcú tnüñí-güedé, te ní yühú-güedé cãcãⁿ tnúhú-güedé núú-gã nása ndüu tnúhu ní xãháⁿ-gã xii-güedé.

Cue tée ndücu tnúhu núú tnáhã núu ndédacãa-güedé ío-gã cünüu
(Mt. 18:1-5; Mr. 9:33-37)

⁴⁶ Te cue tée xica cuu ndihi-gã ní nguíta-güedé ndãtnúhu-güedé núu ndédacãa-güedé ío-gã cünüu,

⁴⁷ dico Jèsús ní cutnuni iní-gã nãcuãa sãni iní-güedé núu ní cana-gã ìⁿ té líhli, te ní sanu tñi ñãha-gã ìⁿ xio dñi-gã.

⁴⁸ Te ní xãháⁿ-gã xii-güedé:

—Nchaa ñãyiu na quèheⁿ cuendã ìⁿ té líhli dàtnã té líhli-a cuendã sã ñühú iní ñãhá-yu xii-í ñã, te cada iní-yu sã yühú ní queheⁿ cuendã-yu, te nchãa ñãyiu na quèheⁿ cuendã ñãhá xii yühú, te cada iní-yu sã tnáhã Tãtã-í Dútú Ndiõxí Yãá ní tendaha ñãha xii-í véxi-í ñuyú-a ní queheⁿ cuendã-yu. Te nchãa ñãyiu ío ndãhú iní-xi mee-ní xinu cuechí-yu, ñãyiu-án ío-gã cünüu-yu —cachí-gã xãháⁿ-gã xii-güedé.

Ñãyiu ñã túú cùu úhú iní ñãhá cündìhi ñãhá-yu xii-o
(Mr. 9:38-40)

⁴⁹ Te té Juãã diu-ni ìⁿ tée xica cuu ndihi-gã ní xãháⁿ-dã xii-gã:

—Mèstrú, ní xini-ndí ìᵀ tée càcunehe ñaha-dé xii-n, te ndèñuhu-dé espíritu cùndìhi yucu ñávãha yìhi ñaha xii ñáyiu, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndìhi ñaha-dé xii-o —càchí-dé xãhaⁿ-dè xii-gã.

⁵⁰ Te Jèsús ní xãhaⁿ-gã xii-dé:

—Daña-ndo na càda nahi-dé ní cùu, chi ñáyiu ñá túú cùu úhú iní ñáhã xii-o te cùndìhi ñahã-yu —càchí-gã xãhaⁿ-gã xii-dé.

Jèsús càháⁿ-gã dóho té Jàcobó ndìhi té Juãá

⁵¹ Te òré sa ta cùyatni ndaa Jèsús andiu, te ní xica-gã cuáhãⁿ-gã ñú Jerusálén, chi duuⁿ duuⁿ ní sani iní-gã sã quíhíⁿ-gã.

⁵² Te ní tendaha-gã cue tée yòdo nuu cuáhãⁿ, te ní quexio-güedé ìᵀ ñuú, te ñuú-áⁿ yíndèhu-xi distritú Sãmariá, te ndùcu-güedé ìᵀ vehe cada túha-güedé òré quexio-gã.

⁵³ Dico ñáyiu Sãmariá ñá túú ní cuiní-yu cuãñaha núu-yu vehe, chi cuendá sã ní cutnùnì iní-yu sã ichi yáha-ni-gã quíhíⁿ-gã ñuú Jerusálén.

⁵⁴ Te sã dúcãⁿ ní quidé-yu ñá túú ní cuiní-yu cuãñaha núu-yu vehe ndetatú-gã, núu ní xãhaⁿ té Jàcobó ndìhi té Juãá cue tée xica cuu ndìhi-gã xii-gã:

—Mèstrú, ¿cuiní-n càcãⁿ táhú-ó núú Yã Ndióxi cuendá dangãva-gã ñuhú danãa-gã ñáyiu ñuú-a dàtná ní quide té Eliás tée ní xóo càháⁿ tnúhu Yã Ndióxi ndéé sanaha-ã? —càchí-güedé xãhaⁿ-güedé xii-gã.

⁵⁵ Te Jèsús ní nchócótó-gã núu-güedé, te ñhi ní càháⁿ-gã dóho-güedé, te xãhaⁿ-gã:

—Nchòhó, chi ñá túú vãha iní-ndó te núu ducaⁿ càháⁿ-ndó.

⁵⁶ Chi yúhú Tée cùu ñani tnáhã-ndó nchãa-ndo véxi-í sã dácãcu nihnu-í ñáyiu, te ñá díú véxi-í sã dácũta nihnu-í-yu —càchí-gã xãhaⁿ-gã xii-güedé.

Te sãtã dúcãⁿ ní xãhaⁿ-gã, te ní xica-gã cuáhãⁿ-gã ndìhi-güedé ingã ñuú.

Ñáyiu cuiní chitnahã ñáhã xii Jèsús ní cùu (Mt. 8:19-22)

⁵⁷ Te ñuhu Jèsús ichi ndìhi-güedé, te ìᵀ tée ní xãhaⁿ-dè xii-gã:

—Mèstrú, cuiní-í canchicúⁿ ñáhã-í xii-n ndèni ní cuu na quíhíⁿ-n —càchí-dé xãhaⁿ-dè xii-gã.

⁵⁸ Te Jèsús ní xãhaⁿ-gã xii-dé:

—Nchaa ñucuii chi ndècu yaú cúu vèhe-güedé saquihí-güedé, te nchaa quitì ndava caa tacã-güedé díquí yutnu, dico yúhú Tée cùu ñani tnáhã-ndó nchãa-ndo chi ñá túú ndéé cáã vèhe-í ñuyú-a ndetatú-í —càchí-gã xãhaⁿ-gã xii-dé.

⁵⁹ Te dàtnùnì ní xãhaⁿ tùcu-gã xii ingã-dé:

—Yòhó taquixi chitnahã ñáhã-n xii-í —càchí-gã xãhaⁿ-gã xii-dé.

Dico tée-áⁿ ní xãhaⁿ-dè xii-gã:

—Mèstrú, dañã na nùhú-í cundetú-í cuú tãtã-í te chindúxi-í-dé, te dàtnùnì quixi-í chitnahã ñáhã dùcaⁿ-ná-í xii-n —càchí-dé xãhaⁿ-dè xii-gã.

⁶⁰ Te Jèsús ní xãhaⁿ-gã xii-dé:

—Daña ñáyiu ñá túú sãndãá iní ñáhã xii-í ná chindúxi tnãha meé-yu, chi ñáyiu-áⁿ cúu-yu dàtnã ñáyiu ní xihí cuéi ndècu-ní-yu núu ñuyú-a. Te yòhó taquixi, chi quíhíⁿ-n dànehé-n ñáyiu nãcuãa cada Yã Ndióxi ndìhu ndaha ñaha-gã xií-yu —càchí-gã xãhaⁿ-gã xii-dé.

⁶¹ Te ní xãhaⁿ tùcu ingã-dé xii-gã:

—Mèstrú, cuiní-í chitnahã ñáhã-í xii-n, dico díhna-gã dañã na nùhú-í cada ndee iní-í nchaa ñáyiu ndècu vehe-í, te dàtnùnì quixi-í —càchí-dé xãhaⁿ-dè xii-gã.

⁶² Te Jèsús ní xãhaⁿ-gã:

—Nchaa ñáyiu ní sãndãá iní ñáhã xii-í, te núu vá cãchicúⁿ nihnu ñáhã-yu ní yùhu ní iní-yu, te cúu-yu dàtnã ìᵀ tée ní tnã ndaha làtú cutu-dé, chi tée-áⁿ núu na ndãcoto-dé ndãa sãtã-dé òré xitú-dé, te vá quíhíⁿ ndãã làtú-dé ducaⁿ sãtnahã-xi cúu-yu. Te cue ñáyiu chi vá cúu ndãã-yu nãcuãa ndìhu ndaha-gã dava-gã ñáyiu—càchí-gã xãhaⁿ-gã xii-dé.

10

Jèsús téndaha-gã únidico úxi cue tée quíhíⁿ càháⁿ tnúhu-gã núu ñáyiu

¹ Te sãtã dúcãⁿ ní cuu, te ní cáxi tucu Xitohó Jesucristú únidico úxi cue tée codonù-güedé quíhíⁿ-güedé càháⁿ-güedé tnúhu-gã nchaa ñuú, ndìhi nchaa dava-gã xichi núu quíhíⁿ-gã, te ndi ndúú ndi ndúú-güedé tendaha ñaha-gã xii-güedé quíhíⁿ-güedé.

² Te cùmánì-gã caca-güedé, te ní xãhaⁿ-gã xii-güedé:

—Nchòhó xini-ndó sã òré ná sãã yóo cuu nchaa sã xitú ñáyiu, te ío vai cuu. Te na càchí tnúhu ndãá-í xii-ndo sã dàtnã vai sã xitú ñáyiu cùu, ducaⁿ ío vai ñáyiu cùmánì cundedóho tnúhu Yã Ndióxi te ío sacú ñáyiu dàcuaha ñaha xii-yu tnúhu-gã, núu xiãⁿ xini ñuhu-xi càcãⁿ-ndó núú Yã Ndióxi cuendá sã ná dàcãháⁿ-gã iní ñáyiu càháⁿ-yu tnúhu-gã núu ñáyiu cùmánì cundedóho tnúhu-gã.

³ Te nchòhó cúu-ndó dàtnã cue mbéé cue quitì cuáhãⁿ núu yihí cué quitì dééⁿ. Chi tendaha ñaha-í xii-ndo quíhíⁿ-ndó núu xĩndecu nchaa ñáyiu cuihna iní-xi.

⁴ Te vá cãnehè-ndo ñunu cuhuⁿ ndachiuⁿ-ndo, ní núu chúhúⁿ díhúⁿ-ndó, te ní vá cádá túha-gã-í ndó chàu-ndó chi diu-ni chàu yihí-ndó-ãⁿ xiãⁿ-ni quihí-ndo, te vá ío cuyaa-ndo càháⁿ ndìhi-ndo ñáyiu ñuhu ichi.

⁵ Te òré ná quèxio-ndo ìᵀ vehe, te duha cùñaha-ndo xii ñáyiu dii vèhe-xi-áⁿ: “Yã Ndióxi chindee ñaha-gã xii-ndo ío vãha

cuu iní-ndó cùndecu-ndo”, duha cùñaha-ndo xii-yu.

⁶ Te núu ñáyiu-án ní nduu táhũ-yu sá cùndecu váha iní-yu núú Yá Ndióxi, te cuu-xi sá váha sá cúu-xi-yu tnúhu cùñaha-ndo-án, dico núu ñá túú ní cáhá^a váha ndihi ñáhá-yu xii-ndo, te cùñaha-ndo sá vǎ cúu-xi sá váha sá cúu-xi-yu. Dico núu ní cáhá^a váha ndihi ñáhá-yu xii-ndo,

⁷ te ñu-ñi vehe-án cada vehe tnaa-ndo, te ñá túú-gǎ ndèé nducu-ndo vehe cundecu-ndo, te caxi-ndo ncháa sá ná tàxi-yu, chí nchaa cue téé quide chiun^a dacuítí tǎu-güedé sá níhi-güedé sá cáxi-güedé cuendá nchaa chiun^a quide-güedé.

⁸ Te núu ní sáa-ndó ñ^a ñuú núú ní quehe^a cuendá ñáhá-yu xii-ndo, te caxi-ndo ncháa sá ná tàxi-yu.

⁹ Te cada tátna-ndo cué ñáyiu cùhú xĩndecu ñuú-án, te cùñaha-ndo xii-yu sá sá ní sáa nduu ndíhu ndaha ñaha Yá Ndióxi xii-yu.

¹⁰ Dico núu ní sáa-ndó ñ^a ñuú núú ñá túú ní quehe^a cuendá ñáhá-yu xii-ndo, te tñii-ndo íchi cuita cáhá^a-ndó cuáhá^a, te cùñaha-ndo xii-yu:

¹¹ “Ndéé tícǎ chũhmǎ ní tñii sáhá-ndí ñuú-ndó nǎquidi-ndí, te duha quide-ndí cuendá cutnúni iní-ndó sá ñá túú quide váha-ndo ndecu-ndo. Dico cunaha-ndo sá sá ní sáa nduu ndíhu ndaha ñaha Yá Ndióxi xii-ndo ní cùu”, duha cùñaha-ndo xii-yu.

¹² Te na cǎchí tnúhu-í xii-ndo sá ná sáa nduu cada ndáá Yá Ndióxi cuéchi nchaa ñáyiu, te ñáyiu ñuú-án ño-gǎ ndohó-yu ñává-án dǎcúxí ñáyiu ñuú Sodomǎ –cǎchí-gǎ xáhá^a-gǎ xii-güedé.

Cuendá ñáyiu dava ñuú ñá túú sǎndáá iní tnúhu Xitohó Jesucristú
(Mt. 11:20-24)

¹³ Te Jèsús xáhá^a-gǎ xii ñáyiu dava ñuú ñá túú sǎndáá iní tnúhu-gǎ:

–ñdǎhú nchòhó cue ñáyiu ñuú Corázim! Te ndǎhú nchòhó cue ñáyiu ñuú Bètsaidǎ! Chí núu dicó ñuú Tírú, ndihi ñuú Sidón ní quide-í nchaa sá vǎ yò tnǎhí ndacu cada datná ní quide-í ñuú-ndó-án ní xini-ndó ñá, te sá ndéé ama-gǎ cuihnú-yu dóó ndǎhú, te cunucóo-yu núú yǎa cuendá sá ndíxi cuéchi iní-yu sá ñá túú quide váha-yu ní cùu.

¹⁴ Dico sáa nduu te ño-gǎ dandòho ñaha Yá Ndióxi xii-ndo dǎcúxí ñáyiu ñuú Tírú, ndihi ñáyiu ñuú Sidón.

¹⁵ Te nchòhó ñáyiu ñuú Capernaúm quide iní-ndó sá sá cuándaa-ndo ñdiu, dico ñáhá chí ñúhú núú ndòho cundecu-ndo –duha ní xáhá^a-gǎ xii nchaa ñáyiu ñuú-án.

¹⁶ Te xáhá^a tǔcu-gǎ xii cue téé tendaha-gǎ quíhí^a cáhá^a tnúhu-gǎ-án:

–Nchaa ñáyiu na cùndedòho nchaa tnúhu cáhá^a-ndó, te cada iní-yu sá yúhú cáhá^a-í

ndedòho-yu, te nchaa ñáyiu na dàquee tíhú ñáhá xii-ndo, te tnáhá yúhú daquee tíhú-yu, te nchaa ñáyiu duca^a na dàquee tíhú ñáhá xii-í, te tnáhá Tǎtà-í Dútú Ndióxi Yáa ní tendaha ñaha xii-í véxi-í ñuyúú-a dàquee tíhú-yu –cǎchí-gǎ xáhá^a-gǎ xii-güedé.

Te duca^a te ní xica-güedé cuáhá^a-güedé.

Ní nasáá cue téé únidico úxi ní tendaha Jèsús ní sáhá^a ní cáhá^a tnúhu-gǎ núú ñáyiu

¹⁷ Te cue téé únidico úxi-án ní nasáá-güedé te súúni cùdí iní-güedé, te xáhá^a-güedé xii Jèsús:

–Mèstrú, ndéé espíritú cùndíhi yucu ñáváha sǎndáá iní ñáhá-xi xii-ndí òré cǎcú nèhe ñaha-ndí xii-n –cǎchí-güedé xáhá^a-güedé xii-gǎ.

¹⁸ Te Jèsús ní xáhá^a-gǎ:

–Ndáá cáhá^a-ndó chí yúhú ní xini-í cùtnáhá ní xita nihnu yucu ñáváha, chí datná ní ngava ñ^a tasa^a ní ngava-xi ñuyúú-a.

¹⁹ Te datná quide-ndó òré xènihnu-ndo ñ^a cóó, ñdi ñ^a nchacua duca^a cada-ndo daquee tíhú-ndo yucu ñáváha, te ñá túú ná cada ñaha-xi xii-ndo, chí ní taxi-í tnúhu ndee iní ndécú ndíhi-ndo.

²⁰ Dico vá cùdí iní-ndó cuendá sá sǎndáá iní ñáhá cué espíritú cùndíhi yucu ñáváha xii-ndo, chí cùdí iní-ndó cuendá sá sá yodo tnuni-ndó núú tútú Yá Ndióxi Yáa ndécú ñdiu –cǎchí-gǎ xáhá^a-gǎ xii-güedé.

Jèsús cùdí iní-gǎ

(Mt. 11:25-27; 13:16-17)

²¹ Te òré-án súúni ní quide dí iní ñáhá Espíritú Yá Ndióxi xii Jèsús, te ní xáhá^a-gǎ xii Yá Ndióxi:

–Yòhó Tǎtà-í Dútú Ndióxi, ío chíñuhu ñaha-í xii-n chí ñu-n tàxi tnuni-n ñdiu ndíhi ñuyúú-a, te dànehé-n cué ñáyiu nchaa tnúhu váha, te ñu-ñi ñáyiu-án cúu-yu ñáyiu ñá túú cùtnúni iní-xi nchaa tnúhu cáhá^a cue téé túha, te nchaa tnúhu cáhá^a-n-án ñá túú ní datúu-n núú ñáyiu cǎchí sá ño túha, te ío váha sáa díquí-xi. Te duca^a quide-n, chí duca^a cùini-n cùnduu –cǎchí-gǎ xáhá^a-gǎ xii Yá Ndióxi.

²² Te xáhá^a tǔcu-gǎ xii cue téé ní nasáá-án:

–Mee Tǎtà-í Dútú Ndióxi ní cǎchí-gǎ sá cùnúu-í núú ncháa-ndi túhú sá ío. Te vá yò ñ^a xini nǎcuáa sǎni iní yúhú Déhe Dútú Ndióxi, chí ñ^a dí-ñi mee-gǎ xini-gǎ nǎcuáa sǎni iní-í. Te duca^a ñ^a dí-ñi yúhú xini-í nǎcuáa sǎni iní mee-gǎ, te nchaa ñáyiu cǎchí iní-í sá quini-yu nǎcuáa sǎni iní Tǎtà-í Dútú Ndióxi te xitnúhu-í-yu, te vá yò ñ^a-gǎ xini nǎcuáa sǎni iní-gǎ chí ñu-ñi ñáyiu duca^a xitnúhu-í-án xini-yu –cǎchí-gǎ xáhá^a-gǎ xii-güedé.

23 Te ní nchóótó-gã núú xĩndecu mee-ni cuè téé xica cuu ndihi-gã, te ní xáhaⁿ-gã xii-güedé:

–Váha táhú nchòhò ndihi nchaa ñáyiú ndèhe nchaa nacuaá guide-í vitna.

24 Chì ío cuéhé cue téé ní xóo cáháⁿ tnúhu Yá Ndióxi ndéé sanaha, ndihi cue téé ní xindaha ñaha xii ñáyiú ní cuini-güedé cundehe-güedé nchaa sá ndéhé-ndó guide-í vitna, te ñá túú ní xini-güedé, te ní cuini-güedé cundedóho-güedé nchaa tnúhu cáháⁿ-í ndédóho-ndo vitna, te ñá túú ní xĩndedóho-güedé –cächí-gã xáhaⁿ-gã xii-güedé.

Nàcuáa ní guide ìⁿ téé distritú Sàmariá

25 Te ìⁿ téé dàcuaha ñaha xii ñáyiú nchaa tnúhu ní chídó tnúni ndí Moisés ní ndacuñí-dé xitó ndéé-dé Jèsús núu nása cunduu tnúhu cáháⁿ-gã, te xáhaⁿ-dè xii-gã:

–Mèstrú, ñná cúú sá cádá-í cuèndá nduu táhú-í cundecu-í ndihi Yá Ndióxi ní caa ní quíhí-í? –cächí-dé xáhaⁿ-dè xii-gã.

26 Te Jèsús ní xáhaⁿ-gã xii-dé:

–Cuini-í cachí tnúhu-n nása cáháⁿ-xi núú tütú ndí Moisés –cächí-gã xáhaⁿ-gã xii-dé.

27 Te xáhaⁿ-dè xii-gã:

–Ndí Moisés cächí ndí núú tütú ndí: “Cuu iní-ndó Dütú Ndióxi Yáá cúú Ndióxi-ndó ní yuhu ní iní-ndó, te cani iní-ndó cada-ndo datná cuini méé-gã, te mee-ni tnúhu váha cani iní-ndó nàcuáa cuu vii cuu váha-ndo núú-gã, te coo iní-ndó cuu iní-ndó-gã. Te cuu iní-ndó tnàha ñáyiú-ndo datná cúú iní-ndó mèe-ndo”, duha cächí ndí núú tütú ndí –cächí-dé xáhaⁿ-dè xii-gã.

28 Te Jèsús ní xáhaⁿ-gã:

–Váha-ni cáháⁿ-n, te núu cada-n nàcuáa cáháⁿ-n àⁿ, te nduu táhú-n cundecu-n ndihi Yá Ndióxi ní caa ní quíhí-í –cächí-gã xáhaⁿ-gã xii-dé.

29 Te sá dúcáⁿ ní xáhaⁿ Jèsús xii-dé núu ndücu-dé nàcuáa cada-dé cácu nihnu-dé núú tnúhu ní cáháⁿ-dè, te ní xicáⁿ tnúhú-dè núú-gã, te xáhaⁿ-dè:

–¿Yoo cuu tnaha ñáyiú-í-í? –cächí-dé xáhaⁿ-dè xii-gã.

30 Te Jèsús ní cani-gã ìⁿ cuèndú núú-dè nàcuáa tecú tnúni-dé tnúhu-gã, te xáhaⁿ-gã:

–Ìⁿ téé ní ndee-dé ñuú Jerusalén ñúhú-dè ichi cuánuu-dé cuáháⁿ-dè ñuú Jericó, te ní quee ñadúhú ichi-dé ní dúhú-güedé dóó ñhnu-dè, ndihi nchaa sá néhé-dé, te ní caniha vihi-güedé, te nchito diu-ná-dé ní dáñá ñaha-güedé te cuáháⁿ-güedé.

31 Te mei óré cátüu-dé-áⁿ ñúhú ìⁿ dütú ichi-áⁿ, te óré ní xini ñáhá dütú-áⁿ xii-dé, te ìⁿ xio-ni ní xócoo ndee-dé ní yáha-dé.

32 Te ñúhu tucu ìⁿ téé cuu levitá ichi-áⁿ, te óré ní xini-dé téé-áⁿ cátüu-dé, te diu-ni ducaⁿ ní guide-dé ìⁿ xio-ni ní xócoo ndee-dé ní yáha-dé.

33 Dico ìⁿ téé distritú Sàmariá ñúhú tucu-dé ichi-áⁿ te óré ní xini-dé téé-áⁿ cátüu-dé, te ní cundahú iní ñáhá-dè.

34 Te ní sáháⁿ-dè núú cátüu téé-áⁿ, te ní guide tátna-dé nchaa núú ní nícuèhé xii téé-áⁿ ní chihí-dé yúcu, te ní dácútú-dé. Te dätñuni ní dácáá ñaha-dé sátá quiti-dé, te ndéca ñaha-dé cuáháⁿ ìⁿ vehe núú sácóo cue ñáyiú sácúhuⁿ ichi, te yacáⁿ ní xito ñaha-dè.

35 Te ingá nduu óré ní nucúhuⁿ téé Samaritanú-áⁿ ichi, te ní tava-dé úú díhúⁿ denariú, te ní sáha-dé téé cuu xitohó vehe-áⁿ, te ní xáhaⁿ-dè: “Coto saú-n téé-a, te núu ñá ní tnàhá díhúⁿ sá ní taxi-í, te cuèi na dāndoñuhu-gá-n díhúⁿ-n cuèndá-dé, te óré ná quixi tucu-í te nacháhu-í”, duha ní xáhaⁿ téé Samaritanú-áⁿ xii téé dii vehe xiáⁿ.

36 Te vitna cáháⁿ, te núu ndédacàa cue téé úni-áⁿ cúú-güedé téé váha cuu iní-güedé tnàha ñáyiú-güedé –cächí-gã xáhaⁿ-gã xii téé dàcuaha ñaha xii-í ñáyiú-áⁿ nchaa tnúhu ní chídó tnúni ndí Moisés.

37 Te téé-áⁿ ní xáhaⁿ-dè xii-gã:

–Téé ní cundahú iní ñáhá xii téé ní dánicuèhé ñáhá cuè ñadúhú-áⁿ, téé-áⁿ cúú-dé téé cuu iní tnàha ñáyiú-xi –cächí-dé xáhaⁿ-dè xii-gã.

Te Jèsús ní xáhaⁿ-gã:

–Cuáháⁿ te diu-ni ducaⁿ cada-n tnahá-n –cächí-gã xáhaⁿ-gã xii-dé.

Jèsús ndécú-gã vehe tá Mårta ndihi tá Måriá

38 Te Jèsús ñúhú-ni-gã ichi cuáháⁿ-gã ndihi cue téé xica cuu ndihi-gã, te ní sáá-gã ìⁿ ñuú líhli, te xiáⁿ ní quee ìⁿ xichí nání Mårta ní cáháⁿ ñáhá-xi xii-gã vehe-xi.

39 Te tá Mårta ndécu ìⁿ cúhú-xi nani-xi Mariá, te xichí-áⁿ ní ngóo-xi núú Jèsús ndédóho-xi nchaa tnúhu cáháⁿ-gã.

40 Te tá Mårta-áⁿ ndihi vihi-ni iní-xi guide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

–Mèstrú, ñnáá ñá túú tnàhí sàni iní-ni sá ní dāndóo ndaha ñaha cúhú-í nchaa chiuⁿ-áⁿ? Cúñaha saú ná quixi-xi chindee ñaha-xi –cachí-xi xáhaⁿ-xi xii-gã.

41 Dico Jèsús ní xáhaⁿ-gã:

–Yòhó Mårta, ñúhu tñeñu vihi-n, te ndíhú iní-ni sá lo vai chiuⁿ-n ñúhu,

42 dico xini ñúhu vihi-gã-xi cundedóho-n tnúhu cáháⁿ-í, chí tá Måriá-a sa ndédóho-xi tnúhu-í, te vá yóo ìⁿ ndacu xocani tnúhu-í sá ní ngündecu ndihi-xi –cächí-gã xáhaⁿ-gã xii-xi.

11

Jèsús dánèhé-gã cue téé xica cuu ndihi-gã nàcuáa cáháⁿ ndihi-güedé Yá Ndióxi
(Mt. 6:9-15, 7:7-11)

1 Te ìⁿ nduu cáháⁿ ndihi Jèsús Yá Ndióxi ìⁿ xichí, te sátá ní yáha ní cáháⁿ ndihi-gã Yá

Ndiòxí, te ní xáhaⁿ ìnⁿ téé xica cuu ndihi-gá xii-gá:

—Mèstrú, danèhè ñáhá xii-ndí nása cáháⁿ ndihi-ndí Yá Ndiòxí dàtná ní quide ndí Juàà ní danèhè ndí cue téé ní xica cuu ndihi ndí —càchí-dé xáhaⁿ-dè xii-gá.

² Te Jèsus ní xáhaⁿ-gá:

—Òré cáháⁿ ndihi-ndo Yá Ndiòxí, te cachi-ndó:

Yòhó tātá-ndí Dútú Ndiòxí Yáà ndécú àndiu, nchaa ñáiyu na cáháⁿ-yu sá cúu-n Yáà ío yifúhu.

Te xicáⁿ táhú-ndí núu-n sá ná sáá nduu ndihu ndáhá-n-yu.

Te cada-n dàtná cachi iní-n ñuyú-a dàtná quidé-n àndiu.

³ Te xicáⁿ táhú-ndí núu-n sá táxi-n sá cándèca iní-ndí ìnⁿ nduu ìnⁿ nduu.

⁴ Te cada càhnu iní-n nchaa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáiyu-ndí.

Te vá dáñá-n dàcaháⁿ ñáhá yùcu ñáváha xii-ndí cada-ndí sá ñà túú vāha, chi coto ñaha-n xii-ndí cuendá sá vá dúcáⁿ càda ñaha-xí,

duha cáháⁿ-ndó

—càchí-gá xáhaⁿ-gá xii-güedé.

⁵ Te Jèsus ní xáhaⁿ tùcu-gá:

—Te núu ndédacáa nchóhó ndécú ìnⁿ téé tnàha tnúhu ndihi-ndo, te dava niú cuaháⁿ-ndó vehe-dé, te òré ní quexio-ndo, te xáhaⁿ-ndo xii-dé: “Véxi-í núu vá cundèe iní-n tàxi nuu-n úní tnàhá pàà,

⁶ chí ìnⁿ téé xini tnàhá ndihi-í ñúhú-dé ichi ní quexio-dé vehe-í, te ñà túú tnàhí ná cuñaha-í caxi-dé”, quesaha-ndo cñaha-ndo.

⁷ Te téé-áⁿ cáháⁿ-dé ndéé xití vehe-dé, te cúñaha-dé xii-ndo: “Vá dásàtú nihá-n chi ndéí yuyèhe-í, te càa-í ndihi cue landú-í, te vá cúú ndàcòo-í taxi-í sá cuiní-n”, quesaha-dé cúñaha-dé xii-ndo.

⁸ Te na càchí tnúhu-í xii-ndo sá cuèi cùu-dé téé tnàha tnúhu ndihi-ndo, dico ducaⁿ cñaha-dé xii-ndo, dico dacuití sá ndàcòo-dé taxi-dé sá cuiní-ndó cuendá sá vá dásàtú-gá-ndó ìní-dé.

⁹ Te yúhú càchí-í xii-ndo sá cãcáⁿ-ndó núu ná cuiní-ndó núú Yá Ndiòxí te taxi-gá. Te vá dáñá ndèé-ndó cãcáⁿ-ndó núú-gá núu ná cuiní-ndó, te ducaⁿ te níhí-ndó. Te cada iní-ndó sá ní quexio-ndo vehe ìnⁿ tnaha ñáiyu-ndo te ní cáháⁿ-ndó, te ñáiyu-áⁿ ní tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chí Yá Ndiòxí tedóho ñaha-gá xii-ndo, te taxi-gá sá ná cãcáⁿ-ndó núú-gá.

¹⁰ Chí nchaa ñáiyu ducaⁿ xiquide te Yá Ndiòxí tedóho ñaha-gá xii-yu níhí-yu sá cuiní-yu. Te diu-ni ducaⁿ tùcu nchaa ñáiyu

na cãcáⁿ núú-gá ìnⁿ sá cuiní-yu, chí sãñaha-gá sá xicáⁿ-yu núú-gá. Te diu-ni ducaⁿ tùcu níhí nchaa ñáiyu ñà túú dàña ndeé xicáⁿ núú Yá Ndiòxí sá cuiní-yu, chí níhí-yu.

¹¹ Te nchòhó cue téé cùu tātá ñà túú cundee iní-ndó cuñaha-ndo cuè déhe-ndo ìnⁿ yúú caxi-güexi òré xicáⁿ-güexi ìnⁿ pàà núú-ndó càxi-güexi, te ní ñà túú cundee iní-ndó cuñaha-ndo ìnⁿ cóo caxi-güexi òré xicáⁿ-güexi ìnⁿ chácá núú-ndó càxi-güexi.

¹² Te ní ñà túú cundee iní-ndó cuñaha-ndo ìnⁿ nchacua caxi-güexi òré xicáⁿ-güexi ìnⁿ ndúú núú-ndó càxi-güexi.

¹³ Te nchòhó cuèi ndèé dau sàà iní-ndó, dico sàha-ndo cuè déhe-ndo sá vāha xèxi-güexi òré xicáⁿ-güexi núú-ndó. Te núu nchòhó ducaⁿ quide-ndo, ÿte uuⁿ-gá ducaⁿ quide Tātá-ndó Dútú Ndiòxí Yáà ndécú àndiu, chí taxi-gá Espiritú-gá cundecu ndihi-ndo te núu na cãcáⁿ-ndó núú-gá! —càchí-gá xáhaⁿ-gá xii-güedé.

Càchí-güedé sá ndécú ndihi Jesús yucu ñávāha

(Mt. 12:22-30; Mr. 3:20-27)

¹⁴ Te Jèsus ndèñúhu-gá espíritú cundñihi yucu ñávāha yíhi ñaha xii ìnⁿ téé ní quide ñíhí-xi, te òré ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñúhu ñáiyu sá dúcáⁿ ní quide-gá.

¹⁵ Te davá-yu ní xitnàhá-yu:

—Téé-a ndèñúhu-dé nchaa espíritú cundñihi sácúíhná yíhi ñaha xii ñáiyu, chí diu-ni sácúíhná-áⁿ chindèe ñaha-xi xii-dé, te diu-ni-xi tàxi tnuní-xi nchaa espíritú-áⁿ —càchí-yu xitnàhá-yu.

¹⁶ Te davá-yu xito ndeé ñáhá-yu xii-gá, te xáhāⁿ-yu sá ná cãdá-gá ìnⁿ sá vá yòo tnàhí ndàcu cada ñuyú-a cundèhé-yu nàcuáa cutnúní iní-yu núu ndáá sá Yá Ndiòxí ní tendaha ñaha-gá xii-gá véxi-gá ñuyú-a.

¹⁷ Dico mee-gá sa ní cutnúní iní-gá nchaa nàcuáa sàni iní-yu, núu ní xáhaⁿ-gá xii-yu:

—Te nchòhó xini-ndó sá núu ìnⁿ téé yindaha ìnⁿ nacióⁿ vá cúú ìnⁿnuu-dé ndihi cue téé cundñihi-dé, te vá cúdí-dé cunuu-dé. Te diu-ni ducaⁿ sãtnahá tucu-xi cùu cue ñáiyu xindecu ìnⁿ-ni vehe, chí núu vá cúú ìnⁿnuú-yu cundecú-yu, te vá cúdí-yu cundecu càhnú-yu.

¹⁸ Te ducaⁿ sãtnahá-xi cùu sácúíhná, chí núu vá cúú ìnⁿnuu-xi ndihi nchaa espíritú cundñihi-xi te vá cúdí-xi cundecu-xi taxi tnuní-xi. Te duha cáháⁿ-í chí nchòhó càchí-ndó sá sácúíhná chindèe ñaha-xi xii-í queñúhu-í nchaa espíritú cundñihi-xi yíhi ñaha xii ñáiyu.

¹⁹ Te núu yúhú quidé cuendá-ndó sá sácúíhná chindèe ñaha-xi xii-í, te xini ñuhu-xi cada cuendá-ndó yòo chindèe ñaha xii cue téé xica cuu ndihi-ndo queñúhu-güedé nchaa

espíritú cündihí-xi yihí ñaha xii ñáyu. Te mee-güedé cächí-güedé sá nchòhò ñá túú cáháⁿ ndáá-ndó sá dúcáⁿ càháⁿ-ndó.

²⁰ Te ndáá sá Yá Ndióxi chíndèe ñaha-gá xii-í quèññu-í nchaa espíritú cündihí sácuihná yihí ñaha xii ñáyu, te xiáⁿ cutnùní iní-ndó sá sá ní sáá nduu ndáhu ndaha ñaha Yá Ndióxi xii-ndo.

²¹ Te núu ñⁿ téé ío ndee, te súúni ññ cáá-dé, te ndèé-dé vehe-dé cuendá sá vâ cuíta, te ní quide túha-dé titní sá dééⁿ, te ío váha nèhe váha-dé nchaa ndachüⁿ-dé.

²² Dico núu quexio ingá téé ío-gá ññ cáá te ndee-gá-dé, te nguíta-dé náá-dé ndihí téé ndèé vehe-xi-áⁿ, te cada cànarí ñáhá téé-áⁿ xii téé ndèé vehe-xi-áⁿ, te quendeé-dé nchaa sá dééⁿ cündèe iní-dé, te taxi tñùní-na-dé nchaa xiáⁿ, ndihí nchaa sá ndécú ndihí-dé, te dàcãñu-dé nchaa cue téé cündihí-dé nchaa sá ná ññí-dé.

²³ Te nchaa ñáyu ñá túú cündihí ñaha xii-í, te cùu úhú iní ñáhã-yu, te nchaa ñáyu ñá túú chíndee ñaha xii-í, te dàquee tíhü-yu chíuⁿ quide-í.

Espíritú cündihí yucu ñávãha sá nãnhòcãva xito cùu túú
(Mt. 12:43-45)

²⁴ Te òré ná quèe ñaha ñⁿ espíritú cündihí yucu ñávãha xii ñⁿ ñáyu, te cuáhã-xi ndücu-xi ñⁿ xichí núú cündècu-xi te ñá ññí-xi, te ní sani iní-xi: “Vãha-gá núhú tucu-í núú ní xíndecu-í”, duha ní sani iní-xi.

²⁵ Te cuánuhú-xi, te òré ní nasáá-xi, te ní xiní-xi sá cáá iní ñáyu-áⁿ dàtná cáá-nã ñⁿ vehe ní natíhú, chi ní nduu vii-nã, vâ yõ-gá ndécú.

²⁶ Te sátá dúcáⁿ te ní xica-xi cuáhã-xi cuándúcú-xi úsã tñáhã espíritú cündihí-xi sá nèhé vñí-gã xiquide, te òré ní ññí-xi cue espíritú-áⁿ te ndèca ñaha-xi cuáhãⁿ cuendá ngúndecu ndihí-xi ñáyu-áⁿ, te ñáyu-áⁿ uuⁿ-gá nãndi yãha-yu dàcúúxí ndèé díhna —cächí-gã xáhaⁿ-gã xií-yu.

Cuendá ñáyu cùu váha ndisa iní-xi

²⁷ Te ññi càháⁿ Jèsús tñúhu-áⁿ núú ñáyu ní càháⁿ ññi ñⁿ ñadhí tnuú-yu, te xáhaⁿ-aⁿ xii Jèsús:

—jSã váha táhú ñadhí ní dàcácu ñaha xii-n, te ní dàcuéhnú ñaha-aⁿ! —cachí-aⁿ xáhaⁿ-aⁿ xii-gã.

²⁸ Te Jèsús ní xáhaⁿ-gã:

—jVãha-gã táhú nchaa ñáyu sácúndedóho nchaa tñúhu càháⁿ Yá Ndióxi te sãndáá iní-yu! —cächí-gã xáhaⁿ-gã xii-aⁿ.

Ñáyu ñá túú sãndáá iní ñáhã xii Jèsús cuini-yu cada-gã ñⁿ sã vâ yõ tñáhí ndãcu cada
(Mt. 12:38-42; Mr. 8:12)

²⁹ Te ta tàcã vãi ñáyu te dàdehnde tñaha-nã-yu, te ní nguíta Jèsús xáhaⁿ-gã xií-yu:

—Nchòhò ñáyu ndècu ñuyú vitna, chi ío sáá iní-ndó, te cuini-ndó càda-í ñⁿ sã vâ yõ tñáhí ndãcu cada cuendá cuini-ndó cutnuni iní-ndó núu ndisa sã Yá Ndióxi ní tendaha ñaha-gã xii-í véxi-í. Dico ñá túú nãgã cada-í quini-ndó, chi sa ññi-ndó tñúhu nãcuã ní yãha ndí Jónás téé ní xó cáháⁿ tñúhu Yá Ndióxi ndèé sanaha, te ññi-ni ducaⁿ yãha yúhú tucu.

³⁰ Chi nchaa ñáyu ñuu Nínivé ní cutnuni iní-yu sã Yá Ndióxi ní tendaha ñaha-gã xii ndí Jónás ní sáhãⁿ ndí ñuú-yu. Te ducaⁿ sãtnahã-xi cùu yúhú Téé cùu ññi tñáhã-ndó nchaa-ndo, chi sáá nduu te cutnuni iní-ndó sã Yá Ndióxi ní tendaha ñaha-gã xii-í véxi-í ñuyú-a.

³¹ Te na sáá nduu càda ndáá Yá Ndióxi cuéchi nchaa nchòhò ñáyu ndècu ñuyú-a, te dàvã-áⁿ quini-ndó ñⁿ ñadhí ñaha ní xíndaha ñⁿ nacióⁿ cáá ndãa xio cuha núú quèe nchicanchi. Te ñaha-áⁿ ío xica ní xíndecu-aⁿ, te ní sáhãⁿ-aⁿ ní xíndedóho-aⁿ nchaa tñúhu ní cáháⁿ ndí Salómón, chi ndí-áⁿ ío ní sáá sã xini tñuni ndí. Te ñaha-áⁿ cáháⁿ-aⁿ dàvã-áⁿ sã nchòhò ñáyu ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ññi-í ío-gã cúnú-í dàcúúxí ndí Salómón.

³² Te ññi-ni nduu càda ndáá Yá Ndióxi cuéchi nchaa nchòhò ñáyu ndècu ñuyú-a vitna, dàvã-áⁿ tñáhã cue ñáyu ní xíndecu ñuu Nínivé cundecú-yu núú Yá Ndióxi, te tñáhã-yu cachí-yu sã ñã túú ní quide ndáá-ndó. Chi ñáyu ñuu Nínivé-áⁿ ní ndixi túu iní-yu sã ñã túú quide váha-yu ndécú-yu te ní natuhã-yu ichi Yá Ndióxi cútñáhã ní cáháⁿ ndihí ñaha ndí Jónás tñúhu-gã xií-yu. Dico vitna iha ndècu ndihí ñaha-ndo xii yúhú téé cáháⁿ tucu tñúhu Yá Ndióxi, te ññi-í ío-gã cúnú-í dàcúúxí ndí Jónás.

Núú-ó cùu-xi datná ñⁿ ñuhú

(Mt. 5:15; 6:22-23)

³³ Te ñã túú ní ñⁿ ñáyu tẽñuhú ñⁿ linterná, te taxi ndècu-yu ñⁿ núú yidãhu, àdi chivãha-yu xití ñⁿ tídihi, chi tàxi ndecú-yu ñⁿ núú ññu cuendá nchaa ñáyu quíhu vehe cutnuni núu-yu.

³⁴ Te núú-ndó cùu-xi datná ñⁿ ñuhú, chi ñⁿ sã ná quini-ndó te ndixi túu iní-ndó nã cúu xiáⁿ, te núu càvãha núú-ndó, te ducaⁿ cutnuni iní-ndó nã cúu sã ndécú núú-ndó, áⁿ te núu cùhú, te vâ cutnuni iní-ndó nã cúu sã ndécú núú-ndó. Te sã dúcáⁿ cùhú núú-ndó te cada iní-ndó sã ndécú-ndó dàtná ñⁿ núú néé.

³⁵ Te ío cada cuendá-ndó vâ caní cuèhé iní-ndó cuendá tñúhu Yá Ndióxi cuendá cutnuni iní-ndó nãcuãa cundecu-ndo, chi

núu na càni cuehé iní-ndo cuendá tnúhu-gá, te cùu-ndo datná ìⁿ ñáyiú ñá túú cùtnuní nùú-xí.

³⁶ Te núu càndoo canine iní-ndo, te mee-ni sá vâha ñuhu iní-ndo, te cùtnuní vâha iní-ndo tnúhu ndáá dàtná cùtnuní vâha núu-ndo òré càyú ñuhú, ducaⁿ cùtnuní iní-ndo —càchí-gá xâhaⁿ-gá xâhaⁿ-gá xii-yu.

Jesús càháⁿ-gá cuendá cue tée cùu fariséú ndihi cue tée dàcuaha ñaha xii-í ñáyiú (Mt. 23:1-36; Mr. 12:38-40; Lc. 20:45-47)

³⁷ Te òré ní ndihi tnúhu ní càháⁿ Jèsús, te ìⁿ tée cùu fariséú ní càháⁿ ñáhá-dé xii-gá vehe-dé caxi-gá, te cuànguihu-gá vehe-dé, te ní ngóo-gá mèsá.

³⁸ Te tée cùu fariséú-áⁿ ìo ní cuñúhu-dé, chí Jèsús ñá túú ní ndàha-gá nàcuáa sàni iní-güedé nduu vétú iní Yá Ndiòxí òré ní ngóo-gá caxi-gá dàtná quidé mèe-güedé.

³⁹ Te Jèsús ní xâhaⁿ-gá xii-dé:

—Nchòhó cue tée cùu fariséú xiní-ndo sá ìo ñáyiú nàquete sátá-ni tàsáⁿ ndihi sátá-ni còhó, te xití-xi càndehé caduha-ni. Te ducaⁿ sàtnahá-xi cùu nchohó, chí ndaha-ni-ndo nàquete-ndo, te iní-ndo ñá túú nduu ndoo, te nándi dándahú-ndo tnàha ñáyiú-ndo, te quèheⁿ-ndo sá ndécú ndihí-yu, te nándi-gá nchaa sá cuehé sá dúhá ñuhu iní-ndo quide-ndo.

⁴⁰ ¡Te nchòhó cùu-ndo cuè tée ìo ñá iní-xil ¿Te náa ñá túú cùtnuní iní-ndo sá Yá Ndiòxí Yaá ní cadúha yiqui cùñú-ó diu-ni-gá ní chihi-gá iní-ó-áⁿ?

⁴¹ Te nchaa sá vâha ndècu ndihi-ndo cuâha-ndo nchâa ñáyiú xiní ñuhu na cundecu ndihí-yu, te núu ducaⁿ na càda-ndo, te cuu-ndo ñáyiú sa ní nduu ndoo ní nduu nine iní-xi.

⁴² ¡Te ndàhú ní cuu nchaa nchòhó cue tée cùu fariséú! Chí sâha-ndo Yá Ndiòxí núú ùxí xichí yúcú nání mენტá, ndihi yúcú rúdá, ndihi nchaa dava-gá núú yúcú quèe comidá, dico ñá túú quide ndáá-ndo, te ní ñá túú ñuhu iní-ndo Yá Ndiòxí. Dico tnúhu càháⁿ-í-a tàù-ndo càda-ndo, te ní vâ dàñá ndèe-ndo càda-ndo nchaa dava-gá sá vâha.

⁴³ ¡Te ndàhú ní cuu nchòhó cue tée cùu fariséú! Chí cuiní-ndo cùnucóo-ndo núú sácóo cue tée ìo cùnuu xití veñúhu, te cuiní-ndo mèe-ni ndihi tnúhu yíñuhu càháⁿ ndihi ñaha ñáyiú xii-ndo nchâa núú xicá cùu-ndo.

⁴⁴ ¡Te ndàhú ní cuu nchòhó cue tée dàcuaha ñaha xii ñáyiú nchaa tnúhu ní chidó tnuní ndí Moisés, ndihi nchòhó cue tée cùu fariséú chí ìo dándahú-ndo mèe-ndo sá quidé ndáá-ndo te ñá ndáá sá quidé ndáá-ndo! Chí cùu-ndo datná ìⁿ ñáyiú ní xihí te ní nguindúxi, te ñá túú cùtnuní-gá ndèe yindúxi-yu, te cuèi nà yâha ñáyiú dico ñá túú

cùtnuní sá yindúxi ndíyi. Te ducaⁿ sàtnahá-xi cùu nchohó, chí nchaa ñáyiú ndèhe ñaha xii-ndo ñá túú cùtnuní iní-yu nchaa sá cuehé sá dúhá sàni iní-ndo —càchí-gá xâhaⁿ-gá xii-güedé.

⁴⁵ Te ní xâhaⁿ ìⁿ tée dàcuaha ñaha xii-yu nchaa tnúhu ní chidó tnuní ndí Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xicuehé-n áⁿ —càchí-dé xâhaⁿ-dè xii-gá.

⁴⁶ Te Jèsús ní xâhaⁿ-gá:

—¡Ndàhú ní cuu tnàhá nchaa nchòhó cue tée dàcuaha ñaha xii ñáyiú nchaa tnúhu ní chidó tnuní ndí Moisés! Chí quide-ndo datná quidé ñáyiú dàcuído ìⁿ tnaha ñáyiú-xi ìⁿ sá ìo vée, te mèe-yu ní lùha ñá túú cuiní-yu cuidó-yu. Te ducaⁿ sàtnahá-xi quide nchohó chí dānehé-ndo ñáyiú nàcuáa cadá-yu, dico mee-ndo chí ní lùha ñá túú cuiní-ndo càda-ndo nacuáa dānehé-ndo-yu.

⁴⁷ ¡Te ndàhú ní cuu tucu-ndo! Chí càdúha-ndo núú ní nguindúxi cue tée ní xóo càháⁿ tnúhu Yá Ndiòxí ndéé sanaha cuendá sá cúnaha-ndo núú yindúxi cue ndí, te diu-ni cue ñaní tnàhá-ndo ní sahani-güedé cue ndí.

⁴⁸ Te nchòhó sa nàha-ndo nacuáa ní quide cue ñaní tnàhá-ndo, te càchí-ndo sá ní quide vâha-güedé sá dúcáⁿ ní sahani-güedé cue ndí-áⁿ, te vitna càdúha-ndo núú ní nguindúxi cue ndí.

⁴⁹ Te Yá Ndiòxí ìo sàa nchaa sá xiní tnuní-gá, te ní cachi-gá sá dácàháⁿ-gá iní cue tée cuendá càháⁿ-güedé tnúhu-gá núú ñáyiú, te cada-güedé nchaa nacuáa cuiní-gá, te dava-güedé cahni ñáhá-yu xii-güedé, te dava-güedé ìo dandòho ñáhá-yu xii-güedé duha ní cachi-gá.

⁵⁰ Te nchaa ñáyiú ñuyú vitna tnàhá-yu nacháhu-yu núú Yá Ndiòxí cuendá sá ní sahani-güedé cue tée ní càháⁿ tnúhu-gá ndéé cùtnàhá ní ngáva ñuyú.

⁵¹ Te ndéé ndí Abél tée ní sahani-güedé ndéé díha nuu, ndihi ndéé ndí Zacàriá tée ní sahani-güedé ndéé núú ní ndihi-ná ndácáⁿ cuendá ñáhá Yá Ndiòxí núú ñáyiú ndècu ñuyú vitna, te diu ndí-áⁿ ní sahani-güedé mei tnúú veñúhu càhu sá ìo cùnuu, ndihi xito núú sácódo sá ndúú tãhú Yá Ndiòxí.

⁵² ¡Te ndàhú ní cuu tucu nchaa nchòhó cue tée dàcuaha ñaha xii ñáyiú nchaa tnúhu ní chidó tnuní ndí Moisés! Chí quide-ndo datná quidé ìⁿ tée tàxi tnuní ìⁿ vehe, chí nacadí-dé te ñá dàñá-dè quíhu ñáyiú te ní mèe-dé ñá túú quíhu-dé. Te ducaⁿ sàtnahá-xi quide-ndo, chí dàcuaha-ndo tnúhu Yá Ndiòxí te ñá túú cuiní-ndo quindáá iní-ndo te ní ñá túú dānehé-ndo ñáyiú cuiní tñi tnúhu-gá nacuáa tàù-xi cunduu cuendá naníhí tãhú-yu —càchí-gá xâhaⁿ-gá xii-dé.

⁵³ Te òré ní ndee Jèsús vehe tée cùu fariséú-áⁿ, te cue tée dàcuaha ñaha xii ñáiyu nchaa tnúhu ní chídó tnúni ndíi Moisés, ndíhi cue tée cùu fariséú ní cudééⁿ-güedé núú-gá, te ní ngüita-güedé nándi sá xicáⁿ tnúhú-güedé núú-gá cuendá cuini-güedé núu vá cuíta-gá ñⁿ tnúhu càháⁿ-gá

⁵⁴ cuendá ducaⁿ ñíhí-güedé nàcuáa cada-güedé cacáⁿ cuéchi-güedé cuendá-gá.

12

Jèsús càháⁿ-gá cuendá cue tée dàndahú méé-xí

¹ Te òré-áⁿ ní tacá titní mī ñáiyu núú ndécú Jèsús, te súúni dicó ngõnchihi tnàha-ná-yu. Te ndédóho-yu ní xáhaⁿ Jèsús xii cue tée xica cuu ndíhi-gá:

—Cada cuendá-ndó vǎ cáncícuⁿ ñihu-ndo nàcuáa quide cue tée cùu fariséú, chí cue tée-áⁿ ío dāndahú-güedé méé-güedé sá quidé ndǎá-güedé dico ñá ndǎá sá quidé ndǎá-güedé.

² Te nchaa tnúhu sá cúú yùhu ní cuu vá cúú yùhu-gá, chí nchaa dacuitíí sǎ quée túu-xi núú ñáiyu.

³ Chí nchaa tnúhu càháⁿ dayuhu-ndo quée túu-xi núú chítú núú tàcá, te nchaa tnúhu càháⁿ méé-ndó vèhe-ndo dacuitíí sǎ ñíhí ñáiyu tnúhu.

Yá Ndióxi xini ñuhu-xi yuhú-ó-gǎ (Mt. 10:26-31)

⁴ Te nchóhó cue tée ío váha tnàhá tnúhu ndíhi-í ná cǎchí tnúhu-í xii-ndo sǎ vǎ yùhú-ndó cué ñáiyu cuéi na cǎhni ñáhá-yu xii-ndo, chí ñi-ni yiqi: cùñú-ndó ndácú-yu cǎhni-yu, te ñá túú nǎgá ndacú-yu cada ñáhá-yu xii-ndo.

⁵ Te na cǎchí tnúhu-í xii-ndo sǎ Yá Ndióxi tàú-ndó yùhú-ndó-gǎ, chí mee-gǎ ío cùnuu-gǎ, te ñi-gǎ quidé-gǎ sǎ vǎ cùndècu-gǎ ñáiyu ñuyúí, te daquihíⁿ ñáhá-gǎ xii-yu núú ùhú núú ndàhú, núu xiǎⁿ cǎchí tnúhu-í xii-ndo sǎ Yá-áⁿ tàú-ndó yùhú-ndó-gǎ.

⁶ Te nchóhó xini-ndó sǎ ndéé úhúⁿ tnàhá tǐlaá cùyáhu-di núú úú díhúⁿ, dico Yá Ndióxi ñá túú cùnaa-gǎ ní ñⁿ-güedi, chí ñèhe cuendá ñáhá-gǎ xii-güedi.

⁷ Te nchóhó ndéé ñⁿ ñⁿ idi díquí-ndó yìndehu, núu xiǎⁿ cǎchí-í sǎ vǎ yùhú-ndó, chí cùnuu-gǎ-ndó dàcúúxí tǐlaá cuéi vǎi vihi-güedi.

Ñáiyu na dátúu núú dàva-gǎ ñáiyu sǎ ndécú ndíhi-yu Xitohó Jesucristú

(Mt. 10:32-33; 12:32; 10:19-20)

⁸ Te na cǎchí tnúhu-í xii-ndo sǎ núu na dátúu-ndo núú dàva-gǎ ñáiyu sǎ ndécú ndíhi ñaha-í xii-ndo. Te ducaⁿ te tnàhá yùhú Tée cùu ñaní tnàhá-ndó nchaa-ndo dátúu-í núú

nchaa cue espíritú xínú cuéchi núú Yá Ndióxi sǎ nchóhó ndécú ndíhi ñaha-ndo xii-í.

⁹ Dico núu na cùñaha-ndo xii ñáiyu sǎ ñá túú ndècu ndíhi ñaha-ndo xii-í, te ñi-ni ducaⁿ cada yùhú Tée cùu ñaní tnàhá-ndó nchaa-ndo, chí cùñaha-í xii cue espíritú xínú cuéchi núú Yá Ndióxi sǎ ñá túú ndècu ndíhi ñaha-í xii-ndo.

¹⁰ Te ndédani cǎa ñáiyu na càháⁿ cuéhé cuendá yùhú Tée cùu ñaní tnàhá-ndó nchaa-ndo, te cada cǎhnu iní ñáhá Yá Ndióxi xii-yu. Dico ñáiyu na càháⁿ cuéhé cuendá Espíritú Yá Ndióxi, te ñáiyu-áⁿ vǎ cadá cǎhnu iní ñáhá-gǎ xii-yu.

¹¹ Te òré ná cǎndeca ñaha-güedé xii-ndo quihíⁿ veñúhu, àdi núú cué tée cùchiuⁿ, te ñi vǎ cǎní iní-ndó núu nása cunduu tnúhu cùñaha-ndo xii-güedé, te ñi vǎ cǎní iní-ndó núu ná tnúhu nadānchocáva-ndo núu ná tnúhu na cùñaha-güedé xii-ndo.

¹² chí òré-nǎ te mee Espíritú Yá Ndióxi dacàhu iní ñáhá-xí xii-ndo tnúhu cùñaha-ndo xii-güedé —cǎchí-gǎ xáhaⁿ-gǎ xii-güedé.

Cuendá ñⁿ tée cuica

¹³ Te ñⁿ tée ñihu tnàhá tnuú ñáiyu-áⁿ ní xáhaⁿ-dè xii Jèsús:

—Mèstrú, cùñaha xii ñaní-í sǎ ná chidava-dé sǎ ní dǎndóo tǎtá-ndí cuu cuendá-ndí —cǎchí-dé xáhaⁿ-dè xii-gǎ.

¹⁴ Te Jèsús ní xáhaⁿ-gǎ xii-dé:

—¿Te ná cuendá ducaⁿ càháⁿ-n? Te ñá díú chiuⁿ-áⁿ vèxi-í cada-í, chí ñá díú tée cùchiuⁿ cuu-í —cǎchí-gǎ xáhaⁿ-gǎ xii-dé.

¹⁵ Te xáhaⁿ-gǎ xii nchaa ñáiyu xǐndecu-áⁿ:

—Nchaa nchóhó ñáiyu ndédóho nchaa tnúhu càháⁿ-í ío váha cada cuendá-ndó, te vǎ cǎní iní-ndó nándi nducu-ndo cùndecu ndíhi-ndo, chí cuéi vǎi vihi na ñíhí-ndó cùndecu ndíhi-ndo, dico vǎ chindèe ñaha-xi cudíi-ndo cùndecu-ndo ñuyúí-a —cǎchí-gǎ xáhaⁿ-gǎ xii-yu.

¹⁶ Te dàtnúni ní ngüita-gǎ cǎní-gǎ ñⁿ cuendú núu-yu cuendá tecú tnúni-yu tnúhu-gǎ, te xáhaⁿ-gǎ:

—Ñⁿ tée cuica súúni ní cuu nchaa tatá ní xitu-dé núú ñúhú-dé.

¹⁷ Te ní ngüita-dé sǎní iní-dé: “¿Te nása cada-í? Te ñá túú ndéé nataxúha-í nchaa sǎ ní xitu-í”, duha ní sani iní-dé.

¹⁸ Te dàtnúni ní sáha váha tucu-dé cuendá nàcuáa cada-dé, te ní cachí-dé: “Duha na cùnduu, dangoyo-í yacá-í, te ndada cǎhnu-gǎ-í, te xití-xi nataxúha-í nchaandi túhú sǎ ní xitu-í, ndíhi nchaa daga-gǎ sǎ ndécú ndíhi-í.

¹⁹ Te sǎtá dúcǎⁿ, te cachí-í: Ío vǎi sǎ ndécú ndíhi-í, te cudíi-xi cuéhé cuíá, te vitna nde-tatú-í, te coho-í te caxi-í cada-í, te nándi-gǎ

cada-í cuendá cudíí iní-í cundecu-í, duha quehaha-í”, cächí-dé.

²⁰ Dico Yá Ndióxi ní xáhaⁿ-gã xii-dé: “Yòhó, ñá túú nándíhi sá sání iní-n, chi yúhú cächí-í sá niú vitna cuú-n, te nchaa sá ndécú ndíhi-n ¿yoo cuu sá vâha xii-aⁿ-i?”, cächí-gã xáhaⁿ-gã xii-dé.

²¹ Duha yâha nchaa ñâyüu nândi sâni iní-xi cundecu ndíhi-xi ñuyüú-a, dico ñâyüu-áⁿ ío ndâhú-yu chi ñá túú nâ nduu táhú-yu núú Yá Ndióxi cundecu ndíhi-yu —cächí Jêsús xáhaⁿ-gã xii-yu.

Yá Ndióxi xitó-gã nchaa ñâyüu sândáá iní ñâhá xii-gã

(Mt. 6:25-34)

²² Te ní xáhaⁿ Jêsús xii cue tée xica cuu ndíhi-gã:

—Te na cächí tnúhu-í xii-ndo sã vâ ío cani iní-ndó núu nása cundecu-ndo, àdi nása níhí-ndó sã cáxi-ndó, àdi nása níhí-ndó dóó cuihnu-ndo.

²³ Chi cùnuu-gã méé-ndó dàcúúxí sá nchító-ndó, te ducaⁿ yiqui cuñú-ndó cùnuu-gã-xi dàcúúxí dóó sácuihnu-ndo.

²⁴ Te chí cuâha cuendá nâcuáa quide cue tícacá, chi ní ñá túú chíhi-güedi tatá cuu itú natahu-güedi te ní ñá túú ndéé nûtní yacá-güedi, te níhí-güedi xèxi-güedi, chí Yá Ndióxi xitó ñâha-gã xii-güedi. ¡Te nchòhó cùnûu-gã-ndó dàcúúxí nchâa cue quití ndava!

²⁵ Te cuèi nândi sá sání vîhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ñⁿ yiqui-gã.

²⁶ Te núu ní sã lúhá xiãⁿ ñá ndácú-ndó càda-ndo, ¿te ná cuendá ío sâni iní-ndó cuendá nchaa sá cuñí-ndó níhí-ndó cundecu ndíhi-ndo?

²⁷ Te chí cadá cuendá nâcuáa sâhnu ñⁿ tnu itá, chí ní ñá túú quide chiúⁿ-xi, te ní ñá túú quèheⁿ-xi idi. Te na cächí tnúhu-í xii-ndo sã ndí Salomón ío víi ní cãa nchaa sã ní xindecu ndíhi ndí, dico víi-gã tucu cãa nchaa itá dàcúúxí nchâa sã ní xindecu ndíhi ndí.

²⁸ Te cùhú sã ío vitna tnaa-ni cùdíi-xi te sâhmí-yu, te cuèi ducaⁿ dico ío víi càdúha Yá Ndióxi nchaa cùhú-ãⁿ. ¡Te nchòhó ío cùnûu-ndo dacúúxí nchâa cùhú-ãⁿ, núu xiãⁿ ío xito ñâha-gã xii-ndo, te dicó yica cùu iní-ndó sândáá iní-ndó-gã!

²⁹ Te vâ ío canchicúⁿ nihnu-ndo sã cóhó sã cáxi-ndó, te ní vâ dândíhú-ndó iní-ndó núu nása cada-ndo níhí-ndó.

³⁰ Chi nchaa ñâyüu ñá túú sândáá iní ñâhá xii Yá Ndióxi ducaⁿ mée-ni sã cóhó sã cáxi-yu xica nchicúⁿ nihnú-yu. Dico mee Tãtá-ó Dütú Ndióxi sa ñâha-gã nândi cùu sã xini ñûhu-ndo, te taxi-gã.

³¹ Te cada-ndo nchâa nacuáa càháⁿ Yá Ndióxi Yá yindâha ñâha xii-ndo, te ducaⁿ te taxi-gã nchaa sã xini ñûhu-ndo.

Cuendá sã vâha nduu táhú-ó núú Yá Ndióxi

(Mt. 6:19-21)

³² Te vâ yúhú nchòhó cue tée ndècu ndíhi-í cuèi ío sacú-ndó, chí Tãtá-ó Dütú Ndióxi ní cächí-gã sã ndúú táhú-ndó cundecu-ndo núú ndécú-gã taxi tnúni-ndó tnâhá-ndó.

³³ Te chí dicó nchâa sã ndécú ndíhi-ndo, te chí cuâha nchaa ñâyüu ndâhú díhúⁿ-ndó ñâyüu xini ñûhu, te cada vâha-ndo cundecu-ndo, te ducaⁿ te nduu táhú-ndó sã ío-gã vâha núú Yá Ndióxi cundecu ndíhi-ndo, te xiãⁿ vâ cúú túhú tnâhí-gã-xi, te ní vâ ndíhí nihnu-gã-xi, te ní ñâdúhú vâ ndácú-güedé duhu-güedé, te ní tíquidi vâ queé-dí.

³⁴ Te núu xiãⁿ cúú cuendá-ndó ñá, te díu-ni xiãⁿ ñûhú iní-ndó, áⁿ te núu mee-ni sã ndécú ñûyüú-a ndècu ndíhi-ndo, te díu-ni nchaa xiãⁿ ñûhú iní-ndó.

Xini ñûhu-xi quíhi iní-ó cundecu-ó

³⁵⁻³⁶ Te ío quíhi iní-ndó cundecu-ndo, te cada-ndo dàtná quidé dâva cue tée xinu cuechi sacundecu túha-güedé cuèi nâni òré-áⁿ ndétú-güedé pãtróoⁿ-güedé ná òré nasáá-dé sã cuâháⁿ-dé vico tnândaha. Te núu niú te sa cúu cáyú-ni ñûhú-güedé sã cündètu ñâha-güedé, chí òré ná nasáá-dé dacâsaⁿ-dé yuyèhe, te ndíhi-ni nacaáⁿ-güedé ndíhu-dé.

³⁷ Te vâha táhú nchaa cue tée xinu cuechi-áⁿ, chí ndècu túha-ni-güedé ndétú-güedé ndéé òré ní nasáá pãtróoⁿ-güedé, te na cächí tnúhu ndáá-í xii-ndo sã òré ná nasáá pãtróoⁿ-güedé-áⁿ te chíhi ñâha-dé mésá xii-güedé, te ndacáⁿ ndee-dé dóó níhnu-dé núu yiquí-dé, te ngüita-dé cani-dé cóhó-güedé cuendá caxi-güedé.

³⁸ Te díu-ni ducaⁿ càda-dé cuèi dâva niú, àdi taculíhndá-gã, te núu ñá túú xidí-güedé òré nasáá-dé, te cue tée xinu cuechi-áⁿ ío vâha tnâhá-güedé.

³⁹ Te núu dicó ñⁿ tée cùu xitohó ñⁿ vehe xini-dé ná òré quíhu ñadúhú vehe-dé ñá, te quíhi iní-dé te vâ cùdú-dé, te vâ dáñá-dé nacaáⁿ-güedé yuyèhe-dé quíhu-güedé duhu-güedé.

⁴⁰ Te nchòhó tucu nchaa-ni nduu quíhi iní-ndó cundecu túha-ndo, chí na cuâháⁿ nduu ñá túú yíhi iní-ndó, te quixi tucu yúhú Tée cùu ñani tnâhá-ndó nchâa-ndo —cächí-gã xáhaⁿ-gã xii-güedé.

Cue tée quide ndáá ndíhi cue tée ñá túú quide ndáá

(Mt. 24:45-51)

⁴¹ Te té Pèlù ní xícáⁿ tnúhú-dě núú Jèsús, te xáhaⁿ-dè:

—Mèstrú, ¿te tnúhu ní cáháⁿ-n-ǎⁿ cùu-xi mee-ni cuendá nchúhú ǎⁿ cuèndá nchaa ñáyíu? —càchí-dé xáhaⁿ-dè xii-gá.

⁴² Te Jèsús ní xáhaⁿ-gá:

—Càháⁿ-í cuèndá ñáyíu quide váha dàtná quidé ìⁿ tée tàxi tnuní ñáhá xii cue ñáyíu xínu cuechi ndecu vehe patróóⁿ-xi, chí tée-áⁿ ío váha tècú tnùní-dé, te quide-dé nchaa nàcuáa cáháⁿ patróóⁿ-dè, te dàcaxi-dé cue ñáyíu xínu cuechi oré tàú-xi caxí-yu.

⁴³ Te núu ducaⁿ quide váha tée tàxi tnuní ñáhá xii cue ñáyíu xínu cuechi-áⁿ ñá, te ío váha tnàhá-dé oré násáá patróóⁿ-dè núu ndéè cuáháⁿ-dè.

⁴⁴ Te na càchí tnúhu ndáá-í xii-ndo sǎ tée quide ndáá táxi tnùní ñáhá xii cue ñáyíu xínu cuechi-áⁿ cùñaha-nǎ patróóⁿ-dè xii-dé sǎ ncháándí túhú-nǎ sǎ ndécú ndíhi-dé quindaha-dè.

⁴⁵ Dico núu tée tàxi tnuní ñáhá xii cue ñáyíu xínu cuechi-áⁿ ná caní iní-dé sǎ cùyáa patróóⁿ-dè vá násáá ndíhi-ni-dé ñá, te ngúíta-dé caní-dé nchaa ñáyíu xínu cuechi, cuèi tée cuèi ñadíhí, te ngúíta-dé caxi-dé coho-dé, te dàxini-dé mée-dé,

⁴⁶ Te nduu ñá túú yíhi iní-dé te nasáá patróóⁿ-dè, te dandòho ñaha patróóⁿ-dè-áⁿ xii-dé, te daquihíⁿ ñáhá-dè xii-dé núu ndécú ñáyíu ñá túú ní quide ndáá.

⁴⁷ Te dava cue tée xínu cuechi xiní-güedé nàcuáa cuiní patróóⁿ-güedé cada-güedé te ñá túú quide-güedé, te ní ñá túú cuiní-güedé cundecu túha-güedé cundetu-güedé patróóⁿ-güedé, te nchaa cue tée ducaⁿ xiquide dandòho ñaha patróóⁿ-güedé, chí ñáni víhi-güedé.

⁴⁸ Te dava cue tée xínu cuechi ñá túú xiní-güedé nàcuáa cuiní patróóⁿ-güedé cada-güedé, te ní quide-güedé sǎ néñùu-güedé ìⁿ sǎ ñá túú tàú-güedé cada-güedé ñá, te cue tée-áⁿ sacú-gá dandòho ñaha patróóⁿ-güedé, chí sacú-gá ñáni-güedé. Te ñáyíu cùtnuní iní-xi nàcuáa cuiní Yá Ndióxi cadá-yu, te diu-ni ducaⁿ tàú-yu cadá-yu nàcuáa cuiní-gá. Te ñáyíu vai-gá tècú tnùní nàcuáa càháⁿ-gá, te diu-ni ducaⁿ vai nchaa sǎ càháⁿ-gá tàú-yu cadá-yu.

Ñá túú cùu ìⁿnuu ñáyíu

(Mt. 10:34-36)

⁴⁹ Te yúhú véxi-í ñuyíú-a cuèndá cutnùní iní ñáyíu nàcuáa cada ñaha Yá Ndióxi xii-yu, ¿te cuiní-í sǎ ndíhi-ni cada-gá nàcuáa sàni iní-gá!

⁵⁰ Te yúhú ío vai tnúhu sàni iní-í, ¿chi sǎá nduu te ío ndoho-í, te diu-ni xiǎⁿ cuhuⁿ iní-í ndéè ná sǎá nduu dùcaⁿ yáha-í!

⁵¹ Te nchòhó vá caní iní-ndó sǎ yúhú véxi-í ñuyíú-a te cundecu ndíhi tnàha váha-ni

ñáyíu, te ñáhá chi dá ngúíta-yu vá cùú ìⁿnuú-yu cundecú-yu.

⁵² Te ndéè není vitna ngúíta ñáyíu vá cùú ìⁿnuú-yu cundecú-yu, te na càda-o cuendá te núu úhúⁿ ñáyíu xíndecu ìⁿ-ni véhe, te vá cùú ìⁿnuu-gá-yu, chí úní-yu ndatnúhu-yu te nàá-yu ndíhi úú-gá-yu, àdi ñáyíu úú-áⁿ ndatnúhu-yu te nàá-yu ndíhi ñáyíu úní-áⁿ.

⁵³ Te dava cue tée cùu tátá vá cùú ìⁿnuu-gá-güedé ndíhi déhe ducuⁿ-güedé, te ní dáva cue ñáyíu cùu náná vá cùú ìⁿnuu-gá-yu ndíhi déhe yócó-yu, te ní sǎnu-yu vá cùú ìⁿnuu ndíhi-gá-yu. Te ducaⁿ cadá-yu chí davá-yu quindáá iní ñáhá-yu xii-í, te davá-yu vá quindáá iní ñáhá-yu —càchí-gá xáhaⁿ-gǎ xii-güedé.

Ñáyíu cùtnuní iní-xi nàcuáa quide-xi ñuyíú ndíhi andíu

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gǎ xii nchaa ñáyíu xíndecu-áⁿ:

—Te nchòhó oré ndéhé-ndó ndànchita vícò ndáa xio quèe nchicanchii, te càchí-ndó sǎ cùúⁿ dàú, te diu ducaⁿ ndísa quide-xi.

⁵⁵ Te oré ná quèe táchí ndáa xio datni nàcuáa quèe nchicanchii, te càchí-ndó sǎ ío cada ihní-xi, te diu ducaⁿ ndísa quide-xi.

⁵⁶ Te nchòhó ío váha cùtnuní iní-ndó nàcuáa quide-xi andíu ndíhi ñuyíú, ¿te ná cuèndá quidé-ni-ndó sǎ ñá tècú tnùní-ndó nàcuáa quide Yá Ndióxi vitna? Te sǎ dúcáⁿ quide-ndo-áⁿ ío dándahú-ndó mèe-ndo sǎ ío váha cùtnuní iní-ndó, chí ñá ndáá sǎ cùtnuní iní-ndó.

Nducu-o nàcuáa nucúndecu ndíhi váha-o ñáyíu cùu úhú iní ñáhá

(Mt. 5:25-26)

⁵⁷ Te nchòhó, ¿ná cuèndá ñá túú dándixi túu-ndo iní-ndó càda-ndo mee-ni sǎ váha sǎ tàú-ndó càda-ndo-í?

⁵⁸ Te núu ío ìⁿ-ndo ní sacáⁿ cuèchi ñáyíu cuèndá-ndó cuèndá ìⁿ sǎ ní quide-ndo, te cuáháⁿ-ndó ndíhi-yu núú tée cùchiuⁿ, te nini ñùhu-ndo ndíhi-yu ichi, te nducu-ndo nàcuáa cada-ndo nàcáháⁿ cáhmú iní tnáhá-ndó ndíhi-yu cuèndá sǎ vá cándèca ñaha-gá-yu quíhíⁿ núú tée cùchiuⁿ, chí núu ducaⁿ na cadá-yu te tée cùchiuⁿ-áⁿ nachíhi ñaha-dè ndaha cue tée cùu poleciá, te cue tée-áⁿ chíhi ñaha-güedé veacaá xii-ndo.

⁵⁹ Te na càchí tnúhu-í xii-ndo sǎ núu na ngáva-ndo veacaá, te vá càcu-ndo te núu vá nácháhu-ndo nchaa sǎ tàú-ndó —càchí-gá xáhaⁿ-gǎ xii-yu.

13

Xini ñuhu-xi natuha-o ichi Yá Ndióxi

¹ Te diu-ni oré-áⁿ ní ngúnutnii ìⁿ úú ñáyíu núú Jèsús caní-yu cuèndú núú-gǎ nàcuáa

ní quide ñaha té Pilatú xii cue tée distritú Galileá cue tée ní sahani quiti nduu táhú Yá Ndióxi, te mei òré ní sahani-güedé cue quiti-áⁿ ní táuchíúⁿ tē Pilatú cue sandadú-dé ní sahani-güedé cue tée Galileá-áⁿ, te ní xica níñi-güedé núú ñuhu ndihi níñi cue quiti-áⁿ, te ní nadacánuu-xi.

² Te Jèsús ní xáhaⁿ-gá xii-yu:

—Te núu nchòhó sání ínì-ndó sá sá dúcáⁿ ní yáha cue tée distritú Galileá-áⁿ te cùu-güedé cue tée ndecu vihi-gá cuéchi-xi dàcúúxí cué tée ñuú-güedé ñá.

³ Te na cächí tñúhu-í xii-ndo sá ñáhá. Te núu nchòhó vá ndíxí cuéchi ínì-ndó cuendá nchaa sá cuéhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátni-ndo ichi Yá Ndióxi.

⁴ Te núu nchòhó sání ínì-ndó sá ñáyiú sáhúⁿ únì ní xihí ní táú ñáhá vèhe ducúⁿ Silòé ío-gá ndécú cuéchi-yu dàcúúxí nchaa ñáyiú xindecu ñuú Jerusalén ñá,

⁵ te na cächí tñúhu tucu-í xii-ndo sá ñáhá. Te núu nchòhó vá ndíxí cuéchi ínì-ndó cuendá nchaa sá cuéhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátni-ndo ichi Yá Ndióxi —cächí-gá xáhaⁿ-gá xii-yu.

Yutnu ngüxi ñá túú cùuⁿ sávidí-xi

⁶ Te Jèsús ní cani tucu-gá ñⁿ cuendú núu-yu nàcuáa tecú tñuní-yu tñúhu-gá, te xáhaⁿ-gá:

—Ñⁿ tée nùtní ñⁿ yutnu ngüxi núú ñúhú-dé, te cuáháⁿ ndéhé-dé núu ní cuuⁿ sávidí-xi ní cùu, te ní ñⁿ ñá túú ní cùuⁿ.

⁷ Te ní xáhaⁿ tée-áⁿ xii tée ndèé ñuhu-dé: “Ñaha-n sá vitna ní cuu únì cuíá quixí còto-í yutnu ngüxi-a te ñá túú xini-í ní ñⁿ sávidí-xi. Te quehndé-n vitna, chí áúⁿ ñá cuu nùtní-xi quide tñeñu-xi núú ñuhu-áⁿ”, cächí-dé xáhaⁿ-dè xii tée ndèé ñuhu-dé-áⁿ.

⁸ Te tée ndèé ñuhu-áⁿ ní xáhaⁿ-dè: “Pàtróón, dañá na cuihnu-xi cuíá vitna-ná, te na nàdatayá-í ñuhu núú sáhá-xi, te chíhi-í saháⁿ”.

⁹ Te ducaⁿ te cudana cuuⁿ sávidí-xi, àdi núu ñá túú ní cùuⁿ sávidí-xi ña te téhndé-ná-xi”, cächí-dé xáhaⁿ-dè xii pàtróón-dè —cächí-gá xáhaⁿ-gá xii-yu.

Jèsús quidé tātna-gá ñⁿ ñadhí ní nduu cueyi sātá-xi nduu ndetátú ñáyiú

¹⁰ Te ñⁿ xito cùu-xi nduu ndetátú ñáyiú, te yihí Jèsús ñⁿ veñúhu dànehé-gá ñáyiú.

¹¹ Te xiáⁿ ndécú ñⁿ ñadhí ní cuu sáhúⁿ únì cuíá sá cùhú-aⁿ yihí ñaha espíritu cündihí yuca ñávaha xii-aⁿ, te xiáⁿ ní ndada cueyi-xi sātá-aⁿ, te ñá dáñá-gá-xi nucuntní ndáá-aⁿ.

¹² Te òré ní xini ñáhá Jèsús xii-aⁿ te ní cana ñaha-gá, te xáhaⁿ-gá:

—Yòhó ñaha cùhú, ndúha-n cuéhé tnàhá-n —cächí-gá xáhaⁿ-gá xii-aⁿ.

¹³ Te ní dácaá-gá ndaha-gá ní tendaha ñaha-gá xii-aⁿ, te òré-ni-áⁿ ní ndúha-aⁿ te ní nucuntní ndáá-aⁿ, te ní ngüita-aⁿ ní cächí-aⁿ sá ío càhnu cuu Yá Ndióxi.

¹⁴ Dico tée tàxi tñuní veñúhu ní cudééⁿ-dè sá dúcáⁿ ní quide Jèsús ní quide tātna-gá ñaha cùhú-áⁿ nduu ndetátú-yu, te ní xáhaⁿ-dè xii-yu:

—Íó ñúu nduu tàú-ó càda chiúⁿ-o, te ndédani càa nduu-áⁿ quixi-ndo cutátna-ndo, dico ñá díú nduu cuu-xi nduu ndetátú-ó —cächí-dé xáhaⁿ-dè xii-yu.

¹⁵ Te ní xáhaⁿ Jèsús:

—Nchòhó chí ío dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ñáa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó áⁿ?

¹⁶ Te ñadhí-a cùu-aⁿ ñani tnàhá ndíi Ábrahám, te dicó-ni sá yücu ñávaha quide duha cùhú-aⁿ ní cuu sáhúⁿ únì cuíá, ¿te ñáa ñá túú xini ñuhu-xi cutátna-aⁿ cuéi cùu-xi nduu ndetátú-ó áⁿ? —cächí-gá xáhaⁿ-gá xii-dé.

¹⁷ Te sá dúcáⁿ ní cáháⁿ Jèsús, núu nchaa cue tée cùu úhú ínì ñáhá xii-gá ní cucahaⁿ núú-güedé, dico nchaa dava-gá ñáyiú chí xicudí ínì-yu xindéhé-yu nchaa sá vā yòo tnáhi ndacu cada quide-gá.

Cuendá ndíquíⁿ yutnu nani mostázá

(Mt. 13:31-32; Mr. 4:30-32)

¹⁸ Te ní xáhaⁿ-gá xii-yu:

—Na caní-í ñⁿ cuendú núú-ndó nàcuáa tecú tñuní-ndó nàcuáa cada-xi òré ndíhu ndaha ñaha Yá Ndióxi xii-ndo.

¹⁹ ñⁿ tée ní queheⁿ-dè ndíquíⁿ yutnu nani mostázá te nèhe-dé cuáháⁿ ní sacáⁿ-dé núú ñúhú-dé te ní xínu-xi, te ní sahnú-xi ní cuu dúcúⁿ-xi, te cue quiti ndava núú tàchi cádúha-güedi tacá-güedi núú dité-xi —cächí-gá xáhaⁿ-gá xii-yu.

Nàcuáa quide levadurá

(Mt. 13:33)

²⁰ Te ní xáhaⁿ tucu Jèsús xii-yu:

—Te na cächí tñúhu tucu-í xii-ndo nàcuáa cada tucu Yá Ndióxi òré ndíhu ndaha ñaha-gá xii-ndo.

²¹ ñⁿ ñadhí ní queheⁿ-aⁿ levadurá ní chíhi-aⁿ únì arróbá yuchi triú, te levadurá-áⁿ ní quide-xi ní ndaa nihíi yusaⁿ-áⁿ —cächí-gá xáhaⁿ-gá xii-yu.

Yuyèhe cuiñi

(Mt. 7:13-14, 21-23)

²² Te ichi ñuhu Jèsús cuáháⁿ-gá ñuú Jerusalén, te nchaa ñuú náhnú, ndíhi nchaa ñuú líhli ta yáha-gá ducaⁿ ta dànehé-gá ñáyiú tñúhu-gá cuáháⁿ.

²³ Te ñⁿ ñuú-áⁿ ní xáhaⁿ ñⁿ tée xii-gá:

—Mèstrú, cuiñí-í cacán tnúhu-í ìn tnúhu núu-n, ¿ndáá sá io sacú ñáyiú nàníhí tãhú-án? —cächí-dé xãhaⁿ-dê xii-gá.

Te Jèsús ní xãhaⁿ-gá xii-dé ndihi nchaa ñáyiú:

²⁴ —Cada-ndo sã nánihí tãhú-ndó, te tnú-ndo ichi Yá Ndióxi, te ichi-gá-án cuú-xí dàtná ìn yuyèhe cuiñí, te cächí tnúhu-í xii-ndo sã io cuéhé ñáyiú cachí iní-yu quíhu-yu yuyèhe cuiñí-án dico vá ndácú-yu.

²⁵ Te na cãni tucu-í ingá cuèndú núu-ndo nàcuáa tecú tnúni-ndó tnúhu cãháⁿ-í. Te óré ná ndacuñí tée cùu xitohó vehe, te nacadí-dé yuyèhe, te nchaa nchòhó ñáyiú na quèndóo quehé dacãsaⁿ-ndo yuyèhe, te quesaha-ndo cũñaha-ndo xii-dé: “Tátá, nacaán yuyèhe na quíhu-ndí”, quesaha-ndo cũñaha-ndo xii-dé. Dico tée cùu xitohó vehe-án cũñaha-dê xii-ndo: “Ná túú xini-í nchòhó ndèé ñáyiú cùu-ndo”, duha cũñaha-dê xii-ndo.

²⁶ Te dàtnúni nguíta nchòhó cũñaha-ndo xii-dé: “Nchúhú ní xexi ndihi ñaha-ndí, te ní xihí ndihi ñaha-ndí xii-n, te nchaa ichi ní xóo dacuaha ñaha-n xii-ndí”, quesaha-ndo cũñaha-ndo xii-dé.

²⁷ Dico cachí tucu tée cùu xitohó vehe-án cũñaha-dê xii-ndo: “Sa ní cachí-í sã ñã túú xini-í ndèé ñáyiú cùu-ndo. Te chí xócuñí nchòhó ñáyiú ndècu ichi cuehé ichi duha núu ndècu-í”, quesaha-dê cũñaha-dê xii-ndo.

²⁸ Te na sáá nduu òucaⁿ cada-xi te quini-ndó tã Abrahám, ndihí tã Isáac, ndihí tã Jácob, ndihí nchaa cue tée ní xóo cãháⁿ tnúhu Yá Ndióxi, te nchaa cue tée-án ndécú-güedé núu ndécú-gã táxi tnúni-gã, te nchòhó quee tihú-ndó núu-gã sã tnúhu ñã túú ní cuiñí cada ndáá, te dává-án ndãhyú-ndó te cuu rúhñú-nã núhu-ndo sã sãtú iní-ndó cuèndá sã ndóhó-ndó.

²⁹ Te dává-án quíhu nchaa ñáyiú ndi cùmi xio ñuyúú núu ndécú Yá Ndióxi táxi tnúni-gã caxí-yu ndihí-gá, te cundecú-yu ndihí-gá.

³⁰ Te dava ñáyiú nchicúⁿ ñã túú cùnuu ndecu ichi Yá Ndióxi vitna, ñáyiú-án sáá nduu te ío cunúu-yu. Te dava ñáyiú cùnuu ndecu ichi-gá vitna, ñáyiú-án sáá nduu te vá ío-gá cunúu-yu —cächí-gá xãhaⁿ-gá xii-yu.

Jèsús ndãhyú-gá cuèndá ñáyiú ñuu Jerusálén

(Mt. 23:37-39)

³¹ Te diu-ni nduu-án ñi quexio ìn úú cue tée cùu fariséu núu ndécú-gã, te xãhaⁿ-güedé xii-gá:

—Quee-n ìha quíhíⁿ-n núu ndèé quíhíⁿ-n, chí tée cùu Herodés cuiñí-dé cahni ñaha-dê xii-n —cächí-güedé xãhaⁿ-güedé xii-gá.

³² Te Jèsús ní xãhaⁿ-gá:

—Chí cuahán te cũñaha-ndo xii tée nèhe mañá-án sã cächí-í sã ná cùndedóho váha-dé

ìn tnúhu cãháⁿ-í, chí cùmání ìn úú-gá nduu cundecu-í xocãni-í nchaa espíritu cùndihí yucu ñávãha yihí ñaha xii ñáyiú, te cada tátna-í nchaa dava-gã ñáyiú cùhú, te ducaⁿ te ndihí chiuⁿ-í, duha cũñaha-ndo xii-dé.

³³ Dico dacuítí sã cùhúⁿ-í ichi ìn úú-gá nduu, te ducaⁿ te sáá-í núu quíhíⁿ-í, chí vá cuú tnãhí cuú ìn tée cãháⁿ tnúhu Yá Ndióxi ingá ñuu, chí mei ñuu Jerusálén cuú-güedé —cächí-gá xãhaⁿ-gá xii-güedé.

³⁴ Te ní xãhaⁿ-gá xii ñáyiú ñuu Jerusálén:

—Nchòhó chí sãhni-ndo nchaa cue tée cãháⁿ tnúhu Yá Ndióxi, cue tée ní tendaha-gã véxi, te mee-ni ndihí yúú sãhni-ndó-güedé. ¡Te titní xito ní cuiñí-í nadatácá ñãhá-í xii-ndo dàtná nádatacá ìn nchuxi cuè déhe-di sãquihí-güedi xiti ndíxíⁿ-di, dico ñã ní cuiñí-ndó, te ducaⁿ-ni sãni iní-í ndéé vitna!

³⁵ Te chí cùndedóho tucu ingá tnúhu na cãháⁿ-í-a: Yá Ndióxi daña ñaha-gã xii-ndo. Te na cächí tnúhu tucu-í xii-ndo sã vá quini ñãhá-gã-ndó xii-í, dico sáá nduu te quini ñãhá tucu-ndo, te nduu-án cachí-ndó sã ío cãhnu cuu yúhú Yáá ní tendaha Dütú Ndióxi véxi ñuyúú-a —cächí-gã xãhaⁿ-gá xii-yu.

14

Jèsús quidé tátna-gá ìn tée ñuhu cuiñí

¹ Te duha ní cuu ìn nduu, nduu ndetátú ñáyiú chí ìn tée cùu fariséu cùnunu ní cãháⁿ-dê Jèsús vehe-dé caxi-gá, te cue tée ndècu vehe-dé ndéhé-güedé núu nása cada-gá.

² Te xíáⁿ ndécú tnãhá ìn tée cùhú ñúhú-dê cuiñí.

³ Te Jèsús ní xicáⁿ tnúhú-gã núu cuè tée dàcuaha ñaha xii ñáyiú nchaa tnúhu ní chidó tnúni ndíi Moisés, ndihí núu cuè tée cùu fariséu, te xãhaⁿ-gã:

—¿Cuu cada tátna-o ìn ñáyiú cùhú nduu ndetátú-ó ã ñãhá? —cächí-gã xãhaⁿ-gã xii-güedé.

⁴ Dico cue tée-án ñã túú tnãhí ní cãháⁿ-güedé. Te ní dacáá-gã ndaha-gã ní tendaha-gã tée cùhú-án ní quide tátna ñaha-gã xii-dé, te ní xãhaⁿ-gã sã ná ñuhú-dé vehe-dé.

⁵ Te ní xicáⁿ tnúhú-gã núu nchaa cue tée-án, te xãhaⁿ-gã:

—¿Te núu nchòhó ná ngáumihnu ìn búrru-ndo ãdi ìn ndicutu-ndo déhvã, te vá ná tàva ndíhí-ni-ndo-di cuèi cùu-xi nduu ndetátú-ndó-án? —cächí-gã xãhaⁿ-gã xii-güedé.

⁶ Te ñã túú ní ñihí-güedé tnúhu na dànhocáva-güedé.

Ñáyiú cãháⁿ-yu quíhíⁿ vico tnãndaha

⁷ Te ndèhe Jèsús nàcuáa xiquide nchaa ñáyiú ndècu vico sã súuni ñi nacáxi-yu xilé sácóo nchihí cue tée cùnmu-gã conchihí-yu

òré cuànguihú-yu mèsá caxí-yu, núu ní xáhaⁿ-gã xii-yu:

8 —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóó-ndó núú xilé sácóo cue téé cùnno-gá, chí núú ducaⁿ na càda-ndo, te cudana quexio dava-gá ñáyiú cùnno-gá dàcúúxí nchòhó.

9 Te ñáyiú ní càháⁿ ñáhá xii-ndo-áⁿ quixí-yu te cùñàhá-yu xii-ndo: “Chí cuñàhá xilé núcòo nchihi-ndo-áⁿ ná còncihihi ñáyiú ní quexio-a”, quesàhá-yu cùñàhá-yu xii-ndo. Te cuini-ndó ñáhá cuèi cùcahaⁿ núú-ndó ndàcuiñí-ndó quíhíⁿ-ndó ngòo-ndo núú xilé xinutnii ndéé núú ní ndihi-ná ndàa sátá-xi.

10 Te yúhú cächí-í sá òré ná càháⁿ ñáhá-yu xii-ndo, te ngòo-ndo núú xilé xinutnii ndéé núú ní ndihi-ná ndàa sátá-xi chí cuendá òré ná quèxio ñáyiú ní càháⁿ ñáhá xii-ndo, te cùñàhá-yu xii-ndo: “Nchòhó cue ñáyiú càháⁿ ndihi-í, chí yáha núú xilé sácóo cue téé cùnno-gá coo-ndo”, duha cùñàhá-yu xii-ndo. Te ducaⁿ te cada níno ñaha nchaa ñáyiú yíhi ndihi-ndo mesá.

11 Te nchaa ñáyiú na càda níno mee-xi, te ñáyiú-áⁿ ñà túú cùu níno-yu, te nchaa ñáyiú ñà túú quide níno mee-xi, ñáyiú-áⁿ cùú níno-yu —cächí-gá xáhaⁿ-gã xii-yu.

12 Te dàtnùni ní xáhaⁿ-gã xii téé ní càháⁿ ñáhá xii-gá:

—Te yòhó òré cuini-n càda-n ìⁿ vico, te vá càháⁿ-n mèe-ni cue téé càháⁿ ndihi-n, ni cuè ñani-n, ni cuè ñáyiú cùu ñani tnáhá-n, ni cuè ñáyiú cuica ndècu yatni ndihi-n, chí ñáyiú-áⁿ ducaⁿ càdá-yu ìⁿ nduu càháⁿ ñáhá-yu xii-n te ndéyáhu-ni sá ní quidé-n-yu.

13 Te ñáhá chí òré ná càda-n ìⁿ vico, te càháⁿ-n ñáyiú ndàhú, ndihi ñáyiú ñà cùú càca, ndihi ñáyiú yacua, ndihi ñáyiú cuáá.

14 Te núú ducaⁿ na càda-n, te cuu-xi ìⁿ sá vaha xii-n, chí ñáyiú-áⁿ vá nihí-yu nacoto ñáhá-yu xii-n, dico na cùú-n te sáá nduu ndòto-n ndihi nchaa ñáyiú ní quide ndáá ní xindecu ichi Yá Ndiòxi, te dàvá-áⁿ taxi-gá sá ndúú tàhú-n —cächí-gá xáhaⁿ-gã xii-dé.

Nàcuáa xiquide ñáyiú òré càháⁿ ñáhá ìⁿ téé cada vico

(Mt. 22:1-10)

15 Te sá dúcáⁿ ní càháⁿ Jèsús ní tecú dóho cue téé yíhi mesá-áⁿ, núú ní xáhaⁿ ìⁿ-dé xii-gá:

—Ío váha tàhú nchaa ñáyiú na càxi nchaa sá cuáha ñaha Yá Ndiòxi nduu na sáá-yu cundecú-yu núú ndècú-gá táxi tnùni-gá —cächí-dé xáhaⁿ-dè xii-gá.

16 Te Jèsús ní xáhaⁿ-gã xii-dé:

—Hⁿ téé quide-dé vico, te ní dátècú tnúhu-dé cuéhé víhi ñáyiú quíhíⁿ-yu caxí-yu.

17 Te òré sa ní cuu-ná sá caxí-yu, te ní xáhaⁿ-dè xii téé xinu cuechi núú-dé sá

quíhíⁿ-dé cùñaha-dè quíhíⁿ-yu caxí-yu, chí sa ndècu túha nchaa sá caxí-yu.

18 Dico nchaa-yu ní xáháⁿ-yu xii-dé sá ná càdá càhnu iní téé càháⁿ ñáhá-áⁿ, chí ñà túú cùyáchí-yu quíhíⁿ-yu vico-áⁿ. Te téé ní càháⁿ ndihi téé xinu cuechi-áⁿ díhna ní xáhaⁿ-dè: “Íchí ní saaⁿ-í ìⁿ pedàsú ñuhu, te quíhíⁿ ndéhé-í tnaví, núú xiáⁿ càháⁿ ndàhú-í núú-n sá cùñaha-n xii téé càháⁿ ñáhá-áⁿ xii-í sá ná càdá càhnu iní-dé chí ñà túú cùyáchí-í”, cächí-dé xáhaⁿ-dè.

19 Te ingá-dé ní xáhaⁿ-dè: “Ní saaⁿ-í úhúⁿ yùnda ndicutu sa xitu, te cue quiti-áⁿ quíhíⁿ-í coto ndeé-í-güedi vitna, núú xiáⁿ càháⁿ ndàhú-í núú-n sá cùñaha-n xii téé càháⁿ ñáhá-áⁿ xii-í sá ná càdá càhnu iní-dé chí ñà túú cùyáchí-í”, cächí-dé xáhaⁿ-dè.

20 Te ingá tucu-dé ní xáhaⁿ-dè: “Íchí ní tnándaha-í núú xiáⁿ vá cùyáchí-í quíhíⁿ-í”, cächí-dé xáhaⁿ-dè.

21 Te òré ní nasáá téé xinu cuechi-áⁿ, te ní nacani tnúhu-dé núú patróoⁿ-dè nchaa nàcuáa ní xáháⁿ-yu. Te ní cudéⁿ téé cùu patróoⁿ-áⁿ, te ní xáhaⁿ-dè xii téé xinu cuechi núú-dé-áⁿ: “Yáchí cuáháⁿ nanducu-n nchaa ñáyiú ndàhú, ndihi nchaa ñáyiú ñà cùú càca, ndihi nchaa ñáyiú yacua, ndihi nchaa ñáyiú cuáá, te ndèni ní cuu na nanihí-n-yu te candècá-n-yu quixi”, cächí-dé xáhaⁿ-dè.

22 Te sátá ní nasáá téé xinu cuechi-áⁿ, te ní xáhaⁿ-dè xii patróoⁿ-dè: “Patróoⁿ, sa ní quide-í chiⁿ ní tàhú-n, dico ndècu-gá núú cóo-yu”, cächí-dé xáhaⁿ-dè.

23 Te téé cùu patróoⁿ-dè-áⁿ ní xáhaⁿ-dè: “Cuáháⁿ tucu ndèni ní cuu te cada yica-n na quixí-yu quíhu-yu cuendá ná chitú vehe-í.

24 Te na cächí tnúhu-í xii-n sá ní ìⁿ ñáyiú ní càháⁿ-í díhna vá cùú-gá caxí-yu sá sá ní quide túha-í caxí-yu ní cùu”, cächí téé-áⁿ xáhaⁿ-dè xii téé xinu cuechi núú-dé —cächí-gá xáhaⁿ-gã xii téé-áⁿ.

Ndoho-o cundecu-o ichi Xitohó Jesucristú (Mt. 10:37-38)

25 Te ío cuéhé ñáyiú nchicúⁿ-yu Jèsús, te ní xáhaⁿ-gã xii-yu:

26 —Te núú dava nchòhó cuini-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dàndóo-ndo tátá-ndó, ndihi náná-ndó, ndihi ñadihí-ndó, ndihi déhe-ndo, ndihi ñani-ndó, ndihi cúha-ndo, te cani iní-ndó sá cuèi na cùú-ndó sá cuendá-í, te ducaⁿ te cuu ndisa-ndo cuè ñáyiú tnáhá tnúhu ndihi-í.

27 Te nchaa ñáyiú vá cànchícúⁿ nihnu ñaha xii-í cuendá sá yùhú-yu ndohó-yu dàtná ndoho-í, ñáyiú-áⁿ vá cùú-yu ñáyiú tnáhá tnúhu ndihi-í.

28 Te núú ìⁿ nchòhó ná caní iní-ndó dàcaa-ndo ìⁿ vehe ducúⁿ, çte náa ñà díú díhna-gá cada cuendá-ndó núú ndédau díhúⁿ

cuu, ducaⁿ te cutnùní iní-ndó nũ tnahá dîhúⁿ-ndó càa vehe-áⁿ àdi ñáhá?

²⁹ Chi núu vá dúcáⁿ càda-ndo, te na nguíta-ndo tàusaha-ndo te vá xínu cada-ndo, te nchaa ñáyiⁿ na cundehe ñaha xii-ndo, te cáháⁿ cuèhé-yu cuèndá-ndó.

³⁰ Te cachí-yu: “Tée-áⁿ ní nguíta-dé dácàa-dé ìⁿ vehe te ñá ní ndàcu-dé xínu”, cachí-yu.

³¹ Àdi te núu ìⁿ tée yìndaha ñaha xii ñáyiⁿ cuiní-dé nàá-dé ndîhi ingá tucu tée yìndaha ñaha xii ñáyiⁿ, çte nàa ñá díú dîhna-gá cada cuèndá-dé te núu ndacu-dé ndîhi úxí mîl cue sandàdú-dé nàá-güedé, ndîhi ócò mîl cue sandàdú ingá tucu tée yìndaha ñaha xii ñáyiⁿ cùu úhú iní tnahá ndîhi-dé-áⁿ?

³² Àdi te núu xito-dé sá vâ ndácú-dé ñá, te òré vátá cùyàtni ñaha-gá tée cùu úhú iní tnahá ndîhi-dé-áⁿ, te tendaha-dé ìⁿ tée quíhíⁿ-dé quíhu-dé tñuhu ndáhú núu tée-áⁿ cuèndá sá vâ nàá-güedé.

³³ Te duha càháⁿ-í chi núu nchòhó vá cádá ndée iní-ndó dàña-ndo nchaa sá ndécú ndîhi-ndo cuèndá chitnahá ñáhá-ndó xii-í, te vá cùu-ndó cuè ñáyiⁿ tnahá tñuhu ndîhi-í.

Ñí ñí nduu víxiⁿ

(Mt. 5:13; Mr. 9:50)

³⁴ Te ñíⁿ chi ío váha, dico núu na ndùu víxiⁿ-xí, çte nása-gá cada-o nàndîhi-o te núu ducaⁿ-í?

³⁵ Chi ñá túú-gã nándîhi-xi ní sá dácá ñuhu, te ní sá dácá saháⁿ, chi cuèndá-nã dǎngoyo-o. Te nchaa nchòhó ñáyiⁿ ní xindedóho tñuhu ní cáháⁿ-í-a xini ñuhu-xí ío váha cuáha-ndo cuèndá—càchí-gá xáhaⁿ-gá xii-yu.

15

Cuèndá ìⁿ mbéé quiti ní xíta

(Mt. 18:10-14)

¹ Te cue tée cuilha iní-xi quide cobrá ñáhá xii ñáyiⁿ cuèndá impuèstú ndîhi cue dava-gá ñáyiⁿ ndècu ichi cuèhé ichi duha ní quexió-yu núu ndécú Jèsús cuèndá cundedóho-yu tñuhu càháⁿ-gá.

² Te ní nguíta cue tée cùu fariséú, ndîhi cue tée dàcuaha ñaha xii ñáyiⁿ nchaa tñuhu ní chídó tñuni ndíi Moisés xicáháⁿ cuèhé-güedé cuèndá-gá, te càchí-güedé.

—Tée-a quèheⁿ cuèndá-dé ñáyiⁿ ndècu ichi cuèhé ichi duha, te xèxi ndîhi ñaha-dé xii-yu—càchí-güedé xitnaha-güedé.

³ Te Jèsús ní cani-gá ìⁿ cuèndú nàcuáa tecú tñuni-güedé tñuhu-gá, te xáhaⁿ-gá xii-güedé:

⁴ —Ìⁿ tée ndècu ìⁿ ciendú mbéé-dé, te ní xíta ìⁿ-di, te nchòhó sa cutnumí iní-ndó nàcuáa cada tée-áⁿ, chi dándóo-dé cùmídícó sáhúⁿ cùmí-di ìⁿ yucu, te cùnündúcú-dé quiti ní xíta xiáⁿ ndéé ndéé naníhí-dé-di.

⁵ Te òré ní naníhí-dé-di te ní dácáá-dé-di chíó-dé ní docó-dé-di sá cùdíí iní-dé.

⁶ Te òré ní nasáá-dé vehe-dé, te ní dátacá-dé nchaa cue tée càháⁿ ndîhi-dé, ndîhi nchaa ñáyiⁿ ndècu yatni ndîhi-dé, te ní xáhaⁿ-dé: “Chí ná cùdíí iní-ó vitna, chí ní naníhí-í mbéé-í quiti ní xíta ní cùu”, cachí-dé xáhaⁿ-dé xii-yu.

⁷ Te yúhú càchí-í sá ío-gá cùdíí iní Yá Ndióxi ndîhi cue espíritú xínú cuèchi núu-gã núu ìⁿ ñáyiⁿ ndècu ichi cuèhé ichi duha na ndixi cuèchi iní-yu cuèndá nchaa sá ñá túú vâha quidé-yu ndécú-yu te tñí-yu ichi-gá, dácúúxí cùmídícó sáhúⁿ cùmí ñáyiⁿ sa ní tuha ichi-gá, chí ñá túú-gã xini ñuhu-xi ndixi cuèchi iní-yu chí sa ndécú-yu ichi-gá—càchí-gá xáhaⁿ-gá xii-güedé.

Cuèndá dîhúⁿ ní xíta

⁸ Te ní cani Jèsús ingá cuèndú núu-güedé, te xáhaⁿ-gá:

—Ìⁿ ñadîhí ndécú ndîhi-aⁿ úxí dîhúⁿ cuixíⁿ, te ní dácúita-aⁿ ìⁿ te ní teñuhú-aⁿ iti, te ní nguíta-aⁿ nàtihu-aⁿ vehe, te súuni vâha vâha ní nanducu-aⁿ ndéé ní naníhí-aⁿ.

⁹ Te òré ní naníhí-aⁿ, te ní dátacá-aⁿ nchaa ñáyiⁿ dîhí càháⁿ ndîhi-aⁿ ndîhi nchaa ñáyiⁿ ndècu yatni ndîhi-aⁿ, te ní xáhaⁿ-aⁿ: “Chí ná cùdíí iní-ó vitna chí ní naníhí-í dîhúⁿ-í sá ní xíta ní cùu”, cachí-aⁿ xáhaⁿ-aⁿ xii-yu.

¹⁰ Te yúhú càchí-í sá dúcáⁿ ío cùdíí iní nchaa espíritú xínú cuèchi núu Yá Ndióxi, núu ìⁿ ñáyiⁿ ndècu ichi cuèhé ichi duha na ndixi cuèchi iní-yu cuèndá nchaa sá ñá túú vâha quidé-yu, te tñí-yu ichi-gá—càchí-gá xáhaⁿ-gá xii-güedé.

Cuèndá ìⁿ tée ñá túú ní quide váha

¹¹ Te ní cani tucu Jèsús ingá cuèndú núu-güedé, te xáhaⁿ-gá:

—Ìⁿ tée ndècu úú déhe ducuⁿ-dé,

¹² te tée lìhli-gá ní xáhaⁿ-dé xii tâtá-dé: “Táu, taxi-n tãhú sã cùu cuèndá-í”, càchí-dé xáhaⁿ-dé. Te tâtá-dé-áⁿ ní sãñaha-dé ndí dííⁿ núu-güedé sá cùu cuèndá-güedé.

¹³ Te núu sácú-ni nduu, te déhe-dé tée lìhli-gá-áⁿ ní nadico-dé nchaa sá ní sãñaha tâtá-dé, te ní xica-dé cuáháⁿ-dé ìⁿ ñuu xicá, te yacáⁿ ní tñí-dé ìⁿ ichi cuèhé ichi duha, te ní ndîhi dîhúⁿ-dè ní dándóñuhu-dé ndîhi cue tée càháⁿ ndîhi-dé, ndîhi nchaa ñáyiⁿ dîhí xíndecu ichi díí iní.

¹⁴ Te ní ndîhi ndoo dîhúⁿ-dè ní dándóñuhu-dé, te núu sácú-ni nduu ní sáá tnamá ñuu núu ndécú-dé-áⁿ, te ñá nihí-gá-dé sá cáxi-dé, te xihí-dé docó.

¹⁵ Núu ní xica-dé cuáháⁿ ndúcú chiúⁿ-dè núu ìⁿ tée díu-ni ñuu xiáⁿ, te tée-áⁿ ní sãha chiúⁿ ñaha-dé ìⁿ xichi núu ñuhú-dé coto-dé cùchí.

¹⁶ Te súuni xihí-dé docó te cuiní-dé caxi-dé nchaa sá sãha-yu cùchí-áⁿ ní cùu, dico ñá túú ní sãñahá-yu xii-dé.

17 Te uuⁿ ní sani váha iní-dé, te ní cachí-dé: “Ío cuéhé cue tée xínu cuechi vehe tátá-í te ío cuéhé sá xéxí-güedé ndécú, te yúhú duha ndòho-í docó iha!

18 Te ndacuñí-í te núhú-í vehe tátá-í, te cúñaha-í xii-dé: Táu, ñá túú ní quide váha-í núú Yá Ndióxi te ní ñá túú ní quide váha-í núú-n,

19 te ñá túú-gã tàù-í sá cùu-í déhe-n vitna, te cada ñaha-nã-n xii-í dàtná ìⁿ tée xínu cuechi núú-n”, duha ní sani iní-dé cúñaha-dé xii tátá-dé.

20 Te sáta dúcáⁿ ní sani iní-dé, te ní natnii-dé ichi cuánuhú-dé vehe tátá-dé, te xica-gã cuánuhú-dé ní xini ñáhá tátá-dé xii-dé te ní cundàhú iní ñáhá-dé. Te xínu tátá-dé-áⁿ ní sáháⁿ nútahá ñáhá-dé, te ní numi ñaha-dé, te ío váha ní cáháⁿ ndihi ñaha-dé.

21 Te ní xáhaⁿ dèhe-dé-áⁿ xii-dé: “Táu, ñá túú ní quide váha-í núú Yá Ndióxi te ní ñá túú ní quide váha-í núú-n, te ñá túú-gã tàù-í sá cùu-í déhe-n vitna”, cachí-dé xáhaⁿ-dé.

22 Dico tátá-dé-áⁿ ní xáhaⁿ-dé xii cue tée xínu cuechi núú-dé: “Chí queññuhu ndihi-ni dóó váha-gã cuáha-ndo dèhe-í-a na cuihnu-dé, ndihi ìⁿ dehé ná quíhi díqui ndáhá-dé, ndihi cháú váha na quíhi-dé.

23 Te quíhíⁿ ngeuehⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na càxi-o-dí.

24 Chí déhe-í-a ní sani iní-í sá ní xihí-dé ní cùu, te ñáhá chi ndècu vívú-dé, te ní sani tucu iní-í sá ní xíta-dé ní cùu te ní nasáá méé-dé”, càchí-dé xáhaⁿ-dé xii cue tée xínu cuechi núú-dé-áⁿ. Te ní nguíta-güedé ní quide-güedé vico.

25 Te déhe-dé tée sàcuéhé-gã cuáháⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cùu vico.

26 Te ní cana-dé ìⁿ tée xínu cuechi, te ní xicáⁿ tnúhú-dé núú-dé ná cuendá ducaⁿ ío yaá.

27 Te tée xínu cuechi-áⁿ ní xáhaⁿ-dé: “Ñani-n tée cuáháⁿ ní cùu ní nasáá-dé, te tátá-n ní táuchíúⁿ-dè ní xihí ìⁿ ndicutu numa quiti caváha-gá cuendá sá ní nasáá váha-dé”, càchí-dé xáhaⁿ-dé.

28 Dico ñani-dé tée sàcuéhé-áⁿ ní cudééⁿ-dè, te ní cachí-dé sá vã ndíhu-dé vehe cundecu-dé vico-áⁿ ní cùu, dico ní quee tátá-güedé ní cáháⁿ ndàhú-dé núú-dé cuendá ndíhu-dé.

29 Te ní xáhaⁿ-dè xii tátá-dé: “Táu, cundèdóho váha saú-n tnúhu na cáháⁿ-í-a, yúhú ío cuéhé cuiá ní cuu xínu cuechi-í núú-n, te ní ìⁿ xito ñá túú quide sáa iní-í núú-n, te ní ìⁿ chivá líhli ñá túú tàxi-n-di caxi díí iní-í-di ndihi cue tée cáháⁿ ndihi-í.

30 Te vitna ní nasáá déhe-n tée ní sáháⁿ ní dándóññuhu díhúⁿ-n ndihi nchaa ñáyi

xíndecu ichi díí iní. Te ní sahni-n ìⁿ ndicutu numa quiti caváha-gá sá cuendá-dé”, càchí-dé xáhaⁿ-dè xii tátá-dé.

31 Te ní xáhaⁿ tátá-dé xii-dé: “Yòhó déhe-í ducaⁿ-ni ndècu ndihi ñaha-n xii-í, te nchaa sá ndécú ndihi-í cùu-xí cuendá-n.

32 Te vitna dacuñíⁿ tàù-xi sá cáda-ó vico, te cudíí iní-ó, chí ñani-n-áⁿ ní quide-í cuendá sá ní xihí-dé ní cùu, te ñáhá chi ndècu vívú-dé, te sa ní xíta-dé ní cùu, te ní nasáá méé-dé”, càchí-dé xáhaⁿ-dè xii déhe-dé tée sàcuéhé-gã-áⁿ —duha cuáháⁿ cuendú ní cani Jèsus núú-güedé.

16

Nàcuáa ní quide ìⁿ tée tàxi tnuni ñáhá xii cue tée xínu cuechi

1 Te Jèsus xáhaⁿ-gã xii cue tée xica cuu ndihi-gá:

—Ní xíndecu ìⁿ tée cuica, te ducaⁿ ní xíndecu ìⁿ tée ní taxi tnuni ñáhá xii cue tée ní xínu cuechi núú-dé. Te tée-áⁿ ní xini ñáhá ñáyi duhu-dé díhúⁿ tée cùu patróóⁿ-dè, te cuáháⁿ-dè dándóññuhu-dé, te ní xáháⁿ-yu xii tée cùu patróóⁿ-dè sá dúcáⁿ quide-dé.

2 Te tée cùu patróóⁿ-dè-áⁿ ní cana ñaha-dé xii-dé, te ní xáhaⁿ-dè: “¿Ná cuendá duha cáháⁿ ñáyi cuendá-n? Yáchí chi na tàxi cuendá-n nchaa chiuⁿ ní quide-n, chi vitna te vã tàxi tnuni-gá-n cuè tée xínu cuechi núú-í”, càchí-dé xáhaⁿ-dè.

3 Te tée taxi tnuni ñáhá xii cue tée xínu cuechi-áⁿ ní sani iní-dé: “¿Te nása cada-í vitna na quehndé patróóⁿ-í chiuⁿ-í? Chi ñá cündèé-gá-í cada-í chiuⁿ véé, te cùcahaⁿ núú-í cacáⁿ ndàhú-í.

4 Dico duha cada-í cuendá queheⁿ cuendá ñáhá ñáyi vehe-yu òré ná quehndé duuⁿ-ná patróóⁿ-í chiuⁿ-í”, duha ní sani iní-dé.

5 Te sáta dúcáⁿ te ní cana-dé ìⁿ cue tée tàù núú patróóⁿ-güedé. Te tée díhna ní xicáⁿ tnúhú-dé núú-dé, te xáhaⁿ-dè: “¿Ndéé dau tàù-n núú patróóⁿ-í?”, càchí-dé xáhaⁿ-dè.

6 Te tée-áⁿ ní xáhaⁿ-dè: “Táù-í ìⁿ cièndú bàrril acití”, càchí-dé xáhaⁿ-dè. Te tée tàxi tnuni ñáhá xii cue tée xínu cuechi-áⁿ ní xáhaⁿ-dè: “Iha náu reciú-n-á, te ndadúha íngá sá údico úxi taxi-n”, càchí-dé xáhaⁿ-dè.

7 Te dàtnuni ní xicáⁿ tnúhú tucu-dé núú íngá-dé, te xáhaⁿ-dè: “Te yòhó, ¿ndéé dau tàù-n-í?”, càchí-dé xáhaⁿ-dè. Te tée tàù-áⁿ ní xáhaⁿ-dè: “Íⁿ cièndú ngohncí triú tàù-í”, càchí-dé xáhaⁿ-dè. Te tée tàxi tnuni ñáhá xii cue tée xínu cuechi-áⁿ ní xáhaⁿ-dè: “Iha náu reciú-n-á, te cadúha íngá sá cùmídico-ná taxi-n”, càchí-dé xáhaⁿ-dè.

8 Te tée cùu patróóⁿ-áⁿ ní cachí-dé sá ío váha ññuhu díqui tée dùhu-áⁿ nàcuáa cada-dé cundecu váha-dé. Te nchaa ñáyi xíndecu ichi cuéhé ichi duha, ío-gá váha ññuhu díqui-yu nàcuáa cada-yu cundecu váha-yu

ndihi nchaa ñayiu cùndihí-yu dàcúúxí ñayiu ndècu ichi Yá Ndiòxí.

⁹ Te yúhú càchí-í sá cáda-ndó sá vâha ndihi nchaa sá ndécú ndihi-ndo ní cuâha ñuyú yíca cuèchi-a, te ducaⁿ te coo cue tée ío vâha tnahá tnúhu ndihi-ndo, te òré na ndihi nchaa sá ío ñuyú-a, te Yá Ndiòxí queheⁿ cuèndá ñáhá-gã xii-ndo, te cundecu-ndo ndihi-gá ni caa ni quíhíⁿ.

¹⁰ Te núu ìⁿ tée quide ndáá cuèi ìⁿ chiúⁿ líhli na càda-dé, te ñu-ni ducaⁿ quide ndáá-dé cuèi ìⁿ chiúⁿ cahnu na cada-dé. Dico tée ñá túú quide ndáá, chi cuèi chiúⁿ líhli àdi chiúⁿ cahnu na cada-dé dico ìⁿ-ni quide-dé.

¹¹ Te núu nchòhó vá cáda-ndó sá vâha ndihi nchaa sá ñí cuâha ñuyú yíca cuèchi-a ña, te Yá Ndiòxí vá táxi-gã sá vâha ndècu ndihi-gá xii-ndo.

¹² Te núu vá cáda ndáá-ndó còto-ndo nchaa sá táxi núu tnahá ñayiu-ndo, te vá yò taxí sá ndúú tãhú-ndó.

¹³ Te ní ìⁿ tée xínu cuechi vá ndácú-dé cunu cuechi-dé núú úú pàtróóⁿ, chi tée-ánⁿ cuu váha iní-dé núú ìⁿ pàtróóⁿ-dè te tñú-dé nchaa tnúhu càháⁿ pàtróóⁿ tée cùu váha iní-dé núú-xi-ánⁿ. Te núú ñngá tucu pàtróóⁿ-dè vá cùú váha iní-dé, te ní vâ tñú-dé tnúhu càháⁿ pàtróóⁿ-dè-ánⁿ. Te ducaⁿ sátnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhuⁿ iní-ndó nchaa sá ío ñuyú-a —càchí-gã xâháⁿ-gã xii-güedé.

¹⁴ Te nchaa cue tée cùu fariséú ío ñúhu iní-güedé nchaa sá ío ñuyú-a, te xíndedóho-güedé nchaa tnúhu càháⁿ Jèsús, te ní càháⁿ yíchí-güedé cuèndá-gã.

¹⁵ Te Jèsús ní xâháⁿ-gã xii-güedé:

—Nchòhó cùú-ndó cuè tée ío vâha càháⁿ núú ñayiu cuèndá-ni sá cuíni-ndó càháⁿ vâha-yu cuèndá-ndó, dico Yá Ndiòxí xini ndáá-gã ñacuáa càa iní-ndó ìⁿ ìⁿ-ndo, te nchaa sá càchí cue ñayiu ñuyú-a sá ío nándíhi, Yá Ndiòxí dàquèe tìhú-gã.

Cuèndá nchaa tnúhu ní chídó tñúni ndíi Moisés

¹⁶ Te nchaa tnúhu ní chídó tñúni ndíi Moisés cùnù-xi ni cuu, ndihi nchaa tnúhu ní chídó tñúni cue tée ní xóo càháⁿ tnúhu Yá Ndiòxí ndéé sanaha. Dico cùtnahá ní nguíta té Juáá tée ní xóo dacuàndute ñaha xii ñayiu ní càháⁿ-dé tnúhu-í, ndéé dàvá-ánⁿ ñá túú-gã ní cùnùu nchaa tnúhu ní chídó tñúni ndíi Moisés ndihi nchaa tnúhu ní chídó tñúni cue tée ní xóo càháⁿ tnúhu Yá Ndiòxí ndéé sanaha. Te ñu-ni ndéé dàvá-ánⁿ ní quesaha ta təcú tñúni ñayiu ñacuáa ndíhu ndaha ñaha Yá Ndiòxí xii-yu, te vâi ñayiu ío sàni iní-yu vitna ñacuáa cada-yu ndíhu ndaha ñaha Yá Ndiòxí xii-yu.

¹⁷ Te nchaa tnúhu ní chídó tñúni ndíi Moisés ío ndáá càháⁿ-xi, te ndíhi-gã naa andíu ndíhi ñuyú dàcúúxí sá ndíhi ìⁿ ìⁿ tnúhu-ánⁿ cada-xi ñacuáa càháⁿ-xi.

Jèsús càháⁿ-gã cuèndá ñayiu dàña tnahá (Mt. 19:1-12; Mr. 10:1-12)

¹⁸ Te núu ìⁿ tée na dàña tnahá-dé, ndíhi ñadíhi-dé, te tñándaha tucu-dé ndíhi ñngá-yu, te nèhé víhi quide-dé te núu ducaⁿ na càda-dé, te tée na tñándaha ndíhi ñaha ní dàñá yíi-xi, te ñu-ni ducaⁿ ñá túú cùu-xi sá vâha te núu ducaⁿ na càda-yu —càchí-gã xâháⁿ-gã xii-güedé.

Cuèndá ìⁿ tée nàni Lázará ndíhi cuèndá ìⁿ tée cuica

¹⁹ Te xâháⁿ tucu-gã xii-güedé:

—Ní xíndecu ìⁿ tée cuica, te ní xóo cuíhu-dé mee-ni dóo vâha dóo víi càa, te nchaa nduu súúni vâha ní xóo cada-dé vico vehe-dé.

²⁰ Te ní xíndecu tucu ìⁿ tée ndáhú ní xínani-dé Lázará, te tée-ánⁿ ní cuhú-dé ní xíndé-dé nitúhú-dé ndíhi, te ìⁿ nduu ìⁿ nduu ní xóo taxinucóo ñaha-güedé xii-dé yuyèhe tée cuica-ánⁿ.

²¹ Te tée ndáhú-ánⁿ ní xóo cuú-dé docó, te ní xóo cuíni-dé caxi-dé nchaa sá ñá túú-gã ní xóo yâha caxi tée cuica-ánⁿ, te ñá túú ní xóo níhi-dé. Te cuèi iná ní xóo quíhíⁿ-di ní xóo nayuu-di nchaa núú ndíhi ndéé-dé-ánⁿ.

²² Te ní sáá ìⁿ nduu te ní xíhí tée ndáhú-ánⁿ, te cue espíritú xínu cuèchi núú Yá Ndiòxí ndécá ñaha-xi xii-dé cuàndaa núú ndécú tē Abrahám cundecu-dé. Te ní sáá nduu ní xíhí tée cuica-ánⁿ tnahá-dé, te ní chindúxi ñaha-güedé xii-dé.

²³ Te ní sáá-dé núú xíndecu nchaa ñayiu ní xíhí ñá túú ní quide ndáá núú Yá Ndiòxí te xíáⁿ ío ndòho-dé ndécú-dé, te ní ndonehe núú-dé te xica ní xini-dé té Abrahám ndíhi té Lázará-ánⁿ xíndecu-güedé.

²⁴ Te níhi ní càháⁿ-dé, te xâháⁿ-dè: “Yòhó tãtã Abrahám, cundáhú iní ñáhá xii-í, te cùñaha xii té Lázará ná dándaxi-dé diquí ndáhá-dé, te na quixi-dé dándaxiⁿ-dé yàa-í, chi ío ndòho-í ñúhú-í núú ñúhú núú càyú-a”, càchí-dé xâháⁿ-dè xii té Abrahám.

²⁵ Dico té Abrahám ní xâháⁿ-dè: “Ndáhú yòhó ñani tñáhà-í, dándacu iní sá ío vâha ní xíndecu-n ñuyú, te té Lázará ío ndáhú ní ndòho-dé ní xíndecu-dé. Te vitna ní nucúndecu vâha-dé iha, te yòhó ndòhó-n vitna.

²⁶ Te ñá ñúú-ní sá xíáⁿ tucu, chi cuádava ndècu ìⁿ déhva cùnú ñúhú ñèhu-xi núú ndécú-ó, te cuèi nchaa ñayiu xíndecu iha na càchí iní-yu quixi-yu núú ndécú-ndó dico vá ndácú-yu, te ní nchòhó vá ndácú-ndó quixi-ndo núú ndécú-ndíⁿ, càchí-dé xâháⁿ-dè.

²⁷ Te ní xáhaⁿ tée cuica-ã: “Te núu ducaⁿ te cãháⁿ ndàhú-í núú yòhó tãtã Àbrahám vitna sã tэндàha-n té Lãzarú ná quihíⁿ-dé vehe tãtã-í,

²⁸ chi ndècu úhúⁿ-gã ñani-í, te na cũñaha-dé xii-güedé sã vã cádá-güedé dàtná ní quide-í cuendá sã vã quixi-güedé tnàhá-güedé núú ndécù-í ndòhò-í-a”, càchí-dé xáhaⁿ-dè.

²⁹ Te té Àbrahám ní xáhaⁿ-dè: “Mee-güedé ndécù ndihí-güedé nchaa tnúhu ní chídó tnùní ndíi Moisés, ndihí nchaa tnúhu ní chídó tnùní cue tée ní xóo cáháⁿ tnúhu Yá Ndiòxí ndéé sanaha, te nchaa tnúhu-ãⁿ ná tnii-güedé nàcuáa cáháⁿ-xi”, càchí-dé xáhaⁿ-dè xii-dé.

³⁰ Te ní xáhaⁿ tùcu tée cuica-ã: “Tãtã Àbrahám, dico núu ìⁿ ñáiyu ñã túú-gã ndécù ñùyúⁿ ìⁿ ñáiyu ndècu ndihí-n quihíⁿ-yu cáháⁿ ndihí ñàhá-yu xii-güedé nàcuáa ndúu tnúhu váha, te ndixi cuèchi iní-güedé nchaa sã ñã túú quide váha-güedé ndécù-güedé, te cada váha-güedé, càchí-dé xáhaⁿ-dè xii-dé.

³¹ Dico té Àbrahám ní xáhaⁿ-dè: “Te núu ñã túú cuini-güedé tnii-güedé tnúhu ní cáháⁿ ndíi Moisés, ndihí tnúhu ní cáháⁿ cue tée ní xóo cáháⁿ tnúhu Yá Ndiòxí ndéé sanaha ñã, te diu-ni ducaⁿ càda-güedé cuèi ìⁿ ñáiyu ní xihí ná ndòtò-yu cũñàhá-yu nàcuáa ndúu tnúhu váha, chi vã quindáá iní-güedé, càchí té Àbrahám xáhaⁿ-dè xii tée cuica-ãⁿ —càchí Jèsús xáhaⁿ-gã xii cue tée cùu farisèú.

17

Quihi iní-ó vã cündècu-o ichi cuèhé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue tée xica cuu ndihí-gã:

—Dacuití sã cóo cuè tée dacàháⁿ-güedé ñáiyu cadá-yu nãndi sã cuèhé sã dúhá, jdicò ndàhú ní cuu cue tée ducaⁿ na dàcàháⁿ ñàhá xii-yu cadá-yu nãndi sã cuèhé sã dúhá!

² Chi váha-gã sã núu na dàcutu ndéé ñáiyu ìⁿ yúú yòdó ñúcúⁿ-güedé te dàquée ñàhá-yu xii-güedé xití ndute lámár, te ñã díú sã cündècu-güedé dacàháⁿ-güedé ñáiyu cadá-yu nãndi sã cuèhé sã dúhá, cuèi ñáiyu ndàhú iní-xi dandàhú-güedé.

³ Te ío quihí iní-ndó cündècu-ndo.

Te núu ìⁿ ñani tnàhá-ndó quide-dé ìⁿ sã ñã túú tàú-dé cada-dé sã cúú-xí-ndó te cáháⁿ-ndó dòhò-dé, te núu ní ndixi cuèchi iní-dé sã ñã túú ní quide váha-dé, te cada càhnu iní-ndó sã ní quide-dé.

⁴ Te cuèi úsã xito na càda-dé nãndi sã ñã túú tàú-dé cada-dé sã cúú-xí-ndó ìⁿ nduu, te núu na quixi-dé úsã xito núú-ndó, te càchí-dé sã vã dúcãⁿ-gã cada-dé, te xini

ñuhu-xi cada cahnu iní-ndó-dé —càchí-gã xáhaⁿ-gã xii-güedé.

Ñáiyu sãndáá ndisa iní-xi

⁵ Te ní xáhaⁿ cuè tée xica cuu ndihí Jèsús xii-gã:

—Chindee ñàha xii-ndí cuendá ducaⁿ te quindáá-gã iní-ndí sã Yá Ndiòxí ndácú-gã quidé-gã nchaa sã váha —càchí-güedé xáhaⁿ-güedé xii-gã.

⁶ Te ní xáhaⁿ Jèsús:

—Te núu nchòhó quindáá ndisa iní-ndó súni cuèdìcò luha líi dàtná cuini-ndó càa ìⁿ ndiquiⁿ yutnu nani mostázã, te ducaⁿ te cuu cũñaha-ndo xii ìⁿ yutnu: “Quene-n iha te quihíⁿ-n cuñhu-n xití lámár”, duha cũñaha-ndo. Te ducaⁿ càda-xi te núu na quindáá ndisa iní ñàhá-ndó xii-í —càchí-gã xáhaⁿ-gã xii-güedé.

Nàcuáa tàú ìⁿ tée xinu cuechi cada-dé

⁷ Te xáhaⁿ tùcu-gã xii-güedé:

—Te núu ìⁿ nchòhó ndécú ìⁿ tée xinu cuechi núú-ndó, te cuáhãⁿ-dé yucu cuángada chiúⁿ-dè, àdi cuáhãⁿ-dé yucu coto-dé quiti, te òré ní nasáá-dé vehe sã ní sáhãⁿ-dé yucu, te vã cũñaha nchòhó cue tée cùu patròóⁿ-dè xii-dé: “Yáchi nehé caxi-n dítã”, vã dúhá cũñaha-ndo.

⁸ Chi nchòhó cue tée cùu patròóⁿ-dè cũñaha-ndo xii-dé: “Cundihí iní cada túha sã cúdini-í, te dihna-gã-í caxi-í dítã te dàtnúni caxi-n”, duha cũñaha nchòhó cue tée cùu patròóⁿ xii-dé.

⁹ Te òré ná ndihí chiúⁿ ní táhú nchòhó cue tée cùu patròóⁿ cada tée xinu cuechi núú-ndó, te ñã túú tàú-ndó ndàcãⁿ táhú-ndó núú tée xinu cuechi núú-ndó.

¹⁰ Te duha cáháⁿ-í chi núu òré ná ndihí nchaa chiúⁿ ní táhú Yá Ndiòxí cada-ndo, te cachí-ndó: “Nchúhú cúú-ndí cue tée xinu cuechi núú Yá Ndiòxí, dico ñã túú tàú-gã ndacãⁿ táhú-gã núú-ndí, chi mee-ni chiúⁿ ní táhú-gã ní quide-ndí”, duha cachí-ndó —càchí-gã xáhaⁿ-gã xii-güedé.

Jèsús quidé tãna-gã úxi cue tée tnàhá cuèhé sã dátèhyú nihnu-xi yiqui cüñú ñáiyu

¹¹ Te ñuhu Jèsús ichi cuáhãⁿ-gã núú Jerusalén, te ní yáha-gã núú ràyã distritú Sãmariá ndihí distritú Galiléa.

¹² Te ta cùyatni-gã ìⁿ ñuu líhli cuáhãⁿ, te ní sãtnahá ñàhá úxi tnàhá cue tée cùhú xii-gã, te tnàhá-güedé cuèhé sã dátèhyú nihnu-xi yiqui cüñú-ó dico xica lùha ní ngúnu tnii-güedé,

¹³ te níhi ní cáháⁿ-güedé, te xáhaⁿ-güedé xii Jèsús:

—jMèstrú, cundàhú iní ñàhá xii-ndí! —càchí-güedé xáhaⁿ-güedé xii-gã.

¹⁴ Te òré ní xini ñàhá Jèsús xii-güedé, te ní xáhaⁿ-gã:

—Chí cuàháⁿ núú düttú ná cùndehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuàháⁿ-güedé, te ichi-ni ñùhu-güedé cuàháⁿ-güedé ní ndúha-güedé cuéhé tñàhá-güedé.

¹⁵ Te ncha-güedé ní cutnùni iní-güedé sá ní ndúha-güedé, dico ìⁿ-ni-dé ní nacuíco-dé, te ní ngüita-dé ñihi ní cáháⁿ-dé, te ní cachí-dé sá ïo càhnu cuu Yá Ndiöxi.

¹⁶ Te ní ngüiñi xiti-dé núú Jësús, te ní nuu núú-dé ndàa núú ñùhú ndàcáⁿ tãhú-dé núú-gá. Te tée-áⁿ cúú-dé téé distritú Sãmariá.

¹⁷ Te Jësús ní cachí-gá:

—Úxi tñàhá-güedé ní ndúha cuéhé tñàhá-güedé. ¿Te ndéé ndécú dáva-gá-güedé-í?

¹⁸ ¿Te náa ìⁿ-ni-té téé ingá ñuu-a ní nacuíco-dé ndàcáⁿ tãhú-dé núú Yá Ndiöxi, te càchí-dé sá ïo càhnu cuu-gá ñã? —càchí-gá.

¹⁹ Te ní xáhaⁿ-gá xii-té-áⁿ:

—Ndacuíñi te núhú-n, chí sa ní ndúha-n cuéhé tñàhá-n, chí ní sándáa iní-n Yá Ndiöxi —càchí-gá xáhaⁿ-gá xii-dé.

*Nacúaá yindaha ñaha Yá Ndiöxi
(Mt. 24:23-28, 36-41)*

²⁰ Te cue téé cuu fariséú ní xicáⁿ tñuhú-güedé núú Jësús núu ná ama ngüita Yá Ndiöxi ndíhu ndaha-gá ñáyiu. Te ní xáhaⁿ-gá:

—Ñá túú ná cada-xi ñuyú quini-ndó cuendá cutnùni iní-ndó sá ndíhu ndaha ñaha Yá Ndiöxi xii-ndo.

²¹ Te ní vá yóo cachí: “Iha ndécú-gá táxi tñuni-gá, àdi yacáⁿ ndécú-gá táxi tñuni-gá”, chí tnuú-ndó sá ndecu-gá ndíhi nchaa ñáyiu yindaha-gá —càchí-gá xáhaⁿ-gá xii-güedé.

²² Te ní xáhaⁿ-gá xii cue téé xica cuu ndíhi-gá:

—Te nchòhó chí sáa nduu, te cachí iní-ndó sá súuni cuèdicó ìⁿ nduu quini ñàhá-ndó xii yuhú Téé cùu ñani tñàhá-ndó nchàa-ndo, dico vá quini ñàhá-gá-ndó xii-í.

²³ Te coo ñáyiu cùñàhá-yu xii-ndo: “Iha ndécú-gá, áⁿ yacáⁿ ndécú-gá”, quesàhá-yu cùñàhá-yu xii-ndo. Dico vá quindáa iní-ndó quíñi-ndó ndíhi-yu núú cachí-yu, te ní vá cáni iní-ndó quíñiⁿ méé-ndó.

²⁴ Chí dàtná cuini-ndó quide-xi oré sáa nduté andiu, chí uuⁿ ní dáyehé-xi ñíhi ñuyú, ducaⁿ càda-xi nduu na quixi tucu yuhú Téé cùu ñani tñàhá-ndó nchàa-ndo, te dàvá-áⁿ quini ñàhá nchàa-ndi túhú ñáyiu xii-í.

²⁵ Dico díhna-gá ndoho vihi-í, te daquèe tihú ñàhá ñáyiu ñuyú-a xii-í.

²⁶ Te cadá-yu dàtná ní quide ñáyiu ní xindecu cùtñàhá ní xindecu té Nòé, te diu-ni ducaⁿ sãtnahá-xi cada nchaa ñáyiu ndecu vitna ndéé sáa nduu quixi tucu yuhú Téé cùu ñani tñàhá-ndó nchàa-ndo.

²⁷ Chí caxi-ni-yu, coho-ni-yu, te caca cuu-ni cue téé xica ndáhú, te tñandaha-ni-yu,

chí ducaⁿ ní quidé-yu dàvá-áⁿ ndéé ní sáa nduu cuanguee té Nòé xiti bàrcú, te ní ngüita-xi ní cuuⁿ dáú ní ndaa ndute ñuyú, te nchaá-yu ní xihí ní cáhá-yu dàvá-áⁿ.

²⁸ Te diu-ni ducaⁿ ní quide tucu ñáyiu cùtñàhá ní xindecu té Löt, chí xéxi-yu xihí-yu, te sáaⁿ-yu te ndácó-yu, te xixitú-yu nãndi sá xixitú-yu, te nchaa cue téé xidacáa-güedé vehe.

²⁹ Te òré ní quee té Löt ñuu Sòdomá, te ní ngoyo ñuhú andiu, te dàcá yúú súuni dicó ní nduu ñuhú-nã-xi, te ní xihí nchaandi túhú ñáyiu ñuu-áⁿ.

³⁰ Te diu-ni ducaⁿ sãtnahá-xi cada ñáyiu na sáa nduu quixi tucu yuhú Téé cùu ñani tñàhá-ndó nchàa-ndo ñuyú-a.

³¹ Te núú ìⁿ ñáyiu càndodó-yu díqui vèhé-yu nduu-áⁿ, te ní vá ndíhu-gá-yu quehé-yu ìⁿ ndachiúⁿ-yu canehé-yu quíñiⁿ, te ñáyiu cuàháⁿ yucu, te ní vá ñuhú-gá-yu vèhé-yu.

³² Te chí dándacu iní nàcuáa ní yáha ñadihi té Löt.

³³ Te nchaa ñáyiu cuini dàcácu ñihu mee-xi ñuyú-a ña, te cuíta ñihú-yu, te nchaa ñáyiu na cùú sá cuendá-í, te naníhi tãhú-yu.

³⁴ Te na càchí tñuhu tucu-í xii-ndo sá nduu-áⁿ, te núú úú-yu càa ìⁿ núú xito, te ìⁿ-yu ndanchitá-yu ndaa-yu andiu, te ìⁿ-yu quendóo.

³⁵ Te núú úú ñáyiu ñíhi nchicó-yu ìⁿ-ni vèhe, te ìⁿ-yu ndanchitá-yu ndaa-yu andiu, te ìⁿ-yu quendóo.

³⁶ Te núú úú cue téé yihí-güedé yucu, te ìⁿ-dé ndanchita-dé ndaa-dé andiu, te ìⁿ-dé quendóo —càchí-gá xáhaⁿ-gá xii-güedé.

³⁷ Te sá dúcáⁿ ní cáháⁿ-gá núu ní xicáⁿ tñuhú-güedé núú-gá, te xáhaⁿ-güedé xii-gá:

—Mèstrú, ¿te ndéé ducaⁿ càda-xi-í? —cachí-güedé xáhaⁿ-güedé xii-gá.

Te ní xáhaⁿ-gá:

—Te nchòhó xini-ndó sá ncháa núú yúcu yiqui cuñi ní xihí, te yacáⁿ tàcá cue ndixí xéxi-güèdi —cachí-gá xáhaⁿ-gá xii-güedé.

18

Jësús càháⁿ-gá cuendá ìⁿ juéxi ndíhi cuendá ìⁿ ñaha quèé

¹ Te Jësús ní cani-gá ìⁿ cuendú núú-güedé cuendá sá vá ná túhú iní-güedé cáháⁿ ndíhi-güedé Yá Ndiöxi nchaa-ni òré.

² Te xáhaⁿ-gá:

—Ìⁿ ñuu ndécú ìⁿ juéxi, te ní ña túú sándáa iní-dé Yá Ndiöxi, te ní ìⁿ tñuhu xáhaⁿ ñáyiu ña túú cuini-dé cada cuendá-dé.

³ Te diu-ni ñuu-áⁿ ndécú tucu ìⁿ ñadihi ñaha quèé, te ní sáháⁿ-aⁿ cáháⁿ ndàhú-aⁿ núú juéxi-áⁿ cuendá cada ndáa-dé ìⁿ cuéchi.

4 Te titní xito ní cuu sàháⁿ-aⁿ càháⁿ ndàhú-aⁿ núú-dé te ñá túú cuiní-dé cada cuèndá-dé tnúhu càháⁿ-aⁿ ni cuu, te ndéé núú ñà cúú-gá te ní sani iní-dé: “Te cuèi ñá túú sàndáá iní-í Yá Ndiöxí, te ní ñá túú quide cuèndá-í nchaa tnúhu càháⁿ ñáyiu cada-í,

5 dico na càda ndáá-í cuèndá ñaha quèé-a ndihi ñáyiu cuu úhú iní tnáhá ndihi-aⁿ, chi vá cùndèe-gá iní-í nuu núú quixi-aⁿ dasátú iní ñáhá xii-í”, duha ní sani iní téé cuu juéxi-áⁿ —càchí-gá xáhaⁿ-gá xii-güedé.

6 Te ní xáhaⁿ tucu-gá xii-güedé:

—Cada cuèndá-ndó nàcuáa ní sani iní juéxi téé cuihna iní-xi-áⁿ.

7 Te Yá Ndiöxí io chindee-gá nchaa ñáyiu ní càháⁿ-gá cundecu ndihi-gá, chi cuèi nduu cuèi niú càháⁿ ndihi ñàhá-yu xii-gá, te vá cùyaa-gá nachinaa-gá nchaa sá quidé ñaha nchaa ñáyiu cuu úhú iní ñáhá xii-yu.

8 Te io ndihi ducaⁿ càda-gá. Te òré ná quixi yúhú Téé cuu ñaní tnáhá-ndó nchaa-ndo, ¿te náa naníhí-gá-í ñáyiu sàndáá ndisa iní Yá Ndiöxí-áⁿ? —càchí-gá xáhaⁿ-gá xii-güedé.

Nàcuáa quide ñá téé cuu fariséú ndihi ñá téé cuu cobrador

9 Te Jèsús ní càháⁿ-gá núú ñáyiu nàcuáa quide ñáyiu sàni iní sá ño quide ndáá te dàquee tíhú-yu tnàha ñáyíu-yu, te xáhaⁿ-gá xii-yu:

10—Úú cue téé cuaháⁿ-güedé veñúhu càhnu sá ño cùnnu càháⁿ ndihi-güedé Yá Ndiöxí, te ñá-dé cúú-dé téé cuu fariséú, te ñngá-dé cúú-dé téé cuihna iní-xi quide cobrá ñáhá xii ñáyiu cuèndá impuèstú.

11 Te téé cuu fariséú-áⁿ nutñi-dé càháⁿ ndihi-dé Yá Ndiöxí, te xáhaⁿ-dè xii-gá: “Yòhó Dútú Ndiöxí ndàcáⁿ táhú-í núú-n, chi ñá túú quide-í dàtná quidé dàva-gá-güedé, chi dùhu-güedé, càháⁿ ndihi-güedé ñadhí te ñá díú ñadhí-güedé cúú-yu, te nándi-gá nchaa sá cuèhé sá dúhá quide-güedé, te ní ñá túú quide-í dàtná quidé téé cuihna iní-xi quide cobrá ñáhá xii ñáyiu cuèndá impuèstú ndécú lha.

12 Chi yúhú ñá túú tnáhi ná xéxi-í úú nduu xití samàná cuèndá sá càháⁿ ndihi ñaha-í xii-n, te nchaa sá nihí-í te càhu-í úxí xichi, te ñá xichi táxi-í xii-n”, càchí-dé xáhaⁿ-dè xii Yá Ndiöxí.

13 Dico téé cuihna iní-xi quide cobrá ñáhá xii ñáyiu cuèndá impuèstú-áⁿ chi xica lùha nutñi-dé, te ní lùha ñá túú cùyii-dé ndonehe núú-dé andiu cuèndá sá ndixí cuèchi iní-dé nchaa sá ñá túú vaha quide-dé, te ndédí ndaha-dé pèchú-dé sá ndihú iní-dé, te xáhaⁿ-dè xii Yá Ndiöxí: “¡Yòhó Dútú Ndiöxí cundàhú iní ñáhá xii-í, chi io cuèhé sá ñá túú vaha quide-í núú-n!”, càchí-dé xáhaⁿ-dè xii Yá Ndiöxí.

14 Te na càchí tnúhu-í xii-ndo sá téé cuihna iní-xi quide cobrá ñáhá xii ñáyiu-áⁿ ní tedóho

Yá Ndiöxí nchaa tnúhu ní càháⁿ-dé, te ní quide càhnu iní-gá nchaa sá ñá túú vaha ní quide-dé, te cuánuhú-dé vehe-dé. Te téé cuu fariséú-áⁿ ñá túú ní tédóho ñaha Yá Ndiöxí xii-dé. Chi nchaa ñáyiu na càda cahnu mee-xi ñuyúú-a te vá cúú-yu ñáyiu cùnnu, te nchaa ñáyiu ñá túú quide cahnu mee-xi, ñáyiu-áⁿ cunúú-yu —càchí Jèsús xáhaⁿ-gá xii-yu.

Jèsús quidé ñá-gá landú

(Mt. 19:13-15; Mr. 10:13-16)

15 Te ñá ñá ñáyiu ndècá-yu landú líhli cuaháⁿ núú Jèsús chi cuiní-yu sá téndàha ñaha-gá xii-güexi, te òré ní xiní cue téé xica cuu ndihi-gá sá ndécá-yu landú-áⁿ cuaháⁿ núú-gá, te ní ngúita-güedé ténàá ñáhá-güedé xii-yu, te xáhaⁿ-güedé sá vá dúcáⁿ càdá-yu.

16 Dico Jèsús ní cana ñaha-gá xii-güedé, te ní xáhaⁿ-gá:

—Chí dàhá ná quixi nahi landú líhli-áⁿ núú-í-a, te vá càdí-ndó ichi-güexi, chi dàtná cúú vaha iní cue landú líhli-áⁿ ducaⁿ cuu vaha iní cue ñáyiu yindaha ñaha Yá Ndiöxí.

17 Te na càchí tnúhu ndáá-í xii-ndo sá núú vá quindáá iní ñáhá-ndó dàtná quidé dàva landú líhli sàndáá iní ñáhá xii-í, te vá ndihu ndaha ñaha Yá Ndiöxí xii-ndo, te vá ndúú táhú-ndó cundecu-ndo ndihi-gá ní caa ní quíhíⁿ —càchí-gá xáhaⁿ-gá xii-güedé.

Ñá téé cuica càháⁿ ndihi-dé Jèsús

(Mt. 19:16-30; Mr. 10:17-31)

18 Te ñá téé cùnnu ní xicáⁿ tnúhú-dè núú Jèsús, te xáhaⁿ-dè xii-gá:

—Yòhó Mèstrú, cuu-n téé io vaha iní-xi, te cuiní-í núú vá cùndèe iní-n càchí tnúhu-n ná cúú sá vaha cada-í cuèndá nduu táhú-í cundecu-í ndihi Yá Ndiöxí ní caa ní quíhíⁿ —càchí-dé xáhaⁿ-dè xii-gá.

19 Te Jèsús ní xáhaⁿ-gá xii-dé:

—¿Te cùtnuní iní-n nàcuáa nduu tnúhu càháⁿ-n sá yúhú vaha iní-áⁿ? Chi ñá díf-ni Yá Ndiöxí vaha iní-gá.

20 Te yòhó xiní-n nàcuáa ní càchí Yá Ndiöxí cada ñáyiu, te duha ní càchí-gá: “Nchòhó cue téé vá càháⁿ ndihi-ndo ñadhí te núú ñá díú ñadhí-ndó cúú-yu, te ducaⁿ-ni nchòhó cue ñáyiu dífni tucu vá càháⁿ ndihi-ndo téé te núú ñá díú yii-ndo cuu-güedé, te vá càhni-ndó tnàha ñáyiu-ndo, te ní vá dúhú-ndó sá ndécú ndihi-yu, te ní vá dàcàcu-ndo cuèchi neñúú sá cúú-xí tnàha ñáyiu-ndo, te canehe-ndo sá yíñúhu núú tātá-ndó ndihi núú náná-ndó”, duha ní càchí Yá Ndiöxí cada ñáyiu —càchí Jèsús xáhaⁿ-gá xii-dé.

21 Te téé-áⁿ ní xáhaⁿ-dè xii-gá:

—Nchaa xáⁿ ní ngúita-í quidé-í ndéé cùtnáhá cúú landú-í —càchí-dé xáhaⁿ-dè xii-gá.

22 Te Jèsús ní xáhaⁿ-gá xii-dé:

—Dico cùmání ìngá núú sǎ cáda-n, vitna te quíhí-n te dico-n ncháa sǎ ndécú ndíhí-n, te díhí-n cuáha táhú-n cuè ñáiyu ndàhú, te ducaⁿ te nduu táhú-n cùndecu váha-n núú ndécú Yá Ndióxi táxi tñuní-gǎ, te na yáha ducaⁿ cáda-n te quixi-n chitnahá ñáhá-n xii-í —càchí-gǎ xáhaⁿ-gǎ xii-dé.

²³ Te sǎ dúcáⁿ ní xáhaⁿ Jèsús xii-dé, te ío ní cundiyí-dé, chí ío cuica-dé.

²⁴ Te sǎ ní xini ñáhá Jèsús xii-dé cundiyí-dé, núú ní cachí-gǎ:

—Ío úhú quindáá iní ñáiyu cuica Yá Ndióxi cuendá ndíhu ndaha ñaha-gǎ xii-yu!

²⁵ Te yáchí-gǎ yáha ñⁿ caméyu yaú ñⁿ yiqui ticú dàcúxí sǎ quindáá iní ñⁿ ñáiyu cuica Yá Ndióxi cuendá ndíhu ndaha ñaha-gǎ xii-yu —duha ní cachí-gǎ.

²⁶ Te nchaa ñáiyu ní tecú dóho-xi tñúhu ní cáháⁿ-gǎ ní xáháⁿ-yu xii-gǎ:

—¿Te yoo naníhí táhú te núu ducaⁿ vaiⁿ? —cachí-yu xáháⁿ-yu xii-gǎ.

²⁷ Te Jèsús ní xáhaⁿ-gǎ xii-yu:

—Cue ñáiyu ñuyíú-a chí vá ndácú-yu ná cadá-yu nàcuáa ndíhu ndaha ñaha Yá Ndióxi xii-yu, dico mee-gǎ chí ndacu-gǎ ndíhu ndaha ñaha-gǎ xii-yu chí nchaa sǎ váha ndàcu-gǎ quidé-gǎ —cachí-gǎ xáhaⁿ-gǎ xii-yu.

²⁸ Te té Pèlú ní xáhaⁿ-dè xii-gǎ:

—Nchúhú ní dándóo-ndí nchaa sǎ ndécú ndíhí-ndí, te ní tuha ñaha-ndí xii-n —cachí-dé xáhaⁿ-dè xii-gǎ.

²⁹ Te ní xáhaⁿ-gǎ xii ñáiyu:

—Na cachí tñúhu ndáá-í xii-ndo sǎ ncháá ñáiyu na dándóo vehe-xi, ádi tátá-xi, náná-xi, ñaní-xi, cúha-xi, ñadíhí-xi, déhe-xi cuendá sǎ cuini-yu ndíhu ndaha ñaha Yá Ndióxi xii-yu,

³⁰ te ío-gǎ cuéhé sǎ cuñaha-gǎ xii-yu cundecu ndíhí-yu, te ñá díú-ní xiáⁿ, chí tñahá nduu táhú-yu cundecu ndíhí ñáhá-yu xii-í ní caa ní quíhíⁿ ná sàá nduu —cachí-gǎ xáhaⁿ-gǎ xii-yu.

Jèsús cáháⁿ tucu-gǎ sǎ cáhí ñaha-güedé xii-gǎ

(Mt. 20:17-19; Mr. 10:32-34)

³¹ Te Jèsús ní taudíⁿ-gǎ ndi úxúú cue téé xica cuu ndíhí-gǎ tnuú ñáiyu, te ní xáhaⁿ-gǎ xii-güedé:

—Vitna te quíhíⁿ-ó ñúú Jerusalén, chí yácaⁿ cada-xi nchaa nàcuáa sǎ ní chídó tñuní cue téé ní xóo cáháⁿ tñúhu Yá Ndióxi ndéé sanaha nàcuáa yáha yuhú Téé cuu ñaní tñahá-ndó ncháa-ndo.

³² Chí cuáha cuendá ñáhá-güedé xii-í núú cuè téé ñá túú cuu cue téé isráel, te cudíquí ndéé ñáhá-güedé xii-í, te cúcuéhé ñáhá-güedé, te tiú díí ñáhá-güedé xii-í.

³³ Te caniha-güedé ndíhí ñí, te dàtñuní cahni ñaha-güedé xii-í, dico nduu úní

sǎ cùú-í te ndoto-í —càchí-gǎ xáhaⁿ-gǎ xii-güedé.

³⁴ Dico ní ñⁿ tñúhu ní cáháⁿ-gǎ ñá túú ní tècú tñuní-güedé, chí ío yídáhu tñúhu ní cáháⁿ-gǎ núu xiáⁿ ní ñⁿ ñá túú ní tècú tñuní-güedé.

Jèsús quidé táma-gǎ núú ñⁿ téé cuáá ñúú Jericó

(Mt. 20:29-34; Mr. 10:46-52)

³⁵ Te òré tá cùyatni Jèsús ñúú Jericó cuáháⁿ, te yuhu ichi cuáháⁿ-gǎ-áⁿ núcúo ñⁿ téé cuáá xicáⁿ ndàhú-dé.

³⁶ Te òré ní tecú dóho-dé xicáháⁿ vai ñáiyu xiyáha-yu, te ní xicáⁿ tñúhú-dé núú ñáiyu ndécú ndíhí-dé ná cuendá ducaⁿ vai-yu yáha.

³⁷ Te ní xáháⁿ-yu sǎ Jèsús téé ñúú Nazàrét ñúhú-dé ichi.

³⁸ Te níhí ní cáháⁿ-dé, te xáhaⁿ-dè xii-gǎ:

—Jèsús ñaní tñahá ndí Dàví, cundàhú iní ñáhá xii-í! —cachí-dé xáhaⁿ-dè xii-gǎ.

³⁹ Te ñáiyu xixódó núú núú Jèsús ní tenáá ñáhá-yu xii-dé, te xáháⁿ-yu sǎ ná càdí-dé yuhu-dé dico uuⁿ-gǎ níhí ní cáháⁿ-dè xáhaⁿ-dè xii-gǎ:

—Yòhó téé cuu ñaní tñahá ndí Dàví, cundàhú iní ñáhá xii-í! —cachí-dé xáhaⁿ-dè xii-gǎ.

⁴⁰ Te Jèsús ní ngúñí-gǎ, te ní táuchíúⁿ-gǎ ní sángueheⁿ ñaha cuè téé ndíhí-gǎ. Te òré ní quexio-dé núú-gǎ, te ní xicáⁿ tñúhú-gǎ núú-dé, te xáhaⁿ-gǎ:

⁴¹ —¿Ná cuini-n càda ñaha-í xii-n-í? —cachí-gǎ xáhaⁿ-gǎ xii-dé.

Te téé cuáá-áⁿ ní xáhaⁿ-dè:

—Mèstrú, cuini-í cada tátna-n núú-í cuendá cundehe-í —cachí-dé xáhaⁿ-dè xii-gǎ.

⁴² Te Jèsús ní xáhaⁿ-gǎ:

—Sa ní ndúha núú-n chí ní sándáá iní-n Yá Ndióxi —cachí-gǎ xáhaⁿ-gǎ xii-dé.

⁴³ Te òré-ni-áⁿ ní ndúha núú-dé, te ní chinchícúⁿ-dè Jèsús, te ní cachí-dé sǎ ío càhnu cuu Yá Ndióxi. Te nchaa ñáiyu ní xini nàcuáa ní cuu ní ndúha núú-dé tñahá-yu ní cachí-yu sǎ ío càhnu cuu Yá Ndióxi.

19

Jèsús ndíhí ñⁿ téé nani Zaqueú

¹ Te Jèsús ní sáá-gǎ ñúú Jericó, te ta yáha-gǎ xití ñúú-áⁿ cuáháⁿ.

² Te ñúú-áⁿ ndécú ñⁿ téé cuica nani-dé Zaqueú, te cunuu-dé táxi tñuní-dé cue téé cundíhí-dé, cue téé cuihna iní-xi quide cobrá ñáhá xii ñáiyu cuendá impuestú.

³ Te téé-áⁿ cuini-dé quini-dé Jèsús òré-áⁿ ní cuu te ñá ní ndàcu-dé, chí ío cuéhé ñáiyu, te ñá túú dúcúⁿ-dè.

⁴ Te xinu-dé ní ngódó núú-dé te ní sáá-dé díquí ñⁿ yutnu sicómorú nùtní yatni yuhu ichi núú yáha Jèsús cuendá cuini-dé quini ñáhá-dè xii-gǎ.

⁵ Te òrè tá yáha Jèsús xián, te ní ndonehe núú-gá díquí yutnu núú cándòdo-dé-án, te ní xáhaⁿ-gá xii-dé:

—Zàqueú, tanùu ndíhi díquí yutnu-án, chi tnavíi quexio-í vehe-n ndètátú-í —càchí-gá xáhaⁿ-gá xii-dé.

⁶ Te té Zàqueú-án ní nuu ndíhi-dé díquí yutnu-án, te ío ní cudíí íní-dé ní queheⁿ cuèndá-dé Jèsús vehe-dé.

⁷ Te sá ní xini ñáiyu ní quexio Jèsús vehe-dé, te nchaá-yu ní nguíta-yu càháⁿ cuèhé-yu cuèndá-gá, te xítàhá-yu:

—Tée-a cuánguúhu-dé vehe ìⁿ tée ndècu ichi cuehé ichi duha —càchí-yu xítàhá-yu.

⁸ Te té Zàqueú-án ní ndacuñí-dé tnuú-yu, te xáhaⁿ-dè xii Jèsús:

—Yòhó Mèstrú, na cuáha-í ñáiyu ndàhú cuádava nchaá sá ndécú ndíhi-í. Te núu yoo ní dándàhú-í ní dúhú-í, te codo ùní-gá tñàhá sá ní dúhú-í-yu nacuañaha-í xii-yu —càchí-dé xáhaⁿ-dè xii-gá.

⁹ Te Jèsús ní xáhaⁿ-gá xii té Zàqueú:

—Vitna ní naníhi tàhú-n ndíhi nchaá ñáiyu xíndecu vehe-n, chi tñàhá-n cùu-n ñaní tñàhá ndíi Àbrahám.

¹⁰ Te yúhú Tée cùu ñaní tñàhá-ndó nchàa-ndo véxi-í nándùcu-í ñáiyu ní xita nihnu cuèndá dàcácu nihnu-í-yu núú úhú núú ndàhú —càchí-gá xáhaⁿ-gá xii-dé.

Nàcuáa ní quide-güedé ndíhi díhúⁿ cuááⁿ (Mt. 25:14-30)

¹¹ Te nchaá ñáiyu-án ní sani íní-yu sá ndíhi-ni ndíhu ndaha ñaha Yá Ndiòxi xii-yu cuèndá sá ní cuyatni Jèsús ñuú Jerusàlén, te xián núu ní nguíta Jèsús ní caní-gá ìⁿ cuèndú núú-yu cuèndá tecú tñuní váha-yu tñúhu-gá.

¹² Te xáhaⁿ-gá xii-yu:

—Ní xíndecu ìⁿ tée cùu ñaní tñàhá ñáiyu cùnuu, te cuáháⁿ-dé íngá ñuú xicá cuèndá yacáⁿ cuáha ñaha-güedé chùⁿ coo-dé, te dàtnùní ndixi-dé quindaha-dè titní ñuú.

¹³ Te cùmání-gá quee-dé quíhíⁿ-dé, te ní cana-dé úxí cue tée xinu cuechi núú-dé, te ní sáñaha-dè ndí dííⁿ núú-güedé ìⁿ caa ìⁿ caa díhúⁿ cuááⁿ, te ní xáhaⁿ-dè: “Chí cádá ndàhú ndíhi díhúⁿ-án ndèé ná sáa nduu nàsáá-I”, càchí-dé xáhaⁿ-dè xii-güedé.

¹⁴ Dico nchaá ñáiyu ñuú quindaha-dè-án ñà túú tñàhá íní-yu sá quíndàha ñaha-dé, núu ní tendàhá-yu cue tée nèhe tñúhu cuáháⁿ núú cuè tée cuáñaha chùⁿ coo-dé-án, te ní xáháⁿ-yu sá cùñaha-güedé sá ñà túú tñàhá íní-yu sá tée-án quindaha ñaha-dé xii-yu.

¹⁵ Dico dacutíí sá ní sáha-güedé tée-án chùⁿ coo-dé sá dífú-dé quindaha-dè ñáiyu nchaá ñuú-án, te ní nacuíco-dé cuánuhú-dé ñuú-dé. Te òrè ní nasáá-dé vehe-dé, te ní tendaha-dé ìⁿ tée ní sánucana ñaha xii cue tée xinu cuechi núú-dé, cue tée ní dándóo

ndaha-dè díhúⁿ cuèndá cacáⁿ tñúhú-dè núú-güedé ìⁿ ìⁿ-güedé núu ndèé dau ní chídó-xi díquí díhúⁿ sá ní dándóo ndaha ñaha-dé-án.

¹⁶ Te tée ní ndèxio díhna xáhaⁿ-dè: “Pàtróóⁿ, ní quide-í ndáhú ndíhi díhúⁿ-n sá ní dándóo ndaha ñaha-n xii-í, te sá ìⁿ ní taxi-n te ní chídó-xi úxi-gá tñàhá te ná-u naqueheⁿ cuèndá-n”, càchí-dé xáhaⁿ-dè.

¹⁷ Te tée cùu patróóⁿ-dè-án ní xáhaⁿ-dè: “Ío váha tée xinu cuechi cuu-n chi ío váha ní quide-n, te sá ní quide váha-n ndíhi sacú díhúⁿ sá ní dándóo ndaha ñaha-í xii-n, te xián núu yúhú càchí-í sá táxi tñuní-n úxi ñuú vitna”, càchí-dé xáhaⁿ-dè.

¹⁸ Te ní ndèxio íngá-dé, te ní xáhaⁿ-dè: “Pàtróóⁿ, ní quide-í ndáhú ndíhi díhúⁿ-n sá ní dándóo ndaha ñaha-n xii-í, te sá ìⁿ ní taxi-n te ní chídó-xi úhúⁿ-gá tñàhá te ná-u naqueheⁿ cuèndá-n”, càchí-dé xáhaⁿ-dè.

¹⁹ Te ní xáhaⁿ tée cùu patróóⁿ-dè-án xii-dé: “Te yòhó taxi tñuní-n úhúⁿ ñuú”, càchí-dé xáhaⁿ-dè xii tée xinu cuechi-án.

²⁰ Te dàtnùní ní ndèxio tucu íngá-dé, te xáhaⁿ-dè: “Pàtróóⁿ, náú díhúⁿ-n-á, te naqueheⁿ cuèndá-n chi ní taxúha-í ní chidúcúⁿ-nuu-í ìⁿ pañú te ñà túú ní quide-í ndáhú ndíhi díhúⁿ-n,

²¹ chi ní yúhú ñàhá-í xii-n, chi cùu-n ìⁿ tée díí, te nàqueheⁿ-n ìⁿ sá ñà túú ní tàxi ndecu-n, te nàtahu-n ìⁿ xichi núú ñà túú ní chihí-n tatá”, càchí-dé xáhaⁿ-dè xii patróóⁿ-dè.

²² Te ní xáhaⁿ patróóⁿ-dè xii-dé: “Yòhó cùu-n ìⁿ tée cuihna íní-xi xinu cuechi núú-í, te díu-ni nchaá tñúhu càháⁿ-n-án càchí tñuní-xi nàcuáa cuu ndáá cuèchi-n. Te núu sani íní-n sá cùu-í ìⁿ tée díí, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú ní chihí-í tatá,

²³ te núu ducaⁿ ña, ¿te ná cuèndá ñà túú ní càhu íní-n dàsaⁿ nuu-n díhúⁿ ní taxi-í, te cùñaha-n chàhu-yu díquí-xi, te òrè ná nàsáá-í vehe-í, te sa ngódo lùha-gá díquí-xi naqueheⁿ cuèndá-í ní cùu-í?”, càchí-dé xáhaⁿ-dè xii tée xinu cuechi-án.

²⁴ Te ní xáhaⁿ tée cùu patróóⁿ-án xii cue tée xíndecu xián: “Chí quèndé díhúⁿ cuááⁿ nèhé tée-a, te cuáha-ndo tée nèhe úxí tucu díhúⁿ cuááⁿ-án”, càchí-dé xáhaⁿ-dè xii-güedé.

²⁵ Te ní xáhaⁿ-güedé: “Pàtróóⁿ, dico sa nèhe-dé úxí díhúⁿ cuááⁿ”, càchí-güedé xáhaⁿ-güedé.

²⁶ Te ní xáhaⁿ tée cùu patróóⁿ-án: “Na càchí tñúhu-í xii-ndo sá cue ñáiyu ío xii-xi te níhí-gá-yu cundecu ndíhi-yu, te cue ñáiyu sacú ndécú ndíhi cuita ndíhi nihnu nchaá sá ndécú ndíhi-yu”, càchí tée cùu patróóⁿ-án xáhaⁿ-dè xii-güedé.

²⁷ Te xáhaⁿ tucu-dé xii-güedé: “Nchaá ñáiyu cùu úhú íní ñàhá xii-í ñà tñàhá íní-yu

quindaha-ĩ-yu, te chí cándecá-yu taquixi iha, te cahni-ndó-yu núu-í-a", cächí tée cùu pa-tróó-án xáha-n-dě xii-güedé —duha cuáhán cuèndú ní cani Jesús núu ñáiyu.

*Jèsús cuánguihu-gá ñuú Jerusalén
(Mt. 21:1-11; Mr. 11:1-11; Jn. 12:12-19)*

²⁸ Te sátá dúcáⁿ ní cáháⁿ-gá, te ní nucúhuⁿ ichi-gá cuáhán-gá ñuú Jerusalén.

²⁹ Te òré sa ní cuyatni-gá ñuú Bètfaqé, ndíhi ñuú Bètaniá te xiánⁿ cáá yùcu nani Olivú, te ní xáhaⁿ-gá xii úú cue tée xíca cuu ndíhi-gá:

³⁰ —Chí cuáhánⁿ ñuú cáá yàtni yacáⁿ, te òré quexio-ndo yacáⁿ, te nanihí-ndó ñⁿ búrru ndetní-di, te vátá yóo ñⁿ-gá codo ñaha xii-di, te nandaxi-ndo-di te candeca-ndo-di quixi.

³¹ Te núu yoo na cácáⁿ tnúhu núu-ndó ná cuèndá nándaxi-ndo-di, te cúñaha-ndo xii-yu sá yúhú Yáá xíca cùu ndíhi-ndo xini ñuhu-í-di —cächí-gá xáhaⁿ-gá xii-güedé.

³² Te cue tée-áⁿ ní xíca-güedé cuáhán-güedé, te nchaa-ni nàcuáa ní xáhaⁿ Jèsús ducaⁿ ní cuu,

³³ chí mei òré nándaxi-güedé búrru-áⁿ ní quexio cue ñáiyu cùu xítóhó-di xicáⁿ tnúhu-yu núu-güedé, te xáhánⁿ-yu:

—¿Ná cuèndá nándaxi-ndo búrru-ndí-i? —cächí-yu xáhánⁿ-yu.

³⁴ Te ní xáhaⁿ-güedé xii-yu:

—Ná ndaxi-ndí-di chí Yáá xíca cùu ndíhi-ndí xini ñuhu ñaha-gá xii-di —cächí-güedé xáhaⁿ-güedé xii-yu.

³⁵ Te ndéca-güedé-di cuáhánⁿ núu ndécú Jèsús, te òré ní quexio-güedé ndíhi-di núu ndécú-gá te ní sacáⁿ ndodo-güedé dóó-güedé sátá-di, te ní ngódó ñáhá-gá xii-di.

³⁶ Te ío cuéhé ñáiyu ta sácáⁿ-yu dóó-yu ichi cuáhán-gá cuèndá núu dóó-yu-áⁿ yáha-gá ndíhi quiti yódo-gá.

³⁷ Te ní nucúta nuu-gá ichi tindúú yucu Olivú tá cuyatni-gá ñuú Jerusalén cuáhánⁿ, te nchaa ñáiyu sàndáá ini ñáhá xii-gá nchícúⁿ ñáhá-yu te ní nguíta-yu níhi cáháⁿ-yu sá cudíí ini-yu, te cächí-yu sá ío càhnu cuu Yá Ndióxi cuèndá sá ní xini-yu nchaa sá vā yóo tnàhí ndàcu cada ní quide-gá.

³⁸ Te cächí-yu:

—Ío càhnu cuu Yáá véxi quindaha ñaha xii-o, te diu-gá cúu-gá Yáá ní tendaha Yá Ndióxi véxi quide núu-gá! ¡Te ío càhnu cuu mee-gá! ¡Te andíu ñà túú tnàhí ná cúu! —duha cächí-yu.

³⁹ Te ñⁿ úú cue tée cùu fariséu ñuhú tnàhí tnuú ñáiyu-áⁿ ní xáhaⁿ-güedé xii Jèsús:

—Méstrú, cúñaha ncháa ñáiyu ndíhi-n na càdí-yu yuhú-yu —cächí-güedé xáhaⁿ-güedé xii-gá.

⁴⁰ Dico Jèsús ní xáhaⁿ-gá xii-güedé:

—Te na cächí tnúhu-í xii-ndo sá ñuú ñáiyu-a na càdí-yu yuhú-yu ña, te nchaa

yúú cáháⁿ níhi-xi dàtná ñⁿ ñáiyu —cächí-gá xáhaⁿ-gá xii-güedé.

⁴¹ Te òré ní cuyatni-gá ñuú Jerusalén te ní xini-gá, te ní ndáhyú-gá cuèndá nchaa ñáiyu dii ñuú-xi-áⁿ sá ndíhu ini-gá.

⁴² Te ní xáhaⁿ-gá xii cue ñáiyu-áⁿ:

—Ío cuu váha ini-í te núu dicó nchóhó tecú tnúni-ndó vitna ñⁿ tnúhu sá cáda váha ñaha xii-ndo, chí ñá túú-gá ná cuu cundecu-ndo, te núu na təcú tnúni-ndó. Dico ñá təcú tnúni-ndó, chí ío yidáhu tnúhu-a.

⁴³ Te sáa nduu tnúndóho tnúhu ndáhú sá cúu-xi-ndó, te nchaa cue tée dava-gá ñuú cúu úhú ini tnáhá ndíhi-ndo quixi-güedé chidoco ñaha-güedé xii-ndo, te ní cándéé núu ndécú-ndó-áⁿ dacàa-güedé ndécho cuèndá xiánⁿ quíhi váha-güedé náa ndíhi ñaha-güedé xii-ndo, te vā dáñá-güedé cunu-ndo.

⁴⁴ Te cahni ñaha-güedé xii-ndo, te ndíhi nchaa vehe-ndo dàngoyo-güedé ndéé cimièntú-xi, chí ñá túú ní cuini-ndó nàcuáha-ndo cuèndá òré ní quixi coto ñaha Yá Ndióxi xii-ndo —duha ní xáhaⁿ-gá xii ñáiyu ñuú-áⁿ.

Jèsús ñá túú tnàhí ini-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu cue ñáiyu quide ndáhú ndíhi cue ñáiyu xísaaⁿ. Te ní queñuhu ñaha Jèsús xii-yu quehé.

⁴⁶ Te ní xáhaⁿ-gá xii-yu:

—Núú tütú Yá Ndióxi cáháⁿ-xi nàcuáa ní cáháⁿ-gá, te duha ní cächí-gá: “Vehe-í cúu-xi núu cáháⁿ ndíhi ñaha ñáiyu xii-í”, duha ní cáháⁿ-gá cächí-xi núu tütú-gá. Dico nchóhó quidé-ndó vehe-gá vehe ñadúhú —cächí-gá xáhaⁿ-gá xii-yu.

⁴⁷ Te Jèsús nchaa nduu dànehé-gá ñáiyu xití veñúhu, dico cue tée cùu dútú cùnùu, ndíhi cue tée dàcuaha ñaha xii ñáiyu nchaa tnúhu ní chídó tnúni ndíi Moisés, ndíhi cue tée cùnuu ñuú-áⁿ ndúcú-güedé nàcuáa cada-güedé cahni ñaha-güedé xii-gá.

⁴⁸ Dico ñá níhi-güedé nàcuáa cada-güedé, chí cuèndá nchaa ñáiyu ío cudíí ini-yu ndedóho-yu nchaa tnúhu cáháⁿ-gá.

20

*Jèsús ndécú ndíhi-gá tnúhu ndee ini
(Mt. 21:23-27; Mr. 11:27-33)*

¹ Te ñⁿ nduu yíhi Jèsús xití veñúhu càhnu sá ío cùnuu danehé-gá ñáiyu tnúhu sá cáháⁿ nàcuáa nanihí táhú-yu. Te ní quexio cue tée cùu dútú cùnùu ndíhi cue tée dàcuaha ñaha xii ñáiyu nchaa tnúhu ní chídó tnúni ndíi Moisés, ndíhi cue tée cùu sacuéhé núu ñáiyu isráel,

² te ní xáhaⁿ-güedé xii-gá:

—Cuiñi-ndí cachí tnúhu-n xii-ndí nása ndúu tnúhu ndee ini ndécú ndíhi-n núu quide-n nándi sá quidé-n. ¿Te yoo ducaⁿ ní taxi tnúhu ndee ini-án xii-n? —cächí-güedé xáhaⁿ-güedé xii-gá.

³ Te Jèsús ní xáhaⁿ-gá:

—Yúhú tnàhá-í cuiñi-í cácaⁿ tnúhu-í ñⁿ sá cácaⁿ tnúhu-í núu-ndó, te cachí tnúhu-ndo.

⁴ Te chí cächí tnúhu xii-í yoo ní táuchíuⁿ ní dácuañdúte ndí Juáá ñáiyu. ¿Yá Ndióxi áⁿ cuè téé ñuyíu-a ní táuchíuⁿ ñucaⁿ ní quide ndí? —cächí-gá xáhaⁿ-gá xii-güedé.

⁵ Te ní ngüita-güedé xitnáha-güedé:

—¿Nása cúñaha-o? Chi núu ná cúñaha-o sá Yá Ndióxi ní táuchíuⁿ ñucaⁿ ní quide ndí Juáá ñá, te quesaha-dé: “¿Ná cuèndá ñá túu ní sàndáá ini-ndó tnúhu ní cáháⁿ ndí vaiⁿ?”, quesaha-dé.

⁶ Adi te núu ná cúñaha-o sá cuè ñáiyu ñuyíu-a ní táuchíuⁿ ñucaⁿ ní quide ndí ñá, te nchaa ñáiyu cuáha ñhá-yu yúu xii-o, te cahni ñhá-yu, chí cächí-yu sá ndáá sá Yá Ndióxi ní táuchíuⁿ-gá ní cáháⁿ ndí Juáá tnúhu-gá núu ñáiyu —cächí-güedé xitnáha-güedé.

⁷ Te ní xáhaⁿ-güedé xii-gá sá ñá túu xini-güedé yoo ní táuchíuⁿ ñucaⁿ ní dácuañdúte ndí Juáá ñáiyu.

⁸ Te ní xáhaⁿ Jèsús xii-güedé:

—Te núu ducaⁿ te ni yúhú vá cächí tnúhu-í xii-ndo yòo ní taxi tnúhu ndee ini duha quide-í —cächí-gá xáhaⁿ-gá xii-güedé.

*Cuèndá cue téé cuihna ini-xi
(Mt. 21:33-44; Mr. 12:1-11)*

⁹ Te sátá dúcáⁿ te ní ngüita Jèsús ní cani-gá ñⁿ cuèndú núu ñáiyu xácuáa tecú tnüni-yu tnúhu-gá, te xáhaⁿ-gá xii-yu:

—Ñⁿ téé ní xitu-dé mee-ni yòho yaha stilé núu ñúhú-dé. Te ní sáá ñⁿ nduu quingaca suu xica-dé vai nduu te ní dándóo ndaha-dé sá ní xitu-dé-án xii ñⁿ úu cue téé cáháⁿ ndíhi-dé cuèndá cada chiñu-güedé, te ní ndatnúhu-güedé sá òré ná cùu te cuu cuèndá dáva-güedé te ducaⁿ te ní quee-dé cuáháⁿ-dé.

¹⁰ Te sátá ní sáá nduu ní cuu nchaa ndéhe yoho yàha stilé sá ní xitu-dé-án, te ní xáhaⁿ-dé xii ñⁿ téé xinu cuechi núu-dé: “Cuáháⁿ cácaⁿ-n sá cùu cuèndá-í núu cuè téé ní dándóo ndaha-í nchaa yoho yàha stilé sá ní xitu-í”, cächí-dé xáhaⁿ-dé. Te téé xinu cuechi-án ní xica-dé cuáháⁿ-dé, dico cue téé ndé nchaa yoho yàha stilé-án ní tñi-güedé téé xinu cuechi-án te ní caniha-güedé, te ní nacuícúⁿ ñhá-güedé xii-dé, te ñá túu tnàhi ná ní sãñaha-güedé.

¹¹ Te dátñüni téé cùu xitohó nchaa yoho yàha stilé-án ní tendaha tücu-dé ingá téé xinu cuechi núu-dé cuáháⁿ-dé, dico ñi-ni ducaⁿ ní quide ñaha-güedé xii-dé, chí ní xicuèhé ñhá-güedé, te ní caniha-güedé te ní

nacuícúⁿ ñhá-güedé, te ñá túu tnàhi ná ní sãñaha-güedé.

¹² Te téé cùu xitohó nchaa yoho yàha stilé-án ní tendaha tücu-dé ingá-dé cuáháⁿ-dé, te ñi-ni ducaⁿ ní quide ñaha tücu-güedé, chí ní dancüèhé ñhá-güedé, te ní nacuícúⁿ ñhá-güedé.

¹³ Te téé cùu xitohó nchaa yoho yàha stilé-án ní sani ini-dé: “¿Nása cada-í vitna? Váha-gá tendaha-í déhe-í téé io cùu ini-a núhú-dé, chí cudana te òré quini ñhá-güedé xii-dé, te canehe-güedé sá yíñuhu núu-dé”, duha ní sani ini-dé.

¹⁴ Dico òré ní xini cue téé quide chiñu-án déhe xitohó nchaa yoho yàha stilé-án, te ní xitnáha-güedé: “Téé-án téé véxi nduu táhú ñuhu-a ndíhi nchaa sá cáá núu-xi, dico cahni-o-dé te mee-o nduu tahú-ó sá ndúu táhú-dé”, cächí-güedé xitnáha-güedé.

¹⁵ Te ní queñuhu ñaha-güedé ñⁿ xio yuhu ñuhu-án, te ní sañhi ñaha-güedé xii-dé — duha cuáháⁿ cuèndú ní cani Jèsús núu-yu.

Te dátñüni ní xáhaⁿ tücu-gá xii-yu:

—¿Te nchóho sá cùtnüni ini-ndó nácuaá cada ñaha xitohó ñuhu-án xii cue téé-án ñá?

¹⁶ Chí núhú-dé te cahni-dé cue téé-án, te dándóo ndaha-dé ñuhu-dé xii cue téé cùtnüni ini-dé cada ndáá —cächí-gá xáhaⁿ-gá xii-yu.

Te sátá dúcáⁿ ní cáháⁿ-gá, núu ní cachí-yu:

—¿Sá vá cächí Ndióxi sátá dúcáⁿ yáha-o! — cächí-yu.

¹⁷ Te Jèsús ní ndacoto-gá núu-yu, te ní xáhaⁿ-gá:

—Chí cächí tnúhu nása quee-xi nacuaá cáháⁿ-xi núu tútú Yá Ndióxi, núu cächí-xi: Yúu sá ní dáqueé tñú cue téé dácaa vehe ní saa-xi cùu-xi yúu cùnüu vitna.

Duha cächí-xi núu tútú-gá.

¹⁸ Te nchaa ñáiyu ñá túu cuiñi tñi tnúhu-í, te ndohó-yu dátñá ñⁿ ñáiyu tnàhnú duuⁿ òré ndúá-yu núu yúu, ñi núu na tau ñhá-xi te dácachi duuⁿ ñaha-xi —cächí-gá xáhaⁿ-gá xii-yu.

Cuèndá impuèstú

(Mt. 21:45-46; 22:15-22; Mr. 12:12-17)

¹⁹ Te cue téé cùu dütú cùnüu, ndíhi cue téé dácuaha ñaha xii ñáiyu nchaa tnúhu ní chídó tnüni ndí Moisés ní cuiñi-güedé tñi-güedé Jèsús òré-ni-á ní cùu, chí ní cutñüni ini-güedé sá cuèndá-güedé ní cáháⁿ-gá, dico ní yúhú-güedé cuèndá sá io vai ñáiyu.

²⁰ Te ní ndúcú-güedé nácuaá cada-güedé tñi ñaha-güedé xii-gá, te ní tendaha-güedé cue téé cuáháⁿ ngoto dayuhu ñaha xii-gá, te cuáháⁿ-güedé dátñá cue téé váha ini-xi, te ndücu-güedé nácuaá cada-güedé núu cáháⁿ-gá ñⁿ tnúhu sá ñá túu tau-gá cáháⁿ-gá cuèndá ducaⁿ te candeca ñaha-güedé xii-gá quñⁿ cuáha cuèndá ñhá-güedé núu téé cùnüu.

²¹ Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáiyu mee-ni tnúhu váha, te cuèi ndédani càa ñáiyu ñi-ni càháⁿ-n ndihí-yu, te càháⁿ ndáá-n nàcuáa càháⁿ Yá Ndióxi cundecu-o ñuyíú-a.

²² Te cachí tnúhu xii-ndí núu váha-ni cháhu-ndí té Cèsár tée ío cùnuu cuendá impuèstrú àⁿ ñáhá —càchí-güedé xáhaⁿ-güedé xii-gá.

²³ Dico Jèsús ni cutnùni iní-gá sá xító ndéè ñáhá-güedé xii-gá, núu ní xáhaⁿ-gá xii-güedé:

²⁴ —Chí dánèhé ñáhá xii-í ñiⁿ díhúⁿ cuixíⁿ te cachí tnúhu-ndo núu yoo núu-xi ndéè, ndihí yoo diu-xi ndéè —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndéè ndihí diu-dé —càchí-güedé xáhaⁿ-güedé xii-gá.

²⁵ Te ní xáhaⁿ tucu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá mée Yá Ndióxi, te xiáⁿ nacuáha-ndo-gá —càchí-gá xáhaⁿ-gá xii-güedé.

²⁶ Te ñá ní ndàcu tnahí-güedé datìcanuu ñaha-güedé xii-gá núu tnúhu càháⁿ-gá, chí òré ní càháⁿ-gá, te da ní cuñúhu-güedé nchaa tnúhu ní càháⁿ-gá, te váha-gá ní sadí-güedé yuhu-güedé.

Cuendá nchaa ñáiyu ndoto

(Mt. 22:23-33; Mr. 12:18-27)

²⁷ Te sátá dúcáⁿ te ní sáá ñiⁿ úú cue tée cùu saducus núu ndécú Jèsús. Te cue tée-áⁿ ñá túú sàndáá iní-güedé sá ndótó cuè ñáiyu ní xihí, te ní xáhaⁿ-güedé xii-gá:

²⁸ —Mèstrú, ndii Moisés càchí ndii núu tütú ndècu vitna sá núu ñiⁿ tée na cúu, te quendóo ñadihí-dé te ñá túú dèhe-dé ní xóo ndihí-aⁿ, te tée cùu ñani-dé naqueheⁿ-dé ñaha ní quendóo quèè-áⁿ cuendá coo dèhe-dé ndihí-aⁿ cuendá ñani-dé tée ní xihí-áⁿ.

²⁹ Te ní xindecu úsá tnahá cue tée mee-ni ndi ñani-güedé. Te tée díhna ní níhí ñadihí-dé, dico ñá túú ní cùdii-dé cundecu-dé chí ní xihí-dé, te ní ñiⁿ dèhe-dé ñá túú ní xóo ndihí ñadihí-dé-áⁿ.

³⁰ Te tée cùu uú ní naqueheⁿ-dé ñaha ní quendóo quèè-áⁿ dico ní xihí tucu-dé, te ní ñiⁿ tucu dèhe-dé ñá túú ní xóo ndihí ñaha-áⁿ.

³¹ Te tée cùu uní ní naqueheⁿ tucu-dé ñaha ní quendóo quèè-áⁿ, te diu-ni ducaⁿ ní xihí-dé, te ní xínu ndi úsá-güedé ní cándeca ñaha-güedé xii ñaha-áⁿ, dico ní ñiⁿ-güedé ñá túú ní xóo dèhe-güedé ndihí-aⁿ, te ní ndihí-güedé ní xihí.

³² Te ndéè núu ní ndihí-ná ní xihí tnahá ñadihí-áⁿ.

³³ Te na sáá nduu ndòto-güedé ndihí ñaha-áⁿ ¿Te ndédacaa-güedé ñadihí-güedé cuu-aⁿ-i? Chí ndi úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchaa ñáiyu ñuyíú-a tñándahá-yu.

³⁵ Dico nchaa ñáiyu ní nduu táhú ndoto díhna nuu ñáiyu-áⁿ cundecú-yu ndihí Yá Ndióxi ní caa ní quíhíⁿ, te yàcáⁿ ñá túú-gá sá cándeca tnahá-yu.

³⁶ Te ní ñá túú-gá tnúhu xihí, chí cuu-ná-yu dàtná cue espíritú xínú cuèchi núú Yá Ndióxi cuendá sá ní ndotó-yu, chí cùu-yu dèhe-gá.

³⁷ Te ndéè ndii Moisés ní chidó tñùni ndii núu tütú ndii sá ncháá ñáiyu ní xihí ndotó-yu, te diu-ni xiáⁿ càháⁿ-xi cuendá tnutáú nchicúⁿ ñuhú, te diu-ni xiáⁿ càchí tucu-xi sá Yá Ndióxi cúu-gá Ndióxi ndii Àbrahám, ndii Isáác, ndihí ndii Jàcòb.

³⁸ Te cue tée-áⁿ chí cuèi ní xihí-güedé sá cúu-xí nchòhò, dico sá cúu-xí Yá Ndióxi chí ndècu vívú-ni-güedé. Chí cutnùni iní-ó sá Yá Ndióxi cúu-gá Ndióxi mee-ni cuè ñáiyu xindecu vívú, te ñá túú cùu-gá Ndióxi cue ñáiyu ñá túú ndècu vívú. Te sá cúu-xí mée-gá chí nchaa ñáiyu ndècu ndihí-gá ndécú vívú-yu cuèi sa ní xihí-yu núu ñuyíú-a —càchí-gá xáhaⁿ-gá xii-güedé.

³⁹ Te ñiⁿ tée dàcuaha ñaha xii ñáiyu nchaa tnúhu ní chidó tñùni ndii Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá.

⁴⁰ Te ñá túú-gá ní cùyii-güedé cacaⁿ tnúhú-güedé ní ñiⁿ tnúhu núu-gá.

Yoo dèhe-xi cùu Cristú

(Mt. 22:41-46; Mr. 12:35-37)

⁴¹ Te Jèsús ní xáhaⁿ-gá xii-güedé:

—¿Te nása càchí-tu-yu sá Cristú Yaá tendahá Yá Ndióxi quixi ñuyíú-a cùu-gá dèhe ndii Dàvíí?

⁴² Te mee ndii Dàvíí-áⁿ ní cachí ndii núu libré Sálmu:

Dútú Ndióxi ní xáhaⁿ-gá xii Yaá cúu Xitohó-í: “Ngóo xio cùha-í,

⁴³ te yúhú cada-í te nchaa sá cúu ùhú iní ñáhá xii-n canehe-xi sá yíñúhu núu-n.”

Duha ní xáhaⁿ Dútú Ndióxi xii Yaá cúu Xitohó-í càchí ndii núu libré Sálmu.

⁴⁴ ¿Te nása cùu Cristú dèhe ndii Dàvíí, te mee ndii ní cachí ndii sá cúu-gá Xitohó ndii-i? —càchí Jèsús xáhaⁿ-gá xii-güedé.

Jèsús càháⁿ-gá cuendá cue tée dàcuaha ñaha xii ñáiyu nchaa tnúhu ní chidó tñùni ndii Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnúhu Jèsús ndihí cue tée xica cuu ndihí-gá xindeóhò ñaha ñáiyu, te xáhaⁿ-gá xii-güedé:

⁴⁶ —Cada cuendá-ndó vā cádá-ndó nàcuáa quide cue tée dàcuaha ñaha xii ñáiyu nchaa tnúhu ní chidó tñùni ndii Moisés, chí tnahá

iní-güedé cuihnu-güedé dóó nání sá sácúihnu cue téé cúnuu. Te nchaa núú táca ñáyiú cuiní-güedé sá ndihi tnúhu yíñúhu cáháⁿ ndihi ñáhá-yu xii-güedé, te nàcáxi-güedé xilé sácóo nchihí cue téé cúnuu-gá xití veñúhu conchihí-güedé, te ducaⁿ-ni quide-güedé cuéí òré quíhu-güedé mésá caxi-güedé òré ndécú-güedé ìⁿ vico, chí mee-ni núú sácóo cue téé cúnuu-gá cuiní-güedé coo-güedé.

⁴⁷Te quèndéé-güedé vehe nchaa ñáyiú ñáyiú ñáyiú quèé, te ío naha cáháⁿ ndihi-güedé Yá Ndióxi cuendá cuiní-güedé cáháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhu núú ndáhú dàcúúxí dàva-gá ñáyiú —càchí-gá xáhaⁿ-gá xii-güedé.

21

Díhúⁿ nduu táhú Yá Ndióxi ní dáquèé ìⁿ ñaha ndáhú ñaha quèé
(Mr. 12:41-44)

¹Te Jèsús ní xini-gá xití veñúhu xidáquèé cue téé cuica díhúⁿ nduu táhú Yá Ndióxi xití alcanciá.

²Te ní xini-gá tnàhá ìⁿ ñaha ndáhú ñaha quèé ní dáquèé-aⁿ úú díhúⁿ cóbrí,

³te ní xáhaⁿ Jèsús xii cue ñáyiú xíndecu-áⁿ:
—Na càchí tnúhu ndáá-í xii-ndo sá ñaha ndahú ñaha quèé-a ío-gá nándihí díhúⁿ ní dáquèé-aⁿ xití alcanciá nduu táhú Yá Ndióxi dàcúúxí díhúⁿ ní dáquèé dáva-gá-yu.

⁴Chí nchaa ñáyiú-áⁿ ní dáquèé-yu mee-ná sá ní ndóo-ná, dico ñaha quèé-a cuéí ndáhú-aⁿ dico ní dáquèé-aⁿ nihiú díhúⁿ sá cuááⁿ-áⁿ sá caxí-áⁿ ní cùu —càchí-gá xáhaⁿ-gá xii-yu.

Jèsús càchí-gá sá ngóyó veñúhu
(Mt. 24:1-2; Mr. 13:1-2)

⁵Te ìⁿ úú ñáyiú xicáháⁿ-yu cuendá veñúhu càhnu sá ío cúnuu sá ío vici cãa nchaa yúú yíhí, ndihi cuendá nchaa sá ní sãñaha táhú ñáyiú yíhí xití-xi. Te Jèsús ní xáhaⁿ-gá xii-yu:

⁶—Sáá nduu te nchaa sá cúnúhu-ndo-a vã cundúu-gá-xi dàtná cáá-xi vitna, chí ní ìⁿ-gá yúú vã códó nchihí tnaha-gá-xi chí ndihi ngoyo —càchí-gá xáhaⁿ-gá xii-yu.

Nacuáa cada-xi nduu ta cùyatni naa ñuyúú
(Mt. 24:3-28; Mr. 13:3-23)

⁷Te cue téé xíndecu-áⁿ ní xicáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu ducaⁿ cada-xi ngoyo veñúhu, àdi nándi cùu sá cadá-xi cuendá cutnùní iní-ndí sá sá ta cuyatni nduu ducaⁿ cada-xi-í? —càchí-güedé xáhaⁿ-güedé xii-gá.

⁸Te Jèsús ní xáhaⁿ-gá xii-güedé:

—Ío quíhí iní-ndó cùndecu-ndo, te vã dàñá-ndó mèe-ndo dandahú ñáhá ñáyiú xii-ndo. Chí ío cuéhé cue téé coo ñuyúú-a, te danáni-güedé mèé-güedé dàtná nání-í

te cachí-güedé: “Yúhú cùu-í Crístú Yáá ní tendaha Yá Ndióxi véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vã quíndáá iní-ndó, te ní vã túhá-ndó-güedé.

⁹Te òré ná nihí-ndó tnúhu sá titní nacióⁿ xínáa-güedé te dava ñuu xínáa-güedé ndi mèe-güedé, te vã yùhú-ndó chí dacuitíí sá dúcáⁿ càda-xi, dico vátá sáa-gá nduu nãa ñuyúú òré ducaⁿ càda-xi —cachí-gá xáhaⁿ-gá xii-güedé.

¹⁰Te xáhaⁿ tucu-gá xii-güedé:

—Nchaa cue téé ìⁿ nacióⁿ nãa-güedé ndihi cue téé ingá nacióⁿ, te titní ñuu ngúita-güedé nãa-güedé.

¹¹Te titní xichi ñuyúú níhi vihi tnáa, te titní tucu xichi ñuyúú coo tnamá, te titní tucu xichi ñuyúú quixi cuéhé, te titní núú sá cadá-xi àndiu, te yùhú ñáyiú.

¹²Te òré cùmání-gá cada-xi nchaa nacuáa cáháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhíⁿ xití veñúhu-güedé cada ndáá-güedé cuéchi-ndo, te chíhi ñaha-güedé vecaá xii-ndo, te candeca ñaha-güedé quíhíⁿ núú cuè téé cúnuu yindaha nacióⁿ àdi núú dàva-gá cue téé cúnuu sá cuendá-í.

¹³Te òré ducaⁿ na càda ñaha-güedé xii-ndo, te òré-áⁿ tãu-xi cáháⁿ váha-ndo cuendá-í núú-güedé.

¹⁴Te vã cáni iní-ndó núu nása cunduu tnúhu cùñaha-ndo xii-güedé cuendá cácu ni-hnu-ndo.

¹⁵Chí yúhú dacàhu iní ñáhà-í xii-ndo tnúhu cùñaha-ndo xii-güedé, te taxi-í sá vátá quini tnùn-í-gá-ndó, te ní ìⁿ ñáyiú cùu úhú iní ñáhá xii-ndo vã nihí-gá-yu tnúhu cùñáhá-yu xii-ndo.

¹⁶Te ndéé tãtá-ndó, ndihi ñaní-ndó, ndihi cue ñáyiú cùu ñaní tnáhá-ndó, ndihi cue ñáyiú cáháⁿ ndihi váha-ndo cuãha cuendá ñáhá-yu xii-ndo núú cuè téé cùchiuⁿ, te dava-ndo càhni ñaha-güedé xii-ndo.

¹⁷Te ío cuéhé ñáyiú cuu úhú iní ñáhá-yu xii-ndo sá cuendá-í.

¹⁸Dico Yá Ndióxi ío coto ñaha-gá xii-ndo chí ndéé idi díquí-ndó còto-gá.

¹⁹Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndihi Yá Ndióxi ní caa ní quíhíⁿ.

²⁰Te nduu na quini-ndó ñùhu doco sandadú ní càndéé yuhu ñuu Jerusàlén, te sa cutnùní iní-ndó sá sá ní cuyatni nduu dànaa-güedé ñuu-áⁿ.

²¹Te dàvã-áⁿ nchaa ñáyiú xíndecu distrítú Jùdeá xini ñùhu-xi cunú-yu quíhíⁿ-yu xití yucu, te nchaa ñáyiú xíndecu ñuu Jerusàlén quèé-yu xití ñuu-áⁿ, te ñáyiú ñá túú xíndecu ñuu-áⁿ vã ndíhu-gá-yu.

²² Chi dàvá-án cuu-xi nduu tnúndòho tnúhu ndàhú, te ducaⁿ càda-xi chi ducaⁿ ndéé tnuní núú tùtú Yá Ndiòxi nàcuáa dandòho ñaha-gá xii-yu.

²³ ¡Te ndàhú ní cuu nchaa ñáiyu ñáhi ñúhú ñéhe-xi, ndihi nchaa ñáiyu ndéca ñéhe vitna sàdi na sáa nduu ñáiyu cada-xi! Chi ío cuéhé tnúndòho tnúhu ndàhú coo núú ndécü-yu dàvá-án, te xiáⁿ cuu-xi ñⁿ tnúndòho tendaha Yá Ndiòxi quixi sá cúú-xi-yu.

²⁴ Te dava cue tée cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhiⁿ nchaa ñúú xicá, te cue tée dava-gá ñúú cunuu-güedé ñúú Jerusalén, te mee Yá Ndiòxi cachí-gá te núú ná daha nduu cunuu-güedé ñúú-án.

Nàcuáa cada-xi òré quixi tucu Tée cùu ñani tnáhá cué ñáiyu

(Mt. 24:29-35, 42-44; Mr. 13:24-37)

²⁵ Te cada-xi ñⁿ sá vátá quini-gá ñáiyu núú nchícanhii, ndihi núú yóó, ndihi núú nchàa chódini, te ñuyú-a coo tnúhu ndihú iní-xi te vá cutnúni iní-yu nása cada-yu cuendá sá ío dusaⁿ càda ndute lamár òré candaundéé tnáhá-xi.

²⁶ Te nchaa ñáiyu cuneé-yu sá yùhú-yu, ndihi sá ndihú iní-yu cuendá nchaa sá cáda-xi ñuyú-a, te quidi-xi andiu.

²⁷ Te sátá dúcáⁿ te quini-ndó yùhú Tée cùu ñani tnáhá-ndó nchàa-ndo quee-í andiu quixi-í ichi xiti vícò, te dàvá-án quini ñáhá nchàa ñáiyu sá ío cunuu-í te ndácu-í quide-í nchaa sá vaha.

²⁸ Te òré ná ngúita-xi ducaⁿ càda-xi, te cuita cundee-gá iní-ndó quíhiⁿ, te quíhi iní-ndó chi sa ní cuyatni vii-ná nduu cácu ni-hnu-ndo vā cündecu-gá-ndó núú ñuyú yíca cuéchi-a —cachí-gá xáhaⁿ-gá xii-güedé.

²⁹ Te ní caní-gá ñⁿ cuéndú núú-güedé nàcuáa tecú tnúni vaha-güedé tnúhu-gá, te xáhaⁿ-gá xii-güedé:

—Chí cündéhe yutnu ngúxi ndihi nchaa dava-gá yutnu.

³⁰ Chi nàtahú ndaha-xi, te òré ducaⁿ quide-xi te cächí-ndó sá sá ní cuyatni nuu cahni.

³¹ Te ñúu-ni ducaⁿ sátnahá-xi cùu òré ná quini-ndó càda-xi nchaa nacuáa càháⁿ-í, te sá dúcáⁿ te cutnúni iní-ndó sá ní cuyatni nduu ndihú ndaha ñaha Yá Ndiòxi xii-ndo.

³² Te na cächí tnúhu ndáá-í xii-ndo sá òré vátá cúú-gá cue ñáiyu xíndecu ñuyú-a vitna, te cada-xi nchaa nàcuáa ní cáháⁿ-í.

³³ Te andiu ndihi ñuyú-a chi ndihi ni-hnu-xi, dico tnúhu-í chi vā ndíhi ñihnu-xi, chí cùu-xi tnúhu ndáá.

³⁴ Te quíhi iní-ndó vā cündecu-ndo ichi cuéhe ichi duha, te vā cúú-ndó ñáiyu quíhu, te vā cúhúⁿ iní-ndó mèe-ni nchaa sá ío

ñuyú-a, chí núu ducaⁿ na càda-ndo te nacua-naa-ndo sá sáa nduu càda-xi nacuáa ní cáháⁿ-í. Te uuⁿi sáa nduu-án,

³⁵ te cada-xi dàtná cuini-ndó quide ñⁿ trampá chi uuⁿi ngáva-xi, te ducaⁿ càda-xi nchaa ñáiyu xíndecu ñuyú-a, chí uuⁿi sáa nduu-án.

³⁶ Te nchòhó cundecu túha-ndo te ío cáháⁿ ndihi-ndo Yá Ndiòxi cuendá ndacu-ndo yáha-ndo nchàa tnúndòho quixi ñuyú-a, te ducaⁿ te nasáa-ndó cündecu-ndo núú ndécú yùhú Tée cùu ñani tnáhá-ndó nchàa-ndo —cachí-gá xáhaⁿ-gá xii-güedé.

³⁷ Te nduu ndúu ní xóo danèhé Jesús ñáiyu tnúhu-gá xiti veñúhu cáhu sá ío cunuu, te níú níú ní xóo quíhiⁿ ngúdú-gá xiti yucu Òlívú.

³⁸ Te nehé nehé ní xóo quíhiⁿ nchaa ñáiyu veñúhu-án ní xóo cundedòho-yu nchaa tnúhu càháⁿ-gá.

22

Ndúcu-güedé nàcuáa cada-güedé cahni-güedé Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico pàscuá, te vico-án xéxi ñáiyu pàá sá ñà túú yihi levadurá.

² Te cue tée cùu dútú cúnúu, ndihi cue tée dàcuaha ñaha xii ñáiyu nchaa tnúhu ní chídó tnúni ndíi Moisés ndúcú-güedé nàcuáa cada-güedé cahni-güedé Jesús, te dicò-ni sá xiyùhú-güedé ñáiyu.

³ Te yucu ñávaha ní dácáhu iní ñáhá-xi xiti té Judás ñéhe té Iscariot, te núú tnáhá tée-án cúú ùxúú tnáhá cue tée xica cuu ndihi-gá ní cùu.

⁴ Te té Judás-án ní sáháⁿ-dé ní ndatnúhu-dé ndihi cue tée cùu dútú cúnúu, ndihi cue tée tàxi tnuní ñáhá xiti cue tée quide cuendá veñúhu nàcuáa cada-dé cuáha cuendá-dé Jesús núú-güedé.

⁵ Te ío ní cudíi iní-güedé, te ní xáhaⁿ-güedé xii-dé sá cuañaha-güedé díhúⁿ,

⁶ te ní xáhaⁿ-dè sá cúú quèheⁿ-dè díhúⁿ-án, te ní ngúita-dé ndúcú-dé nàcuáa cada-dé cuáha cuendá-dé Jesús núú-güedé òré ñà túú ñáiyu.

Cùdini Jesús ndihi cue tée xica cuu ndihi-gá
(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáa nduu ní quesaha vico xéxi-yu pàá sá ñà túú yihi levadurá, te ñúu-ni nduu-án sáhní-güedé ñⁿ mbéé líhli xéxi-yu.

⁸ Te Jesús ní xáhaⁿ-gá xii té Pélú ndihi te Juáa:

—Chí cuáháⁿ chí cada túha-ndo núú cùdini-o sacuaa nduu vico pascuá —cachí-gá xáhaⁿ-gá xii-güedé.

⁹ Te ní xicáⁿ tnúhú-güedé núú-gá, te xáhaⁿ-güedé xii-gá:

—¿Te ndéé cáá vehe cuini-n cada túha-ndí-í? —cächí-güedé xáhaⁿ-güedé xii-gá.

¹⁰ Te ní xáhaⁿ Jesús xii-güedé:

—Chí cündédóho na cächí tnúhu-í xii-ndo nácuáa cada-ndo. Óré quíhu-ndo xití núú núú quíhíⁿ-ndó, te naníhí-ndó ñⁿ téé tànehe ñⁿ yóó ndute, te téé-áⁿ candéndaha-ndo-dé quíhíⁿ, te núú ndédacáa vehe na ndíhu-dé te xíáⁿ quíhu-ndo.

¹¹ Te cúnaha-ndo xii xítóhó vehe-áⁿ: “Yáá cúú Mèstrú cächí-gá núú ndédacáa xichi xití vehe-n cuñaha núu-n xii-gá cudini-gá ndíhi cue téé xica cuu ndíhi-gá sacuaa nduu vico pascuáⁿ”, duha cúnaha-ndo.

¹² Te dätñúni danèhé ñáhá-dé xii-ndo ñⁿ cuartú cáhmú cáa núú ñinu, chí vehe yódo tñaha cuu-xi, te sa ní quide túha-dé nchaa sá ná ndíhi, te nchóhó dicó-ná sá cudini-o cada túha-ndo —cächí-gá xáhaⁿ-gá xii-güedé.

¹³ Te ní xica-güedé cuáháⁿ-güedé, te nchaa-ni nácuáa ní xáhaⁿ Jesús xii-güedé ní cuu, chí nchaa sa ndécu túha, te ní quide túha-güedé sá cudini-güedé ndíhi-gá sacuaa nduu vico pascuá-áⁿ.

¹⁴ Te sáta ní tñahá óré cudini Jesús ndíhi cue téé ní táuchíuⁿ-gá cáháⁿ tnúhu-gá núú ñáyyu, te cuánguihu ndíhi ñaha-gá xii-güedé mèsá.

¹⁵ Te xáhaⁿ-gá xii-güedé:

—¿Ducaⁿ-ni ío sàni iní-í sá cudini ndíhi ñaha-í xii-ndo sàcuua nduu vico pascuá óré cümáni-gá sáá nduu ndóho-í te cuú-í!

¹⁶ Te na cächí tnúhu-í xii-ndo sá vā dúhá-gá caxi ndíhi ñaha-í xii-ndo ndúu vico pascuá, chí ndéé óré ná sáá nduu násáá-ndó núú táxi tñúni Yá Ndióxi cundecu-o, te dāvá-áⁿ cada iní-ndó sá dätñá sá caxi túcu-o chí ío váha cuu iní-ó cündecu-o —cachí-gá xáhaⁿ-gá xii-güedé.

¹⁷ Te ní quehéⁿ-gá ñⁿ vāsú ñúhú ndüdí ndéhé yoho yáha stilé, te ní ndacáⁿ táhú-gá núú Yá Ndióxi, te dätñúni ní xáhaⁿ-gá xii-güedé:

—Chí quéhéⁿ vāsú ñúhú ndüdí ndéhé yoho yáha stilé-a, te coho-ndo lúha luha nchaa-ndo.

¹⁸ Te na cächí tnúhu tucu-í xii-ndo sá vítná-ná duha xíhi ndíhi ñaha-í xii-ndo ndüdí ndéhé yoho yáha stilé-a te vā cóhó ndíhi ñaha-gá-í, dico na sáá nduu naníhí tñahá-ó núú ndécú Tàtá-í Dútú Ndióxi táxi tñúni-gá, te dāvá-áⁿ cada iní-ó sá dätñá sá cóhó ndíhi ñaha tucu-í xii-ndo, chí ío cudíí iní-ó —cachí-gá xáhaⁿ-gá xii-güedé.

¹⁹ Te sáta ní túhú cóhó-güedé ní cudini-güedé, te ní quehéⁿ-gá pāá te ní ndacáⁿ táhú túcu-gá núú Yá Ndióxi, te dätñúni ní táhú cuéchi-gá, te ní dácáñu ñaha-gá xii-güedé, te xáhaⁿ-gá:

—Pāá-a cūu-xi datñá yiqui cūñú-í, chí cahni ñaha-güedé xii-í sá cuendá-ndó, te ducaⁿ-ni càxi-ndo pāá-a cuendá ndacu iní ñáhá-ndó xii-í —cachí-gá xáhaⁿ-gá xii-güedé.

²⁰ Te diu-ni ducaⁿ ní quide-gá ndíhi vāsú ñúhú ndüdí ndéhé yoho yáha stilé, chí ní quehéⁿ-gá te óré sáñaha-gá xii-güedé coho-güedé, te ní xáhaⁿ-gá:

—Ndudí ñúhú vāsú-a cada iní-ndó sá cúu-xí datñá ñíñi-í sá cáti óré cahni ñaha-güedé xii-í. Te sá dúcáⁿ cáti ñíñi-í xíáⁿ cutñúni ndáá sá Yá Ndióxi cada-gá ingá núú sá yáha sá cúu-xí-ndó.

²¹ “Dico vitna chí iha tñahá téé cuáha cuendá ñáhá xii-í núú cué téé cúu úhú iní ñáhá yíhi-dé mèsá.

²² Te yúhú Téé cúu ñani tñahá-ndó nchaa-ndo ñuhu ichi-í cuáháⁿ-í cuú-í datñá ní cächí Yá Ndióxi. ¡Dico ndáhú ní cuu téé ducaⁿ na cuáha cuendá ñáhá xii-í núú cué téé cúu úhú iní ñáhá! —cachí-gá xáhaⁿ-gá xii-güedé.

²³ Te ní nguíta-güedé ndúcú tnúhu núú tñahá-güedé núú ndéda cá-güedé ducaⁿ cada cuáha cuendá ñáhá xii-gá núú cué téé cúu úhú iní ñáhá.

Xíndatnúhu-güedé ndédacáa-güedé cunuu-gá

²⁴ Te sáta dúcáⁿ te ní nguíta-güedé xíndatnúhu-güedé núú ndédacáa-güedé táu-güedé cunuu-güedé.

²⁵ Dico Jesús ní xáhaⁿ-gá xii-güedé:

—Nchaa cue téé yíndaha ñaha xii ñáyyu ío táxi tñuni-güedé, te mee-güedé cuini-güedé sá cáháⁿ váha ñáyyu cuendá-güedé.

²⁶ Dico nchóhó vā dúcáⁿ cada-ndo, chí núú ñⁿ-ndo cūnuu te cada-ni-ndo sá ñā túú cūnuu-ndo, àdi cuu-ndo ñⁿ téé tàxi tñuni ñáhá xii cue téé xinu cuechi, te cada-ni-ndo sá cúu-ndó ñⁿ téé xinu cuechi-áⁿ.

²⁷ Te vā cächí-ó sá téé xinu cuechi cunuu-gá-dé, chí téé quíhu mèsá cúnú-gá-dé. Dico yúhú ndécú ndíhi ñaha-í xii-ndo datñá ñⁿ téé xinu cuechi.

²⁸ Te nchóhó ducaⁿ-ni ndécu ndíhi ñaha-ndo xii-í, te yáha ndíhi ñaha-ndo xii-í nchaa sá táyáha-í véxi.

²⁹ Te Tàtá-í Dútú Ndióxi ní cächí-gá sá táxi tñuni-í, te yúhú cächí-í xii-ndo sá sáá nduu te tñahá-ndó táxi tñuni-ndó.

³⁰ Te dāvá-áⁿ caxi-o coho-o cada-o núú táxi tñuni-í, te yàcáⁿ nguíta-ndo cada ndáá-ndó cuéchi ndí úxúu xichi ñáyyu israhél —cachí-gá xáhaⁿ-gá xii-güedé.

Jesús cáháⁿ-gá sá té Pèlú cúnaha-dé xii ñáyyu sá ñā túú xini ñáhá-dé xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítóhó Jesucristú ní xáhaⁿ-gá xii té Xímú:

—Yòhó Xímú, cundedóho váha ìᵐ tñuhu na càháⁿ-í-a, chí dàtná cuíní-n quide táchí triú sàcáⁿ-xí duha sàcáⁿ-xí dàcáⁿ, ducaⁿ quèsaha yucu ñávàha cada ñaha-xí xii-ndo. Chí coto ndeé ñáhá-xí xii-ndo te núu ndisa sàndáá iní ñáhá-ndó xii-í.

³² Dico yúhú xicáⁿ táhú-í núú Yá Ndiòxí cuèndá-n, cuèndá sá vǎ dáñá ndeé-n quíndáá iní ñáhá-n xii-í. Te òré ndixi túu iní-n sá ñà túú ní quide váha-n, te quíhíⁿ-n cuáha-n cuè téé cùndihí-n tñuhu ndee iní cuèndá canchicúⁿ nihnu-ni-güedé ichi Yá Ndiòxí —càchí-gá xáhaⁿ-gǎ xii-dé.

³³ Te ní xáhaⁿ-dè xii-gǎ:

—Mèstrú, sa ndècu túha-í sá quíhíⁿ ndihí ñaha-í xii-n vècaá, àdi cuéi na cùú ndihí ñaha-í xii-n —càchí-dé xáhaⁿ-dè xii-gǎ.

³⁴ Te Jèsús ní xáhaⁿ-gǎ:

—Pèlú, na càchí tñuhu-í xii-n sǎ cùmání-gǎ cana ìᵐ líhi te úní xito càháⁿ-n núú ñǎyiu sǎ ñà túú xini ñáhá-n xii-í —càchí-gá xáhaⁿ-gǎ xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gǎ xii-güedé:

—Te cùtnàhá ní tendaha ñaha-í xii-ndo ní sáháⁿ-ndó chiúⁿ-í, chí ñà túú ní cànehe-ndo ní ìᵐ sǎ cùhúⁿ díhúⁿ-ndó, te ní ìᵐ sǎ cùhúⁿ ndàchiúⁿ-ndo ñà túú ní cànehe-ndo. Te chí càchí tñuhu núu ío ìᵐ sǎ ní cumání xii-ndo —càchí-gá xáhaⁿ-gǎ xii-güedé.

Te ní xáhaⁿ-güedé:

—Ñáhá, chí ní ìᵐ sǎ ñà túú ní cùmání xii-ndí —càchí-güedé xáhaⁿ-güedé xii-gǎ.

³⁶ Te ní xáhaⁿ-gǎ:

—Te vitna núu ndècu ndihí-ndo sǎ sǎcùhuⁿ díhúⁿ-ndó, àdi sǎ sǎcùhuⁿ ndachiuⁿ-ndo te canehe-ndo. Te núu ñà túú ndècu ndihí-ndo machití, te nadico-ndo dǒó tìcàchí nihnu-ndo te cuaaⁿ-ndo.

³⁷ Te na càchí tñuhu-í xii-ndo sǎ dàcutíí sǎ yáha-í nàcuáa càháⁿ-xí núú tütú Yá Ndiòxí núú càchí-xi: “Ìᵐ-ni ní quide ñaha-güedé xii-gǎ, ndihí cue téé ndècu cuèchi-xi”, duha càchí-xi núú tütú-gǎ. Te ñà díú-ní xǎⁿ yáha-í chí nchaandi tühú nàcuáa càháⁿ-xí núú tütú-gǎ yáha-í —càchí-gá xáhaⁿ-gǎ xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gǎ.

Te ní xáhaⁿ-gǎ:

—Chí návíí-nǎ yuhu-ndo, vǎ càháⁿ-gǎ-ndó —càchí-gá xáhaⁿ-gǎ xii-güedé.

Jèsús càháⁿ ndihí-gǎ Yá Ndiòxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gǎ cuáháⁿ-gǎ yucu Òlívú, chí ducaⁿ tñáhí quide-gǎ. Te cue téé xica cuu ndihí-gǎ nchicúⁿ ñáhá-güedé xii-gǎ cuáháⁿ.

⁴⁰ Te òré ní quexio-gǎ xíáⁿ, te ní xáhaⁿ-gǎ xii-güedé:

—Chí càháⁿ ndihí Yá Ndiòxí cuèndá sǎ vǎ dǎcàháⁿ ñáhá yucu ñávàha xii-ndo càda-ndo sǎ ñà túú tǎú-ndó càda-ndo —càchí-gǎ xáhaⁿ-gǎ xii-güedé.

⁴¹ Te sǎtá dúcáⁿ te ní quee díᵐⁿ-gǎ tnuú-güedé cuáháⁿ-gǎ ìᵐ xio, te sa ñùnchií luha ní xica ndehe-gǎ núu ndécú-güedé, te xíáⁿ ní ngüíñí xítí-gǎ càháⁿ ndihí-gǎ Tǎtá-gǎ Dútú Ndiòxí.

⁴² Te xáhaⁿ-gǎ:

—Táu, te núu dicó cachí-n te taunihnu ñaha-n xii-í cuèndá sǎ vǎ ndóhò-í ná sǎá òré, dico vǎ cadá-n nàcuáa càchí iní mée-í, chí cada-n nàcuáa càchí iní mée-n —càchí-gǎ xáhaⁿ-gǎ xii Tǎtá-gǎ Dútú Ndiòxí.

⁴³ Te sǎtá dúcáⁿ te ní quexio ìᵐ espíritu xínú cuèchi núú Yá Ndiòxí ní sǎñaha-gǎ-xi tñuhu ndee iní xii-gǎ.

⁴⁴ Te òré súúni ndihí iní-gǎ, te uuⁿ-gǎ súúni ní yuhu ní iní-gǎ càháⁿ ndihí-gǎ Dútú Ndiòxí, te tneé-gǎ cáá dàtná cáá ñíñí te ngóyó núú ñùhú.

⁴⁵ Te sǎtá ní yáha ní càháⁿ ndihí-gǎ Tǎtá-gǎ Dútú Ndiòxí, te ní ndacuñí-gǎ cuánuhú-gǎ núú ní dándó-gǎ cue téé-áⁿ, te òré ní nasáá-gǎ te xíxídi-güedé cuèndá sǎ ío cuéhé tñuhu sǎni iní-güedé cuèndá-gǎ.

⁴⁶ Te xáhaⁿ-gǎ xii-güedé:

—¿Ná cuèndá xidí-ndó? Chí ndácóo, te càháⁿ ndihí-ndo Yá Ndiòxí cuèndá sǎ vǎ dǎcàháⁿ ñáhá yucu ñávàha xii-ndo càda-ndo sǎ ñà túú tǎú-ndó càda-ndo —càchí-gǎ xáhaⁿ-gǎ xii-güedé.

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

⁴⁷ Te càháⁿ dúcáⁿ-ní Jèsús ní quexio vai cue téé, te ìᵐ téé xica cuu ndihí-gǎ nání Jüdás cúnúu-dé yódó núu-dé núu-güedé ní quexio ndéé núu-gǎ, te ní teyuhu ñaha-dé xii-gǎ, te núú tñáhá téé-áⁿ cúú ùxúú cue téé xica cuu ndihí-gǎ.

⁴⁸ Te ní xáhaⁿ Jèsús xii-dé:

—Jüdás, ¿te yòhó cuáha cuèndá ñáhá-n xii yúhú Téé cùu ñani tñáhá-ndó nchàa-ndo núú cuè téé cùu úhú iní ñáhá xii-í càháⁿ-n núu duha tèyuhu ñaha-n-áⁿ? —càchí-gǎ xáhaⁿ-gǎ xii-dé.

⁴⁹ Te sǎtá ní xini nchaa cue téé cùndihí Jèsús nàcuáa cùu cue téé ní quexio-áⁿ, núu ní xicáⁿ tñuhú-güedé núu-gǎ, te xáhaⁿ-güedé xii-gǎ:

—Mèstrú, ¿cúu nàá-ndí ndihí-güedé ndihí machití-a ñá? —càchí-güedé xáhaⁿ-güedé xii-gǎ.

⁵⁰ Te ìᵐ-dé ní xehndé-ni-dé lóho xio cùha ìᵐ cue téé ní quexio-áⁿ, te téé-áⁿ xínú cuèchi-dé núú dütú cúnúu-gǎ, te ní quendeé duuⁿ lóho-dé.

⁵¹ Te Jèsús ní xáhaⁿ-gǎ xii-güedé:

—Chí dáñá-güedé, vá dúcáⁿ càda-ndo — cachí-gá xáhaⁿ-gá xii-güedé.

Te ní dácàá-gá ndaha-gá ní tendaha-gá núú ní xindeé lóho téé-áⁿ, te ní nduu váha dàtná-ni càa.

⁵² Te nchaa cue téé cùu dútú cúnùu, ndihi cue téé tàxi tnuní nchaa cue téé quide cuendá veñúhu sá ío cúnuu, ndihi cue téé cùu sacuéhé núú ñáyiú isráèl, nchaa cue téé-áⁿ véxi tñi ñaha-güedé xii-gá, te ní xáhaⁿ-gá xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécú-í, dàtná quidé-ndó ìⁿ ñadúhú quidé ñaha-ndo xii-í.

⁵³ Te ducaⁿ-ni ní xiní-ndó ní xindecú-í xití veñúhu càhu sá ío cúnuu ní xóo danèhé-í ñáyiú, te ní lùha ñá túú ní cùu tnándeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácúíhna nácuáa cùu iní-xi —cachí-gá xáhaⁿ-gá xii-güedé.

Té Pèlú càháⁿ-dé núú ñáyiú sá ñà túú xiní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Te ní tñi-güedé Jèsús, te ndéca ñaha-güedé xii-gá cuáháⁿ vehe téé cùu dútú cúnùu-gá, te té Pèlú xica xica-ni nchicúⁿ ñáhá-dé xii-gá cuáháⁿ.

⁵⁵ Te òré ní quexìo-güedé xiáⁿ te ní dátñhá-güedé ñuhú quehé vehe-áⁿ, te ní càndéé yuhu nùhú-áⁿ ní ngóo teté-güedé, chi quide víxiⁿ-xi, te tnàhá té Pèlú ní ngóo teté ndihi ñaha-dé xii-güedé.

⁵⁶ Te xiáⁿ ndécú ìⁿ xíchí xínú cuèchi vehe-áⁿ, te òré ní xiní-xi núcóo teté tnàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tnàhá téé-a xica cuu ndihi-dé téé ndéca-güedé cuánguihu-áⁿ —cachí-xi xáhaⁿ-xi xii-güedé.

⁵⁷ Dico té Pèlú ñá túú ní nñuu-dé, te xáhaⁿ-dè xii-xi:

—Yúhú ñá túú xiní-í téé-áⁿ —cachí-dé xáhaⁿ-dè xii-xi.

⁵⁸ Te tna tnaa-ni ní cuu, te ní xiní ñáhá tucu ìⁿ-dé, te xáhaⁿ-dè:

—Yòhó tnàhá-n xica cuu ndihi-n téé ndéca-güedé cuánguihu-áⁿ —cachí-dé xáhaⁿ-dè xii-dé.

Dico té Pèlú ní xáhaⁿ-dè:

—Ñáhá, ñá díú yúhú xicá cùu ndihi-í-dé —cachí-dé xáhaⁿ-dè.

⁵⁹ Te sa ní cuu dàtná ìⁿ òré te cachí tucu ingá-dé:

—Ndáá sá tèe-a xica cuu ndihi-dé téé ndéca-güedé cuánguihu-áⁿ, chi tnàhá-dé cùu-dé téé distritú Galileá —cachí-dé xáhaⁿ-dè xii-güedé.

⁶⁰ Te té Pèlú ní xáhaⁿ-dè xii téé-áⁿ:

—Yúhú ñá túú cùtnuní iní-í nása ndúu tnúhu càháⁿ-n —cachí-dé xáhaⁿ-dè.

Te ní vátá xínu ducaⁿ-gá tnúhu càháⁿ-dé ní cana-ni ìⁿ líhi.

⁶¹ Te Xítóhó Jesucristú ní nchócótó-gá núú-dé, te òré-ni-áⁿ ní ndacu iní-dé tnúhu ní xáhaⁿ-gá xii-dé sá cùmání-gá cana ìⁿ líhi, te úní xito càháⁿ-dé sá ñà túú xiní ñáhá-dé xii-gá.

⁶² Te té Pèlú ní quee-dé tnuú-güedé cuáháⁿ-dé ìⁿ xio, te ní ndáhyú víhi-dé ní ndixi cuèchi iní-dé.

Cùdíquí ndeé-güedé Jèsús
(Mt. 26:67-68; Mr. 14:65)

⁶³⁻⁶⁴ Te cue téé ndéé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gá, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —cachí-güedé xáhaⁿ-güedé xii-gá.

⁶⁵ Te cuéhé víhi-gá tnúhu cuèhé ní xáhaⁿ-güedé xii-gá.

Jèsús ndécú-gá jündá

(Mt. 26:59-66; Mr. 14:55-64; Jn. 18:19-24)

⁶⁶ Te sátá ní túndaá, te ní tacá cue téé cùu sacuéhé núú ñáyiú isráèl, ndihi cue téé cùu dútú cúnùu, ndihi cue téé dàcuaha ñaha xii-yu nchaa tnúhu ní chídó tnuní ndí Moisés, te ndéca-güedé Jèsús cuáháⁿ núú cádá-güedé jündá, te òré ní quexìo-güedé ndihi-gá núú cádá-güedé jündá-áⁿ, te ní xáhaⁿ-güedé xii-gá:

⁶⁷ —Cùn-ndí cachí tnúhu-n xii-ndí núu diu-n cùu-n Cristú Yáá ní tendaha Yá Ndióxi véxi ñuyíú-a —cachí-güedé xáhaⁿ-güedé xii-gá.

Te ní xáhaⁿ-gá xii-güedé:

—Te núu na cachí-í sá diú-í cúu Cristú ñá, te ní vá quindáá iní-ndó,

⁶⁸ àdi te núu ìⁿ sá ná càcáⁿ tnúhu-í núú-ndó, te ní vá cachí tnúhu-ndo, te ní vá dáñá ñaha-ndo.

⁶⁹ Dico vitna ní cuyatni nduu ngóo yúhú Téé cùu ñaní tnàhá-ndó nchaa-ndo xio cuha Dútú Ndióxi Yáá ío cúnuu —cachí-gá xáhaⁿ-gá xii-güedé.

⁷⁰ Te dàtnuní nchaa-güedé ní xicáⁿ tnúhu-güedé núú-gá, te xáhaⁿ-güedé xii-gá:

—¿Te yòhó cúu-n Dèhe Yá Ndióxi te núu ducaⁿ vání? —cachí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gá cúu-í dàtná cachí méé-ndó-áⁿ —cachí-gá xáhaⁿ-gá xii-güedé.

⁷¹ Te ní xitnàha-güedé:

—Ñá túú-gá xiní ñúhu-xi cue téé càháⁿ núu ndáá sá ndécuéchi-dé àdi ñá túú ndécuéchi-dé chi yuhu mee-dé ní

cáháⁿ-dé vitna ní xíndedóho-o —càchí-güedé xitnáha-güedé.

23

Jesús ndécú-gã núú tẽ Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíñí-güedé, te ndéca-güedé Jèsús cuháⁿ núú tẽ Pilatú,

² te núú tẽe-áⁿ nĩ ngüíta-güedé sàcáⁿ cuéchi-güedé cuendá-gá, te xáhaⁿ-güedé:

—Ní naníhí-ndĩ tée-a dándahú-dé ñáyiú ñuú-ó, chí xáhaⁿ-dẽ xii-yu sá vã chãhu-gá-yu impuéstú xii tẽ Cèsár tée io cùnno, te càchí-dé sá díú-dẽ cúú-dẽ Crístú Yaá ní tendaha Yã Ndióxi véxi ñuyíú-a te yíndaha-dé ñáyiú càchí-dé —càchí-güedé xáhaⁿ-güedé xii-dé.

³ Te tẽ Pilatú ní xicáⁿ tnúhu-dé núú-gã, te xáhaⁿ-dẽ xii-gã:

—¿Ndáá sá díú-n cùn-n tée yíndaha ñaha xii ñáyiú isráel-áⁿ? —càchí-dé xáhaⁿ-dẽ xii-gã.

Te Jèsús ní xáhaⁿ-gã xii-dé:

—Diu-í yíndaha-í-yu —càchí-gã xáhaⁿ-gã xii-dé.

⁴ Te tẽ Pilatú ní xáhaⁿ-dẽ xii nchaa ñáyiú, ndihí cue tée cùu dútú cùnno:

—Yúhú cutnùni iní-í sá ñà túú ni ñⁿ cuéchi tée-a —càchí-dé xáhaⁿ-dẽ xii-yu.

⁵ Dico níhi-gã ní cáháⁿ-güedé, te xáhaⁿ-güedé:

—Càchí-ndĩ sá io dusaⁿ xíquide ñáyiú cuendá nchaa sá dánèhẽ ñáhá-dẽ xii-yu, te ní quesaha-dẽ ndéé distritú Galileá, te ní yáha-dé níhí distritú Júdeá dánèhẽ-dé ñáyiú, te vitna ní sáá-ni-tu-dé ndéé ndíha dánèhẽ-dé-yu —càchí-güedé xáhaⁿ-güedé xii tẽ Pilatú.

Jesús ndécú-gã núú tẽ Hèrodés

⁶ Te sá dúcáⁿ nĩ tecú dóho tẽ Pilatú ní cacu nehé-yu distritú Galileá, núu xiáⁿ ní xicáⁿ tnúhú-dẽ núu-yu núu tée Galileá cúú-gã.

⁷ Te ní xáhãⁿ-yu sá díú tẽe yacáⁿ cúú-gã, núu xiáⁿ ní na dàyáha ñaha-dẽ xii-gã ndaha tẽ Hèrodés tée cùu gobiernú distritú Galileá chí nduu-áⁿ ndécú-dẽ tnáhá-dé ñuú Jerusalén-áⁿ.

⁸ Te órè ní xiní tẽ Hèrodés-áⁿ Jèsús te io ní cudíí iní-dé, chí ní cunaha dùcaⁿ-ni cuiní-dé quini ñáhá-dẽ xii-gã te ñà túú tnáhí xiní ñáhá-dẽ xii-gã ní cùu, chí cuendá-ni tnúhu níhi-dé cuendá-gã, te ndetu-dé sáá ñⁿ nduu quini ñáhá-dẽ xii-gã, te cada-gã ñⁿ sá vã yõo tnáhí ndàcu cada cundehe-dé ní sani iní-dé.

⁹ Te vai sá ní xicáⁿ tnúhú-dẽ núú Jèsús, dico ní ñⁿ tnúhu ñà túú ní cáháⁿ-gã.

¹⁰ Te xiáⁿ xíndecu tnáhá cue tée cùu dútú cùnno, ndihí cue tée dàcuaha ñaha xii ñáyiú nchaa tnúhu ní chídó tnùni ndíi Moisés, te cue tée-áⁿ sùúni ió iní-güedé sàcáⁿ cuéchi-güedé cuendá-gã.

¹¹ Te tẽ Hèrodés ndihí cue tée cùu sandadú-dé ñà túú ní cùu váha iní-güedé núú Jèsús, te ní cudíquí ndeé ñáhá-güedé xii-gã, te ní dácuihnú ñaha-güedé dóo váha xii-gã dàtná caá dóo sácuihnú cue tée sàquíndaha ñaha xii ñáyiú. Te dàtnùni tẽ Hèrodés ní dánùhú ñáhá tucu-dé xii-gã ndaha tẽ Pilatú.

¹² Te nduu-áⁿ nĩ tnáhá tnúhu tẽ Pilatú ndihí tẽ Hèrodés, chí cùu úhú iní tnáhá-güedé ní cùu.

Càchí-güedé sá cahní-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³ Te tẽ Pilatú ní nadatácá-dé nchaa cue tée cùu dútú cùnno ndihí dava-gã cue tée cùnno, ndihí nchaa ñáyiú ñuú-áⁿ,

¹⁴ te ní xáhaⁿ-dẽ:

—Nchòhó ndécá-ndó tée-a véxi ní taxi cuendá-ndó-dẽ iha, te càchí-ndó sá io dusaⁿ quide ñáyiú cuendá nchaa sá dánèhẽ ñáhá-dẽ xii-yu, te núú-ndó ndùcu tnúhu-í núú-dé núu ná ní quide-dé. Dico yúhú cutnùni iní-í sá ñà túú ni ñⁿ cuéchi-dé dàtná càhã-ndó-áⁿ.

¹⁵ Te cuéi tẽ Hèrodés diu-ni ducaⁿ cáhãⁿ-dé sá ñà túú cuéchi-dé núu ní techiuⁿ ñaha tucu-dé cuándixi-dé iha. Te vitna sa ní cutnùni iní-ó sá ñà túú tàú-xi cahni-o-dé chí ñà túú cuéchi ní quide-dé.

¹⁶ Te na dándoho-ni-í-dé te dàcácu-í-dé —càchí-dé xáhaⁿ-dẽ xii-yu.

¹⁷ Te ndi tnáhá nduu vico pascuá te dacuití sá dàcácu tẽ Pilatú-áⁿ ñⁿ cue tée yíhi vecaá, chí ducaⁿ tnáhí quide-dé.

¹⁸ Dico ncháá-yu ní cuáá-yu, te xáhãⁿ-yu xii-dé:

—¡Queñuhu tée nani Jèsús-áⁿ, te cahni-n-dé! ¡Te dàcácu-n tẽ Barrábás! —càchí-yu xáhãⁿ-yu xii-dé.

¹⁹ Te tẽ Barrábás-áⁿ nĩ sanu ichi-dé ñáyiú ñuú ingá ichi, te ní ngüíta-yu ndihí-dé ní cuu úhú iní-yu cue tée cùchiuⁿ, te ní sahní-dé ndíyí núu xiáⁿ ní chihí ñaha-güedé vecaá xii-dé.

²⁰ Te tẽ Pilatú cuiní-dé dàcácu-dé Jèsús núu xiáⁿ cáhãⁿ ndihí ñaha tucu-dé xii-yu ní cùu,

²¹ dico uuⁿ-gã níhi ní cuáá-yu, te ní xáhãⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáhãⁿ-yu xii-dé.

²² Te xito cuu úní ní xáhaⁿ tẽ Pilatú:

—¿Te ná cúú cuéchi ní quide-dé te núu ducaⁿ cuiní-ndó càda-í-dé-í? Te yúhú cutnùni iní-í sá ñà túú cuéchi ní quide-dé núu xiáⁿ ñà túú tàú-xi cahni-o-dé, te na dándoho-ni-í-dé te dàcácu-í-dé —càchí-dé xáhaⁿ-dẽ xii-yu.

²³ Dico níhi-ni cáhãⁿ-yu xáhãⁿ-yu sá ná càta caa ñaha-dé xii-gã núú cùrúxí, te ñáyiú-áⁿ ndihí nchaa cue tée cùu dútú cùnno

xicáháⁿ níhi-güedé ndihí-yu ndéé ní xínu iní té Pilatú cada-dé nàcuáa càchí iní-yu.

²⁴ Te ní xáhaⁿ-dê xii-yu sá cúú cada-dé nàcuáa xáháⁿ-yu.

²⁵ Te ducaⁿ te ní dácácu-dé té Barrábás téé ní sanu ichi ñáiyu ñúú ingá ichi, te ñu-ni-dé ní sahní-dé ndíyí núú xiáⁿ ní xíhi-dé vecaá, te dátñuní ní táuchíúⁿ-dê cada-güedé Jèsús nàcuáa xáháⁿ-yu.

Sáta caa-güedé Jèsús núú cùrúxí

(Mt. 27:32-44; Mr. 15:21-32; Jn. 19:17-27)

²⁶ Te ndèca-güedé Jèsús cuáháⁿ núú cáta càa ñaha-güedé xii-gá, te ichi cuáháⁿ-güedé ndihí-gá ní tñi-güedé ñⁿ téé ñúú Cirené nání-dê Ximú ñúhú-dê ichi duha cuándixi-dé ní sáháⁿ-dê yucu, te ní dácuídó ñaha-güedé xii-dé cùrúxí nchidó Jèsús, te ní ngúíta nchicúⁿ-dé sátá-gá.

²⁷ Te ío cuéhé ñáiyu nchicúⁿ ñáhá xii-gá cuáháⁿ, te vai ñáiyu ñíhí ío níhi ndáhí-yu sá ndíhú iní-yu cuendá Jèsús.

²⁸ Te Jèsús ní nchócótó-gá núú-yu, te ní xáhaⁿ-gá:

—Nchòhó ñáiyu ñíhí ñúú Jerusalén, vá ndàhyú-ndó cuendá-í chí ndàhyú cuendá méé-ndó ndíhi cuendá déhe-ndo.

²⁹ Chí sáá nduu quèsaha ñáiyu: “Sá vaha táhú nchaa ñáiyu ñá túú càcu déhe-xi, ndíhi nchaa ñáiyu vátá quíní-gá cuhuⁿ déhe-xi, chí ní ñá túú xíní-yu dacádí-yu”, duha quesáhá-yu.

³⁰ Te dáva-áⁿ cññaha ñáiyu xii nchaa tindúú ndíhi nchaa núú xiquí: “Chí tákúⁿ ngónchihí ñaha-ndo xii-ndí”, duha cúññáhá-yu.

³¹ Te núú yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñáiyu ndècu ichi cuehé ichi duha —càchí-gá xáhaⁿ-gá xii-yu.

³² Te ndèca tucu-güedé úú tñahá cue téé ndècu ndisa cuéchi-xi cuáháⁿ cuendá cahni ñaha-güedé xii-güedé ndíhi Jèsús.

³³ Te òré ní quexio-güedé ndíhi-gá ñⁿ xichi núú nání Yíqui Díqui Ndíyí, te xiáⁿ ní sata caa ñaha-güedé xii-gá núú cùrúxí, ndíhi úú cue téé ndècu ndisa cuéchi-xi-áⁿ, te ñⁿ-dé ní sata caa-güedé xio cùha-gá te ingá-dé ní sata caa-güedé xio dátñi-gá ñu-ni núú cùrúxí tucu.

³⁴ Te ní xáhaⁿ-gá xii Tátá-gá Dútú Ndiòxí:

—Táu, cada càhmu iní sá quidé-güedé, chí ñá túú cùtnuní iní-güedé ná cúú sá quidé-güedé —càchí-gá xáhaⁿ-gá.

Te cue téé cùu sandadú ní xito ndéé-güedé nñu ndédacàa-güedé cuu cuendá-güedé dóó-gá.

³⁵ Te nchaa ñáiyu xíndecu-áⁿ ndéhè-yu nàcuáa quide-güedé Jèsús, te nchaa cue téé

cùnuu ní cudíquí ndéé ñáhá-güedé xii-gá, te ní xítnàha-güedé:

—Te dava ñáiyu ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Cristú Yaá ní tendaha Yá Ndiòxí véxi ñuyíú-a cùu-dé —càchí-güedé xítnàha-güedé.

³⁶ Te tñahá cue téé cùu sandadú ní cudíquí ndéé ñáhá-güedé xii-gá, chí ní sàndehe yatni-güedé núú tãca-gá sãñaha-güedé ndudí íá còho-gá ní cùu,

³⁷ te ní xáhaⁿ-güedé xii-gá:

—Te núu yòhó cúú-n tée yíndaha ñaha xii ñáiyu israél, te dácácu nihnu mee-n —càchí-güedé xáhaⁿ-güedé xii-gá.

³⁸ Te ní taxi ndecu-güedé ñⁿ sá ndéé lètrá ndàa díquí-gá te ndéé úní núú tñúhu, tñúhu grègú, ndíhi tñúhu látín, ndíhi tñúhu hèbreú, te duha quèe-xi ndí nuní núú tñúhu-áⁿ “Té-a cùu-dé téé yíndaha ñaha xii ñáiyu israél”, duha quèe-xi.

³⁹ Te ñⁿ téé ndècu ndisa cuéchi-xi, téé ní sata caa-güedé díñi-gá xicuehé ñáhá-dé xii-gá, te xáhaⁿ-dê:

—Te núu yòhó cúú-n Cristú Yaá ní tendaha Yá Ndiòxí véxi ñuyíú-a, te dácácu nihnu mee-n, te dácácu nihnu ñaha xii nchúhú tñahá-ndí tucu —càchí-dé xáhaⁿ-dê xii-gá.

⁴⁰ Dico ingá téé cùndíhi-dé téé tàcaa ingá xio díñi-gá ní tenáá ñáhá-dé xii-dé, te xáhaⁿ-dê:

—¿Te náa ñá túú ndácu iní-n Yá Ndiòxí vitna duha càa-o ndoho-o ndíhi téé nàni Jèsús-a ñá?

⁴¹ Chí nchoo tàú ndisa-o sá dúhá ndòho-o nacháhu-o cuéchi-o, dico Jèsús-a chí ñá túú cuéchi-dé —càchí-dé xáhaⁿ-dê xii téé tàcaa ndíhi-dé-áⁿ.

⁴² Te dátñuní ní xáhaⁿ-dê xii-gá:

—Jèsús, ndacu iní ñáhá-n xii-í òré ná quíxi-n taxi tñuní-n ñuyíú-a —càchí-dé xáhaⁿ-dê xii-gá.

⁴³ Te Jèsús ní xáhaⁿ-gá:

—Na càchí tñúhu ndáá-í xii-n sã méí nduu vitna cundecu ndíhi ñaha-í xii-n núú ñí nduu táhú-í cundecu-í —càchí-gá xáhaⁿ-gá xii-dé.

Ní xíhi Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee níhí ñuyíú, te ducaⁿ-ni càa ní cuu ndéé caá úní sacuaa.

⁴⁵ Chí ñá túú-gá ní dàyehé nchícanchí te ní ndátá dóó cúú còrtiná veñúhu càhnu sá ío cùnuu ní quée dava ndáá.

⁴⁶ Te níhi ní cáháⁿ Jèsús, te xáhaⁿ-gá xii Tátá-gá Dútú Ndiòxí:

—Táu, naqueheⁿ cuendá-n espíritú-í —càchí-gá xáhaⁿ-gá xii Tátá-gá.

Te tnúhu-ná-án nǐ cáháⁿ-gá te ní xíhí-ni-gá.

⁴⁷ Te òré ní xiní tée cùu capítáⁿ sá dúcáⁿ nǐ cuu, te ní ndacu iní-dé Yá Ndiòxí, te ní cachí-dé:

—Sá ndáa ndisa sá tǎe-a cùu-dé ìⁿ tée ío quide ndáa ndécú ñyúú-a ní cùu —duha ní cachí-dé.

⁴⁸ Te chitu ñáyíu ní tacá xíaⁿ chi cuíní-yu cundehé-yu nása cada-güedé Jèsús. Te sáta nǐ yáha ní xiní-yu nácuáa ní quide ñaha-güedé xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu.

⁴⁹ Dico ndècu tnahá cue ñáyíu xiní tnahá ndihí Jesús, ndihí ñáyíu ñihí ní chinchícúⁿ ñáhá xii-gá ndéé distritú Galileá, te ñáyíu-án xica-ni xixínutnǐ-yu xindéhé-yu nchaa nácuáa ní quide ñaha-güedé xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñúu Arimàtea nání-dé Chèé, te ñúu-án yíndèhu-xi distritú Jüdeá, te ío váha iní-dé te quide ndáa-dé núú Yá Ndiòxí, te tnahá-dé cúu-dé chiúⁿ te ní xíndecu-dé jündá cue tée isráèl.

⁵¹ Te ñá ní tnahá tnahí iní-dé nácuáa ní cáháⁿ-güedé núú jündá nácuáa cada-güedé Jèsús. Te tée-án ndétú-dé sáa nduu ndíhu ndaha ñaha Yá Ndiòxí xii-dé ndihí ñáyíu.

⁵² Te tée-án nǐ sáháⁿ-dé núú tǎ Pilatú te ní xáhaⁿ-dǎ sá núu vá cündèe iní-dé daña-dé chindúxi-dé yiqui cùñú Jèsús. Te té Pilatú-án nǐ sáha-dé tnúhu.

⁵³ Te ní nunehe-dé yiqui cùñú-gá núú cùrúxí, te ní chidúcuⁿnuu-dé ìⁿ dóo cuixíⁿ, te ní chihí-dé ìⁿ yaú nchíi yiqui naha càva, te vátá yóo ìⁿ-gá nguindúxi yaú-án.

⁵⁴ Te cùu-xi nduu vispré nduu ndétatú ñáyíu, núu xíquide túha-ná-yu sá cúu ñgá nduu.

⁵⁵ Te nchaa ñáyíu ñihí ní chinchícúⁿ ñáhá xii Jesús ndéé distritú Galileá ndéndahá-yu té Chèé ní sáháⁿ núú nchíi yaú-án, núu ní xiní-yu nácuáa ní sacáⁿ-dé yiqui cùñú-gá xití yaú-án.

⁵⁶ Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihí pomáda, te ní ndetatú-yu ñgá nduu-án ní quide-yu nácuáa càháⁿ tnúhu Yá Ndiòxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumíngú nehé víhí-ní cuáháⁿ tucu ñáyíu ñihí núú nchíi yaú ní chihí-güedé yiqui cùñú Jèsús, te nèhé-yu nchaa sá sáháⁿ tnámí ní quide túha-yu-án cuáháⁿ, te tnahá tucu ìⁿ úú-gá tnahá ñihí-yu nchícúⁿ ñáhá xii-yu cuáháⁿ.

² Te òré ní quexió-yu yuhu yaú-án te ní xiní-yu sá yúú ndèdí ìⁿ xio-ná ndécú,

³ te ní quíhu-yu xití yaú-án, dico ñá túú-gá yiqui cùñú Jèsús yíhí.

⁴ Te ñá ní cùtnuní tnahí iní-yu ndéé ichi cuáháⁿ yiqui cùñú-gá, te ní xiní-yu úú espíritú xínú cuèchi núú Yá Ndiòxí xínutnǐ-xi ñihí-yu te xíxíhnu-xi dóo chàhnhí.

⁵ Te ní yùhú-yu te ñá túú ní cùyíi-yu cundehé-yu cue espíritú-án, te cue espíritú-án nǐ xáhaⁿ-xi xii-yu:

—¿Ná cuendá nándücu-ndo Jesús Yaá ndécú vívú núú yíndúxi ñáyíu ní xíhí-i?

⁶ Te ñá túú-gá yiqui cùñú-gá ndécú ñha chi sa ní ndoto-gá, te chí dándacu iní nácuáa ní cáháⁿ-gá cùtnáhá ní xíndecu-ndo ndihí-gá distritú Galileá,

⁷ chí ní cachí-gá sá méé-gá cúu-gá ñaní tnahá-ndó ncháa-ndo, te dacuitíi cuáha cuendá ñáhá-güedé xii-gá núú cuè tée ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cuú-gá dico nduu úní sá cúu-gá te ndoto-gá, duha ní cachí-gá xii-ndo.

⁸ Te òré-án ní ndacu iní-yu tnúhu ní cáháⁿ Jèsús.

⁹ Te sáta dúcáⁿ te ní naquehéⁿ-yu ichi cuánuhú-yu, te ní caní-yu cuendú núú ndí úxí ìⁿ cue tée ní táuchíúⁿ Jèsús cáháⁿ tnúhu-gá, ndihí núú dàva-gá ñáyíu.

¹⁰ Te ñáyíu ducaⁿ ñaha tnúhu cuánuhú núú-güedé-án cúú tǎ Màriá Magdalená, ndihí tá Juáná, ndihí tá Màriá náná tǎ Jacóbó, ndihí dava-gá ñáyíu ñihí.

¹¹ Dico cue tée-án nǐ sani iní-güedé sá dicó cáhú iní-yu tnúhu xáháⁿ-yu xii-güedé núu ñá túú ní sándáa iní-güedé nácuáa ní xáháⁿ-yu.

¹² Dico té Pèlú ní quee-dé xínú-dé cuáháⁿ cuándéhé-dé yaú núú ní chihí-güedé yiqui cùñú Jèsús, te ní sáa-dé te ní ngáundeyi-dé xitó nihni-dé xití yaú-án te ní xiní-dé sá méé-ná dóo ní xiducúⁿ nuu-gá yúcu ìⁿ xio, te ío ní cuñúhu-dé sá dúcáⁿ ní cuu, te ní natnǐ-dé ichi cuánuhú-dé vehe núú xíndecu-güedé.

Ichi ñúu Emàús

(Mr. 16:12-13)

¹³ Te diu-ni nduu-án ñúhú úú cue tée ní xica cuu ndihí Jèsús ichi cuáháⁿ-güedé ìⁿ ñúu nání Emàús, te sácúhuⁿ-güedé dàtná úú òré ichi ndéé ñúu Jerusàlén, te ndéé ñúu Emàús.

¹⁴ Te ta ndàtnúhu-güedé cuáháⁿ nchaa nácuáa ní cuu,

¹⁵ te nini dùcaⁿ xicáháⁿ-güedé, te Jèsús ní natnahá ñáhá-gá xii-güedé te ndéca tnahá-gá ndihí-güedé cuáháⁿ.

¹⁶ Te cuèi ndèhe ñaha-güedé xii-gá dico dàtná ìⁿ sá ndèdí núú-güedé, chí ñá ná quimí ñáhá-güedé xii-gá ní cuu.

17 Te Jèsús ní xícáⁿ tnúhú-gă núú-güedê, te xâhaⁿ-gâ:

—¿Ná tnúhu xícáháⁿ-ndó ñuhu-ndo ichi núu ducaⁿ ïo cùu ndiyí-ndó-í? —câchí-gâ xâhaⁿ-gâ xii-güedê.

18 Te ìⁿ tée nàni Cleofás ní xâhaⁿ-dê xii-gâ:

—¿Te ná cuèndá nchaa ñáyiú íchí ní sáá ñúu Jerusalén xìní-yu nchaa nàcuáa ní cuu, te ìⁿ òlì-ná yòhò ñá túú xìní-n-í? —câchí-dé xâhaⁿ-dê xii-gâ.

19 Te ní xâhaⁿ-gâ xii-güedê:

—¿Te ná ní cuu-í? —câchí-gâ xâhaⁿ-gâ xii-güedê.

Te ní xâhaⁿ-güedê xii-gâ:

—Cuèndá Jèsús tée ñúu Nazàrèt càháⁿ-ndí, chí tée-án cùú-dê ìⁿ tée càháⁿ tnúhu Yá Ndiòxí, te ïo váha ndùu tnúhu càháⁿ-dê ní cùu, te quide-dé sá vâ yòo tnàhí ndàcu cada nacúaa cudíí ìní Yá Ndiòxí ndihí ñáyiú ní cùu.

20 Te cue tée cùu dùtú cùnùu, ndihí cue tée cùnùu taxi tñuni ñáhá xii-ndí ní sáha cuèndá ñáhá-güedê xii-dé núú tē Pilatú te ní sata caa ñaha-güedê te núú cùrtixí-án ní xihí-dê.

21 Dico vitna sa ní cuu úní nduu sá ní xihí-dê, te nchúhú ní sani ìní-ndí sá tēe-án dàcácu nihnu ñaha-dê xii nchúhú ñáyiú israhél núú nchaa tñundòho tnúhu ndàhú ndécú-ndí.

22 Dico ïo cùñúhu-ndí cúú, chí ìⁿ úú ñáyiú òhí ní tuha ñaha xii-dé ndécú ndihí-ndí ní sáháⁿ ngotó-yu ndéxuehe tàcuíhndá-gâ yaú núú ní chihi-güedê yiqui cùñú-dé,

23 te ní nasáá-yu câchí-yu xii-ndí sá ñà túú-gâ yiqui cùñú-dé yihí xití yaú-án. Te ní xìní-yu espíritú xínú cuèchi núú Yá Ndiòxí, te ní xâhaⁿ-xi xii-yu sá ndécú vívú-dê.

24 Te sáta dúcáⁿ te ìⁿ úú cue tée cùndihí-ndí ní sáháⁿ ndéhé-güedê yaú-án, te ní xìní-güedê sá ndáá cùú-xi nchaa tnúhu ní càháⁿ ñáyiú òhí-án, dico ñá túú ní xìní-güedê tēe-án —câchí-güedê xâhaⁿ-güedê xii-gâ.

25 Te Jèsús ní xâhaⁿ-gâ xii-güedê:

—¿Jo cùmání sá xìní tñuní-ndó, chí ïo cuèé sàndáá ìní-ndó tñùhu ní càháⁿ cue tée ní xóo càháⁿ tnúhu Yá Ndiòxí ndéé sanaha!

26 ¿Te náa ñá túú tàú-xi sá ndóhó Crìstú òrè cùmání-gâ sáá nduu ndàa andiu núú ndécú Dùtú Ndiòxí cundecu-gâ-án? —câchí-gâ xâhaⁿ-gâ xii-güedê.

27 Te ní nguíta-gâ xâhaⁿ-gâ nàcuáa quèe-xi nchaa tnúhu càháⁿ-xi núú tútú Yá Ndiòxí cuèndá-gâ, te òhí-gâ ní càháⁿ-gâ nàcuáa ndùu nchaa tnúhu yòdo tñuní núú tútú ndí Moisés, te dàtñuní ní càháⁿ-gâ nàcuáa ndùu nchaa tnúhu yòdo tñuní núú tútú nchaa cue tée ní xóo càháⁿ tnúhu Yá Ndiòxí ndéé sanaha.

28 Te òrè ní quexio-güedê yuhu ñúu núú cuaháⁿ-güedê-án, te Jèsús ní quide-ni-gâ sá yâha-gâ quíhíⁿ-gâ íngá xichí ní cùu.

29 Dico ní càháⁿ ndàhú-güedê núú-gâ sá quèndóo-gâ xiáⁿ ndetatu-gâ ndihí-güedê, te xâhaⁿ-güedê xii-gâ:

—Quèndóo ndihí ñaha xii-ndí iha ndetatu-n chí sa ní cuaa, te tñavíí cundiquiⁿ —câchí-güedê xâhaⁿ-güedê xii-gâ.

Te xiáⁿ cáá ìⁿ vehe cuánguihu-güedê ndetatu-güedê ndihí-gâ.

30 Te òrè sa yihí-güedê mèsá ndihí-gâ cùdini ndihí ñaha-güedê, te ní queheⁿ-gâ páá te ní ndacáⁿ táhú-gâ núú Yá Ndiòxí, te ní táhú cuèchi-gâ te dàtñuní ní dàcáñhu ñaha-gâ xii-güedê.

31 Te òrè-án ní naquiní ñáhá-güedê xii-gâ ní cùu, dico unⁿ ní ndóñhú-gâ.

32 Te ní xitnàha-güedê:

—Te ndáá sá súuní cùdíí ìní-ó òrè tá ndàtnúhu-o ndihí Jèsús véxi ichi, te ta dànehé ñáhá-gâ xii-o nchaa nacúaa quèe-xi tnúhu càháⁿ-xi núú tútú Yá Ndiòxí —câchí-güedê xitnàha-güedê.

33 Te ñá túú-gâ ní xñdetu-güedê chí ndihí-ni ní natnii-güedê ichi cuánuhú-güedê ñúu Jerusalén, te ní nasáá-güedê núú xñdecu ndí úxí ìⁿ cue tée ní táuchúú Jèsús càháⁿ tnúhu-gâ, ndihí daga-gâ ñáyiú.

34 Te cue tée xñdecu-án xâhaⁿ-güedê:

—Ndáá sá ní ndoto Yaá cúú Mèstrú, chí ní xìní ñáhá tē Ximú —câchí-güedê xâhaⁿ-güedê.

35 Te cue tée ní nasáá-án ní caní-güedê cuèndú nàcuáa ní cuu ichi, ndihí nàcuáa ní cuu ní naquiní-güedê Jèsús òrè ní táhú-gâ páá ní dàcáñhu ñaha-gâ xii-güedê.

Jèsús ní quexio-gâ núú xñdecu cue tée ní xica cuu ndihí-gâ

(Mt. 28:16-20; Mr. 16:14-18; Jn. 20:19-23)

36 Te càháⁿ dúcáⁿ-ní-güedê nàcuáa ní cuu ní quexio Jèsús ní ngúnutnii-gâ ndéé tñuu-güedê, te xâhaⁿ-gâ xii-güedê:

—Yá Ndiòxí chíndèe ñaha-gâ xii-ndo ïo váha cùu ìní-ndó ndècu-ndo —câchí-gâ xâhaⁿ-gâ xii-güedê.

37 Te da ní yùhú-güedê, te ní sani ìní-güedê sá dicó ìⁿ espíritú cúú sá ndéhé-güedê ní cùu.

38 Dico Jèsús ní xâhaⁿ-gâ xii-güedê:

—¿Ná cuèndá yùhú-ndó, te sàni ìⁿ sani úú ìní-ndó-í?

39 Chí cùndèhe ndaha-í ndihí sáhá-í te quini-ndó ná diu-ni-í. Te chí tэндàha ñaha xii-í te cundehe-ndo, te núu ìⁿ espíritú ndécú yiqui cuñú-xi dàtná ndécú ndihí yùhú —câchí-gâ xâhaⁿ-gâ xii-güedê.

40 Te sáta dúcáⁿ ní xâhaⁿ-gâ te ní dánhèhé ñáhá-gâ xii-güedê ndaha-gâ ndihí sáhá-gâ.

41 Te ïo ní cuñúhu-güedê, te ní cudíí ìní-güedê sá ndécú-gâ tñuu-güedê dico sàni ìⁿ sani úú ìní-güedê, te ní xâhaⁿ Jèsús xii-güedê:

—¿Ndècu ndihì-ndo luha sá cáxí-ó ìha ñá?
—càchí-gá xáhaⁿ-gã xii-güedé.

⁴² Te ní sãñaha-güedé xii-gá luha cháca ñí
chíhó, ndihì díta ñũñú ñúhú ndùdí,

⁴³ te ní queheⁿ-gá te ndèhe-güedé ní
xexi-gá.

⁴⁴ Te dãtnùní ní xáhaⁿ-gã:

—Nchaa sá ñí yáha-í-a cùu-xi sá ñí
cachí tnúhu-í xii-ndo cùtnàhá ndécú ndihì
ñaha-gá-í xii-ndo, chí ní cachí-í sá dàcuítí
cada-xi nchaa nacúáa càháⁿ-xi núú tütú ndí
Moisés, ndihì núú tütú ndéé tnúhu ní cáháⁿ
cue téé ní xóo càháⁿ tnúhu Yá Ndióxi ndéé
sanaha, ndihì núú librú Sãlmú —càchí-gá
xáhaⁿ-gã xii-güedé.

⁴⁵ Te òré-áⁿ ñí sãñaha-gã sá xini
tnùni-güedé, te ní tecú tnùni-güedé nchaa
tnúhu càháⁿ-xi núú tütú Yá Ndióxi.

⁴⁶ Te ní xáhaⁿ-gã xii-güedé:

—Ducaⁿ ndéé tnuní núú tütú Yá Ndióxi
sá dàcuítí sã yùhú Crístú cuú-í, te nduu úní
ndoto-í.

⁴⁷ Te ñihí ñuyíú cùténuu tnúhu ní cáháⁿ-í,
dico díhna nuu-gã ñúú Jerusalén ngúita-yu
cacunehe ñàhá-yu xii-í, te cáháⁿ-yu nàcuáa
ní dánhé-í-yu, te cúñàhá-yu xii cue ñáyiu
sá ná dándixi túu-yu iní-yu sá ñà túú quide
váha-yu, te dàñá-yu nchaa ichi cuéhé ichi
duha ndécú-yu, te natní-yu ichi Yá Ndióxi,
te ducaⁿ te cada càhnu iní-gá nchaa yíca
cuèchi-yu.

⁴⁸ Te vitna nchòhó cuu-ndo cuè téé cáháⁿ
ndáá nchaa nàcuáa ní cuu chí ní xini
núú-ndó.

⁴⁹ Te yúhú tendaha-í Espiritú Yá Ndióxi
quixi cundecu ndihì-ndo, chí ducaⁿ
ñí cachí-gá. Dico chí cùndecu-ni ñúú
Jerusalén-áⁿ ndéé ná quèxio Espiritú Yá
Ndióxi ngúndecu ndihì-ndo cuèndá chindee
ñaha-xi xii-ndo cada-ndo nchaa nacúáa ní
cáháⁿ-í —càchí-gá xáhaⁿ-gã xii-güedé.

Jesús cuánda-gá andiu

(Mr. 16:19-20)

⁵⁰ Te Jesús ní queñuhu ñaha-gã xii-güedé
ñúú Jerusalén ndécá ñaha-gá cuáháⁿ ñúú
Bètaniá, te xíáⁿ ní ndonehe-gá ndaha-gá núú
ñnu, te ní xícaⁿ táhú ñaha-gá xii-güedé núú
Yá Ndióxi.

⁵¹ Te sátá ñí xícaⁿ táhú ñaha-gá xii-güedé
núú Yá Ndióxi, te ní quee-gá tnuú-güedé
cuánda-gá andiu.

⁵² Te ní ngúita-güedé ní cachí-güedé sá
ío càhnu cuu Jesús, te ní natni-güedé ichi
cuánuhú-güedé ñúú Jerusalén, te súúni cùdíí
iní-güedé ñúhú-güedé ichi.

⁵³ Te nchaa nduu ní xíndecu-güedé veñúhu
càhnu sá ño cùnuu ní ndacáⁿ táhú-güedé núú
Yá Ndióxi, te ní cachí-güedé sá ño càhnu
cuu-gá. Duha ní cuu dàvá-áⁿ.

TNÚHU NÍ CHÍDÓ TǸNÍ TÈ JUÁÁ

Déhe Yá Ndióxi ní cuu-gá ìn ñáyi

¹ Cùmání-gá ngáva ñuyú, te sa ndècu ndìhi Yá Ndióxi Déhe-gá. Te ìn-ni xicuu-gá. Te Déhe-gá-áⁿ ní cuu-gá dàtná ìn tnúhu, chi ní cachí tnúhu-gá nàcuáa càa Tátá-gá Dútú Ndióxi.

² Te sa ndècu-gá ndìhi Dútú Ndióxi te ní ngáva ñuyú.

³ Te diu-ni tnúhu mee Dútú Ndióxi ní cuu ní cadúha Déhe-gá nchaa sá ío ñuyú. Te núu ñá túú Déhe-gá ñá, te ñá túú ná coo ñuyú-a ní cùu.

⁴ Te diu-ni Déhe-gá quidé-gá ndécú-ó, te ní dáyèhé-gá iní-ó nàcuáa cundecu-o.

⁵ Te tnúhu-gá ní xité nuu-xi núu ndécú nchaa ñáyi ñuhu ichi cuehé ichi duha. Te ñáyi-áⁿ cùu-yu dàtná cue ñáyi ndècu ìn núu néé, te diu-ni-yu cachí iní-yu xocàni-yu tnúhu-gá dico vá ndácú-yu.

⁶⁻⁷ Te ní xindecu ìn téé ní xínani-dé Juáá, te téé-áⁿ ní táuchíⁿ Yá Ndióxi sá càháⁿ-dé tnúhu-gá núu ñáyi. Te ní xáhaⁿ-dè xii-yu sá véxi Déhe-gá ñuyú-a, te dandixi túu-gá iní-yu cuendá cutnùni iní-yu nàcuáa nduu cuendá Yá Ndióxi cuendá quíndáá iní-yu tnúhu-gá.

⁸ Te ñá díú mèe té Juáá ní dándixi túu-dé iní-yu cuendá cutnùni iní-yu nàcuáa nduu cuendá Yá Ndióxi, chi cuendá-ni ní xica cuu-dé ní càháⁿ-dé sá Déhe Yá Ndióxi véxi-gá dandixi túu-gá iní-yu.

⁹ Te ndáá ndisa sá mée-gá dándixi túu-gá iní ñáyi ñuyú-a cuendá cutnùni iní-yu nàcuáa nduu cuendá Yá Ndióxi.

¹⁰ Te ní xindecu-gá ñuyú-a, te ñáyi ñuyú-a ñá ní cùtnuní iní-yu yoo cùu-gá, te diu-ni mee-gá ní cadúha-gá ñuyú-a ní quide-gá chiⁿ ní táhú Dútú Ndióxi.

¹¹ Te ní quixi-gá ñuyú ní cadúha mee-gá, dico cue ñáyi ñuyú-a ñá ní cùu váha iní-yu núu-gá.

¹² Dico davá-yu ní sándáá iní ñáhà-yu xii-gá, te ní nduu táhú-yu ní nduu déhe ñaha Yá Ndióxi xii-yu.

¹³ Te ñá túú ní nduu déhe ñaha-gá xii-yu sá cùu-yu déhe ñáyi ñuyú-a, ádi sá ndécú tātá-yu, nānā-yu chi mee Yá Ndióxi ducaⁿ ní cuini-gá cunduu sá ndúú déhe ñaha-gá xii-yu.

¹⁴ Te Déhe-gá ní quixi túu-gá ñuyú-a, te ní cuu-gá ìn yiqui cùñú ní xindecu ndìhi ñaha-gá xii nchoo cuè ñáyi ní xica cuu túu ndìhi-gá. Te ní xini-ó sá ío càhu cuu-gá cuendá sá ìn dìi díi-ni-gá cùu-gá Déhe Yá Ndióxi, te ío cùndahú iní ñáhà-gá chindèe

ñaha-gá xii nchoo ñáyi ndècu ñuyú-a, te ío ndáá càháⁿ-gá.

¹⁵ Te duha ní càháⁿ té Juáá cuendá Déhe Yá Ndióxi ní xáhaⁿ-dè xii ñáyi:

—Cuendá téé iha ní càháⁿ-í ndéé càni-gá ní cachí-í sá quixi ìn téé quixi. Te téé-áⁿ cùnuu-gá-dé, chi díhna-gá-dé sa ndècu-dé dàcúxí yùhú —duha ní xáhaⁿ-dè xii-yu.

¹⁶ Te ío váha iní Yaá-áⁿ chi xito ñaha-gá xii-o nchàa-o ìn nduu ìn nduu.

¹⁷ Te ndii Moisés ní cachí tnúhu ndii tnúhu Yá Ndióxi tnúhu sá sánú ichi ñaha xii-o nacuáa cundecu-o, dico Déhe-gá Xitohó Jesu cristú ní cachí-gá sá ío cùu iní ñáhà Yá Ndióxi xii-o. Te ní càháⁿ-gá nchaa dava-gá tnúhu ndáá.

¹⁸ Te ñá ìn ñáyi xini túu-yu Yá Ndióxi. Dico ìnⁿ dìi ní Déhe-gá Yaá ndécú ndìhi-gá càchí tnúhu-gá nàcuáa càa-gá.

Té Juáá téé dàcuandute ñaha xii ñáyi càháⁿ váha-dé cuendá Xitohó Jesu cristú

(Mt. 3:11-12; Mr. 1:7-8; Lc. 3:15-17)

¹⁹ Te cue téé israél ndécú ñuu Jerusálén ní tendaha-güedé cue dútú ndìhi cue téé cùu levitá càháⁿ-güedé núu ndécú té Juáá ndúcú tnúhu-güedé núu-dè ñuu ná téé cùu-dé.

²⁰ Te ní càháⁿ ndáá-dé ní xáhaⁿ-dè xii-güedé:

—Yúhú, ñá díú Cristú Yaá ní tendaha Yá Ndióxi véxi ñuyú-a cùu-í —càchí-dé xáhaⁿ-dè.

²¹ Te ní xáhaⁿ tucu-güedé:

—¿Te yoo cùu yohó váiⁿ? ¿Á yohó cùu-n té Èliás? —càchí-güedé xáhaⁿ-güedé xii-dé.

Te ní xáhaⁿ té Juáá:

—Yúhú, ñá díú té Èliás cùu-í —càchí-dé xáhaⁿ-dè.

Te ní xáhaⁿ tucu-güedé:

—¿Te yohó cùu-n téé ní cachí cue téé ndéé sanaha quixi càháⁿ tnúhu Yá Ndióxi-áⁿ? —càchí-güedé xáhaⁿ-güedé xii-dé.

Te ní xáhaⁿ-dè:

—Ní ñá díú téé-áⁿ cùu-í —càchí-dé xáhaⁿ-dè xii-güedé.

²² Te ní xáhaⁿ tucu-güedé:

—¿Te ná téé cùu yohó váiⁿ?, cuendá ducaⁿ nàcani tnúhu-ndí núu cuè téé ní tendaha ñaha xii-ndí véxi-ndí, te càháⁿ duuⁿ-n ñuu ná téé cùu-n —càchí-güedé xáhaⁿ-güedé xii-dé.

²³ Te ní xáhaⁿ té Juáá:

—Yúhú cùu-í téé xica càháⁿ xiti yucu nàcuáa ní càháⁿ ndii Chàia, chi ndii-áⁿ ní cachí ndii: “Chí dàña ichi cuehé ichi duha ndècu-ndo te tñi-ndo ichi váha, chi véxi Yaá ío cùnuu”, duha ní cachí ndii —càchí té Juáá xáhaⁿ-dè xii-güedé.

²⁴ Te cue téé ndècu tnúhu núu té Juáá ñuu ná téé cùu-dé, cue téé-áⁿ ní tendaha ñaha cue téé cùu fariséu xii-güedé.

25 Te ní xáhaⁿ tùcu-güedé xii té Juàá:

—¿Ná cuèndá dácüandute-n ñáyiu te núu ñá díú Cristú cúu-n, te ní ñá díú tè Èliás, te ní ñá díú tée véxi cáháⁿ tnúhu Yá Ndióxi cúu-n váiⁿ? —cächí-güedé xáhaⁿ-güedé xii-dé.

26-27 Te ní xáhaⁿ tè Juàá:

—Yúhú ní ngódó núu-í dácüandute-í ñáyiu. Dico nchícúⁿ ñⁿ tée véxi, te tée-án cúnúu-gá-dé dácúúxi yúhú, chí yúhú cúu-í ñⁿ tée duuⁿ duuⁿ ñá túú tau nandaxi cuèdicó ñíi chàú-dé dico quide-í chiúⁿ-dé. Te tée-án sa ñúhu tnahá-dé tnuú-ndó dícó-ni sá ñá túú xini-ndó-dé —cächí-dé xáhaⁿ-dé.

28 Duha ní cuu ñúu Bètábará ñúu cáá ndáa ingá yúte Jordán, yácaⁿ ní xindecu té Juàá ní dácüandute-dé ñáyiu.

Jèsús quidé càhnu iní-gá nchaa yíca cuèchi ñáyiu

29 Te nduu tnée ní xini té Juàá Jèsús véxi yatni-gá núu ndécú-dé ndihi ñáyiu. Te ní xáhaⁿ-dè xii-yu:

—Chí cündèhe tée-án, chí tée-án cúu-dé Cristú Yaa ní tendaha Yá Ndióxi véxi ñuyú-a, te véxi-dé cada càhnu iní-dé nchaa yíca cuèchi ñáyiu ñuyú. Te cúu-dé dàtná ñⁿ mbéé quiti ío váha iní-xi.

30 Te diu tée-án ní cachí-í sá cánchezúⁿ-dé quixi. Te cunu-gá-dé dácúúxi yúhú, chí díhna-gá-dé sa ndécú ní cachí-í xii-ndo.

31 Te ní yúhú ñá túú xini-í-dé ní cuu, dico xica cuu-í dácüandute-í ñáyiu cuèndá nchaa ñáyiu israél quini ñáha-yu xii-dé —cächí-dé xáhaⁿ-dè xii-yu.

32 Te ní xáhaⁿ tùcu-dé:

—Ní xini-í Espiritú Yá Ndióxi ní quee-xi andiu véxi cuuⁿ-xi ngúndecu ndihi ñaha-xi xii-dé, te dàtná cáá lómá cáá Espiritú-án véxi cuuⁿ-xi.

33 Te yúhú ñá túú xini-í-dé ní cuu, dico Yá Ndióxi Yaa ní tendaha ñaha xii-í xicá cúu-í dácüandute-í ñáyiu, Yaa-án ní cachí tnúhu-gá sá tée na quini-í ngúndecu ndihi Espiritú-gá sá véxi cuuⁿ andiu, te tée-án taxi-dé Espiritú-gá cundecu ndihi-o.

34 Te yúhú ní xini-í-dé te xini ndáa-í sá Dèhe Dütú Ndióxi cúu-dé. Te xiáⁿ cächí tnúhu-í xii-ndo —cächí té Juàá xáhaⁿ-dè xii-yu.

Cue tée díhna nuu xica cuu ndihi Jèsús

35 Te nduu tnée-án diu-ni xiáⁿ ndécú té Juàá ndihi úu cue tée xica cuu ndihi-dé.

36 Te ní xini-dé Jèsús ñúhú-gá ichi, te ní xáhaⁿ-dè xii cue tée xica cuu ndihi-dé-á:

—Chí cündèhe tée-án, chí tée-án cúu-dé Cristú Yaa ní tendaha Yá Ndióxi véxi ñuyú-a. Te cúu-dé dàtná ñⁿ mbéé quiti ío váha iní-xi —cächí-dé xáhaⁿ-dè.

37 Te sá dúcáⁿ ní cáháⁿ té Juàá núu cué tée úu ndihi-dé-án núu ní chinchícúⁿ-güedé Jèsús.

38 Te ní nchócótó-gã ndáa sátá-gã, te ní xini-gá sá nchícúⁿ ñáha-güedé xii-gá. Te ní xáhaⁿ-gã xii-güedé:

—¿Ná nándücu-ndo? —cachí-gá xáhaⁿ-gã xii-güedé.

Te ní xáhaⁿ-güedé:

—¿Ndée ndécú-n, Ràbi? —cächí-güedé xáhaⁿ-güedé xii-gá.

Te Ràbi-án queé-xi Mèstrú tnúhu mee-güedé.

39 Te ní xáhaⁿ Jèsús xii-güedé:

—Chí nèhé te quini-ndó —cächí-gá xáhaⁿ-gã.

Te ní xica-güedé cuháⁿ-güedé, te ní quexio-güedé núu quidé vèhe-gá. Te ndécú-ni-güedé ndihi-gá ní cuaa, chí dàtná òrè caa cúmi sacuaa ní sáa-güedé.

40 Te úu cue tée-án ní tni-güedé tnúhu ní cáháⁿ té Juàá, te ní chinchícúⁿ-güedé Jèsús. Te núu úu cue tée-án, ñⁿ-dé nani-dè Ndríxi, te ñani-dé cúu té Ximú, ádi Pelú chí úu diu-dé.

41 Te té Ndríxi-án ní nanducu-ni-dé ñani-dé te ní xáhaⁿ-dè:

—Ní naníhi-ndí tée cuu Mesiás —cächí-dé xáhaⁿ-dè.

Te Mesiás-án queé-xi Cristú tnúhu mee-güedé, Yaa ní tendaha Yá Ndióxi véxi ñuyú-a.

42 Te ndéca té Ndríxi ñani-dé cuháⁿ núu ndécú Jèsús. Te òrè ní xini ñáha Jèsús xii té Ximú, te ní xáhaⁿ-gã:

—Yòhó cúu-n tè Ximú déhe té Jonás, te vitna danàni ñaha-í Céfás xii-n —cächí-gá xáhaⁿ-gã.

Te Céfás-án queé-xi Pelú tnúhu mee-güedé.

Jèsús ní cáháⁿ-gá té Lipé ndihi té Natanáel

43 Te nduu tnée ní sani iní-gá quihíⁿ-gá distritú Galilea. Te ní naníhi-gá ñⁿ tée nani Lipé, te ní xáhaⁿ-gã xii-dé:

—Néhe ná quihíⁿ-ó núu quihíⁿ-í-a —cächí-gá xáhaⁿ-gã.

44 Te té Lipé-án cúu-dé tée ñúu Betsaidá. Te diu-ni ñúu yácaⁿ cúu ñúu té Ndríxi ndihi té Pelú.

45 Te té Lipé ní naníhi tnáha-dé ndihi té Natanáel, te ní xáhaⁿ-dè:

—Ní naníhi-ndí tée dii cuèndú-xi ní chído tnúni ndíi Moisés ndihi dava-gá cue tée ní xóo cáháⁿ tnúhu Yá Ndióxi ndée sanaha. Te tée-án nani-dé Jèsús déhe té Chéé, tée ñúu Nazaréⁿ —cächí-dé xáhaⁿ-dè.

46 Te ní xáhaⁿ té Natanáel xii té Lipé:

—¿Te náa ío váha caa ñúu Nazaréⁿ núu da yácaⁿ quee tée cáháⁿ tnúhu Yá Ndióxi? —cächí-dé xáhaⁿ-dè.

Te ní xáhaⁿ té Lipé:

—Néhe ná quihíⁿ-ó te quini-n —cächí-dé xáhaⁿ-dè.

47 Te òrè ní xini Jèsús té Natanáel tá cüyatni-dé cuháⁿ, te ní cáháⁿ-gã cuèndá-dé te ní cachí-gá:

—Tée véxi-án cúu-dě mei tée israhél, te ñá ííⁿ ndùu dandahú-dé ñáyíu —càchí-gá xáhaⁿ-gá.

⁴⁸ Te ní xáhaⁿ tē Natanàél xii Jèsús:

—¿Te nása náquini ñáhá-n? —càchí-dé xáhaⁿ-dē.

Te ní xáhaⁿ Jèsús:

—Yúhú sa ní xiní ñáhá-í xii-n òrē ndécú-gá-n càha yutnu ngúxí-án te ni tē Lìpé vátá cáná ñàha-gá-dé xii-n òrē-án —càchí-gá xáhaⁿ-gá xii-dé.

⁴⁹ Te sá dúcáⁿ ní cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúu-n Dēhe Dútú Ndiòxí yíndàha-n ñáyíu israhél —càchí-dé xáhaⁿ-dē xii-gá.

⁵⁰ Te Jèsús ní xáhaⁿ-gá:

—Cuèndá sá ní xiní ñáhá-í xii-n càha yutnu ngúxí xiáⁿ iní ñáhá-n, dico cuéhé-gá núu sá quini-n —càchí-gá xáhaⁿ-gá xii-dé.

⁵¹ Te ní xáhaⁿ tūcu-gá:

—Na càchí tnúhu ndáá-í sá sàá nduu, te quini-ndó nacaáⁿ andíu. Te quini-ndó cuè espíritú xinú cuèchi núu Yá Ndiòxí sá ndàa nuu-xi quide-xi núu cùndecu yúhú Tée cùu ñani tnáhá-ndó nchàa-ndo —càchí-gá xáhaⁿ-gá xii-güedé.

2

Vico tnândaha ió ñuu Cànaá

¹ Te nduu úní sá dúcáⁿ ní cuu te ní xóo ííⁿ vico tnândaha ñuu Cànaá, ííⁿ ñuu yíndèhu distritú Galiléa. Te yàcáⁿ ní xíndecu náná Jèsús.

² Te tnàhá Jèsús ndihi cue tée xica cuu ndihi-gá ní cáháⁿ-yu cuáháⁿ-gá ndihi-güedé vico-án.

³ Te òrē ní ndihi vinú, te ní xáhaⁿ náná Jèsús xii-gá:

—Ñá túú-gá vinú ndécú ndihi-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xiní ñuhu-xi da yúhú cùñaha-n cuèndá vinú-án, chí vátá tnáhá-gá òrē quini-yu yoo cùu yúhú —càchí-gá xáhaⁿ-gá xii-aⁿ.

⁵ Te ní xáhaⁿ-aⁿ xii ñáyíu xinú cuechi:

—Cada-ndo nchàa nacuáa na cáháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nùtní íñú quídi yúu te quée dàtná ííⁿ cièndú lítrú ndute ííⁿ ííⁿ quídi-án. Te ndute-án nándíhi ñáyíu israhél ndáhá-yu te nàqueté-yu cóhó-yu chí ducaⁿ tnàhí quidé-yu nacuáa sàndáá iní-yu Yá Ndiòxí.

⁷ Te ní xáhaⁿ Jèsús xii nchaa cue tée xinú cuechi:

—Nadachítú-ndó ndüte ndi nchaa quídi-án —càchí-gá xáhaⁿ-gá xii-güedé.

Te ní nadachítú-güedé.

⁸ Te ní xáhaⁿ-gá:

—Vitna te tava-ndo lùha, te canehe-ndo quíhíⁿ cuáha-ndo tée quide vico —càchí-gá xáhaⁿ-gá xii-güedé.

Te ducaⁿ ní quide-güedé ní tava-güedé luha nèhe-güedé cuáháⁿ ní sáha-güedé tée quide vico.

⁹ Te ní xito ndéé tée quide vico-án, te sa ní nduu-xi vinú, te ñá túú ní xiní-dé ndéé véxi-xi, dico mee cuè tée xinú cuechi sa naha-güedé núu ní tava-güedé. Ducaⁿ te tée quide vico-án ní cana-dé tée tnândaha.

¹⁰ Te ní xáhaⁿ-dē:

—Nchaa ñáyíu quide vico queñuhu-yu díhna-gá vinú váha. Te sa vái vinú váha xihí-yu, te dàtnúni queñuhu-yu vinú ndàhú. Te yòhó díhna-gá vinú ndàhú ní queñuhu-n, te ndéé núu ní ndihi-ná ní queñuhu-n vinú váha —càchí tée quide vico-án xáhaⁿ-dē xii tée tnândaha-án.

¹¹ Te sá ní nadatiu Jèsús ndute-án ní nduu-xi vinú cúu-xi ííⁿ chiuⁿ díhna nuu sá vā yòo tnàhí ndàcu cada ní quide-gá ñuu Cànaá, ííⁿ ñuu yíndèhu distritú Galiléa, te chiuⁿ ní quide-gá-án cúu-xi ííⁿ chiuⁿ cahnu vihi, núu xiáⁿ ní cutnùni iní-yu sá ío càhnu cuu-gá, te ní sàndáá iní ñáhá nchàa cue tée xica cuu ndihi-gá.

¹² Te sátá ní yáha vico, te ní xica Jèsús ndihi náná-gá, ndihi cue ñani-gá, ndihi nchaa cue tée xica cuu ndihi-gá cuáháⁿ-yu ñuu Capèrnaúm. Te yàcáⁿ ní xíndecu-yu ííⁿ úú nduu ndihi-gá.

Jèsús ñá túú tnàhá iní-gá nacuáa quide ñáyíu xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyíu israhél vico pàsua, te ní xica Jèsús cuáháⁿ-gá ñuu Jerusalén.

¹⁴ Te sátá ní sáá-gá yàcáⁿ, te ní xica-gá cuáháⁿ-gá veñúhu càhnu sá ío cùnno, te xití veñúhu-án ní xiní-gá ndécú ñáyíu dícó-yu ndicutu, mbéé ndihi lómá, te tnàhá ñáyíu dàma díhúⁿ núcóo-yu ní xiní-gá.

¹⁵ Te ní queheⁿ-gá ííⁿ úú yoho, te ní cáunno tnàha-gá, te ní dáyúhu-gá ñáyíu ní queé-yu quehé veñúhu, ndihi ndicutú-yu ndihi mbéé-yu. Te cue ñáyíu dàma díhúⁿ-án ní dàngoyo-gá díhúⁿ-yu, te ní dándúá-gá mèsá-yu.

¹⁶ Te ní xáhaⁿ-gá xii cue ñáyíu dico lómá:

—¡Queñuhu-ndo nchàa quiti-a xití veñúhu-a! ¡Vá cáda-ndó vèhe núu yáhu núu cúu vèhe Tàtá-í Dútú Ndiòxí! —càchí-gá xáhaⁿ-gá xii-yu.

¹⁷ Te xiáⁿ ní ndacu iní cue tée xica cuu ndihi-gá sá dúcáⁿ yòdo tnuní núu tütú-gá, te càchí-xi: “Ío cùyica iní-í chí ñá cuini-yu canehe íi-yu vèhe Tàtá-í”, duha càchí-xi núu tütú-gá.

18 Te ní xáhaⁿ cuè téé israhél xii-gá:
—¿Ná cúu sá vǎ yǒ tñahí ndàcu cada, cada-n cuèndá cutnùni iní-ndí sá cúu òuha taxi tñuní ñáhá-n xii-ndí-i? —càchí-güedé xáhaⁿ-güedé xii-gá.

19 Te ní xáhaⁿ Jèsús:
—Chí dǎngoyo veñúhu-a, te neni xití úní nduu te sa nadaxínu-í —càchí-gá xáhaⁿ-gǎ xii-güedé.

20 Te ní xáhaⁿ tùcu cue téé israhél:
—Údico ìnú cuía ní xíndecuu-güedé ní sáá veñúhu-a, te yòhò cuìni-n nadaxínu-n xití úní-ni nduu —càchí-güedé xáhaⁿ-güedé xii-gá.

21 Dico sá ní cǎháⁿ-gá chi ñá díú cuèndá veñúhu ní cǎháⁿ-gá chi cuèndá yiqui cùñú-gá ní cǎháⁿ-gá.

22 Núu sǎtá ní xíhí-gá, te ní ndoto-gá, te òré-áⁿ ní ndacu iní cue téé ní xica cuu ndihí-gá nàcuáa ní cǎháⁿ-gá, núu xíáⁿ ní sándáá iní-güedé tñúhu yòdo tñuní núú tütú-gá. Te ducaⁿ te ní sándáá iní-güedé tñúhu ní cǎháⁿ-gá.

Jèsús xini-gá nàcuáa càa iní nchaa ñáyiu

23 Te òré ndécú Jèsús vico páscaú, te ío vǎi ñáyiu ní sándáá iní ñáhá xii-gá cuèndá ío titní sá vǎ yǒ tñahí ndàcu cada ní quide-gá ní xini-yu.

24 Dico Jèsús ñá ní cǎháⁿ-gá nchaa tñúhu ñúhu iní-gá, chi sa ní cutnùni iní-gá sá ñà túú cùu váha iní-yu.

25 Te ñá túú xini ñúhu-gá ìⁿ ñáyiu cúñaha nàcuáa càa iní nchaa tñaha ñáyiu-yu, chi mee-gá sa ñaha ndáá-gá nàcuáa càa iní-yu nchaa-yu.

3

Jèsús ndihí té Nicòdemú

1 Ní xíndecu ìⁿ téé cùu fariséu ní xínani-dé Nicòdemú, te ní cuu-dé ìⁿ téé cùnuu núú ñáyiu israhél.

2 Te téé-áⁿ ní sáháⁿ-dé niú ní cǎháⁿ ndihí-dé Jèsús, te ní xáhaⁿ-dè:

—Mèstrú, yúhú ndihí dava-gá-güedé sa ñaha-ndí sá Yá Ndióxi ní tendaha ñaha-gá xii-n véxi-n dānehé ñáhá-n xii-ndí, chi núu ñá túú Yá Ndióxi ndécú ndihí-n, te vǎ ndácú-n càda-n nchaa sá vǎ yǒ tñahí ndàcu cada quide-n —càchí-dé xáhaⁿ-dè.

3 Te ní xáhaⁿ Jèsús:

—Na càchí tñúhu ndáá-í xii-n sǎ ncháá ñáyiu vǎ ná càcu saa tucu, te vǎ ndihu ndaha ñaha Yá Ndióxi xii-yu —càchí-gá xáhaⁿ-gǎ xii-dé.

4 Te ní xáhaⁿ tè Nicòdemú:

—¿Te nása cada ìⁿ ñáyiu sa ní yⁱⁱ te cacu-ni tucú-yu? ¿Náa ndihu tucú-yu xití ñāñā-yu te cacu tucú-yu xito cùu uú-áⁿ? —càchí-dé xáhaⁿ-dè xii-gá.

5 Te ní xáhaⁿ Jèsús:

—Na càchí tñúhu ndáá-í xii-n sǎ ncháa ñáyiu na nduu ndoo nduu nine iní-xi cuú-yu ñáyiu ní na càcu saa ndihí ndute ndihí Espiritú Yá Ndióxi, ñáyiu-áⁿ ndihu ndaha ñaha-gá xii-yu.

6 Te nchaa ñáyiu càcu ñuyúú-a, chi déhe ñáyiu ñuyúú-a cuú-yu. Te ñáyiu ní nduu ndoo ní nduu nine iní-xi, ñáyiu-áⁿ ní nduu táhú-yu Espiritú Yá Ndióxi te taxi tñuní ñáhá-nǎ Espiritú-gá xii-yu.

7 Te vǎ cùñúhu-n tñúhu ní cǎháⁿ-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-áⁿ cuú-yu dàtná ñáyiu ní nacacu saa.

8 Táchí ndèni xiáⁿ təcú dòho-o xico-xi, dico ñá túú xini-ó ndèé ichi véxi-xi, te ní ñá túú xini-ó ndèé ichi cuáháⁿ-xi. Ducaⁿ sǎtnahá-xi cùu Espiritú-gá ndécú ndihí ñáyiu ní nduu ndoo ní nduu nine iní-xi —càchí-gá xáhaⁿ-gǎ xii-dé.

9 Te dàtnùni ní xicáⁿ tñuhú tùcu té Nicòdemú núú-gǎ, te xáhaⁿ-dè xii-gá:

—¿Te nása nduu tñúhu cǎháⁿ-n dùcaⁿ cǎháⁿ-n? —càchí-dé xáhaⁿ-dè xii-gá.

10 Te ní xáhaⁿ Jèsús:

—Yòhò cúu-n ìⁿ téé cùnuni iní-xi, chi dàcuaha-n ñáyiu israhél, ¿te ñá təcú tñuní-n tñúhu cǎháⁿ-í-u?

11 Te na càchí tñúhu ndáá-í xii-n sǎ nchúhú cǎháⁿ-ndí ìⁿ sá ní tecú tñuní-ndí, te cǎháⁿ ndáá-ndí cuèndá ìⁿ sá ní xini-ndí. Dico nchòhó ñá təcú tñuní-ndó tñúhu cǎháⁿ-ndí.

12 Te ñá sándáá iní-ndó tñúhu cǎháⁿ-í cuèndá nchaa nàcuáa cùu ñuyúú-a, te uuⁿ-gá cada-ndo núu cǎháⁿ-í cuèndá nchaa nàcuáa cùu andiu.

13 Vǎ yǒ ìⁿ sǎa andiu, te caní-xi cuèndú nàcuáa càa. Chi ìⁿdií díí-ni yúhú véxi cuuⁿ-í andiu, te cùu-í ñani tñahá-ndó nchaa-ndo. Te diu-ni yàcáⁿ ndaa-í cundecu-í.

14 Te dàtná ní ndanehe ndí Moisés cóo ní sata caa ndí-di xití yucu, ducaⁿ càda ñaha-güedé cata caa ñaha-güedé núú cùrúxi xii yúhú Téé cùu ñani tñahá-ndó nchaa-ndo ìⁿ nduu,

15 te ducaⁿ yáha-í cuèndá nchaa ñáyiu na quíndáá iní ñáhá xii-í te nduu táhú-yu cundecu-yu ndihí Yá Ndióxi ní caa ní quíhíⁿ —càchí-gá xáhaⁿ-gǎ xii-dé.

Yá Ndióxi ío cùu iní-gá ñáyiu ñuyúú-a

16 Te Yá Ndióxi ío cùu iní-gá ñáyiu ñuyúú-a. Te ìⁿdií-ni Déhe-gá ndécú, te ní tendaha ñaha-gá ní quixi-gá ñuyúú-a, te núu na quíndáá iní ñáhá ñáyiu, te vǎ cuíta nihnú-yu, chi nduu táhú-yu cundecu-yu ndihí-gá ní caa ní quíhíⁿ.

17 Te Yá Ndióxi ñá túú ní tendaha-gá Déhe-gá quixi-gá ñuyúú-a dacuíta nihnú-gá ñáyiu, chi ní tendaha-gá Déhe-gá ní quixi-gá

sá dácaacu nihnu-gá ñáyiú ñuyúú-a núú ùhú núú ndàhú.

¹⁸ Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndióxi.

¹⁹ Chi ní quixi Déhe-gá ñuyúú-a ní dándíxi tũu-gá iní-yu cuendá cutnùni iní-yu nàcuáa ndũu cuendá Yá Ndióxi te tñiⁿ-yu ñⁿ ichi váha ni cùu, te ñá ní tnàhá iní-yu, chi ní cudíí-gá iní-yu nchaa sá cuèhé sá dúhá dácúúxi sá váha, núu xíáⁿ tá xíta nihnú-yu cuáháⁿ.

²⁰ Te nchaa ñáyiú quide nchaa sá cuèhé sá dúhá ñá tnàhá iní-yu cutnùni iní-yu nàcuáa ndũu cuendá Yá Ndióxi, te ñá tñiⁿ-yu tñũhu-gá cuendá yùhú-yu nduu tñùni nchaa sá quidè-yu.

²¹ Te nchaa ñáyiú ñũhu ichi ndáá cuíni-yu cutnùni iní-yu nàcuáa ndũu cuendá Yá Ndióxi, te cùtnuni sá chindèe ñaha-gá xii-yu, chi quide váha-yu.

Té Juáá tée dácuaudute ñaha xii ñáyiú càháⁿ váha tucu-dé cuendá Jèsús

²² Te sátá dúcáⁿ ní cuu, te ní quee Jèsús cuáháⁿ-gá ndihi cue tée xica cuu ndihi-gá distritú Júdeá. Te yácáⁿ ní xindecu tnaa-gá ndihi-güedé ní xóo dácuaudute-güedé ñáyiú.

²³ Te ndècu té Juáá ñⁿ xichi núú nání Ènón yatni ñũu Salém dácuaudute-dé ñáyiú, chi yácáⁿ ío váha ñũhu ndute, núu xíáⁿ ní xóo quíhíⁿ ñáyiú yácáⁿ ní xóo cuanduté-yu.

²⁴ Duha ní cuu cutnàhá vátá ngává-gã té Juáá vecaá.

²⁵ Te ní cacu ñⁿ cuendú ní càháⁿ cue tée xica cuu ndihi té Juáá ndihi ñⁿ úú cue tée israhél, núu ndèdaca sá váha-gá cada ñáyiú cuendá nduu ñⁿ-yu.

²⁶ Te ní sáháⁿ-güedé núú ndécú té Juáá ní xáhaⁿ-güedé:

—Mèstrú, tée ní quixi núú ní xindecu-n ndàa ingá xio yúte Jórdán, tée dii cuendú-xi ní càháⁿ-n, té-áⁿ dácuaudute-dé tnàhá-dé ñáyiú. Te ío vai ñáyiú ní chinchícúⁿ ñáhá xii-dé —càchí-güedé xáhaⁿ-güedé xii-dé.

²⁷ Te ní xáhaⁿ té Juáá:

—Te vá yóo ñⁿ ndàcu cada ñⁿ chiúⁿ nacuáa cuu váha iní Yá Ndióxi, te núu ñá túú mèe-gá chindèe ñaha-gá xii-yu.

²⁸ Te nchóhó sa ñaha-ndo sá yùhú ní càháⁿ ndáá-í sá ñá díú Cristú cùú-í, dico mee Yá Ndióxi ní tendaha ñaha-gá yódó nùú-í véxi núú Yáá-áⁿ.

²⁹ Te nchóhó xini-ndó sá ñⁿ té tñandaha te xichi tñandaha ndihi-ná-dé cùndihi-dé. Te tée ní xica ndáhu ío cùdíí iní-dé ndèdóho-dé nchaa tñũhu càháⁿ té tñandaha-áⁿ. Te ducaⁿ sátnahá-xi cùu yùhú, chi ío cùdíí iní-í sá vái ñáyiú ta chinchícúⁿ ñáhá xii Jèsús cuáháⁿ.

³⁰ Te uuⁿ-gá cuita cuu vai ñáyiú cutnùni iní-xi sá ío cùnuu-gá, te yùhú cuita ndóo ndee-í quíhíⁿ —càchí-dé xáhaⁿ-dè xii-güedé.

Cristú véxi cuuⁿ-gá andiu

³¹ Te ñⁿ dii díí-ni Cristú Yáá véxi cuuⁿ andiu cùnuu-gá núú ñuyúú-a. Te nchaa ñáyiú ndècu ñuyúú-a cùú-yu ñáyiú ñuyúú iha, te càháⁿ-yu sá cùú-xi ñuyúú-a. Dico Cristú Yáá véxi cuuⁿ andiu

³² càháⁿ-gá ñⁿ sá ní xini-gá, te càháⁿ-gá ñⁿ sá ní tecú dóho-gá. Te ñá túú cuíni-yu quindáá iní-yu tñũhu càháⁿ-gá.

³³ Te nchaa ñáyiú tñiⁿ tñũhu càháⁿ Yáá véxi cuuⁿ andiu-áⁿ càháⁿ-yu sá tñũhu Yá Ndióxi cùú-xi ñⁿ sá ndáá.

³⁴ Te Déhe-gá Yáá véxi cuuⁿ andiu càháⁿ-gá mee-ni tñũhu-gá. Te ñá ùhú iní-gá ní sáñaha-gá Espiritú-gá ndécú ndihi Déhe-gá.

³⁵ Te Dútú Ndióxi ío cùu iní-gá Déhe-gá, núu ní xáhaⁿ-gá sá méé-gá taxi tñùni-gá nchaandi tùhú sá ío.

³⁶ Te nchaa ñáyiú na quindáá iní ñáhá xii Déhe-gá, ñáyiú-áⁿ cundecú-yu ndihi-gá ní caa ní quíhíⁿ. Te nchaa ñáyiú vá quindáá iní ñáhá xii Déhe Yá Ndióxi ío dandòho ñaha-gá xii-yu.

4

Jèsús ndihi ñⁿ ñaha Sàmariá

¹ Te ní níhi cue tée cùu fariséú tñũhu sá vai-gá ñáyiú ta chinchícúⁿ ñáhá xii Jèsús. Te ducaⁿ vai-gá-yu ta dácuaudute-gá cuáháⁿ dácúúxi té Juáá.

² Te cuèi ñá díú mèe-gá dácuaudute ñaha-gá xii-yu, dico cue tée xica cuu ndihi-gá dácuaudute ñaha-güedé xii-yu.

³ Te ní níhi Jèsús tñũhu nàcuáa càháⁿ cue tée cùu fariséú, núu ní ndee-gá distritú Júdeá cuánuhú tucu-gá distritú Galiléa.

⁴ Te ichi ñũhu-gá ní nayáha-gá distritú Sàmariá.

⁵ Te ní sáá-gá ñⁿ ñũu nání Sicár te ñũu-áⁿ yíndèhu-xi distritú Sàmariá. Te xíáⁿ cáá yatni ñũhu núú ní sáha táhú ndíi Jácób déhe ndíi ndíi Chèé.

⁶ Te yácáⁿ cáá dòco ní cuu cuendá ndíi Jácób. Te cùu-xi datná cuádava nduu ñũhu Jèsús ichi, te ío ní xáú-gá núu ní sáá-gá yuhu dòco-áⁿ ní ngóo-gá ndétátú-gá.

⁷⁻⁸ Te ní xica cue tée xica cuu ndihi-gá cuáháⁿ-güedé xití ñũu Sicár cuánguaaⁿ-güedé sá cáxi-güedé. Te yuhu dòco-áⁿ núcòo-gá ní sáá ñⁿ ñadihi ñaha distritú Sàmariá véxi quèhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gá.

⁹ Te ní xáhaⁿ ñàdihi-áⁿ:

—¿Ná cuendá da núu-í xicáⁿ-n ndüte coho-n? Te yóhó cúu-n tée isráel, te yúhú cúu-í ñaha Sámariá —cachí-aⁿ xáha-aⁿ xii-gá.

Te ducaⁿ ní xáhaⁿ-aⁿ, chi ñá túu ndècu váha ñáyi isráel ndihi ñáyi distritú Sámariá.

¹⁰ Te ní xáhaⁿ Jèsús xii-aⁿ:

—Ñá cútñuní iní-n ná taxi Yá Ndióxi xii-n, te ni ñá cútñuní iní-n yòo xicáⁿ ndute núu-n. Te núu dícó xiní-n yòo cuu yúhú á, te da mee-n cǎcáⁿ-n ndüte núu-í coho-n, te yúhú taxi-í ndüte cundecu ndihi-n núu cuáháⁿ núu véxi —cachí-gá xáhaⁿ-gá.

¹¹ Te ní xáhaⁿ tucu ñadhí-áⁿ:

—Tátá, ni sá quèhnu-n ndüte ñá túu nehe-n, te doco-a cümü víhí, te ñá túu ndéé quíngueheⁿ-n ndüte taxi-n coho-í.

¹² Ndú Jácób ñaní tnáhá-ndí ní xíndecu ndéé sanaha ní cadúha ndí doco-a ní tóo ndute ní xihí ndí, ndihi nchaa déhe ndí, ndihi nchaa quiti ndí, te ní ndóo cùu cuendá-ndí. ¿Te násai, te yóhó cúnùu-gá-n dàcúuxí ndí-áⁿ? —cachí-aⁿ xáha-aⁿ xii-gá.

¹³ Te ní xáhaⁿ Jèsús:

—Nchaa ñáyi xihí ndute doco-a, te vá cúu vétú dúcáⁿ iní-yu chi dayíchi ñáhá-ní tucu-xi ndute-a.

¹⁴ Dico nchaa ñáyi na còho ndute na cuáñaha-í, te vá ñá ndùu-gá dayíchi ñáhá-xí ndüte-áⁿ xii-yu, chi ndute cuáñaha-í cúu-xí ndüte váha-gá. Te dàtná queé nihni ndute xití doco-a, nchaa-ni nduu ñuhu ñá túu yíchi, ducaⁿ sǎtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yúhú —cachí-gá xáhaⁿ-gá xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vá dáyichi ñáhá tnáhí-gá-xi ndute. Te vá quíxi-gá-í quixi quèhnu-í ndute doco-a —cachí-aⁿ xáha-aⁿ xii-gá.

¹⁶ Te ní xáhaⁿ Jèsús:

—Cuáháⁿ cuángana yí-n, te quixi-ndo iha —cachí-gá xáhaⁿ-gá xii-aⁿ.

¹⁷ Te ní xáhaⁿ-aⁿ:

—Ñá túu yí-í —cachí-aⁿ xáha-aⁿ xii-gá.

Te ní xáhaⁿ tucu Jèsús:

—Ndáá cǎháⁿ-n sǎ ñá túu yí-n.

¹⁸ Dico ní cuu úhúⁿ tée cǎndeca-n, te tée ndeca-n vitna chi ñá díu yí-n cuu-dé, te ndáá cǎháⁿ-n sǎ ñá túu yí-n —cachí-gá xáhaⁿ-gá xii-aⁿ.

¹⁹ Te sá dúcáⁿ ní xáhaⁿ-gá núu ní xáhaⁿ tucu-aⁿ:

—Tátá, yúhú sání iní-í sá yóhó cúu-n ñá tée cǎháⁿ tnúhu Yá Ndióxi.

²⁰ Te cue ñaní tnáhá-ndí ní xíndecu ndéé sanaha ní xóo cada cǎhnu-yu Yá Ndióxi tñdúu-a, dico nchòhó ñáyi isráel cachí-ndó sá ndéé ñúu Jerusalén cada cǎhnu-o-gá —cachí-aⁿ xáha-aⁿ xii-gá.

²¹ Te ní xáhaⁿ Jèsús xii-aⁿ:

—Ñá tnúhu na cǎháⁿ-í-a, te quindáá iní-n. Sa ta cùyatni sáá nduu sá ñá díu-gá mee-ni tñdúu-a, te ni ñá díu-gá mee-ni ñúu Jerusalén cada cǎhnu-ndo Tátá-ó Dítú Ndióxi, chi ndèni ní cuu cada cǎhnu-ndo-gá.

²² Te nchòhó cue ñáyi Sámariá chi ñá cútñuní iní-ndó ná cúu sǎ quidé cǎhnu-ndo, dico nchúhú ñáyi isráel, chi cútñuní iní-ndí ná cúu sǎ quidé cǎhnu-ndí. Chi ñá tée isráel véxi-dé dàcácu nihnu-dé ñáyi cuendá vá quíhíⁿ-yu núu úhú núu ndàhú.

²³ Te není vitna ngúta-yu cada cǎhnu ndisá-yu Tátá-ó Dítú Ndióxi, te cadá-yu ni yúhu ni iní-yu sá cúu-xí-gá, chi mee-gá ducaⁿ cuini-gá cadá-yu cada cǎhnu-yu-gá.

²⁴ Te Yá Ndióxi chi ñá espíritu cúu-gá. Te nchaa ñáyi na cǎda cǎhnu ñaha, te cadá-yu ni yúhu ni iní-yu sá cúu-xí-gá te cadá-yu dàtná cǎháⁿ tnúhu-gá —cachí-gá xáhaⁿ-gá xii-aⁿ.

²⁵ Te ní xáhaⁿ ñadhí-áⁿ:

—Xini-í sá quíxi tée cùu Mesías, tée cǎchí-güedé nání Cristú. Te tée-áⁿ ná sáá-dé, te cachí tnúhu ndáá-dé nàcuáa cuu —cachí-aⁿ xáha-aⁿ xii-gá.

²⁶ Te ní xáhaⁿ Jèsús:

—Diu tée-áⁿ cúu yúhú tée ndátñuhu ndihi-n —cachí-gá xáhaⁿ-gá xii-aⁿ.

²⁷ Te òré-áⁿ ní ndexio cue tée xica cuu ndihí-gá, te ní cuñúhu-güedé sá ndátñuhu-gá ndihi ñadhí-áⁿ. Dico ní ñá-güedé ñá ní xicáⁿ tnúhú-güedé núu-gá núu ná cuendú ndátñuhu-gá ndihi ñadhí-áⁿ.

²⁸ Ducaⁿ te ní dándó ñadhí-áⁿ yóo ndute-aⁿ xiáⁿ, te ní xica-aⁿ cuánuhú-aⁿ ñúu cútñuhu-aⁿ ñáyi cuendá Jèsús.

²⁹ Te ní xáhaⁿ-aⁿ:

—Chí nehé ná quíhí-ó, chi quini-ndó ná cúu ñá tée núcóo yuhu dòco-áⁿ núu ñá díu Cristú Yá ní tendaha Yá Ndióxi véxi ñuyúyú-a cùu-dé núu ní cǎháⁿ ndáá-dé nàcuáa cùu ndecu-í —cachí-aⁿ xáha-aⁿ xii-yu.

³⁰ Te sá ní níhí ñáyi ñúu-áⁿ tnúhu, xiáⁿ ní xicá-yu cuáháⁿ-yu.

³¹ Te òré vátá sáá-gá-yu xiáⁿ ní xáhaⁿ cue tée xica cuu ndihí-gá xii-gá:

—Mèstrú, cudèñu na cudèñu-o —cachí-güedé xáhaⁿ-güedé xii-gá.

³² Te ní xáhaⁿ-gá:

—Ndècu ñá sá cǎxi-í, ñá sá ñá túu xiní nchòhó —cachí-gá xáhaⁿ-gá xii-güedé.

³³ Te cue tée xica cuu ndihí-gá xitñaha-güedé:

—Váa ió ñáyi ní quixi nehe sá ní xexi-gá núu duha cǎháⁿ-gá —cachí-güedé xitñaha-güedé.

³⁴ Te ní xáhaⁿ-gá:

—Dàtná cuini-ndó cùu vétú iní-ó òré xéxi-ó, ducaⁿ cùu vétú iní-í quidé-í nchaa

nàcuáa ní cáhá^a Yá Ndióxi Yaa ní tendaha ñàha xii-í véxi-í ñuyíú-a, te chüu^a-gá ío cùdíí ìní-í dandíhi-í.

³⁵ Te nchòhó càchí-ndó sá cùmání cümü-gá yóó te cuu itú. Dico yúhu càchí-í sá cundehe-ndo ñáyiú-án, chí sa ndècu túha-yu, dàtná cúú-ná itú sá sá ní cuu-ná natahu-o cùú-yu, chí sa ndècu túha-ná-yu cundedóho-yu tñúhu-í.

³⁶ Te dàtná cúú ñáyiú nàtahu itú chí sa cúhu^a yáhu-yu, duca^a sátnahá-xi cùu ñáyiú na càhá^a tñúhu-í, chí cuáñaha-í sá ndúú tãhü-yu na sáá nduu. Te nchaa ñáyiú na tñi tñúhu-í te nduu tãhü-yu cundecu-í ndihí-yu ni caa ni quíhí^a. Te dàtná cúú ñáyiú ní chíhi tatá-xi, ndihí ñáyiú ní natahu itú-xi cùdíí-ná ìní-yu. Duca^a sátnahá-xi cùu ñáyiú na càhá^a tñúhu-í.

³⁷ Chí ndáá quée-xí nàcuáa cuáhá^a ìi^a cuèndú sá càchí-xi: “Tucu téé ní chíhi tatá, te tucu téé ní natahu”, duha cuáhá^a cuèndú-á^a.

³⁸ Te yúhu tendaha ñaha-í xii-ndo quíhí^a-ndó càhá^a-ndó tñúhu-í núú sá ní yáha-güedé ní cáhá^a-güedé tñúhu-í. Te nchòhó quíhí^a-ndó dícó-ná nduu cuèndá-ndó chüu^a-án —càchí-gá xáha^a-gá xii-güedé.

³⁹ Te ío cuéhé ñáyiú ñuu^a-án ní xíndedóho-yu cuèndú ní caní ñadíhí-án núú-yu sá Jesús ní xáha^a-gá nchaa nàcuáa quide-a^a, te xíá^a ío vai-yu ní sándáá ìní-yu Jesús.

⁴⁰ Te ní quexió-yu núú ndécú-gá, te ní cáhá^a ndàhú-yu núú-gá sá quèndóo-gá ñuu^a-yu, núú xíá^a ní xíndecu-gá ndihí-yu úú nduu.

⁴¹ Te ío cuéhé-gá-yu ní sándáá ìní-yu tñúhu ní cáhá^a mée-gá.

⁴² Te ní xáhá^a-yu xii ñadíhí-án:

—Vitna te ñá díú mèe-ni tñúhu ní cáhá^a-n ní sándáá ìní-ndí-gá, chí ní cáhá^a mée-gá ní xíndedóho-ndí vitna núú ní sándáá ndisa ìní-ndí sá díú-gá cúú-gá Cristú Yaa ní tendaha Yá Ndióxi véxi ñuyíú-a dàcácu ni-hnu-gá ñáyiú núú úhú núú ndàhú —càchí-yu xáhá^a-yu xii-a^a.

Jesús quidé tãtna-gá déhe ìi^a téé ndéé chíú^a núú gobiènú

⁴³ Te nduu úní ní nucúhu^a Jesús ichi cuáhá^a-gá distritú Galiléa.

⁴⁴ Te cuáhá^a-gá yácá^a, chí mee-gá ní cacíhí-gá sá núú ìi^a téé na càhá^a-dé tñúhu Yá Ndióxi ñuu^a núú ní cacu-dé, te ñá túú nèhé-yu sá yíñúhu núú-dé.

⁴⁵ Te òré ní sáá-gá distritú Galiléa, te ío váha ní cuu ìní ñáhá-yu xii-gá, chí cuèndá tñáhá-yu ní xíndecu ndihí-gá vico pàscuá ñuu^a Jerusalén. Te yácá^a ní xini-yu nchaa sá ní quide-gá.

⁴⁶ Te ní sáhá^a tucu-gá ñuu^a Cànaá ìi^a ñuu^a yíndèhu distritú Galiléa, núú ní nadatiu-gá

ndute ní nduu-xi vínú. Te ñuu^a Capèrnaúm ndécú ìi^a téé ndéé chíú^a núú téé cùu gobièrnú, te téé-án cùhú ìi^a déhe-dé.

⁴⁷ Te ní níhí-dé tñúhu sá ní ndee Jesús distritú Júdeá ní ndexio-gá distritú Galiléa, núú ní sáhá^a-dé núú ndécú-gá, te ní cáhá^a ndàhú-dé núú-gá sá quíhí^a-gá cada tãtna-gá déhe-dé, chí sa ndècu-na-dé sá cùú-dé.

⁴⁸ Te ní xáha^a Jesús xii-dé:

—Nchòhó, chí vá quèndáá ìní ñáhá-ndó xii-í te núú vá cadá-í ìi^a sá vá yóo tñàhí ndàcu cada quini-ndú —càchí-gá xáha^a-gá xii-dé.

⁴⁹ Te ní xáha^a tucu téé cùhú déhe-xi-án xii-gá:

—Tãtã, cundee ìní-n ná quíhí^a-ni-o cada tãtna-n déhe-í ná cuu-dé, chí cãhú víhí tñáhá-dé —càchí-dé xáha^a-dè xii-gá.

⁵⁰ Te ní xáha^a Jesús:

—Cuanuhú te quini-n ná ní ndúha déhe-n —càchí-gá xáha^a-gá xii-dé.

Te ní sándáá ìní-dé tñúhu ní cáhá^a Jesús, te cuánuhú-dé.

⁵¹ Te ñúhu-dé ichi cuánuhú-dé ní sánú tñáhá ñáhá cuè téé xinu cuèchi núú-dé. Te ní xáha^a-güedé sá sá ta ndúha déhe-dé cuáhá^a.

⁵² Te ní xícá^a tñúhú-dé núú-güedé ná òré cúú-xí ní ngúíta-xi ta quetaú cuéhé-dé. Te ní xáha^a-güedé:

—Icu dàtná òré caá ìi^a sacuaa ní nchíco-dé cahni —càchí-güedé xáha^a-güedé xii-dé.

⁵³ Te tãtã téé cùhú-án ní ndacu ìní-dé sá díú òré ní quetaú cuéhé-dé ní cáhá^a ndihí-dé Jesús ní xáha^a-gá sá ndúha déhe-dé. Te xíá^a núú ndi nchaa téé-án vehe-dé ní sándáá ìní-yu Jesús.

⁵⁴ Te sá ní quide-gá-án cúú úú xito quide-gá sá vá yóo tñàhí ndàcu cada. Te sá ní quide-gá xito cùu uú-án cúú-xí sá ní quide-gá cùtñáhá ní ndee-gá distritú Júdeá cuánuhú-gá distritú Galiléa.

5

Jesús quidé tãtna-gá ìi^a téé cùhú ìi^a xichi núú nání Bètesdá

¹ Te sátá dúcá^a ní cuu, te ní tñahá nduu ní quide ñáyiú isràél ìi^a vico. Te ní sáhá^a Jesús ñuu^a Jerusalén.

² Te ní cãa xico yuhu ñuu^a-án ñúhú dòco, te titní yèhe-xi ndecu. Te ìi^a yèhe-xi-án nání Yüyehe Mbéé, te yatni xíá^a caá ìi^a tanquí ndute dàna-ni-yu Bètesdá tñúhu mée-yu tñúhu hèbreú, te yuhu tànquí-án caá úhú^a corrèdór.

³ Te xití corrèdór-án xíndecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gá candá nihnu, ndetú-yu candá ndute-án.

⁴ Chí níhí-yu tñúhu sá àma nihnu cùu^a ìi^a espíritú xínú cuèchi núú Yá Ndióxi, te dàcandá-xi ndute ñúhu tanquí-án. Te ñáyiú

díhna nuu ná quée xití ndute-án, te òré-ni ndúha-yu.

⁵ Te yàcáⁿ ñũtnàhá ìⁿ tée ní cuu ócò sáhúⁿ úní cuíá sá cùhú-dé.

⁶ Te ní xiní Jèsús cáá-dé, te ní cutnùní iní-gá sá ní cuu cuéhé cuíá cùhú-dé, te ní xáhaⁿ-gá:

—¿Cuíní-n ndúha-n-án? —càchí-gá xáhaⁿ-gá xii-dé.

⁷ Te ní xáhaⁿ tée cùhú-án:

—Táta, vá yòo ñihí-í dàquée ñaha xii-í xití tànquí-a òré càndá ndute, chi òré cuíní-í quée-í, te ingá-ni tucú-yu quènduú-yu núú-í cuàngueé-yu —càchí-dé xáhaⁿ-dè xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gá xii-dé.

⁹ Te òré-ni-án ní ndúha tée cùhú-án, te ní ndaca-ni-dé yuu-dé, te ní xica-dé cuáháⁿ-dè. Te nduu-án cúú-xí nduu ndetatú ñáiyu,

¹⁰ núu ní xáhaⁿ cué tée isráel xii tée ní cuhu-án:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dè:

—Mee tée ní quide tátna ñaha xii-í ní cachí-dé sá ndacàni-í yuu-í, te caca-í —cachí-dé xáhaⁿ-dè xii-güedé.

¹² Te ní xáhaⁿ-güedé:

—¿Te ná cúú tée ducaⁿ ní cachí sá ndacàni-n yuu-n te caca-n-í? —càchí-güedé xáhaⁿ-güedé xii-dé.

¹³ Dico tée ní cuhú-án ñá túú ní cùnnumí iní-dé ná cúú tée ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáiyu chitu xíndecu xián.

¹⁴ Te sátá dúcáⁿ te ní nanihí tnáhá Jèsús ndihi tée ní quide tátna-gá-án xití veñúhu càhnu sá ìo cùnnuu, te ní xáhaⁿ-gá xii-dé:

—Ní xiní-n ná ní ndúha-n-va. Te vitna vá cáda-gá-n nãndi sá cuéhé sá dúhá, chi núu ná cáda-ni-n ña, te quixi ingá cuéhé, te vihi-gá ndoho-n —càchí-gá xáhaⁿ-gá xii-dé.

¹⁵ Ducaⁿ te ní xica tée ní cuhú-án cuàngúñaha-dè xii cue tée isráel sá Jèsús ní quide tátna ñaha-gá xii-dé.

¹⁶ Núu sátá ní níhi cue tée isráel tnúhu, te ní cuu úhú iní-güedé Jèsús. Te ní cuíní-güedé cahni ñaha-güedé xii-gá cuendá sá dúcáⁿ ní quide tátna-gá nduu ndetatú-güedé.

¹⁷ Te ní xáhaⁿ Jèsús xii-güedé:

—Tátá-í Dútú Ndióxi quidé chiúⁿ-ni-gá núu xián quidé chiúⁿ-í tnàhá-í —càchí-gá xáhaⁿ-gá xii-güedé.

¹⁸ Te ní cudééⁿ-güedé sá ñá ní cànehe í-gá nduu ndetatú-güedé, te ní cuíní-güedé cahni ñaha-güedé, te uuⁿ-gá ní cuíní-güedé cahni ñaha-güedé xii-gá sá ní cachí-gá sá Tátá-gá cúú Dútú Ndióxi, chi ní sani iní-güedé sá

cuíní-gá nútnahá-gá Yá Ndióxi núu xián ío ní cudééⁿ-güedé.

Jèsús Déhe Yá Ndióxi táxi tnùní-gá

¹⁹ Te ní xáhaⁿ túcu Jèsús xii-güedé:

—Na càchí tnúhu ndáá-í xii-ndo sá yùhú chi ní ìⁿ sá ñá ndacú-í cada mee-í núu ñá túú mée Tátá-í dánèhé ñáhá-gá xii-í nàcuáa cada-í, chi nchaa sá quidé Tátá-í quidé-í tnàhá-í.

²⁰ Te Tátá-í ío cùu iní ñáhá-gá xii-í núu dānehé ñáhá-gá nchaa nàcuáa quide-gá. Te vitna ndècu vai-gá chiúⁿ tahu-gá cada-í, chiúⁿ sá vátá quíní-gá-ndó càda-í nàcuáa cuñúhu vihi-ndo.

²¹ Chi Tátá-í dandòto-gá ñáiyu ní xihí. Te yùhú cada-í te nduu táhú nchaa ñáiyu càchí iní-í cundecu ndihi ñáhá-yu xii-í ní caa ní quíhíⁿ.

²² Te na sáa nduu te ñá díú Tátá-í cada ndáá-gá cuéchi ñáiyu, chi ní cachí-gá sá yùhú cada ndáá-í

²³ cuendá nchaa ñáiyu canehé-yu sá yíñúhu núú-í dàtná nèhé-yu sá yíñúhu núú Tátá-í Yáa ní tendaha ñaha xii-í véxi-í ñuyú-á. Te nchaa ñáiyu ñá túú nèhe sá yíñúhu núú yùhú, te ní núú Tátá-í ñá túú nèhé-yu sá yíñúhu.

²⁴ Te na càchí tnúhu ndáá-í xii-ndo sá nchaa ñáiyu na cùndedóho tnúhu na càháⁿ-í, te núu na quíndáa iní-yu Dútú Ndióxi Yáa ní tendaha ñaha xii-í véxi-í ñuyú-a ña, te vá cuíta nihnú-yu chi nduu táhú-yu cundecú-yu ndihi-gá ní caa ní quíhíⁿ.

²⁵ Te vitna na càchí tnúhu ndáá-í xii-ndo sá nchaa ñáiyu ndècu ichi cuéhé ichi duha cùu-yu dàtná ìⁿ ñáiyu ní xihí, te vitna ní sáa nduu cùndedóho-yu tnúhu càháⁿ yùhú Déhe Dútú Ndióxi, te nchaa ñáiyu na quíndáa iní-xi, te nanihí tàhú-yu.

²⁶ Te dàtná quidé mée Tátá-í dácacu nihnu-gá ñáiyu, ducaⁿ ní cachí-gá cada-í dácacu nihnu-í-yu.

²⁷ Te ní cachí tucu-gá sá sáa ìⁿ nduu, te cada ndáá-í cuéchi nchaa ñáiyu ñá túú quide ndáá, chi yùhú táxi tnùní-í, te cùu-í ñaní tnáhá-ndó nchaa-ndo.

²⁸ Te ní vá cuñúhu-ndo tnúhu càháⁿ-í, chi sáa nduu te nchaa ñáiyu ní xihí tecú dóho-yu tnúhu càháⁿ-í.

²⁹ Te ndoto nchaa ñáiyu ní quide váha cundecu ndihi-í-yu ní caa ní quíhíⁿ, te ndoto tnáhá nchaa ñáiyu ní quide cuéhé ní quide duha, te ñáiyu-án quíhíⁿ-yu núú ùhú núú ndàhú.

Yá Ndióxi chindée tnúhu-gá Jèsús

³⁰ Te yùhú, chi ní ìⁿ sá ñá ndacú-í cada mee-í núu ñá díú mée Yá Ndióxi táuchiuⁿ-gá nàcuáa cada-í. Te quide ndáá-í cuéchi ñáiyu nàcuáa táxi tnùní-gá cada-í, te yùhú ñá

túu quide-í sá cúú íní mée-í chi Tàt-à ní táúchíúⁿ-gá nàcuáa cada-í.

³¹ Te núu na càháⁿ-í sá mée-í táxi tñuní-í, te vâ quindáá íní-ndó.

³² Chi Yá Ndióxi chindèe tñuhu ñaha-gã xii-í, te yúhú xini-í sá tñuhu càháⁿ-gá cuendá-í cúú-xí ñⁿ sá ndáá.

³³ Te nchòhó ní téchíúⁿ-ndó cuè téé ní sáháⁿ ní ndúcú tñuhu-güedé núú té Juáá núu ná tñuhu càháⁿ-dé cuendá-í, te tée-ãⁿ ní càháⁿ ndáá-dé nàcuáa nduu cuendá-í.

³⁴ Dico yúhú, chi ñá túú xini ñuhu-í ñⁿ ñáyiu ñuyíú-a chindèe tñuhu ñáh-ya xii-í, dico té Juáá ní càháⁿ váha-dé cuendá-í, te xiãⁿ càchí tñuhu tucu-í cuendá quindáá íní-ndó, te naníhí tãhú-ndó.

³⁵ Te dàtná cuini-ndó cùu ñⁿ iti ndéñuhú te dàyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudíí íní-ndó tñuhu ní càháⁿ-dé.

³⁶ Te váha-ni ní càháⁿ té Juáá, dico yúhú chi ndècu nchaa sá tá quide-í véxi nàcuáa ní táuchíúⁿ Yá Ndióxi cada-í, te nchaa xiãⁿ cúú-xí ñⁿ sá cútñuní íní-ndó sá mee Yá Ndióxi ní tendaha ñaha-gã xii-í véxi-í ñuyíú-a.

³⁷ Te ñu-ni-gá chindèe tñuhu ñaha-gã xii-í, dicó-ní sá mée-ndó ñá túú cuini-ndó càda cuendá-ndó tñuhu càháⁿ-gá, te ni ñá túú xini-ndó nàcuáa càa-gá.

³⁸ Te ñá túú quèe íní nchòhó tñuhu càháⁿ-gá, chi ñá túú sãndáá íní ñáhá-ndó xii yúhú Déhe-gá.

³⁹ Te dàcuaha vihi-ndo tutú ndèe tñuhu-gá, chi sãni íní-ndó sá xiãⁿ-ni dacuaha-ndo te naníhí tãhú-ndó. Te váha-ni quide-ndo, chi ñu tutú-ãⁿ càháⁿ-xi cuendá-í.

⁴⁰ Te nchòhó ñá túú cuini-ndó quindáá íní ñáhá-ndó xii-í cuendá naníhí tãhú-ndó.

⁴¹ Te yúhú, ñá túú xini ñuhu-í sá càdá càhnu ñaha-ndo xii-í.

⁴² Dico sa xini-í nàcuáa sãni íní-ndó chi ñá túú cùu íní-ndó Yá Ndióxi.

⁴³ Te yúhú véxi-í ñuyíú-a chi Tàt-à ní tendaha ñaha-gá, te nchòhó ñá túú cuini-ndó tñi-ndó tñuhu càháⁿ-í, dico núu quixi ñⁿ téé càháⁿ cuendá mée-xí, chi quindáá íní-ndó.

⁴⁴ Te ná váha nchòhó ná tñi-ndó tñuhu càháⁿ-í, te xio xio-ni quide cahnu tñaha-ndo, te ñá túú quide cuendá-ndó sá tñuhu váha càháⁿ Yá Ndióxi cuu xii-ndo.

⁴⁵ Te vâ cáni íní-ndó sá yúhú ndacáⁿ cuéchi-í núú Tàt-à nàcuáa quide-ndo, chi ndíi Moisés ní chídó tñuní ndíi núú tütú Yá Ndióxi nàcuáa quide-ndo sá ñá túú quide váha-ndo, te mee-ndo sãni íní-ndó sá naníhí tãhú-ndó cuendá tñuhu ní càháⁿ ndíi.

⁴⁶ Chi núu nchòhó sãndáá ndisa íní-ndó tñuhu ní càháⁿ ndíi Moisés ñá, te ducaⁿ te quindáá íní-ndó yúhú ní cùu, chi ndíi-ãⁿ ní chídó tñuní ndíi nàcuáa cada-í ñuyíú-a vitna.

⁴⁷ Te núu ñá túú sãndáá íní-ndó tñuhu ní chídó tñuní ndíi, te ñu-ni ducaⁿ càda ñaha-ndo xii-í vâ quindáá íní-ndó tñuhu càháⁿ-í —càchí-gá xáhaⁿ-gã xii-güedé.

6

Jèsús dácàxi-gá úhúⁿ mĩl ñáyiu

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñí cuu, te ní quee Jèsús cuáháⁿ-gá ingá xio yuhu làgúná Galiléá, àdi Tiberiás chi úú ñu-xi.

² Te ío cuéhé ñáyiu nchicúⁿ ñáhá xii-gá cuáháⁿ cuendá sá ñí xini-yu nchaa sá vâ yòo tñahí ndàcu cada ní quide-gá, chi ní quide tátna-gá nchaa ñáyiu cùhú.

³ Te ní sáá Jèsús ndíhi cue téé xica cuu ndíhi-gá ñⁿ núú tìndúú, te xiáⁿ ñí ngóo-gá ndíhi-güedé.

⁴ Te ta cùyatni coo vico pascuá, vico quide ñáyiu isràél.

⁵ Te ní xini-gá sá ío vai ñáyiu nchicúⁿ ñáhá xii-gá cuáháⁿ, te ní xáhaⁿ-gã xii té Lipé:

—¿Ndèe quihíⁿ-ó quinguaaⁿ-o sá cáxi nchaa ñáyiu-a? —càchí-gá xáhaⁿ-gã xii-dé.

⁶ Te ducaⁿ ní xáhaⁿ-gã xii-dé cuendá sá cuini-gá quini-gá nása cunduu tñuhu càháⁿ-dé, dico mee-gá sa xini-gá nàcuáa cada-gá.

⁷ Te ní xáhaⁿ té Lipé xii-gá:

—Te cuéi úú cièndú díhúⁿ denariú ná dãndoñuhu-o cuaaⁿ-o paá, te ni vâ tñáhá caxí-yu luha luha —càchí-dé xáhaⁿ-dè xii-gá.

⁸ Te té Ndríxi ingá téé xica cuu ndíhi-gá, ñani té Ximú, àdi Pelú chi úú ñu-dé, ní xáhaⁿ-dè:

⁹ —Iha ndècu ñⁿ té líhli nèhe-dé úhúⁿ pãá cebadà te úú chácá, dico ndèe tñahá xéhé, te cuéhé vihi ñáyiu —càchí-dé xáhaⁿ-dè xii-gá.

¹⁰ Te ní xáhaⁿ Jèsús xii-güedé:

—Chí cùñaha ná ngóo-yu nchaa-yu —càchí-gá xáhaⁿ-gã.

Te ñáyiu-ãⁿ ñí ngóo-yu, te càa vihi ité núú ñí ngóo-yu-ãⁿ, te xinu dàtná úhúⁿ mĩl mee-ni cuè téé, te ñⁿ ñáyiu díhí ndíhi landú.

¹¹ Te ní queheⁿ Jèsús pãá, te ní ndacáⁿ tãhú-gá núú Yá Ndióxi, te ní sãñaha-gã pãá-ãⁿ xii cue téé xica cuu ndíhi-gá, te cue téé-ãⁿ ñí dácãhñu-güedé ní xexi nchaa ñáyiu xixúcu-ãⁿ. Te ñu-ni ducaⁿ ñí quide-gá chácá, te ní dácãhñu tucu-güedé-di ní xexi ñáyiu ní ndahá xití-yu.

¹² Te òrè ní túhú cóhó-yu, te ní xáhaⁿ Jèsús xii cue téé xica cuu ndíhi-gá sá ná nàqueheⁿ-güedé nchaa sá ñí quendóo cuendá sá vâ quihíⁿ-xi núú míhí.

¹³ Te cue téé-ãⁿ ñí naqueheⁿ-güedé nchaa sá ñí quendóo, te ní chítú ùxúú tídihi núú úhúⁿ-ni pãá cebadà.

¹⁴ Te sá ñí xini-yu ní nadacáyá-gá sá ñí xexí-yu, xiãⁿ ñí ngúita-yu ní xitñahá-yu:

—Ndáá sá t̄e-a sa ió cuëndú sá quixí-d̄é ñuyú-a cáháⁿ-dé tnúhu Yá Ndióxi —cächí-yu xitnàhá-yu.

15 Te ní cutnùnì inì Jèsús sá cáda yicá-yu candeca ñàhá-yu xii-gá quíhíⁿ cuendá cundecu-gá quindaha ñàhá-gá xii-yu ni cùu, núu xiáⁿ ní xica tucu-gá cuáháⁿ-gá xití yucu mee ðii chícuú-gá.

Jèsús xicá-gá núu ndute

(Mt. 14:22-27; Mr. 6:45-52)

16 Te òrè ní cuu ndiquíⁿ, te cuáháⁿ cue tée xica cuu ndihi-gá yuhu làgúná.

17 Te ní quée-güedé bàrcú cuáháⁿ-güedé ñúu Capernaúm cáá ndàa ingá xio yuhu làgúná, te sa ní cuu ndiquíⁿ, te ñá túú Jèsús quéxio quée-gá bàrcú ñúhú-güedé-á.

18 Te ní nguíta-xi quène táchí ñihi, te ñihi dàcandau ndéé tnàhá ndüte làgúná-á.

19 Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núu ndúté, te ní yùhú-güedé.

20 Te ní xáhaⁿ Jèsús xii-güedé:

—Yúhú véxi-í, vá yùhú-ndó —cächí-gá xáhaⁿ-gá xii-güedé.

21 Te ío ní cudíⁿ iní-güedé sá ní quexio-gá cuánguee-gá bàrcú, te òrè-ni ní quexio-güedé ndihi-gá ndéé ingá xio yuhu làgúná núu cuáháⁿ-güedé.

Ñyiu nànducu ñaha xii Jèsús

22 Te ingá nduu-áⁿ xindecu-ni nchaa ñáyiu ní quendóo yuhu làgúná. Te ní quide cuendá-yu sá ñⁿ ði-ná bàrcú nùtní-áⁿ ní cùu ñá túú-gá, chí cue tée xica cuu ndihi Jèsús ní quée-güedé bàrcú-áⁿ cuáháⁿ-güedé. Te ní ñihí-yu tnúhu sá ñà túú ní quée tnàhá Jèsús.

23 Te ðiu-ni nduu-áⁿ ní quée ñⁿ úú bàrcú ñúu Tiberiás ní sáa-xi yatni núu ní xexí-yu pàá sá ní ndacáⁿ táhú Jèsús núu Yá Ndióxi.

24 Te ní xiní-yu sá ñà túú Jèsús ndihi cue tée xica cuu ndihi-gá, núu ní quée-yu bàrcú-áⁿ cuáháⁿ-yu ñúu Capernaúm cuánúndúcú ñàhá-yu xii-gá.

Jèsús cùu-gá dàtná ñⁿ sá nchító-ó

25 Te ní sáa-yu ingá xio yuhu làgúná, xiáⁿ ní nanihí-yu Jèsús, te ní xáhaⁿ-yu xii-gá:

—Mèstrú, ¿ná òrè ní sáa-n ñha? —cachí-yu xáhaⁿ-yu xii-gá.

26 Te ní xáhaⁿ Jèsús:

—Na cächí tnúhu ndáá-í sá nchòhó nándücu ñaha-ndo xii-í cuendá-ni sá ñⁿ xexi-ndo ní ndahá xití-ndó, dico ñá díú cuendá sá ñⁿ quide-í sá vá yóo tnàhí ndàcu cada nanducu ñaha-ndo.

27 Te vá cáda cuendá-ndó sá mée-ní sá caxí-ndó càda chiuⁿ-ndo chí xiáⁿ vá cùdii-xi. Chí ío-gá xiní ñúhu-xi cada cuendá-ndó tnúhu Yá Ndióxi te tní-ndo, te nanihí táhú-ndó. Te tnúhu-áⁿ cachí tnúhu yùhú Tée cùu ñaní tnàhá-ndó nchàa-ndo, te xiáⁿ

candeca-xi iní-ndó ní caa ní quíhíⁿ, chí mee Dùtú Ndióxi ní cachi-gá sá dúcáⁿ càda-í —cächí-gá xáhaⁿ-gá xii-yu.

28 Te ní xáhaⁿ-yu:

—¿Nása cada-ndí cuendá ngúmu ichi-ndí nàcuáa cuini Yá Ndióxi cunduu-i? —cächí-yu xáhaⁿ-yu xii-gá.

29 Te ní xáhaⁿ Jèsús xii-yu:

—Yá Ndióxi cuini-gá sá quindáá iní ñàhá-ndó xii yùhú, tée ní tendaha-gá véxi ñuyú-a —cächí-gá xáhaⁿ-gá xii-yu.

30 Te ní xáhaⁿ tucú-yu xii-gá:

—¿Ná cùú sá vá yóo tnàhí ndàcu cada, cada-n cundehe-ndí cuendá quindáá iní ñàhá-ndí xii-n-i? ¿Ádi nágá cùú sá cáda-n cuendá cutnùnì iní-ndí sá ndáa càháⁿ-n-í?

31 Chí cue ñaní tnàhá-ó ní xindecu ndéé sanaha ní xexi-yu pàá nání mànáá xití yucu dàtná yódó tnùnì núu tütú Yá Ndióxi núu cächí-xi: “Yá Ndióxi ní sáñaha-gá sá ní xexí-yu, te ní cuuⁿ túu-xi andiu”, duha cächí-xi núu tütú-gá —cächí-yu xáhaⁿ-yu xii-gá.

32 Te ní xáhaⁿ Jèsús:

—Na cächí tnúhu ndáá-í xii-ndo sá ñà díú ndii Moisés ní sáñaha ndii pàá ní cuuⁿ andiu ní xexi-yu, chí mee Tàtá-í ní sáñaha-gá sá ní xexí-yu. Te sá táxi-gá vitna cùu-xi

33 dàtná pàá véxi cuuⁿ andiu càndeca-xi iní-ndó ní caa ní quíhíⁿ —cächí-gá xáhaⁿ-gá xii-yu.

34 Te ní xáhaⁿ-yu xii-gá:

—Tàtá, mee-ni pàá-áⁿ taxi-n caxi-ndí —cächí-yu xáhaⁿ-yu xii-gá.

35 Te ní xáhaⁿ Jèsús:

—Yúhú cùu-í dàtná ñⁿ sá xexí-ndó càndeca-xi iní-ndó. Te duha nduu tnúhu càháⁿ-í, chí nchaa ñáyiu na quindáá iní ñàhá xii-í, te vá ndòhó-gá-yu docó te vá ndòhó-gá-yu ndute.

36 Dicó-ni sá nchòhó ñá túú sàndáá iní ñàhá-ndó cuéi xiní ñàhá-ndó xii-í.

37 Te nchaa ñáyiu na cächí Tàtá-í nduu cuendá-í nasaá-yu núu-í, te ñáyiu-áⁿ vá dáquèe tìhú-í-yu.

38 Te ñá díú yùhú sá véxi cuuⁿ-í andiu te quide-í nchaa sá cùú iní mée-í, chí véxi cuuⁿ-í sá cáda-í nchaa nàcuáa ní táuchíuⁿ mée Tàtá-í Dùtú Ndióxi Yáa ní tendaha ñàhá xii-í véxi-í ñuyú-a.

39 Te cuini-gá sá ncháá ñáyiu ní cachí-gá nduu cuendá-í vá ðàñá-í-yu cuíta nihnú-yu, te na sáa nduu te ðiu-ni-í dandòto-í-yu.

40 Chí ducaⁿ ní cachí Dùtú Ndióxi cunduu sá ncháá ñáyiu na tníi tnúhu càháⁿ-í, te quindáá ndisa iní ñàhá-yu xii yùhú Déhe-gá, te nduu táhú-yu cundecu-yu ndihi Yá Ndióxi ní caa ní quíhíⁿ, te yùhú dandòto-í-yu na sáa nduu —cächí-gá xáhaⁿ-gá xii-yu.

41 Te ñá ní tnàhá iní ñáyíu isràél tnúhu ní cáháⁿ Jèsús núu ní nguíta-yu ní cáháⁿ cuèhé-yu cuèndá-gá cuèndá sá ní xáhaⁿ-gã sá mée-gã cúú-gã dàtná sá xéxí-ó véxi cuuⁿ andíu.

42 Te ní xítñàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tātá-dé, te xini-ó náná-dé, ñá cáhí-tu tée-a sá andíu véxi cuuⁿ-dé! —cáhí-yu xítñàhá-yu.

43 Te ní xáhaⁿ Jèsús xii-yu:

—Vá cáháⁿ cuèhé-gá-ndó cuèndá-í, chí dáñá.

44 Vá yõ quindáá iní ñáhá xii yúhú núu ñá túú mée Tàtá-í táxí cuèndá ñáhá-gã xii-yu. Te ñá-gá ní tendaha ñàha-gã xii-í véxi-í, te yúhú dandòto-í-yu na sáa nduu.

45 Te núú tútú cue tée ní xóo cáháⁿ tnúhu Yá Ndióxi ndéé sanaha cáhí-xi: “Yá Ndióxi danéhé ñáhá-gã xii-yu tnúhu-gã”, duha cáhí-xi. Te nchaa ñáyíu na cùndedóho nchaa tnúhu cáháⁿ Dútú Ndióxi, te cutúha-yu nàcuáa cáháⁿ-gã, te ñáyíu-áⁿ quindáá iní ñáhá-yu xii yúhú.

46 Te vá yõ xini ñáhá xii Dútú Ndióxi chí ñá-ni yúhú xini-í-gã, chí núú ndécú-gã ní quee-í véxi cuuⁿ-í —cáhí-gã xáhaⁿ-gã xii-yu.

47 Te xáhaⁿ tucu-gá:

—Na cáhí tnúhu ndáá-í xii-ndo sã nchaa ñáyíu na quindáá iní ñáhá xii-í, te naníhí tãhú-yu.

48 Te yúhú cúú-í dàtná ñá sá xéxí-ndó càndeca-xi iní-ndó, te ducaⁿ sãtnahá-xi cúú-í chí yúhú cada-í te nduu tãhú-ndó cùndecu-ndo ndíhi Yá Ndióxi ní caa ní quíhíⁿ.

49 Te cue ñaní tnáhá-ó ní xindecu ndéé sanaha ní xexi-yu pãá ñaní mánáá xití yucu, dico ní sáa nduu te dacuítí ní xihí-yu.

50-51 Te yúhú cáháⁿ-í cuèndá mée-í, chí véxi cuuⁿ-í andíu. Te cúu-í dàtná ñá sá nchító-ndó, te nchaa ñáyíu na càxi te candeca-xi iní-yu ní caa ní quíhíⁿ te vá cuíta nihnu-gá-yu. Te sá táxi-í xii-ndo xiãⁿ cúú-xi yiqui cuñú-í, te cúu-xi cuèndá nchaa ñáyíu níhí ñuyúú cuèndá nduu tãhú-yu cundecú-yu ndíhi Yá Ndióxi ní caa ní quíhíⁿ —cáhí-gã xáhaⁿ-gã xii-yu.

52 Te ní nguíta ñáyíu isràél xítñàhá-yu:

—¿Náa cada-tu tée-a núu cáhí-tu-dé sá yiqui cuñú-dé taxi-dé caxi-o-í? —cáhí-yu xítñàhá-yu.

53 Te ní xáhaⁿ Jèsús:

—Na cáhí tnúhu ndáá-í xii-ndo sã núu na cada iní-ndó sá dàtná sá cáxi-ndó yiqui cuñú yúhú Tée cúu ñaní tnáhá-ndó nchaa-ndo, te cada tucu iní-ndó sá dàtná sá cóhó-ndó níhí-í ñá, te xiãⁿ queé-xi sá quindáá iní ñáhá-ndó ní yuhu ní iní-ndó te naníhí tãhú-ndó, te núu ñáhá te cuíta nihnu-ndo.

54 Nchaa ñáyíu na cada iní-xi sá dàtná sá cáxi-yu yiqui cuñú-í te cohó-yu níhí-í, ñáyíu-áⁿ naníhí tãhú-yu te yúhú dandòto-í-yu na sáa nduu.

55 Chí yiqui cuñú-í ndíhi níhí-í cúú-xi mée-í.

56 Te nchaa ñáyíu na cada iní-xi sá dàtná sá cáxi-yu yiqui cuñú-í te cohó-yu níhí-í, te ñáyíu-áⁿ ñá-ná cuu-í ndíhi-yu chí cundecu ndíhi-í-yu.

57 Te yúhú nchító-í chí ducaⁿ nchító Tàtá-í Yáá ní tendaha ñàha xii-í véxi-í ñuyúú-a. Te ñá-ni ducaⁿ nchaa ñáyíu na quindáá iní ñáhá xii-í te cundecu ndíhi-í-yu ní caa ní quíhíⁿ.

58 Te yúhú cúú-í dàtná ñá sá nchító-ndó véxi cuuⁿ andíu, dico ñá díú pãá sá nání mánáá ní xexi cue ñaní tnáhá-ó ní xindecu ndéé sanaha, chí ní xexi-yu pãá te dacuéi ní xihí-yu. Te nchaa ñáyíu na quindáá iní ñáhá xii yúhú Yáá véxi cuuⁿ andíu, te cundecu ndíhi-í-yu ní caa ní quíhíⁿ —cáhí-gã xáhaⁿ-gã xii-yu.

59 Nchaa tnúhu-a ní cáháⁿ-gã xití veñúhu ñáyíu ñuú Capernaúm.

Jèsús cáhí tnúhu-gã nàcuáa naníhí tãhú-ó

60 Te sá dúcáⁿ ní cáháⁿ-gã núu vai ñáyíu nchícúⁿ ñáhá xii-gã ní xítñàhá-yu:

—Vá tñí cuítí-o tnúhu cáháⁿ-dé chí ñá díú tnúhu sá cúú váha iní-ó cáháⁿ-dé —cáhí-yu xítñàhá-yu.

61 Te ní cutnùni iní Jèsús sá ñá túú cáháⁿ váha-yu cuèndá tnúhu ní cáháⁿ-gã, núu ní xáhaⁿ-gã xii-yu:

—¿Náa ñá tnáhá iní-ndó nàcuáa cáháⁿ-í-a?

62 Te uuⁿ-gã cada nchòhó núu quini-ndó yúhú Tée cúu ñaní tnáhá-ndó nchaa-ndo ndaa-í núu ní xindecu-í díhna.

63 Te espíritú ndécú ndíhi yiqui cuñú-ó, xiãⁿ ndécá ñàha-xi xii-o, te núu ñá túú xiãⁿ, te yiqui cuñú-ó ñá túú nandíhi-xi. Dico núu nchaa tnúhu cáháⁿ-í-a quee-xi iní-ndó ñá, te quini-ndó ná xéhé candeca ñàha-xi xii-ndo núu cuaháⁿ núú véxi.

64 Te dava nchòhó chí ñá túú sàndáá iní-ndó —cáhí-gã xáhaⁿ-gã xii-yu.

Te ducaⁿ ní xáhaⁿ-gã chí sa ñàha-gã nándi cúu ñáyíu vá quindáá iní ñáhá xii-gã. Te ducaⁿ sã ñàha-gã ndèdacáa tée cuáha cuèndá ñáhá xii-gã núu cuè tée cúu úhú iní ñáhá.

65 Te ní xáhaⁿ tucu Jèsús xii-yu:

—Te duha cáháⁿ-í chí sa ní cáhí tnúhu-í xii-ndo sã vá yõ ñá cuíni tñí tnúhu-í te núu ñá túú Tàtá-í Dútú Ndióxi sánú ichi ñàha-gã xii-yu —cáhí-gã xáhaⁿ-gã xii-yu.

66 Te òré-áⁿ ò vai ñáyíu nchícúⁿ ñáhá xii-gã ní xócòo-yu ñá ní xica cuu-gá-yu ndíhi-gã.

67 Te xiãⁿ ní xáhaⁿ Jèsús xii ndí ùxúú cue tée xica cuu ndíhi-gã:

—¿Cuini-ndó dándóo ñaha-ndo tnàhá-ndó-ãñ? —càchí-gá xáhaⁿ-gá xii-güedé.

⁶⁸ Te ní xáhaⁿ tẽ Xímú, àdi Pelú chi úú diu-dé:

—Métrú, ñá túú-gã ndèe quíhíⁿ-ndí, chi nchúhú náhá-ndí sá tnúhu mee-n cùu-xi sá váha candeca-xi iní-ndí ní caa ni quíhíⁿ.

⁶⁹ Chi nchúhú sa ní sándáá iní ñáhá-ndí xii-n chi náha-ndí sá yóhó cúú-n Cristú Déhe Dútú Ndióxi yaá ndécú àndiu —cachí-dé xáhaⁿ-dẽ xii-gá.

⁷⁰ Te ní xáhaⁿ Jèsús:

—Nàha-ndo sá yùhú ní cáháⁿ ñàhá-í xii ndí ùxúú-ndó xica cuu ndihi ñaha-í xii-ndo, dico ñⁿ-ndo quíhu ñaha yùcu ñávàha xii-ndo —càchí-gá xáhaⁿ-gá xii-güedé.

⁷¹ Duha ní cáháⁿ Jèsús cuendá té Jùdás déhe té Xímú Iscarioté ñⁿ tée ñtñahá núú ùxí ñⁿ cue tée xica cuu ndihi-gá, chi sa náha-gá sá tẽ-ã cuáha cuendá ñáhá-dẽ xii-gá ñⁿ nduu núú cuè tée cùu úhú iní ñáhá.

7

Cue ñani Jèsús ñá túú sándáá iní-güedé nàcuáa ndúu tnúhu càháⁿ-gá

¹ Te sáta dúcáⁿ ní cuu, te ní xica cuu Jèsús distritú Galiléa, te ñá ní sáháⁿ-gá distritú Jüdeá, chi yacáⁿ cuini cue tée israhél cahni ñaha-güedé xii-gá ní cùu.

² Te ní cuyatni nduu cáda-yu vico, vico sá dánani-yu Vico Vehe Tnuvixiⁿ.

³ Te ní xáhaⁿ cuè ñani Jèsús xii-gá:

—Váha-gá quíhíⁿ-n distritú Jüdeá te vá cündecu-n iha, chi yacáⁿ cada-n ncháa sá quidé-n iha cuendá quini nchaa ñáyiú cündihi ñaha xii-n ndecu yacáⁿ.

⁴ Chi núu cuini-ó quini nchaa ñáyiú ná chiuⁿ cada-o te vá cáda dáyuhu-o. Te yóhó cuéhé núú sá quidé-n, te cada-n na quini nchaa ñáyiú —càchí-güedé xáhaⁿ-güedé xii-gá.

⁵ Ducaⁿ ní cáháⁿ cue ñani-gá, chi ní mée-güedé ñá túú sándáá iní-güedé nàcuáa ndúu tnúhu càháⁿ-gá.

⁶ Te ní xáhaⁿ Jèsús xii-güedé:

—Vátá tnàhá-gá òrè quíhíⁿ-í dico nchòhó ndédani càa òrè cuu quíhíⁿ-ndó.

⁷ Chi nchaa ñáyiú ñihu ichi cuéhé ichi duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuendá sá càháⁿ-í sá quidé-yu nchaa sá cuéhé sá dúhá.

⁸ Te chí cuáháⁿ nchòhó vico chi yúhú vá quíhíⁿ-ni-í chi vátá tnàhá-gá òrè quíhíⁿ-í —càchí-gá xáhaⁿ-gá xii-güedé.

⁹ Te ducaⁿ ní xáhaⁿ-gã te ní ndóo-gá Galiléa, te cue tẽ-ã cuáháⁿ-güedé.

Jèsús ndécú-gã ñⁿ vico chiñuhú-yu Yá Ndióxi

¹⁰ Dico sáta cuáháⁿ cue ñani-gá, te ní xica-gá cuáháⁿ-gã tnàhá-gá dicó-ni sá dáyuhu cuáháⁿ-gã.

¹¹ Te ñáyiú israhél ñáyiú xíndecu vico nánducú-yu Jèsús, te xitnàhá-yu:

—¿Ndèe ndécú Jèsús? —càchí-yu xitnàhá-yu.

¹² Te nchaa ñáyiú xíndecu vico xíndatnúhu-yu cuendá-gá. Te davá-yu xitnàhá-yu sá ño váha iní-gá, te davá-yu xitnàhá-yu sá ña diú tẽe váha cùu-gá, chi dándahú-gá ñáyiú.

¹³ Dico mee-ni xicáháⁿ náhi-yu, chi xiyùhú-yu cue tée cùnuu núu-yu.

¹⁴ Te ta ngúhuⁿ dava vico, te cuánguihu Jèsús veñúhu càhnu sá ño cùnuu, te ní ngúíta-gá dácuaa-gá ñáyiú.

¹⁵ Te ñáyiú israhél ní cuñúhu vihí-yu sá ño váha càháⁿ-gá, te ní xitnàhá-yu:

—¿Ná cuendá ño váha ñuhu-tu díquí tẽe-a tnúhu càháⁿ-dẽ te ñá túú ní dácuaa-dẽ-í? —càchí-yu xitnàhá-yu.

¹⁶ Te ní xáhaⁿ Jèsús:

—Ñá diú cuendá mée-í cúu-xí sá dánèhé ñàhá-í xii-ndo, chi cuendá Dútú Ndióxi Yáa ní tendaha ñaha xii-í véxi-í cúu-xí.

¹⁷ Te núu ño dava-ndo ñi yuhu ni iní-ndó cuini-ndó càda-ndo nàcuáa cuini Yá Ndióxi cunduu, te cutnúni ndáá iní-ndó sá tnúhu dácuaa ñaha-í xii-ndo cùu-xi cuendá mée Dútú Ndióxi, te ñá diú cuendá mée-í cúu-xí.

¹⁸ Te tée cuini sá cáda càhnu ñaha ñáyiú xii-dé, tẽe-ã càháⁿ-dẽ nàcuáa véxi iní mée-dẽ. Dico yúhú cuini-í sá cáda càhnu-yu Dútú Ndióxi Yáa ní tendaha ñaha xii-í véxi-í ñuyú-á, te càháⁿ ndáá-í te ñá túú dácuaandehnde-í.

¹⁹ Te ndíi Moisés ní taxi ndíi tnúhu sá sánú ichi ñaha xii-ndo nàcuáa cundecu-ndo, te ni dùcaⁿ ñá túú sándáá iní-ndó nàcuáa càháⁿ tnúhu-áⁿ. ¿Te ná cuendá cuini-ndó càhni ñaha-ndo xii-í? —càchí-gá xáhaⁿ-gá xii-yu.

²⁰ Te ní xáháⁿ-yu xii-gá:

—Yucu ñávàha dácoto ñaha xii-ó, chi vá yõo ñⁿ cuini cahni ñaha xii-n —cachí-yu xáháⁿ-yu xii-gá.

²¹ Te ní xáhaⁿ Jèsús xii-yu:

—Sá ñi quide-í ñⁿ sá vá yõo tnàhi ndàcu cada nduu cuu-xi nduu ndetatú-ó, xíáⁿ io ní cuñúhu ñaha-ndo xii-í.

²² Te ndíi Moisés ní cachí ndíi sá cuáha-yu sèñá ñⁿ cue landú tée, dico ñá diú mée ndíi ní càhu iní ndíi chí cuáha tnàhi ní xóo cada cue ñani tnàhá-ó dàvã-ãⁿ, núu xíáⁿ nchòhó sáha-ndo sèñá ñⁿ landú tée cuèi cùu-xi nduu ndetatú-ó.

²³ Te ducaⁿ quide-ndo cuendá sá ña túú ná cumáni-ndó núu tnúhu sá sánú ichi ñaha xii-ndo ní dándóo ndíi Moisés. ¿Te ná cuendá cúdeéⁿ-ndó núu-í sá ñi quide tátña-í tée cùhú nduu ndetatú-ó-í?

24 Te váha váha cada cuendá-ndó, te vá cuendá-ni cáháⁿ-ndó sá yúhú ndècuéchi-í chi ñá túú xini-ndó —càchí-gá xáhaⁿ-gá xii-yu.

Jesús xáhaⁿ-gá xii-yu núú véxi-gá

25 Te dava ñáyiú ñuú Jerusálén ni nguíta-yu xitnàhá-yu:

—¿Náa ñá díú tée-áⁿ nánducu-güedé cahni-güedé?

26 núú náí-dé nútñi núú chítú núú tàcá-áⁿ cáháⁿ-dé, te vá yóo cùyi cùñaha xii-dé ñⁿ tnúhu. Cudana te cue tée cùchiuⁿ sandáá iní-güedé sá díú-dé cùú-dé Cristú Yaá ní tendaha Yá Ndióxi véxi ñuyúú-a.

27 Dico nchoo xini-ó ndèé ichi véxi tée-áⁿ, dico Cristú ná quixi-gá chi vá yóo ñⁿ quini ndèé ichi quixi Yaá-áⁿ —càchí-yu xitnàhá-yu.

28 Te yihí Jesús xití veñúhu cahnu sá ño cùnuu danehe-gá ñáyiú, te ní tecú dóho-gá tnúhu cáháⁿ-yu. Te níhi ní cáháⁿ-gá, te xáhaⁿ-gá xii-yu:

—¿Ná quini-tu nchòhó ndèé ichi véxi yúhú! Yúhú véxi-í dico ñá díú sá cùú ñni mée-í, chi Yá Ndióxi Yaá quidé nchàa-ndi túhú sá váha ní tendaha ñaha-gá xii-í véxi-í, te nchòhó ñá túú xini-ndó-gá.

29 Te yúhú xini-í-gá chi núú ndécú-gá ní quee-í véxi-í, te díu mee-gá ní tendaha ñaha-gá véxi-í —càchí-gá xáhaⁿ-gá xii-yu.

30 Te sá dúcáⁿ ní cáháⁿ-gá, núú cuini-güedé tñi ñaha-güedé xii-gá quihíⁿ-gá vecaá ní cùu, dico vá yóo ñⁿ ni cùyi tñi ñaha xii-gá chi vátá sáa-gá òré tñi ñaha-güedé.

31 Dico vai-yu ní sandáá iní ñahá-yu xii-gá, te ní xitnàhá-yu:

—¿Nágá cùú sá cáda Cristú ná quixi-gá-í?, te tée-a ño cuéhé núú sá tá quide-dé véxi. Vaa díu tée-a cùú-dé Cristú Yaá ní tendaha Yá Ndióxi véxi ñuyúú-a —càchí-yu xitnàhá-yu.

Cue tée cùu fariséu cuini-güedé quihíⁿ Jesús vecaá

32 Te ní níhi cue tée cùu fariséu tnúhu nàcuáa cáháⁿ ñáyiú cuendá Jesús, núú ní ndatnúhu-güedé ndihi cue dútú cùnúu, te ní techiuⁿ-güedé cue tée quide cuendá veñúhu cuáháⁿ-güedé cuátñi ñaha-güedé xii-gá ní cùu.

33 Te ní xáhaⁿ-gá xii-güedé:

—Sacú duha nduu cundecu ndihi ñaha-í xii-ndo, te nùhú tucu-í núú ndécú tàtá-í Yaá ní tendaha ñaha xii-í véxi-í ñuyúú-a.

34 Te cuéi na nánducu ñaha-ndo dico vá ná níhi ñahá-ndó chi vá sáa-ndó núú cündecu-í —càchí-gá xáhaⁿ-gá xii-güedé.

35 Te ní nguíta ñáyiú isráel xitnàhá-yu:

—¿Ndèé quihíⁿ-tu tée-a te vá ná níhi-ó-dé-í? ¿Ádi quihíⁿ-dé na chitnahá-dé ñáyiú isráel ñáyiú nchítenuu nchaa ñuú xicá cuendá danèhé-dé ñáyiú griégú?

36 ¿Náa cáháⁿ-tu-dé duha cáháⁿ-dé: “Nanducu ñaha-ndo te vá nánihí ñahá-ndó chi

vá sáa-ndó núú cündecu-í”, càchí-tu-dé? —càchí-yu xitnàhá-yu.

Nàcuáa cada Espiritú Yá Ndióxi iní-ó

37 Te nduu ní yáha-ná vico cùu-xi nduu cahnu vihi, te nduu-áⁿ ní ngunu tñi Jesús tnuú ñáyiú, te níhi ní cáháⁿ-gá, te xáhaⁿ-gá xii-yu:

—Núu ío dava-ndo yichí-ndó ndüte, te quixi-ndo núú-í, te coho-ndo.

38 Duha cáháⁿ-í chi nchaa ñáyiú na quindáá iní ñahá xii-í, te cada-xi iní-yu dátñá ñⁿ núú xicá ndüte, nchaa-ni nduu xica ñá túú yichí, ducaⁿ cáda-xi iní-yu núú cuáháⁿ núú véxi dátñá cáháⁿ-xi núú tütú Yá Ndióxi —càchí-gá xáhaⁿ-gá xii-yu.

39 Te ducaⁿ ní cáháⁿ-gá cuendá sá quixi Espiritú Yá Ndióxi ngundecu ndihi nchaa ñáyiú na quindáá iní ñahá xii-gá, chi sáa nduu ndaa-gá andiu cáda cahnu ñaha Tátá-gá xii-gá, te dàvá-áⁿ te quixi Espiritú Yá Ndióxi cundecu ndihi-yu.

Ñá ní cùu ñⁿnuú-yu cuendá tnúhu ní cáháⁿ Jesús

40 Te dava ñáyiú ní xindedóho tnúhu ní cáháⁿ Jesús ní xitnàhá-yu:

—Ndáá sá tée-a cùú-dé tée càchí-yu quixi cáháⁿ tnúhu Yá Ndióxi —càchí-yu xitnàhá-yu.

41 Te dava tucú-yu xitnàhá-yu:

—Tée-a cùú-dé Cristú Yaá ní tendaha Yá Ndióxi véxi ñuyúú-a —càchí-yu xitnàhá-yu.

Te dava-gá tucú-yu xitnàhá-yu:

—¿Náa ndaa distritú Galilea quixi Cristú Yaá tendaha Yá Ndióxi quixi ñuyúú-a?

42 Chi núú tütú Yá Ndióxi càchí-xi sá Cristú Yaá tendaha Yá Ndióxi quixi ñuyúú-a cuu-gá ñⁿ ñani tnáhá ndií Dàvií, te quee-gá ñuú Belén ñuú mée ndií Dàvií, duha cáháⁿ-xi núú tütú Yá Ndióxi —càchí-yu xitnàhá-yu.

43 Te xiaⁿ núu ñá ní cùu ñⁿnuú-yu cuendá Jesús.

44 Te davá-yu cuini-yu tñi-yu Jesús quihíⁿ-gá vecaá ní cùu, dico ní ñⁿ-yu ñá túú ní cùyi-yu tñi ñahá-yu xii-gá.

Cue tée cùchiuⁿ ñá túú sandáá iní-güedé Jesús

45 Te cue tée cuáháⁿ tñi ñaha xii Jesús ní cùu ní ndexio-güedé núú cué tée cue fariséu ndihi núú cué dútú cùnúu. Te xáhaⁿ cué tée cùnúu-áⁿ:

—¿Ná cuendá ñá ní cãndeca-ndo tée-áⁿ quixi? —càchí-güedé xáhaⁿ-güedé.

46 Te cue tée ní sáháⁿ chiuⁿ ní xáhaⁿ-güedé: —Ni ñⁿ tée ñá túú xini-ndí cáháⁿ dátñá cáháⁿ tée-áⁿ —càchí-güedé xáhaⁿ-güedé.

47 Te ní xáhaⁿ cué tée cùu fariséu:

—¿Náa tnàhá nchòhó ní sandáá iní-ndó tnúhu ndehnde cáháⁿ tée-áⁿ?

⁴⁸ ¿Náa ñá túú xini-ndó sã ní ìⁿ cue tée tàxi tñuní nchúhú, te ní ìⁿ nchúhú cue tée cùu fariséú ñá túú sãndáá ini-ndí tée-ã ñá?

⁴⁹ Nchaa ñáyíu tùha ñaha xii tée-ã ñá túú sãndáá ini-yu nàcuáa càháⁿ tñúhu sá sánú ichi ñaha xii-o, dico cuíta nihnú-yu sá dúcáⁿ quidé-yu —càchí-güedé xáhaⁿ-güedé xii cue tée-ã.

⁵⁰ Te té Nicòdemú tée ní sáháⁿ niú ní ndatnúhu-dé ndihi Jèsús cùú-dé tñhá-dé ìⁿ tée fariséú, te ní xáhaⁿ-dè xii-güedé:

⁵¹ —Tnúhu sá sánú ichi ñaha xii-o nàcuáa cundecu-o càchí-xi sá ndéé cundedóho-o nása càháⁿ tée tàú cuéchi cuendá cutnùní ini-ó ná ní quide-dé, te dàtnùní càháⁿ-ó núu ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

⁵² Te ní xáhaⁿ-güedé:

—Cùu ní cachi sá tñhá-ó cùú-n tée distritú Galiléa núu ducaⁿ càháⁿ-n. Dacuàha tutú yódó tñuní tñúhu Yá Ndióxi te quini-n nàcuáa càháⁿ-xi sá ní ìⁿ tée véxi distritú Galiléa ñá túú càháⁿ-dè tñúhu Yá Ndióxi —càchí-güedé xáhaⁿ-güedé.

⁵³ Ducaⁿ te ndi díⁿ cuànuhú-güedé vehe-güedé.

8

Ìⁿ ñadhí ndécú vihi cuéchi-xi

¹ Te Jèsús cuáháⁿ-gá yucu Òlívú.

² Te sáta ní tũndaá nduu tñéé, te cuáháⁿ tucu-gá veñúhu càhnu sá ìo cùnuu. Te ìo cuéhé ñáyíu ní chítú nihnú-yu núu-gá, te ní ngóo-gá ní dánèhé ñáhá-gá xii-yu.

³ Te ní quexío cue tée dàcuaha ñaha xii-yu nchaa tñúhu ní chídó tñuní ndíi Moisés, ndihi cue tée cùu fariséú, te ndèca-güedé ìⁿ ñadhí ní sáá, te ñaha-á ní xini ñáhá-yu càháⁿ ndihi-aⁿ ìⁿ tée dico ñá díú yì-aⁿ cuu-dé, te ní sanutñí ñaha-güedé xii-aⁿ tnuú nchaa ñáyíu xindecu núú Jèsús.

⁴ Te ní xáhaⁿ-güedé xii Jèsús:

—Mèstrú, ñadhí-a ní xini ñáhá ñáyíu xii-aⁿ càháⁿ ndihi-aⁿ ìⁿ tée dico ñá díú yì-aⁿ cuu-dé.

⁵ Te tñúhu ní chídó tñuní ndíi Moisés càchí-xi sá yúu cahni-o nchaa ñáyíu díhi duha quide. Te yòhó, ¿nása càchí-n cùnduu-i? —càchí-güedé xáhaⁿ-güedé xii-gá.

⁶ Duha ní càháⁿ-güedé chí cuendá sá cùní-güedé coto ndéé ñáhá-güedé xii-gá núu nása càháⁿ-gá cuendá nùcúo nchíhi ñaha-güedé xii-gá ní càháⁿ-güedé. Te ní ngúnu ndeyi-gá te ní ngúita-gá tée-gá ndihi díquí ndáhá-gá lètrá núú ñúhú.

⁷ Te xicáⁿ tñúhú-ní tucu-güedé núu-gá núu ní ndonehe núu-gá, te ní xáhaⁿ-gá:

—Ndédani càa nchóhó te núu ñá túú ná cuéchi quide-ndo te díhna nuu-gá-ndó chí cuàha-aⁿ yúú —càchí-gá xáhaⁿ-gá xii-güedé.

⁸ Te ní ngúnu ndeyi tucu-gá tée tucu-gá lètrá núú ñúhú.

⁹ Te sá dúcáⁿ ní xáhaⁿ-gá xii-güedé te ní ndixi túu ini-güedé sá ñá túú quide váha mee-güedé tñhá-güedé, núu da ìⁿ da ìⁿ-güedé ní ndee, te díhna-gá cue tée cùu sacuéhé ní ndee te ní ngúita nchicúⁿ dava-gá-güedé. Te sáta ní ndihi-güedé ní ndee, te ní quendóo mee-ñá Jèsús ndihi ñadhí-á.

¹⁰ Te ní ndonehe núú Jèsús te ní xini-gá sá ní ndihi-güedé cuáháⁿ te mee-ñá ñadhí-áⁿ ní ndóo-aⁿ, te ní xáhaⁿ-gá xii-aⁿ:

—¿Ndèndi cuáháⁿ cue tée càchí sá ní quide-n cuéchi? ¿Ni ìⁿ-güedé ñá ní cùndee tñúhu-güedé quíhíⁿ-n càstiú-va? —càchí-gá xáhaⁿ-gá xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chí ní ìⁿ-güedé ñá ní ndacu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ní yúhú vá dáquihíⁿ ñáhá-í castiú xii-n. Te vitna te nùhú-n te vá cadá-gá-n nãndi sá cuéhé sá dúhá —càchí-gá xáhaⁿ-gá xii-aⁿ.

Jèsús dàndixi túu-gá ini-ó

¹² Te ní càháⁿ tucu Jèsús núú ñáyíu, te xáhaⁿ-gá xii-yu:

—Yúhú cùú-í dàtná ìⁿ ñuhú dáyèhe-í ñuyú-a, te nchaa ñáyíu na chitnahá ñáhá xii-í, te vá cùndecu-gá-yu ichi cuéhé ichi duha, chí yúhú dàndixi túu-í ini-yu cuendá cutnùní ini-yu nàcuáa nduu cuendá Yá Ndióxi, te cundecu-í ndihi-yu ni caa ni quíhíⁿ —càchí-gá xáhaⁿ-gá xii-yu.

¹³ Te ní xáhaⁿ cué tée cùu fariséú xii-gá:

—Medíi-n caháⁿ-n sá cùú-n tée váha, te vá yóo ìⁿ-gá chindèe tñúhu ñaha xii-n núu ná tée cùu-n, dico xiáⁿ ñá túú nãndíhi-xi —càchí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuéi càháⁿ-í cuendá mée-í dico nãndíhi tñúhu càháⁿ-í. Chí yúhú ñaha-í ndéé ichi véxi-í, te xini-í ndéé ichi nùhú-í, dico nchóhó chí ñá túú xini-ndó ndéé ichi véxi-í, te ni ñá túú xini-ndó ndéé ichi quíhíⁿ-í.

¹⁵ Te nchóhó chí cuendá-ni càháⁿ-ndó cuendá ñáyíu núu quide váha-yu àdi ñá túú quide váha-yu. Te yúhú ñá túú càháⁿ-í cuendá ñáyíu núu quide váha-yu àdi ñá túú quide váha-yu.

¹⁶ Àdi núu càháⁿ-í dico ìⁿ tñúhu ndáá càháⁿ-í chí ñá díú-ni mée-í càháⁿ, chí tñhá Tãtã-í Yaa ní tendaha ñaha xii-í véxi-í ñuyú-a càháⁿ-gá chindèe tñúhu ñaha-gá xii-í.

¹⁷ Te tñúhu sá sánú ichi ñaha xii-ndo càchí-xi sá núu na cùndecu úú cue tée càháⁿ ndáá-güedé nàcuáa cùu ìⁿ sá cùndáá, te núu ìⁿ-ni tñúhu na càháⁿ-güedé ndi ndúú-güedé te xiáⁿ nãndíhi-xi, duha càchí tñúhu-áⁿ.

¹⁸ Te diu-ni ducaⁿ cùu-xi yúhú chi càháⁿ-í ìⁿ tñúhu ndáá sá cùú-xí mèe-í, te diu-ni dàtná càháⁿ-í càháⁿ Tàtá-í Yaa ní tendaha ñàha xii-í véxi-í ñuyúú-a —càchí-gá xáhaⁿ-gá xii-güedé.

¹⁹ Te ní xáhaⁿ-güedé xii-gá:
—¿Te ndéé ndécú Tàtá-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dicó xini-ndó yòo cuu yúhú-á te ducaⁿ te quini-ndó Tàtá-í. Te ni yúhú ñá túú xini-ndó Tàtá-í —càchí-gá xáhaⁿ-gá xii-güedé.

²⁰ Duha ní cáháⁿ Jèsús nini dàcuaha-gá ñáiyu xití veñúhu núu ndécú àlanciá díhúⁿ. Te vá yòo ìⁿ ni cùuyi tñi ñaha xii-gá chi vátá sàá-gá òré tñi ñaha-güedé.

Ñáiyu ñá túú sàndáá iní ñáhá xii Jèsús vá ndácú-yu quíhíⁿ-yu núu ñùhú-gá cundecu-gá

²¹ Te ní xáhaⁿ tucu Jèsús xii-güedé:

—Yúhú ñùhú-í te nanducu ñaha-ndo te vá nánihí ñáhá-ndó, te cuú-ndó núu yíca cuéchi-ndo, chi vá ndácú-ndó sàá-ndó núu ñùhú-í cundecu-í —càchí-gá xáhaⁿ-gá xii-güedé.

²² Te ní xitnáha cue téé isràèl:

—¿Te ná cahni-dé méé-dé núu càchí-dé sá vá ndácú-ó sàá-ó núu quíhíⁿ-dé-á? —càchí-güedé xitnáha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyúú-a cùu-ndo, núu ío ñùhu iní-ndó sá ío ñuyúú-a. Te yúhú chi téé núu ñinu cùu-í núu xiáⁿ ñá túú sá ío ñuyúú-a ñùhu iní-í.

²⁴ Te xiáⁿ núu càchí-í sá cùú-ndó núu yíca cuéchi-ndo, chi ñá cuini-ndó quindáá iní-ndó sá yúhú véxi cuuⁿ-í andiu, te núu xiáⁿ diu-ni núu yíca cuéchi-ndo cùú-ndó —càchí-gá xáhaⁿ-gá xii-güedé.

²⁵ Te ní xicáⁿ tñúhú-güedé núu-gá, te xáhaⁿ-güedé:

—¿Te ná cùú yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gá:

—Sa ní cachí tñúhu-í xii-ndo ndéé díhna —càchí-gá xáhaⁿ-gá xii-güedé.

²⁶ Te xáhaⁿ tucu-gá:

—Ndécu cuéhé tñúhu càháⁿ-í cada ndáá-í cuendá nchòhó. Te Tàtá-í Yaa ní tendaha ñàha xii-í véxi-í ñuyúú-a càháⁿ-gá tñúhu ndáá, te tñúhu càháⁿ ní yúhú ñuyúú-a cùu-xi tñúhu ní càháⁿ-gá ní xindédòho-í —càchí-gá xáhaⁿ-gá xii-güedé.

²⁷ Te mee-güedé ñá túú ní tècú tñuni-güedé sá cuendá Dútú Ndióxi ní cáháⁿ Jèsús.

²⁸ Te ní xáhaⁿ-gá xii-güedé:

—Òré ná catá càa ñaha-ndo xii yúhú Téé cùu ñani tñáhá-ndó nchàa-ndo núu cùrúxi cahni ñaha-ndo, te òré-áⁿ cutnùni iní-ndó yòo cuu-í, te ñá túú quide-í sá cùú iní mèe-í,

chi yúhú càháⁿ-í nàcuáa ní dánèhé ñáhá Tàtá-í

²⁹ Yaa ní tendaha ñàha xii-í véxi-í. Te diu-gá ndécú ndíhi ñaha-gá xii-í, te ñá túú dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gá xii-güedé.

³⁰ Te sá dúcáⁿ ní càháⁿ-gá núu ío vai ñáiyu ní sàndáá iní ñáhá xii-gá.

Ñáiyu sàndáá iní ñáhá xii Yá Ndióxi ndíhi ñáiyu ndécu ichi cuehé ichi duha

³¹ Te ní xáhaⁿ Jèsús xii ñáiyu isràèl ñáiyu ní sàndáá iní ñáhá xii-gá:

—Te núu vá dàña ndéé-ndó càda-ndo nchaa nàcuáa càháⁿ-í, te cuu ndisa-ndo cué téé tñáhá tñúhu ndíhi-í,

³² te tecú tñuni-gá-ndó tñúhu ndáá, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáháⁿ-yu:

—Nchúhú cùú-ndí cue ñani tñáhá ndí Àbrahám, te ni ìⁿ nduu ñá túú ndéé sácúndedí nihnu-ndí ndoho tñáhá-ndí núu càchí-ó sá dàcácu nihnu ñaha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tñúhu ndáá-í xii-ndo sá nchàa ñáiyu quide nchaa sá cuéhé sá dúhá tàxi tñuni ñáhá-ná-xi xii-yu.

³⁵ Te cue ñáiyu xinu cuechi te vá cùú ìⁿ-ná cuú-yu ndíhi ñáiyu dii véhe-xi xinu cuechi-yu, dico cue déhe ñáiyu dii véhe-xi-áⁿ chi ìⁿ-ni cùu ndíhi ñaha-güexi xii-yu.

³⁶ Te núu yúhú Yaa cùú Dèhe Yá Ndióxi dàcácu nihnu ñaha-í xii-ndo núu nchàa yíca cuéchi-ndo, te ndáá sá nchòhó cácu nihnu ndisa-ndo.

³⁷ Te yúhú sa xini-í sá nchòhó cùú-ndó ñani tñáhá ndí Àbrahám, te dicó-ni sá ñá tñáhá iní-ndó tñúhu càháⁿ-í núu xiáⁿ cuini-ndó cahni ñaha-ndo.

³⁸ Te yúhú càháⁿ-í nàcuáa ní dánèhé ñáhá Tàtá-í, te nchòhó quide-ndó nàcuáa càháⁿ tàtá-ndó —càchí-gá xáhaⁿ-gá xii-yu.

³⁹ Te ní xáháⁿ-yu:

—Ndí Àbrahám cùú tàtá-ndí —càchí-yu xáháⁿ-yu xii-gá.

Te ní xáhaⁿ Jèsús:

—Núu ndisa ñani tñáhá ndí Àbrahám cùú-ndó, te cada-ndo nàcuáa ní xóo cada ndí ni cùu.

⁴⁰ Te yúhú cuéi càháⁿ-í ìⁿ tñúhu ndáá nàcuáa càháⁿ Yá Ndióxi càchí tñúhu-gá xii-í, te cuini-ndó cahni ñaha-ndo. ¡Dico ndí Àbrahám chi ñá túú dùcaⁿ ni quide ndí!

⁴¹ Te nchòhó quide-ndó nàcuáa quide tàtá-ndó —càchí-gá xáhaⁿ-gá xii-yu.

Te ní xáháⁿ-yu:

—Nchúhú, ñá túú yàacáⁿ ndécú tātá-ndí, chí ñⁿdii Yá Ndióxi cúú tātá-ndí —cächí-yu xáháⁿ-yu xii-gá.

⁴² Te ní xáhaⁿ Jèsús:

—Núu dicó Yá Ndióxi ndisa cùu Tátá-ndó te cuu iní ñáhá-ndó xii-í ní cuu chí yúhú ní quee-í núu ndécú-gá véxi-í ñuyú-a. Te ñá túú véxi-í sá cúú iní mee-í, chí mee-gá ní tendaha ñaha-gá véxi-í.

⁴³ Te ñá túú təcú tñni-ndó tñhu cáháⁿ-í chí ñá túú tñhá iní-ndó.

⁴⁴ Te nchòhó chí tātá-ndó cùu yucu ñáváha núu cùdíí iní-ndó quide-ndo ncha nacuaa cuu iní-xi, chí ndée òré ní ngáva ñuyú ducaⁿ-ní ndécú-xi dacáháⁿ-xi iní-ndó sàhni tñaha-ndo. Te ñá ñⁿ ndùu cáháⁿ-xi ñⁿ tñhu ndáá chí ñá túú xica-xi ichi ndáá, chí mee-ní ichi tñhu ndehnde xica-xi chí ducaⁿ iní-xi. Te ñu-xi dàcahu-xi iní-ndó dàcuandehnde-ndo.

⁴⁵ Te yúhú cáháⁿ-í tñhu ndáá te ñá túú cuiní-ndó quindáá iní ñáhá-ndó.

⁴⁶ Te ndédacáa nchohó xini-ndó sá quidè-í ñⁿ sá cuèhé sá dúhá-í?, te yúhú ñá túú ná quidè-í chí cáháⁿ ndáá-í, te ná cuendá ñá túú cuiní-ndó quindáá iní-ndó tñhu cáháⁿ-í?

⁴⁷ Te ncha ñáyiú ndècu ichi Yá Ndióxi, ñáyiú-áⁿ sácúndedóho-yu ncha tñhu cáháⁿ-gá. Te nchòhó chí ñá díú ichi Yá Ndióxi ndécú-ndó núu ñá túú sácúndedóho-ndo tñhu cáháⁿ-gá —cächí-gá xáhaⁿ-gá xii-yu.

Díhna-gá Cristú sa ndècu dacúúxi ndí Ìbrahám

⁴⁸ Te ní xáhaⁿ ñáyiú isràél:

—Váha-ni cáháⁿ-ndí sá tée samaritànú cúu-n, te yucu ñáváha ndècu ndíhi-n —cachí-yu xáháⁿ-yu xii-gá.

⁴⁹ Te ní xáhaⁿ Jèsús:

—Yúhú, ñá túú yucu ñáváha ndècu ndíhi-í, chí Tátá-í quidè cahnú-í, te nchòhó da cùu úhú iní ñáhá-ndó xii-í —cächí-gá xáhaⁿ-gá xii-yu.

⁵⁰ Te xáhaⁿ tucu-gá:

—Yúhú, ñá túú cächí-í sá cádá cahnú ñaha-ndo, dico Dútú Ndióxi cuiní-gá sá cádá cahnú ñaha-ndo xii-í. Te mee-gá cáháⁿ-gá núu ndédacáa-ndo quide váha, te ndédacáa-ndo ñá túú quide váha.

⁵¹ Te na cächí tñhu ndáá-í xii-ndo sá ncháa ñáyiú na tñi tñhu cáháⁿ-í te vá cuíta nihnú-yu —cächí-gá xáhaⁿ-gá xii-yu.

⁵² Te ní xáhaⁿ tucu ñáyiú isràél:

—Vitna te ní xini ndáá-ndí sá yucu ñáváha ndècu ndíhi-n, chí ndí Ìbrahám ndíhi ncha cue tée ní xóo cáháⁿ tñhu Yá Ndióxi ndée sanaha ní xihí-güedé, te yòhó cächí-tu-n sá ncháá ñáyiú na tñi tñhu cáháⁿ-n te vá cúú-gá-yu.

⁵³ ¿Náa ío-gá cahnú cuu-ó dàcúúxi ñani tñhá-ndí ndí Ìbrahám-án? Tée-án dai ní xihí-dé ndíhi cue tée ní xóo cáháⁿ tñhu Yá Ndióxi ndée sanaha. ¿Te yòhó nágá-tu cùu-n te vá cùu-n cáháⁿ-n-í? —cachí-yu xáháⁿ-yu.

⁵⁴ Te ní xáhaⁿ Jèsús:

—Te núu dicó mee-í quidè cahnú-í mee-í ñá, te ñá túú nandíhi sá quidè-í núu ducaⁿ. Dico Tátá-í quidè cahnú ñaha-gá xii-í, te ñu-ni Yáá-áⁿ cächí-ndó cùu Ndióxi-ndó.

⁵⁵ Te nchòhó chí ñá túú xini-ndó-gá. Te yúhú chí xini-í-gá. Te núu na cächí-í sá ñá túú xini-í-gá te dàcuandehnde-í dàtná ndehnde mee-ndo. Te yúhú chí xini ndisa-í-gá te tñi-í ncha tñhu cáháⁿ-gá.

⁵⁶ Te ndí Ìbrahám ñani tñhá-ndó ní xindecu ndée sanaha ío ní cudíí iní ndí sá quini ñáhá ndí xii-í, te ní sáá nduu ní xini ñáhá ndí xii-í núu ío ní cudíí iní ndí —cächí-gá xáhaⁿ-gá xii-yu.

⁵⁷ Te ní xáhaⁿ ñáyiú isràél xii Jèsús:

—Ni vátá cùhú-gá-n ùdico úxi cuíá-n te cächí-n sá ní xini-n ndí Ìbrahám, te ní cunaha víhi ní xihí ndí-án —cachí-yu xáháⁿ-yu xii-gá.

⁵⁸ Te ní xáhaⁿ Jèsús:

—Te na cächí tñhu ndáá-í xii-ndo sá cùmáni-gá cundecu ndí-án ñuyú-a te yúhú sa ndècu-gá-í —cächí-gá xáhaⁿ-gá xii-yu.

⁵⁹ Te sá dúcáⁿ ní cáháⁿ-gá núu xíáⁿ ní quehéⁿ-yu yúú cuáha ñáhá-yu xii-gá ní cùu, te ní nguíváha-gá núu-yu te ní quee-gá xití veñúhu cuáháⁿ-gá.

9

Jèsús quidè tātma-gá ñⁿ tée cuáá

¹ Te núu xicá cùu Jesús ní naníhí-gá ñⁿ tée cuáá, te sa ducaⁿ tñhí cãa núú-dé ní cacu-dé.

² Te ní xáhaⁿ cuè tée cuu ndíhi-gá xii-gá:

—Mèstrú, ¿ná cuendá dàcáⁿ cuáá tée-án ní cacu-dé? ¿Sá cuendá nchaa yicá cuèchi tātá-dé, án sá cuendá nchaa yicá cuèchi náná-dé, án sá cuendá nchaa yicá cuèchi mee-dé dàcáⁿ cáá-dé ní cacu-dé? —cächí-güedé xáhaⁿ-güedé xii-gá.

³ Te ní xáhaⁿ Jèsús:

—Ni ñá díú sá cuendá nchaa yicá cuèchi mee-dé, te ni ñá díú sá cuendá nchaa yicá cuèchi tātá-dé, te ni ñá díú sá cuendá nchaa yicá cuèchi náná-dé, chí mee Yá Ndióxi ní cuiní-gá sá dúcáⁿ cunducu-dé sáá-dé ñuyú-a cuendá sá ñuyú-a quini ñáyiú nása cada ñaha Yá Ndióxi xii-dé ndúha núú-dé.

⁴ Te vitna ío-gá nduu cùyica sá cádá-í nchaa chiúⁿ ní táhú Yáá ní tendaha ñaha xii-í véxi-í ñuyú-a, chí sáá nduu te vá ndácú-gá-í cada-í chiúⁿ-gá.

⁵ Te nini ndècu-gá-í ñuyíú-a te dándixi tũú-í iní nchaa ñáiyu cuendá cutnũni iní-yu nàcuáa ndũu cuendá Yá Ndiõxi —càchí-gá xáhaⁿ-gá xii-güedé.

⁶ Te sátá dúcáⁿ nĩ cáháⁿ-gá, te ní sati-gá díí-gá núú ñũhú te ní dácá-gá luha ñuhu ní cuáha ndéhyú, te ndéhyú-áⁿ nĩ dácánũ-gá ndúú xio núú tée cuáá-áⁿ.

⁷ Te ní xáhaⁿ-gá xii-dé:

—Quíhíⁿ-n nàquete-n núú-n ndũte tanqui Silòé —càchí-gá xáhaⁿ-gá xii-dé. Te Silòé-áⁿ quèé-xi tñũhu mée-yu: Tée xica chiuⁿ.

Te ní sáháⁿ tée cuáá-áⁿ nĩ naquete-dé núú-dé, te òré ní ndexio-dé te sa ndèhe-dé.

⁸ Te nchaa ñáiyu ndècu yatni núú ndécú-dé ndihí nchaa ñáiyu xini ñáhá xii-dé núú xicáⁿ ndàhú-dé ní xitnàhá-yu:

—¿Náa ñá díú tée-áⁿ ní xóo cacáⁿ ndàhú-dé? —càchí-yu xitnàhá-yu.

⁹ Te davá-yu càchí-yu sá díú-dé, te davá-yu càchí-yu sá ñá díú-dé, dico ducaⁿ càa-dé, càchí-yu xitnàhá-yu.

Dico mee-dé ní xáhaⁿ-dè xii-yu sá díú-dé.

¹⁰ Te ní xicáⁿ tñũhũ-yu núú-dé, te xáhãⁿ-yu:

—¿Náa ní cuu núú ní ndúha núú-n ndèhe-n vitna? —càchí-yu xáhãⁿ-yu xii-dé.

¹¹ Te ní xáhaⁿ-dè:

—Tée nani Jesús-áⁿ ní cadúha-dé luha ndéhyú te ní dácánũ-dé núú-í, te ní táuchíúⁿ-dè ní sáháⁿ-í tãnqui Silòé ní naquete-í núú-í, te òré-áⁿ nĩ cuu cundehe-í —càchí-dé xáhaⁿ-dè xii-yu.

¹² Te ní xicáⁿ tñũhú tucú-yu núú-dé, te xáhãⁿ-yu:

—¿Te ndèé ndécú tée-áⁿ? —càchí-yu xáhãⁿ-yu xii-dé.

Te ní xáhaⁿ-dè:

—Ñá túú xini-í —càchí-dé xáhaⁿ-dè xii-yu.

Cue tée cùu fariséú ndátñũhũ-güedé ndihí tée ní ndúha núú-xi

¹³ Te ndéca-güedé tée ní ndúha núú-xi-áⁿ cuáhãⁿ núú cuè tée cùu fariséú.

¹⁴ Te cuendá sá ndũu ndetatú-yu ní cadúha Jesús ndéhyú nĩ dácánũ-gá núú tée-áⁿ te ní ndúha,

¹⁵ xiãⁿ nũu ní xicáⁿ tñũhú cuè tée cùu fariséú núú-dé, te xáhaⁿ-güedé:

—¿Náa ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dè xii-güedé:

—Híⁿ tée ní dácánũ-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dè xii-güedé.

¹⁶ Te dava cue tée cùu fariséú ní xitnàha-güedé:

—Ñá díú Yá Ndiõxi ní tendaha ñaha-gá xii tée-áⁿ véxi-dé nũu duha quide-dé nchaa sá vã yõo tñáhí ndácu cada, te ñá túú

sàndáá iní-dé canehe íí-dé nduu ndetatú-ó —càchí-güedé xitnàha-güedé.

Te dava-güedé ní xitnàha-güedé:

—¿Náa ndacu-dé cada-dé sá vã yõo tñáhí ndácu cada te núú cùu-dé tée yicá cuèchi? —càchí-güedé xitnàha-güedé.

Te ñá túú ní cùu ñⁿnuu-güedé tñũhú ní cáháⁿ-güedé.

¹⁷ Te ní xicáⁿ tñũhú tucú-güedé núú tée ní ndúha núú-xi-áⁿ, te xáhaⁿ-güedé:

—Te yòhó, ¿náa càchí-n cuendá tée ní quide tátna núú-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dè:

—Yúhú càchí-í sá ñⁿ tée càháⁿ tñũhú Yá Ndiõxi cúú-dé —càchí-dé xáhaⁿ-dè xii-güedé.

¹⁸ Dico cue tée isràèl ñá ní sàndáá iní-güedé sá cuáá-dé ní cùu, chi cuendá sa ní ndúha núú-dé ní xini ñáhá-güedé, te xiãⁿ nũu ní cana-güedé tátá-dé ndihí náná-dé,

¹⁹ te ní xicáⁿ tñũhú-güedé núú-yu, te xáhaⁿ-güedé:

—¿Diu tée-a déhe-ndo tée càchí-ndó cuáá-dé ní cacu-dé-áⁿ? ¿Te náa ní cuu ní ndúha núú-dé? —càchí-güedé xáhaⁿ-güedé xii-yu.

²⁰ Te ní xáhaⁿ tátá-dé ndihí náná-dé:

—Diu déhe-ndí cúú-dé te sa cuáá ndisa-dé ní cacu-dé,

²¹ dico ñá túú xini-ndí náa ní cuu ní ndúha núú-dé, te ní ñá túú xini-ndí yoo ní quide tátna. Chí cacáⁿ tñũhú núú mée-dé xiãⁿ nũu sa sàcuéhé-dé, te na càháⁿ-dé nũu náa ní cuu ní ndúha núú-dé —càchí-yu xáhãⁿ-yu xii-güedé.

²² Duha ní cáháⁿ tátá-dé ndihí náná-dé ní xáhãⁿ-yu xii-güedé cuendá sá yuhú-yu cue tée cùnuu núú ñáiyu isràèl, chi cue tée-áⁿ sa ní ndatñũhũ-güedé ní cuu ñⁿnuu-güedé sá nũu ndédacà ñáiyu na càháⁿ sá Jesús cúú-gá Cristú Yáa ní tendaha Yá Ndiõxi véxi ñuyíú-a, te vã dáñá-gá-güedé quíhu-yu veñúhu.

²³ Núu xiãⁿ ní xáhaⁿ tátá-dé ndihí náná-dé sá ná cacáⁿ tñũhú-güedé núú mée-dé chi sa sacuéhé-dé.

²⁴ Te xiãⁿ nũu ní cana tucu-güedé tée ní ndúha núú-xi-áⁿ, te ní xáhaⁿ-güedé:

—Cáhãⁿ-n ñⁿ tñũhú ndáá chi Yá Ndiõxi ndéhé ndií-gá nàcuáa ní cuu ní ndúha núú-n, chi nchúhú xini-ndí sá dicó ñⁿ tée ndècu yicá cuèchi-xi cùu tée càchí-n ní quide tátna núú-n —càchí-güedé xáhaⁿ-güedé xii-dé.

²⁵ Te ní xáhaⁿ-dè:

—Yúhú, ñá túú xini-í te núú tée ndècu yicá cuèchi-xi cùu-dé ádi ñáhá. Dico-ní sá xini-í sá cuáá-í ní cùu te vitna ní cuu cundehe-í —càchí-dé xáhaⁿ-dè xii-güedé.

²⁶ Te ní xicáⁿ tñũhú tucú-güedé núú-dé, te xáhaⁿ-güedé:

—¿Náa ní quide ñaha-dé xii-n te ní ndúha núú-n-í? —càchí-güedé xáhaⁿ-güedé xii-dé.

²⁷ Te ní xáhaⁿ-dê:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuiní-ndó càchí tnúhu-ni tucu-í? ¿Á tnàhá-ndó cuiní-ndó quindáá iní-ndó tnúhu càháⁿ-dé? —càchí-dé xáhaⁿ-dê xii-güedé.

²⁸ Te ní cudéⁿ-güedé núú-dê, te ní xáhaⁿ-güedé xii-dé:

—Te núú yòhó cuiní-n chinchícúⁿ-n tõe-ãⁿ te cuaháⁿ, dico nchúhú chi canchicúⁿ niñhu nahi-ni-ndí nàcuáa ní cáháⁿ-n ndíi Moisés.

²⁹ Te nchúhú chi nàha-ndí sá Yá Ndióxi ní cáháⁿ ndíi-gá ndíi Moisés, dico tée càchí-n-ãⁿ chi ní ñá túú xiní-ndí ndéè tée cùu-dé —càchí-güedé xáhaⁿ-güedé xii-dé.

³⁰ Te ní xáhaⁿ tõe ní ndúha núú-xi-ãⁿ:

—¿Te nãa ñá díú nchòhó càchí-ndó sá ïo túha-ndo? Te núú ducaⁿ càháⁿ-ndó sá ñá túú xiní-ndó ndéè tée cùu-dé, te diu-dé ní quide tátna-dé núú-í ní ndúha —càchí-dé xáhaⁿ-dê xii-güedé.

Te xáhaⁿ tucu-dé:

³¹ —Xiní-ó sá Yá Ndióxi ñá túú tédóho-gá tnúhu càháⁿ ñáyiú quide nchaa sá cuèhé sá dúhá, chi nchaa ñáyiú quide cahnu ñaha xii-gá te quidé-yu nchaa nàcuáa cùu iní-gá, te ñáyiú-ãⁿ tédóho-gá tnúhu càháⁿ-gá.

³² Te ñá ñáⁿ ndúu cáháⁿ ñáyiú cuendá ñá tée cada tátna núú ñá ñáyiú cuàá ndéè ní cacu-xi te ndúha.

³³ Te núú ñá díú mèe Yá Ndióxi ní tëndaha ñaha-gá xii tõe-ãⁿ véxi-dé ñá, te vá ndácú-dé cada tátna-dé núú-í ní cùu —càchí-dé xáhaⁿ-dê xii-güedé.

³⁴ Te ní xáhaⁿ-güedé:

—Dico yòhó ndéè yatni vai cuéchi sa ta quide-n véxi, ¿te vitna nacanú ichi ñaha-n xii-ndí cáháⁿ-n-ãⁿ? —càchí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàha-gá-güedé níhí tnàhá ndíhi ñaha-dé xii-güedé.

Ñáyiú ñá túú ndíxi túu iní cuendá nchaa sá cuèhé sá dúhá quidé-yu

³⁵ Te ní níhí Jesús tnúhu sá ní queñuhu-güedé tée ní cuhú núú-xi-ãⁿ tnuú-güedé cuendá sá vá tnàhá tnúhu ndíhi ñaha-gá-dé xii-güedé, te ní naníhí ñahá-gá xii-dé te ní xáhaⁿ-gá:

—¿Sándáá iní-n Dêhe Yá Ndióxi-ãⁿ? —càchí-gá xáhaⁿ-gá.

³⁶ Te ní xáhaⁿ tõe ní cuhú núú-xi-ãⁿ:

—Mèstrú, cachí tnúhu núú ndéè ndécú tõe-ãⁿ cuendá quindáá iní-í-dé —càchí-dé xáhaⁿ-dê xii-gá.

³⁷ Te ní xáhaⁿ Jesús:

—Sa xiní-n-dê chi diu-dé cúu yúhu tée ndátmúhu ndíhi-n —càchí-gá xáhaⁿ-gá xii-dé.

³⁸ Te ní ngüñí xítí-dé núú-gá, te ní xáhaⁿ-dê:

—Xítóhó Jesucristú, sándáá iní ñàhá-í xii-n —càchí-dé xáhaⁿ-dê xii-gá.

³⁹ Te ní xáhaⁿ tucu Jesús:

—Yúhú véxi-í ñuyúú-a cada ndáá-í cuéchi ñáyiú. Te nchaa ñáyiú ñá túú quide váha cùu-yu dátna ñá ñáyiú cuàá, dico nchaa ñáyiú cùtnuní iní-xi sá ñá túú quide váha, te núu na quindáá iní-yu tnúhu càháⁿ-í, te cada iní-ndó sá dátna sá ní nacaáⁿ núú-yu chi tní-yu tnúhu càháⁿ-í. Te ñáyiú càchí sá quidé váha vá núu nuu-yu cuéchi-yu chi quesàhá-yu sá ïo ndáá quidé-yu, ñáyiú-ãⁿ cùu-yu dátna ñá ñáyiú cuàá, chi vá ndíxi túu iní-yu sá ñá túú quide váha-yu ndécú-yu, te vá tní-yu tnúhu càháⁿ-í —càchí-gá xáhaⁿ-gá xii-dé.

⁴⁰ Te sá dúcáⁿ ní cáháⁿ-gá, núu ní cáháⁿ ñá ùú cue tée cùu fariséú, te xáhaⁿ-güedé:

—¿Te nãa tnàhá nchúhú cuàá-ndí cáháⁿ-n-ãⁿ? —càchí-güedé xáhaⁿ-güedé xii-gá.

⁴¹ Te ní xáhaⁿ Jesús:

—Te núú dico nchòhó cuàá-ndó ñá, te vá cùndecu cuéchi-ndo ní cùu, dico càchí-ndó sá ndéhé-ndó ñá sá quidé-ndó te ñá ndáá, núu xíãⁿ ïo ndécu cuéchi-ndo.

10

Jesús càháⁿ-gá cuendá cùrrálí mbéè

¹ Te na càchí tnúhu ndáá-í xii-ndo sá ñá tée ñá túú quíhu ndáa yuyehe ñá cùrrálí mbéè, te cùtèxínu-ni na cuídó-dé, tõe-ãⁿ cúú-dé ñádúhú.

² Dico tée quíhu ichi yèhe cùrrálí-güedi, tõe-ãⁿ cúú-dé xítóhó-güedi.

³ Te tée ndéè yèhe cùrrálí-güedi nàcaáⁿ-dé te cuánguñhu xítóhó-güedi te ní cáháⁿ-dê, te ní nucúhuⁿ ndudú ñahá-güedi xii-dé. Te ní cáháⁿ díú-dé-güedi te ní queñuhu-dé-güedi cùrrálí.

⁴ Te sátá ní quee-güedi cùrrálí, te ní ngódó núú-dé núú-güedi, te ní ngüita nchicúⁿ ñahá-güedi xii-dé chi ní nucúhuⁿ ndudú ñahá-güedi.

⁵ Te ñá túú chinchícúⁿ-güedi ñá tée tátú, chi nucúhuⁿ ndudú-güedi sá ñá díú xítóhó-güedi cùu-dé, núu xíãⁿ xinú-güedi núú-dé —càchí-gá xáhaⁿ-gá xii-güedé.

⁶ Duha ní cáháⁿ Jesús cuendá sá cuiní-gá dacuahá-yu tnúhu-gá ní cùu, dico ñá ní təcú tnùnì-yu nása ndùu tnúhu ní cáháⁿ-gá.

Jesús cúú-gá dátna ñá tòi

⁷ Te ní xáhaⁿ tucu Jesús xii-güedé:

—Na càchí tnúhu ndáá-í xii-ndo sá yúhu cùu-í dátna ñá yèhe cùrrálí núu ndíhu cue mbéè.

⁸ Te nchaa cue tée sa yòdo nuu-gá ní quixi ní dándàhú-güedé ñáyiú cùu-güedé dátna ñádúhú dùhu-güedé cue mbéè ní cùu, dico ñá ní quide cuendá ñahá-güedi xii-güedé, chi

ní cutnùní iní-güedi sá ñã díú xítóhó-güedi cùu-güedé.

⁹ Te yúhú cùu-í dàtná yuyèhe curráli cue mbéé. Te ducaⁿ sãtnahá-xi cùu-í chi nchaa ñáyiu na tũha ñaha xii-í te naníhí tãhú-yu. Te cùu-yu dàtná cue mbéé quiti xítóhó-güedi-xi cuáhãⁿ-güedi núú cáã íté caxi-güedi, te dàtnùní cuándihu-ná-güedi curráli, ducaⁿ sãtnahá-xi cùu-yu.

¹⁰ Ñádúhú òrè véxi-dé chi dùhu-dé, sãhni-dé te dànaa-dé mbéé, dico yúhú chi véxi-í cuendá sá naníhí tãhú-ndó te ío cudíí iní-ndó cùnu cuechi-ndo núú Dùtú Ndióxi ní caa ní quíhíⁿ.

¹¹ Te yúhú cùu-í dàtná ìⁿ toli téé ío nèhe cuendá mbéé-xi, chi téé-ãⁿ cuéi na cùu-dé sá cùu-xi mbéé-dé cuendá-nã sá ná cãcu-güedi.

¹² Te núú ìⁿ téé na còto ñaha xii-güedi, te téé-ãⁿ cuendá-ní sá ñúhú yãhu-dé xító-dé-güedi. Te núú na quini-dé sáã ìⁿ quiti dééⁿ te dàña-dé-güedi xinu-dé, te ndíhi-güedi xité nuu ñaha quiti dééⁿ-ãⁿ, chi ñã díú mèi xítóhó-güedi cùu-dé.

¹³ Chi cuendá-ní sá ñúhú yãhu-dé xító-dé-güedi núú ñã túú nã ndíhú iní-dé cuéi na dãndíhi ñaha quiti cuíhna.

¹⁴ Te yúhú cùu-í dàtná ìⁿ téé ío váha xito mbéé-xi, chi téé-ãⁿ da ìⁿ da ìⁿ-dí xini-í-dé nãcuáa ndãa-dí, te ducaⁿ xini ñãhá-güedi xii-dé. Te ducaⁿ sãtnahá-xi cùu yúhú ndíhi nchaa ñáyiu sãndáã iní ñãhá xii-í, chi yúhú xini-í-yu te ducaⁿ mèe-yu xini ñãhá-yu xii-í.

¹⁵ Te ñu-ni ducaⁿ cùu-í ndíhi Tãtã-í, chi xini ñãhá-gã xii-í te xini-í-gã. Te sáã nduu cùu-í cuendá nchaa ñáyiu sãndáã iní ñãhá xii-í.

¹⁶ Te ndècu-gã ñáyiu vátã quindáã iní ñãhá-gã xii-í. Te xini ñuhu-xi cundedóho-yu tñuhu-í te quindáã iní ñãhá-yu cuendá ìⁿ-nã ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tóli-yu, te téé coto ñaha xii-yu-ãⁿ cúú yúhú.

¹⁷ Te Tãtã-í ío cudíí iní ñãhá-gã xii-í cuendá sá sáã ìⁿ nduu te cuú-í, te cuú-í chi ducaⁿ cãchí iní-í, te ñã díú sã cùú iní ñáyiu ñuyú-a cuú-í, te cuú-í dico ndoto-í.

¹⁸ Te vá yõ ìⁿ te ndacu cahni ñaha xii-í, te núú ñã díú sá cúú iní mèe-í cuú-í. Te dàtná-ni cùu iní-í sá cùu-í te ñu-ni ducaⁿ ndòto-í chi ducaⁿ ní cãchí Tãtã-í Dùtú Ndióxi cunduu — cãchí-gã xáhaⁿ-gã xii-güedé.

¹⁹ Te sá dúcãⁿ ní cãháⁿ-gã te ñã ní cùu ìⁿnduu tucu ñáyiu isráel.

²⁰ Te davá-yu ní xítñahá-yu:

—Ñã cuendá sãndáã-tu iní-ndó tñuhu cãháⁿ téé-ãⁿ, te yucu ñávãha ndècu ndíhi-dé, lúcú téé-ãⁿ? —cãchí-yu xítñahá-yu.

²¹ Te davá-yu ní xítñahá-yu:

—¿Náa xini-ndó ìⁿ téé ndècu ndíhi yucu ñávãha duha váha cãháⁿ-dé? ¿Náa xini-ndó

núu ndàcu yucu ñávãha cada tátña-xi núú ìⁿ téé cuãã te ndúha? —cãchí-yu xítñahá-yu.

Ñáyiu isráel dáquèe tihú-yu Jèsús

²² Te ndí tnahá cuíã ndadá cãhnú-yu vico veñúhu cãhnu sá ío cùnuu ñúú Jerusalén, te mei yõ quidé víxiⁿ-xi quidé-yu vico-ãⁿ.

²³ Te corrèdòr veñúhu-ãⁿ naní-xi Sàlomón, te xiãⁿ xicã cùu Jèsús.

²⁴ Te ní chítú ñíhnú ñáyiu isráel núú-gã, te ní xáhãⁿ-yu:

—¿Ná ndéé òrè cãchí tñuhu ndáã-n, te núú sã Cristú Yãã ní tendaha Yã Ndióxi véxi ñuyú-a cùu-n, ãdi ná téé cùu-n?, cãháⁿ-ni-n —cãchí-yu xáhãⁿ-yu xii-gã.

²⁵ Te ní xáhaⁿ Jèsús:

—Sa ní cãchí tñuhu-í te ñã sãndáã iní-ndó, te ndèhe-ndo sá vái núú sã quidé-í sá ní táuchíúⁿ Tãtã-í cada-í, te cùu-xi ìⁿ sã cutnùní iní-ndó nã téé cùu-í.

²⁶ Dico nchòhó ñã sãndáã iní-ndó, chi ñã túú cùu-ndo ñáyiu ní chitnahá ñãhá xii-í.

²⁷ Chi nchaa ñáyiu ní chitnahá ñãhá xii-í cùu-yu dàtná cue mbéé quiti xíndecu ndíhi xítóhó-xi chi nùcúhuⁿ ndudú-güedi xítóhó-güedi, te ducaⁿ nãquini ñãhá-ní xítóhó-güedi xii-güedi. Ducaⁿ sãtnahá-xi cùu nchaa ñáyiu ní chitnahá ñãhá xii-í.

²⁸ Te yúhú cada-í te nduu tãhú-yu cundecu ndíhi ñãhá-yu xii-í ní caa ní quíhíⁿ te vá ìⁿ ndúu-gã cuíta nihnú-yu, te ní vá yõ ìⁿ ndacu naquendé ñãhá xii-yu ndaha-í.

²⁹ Chi Tãtã-í ní taxi cuendá ñãhá-gã xii-yu. Te ío cùnuu-gã núu xiãⁿ vá yõ ìⁿ ndacu naquendé ñãhá xii-yu ndaha-gã.

³⁰ Yúhú ndíhi Tãtã-í Dùtú Ndióxi ìⁿ-ni cùu-ndí —cãchí-gã xáhaⁿ-gã xii-yu.

³¹ Te ní queheⁿ tucu ñáyiu isráel yúú cuãha ñãhá-yu xii-gã ní cùu.

³² Te ní xáhaⁿ-gã xii-yu:

—Ío quehé sã váha ní quide-í núú-ndó ní chindee ñaha Tãtã-í Dùtú Ndióxi. ¿Te ndédacã sã ñã tñahá iní-ndó núu cuini-ndó cuãha ñaha-ndo yúú xii-í? —cãchí-gã xáhaⁿ-gã xii-yu.

³³ Te ní xáhaⁿ ñáyiu isráel:

—Ñã díú cuendá nchaa sã váha ní quide-n cuini-ndí cuãha ñaha-ndí yúú xii-n, chi ìⁿ ñu-ni sá ío cãháⁿ úhú-n cuendá Yã Ndióxi. Te díco ìⁿ téé ñuyú-a cùu-n te cãchí-n sã cúu-n Ndióxi —cãchí-yu xáhãⁿ-yu xii-gã.

³⁴ Te ní xáhaⁿ Jèsús:

—Núú tutú Yã Ndióxi sã ndécú ndíhi-ndo cãháⁿ-xi nãcuãã ní cãháⁿ-gã, te duha ní cãchí-gã: “Nchòhó quidé-ndó núu-í”, duha ní cãchí-gã.

³⁵ Te náha-o sã vá cúú quèhndé nihnu-o tñuhu yòdo tñuní núú tutú Yã Ndióxi, chi mee-gã ní cãchí-gã sã cadã-yu núú-gã, te vá cãchí-o sã ñã ndáã.

³⁶ Te núu ducaⁿ ní cáháⁿ-gá sá núú-gá quidé ncháa ñáyiú ní sándáá iní ñáhá xii-gá ñá, ¿te ná cuendá cúdeéⁿ-ndó núú yúhú sá cáchí-í sá cùú-í Déhe-gá? Te mee Yá Ndióxi ní tendaha ñaha-gá xii-í véxi-í ñuyúí-a sá cáda-í chiúⁿ-gá.

³⁷ Te núu ñá túú quide-í ñacuáa ní táuchíúⁿ Tàtà-í cada-í ñá, te vá quindáá iní ñáhá-ndó.

³⁸ Te núu quide-í ñá, te cuéi vá quindáá iní ñáhá-ndó xii mee-í dico quindáá iní-ndó ncháa chiúⁿ quide-í. Ducaⁿ te cutnúni ndáá iní-ndó sá Yá Ndióxi ndécú ndíhi-í te ñ-ni cùú-ndí —cáchí-gá xáhaⁿ-gá xii-yu.

³⁹ Te ní cuini-güedé tñi ñaha tucu-güedé xii-gá quihíⁿ-gá vecaá ní cùú, dico ní xinú núú ñáhá-gá xii-güedé.

⁴⁰ Te ní xica-gá cuáháⁿ-gá ndàa ingá xio yúte Jórdán núú ní xóo dacuàndute ndíi Juàá ñáyiú ndéé díhna, yacáⁿ ní xindecu-gá.

⁴¹ Te yacáⁿ ío vai ñáyiú ní sáháⁿ ní cáháⁿ ndíhi ñaha xii-gá, te ní xitnáhá-yu:

—Ndíi Juàá, cuéi ñá túú ní quide ndíi sá vá yóo tñahí ndàcu cada dico ndáá ní cáháⁿ ndíi, chi dátna-ni ní cáháⁿ ndíi quide téa-a —cáchí-yu xitnáhá-yu.

⁴² Te yacáⁿ ío vai-yu ní sándáá iní ñáhá-yu xii-gá.

11

Ní xihí té Lázará

¹ Núú Bètaniá ní xindecu ñ-ni téa ní xínani-dé Lázará. Te cáhú víhi ní tñahá-dé ní cuhú-dé, te ní xindecu ndíhi-dé cue cúha-dé tá Màriá ndíhi tá Màrta chi xiáⁿ ñúú-yu.

² Te tá Màriá-án Jesús-xí xichí ní sódo àcítí sáháⁿ tñamí sáhá Jesús, te ní nadayíchí-xi sáhá-gá ndíhi idi díquí-xi. Te cuendá sá cùhú cúha-yu té Lázará,

³ núú ní tendáhá-yu ñáyiú ñaha tñuhu cuáháⁿ núú Jesús, te xáháⁿ-yu xii-gá:

—Mèstrú, téa ío cùú iní-n ío càhú tñahá-dé cùhú-dé —cáchí-yu xáháⁿ-yu xii-gá.

⁴ Te sá dúcáⁿ càa tñuhu ní saá, núú ní xáhaⁿ Jesús xii-yu:

—Dico cuéhé-án chi vá cùú-dé sá cùú dúcáⁿ-dè, chi Yá Ndióxi cuini-gá sá quini-yu nchaá sá cáda-gá cuendá chiñuhu ñáhá-yu xii-gá, te díu-ni ducaⁿ chiñuhu ñáhá-yu xii yúhú Déhe-gá —cáchí-gá xáhaⁿ-gá xii-yu.

⁵ Te cuéi ío cùú iní ñáhá Jesús xii té Lázará ndíhi cue cúha-dé

⁶ dico òré ní níhí-gá tñuhu, te ní cuyaa-gá úú-gá nduu núú ndécú-gá.

⁷ Te ní xáhaⁿ-gá xii cue téa xica cuu ndíhi-gá:

—Na quihíⁿ tucu-o dístrítú Jùdea —cáchí-gá xáhaⁿ-gá xii-güedé.

⁸ Te ní xáhaⁿ cué téa xica cuu ndíhi-gá xii-gá:

—Mèstrú, vitna-ni cuini cue téa israhél xindecu yacáⁿ cuáha ñaha-güedé xii-n yúú ní cùú, ¿te cuini-ni tucu-n quihíⁿ-n-ú? —cáchí-güedé xáhaⁿ-güedé xii-gá.

⁹ Te ní xáhaⁿ Jesús:

—Úxúú òré cùú ñ-ni nduu, te núu nduu na càca cuu-o, te ñá túú ná candaundeé-ó chi cùtñuni núú-ó chi díto.

¹⁰ Dico núu niú ná càca cuu-o, te ío ná candaundeé-ó chi vá cùtñuni núú-ó —cáchí-gá xáhaⁿ-gá xii-güedé.

¹¹ Te ní xáhaⁿ Jesús:

—Té Lázará téa ío váha tñahá tñuhu ndíhi-o ní xidí-dé dico quihíⁿ-ó chi ndocani-o-dé —cáchí-gá xáhaⁿ-gá xii-güedé.

¹² Te ní xáhaⁿ-güedé xii-gá:

—Mèstrú, te núu xidí-dé te váa sa ta ndúha-dé cuáháⁿ —cáchí-güedé xáhaⁿ-güedé xii-gá.

¹³ Duha ní cáháⁿ Jesús, chi té Lázará sa ní xihí-dé te cue téa xica cuu ndíhi-gá ní sani iní-güedé sá ní xidí ndisa-dé.

¹⁴ Te Jesús ní xáhaⁿ ndáá-gá xii-güedé:

—Sa ní xihí té Lázará.

¹⁵ Váha-gá sá ñá ní sáháⁿ-í quíngoto-í-dé, chi ndècu ingá chiúⁿ cada-í quini-ndó, te quindáá iní ñáhá-gá-ndó xii-í, te vitna na quihíⁿ-ó núú ndécú yiqui cuñú ndíi —cáchí-gá xáhaⁿ-gá xii-güedé.

¹⁶ Te té Mäxi téa xáhaⁿ-güedé cuáchí ní xáhaⁿ-dè xii dava-gá-güedé:

—Na quihíⁿ-ó ncháa-o chi yacáⁿ cuú-ó ndíhi-dé —cáchí-dé xáhaⁿ-dè xii-güedé.

Jesús càháⁿ-gá sá cuéi na cùú ñáyiú dico ndotó-yu cundecú-yu ndíhi-gá

¹⁷ Te òré ní saá Jesús ñúú Bètaniá, te ní xáháⁿ-yu sá sá ní cuu cúmí nduu ní xihí té Lázará.

¹⁸ Te ñúú-án cáa yàtmi-ni-gá ñúú Jerusalén, dátna cuádava-ná òré cuhuⁿ-o íchi te saá-ó.

¹⁹ Núú xiáⁿ vai ñáyiú israhél ní sáháⁿ-yu ní cáháⁿ ndíhi-yu tá Màrta ndíhi cúhú-xi tá Màriá, te ní sañáhá-yu tñuhu ndee iní sá dúcáⁿ ní xihí cúha-yu.

²⁰ Te ní níhí tá Màrta tñuhu sá ñúhú Jesús íchi cuáháⁿ-gá núú ndécú-yu núú ní sáháⁿ-xi ní sátnahá-xi-gá, te cúhú-xi tá Màriá ní ndóo-xi vehe.

²¹ Te òré ní naníhí tá Màrta Jesús, te ní xáhaⁿ-xi xii-gá:

—Mèstrú, te núu díco ní xindecu-n iha te vá cùú cúha-ndí ní cùú.

²² Te cuéi vitna te núu ná sá ná càcáⁿ-n núú Yá Ndióxi te taxi-gá xii-n —cáchí-xi xáhaⁿ-xi xii-gá.

²³ Te ní xáhaⁿ Jesús:

—Vá ndíhú iní-n chi ndoto cúha-n —cáchí-gá xáhaⁿ-gá xii-xi.

²⁴ Te ní xáhaⁿ tá Màrta:

—Ndáá chi sa xini-í sá ndótó-dě ná quítnahá nduu ndòto nchaa ñáyiú ní xihí —càchí-xi xáhaⁿ-xi xii-gá.

²⁵ Te ní xáhaⁿ Jèsús:

—Yúhú dandòto-í-yu cuendá cundecu-yu ni caa ni quíhíⁿ ná sàá nduu. Te nchaa ñáyiú na quindáá iní ñáhá xii-í, te cuéi na cùu-yu dico ndotó-yu cundecu-í ndihí-yu ni caa ni quíhíⁿ.

²⁶ Te nchaa ñáyiú ndècu vívú ñuyúú-a te núu na quindáá iní ñáhá-yu xii-í, te cundecu ndihí-í-yu ni caa ni quíhíⁿ. ¿Sàndáá iní-n trùhu-a ñá? —càchí-gá xáhaⁿ-gá xii tá Mária.

²⁷ Te xáhaⁿ-xi:

—Mèstrú, sàndáá iní-í, te sàndáá tucu iní-í sá díu-n cùu-n Cristú Déhe Yá Ndióxi, Yaa ní tendaha-gá véxi ñuyúú-a —càchí-xi xáhaⁿ-xi xii-gá.

Jèsús ndàhí-gá núú ní nguínduxi té Lázaru

²⁸ Sata dúcáⁿ ní cáháⁿ-xi te ní sáháⁿ ngana-xi cùhú-xi tá Màriá, te dayuhu ní xáhaⁿ-xi:

—Yácáⁿ ní quexìo Mèstrú, te càna ñaha-dé xii-n —càchí-xi xáhaⁿ-xi.

²⁹ Te sá dúcáⁿ xáhaⁿ cùhú tá Màriá sá cáná ñàha Jesús xii-xi, núu ndihí-ni ní xica-xi cuáháⁿ-xi núú ndécú-gá.

³⁰ Te Jèsús vátá quíhu-gá xití ñuú, chi ndècu-ni-gá núú ní sáháⁿ tnahá ñáhá tá Mária.

³¹ Te ñáyiú isràél ndécú sàñaha trùhu ndee iní xii tá Màriá ndihí cùhú-xi ní sani iní-yu sá cuáháⁿ-xi núú yínduxi cùha-xi ndáhyú-xi ní cáháⁿ-yu, núu nchicúⁿ-yu-xi cuáháⁿ.

³² Te ní sáá tá Màriá núú ndécú Jèsús te ní nguíni xití-xi núú-gá, te xáhaⁿ-xi xii-gá:

—Mèstrú, te núu dico ní xíndecu-n iha te vá cùu cùha-ndí ní cùu —càchí-xi xáhaⁿ-xi xii-gá.

³³ Te sá ní xini Jèsús ndáhyú tá Màriá ndihí ñáyiú isràél nchicúⁿ ñáhá cuáháⁿ, xiáⁿ ío ní cuyica iní-gá.

³⁴ Te ní xáhaⁿ-gá xii-yu:

—¿Ndèé ní taxi ndecu-ndo yiqui cuñú-dé-í? —càchí-gá xáhaⁿ-gá xii-yu.

Te ní xáháⁿ-yu:

—Mèstrú, néhé ná quíhíⁿ-ó te quiní-n —càchí-yu xáháⁿ-yu xii-gá.

³⁵ Te ní ndáhyú-gá tnahá-gá.

³⁶ Te ní xitnàha ñáyiú isràél:

—Súúni cùu iní-dé ndíi ni cùu —càchí-yu xitnàhá-yu.

³⁷ Te davá-yu xitnàhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vā cùu-dé ní cùu-í? —càchí-yu xitnàhá-yu.

Jèsús dándòto-gá té Lázaru

³⁸ Te ío ní cuyica tucu iní Jèsús òrè ní quexìo-gá yuhu yaú núú ní chihi-güedé yiqui cuñú té Lázaru. Te yuhu yaú-áⁿ ndèdí ñⁿ yúú.

³⁹ Te ní xáhaⁿ Jèsús xii-yu:

—Chí xócàni yúú-áⁿ —càchí-gá xáhaⁿ-gá xii-yu.

Te ní xáhaⁿ tá Mária cùha tée ní xihí-áⁿ:

—Mèstrú, sa tucu sáháⁿ-dé chi sa ní cuu cúmí nduu sá ní xihí-dé —càchí-xi xáhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá núu na quindáá iní-n, te quiní-n sá ío càhnu cuu Yá Ndióxi? —càchí-gá xáhaⁿ-gá xii-xi.

⁴¹ Te ní xócàni-yu yúú ndèdí yuhu yaú-áⁿ. Te ní ndacoto-gá andiu, te ní xáhaⁿ-gá xii Tātá-gá Dútú Ndióxi:

—Táu, ndácáⁿ táhù-í núu-n sá ní tètòho-n trùhu ní cáháⁿ-í.

⁴² Te yúhú sa náha-í sá ncháá-ni òrè ndèdóho ñaha-n xii-í, dico duha cáháⁿ-í cuendá sá ná təcú dóho nchaa ñáyiú ndècu iha cuendá quindáá iní-yu sá díu-n ní tendaha ñaha-n xii-í véxi-í ñuyúú-a —càchí-gá xáhaⁿ-gá xii Dútú Ndióxi.

⁴³ Te sáta dúcáⁿ ní cáháⁿ-gá ndihí Yá Ndióxi, te níhi ní cáháⁿ-gá xáhaⁿ-gá xii tée ní xihí-áⁿ:

—¡Lázaru, tandèe xiáⁿ! —càchí-gá xáhaⁿ-gá xii-dé.

⁴⁴ Te ní ndee tée ní xihí-áⁿ yaú-áⁿ, te ndùtu dóo cuíñi ndàha-dé ndihí sáháⁿ-dé, te dàhu tucu ñⁿ dóo núú-dé. Te ní xáhaⁿ Jèsús xii-yu:

—Chí nándàxi-dé te dañà-ndo-dè ná cáca-dé —càchí-gá xáhaⁿ-gá xii-yu.

Ndùcu-güedé nàcuá cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiú nchicúⁿ ñáhá xii tá Màriá cuáháⁿ ío vāi-yu ní sàndáá iní-yu Jèsús sá ní xini-yu nàcuá ní quide-gá.

⁴⁶ Dico davá-yu ní sáháⁿ-yu núú cuè tée cùu fariséú, te ní caní-yu cuendú núú-güedé nàcuá ní quide Jèsús.

⁴⁷ Te tée cùu fariséú ndihí cue dútú cùnùu ní natacá-güedé ní xóo-güedé jündá, te ní xitnàha-güedé:

—¿Nása cada-o?, chi tée-áⁿ ío vāi sá vā yóo tnahí ndàcu cada quide-dé.

⁴⁸ Te núu na dañá ío te nchaa ñáyiú quindáá iní ñáhá-yu xii-dé, te quixi cue tée ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

⁴⁹ Te ñⁿ cue tée-áⁿ nání-dé Caifás, te cùnùu-gá-dé núú dàva-gá cue dútú cuíá-áⁿ, te ní xáhaⁿ-dé xii-güedé:

—Nchòhó ní lùha ñá túú cùtnuní iní-ndó.

⁵⁰ Te ni ñã sãha-ndo cuendá sá vãha-gã tnahá-ó, te núu na cùú ìⁿ-ni téé cuendá nchaa ñáyiú isrâél, te ñã díú sã dánãa ñaha-güedé xii-yu —cächí-dé xãhaⁿ-dê xii-güedé.

⁵¹ Dico té Caifás chi ñã díú sã cùú ìní mée-dê ní cãháⁿ-dé, chi cuendá sá cuíá-ãⁿ ní cunuu-dê núú cuè dútú, núú xiãⁿ Yã Ndióxi ní dácáhú ìní ñáhã-gã nãcuáa cãháⁿ-dé sã Jèsús cuú-gã sá cùú-xí nchaa ñáyiú isrâél.

⁵² Te ñã díú cuendá mee-ni ñáyiú-ãⁿ cuú-gã, chi cuú-gã tnahã cuendá nchaa ñáyiú ní sándáá ìní ñáhã xii-gã, ñáyiú nchítenuu nihí ñuyúú, te ìⁿ-nã cuú-yu ndihí-gã.

⁵³ Núu ndéé nduu-ãⁿ ní ndatnúhu cue téé cùnuu núú ñáyiú isrâél nãcuáa cada-güedé cahni-güedé Jèsús.

⁵⁴ Te xiãⁿ núu ñã ní xica cuu-gã Jèsús quini ñáhã ñáyiú isrâél, te ní quee-gã cuáhãⁿ-gã ñuú Efraín, ìⁿ ñuú cáá yãtñi yucu, yacáⁿ ní nguíñi-gã ndihí cue téé xica cuu ndihí-gã.

⁵⁵ Te ta cüyatni nduu cadã-yu vico pãscuá. Te cuéhé ñáyiú ní quee-yu ñuú-yu cuáhãⁿ-yu ñuú Jerusálén cuendá sã sã ndihí-yu nchaa-yu nduu íí, te tnahã nduu vico pãscuá.

⁵⁶ Te yacáⁿ nãndücú-yu Jèsús ní cùu te ñã túú-gã òré-ãⁿ, te ní nanihí tnahã-yu xití veñúhu, te xitnahã-yu:

—¿Nãsa sãni ìní-ndó-í? ¿Quixi Jèsús vico ãⁿ ñáhã? —cächí-yu xitnahã-yu.

⁵⁷ Te cue téé cùu farisèú ndihí cue dútú cùnùu sa ní xãhaⁿ-güedé xii ñáyiú sã núu ndëda-ni cáá-yu xini-yu núú ndécú Jèsús te na cãháⁿ-ni-yu cuendá tñi ñaha-güedé xii-gã.

12

*Ìⁿ ñãdihí chihí-ãⁿ Jèsús acití
(Mt. 26:6-13; Mr. 14:3-9)*

¹ Ìñú-gã nduu cumáni tnahã vico pãscuá, te ní sãháⁿ Jèsús ñuú Bètaniá, ñuú té Lázaru téé ní dándótó-gã.

² Te xiãⁿ ní cadúha-yu sã ní cudini Jèsús. Te tá Márta ní sani-xi cóhó, te té Lázaru yíñi-dê mësã ndihí Jèsús, ndihí dava-gã-güedé xéxi-güedé.

³ Te tá Màriá nêhé-xí cuãdava litrú acití sãháⁿ tñamí sã ìo ndeyáhu, te acití-ãⁿ ní cuáha mee-ni yücú nãrdú, te ní sódó-xi sãhá Jèsús, te ní nadayichí-xi ndihí idi díquí-xi sãhá-gã. Te nihí xití vehe ní xité nuu dicó acití-ãⁿ.

⁴ Te té Jüdás dëhe té Ximú Iscarioté diu-ni ìⁿ téé xica cuu ndihí-gã, téé cuáha cuendá ñáhã xii-gã núú cuè téé cùu úhú ìní ñáhã ní xãhaⁿ-dê xii-gã:

⁵ —¿Nã cuendá ñã ní cüyáhu acití-a sã ùní ciëndú díhúⁿ denàriú cuu cuendá ñáyiú ndàhú? —cächí-dé xãhaⁿ-dê xii-gã.

⁶ Dico sã dúcãⁿ ní cãháⁿ té Jüdás chi ñã díú sã ndás ñùhu ìní-dé ñáyiú ndàhú chi dicó-ni ìⁿ ñãdúhú cùú-dê, chi diu-dé nêhé cuendá-dé díhúⁿ-güedé nchaa-güedé te ní xóo duhu ñaha-dé xii-güedé.

⁷ Te ní xãhaⁿ Jèsús:

—Daña, vã dásátu-n ìní xíchí-a na tàxúha nahí-xi àciti-a, chi nãndihí ndéé òré nã nguindúxi-í.

⁸ Chi nchòhó chi cuhuⁿ tnahã-ni ñáyiú ndàhú tnuú-ndó, dico yúhú chi vã nchãá nduu cundecu ndihí ñaha-í xii-ndo —cächí-gã xãhaⁿ-gã xii-dé.

*Tnahã té Lázaru cuini-güedé cahni
ñaha-güedé xii-dé*

⁹ Te vai ñáyiú isrâél ní nihí-yu tñuhu sã ndécú Jèsús ñuú Bètaniá. Te ní sãháⁿ-yu cuendá quini-yu-gã, te quini-yu tnahã té Lázaru téé ní dándótó-gã.

¹⁰ Te cue dútú cùnùu ní ndatnúhu-güedé ní cuu ìⁿnuu-güedé cuendá sã cáhni-güedé tnahã té Lázaru ní cùu,

¹¹ chi diu cuendá téé-ãⁿ ní cuu cuéhé ñáyiú isrâél tá daña nihnú-yu-güedé cuáhãⁿ cuendá sã ní sándáá ìní-yu Jèsús.

Jèsús cuãnguihu-gã ñuú Jerusálén

(Mt. 21:1-11; Mr. 11:1-11; Lc. 19:28-40)

¹² Te nduu tñé-ãⁿ vai ñáyiú ní quexio ñuú Jerusálén cuendá cundecu-yu vico, te ní nihí-yu tñuhu sã Jèsús sãá-gã tnahã-gã cundecu-gã vico-ãⁿ,

¹³ núu ní xehndé-yu ndaha yùtnu ñuú, te nêhé-yu ní sãháⁿ ní sãtnahã ñáhã-yu xii-gã. Te nihí ní cãháⁿ-yu, te cächí-yu:

—¡Io cãhnu cuu Yã Ndióxi! Te ducaⁿ-ni ìo cãhnu cuu Yã ní tendaha-gã véxi quindaha ñaha xii-o —duha ní cächí-yu.

¹⁴ Te Jèsús ní nihí-gã ìⁿ búrru, te yòdo-gã-di cuáhãⁿ. Te ducaⁿ ní cuu chi ní quee ndãá-xi nãcuáa cãháⁿ-xi núú tütú Yã Ndióxi núú cächí-xi:

¹⁵ Vã yúhú nchòhó cue ñáyiú ndècu ñuú Sión, chi iha véxi téé yindaha ñaha xii-ndo yodo-dé ìⁿ búrru.

Duha cächí-xi núú tütú-gã.

¹⁶ Dico cue téé xica cuu ndihí Jèsús ñã ní ndacu ìní-güedé nãcuáa cãháⁿ-xi núú tütú Yã Ndióxi nãcuáa cada Jèsús. Dico sátã cuãndaa-gã andiu cada cãhnu ñaha Tãtã-gã xii-gã, te ní ndacu ìní-güedé sã dúcãⁿ yòdo tñuni nãcuáa cada-gã, te ducaⁿ ní cuu.

¹⁷ Nchaa ñáyiú ní xindecu ndihí Jèsús òré ní dándótó-gã té Lázaru, ya yacáⁿ ní caní-yu cuendú núú ñáyiú nãcuáa ní quide ñaha-gã xii-dé.

¹⁸ Te vai-yu ní sãháⁿ-yu núú ndécú Jèsús cuendá sã ní nihí-yu tñuhu ní quide-gã sã vã yòo tñahí ndacu cada.

¹⁹ Te cue téé cùu farisèú ní xitnahã-güedé:

—Ní xito-ndo ná ñá túú nàndihi sá quidé-ó-vá, chi nchaa ñáyiu ní chinchícúⁿ ñáhá-yu xii-dé —càchí-güedé xitnàha-güedé.

Ñáyiu ñá túú cùu ñáyiu isràèl nándúcú-yu Jèsús

²⁰ Te tnàhá ñáyiu ñá túú cùu ñáyiu isràèl ní sáháⁿ-yu vico ñuú Jerusàlén ní quide càhnú-yu Yá Ndiòxi.

²¹ Te ñáyiu-áⁿ ní sáháⁿ-yu núú tē Lìpé téé ñuú Bètsaidá, te ñuú-áⁿ yíndèhu-xi distritú Galiléa. Te ní xáháⁿ-yu xii-dé:

—Tátá, vá cündée iní-n càchí tnúhu-n núu ndéé ndécú Jèsús, chi cuini-ndí cáháⁿ ndihi-ndí-gá —càchí-yu xáháⁿ-yu xii-dé.

²² Te té Lìpé ní naníhí-dé té Ndríxí te ní xáháⁿ-dē nàcuáa cáháⁿ-yu, te ndí ndúú-güedé ní sáháⁿ-güedé ní xáháⁿ-güedé xii Jèsús nàcuáa cáháⁿ-yu.

²³ Te ní xáháⁿ Jèsús xii-güedé:

—Vitna ní cuyatni òré cada càhnu ñaha Tàtá-í xii-í, te quini-yu sá ò cànhu cuu yúhú Téé cùu ñani tnáhá-yu nchaa-yu.

²⁴ Te na càchí tnúhu ndáá-í xii-ndo sá núu ñⁿ tatá vá ngává-xí núú ñúhú tēhyú-xi ña, te diu-ni ducaⁿ cùnduu-xi cundecu-xi. Dico ñⁿ tatá ná ngává núú ñúhú xínu déhe-xi, te xiáⁿ ná dáacayá tnáhá-xí, te mee-xi tēhyú-xi.

²⁵ Te nchaa ñáyiu ío ñúhu iní-xi cundecu ñuyúú-a ñá túú ñúhu iní-yu Yá Ndiòxi, te ñáyiu-áⁿ cuíta nihnú-yu. Te nchaa ñáyiu ío ñúhu iní ñáhá xii Yá Ndiòxi, ñáyiu-áⁿ cundecu-yu ndihi-gá ni caa ni quíhíⁿ.

²⁶ Te nchaa ñáyiu cuiniⁿ conu cuechi núú-í xini ñúhu-xi natuha ñáhá-yu xii-í, te nduu táhú-yu cundecu-yu núú ñúhú-í cundecu-í. Te nchaa ñáyiu na cùnu cuechi núú-í, te cada càhnu ñaha Tàtá-í xii-yu —càchí-gá xáháⁿ-gá xii-güedé.

Jèsús càháⁿ-gá sá càhni ñaha-güedé xii-gá

²⁷ Te ní xáháⁿ tucu-gá:

—Ío ndíhú iní-í. Te cùñaha-í xii Tàtá-í tau-nihnu ñaha-gá núu dícó sá cúú, dico vá cúú chí cuendá tnàhí-a véxi-í —càchí-gá xáháⁿ-gá xii-güedé.

²⁸ Te ní xáháⁿ-gá xii Tàtá-gá Dútú Ndiòxi:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáyiu xii-n —càchí-gá xáháⁿ-gá.

Te ducaⁿ te ní tecú ní cáháⁿ Yá Ndiòxi ndéé andíu, te càchí-gá:

—Sa ní quidé-í nàcuáa cachí ñáyiu sá ío càhnu cuu-í. Te cada tucu-í cuendá cada càhnu ñaha-gá-yu xii-í —càchí Yá Ndiòxi xáháⁿ-gá xii Déhe-gá.

²⁹ Te nchaa ñáyiu xíndecu ní tecú dóho-yu ní cáháⁿ-gá, dico ñá túú ní sàni iní-yu sá méé-gá ní cáháⁿ, chí davá-yu ní xitnàhá-yu sá ñúhu ní cáháⁿ, te davá-yu ní xitnàhá-yu sá ñⁿ espíritú xínú cuèchi núú Yá Ndiòxi ní cáháⁿ.

³⁰ Te ní xáháⁿ Jèsús xii-yu:

—Ñá díú cuendá yúhú ní cáháⁿ Yá Ndiòxi, chí ní cáháⁿ-gá cuendá sá nchóhó cund-edóho-ndo.

³¹ Te vitna ní sáá nduu càda ndáá Yá Ndiòxi cuèchi nchaa ñáyiu ñuyúú-a, te ducaⁿ te vá cùnuú-gá yucu ñávàha.

³² Te na càta caa ñaha-güedé xii-í núú cùrúxí, te xiáⁿ cuú-í te nihí-yu tnúhu ní càa xico ñuyúú, te quindáá iní-yu tnúhu-í —càchí-gá xáháⁿ-gá xii-yu.

³³ Duha ní cáháⁿ-gá cuendá cutnùni iní-yu nàcuáa ndoho-gá òré cuú-gá.

³⁴ Te ní xáháⁿ-yu xii-gá:

—Nihí-ndí tnúhu sá núú tütú yódó tnùni tnúhu Yá Ndiòxi càháⁿ-xí sá Cristú Yaá tendaha-gá quixi ñuyúú-a cundecu-gá ni caa ni quíhíⁿ. ¿Te yòhó nása càháⁿ-tu-n sá ñⁿ téé cùu ñani tnáhá nchaa ñáyiu ñuyúú-a cahni ñaha-güedé núú cùrúxí? Te cachí tnúhu-n ná cúú tée-áⁿ —càchí-yu xáháⁿ-yu xii-gá.

³⁵ Te ní xáháⁿ Jèsús:

—Yúhú cuú-í dàtná ñⁿ ñuhú dàyehé ñuyúú-a, dico sacú-ni nduu ndécu ndíhí ñaha-í xii-ndo. Te caca-ndo ichi ndáá vitna dàyehé-gá-í núú-ndó chí na cùnee te vá cutnùni-gá núú-ndó ndéé ichi quíhíⁿ-ndó.

³⁶ Quindáá iní ñáhá-ndó xii-í vitna ndécu ndíhí ñaha-gá-í xii-ndo dàndixi túu-í iní-ndó, cuendá cutnùni iní-ndó nàcuáa nduu cuendá Yá Ndiòxi, te cuu-ndo déhe-í —càchí-gá xáháⁿ-gá xii-yu.

Te sáta dúcáⁿ ní cáháⁿ Jèsús, te ní quee-gá cuáháⁿ-gá ñⁿ núú vá ná nihí ñáhá-yu xii-gá.

Ñáyiu isràèl ñá cuini-yu quindáá iní-yu Jèsús

³⁷ Te cuéí ío vài sá vā yòo tnàhí ndàcu cada ní quide Jèsús ní xini-yu, dico ní dùcaⁿ ñá túú ní sàndáá iní-yu-gá.

³⁸ Te ducaⁿ ní quidé-yu chí dacuítí ní quee ndáá-xi nàcuáa ní chídó tnùni ndí Chàíá ndí ní cáháⁿ tnúhu Yá Ndiòxi ndéé sanaha núú tütú-gá núú càchí-xi:

Yòhó Yaá cúú Xitohó-í, vá yòo ñⁿ sàndáá iní tnúhu càháⁿ-ndí.

Te vá yòo ñⁿ cutnùni iní-xi sá ío càhnu cuu-n. Duha ní chídó tnùni ndí Chàíá núú tütú-gá.

³⁹ Te ñá ní sàndáá iní-yu chí ní quee ndáá-xi nàcuáa ní chídó tnùni tucu ní quee Chàíá núú tütú Yá Ndiòxi nàcuáa cáháⁿ Jèsús:

⁴⁰ Mee Yá Ndiòxi ní quide-gá sá vā tecú tnùni-yu,

chí ní dádàhu ndodo iní ñáhá-gá xii-yu, chí ío sáá iní-yu núú ñá ní cuini-gá-yu quindáá iní ñáhá-yu xii-gá.

Te ní vā túhá ñáhá-yu xii yúhú cuendá dacácu nihnú-í-yu.

⁴¹ Duha ní chídó tnùni ndí Chàíá nàcuáa cáháⁿ Jèsús chí ní xini ndí sá ío càhnu cuu-gá.

42 Te cuèi ducaⁿ ní cuu dico titní cue téé cùnnoo núú ñáyiú isráèl ní sándáá iní ñáhá-güedé xii-gá. Dico ñá túú ní xóo cáháⁿ ndáá-güedé chí ní xóo yúhú-güedé sá vâ dâñá-gá cue téé cùu fariséú quíhu-güedé veñúhu.

43 Chí ní xóo cudíi-gá iní-güedé sá càháⁿ ñáyiú dàcúúxí tnúhu càháⁿ Yâ Ndiòxi.

Ñáyiú ñá túú sándáá iní tnúhu Jèsús cuíta nihnú-yu

44 Jèsús níhi ní cáháⁿ-gá, te càchí-gá:

–Nchaa ñáyiú na quíndáá iní ñáhá xii-í, te ñá díú-ní mèe-í quíndáá iní-yu, chí tnáhá Tàtá-í Yaa ní tendaha ñaha xii-í véxi-í ñuyíú-a quíndáá iní-yu.

45 Te ñáyiú xini ñáhá xii yúhú xini-yu tnáhá Tàtá-í.

46 Te yúhú véxi-í dandixi túu-í iní ñáyiú ñuyíú-a cuèndá cutnùni iní-yu nàcuáa ndúu cuèndá Yâ Ndiòxi, te nchaa ñáyiú na quíndáá iní ñáhá xii-í te vâ cùndècu-gá-yu ichi cuèhé ichi duha.

47 Te núu ió davá-yu ndèdóho-yu nàcuáa càháⁿ-í te ñá túú tní-yu tnúhu-í, te ñá díú yúhú dàcuíta nihnu-í-yu, chí ñá túú véxi-í ñuyíú-a sá dàcuíta nihnu-í-yu, chí véxi-í sá dàcácu nihnu-í-yu.

48 Te nchaa ñáyiú na cùyíchi iní ñáhá xii-í te ñá túú quide cuèndá-yu nàcuáa càháⁿ-í, te ñáyiú-áⁿ ná sáa nduu te cuíta nihnú-yu chí ñá ní tní-yu tnúhu ní cáháⁿ-í.

49 Te yúhú ñá túú càháⁿ-í tnúhu véxi iní mèe-í, chí mee Tàtá-í Yaa ní tendaha ñaha xii-í véxi-í ñuyíú-a ní cachí tnúhu-gá nàcuáa cunduu tnúhu càháⁿ-í danèhé-í ñáyiú.

50 Te yúhú xini-í sá tnúhu ní táuchíúⁿ Tàtá-í cáháⁿ-í cúú-xí ñⁿ sá vâha sá cúú xii-ndo chí nduu táhu-ndó cùndecu-ndo ndihi-gá ní caa ní quíhíⁿ, núu xiáⁿ càháⁿ-í nchaa nàcuáa ní táuchíúⁿ-gá –càchí-gá xáhaⁿ-gá xii-yu.

13

Jèsús náquète-gá sáhá cuè téé xica cuu ndihi-gá

1 Te cùmání-gá tnahá vico pàscúa, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tàtá-gá. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ní cuu iní ñáhá-gá xii-yu.

2-4 Te ní quíhu yucu ñávâha díquiⁿ tè Júdás déhe té Ximú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhu iní ñáhá xii-gá. Te Jèsús sa nàha-gá sá mèe Yâ Ndiòxi Yaa cúú Tàtá-gá ní sáñaha-gá tnúhu ndee iní xii-gá sá cádá-gá núú-gá, te nàha-gá sá díú núú Tàtá-gá ní quee-gá véxi-gá ñuyíú-a. Te sáa nduu nàsáa tucu-gá núú Tàtá-gá. Te cùdini Jèsús ndihi

cue téé xica cuu ndihi-gá ní cùu, te ní ndacuñí-gá yuhu mèsá, te ní taunuu-gá ñⁿ dóo nihnú-gá, te ní queheⁿ-gá ñⁿ dóo ní dàcúú-tú-gá núú yíquí-gá.

5 Te ní chíhi-gá ndute ñⁿ tñá, te xiáⁿ ní naquete-gá sáhá cuè téé xica cuu ndihi-gá, te ndihi dóo ndúú núú yíquí-gá-áⁿ ní ndayíchi-gá sáhá-güedé.

6 Te òré naquete-gá sáhá tè Ximú, àdi Pelú, ní cùu ní xáhaⁿ-dè xii-gá:

–Mèstrú, ¿te yòhó naquete-n sáhá-í-u? –càchí-dé xáhaⁿ-dè xii-gá.

7 Te ní xáhaⁿ Jèsús:

–Vitna ñá cutnùni iní-n sá quidè-í-a dico sáa nduu te cutnùni iní-n –càchí-gá xáhaⁿ-gá xii-dé.

8 Te ní xáhaⁿ tè Pelú:

–Yúhú chí vâ ñⁿ ndúu te naquete-n sáhá-í –càchí-dé xáhaⁿ-dè xii-gá.

Te ní xáhaⁿ Jèsús:

–Te núu vâ náquète-í sáhá-n áⁿ, te vâ cádá-gá-n cuèndá sá ndécú ndihi ñaha-í xii-n –càchí-gá xáhaⁿ-gá xii-dé.

9 Te ní xáhaⁿ tè Pelú:

–Te núu ducaⁿ te vâ mèe-ní sáhá-í naquete-n, chí naquete-n tnáhá ndaha-í ndihi díqui-í –càchí-dé xáhaⁿ-dè xii-gá.

10 Te ní xáhaⁿ Jèsús xii-dé:

–Tée ichi ní xichi chí xini ñuhu-xi sá sáhá-na-dè ndoo, te ducaⁿ te nduu ndoo-dé nihí-dé. Te nchòhó sa càndoo-ndo cué ñá ncháá-ndó càndoo –cachí-gá xáhaⁿ-gá xii-dé.

11 Te ducaⁿ ní cáháⁿ Jèsús chí sa nàha-gá sá ñⁿ cuè téé-áⁿ cuáha cuèndá ñáhá-güedé xii-gá núú cuè téé cùu úhu iní ñáhá, xiáⁿ núu ní xáhaⁿ-gá sá ñá túú càndoo-güedé nchaa-güedé.

12 Te sátá ní naquete-gá sáhá-güedé, te ní ndécúihnu-gá dóo-gá, te ní nucóo-gá yuhu mèsá, te ní xáhaⁿ-gá xii-güedé:

–¿Te ní cutnùni iní-ndó sá ní quide ñaha-í xii-ndo-áⁿ?

13 Te nchòhó vâha-ni càháⁿ-ndó sá cùnùu-í, te dânaní ñaha tucu-ndo Mèstrú xii-í, te ndáá càháⁿ-ndó.

14 Te núu yúhú cúu-í Mèstrú, te cùu tucu-í téé cùnnoo te náquète-í sáhá-ndó, te ñⁿ-ni ducaⁿ càda nchòhó tucu naquete sáhá tnáhá-ndó.

15 Yúhú sànu ichi ñaha-í xii-ndo nàcuáa cada-ndo.

16 Te na càchí tnúhu ndáá-í xii-ndo sá ní ñⁿ téé xinu cuechi ñá túú cùnnoo-dé dàcúúxí pàtróoⁿ-dè, te ní ñⁿ téé xica chiúⁿ ñá túú cùnnoo-dé dàcúúxí téé tendaha ñaha xii-dé cuáháⁿ-dè chiúⁿ. Te ducaⁿ sàtnahá-xi cùu yúhú ndihi nchòhó.

17 Te núu ní cutnùni iní-ndó nàcuáa ní quide ñaha-í xii-ndo ña, te ducaⁿ càda

tnaha-ndo te cuu váha iní ñáhá Yá Ndióxi xii-ndo.

18 Yúhú, ñá túú càháⁿ-í cuendá-ndó nchàa-ndo, chí yúhú sa nàhá-í nàcuáa sàni iní ìⁿ ìⁿ nchòhó cue téé ní nanducu ñàhà-í tnuú nchaa ñáyiú ñùhu ichi cuehe ichi duha ní cachi-í chitnahá ñáhá-ndó xii-í. Chí dacuítí sá quée ndáá-xi nàcuáa càháⁿ-xi núú tütú Yá Ndióxi núú cachi-xi: “Tée xèxi ndihí ñaha xii-í ngóo-dé cuu úhú iní ñáhá-dé”, duha cachi-xi núú tütú-gá.

19 Te cùmání-gá sáá nduu càda ñaha-dé sá sání iní-dé, núú xiáⁿ cachi tnuú-í xii-ndo nàcuáa cada-dé, chí na sáá nduu-áⁿ te cutnúni iní-ndó sá yúhú cúu-í Cristú Yá ní tendaha Yá Ndióxi véxi ñuyú-a.

20 Te na cachi tnuú ndáá-í xii-ndo sá nchàa ñáyiú na quèheⁿ cuendá ñáhá xii cue téé tendaha-í cáháⁿ tnuú-í, te cada iní-yu sá tnahá yúhú ní queheⁿ cuendá-yu. Te nchaa ñáyiú na quèheⁿ cuendá ñáhá xii-í, te cada iní-yu sá tnahá Tàtá-í Dútú Ndióxi Yá ní tendaha ñaha xii-í véxi-í ñuyú-a ní queheⁿ cuendá-yu —cachi-gá xáhaⁿ-gá xii-güedé.

Jèsús cachi-gá sá té Júdás cuáha cuendá ñáhá-dé xii-gá núú cuè téé cuu úhú iní ñáhá (Mt. 26:20-25; Mr. 14:17-21; Lc. 22:21-23)

21 Te sáta dúcáⁿ ní cáháⁿ Jèsús te io ní ndihí iní-gá, te ní xáhaⁿ-gá xii-güedé:

—Na cachi tnuú ndáá-í xii-ndo sá díú-ní ìⁿ nchòhó cuáha cuendá ñáhá-ndó xii-í núú cuè téé cuu úhú iní ñáhá —cachi-gá xáhaⁿ-gá xii-güedé.

22 Te ní ngúita cue téé xica cuu ndihí-gá ndehé ìⁿ ndehe ìⁿ núú tnahá-güedé, chí ñá ní cutnúni iní-güedé ndédacàa-güedé cuendá-güedé ní cáháⁿ-gá.

23 Te ìⁿ téé-áⁿ io cùdí iní ñáhá Jèsús, te ndècu yatni-dé ñáhi-gá cùdini-dé ndihí-gá.

24 Te té Xímú, àdi Pelú chí úú diu-dé, ní quide-dé seña núú téé ndècu yatni ñáhi-gá-áⁿ sá càcáⁿ tnuúhú-dé núú-gá núú ndédacàa-güedé cuendá-güedé ní cáháⁿ-gá.

25 Te téé-áⁿ ní sáháⁿ ndehe yatni-gá-dé ñáhi Jèsús, te ní xáhaⁿ-dè xii-gá:

—Mèstrú, ¿ndédacàa-ndí cuendá-ndí ní cáháⁿ-n-í? —cachi-dé xáhaⁿ-dè xii-gá.

26 Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cúú-dé —cachi-gá xáhaⁿ-gá xii-dé.

Te ní chindóyo-gá luha pàá, te ní sáha-gá té Júdás déhe té Xímú Iscarióte.

27 Te òré ní queheⁿ-dé pàá, te ní ngúndecu ndihí ñaha ñuuⁿ-ná yucu ñávaha xii-dé. Te ní xáhaⁿ Jèsús:

—Sá ní sani iní-n càda-n te cada ndihí-ni-n —cachi-gá xáhaⁿ-gá xii-dé.

28 Te ní ìⁿ cue téé cùdini ndihí-gá ñá ní tècú tnuú-güedé nása nduu tnuú ní xáhaⁿ-gá xii té Júdás.

29 Te dava-güedé ní sani iní-güedé sá sá cuendá sá ndècú ndihí-dé sá ñúhú ñáhiⁿ, te váa íó ìⁿ sá cuááⁿ-dè nándihí-güedé vico, àdi ñáhiⁿ cuáha-dé ñáyiú ndàhú xáhaⁿ-gá ní cáháⁿ-güedé.

30 Te sa ní cundiⁿ ní queheⁿ cuendá té Júdás pàá caxi-dé, te òré ní ñíhí-dé pàá-áⁿ te ní quee-dé cuáháⁿ-dè.

Jèsús cachi tnuú-gá nàcuáa cada-o

31 Te sáta ní quee té Júdás cuáháⁿ-dè, te ní xáhaⁿ Jèsús xii dava-gá-güedé:

—Vitna te quini-ndó ndihí nchaa ñáyiú sá ío càhnu cuu yúhú Tée cùu ñani tnahá-ndó nchàa-ndo, te òré-áⁿ cutnúni iní-ndó sá ío càhnu cuu tucu mee Yá Ndióxi.

32 Te núú yúhú quidé càhnu-í Yá Ndióxi, te diu-ni ducaⁿ càda càhnu ñaha-gá xii yúhú, te ñá túú-gá titni nduu te ducaⁿ càda-gá.

33 Te nchòhó cue déhe-í na cachi tnuú-í sá sàcú duha-ná nduu ndècu ndihí ñaha-í xii-ndo. Te nchòhó nanducu ñaha-ndo xii-í dico vá ná ñíhí ñáhá-ndó dàtná ní xáhaⁿ-í xii ñáyiú isráel, te diu-ni ducaⁿ càháⁿ-í núú-ndó sá vá ndácú-ndó quíhíⁿ-ndó núú quíhíⁿ-í.

34 Te duha sànu ichi ñaha tucu-í xii-ndo nàcuáa cada-ndo sá cúú iní tnahá-ndó ìⁿ ìⁿ ndo datná yúhú cúú iní ñáhá-í xii-ndo.

35 Te núu na cùu iní tnahá-ndó ìⁿ ìⁿ-ndo ña, te ducaⁿ te cutnúni iní nchaa ñáyiú sá cúú-ndó cuè téé ní chitnahá ñáhá xii-í —cachi-gá xáhaⁿ-gá xii-güedé.

Jèsús càháⁿ-gá sá té Pelú vá ñuuu-dé sá xicá cùu ndihí ñaha-dé xii-gá

(Mt. 26:31-35; Mr. 14:27-31; Lc. 22:31-34)

36 Te ní xáhaⁿ té Xímú, àdi Pelú chí úú diu-dé, xii Jèsús:

—Mèstrú, ¿ndéé quíhíⁿ-n-í? —cachi-dé xáhaⁿ-dè xii-gá.

Te ní xáhaⁿ Jèsús:

—Vitna te vá ndácú-n càncicúⁿ ñáhá-n quíhíⁿ núú quíhíⁿ-í, dico na sáá nduu te ñá sáá-n núú cùndècu-í —cachi-gá xáhaⁿ-gá xii-dé.

37 Te ní xáhaⁿ té Pelú xii-gá:

—Mèstrú, ¿te ná cuendá núu vá ndácú-í càncicúⁿ ñáhá-í xii-n quíhíⁿ vitna-í? Chí yúhú ñá túú tnahí yúhú-í cuèi na cùu-í sá cuendá-n —cachi-dé xáhaⁿ-dè xii-gá.

38 Te ní xáhaⁿ Jèsús:

—¿Te ndáá sá xèhndé iní-n sá cuèi na cùu-n cuendá-í-u? Te na cachi tnuú ndáá-í xii-n sá cùmání-gá cana líhi, te úní xito cáháⁿ-n sá ñá túú xini ñáhá-n xii-í —cachi-gá xáhaⁿ-gá xii-dé.

14

Jèsús dánèhé ñáhá-gã nàcuáa cada-o nàsáá-ó núú ndécú Yá Ndióxi

¹ Te ní xáhaⁿ-gã xii-güedé:

—Te ñá túú nã cani iní-ndó. Quindáá iní-ndó Yá Ndióxi, te quindáá iní-ndó yúhú.

² Chi núú ndécú Tàtá-í ío ñúne núú cùndècu-o, chi núú ñáhá ñá te sa cachí tnúhu-í xii-ndo ni cùu. Te vitna na ñuhú-í te cada túha-í núú cùndècu-ndo.

³ Te dàtnùni quixi tucu-í te candeca ñaha-í xii-ndo quíhíⁿ cuendá ìⁿ-ni xichi cundecu-o.

⁴ Te sa ñaha-ndo ndéé quíhíⁿ-í te sa xiní-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Mǎxi xii-gá:

—Mèstrú, ñá túú xiní-ndí ndéé quíhíⁿ-n te da ìchi-ná quini-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùu-í dàtná ìⁿ ichi te càháⁿ-í tnúhu ndáá, te yúhú cada-í te naníhí tǎhú-ndó. Te ìⁿ ñá díi-ñi yúhú cada-í te sáá-ndó núú Yá Ndióxi cundecu-ndo te núu na quindáá iní ñáhá-ndó xii-í.

⁷ Te núú dico cùtnùni ndisa iní-ndó yòo cuu-í-án, ducaⁿ te cutnùni iní-ndó yòo cuu Tàtá-í ní cùu. Dico vitna dàtná ñá ní xiní núú-ndó Dútú Ndióxi Yaá cùú Tàtá-í cada iní-ndó, chi ní xiní-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndióxi chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xiní ñáhá-n xii-í? Te sa ní cuu vai nduu ndecu ndihi ñaha-í xii-ndo, chi ñáyiú xiní ñáhá xii-í te xiní-yu tnáhá Tàtá-í. ¿Te ná cuendá yòhó càchí-n sá dánèhé ñáhá-í xii-ndo Tàtá-í?

¹⁰ ¿Náa ñá túú sàndáá iní-ndó sá yúhú ndécú-í ndihi Tàtá-í? Te mee-gã ndécú ndihi ñaha-gã xii-í. Te nchaa tnúhu càháⁿ-í núú-ndó ñá túú càháⁿ-í sá véxi iní mèe-í, chi Tàtá-í Yaá ndécú ndihi ñaha xii-í chindèe ñaha-gã quidè-í chiúⁿ-gá.

¹¹ Te quindáá iní-ndó sá yúhú ndécú-í ndihi Tàtá-í, te ducaⁿ mèe-gã ndécú ndihi ñaha-gã xii-í. Te núu ñá túú sàndáá iní-ndó tnúhu càháⁿ-í-a, te dandacu iní-ndó nchaa chiúⁿ ta quide-í véxi, te quindáá iní ñáhá-ndó.

¹² Te na càchí tnúhu ndáá-í xii-ndo sá nchaa ñáyiú na quindáá iní ñáhá xii-í, te cadá-yu chiúⁿ quide-í te càhu-gã chiúⁿ cadá-yu chi yúhú ñuhú-í núú ndécú Tàtá-í cundecu-í nàcuáa níhí ndéé-gã-yu cundecu-yu.

¹³ Te nchaa sá ná càcáⁿ-ndó te taxi-í te núu na quindáá iní ñáhá-ndó xii-í, te nchaa

cada-í cuendá cutnùni iní ñáyiú sá ío càhu cuu Tàtá-í Dútú Ndióxi.

¹⁴ Te yúhú cada-í nchaa sá cuini-ndó càcáⁿ tǎhú-ndó núu-í, te núu na quindáá iní ñáhá ndisa-ndo xii-í.

Jèsús càchí-gá sá téndaha-gã Espiritú Yá Ndióxi quixi cundecu ndihi-o

¹⁵ Te núu nchòhó cùú iní ñáhá-ndó xii-í te tnii-ndo nchaa tnúhu càháⁿ-í.

¹⁶ Te yúhú cacáⁿ tǎhú-í núú Tàtá-í sá téndaha-gã Espiritú-gã quixi cundecu ndihi-ndo canu ìchi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhíⁿ.

¹⁷ Te nchaa ñáyiú ndècu ìchi cuehé ìchi duha ñá túú xiní-yu Espiritú Yá Ndióxi te ni vá cùú cundecu ndihi-yu. Dico nchòhó sa xiní-ndó Espiritú-gã te ndècu ndihi ñaha-xi xii-ndo. Te sáá ìⁿ nduu te cunuu Espiritú-gã iní-ndó.

¹⁸ Te yúhú vá dáñá ñihu ñaha-í xii-ndo, chi quixi tucu-í cundecu ndihi ñaha-í xii-ndo.

¹⁹ Te sácú duha-ná nduu ndècu-í te vá quini ñáhá-gã ñáyiú xii-í, dico nchòhó chi quini ñáhá-ní-ndó xii-í. Te ducaⁿ-ni cundecu-ndo ìchi váha chi cundecu ndihi ñaha-í xii-ndo ni caa ni quíhíⁿ.

²⁰ Te dàvá-án cutnùni iní-ndó sá ndécú-í ndihi Tàtá-í, te ducaⁿ nchòhó cundecu ndihi ñaha-ni-ndo xii-í.

²¹ Te nchaa ñáyiú dàcuaha tnúhu-í te tnii-yu, ñáyiú-án quidè ndisá-yu sá cùú iní ñáhá-yu xii-í. Te ducaⁿ Tàtá-í cùú iní ñáhá-gã xií-yu, te ducaⁿ-ni yúhú cùú iní-í-yu tucu, te ducaⁿ te cùtnùni iní-yu sá ndécú ndihi-í-yu —càchí-gá xáhaⁿ-gã xii-dé.

²² Te ní cáháⁿ ìⁿ tée nani Judás dico ñá díú tẽ Judás déhe te Ximú Iscarioté ní càháⁿ, chi ingá té Judás ní xáhaⁿ-dẽ xii-gá:

—Mèstrú, ¿nása cada-n cuendá cutnùni iní-ndí sá cùndècu ndihi ñaha-n xii-ndí, te ñáyiú ñuhu ìchi cuehé ìchi duha vá cundecu ndihi-n-yu-í? —càchí-dé xáhaⁿ-dẽ xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tnii-yu tnúhu càháⁿ-í, te ñáyiú-án cùú iní ñáhá Tàtá-í xií-yu, te yúhú ndihi Tàtá-í ndécú-ndí ndihi-yu.

²⁴ Te nchaa ñáyiú ñá túú cùu iní ñáhá xii-í te ñá túú tnii-yu tnúhu càháⁿ-í. Te nchaa tnúhu ní cáháⁿ-í ní xindèdòho-ndo chi Tàtá-í Yaá ní tendaha ñaha xii-í véxi-í ñuyú-á ní dácáhu iní ñáhá-gã xii-í, te ñá díú mèe-í ní càhu iní-í tnúhu càháⁿ-í.

²⁵ Duha nduu tnúhu càháⁿ-í núú-ndó vitna ndecu ndihi ñaha-gã-í xii-ndo.

²⁶ Dico Yá Ndióxi tendaha-gã Espiritú-gã quixi-xi cada-xi núu-í taxi-xi tnúhu ndee iní

xii-ndo, te diu-xi chindee ñaha-xi xii-ndo te danèhé ñáhá-xí xii-ndo nchaa sá cúmáni quini-ndó, te diu-ni-xi dandacu iní ñáhá-xí xii-ndo nchaa nacuaa ní cáháⁿ-í.

²⁷ Te yúhú chindee chítuu ñaha-í xii-ndo ío váha cuu iní-ndó cundecu-ndo datná yúhú ío váha cuu iní-í ndécú-í, chí sa ta cüyatni nduu núhú-í. Te yúhú cáchi tnúhu ndáá-í sá chindée ñaha-í xii-ndo, te vá cadá-í datná quidé ñáyiú ñúhu ichi cuehé ichi duha. Te ní vá ndíhú iní-ndó, te ní vá yúhú-ndó.

²⁸ Te sa ní xindédóho-ndo ní cáháⁿ-í sá núhú-í, te quixi tucu-í cundecu ndíhi ñaha-í xii-ndo. Te núu ndisa cuu iní ñáhá-ndó xii-í ñá, te òré ní níhí-ndó tnúhu sá núhú-í núu ndécú Tàtá-í, te cudíí iní-ndó ní cuu, chí ío càhnu cuu-gá dàcúxí yúhú.

²⁹ Te sa ní cachí tnúhu-í sá núhú-í, te na sàà òré núhú-í núu ndécú Tàtá-í, te quindáá iní ñáhá-ndó xii-í.

³⁰ Te ñá túú-gá vai tnúhu ndatnúhu ndíhi ñaha-í xii-ndo chí sa véxi yucu ñávaha sá táxi tnúni ñuyúú-a, dico vá táxi tnúni ñáhá-xí xii yúhú.

³¹ Te cada-í nchaa nacuaa ní táuchíúⁿ Tàtá-í cuendá cutnúni iní nchaa ñáyiú ñuyúú-a sá yúhú ío cuu iní-í-gá. Te vitna chí ndacúñí ná quihíⁿ-ó –cáchi-gá xáhaⁿ-gá xii-güedé.

15

Cuendá yoho yàha stilé ndíhi nchaa dité-xi

¹ Te ní xáhaⁿ tucu-gá xii-güedé:

–Yúhú cúu-í datná yoho yàha stilé, te Tàtá-í cúu-gá datná ñⁿ tée xito yoho yaha stilé-áⁿ.

² Te nchaa ñáyiú ní sándáá iní ñáhá xii-í cúu-yu datná dité nchaa yoho yàha stilé-áⁿ. Te tée xito yoho yaha stilé-áⁿ xèhndé-dé nchaa dité-xi sá ñá cuini-gá-xi cuuⁿ ndéhé-xi, te ndàda ndoo-dé nchaa dité-xi sá cúuⁿ cuendá cuuⁿ-gá.

³ Te ducaⁿ sátnahá-xi cuu nchóhó, chí sa ní xócúñí nchaa sá cuehé sá dúhá ndècu ndíhi-ndo, chí ní sándáá iní-ndó tnúhu ní cáháⁿ-í.

⁴ Te cuu ñⁿnuu-ndo cundecu ndíhi ñaha-ndo xii-í, te núu ducaⁿ na càda-ndo, te cundecu ndíhi ñaha-í xii-ndo. Chí núu ñⁿ yutnu vídí ná quèndèè dité-xi, te dité-xi sá ní quèndèè-áⁿ vá cúuⁿ-gá sávidí-xi chí duuⁿ duuⁿ ní xíta-xi. Ducaⁿ sátnahá-xi cuu nchóhó chí vá ndacú-ndó càda-ndo chiuⁿ-í, te núu vá cundècu ndíhi ñaha-í xii-ndo.

⁵ 'Chí yúhú cúu-í datná yutnu vídí-áⁿ, te nchóhó cúu-ndó datná nchaa dité-xi. Te nchaa ñáyiú cuu ñⁿnuu ndíhi ñaha xii-í, te ndècu ndíhi-í-yu, te ndacú-yu quidé-yu chiúⁿ-í. Te núu vá cúu ñⁿnuu ndíhi ñáhá-yu xii-í, te vá ndacú-yu cadá-yu chiúⁿ-í.

⁶ Te nchaa ñáyiú vá cúu ñⁿnuu ndíhi ñaha xii-í, te yáha-yu datná yáha ñⁿ dité yutnu vídí sá ñá túú cuuⁿ sávidí-xi, chí xèhndé-güedé yichí-xi, te sàhmi-güedé.

⁷ 'Cuu ñⁿnuu ndíhi ñaha-ndo xii-í, te vá nacuaana-ndo nacuaa ní cáháⁿ-í. Te núu ducaⁿ na càda-ndo, te nani cuini-ndó cácaⁿ-ndó núu-í te taxi-í.

⁸ Te núu nchóhó ná cadá váha-ndo cundecu-ndo, te ío cada càhnu-ndo Tàtá-í, te ducaⁿ cùtnumí sá ndísá cuu-ndo cue tée ní chitnahá ñáhá xii-í.

⁹ Te yúhú ío cuu iní ñáhá-í xii-ndo datná cúu iní ñáhá Yá Ndióxi xii-í. Te cada-ni-ndo mèe-ni sá váha cuendá cudíí iní ñáhá-gá-í xii-ndo.

¹⁰ Te núu na quindáá iní-ndó càda-ndo nchaa nacuaa ní cáháⁿ-í, te ío cuu iní ñáhá-í xii-ndo, chí yúhú ducaⁿ ío sándáá iní-í Tàtá-í quidè-í nchaa nacuaa ní cáháⁿ-gá, te xíáⁿ núu ío cuu iní ñáhá-gá xii-í.

¹¹ 'Duha càháⁿ-í núu-ndó cuendá cudíí ndisa iní-ndó datná cúdíí iní mèe-í.

¹² Te duha nduu tnúhu càháⁿ-í cuendá sá cúu iní tnáhá-ndó ñⁿ ñⁿ-ndo datná cúu iní ñáhá-í xii-ndo.

¹³ Te núu ní xíhó sá cúu-xi ñⁿ tée ío váha tnahá tnúhu ndíhi-o, te xíáⁿ cutnúni iní ñáyiú sá ío cuu iní-ó-dé.

¹⁴ Te nchóhó cuu-ndo cuè tée ío váha tnahá tnúhu ndíhi-í te núu na càda-ndo nchaa nacuaa càháⁿ-í.

¹⁵ Te vá cüñaha-gá-í xii-ndo sá cúu-ndó cuè tée xinu cuechi núu-í, chí ní ñⁿ tée xinu cuechi ñá túú xini-dé ná quidé patróoⁿ-dè. Te yúhú cáchi-í xii-ndo sá cúu-ndó cuè tée ío váha tnahá tnúhu ndíhi-í, chí ní cachí tnúhu-í nchaa nacuaa ní cáháⁿ Tàtá-í.

¹⁶ Te ñá díú nchóhó ní càháⁿ ñáhá-ndó xii yúhú, chí yúhú ní cáháⁿ ñáhá-í xii-ndo. Te yúhú tauchiúⁿ-í quihíⁿ-ndó càda-ndo nchaa nacuaa ní cáháⁿ-í, chí tnúhu-áⁿ vá ndíhi ñihnu-xi. Te ducaⁿ nchaa sá ná cácaⁿ-ndó núu Tàtá-í Yá Ndióxi te taxi-gá, te núu na quindáá iní ñáhá-ndó xii-í.

¹⁷ Te yúhú càháⁿ-í dóho-ndo sá cúu iní tnáhá-ndó ñⁿ ñⁿ-ndo.

Ñáyiú ndècu ichi cuehé ichi duha cuu úhú iní-yu Jesús ndíhi nchaa ñáyiú sándáá iní tnúhu-gá

¹⁸ 'Te nchaa ñáyiú ndècu ichi cuehé ichi duha ñá cúu quini ñáhá-yu xii-ndo, te sa ñaha-ndo sá díhna-gá yúhú ní nguíta-yu ducaⁿ ñá cúu quini ñáhá-yu xii-í.

¹⁹ Te núu dicó tnahá nchóhó ndécú-ndó ichi cuehé ichi duha ñá, te cuu iní ñáhá-yu xii-ndo datná cúu iní tnáhá-yu ndí mèe-yu ní cuu. Te yúhú ní nanducu ñihnu ñaha-í xii-ndo tnúu ñáyiú ndècu ichi cuehé ichi

duha, núu xíáⁿ ío cùu úhú iní ñáhá-yu xii-ndo cuendá sá ñà túú-gá chítnàhá-ndó-yu.

²⁰ Te dandacu iní-ndó nàcuáa ní cáháⁿ-í sá ní ñⁿ téé xinu cuechi ñá túú cùnuu-dé dàcúúxí pàtróóⁿ-dè. Te yúhú cúú úhú iní ñáhá-yu, te ñu-ni ducaⁿ càda ñahá-yu xii nchòhó. Te núu dicó ní tníⁿ-yu tnúhu ní cáháⁿ-í ñá, te ñu-ni ducaⁿ tníⁿ-yu tnúhu cáháⁿ-ndó nũ-yu ní cùu.

²¹ Te ducaⁿ càda ñahá-yu xii-ndo sá cuendá-í, chí ñá xini-yu Tàtá-í Yaá ní tendaha ñaha xii-í véxi-í ñuyúí-a.

²² Te váa vá cùndècu cuèchi-yu ní cùu, te núu ñá túú yúhú ní cáháⁿ-í núu-yu, te vitna vá cúú tnàhí cachí-yu sá ñà túú cuèchi-yu.

²³ Chí nchaa ñáyiú cùu úhú iní ñáhá xii-í, te cùu úhú iní-yu tnàhá Tàtá-í.

²⁴ Te váa ní ñⁿ cuèchi-yu vá cùndècu ní cuu, te núu dicó ñá túú ní xini-yu nchaa sá ní quide-í sá vá yòo tnàhí ndàcu cada. Te cuèí ní xini-yu dico dai cùu úhú iní ñáhá-yu xii-í ndíhí Tàtá-í.

²⁵ Te duha quidè-yu chí dacuítí quèe ndáá-xi nàcuáa yòdo tnuní núú tütú Yá Ndióxi sá dácuahá-yu, chí càchí-xi sá ñà túú ná cuèchi-í te cuu úhú iní ñáhá-yu xii-í.

²⁶ Te Espiritú Tàtá-í Dútú Ndióxi sá ndécú núú-gá tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cáháⁿ ndáá-xi cuendá cutnùní iní nchaa ñáyiú yoo cùu-í.

²⁷ Te nchòhó tnàhá-ndó cáháⁿ váha-ndo cuendá-í cuendá cutnùní iní-yu yoo cùu-í, chí ñaha-ndo sá ndéé òré ní ngúita-í quidè-í chiúⁿ Tàtá-í ní chitnahá ñáhá-ndó xii-í — càchí-gá xáhaⁿ-gá xii-güedé.

16

¹ Te ní xáhaⁿ tucu-gá xii-güedé:
—Duha cáháⁿ-í cuendá ná nanchòcava iní-ndó nùhú-ndó ichi cuehé ichi duha.

² Chí vá dáñá-gá-güedé quíhu-ndo vèñúhu, te ní vá cúú-gá quini ndéé ñáhá-güedé xii-ndo. Te sáá ñⁿ nduu te cahni ñaha-güedé xii-ndo, te xíáⁿ cuu cahaⁿ-güedé sá quidè-güedé chiúⁿ Yá Ndióxi.

³ Te ducaⁿ càda-güedé chí ñá túú xini-güedé Tàtá-í, te ní ñà túú xini ñáhá-güedé xii yúhú.

⁴ Te duha nduu tnúhu cáháⁿ-í núú-ndó, chí na sáá òré te ndacu iní-ndó nchàa tnúhu sá sá ní cachí tnúhu-í xii-ndo nàcuáa cada ñaha-güedé xii-í.

Nchaa chiúⁿ quide Espiritú Yá Ndióxi

⁷ Te ñá túú ní cáchí tnúhu-í xii-ndo ndéé díhna chí ndècu ndíhí ñaha-í xii-ndo.

⁵ Dico vitna sa ta cüyatni nduu nùhú-í núú ndécú Tàtá-í Yaá ní tendaha ñaha xii-í véxi-í ñuyúí-a. Te ní ñⁿ nchòhó ñá túú xicáⁿ tnúhú-ndó núú-í núu ndéé quíhíⁿ-í.

⁶ Chí mee-ni sá ndíhú iní-ndó sá dúcáⁿ ní cáháⁿ-í.

⁷ Te na càchí tnúhu ndáá-í xii-ndo sá váha-gá sá cúú-xi-ndó núu nùhú-í, chí tendaha-í Espiritú Yá Ndióxi quixi cundecu ndíhí-ndo chindee ñaha-xi, chí núu vá nùhú-í te vá quíxí Espiritú-gá cundecu ndíhí-ndo chindee ñaha-xi xii-ndo.

⁸ Te na quíxí Espiritú-gá te dandixi túu-xi iní nchaa ñáyiú ndècu ichi cuehé ichi duha sá ñà túú quide váha-yu. Te dacàhu iní ñáhá-xi sá ndécú ñⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sá Yá Ndióxi cada ndáá-gá cuèchi-yu.

⁹ Te ducaⁿ te cutnùní iní-yu sá ndécú cuèchi-yu, chí ñá túú sàndáá iní ñáhá-yu xii-í.

¹⁰ Te ducaⁿ te cutnùní iní-yu nàcuáa nduu cuendá ichi váha ichi ndáá, chí yúhú nùhú-í núú ndécú Tàtá-í, te nchòhó vá quini ñáhá-gá-ndó.

¹¹ Te ducaⁿ te cutnùní iní-yu sá Yá Ndióxi cada ndáá-gá cuèchi-yu, chí sa ní cáháⁿ-gá sá yúcu ñávaha sá táxi tnuní ñuyúí-a quíhíⁿ-xi núú úhú núú ndàhú.

¹² Te vài-gá tnúhu ndècu cachí tnúhu-í xii-ndo, dico nchòhó chí vá cùndèe iní-ndó cùndedóho-ndo nchàa vitna.

¹³ Te na quíxí Espiritú Yá Ndióxi, Espiritú cáháⁿ ndáá cuítí, te Espiritú-áⁿ danèhé ñáhá-xi nchàa tnúhu váha tnúhu ndáá. Te vá dácàhu iní ñáhá-xi xii-ndo sá véxi iní méé-xí chí dacàhu iní ñáhá-xi nchàa sá cáháⁿ Yá Ndióxi, te cachí tnúhu-xi nchaa nàcuáa cada-xi ndéé núú cuaháⁿ núú véxi-gá.

¹⁴ Te Espiritú-gá-áⁿ cada càhu ñaha-xi xii yúhú chí ndècu ndíhí-xi tnúhu-í, te danèhé ñáhá-xi xii-ndo.

¹⁵ Te nchaa sá ndécú ndíhí Tàtá-í ndécú ndíhí-í tnàhá-í, núu xíáⁿ càchí-í sá Espiritú-gá danèhé ñáhá-xi nchàa tnúhu-í xii-ndo.

Nchaa ñáyiú ndíhú iní-xi nduu díí iní-yu na quíxí tucu Jesús

¹⁶ Te ñⁿ úú-ná nduu ndècu-í te vá quini ñáhá-gá-ndó xii-í, dico núú sàcú-ni nduu te quini ñáhá tucu-ndo xii-í, te ducaⁿ chí nùhú-í núú ndécú Tàtá-í — càchí-gá xáhaⁿ-gá xii-güedé.

¹⁷ Te sá dúcáⁿ ní cáháⁿ-gá núu ní ngúita ñⁿ úú cue téé xica cuu ndíhí-gá xitnàha-güedé:

—¿Nása nduu-tu tnúhu cáháⁿ-gá sá càchí-gá sá ñⁿ úú-ná nduu ndècu-gá te vá quini-gá-ò-gá, dico núú sàcú-ni nduu te quini tucu-o-gá-í?, chí nùhú-gá núú ndécú Tàtá-gá —càchí-güedé xitnàha-güedé.

¹⁸ Te xitnàha tucu-güedé:

—¿Nása cuaháⁿ-tu tnúhu-áⁿ sá sàcú-ni nduu? Te ñá tècu tnùn-ó nása nduu tnúhu cáháⁿ-gá —càchí-güedé xitnàha-güedé.

¹⁹ Te Jèsús ní cutnùní iní-gá sá cuíní-güedé cácá^a tñúhú-güedé núú-gá nása ndúu tñúhu ní cáhá^a-gá, núu ní xáha^a-gá:

—Cuendá sá ní cachí-í sá ñ^a úú-ná nduu ndècu-í te vā quíní ñáhá-gá-ndó xii-í, dico núú sácú-ní nduu te quíní ñáhá tūcu-ndo xii-í ní cachí-í, xixá^a ndúcu tñúhu núú tñáhá-ndó-áⁿ? —càchí-gá xáha^a-gá xii-güedé.

²⁰ Te ní xáha^a tūcu-gá:

—Te na càchí tñúhu ndáá-í xii-ndo sá nchòhó ndíhú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chí da cudíí iní-yu. Dico nchòhó ñáyiú ndáhyú chí sáá nduu te nduu díí iní-ndó.

²¹ Chí dàtná cuíní-ndó cùu ñ^a ñadihí ñaha ní tñahá nduu cacu déhe-xi vāi sani iní-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gá ndácú iní-aⁿ sá ní quide úhú ñáhá-xí xii-aⁿ chí mee-ná sá cudíí iní-aⁿ déhe-aⁿ.

²² Ducaⁿ sátnahá-xi cùu nchòhó vitna chí ndíhú iní-ndó sá nùhú-í, dico quixi tucu-í quixi coto ñaha-í xii-ndo, te òrè-áⁿ te cudíí ndísa iní-ndó, te vā yòo ñ^a-gá dandíhú iní ñáhá xii-ndo davá-áⁿ.

²³ Te davá-áⁿ ñá túú-gá ná nducu tñúhu-ndo núu-í. Te na càchí tñúhu ndáá-í xii-ndo sá Tàtá-í taxi-gá nchaa sá ná cácá^a-ndó núú-gá núu na quindáá iní ñáhá-ndó xii-í.

²⁴ Te ndéé vitna vátá dúcáⁿ-gá cada-ndo cácá^a-ndó. Dico cácá^a-ndó núú-gá núu ná cuíní-ndó te taxi-gá cuendá cudíí ndísa iní-ndó —càchí-gá xáha^a-gá xii-güedé.

Xitohó Jesucristú ní cunuu tñúhu-gá núú yucu ñávaha

²⁵ Te xáha^a tūcu-gá xii-güedé:

—Mee-ní ní chidáhu ndodo-í tñúhu ní cáhá^a-í núú-ndó, dico sáá nduu te vā chidáhu-gá-í tñúhu cáhá^a-í, chí cáhá^a ndáá-na-í cuendá Tàtá-í.

²⁶ Te davá-áⁿ cácá^a-ndó núú Tàtá-í núu ná cuíní-ndó te taxi-gá, te núu na quindáá iní ñáhá-ndó xii yúhú Déhe-gá. Te ñá túú-gá xini ñúhu-xi sá yúhú cácá^a-í núú-gá cuendá-ndó chí cácá^a meé-ná-ndó.

²⁷ Chí mee Tàtá-í ío cùu iní ñáhá-gá xii-ndo cuendá cùú iní ñáhá-ndó xii-í, te sàndáá iní-ndó sá núú-gá ní quee-í véxi-í.

²⁸ Te yúhú ní quee-í núú Tàtá-í véxi-í ñuyúú-a, te vitna dándóo-í ñuyúú-a te nùhú-í núú ndécú-gá —càchí-gá xáha^a-gá xii-güedé.

²⁹ Te ní xáha^a cué téé xica cuu ndíhi-gá:

—Vitna chí cáhá^a ndáá-ná-n, ñá túú-gá chídáhu-n tñúhu cáhá-n.

³⁰ Te vitna ní xini-ndí sá ío vāha cùtnuní iní-n nchàa nacuaá cùu, te cùtnuní iní-n nchàa nacuaá sàni iní nchaa ñáyiú. Te ñá túú xini ñuhu-xi nágá nducu tñúhu-yu núú-n chí nchaa sa ní dátúu-n núu-yu. Te xiáⁿ núu

sàndáá iní-ndí sá núú Yá Ndióxi ní quee-n véxi-n —càchí-güedé xáha^a-güedé xii-gá.

³¹ Te ní xáha^a Jèsús:

—¿Te vitna sàndáá iní-ndó-áⁿ?

³² Vitna ní sáá nduu ní sáá òrè sá ncháá nchòhó cuténuu-ndo caa ñ^a caa úú cuu-ndo, te dándóo mee ñaha-ndo xii-í. Dico ñá díú mée dii-í quendóo chí ndècu ndíhi-í Tàtá-í.

³³ Duha cáhá^a-í cuendá cuu vāha iní-ndó cùndecu-ndo, chí ñuyúú-a cuu úhú iní ñáhá-yu xii-ndo, dico ní vā yúhú-ndó chí yúhú sa ní dáqueé tñhú-í nchaa sá cuehé sá dúhá ío ñuyúú-a —càchí-gá xáha^a-gá xii-güedé.

17

Jèsús xicáⁿ táhú-gá núú Tàtá-gá Dúú Ndióxi cuendá cue téé xica cuu ndíhi-gá

¹ Te sáta dúcáⁿ ní cáhá^a Jèsús te ní ndacoto-gá andiu, te ní xáha^a-gá xii Tàtá-gá Dúú Ndióxi:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n.

² Chí mee-n ní cachí-n sá táxi tñuní-í nchaa ñáyiú ñuyúú-a, te dàcacu nihnu-í nchaa ñáyiú ní cachí-n nàníhí tàhú.

³ Te cundecu ndíhi-ò-yu ní caa ní quíhíⁿ, chí sàndáá iní ñáhá-yu sá ñ^a dìi díi-n yohó cúu-n Ndióxi ndísa, te ducaⁿ xini ñáhá-yu xii yúhú Jesucristú téé ní tendaha-n véxi ñuyúú-a.

⁴ Te yúhú ní chíñuhu ñaha-í xii-n ñuyúú-a, te ní xínu chiúⁿ ní cachí-n càda-í.

⁵ Táu, vitna na sàsáá-í núu-n te cada cahnu ñaha-n xii-í ndéé cùtnáhá vátá ngáva-gá ñuyúú.

⁶ Te nchaa ñáyiú ní nanducu nihnu-n tñuu nchaa ñáyiú ndècu ichi cuehé ichi duha, ní taxi cuendá-n-yu, te ní xáha^a-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sàndáá iní-yu tñúhu-n.

⁷ Te vitna ní cutnùní iní-yu sá ncháá tñúhu ndècu ndíhi-í diu-ní mee-n ní taxi-n.

⁸ Te ní dánèhé-í-yu nchaa tñúhu sá ní dánèhé ñáhá-n xii-í, te ní sàndáá iní-yu. Te ní cutnùní iní-yu sá núu-n ní quee-í véxi-í, te ní sàndáá iní-yu sá yohó ní tendaha ñaha-n xii-í véxi-í ñuyúú-a.

⁹ Te yúhú cáhá^a ndáhú-í núu-n cuendá nchaa ñáyiú ní taxi cuendá-n. Te ñá túú cáhá^a ndáhú-í núu-n cuendá ñáyiú ndècu ichi cuehé ichi duha, chí cuendá nchaa ñáyiú ní taxi cuendá-n cáhá^a-í, chí cuendá-n cúu-yu.

¹⁰ Te nchaa sá cúu cuendá-í cúu-xí cuendá-n, te nchaa sá cúu cuendá-n cùu-xi cuendá-í tñahá-í. Te xíquide cahnu ñahá-yu xii-í.

¹¹ Te yúhú vā cùndècu-gá-í ñuyúú-a, dico mée-yu chí cundecu-ní-yu, te yúhú ndixi-í

núu ndécú-n. Táu, yòhó ío yiñùhu ndecu-n, te yúhú cáháⁿ ndáhú-í núu-n sá ní yùhu ní iní-n còto-n nchaa ñáyiú ní taxi cuendá-n, ñáyiú ní sándáá iní tnùhu-í cuendá sá ñⁿ-ní ichi cuú-yu cundecú-yu dàtná ñⁿ-ni cùu nchoo.

¹² Chi òrè ndécú-í ndihí-yu ñuyúú-a ní xito-í-yu nàcuáa cùu iní-n, te ní ñⁿ-yu ñá túú ní xíta nihnu, chi ñⁿ-di-í ní té Jùdás ní xíta nihnu tnàhí-dé, te ducaⁿ ní cuu cuendá sá ní quee ndáá-xi nàcuáa yòdo tnuú ní túú-túú-n.

¹³ Te vitna sa ndixi-í núu ndécú-n, dico níni ndécú-gá-í ñuyúú-a duha cáháⁿ-í cuendá sá cúdíí iní-yu dàtná cúdíí iní mèe-í.

¹⁴ Te yúhú ní dánèhé-í-yu tnùhu-n, dico nchaa ñáyiú ndécú ichi cuehé ichi duha cùu úhú iní ñáhá-yu xií-yu cuendá sá ñá túú-gá ndécú-yu ichi cuehé ichi duha-áⁿ dàtná yúhú ñá túú ndécú-í ichi-áⁿ.

¹⁵ Te ñá túú cáchí-í sá xócání-n-yu ñuyúú-a, dico cáháⁿ ndáhú-í núu-n sá dácácu ñihmú-n-yu núu yucu ñávàha.

¹⁶ Te yúhú ñá túú ndécú-í ichi cuehé ichi duha, te ducaⁿ mèe-yu ñá túú-gá ndécú-yu ichi cuehé ichi duha.

¹⁷ Te ío na cundecu yihi ñuhu-gá-yu núu-n dàcuahá-yu tnùhu-n, chi cùu-xi ñⁿ tnùhu ndáá.

¹⁸ Te dàtná ní tendaha ñàha-n xii yúhú véxi-í tnuú nchaa ñáyiú ndécú ichi cuehé ichi duha, ducaⁿ càda-í tendaha-í-yu quíhⁿ-yu cáháⁿ-yu tnùhu-í tnuú nchaa ñáyiú ndécú ichi cuehé ichi duha.

¹⁹ Te yúhú ndécú yiñùhu-í núu-n, te cada ñàha-n xii-í nàcuáa cùu iní-n sá cuendá-yu, te ducaⁿ te cundecu yiñùhú-yu núu-n dàcuahá-yu tnùhu-n.

²⁰ Te ñá díú cuendá mee-ni ñáyiú sa ní sándáá iní-xi cáháⁿ ndáhú-í núu-n, chi tnàhá cuendá nchaa ñáyiú na quindáá iní ñáhá xii-í ndéé idá-gá ñuu na cùndedóho-yu tnùhu cáháⁿ ñáyiú na tendaha-í.

²¹ Te xicáⁿ táhú-í núu-n sá ncháá-yu ñⁿ-ná ichi na cùu-yu, te ñⁿ-ná cani iní ndihí ñáhá-yu xii-o dàtná cúú nchòo ñⁿ-ní cuu-o. Te ducaⁿ ñⁿ-ná cuu-o ndihí-yu cuendá sá ná quindáá iní nchaa ñáyiú ndécú ichi cuehé ichi duha sá díú-n ní tendaha ñàha-n xii-í véxi-í ñuyúú-a.

²² Te nchaa sá vaha ní taxi-n ndécú ndihí-í ní dánèhé-í-yu cuendá sá ñⁿ-ná cuú-yu cundecú-yu dàtná ndécú nchòo.

²³ Te yúhú cundecu ndihí-í-yu, te yòhó cundecu ndihí ñàha-n xii yúhú cuendá ñⁿ-ná cuu ndisá-yu cundecú-yu. Te ducaⁿ te cutnùní iní nchaa ñáyiú ndécú ichi cuehé ichi duha sá díú mèe-n ní tendaha ñàha-n xii-í véxi-í ñuyúú-a, te cùu iní-n-yu dàtná cúú iní ñáhá-n xii yúhú.

²⁴ Táu, mee-n ní taxi cuendá-n-yu, te cùlíní-í sá cùndécú-yu núu cùndécú-í cuendá quini-yu sá quidé càhnu ñàha-n xii-í chi ducaⁿ-ni cùu iní ñáhá-n xii yúhú ndéé cùtnàhá vátá ngáva-gá ñuyúú.

²⁵ Táu, yòhó ío yiñùhu ndecu-n. Te ñáyiú ndécú ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyiú ní sándáá iní ñáhá xii-í sa xini-yu sá díú-n ní tendaha ñàha-n xii-í véxi-í ñuyúú-a.

²⁶ Te sa xàhaⁿ-í xií-yu yoo cùu-n, te diu-ni ducaⁿ càda-í cuendá cuu iní tnàhá-yu dàtná cúú iní ñáhá-n xii-í, te ducaⁿ cundecu-í ndihí-yu —cachí-gá xàhaⁿ-gá xii Tàtá-gá Dútú Ndióxi.

18

Ní tnuú-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sáta dúcáⁿ ní cáháⁿ Jèsús, te ní quee-gá ndihí cue tée xica cuu ndihí-gá cuáháⁿ-güedé ndáa ingá xio yuhu yùú Cèdrón. Te yàcáⁿ cáá ñⁿ lahuertá, te xití lahuertá-áⁿ cuànguihu Jèsús ndihí cue tée xica cuu ndihí-gá.

² Te té Jùdás déhe té Ximú Iscarioté téé ní sàha cuendá ñáhá xii-gá núu cué téé cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihí-güedé xíáⁿ.

³ Núu ndáá ichi xíáⁿ ní sáá té Jùdás ndihí vài sandadú, ndihí cue téé quide cuendá veñùhu ní techiúⁿ ñàha cue dútú cùnùu, ndihí cue téé cùu fariséú. Te xinehe-güedé machití ndihí ñⁿ úú-gá sá dèéⁿ, te yòtnuú-güedé lintèrná ndihí iti ní sáá.

⁴ Te Jèsús sa nàha-gá nchaa nàcuáa cada ñàha-güedé xii-gá ñuu ní sáháⁿ tuha ñàha-gá xii-güedé, te ní xàhaⁿ-gá:

—¿Yoo nànducu-ndo? —cachí-gá xàhaⁿ-gá xii-güedé.

⁵ Te ní xàhaⁿ-güedé:

—Jèsús téé ñuu Nazàrét nánducu-ndí —cachí-güedé xàhaⁿ-güedé xii-gá.

Te ní xàhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nánducu-ndo —cachí-gá xàhaⁿ-gá xii-güedé.

Te tnàhá té Jùdás téé ní sàha cuendá ñáhá xii-gá ndihí-güedé.

⁶ Te òrè ní xàhaⁿ Jèsús sá díú-gá cúú téé nànducu-güedé, te ní nacaca dùma-güedé te ní nduá-güedé ndéé ñuhu.

⁷ Te ní xicáⁿ tnùhú tùcu Jèsús núu-güedé yoo nànducu-güedé. Te ní xàhaⁿ tùcu-güedé sá Jèsús téé ñuu Nazàrét nánducu-güedé,

⁸ núu ní xàhaⁿ-ná Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nánducu-ndo, te dañá-ndo

nchaa cue tée iha na nùhú-güedé —càchí-gá xáhaⁿ-gá xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñáiyu ní sáha cuendá ñháá Yá Ndióxi cundecu ndihi-gá vá cuíta nhínú-yu.

¹⁰ Te té Xímú, àdi Pelú chi úú diu-dé, néhé-dé ìⁿ machiti, te ní tava-dé machiti-áⁿ ñii-xi te ní xehndé-dé lóho xio cùha ìⁿ tée nàni Malcú ní quendeé duuⁿ. Te tée-áⁿ xínú cuèchi-dé núú dütú cúnúu-gá.

¹¹ Te ní xáhaⁿ Jèsús xii té Pèlú:

—Nataxúha machiti-áⁿ núú ñhúu-xí, chi dacutií sá ndóhò-í nàcuáa ní cachí Tàtá-í cunduu —càchí-gá xáhaⁿ-gá xii-dé.

Jèsús ndécú-gá núú dütú cúnúu-gá

(Mt. 26:57-58; Mr. 14:53-54; Lc. 22:54)

¹² Te cue sandadú ndihi cue tée cúnúu-gá núú-güedé, ndihi cue tée quide cuendá veñúhu ní tñii-güedé Jèsús, te ní dacútú ñàha-güedé.

¹³ Te ndèca ñaha-güedé xii-gá cuáháⁿ núú ndécú té Anás, te té Anás-áⁿ cúu-dé tātá ñadihí té Caifás. Te té Caifás-áⁿ ní cuu-dé dütú cúnúu-gá cuía-áⁿ.

¹⁴ Te diu-ni tée-áⁿ ní xáhaⁿ-dè xii ñáiyu isráel sá váha-gá sá ìⁿ-ní tée na cúu-dé sá cuendá-yu nchaá-yu.

Té Pèlú càháⁿ-dé núú ñáiyu sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú diu-dé, ndihi ingá tucu-dé nàcuáa xica cuu ndihi-güedé Jèsús nchicúⁿ ñháá-güedé xii-gá cuáháⁿ. Te ìⁿ tée-áⁿ xini tnáhá-dé ndihi dütú cúnúu-áⁿ núu nchicúⁿ-dé tnáhá-dé Jèsús cuánguihu ndéé núú cáá vèhe tée cúnúu-áⁿ.

¹⁶ Dico té Pèlú ní ndóo-dé yuyèhe ndaa quehé, núu ní ndee tée ndihi té Pèlú-áⁿ ní cáháⁿ ndihi-dé ñaha ndéé yuyèhe, te ndèca-dé té Pèlú cuánguihu.

¹⁷ Te ní xáhaⁿ ñaha ndéé yuyèhe-áⁿ xii té Pèlú:

—¿Náa ñá díú yòhó tnáhá-n xica cuu ndihi-n tée ndèca-güedé cuánguihu-a? —càchí-aⁿ xáhaⁿ-aⁿ xii-dé.

Te ní xáhaⁿ té Pèlú:

—Ñháá, ñá túú tée-áⁿ xicá cùu ndihi-ú —càchí-dé xáhaⁿ-dè xii-aⁿ.

¹⁸ Te ío víxiⁿ quide-xi núu cue tée xínu cuechi, ndihi cue tée quide cuendá veñúhu ní dátñháá-güedé ñuhú, te xínutñii teté-güedé ndihi té Pèlú.

Dütú cúnúu nducu tnúhu-dé núú Jèsús

(Mt. 26:59-66; Mr. 14:55-64; Lc. 22:66-71)

¹⁹ Te dütú cúnúu ní xicáⁿ tnúhú-dé núú Jèsús núu nándi cùu cue tée xica cuu ndihi-gá, te nándi sá dánèhé ñháá-gá xii-güedé.

²⁰ Te ní xáhaⁿ-gá:

—Yúhú càháⁿ ndodo-í núú nchàa ñáiyu cuèi xití veñúhu càhnu sá ío cúnúu, te cuèi xití nchaa dava-gá veñúhu núú tàcá nchaa ñáiyu isráel ducaⁿ-ní dànehé-í-yu, te ñá túú dàyuhu càháⁿ-í.

²¹ Núu vá càcáⁿ tnúhú-n núu-í. Càcáⁿ tnúhú núú nchàa ñáiyu sàcúndedóho tnúhu càháⁿ-í, te na càháⁿ-yu núu nása nduu tnúhu càháⁿ-í chi xini-yu —càchí-gá xáhaⁿ-gá xii-dé.

²² Te sá dúcáⁿ ní càháⁿ Jèsús núu ìⁿ tée quide cuendá veñúhu nütñii-dé tnáhá-dé te ní cani-dé ìⁿ déhndé núú-gá. Te ní xáhaⁿ-dè: —¿Ná cuendá ducaⁿ càháⁿ-n núú dütú cúnúu-í? —càchí-dé xáhaⁿ-dè xii-gá.

²³ Te ní xáhaⁿ Jèsús xii-dé:

—Te núu néhé ní càháⁿ-í te càháⁿ-n nása nduu tnúhu ní càháⁿ-í, te yúhú càháⁿ váha-í te ducaⁿ càniha-n —càchí-gá xáhaⁿ-gá xii-dé.

²⁴ Te ndütú yoho-ní Jesús ní dánúhú ñháá té Anás xii-gá ndaha té Caifás dütú cúnúu-gá.

Té Pèlú càháⁿ tucu-dé núú ñáiyu sá ñà túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nütñii teté-ni-dé, te ní xáhaⁿ-güedé xii-dé:

—¿Náa ñá díú tnáhá yòhó xicá cùu ndihi tée ndèca-ndí véxi-áⁿ? —càchí-güedé xáhaⁿ-güedé xii-dé.

Te ní xáhaⁿ té Pèlú:

—Ñháá, ñá túú tée-áⁿ xicá cùu ndihi-ú —càchí-dé xáhaⁿ-dè xii-güedé.

²⁶ Te ìⁿ ñani tnáhá tée ní xehndé té Pèlú lóho-xi-áⁿ xínú cuèchi-dé tnáhá-dé núú dütú cúnúu. Te tée-áⁿ ní xáhaⁿ-dè xii té Pèlú:

—¿Náa ñá díú tnáhá-n ndihi-n-dé ní xini ñháá-í òré ní tñii-ndí-dé xití lahuértá? —càchí-dé xáhaⁿ-dè xii-dé.

²⁷ Te té Pèlú ní xáhaⁿ tucu-dé sá ñà díú-dé, te òré-áⁿ ní cana ìⁿ líhi.

Jèsús ndécú-gá núú té Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiuⁿ tée cùu gobiernú. Te sa ta cùditó-ni-gá cuáháⁿ núu ñá ní cuini cue tée isráel quíhu-güedé xití vechiuⁿ tée cùu gobiernú-áⁿ. Te núu nì quíhu-güedé vechiuⁿ-áⁿ ñá, te vá cúu-gá quíhu-güedé cudini-güedé vico pàscaú ní cùu chi ducaⁿ tnáhí quide-güedé.

²⁹ Núu té Pilatú tée cùu gobiernú ní quee-dé vechiuⁿ-dè ní càháⁿ ndihi ñaha-dé xii-güedé, te ní xáhaⁿ-dè:

—¿Ná cuèchi ní quide tée-a núu ndèca-ndo-dé véxi? —càchí-dé xáhaⁿ-dè xii-güedé.

³⁰ Te ní xáhaⁿ-güedé:

—Te núu díco ñá túú cuèchi-dé-áⁿ te vá cándeca-ndí-dé quixi núu-n ní cùu — cachí-güedé xáhaⁿ-güedé xii-dé.

³¹ Te ní xáhaⁿ túcu té Pilatú xii-güedé:

—Chí cándeca-dé cuánùhú, te cada ndáá-ndó cuèchi-dé nàcuáa ça lei méé-ndó —cachí-dé xáhaⁿ-dè xii-güedé.

Te ní xáhaⁿ-güedé:

—Dico nchúhú ñáyiú isràél chí ñá túú dùcaⁿ taxi tnuñí lèi sá cahní-ndí —cachí-güedé xáhaⁿ-güedé xii-dé.

³² Te ducaⁿ ní cuu chí dacutií ní quee ndáá-xi nàcuáa ní cáháⁿ méé Jèsús cada-xi cuú-gá.

³³ Te cuándihu té Pilatú vechiúⁿ-dé, te ní cana-dé Jèsús ní xicáⁿ tnuhú-dè núu-gá, te xáhaⁿ-dè:

—¿Yòhó yíndaha-n ñáyiú isràél-áⁿ? —cachí-dé xáhaⁿ-dè xii-gá.

³⁴ Te ní xáhaⁿ Jèsús:

—¿Te xiáⁿ cáháⁿ-n sá vèxi iní méé-n, àdi ío ñáyiú ní cachí tnuhu xii-n cuendá-í? —cachí-gá xáhaⁿ-gá xii-dé.

³⁵ Te ní xáhaⁿ tẽ Pilatú xii-gá:

—Ñá díú tẽ isràél cùu-í núu ducaⁿ cáháⁿ-n, chí cue ñaní tnahá-n cuè tẽ isràél ndihi cue dítú cúnù ní taxi cuendá ñáhá-güedé xii-n iha. ¿Te ná ní quide-n? —cachí-dé xáhaⁿ-dè xii-gá.

³⁶ Te ní xáhaⁿ Jèsús:

—Ñá díú tẽ ñuyú-a cùu-í te ni ñá túú vèxi-í taxi tnuñí-í ñuyú-a, chí núu díco iha tàxi tnuñí-í áⁿ te cue tẽ xica cuu ndihí-í nàá-güedé ndihi cue tẽ isràél cuendá sá vá tnuñí ñaha-güedé xii-í ní cùu, dico ñá túú vèxi-í sá táxi tnuñí-í ñuyú-a —cachí-gá xáhaⁿ-gá xii-dé.

³⁷ Te ní xáhaⁿ tẽ Pilatú:

—¿Te tẽ yíndaha ñáyiú cùu-ó vání? —cachí-dé xáhaⁿ-dè xii-gá.

Te ní xáhaⁿ Jèsús:

—Te dàtná cachí-n-áⁿ yíndaha ndisa-í ñáyiú, chí yúhú vèxi-í ñuyú-a te iha ní cacu-í te cáháⁿ-í mee-ni tnuhu ndáá. Te nchaa ñáyiú na cùdí iní-xi tnuhu ndáá, te tedóho-yu nchaa tnuhu cáháⁿ-í —cachí-gá xáhaⁿ-gá xii-dé.

³⁸ Te ní xáhaⁿ tẽ Pilatú:

—¿Te ná cùu-tu tnuhu ndáá-áⁿ? —cachí-dé xáhaⁿ-dè xii-gá.

Cachí-güedé sá cahní-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ní yáha ní xicáⁿ tnuhú tẽ Pilatú núu Jèsús, te ní quee tucu-dé quehé, te xáhaⁿ-dè xii cue tẽ isràél:

—Ñá túú nã cuèchi tẽ-a.

³⁹ Te váha-ni chí ducaⁿ tnahí quide nchohó sá ndí tnahá nduu vico pascuá cuiní-ndó sá dácacu-í ñá tẽ yihí vecaá. Te núu cuiní-ndó

te na dácacu-í tẽ yíndaha ñaha xii-ndo —cachí-dé xáhaⁿ-dè xii-güedé.

⁴⁰ Te sá dúcáⁿ ní cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácacu-n tẽ-áⁿ, té Barrábás dácacu-n! —cachí-güedé xáhaⁿ-güedé xii-dé.

Te té Barrábás-áⁿ ní cuu-dé ñá ñadúhú.

19

¹ Te té Pilatú ní táuchúⁿ-dè ní tnuñí ñaha cuè sandadú xii Jèsús, te ní caniha-güedé xii-gá ndihí ñii.

² Te diu-ni cue tẽ-áⁿ ní cadúha-güedé ñá coróná iñu ní chihi-güedé díquí-gá, te ní dáquiú nuu ñaha-güedé xii-gá ñá dóó tícuéhé víhí.

³ Te ní sáháⁿ ndehe yatni-gá-güedé núu-gá, te ní xáhaⁿ-güedé:

—¡Ío cahnú cuu yohó tẽ yíndaha ñaha xii ñáyiú isràél! —cachí-güedé xáhaⁿ-güedé cùdíquí ndeé ñáhá-güedé xii-gá.

Te ní cani-güedé déhndé núu-gá.

⁴ Te ní quee tucu té Pilatú quehé te ní xáhaⁿ-dè xii nchaa ñáyiú xíndecu quehé:

—Te cundehe-ndo-dè ñá ndeé ñuhu-í-dé iha, chí yúhú sáhá-í cuendá sá ñá túú cuèchi-dé —cachí-dé xáhaⁿ-dè xii-yu.

⁵ Te ní ndeñuhu ñaha té Pilatú xii Jèsús xití vechiúⁿ-dé te ñuhu ñá coroná iñu díquí-gá, te ñihnu-gá dóó tícuéhé víhí-áⁿ. Te ní xáhaⁿ tẽ Pilatú xii-yu:

—¡Náí-dé-a! —cachí-dé xáhaⁿ-dè xii-yu.

⁶ Te ní xiní ñáhá cuè dítú cúnù ndihi cue tẽ quide cuendá veñúhu. Te ní cuáá-güedé, te xáhaⁿ-güedé:

—¡Cata caa-dé! ¡Cata caa-dé núu cùrúxí! —cachí-güedé xáhaⁿ-güedé xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dè quíhíⁿ cata caa-ndo-dè núu cùrúxí, chí yúhú cùtnúñí iní-í sá ñá túú na cuèchi-dé —cachí-dé xáhaⁿ-dè xii-güedé.

⁷ Te ní xáhaⁿ cuè tẽ isràél:

—Lèi ndécú ndihí nchúhú cachí-xi sá dàí cuú-dé, chí cachí-dé sá Dèhe Yá Ndióxi cùú-dé —cachí-güedé xáhaⁿ-güedé xii-dé.

⁸ Te sá dúcáⁿ ní xáhaⁿ-güedé xii té Pilatú, te váa-gá ní yúhú-dé.

⁹ Núu cuándihu tucu-dé vechiúⁿ-dé, te ní xáhaⁿ túcu-dé xii Jèsús:

—¿Te yòhó ndeé tẽ cùu-n-í? —cachí-dé xáhaⁿ-dè xii-gá.

Dico Jèsús ñá túú ní cáháⁿ-gá.

¹⁰ Núu ní xáhaⁿ tẽ Pilatú xii-gá:

—¿Te vá cachí tnuhu-n núu ndeé tẽ cùu-n-u? ¿Náa ñá túú xiní-n sá yúhú táxi tnuñí-í, te cuu-ni tauchiúⁿ-í cata caa ñaha-güedé xii-n núu cùrúxí cuú-n, te cuu-ni dácacu ñaha-í xii-n-áⁿ? —cachí-dé xáhaⁿ-dè xii-gá.

11 Te ní xáhaⁿ Jèsús:

—Yòhó ñá túú sá táxí tñùní ñáhá-n xii yúhú ní cùu núu ñá túú Yá Ndiòxí ní cuíni-gá sá dúcáⁿ cùnduu, te tée ní taxi cuèndá ñáhá xii-í núu-n tée-án ïo-gá ndècuéchi-dé dàcúúxí yòhó —càchí-gá xáhaⁿ-gá xii-dé.

12 Te òré-án nǐ ngúíta té Pilatú ndúcú-dé nàcuáa cada-dé dàcácu-dé Jèsús ní cùu, dico cue tée isràél ní ngúíta-güedé ní cuáá-güedé, te xáhaⁿ-güedé:

—Te núu na dàcácu-n tée-án, te ñá díú tée tñáhá tñúhu ndihi té Cèsár cúu-n. Chi ndéda-ni cãa tée na cãchí sá úú-dé tée yíndaha ñaha xii ñáyiu cùu úú iní-dé té Cèsár. Te té Jèsús-án càchí-dé sá táxí tñùní-dé —càchí-güedé xáhaⁿ-güedé xii-dé.

13 Te sá dúcáⁿ nǐ xáhaⁿ-güedé xii té Pilatú núu ní quee-dé ndihi Jèsús cuáháⁿ ndihi ñaha-dé corrèdór núu ní quee mee-ni yúú vãha núu ñúhú, te xiáⁿ nání-xí Gãbatá tñúhu hèbreú. Te xiáⁿ ndécú xilé sácóo nchihi té Pilatú xèhndé-dé cuéchi ñáyiu, núu ní nucóo-dé núu xilé-dé òré ní quexio-dé ndihi Jèsús.

14 Te cùu-xi datná cuádava nduu, nduu vispré vico páscaú. Te ní xáhaⁿ tẽ Pilatú xii ñáyiu isràél:

—jNáí tée yíndaha ñaha xii-ndo-a! —càchí-dé xáhaⁿ-dẽ xii-yu.

15 Te ní cuáá-yu, te xãháⁿ-yu:

—jCahni-dé! jCahni-dé! jCata caa-dé núu cùrúxí! —càchí-yu xãháⁿ-yu.

Te ní xáhaⁿ tẽ Pilatú:

—¿Te yúhú cata caa-í tée yíndaha ñaha xii-ndo-u? —càchí-dé xáhaⁿ-dẽ xii-yu.

Te cue dútú cùnùu ní xáhaⁿ-güedé:

—Nchúhú ñá túú-gã tée yíndaha ñaha xii-ndí, chi ñndii-ni té Cèsár yíndaha ñaha-dé xii-ndí —càchí-güedé xáhaⁿ-güedé xii-dé.

16 Te té Pilatú ní xáhaⁿ-dẽ ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sáta caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gã cùrúxí cuáháⁿ ñndii xichi núu nání Yíqiu Díqiu Ndiyi. Te tñúhu hèbreú quée-xí Gólgotá.

18 Te yacáⁿ ní sata caa ñaha-güedé xii-gá núu cùrúxí-án. Te xio xio ñndii-gá ní sata caa-güedé úú cue tée ndècu ndisa cuéchi-xi díu-ni núu cùrúxí tucu.

19 Te ní táuchíúⁿ tẽ Pilatú ní taxi ndecu-güedé ñndii sá ndéé lètrá núu cùrúxí tá cãa-gá, te duha cãchí lètrá-án: “Jèsús tée ñúú Nazàrét, tée yíndaha ñaha xii ñáyiu isràél”, duha cãchí-xi.

20 Te vai ñáyiu isràél ní xiní-yu nàcuáa càháⁿ lètrá-án, chi yatni-ni yuhu ñúú ní sata caa ñaha-güedé xii-gá núu cùrúxí. Te

lètrá-án càháⁿ-xi tñúhu hèbreú, te càháⁿ-xi tñúhu griégú, te càháⁿ-xi tñúhu làtin.

21 Te ní xáhaⁿ cuè dútú cùnùu xii té Pilatú:

—Vá táuchíuⁿ-n tee-güedé lètrá càháⁿ-xi “Tée yíndaha ñaha xii ñáyiu isràél” ní cùu, váha-gã tauchíuⁿ-n tee-güedé lètrá càháⁿ-xi “Tée cãchí yíndaha ñaha xii ñáyiu isràél ní cùu” —càchí-güedé xáhaⁿ-güedé xii-dé.

22 Te ní xáhaⁿ tẽ Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dẽ xii-güedé.

23 Te sátá ní sata caa ñaha cuè sandadú xii Jèsús núu cùrúxí, te cúmi xichi ní quide-güedé dóo-gã, te ñndii xichi dóo-gã ní cãhñu cue sandadú-án. Te ndècu ñndii dóo-gã dóo cãní ñá túú ní tçu.

24 Te cuèndá dóo-án nǐ xítñaha cue sandadú-án:

—Vá ndátá-ó dóo-a, váha-gã núu na còto ndéé-ó cuèndá quini-ó ndèdacãa-o cuu cuèndá-ó —càchí-güedé xítñaha-güedé.

Te ducaⁿ ní quide-güedé chi ní quee ndáá-xi nàcuáa càháⁿ-xi núu tütú Yá Ndiòxí núu cãchí-xi: “Titní xichi ní cãhñu-güedé dóo-í. Te ní xito ndéé-güedé cuèndá cutnùni iní-güedé ndèdacãa-güedé ñndii-güedé dóo-í”, duha cãchí-xi núu tütú-gã. Te sá dúcáⁿ càháⁿ-xi núu tütú Yá Ndiòxí núu xiáⁿ ducaⁿ ní quide cue sandadú-án.

25 Te yatni ñndii curúxí núu tácãa Jèsús nùtní ñaná-gã, ndihi cùhú-xi, ndihi tá Màriá ñndiihi té Clèofás, ndihi tá Màriá Magdaléná.

26 Te ní xiní Jèsús ñaná-gã nùtní-aⁿ ñndii ñndii tée ní xica cuu ndihi-gã, tée ïo cùu iní-gã, te ní xáhaⁿ-gã xii ñaná-gã:

—Náá, tée nùtní-án nduu-dé datná déhe mee-n —càchí-gã xáhaⁿ-gã xii-aⁿ.

27 Te ní xáhaⁿ-gã xii tée ní xica cuu ndihi-gã-án:

—Ñaha-án nduu-aⁿ datná ñaná mée-n —càchí-gã xáhaⁿ-gã xii-dé.

Núu ndéé dàvã-án nǐ nduu ñaná ñáhá tée-án xii ñaná-gã.

Ní xihí Jèsús

(Mt. 27:45-56; Mr. 15:33-41; Lc. 23:44-49)

28 Te ní cutnùni iní Jèsús sá ní ndihi chiúⁿ ní táhú Tãtã-Gá Dútú Ndiòxí ní quide-gã núu ní cãchí-gã:

—Yichí-í ndute —càchí-gã.

Te duha ní càháⁿ-gã chi ní quee ndáá-xi nàcuáa càháⁿ-xi núu tütú Yá Ndiòxí.

29 Te ndècu ñndii lítu ññúhu ndudí íá. Te sá dúcáⁿ ní càháⁿ-gã sá yichí-gã ndute, núu xiáⁿ ní queheⁿ-güedé cãchí te ní chindóyo-güedé xití ndudí íá-án, te ní chinenu-güedé díqiu ñndii dité yutnu ñani hisópó, te ní ndocani-güedé ní chihi-güedé yuhu-gã.

³⁰ Te sáta ní xihí-gá ndudí íá-ǎⁿ, te cächí-gá:

—Vítna ní dáxínu cava-í nchaa chiúⁿ ní cachi Tàtá-í cada-í—duha ní cachi-gá.

Te ní xócuíta dúcuⁿ-gá ndàa núu-gá, te ní xihí-ní-gá.

Ìⁿ sandàdú ní caáⁿ-dé yiqui naha Jèsús ndihí ìⁿ pùyá yihí caá núu-xi

³¹ Te cuèndá sá ndúu vispré vico pàscuá cúu-xí núu ñá ní cuíní cue téé isràél cundecu-ní yiqui cùñú-gá núu cùrúxí ndihí yiqui cùñú cue téé ní sata caa-güedé díñi-gá, chi cuèndá nduu tnéé-áⁿ cúu-xí ndúu ndetatu ñáyiú, te ío quide cahnú-yu nduu-ǎⁿ, núu ní xáhaⁿ-güedé xii té Pilatú sá táuchíuⁿ-dé quihíⁿ cue téé cáhnú-güedé díhíⁿ Jèsús ndihí díhíⁿ cue téé tàcaa ndihí-gá, te xocáni-güedé yiqui cùñú-gá ndihí yiqui cùñú-güedé yácaⁿ.

³² Te sáta dúcaⁿ te ní sáháⁿ cue sandàdú ní sáhnú-güedé díhíⁿ cue téé tàcaa xio xio díñi Jèsús.

³³ Te òré ní cuyatni-güedé núu-gá, te ní xiní-güedé sá sá ní xihí-gá núu ñá ní sáhnú-güedé díhíⁿ-gá.

³⁴ Dico ìⁿ sandàdú-ǎⁿ ní cúxi-dé pùyá néhé-dé ìⁿ xio yiqui naha-gá, te yihí caá núu-xi núu ní caáⁿ-xi yiqui naha-gá ní quee ñíñí ndihí ndute cuí.

³⁵ Te yúhú té Juáá téé ní cadúha tutú-a ní xiní-í nácuáa ní cuu ní xihí Jèsús, te xiǎⁿ núu cáháⁿ ndáá-í cuèndá quíndáá iní-ndó.

³⁶ Te ducaⁿ ní cuu ñá ní sáhnú-güedé díhíⁿ Jèsús, chí ní quee ndáá-xi nácuáa cáháⁿ-xi núu tutú Yá Ndióxi núu cächí-xi: “Vá cáhnú-güedé ní ìⁿ yiqui-gá”, duha cächí-xi.

³⁷ Te ducaⁿ ní quide-güedé Jèsús ní caáⁿ-güedé yiqui naha-gá, chí ingá xichi núu tutú Yá Ndióxi cächí-xi: “Sáá nduu te quini-güedé ìⁿ téé ní dánícuéhé-güedé”, duha cächí-xi.

Chíndúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcaⁿ ní cuu, te té Chèé téé ñúu Arimáteaⁿ tnàhá-dé ní sándáá iní-dé tnúhu Jèsús dico dayuhu, chí ní xóo yúhú-dé cue téé cùnuu núu ñáyiú isràél. Te téé-ǎⁿ ní xáhaⁿ-dè xii té Pilatú núu vá dáñá-dé canehe-dé yiqui cùñú Jèsús quihíⁿ chíndúxi-dé, te té Pilatú ní xáhaⁿ-dè xii-dé sá cúu cànehe-dé yiqui cùñú Jèsús quihíⁿ, núu ní sáháⁿ-dè ní nuu nehe-dé yiqui cùñú-gá núu cùrúxí nchídó-dé cuáháⁿ.

³⁹ Te té Nicòdemú téé ní sáháⁿ núu ní cáháⁿ ndihí-dé Jèsús ndéé díhna, téé-ǎⁿ néhé-dé ócò úxí kilú yuchi ní cuáha mee-ní yúcu sá nání mírra ndihí yúcu sá nání òloés. Te ío váha tnàmi saháⁿ.

⁴⁰ Te ní naníhí tnàhá-dè ndihí té Chèé, te ní chidúcuⁿ nuu-güedé yiqui cùñú Jèsús mee-ní dóó váha, te nácuáa ta dùcuⁿ nuu-güedé yiqui cùñú-gá dóó-ǎⁿ, te ducaⁿ ta chido-güedé yuchi sáháⁿ tnámí-ǎⁿ núu dóó-ǎⁿ chí ducaⁿ tnáhi quide ñáyiú isràél òré chíndúxi tnàhá-yu.

⁴¹ Te yatni núu ní sata caa-güedé Jèsús caá ìⁿ lahuertá. Te xití lahuertá-ǎⁿ nchií ìⁿ yáú cava duha cuáháⁿ ndáá-xi, te vátá yóo ìⁿ-gá nguíndúxi xiǎⁿ.

⁴² Te cuèndá sá ní cuyatni tnàhá nduu ndètatu ñáyiú isràél núu xiǎⁿ yáú cava nchií yatni-ni xiǎⁿ ní chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumíngú tacuíhndá-gá cuáháⁿ tá Màriá Magdaléná cuáháⁿ ngoto-xi yáú núu ní chihi-güedé yiqui cùñú Jèsús, te ní sáá-xi ní xiní-xi sá ñá túu-gá ndèdí yúú yèhe yáú-ǎⁿ.

² Núu xínu-xi cuánuhú núu ndécú té Xímú, àdi Pelú chí úú diu-dé, ndihí ingá téé ní xica cuu ndihí-gá téé ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndèé ní taxi ndecu-güedé—cächí-xi xáhaⁿ-xi xii-güedé.

³ Te ní quee té Pelú ndihí ingá téé-ǎⁿ cuáháⁿ ndéhe-güedé yáú núu ní chihi-güedé yiqui cùñú-gá.

⁴ Te ndúú-güedé xínú-güedé cuáháⁿ ní cùu, dico ingá téé-ǎⁿ ní cuu níhi-gá sáhá-dè cuáháⁿ-dè núu díhna-gá-dé ní sáá-dé yuhu yáú núu ní chihi-güedé yiqui cùñú Jèsús ní cùu.

⁵ Te ní ngáundeyi-dé xító ñihni-dé xití yáú-ǎⁿ, te ní xiní-dé mee-ná dóó váha sá ní xiducúⁿ nuu-gá yúcu, dico ñá ní quíhu-dé.

⁶ Te sáta ní sáá té Pelú te cuánguihu-dé xití yáú-ǎⁿ, núu tnàhá-dé ní xiní-dé nchaa dóó ní xiducúⁿ nuu-gá yúcu-ǎⁿ.

⁷ Te ní xiní-dé sá dóó ní xíndútú díquí-gá ñá túu càtuu jundú-xi ndihí dóó ní xiducúⁿ nuu-gá chí ní naducúⁿ nuu-ná càtuu ìⁿ xio.

⁸ Te nchicúⁿ tucu téé ní sáá díhna-gá-ǎⁿ cuánguihu xití yáú-ǎⁿ, te ní xiní-dé sá dóó-ná yúcu, te ñá túu-gá yiqui cùñú Jèsús núu ní sándáá iní-dé sá ní ndoto-gá.

⁹ Chí vátá tècú tnúni-gá-güedé nácuáa cáháⁿ-xi núu tutú Yá Ndióxi núu cächí-xi sá Jèsús ndoto-gá.

¹⁰ Te ní xicó ndí ndúú cue téé ní sángoto yáú núu ní chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní nanhí tnahá-gă ndihi tá Màriá Magdalená

(Mr. 16:9-11)

¹¹ Te ní sáá tucu tá Màriá yuhu yaú núú ní chihí-güedé yiqui cùñú Jèsús te ní ngúita-xi ndàhyú-xi, te ní ngáundeiy-xi xito nihni-xi xití yaú-án.

¹² Te xití yaú-án ní xiní-xi úú espíritú xínú cuéchi núú Yá Ndióxi xixíhnu-xi mee-ni dóó cuixíⁿ xĩndecu-xi núú ní cáa yiqui cùñú-gă. Te ìⁿ-xi nùcúo núú ní cáa sáhá-gă.

¹³ Te espíritú-án ní xáhaⁿ-xi xití tá Màriá:
—¿Ná cuendá ndàhyú-n? —cächí-xi xáhaⁿ-xi.

Te ní xáhaⁿ tă Màriá:

—Ndàhyú-í chi nèhe-güedé yiqui cùñú Yaa cúú Xitohó-í cuáháⁿ, te ñá túú xiní-í ndéé ní taxi ndecu-güedé —cächí-xi xáhaⁿ-xi xití cue espíritú-án.

¹⁴ Te tnúhu-ni-án ní cáháⁿ-xi te ní nchócótó-xi ìⁿ xio, te ní xiní-xi Jèsús núnúⁿ-gă dico ñá túú ní cùtnuní iní-xi sá díú mèe-gă.

¹⁵ Te ní xáhaⁿ Jèsús xii-xi:
—¿Ná cuendá ndàhyú-n? ¿Yoo nànducu-n? —cächí-gă xáhaⁿ-gă xii-xi.

Te mee-xi ní sani iní-xi sá tée xito lahuertá-án cúú tée-án, núú ní xáhaⁿ-xi:

—Táta, te núú yòhó nèhé-n yiqui cùñú Jèsús cuáháⁿ, te cáháⁿ-n ndéé ní taxi ndecu-n chi cuendá naquehe-í canehe-í nùhú —cächí-xi xáhaⁿ-xi.

¹⁶ Te ní cáháⁿ díú ñaha-gă xii-xi, te xáhaⁿ-gă:

—¡Màriá! —cächí-gă xáhaⁿ-gă xii-xi.

Te ní ndacoto-xi núú-gă, te ní cáháⁿ-xi tnúhu hèbreú, te xáhaⁿ-xi:

—¡Rabóní! —cächí-xi xáhaⁿ-xi. Te tnúhu-án quée-xi Mèstrú.

¹⁷ Te ní xáhaⁿ Jèsús:

—Daña vá ngáni ñaha-n chi vátá ndáá-gă-í núú ndécú Tătà-í. Te nùhú-n cùñaha-n xii cue tée ío váha ní tnahá tnúhu ndihi-í sá ndáá-í núú ndécú Tătà-í Dútú Ndióxi, te díu-gă cúú Tătà-ndó nchàa-ndo, te díu-ni-gă cúú Ndióxi-ndó —cächí-gă xáhaⁿ-gă xii-xi.

¹⁸ Te ní natnii tá Màriá Magdalená ichi cuánuhú-xi cùñaha-xi xii cue tée ní xica cuu ndihi-gă sá ní xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gă xii-xi.

Ní quexio Jèsús núú xĩndecu cue tée ní xica cuu ndihi-gă

(Mt. 28:16-20; Mr. 16:14-18; Lc. 24:36-49)

¹⁹ Te díu-ni ndumíngú sandiquiⁿ ní nataká cue tée ní xica cuu ndihi-gă, te xĩndedí nihnu-güedé vehe sá xiyùhú-güedé cue tée cùnuu núú ñayiu israhél. Te ní quíhu

Jèsús ndéé tnuú-güedé ní ngúnutnii-gă, te ní xáhaⁿ-gă:

—Yá Ndióxi chĩndèe ñaha-gă xii-ndo ío váha cùu iní-ndó ndècu-ndo —cächí-gă xáhaⁿ-gă xii-güedé.

²⁰ Te ní dánhèe ñáhá-gă ndaha-gă ndihi yiqui naha-gă xii-güedé. Te ío ní cudíí ìní-güedé sá díú ndisa-gă ní xiní ñáhá-güedé.

²¹ Te ní xáhaⁿ tucu Jèsús xii-güedé:

—Yá Ndióxi chĩndèe ñaha-gă xii-ndo ío váha cùu iní-ndó ndècu-ndo. Te dàtná ní tendaha ñaha Tătà-í Dútú Ndióxi xii-í véxi-í ñuyúí-a, te ducaⁿ tendaha ñaha-í xii-ndo quíhíⁿ-ndó cáháⁿ-ndó tnúhu-í núú ñayiu —cächí-gă xáhaⁿ-gă xii-güedé.

²² Te ní chiyóco-gă núú-güedé, te ní xáhaⁿ-gă:

—Chí ndúú tàhú Espíritú Yá Ndióxi cundecu ndihi-ndo.

²³ Te nchaa ñayiu na quĩndáa iní-xi tnúhu-í te cùñaha-ndo xii-yu sá ní quide cáhnu iní Yá Ndióxi nchaa cuéchi-yu. Te nchaa ñayiu vá quĩndáa iní tnúhu-í te cùñaha-ndo xii-yu sá vá cáá cáhnu iní-gă cuéchi-yu —cächí-gă xáhaⁿ-gă xii-güedé.

Té Măxí cáháⁿ ndihi-dé Jèsús

²⁴ Te núú ùxúú cue tée ní xica cuu ndihi-gă, te ìⁿ-dé nání-dé Măxí tée ní xóo danáni-güedé Cuächí, te tée-án ñá túú-dé ndécú ndihi-güedé órè ní sáháⁿ Jèsús.

²⁵ Te dava-gă cue tée ní xica cuu ndihi-gă ní xáhaⁿ-güedé xii-dé:

—Ní xiní-ndí Jèsús —cächí-güedé xáhaⁿ-güedé.

Te ní xáhaⁿ tē Măxí:

—Te vá quĩndáa iní-í, chi ndéé quini-í ndaha-gă núú ní quée nduyú, te dàquíhu-í díquí ndáhá-í núú ní caáⁿ nduyú-án, te dàquíhu ndàha-í yiqui naha-gă núú ní caáⁿ, ducaⁿ te quĩndáa iní-í —cächí-dé xáhaⁿ-dē xii-güedé.

²⁶ Te núú úná tucu nduu ní nataká tucu cue tée ní xica cuu ndihi Jèsús ìⁿ vehe, te nduu-án tnahá té Măxí ndécú ndihi-güedé. Te cuéi ndédí nihnu-güedé vehe-án, te ní quíhu Jèsús ndéé tnuú-güedé, te ní xáhaⁿ-gă:

—Yá Ndióxi chĩndèe ñaha-gă xii-ndo ío váha cùu iní-ndó ndècu-ndo —cächí-gă xáhaⁿ-gă xii-güedé.

²⁷ Te ní xáhaⁿ-gă xii té Măxí:

—Cundehe ndàha-í te dàquíhu-n díquí ndáhá-n núú ní quée nduyú, te dàquíhu-n ndàha-n yiqui naha-í-a cuendá quĩndáa iní-n te vá cáni ìⁿ cani úú iní-n —cächí-gă xáhaⁿ-gă xii-dé.

²⁸ Te ní xáhaⁿ tē Măxí xii-gă:

—¡Yòhó cúú-n Xitohó-í! ¡Yòhó cúú-n Ndióxi-í! —cächí-dé xáhaⁿ-dē xii-gă.

²⁹ Te ní xáhaⁿ Jèsús:

—Máxi, ndéé vitna ní sándáá iní-n chi ndéé ní xini ñáhá-n xii-í te ní sándáá iní-n, dico cùdí-gã iní nchaa ñáyiú ñá túú ní xini núú ñáhá xii-í, te ní sándáá iní-yu —cächí-gã xáhaⁿ-gã xii-dé.

Quindáá iní-ó tñuhu yodo tñuni núú tütú-a

³⁰ Te vai-gã sá vã yõ tñahí ndácu cada ñá túú yodo tñuni núú tütú-a ní quide Jèsús núú cuè téé ní xica cuu ndihi-gã.

³¹ Dico dava-gã ní ngódó tñuni núú tütú-a cuendá sá quindáá iní-ndó sã Jèsús cúú-gã Cristú Déhe Dútú Ndiõxi, te naníhi tãhú-ndó te núu na quindáá iní-ndó-gã.

21

Úsá cue téé ní xica cuu ndihi Jèsús ní xini ñáhá-güedé xii-gã

¹ Te ingá nduu tucu xĩndecu cue téé ní xica cuu ndihi Jèsús yuhu lãgúná ñuú Tiberiás, te ní sáháⁿ-gã núú xĩndecu-güedé-án. Te duha ní cuu ní xini ñáhá-güedé xii-gã.

² Te ndécu té Ximú, àdi Pelú chi úú ñuú-dé, ndihi té Máxi téé ní xóo cúnaha-güedé Cuächí, ndihi té Natanáel téé ñuú Cánaá, te ñuú-án yíndèhu-xi distritú Galiléa, te tñahá ndi ndúú déhe té Zebédéu, ndihi úú-gã tucu cue téé ní xica cuu ndihi-gã.

³ Te ní xáhaⁿ té Pelú xii-güedé:

—Quíhiⁿ-í quítniⁿ-í chácá —cächí-dé xáhaⁿ-dè xii-güedé.

Te ní xáhaⁿ-güedé:

—Tñahá nchúhú canchicúⁿ ñáhá-ndí xii-n quíhiⁿ tucu —cächí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quee-güedé xití bàrcú-án cuáháⁿ-güedé. Te niú-án ñã ní níhi tñahí-güedé chácá.

⁴ Te sa ta cùditó-nã cuáháⁿ ní xini-güedé Jèsús yuhu lãgúná, dico ñá ní cùtnuni iní-güedé sá díú-gã.

⁵ Te ní xáhaⁿ-gã xii-güedé:

—Cue téé cuechi, ¿ní níhi-ndó chácá caxi-ó ñã? —cächí-gã xáhaⁿ-gã xii-güedé.

Te ní xáhaⁿ-güedé:

—Védana chácá ñã túú ní níhi-ndí —cächí-güedé xáhaⁿ-güedé xii-gã.

⁶ Te ní xáhaⁿ Jèsús:

—Chí dáquëe ñunu-ndo ndàa xio cuha bàrcú chi níhi-ndó-dí —cächí-gã xáhaⁿ-gã xii-güedé.

Te ducaⁿ ní quide-güedé, te òré nátava-güedé ñunu xití ndute, te ñã cündèe-gã-güedé natava-güedé cuendá sá ní chítú chácá xití-xi.

⁷ Te téé ní xica cuu ndihi-gã téé ío cùu iní-gã ní xáhaⁿ-dè xii té Pelú:

—¿Diu Xitohó Jesucristú! —cächí-dé xáhaⁿ-dè xii-dé.

Te sá ní tecú dóho té Pelú sá dúcáⁿ càháⁿ-dè núu ní ndíumu-dé dóó-dè, chí dóó sã yimaa-ni-dé níhnú-dè ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dè núú ndute-án ní quene-dé ndéé ñuhu yíchi.

⁸ Te dava-gã cue téé ndihi té Pelú ñuú-ni cue téé ní xica cuu ndihi Jèsús ní quendóo-güedé dàtná ñⁿ ciendú-gã mètrú te quene-güedé yuhu ndute. Te tãñuhu-ni-güedé ñunu-güedé chitu chácá ní quene-güedé ndéé yuhu ndute.

⁹ Te òré ní quene-güedé ñuhu yíchi, te ní xini-güedé càyú ñuhu, te núú ñuhú-án ñúhú ñⁿ chácá ndihi ñⁿ pàá.

¹⁰ Te ní xáhaⁿ Jèsús xii-güedé:

—Quíhiⁿ ñⁿ gueheⁿ-ndo ñⁿ úú chácá quiti íchi ní tñi-ndo —cächí-gã xáhaⁿ-gã xii-güedé.

¹¹ Núú té Pelú ní sáháⁿ-dè núú ndécú bàrcú, te ní quee-dé xití-xi ní cãdeé-dé ñunu ñuhu chácá tãñuhu-dé ní quene ndéé ñuhu yíchi, te chitu chácá náhnú, te ñuhu ñⁿ ciendú údico úxí úní-dí xití ñunu-án, te cuéi ducaⁿ vai-di ñuhu dico ñã ní ndátá ñunu-án.

¹² Te ní xáhaⁿ Jèsús:

—Chí nèhé cadí iní-ndó —cächí-gã xáhaⁿ-gã xii-güedé.

Dico ní ñⁿ cue téé ní xica cuu ndihi-gã-án ñã ní xicáⁿ tñuhú-güedé núú-gã núu yoo cùu-gã, chí sa ní cutnùni iní-güedé sá díú Jèsús cúú-gã.

¹³ Te Jèsús ní sáháⁿ-gã ní queheⁿ-gã pàá ní sãñaha-gã xii-güedé caxi-güedé, te dàtnuni ní queheⁿ tucu-gã chácá ní sãñaha-gã xii-güedé.

¹⁴ Vitna cùu úní xito sá xini ñáhá cue téé ní xica cuu ndihi-gã sátá ní ndoto-gã.

Jèsús càháⁿ ndihi-gã té Pelú

¹⁵ Te sátá ní túhú cóho-güedé ní sadí iní-güedé te ní xicáⁿ tñuhú Jèsús núú té Ximú, àdi Pelú chi úú ñuú-dé, te xáhaⁿ-gã:

—Ximú, déhe té Jónás, ¿cùu iní-gã-n yùhú dàcúxí dáva-gã cue téé-a ñã? —cächí-gã xáhaⁿ-gã xii-dé.

Te ní xáhaⁿ té Pelú:

—Mèstrú, cùu iní ñáhà-í, yòhó sa nàha-n —cächí-dé xáhaⁿ-dè xii-gã.

Te ní xáhaⁿ Jèsús:

—Te núu ducaⁿ, te dacaxi-n cue mbéé líhli-í —cächí-gã xáhaⁿ-gã xii-dé.

Te cue mbéé-án cúú-güedé ñáyiú cùu cuendá-gã.

¹⁶ Te ní xáhaⁿ tucu-gã xii té Pelú:

—Ximú, déhe té Jónás, ¿cùu iní ñáhà-n xii-í-u? —cächí-gã xáhaⁿ-gã xii-dé.

Te ní xáhaⁿ tucu té Pelú:

—Mèstrú, cùu iní ñáhà-í, yòhó sa nàha-n —cächí-dé xáhaⁿ-dè xii-gã.

Te ní xáhaⁿ-gã:

—Te núu ducaⁿ, te coto-n cuè mbéè-í —
càchí-gá xáhaⁿ-gá xii-dé.

¹⁷ Te xito cùu uní ní xáhaⁿ tùcu-gá xii té
Pèlú:

—Xímú, déhe té Jònás, ¿cùu iní ñáhá-n-ǎ?
—càchí-gá xáhaⁿ-gá xii-dé.

Te té Pèlú io ní cundiýí-dé sá dúcáⁿ nǐ cuu
uní xito xìcáⁿ tnúhú-gá núú-dě nǔu ndisa sá
cúú iní ñáhá-dě xii-gá, te ní xáhaⁿ-dè:

—Mèstrú, yòhó nchaa sa xini-n, te sa
cùtnuní iní-n sá cúú iní ñáhà-í xii-n —
càchí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í.

¹⁸ Te na càchí tnúhu ndáá-í xii-n sá cùtnàhá
cuechi-gá-n nǐ xóo ndécùihnu mee-n dǎo-n,
te ní xóo quíhíⁿ-n nděni ní xóo cachí iní-n,
dico na yii-n te dacáá-n ndàha-n, te ingá téé
dacùihnu ñaha xii-n dǎo-n te cada yica-dě
candeca ñaha-dě xii-n quíhíⁿ ìn núú ñà túú
tnàhá iní-n —càchí-gá xáhaⁿ-gá xii-dé.

¹⁹ Te sá dúcáⁿ nǐ cáháⁿ Jèsús cúú-xí sá
nǐ dátècú tnúhu ñaha-gá xii té Pèlú nàcuáa
cada-xi cuú-dé, te ducaⁿ càda cahnu-dé Yá
Ndiòxí, te ní xáhaⁿ-gá xii-dé:

—¡Canchicúⁿ ñáhá-n xì-í! —càchí-gá
xáhaⁿ-gá xii-dé.

Téé ío cùu iní-gá

²⁰ Te ní nchóótó tǎ Pèlú ndàa sátá-dě,
te ní xini-dé sá nchicúⁿ ñáhá ìngá téé xica
cuu ndihí-gá cuáháⁿ, téé ío cùu iní-gá téé ní
xínucóo ñíhí-gá òré ní cudini ndihí ñaha-gá
xii-güedé, te ñiu-ni téé-áⁿ nǐ xicáⁿ tnúhú-dě
núú-gá dàvá-áⁿ nǔu nděda càa téé cuáha
cuèndá ñáhá xì-gá núú cuè téé cùu úhú iní
ñáhá.

²¹ Te òré ní xini té Pèlú sá nchicúⁿ ñáhá
tée-áⁿ, te ní xicáⁿ tnúhú-dě núú Jèsús, te
xáhaⁿ-dè:

—Mèstrú, te tée-ǎⁿ, ¿ná cúú sá yáha-dé-í? —
càchí-dé xáhaⁿ-dě xii-gá.

²² Te ní xáhaⁿ Jèsús:

—Te núu yúhú cuini-í sá cùndècu-ni-dé
ndéé ná quixi tucu-í ñuyíú-a, ¿te yòhó
ná cuèndá-n nǔu xìcáⁿ tnúhú-n? Yòhó
canchicúⁿ ñáhá-ní xì-í —càchí-gá xáhaⁿ-gá
xii-dé.

²³ Te ní xinu tnúhu núú nchaa ñáyiú
sàndáá iní tnúhu-gá sá tée-ǎⁿ vǎ cùú-dé. Dico
Jèsús ñà túú dùcaⁿ ní xáhaⁿ-gá sá vǎ cùú-dé,
chí ní xáhaⁿ-gá: “Núu yúhú cuini-í sá tée-ǎⁿ
cundècu-ni-dé ndéé ná quixi tucu-í ñuyíú-a,
¿te yòhó ná cuèndá-n?”, ñuha ní xáhaⁿ-gá xii
té Pèlú.

²⁴ Te ñiu-ni yúhú té Juáá téé ní sani iní-yu
sá vǎ cùú cáháⁿ ndáá-í nchaa nàcuáa ní
cuu, te ducaⁿ nǐ tee-í núú tùtú-a, te cùtnuní
iní-ndó sá tnúhu ndáá cúú-xí.

²⁵ Te ndècu vai-gá núú sá nǐ quide Jèsús. Te
núu ñicó ní ngúndee nchaandi túhú ñá, te váa

ni te nihí ñuyíú te vǎ tnàhá núú-xi cundecu
librú, te núu ñicó ní ngúndee nchaa. Te ducaⁿ
na cùnduu. Te ío chí cádá ndèe iní-nǎ vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÁHA ÑAHA XII ÑÁYIU TNÚHU-GÁ

*Jèsús ní cachí tnúhu ndáa-gá sá quixi
Espiritú Yá Ndióxi cundecu ndihi ñáyi*

¹ Te duha ní cáháⁿ té Lùcá ní xii-dé té Tëofilú: Yúhu sa ní chídó tnúni-í núu librú ndéé díhna nchaa sá ní quide Jèsús, ndihi nchaa sá ní dácuhá-gá ñáyi. Te ní chídó tnúni-í nchaa sá ní quide-gá ndéé nduu ní quesaha-gá quidé chiuⁿ-gá,

² ndihi nchaa sá ní quide-gá ndéé òré cuándaa-gá andiu. Te sa ta cüyatni nduu ndaa-gá andiu, te ní ndatnúhu-gá ndihi cue té ní cáháⁿ-gá dácuhá ñaha xii ñáyi tnúhu-gá, te mee Espiritú Yá Ndióxi ní chindee ñaha-xi xii-gá ní xáhaⁿ-gá nácuaa cada-güedé.

³ Te sáta ní xihí-gá te ní ndoto-gá, te ní xindecu-gá údico nduu. Te titni xito ní sáháⁿ-gá núu ní xindecu-güedé, te ducaⁿ ní quide-gá cuendá quini-güedé sá ndáa ní ndoto-gá, te ní xáhaⁿ-gá nácuaa quide Yá Ndióxi ndihu ndaha-gá ñáyi.

⁴ Te ñⁿ nduu ndécu ndihi ñaha-gá xii-güedé, te ní xáhaⁿ-gá:

—Vá queé-ni-ndó ñúu Jerusálén, chí cundetu-ndo quixi Espiritú Yá Ndióxi cundecu ndihi-ndo, chí sa ní cachí tnúhu-í sá dúcáⁿ ní cáháⁿ Tátá-ó Dütú Ndióxi Yaá ndécú andiu nacuaa cunduu.

⁵ Te ndáa sá ndii Juuá ní dácuañdute ñaha ndii xii-ndo, dico vitna ñá túu-gá cuhé nduu, te quexio Espiritú Yá Ndióxi cundecu ndihi-ndo —cächí-gá xáhaⁿ-gá xii-güedé.

Jèsús cuándaa-gá andiu

⁶ Te òré ní xindecu-güedé ndihi Jèsús, te ní xáhaⁿ-güedé xii-gá:

—Métrú, cuini-ndí cachí tnúhu-n núu sa ta cüyatni nduu chindee-n ñáyi ñúu Is-ràel cuendá taxi tnúni tucú-yu ñúu-yu —cächí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túu xini ñuhu-xi cunaha nchóhó xíaⁿ, chí Tátá-ó Dütú Ndióxi náha-gá ná nduu cada-gá nchaa sá ní cáháⁿ-gá.

⁸ Te òré quexio Espiritú Yá Ndióxi cundecu ndihi-ndo, te cuyi-ndo ní yuhu ní iní-ndó quihíⁿ-ndó cáháⁿ-ndó tnúhu-í núu ñáyi ñúu Jerusálén ndihi núu ñáyi distritú Jüdeá ndihi núu ñáyi distritú Sámariá. Te ducaⁿ-ni cáháⁿ-ndó quihíⁿ-ndó ní cacixo ñuyú —cächí-gá xáhaⁿ-gá xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuándihu-gá xiti víco, te ñá túu-gá ní xini ñáha-güedé xii-gá.

¹⁰ Te ndèhe vihi-güedé andiu núu ndéé quini ñáha-güedé xii-gá yòtnúhu, te ní quexio cunu úu cue té ñihu dóo cuixiⁿ núu ndécú-güedé.

¹¹ Te xáhaⁿ-güedé:

—Nchòhó cue té Galiléa, ¿ná cuendá ndéhe-ndó àndiu? Te dátá-ni çaa Jèsús cuándaa-gá andiu vitna, te ducaⁿ-ni cünduu-gá quixi tucu-gá —cächí cue té ñihu dóo cuixiⁿ-án xáhaⁿ-güedé.

*Cuendá sá ña túu-gá ndii Jüdás núu ní
nanducu-güedé té Màtiá ní núcuntní-dé núu
ndii*

¹² Te ní ndee-güedé yucu Òlívú cuánuhú-güedé ñúu Jerusálén, te ní xúhuⁿ-güedé cuedicó cuádava òré ichi.

¹³ Te òré ní ndexio-güedé ñúu-án, te cuándaa-güedé cuártu ndéé núu ñnu, chí vehe yòdo tnaha ndecu-güedé. Te ní naníhí tnáha-güedé nchaa-güedé té Pèlú, té Jäcobó, té Juuá, té Ndríxi, té Lipé, té Mäxi, té Bartolómé, té Mäteú, té Jäcobó déhe té Álféu, ndihi té Ximú té ní cundihí cue té cananístá, ndihi té Jüdás ñani té Jäcobó.

¹⁴ Te ní naníhí tnáha-güedé nchaa-güedé yácáⁿ ndihi tá Màriá náná Jèsús, ndihi cue ñani-gá ndihi dava-gá cue ñáyi dñí. Te ñⁿ-ni ní cuú-yu ní cáháⁿ ndihí-yu Yá Ndióxi.

¹⁵ Te ñⁿ nduu ní xindecu dátá ñⁿ ciendú óco mee-ni ñáyi sándáá iní tnúhu Jèsús, te ní ngúnutni té Pèlú núu-yu, te ní xáhaⁿ-dè xii-yu:

¹⁶⁻¹⁷ —Nchòhó cue ñáyi ndècu ndihi-í ichi Xitohó Jesucristú, na çani-í cuendú núu-ndó nacuaa ní chídó tnúni ndii Dävii té ní xindecu ndéé sanaha nácuaa ní cáháⁿ Espiritú Yá Ndióxi cuendá té Jüdás. Te daceutí dúcáⁿ ní cuu, chí tnàhá té Jüdás ní xindecu ndihí-o, te ní xinu cuechí-o ndihí-dé núu-gá sá díhna, te ducaⁿ ní quide-dé ní sáha cuendá-dé Jèsús núu cuè té cuu úhu iní ñáha xii-gá.

¹⁸ Te ní cháhu ñaha-güedé xii-dé cuendá sá ní sáha cuendá ñáha-dé xii-gá. Te ní sáháⁿ-dé ñⁿ xichi ní sata caa-dé meé-dé, te ní ngava-dé, te ní cahnde duuⁿ xiti-dé te xíaⁿ ní xihí-dé. Te ní naqueheⁿ-güedé díhúⁿ sá ní cháhu-güedé ndii, te ní nacuaaⁿ-güedé ñuhu núu ní ngava ndii-án.

¹⁹ Te nchaa ñáyi Jerusálén ní níhi-yu tnúhu, te ní dánáni-yu ñuhu-án Acèldamá. Te tnúhu meé-yu quèe-xi: Ñuhu núu ní sati níñí.

²⁰ Te duha ní cáháⁿ ndii Dävii ní chídó tnúni ndii núu librú Sálmu ní dándóo ndii: “Ná ndóo nahi vehe-dé, vá yòo ñⁿ quihíⁿ cundecu”, duha ní cáháⁿ ndii. Te ingá tucu

tnúhu ní cachí ndíi: “Na nànducu-güedé ingá tée nucúnutnîi núú ndîi”, duha ní cáháⁿ ndîi Dàvíí —cachí té Pèlù xáhaⁿ-dê xii-yu.

21-22 Te ní xáhaⁿ tùcu-dé:

—Te ducaⁿ ní cáháⁿ ndîi Dàvíí, te vitna xini ñuhu-xi nanducu-o ñⁿ tée nucúnutnîi-dé núú ndîi Judás, te xini ñuhu-xi ñu-ni ñⁿ tée ní xica cuu ndîhi Xítóhó Jesucristú cúnahá ní xica cuu-o ndîhi-gá, ñⁿ tée ní xiní ndéé òré ní dácuañdute ñaha ndîi Juáá xii-gá, te ndéé òré cuañdaa-gá andîu. Te tée nanducu-o cùndecu-dé cáháⁿ-dé nàcuáa ní cuu ní ndoto-gá —cachí té Pèlù xáhaⁿ-dê xii-yu.

23 Te ní cacunehe-güedé úú tñahá-güedé núu ndédacaa-güedé nduu táhú-güedé nucúnutnîi-güedé núú ndîi. Te ñⁿ-dé nání-dê Chèè Barsábás, àdi Justú chi úú ñu-dé, te ingá-dé nání-dê Màtiá.

24 Te ní cáháⁿ ndîhi-güedé Yá Ndiòxí, te xáhaⁿ-güedé xii-gá:

—Yóhó Dútú Ndiòxí xini-n iní nchaa ñáyi, te mee-n nàha-n núu ndéda càa núú ùú cue tée-a tñahá iní-n

25 cáháⁿ-güedé tñuhu-n núú ñáyi, te tée-áⁿ nucúnutnîi-dé núú ndîi Judás, chi cuháⁿ ndîi núú ùhú núú ndàhú núú tàù-xi quíhíⁿ ndîi —cachí-güedé xáhaⁿ-güedé xii-gá.

26 Te ní xito ndéé-güedé, te ní cutnùní sá tée nani Matíá quendóo-dé ndîhi úxí ñⁿ cue tée ní táuchíúⁿ-gá dacuàha ñaha xii ñáyi tñuhu-gá.

2

Ní quexio Espiritú Yá Ndiòxí cundecu ndîhi ñáyi

1 Te ní sáá nduu còo vico Pentecostés te xíndecu nchaa ñáyi ñⁿ-ni xichi.

2 Te ní tecú dóho-yu uuⁿ ní níhi andîu, dàtná quidé ñⁿ táchi níhi víhi ní quide-xi, te ducaⁿ ní cuu ndéé xití vehe núú ndécü-yu nchaa-yu.

3 Te ní xiní-yu dàtná cáá itá ñuhú cáá sá ndécü xití vehe, te ní xitè nuu-xi ní ngoyo ndodo-xi díquí-yu nchaa-yu.

4 Te ducaⁿ ní quide-xí òré ní quexio Espiritú Yá Ndiòxí ní ngúndecu ndîhi-yu nchaa-yu. Te ní ngúita-yu ní cáháⁿ-yu tñuhu cue ñáyi ñá túú cùu ñáyi isráél, te nchaa xíáⁿ ní quide Espiritú Yá Ndiòxí.

5 Te vai ñáyi isráél xíndecu nchaa dava-gá ñuú ní tacá-yu ñuú Jerusalén, te ñáyi-áⁿ ño ndücu ndéé-yu dácuahá-yu nchaa ndudú sá dácuaàha tñahí-yu.

6 Te òré ní tecú dóho-yu ñîhi, te ní sáháⁿ-yu ní xíndedóho-yu tñuhu cáháⁿ mée-yu ñⁿ ñⁿ ñuú-yu, chi ndi díñⁿ ndi díñⁿ tñuhu cáháⁿ ñáyi ndécü-áⁿ.

7 Te xíáⁿ ño ní cuñúhu ñáyi véxi dava-gá ñuú, te ní xitñahá-yu:

—Ñáyi ducaⁿ xícáháⁿ cùu-yu ñáyi distritú Galiléa.

8 Te nása ní quidé-yu ní cutúha-yu nàcuáa cáháⁿ-ó ñⁿ ñⁿ-o ndéé líhli-o?

9 Te iha véxi ñáyi dava nàcióⁿ, chi véxi ñáyi Pártiá, véxi ñáyi Mediá, véxi ñáyi Élam, véxi ñáyi Mesopotamiá, véxi ñáyi Júdeá, véxi ñáyi Capadociá, véxi ñáyi Pòntó, véxi ñáyi Asíá,

10 véxi ñáyi Frigíá, véxi ñáyi Pánfiliá, véxi ñáyi Égiptú, véxi ñáyi Áfricá ñáyi ndécü ndéé núú-gá-xí ñuú Cirené. Te tñahá ñáyi ñuú Rómá véxi, te ñáyi-áⁿ chi ñá díú mèe-ni ñáyi isráél cùu-yu nchaa-yu, dico ñⁿ-ni cùu sá dácuaàha-yu.

11 Te véxi ñáyi Crètá, véxi ñáyi Àrabiá. Te nchaa-o sa ndédóho-o cáháⁿ-yu nàcuáa cuháⁿ tñuhu mee-o ñⁿ ñⁿ-o. Te nchaa ñáyi xícáháⁿ tñuhu-o cáháⁿ-yu cuendá nchaa sá vâ yóo tñahí ndàcu cada ní quide Yá Ndiòxí —cachí-yu xitñahá-yu.

12 Te ní cuñúhu víhi-yu, te ñá ná sáá iní-yu nása ní cuu, te xitñahá-yu:

—¿Nása ní cuu duha cáháⁿ-yu tñuhu-o? —cachí-yu xitñahá-yu.

13 Te davá-yu ní sácú ndéé yíchi ñáhá-yu, te xitñahá-yu:

—Xíxini ñáyi-áⁿ núu ñá náhá-yu tñuhu cáháⁿ-yu —cachí-yu xitñahá-yu.

Tñuhu ní xáhaⁿ té Pèlù xii cue ñáyi

14 Te ní ngúnutnîi té Pèlù ndîhi úxí ñⁿ cue tée ní táuchíúⁿ Jesús dacuàha ñaha xii ñáyi tñuhu-gá, te níhi ní cáháⁿ-dé, te xáhaⁿ-dê xii-yu:

—Nchaa nchòhó ñáyi distritú Júdeá ndîhi nchòhó ñáyi ñuú Jerusalén, cundedóho váha-ndo tñuhu na cáháⁿ-í-a.

15 Ñá ndáá tñuhu cáháⁿ-ndó, chi ñá túú xini-ndí te ducaⁿ cáháⁿ-ndó, chi davitna cùu-xi caá ñⁿ dátneé, vátá tñahá-gá òré coho ñáyi ndidí.

16 Te yúhú ná cachí tñuhu-í xii-ndo vitna nacuáa ní xáhaⁿ Yá Ndiòxí xii ndîi Jóel tée ní xóo cáháⁿ tñuhu-gá ndéé sanaha nàcuáa cada ñaha-gá xii ñáyi, te ndîi-áⁿ ní chídó tñúni ndîi nàcuáa ní cáháⁿ-gá.

17 Te duha ní xáhaⁿ-gá xii ndîi: Cùmání-gá sáá nduu nàa ñuyú, te cuañaha-í Espiritú-í cundecu ndîhi nchaa ñáyi na quindáá iní ñáhá xii-í.

Te cue déhe-yu cáháⁿ-yu tñuhu-í, te cue tée cuechi dacòto núú ñáhá-xí xii-güedé,

te ducaⁿ-ní cuè tée ni sàhnu cáháⁿ saní-güedé,

te diu-ni cuendá nchaa sá quidé-í ducaⁿ dacòto núú ñáhá-xí xii-güedé.

18 Te nchaa ñáyi xinu cuechi núú-í cáháⁿ-yu tñuhu-í, te cuañaha-í Espiritú-í cundecu ndîhi-yu.

19 Te ndéé andiu, yacáⁿ vai sá cadà-í nàcuáa cuñúhu vihi-yu,
te núú ñuyú-a cada-í ñⁿ sá vátá quini
tnàhí-gá-yu,

te ngoyo ññí te ngoyo ñuhú te quene vihi ññhmá.

20 Te vá dáyèhé-gá nchíanchii,
cuu nee ñuyú te cuu ticuèhé núú yóó dàtná ticuèhé ññí.

Te dàv-áⁿ sáá nduu quixi Yaá cúú Xitohó-yu,
te nduu-ú cuu-xi ñⁿ nduu càhmu vihi, chi cada-gá nchaa sá ñá túú xini-yu, te cuñúhu vihi-yu.

21 Te òré xiáⁿ te nchaa ñáyiu càháⁿ ndihi ñaha xii Yaá cúú Xitohó-yu-áⁿ nanihí tãhú-yu.

Duha ní xáhaⁿ Yá Ndióxi xii ndii Joél ní chídó tnúni ndii.

22 Te nchòhó ñáyiu isràél, cundedóho váha-ndo tnúhu na càháⁿ-í-a cuèndá Jèsús téé ñúú Nazarét. Te Jèsús ní quide-gá chiurⁿ Yá Ndióxi, chi mee Yá Ndióxi ní chindee ñaha-gá ní quide Jèsús ná dahanú chiuⁿ, núú xiáⁿ ní ndacu-gá ní quide-gá nchaa sá vá yóó tnàhí ndàcu cada, te xiáⁿ ní cuñúhu vihi-ndo. Te sa ñaha-ndo nacuáa ní quide-gá cutnàhá ní xica cuu-gá ñuyú.

23 Te ndii Júdás ní taxi cuèndá ñháhá ndii Jèsús xii nchòhó cue téé ní cuu úhú iní ñháhá xii-gá, te ní nducú-ndó cuè téé úhú iní-xi ní tní ñaha-güedé xii-gá te ní sata caa ñaha-güedé núú cürúxi, te núú cürúxi-áⁿ ní xihí-gá. Dico sa ní cutnùni iní Yá Ndióxi sá dúcáⁿ cada-ndo Jèsús, te mee Yá Ndióxi ní cachí-gá sá dúcáⁿ ndòho Jèsús.

24 Te diu-ni mee Yá Ndióxi ní dándótó-gá Jèsús, chi sa ní càháⁿ-gá sá òré cuú-gá te vá cúú dúcáⁿ-gá.

25 Te ndii Dàvií téé ní xindaha ñaha xii cue ñani tnàhá-ó ní xindecu ndéé sanaha ní chídó tnúni ndii nàcuáa ní càháⁿ Jèsús, te duha ní càháⁿ-gá:

Cùtnuni iní-í sá ncháá nduu ndecu ndihi-í Yá Ndióxi, te ío chindee ñaha-gá xii-í, te ñá túú tnàhí sá yuhú-í.

26 Te ío ndacáⁿ tãhú-í núú Yá Ndióxi chi cùdí iní-í, chi sa ñaha-í sá cúú-í dico ndoto-í,

27 chi vá dáñá-gá quihíⁿ dúcáⁿ àlmá-í núú ndécú ñáyiu ní xihí,

te vá dáñá-gá téhyu yiqui cùñú-í chi cùu-í Déhe-gá, te yuhú sa ñaha-í sá cúú iní ñháhá-gá xii-í.

28 Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndihi ñaha-gá xii-í núu ío cùdí iní-í.

Duha ní càháⁿ Jèsús, te ducaⁿ ní chídó tnúni ndii Dàvií.

29 Te nchòhó cue ñani tnàhá-í, na càchi tnúhu ndáá-í xii-ndo cuèndá ndii Dàvií téé ní xindecu ndéé sanaha vihi, chi ní xihí-dé, te ní

chindúxi ñaha-güedé, te ñaha-o tnavíí núú ní chindúxi ñaha-güedé.

30 Te ndii Dàvií ní xóo càháⁿ ndii tnúhu Yá Ndióxi, te sa ñaha ndii sá Yá Ndióxi ní càháⁿ ndáá cuiti-gá sá díú-ní ñⁿ tnaha ndii taxi tnúni-dé ñáyiu isràél ndéé cuèé-gá dàtná ní xóo taxi tnúni méé ndii cutnàhá ní xindecu ndii, te téé taxi tnúni-áⁿ cúú Cristú chi cùu-gá ñⁿ tnaha ndii.

31 Te sa ní cutnùni iní ndii sá ndótó Cristú, núu xiáⁿ ní chídó tnúni ndii sá vá dáñá Yá Ndióxi sá quihíⁿ dúcáⁿ àlmá-gá cundecu-xi núú ndécú ñáyiu ní xihí, te vá dáñá-gá téhyu yiqui cùñú-gá.

32 Te ndáá chi Yá Ndióxi ní dándótó-gá Jèsús, te nchúhu ní xini-ndí sá ní ndoto-gá.

33 Te ní xáhaⁿ Yá Ndióxi xii Jèsús sá cundecu ndihi ñaha-gá, te taxi tnúni Jèsús ní caa ní quihíⁿ. Te Yá Ndióxi ní sãñaha-gá Espiritú-gá ní ngúndecu ndihi-gá nàcuáa ní xáhaⁿ-gá, te diu Jèsús ní quide-gá nchaa sá ní xini-ndó vitna ndihi nchaa sá ní xindedóho-ndo.

34 Te ndii Dàvií ñá túú ní ndàa túu ndii andiu ndihi yiqui cùñú ndii, te òré ndécú-gá ndii ñuyú-a ní cachí ndii:

Dútú Ndióxi ní xáhaⁿ-gá xii Yaá cúú Xitohó-í: “Ngóo xio cùha-í,

35 te yuhú cada-í te nchaa sá cúú ùhú iní ñháhá xii-n canehé-xi sá yíññhu núu-n.”

Duha ní xáhaⁿ Dútú Ndióxi xii Yaá cúú Xitohó-í càchi ndii.

36 Te nchòhó ñáyiu isràél cùu-ndo ndi mee-í, te cuini-í cundedóho váha-ndo ñⁿ tnúhu na càháⁿ-í-a. Jèsús ní sata caa-ndo-gá núú cürúxi, dico Yá Ndióxi ní cachí-gá sá Jèsús dacacu nihnu-gá ñáyiu, te vá caní ñⁿ caní úú iní-ndó, chi diu-gá cùnùu-gá núú nchaa ñáyiu —càchi té Pèlú xáhaⁿ-dè xii-yu.

37 Te ñáyiu ní xindedóho tnúhu ní càháⁿ té Pèlú ní ndixi túu iní-yu nàcuáa quidé-yu ndécú-yu, te ní xáhãⁿ-yu xii-dé ndihi dava-gá cue téé ní táuchúⁿ Jèsús dacuáha ñaha xii-yu tnúhu-gá:

—Nchaa nchòhó cue ñani tnàhá-ndí, ¿nása cachí-ndó cùnduu, nása cada-ndí vitna? —càchi-yu xáhãⁿ-yu xii-güedé.

38 Te ní xáhaⁿ té Pèlú xii-yu:

—Daña-ndo nchaa sá cuèhé sá dühá quide-ndo, te cada càhmu iní Yá Ndióxi nchaa yicá cuèchi-ndo. Te cuandute-ndo cuèndá quini-yu sá ní natuha-ndo ichi Jèsús, te ducaⁿ te taxi Yá Ndióxi Espiritú-gá cundecu ndihi-ndo,

39 chi cuini-gá taxi-gá Espiritú-gá xii mee-ndo ndihi déhe-ndo, te cuãñaha-gá Espiritú-gá xii nchaa ñáyiu ní caa xico ñuyú, ñáyiu càháⁿ-gá cundecu ichi-gá ndéé idá-gá —càchi té Pèlú xáhaⁿ-dè xii-yu.

40 Te titní-gá tnúhu ní xáhaⁿ-dê nàcuáa cadá-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vâ cadá-ndó sá quidé dâva-gá-yu —câchí-dê xáhaⁿ-dê.

41 Te nchaa ñáiyu ní sándáá iní-xi tnúhu ní cáháⁿ té Pèlú ní sandutè-yu, te ñu-ni nduu-áⁿ ní cuu dàtná úní mîl ñáiyu ní sándáá iní-xi ní xíndecu ndihi ñáiyu xídácúhá tnúhu Yá Ndiôxi.

42 Te ío ní xíndedóho-yu tnúhu ní cáháⁿ cue téé ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá nâhá-yu sá dúcáⁿ ní quide Jèsús cútñahá vátá cáhni ñaha-gá-güedé xii-gá, te ní xóo cáháⁿ ndihí-yu Yá Ndiôxi.

Nàcuáa ní quide nchaa ñáiyu ní sándáá iní tnúhu Jèsús ndéé díhna nuu

43 Te nchaá-yu ní cuñúhu vihi-yu, chi cue téé ní táuchíúⁿ-gá dacuàha ñaha xii-yu tnúhu-gá ní quide-güedé titní núú sâ vâ yóo tnâhí ndàcu cada, te xiáⁿ ní cutnúni iní-yu sá méé Yá Ndiôxi chíndèe ñaha-gá xii-güedé.

44 Te nchaa ñáiyu sándáá iní tnúhu Jèsús cáháⁿ ndihi tnàha váha-yu, te cuèi-ni nchaa ndachíuⁿ nandíhi-yu ndècu cahnu.

45 Te ní dícò-yu nchaa ndachíuⁿ sá ñà túú xini ñuhú-yu, te ní níhí-yu díhúⁿ te ní sáñàhá-yu xii nchaa ñáiyu ñâ níhí.

46 Te íiⁿ nduu íiⁿ nduu ní xóo quíhíⁿ ndihi tnàhá-yu veñúhu càhnu sá ío cúnuu. Te ní xexi ndihi tnàhá-yu vehé-yu. Te ío ní cudáí iní-yu chí íiⁿ-ni ní cuú-yu nchaá-yu.

47 Te ío ní ndacáⁿ táhú-yu núú Yá Ndiôxi, te nchaa dava-gá ñáiyu ní cáháⁿ váha-yu cuèndá ñáiyu-áⁿ. Te mee Yá Ndiôxi ní quide-gá ní sándáá iní vâi-gá ñáiyu, te ní xíndecú-yu ndihi dava-gá ñáiyu xídácúhá tnúhu-gá.

3

Quide tátma-güedé íiⁿ téé yacua

1 Te íiⁿ nduu òré caá úní sacuaa, òré xicáháⁿ-yu ndihi Yá Ndiôxi cuáháⁿ té Pèlú ndihi té Juáá veñúhu càhnu sá ío cúnuu sacúú-xí ñáiyu isráèl.

2 Te ndècu íiⁿ téé yacua, te ducaⁿ-ni càa-dé ní cacu-dé. Te sàháⁿ ndihi ñàhá-yu veñúhu càhnu sá ío cúnuu, te sàcòo-dé íiⁿ xio yuyèhe veñúhu sá nání Yèhe Vii Caa, chí ducaⁿ nàni-xi, te xicáⁿ ndàhú-dé núú nchaa ñáiyu sàháⁿ veñúhu.

3 Te ní xiní-dé té Pèlú ndihi té Juáá cuànguihu-güedé veñúhu, te xicáⁿ ndàhú-dé núú-güedé.

4 Te ní ndacoto-güedé núú-dê, te ní xáhaⁿ té Pèlú xii téé yacua-áⁿ:

—Cundehe ñaha xii-ndí —câchí té Pèlú xáhaⁿ-dê xii-dé.

5 Te ní xíndéhe ñaha-dé xii-güedé, chí ní cáháⁿ-dê sá ío íiⁿ sá cuáñaha-güedé.

6 Te ní xáhaⁿ té Pèlú:

—Ñâ túú tnâhí díhúⁿ nêhé-í dico chindee ñaha-í xii-n, te Xitohó Jesucristú Yáá ní xíndecu ñuu Nazaréte, ndacu-gá cada tátma ñaha-gá xii-n, ndacuíñí te caca-n —câchí-dê xáhaⁿ-dê.

7 Te té Pèlú ní tñi-dé ndaha cùha téé yacua-áⁿ, te ní ngúita-dé ndacàni ñaha-dé, te òré xiáⁿ ní naníhí ndéé-dê, te ní ndúha sàhá-dê.

8 Te ní ndacuíñí cunu mee-dê te ní xica-dé, te ní cachí-dé sá ío càhnu cuu Yá Ndiôxi cuèndá sá ní ndúha-dé, te ta sândava-dé cuànguihu ndihi ñaha-güedé veñúhu.

9 Te nchaa ñáiyu xíndecu-áⁿ ní xiní-yu sá ní nduu váha-dé, te ndèhé-yu ndacáⁿ táhú-dé núú Yá Ndiôxi.

10 Te ní naquini ñàhá-yu xii-dé sá díú tée xicáⁿ ndàhú téé ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ní ndúha-dé.

Té Pèlú ní cáháⁿ-dê corredór sá nêhé ñuu ndí Salomón

11 Te sátá veñúhu càa corredór sá nêhé ñuu ndí Salomón. Yacáⁿ ndécú té Pèlú ndihi té Juáá ndihi téé ní ndúha sàhá-xi, te ñâ cuini téé ní ndúha sàhá-xi-áⁿ daña-dê quíhíⁿ-güedé dandóo ñaha-güedé xii-dé. Te chítú-yu ní quexio coyó-yu núú ndécú-güedé, te ní cuñúhu vihi-yu sá ní ndúha sàhá tée cùhú-áⁿ.

12 Te té Pèlú ní xiní-dé ní quexio coyó-yu, te ní xáhaⁿ-dê xii-yu:

—Nchòhò ñáiyu isráèl, çná cuèndá ndéé dúcáⁿ ndèhe ñaha-ndo xii-ndí te cuñúhu-ndo sá ní ndúha téé yacua-áⁿ? Nchòhò cáháⁿ-ndó sá méé-ndí ní quide tátma-ndí-dé sá ío váha iní-ndí, dico ñàhá chí ñâ díú mèe-ndí ní quide tátma-ndí-dé.

13 Chí Yá Ndiôxi ní ndadúha ñaha-gá xii-dé, chí díu-gá cúú Ndiôxi ndíi Àbrahám ndihi ndíi Isàac ndihi ndíi Jàcób, te ñu-ni cue téé-áⁿ cúú ñàni tnàhá-ó ní xíndecu ndéé sanaha vihi. Te ñu-ni Ndiôxi-áⁿ ní xáhaⁿ-gá xii Déhe-gá Jèsús sá táxi tnúni-gá nchaa sá ío andíu ndihi nchaa ñáiyu ndècu ñuyúú-a, dico mee-ndo ní sáha cuèndá-ndó Jèsús núú tée cùchiuⁿ. Te té Pilatú ní cuini-dé dacàcu-dé Jèsús ní cuu, te mee-ndo ñâ ní cuini-ndé.

14 Te Yá Ndiôxi ní cachí-gá sá ío váha iní Jèsús te ñâ túú tnâhí cuèchi-gá. Te mee-ndo ñâ túú ní cuini-ndó càcu-gá núu ní xáhaⁿ-ndo xii té Pilatú sá váha-gá dacàcu-dé íiⁿ téé ndècu vihi cuèchi-xi, te vâ dacàcu-dé Jèsús.

15 Te ní xáhaⁿ-ndo sá cáhni-güedé Jèsús Yáá quidé nchito-o ndecu-o, dico Yá Ndiôxi ní dándótó ñaha-gá, te ní xiní-ndí sá ndàá ní ndoto-gá.

16 Te nchúhu sa nàha-ndí sá díú Xítohó Jesucristú ní ndadúha-gá tée yacua, te náí-dé núní-a. Te ducaⁿ ní quide-gá chi ní sándáá iní ñáhá-dé xii-gá, te vitna ní xiní-ndó sá ndáá ní ndúha-dé.

17 Te nchòhò ndihi cue tée cùnnu ní sahni-ndo Xítohó Jesucristú, chi ñá ní cùtnuní iní-ndó sá ní quide-ndo.

18 Te cue tée ní xóo cáháⁿ tnúhu Yá Ndióxi ndéé sanaha ní chídó tnùní-güedé nàcuáa ní xáhaⁿ Yá Ndióxi xii-güedé sá Cristú quixi-gá ñuyú-a, te ndoho vihi-gá, te xiáⁿ núu ducaⁿ ní cuu ío ní ndoho-gá.

19 Te vitna te dañá-ndo ncháa sá cuèhé sá dúhá quide-ndo. Te quindáá iní-ndó Yá Ndióxi, te ducaⁿ te cada càhnu iní-gá nchaa sá ñá túú vaha ní quide-ndo ñuyú-a, te canu ichi ñaha-gá xii-ndo ñiⁿ ichi váha.

20 Te ní tendaha-gá Cristú ní quixi-gá ñuyú-a, chi mee Yá Ndióxi ní cachí-gá sá díú Cristú taunihnu ñaha-gá xii-ndo.

21 Te dacuití cùndecu-gá andiu ndéé ná sáa nduu nàtaxi ndecu-gá nchaa sá ndécú ñuyú nàcuáa sàni iní mee-gá. Te diu ducaⁿ ní cáháⁿ Yá Ndióxi núu ducaⁿ ní chídó tnùní cue tée ní xóo cáháⁿ tnúhu-gá ndéé sanaha.

22 Te ndíi Moisés ní xáhaⁿ ndíi xii cue ñani tnáhá-ó ní xíndecu ndéé sanaha: “Yá Ndióxi tendaha-gá ñiⁿ tée quixi-dé cáháⁿ-dé tnúhu-gá dàtná cuiní-ndó ní quide ñaha-gá xii yúhú, te tée-áⁿ cuu-dé ñiⁿ ñani tnáhá-ndó. Te cundedóho váha-ndo ncháa tnúhu cáháⁿ-dé.

23 Te nchaa ñáiyú vá quindáá iní tnúhu cáháⁿ-dé, te cuíta nihnú-yu chi vá quihíⁿ-yu núu quihíⁿ ñáiyú sándáá iní tnúhu Yá Ndióxi”, duha ní xáhaⁿ ndíi Moisés xii-yu –cachí té Pèlú xáhaⁿ-dé xii-yu.

24 Te ní xáhaⁿ tùcu té Pèlú xii-yu:

–Ndíi Sàmuél ndihi nchaa cue tée nchicúⁿ-gá ní xóo cáháⁿ tnúhu Yá Ndióxi ndéé sanaha ní cáháⁿ-güedé nàcuáa cada-xi vitna.

25 Te Yá Ndióxi ní cáháⁿ-gá ndihi cue tée ní cáháⁿ tnúhu-gá ndéé sanaha. Te ní quide ndáá-gá ndihi nchaa ñani tnáhá-ó ní xíndecu ndéé sanaha nàcuáa cada-gá nanihi tãhú-ó. Te duha ní xáhaⁿ-gá xii ndíi Abrahám: “Ío nduu cacu ñiⁿ tnàha-n, te tée-áⁿ cada-dé te nanihi tãhú ñáiyú ñuyú-a”, duha ní xáhaⁿ-gá xii ndíi Abrahám.

26 Núu xiáⁿ ní tendaha-gá Déhe-gá ní quixi-gá núu ndécú-ndó cuendá dañá-ndo ncháa sá cuèhé sá dúhá quide-ndo, te nanihi tãhú-ndó –cachí té Pèlú xáhaⁿ-dé xii-yu.

4

Té Pèlú ndihi té Juáá ndécú-güedé ndaha tée cùchiuⁿ

1 Te té Pèlú ndihi té Juáá cáháⁿ dúcáⁿ-ni-güedé ndihi ñáiyú, ní quexio cue dútú ndihi tée tàxi tnuní ñáhá xii cue tée quide cuendá veñúhu càhnu sá ío cùnnu, ndihi cue tée cùu saducéú.

2 Te ní cudééⁿ-güedé nchaa-güedé núu té Pèlú ndihi té Juáá sá xáhaⁿ-güedé xii ñáiyú sá ndótó ñáiyú ní xihí dàtná ní ndoto Jèsús.

3 Te ní tñi ñaha-güedé ní chihí ñaha-güedé vecaá xii-güedé, te ñá ní quide ndáá tée cùchiuⁿ cuèchi-güedé nduu-áⁿ chi sa ní cuaa.

4 Te ío vãi ñáiyú ní sándáá iní-yu tnúhu ní cáháⁿ-güedé, te ñáiyú-áⁿ ndihi ñáiyú sa ní sándáá iní-xi ndéé càni-gá ní xínu dàtná úhúⁿ mĩ mee-ni cuè tée, te diiⁿ ñáiyú dihi ndihi landú.

5 Te nduu tnéé-áⁿ diu-ni ñuu Jerusalén-áⁿ ní tacá cue tée yindaha veñúhu, ndihi cue tée cùu sacuéhé núu ñáiyú isràél ndihi cue tée dàcuaha ñaha xii-yu nchaa tnúhu ní chídó tnùní ndíi Moisés.

6 Te tnáhá dútú cùnnu-gá tée nani Anás ndécú ndihi té Caiías, ndihi té Juáá, ndihi té Lijandrú ndihi dava-gá ñani tnáhá dútú cùnnu-gá-áⁿ ndécú.

7 Te ní xáhaⁿ-güedé xii cue tée xínu cuechi núu-güedé:

–Chí cuaháⁿ queñuhu-ndo té Pèlú ndihi té Juáá vecaá, te na quixi-güedé iha –cachí-güedé xáhaⁿ-güedé.

Te ní quexio té Pèlú ndihi té Juáá núu cuè tée cùnnu, te cue tée cùnnu-áⁿ ní xicáⁿ tnúhú-güedé núu-güedé, te xáhaⁿ-güedé:

–¿Nása ní quide-ndo cuendá tée yacua-áⁿ? ¿Yoo ní táuchíúⁿ dúcaⁿ cada-ndo? –cachí-güedé xáhaⁿ-güedé.

8 Te ndécú ndihi té Pèlú Espiritú Yá Ndióxi, núu xiáⁿ ní xáhaⁿ-dé xii-güedé:

–Nchòhò cue tée cùchiuⁿ ndihi nchòhò cue tée cùu sacuéhé núu ñáiyú isràél,

9 te núu cuiní-ndó quini-ndó nása ní quide-ndí ní ndúha tée yacua-áⁿ,

10 te cundedóho-ndo ñiⁿ tnúhu na cáháⁿ-í-a. Xini ñuhu-xi cundedóho nchaa ñáiyú isràél cuendá quini-yu nàcuáa ní cuu ní ndúha té-áⁿ. Xítohó Jesucristú Yaá ní xíndecu ñuu Nazarét ní quide tátna-gá sáhá tée yacua ní ndúha, te diu-ni-gá ní sata caa-ndo núu cùrúxí te núu cùrúxí-áⁿ ní xihí-gá, te ní dándótó ñaha Yá Ndióxi xii-gá.

11 Te núu tùtú Yá Ndióxi cachí-xi: “Cristú cúú-gá dàtná ñiⁿ yúú ndécú xiquí ñiⁿ vehe. Te yúú cachí-yu sá ñá túú nandíhi, te diu xiáⁿ ní nandíhi-xi ní ngùnuni-xi xiquí véhé”, duha cachí-xi núu tùtú-gá. Te ducaⁿ sátnahá-xi cùu Jesús, chi cachí-ndó sá ñá túú nandíhi-gá,

12 dico Yá Ndióxi ñá túú ndéé ní tàxi ndecu-gá ingá tée dàcácu nihnu ñaha xii-o núu úhú núu ndàhú, chi ñiⁿ dii-ñi Déhe-gá

Xitohó Jesucristú dacácu nihnu ñaha-gã xii-o —cächí té Pèlú xáhaⁿ-dê xii-güedé.

¹³ Te té Pèlú ndihi té Juää ñá túú tûha-güedé, te cûñúhu cue tée cûchiuⁿ sá ío ñíi xindáa-güedé. Te ní cutnùní iní cue tée cûchiuⁿ-áⁿ sá Jësús ní xica cuu ndihi-güedé, núu xiáⁿ ñá túú tnàhí yùhú-güedé cãháⁿ-güedé.

¹⁴ Te cuëndá ndécú ndihi té Pèlú ndihi té Juää tée ní ndúha sãhá-xi, núu xiáⁿ ñá ní ñíhi cue tée cûchiuⁿ tnúhu cãháⁿ-güedé.

¹⁵ Te ní xáhaⁿ-güedé xii té Pèlú ndihi té Juää sá queé-güedé quehé cuëndá ndóo mee-güedé ndatnúhu-güedé.

¹⁶ Te ní xitnáha-güedé:

—¿Nása cada-o úú cue tée-ã?, chi nchaa ñáyiu ñúu Jerusálén náha-yu sá ní quide tátna-güedé ñí tée yacua, te xiáⁿ xicuñúhu vîhi ñáyiu. Te vá cúú cãchí-ó sã ñã ndáa, chi vai ñáyiu ní xini nácuáa ní cuu.

¹⁷ Te dayùhú-ó-güedé te cúñaha-o sã vá cãháⁿ-gã-güedé tnúhu Jësús, chi núu ñáhá te quindáa-gã iní-yu —cächí-güedé xitnáha-güedé.

¹⁸ Te ní cana tucu-güedé té Pèlú ndihi té Juää, te xáhaⁿ-güedé sá vá dácuaaha-gã-güedé ñáyiu tnúhu Jësús.

¹⁹ Te té Pèlú ndihi té Juää ní xáhaⁿ-güedé:

—Chí cuáha cuëndá, te núu sá cächí nchòhó cada-ndí àdi sá cãháⁿ Yá Ndióxi cada-ndí. Te cada cãhu iní-ndó chi vá cúú cada-ndí sá cächí-ndó, chi cada nahi-ni-ndí sá cächí Yá Ndióxi.

²⁰ Chi dacuití cãháⁿ-ndí nácuáa ní cãháⁿ Jësús, te cãháⁿ-ndí nchaa sá ní xini-ndí ní quide-gã —cächí-güedé xáhaⁿ-güedé.

²¹ Te cue tée cûchiuⁿ ñíhi-gã ní cãháⁿ-güedé xáhaⁿ-güedé sá cáda cástiu ñáhá-güedé núu vá dáñá-güedé sá dácuaaha-güedé ñáyiu. Te ducaⁿ te ní dáñá ñaha-güedé cuánuhú-güedé, chi ñá ní ñíhi-güedé nása cada-güedé cada castíu ñáhá-güedé, chi nchaa-yu ndacáⁿ táhú-yu núu Yá Ndióxi sá ní ndúha tée yacua.

²² Te tée ní quide tátna-güedé-áⁿ ndécú-dé vîhi-gã údico cuá-dé, te ío ní cuñúhu-yu sá ní ndúha-dé.

Ñáyiu sándáa iní tnúhu Jësús xicáⁿ táhú-yu núu-gã sá vá yùhú-yu cãháⁿ-yu tnúhu-gã

²³ Te ní ndee té Pèlú ndihi té Juää cuánuhú-güedé núu ndécú cué tée cündihi-güedé, te ní nacani tnúhu-güedé nácuáa ní xáhaⁿ cué dútú cúnúu ndihi cue tée cúu sacuéhé núu ñáyiu isráel.

²⁴ Te sátá ní xindedóho-yu tnúhu ní cãháⁿ-güedé, te ñí-ni tnúhu ní cãháⁿ-yu nchaa-yu ndihi Yá Ndióxi, te ní xáhãⁿ-yu xii-gã:

—Yòhó Dútú Ndióxi, ní cadúha-n àndiu, ní cadúha-n ñuyúí, ní cadúha-n lámár, ní cadúha-n nchãandi túhú sá ío ñuyúí.

²⁵ Te ndíi Dávii ní sándáa iní ndíi tnúhu ní cãháⁿ-n, te ní chídó tnùní ndíi nácuáa ní xáhaⁿ-n cãháⁿ ndíi, te ñíu-ni Espiritú-n ní chindee ñaha-xi xii ndíi ní chídó tnùní ndíi, te duha ní chídó tnùní ndíi:

Ñáyiu ñá túú cúu ñáyiu isráel ío cüdéⁿ-yu núu Yá Ndióxi,

te cuini-yu nãa-yu ndihi-gã, dico vá ndácú-yu chi mee-gã cúnúu-gã.

²⁶ Te cue tée yindaha nacióⁿ ndihi cue tée cûchiuⁿ tacá-güedé nãa-güedé ndihi Dútú Ndióxi ndihi Cristú Yáa ní quixi ñuyúí-a.

Duha ní chídó tnùní ndíi Dávii nácuáa ndúu tnúhu ní cãháⁿ-n —cächí-yu xáhãⁿ-yu xii Yá Ndióxi.

²⁷ Te xáhaⁿ tucú-yu xii-gã:

—Ndáa ní cãháⁿ ndíi Dávii chi ñíu-ni ñúu íha ní tacá té Hèrodés ndíhi té Ponciú Pilatú ndíhi ñáyiu ñá túú cúu ñáyiu isráel ndíhi ñáyiu isráel ní cãháⁿ cuèhé-yu cuëndá Jësús. Te Yòhó Dútú Ndióxi, Déhe-n cúu Jësús núu ío váha iní-gã, te ní sáha chiúⁿ-n-gã, te ío úhú ní cuu iní ñáhá ñáyiu xii-gã.

²⁸ Te ní quidé-yu nácuáa ní sani iní-n cáda-yu ndéé sanaha, ndéé cúnáhá ní ngáva ñuyúí.

²⁹ Te Yòhó Dútú Ndióxi sa náha-n nása cãháⁿ cue tée cuini cada úhú ñáhá xii-ndí. Te quide-ndí chiúⁿ tahu-n, te vitna chindee ñaha-n xii-ndí cuëndá sá vá yùhú-ndí cãháⁿ-ndí tnúhu-n.

³⁰ Te cada tátna-n ñáyiu cùhú, te chindee ñaha-n xii-ndí, te cada-ndí nchaa sá vá yóo tnàhí ndacu cada nacuaa cuñúhu vîhi-yu. Te xini-ndí sá mée Jësús chindee ñaha-gã xii-ndí, chi quide-gã chiúⁿ tahu-n —cächí-yu xáhãⁿ-yu xii Yá Ndióxi.

³¹ Te sátá ní váha ní cãháⁿ-yu ndíhi Yá Ndióxi, te ní quidi-xi vehe núu xindécú-yu, te òré-áⁿ ní cutáhú tucú-yu nchaa-yu Espiritú-gã. Te ní cãháⁿ-yu tnúhu Yá Ndióxi, te ñá túú tnàhí ní yùhú-yu.

Cuëndá nchaa ndachiúⁿ cánehe chiúⁿ-yu

³² Te nchaa ñáyiu ní sándáa iní tnúhu Yá Ndióxi ñí-ni tnúhu ní cãháⁿ-yu nchaa-yu. ñí-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnàhá-yu nchaa sá xini ñùhú-yu, te ní ñí-yu ñá túú ní cãháⁿ-yu sá ndachiúⁿ-yu ñí-di-ni-yu cúu nchaa sá ndécú ndíhi-yu.

³³ Te cue tée ní táuchíⁿ Jësús dacuaaha ñaha xii-yu tnúhu-gã ío váha ní cãháⁿ-güedé nácuáa ní cuu ní ndoho Xitohó Jesucristú. Te ío ní chindee ñaha Yá Ndióxi ní cãháⁿ-yu tnúhu-gã, te ñá túú ní cãháⁿ cuèhé dava-gã-yu cuëndá ñáyiu dácuaaha tnúhu-gã.

³⁴ Te ñá túú tnàhí ní cundahú-yu dñíhúⁿ, chi nchaa ñáyiu ndécu ndíhi ñuhu-xi, ndíhi nchaa ñáyiu cãa vehe-xi ní nadicó-yu, te da

iiⁿ da iiⁿ ndachiiⁿ-yu ní nadicó-yu òrè xíní ñùhú-yu díhúⁿ.

³⁵ Te ní sáñhá-yu xii cue téé ní táúchíúⁿ Jèstù dacuàha ñaha xii-yu tnúhu-gá, te cue téé-án ní dácãñu-güedé nchaa ñáyiú xini ñuhu.

³⁶ Te distritú Chìpré ndécú iiⁿ téé nàni-dé Chéé ñani tnáhá ndii Léví, te ní xóo cunu cuechi-dé veñúhu ñáyiú isráél. Te cuendá sá sáñaha-dé tnúhu ndee iní xii-yu, xiáⁿ núu ní dánání ñaha-güedé Vèè xii-dé.

³⁷ Te téé-áⁿ ní nadico-dé luha ñuhu-dé, te nèhe-dé díhúⁿ cuáháⁿ núu cuè téé ní táúchíúⁿ-gá dacuàha ñaha xii-yu tnúhu-gá.

5

Té Ananiás ndihi tá Sãfirá ñá túú ní quide ndáa-yu

¹ Te ndècu iiⁿ téé nàni Ananiás, te ñadihí-dé nání-án Sãfirá, te ñáyiú-án ní nadicó-yu luha ñuhú-yu.

² Te ní taxúha-dé sacú díhúⁿ, te sacú-gá néhé-dé cuáháⁿ ní sáñaha-dé xii cue téé ní táúchíúⁿ Jèstù dacuàha ñaha xii ñáyiú tnúhu-gá, te ní dándahú ñáhá-dé xii-güedé, chí ní xáhaⁿ-dé sá níhí ní sáñaha-dé, te ñaha ñadihí-dé sá dúcáⁿ ní quide-n.

³ Te ní xáhaⁿ tē Pèlú xii-dé:

—Ananiás, ¿ná cuendá ducaⁿ ní quide-n ní dáñá-n ní quíhu sácúlmá iní-n? Te ní dácúandèhnde-n núu Espiritú Yá Ndióxi, te ní taxúha-n sácú díhúⁿ ní níhí-n cuendá ñuhu-n.

⁴ ¿Te ñuhu-án cuendá sá ñuhú mèe-n, àdi díhú-án cuendá sá díhúⁿ mèe-n cùu-xi, te cuu-ni cada-n nàcuáa càchí iní-n càhaⁿ-n ñá? ¿Ná cuendá ducaⁿ ní quide-n? ¿Ná ní quide-xi iní-n núu ní dácúandèhnde-n núu Yá Ndióxi? Chí ñá díú-ní mèe-ni ñáyiú ní dándahú-n —càchí tē Pèlú xáhaⁿ-dē xii-dé.

⁵ Te òrè ní ndihi tnúhu ní xáhaⁿ tē Pèlú, te uuⁿ ní nduá-dé te ní xihí-ni-dé. Te nchaa ñáyiú ní níhí tnúhu sá ní xihí-dé, te ní yùhú vñhí-yu.

⁶ Te ní quixi iiⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núu yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òrè, te ní quexio ñadihí téé ní xihí-áⁿ, te vátá quini-gá-aⁿ sá ní xihí yii-aⁿ.

⁸ Te ní xáhaⁿ tē Pèlú xii-aⁿ:

—Cuiní-í cachí tnúhu ndáá-n. ¿Ndédau ní dícó-ndó ñuhu, ní dícó-ndó nàcuáa ní cachí yii-n áⁿ? —càchí tē Pèlú xáhaⁿ-dē xii-aⁿ.

Te ní xáhaⁿ-aⁿ:

—Ndáá sá díú-ní dúcáⁿ —cachí-aⁿ xáhaⁿ-aⁿ.

⁹ Te ní xáhaⁿ tē Pèlú:

—¿Ná cuendá ducaⁿ ní chitnàha tnúhu-ndo dúcáⁿ ní quide-ndo ní cuini-ndó dándahú-ndó Espiritú Yá Ndióxi? Quini-n,

chí sa cuándixi cue téé ní sáháⁿ ní chindúxi yii-n, te yòhó tnáhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dē xii-aⁿ.

¹⁰ Te òrè-áⁿ ní nduá-aⁿ núú tē Pèlú, te ní xihí-ñi-aⁿ. Te cuándihu cue téé cuechi-áⁿ xiti vehe, te ní xiní-güedé sá sá ní xihí-aⁿ, núu ní xido ñaha tucu-güedé cuáháⁿ chindúxi-güedé-aⁿ díñi yii-aⁿ.

¹¹ Te ní yùhú víhí ñáyiú ní sándáá iní tnúhu Yá Ndióxi, ndihi dava-gá ñáyiú ní níhí tnúhu nàcuáa ní cuu.

Ní quide-güedé titní núú sá vā yòo tnáhí ndàcu cada te io ní cuñúhu ñáyiú

¹² Te cue téé ní táúchíúⁿ Jèstù dacuàha ñaha xii-yu tnúhu-gá titní víhí sá vā yòo tnáhí ndàcu cada ní quide-güedé, te ní cuñúhu víhí-yu. Te nchaa ñáyiú ní sándáá iní-xi tnúhu Jèstù ní xóo tacá-yu corrèdór néhé diu ndii Salómón.

¹³ Te nchaa ñáyiú ñá túú dàcuaha tnúhu-gá ñá ní cùyí-yu chitnahá-yu ñáyiú ní sándáá iní-xi tnúhu-gá, dico nchaá-yu ní cáháⁿ váha-yu cuendá ñáyiú ní sándáá iní-xi tnúhu-gá.

¹⁴ Te vai téé, vai ñadihí ní sándáá iní-yu tnúhu-gá.

¹⁵ Te cuendá sá ní níhí-yu tnúhu sá quidé tãtna cue téé ní xica cuu ndihi Jèstù, núu xiáⁿ ní queñuhú-yu nchaa ñáyiú cùhú ichi, te davá-yu ní quide túha-yu camá te davá-yu ní quide túha-yu yuu, núu núu nchaa xiáⁿ tá sácáⁿ-yu cue ñáyiú cùhú-áⁿ cuáháⁿ, te xiáⁿ cáá-yu ndètú-yu, chí ní sani iní-yu sá òrè yáha tē Pèlú te cuèdicó cuándahú-dé yáha ndodo ñaha-xi xii-yu te ndúha-yu.

¹⁶ Te ní quixi ñáyiú ñuú yatni Jerusálén ndécá-yu ñáyiú cùhú, ndihi ñáyiú yihí ñaha espíritú cündihi yucu ñávaha ní quixi, te nchaá-yu ní ndúha.

Ío ní quide úhú-güedé tē Pèlú ndihi té Juáá

¹⁷⁻¹⁸ Te dútú cùnù-gá ndihi cue téé cùu saducéú cue téé cündihi-dé ní cudéⁿ-güedé sá ío chítu-yu dàcuaha tnúhu Jèstù, núu xiáⁿ ní tñii-güedé cue téé ní táúchíúⁿ Jèstù dacuàha ñaha xii-yu tnúhu-gá ní chíhi ñaha-güedé v-caá.

¹⁹ Te xití niú-áⁿ ní quexio iiⁿ espíritú xínú cuèchi núú Yá Ndióxi ní nacaáⁿ-xi yèhe v-caá ní quee-güedé, te ní xáhaⁿ-xi xii-güedé:

²⁰ —Quíhíⁿ-ndó veñúhu càhnu sá ío cùnnu te cúnaha-ndo xii ñáyiú nàcuáa cadá-yu naníhí tàhú-yu —càchí espíritú-áⁿ xáhaⁿ-xi xii-güedé.

²¹ Te sá dúcáⁿ ní xáhaⁿ-xi núu sátá ní túnadaá, te ní sáháⁿ-güedé veñúhu càhnu sá ío cùnnu sá cúú-xí ñáyiú isráél ní dácuaáha ñaha-güedé xii-yu.

Te dútú cúnú-gá ndihi cue té cùndihi-dé ní nadatácá tnáhá-güedé ndihi nchaa cue té cùu sacuéhé núú ñáyiú isrâél ndihi cue té cùchiuⁿ, te ní tendaha-güedé sandádú cuáháⁿ queñihu-güedé cue té yíhi vecaá ní cùu.

²² Te ní quexio-güedé yèhe vecaá, te ní xiní-güedé sá ní ñⁿ-gá cue tée dácuaaha ñaha xii ñáyiú tnúhu Jèsús ñá túú-gá-güedé yíhi. Te cuánuhú-güedé

²³ ní xitnúhu-güedé cue té cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndèé chóó-ni, te xíndecu-ni sandádú cue té xíndéé yèhe vecaá. Te ní nacaáⁿ-ndí vecaá, te vá yóo ñⁿ-gá yíhi —càchí-güedé xáhaⁿ-güedé.

²⁴ Te sá dúcáⁿ ní xáhaⁿ-güedé, te cuáháⁿ iní cue dútú cúnú ndihi téé tàxi tnuní cue téé xíndéé veñúhu càhnu sá ño cúnú, te ní xitnáha-güedé:

—¿Nása cada-xi vitna duha càa ní cuu ní xinu cue téé yíhi vecaá-i? —càchí-güedé xitnáha-güedé.

²⁵ Te ní quexio ñⁿ téé ní xáhaⁿ-dé:

—Cundedóho-ndo na càchí tnúhu-í ñⁿ tnúhu. Cue téé ní chíhi-ndo vècaá ndécú-güedé veñúhu càhnu sá ño cúnú dácuaaha-güedé ñáyiú —càchí-dé xáhaⁿ-dé.

²⁶ Te cue téé ndèé veñúhu ndihi téé tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chí ní yuhú-güedé cuáha yúú ñáhá ñáyiú díi ñúú-xi-áⁿ.

²⁷ Te ní ndexio ndihi ñaha-güedé núú cuè téé cùu sacuéhé ndihi núú cuè téé cùchiuⁿ. Te dútú cúnú-gá ní ngüíta-dé ténáá ñáhá-dé xii-güedé, te xáhaⁿ-dé:

²⁸ —Te náa ñá díú ní cachí-ndí sá vá dácuaaha-gá-ndó ñáyiú tnúhu Jèsús te dácuaaha-ni-ndó-yu, te vitna nchaa ñáyiú ñúú Jerusalén ní níhi-yu tnúhu nàcuáa càháⁿ-ndó. ¿Te ná cuèndá ducaⁿ quide-ndo, te càchí-ndó sá nchúhú ndécuéchi-ndí ní sañni-ndí Jèsús-i? —càchí dútú cúnú-gá xáhaⁿ-dé xii-güedé.

²⁹ Te té Pèlú ndihi dava-gá cue téé ní táuchíúⁿ Jèsús dácuaaha ñaha xii-yu ní xáhaⁿ-güedé xii cue téé cùchiuⁿ:

—Nchúhú, Yá Ndióxi cúnú-gá sándáá iní-ndí tnúhu càháⁿ-gá dácúúxi tnúhu càháⁿ ñáyiú.

³⁰ Te nchóhó ní sata caa-ndo Jèsús núú cùrúxi te núú cùrúxi-áⁿ ní xíhi-gá, dico ní dándótó ñaha Yá Ndióxi xii-gá. Te Yá Ndióxi ní sándáá iní cue ñani tnáhá-ndí ní xíndecu ndéé sanaha.

³¹ Te Yá Ndióxi ní xáhaⁿ-gá sá cùndecu Jèsús xio cùha-gá cuèndá taxi tnuní-gá te dacacu nihnu-gá ñáyiú isrâél núú úhú núú ndáhú. Te ducaⁿ-ni dacacu nihnu-gá nchaa

ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu.

³² Te ní xiní-ndí nàcuáa ní quide-gá, núú xíáⁿ cání-ndí cuèndú núú nchaa ñáyiú, te Espiritú Yá Ndióxi chíndéé ñaha-xi xii-ndí càháⁿ-ndí tnúhu-gá. Te diu-ni Espiritú-gá ní sáñaha-gá xii nchaa ñáyiú ní sándáá iní-xi tnúhu-gá —càchí té Pèlú ndihi dava-gá-güedé xáhaⁿ-güedé xii cue téé cùchiuⁿ.

³³ Te sátá dúcáⁿ ní xáhaⁿ-güedé xii cue téé cùchiuⁿ, te ní quidéⁿ-güedé, te ní ndatnúhu-güedé sá cahní ñaha-güedé.

³⁴ Te ñⁿ téé cùu fariséú tnàha-dé cùú-dé chiúⁿ, te nàni-dé Gamaliél, te cùu-dé mèstrú dácuaaha-dé ñáyiú nàcuáa ní chídó tnuní ndí Moisés, te ío yíñúhu caháⁿ ndihi ñáhá-yu xii-dé. Te ní ngúnutñi-dé, te ní xáhaⁿ-dé sá ná quèe tnaa té Pèlú ndihi dava-gá-güedé quehé.

³⁵ Te ní xáhaⁿ-dé xii cue téé cùchiuⁿ:

—Nchóhó cue téé isrâél, xini ñuhu-xi sá cáni váha iní-ndó nása cada-ndo ndihi cue téé-áⁿ.

³⁶ Chi ní cunaha ní xíndecu ñⁿ téé ní xínani Tèudás, te ní cachí-dé sá cúnú-dé, te ní cundihi-dé dàtná cümü cièndú cue téé, te ñá ní cuini-güedé cuu ñⁿ-nuu-güedé ndihi cue téé cùchiuⁿ. Te ní sañni ñaha cuè téé cùchiuⁿ-áⁿ xii téé Tèudás, te ní ndihi cue téé ní xica cuu ndihi-dé ní xité nuu-güedé, te ñá túú-gá ní quide-güedé nàcuáa ní sani iní-güedé cada-güedé.

³⁷ Te sátá ní xíhi téé-áⁿ, te ní tnáhá nduu núcódó tnuní ñáyiú. Te dàva-áⁿ ní xíndecu ñⁿ téé distritú Galilea ní xínani-dé Judás. Te titni-güedé ní chitnahá ñáhá-güedé xii-dé. Te tnáhá-dé ní sañni ñaha tucu cue téé cùchiuⁿ, te nchaa cue téé ní xica cuu ndihi-dé ní xité nuu-güedé.

³⁸ Te na càchí tnúhu-í sá dáñá-ndó cuè téé-áⁿ, te ní ñá túú nágá tnúhu cùñaha-ndo xii-güedé, chí núú chiúⁿ mee-güedé quidé-güedé te cuíta-güedé,

³⁹ dico núú chiúⁿ Yá Ndióxi quidé-güedé, te vá ndínihu chiúⁿ quide-güedé. Te núú quide-güedé chiúⁿ Yá Ndióxi, te vá nàá-ndó ndihi-güedé, chí Yá Ndióxi nàá ndihi-ndo sá dúcáⁿ xiquide-ndo —càchí té Gamaliél xáhaⁿ-dé xii cue téé cùchiuⁿ.

⁴⁰ Te nchaa-güedé ní càháⁿ sá tnúhu ndáá càháⁿ-dé. Te dàtnuní ní nacana tucu-güedé té Pèlú ndihi dava-gá-güedé te ní caniha-güedé, te ní càháⁿ níhi-güedé, te xáhaⁿ-güedé sá vá càháⁿ-gá-güedé tnúhu Jèsús, te dàtnuní ní dáñá ñaha-güedé cuánuhú-güedé.

⁴¹ Te ío ní cudíi iní-güedé, chí mee Yá Ndióxi ní cachí-gá sá dúcáⁿ ndòho-güedé dácuaaha-güedé ñáyiú tnúhu Jèsús.

42 Te ñⁿ nduu ñⁿ nduu ní dácuahá-güedé ñáyiú xití veñúhu càhnu sá ïo cùnnu ndihí nchaa vehé-yu. Te ní xáhaⁿ-güedé xii-yu sá Jësús cuú-gá Cristú Yáá ní quixi ñuyiú-a.

6

Ní ndúcü-güedé úsá cue tée cundecu dacáhñu sá caxí ñáyiú

1 Te ñiu-ni dává-án ní sándáá ñi vâi ñáyiú tnúhu Jësús. Te cue ñáyiú griégü ní cáháⁿ cuéhé-yu cuendá ñáyiú isrâél, sá ñáyiú ñihí ñáyiú quée ñáyiú cáháⁿ tnúhu griégü ñá túú tnáhá sá caxí-yu, chi ñá túú sãñaha ñⁿnuu-güedé.

2 Te cue tée úxúú ní táuchíúⁿ Jësús dacuaha ñaha xii-yu tnúhu-gá, cue té-án ní cana-güedé nchaa ñáyiú sándáá ñi tnúhu Jësús. Te ní xáhaⁿ-güedé xii-yu:

—Nchúhú chi vá cuú dacáhñu-ndí sá caxí-yu, chi mee-ni tnúhu Yá Ndióxi cáháⁿ-ndí.

3 Te nchòhó cue tée ndècu ndihí-ndí ichi Xitohó Jesucristú cáháⁿ ndihí-ndo úsá cue tée xindecu iha, cue tée cáháⁿ ndihí ñáhá-yu mee-ni tnúhu yññúhu, cue tée ndècu ndihí Espiritú Yá Ndióxi, mee-ni cuè tée cùnuni váha ñi-xi. Te cue té-án cuáha-ndí-güedé chiúⁿ cada-güedé dacáhñu-güedé sá caxí-yu.

4 Te nchúhú mee-ni Yá Ndióxi cáháⁿ ndihí-ndí, te mee-ni tnúhu-gá dacuaha-ndí-yu —cächí-güedé xáhaⁿ-güedé xii-yu.

5 Te nchaá-yu ní tñí-yu tnúhu ní cáháⁿ-güedé, núu ní ndúcü-yu cue tée cada chiúⁿ-án. Te ñⁿ-dé ñani-dé Tévá, te ïo váha sándáá ñi-dé Yá Ndióxi, te ndècu ndihí-dé Espiritú-gá. Te duha ní xinanani dáva-gá-güedé: té Lipé, té Pröcoró, té Nicànór, té Tímón, té Pärmenás, té Lãxi téé ñuú Antioquiá téé ní sándáá ñi-xi sá dácuaaha ñáyiú isrâél te vitna ní sándáá ñi-dé tnúhu Jësús.

6 Te úsá cue té-án ní sáháⁿ-güedé núu cuè tée úxúú ní táuchíúⁿ Jësús dacuaha ñaha xii-yu tnúhu-gá, te cue tée úxúú-án ní cáháⁿ ndihí-güedé Yá Ndióxi, te ní sacáⁿ ndodo-güedé ndaha-güedé díquí cuè téé úsá-án.

7 Te ñáyiú ní sándáá ñi tnúhu Jësús cuáháⁿ-yu titní xichi cáháⁿ-yu tnúhu-gá. Te vai-gá ñáyiú ta sándáá ñi-yu tnúhu-gá cuáháⁿ, te ní xindecu-yu ndihí dava-gá ñáyiú dácuaaha tnúhu-gá ñuú Jerusalén. Te titní dütú ní sándáá ñi-güedé tnúhu-gá.

Ní tñi-güedé té Tévá

8 Te té Tévá ní quide-dé titní núu sá vá yoo tnáhí ndäcu cada, te ní cuñúhu vihi-yu sá dúcáⁿ ní quide-dé, te ducaⁿ ní quide-dé chi ndècu ndihí-dé Yá Ndióxi chindée ñaha-gá.

9 Te ní xindecu cue téé ní xóo cunu cuechi núu ñⁿ téé táxi tnuní, te téé táxi tnuní-án ñá ní xóo daña tnáhí-dé quee-güedé núu chíúⁿ-dè, te ní xinu-ná-güedé. Te sátá xiáⁿ, te ní dácáá-güedé veñúhu-güedé, te veñúhu-án sáháⁿ ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndihí ñáyiú distritú Àsiá. Te nchaa ñáyiú-án ní nää ndihí-yu té Tévá.

10 Te ñá ní ñihí-yu tnúhu cáháⁿ-yu, chi ïo váha ní sáá díquí-dé ñacuáa ní xáhaⁿ-dè xii-yu, chi Espiritú Yá Ndióxi ní chindee ñaha-xi-dé.

11 Te ní cháhu-yu cue téé ní dácuaándehnde tnúhu ní cáháⁿ té Tévá núu-yu. Te ní xáhaⁿ-güedé sá cáháⁿ cuéhé-dé cuendá ndí Moisés ndihí cuendá Yá Ndióxi.

12 Te cuendá sá dúcáⁿ ní dácuaándehnde-güedé núu ní sándáá ñi-yu, te ní cudéⁿ-yu núu té Tévá. Te ní cudéⁿ cue téé cùu sacuéhé, te tnáhá cue téé dácuaaha ñaha xii-yu nchaa tnúhu ní chidó tnuní ndí Moisés ní cudéⁿ-güedé. Te ní sáháⁿ-güedé ní tñi-güedé té Tévá ndécá ñaha-güedé cuáháⁿ núu quidé cuè téé cùchiuⁿ jundá, ndihí cue téé cùu sacuéhé.

13 Te ndécá-yu cue téé dácuaandehnde cuáháⁿ núu quidé-güedé jundá, te ní quesaha-ni tucu-güedé cáháⁿ cuéhé-güedé, te xáhaⁿ-güedé:

—Tée-a mee-ni cáháⁿ cuéhé-dé cuendá veñúhu sá ïo cùnnu, veñúhu ní cuu íí, te cáháⁿ cuéhé-dé cuendá nchaa sá ní chidó tnuní ndí Moisés.

14 Te ní tecú dóho-ndí cächí-dé sá Jësús téé ñuú Nazàrèt dangöyo-dé veñúhu càhnu sá ïo cùnnu te vá daña-gá-dé cada-ndí ñacuáa ní cachí ndí Moisés cada-ndí —cächí-güedé xáhaⁿ-güedé.

15 Te nchaa cue téé ndècu jundá ní ndacoto váha-güedé núu té Tévá. Te ní dayèhé-xi núu-dé dátña quidé-xi núu espiritú xinu cuechi núu Yá Ndióxi.

7

Té Tévá xáhaⁿ-dè sá ñà túú cuéchi-dé

1 Te ní xáhaⁿ dütú cùnnu-gá xii-dé:

—¿Ndáá tnúhu cáháⁿ-güedé cuendá-n-á?
—cächí-dé xáhaⁿ-dè.

2 Te té Tévá ní xáhaⁿ-dè xii-güedé:

—Nchòhó cue ñani tnáhá-í ndihí nchòhó cue téé cùu sacuéhé, cundedóho-ndo ñⁿ tnúhu na cáháⁿ-i-a. Yá Ndióxi ïo cùnnu-gá, te ní cáháⁿ ndihí-gá ndí Àbrahám nacióⁿ Mesopotamiá cùtnáhá vátá quihíⁿ-gá ndí cundecu ndí ñuú Hàrán.

3 Te ní xáhaⁿ-gá xii ndí: “Daña-n nchaa ñani tnáhá-n, te daña-n ñúhu-n, te quihíⁿ-n ñⁿ xichi núu dánèhé ñáhá-í cundecu-n”, duha ní xáhaⁿ Yá Ndióxi xii ndí Àbrahám.

4 Te sáta dúcáⁿ nǐ xáhaⁿ Yá Ndióxi xii ndíi Ábrahám, te ní ndee ndíi ñuú Cáldeá, te cuáháⁿ ndíi cundecu ndíi ñuú Hárán. Te sáta nǐ xíhí tátá ndíi, te ní xáhaⁿ Yá Ndióxi quixi ndíi cundecu ndíi núú ndécú-ó vitna.

5 Te Yá Ndióxi ñá túú ní sãñaha-gã ni lùha ñuhu cuu cuendá ndíi núú ní xíndecu ndíi. Te ní xáhaⁿ ndáá Yá Ndióxi xii ndíi sá cuãñaha-gã ñuhu cuu cuendá ndíi, te na cuú ndíi, te ndóo ndíi nchaa ñaní tnáhá ndíi cacu túu ndéé cuèé-gá. Te ducaⁿ nǐ xáhaⁿ-gã cuèi vátá cundècu-gá ni ñiⁿ déhe ndíi.

6 Te ní xáhaⁿ túcu Yá Ndióxi xii ndíi Ábrahám sá díú-ní ñaní tnáhá ndíi quíhíⁿ-yu núú xicá cundècú-yu cúmi ciendú cuía, te vá dáñã-yu queé-yu núú chíúⁿ-yu, te ío dandòho ñaha-güedé núú cundècú-yu. Duha ní xáhaⁿ Yá Ndióxi xii ndíi, te ndáá ducaⁿ nǐ cuu.

7 Te ní xáhaⁿ túcu Yá Ndióxi xii ndíi Ábrahám: “Yúhú dandòho-í nchaa ñáyyi na dándòho ñaha xii cue ñaní tnáhá-n. Te dàvá-áⁿ te ndee cue ñaní tnáhá-n núú cundècú-yu, te quixí-yu chíñuhu ñáhá-yu xii-í iha”, duha ní xáhaⁿ Yá Ndióxi xii ndíi Ábrahám, te ndáá ducaⁿ nǐ cuu.

8 Te Yá Ndióxi ní quide ndáá-gá ndíi ndíi Ábrahám, te ní xáhaⁿ-gã xii ndíi sá cuãha-güedé sèñá ñiⁿ nchaa landú téé cuendá cunáhá-yu nácuaá ndúu sá ní quide ndáá-gá ndíi ndíi Ábrahám. Núu xiãⁿ núú úná nduu sá ní cacu té Isàác déhe ndíi Ábrahám, te ní sáha ndíi sèñá ñiⁿ-dé. Te díu-ní ducaⁿ ní quide tucu té Isàác déhe-dé té Jácób, te díu-ní ducaⁿ ní quide té Jácób, chí úxúú déhe-dé ní xíndecu, te nchaa-güedé ducaⁿ ní quide-dé. Te ndí úxúú cue téé-áⁿ nǐ cuu-güedé ñaní tnáhá-ó.

9 Te ñiⁿ déhe té Jácób ní xínani-dé Chèé. Te ñá ní cuu váha íni cue ñaní-dé núú-dé, núu ní díco ñaha-güedé ní queheⁿ ñaha cuè téé cuáháⁿ nacióⁿ Ègiptú, te Yá Ndióxi ñá ní dàña ñaha-gá xii-dé cuíta nihnu-dé.

10 Te ní chindee ñaha-gá xii-dé ní cácu-dé cútñahá ní ndoho víhi-dé. Te téé yíndaha Ègiptú ío ní cudíí íni-dé té Chèé, te ní cutnúní íni-dé sá ío váha túha té Chèé, te ducaⁿ nǐ cutnúní íni-dé, chí Yá Ndióxi ní chindee ñaha-gá xii té Chèé. Te ní xáhaⁿ tée yíndaha Ègiptú xii té Chèé sá díú tē Chèé coo-dé gobièrnú Ègiptú, te taxi tnúní-dé nchaa ñáyyi xínu cuechi núú tée yíndaha Ègiptú-áⁿ.

11 Te ní quíhu tnamá níhí nacióⁿ Ègiptú ndíi nacióⁿ Cánaá, te ío ní ndohó-yu. Te nchaa ñaní tnáhá-ó ní xíndecu ndéé sanaha ñá ní xóo níhí-gá-yu sá cáxi-yu.

12 Te ní níhí tē Jácób tnúhu sá ío triú Ègiptú, núu ní tendaha-dé cue déhe-dé ní sáháⁿ-güedé ní sánquaaⁿ-güedé triú-áⁿ, te

dává-áⁿ ní sáháⁿ cue ñaní tnáhá-ó xito díhna nuu nacióⁿ Ègiptú.

13 Te xito cuu úú cuáháⁿ-güedé, te ní xáhaⁿ tē Chèé sá ñaní-dé cuú-güedé. Te téé yíndaha Ègiptú ní cutnúní íni-dé sá díú-ní ñaní té Chèé cuú-güedé.

14-15 Te ní cana té Chèé tátá-dé té Jácób ndíi nchaa ñaní tnáhá-dé. Te cuu-xi datná úndico sáhúⁿ-yu ndèca té Jácób cuáháⁿ nacióⁿ Ègiptú núú ndécú té Chèé, te xiáⁿ ní quexióⁿ yu ní ngóo-yu. Te yacáⁿ ní xíhí té Jácób ndíi nchaa déhe-dé cue ñaní tnáhá-ó.

16 Te sáta nǐ cuu titní cuía, te ní natava-güedé yiqui ndíi Jácób ndíi nchaa déhe ndíi nchído-güedé cuáháⁿ ñuú Sìquém. Te ndíi Ábrahám sa ní cuu titní-gá cuía sá ní nacuaaⁿ ndíi ñuhu núú cuè déhe ndíi Hámór. Te xiáⁿ nchíi yaú ní nachíndúxi-güedé yiqui-áⁿ.

17 Te cútñahá vátá natáva-gá-güedé yiqui cue ndíi, te sa ta tnáhá yatni cada Yá Ndióxi nácuaá ní xáhaⁿ-gã xii ndíi Ábrahám cada-gá sá cuú-xí ñáyyi isráel ndécú Ègiptú, te ta cáya víhi-yu cuáháⁿ.

18 Te dàvá-áⁿ chí ingá tée yíndaha nacióⁿ Ègiptú, te ñá túú-gá ní xini-dé nása ní xóo cada ndíi Chèé.

19 Te téé yíndaha Ègiptú ñá ní quide ndáá-dé, chí ío ní dándòhó-dé ñaní tnáhá-ó ní xíndecu dàvá-áⁿ. Te ní táuchíúⁿ-dē sá xócuíñi-yu dándóo-yu déhe yiquiⁿ cuendá ndíi-güexi cuú.

20 Te dàvá-áⁿ nǐ cacu té Moisés, te ío ní cudíí íni ñáhá Yá Ndióxi xii-dé. Te ní xíndecu ndíi ñaha náná-dé ndíi tátá-dé úní-ní yóo.

21 Te ndèca ñahá-yu cuáháⁿ ingá xichi, te yacáⁿ ní dándóo ñahá-yu xii-dé, te ní naníhí ñáhá déhe yoco tée yíndaha Ègiptú, te ní xito-xi-dé datná xitó-xí ñiⁿ déhe mee-xi ní xito-xi-dé ndéé ní sahnú-dé.

22 Te ní cutúha-dé nchaa sá xini cue tée ègiptú, te ío váha ní sáa díquí-dé tnúhu cáháⁿ-dé ndíi nchaa sá cádá-dé.

23 Te cútñahá ndécú-dé údico cuía-dé, te ní cachí-dé sá quíhíⁿ-dé cáháⁿ ndíi-dé cue ñaní tnáhá-dé ñáyyi isráel.

24 Te ní xini-dé ní caníha ñiⁿ tée ègiptú xii ñiⁿ tée isráel, te ñá ní cundee íni-dé cundehe-dé núu ní sáháⁿ-dé ní chindee-dé tée isráel, te ní sahní-dé tée ègiptú,

25 chí ní cachí Yá Ndióxi sá díú-dé dacácu-dé ñaní tnáhá-dé ñáyyi isráel núú cuè tée ègiptú. Te ní sani íni-dé sá cútñúní íni-yu nácuaá ní xáhaⁿ Yá Ndióxi xii-dé, dico ñá túú ní cútñuní íni-yu.

26 Te nduu tnéé ní xini-dé nàá úú cue tée isráel, te ñá túú ní tnáhá íni-dé nàá-güedé núu ní xáhaⁿ-dé xii-güedé: “¿Ná cuendá ducaⁿ xináá-ndó? ¿Ná ñá díú ndímee-ndo

núu ducaⁿ xínáá-ndó?" Duha ní xáhaⁿ tẽ Moisés xii-güedé.

²⁷ Te tée ndécuechi ní sáháⁿ-dé ní chindhaha nihnu-dé té Moisés ìⁿ xio, te ní xáhaⁿ-dè: "¿Ná cúu yòhó núu véxi-n tàxi tnuini ñháⁿ-n?"

²⁸ Te tñháⁿ-ni tucu yúhú cahni-n dàtná ní sahani-n tée ègíptú icu cáhaⁿ-á", duha ní xáhaⁿ-dè xii té Moisés.

²⁹ Te sá dúcáⁿ ní cáháⁿ tée isráel núu ní yúhú té Moisés ní xinu-dé cuáháⁿ-dé ní sáá-dé nacióⁿ Medián. Yácaⁿ ní ngóo-dé, te yácaⁿ ní tnándaha-dé, te ní cacu úú déhe tée-dé.

³⁰ Te sá táⁿ ní xinú údico cuíá, te ní sáháⁿ té Moisés ìⁿ xio yucu Sinái. Te yácaⁿ ní xini-dé ìⁿ tnutáú nchicúⁿ ñuhú, te xití itá ñuhú-áⁿ ní xini-dé yíhí ìⁿ espíritú xinú cuèchi núú Yá Ndióxi.

³¹ Te òré ní xini-dé sá yíhí-xí xití itá ñuhú-áⁿ, te ní cuñuhu vihi-dé sá ní xini-dé espíritú-áⁿ xití itá ñuhú-áⁿ, te ní sándehe-gá-dé, te ní xindéhe váha-dé. Te ní tecú dóho-dé ní cáháⁿ Yá Ndióxi, te xáhaⁿ-gá xii-dé:

³² "Yúhú cúu-í Ndióxi ní cáháⁿ ndihi cue ñani tñháⁿ-n ndéé sanaha, ndí Abrahám ndihi ndí Isáac ndihi ndí Jácób, ndihi dava-gá cue ñani tñháⁿ-n. Nchaa cue ndí-áⁿ ní xóo cáháⁿ ndihi-í." Duha ní xáhaⁿ-gá xii té Moisés. Te ní quidi ñaha-xi xii té Moisés sá ní yúhú-dé, te ñá ní cùyi-gá-dé cundehe-dé tnutáú nchicúⁿ ñuhú-áⁿ.

³³ Te Yá Ndióxi ní xáhaⁿ-gá xii-dé: "Queñuhu chàu-n, chi núú ñuhú ní cuu íi nútñi-n.

³⁴ Te yúhú ndéhè-í sá ìo ndòho nchaa ñayiu cùu cuendá-í, ñayiu ndècu nacióⁿ Ègíptú. Te ní tecú dóho-í sá ìo ndàhú xicáháⁿ-yu, núu xíáⁿ véxi-í cächí tñuhu-í sá ñuhú-n nacióⁿ Ègíptú cuendá ndèñuhú-n-yu yácaⁿ." Duha ní xáhaⁿ Yá Ndióxi xii té Moisés.

³⁵ "Te ñá ní sándáá iní-yu té Moisés ndéé díhna, chi ní xáháⁿ-yu: "¿Ná cuendá véxi-n tàxi tnuini ñháⁿ-n xii-ndí?" Duha ní xáháⁿ-yu xii té Moisés. Te ñu-ni té Moisés ní tendaha ñaha Yá Ndióxi ní sáháⁿ-dè dacácu-dé ñayiu isráel nacióⁿ Ègíptú tuxi ñá ní sándáá iní ñháⁿ-yu xii-dé. Dico ní taxi tñuni-dé-yu, chi ducaⁿ ní xáhaⁿ-gá òré ní xini-dé espíritú xinú cuèchi núú-gá xití tnutáú nchicúⁿ ñuhú.

³⁶ Te té Moisés ní ngüita-dé ní quide-dé sá vã yòo tñáhi ndàcu cada, te ní cuñuhu vihi-yu sá dúcáⁿ ní quide-dé, te ducaⁿ ní quide-dé Ègíptú ndihi Lámár Tícuéhé. Te ní ngódó núu-dé núu-yu ní quee-yu Ègíptú cuáháⁿ-yu ìⁿ ichi xití yucu núú vã yòo tñáhi ndècu, te ní xihí-yu údico cuíá xití yucu-áⁿ, te xíáⁿ ní xóo cada-dé sá vã yòo tñáhi ndàcu cada.

³⁷ Te ñu-ni té Moisés ní xáhaⁿ-dè xii cue ñani tñháⁿ-dè dàvá-áⁿ: "Yá Ndióxi cada-gá te coo ìⁿ ñani tñháⁿ-ndó ndéé cuèé-gá, te tée-áⁿ cáháⁿ-dé tñuhu-gá núú-ndó dàtná cuini-ndó ní cachí-gá quidé yúhú, te ìo xini ñuhu-xi cundedóho-ndo tñuhu cáháⁿ-dè", duha ní xáhaⁿ té Moisés xii-yu dàvá-áⁿ.

³⁸ Te ñu-ni té Moisés ní xindecu ndihi-dé ñayiu isráel xití yucu, te ní sáá-dé yucu Sinái, te xíáⁿ ní quixi ìⁿ espíritú xinú cuèchi núú Yá Ndióxi ní cáháⁿ ndihi ñaha-xi xii-dé, te yácaⁿ ní dácuháⁿ ñaha-xi tñuhu-gá, te ñu-ni tñuhu-áⁿ ní ndóo dàcuaha-o.

³⁹ Te cue ñani tñháⁿ-ó ní xindecu ndéé sanaha ñá ní sándáá iní-yu té Moisés, te ñá ní ndéé iní ñháⁿ-yu xii-dé, chi ní cuini-yu nuhú tucú-yu ñuú Ègíptú cundecú-yu.

⁴⁰ Te òré ndécú té Moisés yucu ní xáháⁿ-yu xii ñani-dé té Áron: "Cadúha-n ìⁿ úú ndiόxi díhúⁿ cuááⁿ codonuu núú-ó cùhu-n-o ichi, chi ñá túú cùtnuni iní-ó ndéé ichi cuáháⁿ té Moisés, tée yòdo nuu núú-ó nduu ní quee-o Ègíptú", duha ní xii-yu té Áron.

⁴¹ Te dàvá-áⁿ ní cadúha-güedé ìⁿ chēhlu mee-ni díhúⁿ cuááⁿ, te ní sahani-güedé ìⁿ úú quiti nchito ní quide cāhnu-güedé chēhlu-áⁿ. Te ìo ní cudí iní-yu quiti-áⁿ, chi ní cachí-yu sá díu-ni ndiόxi cúu-dí.

⁴² Te sá dúcáⁿ ní quidé-yu, xíáⁿ ní dáñá ñaha Yá Ndióxi xii-yu. Te ní dáñá-gá ní xóo cada cāhnu-yu nchicanchi, ndihi yóo, ndihi nchaa chodíni. Te duha ní chídó tñuni ìⁿ tée ní xóo cáháⁿ tñuhu Yá Ndióxi ndéé sanaha nācuáa ní xáhaⁿ-gá xii ñayiu dàvá-áⁿ:

Nchòhó ñayiu isráel, ní cuu údico cuíá yíhí-ndó yùcu,

te ní sahani-ndo quiti-ndo ní quide cāhnu ñaha-ndo xii-í cáháⁿ-ndó, dico ñháⁿ chi ní sahani-ndo-güedé ní quide cāhnu-ndo sá ní cadúha mee-ndo.

⁴³ Te ní cadúha-ndo ìⁿ veñuhu líhli, te ní sanutñi-ndo Mólóc sá cächí-ndó cùu ndiόxi-ndó xica nchido-ndo xití yucu, te ní cadúha-ndo ìⁿ chodíni, te quiti-áⁿ cächí-ndó sá cúu-dí ndiόxi Rēñfán, te ndí nduu sá ní cadúha-ndo-áⁿ ní quide cāhnu-ndo.

Te cuendá sá dúcáⁿ ní quide-ndo te yúhú queñuhu ñaha-í xii-ndo quihíⁿ-ndó cūndecu-ndo ingá xio nacióⁿ Babiloniá. Duha ní xáhaⁿ Yá Ndióxi xii-yu, te ducaⁿ ní chídó tñuni tée ní xóo cáháⁿ tñuhu-gá.

⁴⁴ "Te xití yucu-áⁿ ní dácáá-güedé ìⁿ veñuhu vehe dóo. Te vehe-áⁿ ní cuu-xi ìⁿ sá cùtnuni iní-yu sá Yá Ndióxi ndécú ndihi ñaha-gá xii-yu. Te vehe-áⁿ ní dácáá-güedé nācuáa ní xáhaⁿ Yá Ndióxi xii té Moisés, chi ní dānehé ñháⁿ-gá xii-dé nācuáa dacāa-güedé.

⁴⁵ Te sá táⁿ ní xihí nchaa cue tée-áⁿ, te ní ndóo ndihi nchaa déhe-güedé veñuhu-áⁿ.

Te ní xido tucu-güedé veñúhu-güedé cuáháⁿ-güedé, te cuáháⁿ ndihi-güedé té Jòsué núú cündécú-yu. Te sáta ní quexió-yu, te ní dácúnú-yu ñáiyu dii ñúú-xi-áⁿ chi mee Yá Ndióxi ní chindee ñaha-gá xii-yu. Te sáta ní ndihi nchaa ñáiyu ní xica nchido veñúhu dóó-áⁿ ní xíhi, te ní ndóo ndihi dava-gá-yu. Te ducaⁿ-ni ndécú-xi ní cacu té Dàvií, téé ní xindaha ñaha xii-yu.

46 Te Yá Ndióxi ní cudíí víhi iní-gá té Dàvií. Te ní xicáⁿ tnúhú-dé núú-gá núu cuu dacáa-dé veñúhu cuu cuendá-gá, chi ñⁿ-ni Yá Ndióxi ní xóo cada càhuu té Dàvií ndihi té Jácób, ñaní tnáhá-ó ní xindecu ndéé sanaha vihi-gá.

47 Te Yá Ndióxi ñá ní dàña-gá dacáa té Dàvií veñúhu-gá dico déhe-dé té Salómón, chi ní dàña-gá ní dácáa-dé veñúhu cuu cuendá-gá

48 cuéi ñá túú sácúndecu-gá veñúhu dácaa cue téé ñuyúú-a, chi ndèni xíáⁿ ndécú-gá chi espíritu cúú-gá. Te duha ní chídó tnúni téé ní xóo cáháⁿ tnúhu Yá Ndióxi ndéé sanaha nàcuáa ní cáháⁿ-gá:

49 Yúhú táxi tnúni-í andiu ndihi ñuyúú, te xíáⁿ núu nchòhó vá ndácú-ndó chihí ñaha-ndo xití veñúhu dátáa quidé-yu sá cächí-yu cùu ndiòxi-yu ní cadúha-yu.

Te ñá túú xini ñuhu-í núú ndétátú-í, 50 chi yúhú ní cadúha-í nchaa sá íó ñuyúú-a. Duha ní cáháⁿ Yá Ndióxi, te diu-ni ducaⁿ ní chídó tnúni téé ní xóo cáháⁿ tnúhu-gá —duha ndúu nchaa tnúhu ní xáhaⁿ té Tèvá xii-güedé.

51 Te ní xáhaⁿ tùcu-dé:

—Nchòhó, ío sáá iní-ndó chi quide-ndo datná quidé ñáiyu ñá túú cùu ñáiyu isràél chi ñá túú tédóho-ndo tnúhu cáháⁿ Yá Ndióxi, chi ñá cuíni-ndó quindáá iní-ndó tnúhu-gá, mee-ni cùu úhú iní-ndó Espiritú-gá dátáa ní xóo cada cue ñaní tnáhá-ndó ní xindecu ndéé sanaha.

52 Chi cue téé-án ío ní xóo dandóho-güedé nchaa cue téé ní xóo cáháⁿ tnúhu Yá Ndióxi ndéé sanaha. Te ní sahani-güedé nchaa cue téé ní cáháⁿ sá quixí Crístú ñuyúú-a, te Yaá-án ñá túú cuèchi-gá. Te diu-ni ducaⁿ ní quide-ndo Crístú cútáhá ní quixi-gá ñuyúú-a, chi ní sáha cuendá-ndó-gá núú cué téé ní cuu úhú iní ñáhá xii-gá ní sahani ñaha-güedé.

53 Te ndécú ndihi-ndo tnúhu ní chídó tnúni ndíi Moisés nàcuáa ní xáhaⁿ espíritu xínú cuèchi núú Yá Ndióxi xii ndíi, te ní dùcaⁿ ñá túú sándáá iní-ndó tnúhu-án núu ní sahani-ndo Jesús. Te diu-ni tnúhu-án ndécú ndihi-ndo ndéé vitna —cächí té Tèvá xáhaⁿ-dè xii-güedé.

Ní sahani-güedé té Tèvá

54 Te sá dúcáⁿ ní xáhaⁿ té Tèvá xii-güedé, te ní cudééⁿ víhi-güedé núú-dé, núu ní quide rúhñú-güedé núhu-güedé sá sátú iní-güedé.

55 Te té Tèvá ndécú ndihi-dé Espiritú Yá Ndióxi, te ní ndacoto váha-dé andiu, te ní xini-dé súuni dátáaⁿ-xi núú ndécú Yá Ndióxi, te ní xini-dé Xítóhó Jesucristú núnñi-gá xio cùha Yá Ndióxi.

56 Te ní xáhaⁿ té Tèvá xii-güedé:

—Chí cündèhe andiu chi yúhú ndèhè-í Xítóhó Jesucristú núnñi-gá xio cùha Yá Ndióxi, te diu-gá cúú-gá ñaní tnáhá-ndó nchaa-ndo —cächí-dé xáhaⁿ-dè.

57 Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu cáháⁿ-dè, te uuⁿ-ni ní cuáá-güedé, te ní taxi ndaha ñaha-güedé xii-dé

58 ndéca ñaha-güedé cuáháⁿ ndéé ñⁿ xio yuhu ñúú, te yàcáⁿ ní sáñaha-güedé yúú xii-dé. Te ndécú ñⁿ téé cuechi nani-dé Sàulú, te téé-án ní quide cuendá-dé dóó-güedé cuendá ní nune ndaha-güedé ní sáñaha-güedé yúú xii té Tèvá.

59 Te órè sáñaha-güedé yúú, te ní cáháⁿ ndihi-dé Xítóhó Jesucristú te xáhaⁿ-dè:

—Yòhó Xítóhó Jesucristú, naqueheⁿ-n iní-í —cächí-dé xáhaⁿ-dè xii-gá.

60 Te ní nguñí xití-dé, te nihi ní cáháⁿ-dè, te xáhaⁿ-dè:

—Yòhó Xítóhó Jesucristú, vá técuèchi-n cué téé-a sá dúhá quide ñaha-güedé xii-í —cächí-dé xáhaⁿ-dè xii-gá.

Te xíáⁿ-ná ní cáháⁿ-dè, te ní xihí-dé.

8

Té Sàulú chíhi-dé ñáiyu sándáá iní-xi tnúhu Jesús vecaá

1 Te té Sàulú ní nduu vétú iní-dé sá ní sahani-güedé té Tèvá.

Te diu-ni nduu-án ní cuu níhi cuendá nchaa ñáiyu sándáá iní-xi tnúhu Jesús ñuú Jerusalén. Te ní ndihi-yu ní xité nuu cuáháⁿ-yu distritú Judeá ndihi distritú Sàmaría. Te cue téé ní táuchíuⁿ Jesús dácuaha ñaha xii-yu tnúhu-gá ní ndóo-güedé ñuú Jerusalén.

2 Te nchaa cue téé cáháⁿ ndihi Yá Ndióxi ní chindúxi-güedé ndíi Tèvá. Te ío ní ndáhyu ñáiyu ní sándáá iní tnúhu Jesús sá ní xihí ndíi.

3 Te té Sàulú ío dándóho-dé-yu, chi ndi vehe ndi vehe cuáháⁿ-dè cuátñi-dé cuéi téé cuéi ñadihi ndéca-dé cuáháⁿ vecaá.

Cáháⁿ-yu tnúhu Yá Ndióxi distritú Sàmaría

4 Te nchaa ñáiyu ní xité nuu cuáháⁿ-yu cáháⁿ-yu tnúhu Jesús nchaa núú quexió-yu.

5 Te té Lipé cuáháⁿ-dè distritú Sàmaría cáháⁿ-dè tnúhu Xítóhó Jesucristú Yaá ní tendaha Yá Ndióxi ní quixi ñuyúú-a.

6 Te ío vai núú sá vá yóo tnàhi ndàcu cada ní quide-dé, te ní cuñúhu vihi-yu, te ní xindedóho váha-yu nchaa tnúhu ní cáháⁿ-dè.

7 Te vai ñáiyu yihi ñaha espíritu cündihi yucu ñávaha ní queñuhu-dé nchaa

espíritu-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vâi ñáiyu cùhú ñá cùú-gã candá nihnú-yu ndihi ñáiyu yacua ní quide tátna-dé, te ní ndúha-yu.

⁸ Te sá dúcáⁿ ní cáháⁿ-dé tnúhu Jèsús te ní quide tátna-dé-yu, xiáⁿ ío ní cudíí íni ñáiyu ñuú-áⁿ.

⁹ Te diu-ni ñuú-áⁿ ndécúⁿ ìⁿ tée nàni Xímú, te tée-áⁿ xiní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáiyu distritú Sámariá sá dúcáⁿ quide-dé, te ní cachí-dé sá díú-ní-dé cùñú.

¹⁰ Te nchaa ñáiyu cuéi ñáiyu cuica te cuéi ñáiyu ndàhú ío nèhé-yu sá yíñùhu núú-dé, te xitnàhá-yu:

—Tée-áⁿ ío chindee ñaha Yá Ndióxi xii-dé núu vâi núú sá quidé-dé —cachí-yu xitnàhá-yu.

¹¹ Te ní sándáá íni-yu nàcuáa ní xóo cada ndúu-dé, te ní xóo cuñúhu víhi-yu, te ní cuu naha dùcaⁿ-ni dandahú ñháá-dé xii-yu.

¹² Te té Lipé ní cáháⁿ-dé tnúhu Xitohó Jesucristú, te ní xáhaⁿ-dé xii-yu sá Yá Ndióxi cuini-gá ndíhu ndaha ñáha-gá xii-yu. Te cuéi tée cuéi ñadhí ní sándáá íni-yu tnúhu-gá, te ní sanduté-yu.

¹³ Te tnàhá té Xímú ní sándáá íni-dé tnúhu-gá, te ní sandute-dé, te ní xica cuu-dé ndihi té Lipé, te ní cuñúhu-dé chi titní núú sá vâ yóo tnáhi ndàcu cada ní quide té Lipé, te ní cuñúhu víhi nchaa ñáiyu.

¹⁴ Te dava-gá cue tée ní táuchíúⁿ Jèsús dacuáha ñaha xii ñáiyu tnúhu-gá ní níhi-güedé tnúhu sá ñáiyu distritú Sámariá ní sándáá íni-yu tnúhu Yá Ndióxi. Te ní tendaha-güedé té Pèlú ndihi té Juáa cuáháⁿ-güedé distritú Sámariá.

¹⁵ Te ní quexio-güedé, te ní cáháⁿ ndihi-güedé Yá Ndióxi ní xicáⁿ-güedé Espiritú-gá quixi cundecu ndihí-yu.

¹⁶ Chi ní ñⁿ-yu vátá sáa-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé.

¹⁷ Te òré ní sacáⁿ ndodo-güedé ndaha-güedé díquí-yu, te ní quexio Espiritú-gá ní ngúndecu ndihí-yu.

¹⁸ Te ní xiní té Xímú nàcuáa ní quide-güedé ní quexio Espiritú-gá ní ngúndecu ndihí-yu, te cuini-dé cuañaha-dé díhúⁿ xii té Pèlú ndihi té Juáa ní cùu.

¹⁹ Te ní xáhaⁿ-dé:

—Chindee ñaha-ndo cuendá ndéda-ni cáa-yu cacáⁿ ndodo-í ndaha-í díquí-yu, te níhi-yu Espiritú Yá Ndióxi cundecu ndihí-yu —cachí-dé xáhaⁿ-dé xii-güedé.

²⁰ Te té Pèlú ní xáhaⁿ-dé xii-dé:

—Yòhó cuíta nihnu-n ndihi díhúⁿ-n, chi cuini-n cuáaⁿ-n sá vâha quide Yá Ndióxi.

²¹ Yòhó vá cùú càda-n chiuⁿ quide-ndí, chi ñá túú ndècu vâha íni-n núú Yá Ndióxi.

²² Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n núú Yá Ndióxi sá ná cadá càhnu íni-gá tnúhu ní cáháⁿ-n.

²³ Te yúhú sa xini-í sá ío úhú íni-n, chi mee-ni sá cuéhé sá dúhá chido nuu-n quide-n —cachí té Pèlú xáhaⁿ-dè xii té Xímú.

²⁴ Te ní xáhaⁿ té Xímú xii-güedé:

—Cáháⁿ ndàhú-ndó núú Yá Ndióxi sá ña túú ná tnahá-í sá dúcáⁿ ní cáháⁿ-í —cachí-dé xáhaⁿ-dè.

²⁵ Te té Pèlú ndihi té Juáa ní cáháⁿ-güedé tnúhu Yá Ndióxi núú ñáiyu ñuú-áⁿ. Te ní xáhaⁿ-güedé nchaa nàcuáa ní quide Jèsús ní xiní-güedé òré ní xica cuu-gá ñuyúí-a. Te ní tnií-güedé ichi cuánuhú-güedé ñuú Jerusalén, te ní yáha-güedé titní ñuú yíndèhu distritú Sámariá, te ní cáháⁿ-güedé tnúhu-gá.

Té Lipé ndihi ñⁿ tée ñuú Etiópia

²⁶ Te ñⁿ espiritú xinú cuéchi núú Yá Ndióxi ní quexio-xi ñuú Jerusalén ní xáhaⁿ-xi xii té Lipé:

—Cada túha-n chi quée nuu-n ñuú Gàzá, dico mee-ni xití yucu cuáháⁿ ichi —cachí-xi xáhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ñⁿ tée nacióⁿ Etiópia ñúhú-dé ichi. Te cùu-dé tesorerú xinú cuéchi-dé núú ñⁿ ñadhí ñaha yíndaha nacióⁿ Etiópia, te ñaha-áⁿ nání-áⁿ Cándacé.

²⁸ Te tée etiópia-áⁿ ní sáháⁿ-dé ñuú Jerusalén ní cáháⁿ ndihi-dé Yá Ndióxi, te ñúhu-dé ichi cuánuhú-dé ñuú-dé ñúhú-dé carrètá, te dacuaha-dé tnúhu ní chídó tnúni ndíi Chaiá tée ní xóo cáháⁿ tnúhu Yá Ndióxi ndéé sanaha.

²⁹ Te ní xáhaⁿ Espiritú Yá Ndióxi xii té Lipé:

—Quíñⁿ tuha-n carrètá-áⁿ —cachí Espiritú-gá xáhaⁿ-xi xii-dé.

³⁰ Te té Lipé ní sátuha-dé carrètá-áⁿ, te ní tecú dóho-dé nàcuáa cáháⁿ tée etiópia-áⁿ, tée ñúhu carrètá-áⁿ dacuaha-dé nàcuáa ní chídó tnúni ndíi Chaiá. Te ní xáhaⁿ té Lipé xii tée etiópia-áⁿ:

—¿Tècú tnúni-n ncháa tnúhu dacuaha-n-áⁿ? —cachí té Lipé xáhaⁿ-dè xii-dé.

³¹ Te ní xáhaⁿ tée etiópia:

—¿Nása tecú tnúni-í te vâ yóo dànehé ñháá xii-í? Ta quène iha coo-n chi danèhé ñháá-n —cachí-dé xáhaⁿ-dè xii té Lipé.

Te cuasáa té Lipé núu carrètá ní ngóo-dé.

³² Te ndédóho-dé nàcuáa dacuaha tée etiópia-áⁿ nàcuáa ní chídó tnúni ndíi Chaiá núú tütú Yá Ndióxi núú cachí-xi:

Dàtná quidé ñⁿ mbéé cada-dé òré candeca ñaha-güedé xii-dé quíñⁿ cahni ñaha-güedé chi ñá túú ná cada-dé,

dàtná cuíní-ndó quide mbéé òré dètè-di ñá túú ndàhí-di ducaⁿ càda-dé òré cahni ñaha-güedé chi ní vâ càháⁿ-dé.

³³ Te mee-ni cùdiquí ndeé ñáhá-güedé xii-dé, te ní vâ ndúcu tñuhu-güedé núú-dé nùu ndáá ndècuéchi-dé.

Te ío cuu nduu cuihna íní cue ñani tñáhá-dé, chi cahni ñaha-güedé xii-dé ñuyúú-a. Duha càháⁿ tutú ní dâcuahá tée etiòpiá ní xíndedóho té Lipé.

³⁴ Te ní xáhaⁿ tucu tée Etiòpiá xii té Lipé:

—Cundee íní-n cächí tñuhu-n yòo cuncuhe tée ní càháⁿ tñuhu Yá Ndiòxí ndéé sanaha, núu càháⁿ-dé cuendá méé-dé àdi caháⁿ-dé cuendá ingá ñáyú —cächí tée etiòpiá-án xáhaⁿ-dè xii té Lipé.

³⁵ Te té Lipé ní cani-dé cuendú núú tée etiòpiá nâcuáa ní càháⁿ ndí Chàíá nâcuáa cada Jèsús òré quixi-gá ñuyúú-a. Te ní xáhaⁿ-dè nâcuáa nduu tñuhu Jèsús ndihi nâcuáa ní quide-gá.

³⁶ Te ñuhu-güedé ichi cuáháⁿ-güedé ní naníhí-güedé íñ xichi núú ñuhú ndüte, te ní xáhaⁿ tée etiòpiá:

—Iha ñuhu ndute, ¿te vâ cúú cuandute-í iha-án? —cächí-dé xáhaⁿ-dè xii té Lipé.

³⁷ Te xáhaⁿ té Lipé:

—Te núu sândáá ndisa íní-n Jèsús, te cuu cuandute-n —cächí-dé xáhaⁿ-dè.

Te ní xáhaⁿ tée etiòpiá:

—Sândáá ndisa íní-í sá Dèhe Yá Ndiòxí cúú Xítóhó Jesucristú —cächí-dé xáhaⁿ-dè.

³⁸ Te ní ngani-dé carrètá, te ní nuu-güedé ndi ndùú-güedé, te cuánguee-güedé xití ndute, te ní dâcuándute ñaha té Lipé xii-dé.

³⁹ Te òré ní nene-güedé xití ndute, te ndèca ñaha Espiritú Yá Ndiòxí xii té Lipé cuáháⁿ. Te ñá túú ní xini tée ní sandute-án ndèé ichi cuáháⁿ té Lipé. Te ío ní cudíí íní-dé sá ní natuha-dé ichi Yá Ndiòxí, te cuándaa-dé núú carrètá-dé cuánuhú-dé.

⁴⁰ Te ní quexio té Lipé ñuu Àzotó, te ndi tñahá ñuu ndi tñahá ñuu cuáháⁿ-dé càháⁿ-dé tñuhu Yá Ndiòxí, te ní yáha-dé cuáháⁿ-dé ní quexio-dé ndéé ñuu Cèsareá.

9

Té Sàulú ní tuha-dé ichi Xítóhó Jesucristú (Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuendá ñáyú ní sândáá íní tñuhu Jèsús, te cuíní-dé cahni ñaha-dé xii-yu. Te ní sáháⁿ-dé núú dùtú cúnú-gá,

² te ní xáhaⁿ-dè sá cádúha dùtú-án íñ tutú canehe-dé quíhíⁿ cuáha-dé cue tée xíndeé nchito veñúhu ñuu Dàmascú, chi cuíní-dé tñiⁿ-dé nchaa ñáyú dâcuaha tñuhu Xítóhó Jesucristú candeca ñaha-dé quíhíⁿ ñuu Jerusalén.

³ Te ní xica-dé cuáháⁿ-dé tá cùyatni-dé ñuu Dàmascú, te uuⁿ ní quee ñuhu andú, te ní dáyhé-xi ndéé núú nùtñiⁿ-dè.

⁴ Te ní nduá-dé ndéé ñuhu, te ní tecú dóho-dé càháⁿ íñ sá càháⁿ núú ñinu, te xáhaⁿ-xi xii-dé:

—Yòhó Sàulú, ¿ná cuendá cúú úhú íní ñáhá-n xii-í te dândoho ñaha-n? —cächí sá càháⁿ-án xáhaⁿ-xi xii-dé.

⁵ Te ní xáhaⁿ-dè:

—¿Ná cúú yòhó sá càháⁿ-án-i? —cächí-dé xáhaⁿ-dè.

Te ní xáhaⁿ sá càháⁿ xii-dé:

—Yúhú cúú-í Jèsús tée cúú úhú íní-n. Te ío dândoho-n mee-n, chi dàtná quidé ndicutu quide-n, chi quiti-án núu na cùxi-güedé-di pùyá te sáha-di patadá núú-xi, te quide úhú-di mee-di. Te ducaⁿ sâtnahá-xi cúú yohó chi ñá túú sândáá íní ñáhá-n xii-í —cächí sá càháⁿ-án xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ní yuhú-dé, te ní xáhaⁿ-dè:

—Xítóhó Jesucristú, ¿te ná cuíní-n càda-í-i? —cächí-dé xáhaⁿ-dè.

Te Jèsús ní xáhaⁿ-gá xii-dé:

—Ndacóo, te quíhíⁿ-n ñuu-án, te yacáⁿ tecú tñuhu-n ná cúú sá càdá-n —cächí-gá xáhaⁿ-gá xii-dé.

⁷ Te cue tée cuáháⁿ ndihi té Sàulú ní tecú dóho-güedé càháⁿ íñ sá càháⁿ, dico vâ yòo tñahí ní xini-güedé, te ní yuhú víhí-güedé, te ñá túú tñahí ní càháⁿ-güedé.

⁸ Te ní ndacóo té Sàulú, te ñá ní cúu-gá cundehe-dé, chi ní cuaa-dé, te ní tñiⁿ-güedé ndaha-dé ndéca ñaha-güedé cuáháⁿ ñuu Dàmascú.

⁹ Te yacáⁿ ní xíndecu-dé úní nduu, te ñá ní cúu tñahí cundehe-dé, te ñá túú ná ní xèxi-dé, te ñá túú ní xihí-dé ndute.

¹⁰ Te ndècu tée sândáá íní tñuhu Jèsús ñuu Dàmascú, nání-dé Ananiás, te ní sáháⁿ Jèsús núú sání-dé, te ní xáhaⁿ-gá xii-dé:

—¡Ananiás! —cächí-gá xáhaⁿ-gá.

Te ní xáhaⁿ-dè:

—¿Yúhú càháⁿ ndihi-n-án? —cächí-dé xáhaⁿ-dè.

¹¹ Te ní xáhaⁿ-gá:

—Ndacúñí, te quíhíⁿ-n íñ chiuⁿ ichi núú dânaní-güedé Ichi Ndáá, te yacáⁿ nanducu-n vèhe té Jüdás, chi vehe tée-án ndécú íñ tée ñuu Tarsú nání-dé Sàulú, te tée-án sa càháⁿ ndihi ñaha-dé xii-í.

¹² Te tée-án ní dácóto ñaha-xi sá ní xini ñáhá-dé xii-n ní quexio-n núú ndécú-dé, te ní sacáⁿ ndodo-n ndàha-n díquí-dé, te ducaⁿ te ní nacaáⁿ núú-dé ní dácóto ñaha-xi xii-dé —cächí-gá xáhaⁿ-gá.

¹³ Te té Ananiás ní xáhaⁿ-dè:

—Yòhó Xítóhó Jesucristú, cächí tñuhu-í xii-n sá ní ñihí-í tñuhu nâcuáa quide-dé sá

io quide úhú-dé ñáiyu càháⁿ ndihi-n ñùú Jerusalén.

¹⁴ Chi ñehe-dé tutú ní sáñaha cuè dútú cúnú cuendá ñihí-dé ñàcuáa cada-dé tñii-dé nchaa ñáiyu sàndáá iní ñáhá xii-n —cachí-dé xáhaⁿ-dè xii-gá.

¹⁵ Te Jèsús ní xáhaⁿ-gá xii-dé:

—Quihíⁿ-n ndàtnúhu-n ndihi-dé, chi cuini-í cada-dé chiúⁿ-í, quihíⁿ-dè cáháⁿ-dè tñúhu-í núú cuè ñáiyu isràél, ndihi núú cuè ñáiyu ñá túú cuè ñáiyu isràél, ndihi núú cuè téé yìndaha ñaha xii-yu.

¹⁶ Te yúhú cuñaha-í xii-dé sá ndóhó vihi-dé cuèndá-í —cachí-gá xáhaⁿ-gá xii té Ananiás.

¹⁷ Te cuaháⁿ té Ananiás vehe núú ndécú té Sàulú te ní sacáⁿ ndodo-dé ndaha-dé díqui té Sàulú, te ní xáhaⁿ-dè:

—Yohó té Sàulú téé ndècu ndihi-í ichi Xitohó Jesucristú, diu-n Xitohó Jesucristú Yaá ní cáháⁿ ndihi ñaha xii-n ichi ní tendaha ñaha-gá véxi-í cuèndá cacáⁿ táhú-í núú-gá cuèndá-n te ndúha núú-n, te dàtnúni quixi Espiritú-gá cundecu ndihi-n —cachí-dé xáhaⁿ-dè.

¹⁸ Te dàtná sá ní xócání-ó ñiⁿ sá ndèdí núú-dé ní quide ñaha-xi xii-dé, te ní nacaáⁿ núú-dé, te ní sandute-dé.

¹⁹ Te ní xexi-dé, te ní nanihí ndéé-dé, te titní nduu ní xíndecu ndihi-dé ñáiyu ní sàndáá iní tñúhu-gá ñúú Dàmascú.

Té Sàulú dácuaⁿ-dè ñáiyu tñúhu Yá Ndióxi ñúú Dàmascú

²⁰ Te sáta ní ndúha núú-dé, te ní sáháⁿ-dè veñúhu cue ñáiyu isràél ní xáhaⁿ-dè sá Jèsús cúú-gá Déhe Yá Ndióxi.

²¹ Te nchaa ñáiyu ní xíndedóho tñúhu ní cáháⁿ-dè, te ní cuñúhu vihi-yu, te ní xítñahá-yu:

—Diu téé-áⁿ ní sahani-dé ñáiyu ní xóo chiñúhu ñaha xii Jèsús ñúú Jerusalén. Te ní quixi-dé iha ní cuini-dé tñii ñaha-dé xii-yu candeca ñaha-dé quihíⁿ núú cuè dútú cúnú ni cuu —cachí-yu xítñahá-yu.

²² Te ió iní-gá té Sàulú xáhaⁿ-dè xii-yu sá díú Jèsús cúú-gá Cristú Yaá ní tendaha Yá Ndióxi ní quixi ñuyú-a, te xiáⁿ ñá ní ñihí ñáiyu isràél ndécú ñúú Dàmascú tñúhu cáháⁿ-yu, te ní cuñúhu vihi-yu.

Té Sàulú ní dáxió-dé núú ñáiyu isràél

²³ Te sáta ní cuu titní nduu, te ní ndatnúhu cue téé isràél sá cáhni-güedé té Sàulú.

²⁴ Te Sàulú ní ñihí-dé tñúhu ñàcuáa cáháⁿ-güedé cada ñaha-güedé xii-dé, te cuèi nduu cuèi niú néhé cuèndá-güedé yuyéhe núú ñúdòco ndóho yuhu ñúú cuèndá cuini-güedé tñii ñaha-güedé xii-dé te cahni ñaha-güedé.

²⁵ Te ñiⁿ niú ndécá ñaha cue téé ní sàndáá iní-xi tñúhu Jèsús cuaháⁿ ndéé núú ñúdòco ndóho yuhu ñúú. Te ní sáá-güedé núú

ndóho, te ní chihí ñaha-güedé xii-dé xití tídihi te ní dándéé ñaha-güedé núú ñúhú, te ní quene-dé cuaháⁿ-dè.

Te Sàulú ndécú-dé ñúú Jerusalén

²⁶ Te té Sàulú ní nasáá-dé ñúú Jerusalén, te cuini-dé chitnahá-dé ñáiyu sàndáá iní tñúhu Jèsús, te ní yùhú-yu chi ní cáháⁿ-yu sá dándáhu ñáhá-dé sá sàndáá iní-dé Jèsús.

²⁷ Te té Bèé ndécá-dé té Sàulú cuaháⁿ núú ndécú cuè téé ní táuchíúⁿ Jèsús dácuaⁿ ñaha xii-yu tñúhu-gá. Te ní cani té Bèé cuèndú núú-güedé ñàcuáa ní cuu ní nanihí tñáhá té Sàulú ndihi Jèsús ichi, te ní cáháⁿ ndihi ñaha-gá xii-dé. Te ní xáhaⁿ tícu té Bèé ñàcuáa ní cáháⁿ té Sàulú tñúhu Jèsús núú ñáiyu Dàmascú, te ñá túú tñahí ni yùhú-dé ní cáháⁿ-dè, cachí té Bèé xáhaⁿ-dè xii-güedé.

²⁸ Te ní xíndecu té Sàulú ndihi ñáiyu xídácuaⁿ tñúhu-gá ñúú Jerusalén. Te ní ndicuu ndicuu-dé ní cáháⁿ-dè tñúhu Jèsús, te ñá túú tñahí ni yùhú-dé

²⁹ ní cáháⁿ ndihi-dé ñáiyu isràél ñáiyu cáháⁿ tñúhu griégú. Te ñáiyu-áⁿ ní ngüita-yu ndàtnúhu-yu sá cáhni ñahá-yu xii-dé.

³⁰ Te ñáiyu sàndáá iní tñúhu-gá ní ñihí-yu tñúhu ñàcuáa cuini ñáiyu cáháⁿ tñúhu griégú cada ñahá-yu xii té Sàulú, núú ní sàndeca ñahá-yu xii-dé ñúú Cèsareá, te yacáⁿ ní tendaha ñahá-yu cuánuhú-dé ñúú Tarsú.

³¹ Te sáta xiáⁿ te ní sanaá-yu ñá túú-gá ní xóo cada úhú-yu nchaa ñáiyu sàndáá iní tñúhu Jèsús ñihí distritú Judeá, ndihi distritú Galileá, ndihi distritú Sàmaría. Te ní ñihí ndéé-yu ní quide-yu ñàcuáa ní xáhaⁿ Yá Ndióxi cada-yu, te ió ní xíndecu yíñúhú-yu núú-gá, te Espiritú-gá ní chindee ñaha-xi xii-yu, te vai-gá ñáiyu ní sàndáá iní-yu tñúhu-gá.

Té Pèlú ní quide tátma-dé té Èneás

³² Titní xichi ní sáháⁿ té Pèlú ní cáháⁿ-dè tñúhu Yá Ndióxi. Te ñiⁿ nduu ní sáháⁿ-dè ñúú Lidá ní cáháⁿ ndihi-dé ñáiyu sàndáá iní ñáhá xii Jèsús.

³³ Te yacáⁿ ní nanihí-dé ñiⁿ téé nani Eneás, te ní cuu úná cúú cáhú-dé, te ní lúha ñá cúú-gá candá nihnu-dé.

³⁴ Te ní xáhaⁿ té Pèlú xii-dé:

—Èneás, Xitohó Jesucristú cada tátma ñaha-gá xii-n tñavíi. Ndacóo te ndocani-n yùu-n —cachí-dé xáhaⁿ-dè.

Te òré-ni ní ndacóo-dé.

³⁵ Te nchaa ñáiyu ñúú Lidá ndihi ñáiyu ñúú Sàrón ní xiní-yu sá ní ndúha-dé, te ní sàndáá vihi iní-yu Xitohó Jesucristú.

Ní ndoto tá Dòrcás

³⁶ Te ñúú Jópé ndécú ñiⁿ ñadihí sàndáá iní-aⁿ tñúhu Jèsús, te nani-aⁿ Tabitá, te tñúhu griégú xáháⁿ-yu Dòrcás, te ió váha ní xóo cada-aⁿ chi ió váha iní-aⁿ, te ní xóo chindee-aⁿ ñáiyu ndáhú.

³⁷ Te váha-ni ndècu-aⁿ ní cuu, te ní tnú ñaha cuéhé ní xihí-aⁿ, te ní nadacúchi ñahá-yu, te ní chihi ñahá-yu ñⁿ cuártú ndécú ndéé núu ñnu.

³⁸ Te ñáyu ní sándáá iní tnúhu Jèsús ñuú Jòpé ní níhi-yu tnúhu sá ndécú tē Pèlú ñuú Lldá. Te yatni-ni càa ñuú-án, te ní tendahá-yu úú cue tēe cuáháⁿ-güedé núu ndécú-dé cuendá cúnaha-güedé candeca ñaha-güedé xii-dé quihíⁿ núu ndécú-yu. Te ní xáhaⁿ-güedé xii tē Pèlú:

—Yáchí ná quihíⁿ-ó ñuú-ndí, chi yacáⁿ cáná ñahá-yu quihíⁿ-n tnávú —càchí-güedé xáhaⁿ-güedé xii tē Pèlú.

³⁹ Te tē Pèlú ní xica-dé cuáháⁿ-dé ndihi cue tēe-án ñuú Jòpé, te òré ní quexio-güedé ndihi-dé, te cuasaá ndihi ñaha-güedé cuártú ndéé núu ñnu. Te nchaa ñáyu ñhi ñáyu queé ní tacá ndéé ñahá xii ndíyí-án xindáhyú-yu, te ní dánèhé ñahá-yu nchaa dóó ní cadúha ñaha ní xihí-án. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xindecu-aⁿ ñuyúú-a, te nchaa xiáⁿ ní dánèhé ñahá-yu xii tē Pèlú.

⁴⁰ Te tē Pèlú ní xáhaⁿ-dē sá queé-yu nchaa-yu quehé, te ní queé-yu. Te ní nguñí xití-dé te ní cáháⁿ ndihi-dé Yá Ndióxi, te dátñúni ní ndacoto-dé núu cándodo ndíyí-án, te ní xáhaⁿ-dē:

—Tàbitá, ndacóo —càchí-dé xáhaⁿ-dē.

Te ní ndacoto-aⁿ núu tē Pèlú te ní ndacóo-aⁿ.

⁴¹ Te ní tnú-dé ndaha-aⁿ ní nacanutñí ñaha-dē. Te ní cana-dé nchaa ñáyu ñhi ñáyu queé ndihi nchaa ñáyu sándáá iní tnúhu Jèsús cuendá quini-yu sá ní ndoto-aⁿ.

⁴² Te nchaa ñáyu ñuú Jòpé ní níhi-yu tnúhu ñacuáa ní quide tē Pèlú ní ndoto ñaha ní xihí-án, te vài-yu ní sándáá iní-yu Xitohó Jesucristú.

⁴³ Te titní nduu ní xindecu tē Pèlú vehe tē Ximú tēe dàcuitá ñhi.

10

Tē Pèlú ndihi tē Còrneliú

¹ Te ndècu ñⁿ tēe ñani-dé Còrneliú ñuú Cèsareá te cùu-dé capitáⁿ, te ndècu ndihi-dé ñⁿ ciendú sandadú. Te cue tēe-án nání-güedé Sandadú Italianú.

² Te tēe cùu capitáⁿ ío váha iní-dé, te mee-dé ndihi ñadhí-dé ndihi nchaa landú-dé ío nèhé-yu sá yíñnu núu Yá Ndióxi, te sáha-dé ñáyu ndàhú ñáyu isràél díchúⁿ, te ío cáháⁿ ndihi-dé Yá Ndióxi.

³ Te ñⁿ nduu dátñá òré caá úní sacuaa ní dácótó núu ñahá-xí xii-dé sá ní sáháⁿ ñⁿ espíritu xínú cuèchi núu Yá Ndióxi núu-dé, te ní xáhaⁿ-xi:

—Còrneliú —càchí-xi xáhaⁿ-xi xii-dé.

⁴ Te ní xiní-dé ndi ndúu xio núu-dé espíritu-án. Te ío ní yuhú-dé. Te ní xáhaⁿ-dē: —¿Ná chíuⁿ vèxi-n? —càchí-dé xáhaⁿ-dē.

Te xáhaⁿ-xi:

—Ío cáháⁿ ndihi-n Yá Ndióxi, te ñáyu ndàhú sáñaha-n dñhúⁿ-n, te nchaa xiáⁿ sa ñaha-gá.

⁵ Te vitna tendaha-n cuè tēe na quihíⁿ-güedé ñuú Jòpé quingana-güedé ñⁿ tēe ñani Ximú, ñdi Pelú chí úú ñuú-dé, te candeca ñaha-güedé quixi.

⁶ Te òré quexio-dé te cachí tnúhu-dé nchaa dava-gá sá cuini Yá Ndióxi cada-n. Te ndècu-dé vehe ingá tucu tēe ñani Ximú tēe dàcuitá ñhi, te vehe tēe-án caá ñⁿ xio yuhu lamár —càchí-xi xáhaⁿ-xi xii-dé.

⁷ Te sáta cuáháⁿ espíritu-án, te tē Còrneliú ní cana-dé úú tnàhá cue tēe xínu cuèchi núu-dé ndihi ñⁿ sandadú xínú cuèchi tucu núu-dé, te tnàhá sandadú-án ío cáháⁿ ndihi-dé Yá Ndióxi.

⁸ Te tē Còrneliú ní cani-dé cuendú núu-güedé ñacuáa ní cáháⁿ espíritu xínú cuèchi núu Yá Ndióxi. Te ní tendaha ñaha-dé xii-güedé cuáháⁿ-güedé ñuú Jòpé.

⁹ Te nduu tnéé-án ñhúhú-ní-güedé ichi cuáháⁿ-güedé, te cùu-xi datná òré cauxúu nduu ta cuyatni-güedé ñuú-án, te òré-án ní sáa tē Pèlú díquí véhé cáháⁿ ndihi-dé Yá Ndióxi.

¹⁰ Te òré-án sa xihí-dé docó cuini-dé caxi-dé, te ñini cadúha-yu sá caxí-dé ní dácótó núu ñahá-xí

¹¹ sá ní xiní-dé ñⁿ sá ndécú àndiu, te càa datná caá ñⁿ dóó cáhnú nchicúⁿ yoho ndi cùmi xíquí-xi véxi cuuⁿ núu ñhúhú.

¹² Te núu dóó-án yódó còo ndihi quiti ndàva ndihi nchaa núu quiti ndéé cùmi sáhá-xi.

¹³ Te ní tecú dóho-dé cáháⁿ ñⁿ sá cáháⁿ, te xáhaⁿ sá cáháⁿ-án xii-dé:

—Pèlú, ndacuíñí cahni-n ndéda-ni càa quiti-a caxi-n-di —cachí sá cáháⁿ-án xáhaⁿ-xi xii-dé.

¹⁴ Te tē Pèlú ní xáhaⁿ-dē:

—Vá cáhni-í-di chí càchí tnúhu sá sánú ñhi ñaha xii nchúhú ñáyu isràél sá và cùú caxi-ndí nchaa quiti-a chí cuu cuèchi, te vátá caxí-gá-í-di ní ñⁿ xito —cachí-dé xáhaⁿ-dē.

¹⁵ Te ní cáháⁿ tucu sá ní cáháⁿ-án, te xáhaⁿ-xi:

—Vá cùú càchí-n sá và cùú caxi-n-di, chí mee Yá Ndióxi ní cachí-gá sá díú nchaa quiti-a cuu caxi-o vitna —cachí sá ní cáháⁿ-án xáhaⁿ-xi xii-dé.

¹⁶ Te ducaⁿ ní cáháⁿ sá ní cáháⁿ-án úní xito, te dátñúni cuánda tucu dóó-án andíu.

¹⁷ Te tē Pèlú ñá ní cùtmuní iní-dé ná cuendá ducaⁿ ní dácótó núu ñahá-xí xii-dé, núu xiáⁿ ío cuéhé ní sani iní-dé. Te òré-án ní quexio cue tēe ní tendaha tē Còrneliú ndéé yuyèhe, chí ndi vehe ndi vehe cuáháⁿ-güedé ndúcú

tnúhu-güedé ndéé cáá vèhe té Xímú téé dii vèhe-xi ndecu té Pèlú.

¹⁸ Te ní cáháⁿ níhi-güedé, te xáhaⁿ-güedé:

–Ñá túú cùdana iha ndecu ìⁿ téé nànducu-ndí nání-dé Xímú, àdi Pelú chi úú diu-dé –cáchi-güedé xáhaⁿ-güedé.

¹⁹ Te té Pèlú vài sani iní-dé sá ní dácótó núú ñáhá-xí xii-dé. Te òré-áⁿ ní xáhaⁿ Espiritú Yá Ndióxi xii-dé:

–Cundedóho-n ìⁿ tnúhu na cáháⁿ-í-a. Ní quexio úní cue téé nànducu ñaha xii-n.

²⁰ Yáchi, cuandée chi quíhíⁿ-n ndíhi-güedé, te vá yúhú-n chi yúhú ní xáhaⁿ-í véxi cuaca ñaha-güedé xii-n –cáchi Espiritú-gá xáhaⁿ-xi xii té Pèlú.

²¹ Te ní xica-dé cuándeé-dé núú ndécú cue téé xica nanducu ñaha xii-dé, te xáhaⁿ-dē xii-güedé:

–Yúhú cúú tēe nànducu-ndo-áⁿ. Náu-í-a núú ná chíúⁿ cuini ñáhá-ndó –cáchi-dé xáhaⁿ-dē xii-güedé.

²² Te xáhaⁿ-güedé:

–Tée cúu capitáⁿ téé nani Corneliú ní tendaha ñaha-dé véxi-ndí, te tée-áⁿ ío váha iní-dé, chi ío sándáá iní-dé Yá Ndióxi, te nchaa ñáyiú isràél ío váha cáháⁿ-yu cuèndá-dé. Te ìⁿ espíritú xínú cuèchi núú Yá Ndióxi ní xáhaⁿ-xi xii-dé sá cána ñaha-dé xii-n quíhíⁿ-n vèhe-dé dacuàha-n-dé tnúhu Yá Ndióxi –cáchi cue téé ní tendaha té Corneliú xáhaⁿ-güedé xii té Pèlú.

²³ Te ní xáhaⁿ tē Pèlú sá quíhu-güedé vèhe-dé, te candeca tñaha-güedé ndíhi-dé quíhíⁿ ndéé nduu tnéé. Te nduu tnéé-áⁿ ní xica-güedé ndécá tñaha-güedé ndíhi té Pèlú cuáháⁿ, te tñahá ìⁿ úú cue téé sándáá iní tnúhu Jesús ñúú Jòpé cuáháⁿ ndíhi ñaha-güedé xii-dé.

²⁴ Te ndéé ingá nduu ní quexio-güedé ñúú Césareá. Te té Corneliú ndétú ñaha-dé xii-güedé vèhe-dé te sa ndéu túha-dé ndíhi ñadíhi-dé ndíhi nchaa landú-dé ndíhi cue téé ío váha tñahá tnúhu ndíhi-dé, chi ní cana ñaha-dé ní nítnáhá-yu ndíhi-dé cundetú-yu té Pèlú.

²⁵ Te sátá ní quexio té Pèlú vèhe té Corneliú, te ní quee-dé quehé, te ní ngúíñí xítí-dé núú té Pèlú chíñúhu ñaha-dé ní cúu.

²⁶ Te té Pèlú ní xáhaⁿ-dē:

–Ndacuñí vá ngúíñí xítí-n núú-í chí ñá díú Ndióxi cúu-í, dicó ìⁿ tēé ñuyú-a cúu-í –cáchi té Pèlú xáhaⁿ-dē xii-dé.

²⁷ Te ta cáháⁿ té Pèlú ndíhi té Corneliú cuánguñu-güedé xítí vèhe, te chitu ñáyiú xixíhi xítí vèhe.

²⁸ Te ní xáhaⁿ tē Pèlú xii-yu:

–Sa ñaha-ndo sá cáchi tnúhu sá sánú ichi ñaha xii nchúhú ñáyiú isràél sá vá cúú quíxi-ndí vèhe ní ìⁿ nchohó ñáyiú ñá túú cúu ñáyiú isràél te ní vá cúú tñahá tnúhu ndíhi

ñaha-ndí xii-ndo. Dico Yá Ndióxi ní cachí-gá sá vá cúú cáháⁿ-í sá vá cúú cáháⁿ ndíhi-í ñáyiú ñá túú cúu ñáyiú isràél, chi cuu cuéchi.

²⁹ Núú xiáⁿ ndíhi-ni véxi-í òré ní quexio tnúhu sá cána ñaha-ndo. Te cachí tnúhu-ndo ná cuèndá cána ñaha-ndo –cachí té Pèlú xáhaⁿ-dē xii-yu.

³⁰ Te té Corneliú ní xáhaⁿ-dē:

–Ní cuu cúmí nduu, te diu-ni dàtná òré iha cúu-xi, te yúhú ndécú-í diu-ni vèhe-í, te ñá túú tñahí ná xéxi-í cáháⁿ ndíhi-í Yá Ndióxi, te òré-áⁿ ní quexio ìⁿ espíritú xínú cuèchi núú-gá níñnú-xí dóó cuíxiⁿ dóó chàhñchí.

³¹ Te cáchi-xi: “Corneliú, ní xíndedóho Yá Ndióxi tnúhu ní cáháⁿ-n ndíhi-gá, te xini-gá sá sáñaha-n díhúⁿ xii ñáyiú ndáhú.

³² Te ñúú Jòpé ndécú ìⁿ tēé nani Xímú, àdi Pelú chi úú diu-dé, te ndécú-dé vèhe ìⁿ tēé nani tucu Xímú téé dàcutá ñúú, te càa vèhe-dé ìⁿ xio yuhu lámár, te cana-n-dé ná quíxi-dé ndatnúhu-n ndíhi-dé”, duha ní cáháⁿ espíritú xínú cuèchi núú Yá Ndióxi.

³³ Núú xiáⁿ ndíhi-ni ní cana ñaha-í xii-n. Te táxáhu xii-n sá véxi-n chi iha ndécú-ndí nchaa-ndí ndétú ñaha-ndí xii-n cündedóho-ndí tnúhu Yá Ndióxi, te cúni-ndí cachí tnúhu-n nchàa tnúhu ní cachí Yá Ndióxi cáháⁿ-n –cáchi té Corneliú xáhaⁿ-dē.

Té Pèlú ní ndatnúhu-dé ndíhi ñáyiú ní tacá vèhe té Corneliú

³⁴ Te té Pèlú xáhaⁿ-dē xii-yu:

–Vitna ní xini-í sá Yá Ndióxi cáháⁿ ndíhi-gá ñáyiú cuéi ndéda-ni càa ñúú, te ìⁿ-ni quide-gá ndíhi nchaá-yu.

³⁵ Te nchaa ñáyiú nèhe sá yíñúhu núú Yá Ndióxi, te xíquide váha-yu, te nchaá-yu cúu váha iní ñáhá-gá xii-yu. Te ñá túú quide cuèndá-gá cuéi ná ñáyiú ñúú cúu-yu.

³⁶ Te Yá Ndióxi ní tendaha-gá Xítohó Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gá xii-yu ìⁿ tnúhu váha nàcuáa cuu váha iní-yu. Te diu-ni mee Jesús cúnú-gá núú ñáyiú ni càa xico ñuyú.

³⁷ Te ñaha-ndo sá díhna-gá ndí Juáá ní cáháⁿ ndí tnúhu Yá Ndióxi núú ñáyiú, te ní dàcuándute ñaha ndí xii-yu. Te dàtnúni ní ngúíta Jesús ní cáháⁿ-gá tnúhu-gá dístrítú Galiléa, te dàtnúni ní sáháⁿ-gá níhí nacióⁿ Isràél ní cáháⁿ-gá tnúhu-gá núú ñáyiú.

³⁸ Te sa ñaha-ndo sá Yá Ndióxi ní sáñaha-gá Espiritú-gá xii Jesús téé ñúú Nazàrét ndécú ndíhi-dé chíndée ñaha-xi xii-dé. Te ñaha-ndo sá ní xica cuu Jesús ní quide tátna-gá nchaa ñáyiú yíhi ñaha espíritú cündíhi yucu ñávaha. Te ío vai-gá sá váha ní quide ñaha-gá xii-yu, te ducaⁿ ní quide-gá, chí Yá Ndióxi ní chindee ñaha-gá.

³⁹ Te mee-ndí ní xini-ndí nàcuáa ní quide Jesús ñúú Jerusalén ndíhi níhí nacióⁿ Isràél.

Te ní sata caa ñaha-güedë xii-gá núú cùrúxi te yacáⁿ ní xihí-gá.

⁴⁰ Te núú ùní nduu ní dándótó ñaha Yá Ndióxi xii-gá. Te ní cuini-gá sá cündëcu Xítohó Jesucristú titní nduu sátá ní ndoto-gá cuendá cáháⁿ ndihi ñaha-gá xii-ndí nchaa-ndí nacuáa ní xica cuu-ndí ndihi-gá.

⁴¹ Te ñá ncháá ñayiu ní xini ñahá xii-gá, chí mee-ni nchühú cue téé ní cachí-gá sá cáháⁿ ndáá-ndí sá ní ndoto-gá, chí ní xíndecu ndihi-ndí-gá, te ní xihí ní xexi-ndí ndihi-gá, núú cáháⁿ ndáá-ndí sá ní ndoto-gá.

⁴² Te ní cachí-gá sá nchühú quihíⁿ-ndí cúñaha-ndí xii ñayiu sá méé Yá Ndióxi ní táuchíúⁿ-gá sá Jesús cada ndáá-gá cuéchi nchaa ñayiu ndëcu vivú ndihi cuéchi nchaa ñayiu ní xihí. Te ducaⁿ ní xáhaⁿ Yá Ndióxi xii Jesús, te diu-ni ducaⁿ ní cachí Jesús cáháⁿ-ndí.

⁴³ Te cue téé ní cáháⁿ tnúhu Yá Ndióxi ndéé sanaha ní cáháⁿ-güedé sá quixí Jesús, te ní cachí-güedé sá ncháá ñayiu na quindáá iní ñahá xii Jesús, te cada cáhnu iní-gá nchaa cuéchi-yu —cächí té Pèlú xáhaⁿ-dë xii-yu.

Ní quexio Espiritú Yá Ndióxi ní ngündecu ndihi cue ñayiu ñá túú cùu ñayiu israhél

⁴⁴ Te mei òré cáháⁿ-dë ndédóho-yu ní quexio Espiritú Yá Ndióxi ní ngündecu ndihi nchaa ñayiu-áⁿ.

⁴⁵ Te cue téé israhél cuaháⁿ ndihi té Pèlú, cue téé ní sándáá iní tnúhu Jesús ní cuñuhu vihi-güedé sá ní quexio Espiritú Yá Ndióxi ní ngündecu ndihi-yu, chí cuendá sá ñá díú ñayiu israhél cúu-yu núu xiáⁿ ní cuñuhu-güedé.

⁴⁶ Te ní cutnùní sá ní quexio Espiritú Yá Ndióxi ní ngündecu ndihi-yu, chí ní nguíta-yu cáháⁿ-yu tnúhu sá dácàhu iní ñahá Espiritú-gá, tnúhu sá ñá túú xini-yu cáháⁿ-yu. Te ní ndacáⁿ táhú-yu núú Yá Ndióxi cuendá nchaa sá ní quide-gá.

⁴⁷ Te dätñùní ní xáhaⁿ té Pèlú:

—Vitna te cuandute ñayiu ní natuha ichi Xítohó Jesucristú chí sa ndëcu ndihi-yu Espiritú Yá Ndióxi dátñá cuini-ndó ndëcu ndihi nchoo, núu xiáⁿ vá cúú cächí dava-gá ñayiu sá vá cúú cuanduté-yu —cächí-dé xáhaⁿ-dë xii-yu.

⁴⁸ Te dätñùní ní xáhaⁿ-dë xii ñayiu:

—Vitna te cuandute-ndo, te òré-áⁿ te cacunehe-ndo Xítohó Jesucristú —cächí-dé xáhaⁿ-dë xii-yu.

Te dätñùní ní cáháⁿ ndáhú-yu núú té Pèlú cündecu ndihi ñaha-dë xii-yu ñú nduu.

11

Té Pèlú ní cani-dé cuendú núú ñayiu sándáá iní tnúhu Jesús ñúú Jerusálén

¹ Te cue téé ní táuchíúⁿ Jesús dacuàha ñaha xii ñayiu tnúhu-gá, ndihi cue ñayiu ní sándáá iní tnúhu-gá, ñayiu ndëcu distritú Jüdeá ní níhi-yu tnúhu sá ñayiu ñá túú cùu ñayiu israhél ní sándáá iní-yu tnúhu Yá Ndióxi.

² Te òré ní ndexio té Pèlú ñúú Jerusálén, te ñayiu israhél ñayiu ní cachí sá cadá ncháa nacuáa ní cáháⁿ ndíu Moisés ní satnuhu ñahá-yu xii-dé.

³ Te ní xáháⁿ-yu xii té Pèlú:

—¿Ná cuendá ní sáháⁿ-n ndéé ndiáçáⁿ ní cáháⁿ ndihi-n ñayiu-áⁿ, te ñá túú quidé-yu dátñá quidé nchòo-í? Te ní sáháⁿ-n yacáⁿ ní xexi-n ndihi-yu —cächí-yu xáháⁿ-yu xii-dé.

⁴ Te té Pèlú ní cani-dé cuendú nacuáa ní cuu núú ní sáháⁿ-dë, te xáhaⁿ-dë:

⁵ —Ní xíndecu-í ñúú Jòpé. Te òré cáháⁿ ndihi-í Yá Ndióxi, te ní dácótó ñaha-xi xii-í sá vëxi cuuⁿ ñúú dóó cáhnu àndiu, te ndütü ndi cumí xiquí-xi, te ní ngava-xi núú ndëcú-í.

⁶ Te ní xíndehé vaha-í, te ní xini-í nchaa quiti yòdo núú-xi. Te ñúú xichi yòdo quiti cúmí sáhá-xi, te ñúú xichi yòdo quiti dééⁿ, te ñúú xichi yòdo cóó, te ñúú xichi yòdo quiti ndava.

⁷ Te ní tecú dóho-í cáháⁿ ñúú sá cáháⁿ, te cächí-xi: “Pèlú, ndacuñí cahni-n ndéda-ni caa quiti-a caxi-n-dí”, cachí sá ní cáháⁿ-áⁿ.

⁸ Te ní xáhaⁿ-í: “Vá cáhni-í dí chí cächí tnúhu sá sánú ichi ñaha xii nchühú ñayiu israhél sá vá cúú caxi-ndí nchaa quiti-a”, xáhaⁿ-í.

⁹ Te ní tecú dóho-í cáháⁿ-ni tucu núú ñinu, te cächí sá cáháⁿ-áⁿ: “Vá cúú cächí-n sá vá cúú caxi-n-dí, chí mee Yá Ndióxi ní cachí-gá sá díú ncháa quiti-áⁿ cuu caxi-o”, cächí sá cáháⁿ-áⁿ.

¹⁰ Te ducaⁿ ní cáháⁿ sá ní cáháⁿ-áⁿ ùní xito, te dátñùní cuándaa dóó-áⁿ ndihi nchaa quiti-áⁿ andiu.

¹¹ Te òré-ni ní quexio ùní cue téé vehe núú ndëcú-í. Te cue téé-áⁿ ní tendaha ñaha ñúú téé ñúú Césareá nándücu ñaha-güedé xii-í.

¹² Te mee Espiritú Yá Ndióxi ní cachí-xi sá quihíⁿ-í ndihi-güedé, te ní cachí-xi sá ñá túú ñá cani iní-í. Te ñnahá ñúú cue téé ndëcu iha ní sáháⁿ ndihi ñaha-güedé xii-í, te nchaa-ndí ní sáháⁿ-ndí vehe té Còrneliú ñúú Césareá.

¹³ Te ní cani-dé cuendú nacuáa ní cuu ní sáháⁿ ñúú espíritú xínu cuéchi núú Yá Ndióxi vehe-dé, te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cue téé na quihíⁿ-güedé ñúú Jòpé quíngana-güedé ñúú téé nani Xímú, àdi Pelú chí úú diu-dé. Te candeca ñaha-güedé quixi.

¹⁴ Te téé-áⁿ cachí tnúhu-dé nása cada-n nánihí táhú-n ndihi ñadihí-n, ndihi landú-n, ndihi nchaa ñayiu xinu cuechi vehe-n”, duha ní xáhaⁿ espíritú-áⁿ xii té Còrneliú.

¹⁵ Te òré ní nguíta-í cáháⁿ ndihi-í-yu ní quexio Espiritú Yá Ndióxi ní ngündecu

ndihí-yu dàtná ní quide-xi cùtnàhá ní taxi Yá Ndiòxí Espiritú-gá ndeé díhna ní ngunde cu ndihí nchoo.

¹⁶ Te ní ndacu ini-í nàcuáa ní cáháⁿ Xitohó Jesucristú, te duha ní cachí-gá: “Té Juáa ní xó dacuandute-dé ñáiyu, dico yúhú sãñaha-í Espiritú Yá Ndiòxí cundecu ndihí-yu”, duha ní cachí-gá.

¹⁷ Te Yá Ndiòxí ní sãñaha-gã Espiritú-gá cundecu ndihí ñáiyu ñá túú cùu ñáiyu isràél dàtná ní quide-gá cùtnàhá ní sãndáa ini-ó tnúhu Jèsús, núu xiãⁿ vá càchí-í sá vã cúú cada-í ñⁿ sá cuini Yá Ndiòxí cada-í —càchí té Pèlú xáhaⁿ-dè xií-yu.

¹⁸ Te sáta dúcáⁿ ní xáhaⁿ tẽ Pèlú, te ñá túú-gã ná tnúhu ní cãháⁿ-yu, te ío ní cudíí ini-yu nchaa nàcuáa ní quide Yá Ndiòxí, te ní xitnàhá-yu:

—Tnàhá nchaa ñáiyu ñá túú cùu ñáiyu isràél nanihí tãhú-yu núu na dàñá-yu nchaa sá cuèhé sá dúhá quide-yu, chí ducaⁿ cuini Yá Ndiòxí cundecu —càchí-yu xitnàhá-yu.

Ñáiyu sãndáa ini tnúhu Jèsús ñuú Antiòquia

¹⁹ Te sáta ní sahní-güedé té Tévá, te ní cuini-güedé cada úhú-güedé nchaa ñáiyu ní sãndáa ini-xi tnúhu Jèsús, te ní xitè nuú-yu ndi tnahá ñⁿ ñⁿ ñuú. Te davá-yu cuáháⁿ-yu ndeé distritú Fènicia ndihí distritú Chìpré ndihí ñuú Antiòquia. Te ní cáháⁿ-yu tnúhu Jèsús núu mee-ni ñáiyu isràél, te ñá ní xitnùhu-yu dava-gá-yu.

²⁰ Te dava-gá ñáiyu distritú Chìpré ndihí ñáiyu ñuú Cirené ní sáháⁿ-yu ñuú Antiòquia. Te ñá díú mèe-ni ñáiyu isràél ní cãháⁿ ndihí-yu, chí tnahá ñáiyu ñá túú cùu ñáiyu isràél ní xáháⁿ-yu tnúhu Jèsús.

²¹ Te ní chindee ñaha-gá xii ñáiyu càháⁿ tnúhu-gá, te vai-gá-yu ní sãndáa ini-yu-gá chí ní tuhá-yu ichi-gá.

²² Te ñáiyu ndècu ñuú Jerusalén ñáiyu ní sãndáa ini tnúhu Jèsús ní níhí-yu tnúhu nàcuáa ní cuu, núu xiãⁿ ní tendàhá-yu té Bèe cuáháⁿ-dè ñuú Antiòquia.

²³ Te òré ní quexio té Bèe, te ní xini-dé nàcuáa ní quide ñaha-gã xií-yu sá ní nanihí tãhú-yu, núu xiãⁿ ío ní cudíí ini-dé. Te ní dácáhu ini ñáhá-dè, te ní xáhaⁿ-dè:

—Ío nducu ndèe-ndo cada-ndo nchaa sá càchí Yá Ndiòxí cada-ndo —càchí-dé xáhaⁿ-dè xií-yu.

²⁴ Te té Bèe cúú-dé ñⁿ tée váha ini-xi, te ndècu ndihí-dé Espiritú Yá Ndiòxí, te ío sãndáa ini-dé tnúhu Jèsús. Te vai vihi ñáiyu ní tuhá-yu ichi-gá.

²⁵ Te dàtnùni cuáháⁿ té Bèe ñuú Tãrsú cuánúndúcú-dé té Sàulú.

²⁶ Te òré ní nanihí ñáhá-dè, te ndèca ñaha-dé cuáháⁿ ñuú Antiòquia, te yacáⁿ ní xindecu-güedé ñⁿ cuía ndihí ñáiyu ní sãndáa ini tnúhu Jèsús, te vai-yu ní dacuáhá

ñaha-güedé tnúhu-gá. Te ñu-ni ñuú Antiòquia ní dánáni ñáhá-yu Cristiánú xii nchaa ñáiyu sãndáa ini tnúhu Jèsús.

²⁷ Te ndeé davá-áⁿ ní quee ñⁿ úú cue tée cáháⁿ tnúhu Yá Ndiòxí ñuú Jerusalén cuáháⁿ-güedé ñuú Antiòquia.

²⁸ Te ñⁿ-dè nání-dè Agabú, te ní chindee ñaha Espiritú Yá Ndiòxí xii-dé, te ní sáháⁿ-dè núu nchaa ñáiyu sãndáa ini tnúhu-gá, te ní xáhaⁿ-dè xií-yu sá quixí ñⁿ tnamá nihí ñuyú. Te ducaⁿ ní cuu sáta ní ngónutnii té Claudiú tée yindaha cuèhé nacióⁿ.

²⁹ Núu xiãⁿ nchaa ñáiyu sãndáa ini tnúhu Jèsús ñuú Antiòquia ní ndatnùhu-yu sá chindèe-yu nchaa ñáiyu sãndáa ini tnúhu-gá ndécú distritú Júdeá cuèndá vá ndóhó vihi-yu docó. Te nàcuáa ní níhí-yu, te ducaⁿ ní sacáⁿ tnáhá-yu.

³⁰ Te ní tacá díhúⁿ-ãⁿ, te nèhe té Bèe ndihí té Sàulú cuáháⁿ, cuáhá-güedé cue tée yindaha ñáiyu sãndáa ini tnúhu-gá.

12

Sáta ní xihí té Jacobó, te ní ngava té Pèlú vecaá

¹ Te ndeé davá-áⁿ ní ngüita té Hèrodés tée yindaha ñaha xii ñáiyu isràél ní quide úhú-dé ñⁿ úú ñáiyu sãndáa ini tnúhu Yá Ndiòxí.

² Te ní táuchíúⁿ-dè ní tñii-güedé té Jacobó ñaní té Juáa, te ní sahní ñaha-güedé ndihí machiti.

³ Te ío ní cudíí ini dava ñáiyu isràél cuèndá sá ní sahní ñaha-güedé xii té Jacobó, núu xiãⁿ ní tendaha tucu té Hèrodés sandadú-dé ní sáháⁿ tñii tucu-güedé té Pèlú. Te ducaⁿ ní quide-dé cùtnàhá ní xóo vico ní xexí-yu paa sá ñá túú yihi levadurá.

⁴ Te ní nanihí-güedé té Pèlú, te ní tñii ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ñⁿ sandadú cundeé-güedé té Pèlú. Te ní xáhaⁿ-dè:

—Cundeé-ndó ndi cúmí ndi cúmí-ndó tẽe-ãⁿ —càchí-dé xáhaⁿ-dè xii-güedé.

Te té Hèrodés ní sani ini-dé queñuhu-dé té Pèlú vecaá òré ná yaha vico cuèndá cahni ñaha-güedé cáháⁿ-dè ní cuu.

⁵ Te ní xihí-ni té Pèlú vecaá, te ní xindee cuaa ñaha sandadú xii-dé. Te cue ñáiyu sãndáa ini tnúhu Yá Ndiòxí ío ní xicáⁿ tãhú-yu núu-gã cuèndá sá ñá túú ná cada ñaha-güedé xii-dé.

Yá Ndiòxí ní dácacu-gá té Pèlú vecaá

⁶ ñⁿ niú-gá quihí té Pèlú vecaá ní cuu, te nduu tnèe tauchíuⁿ té Hèrodés quihíⁿ sandadú queñuhu ñaha-güedé xii-dé vecaá cuèndá quini nchaa ñáiyu nãsa cada ñaha-güedé ní cuu. Te té Pèlú cáá-dè xidí-dé xití vecaá, te ndi ndúú dúcúⁿ ndáhá-dè

ndútú càdená, te xio xio ñíñi-dé ndécú sàndadú, te dava-gá sandàdú xíndeé-güedé yèhe vecaá.

⁷ Te ní quexio ìⁿ espíritú xínú cuèchi núú Yá Ndióxi xítí vecaá núú caá tē Pèlú xidí-dé, te uuⁿ ní ní dáyèhé-xi xítí vecaá, te ní dāngúñi ñaha-xi xii-dé, te xāhaⁿ-xi xii-dé:

—Yáchi, ndácóo —cāchí-xi xāhaⁿ-xi xii-dé.

Te ní ndacóo-dé, te ncha cadèná ndútú dūcúⁿ ndáhá-dé ní nandáxi.

⁸ Te ní xāhaⁿ tūcu espíritú-án xii-dé:

—Yáchi, nucuñnu dóo-n, te ndíhu-n chàú-n —cāchí-xi xāhaⁿ-xi xii-dé.

Te ní ndíhu nuu-dé dóo-dé, te ní xāhaⁿ tūcu espíritú-án:

—Candixi dóo-n, te na quíhíⁿ-ó —cāchí-xi xāhaⁿ-xi xii-dé.

⁹ Te té Pèlú ní chinchícúⁿ-dé espíritú-án, te ñá ní cùtnuní iní-dé núu ndáá ìⁿ espíritú xínú cuèchi núú Yá Ndióxi ducaⁿ quide àdi ñáhá, te dàcoto ñaha-xi xii-dé ní saní iní-dé.

¹⁰ Te ndèndaha-ní-dé espíritú-án cuáháⁿ ní yáha-dé nācuáa xñutñí sandàdú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndédi caá nācuáa ní yáha ichi sá cuáháⁿ ndéé xítí ñuú, te ní nacaáⁿ méé yèhe-án, te ní quee-dé cuáháⁿ-dé ndíhi espíritú-án. Te ní tnahá-dé ìⁿ tnuú, te yacáⁿ ní dándóo ñaha espíritú-án xii-dé.

¹¹ Te dātñuní ní nene váha saní núú-dé, te ní cutñuní iní-dé, te ní cachí-dé:

—Ndáá sá Yá Ndióxi ní tendaha-gá espíritú-án ní quixi-xi ní dácacu ñaha-xi xii-dé cuendá sá vè cáhni ñaha té Hèrodés. Te dava ñáyiu isráel ío ní cudíí iní-yu cuendá sá ní cuiní té Hèrodés cahni ñaha-dé xii-í —duha ní cachí-dé sáta ní cutñuní iní-dé.

¹² Te sáta ní cutñuní iní-dé sá ní cácu-dé, te cuáháⁿ-dé vehe ìⁿ ñaha ñani Mariá ñāná té Juáa, àdi Mácú chí úú ñuú-dé, te xiáⁿ ndécú vai-yu cāháⁿ ndíhi-yu Yá Ndióxi.

¹³ Te té Pèlú ní quexio-dé ndéé yuyèhe ní dácásáⁿ-dé, te ní quixi ìⁿ xíchí nání Ròde ní quixi ndehe-xi ná cúú ñáyiu dācasaⁿ.

¹⁴ Te ní nucuñnu nduú-xi sá díú tē Pèlú, te ní cudíí víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ nguñaha-xi xii-yu sá nūtní té Pèlú yuyèhe ndaa quehé.

¹⁵ Te ñá ní sàndáá iní-yu tñúhu ní cāháⁿ-xi, te xāhāⁿ-yu xii-xi:

—¡Ná tñúhu víhi cāháⁿ-ón xíchí lūcú! —cāchí-yu xāhāⁿ-yu.

Te xāhaⁿ-xi sá ndàá nūtní-dé, te xāhāⁿ-yu:

—Ñá díú tē Pèlú chí espíritú sá xitó ñaha xii-dé cúú sá cāháⁿ —cāchí-yu xāhāⁿ-yu xii-xi.

¹⁶ Te òré ducaⁿ xñtñahá-yu, te té Pèlú ní dácásáⁿ tūcu-dé yuyèhe. Te ní sáháⁿ-yu ní

nacaáⁿ-yu yuyèhe, te ní xiní-yu sá díú tē Pèlú, te ní cuñúhu víhí-yu.

¹⁷ Te ní quide-dé ndaha-dé núú-yu cuendá cadí-yu yuhú-yu. Te ní nguíta-dé ní cani-dé cuendú nācuáa ní quide ñaha Yá Ndióxi xii-dé sá ní dácacu ñaha ìⁿ espíritú xínú cuèchi núú-gá xii-dé vecaá, te ní xāhaⁿ-dē xii-yu:

—Cúu-ndo té Jācobó ndíhi dava-gá ñáyiu sàndáá iní tñúhu Jèsús nācuáa ní quide ñaha Yá Ndióxi xii-í —cāchí-dé xāhaⁿ-dē xii-yu.

Te sáta dúcáⁿ ní xāhaⁿ-dē, te ní quee-dé cuáháⁿ-dé ingá xichi.

¹⁸ Te sáta ní tūndaá, te ní nguíta ncha sandàdú cāháⁿ ìⁿ cāháⁿ ìⁿ-güedé, te xñtñaha-güedé:

—Ñá túú-gá té Pèlú yíhí vècaá, ¿te nása cada-o-í? —cāchí-güedé xñtñaha-güedé.

¹⁹ Te té Hèrodés ní tendaha-dé titní sandàdú cuáháⁿ-güedé cuánundúcu ñaha-güedé, te ñá ní nāñíhí ñáhá-güedé xii-dé. Te dātñuní ní cana-dé sandàdú cue tée ní xindeé ñáhá xii té Pèlú, te ní tenáá ñáhá-dé xii-güedé, te ní xāhaⁿ-dē xii dava-gá cue sandàdú-dé:

—Cahni-ndo cue tée-án —cāchí té Hèrodés xāhaⁿ-dē.

Te dātñuní ní quee té Hèrodés distritú Júdeá cuáháⁿ-dé ñuú Cèsareá, yacáⁿ ní ngñudecu-dé.

Ní xihí té Hèrodés

²⁰ Té Hèrodés ní cudééⁿ-dē núú ñáyiu ñuú Tírú ndíhi núú ñáyiu ñuú Sidón. Te xiáⁿ ní ndatñúhu-yu ní cuu ìⁿ-nuu tñúhu-yu, te ní xicá-yu cuáháⁿ-yu cuáháⁿ ndatñúhu ndíhi ñáhá-yu xii-dé, te ní ndatñúhu ndíhi-yu té Blástú. Te tée-án cúú-dé chiⁿ quide-dé núú té Hèrodés, te ní chindee tñúhu ñaha-dé xii-yu, chí ní cāháⁿ ndáhú-yu núú té Hèrodés sá vè cáda úhú ñáhá-dé xii-yu. Te ducaⁿ ní quide-yu cuendá ñuú té Hèrodés-án quée sá xéxi-yu.

²¹ Te ní xāhaⁿ té Hèrodés ná nduu quíhíⁿ-yu ndatñúhu ndíhi ñaha-dé xii-yu, te nduu-án ní quíunuu-dé ìⁿ dóo váha, ìⁿ sá sácúñnu tée tàxi tñuní. Te ní ngóo-dé núú xilé váha, xilé sá sácóo nchíhi tée tàxi tñuní, te ní nguíta-dé ní cāháⁿ sáhú-dé dóho-yu.

²² Te uuⁿ ní ní cuáá-yu té cāchí-yu:

—¡Tée-a cāháⁿ-dē dico ñá díú tē ñuyiú-a cúu-dé chí ndiósí cúú-dé! —cāchí-yu xñtñahá-yu.

²³ Te ñuú-ni òré-án ní yáha ìⁿ espíritú xínú cuèchi núú Yá Ndióxi, te ní sáñaha-xi cuèhé xii té Hèrodés. Te ducaⁿ ní tnahá-dé chí mee-dé ñá ní xāhaⁿ-dē sá ñáyiu cúu-dé, te ní cāhāⁿ-yu sá ndiósí cúú-dé. Te nchito-gá-dé ní sanú ñáhá tñdácú xii-dé, te dātñuní ní xihí-dé.

²⁴ Te ío títí xichi ní sáháⁿ ñáiyu sándáá ínì tñúhu Yá Ndiòxí ní cáháⁿ-yu tñúhu-gá, te ío chítú-yu ní sándáá ínì-yu tñúhu-gá.

²⁵ Te té Bèè ndihi té Sàulú ní ndihi chiúⁿ-güedé, te ní ndee-güedé ñúu Jerusálén cuáháⁿ-güedé ndihi té Juáá, àdi Mácú chi úú ñúu-dé.

13

Té Bèè ndihi té Sàulú cuáháⁿ-güedé dácuaⁿ-güedé ñáiyu tñúhu Yá Ndiòxí nchaa ñúu xíca

¹ Te ñúu Antiòquia ndécú ñⁿ úú cue téé cáháⁿ tñúhu Yá Ndiòxí núú ncháa ñáiyu ní sándáá ínì-xi tñúhu-gá. Te ndècu tucu ñⁿ úú cue téé cùu mestrú dácuaⁿ ñaha-güedé xíi-yu tñúhu-gá. ñⁿ-dé nání-dé Bèè, te ñⁿ-dé nání-dé Xímú, te té Xímú-áⁿ xáhaⁿ-güedé Nègrú chi tnuu-dé. Te ingá-dé nání-dé Lùciú, te té-áⁿ cùú-dé téé ñúu Cirené. Te ingá-dé nání-dé Sàulú, te ingá tucu-dé nání-dé Manàén. Te té Manàén-áⁿ ndihi té Hèrodés téé cùu gobiernú Galilea ío váha ní xóo cáháⁿ ndihi tñaha-güedé cùtnháá ní cuu líhli-güedé.

² Te ñⁿ nduu ñá túú ná ní xèxi ñáiyu ní sándáá ínì tñúhu Yá Ndiòxí cuèndá mee-ni-gá ní cáháⁿ ndihí-yu, te ní xáhaⁿ Espiritú Yá Ndiòxí xíi-yu:

—Tendaha-ndo té Bèè ndihi té Sàulú quihíⁿ-güedé dava-gá ñúu cada-güedé chiúⁿ tahu-í, chi ducaⁿ cuiní-í cunduu —càchí Espiritú-gá xáhaⁿ-xi xíi-yu.

³ Te ní cáháⁿ ndihi tucú-yu Yá Ndiòxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí té Bèè ndihi té Sàulú. Te sátá dúcáⁿ ní quide-güedé, te ní quide ndee ínì ñáhá-yu xii-güedé.

Té Bèè ndihi té Sàulú cuáháⁿ-güedé distritú Chìpré cáháⁿ-güedé tñúhu Yá Ndiòxí

⁴ Te té Bèè ndihi té Sàulú ní quee-güedé cuáháⁿ-güedé cuèndá ducaⁿ cuiní Espiritú Yá Ndiòxí cunduu sá cáca cùu-güedé dava-gá ñúu, te ní quexio-güedé ñúu Selèuciá, te yàcáⁿ ní quee-güedé bàrcú cuáháⁿ-güedé distritú Chìpré. Te ñúu-áⁿ cáá xítí lámár chi ndècu ñúhu yichí xítí ndute.

⁵ Te ní quexio-güedé mei ñúu Salaminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáiyu israhél cáháⁿ-güedé tñúhu Yá Ndiòxí. Te cuáháⁿ ndihi-güedé té Juáá cuèndá chindee ñaha-dé xii-güedé.

⁶ Te ní tñi-güedé ichi cuáháⁿ-güedé ñúu Páfós cáá ndaa ingá xio Chìpré, te yàcáⁿ ní naníhí tñahá-güedé ndihi ñⁿ téé israhél nání-dé Barjèsús, te té-áⁿ xini-dé cada ndúu-dé, te càchí-dé sá cáháⁿ-dé tñúhu Yá Ndiòxí dico ñá ndàá.

⁷ Te té-áⁿ quidé chiúⁿ-dé ndihi té Sèrgiú, àdi Páblú chi úú ñúu-dé, te cùu-dé gobiernú

Chìpré, te ío túha-dé. Te ní cana-dé té Bèè ndihi té Sàulú, chi cuiní-dé cundedóho-dé tñúhu Yá Ndiòxí.

⁸ Te téé quide nduu-áⁿ ñá ní dàña-dé cáháⁿ-güedé tñúhu-gá, chi ñá ní cuiní-dé sá téé cùu gobiernú-áⁿ tuha-dé ichi Yá Ndiòxí. Te ducaⁿ ní quide té Barjèsús, téé xáhaⁿ-güedé Èlimás.

⁹ Te tñahá tucu té Sàulú ndécú úú ñúu-dé chi xáhaⁿ tucu-güedé Páblú, te ndècu ndihi-dé Espiritú Yá Ndiòxí. Te ní xindéhe ñí ñáhá-dé xii téé quide nduu-áⁿ.

¹⁰ Te ní xáhaⁿ-dé:

—Yòhó, chi dàtná quidé yùcu ñáváha quide-n chi mee-ni dàndahú-n ñáiyu. Yòhó cùú-n déhe sácúhná, chí nchaa tñúhu váha cuiní Yá Ndiòxí cáháⁿ-yu, te yòhó ñá dáñá-n.

¹¹ Te vitna quini-n nàcuáa cunduu, chí taxi Yá Ndiòxí ñⁿ castiú xii-n chí vá cùtnúni-gá núu-n cáca cuu-n ñⁿ úú nduu —càchí-dé xáhaⁿ-dé xii téé quide nduu-áⁿ.

Te òré ducaⁿ ní xáhaⁿ té Páblú xii-dé, te òré-ni ní cuaa-dé, te ñá túú ní cùtnúni tñahí-gá núu-dé, te ní xóo nducu-ná-dé ñáiyu ní xóo cuita nehe ñaha xii-dé.

¹² Te téé cùu gobiernú ní xini-dé nàcuáa ní quide té Páblú, te ío ní cuñúhu-dé. Te ní tñahá ínì-dé tñúhu Jèsús, núu xíáⁿ ní sándáá ínì-dé.

Té Páblú ndihi té Bèè ndécú-güedé ñúu Antiòquia Písidiá

¹³ Te té Páblú ndihi dava-gá cue téé xíca cuu ndihi-dé ní quee-güedé bàrcú, te ní quee-güedé ñúu Páfós cuáháⁿ-güedé ñúu Pèrgé, te ñúu-áⁿ yindèhu-xi distritú Pánfilia. Te té Juáá ní nacuico-dé ní dàndóo ñaha-dé xii-güedé cuánuhú-dé ñúu Jerusálén.

¹⁴ Te dava-gá-güedé ní quee-güedé ñúu Pèrgé cuáháⁿ-güedé ñúu Antiòquia, te Písidiá yindàha-xi ñúu-áⁿ. Te nduu xindetatú-yu, te ní sáháⁿ-güedé veñúhu ñáiyu israhél, te ní ngóo-güedé xítí veñúhu.

¹⁵ Te cue téé ndècu veñúhu ní queheⁿ-güedé tutú yódó tñúni nchaa tñúhu sá ní chídó tñúni ndí Moisés ndihi tutú yódó tñúni nchaa tñúhu sá ní chídó tñúni dava-gá cue téé ní xóo cáháⁿ tñúhu Yá Ndiòxí ndéé sanaha, te ní dácuaⁿ-güedé ní xindedóho cue ñáiyu, te dàtnúni cue téé yindaha veñúhu-áⁿ ní xáhaⁿ-güedé xii té Páblú ndihi dava-gá-güedé:

—Nchóhó cue téé cùu ñaní tñahá-ndí, te núu cuiní-ndó cáháⁿ-ndó tñúhu Yá Ndiòxí, te cuu cáháⁿ-ndó tñáví cuèndá cutúha-yu —càchí-güedé xáhaⁿ-güedé.

¹⁶ Te té Páblú ní ndacuñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tñúhu cáháⁿ-dé, te ní xáhaⁿ-dé:

—Te nchòhò ñáiyu quide nchaa nacúaa càháⁿ Yá Ndiòxí ndihí nchaa nchòhò ñáiyu isràèl, cundedóho-ndo nchaa-ndo #ⁿ tnúhu na càháⁿ-í-a.

¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáiyu isràèl, te ní nacáxi ñaha-gá xii-yu te ní chindee ñaha-gá cuendá cáyá-yu, chi cuini-gá sá cúu vai-yu, te ducaⁿ ní quide-gá cutnàhá ní xindecú-yu nàcióⁿ Ègíptú. Te dàtnùní ní dácácu ñaha-gá xii-yu ñuú-áⁿ, chi mee-gá nchaa ndàcu-gá quidé-gá.

¹⁸ Te ní xindecú-yu #ⁿ xichi núu ñá túú tnàhí sàcúndecu ñáiyu údico cuía, te xití údico cuía-áⁿ ní cundee ini-gá nchaa sá ní quidé-yu.

¹⁹ Te Yá Ndiòxí ní chindee ñaha-gá xii ñáiyu isràèl, te ní dánáá-yu úsá nàcióⁿ, chi cuendá ní cuini-gá cuu cuendá-yu ñuhú-áⁿ.

²⁰ Te dàtnùní ní cachí Yá Ndiòxí sá díú-ní cuè téé cùchiuⁿ taxi tnuni-güedé nchaa ñáiyu, te ducaⁿ ní quide-güedé dàtná cúmí cièndú dava cuía. Te sáta xiáⁿ, te ní xindecu té Sàmuelé téé ní càháⁿ tnúhu Yá Ndiòxí.

²¹ Te dàv-áⁿ ní cuini ñáiyu isràèl sá cundècu #ⁿ téé quindaha ñaha-dé xii-yu, te Yá Ndiòxí ní cachí-gá sá té Sàul quindaha-dé-yu, te téé-áⁿ ní cuu-dé déhe té Cis, te té Benjamín téé ní xindecu ndéé sanaha-gá ní cuu ñani tnàhá-dé. Te té Sàul ní xindaha-dé ñáiyu údico cuía.

²² Te Yá Ndiòxí ñá ní cuini-gá cundecu-ni-dé quindaha-dé ñáiyu, chi ní cuini-gá sá té Dàvií ndíhu ndaha-dé cue ñáiyu isràèl, te ní cachí-gá: “Ío vaha ní tnahá ini-í nàcuáa quide té Dàvií déhe té Isàí, te cada-dé nchaa nàcuáa cùñaha-í xii-dé”, duha ní cachí Yá Ndiòxí —cachí té Pàblú xáhaⁿ-dé xii-yu.

²³ Te ní xáhaⁿ tucu té Pàblú:

—Diu-ni ñani tnàhá té Dàvií cúu Jèsús. Te Yá Ndiòxí ní tendaha-gá Jèsús ní quixi-gá ñuyú-a cuendá nchaa ñáiyu isràèl ná quindáa ini ñáhá xii Jèsús naníhí tãhú-yu, chi ducaⁿ ní cachí Yá Ndiòxí cunduu.

²⁴ Te cutnàhá vátá ngüita-gá Jèsús càháⁿ-gá tnúhu Yá Ndiòxí, te ní càháⁿ té Juáá núu ñáiyu isràèl sá xini ñuhu-xi dañá-yu nchaa sá cuèhé sá dúhá, te cuanduté-yu.

²⁵ Te sa ta cüyatni-ni-gá cuú-dé, te ní xáhaⁿ-dé xii-yu: “Nchòhò cachí-ndó sá yúhú cúu-í Cristú Yáá ndétú-ndó dico ñáhá, chi ñá díú yúhú cúu-í Cristú, chi davitna quixi Cristú Yáá tendaha Yá Ndiòxí quixi ñuyú-a. Te yúhú cúu-í #ⁿ téé duuⁿ duuⁿ ñá túú tãu nandaxi cuèdicó chàú-gá dico quide-í chiuⁿ-gá”, duha ní càháⁿ té Juáá —cachí té Pàblú xáhaⁿ-dé xii-yu.

²⁶ Te ní xáhaⁿ tucu té Pàblú:

—Cundedóho tucu-ndo ñngá tnúhu na càháⁿ-í. Nchòhò tnàhá-ndó cùu-ndo ñani

tnàhá ndíi Àbráhám, te xini-ndó sá Yá Ndiòxí cùnùu-gá. Te diu-ni-gá cuini-gá sá nchaa-ndó cundedóho-ndo tnúhu-gá, chi cùu-xi tnúhu sá càháⁿ nàcuáa naníhí tãhú-ndó.

²⁷ Te nchaa ñáiyu ndècu ñuú Jerusálén ndihí nchaa cue téé cùnùu ñá ní cùtnuni ini-yu ndihí-güedé sá Yá Ndiòxí ní tendaha-gá Jèsús ní quixi-gá ñuyú-a. Te ñá ní sáha-yu cuendá sá díú Jèsús ní cacunehe cue téé ní càháⁿ tnúhu Yá Ndiòxí ndéé sanaha cuèi ní dácúahá-yu tnúhu-gá veñuhu-yu ndi tnahá úná nduu, nduu ndetátú-yu. Te ní cachí-yu sá ndècuéchi Jèsús, te ní xáháⁿ-yu sá càhni ñaha-güedé xii-gá. Te xiáⁿ sa ñaha cue téé ní xóo càháⁿ tnúhu-gá ndéé sanaha sá dúcáⁿ càháⁿ-yu.

²⁸ Te cuèi ñá túú ná ní quide-gá te ní xáháⁿ-yu xii té Pilatú téé cùu gobiernú sá táuchiuⁿ-dé càhni ñaha-güedé xii-gá.

²⁹ Te xiáⁿ núu ní sata caa ñaha-güedé xii-gá núu cùrúxi. Te ní quide-güedé nchaa nàcuáa ní chidó tnùni cue téé ní càháⁿ tnúhu Yá Ndiòxí ndéé sanaha. Te sáta ní xihí-gá, te ní nunehe ñaha-güedé xii-gá núu cùrúxi, te nchidó ñaha-güedé cuaháⁿ, te ní chihí ñaha-güedé #ⁿ xití yaú.

³⁰ Te Yá Ndiòxí ní dándótó-gá Jèsús.

³¹ Te titní xito ní sáháⁿ Jèsús núu ndécú ñáiyu ní xica cuu ndihí-gá, ñáiyu ní quee distritú Galilea ní sáháⁿ-yu ndihí-gá ñuú Jerusálén. Te vitna nchaa ñáiyu-áⁿ xáháⁿ-yu xii dava-gá ñáiyu isràèl nàcuáa ní cuu ní ndoto-gá.

³² Te nchúhú càháⁿ-ndí nàcuáa cada-ndo naníhí tãhú-ndó, chi Yá Ndiòxí ní xáhaⁿ-gá xii cue ñani tnàhá-ó ní xindecu ndéé sanaha sá tendaha-gá Déhe-gá Jèsús quixi-gá ñuyú-a.

³³ Te ní quixi-gá ní xihí-gá, te ní dándótó ñaha Yá Ndiòxí xii-gá, te núu xiáⁿ naníhí tãhú-ó núu na quindáa ini-ó-gá. Te #ⁿ téé ní càháⁿ tnúhu Yá Ndiòxí ndéé sanaha ní chidó tnùni-dé núu sàlmú cúu úú nàcuáa ní càháⁿ Yá Ndiòxí ní xáhaⁿ-gá xii Déhe-gá, te duha ní xáhaⁿ-gá: “Yòhó cúu-n Déhe-í, te vitna cutnùni ini ñáiyu sá yúhú cúu-í Tãtá-n”, duha ní xáhaⁿ-gá xii Jèsús. Te diu-ni ducaⁿ ní chidó tnùni téé ní càháⁿ tnúhu-gá ndéé sanaha.

³⁴ Te ñngá xichi tucu núu tütú-gá ní chidó tnùni #ⁿ téé ní xindecu ndéé sanaha nàcuáa ní xáhaⁿ-gá xii Déhe-gá, te duha ní xáhaⁿ-gá: “Mee-ni sá vaha cada ñaha-í dàtná ní xii-í té Dàvií”, duha ní xáhaⁿ-gá. Te ducaⁿ ní chidó tnùni téé ní xindecu ndéé sanaha nàcuáa ní càháⁿ Yá Ndiòxí, chi òré ní xihí Jèsús te ní dándótó ñaha-gá cuendá sá vã tíú yiqui cuñú-gá.

³⁵ Te núu xiáⁿ duha ní chidó tnùni #ⁿ téé ní xindecu ndéé sanaha núu libré Sàlmú nàcuáa

ní xáhaⁿ-dê xii-gá: “Vá dáñá-n sã túú yiqui cuñú Déhe-n chi ío váha quide-gá”, duha ní chídó tnúni téé ní xíndecu ndéé sanaha — cächí té Páblú xáhaⁿ-dê xii-yu.

³⁶ Te xáhaⁿ tucu-dé:

—Te té Dávií ní quide-dé nchaa chiúⁿ ní tãhú Yá Ndióxi cada-dé, te dátñúni ní xihí-dé. Te ní chindúxi ñaha-güedê xii-dé yatni nácuáa yindúxi cue ñani tnáhá-dê ndéé sanaha-gã, te xíáⁿ ní téhyú yiqui cuñú-dé.

³⁷ Te Jesús chi ñá ní téhyú yiqui cuñú-gá, chi ní dándótó ñaha Yá Ndióxi xii-gá.

³⁸ Te cuini-í cächí tnúhu-í xii-ndo cuendá cutñúni iní-ndó ncháa-ndo sá cáda càhnu iní Yá Ndióxi nchaa cuèchi-o, chi ní xihí Jesús cuendá naníhí tãhú-ó.

³⁹ Te nchaa ñáyiú na quindáá iní ñháá xii Jesús te cada càhnu iní-gá nchaa sá ñá túú váha ní quide-yu, chi núu mee-ni tnúhu ní chídó tnúni ndíi Moisés ná quindáá iní-yu te vá naníhí tãhú-yu.

⁴⁰⁻⁴¹ Te ío coto-ndo mée-ndo cuendá sá vá yãha-ndo dátñá ní cächí Yá Ndióxi yáha cue ñáyiú ñá túú ní quide váha ní xíndecu ndéé sanaha. Te nácuáa ní cáháⁿ-gá ní chídó tnúni íiⁿ téé ní cáháⁿ tnúhu-gá ndéé sanaha, te duha ní xáhaⁿ-gã xii-yu dáva-áⁿ:

Cundedóho nchaa nchóhó ñáyiú cuèhé yuhu-xi na càháⁿ-í íiⁿ tnúhu te quini-ndó ná cuñúhu-ndo,

yúhú quidê-í vai núú sã ío váha vitna ndêcu-ndo ñuyú-a,

te cuèi na còo ñáyiú cächí tnúhu xii-ndo nácuáa ndúu nchaa sá váha-áⁿ, dico nchóhó vá quindáá iní-ndó,

te sá dúcáⁿ cáda-ndo vá quindáá iní-ndó, te dácuíta ñihnu-ndo mée-ndo.

Duha ní xáhaⁿ-gã xii-yu te ducaⁿ ní chídó tnúni téé ní cáháⁿ tnúhu-gá ndéé sanaha — cächí té Páblú xáhaⁿ-dê xii-yu.

⁴² Te òré ní ndee té Páblú veñúhu ñáyiú isráel ndihi cue téé xica cuu ndihi-dé, te ní cáháⁿ ndáhú ñáyiú yíhi veñúhu núú-dê sá quíhíⁿ-dé núú ùná nduu, te ñu-ni tnúhu ní cáháⁿ-dê cáháⁿ tucu-dé òré quexio-dé.

⁴³ Te sátá ní túhú veñúhu-yu, te vai ñáyiú isráel ndihi ñáyiú ní chitnahá ñháá xii-yu nchicúⁿ ñihnu quide nacuaá quide-yu cáháⁿ ndihí-yu Yá Ndióxi cuáháⁿ ndihí-yu té Páblú ndihi té Bèé. Te ní xáhaⁿ-güedê xii-yu sá vá dáñá ndéé-yu canchicúⁿ ñihnú-yu tnúhu sá cáháⁿ nácuáa quide Yá Ndióxi sá cúú-xi-yu.

⁴⁴ Te núú ùná nduu, nduu ndetatú-yu ní quexio vai víhi ñáyiú, chi ñihí ñuú ní quexio ndedóho-yu tnúhu Yá Ndióxi.

⁴⁵ Te cuendá sá ío vai ñáyiú ní quexio, núú xiãⁿ ní cuu cuédú iní ñháá ñáyiú isráel xii té Páblú, te ní xicuèhé ñháá-yu xii-dé. Te ní xáhãⁿ-yu xii-dé sá dándahú ñháá-dê xii-yu ndihi tnúhu cáháⁿ-dé.

⁴⁶ Te té Páblú ndihi té Bèé ñá túú ní yùhú ñáhá-güedê xii-yu. Te ní xáhaⁿ-güedê:

—Xini ñihu-xi díhna-gá nchóhó ñáyiú isráel cáháⁿ ndihi-ndí tnúhu Yá Ndióxi, te mee-ndo ñá cuini-ndó cundedóho-ndo. Te sá dúcáⁿ quide-ndo, te vá naníhí tãhú-ndó, te ni vá cáháⁿ-gá-ndí tnúhu Yá Ndióxi núú-ndó, dico cáháⁿ-ndí núú dáva-gá ñáyiú cuèi ñá díú ñáyiú isráel cúú-yu,

⁴⁷ chi ducaⁿ ní táuchíúⁿ Yá Ndióxi cada-ndí. Te ní cächí-gá:

Cuini-í cundecu-ndo dátñá íiⁿ téé yòtnuú ñuhú cundecu-ndo

cáháⁿ-ndó tnúhu-í núú ncháa ñáyiú ñá túú cundihi-ndo ñáyiú ndêcu ñihí ñuyú,

te naníhí tãhú-yu, duha ní cáháⁿ-gá — cächí té Páblú ndihi té Bèé xáhaⁿ-güedê xii-yu.

⁴⁸ Te ñáyiú ñá túú cùu ñáyiú isráel ío ní cudíí iní-yu sá dúcáⁿ ní cáháⁿ-güedê, te ní xitnãhá-yu sá ío váha cuáháⁿ tnúhu Yá Ndióxi. Te mee Yá Ndióxi sa náha-gá nándi cùu ñáyiú naníhí tãhú, te ñu-ni ñáyiú-áⁿ ní sándáá iní-yu.

⁴⁹ Te nchaa xichi xíáⁿ ní sáháⁿ-yu ní cáháⁿ-yu tnúhu-gá.

⁵⁰ Te cue téé isráel ní ndatnúhu-güedê ndihi cue téé cùnuu, ndihi cue ñáyiú díhí cùnuu, te ñáyiú díhí-áⁿ ñá túú tnáhi cùmání-yu veñúhu. Te ní xáhaⁿ-güedê sá cáda ùhú-yu té Páblú ndihi té Bèé, te dátñúni cuícuⁿ ñáhã-yu xii-güedê, te ducaⁿ ní quide-yu.

⁵¹ Te ní casaⁿ ñuhu té Páblú ndihi té Bèé sáhá-güedê ní naquidi-güedê tícá chúhmá ní tníi sáhá-güedê. Te ducaⁿ ní quide-güedê cuendá cutñúni iní-yu sá ñá túú ní quide váha-yu. Te dátñúni ní quee-güedê cuáháⁿ-güedê ñuú Ìconiú.

⁵² Te ñáyiú ní sándáá iní-xi tnúhu Jesús ío váha ní cuu iní-yu cuendá sá ní naníhí tãhú-yu, te ncháa-yu sa ndêcu ndihí-yu Espiritú Yá Ndióxi.

14

Té Páblú ndihi té Bèé ndécú-güedê ñuú Ìconiú

¹ Te ní quexio té Páblú ndihi té Bèé ñuú Ìconiú. Te ní sáháⁿ-güedê veñúhu ñáyiú isráel, te ío váha ní cáháⁿ-güedê tnúhu Yá Ndióxi, te vai ñáyiú isráel ndihi ñáyiú ñá túú cùu ñáyiú isráel ní sándáá iní-yu tnúhu-gá.

² Te dava ñáyiú isráel ñá ní sándáá iní-yu, te ní cáháⁿ cuèhé-yu cuendá té Páblú ndihi té Bèé cuendá sá vá quindáá iní ñáyiú ñá túú cùu ñáyiú isráel.

³ Te ní xíndecu-güedê titní nduu, te ñá túú tnáhi ni yùhú-güedê ní dácuáhá-güedê ñáyiú tnúhu Yá Ndióxi. Te mee-gá ní chindee

ñaha-gá ní quide-güedé titní núú sá vâ yôo tñahí ndâcu cada, te ío ní cuñúhu-yu. Te ducaⁿ ní quide-gá cuëndá cutnùní iní-yu sá ndâá cãháⁿ-güedé sá mée-gá ío cùu iní ñáhã-gã xíí-yu, te naníhí tãhú-yu núu na quindáá iní-yu tñúhu-gã.

⁴ Te ní quee dava ñáiyu ñúú Ìconiú, davá-yu cündihí-yu ñáiyu israhél ñáiyu ñá túú sãndáá iní tñúhu Jësús. Te davá-yu cündihí-yu cue tée ní táuchíúⁿ Jësús cãháⁿ tñúhu-gã.

⁵ Te ñáiyu israhél ndihí dava-gã ñáiyu ñá túú sãndáá iní-xi ní cuu ñⁿñúú-yu ndihí cue tée cùnuu sá cãní-yu-güedé, te cuãha yúú ñáhã-yu xii-güedé.

⁶ Te té Pãblú ndihí té Bèé ní níhí-güedé tñúhu sá cuíní-yu canihá-yu, núu xiãⁿ dayuhu ní quee-güedé cuáhãⁿ-güedé ñúú Lìstrá ndihí ñúú Dèrbé. Te ndi ndúú ñúú-áⁿ yindèhu-xi Licaoniá. Te ní sãháⁿ-güedé dava-gã ñúú líhli càa yatni xiãⁿ.

⁷ Te nchaa ñúú-áⁿ ní cãháⁿ-güedé tñúhu Jësús.

Ñúú Lìstrá ní sãhayúú ñáhã-yu xii té Pãblú

⁸ Te ñúú Lìstrá ndécú ñⁿ tée yacua, mee-ni núcóo-dé chi ducaⁿ tñahí càa-dé ní cacu-dé.

⁹ Te ndédóho-dé tñúhu cãháⁿ té Pãblú, te ní cutnùní iní té Pãblú sá ío sãndáá iní tée yacua-ãⁿ sá Yã Ndióxi cada tátna ñaha-gã xii-dé, núu xiãⁿ ní xindéhé ñaha váha té Pãblú xii-dé.

¹⁰ Te té Pãblú ní cãháⁿ níhí-dé, te ní xãháⁿ-dè:

—Ndacuíñí cunutñí váha-n —cãchí-dé xãháⁿ-dè.

Te ní ndacuíñí cunu-dé te ní xica-ni-dé.

¹¹ Te òré ní xiní-yu sá té Pãblú ní quide tátna-dé tée yacua-ãⁿ, te nchaa-yu ní cãháⁿ-yu tñúhu mée-yu tñúhu Licãoniá. Te ní cãháⁿ níhí-yu, te xitnãhá-yu:

—Cue tée-ãⁿ sãnuu sá ñáiyu cùu-güedé dico ñáhã, chi ndiöxi cúu-güedé te ní quexio-güedé ñuyíú-a —cãchí-yu xitnãhá-yu.

¹² Te ní cãchí-yu sá té Bèé cúu-dé ndiöxi dánani-yu Jüpitér, te té Pãblú cúu-dé ndiöxi dánani-yu Mèrcuriú, chi cuëndá tée-ãⁿ cúu-dé tée cãháⁿ.

¹³ Te càa ñⁿ veñúhu yuhu ñúú-áⁿ núu quidé cãhnú-yu ndiöxi sá dánani-yu Jüpitér. Te dútú yíndãha veñúhu-ãⁿ ndécã-dé ñⁿ úú ndicutu cuáhãⁿ quehé veñúhu, te ñúhu itã dúcúⁿ-güedi. Te cue quiti-ãⁿ cahní-dé cada cãhnu-dé ndihí-yu té Bèé ndihí té Pãblú ní cùu, chi ducaⁿ quidé-yu quide cahnú-yu ndiöxi-yu.

¹⁴ Te té Bèé ndihí té Pãblú ní níhí-güedé tñúhu ñacuãa sãni iní-yu cadã-yu, te ní ndátã-güedé dóo-güedé cuëndá cutnùní iní-yu sá ñã tñahã iní-güedé ñacuãa sãni iní-yu cadã-yu. Te xinu-güedé

cuãnguihu-güedé tñuu-yu, te níhí ní cãháⁿ-güedé, te xãháⁿ-güedé:

¹⁵ —Ñã cuëndá ducaⁿ cuíní-ndó càda-ndo?

Te diu-ni tñaha ñáiyu-ndo cùu-ndí, dicó-ni tñúhu Yã Ndióxi véxi-ndí dacuãha ñaha-ndí xii-ndo cuëndá sá vã cadã-gã-ndó ñacuãa quide-ndo, te quindáá iní-ndó Yã Ndióxi, chi ñⁿdií-ni Yã Ndióxi ndécú. Te diu-gã ní cadúha-gã andiú ndihí ñuyíú-a ndihí lámár ndihí nchaandi túhú sá ío ñuyíú-a.

¹⁶ Te ndéé sanaha ní dáñã Yã Ndióxi ní quidé-yu ñacuãa cuáhãⁿ iní mée-yu.

¹⁷ Te ní xóo cada-gã sá váha cuëndá cutnùní iní-yu sá ío váha iní-gã. Te diu-gã dácúuⁿ-gã dáú, te tàxi-gã sá nchító-ó chi xito-gã nchaa tatã xitú-ó, te xiãⁿ cudíí ñni-ó ndécú-o ñuyíú-a —cãchí té Pãblú ndihí té Bèé xãháⁿ-güedé xii-yu.

¹⁸ Te cuéi ducaⁿ ní xãháⁿ-güedé nchaa tñúhu-ãⁿ, dico ío úhú ní sãndáá iní-yu ñã ní sãhní-yu ndicutu-ãⁿ chi cuëndá ducaⁿ tñahí quidé-yu sãhní-yu ndicutu òré quidé cãhnú-yu ndiöxi-yu.

¹⁹ Te ñúú Antiòquia ndihí ñúú Ìconiú xíndecu dava ñáiyu israhél, te ní queé-yu cuáhãⁿ-yu ñúú Lìstrá núu ndécú té Pãblú. Te xiãⁿ ní quexió-yu te ní xãháⁿ-yu xii ñáiyu dií ñúú xiãⁿ sã cãhní-yu té Pãblú. Te ní sãha yúú ñáhã-yu xii-dé, te ní cãháⁿ-yu sá ní xihí-dé, te ní tñi ñaha-güedé xii-dé, te tãñuhu ñaha-güedé xii-dé cuáhãⁿ ñⁿ xio yuhu ñúú ní sá dáquéné ñaha-güedé.

²⁰ Te ní quexio cue ñáiyu sãndáá iní tñúhu Jësús núu càtúu-dé-ãⁿ, te ní nadúcúⁿ ndéé ñáhã-yu xii-dé, te níni xínutñí-yu-ãⁿ ní ndacóo-dé cuãnuhú ndihí ñaha tucu-dé xii-yu xití ñúú. Te nduu tñéé-ãⁿ ní ndee-dé ndihí té Bèé cuáhãⁿ-güedé ñúú Dèrbé.

²¹ Te ní cãháⁿ-güedé tñúhu Yã Ndióxi ñúú-ãⁿ, te ío vãi ñáiyu ní sãndáá iní-yu tñúhu-gã. Te dãtnùní ní quee-güedé cuáhãⁿ tucu-güedé ñúú Lìstrá, ndihí ñúú Ìconiú, ndihí ñúú Antiòquia.

²² Te ní xãháⁿ-güedé xii-yu sá vã dáñã ñhntú-yu tñúhu Jësús. Te sã dúcãⁿ ní cãháⁿ-güedé, te vñhi-gã ní cudíí iní-yu cadã-yu ñacuãa cuíní Yã Ndióxi cadã-yu, te ní xãháⁿ-güedé:

—Dacuití cündecu-o ñuyíú-a ndoho-o, te dãtnùní ducaⁿ te nacuaca ñaha Yã Ndióxi xii-o —cãchí-güedé xãháⁿ-güedé xii-yu.

²³ Te ní sãháⁿ-güedé ndi tñahã ñⁿ ñⁿ xichi núu ndécú ñáiyu dãcuaha tñúhu Yã Ndióxi, te ní taxi ndecu-güedé cue tée quindãha ñaha xii-yu, te ní cãháⁿ ndihí-güedé Yã Ndióxi, te ñã túú tñahí ná ní xèxi-güedé cuëndá sá ní cãháⁿ ndihí-güedé-gã. Te ní xãháⁿ-güedé sá Yã Ndióxi coto ñaha-gã xii-yu chi diu-ni-gã ní sãndáá iní-yu.

Té Páblú ndihi té Bèé cuáháⁿ tucu-güedé ñuú Antiòquia Siríá

²⁴⁻²⁵ Te dātnūnī ní quee té Páblú ndihi té Bèé cuáháⁿ-güedé, ní yáha-güedé distritú Pisidiá. Te ní quexio-güedé ñuú Pèrgé, xiáⁿ ní cáháⁿ-güedé tnúhu Jèsús. Te ñuú-áⁿ yíndèhu-xi Panfilíá. Te dātnūnī cuáháⁿ-güedé ñuú Àtaliá.

²⁶ Te yacáⁿ ní quee-güedé bàrcú cuánuhú tucu-güedé ñuú Antiòquia. Te ñuú-áⁿ cúú-xí ñuú núú ní xicáⁿ táhú-yu núú Yá Ndióxi cuèndá sá chíndèe ñaha-gá xii-güedé chiúⁿ quide-güedé. Te cuèndá sá ní ndihi chiúⁿ-güedé nchaá ñuú núú ní sáháⁿ-güedé, núu xiáⁿ cuánuhú-na-güedé.

²⁷ Te ní ndexio-güedé ñuú-áⁿ, te ní cana-güedé nchaá ñáyiu sàndáá iní tnúhu-gá, te ní cani-güedé cuèndú núu-yu nchaá nacuáa ní cuu núú ní sáháⁿ-güedé, te xáhaⁿ-güedé: “Yá Ndióxi ío ní chindee ñaha-gá xii-ndí ní cáháⁿ-ndí tnúhu-gá núú ní sáháⁿ-ndí, te mee-gá ní quide sá tnàhá ñáyiu ñá túú cùu ñáyiu isràél ní xíndedóho-yu tnúhu-gá cuèndá quíndáá iní-yu”, cachi-güedé xáhaⁿ-güedé xií-yu.

²⁸ Te vai nduu ní xíndecu-güedé ñuú Antiòquia ndihi nchaá ñáyiu ní sàndáá iní tnúhu Jèsús.

15

Ní natacá ñáyiu sàndáá iní tnúhu Jèsús ñuú Jerusàlén

¹ Te ní quee ñuú úú cue tée distritú Júdeá cuáháⁿ-güedé ñuú Antiòquia, te ní sáá-güedé, te ní xáhaⁿ-güedé xii ñáyiu sàndáá iní tnúhu Jèsús sá núu vá cuáha-güedé seña ñii nchaá cue tée dàtná ní cachi ndíi Moisés, te vá náníhí tàhú-güedé.

² Te sá dúcáⁿ ní cáháⁿ cue té-áⁿ, te ní nguíta té Páblú ndihi té Bèé ní tenàá-güedé cue té-áⁿ, chi dandàhú ñáhá-güedé cuíní-güedé ní cùu. Te nchaá ñáyiu sàndáá iní tnúhu-gá ní cachi-yu sá quihíⁿ té Páblú ndihi té Bèé ndihi ñuú úú-gá-güedé ñuú Jerusàlén. Te yacáⁿ cada-güedé ñuú jùndá ndihi mee-ní cue tée ní táuchíuⁿ Jèsús cáháⁿ tnúhu-gá, ndihi cue tée yíndaha ñáyiu sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue tée ní sáá ñuú Antiòquia.

³ Te nchaá ñáyiu sàndáá iní tnúhu-gá ní quide ndee iní ñáhá-yu xii-güedé, te ní tnú-güedé ichi cuáháⁿ-güedé. Te ní yáha-güedé distritú Fènicia ndihi distritú Sámariá, te yacáⁿ ní caní-güedé cuèndú nása ní cuu ní tuha ñáyiu ñá túú cùu ñáyiu isràél ichi Yá Ndióxi, te ní cudíí vihí iní nchaá ñáyiu ní xíndedóho-áⁿ.

⁴ Te té Páblú ndihi té Bèé ní ndexio-güedé ñuú Jerusàlén, te ío ní cudíí iní-yu sá ní

ndexio váha-güedé. Te ndècu dava-gá cue tée ní táuchíuⁿ Jèsús dácúaha ñaha xií-yu tnúhu-gá, ndihi cue tée yíndaha ñaha xií-yu, ndihi dava-gá ñáyiu sàndáá iní tnúhu-gá, te ní caní-güedé cuèndú núu-yu nacuáa ní quide Yá Ndióxi ní chindee ñaha-gá xii-güedé ní quide-güedé chiúⁿ-gá.

⁵ Te ndècu ñuú úú cue tée ní tuha ichi Yá Ndióxi, te cue té-áⁿ cúú-güedé cue tée fariséu, te ní ndacuñí-güedé, te ní xáhaⁿ-güedé:

—Dacuñí xini ñuhu-xi sá cuáha-güedé seña ñii cue tée cùmání cue tée ñá túú cùu ñáyiu isràél, te cùñaha-ndo sá ná cádá-güedé nchaá nacuáa ní chídó tnúni ndíi Moisés —cachi cue tée cùu fariséu-áⁿ xáhaⁿ-güedé xii-güedé.

⁶ Te cue tée ní táuchíuⁿ Jèsús dacuáha ñaha xii ñáyiu tnúhu-gá, ndihi cue tée yíndaha ñáyiu sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu.

⁷ Te vai vihi tnúhu ní cáháⁿ-güedé. Te té Pèlú ní ndacuñí-dé, te ní xáhaⁿ-dè xii-güedé:

—Nchòhò cue tée ndècu ndihi-í ichi Xitohó Jesucristú, chí cùndedóho ñuú tnúhu na cáháⁿ-í-a. Sa ñaha-ndo sá ní cachi Yá Ndióxi sá díu-í cáháⁿ-í tnúhu Jèsús núu ñáyiu ñá túú cùu ñáyiu isràél cuèndá sá quíndáá iní-yu, te náníhí tàhú-yu.

⁸ Dico Yá Ndióxi sa ñaha-gá nása càa iní ñuú ñáyiu. Te cùtnuní iní-ó sá cúú iní ñáhá-gá xii cue ñáyiu ñá túú cùu ñáyiu isràél, chí ní sáñaha-gá Espíritú-gá ndécú ndíhí-yu dàtná cuíní-ndó ní taxi-gá ndécú ndíhí nchoo.

⁹ Chí Yá Ndióxi ñuú-ní cùu iní ñáhá-gá xii-o ncháa-o ndihi cue ñáyiu ñá túú cùu ñáyiu isràél, chí tnàhá-yu ní xócání-gá nchaá sá cuèhé sá dúhá ní xócá-yu ndéé òré ní sàndáá iní-yu Jèsús.

¹⁰ Te ná cuèndá nchòhò cuíní-ndó càda ñáyiu ní sàndáá iní tnúhu-gá ñuú sá ñá tnàhá iní-gá sá cádá-yu? Te cuíní-ndó dāndoho-ndó-yu. Te ní nchòo te ní cue ñaní tnàhá-ó ní xíndecu ndéé sanaha ñá ní ndàcú-yu cádá-yu nchaá xiáⁿ.

¹¹ Te vá dúcáⁿ cáháⁿ-ndó, chí sa ñaha-ndo sá Yá Ndióxi ní cundàhú iní ñáhá-gá xii-o, te dío ducaⁿ ní quide-gá sá náníhí tàhú-ó ncháa-o. Te díu-ní ducaⁿ ní quide-gá ñáyiu ñá túú cùu ñáyiu isràél, te ní náníhí tàhú-yu —cachi té Pèlú xáhaⁿ-dè xii-güedé.

¹² Te dātnūnī té Bèé ndihi té Páblú ní nguíta-güedé ní cáháⁿ-güedé, te ní xíndedóho-yu nchaá tnúhu ní cáháⁿ-güedé. Te ní xáhaⁿ-güedé xií-yu nacuáa ní chindee ñaha Yá Ndióxi xii-güedé, te ní quide-güedé vai núú sá vá yòo tnàhí ndàcu cada, te ducaⁿ te ní cutnūnī iní ñáyiu ñá túú cùu ñáyiu isràél sá ndáá cáháⁿ-güedé.

¹³ Te òré ní ndihi cuèndú ní cáháⁿ-güedé, te té Jácobó ní xáhaⁿ-dè:

—Nchòhó cue téè ndècu ndihi-í ichi Xítóhó Jesucristú, chí cündèdòhó ìⁿ tnúhu na cáháⁿ-í-a.

¹⁴ Té Xímú, àdi Pelú chí úú òú-dé, ní cani-dé cuèndú nàcuáa ní quide Yá Ndiòxí ndéé díhna ní dáquédè dèⁿ-gá ñáiyu ñá túú cùu ñáiyu isràél tnuú nchaa ñáiyu ñá túú ndècu ichi-gá, cuèndá cuìní-gá chíñuhu ñàhá-yu xii-gá.

¹⁵ Te dàtnùní ní cáháⁿ-dé nàcuáa ní cáháⁿ Yá Ndiòxí ndéé sanaha. Te duha ní chídó tnùní cue téè ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáá te ní ngoyo te dàndaa-güedé xito cùu úú, ducaⁿ sàtnahá-xi cada-xi ìⁿ nduu,

chí ñaní tnàhá ndii Dàvíí ní xóo cáháⁿ ndihi ñàhá-yu xii-í ní cùu, te ní dàñá ndèè-yu ichi-í,

te na quixi-í te natuha ñaha tùcú-yu.

¹⁷ Te ducaⁿ te vai ñáiyu ñá túú cùu ñáiyu isràél nandùcú-yu ichi-í te cáháⁿ ndihi ñàhá-yu.

¹⁸ Duha ní cáháⁿ Yá Ndiòxí, te ducaⁿ ní chídó tnùní cue téè ní xóo cáháⁿ tnúhu-gá ndéé sanaha —cachí té Jácobó xáhaⁿ-dè xii-güedé.

¹⁹ Te xáhaⁿ tùcu-dé:

—Yúhu cachí iní-í sá vǎ cùú dàsatú-ó ìní nchaa ñáiyu ta sàndáá iní-xi tnúhu Yá Ndiòxí, ñáiyu ñá túú cùu ñáiyu isràél, te ìⁿ úú-ni tnúhu cùñaha-o nàcuáa cada-yu.

²⁰ Dico xini ñuhu-xi daquihíⁿ-ó tùtú cùñaha-o sǎ vǎ cáxi-gǎ-yu nchaa sǎ nchító-ó ndùu táhu nchaa sǎ cachí-yu cùu ndiòxi-yu. Te cùñaha-o sǎ vǎ cáháⁿ ndihi cue téè ñadihí te núu ñá díú ñadihí-güedé cùu-yu, te ní cuè ñáiyu òhí vǎ cáháⁿ ndihi-yu téè te núu ñá díú yí-yu cùu-güedé, te vǎ cáxi-yu cuñú quiti cuèhné, te vǎ cáxi-yu ñíí.

²¹ Te ducaⁿ cùñaha-o, chí ndi tnahá ñuú núú ndécú-yu, te xindecu ñáiyu isràél dácuahá-yu tnúhu ní chídó tnùní ndii Moisés, te ndi tnahá nduu ndètátú-yu dàcuahá-yu tnúhu ndii veñúhu-yu —cachí té Jácobó xáhaⁿ-dè xii-güedé.

²² Te dàtnùní cue téè ní táuchíuⁿ Jesús dacuáha ñaha xi-yu tnúhu-gá, ndihi cue téè yindaha ñáiyu sàndáá iní tnúhu-gá ní cachí-güedé sǎ ndúcú-güedé ìⁿ úú-gǎ cue téè quihíⁿ ndihi té Páblú ndihi té Bèè ñuú Antiòquia, te diu-ni ducaⁿ ní cáháⁿ dava-gǎ ñáiyu ndècu ichi-gǎ. Te úú cue téè ní ndúcú-güedé, ìⁿ-dè nání-dè Silás, te ìⁿ-dè nání-dè Jüdás, àdi Barsabás chí úú òú-dé, te cùnuu-güedé ndi ndùu-güedé.

²³ Te ní cadúha nchaa cue téè cùnuu tutú canehe-güedé quihíⁿ, te duha cáháⁿ-xi:

“Còváha díí-ndó ncháa-ndo. Nchúhú cue téè ní táuchíuⁿ Jesús cáháⁿ-ndí tnúhu-gǎ, ndihi cue téè yindaha cue ñáiyu sàndáá iní tnúhu-gǎ quide ndee iní ñàhá-ndí xii nchòhó cue ñáiyu ndècu ndihi-ndí ichi-gǎ cuèí ñá díú ñáiyu isràél cùu-ndó. Te nchòhó ñáiyu xindecu ñuú Antiòquia, ndihi nchòhó ñáiyu ndècu distritú Siriá, ndihi nchòhó ñáiyu ndècu distritú Cliciá, càchí tnúhu-ndí xii-ndo sǎ

²⁴ ní níhí-ndí tnúhu sǎ ìⁿ úú cue téè ndècu iha ní quixi-güedé núú ndécú-ndó, te ñá túú chíuⁿ ní tahu-ndí quixi-güedé. Te sǎ ìⁿ tnúhu ní cáháⁿ-güedé ní xáhaⁿ-güedé xii-ndo sǎ ngündecu sèñá ñii-ndo, te canchicúⁿ nihnu-ndo ncháa nacuáa ní chídó tnùní ndii Moisés, te xíáⁿ ní sani ìⁿ ní sani úú iní-ndó, chí ñá túú xini-ndó núu ndáá tnúhu cáháⁿ-güedé àdi ñá ndáá.

²⁵ Te ní ndatnúhu-ndí nàcuáa cunduu sǎ téndaha-ndí úú cue téè quixi-güedé ndihi té Bèè ndihi té Páblú, cue téè ío cùu iní-ndí, te cue téè-áⁿ cáháⁿ-güedé nàcuáa cáháⁿ-ndí-a.

²⁶ Te òú-ni té Bèè ndihi té Páblú ní sǎháⁿ-güedé ní cáháⁿ-güedé tnúhu Xítóhó Jesucristú nchaa xichi. Te ndi tnahá cuaháⁿ-güedé cuìní-yu cahni ñàhá-yu xii-güedé.

²⁷ Te tendaha-ndí té Jüdás ndihi té Silás quixi-güedé tnàhá-güedé cachí tnúhu váha-güedé nàcuáa cuaháⁿ tnúhu cáháⁿ-ndí.

²⁸ Te diu-ni ducaⁿ cáháⁿ-ndí cachí tnúhu-ndí nàcuáa cáháⁿ Espíritu Yá Ndiòxí cada-ndo, chí nchúhú vǎ cáháⁿ-ndí sǎ cáda-ndó ncháa sǎ ní cáháⁿ ndii Moisés cada ñáiyu, chí ío úhú, te vǎ yóo ndacu cada. Te vitna na cáháⁿ-ndí ìⁿ úú-ni tnúhu nàcuáa cada-ndo.

²⁹ Vǎ cáxi-ndó sǎ nchító-ó ndùu táhu nchaa sǎ cachí ñáiyu cùu ndiòxi-yu, te vǎ cáxi-ndó ñíí, te vǎ cáxi-ndó cuñú quiti cuèhné, te vǎ cáháⁿ ndihi cue téè ñadihí te núu ñá díú ñadihí-güedé cùu-yu, te ní cuè ñáiyu òhí vǎ cáháⁿ ndihi-yu téè te núu ñá díú yí-yu cùu-güedé. Te núu na cáda-ndo nchaa nacuáa cáháⁿ-ndí-a, te cada váha-ndo. Te vitna ío cada ndee ìní-ndó ncháa-ndo-na.” Duha ní chídó tnùní-güedé núú tùtú ní tendaha-güedé cuaháⁿ.

³⁰ Te ní quide ndee ìní-yu cue téè quihíⁿ ñuú Antiòquia, te ducaⁿ te ní xica-güedé cuaháⁿ-güedé. Te òré ní quexio-güedé ñuú-áⁿ, te ní cana-güedé nchaa ñáiyu sàndáá iní tnúhu Jesús, te ní sǎñaha-güedé tutú xii-yu.

³¹ Te ní dácuahá-yu tutú ní sǎñaha-güedé-áⁿ, te ní cudíí víhí ìní-yu chí ío váha cáháⁿ tutú-áⁿ.

³² Te té Jùdás ndihi té Silás tnàhá-güedé ní nduu táhú-güedé cáháⁿ-güedé tnúhu sá dácàhu iní ñàhá Yá Ndiòxí. Te ní xáhaⁿ-güedé vai tnúhu nàcuáa cadá-yu, te vihi-gá ní cudú iní-yu cadá-yu nàcuáa càháⁿ Yá Ndiòxí cadá-yu.

³³ Te ní xindecu-güedé ìⁿ úú nduu ndihí-yu, te dàtnùní ní quide ndee iní ñàhá-yu xii-güedé cuendá sá nùhú-güedé núú véxi-güedé, te mee-ni tē Jùdás cuánuhú-dé.

³⁴ Te té Silás ní xáhaⁿ-dē sá vā nùhú-ni-dé.

³⁵ Te té Páblú ndihí té Bèé ní ndóo-güedé ní cáháⁿ-güedé tnúhu Yá Ndiòxí ñuu Antiòquiá, te vai-gá tucu ñáiyu Antiòquiá ní cáháⁿ-yu tnúhu-gá.

Xito cùu uú cuáháⁿ té Páblú càháⁿ-dé tnúhu Yá Ndiòxí núú ñáiyu

³⁶ Te sáta ní cuu cuéhé nduu, te ní xáhaⁿ té Páblú xii té Bèé:

—Na quihíⁿ-ó ncháa ñuu núú ní sáháⁿ-ó ní cáháⁿ-ó tnúhu Yá Ndiòxí cáháⁿ ndihí-o ncháa ñáiyu ní tuha ichi-gá cuendá quini-ó núu ndécu váha-yu —càchi-dé xáhaⁿ-dē.

³⁷ Te té Bèé ní xáhaⁿ-dē sá quihíⁿ ndihí-güedé té Juáá, àdi Mácú chi úú diu-dé.

³⁸ Dico té Páblú ñá ní dàña-gá-dé quihíⁿ té Juáá, chi ní dándóo ñaha-dé xii-güedé cutnàhá ní xindecu-güedé Pánfilia, te ní nacuico-dé cuánuhú-dé, te ñá túú-gá ní sáháⁿ ndihí ñaha-dé xii-güedé.

³⁹ Xíáⁿ ní cuu ní tenáá tnàhá tē Bèé ndihí té Páblú, te ichi caa ichi caa ní cuu-güedé. Te té Bèé ndihí té Mácú ní quee-güedé bàrcú cuáháⁿ-güedé Chìpré.

⁴⁰ Te té Páblú ní xáhaⁿ-dē xii té Silás sá quihíⁿ ndihí ñaha-dé, te ñáiyu sàndáá iní-xi tnúhu Jèsús ní cáháⁿ ndihí-yu Yá Ndiòxí sá chindèe ñaha-gá xii-güedé.

⁴¹ Te ní xica-güedé cuáháⁿ-güedé te ní yáha-güedé nihí distritú Siria ndihí distritú Clicia. Te ní cáháⁿ-güedé tnúhu Jèsús núu ncháa ñáiyu ní sàndáá iní tnúhu-gá, núu xíáⁿ ío-gá ní cudú iní-yu cadá-yu nàcuáa càháⁿ Yá Ndiòxí.

16

Tnàhá té Timùteú cuáháⁿ ndihí-dé té Páblú ndihí té Silás

¹ Te té Páblú ndihí té Silás cuáháⁿ-güedé ñuu Dèrbé ndihí ñuu Lìstrá, te ñuu Lìstrá yàcáⁿ ndécú ìⁿ tēe nàni Timuteú. Te tēe-áⁿ sàndáá iní-dé tnúhu Jèsús, te tnàhá nàná-dé sàndáá iní-aⁿ tnúhu-gá, te ñaha isràél cúú-áⁿ, te tēe griégú cúú tātá-dé.

² Te nchaa ñáiyu ní sàndáá iní tnúhu-gá ñáiyu ndécú ñuu Lìstrá, ndihí ñáiyu ñuu Ìconiú, nchaa ñáiyu-áⁿ cudú iní-yu nàcuáa quide-dé.

³ Te ní cuini té Páblú sá tnàhá té Timùteú quihíⁿ ndihí-dé dava-gá ñuu, núu xíáⁿ

díhna-gá sēñá ní sáha té Páblú ñii té Timùteú, chi ñá ní tnàhá iní té Páblú sá càháⁿ cuéhé ñáiyu isràél cuendá té Timùteú. Te nchaa ñáiyu isràél ndécú ñùú-áⁿ xiní-yu sá tēe griégú cúú tātá-dé, te ñá diú tēe isràél cúú-dé, te xíáⁿ ní sáha té Páblú sēñá ñii té Timùteú.

⁴ Te ndi tnahá ñuu ndi tnahá ñuu cuáháⁿ-güedé cáháⁿ ndihí-güedé nchaa ñáiyu ní sàndáá iní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue tēe ní táuchíúⁿ Jèsús dacuàha ñaha xii-yu tnúhu-gá, ndihí cue tēe yindaha ñáiyu sàndáá iní tnúhu-gá ñuu Jerusalén.

⁵ Te cuendá ducaⁿ ní sáháⁿ-güedé nchaa ñuu núu ndécú ñáiyu sàndáá iní tnúhu-gá ní dácuhá ñaha-güedé xii-yu, núu xíáⁿ tá cùu túha-gá-yu tnúhu Yá Ndiòxí, te vai-gá-yu ní tuhá-yu ichi-gá.

Ní dácótó ñaha-xi xii té Páblú sá ní xiní-dé ìⁿ tēe distritú Macedonia

⁶ Te ñá ní dàña Espiritú Yá Ndiòxí quihíⁿ-güedé cáháⁿ-güedé tnúhu-gá distritú Àsia, núu ní sáháⁿ-güedé distritú Frìgiá ndihí distritú Gàlacia cáháⁿ-güedé tnúhu-gá.

⁷ Te ní sáa-güedé yuhu distritú Misiá. Te quihíⁿ-güedé distritú Bitiniá ní cùu, dico ñá ní dàña Espiritú Yá Ndiòxí quihíⁿ-güedé yàcáⁿ.

⁸ Te ní yáha-güedé Misiá, te ní quexìo-güedé ñuu Tròás, te yàcáⁿ ní nanítnahá-ndí ndihí-dé.

⁹ Te ìⁿ niú ní dácótó-xi núu tē Páblú sá ní xiní-dé ìⁿ tēe distritú Macedonia nùtní-dé, te ní xáhaⁿ tēe-áⁿ xii té Páblú: “Cada ndee iní-n quihíⁿ-n Macedonia chi dacuàha ñaha-n nchaa sá xiní-n”, càchi-dé xáhaⁿ-dē, ní dácótó ñaha-xi xii té Páblú.

¹⁰ Te cuendá sá dúcáⁿ ní dácótó ñaha-xi xii té Páblú núu ní ndatnúhu-ndí quihíⁿ-ndí Macedonia, chi ní cutnùní iní-ndí sá càná ñaha Yá Ndiòxí quihíⁿ-ndí cáháⁿ-ndí tnúhu-gá núu ñáiyu yàcáⁿ.

Té Páblú ndihí té Silás ndécú-güedé ñuu Filipú

¹¹ Te ní quee-ndí bàrcú ñuu Tròás, te cuáháⁿ ndáá-ndí ñuu Samòtracia, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tnéé ní quexìo-ndí ñuu Neápolis.

¹² Te yàcáⁿ ní quene-ndí bàrcú, te xica-na-ndí cuáháⁿ-ndí ñuu Filipú te ñuu-áⁿ yíndèhu-xi distritú Macedonia. Te yàcáⁿ ní cudú-ndí ní xindecu tnaa-ndí. Te ñuu Filipú-áⁿ ío cùnuu-xi, chi ío chitu ñáiyu ròma ní ngóo-yu.

¹³ Te nduu ndètátú-yu ní quee-ndí ñuu cuáháⁿ-ndí ìⁿ xio yuhu yúte, chi yàcáⁿ sáháⁿ-yu càháⁿ ndihí-yu Yá Ndiòxí. Te órè

ní quexìo-ndí, te ní naníhí tnáhá-ndí ndíhi mee-ni ñáyiú díhí, te ní cáháⁿ-ndí tnúhu Yá Ndióxi ní xíndedóho-yu.

14 Te ndècu ìⁿ ñaha nani Lidiá ní xíndedóho-aⁿ ñacuáa ní cáháⁿ-ndí, te ñaha ñúú Tiatírà cúú-áⁿ, te díco-aⁿ dóó murádú, te ío cáháⁿ ndíhi-aⁿ Yá Ndióxi. Te díu-ni mee Yá Ndióxi ní chindee ñaha-gá ní sándáá iní-aⁿ tnúhu ní cáháⁿ té Páblú.

15 Te ní sandute-aⁿ ndíhi landú-aⁿ, ndíhi nchaa ñáyiú xínu cuechi núú-aⁿ, te ní cachí-aⁿ xii-ndí:

—Te núú ní cutnùnì iní-ndó sã ní sándáá ndisa iní-í tnúhu Jèsús, te cundecu tnaa-ndo vehe-í —cachí-aⁿ xii-ndí.

Te ní quide yica-aⁿ ní xíndecu-ndí vehe-aⁿ.

16 Te ìⁿ nduu ñúhu-ndí ichi cuáháⁿ-ndí núú cáháⁿ ndíhi-yu Yá Ndióxi, te ní naníhí-ndí ìⁿ xíchí ñúhú ichi, te yíhi ñaha espíritú cúndíhi yucu ñávaha xii-xi. Te xíáⁿ ní quide ní cáháⁿ-xi nchaa sã vã yóo tnáhí cutnùnì iní-xi núú nchaa ñáyiú ní sángándíhi ñaha xii-xi. Te ñáyiú díi vehe-xi xínu cuechi-xi ío vã díhúⁿ ní níhí-yu chi ní cháhu nchaa ñáyiú ní sángándíhi ñaha xii-xi.

17 Te xíchí-áⁿ ní chinchí-cúⁿ ñáhá-xí xii-ndí ndíhi té Páblú ndéndaha ñaha-xi cuáháⁿ, te ní cáháⁿ níhi-xi xáhaⁿ-xi xii dava-gá ñáyiú:

—Cue té-a xínu cuechi-güedé núú Yá Ndióxi, chí ío cháhu cuu-gá, te cachí tnúhu-güedé nása cada-ndo naníhí tãhú-ndó —cachí-xi xáhaⁿ-xi xii-yu.

18 Te titní xito ní yáha-ndí ducaⁿ-ni ní cáháⁿ-xi. Te ñá ní cúndee-gá iní té Páblú sã dúcáⁿ cáháⁿ-xi, núú ní nanchocuíhnu-dé núú núníhi-xi, te ní xáhaⁿ-dè xii espíritú cúndíhi yucu ñávaha yíhi ñaha xii-xi:

—Ío cháhu cuu Xítoho Jesucristú, núú xíáⁿ cachí-í sã xócuíñí-n vã quíhí-gã-n yíqui cuñú xíchí-a —cachí-dé xáhaⁿ-dè.

Te òré-ni ní quee espíritú cúndíhi yucu ñávaha-áⁿ yíqui cuñú-xi.

19-20 Te ñáyiú díi vehe-xi xínu cuechi-xi-áⁿ ní cutnùnì iní-yu sã vã níhí-gá-yu díhúⁿ cuèndá tnúhu cáháⁿ-xi, núú ní tníⁿ-yu té Páblú ndíhi té Silás ndécá ñáhá-yu cuáháⁿ núú cuè tée cùchiuⁿ Romá, te xáhãⁿ-yu xii-güedé:

—Cue té-a cùu-güedé cue tée israhél, te ío dusaⁿ xíquide-güedé ñúú-ó.

21 Te cuñí-güedé cada-o ñacuáa quide-güedé, te vã cúú dúcaⁿ cada-o chí ñáyiú nacióⁿ Rómá cúú-ó —cachí-yu xáhãⁿ-yu xii cue tée cùchiuⁿ.

22 Te uuⁿ-ni ní cáháⁿ ncháa-yu, te xáhãⁿ-yu sã ñá túú quide váha té Páblú ndíhi té Silás. Te cue tée cùchiuⁿ ní cándeé-güedé dóó té Páblú ndíhi dóó té Silás ní ndátá-güedé, te ní táuchíuⁿ-güedé caníha-güedé ndíhi tnudíhi xii-güedé.

23 Te ní caníha-güedé, te dátñuní ní chíhi ñaha-güedé vecaá. Te ní xáhaⁿ-güedé xii tée ndénchito vecaá sã cáda cuèdadú víhí-dè cuèndá ná canú-güedé vecaá.

24 Te cuèndá sã dúcáⁿ ní cáháⁿ-güedé, núú tée ndénchito vecaá ní dáyaha ñaha-dè ingá cuártú ndécú xití vecaá, te ní chíhi-dé sáhá-güedé yaú nduhu, te ní quide tii-dé.

25 Te dava niú ní cáháⁿ ndíhi té Páblú ndíhi té Silás Yá Ndióxi, te ní xita-güedé ndudú ní quide cháhu ñaha-güedé xii-gá. Te dava-gá cue tée yíhi vecaá ní xíndedóho-güedé ñacuáa ní xita-güedé.

26 Te uuⁿ-ni níhi víhi ní tnáa ní quidi-xi ndéé cimientú vecaá, te ní nacaáⁿ nchaa yéhe vecaá, te ní ndíhi cadená ndútú cuè tée yíhi vecaá ní nandáxi.

27 Te ní ndiquíú cúnú iní tée ndénchito ve-caá, te ní quide cuèndá-dé nchíi nchaa yéhe vecaá. Te ní tava-dé machití-dé cahní-dé méé-dè ní cùu, chí ní cáháⁿ-dè sã ní ndíhi cue tée yíhi vecaá ní xínu ní cùu.

28 Te té Páblú ní cáháⁿ níhi-dé, te xáhaⁿ-dè xii tée ndénchito vecaá:

—Vã dúcáⁿ cáda-n cahni-n mee-n, chí nchaa-ni-ndí yíhí —cachí-dé xáhaⁿ-dè xii tée ndénchito vecaá.

29 Te dátñuní ní xícáⁿ tée ndénchito ve-caá ñuhú, te xínu-dé cuánguihu xití vecaá núú yíhí té Páblú ndíhi té Silás, te quidi ñaha-ná-xi xii-dé ní quexìo-dé ní nguíñí xití-dè núú-güedé.

30 Te dátñuní ndécá ñaha-dé xii-güedé ní ndee vecaá, te ní xícáⁿ tnúhú-dè núú-güedé, te xáhaⁿ-dè:

—Nchòhó cachí tnúhu-ndo nása cada-í naníhí tãhú-í —cachí-dé xáhaⁿ-dè.

31 Te ní xáhaⁿ-güedé:

—Quindáá iní-n ndíhi ñadíhí-n, ndíhi landú-n, ndíhi nchaa ñáyiú xínu cuechi núú-n tnúhu cáháⁿ Xítoho Jesucristú, te naníhí tãhú-ndó —cachí-güedé xáhaⁿ-güedé.

32 Te ní dácúahá ñaha-güedé xii tée ndénchito vecaá ndíhi nchaa ñáyiú ndècu vehe-dé tnúhu Yá Ndióxi.

33 Te díu-ni òré-áⁿ ní naquete-dé sátá-güedé núú ní ñáni, te dátñuní ní sandute-dé ndíhi-yu.

34 Te ndéca ñaha-dé cuáháⁿ vehe-dé ní sãñaha-dè sã ní xexi-güedé, te ní cudíí víhí iní tée ndénchito vecaá ndíhi nchaa-dé vehe-dé sã ní tuhá-yu ichi Yá Ndióxi. Te cuándihu tucu té Páblú ndíhi té Silás vecaá.

35 Te nduu tnéé ní xáhaⁿ cuè tée cùchiuⁿ xii polecia cuáháⁿ-güedé cùu-güedé tée ndénchito vecaá queñuhu-dé úú cue tée cuánguihu ndedí nduu ícu núhú-güedé.

36 Te tée ndénchito vecaá ní xáhaⁿ-dè xii té Páblú ndíhi té Silás:

—Cue téé cùchiuⁿ ní cachí-güedé sá queé-ndó nùhú-ndó, chí ñá túú-gá ná cada-güedé, chí sa ní yáha cuendá-ndó —cachí téé ndénchito vecaá xáhaⁿ-dè xii-güedé.

³⁷ Te té Páblú ní xáhaⁿ-dè xii cue téé cùu poleciá:

—Tée ròma cúú-ndí, te vá cúú dùcaⁿ-ní cunduu, chí ní caniha-güedé tnudli xii-ndí, te ní xiní-yu nchaá-yu. Te ñá túú tñahí ní xicáⁿ tnúhú-güedé nùu ndáá ndècuéchi-ndí àdi ñáhá, chí cuendá-ni ní chihí ñaha-güedé vecaá xii-ndí. Te vitna cuiní-güedé dacácu ñaha-güedé nùhú-ndí cuendá sá vā yōo quini ñáhá nùhú-ndí cáháⁿ-güedé, dico vá cúú dùcaⁿ cada ñaha-güedé xii-ndí. Chí cuaháⁿ cúñaha-ndo na quixi mee-güedé queñuhu ñaha-güedé —cachí té Páblú xii-dé cue poleciá.

³⁸ Te cue téé cùu poleciá cuánuhú-güedé núu ndécú cuè téé cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ ní xáhaⁿ pòleciá sá tée ròma cúú-güedé, xiáⁿ ní yùhú-güedé.

³⁹ Te ní sáháⁿ cue téé cùchiuⁿ yehe vecaá, te ní xáhaⁿ-güedé sá cáda cáhnu iní-güedé sá ní chihí ñaha-güedé vecaá, te ní ndèñuhu ñaha-güedé vecaá. Te ní cáháⁿ ndáhú-güedé núu cuè téé ní xihí vecaá sá ndéé-güedé ñuú-áⁿ nùhú-güedé.

⁴⁰ Te ní ndee-güedé vecaá, te cuaháⁿ-güedé vehe tá Lidíá, te ní ndatnúhu-güedé ndihí nchaa ñáyiu ní sándáá iní-xi tnúhu Jèsús, te ní xáhaⁿ-güedé xii-yu nàcuáa cada-yu, te ío ní cudíí iní-yu, te ducaⁿ te ní xica-güedé cuaháⁿ-güedé.

17

Ío dusaⁿ quide ñáyiu ñuú Tesalónica

¹ Te ní yáha-güedé ñuú Anfipolis ndihí ñuú Apoloniá, te ní quexiò-güedé ñuú Tesalónica, te yacáⁿ cáá ñⁿ veñuhu ñáyiu israhél.

² Te ní sáháⁿ té Páblú veñuhu-áⁿ, chí ducaⁿ tñahí quide-dé, te ndi tñahá nduu ndetatu-yu ní sáháⁿ-dè veñuhu-áⁿ úní xito. Te ní ndatnúhu ndihí ñaha-dé xii-yu nàcuáa ní chidó tñuni cue téé ní xóo cáháⁿ tnúhu Yá Ndióxi ndéé sanaha.

³ Te ní xitnúhu ñaha-dé nàcuáa ní cáháⁿ cue téé-áⁿ sá Cristú Yaá tendaha Yá Ndióxi quixi ñuyiú-a ndoho vihi-gá, te cuú-gá, te ndoto-gá, te xáhaⁿ-dè:

—Te diu Jèsús cúú Cristú Yaá ní tendaha Yá Ndióxi ní quixi ñuyiú-a, núu xiáⁿ cachí tnúhu-í vitna —cachí té Páblú xáhaⁿ-dè xii-yu.

⁴ Te dava ñáyiu israhél ní sándáá iní-yu tnúhu ní cáháⁿ té Páblú, te ní níhí tñahá-yu ndihí-dé, ndihí té Silás. Te vāi ñáyiu griégú ñáyiu cáháⁿ ndihí Yá Ndióxi ní sándáá iní-yu tnúhu Jèsús. Te ndècu titní ñáyiu dñí ñáyiu

cùnuu, te ñáyiu-áⁿ tñahá-yu ní sándáá iní-yu tnúhu-gá.

⁵ Te dava ñáyiu israhél ñá túú ní cùu váha iní-yu núu té Páblú núu ní ndúcú-yu cue téé cuihna iní-xi tuhiò-güedé cada chùu-güedé, chí ndi cuihnu ndi cuihnu-ni-güedé, te nchaá-yu ndihí cue téé-áⁿ ndí coyo ndi coyo-yu xicuaá-yu. Te sáta ní tecú dóho dava-gá-yu, te ní sáháⁿ tuhá-yu, te ío ní quide dúsáⁿ-yu. Te nísáháⁿ-yu vehe té Jásón, te ní quide yicá-yu ní quihu-yu vehe-dé nándúcú-yu té Páblú ndihí té Silás cuendá queñuhu ñahá-yu núu nchàa ñáyiu.

⁶ Te ñá ní nánihí ñáhá-yu xii-güedé, núu xiáⁿ ní tñí-yu té Jásón ndihí ñⁿ úú-gá cue téé sándáá iní tnúhu Jèsús, te tñíuhu ñahá-yu xii-güedé cuaháⁿ núu cuè téé cùchiuⁿ. Te óré ní quexiò-yu núu ndécú cuè téé cùchiuⁿ, te ní ngúta-yu ní cuaa-yu, te xáháⁿ-yu xii-güedé:

—Ní quexiò cue téé-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núu xicá cùu-güedé.

⁷ Te té Jásón-áⁿ ní xáhaⁿ-dè sá cúu cùndecu-güedé vehe-dé, te ñá túú sándáá iní-güedé nàcuáa cáháⁿ té Césár téé yindaha cuéhé nacióⁿ, te cachí-güedé sá ndécú ñngá téé cùnuu-gá tucu nani-dé Jèsús —cachí-yu xáháⁿ-yu xii cue téé cùchiuⁿ.

⁸ Te sáta dúcáⁿ ní cáháⁿ-yu, te ní cudéén vihi cuè téé cùchiuⁿ ndihí dava-gá ñáyiu ndédóho.

⁹ Te vāi díhúⁿ ní xicáⁿ cue téé cùchiuⁿ núu té Jásón ndihí dava-gá cue téé cuaháⁿ ndihí-dé cuendá té Páblú ndihí té Silás, te núu na ndèe-güedé nùhú-güedé, te nacuáñaha cue téé cùchiuⁿ díhúⁿ-güedé.

Té Páblú ndihí té Silás ndécú-güedé ñuú Bèrea

¹⁰ Te óré ní cundiquiⁿ, te ní quide ndee iní ñáhá ñáyiu sándáá iní tnúhu Jèsús xii té Páblú ndihí té Silás, te ní xica-güedé cuaháⁿ-güedé ñuú Bèrea. Te diu-ni nduu ñí sáá-güedé yacáⁿ ní sáháⁿ-güedé veñuhu ñáyiu israhél.

¹¹ Te váha-gá iní ñáyiu ñuú Bèrea dácúúxi ñáyiu ñuú Tesalónica, chí ío ní cudíí iní-yu ní xindedóho-yu tnúhu Jèsús, te ñⁿ nduu ñí dácúhá-yu tnúhu ní chidó tñuni cue téé ní xóo cáháⁿ tnúhu Yá Ndióxi ndéé sanaha cuendá cuiní-yu quini-yu núu ndáá cáháⁿ té Páblú ndihí té Silás.

¹² Te titní ñáyiu israhél ní sándáá iní-yu tnúhu-gá ndihí titní cue téé griégú ndihí ñáyiu dñí ñáyiu cùnuu ní sándáá iní-yu.

¹³ Te dava ñáyiu israhél ndécú-yu ñuú Tesalónica, te ñáyiu-áⁿ ní níhí-yu tnúhu sá ndécú té Páblú ndihí té Silás ñuú Bèrea cáháⁿ-güedé tnúhu Yá Ndióxi, núu xiáⁿ ní sáháⁿ-yu ñuú Bèrea ní dácúandèhndé-yu núu nchàa ñáyiu vátá dácúaha-gá. Te ñáyiu-áⁿ ní

sándáá iní-yu tnúhu ndehnde te ní cudééⁿ vihi-yu núú-güedé.

14 Te òré-áⁿ ní xáhaⁿ ñáiyu sándáá iní tnúhu-gá xii té Páblú sá quihíⁿ-dé yuhu lámár, te ní xica-dé cuáháⁿ-dé, te té Silás ndihi té Timùteú ní quendóo-güedé ñuu Bèrea.

15 Te ñⁿ ùú-güedé cuáháⁿ ndihi-güedé té Páblú, te ndéca ñaha-güedé cuáháⁿ ndéé ñuu Atenás, te ní xáhaⁿ té Páblú xii-güedé:

—Núu na nùhú-ndó, te cúu-ndo té Silás ndihi té Timùteú ná quixí ndihi-ni-güedé nanítnáhá-ndí iha —cächí-dé xáhaⁿ-dè.

Te ní xica-güedé cuánuhú-güedé.

Té Páblú ndécú-dé ñuu Atenás

16 Te ñuu Atenás ndétu té Páblú quihíⁿ té Silás ndihi té Timùteú. Te yacáⁿ ní xiní-dé sá ïo cuéhé sá cächí-yu cùu ndióxí-yu ndècu te ñá ndáa sá díú ndióxí cúu-xí, te xíáⁿ ñá túú ní cùu váha iní-dé, chi ñá tnáhá iní-dé nàcuáa quidé-yu.

17 Te ní sáháⁿ-dé veñúhu ní cáháⁿ ndihi-dé ñáiyu isràél ndihi dava-gá ñáiyu cáháⁿ ndihi Yá Ndióxi. Te ñⁿ nduu ñⁿ nduu sáháⁿ-dé xití ñuu cáháⁿ-dé tnúhu-gá ndihi nchaa ñáiyu xica cuu yacáⁿ.

18 Te cue téé cùu epicureú ndihi cue téé cùu estoicú, cue téé-áⁿ ní ndatnúhu-güedé ndihi té Páblú, te dava-güedé xítnàha-güedé:

—¡Ná tnúhu vihi cáháⁿ téé lùcú-áⁿ! — cächí-güedé xítnàha-güedé.

Te dava-güedé xítnàha-güedé:

—Sàni iní-ndí sá cáháⁿ-dé cuèndá ndióxí sá vátá quini-gá-ó —cächí-güedé xítnàha-güedé.

Te ducaⁿ xítnàha-güedé, chi cáháⁿ té Páblú tnúhu Jèsús, te ní cáháⁿ-dé nàcuáa ní dándótó ñaha Yá Ndióxi xii-gá, xíáⁿ núu ducaⁿ xítnàha-güedé.

19 Te ndéca ñaha-güedé xii té Páblú cuáháⁿ ñⁿ xichi núu nání Àreópagú, te ní xáhaⁿ-güedé xii-dé:

—Cachí tnúhu ndáa-n nàsa cuáháⁿ tnúhu cáháⁿ-n, chi na cùtnuní ndáa iní-ndí,

20 chi ducaⁿ-ni cáháⁿ-n tnúhu sá ñá túú sàcúndedóho-ndí, te cuini-ndí cachí tnúhu ndáa-n nàsa ndúu tnúhu-áⁿ cuèndá cùtnuní váha iní-ndí —cächí-güedé xáhaⁿ-güedé xii-dé.

21 Te nchaa ñáiyu ñuu Atenás ndihi ñáiyu dava-gá ñuu, mee-ni tnúhu saa cuini-yu cáháⁿ-yu, nchaa sá vátá cùndedóho-gá-yu cuini-yu cundedóho-yu.

22 Te té Páblú ní ngùnntíi-dé núu xixúcu-yu nchaá-yu, te xáhaⁿ-dè:

—Nchòho cue ñáiyu ñuu Atenás, cundedóho-ndo nchaa tnúhu na cáháⁿ-i-a. ïo quide cahnu nchohó sá cächí-ndó cùu ndióxí-ndó.

23 Te vitna ní quexio-í ñuu-ndó, te ní xiní-í sá yàyacáⁿ ndécú nchaa sá cächí-ndó cùu

ndióxí-ndó cáháⁿ ndihi-ndo. Te ní xiní-í ñⁿ xichi núu ndéé tnuní quidé cahnu-ndo Yá Ndióxi Yaa ñá túú xiní-ndó, te diu-ni ducaⁿ cáháⁿ lètrá ndéé tnuní xiáⁿ, te cächí-xi: “Iha quide cahnu-ndí Ndióxi sá ñá túú xiní-ndí”, duha cáháⁿ lètrá-áⁿ. Te quide cahnu-ndo Yá Ndióxi cáháⁿ-ndó, dico ñá túú xiní-ndó nàsa càa-gá, te yúhú xiní ndáa-í nàcuáa càa Yá Ndióxi, chi diu-ni Yá Ndióxi cáháⁿ ndihi-í, te diu tnúhu-gá cáháⁿ-í vitna.

24 Te diu Yá Ndióxi ní cadúha-gá ñuyiú-a ndihi nchaa sá ïo, núu diu-gá cúu Xitohó ñuyiú-a ndihi andiu. Te ñá túú xiní ñuhu-gá vehe dàcaa ñáiyu ñuyiú-a cundecu-gá.

25 Te ñá túú xiní ñuhu-gá ñáiyu chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tächí-ó ndihi nchaa sá xiní ñuhu-o.

26 Te ndéé sanaha ní cadúha-gá ñⁿdi-ni téé, te diu-ni ñáí-dé cúu ñáiyu ndècu nicaxico ñuyiú. Te diu-ni mee Yá Ndióxi ní xáhaⁿ-gá nchaa núu cundècu-yu, te mee-gá ní cáháⁿ-gá ná daha cuiá cudí nchaa nàcióⁿ ndihi mee-yu.

27 Te cuini-gá sá ncháá ñáiyu nanducu ñàhá-yu cáháⁿ ndihi ñàhá-yu xii-gá, te mee-gá ndécú túha-gá sá cáháⁿ ndihi ñaha-gá xii-yu ñⁿ ñⁿ-yu.

28 Te diu-ni Yá Ndióxi xitó ñaha-gá xii-yu núu cùdii-yu ndècu-yu te càndá-yu. Te duha ní cáháⁿ ñⁿ ñani tnáhá-ndó, téé ní cùtnuní iní-xi ní xindecu ndéé sanaha, te ní xáhaⁿ-dè xii-yu: “Nchaa-o cùu-o déhe Yá Ndióxi”, duha ní xáhaⁿ-dè xii-yu.

29 Te núu déhe Yá Ndióxi cúu-yu nchaá-yu, te vá cúu cáháⁿ-yu sá Yá Ndióxi cúu sá ní cadúha-yu ndahá-yu. Te sá ní cadúha-yu cùu ndióxí-yu-áⁿ, dava cùu-xi díhúⁿ cuàáⁿ, dava cùu-xi díhúⁿ cuixíⁿ, dava cùu-xi yúu. Te mèe-yu ní cahu iní-yu nàcuáa cunduu sá cúu ndióxí-yu.

30 Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuèndá Yá Ndióxi sá dúcáⁿ ní quidé-yu. Te vitna cächí Yá Ndióxi sá dáñá nchaa ndi túhú-yu nchaa sá cuéhé sá dúhá quidé-yu.

31 Te Yá Ndióxi nàhá-gá ná nduu cundecu nchaa ñáiyu núu-gá, te mee-gá sa ñaha-gá ndéndida càa ñáiyu ní quide váha, te ndéndida càa ñáiyu ñá túú ní quide váha. Te mee-gá ní xáhaⁿ-gá xii Déhe-gá Yaa nání Jèsús cùñaha-gá xii-yu núu ndéndida càa-yu ní quide váha te ndéndida càa-yu ñá túú ní quide váha. Te mee Jèsús cáháⁿ ndáa cuiti-gá, te sa ñaha-o sá ncháá xiáⁿ cada Jèsús, chi diu cuèndá-áⁿ ní dándótó ñaha Yá Ndióxi xii-gá —cächí té Páblú xáhaⁿ-dè xii-yu.

32 Te òré ní cáháⁿ té Páblú sá ní ndoto Jèsús, te dava ñáiyu ñá ní tnáhá iní-xi tnúhu ní

cáháⁿ-dé ní cáháⁿ yíchi-yu. Te davá-yu ní xáháⁿ-yu xii-dé:

—Te ingá xito quixi-n, te cáháⁿ tucu-n tnúhu ní cáháⁿ-n vítua —cachí-yu xáháⁿ-yu xii-dé.

³³ Te ní xica-dé cuáháⁿ-dé.

³⁴ Te dava ñáyiú ní xíndedóho tnúhu ní cáháⁿ té Páblú ní sándáá iní-yu Jèsús, te ní chindee tnúhu ñáhá-yu xii-dé. Te ñⁿ téee cùchiuⁿ Areópagú nání-dé Níxú ndihi ñⁿ ñadihí nání-áⁿ Dámarís, tnàhá-yu ní sándáá iní-yu tnúhu-gá ndihi dava-gá-yu.

18

Té Páblú ndécú-dé ñuú Còrintú

¹ Te té Páblú ní quee-dé ñuú Àtenás cuáháⁿ-dé ñuú Còrintú.

² Te yàcáⁿ ní naníhí tnàhá-dé ndihi ñⁿ téee isràél nání-dé Àquilú, te téee-áⁿ cúú-dé téee distritú Pónto, te ní xíndecu-dé ndihi ñadihí-dé tá Priscilá ñuú Rómá. Te té Cèsár téee yíndaha cuéhé nacióⁿ, téee nani Claudíú ní xáhaⁿ-dé sá vā cúú-gá cundecu ñáyiú isràél ñuú Rómá, te xiáⁿ núu ní ndee té Àquilú ndihi ñadihí-dé cuáháⁿ-yu ñuú Còrintú. Te sácú-ní nduu ní cuu sá ní quexió-yu ñuú-áⁿ, te ní sáháⁿ té Páblú ní ndatnúhu ndihi ñaha-dé xii-yu vehé-yu.

³ Te ní xáháⁿ-yu sá cundecu-dé cada chiúⁿ ndihi ñáhá-yu, chí ñⁿ-ni chiúⁿ quide-dé ndihí-yu, te ní xóo dacáá-yu vehe dóó. Te núu xiáⁿ ní xíndecu ndihi ñaha té Páblú ní quide chiúⁿ ndihi ñaha-dé xii-yu.

⁴ Te núú ùná núú ùná nduu, nduu ndétatú-yu, ní xóo quíhíⁿ-dé veñúhu ñáyiú isràél. Te ní ndatnúhu-dé ndihi ñáyiú isràél ndihi ñáyiú ñá túú cùu ñáyiú isràél, te ní xáhaⁿ-dé sá quíndáá iní-yu tnúhu Jèsús.

⁵ Te té Silás ndihi té Timúteú ní quee-güedé distritú Macèdoniá cuáháⁿ-güedé núú ndécú té Páblú. Te óré ní quexió-güedé, te ní cáháⁿ-ni té Páblú tnúhu Yá Ndióxi núú ñáyiú isràél, te xáhaⁿ-dé xii-yu sá Jèsús cúú-gá Cristú Yaá ní tendaha Yá Ndióxi ní quixi ñuyú-a.

⁶ Te sá dúcáⁿ ní cáháⁿ-dé núu ní nàá ndihi ñáhá-yu xii-dé, te ní cáháⁿ cuéhé-yu cuèndá-dé, núu xiáⁿ ní naquidi-dé dóó-dé. Te ducaⁿ ní quide-dé cuèndá sá cútñuní iní-yu sá ñá ní tnàhá iní-dé nàcuáa ní cáháⁿ-yu, te ní xáhaⁿ-dé xii-yu:

—Yúhú ñá túú cuèchi-í, te núu ní xíta ni-hnu-ndo, xiáⁿ quèndóo cuèchi mee-ná-ndó. Te vítua quíhíⁿ-í cáháⁿ ndihi-í ñáyiú ñá túú cùu ñáyiú isràél, te vā nándücu-gá-í nchóhó ñáyiú isràél cáháⁿ ndihi ñaha-í xii-ndo —cachí-dé xáhaⁿ-dé xii-yu.

⁷ Te ní xica-dé cuáháⁿ-dé vehe ñⁿ téee nani Justú, te téee-áⁿ ndécú yàtni-dé núú

cáá veñúhu, te tnàhá-dé cáháⁿ ndihi-dé Yá Ndióxi.

⁸ Te té Crispú téee yíndaha veñúhu-áⁿ ní sándáá iní-dé Jèsús ndihi ñadihí-dé ndihi landú-dé. Te vai ñáyiú ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhá-yu xii-gá, te ní sanduté-yu.

⁹ Te ñⁿ níu ní cáháⁿ saní té Páblú sá ní xáhaⁿ Yá Ndióxi xii-dé:

—Cáháⁿ-ni-n tnúhu-í, te vā yùhú-n ncháa tnúhu cuéhé tnúhu duha cáháⁿ ñáyiú,

¹⁰ chí yúhú chindee ñaha-í xii-n, te vā yóo ñⁿ cada úhú ñáhá xii-n, te vai-gá ñáyiú ñuú-áⁿ quíndáá iní-yu tnúhu-í —cachí-gá xáhaⁿ-gá núú saní-dé.

¹¹ Te ñuú Còrintú ní xíndecu té Páblú ñⁿ cuíaⁿ dava, te mee-ni tnúhu Yá Ndióxi ní xóo dacuàha-dé ñáyiú.

¹² Te ndécú-gá-dé ñuú-áⁿ ní ngóo té Gàlión chiúⁿ taxi tñuní-dé distritú Acáyá. Te dáva-áⁿ ní cudééⁿ ñáyiú isràél núú té Páblú, te ní tñi ñáhá-yu xii-dé ndécá ñáhá-yu cuáháⁿ núú cué téee cùchiuⁿ.

¹³ Te ní xáháⁿ-yu xii té Gàlión téee cùu gobiernú:

—Téee-a ní quexió-dé ñuú-ó xica cuu-dé te cuini-dé dandáhú ñáhá-dé chitnahá-ndí-dé cada-ndí nàcuáa quide-dé quidé càhnu-dé Ndióxi-dé, te ñaha-ndí vā cáda-gá-ndí nàcuáa cáháⁿ tnúhu sá sánú ichi ñaha xii-o nàcuáa cundecu-o cuini-dé —cachí-yu xáháⁿ-yu xii téee cùu gobiernú.

¹⁴ Te té Páblú cuini-dé cani-dé cuèndú ní cùu, te ní ngúita té Gàlión cáháⁿ-dé, te xáhaⁿ-dé xii-yu:

—Nchóhó ñáyiú isràél, cundedóho-ndo tnúhu na cáháⁿ-í-a. Te núu ndécú núú ñⁿ cuèchi ní quide-dé àdi ní sahani-dé ñⁿ ndíyi, te cuu cundáá-xi iha, te cáháⁿ-ndó núu nándi cùu sá ní quide-dé,

¹⁵ àdi dico-ni sá ñⁿ tnúhu ní cáháⁿ-dé, te yáchi-gá chí cuáháⁿ yàcáⁿ ndatnúhu-ndo núú méé-ndó, chí mee-ni sá ñá túú quide-dé nàcuáa cáháⁿ tnúhu sá sánú ichi ñaha xii-ndo cáháⁿ-ndó, te yúhú ñá túú tnàhá iní-í cada ndáá-í ncháa xiáⁿ —cachí-dé xáhaⁿ-dé.

¹⁶ Te ní cudééⁿ-dé, te ní ndeñuhu ñaha-dé xii-yu vechiuⁿ.

¹⁷ Te ñáyiú ñá túú cùu ñáyiú isràél ní tñi-yu té Sòstenés téee yíndaha veñúhu ñáyiú isràél, te ndèhe té Gàlión téee cùu gobiernú ní canihá-yu xii-dé, dico ñá túú tnàhá ná tnúhu ní cáháⁿ-dé taunihnu-dé téee ní caní-yu-áⁿ.

Té Páblú cuáháⁿ tucu-dé ñuú Antióquia, te yàcáⁿ ní xica tucu-dé cuáháⁿ-dé dava-gá ñuú cáháⁿ-dé tnúhu Yá Ndióxi

¹⁸ Te titní-gá nduu ní xíndecu té Páblú ñuú Còrintú, te ní quide ndee iní-dé ncháa ñáyiú ní sándáá iní-xi tnúhu Jèsús, te ní tñi-dé ichi cuáháⁿ-dé distritú Siríá ndihi té Àquilú

ndihi ñadihí té Àquilú-án tã Priscilá, te ní quexió-yu ñuú Cèncreá. Te cùmání-gã tñí-yu ichi quihí-yu ñuú Éfesú, te ní deté díquí tã Páblú, chi ducaⁿ ní xáhaⁿ-dê xii Yá Ndióxi sá ndéé xínu ñⁿ chiúⁿ ní sani iní-dé cada-dé cuendá-gá, te dätñüni deté-dé. Te ní quée-yu bãrcú cuáhãⁿ-yu.

¹⁹ Te ní quexió-yu ñuú Éfesú, te yacáⁿ ní xáhaⁿ tã Páblú sá cündecu té Àquilú ndihi ñadihí-dé, te mee-dê quihíⁿ-dé dava-gá ñuú. Te cùmání-gã caca-dé quihíⁿ-dé, te ní sáhãⁿ-dê veñuhu ñáiyu israél ní ndatnúhu ndihi ñaha-dê xii-yu.

²⁰ Te ní xáhãⁿ-yu sá cündecu-dé titní nduu, te ñã ní cuiñí-dé cundecu-dé.

²¹ Te ní xáhaⁿ-dê:

—Núhú-í chi dacuití xini ñuhu-xi cundecu-í vico coo ñuú Jerusalén, te quixi tucu-í te núu Ndióxi ná cächí-gá, te vitna chí cadá ndé iní —cächí-dé xáhaⁿ-dê xii-yu.

Te ní quée-dé bãrcú cuáhãⁿ-dê.

²² Te ní quexio-dé ñuú Cèsereá, te ní quene-dé bãrcú, te ní xica-dé cuánuhú-dé ñuú Jerusalén, te ní ndexio-dé, te ní dándácõo váha-dé ñáiyu ndècu ichi Yá Ndióxi, te dätñüni ní xica-dé cuáhãⁿ-dê ñuú Antióquia.

²³ Te yacáⁿ ní xíndecu-dé titní nduu, te dätñüni ní tñí-dé ichi cuáhãⁿ-dê. Te ní sáhãⁿ-dê nihíi distritú Gàlaciá ndihi distritú Frigiá. Te ndi tnahá ñuú ní sáhãⁿ-dê ní cáháⁿ-dê ndihi ñáiyu sándáá iní tñuhu Yá Ndióxi, te ní ndúcú ndéé-gã-yu ní quidé-yu nchaa ñacuáa ní xáhaⁿ-dê cadá-yu.

Té Àpolós cáháⁿ-dê tñuhu Yá Ndióxi ñuú Éfesú

²⁴ Te dáva-án ní quexio ñⁿ tée israél ñuú Éfesú, te nani-dé Àpolós, te cùu-dé tée ñuú Alejandriá, te ío váha túha-dé tñuhu Yá Ndióxi, te ío váha ñuhu díquí-dê ñacuáa cáháⁿ-dê,

²⁵ chi sa xini-dé ñacuáa ní xóo cáháⁿ ndii Juáa cütñahá ní xóo dacuándute ndii ñáiyu. Te ío ní cudíi iní-dé ní cáháⁿ-dê nchaa ñacuáa ní cuu cuendá Jèsús, dico vátá dacuáha-gá-dé nchaa tñuhu ní cáháⁿ meé Jèsús.

²⁶ Te ní sáhãⁿ-dê veñuhu ñáiyu israél, te yacáⁿ ní cáháⁿ-dê ní yùhu ní iní-dé. Te ndècu té Àquilú ndihi ñadihí-dé tá Priscilá ndedóho-yu tñuhu ní cáháⁿ-dê, te ní xáhãⁿ-yu sá quihíⁿ-dê vehé-yu, te ní sáhãⁿ-dê, te ní xítñuhu ñahá-yu xii-dé dava-gá tñuhu Yá Ndióxi sá ñã túú xini-dé.

²⁷ Te ní cachí té Àpolós sá quihíⁿ-dê distritú Acáyá, núu xiãⁿ ní cadúha ñáiyu ñuú Éfesú ñⁿ tutú canehe-dé quihíⁿ ndaha ñáiyu sándáá iní tñuhu-gá xíndecu Acáyá. Te xáhãⁿ-yu núú tütú-yu: “Cáhãⁿ váha-ndo ndihi té Àpolós

núu ní quexio-dé”, cächí-yu xáhãⁿ-yu núú tütú-yu. Te ní xica-dé cuáhãⁿ-dê, te ní quexio-dé Acáyá. Te nchaa ñáiyu sándáá iní tñuhu-gá yacáⁿ, diu-ni mee Yá Ndióxi ní chindee ñaha-gá ní sándáá iní ñahãⁿ-yu xii-gá. Te té Àpolós ío váha ní cáháⁿ-dê tñuhu Yá Ndióxi núu-yu, te xiãⁿ ío ní ndúcú ndéé-gã-yu ní quidé-yu chiúⁿ-gá.

²⁸ Te té Àpolós ní ndatnúhu-dé ndihi ñáiyu israél, te ní xíndedóho dava-gá-yu. Te ío váha ní cani-dé cuendú nchaa ñacuáa ní xóo cáháⁿ cue tée ndéé sanaha sã quixí Cristú ñuyúⁿ-a. Te ní cáháⁿ ndáá-dé ní xáhaⁿ-dê sá díúⁿ-ní Jèsús cúu-gã Cristú Yáá ní tendaha Yá Ndióxi ní quixi ñuyúⁿ-a. Te ñáiyu israél xíndatnúhu-yu sá ñã ndáa ñacuáa cáháⁿ-dê, dico ñã ní nihí-yu tñuhu cüñahá-yu xii-dé, chi ío váha ñuhu díquí-dê tñuhu cáháⁿ-dê.

19

Té Páblú ndécú-dê ñuú Éfesú

¹ Te cütñahá ndécú-gã té Àpolós ñuú Còrintú, te ní xica té Páblú cuáhãⁿ-dê tá yáha-dé mee-ni xiti yucu cuáhãⁿ, te ní sáá-dé ndéé ñuú Éfesú. Te ñuú-án ní nanihí tñahá-dê ndihi cue tée sándáá iní tñuhu Jèsús.

² Te ní xicáⁿ tñuhú-dê núu-güedê, te xáhaⁿ-dê:

—¿Sa ní quexio Espiritú Yá Ndióxi ní ngündecu ndihi-ndo ndéé òré ní sándáá iní-ndo Jèsús-ã? —cächí-dé xáhaⁿ-dê xii-güedê.

Te ní xáhaⁿ-güedê:

—Ñã túú xini-ndí sá ío Espiritú Yá Ndióxi —cächí-güedê xáhaⁿ-güedê xii-dê.

³ Te ní xáhaⁿ tucu-dé:

—¿Nása ní cáháⁿ tée ní dacuándute ñaha xii-ndo-i? —cächí-dé xáhaⁿ-dê xii-güedê.

Te ní xáhaⁿ-güedê:

—Ní cáháⁿ-dê ñacuáa ní xóo cáháⁿ ndii Juáa —cächí-güedê xáhaⁿ-güedê xii-dê.

⁴ Te ní xáhaⁿ tã Páblú:

—Ndii Juáa ní dacuándute ñaha ndii xii ñáiyu, chi ní cuiñí-yu sá dáñã-yu nchaa sã cuèhé sá dúhá quidé-yu. Te ní xáhaⁿ ndii xii-yu: “Quindáá iní-ndo tñuhu Jèsús chi dacuití quixi-gá ñⁿ nduu”, duha ní xáhaⁿ ndii Juáa xii-yu —cachí té Páblú xáhaⁿ-dê xii-güedê.

⁵ Te sá dúcãⁿ ní cáháⁿ té Páblú xáhaⁿ-dê xii-güedê, núu xiãⁿ ní sandute-güedê ñacuáa ní dándõo tñuhu Jèsús.

⁶ Te ní sacãⁿ ndodo té Páblú ndahá-dé díquí-güedê, te òré-ni ní quexio Espiritú Yá Ndióxi ní ngündecu ndihi-güedê, te ní nguíta-güedê ní cáháⁿ-güedê tñuhu sá dácáhu iní ñahá Espiritú-gá, tñuhu sá ñã túú xini-güedê cáháⁿ-güedê, te ní cáháⁿ-güedê tñuhu Yá Ndióxi ñacuáa ní dácáhu iní ñahá Espiritú-gá xii-güedê.

7 Te cùu datná úxúú tñahá-güedé.

8 Te té Páblú ní sáháⁿ-dé veñúhu ñáiyu isráél ní cáháⁿ ndihí-dé-yu, te úní yóó ní xínu ní xica cuu-dé veñúhu-yu. Te ío váha ñúhu díquí-dé tñúhu cáháⁿ-dé, núu xiáⁿ ní cuyü-dé ní cáháⁿ-dé, te ní xáhaⁿ-dé sá quindáá iní-yu tñúhu Jèsús, te ducaⁿ te ndíhu ndaha ñaha Yá Ndióxi xii-yu.

9 Te davá-yu ío sáa iní-yu ñá ní cuiní-yu quindáá iní-yu, te ío ní cáháⁿ cuèhé-yu cuendá Jèsús xití veñúhu núu dává-gá-yu. Te té Páblú ní ndee-dé veñúhu cuáháⁿ-dé ndihí ñáiyu sàndáá iní tñúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácuahá ñaha-dé xii-yu.

10 Te úú cuía ducaⁿ ní sáháⁿ-dé scuèlá ní dácuahá-dé ñáiyu. Te nchaá ñáiyu isráél ñáiyu ndècu nihí distritú Asiá ndihí nchaá ñáiyu ñá túú cùu ñáiyu isráél ní xindedóho-yu tñúhu Jèsús.

11 Te té Páblú ío ní chindee ñaha Yá Ndióxi xii-dé ní quide-dé vai núu sá vā yōo tñahí ndacu cada.

12 Te pañú díquí-dé ndihí dóó cándèé núu yíquí-dé ní xicáⁿ-yu nèhé-yu ní sáháⁿ núu ndécú ñáiyu cùhú, te xiáⁿ ní tñiⁿ ñáiyu cùhú ndihí ñáiyu yihí ñaha espíritu cúndihí yucu ñávaha, te ní ndúha-yu.

13 Te ñúu Isráél véxi cue téé tatna xica cuu-güedé quidé tátna-güedé ñáiyu yihí ñaha espíritu cúndihí yucu ñávaha. Te ní nguíta-güedé ní cacu nèhe-güedé Jèsús cuendá quee espíritu-áⁿ yiqui cùñú-yu, te ní xáhaⁿ-güedé:

—Xocuiñi-n, chí cächí Jèsús sá vā cúndècu ndihí-gá-n tée-a. Te diu-ni Jèsús cacú nèhe té Páblú óré cáháⁿ-dé tñúhu-gá—cächí-güedé xáhaⁿ-güedé xii espíritu-áⁿ.

14 Te úsá tñahá-güedé ducaⁿ ní xóo cada-güedé. Te tátá-güedé ní xínani-dé Èsevá, te tée-áⁿ ní cuu-dé dútú cúnúu.

15 Te sá dúcáⁿ ní cáháⁿ-güedé, te ní xáhaⁿ espíritu cúndihí yucu ñávaha-áⁿ xii-güedé:

—¿Te ná cúú nchòhó nñu dayùhú ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhá-í xii-ndo—cächí espíritu-áⁿ xáhaⁿ-xi xii-güedé.

16 Te tée yihí ñaha espíritu cúndihí yucu ñávaha-áⁿ ní ndanchita-dé ní tñiⁿ-dé cue tée quide tátna-áⁿ, te ní ndihí dóó-güedé ní ndátá-dé, te ní dánicuehé ñáhá-dé xii-güedé, te ní xínu-güedé cuáháⁿ-güedé.

17 Te nchaá ñáiyu isráél ndécú ñúu Èfesú ndihí dává-gá ñáiyu ndècu diu-ni ñúu-áⁿ ní nihí-yu tñúhu nàcuáa ní cuu, te ío ní yùhú-yu, te vai-yu ní cächí sá ío càhnu cuu Xitohó Jesucristú.

18 Te dává ñáiyu ní sàndáá iní-xi tñúhu Jèsús ní sáháⁿ-yu núu ndécú té Páblú, ndihí núu ndécú nchàa ñáiyu ní sàndáá

iní tñúhu-gá ní nàhmá-yu nàcuáa ní xóo cadá-yu.

19 Te tití ñáiyu ní xóo cada ndùu nehé-yu tutú-yu ní sáháⁿ núu ndécú nchàa ñáiyu sàndáá iní-xi tñúhu-gá, te yacáⁿ ní ndada cuendá-yu sá ío yahu ní sáha-yu tutú-yu, chí ndéé údicó úxí mìl dihúⁿ cuixíⁿ ní sáha-yu núu ncháá. Te nchaá-yu ní sahmí-yu tutú-yu.

20 Te sátá ní cáyú nchaá tutú-áⁿ, te vai-gá ñáiyu ní tuhá-yu ichi Yá Ndióxi, te ní sáha-yu cuendá sá ío xini ñuhu tñúhu Yá Ndióxi.

21 Te ní cächí té Páblú sá quihíⁿ-dé distritú Macèdoniá ndihí distritú Acáyá, te dátñúni nùhú-dé ñúu Jerusalén, te ducaⁿ te dátñúni quihíⁿ-dé ñúu Rómá.

22 Te ndècu ndihí-dé té Timùteú ndihí té Èrastú cue tée chñdee ñaha xii-dé. Te té Páblú ní xáhaⁿ-dé xii-güedé sá códo nùu-güedé quihíⁿ Macèdoniá, te ní xica-güedé cuáháⁿ-güedé, te mee-dé ní quendóo-dé.

Ñáiyu Èfesú ío dusaⁿ quidè-yu ñúu-yu

23 Te dává-áⁿ ío ní cudèéⁿ-yu núu nchàa ñáiyu ní tuha ichi Yá Ndióxi.

24 Te ñⁿ tée ñúu Èfesú nání-dé Demètriú. Te tée-áⁿ ní xóo canehé chiùⁿ-dé mee-ni dihúⁿ cuixíⁿ ní xóo cadúha-dé veñúhu lihli, dátñá cuiní-ndó càa veñúhu Diáná sá cúú ndiòxi-yu. Te vai dihúⁿ ní xóo nihí-dé ndihí cue tée ní xóo cada chiùⁿ ndihí-dé.

25 Te ní cana-dé cue tée quide chiùⁿ ndihí-dé, ndihí nchaá cue tée quide chiùⁿ ndihí dihúⁿ cuixíⁿ, te ní xáhaⁿ-dé xii-güedé:

—Ñaha-ndo sá ío váha nihí-ó dihúⁿ cuendá chiùⁿ quide-o.

26 Te ñaha-ndo sá cächí té Páblú sá ñà díú ndiòxi cúú sá ní cadúha ñáiyu ñuyú-a. Te ducaⁿ càháⁿ-dé ñúu-ó, te ducaⁿ-ní càháⁿ-dé nihí distritú Asiá, te ío-gá vai ñáiyu sàndáá iní tñúhu cáháⁿ-dé.

27 Te ío úhú nñu na cuíta chiùⁿ quide-o, vá yōo-gá cuaaⁿ sá cadúha-o. Te nguíta-yu cáháⁿ-yu sá veñúhu Diáná ñá túú caváha, te vá cadá càhnu-gá-yu sàndú-ó. Te ñaha-ndo sá ío càhnu cuu Dianá, chí nchaá ñáiyu distritú Asiá quidè càhnu ñahá-yu ndihí ñáiyu xñdecu ní càa xico ñuyúú—cächí té Demètriú xáhaⁿ-dé xii-güedé.

28 Te sá dúcáⁿ ní cáháⁿ té Demètriú, xiáⁿ ní cudèéⁿ-güedé núu té Páblú, te uuⁿ ní cuáá-güedé te cächí-güedé:

—Ío càhnu cuu Dianá sàndú ñáiyu Èfesú!—cächí-güedé.

29 Te nchaá ñáiyu ñúu Èfesú ndí coyo ndí coyo-yu xicáháⁿ-yu. Te tñahá úú cue tée distritú Macèdoniá xicá cùu-güedé ndihí té Páblú, ñⁿ-dé nání-dé Gàyú, te ñⁿ-dé nání-dé Arístarcú. Te ní tñiⁿ-güedé úú cue tée-áⁿ, te

cuánguihu coyo ndihi ñaha-güedë vehe núú quidé-güedë jündá.

³⁰ Te té Páblú cuini-dé quíhu-dé tnàhá-dé vehe-áⁿ cáháⁿ ndihi ñaha-dë ní cùu, te ñá ní dàña cue téé ní sándáá iní tnúhu-gá.

³¹ Te ñⁿ úú cue téé cùnnou distritú Ásiá ní cáháⁿ váha-güedë cuendá té Páblú, te ní xáhaⁿ-güedë xii ñⁿ téé xínu cuechi núú-güedë ní sáháⁿ-dé ní xáhaⁿ-dë xii té Páblú sá vâ quíhu-dé vehe núú quidé-güedë jündá.

³² Te uuⁿ ní cuáá-yu nchaá-yu, te ñá ñⁿ-ní tnúhu ní cáháⁿ-yu, chi ndi ñⁿ tnúhu ní cáháⁿ-yu ñⁿ ñⁿ-yu. Te chitu-gã ñáyiú ñá ní cùnuni iní-yu ná cuendá ní dátacá ñáhá-güedë xití vehe-áⁿ, chi ñá ñⁿ-ní tnúhu ní cáháⁿ-yu.

³³ Te davá-yu ní cáháⁿ-yu sá cuéchi té Lijandrú cúú-xí, chi ní xáhaⁿ ñáyiú isráél xii-dé sá cáháⁿ-dé yuhú-yu chindee tnúhu ñaha-dë xii-yu. Te ní quide-dé ndaha-dé núú-yu sá cündedóho-yu tnúhu cáháⁿ-dé chindee tnúhu ñaha-dë xii-yu yòtnúhu.

³⁴ Te ní cutnùni iní-yu sá téé isráél cúú-dë, te uuⁿ ní cuáá tucú-yu, ñá ní dàña-yu cáháⁿ-dë, te cächí-yu:

—Ío cùnnou Dianá sàndú ñuú Éfesú! — cächí-yu. Te dátáá úú òré ñⁿ-ní tnúhu ní cáháⁿ-yu.

³⁵ Te téé cùu secretariú-ni-gá ní cáháⁿ-dé, te dátñuni cuèé cuèé ní sadí-yu yuhú-yu. Te ní xáhaⁿ-dë xii-yu:

—Nchaa-ndo cündedóho-ndo ñⁿ tnúhu na cáháⁿ-í-a. Ío cùnnou Dianá, te nchaandi túhú ñáyiú sa nàhá-yu sá ncháá-ó ío nèhe cuendá-ó veñúhu-áⁿ. Te nàhá-yu sá nehé cuendá-ó sàndú-áⁿ, chi véxi cuuⁿ-gá andíu.

³⁶ Te vá yòo ñⁿ cächí sá ñá ndáá. Te coto-ndo mèe-ndo, te vá cuidó-ndó cada-ndo, te vá cuidó-ndó cáháⁿ-ndó.

³⁷ Te ná cuendá ndécá-ndó cuè téé-áⁿ véxi, te ñá túú ná ní quide-güedé, te ñá túú ná ní dùhu-güedé veñúhu, te ñá túú cáháⁿ cuéhé-güedé cuendá Diáná.

³⁸ Te núú ío yoo nàa ndihi ñaha xii té Demètriú ndihi cue téé quide chiúⁿ ndihi-dé, te quíhⁿ-güedé cacáⁿ cuéchi-güedé núú cuè téé cùchiuⁿ. Te cue téé cùchiuⁿ na cundóho-güedé núu quehndé-güedé cuéchi-yu àdi ñáhá.

³⁹ Àdi ío-gá ná cuendú ñúhú iní-ndó, te cáháⁿ-ndó òré ná cóó jündá.

⁴⁰ Te ío úhú núu na ñihí téé tàxi tnuni ñáhá xii-o tnúhu sá dúhá ío quide dusaⁿ-o, te cächí-dé sá ndécuechi-o chi ñá túú sándáá iní-ó-dë quesaha-dë. Te ñá túú tnáhi ndúu váha-xi sá dúhá cada-o ní cuu, te vitna duha ní quide-o, te ñá cùnuni iní-ó nása cùñaha-o xii téé tàxi tnuni ñáhá xii-o núu na càna ñaha-dé —cächí téé cùu secretariú xáhaⁿ-dë xii-yu.

⁴¹ Te ní xáhaⁿ-dë sá nùhú-yu te ní ndihí-yu cuánuhú.

20

Té Páblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gá ní quide dusaⁿ-yu, te ní cana ñaha té Páblú xii nchaa ñáyiú sándáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñáhá-dë xii-yu, te ní tñi-dé ichi cuáháⁿ-dé distritú Macèdoniá.

² Te tayáha-dé cuáháⁿ ñⁿ ñⁿ ñuú yíndèhu Macèdoniá. Te cáháⁿ-dé dóho nchaa ñáyiú sándáá iní tnúhu Jèsús nàcuáa cadá-yu, te ní cudí iní-yu cadá-yu nàcuáa cáháⁿ Yá Ndiòxi cadá-yu sá dúcáⁿ ní cáháⁿ-dé dóho-yu. Té ní quexio-dé distritú Grèciá.

³ Te xiáⁿ ní xíndecu-dé úní yóó. Te xiáⁿ quée-dé bàrcú quíhⁿ-dé distritú Siríá ní cùu, te ní ñihí-dé tnúhu sá ndétú ñaha ñⁿ úú cue téé isráél cahni ñaha-güedë xii-dé ní cùu, núu xiáⁿ ní tñi-dé ichi cuáháⁿ-dé ní yáha-dé ichi distritú Macèdoniá.

⁴ Te cuáháⁿ ndihi-dé té Sopátér téé ñuú Bèrea, ndihi té Aristarcú, ndihi ñⁿ téé nàni Segundú. Te ndi ndúú cue téé-áⁿ cúú-güedé cue téé ñuú Tesalónica. Te tnàhá té Gàyú téé ñuú Dèrbé, ndihi té Timíteú cuáháⁿ ndihi-dé, te tnàhá té Tiquicú ndihi té Tròfímú cuáháⁿ ndihi-dé, te úú cue téé-áⁿ cúú-güedé cue téé distritú Ásiá. Te nchaa cue téé-áⁿ cuáháⁿ ndihi-güedé té Páblú.

⁵⁻⁶ Te ní quexio-güedé ñuú Filipú, te yàcáⁿ ní naníhí ñáhá-güedé xii-ndí. Te té Páblú ní tendaha-dé cue téé ndihi-dé cuáháⁿ-güedé ñuú Tròás, te ní xáhaⁿ-dë sá díú-ní yàcáⁿ cundetu ñaha-güedé xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñá túú yìhi levadurá. Te sàtá ní yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexio-ndí ñuú-áⁿ. Te yàcáⁿ ní naníhí tnáhá-ndí ndihi cue téé yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihi-dé ñáyiú ñuú Tròás

⁷ Te ñⁿ nduu ndumíngú ní naníhí tnáhá-ndí ndihi nchaa ñáyiú ní sándáá iní-xi tnúhu Jèsús ní xexi-ndí pàá ndihí-yu. Te ducaⁿ ní quide-ndí, chi ní cächí Jèsús sá dúcáⁿ cada-o cuendá sá vâ nàcuànaa-o sá ní xíhí-gá cuendá naníhí tàhú-ó. Te té Páblú ní ngúita-dé cáháⁿ-dë tnúhu-gá, te cáháⁿ-dë ní cuu dava niú, chi cuendá ná tündáá ingá nduu-áⁿ, te caca-dé quíhⁿ-dë ingá xichi.

⁸ Te ndécú-yu vehe yòdo tnahá, te yíhí-yu ndéé cuàrtú cùu ùní núú ñínu, te càyú víhí ñùhú xití cuàrtú-án.

⁹ Te ìn tée sa ta cùu sacuéhé luha nàni-dé Eùticú ndécó-dé yèhe ventaná, cuíní-dé cúdú-dé, chí ní cunaha víhi cahá té Páblú, te ní tñii ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñahá-yu, te sa ní xihí-dé, chí ío dúcú ní ngava-dé.

¹⁰ Te tñhá té Páblú nchicú-dé ní nuu. Te ní quexio cunu-dé núú cátuu tée ní xihí-án, te ní numi ñaha-ni-dé, te ní xáha-dé xii-yu:

—Vá ndíhú iní-ndó, chí ní ndoto-dé — cächí-dé xáha-dé xii-yu.

¹¹ Te dätñuní cuándaa ndíhi ñaha tùcu-dé xii-yu cuàrtú núú yíhí-yu ní cùu, te yàcá ní xexi ndíhi ñaha-dé xii-yu, dätñuní ní nguíta-dé vai-gá tñuhu ní cahá-dé, te cahá-ni-dé ní tundaá, te dätñuní ní xica-dé cuáhá-dé.

¹² Te tée ní ngava-án ní sánundeca ñahá-yu xii-dé ndéé vehe-dé, te ío ní cudíí iní-yu sá ní ndoto-dé.

Ní quee-güedé ñuu Tròas cuáhá-güedé ñuu Miletú

¹³ Te té Páblú ní cachí-dé sá quíhí-ndí ndíhi bàrcú ndéé ñuu Àsón, te mee-dé caca saha-dé, te yàcá naníhí tñhá-ndí ndíhi-dé te quee-dé bàrcú, te ní quee-ndí bàrcú cuáhá-ndí.

¹⁴ Te ní naníhí tñhá-ndí ndíhi-dé ñuu Àsón, te yàcá ní quee-dé bàrcú tñhá-dé cuáhá-ndí ñuu Mitilené.

¹⁵ Te ní quexio-ndí ndéé ingá nduu yatni ñuu Quíú, te ndéé nduu tñéé ní quexio-ndí ñuu Sámú te yàcá ní yáha-ndí, te ní quexio-ndí ñuu Trògíliú. Te ndéé nduu idá ní quexio-ndí ñuu Miletú.

¹⁶ Te té Páblú ñá ní cuíní-dé yáha-ndí ñuu Éfesú, chí ñá túú ní tñhá iní-dé cuyaa-dé ichi, chí ío ndíhi iní-dé cuendá cuíní-dé quíní-dé núu vá ndácú-dé ndexio-dé ñuu Jerusalén cundecu-dé vico Pentecostés.

Té Páblú cahá ndíhi-dé cue tée yindaha ñaha xii ñáyuu sàndáá iní tñuhu Jesús ñuu Éfesú

¹⁷ Te òré ndécú té Páblú ñuu Miletú, te ní cana-dé cue tée yindaha ñaha xii ñáyuu sàndáá iní tñuhu Jesús ñuu Éfesú sá quíhí-güedé núú ndécú-dé.

¹⁸ Te sátá ní quexio-güedé, te ní xáha-dé xii-güedé:

—Ñaha-ndo nacuaá ní quide-í ndéé cútñahá ní quexio-í distritú Àsiá.

¹⁹ Chí ní quide-í nacuaá ní cahá Yá Ndióxi cada-í, ñá túú ní tñúho-í, te ñá túú ní quide cahnu-í meé-í, te ío ní ndáhyú-í sá quidé dáva-yu, chí ío sáá iní-yu. Te sa ñaha-ndo sá

títní xito ní cuíní ñáyuu israél cahni ñahá-yu xii-í ní cùu, te ío ní ndoho-í ní cácu-í.

²⁰ Te sa ñaha-ndo sá ncháandí túhú sa ní cachí tñuhu-í nacuaá cada-ndo cuendá sá chindée ñaha Yá Ndióxi xii-ndo. Te ní cahá-í tñuhu-gá núú-ndó nchaa-ndo, te ñuu-ni duca ní quixi-í ndí tñhá vehe-ndo ní cahá-í tñuhu-gá núú-ndó.

²¹ Te ní xáha-í xii ñáyuu israél ndíhi ñáyuu ñá túú cùu ñáyuu israél sá dáñá-yu nchaa sá cuèhé sá dúhá quidé-yu te quindáá iní-yu tñuhu Xitohó Jesucristú.

²² Te dacuití quíhí-í ñuu Jerusalén, chí Espiritú Yá Ndióxi ní cachí-xi sá dáí quíhí-í, te ñá túú xini-í nándi cada ñaha-güedé xii-í yàcá te núu na quexio-í.

²³ Te ìn ñuu núú sàhá-í cächí tñuhu Espiritú-gá sá chíhí ñaha-güedé vecaa, te cada úhú ñahá-güedé.

²⁴ Dico ñá túú tñáhi ná cuu cuéi na càhni ñaha-güedé xii-í, dico cuíní-í sá díí iní dandíhi-í nchaa sá ní cachí Xitohó Jesucristú cada-í. Te ní cachí Yá Ndióxi sá cahá-í núú ñáyuu sá ío cùu iní ñahá-gá xii-yu, te naníhí tñáhu-yu núu na quindáá iní-yu tñuhu-gá.

²⁵ Te sa ní cachí tñuhu-í xii-ndo nchaa-ndo sá núu na quindáá iní-ndó Yá Ndióxi, te ndíhu ndaha ñaha-gá xii-ndo. Te na cächí tñuhu-í sá ní ñn nduu-gá vá quíní ñahá-ndó xii-í ñuyiú-a.

²⁶⁻²⁷ Te yúhú ñá túú cuèchi-í núu ío ñáyuu vá naníhí tñáhu, chí sa ní cachí tñuhu-í nchaa sá ní cahá-í meé Yá Ndióxi cada-ndo.

²⁸ Te coto-ndo meè-ndo, te coto-ndo tñhá ñáyuu sàndáá iní tñuhu-gá, chí Espiritú-gá ní cachí-xi sá cúnuu-ndo núu-yu dacuaa-ndó-yu tñuhu-gá. Te cada-ndo cuendá sá dátñá mbéé-ndó cùu-yu, te mee-ndo cùu-ndo datná toli xito-ndó-yu duca cada-ndo cuendá, chí ñaha-ndo sá Jesús ní satí níhí-gá, te ní xihí-gá cuendá naníhí tñáhu-ó ndíhi-yu.

²⁹ Te yúhú sa cùnuni iní-í sá òré ñá túú-gá-í ndécú, te quixi ñáyuu dandáhu ñahá xii-ndo cuendá dañá-ndo tñuhu Yá Ndióxi, te cada ñahá-yu xii-ndo dátñá quidé ññá òré tñii-dí mbéé.

³⁰ Te ñuu-ni ñn úu cue tée ndécú ndíhi-ndo, cue tée-án dacuaandehnde-güedé, te cudana dáva-yu quindáá iní-yu chítnáhá ñahá-yu xii-güedé.

³¹ Te xíá núu cächí tñuhu-í sá ío quíhí iní-ndó cundecu-ndo ndíhi nchaa ñáyuu sàndáá iní tñuhu-gá. Te ñaha-ndo sá yúhú ní xindecu-í úní cuía ní cahá-í tñuhu Jesús núú ñáyuu cuéi nduu cuéi niú. Te áma ní xóo ndáhyú-í, chí ñá ní cuíní-yu quindáá iní-yu nchaa-yu tñuhu ní cahá-í —cächí té Páblú xáha-dé xii-güedé.

³² Te xáha-í tùcu-dé:

—Nchòhó cue tée ndècu ndihi-í ichi Xítohó Jesucristú, ío cuéni-í sá méé Yá Ndióxi chindee ñaha-gá xii-ndo. Te mee-gá ní cáháⁿ-gá sá ío cùdíí iní ñáhá-gá xii-ndo. Te naníhí tãhú-ndó ndihi nchaa ñáyíu cùu cuendá-gá, te chindee ñaha-gá xii-ndo cuendá cada-ndo nchaa sá cáháⁿ-gá.

³³ Te òrè ní xíndecu ndihi ñaha-í xii-ndo, te ní dñhúⁿ ní dóó ñà túú ní cùdíí iní-í.

³⁴ Te mee-ndo sá naha-ndo sá yùhú ní quide chiúⁿ-í, te ní níhí-í nchaa sá ní nandíhí-í ndihi cue tée xica cuu ndihi-í.

³⁵ Te sa ní xini-ndó nàcuáa ní quide-í ní quide chiúⁿ-í, te diu-ni ducaⁿ cada chiúⁿ-ndo cuendá chindee-ndo nchaa ñáyíu ndàhú, chí sa ñaha-ndo nacuáa ní cachí Xítohó Jesucristú, te duha ní cachí-gá: “Cùdíí-gá iní-ó cuáha-o ñáyíu ndàhú sá xini ñùhú-yu dácúxí sá táxi-yu xii mee-o”, duha ní cachí-gá —cachí té Páblú xáhaⁿ-dè xii-güedé.

³⁶ Te sáta dúcáⁿ ní cáháⁿ-dè, te ní ngúíñí xití-dè ndihi dava-gá-güedé, te ní cáháⁿ ndihi-dè Yá Ndióxi.

³⁷ Te sáta ní túhú tnúhu ní cáháⁿ-dè ndihi Yá Ndióxi, te ní ndáhyú víhí-güedé sá quíhíⁿ-dè, te ní numi ñaha-güedé, te ní teyuhu ñaha-güedé.

³⁸ Te ní ndíhú víhí iní-güedé, chí ní xáhaⁿ tẽ Páblú sá ní ñⁿ nduu-gá vã nánihí tnáhá-güedé cáháⁿ ndihi tnáha-güedé. Te cuáháⁿ ndihi ñaha-güedé xii-dé núú ndécú bàrcú.

21

Té Páblú cuáháⁿ-dè ñúú Jerusálén

¹ Te ní quide ndee iní-ndí nchaa cue tée cùnuu. Te ní quée-ndí bàrcú cuáháⁿ ndáá ichi-ndí ñúú Cõs. Te nduu tnéé ní sáháⁿ-ndí ñúú Ròdás, te ní yáha-ndí cuáháⁿ-ndí ñúú Pátará.

² Te yàcáⁿ ní naníhí-ndí ñⁿ bàrcú ñùhú ichi-xi quíhíⁿ-xi distritú Fèniciá, xíáⁿ ní quée-ndí cuáháⁿ-ndí.

³ Te ichi cuáháⁿ-ndí ní xini-ndí distritú Chìpré cáá cuádava xití lámár, te ní yáha-ndí, te ní quendóo ñúú-áⁿ xio dàtni-ndí. Te cuáháⁿ-ndí ñúú Tírú ñⁿ ñúú yíndèhu distritú Siriá cuendá yàcáⁿ tava-güedé nchaa sá nchídó bàrcú.

⁴ Te yàcáⁿ ní naníhí tnáhá-ndí ndihi ñáyíu ní sándáá iní tnúhu Jèsús, te ní xíndecu-ndí úsá nduu ndihi-yu. Te ní xáháⁿ-yu sá vã quíhíⁿ té Páblú ñúú Jerusálén, chí Espiritú Yá Ndióxi ní xáhaⁿ-xi xii-yu sá ndóhó víhí-dé nùu na quíhíⁿ-dè.

⁵ Te sáta ní yáha nduu úsá, te ní quée-ndí cuáháⁿ-ndí yuhu lámár. Te ní quée nchaa ñáyíu ní sándáá iní tnúhu-gá, tée, ñadihí, nchaa landú, nchaa-yu ní sándeca ñáhá-yu

yuhu lámár, te òrè ní quexió-ndí, te ní ngúíñí xití-ndí ní cáháⁿ ndihi-ndí Yá Ndióxi.

⁶ Te ní quide ndee iní tnáhá-ndí ndihi-yu, te dàtnùní ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñùhú-ndí ní quée-xi ñúú Tírú cuáháⁿ-ndí ndihi-xi ñúú Tolémaídá. Te xíáⁿ ní sáá-xi te ní quene-ndí, te ní sáháⁿ-ndí ní cáháⁿ ndihi-ndí nchaa ñáyíu sándáá iní-xi tnúhu Jèsús, te ní xíndecu-ndí ndihi-yu ñⁿ nduu.

⁸ Te nduu tnéé ní ndée tucu-ndí bàrcú cuáháⁿ-ndí ñúú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpè cundecu-ndí ndihi-dé. Te tée-áⁿ ní xóo cada chiúⁿ ndihi-dé ífú-gá cue tée ní chindee ñaha xii ñáyíu sándáá iní tnúhu-gá ñúú Jerusálén ní xóo cuáñaha-güedé sá ní xóo caxí-yu. Te dàtnùní mee-nã tnúhu Yá Ndióxi cáháⁿ-dè xicá cùu-dé.

⁹ Te té Lìpè-áⁿ ndècu cúmí dèhe dñhí-dé, te ní ñⁿ-yu vátá ndúcú ñaha-gá tée xii-yu, te nchaa-yu cáháⁿ-yu tnúhu Yá Ndióxi tnúhu sá dácáhu iní ñáhá mèe-gá.

¹⁰ Te xíáⁿ ní cuu titní nduu ndècu-ndí, te ní quexió ñⁿ tée nani Agabú ñúú-áⁿ, véxi-dé distritú Judeá, te tée-áⁿ tnáhá-dé cáháⁿ-dè tnúhu Yá Ndióxi.

¹¹ Te ní níhí-dè tnúhu núú ndécú-ndí nùu ní quixi-dé ní cáháⁿ ndihi ñaha-dè xii-ndí. Te ní xicáⁿ-dè cinchú té Páblú, te ní ngóo-dé, te ní ngúita-dé ní dácútú-dè sáhá-dè ndihi ndaha-dé, te ní cachí-dé xii-ndí:

—Espiritú Yá Ndióxi ní cachí-xi sá tée dii cinchú-xi-a tñi ñaha cuè tée isràél ñúú Jerusálén, te duha dacùtu ñaha-güedé xii-dé, te cuáha cuendá ñáhá-güedé xii-dé núú cuè tée ñúú Rómá. Duha ní cáháⁿ Espiritú-gá —cachí té Ágabú.

¹² Te sá dúcáⁿ ní cáháⁿ-dè, te ní xáhaⁿ-ndí nchaa-ndí sá vã quíhíⁿ té Páblú ñúú Jerusálén.

¹³ Te té Páblú ní cachí-dé:

—¿Ná cuendá ndéé dúcáⁿ ndàhyú-ndó dándihú iní ñáhá-ndó xii-í-í? Te ñá túú nã cuu cuéi na dácùtu ñaha-güedé, àdi cuéi na càhni ñaha-güedé xii-í cuendá sá cáháⁿ ndihi-í Jèsús, chí sa ndècu túha-í sá cùu-í —cachí-dé.

¹⁴ Te ñá túú ní sándáá iní-dé sá dúcáⁿ xáhaⁿ-ndí, núu xíáⁿ ñá túú-gá ná ní xáhaⁿ-ndí xii-dé sá vã quíhíⁿ-dè, te ní xítñaha-ndí:

—Mee-ni-gá Yá Ndióxi ná cùnaha-gá nasa sàni iní-gá cada-gá —Xitñaha-na-ndí.

¹⁵ Te ní quèheⁿ-ndí ndàchiuⁿ-ndí, te ní xica-ndí cuáháⁿ-ndí ñúú Jerusálén.

¹⁶ Te cuáháⁿ ndihi-ndí ñⁿ úú cue tée Cèsareá, cue tée ní sándáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàsón, te tée-áⁿ cùu-dè tée distritú Chìpré,

te ndècu-dé ñúu Jerusalén, te sa ní cuu vâi nduu ní sândáá iní-dé tnúhu-gá, te vehe té-án ní xíndecu-ndí.

Té Páblú ndátnúhu-dé ndihi té Jácobó

17 Te òré ní quexio-ndí ñúu Jerusalén, te nchaa ñáiyu ní sândáá iní tnúhu Jèsús ní quixí-yu ní dándácóo váha ñáhá-yu, chí ní cudíí víhí iní-yu sá ní quexio-ndí.

18 Te nduu tnèé cuáháⁿ ndihi-ndí té Páblú cuendá cáháⁿ ndihi-ndí té Jácobó, te òré ní quexio-ndí núu ndécú-dé, te ndècu ndihi-dé nchaa cue téé yíndaha ñaha xii ñáiyu sândáá iní tnúhu Jèsús.

19 Te té Páblú ní dándácóo váha ñaha-dé xii-güedé, te ní xáhaⁿ-dè nácuáa ní quide Yá Ndióxi ní chindee ñaha-gá xii-dé ní cáháⁿ-dé tnúhu-gá núu ñáiyu ñá túu cùu ñáiyu isràél.

20 Te sáta ní yáha ní cáháⁿ-dé, te ní ndácáⁿ táhú-yu núu Yá Ndióxi cuendá nchaa sá ní quide-gá. Te dátñuní ní xáhaⁿ-güedé xii té Páblú:

—Yòhó sa náha-n sá ní cuu titní mîl ñáiyu isràél ní sândáá iní-yu tnúhu Jèsús, te cächí-yu sá ño xini ñuhu-xi cadá-yu nchaa nácuáa cáháⁿ tnúhu sá ní chídó tnùní ndí Moisés.

21 Te ní níhí-yu tnúhu sá dácua-ha ñáiyu isràél ñáiyu ndècu ñúu xicá cuendá sá vâ cadá-gá-yu nácuáa ní cachí ndí Moisés cadá-yu. Te xáhaⁿ-n xii-yu sá vâ cuáha-gá-yu seña ñii landú-yu, te vâ cadá-gá-yu dátñá ní xóo cada ñáiyu ndéé sanaha, duha dácua-ha ñáiyu ní níhí-yu tnúhu.

22 Te na níhí-yu tnúhu sá ndécú-n íha, te tnáví ngúita-yu cáháⁿ cuèhé-yu cuendá-n.

23 Te na cächí tnúhu-ndí nácuáa cada-n. Ndècu cümü cue téé vátá cadá-gá-güedé nácuáa ní cáháⁿ méé-güedé sá cadá-güedé cuendá nduu vétú iní Yá Ndióxi.

24 Te quihíⁿ-n ndihi-güedé te cada-n ncháa nacuaá ní xóo cada ñáiyu ndéé sanaha cuendá nduu vétú iní Yá Ndióxi. Te tava-n díhúⁿ cuu núu-güedé cháhu-güedé veñúhu, te ducaⁿ te dátñuní ndacu deté díquí-güedé. Nchaa xiáⁿ cada-n, te quini ñáiyu sá ñá ndáá tnúhu cáháⁿ nchaa ñáiyu cáháⁿ cuèhé cuendá-n. Te na cütñuní iní-yu sá tnáhá-n quide-n nchaa nacuaá ní chídó tnùní ndí Moisés cadá-yu.

25 Te sa ní quide ndáá-ndí cuendá nchaa ñáiyu ñúu xicá, nchaa ñáiyu ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáiyu-án sá vâ cáxi-yu nchaa sá nchító-ó nduu táhú nchaa sá cächí-yu cùu ndiόxi ní cadúha cue ñáiyu ñuyú-a. Te ní xáhaⁿ-ndí sá vâ cáxi-yu níhí, te vâ cáxi-yu cuñú nchaa quiti cuèhné. Te vâ cáháⁿ ndihi cue téé ñadihí te núu ñá díú ñadihí-güedé cùu-yu, te ní cuè ñáiyu díhí

vâ cáháⁿ ndihi-yu téé te núu ñá díú yí-yu cùu-güedé. Duha ní tee-ndí núu tütú cuáháⁿ —cächí-güedé xáhaⁿ-güedé xii té Páblú.

Ní tñi-güedé té Páblú xiti veñúhu ñáiyu isràél

26 Te nduu tnèé cuáháⁿ té Páblú ndihi cümü cue téé veñúhu cáhnu sá ño cùnnu núu ñáiyu isràél cada-güedé nácuáa ní xóo cada ñáiyu ndéé sanaha cuendá nduu vétú iní Yá Ndióxi. Te ní quíhu-dé veñúhu cáhnu sá ño cùnnu-án ní xáhaⁿ-dè ná daha-gá nduu cümání dandihí-güedé nácuáa ní xóo cada ñáiyu ndéé sanaha, te dátñuní cânehe-güedé sá ndúú táhú Yá Ndióxi quihíⁿ veñúhu.

27 Te cümání-gá cuu úsá nduu sá ní sáháⁿ-güedé veñúhu cáhnu sá ño cùnnu, te sa ndècu tucu té Páblú veñúhu. Te cue téé isràél véxi distritú Asía ní xini-güedé té Páblú yíhí-dé veñúhu, te ní tñi ñaha-güedé xii-dé, te ño ní cáháⁿ cuèhé-güedé cuendá-dé núu dáva-gá ñáiyu yihí veñúhu cuendá sá cüdèèⁿ-yu núu té Páblú.

28 Te níhí ní cáháⁿ-güedé, te xáhaⁿ-güedé xii-yu:

—¡Nchòhó ñáiyu isràél, yáchí-ndó chí cuánündaha ñaha-ndo! Chí té-é a yayácáⁿ cuáháⁿ-dé cáháⁿ-dé sá ñá túu nándihí-o, te cáháⁿ-dé sá vâ cadá-ó ncháa nacuaá cáháⁿ tnúhu sá ní chídó tnùní ndí Moisés, te cächí-dé sá ñá túu nándihí veñúhu-a. Te ñá díú-ní xiáⁿ chí sa ní quíhu-dé veñúhu-a ndihi cue téé ñá túu cùu ñáiyu isràél, te sá dúcáⁿ ní quide-dé, te ñá túu-gá ní cânehe í-dé xiti veñúhu. Te veñúhu-a cùu-xi vehe Yá Ndióxi —cächí-güedé xáhaⁿ-güedé xii-yu.

29 Te ducaⁿ ní cáháⁿ-güedé chí ní sani iní-güedé sá ní quíhu ndihi-dé té Trófimú veñúhu-güedé, chí ní xini-güedé xicá cùu ndihi ñaha-dé xiti ñúu. Te té-éⁿ cùu-dé téé ñúu Efesus, te ñá díú téé isràél cùu-dé.

30 Te chitu ñáiyu ñuu-án ní tacá-yu ní tñi-yu té Páblú táñúhu ñahá-yu ní ndee veñúhu cáhnu sá ño cùnnu, te òré-ni ní nacadí-güedé yèhe veñúhu-án.

31 Te sa cahní-yu té Páblú ní cùu, te ní sáháⁿ ñúu-güedé núu ndécú téé cùu capitáⁿ cùnnu-gá, te ní xáhaⁿ-güedé xii-dé sá ncháá ñáiyu ñúu Jerusalén xinàá-yu.

32 Te òré-án cuáháⁿ téé cùu capitáⁿ cùnnu-gá ndihi dáva-gá cue téé nchicúⁿ-gá ndihi sandadú-dé. Te òré ní xini-yu ní quexio coyo-güedé núu xixúcu-yu, te ní yùhú-yu ñá túu-gá ní caní-yu té Páblú.

33 Te téé cùu capitáⁿ ní sátuha-dé té Páblú, te ní xáhaⁿ-dè xii cue sandadú-dé sá tñi ñaha-güedé dacutu ñaha-güedé úú cadèná. Te dátñuní ní xicáⁿ tnúhú-dé núu-yu, te xáhaⁿ-dè:

—¿Ná cúú tēe-a? ¿Ná ní quide-dé? —
càchí-dé xāhaⁿ-dē xii-yu.

³⁴ Te tēe cūu capitáⁿ-áⁿ ñā ní cūtnuní iní-dé nūu ná cúú sá ní quide té Pāblú, chí uuⁿ ní cuáá-yu. Te tucu cāháⁿ ñⁿ, tucu cāháⁿ ñⁿ-yu, núu xiáⁿ ní xāhaⁿ-dē cue sandadú-dé sá cándēca ñaha-güedé xii-dé quíhíⁿ cuartél nūú ndécú-güedé.

³⁵⁻³⁶ Te nchicúⁿ ñáhā-yu cuáhāⁿ ní quexio ndéé nācuáa cāa nchio cuiní-yu cahni ñáhā-yu xii-dé ní cūu. Te níhi ní cāháⁿ-yu xāháⁿ-yu sá cáhni ñaha-güedé, te xiáⁿ ní ndacani ñaha-güedé ndécá ñaha-güedé cuáaá nchio-áⁿ.

Té Pāblú xāhaⁿ-dē xii-güedé sá ñā túú cuēchi-dé

³⁷ Te cuánguihu-güedé cuartél ndihi té Pāblú ní cūu, te ní xāhaⁿ-dē xii tēe cūu capitáⁿ cūnūu-gá:

—Cāháⁿ ndāhú-í nūú-n cūndetu-n na cūñaha-í ñⁿ úú tnúhu xii-yu —cāchí-dé xāhaⁿ-dē.

Te tēe tāxi tnuní-áⁿ ní xāhaⁿ-dē:

—¿Nāa tnāhá yòhó cāháⁿ-n tnúhu griégú?

³⁸ Te ní cāháⁿ-í sá tēe ègíptú cūú-n, chí diu-n ní ndúcú-n cuē tēe ní nāá ndihi tēe cūchiuⁿ Cēsár ní cāháⁿ-í, chí diu ñⁿ tēe yacáⁿ ní ndúcú-dé cúmí ml cue tēe ní sahni ndáyi. Te ndēca tnaha-güedé ní sáháⁿ xití yucu ní xíhi váha-güedé —cāchí-dé xāhaⁿ-dē xii té Pāblú.

³⁹ Te té Pāblú ní xāhaⁿ-dē:

—Ñā díú tēe ègíptú cūú-í, chí tēe isráel cūú-í, chí diu ní tēe isráel cūú tātá-í, te dícú-í sá ní cacu-í ñuú Tārsú ñuú cáhnú, te ñuú-áⁿ yindēhu-xi distritú Ciliciá. Te cuiní-í cada ndee iní-n dāña-n na cāháⁿ ndihi-í-yu —cāchí-dé xāhaⁿ-dē.

⁴⁰ Te ní xāhaⁿ tēe cūu capitáⁿ cūnūu-gá sá cúú cāháⁿ té Pāblú, nūu ní ngúnutnii-dé nūú nchio, te ní quide-dé ndaha-dé sá cūndédóho-yu. Te ní sadí-yu yuhú-yu, te ní cāháⁿ-dē tnúhu ñāyi isráel, te xāhaⁿ-dē xii-yu:

22

¹ —Chí cādá cāhnu iní nchóhó cue tēe sa cuéhe ndihi nchóhó cue tēe cuechi, na cāháⁿ-í ñⁿ tnúhu cūndedóho-ndo sá ñā túú cuēchi-í, chí ñā túú nā ní quide-í, te ní ñā túú nā tnúhu cāháⁿ-í —cāchí-dé xāhaⁿ-dē xii-güedé.

² Te cuendá sá dúcáⁿ ní cāháⁿ-dē tnúhu mēe-yu nūu tnáví-nā ní sadí-yu yuhú-yu ní xíndedóho-yu ní cāháⁿ-dē, te xāhaⁿ-dē:

³ —Yuhú cūú-í tēe isráel, te ní cacu-í ñuú Tārsú, te ñuú-áⁿ yindēhu-xi Ciliciá. Te davitna líhli-í cūtnāhá ní quexio-í ñuú Jerusalén ní dācuáhā ñaha té Gamaliél. Te ní dācuáhā-í nchaa tnúhu ní chídó tnuní nchaa cue tēe ndéé sanaha nācuáa cada ñāyi. Te

yuhú ní cahu iní-í ní quide-í titní nūu chiúⁿ nacuáa cuu váha iní Yá Ndióxi ní cāháⁿ-í, te diu-ni ducaⁿ quide nchóhó tucu.

⁴ Te ní sánú ndúcú-í nchaa ñāyi sándáá iní-xi tnúhu Jēsús, cuēi tēe, cuēi ñāyi díhí ní dácútu-í-yu, te ní chíhi-í-yu vecaá, te ní níhi-í tnúhu ndee iní sá cáhni-ndí-yu.

⁵ Te dútú cūnūu-gá ndihi cue tēe cūnuu nūú-ndó ñaha-güedé sá ndáá cāháⁿ-í chí mee-güedé ní taxi-güedé tutú cuñaha-í xii ñāyi isráel ñāyi ndēcu ñuú Dāmascú cuendá cutnūní iní-yu ná chíúⁿ cuáhāⁿ-í ní cūu. Te ñūhu-í ichi cuáhāⁿ-í ñuú-áⁿ cuánúndúcú-í ñāyi ní sándáá iní-xi tnúhu Jēsús cuendá dácútu-í-yu te candeca-í-yu ndixi, te iha cada úhú ñáhā-güedé xii-yu ní cūu.

Té Pāblú xāhaⁿ-dē xii ñāyi nācuáa ní cuu ní tuha-dé ichi Jēsús

(Hch. 9:1-19; 26:12-18)

⁶ Te ta cūyatn-í ñuú Dāmascú cuáhāⁿ-í, te cūu-xi datná óre caúxútu nduu, te uuⁿ ní quee ñuhú andiū, te ní dáyhéhe-xi ndéé nūú nūtní-í.

⁷ Te ní quide nee-xi nūú-í, xiáⁿ ní nduá-í ndéé ñūhu. Te ní tecú dóho-í cāháⁿ ñⁿ sá cāháⁿ andiū, te cāchí-xi: “Yòhó té Sāulú, ¿ná cuendá cúú úhú iní ñáhā-n dāndoho ñaha-n xii-í?”, cāchí sá cāháⁿ-áⁿ.

⁸ Te ní xāhaⁿ-í: “¿Ná cúú yòhó sá cāháⁿ-áⁿ?”, xāhaⁿ-í. Te ní cāháⁿ tucu ingá xito te cāchí-xi: “Yuhú cūú-í Jēsús tēe ní xíndecu ñuú Nazàret, te ducaⁿ ño dāndoho ñaha-n xii-í”, cāchí sá cāháⁿ-áⁿ. Te xiáⁿ ní cutnūní iní-í sá díú Jēsús cāháⁿ.

⁹ Te nchaa cue tēe ndihi-í ní xini-güedé ní dáyhéhe ñuhú, te ní yuhú-güedé, dico ñā túú ní tēcú dóho-güedé óre ní cāháⁿ-gá.

¹⁰ Te ní xāhaⁿ-í xii-gá: “Yòhó Xítohó Jesucristú, ¿ná cuiní-n cada-í?”, xāhaⁿ-í xii-gá. Te ní cāchí-gá: “Ndacóo, te quíhí-n ñuú Dāmascú, yacáⁿ tecú tnúhu-n nchāa nacuáa cuiní Yá Ndióxi cada-n”, cāchí-gá —cāchí té Pāblú xāhaⁿ-dē xii-yu.

¹¹ Te ní xāhaⁿ tūcu té Pāblú:

—Te cuendá sá ní dācuáá ñaha ñuhú xii-í nūu ní tnūi cue tēe ndihi-í ndaha-í ndécá ñaha-güedé cuáhāⁿ ndéé ñuú Dāmascú.

¹² Te yacáⁿ ndécú ñⁿ tēe nāni Ananiás, te ío vai sá ní chídó tnuní ndí Moisés cadá-yu quide-dé. Te nchaa ñāyi ñuú Dāmascú ío váha cāháⁿ ndihi ñáhā-yu xii-dé.

¹³ Te ní quexio-dé nūú ndécú-í, te ní cāchí-dé: “Yòhó té Sāulú, tēe ndēcu ndihi-í ichi Xítohó Jesucristú, ndúha nūú-n”, cāchí-dé. Te óre-ni ní nacaáⁿ nūú-í te ní xini-í-dé.

¹⁴ Te dātnūn-í ní cāchí-dé: “Yá Ndióxi ní cāháⁿ ndihi-gá ñāni tnāhá-ó ní xíndecu ndéé sanaha. Te diu-gá ní cāxi ñaha-gá

xii-n cuendá quini-n nchàa sá vâha cuini-gá cada-n. Te quini-n Jêsus Yaá ñá túú cuêchi-xi, te diu-ni mee-gá cáháⁿ ndihi ñaha-gá xii-n.

¹⁵ Te cáháⁿ-n tnûhu Jêsus núú nchàa ñâyiu, te cáháⁿ-n nchàa sá ní xini-n ndihi nchaa sá ní xindédôho-n.

¹⁶ Tnâvíí, te quíhíⁿ-n cuandute-n, te cáháⁿ ndihi-n Yá Ndiôxí cuendá cada càhnu iní-gá nchaa sá cuèhé sá dúhá ní quide-n”, duha ní cachí té Ananiás xii-í —càchí té Pâblú xâhaⁿ-dê xii-yu.

Té Pâblú ní cani-dé cuendú nâcuáa ní xâhaⁿ Jêsus cada-dé quíhíⁿ-dê ñuú núú xîndecu ñâyiu ñá túú cùu ñâyiu isrâél

¹⁷ Te ní xâhaⁿ tucu té Pâblú:

—Te ní ndee-í cuândixi-í ñuú Jerusalén. Te ní sâháⁿ-í veñúhu càhnu sá ïo cùnunu ní cáháⁿ ndihi-í Yá Ndiôxí, te ní dâcótó núú ñâhá-xí sâ meé Jêsus ní xini-í xití veñúhu,

¹⁸ Te ní cachí-gá: “Yâchí, quee-n ñuú Jerusalén, chi ñâyiu-a vá quindáá iní-yu nâcuáa ní cachí-í cûñaha-n xii-yu cuendá-í”, duha ní cachí-gá xii-í.

¹⁹ Te ní xâhaⁿ-í xii-gá: “Yòhó Xítóhó Jesu-crístú, sa xini-n sâ nchâá ñâyiu nahâ-yu sá ní sâháⁿ-í ndi tnahá ïⁿ ndi tnahá ïⁿ veñúhu nânducu-í ñâyiu sândáá iní tnûhu-n, te ní tnií-í-yu, ní chihi-í-yu vecaá, te ní táuchíuⁿ-í ní caniha-güedê xii-yu.

²⁰ Te cûtnâhá ní sahani-güedê ndí Têvá tée ní xóo cáháⁿ tnûhu-n, te tnahá-í ndécú òrê-án te ní xindêé-í dóo cue tée ní sahani ñaha xii ndí. Te yúhú ní cáháⁿ-í sá ní quide vâha-güedê sá dúcáⁿ ní quide-güedê”, duha ní xâhaⁿ-í xii-gá.

²¹ Te ní cachí tnûhu-gá xii-í: “Cuaháⁿ chi cuini-í quíhíⁿ-n nchàa ñuú xicá núú xîndecu cue ñâyiu ñá túú cùu ñâyiu isrâél cáháⁿ-n tnûhu-í”, càchí-gá —càchí té Pâblú xâhaⁿ-dê xii-yu.

Te Pâblú ndihi tée tàxi tnuní ñâhá xii cue sandadú

²² Te sá dúcáⁿ ní cáháⁿ-dê, te ñá ní tnahá-gá iní-yu cundédôho-yu tnûhu cáháⁿ-dê. Te ïⁿ-ní ní cuú-yu ncháa-yu, te ní cuáá-yu, te xâháⁿ-yu:

—¡Chí cáhni-dê! ¡Ñá díú sá cûndêcu-dê ñuyú-a! —càchí-yu xâháⁿ-yu.

²³ Te mei òrê ducaⁿ ní cáháⁿ-yu, te ní ndátâ-yu dóo-yu, te ní dáquênê-yu núú nînu sá sâtú iní-yu. Te ní quêhnu-yu ñuhu, te ní dâcâcòyò-yu núú nînu sá ïo sâtú iní-yu.

²⁴ Te tée cùu capitáⁿ cùnunu-gá ní xâhaⁿ-dê xii cue sandadú-dê:

—Chí dítâ-dê ná quíhu-dê ndéé xití vehe, te cani-ndo-dê ñii, chi na quêne yuhu-dê ná tnûhu ní cáháⁿ-dê núú ndéé dúcáⁿ cùdêéⁿ-yu núú-dê —càchí-dê xâhaⁿ-dê xii-güedê.

²⁵ Te sátâ ní dâcútú ñaha-güedê xii té Pâblú sá caní ñaha-güedê ní cùu, te ní xâhaⁿ-dê xii tée cùu capitáⁿ ndécú-án:

—Te na càchí tnûhu-í sá vâ cúú caniha-güedê ñii, chi tée rómá cùu-í, te vátâ quini ndáá-gá-ndó núú ndêcuêchi-í ádi ñâhá —càchí-dê xâhaⁿ-dê xii tée cùu capitáⁿ.

²⁶ Te sá dúcáⁿ ní cáháⁿ-dê, te ní sâháⁿ tée cùu capitáⁿ núú tée cùnunu-gá, te ní xâhaⁿ-dê:

—Vá cúú cani-o tée-án, chi tée rómá cùu-dê —càchí-dê xâhaⁿ-dê.

²⁷ Te ní sâháⁿ tée cùu capitáⁿ cùnunu-gá ndéé núú té Pâblú, te ní xâhaⁿ-dê:

—Cáháⁿ ndáá-n núú ndisa tée rómá cùu-n —càchí-dê xâhaⁿ-dê.

Te ní xâhaⁿ té Pâblú:

—Ndáá sá tée rómá cùu-í —càchí té Pâblú xâhaⁿ-dê xii tée cùnunu-án.

²⁸ Te ní xâhaⁿ tée cùnunu-án:

—Yúhú tnahá-í cùu-í tée rómá, chi vâi díhúⁿ ní cháhu-í —càchí-dê xâhaⁿ-dê.

Te té Pâblú ní xâhaⁿ-dê:

—Tnahá-í cùu-í tée yâcáⁿ tucu, chi tàtâ-í cùu-dê tée rómá —càchí té Pâblú xâhaⁿ-dê xii tée cùu capitáⁿ cùnunu-gá.

²⁹ Te uuⁿ ní nacaca sata cuè tée cuaháⁿ caniha xii-dê ní cùu. Te ní yúhú tée tàxi tnuní sá dúcáⁿ ní xâhaⁿ té Pâblú sá tée rómá cùu-dê, chi ní xâhaⁿ-dê ní dâcútú ñaha-güedê xii-dê, núú xiáⁿ ní yúhu-dê.

Té Pâblú ní cáháⁿ ndihi-dê cue tée cùnunu oré ní quide-güedê jündá

³⁰ Te tée tàxi tnuní sandadú ñá ní xini-dê ná cuêchi ní dâcáá ñâyiu isrâél díquí té Pâblú, núú xiáⁿ nduu tñêé ní cana-dê cue dútú cùnunu, ndihi cue tée cùchiuⁿ, ndihi cue tée cùu sacuéhé, te ní xâhaⁿ-dê sá cadá-güedê jündá cuendá nducu tnûhu-güedê núú té Pâblú ná cuéchi ní dâcáa-yu díquí-dê. Te ní xâhaⁿ-dê xii cue sandadú sá nândaxi ñaha-güedê cadená ndútú-dê, te candeca ñaha-güedê quíhíⁿ núú cadá-güedê jündá. Te ní sâháⁿ-güedê ní nandaxi ñaha-güedê xii-dê ndécá ñaha-güedê cuaháⁿ jündá, te ní quexiò-güedê, te ní ngúnutnií-dê núú cuè tée cùchiuⁿ.

23

¹ Te yâcáⁿ ní xindéhé vâha té Pâblú núú nchàa-güedê, te ní xâhaⁿ-dê:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í càchí tnûhu-í sá ñá túú cuêchi-í, chi mee Yá Ndiôxí nahá-gá nása ndêcu-í ñuyú-a, te ñá túú cùcahaⁿ núú-í núú-gá —càchí té Pâblú xâhaⁿ-dê xii-güedê.

² Te té Ananiás tée cùu dútú cùnunu-gá ní xâhaⁿ-dê xii cue tée nütmií yatni díñí té Pâblú sá caní-güedê déhndé yuhu-dê.

³ Te té Pâblú ní xâhaⁿ-dê xii dútú-án:

—Yòhó, chi úhú tnàhí iní-n, chi ní ndúcú-n tée ní caniha xii-í, te ñá túú cuèchi-í, dico quiní-n nã cada ñaha Yã Ndiòxí xii-n. Te yòhó ní cana ñaha-n ndùcu tnúhu-n nùu quide-í nchaa nàcuáa cãháⁿ tnúhu sá ní chídó tnúni ndí Moisés cada-o. Te mee-n ní ndúcú-n tée ní caniha, te ñá túú dùcaⁿ ní cãháⁿ ndí cada-o —cãchí té Pãblú xãhaⁿ-dè xii dútú cúnúu-gá-áⁿ.

4 Te cue tée xínutnî ðîñî té Pãblú ní xãhaⁿ-güedè xii-dé:

—Nèhé ní quide-n chi ní xícuehè-n dütú cúnúu-gá tée xínu cuechi núú Yã Ndiòxí —cãchí-güedè xãhaⁿ-güedè xii té Pãblú.

5 Te té Pãblú ní xãhaⁿ-dè xii-güedè:

—Cada cãhu iní-ndó chi ñá túú xini-í sá dütú cúnúu-gá cúú-dè, chi núú tütú Yã Ndiòxí cãchí-xi sá vã cúú cãháⁿ cuèhé-ó cuèndá ñⁿ tée cúnúu ñúú-ó yòtnúhu. Te yúhú ñá túú xini-í sá tée cúnúu cuu-dé nùu ní sácóo-í ní cãháⁿ-í —cãchí té Pãblú xãhaⁿ-dè xii-güedè.

6 Te òrè-áⁿ ní cutnùni iní té Pãblú sá dáva-güedè cündîhi-güedè cue tée cùu saducéú, te dava-güedè cündîhi-güedè cue tée cùu fariséú, te níhi ní cãháⁿ-dè ní xãhaⁿ-dè xii-güedè:

—Yúhú cùú-í tée fariséú, te tnàhá tàtà-í ndîhi xii-í cúú-güedè cue tée fariséú tucu. Te tnàhá yúhú sãndáá iní-í sá ndótó nchaa ñáyiu ní xihí, te núu xiãⁿ cuiní-ndó ndùcu tnáhu-ndo nùú-í caná ñaha-ndo —cachí-dè xãhaⁿ-dè xii-güedè.

7 Te sá dúcáⁿ ní cãháⁿ-dè xiãⁿ ní nãá ndîhi tnàha cue tée cùu fariséú ndîhi cue tée cùu saducéú, chi ñá ñⁿ-ní tnúhu ní cãháⁿ-güedè, chi ní ndí queheⁿ ndí queheⁿ-güedè sá ní cãháⁿ-güedè.

8 Te cue tée cùu saducéú cãchí-güedè sá vã ndótó cuè ñáyiu ní xihí, te cue tée cùu fariséú cãchí-güedè sá ndótó-yu. Te cue tée cùu saducéú cãchí-güedè sá ñá túú espíritú xínú cuèchi núú Yã Ndiòxí, te cue tée cùu fariséú cãchí-güedè sá ío espíritú xínú cuèchi núú-gá.

9 Te ta cüdèéⁿ-güedè cuáháⁿ, te níhi-gá cúú ñí-güedè cãháⁿ-güedè, te ñⁿ úú cue tée cùu fariséú cue tée ðacuaha ñaha xii ñáyiu nchaa tnúhu ní chídó tnúni ndí Moisés ní cãháⁿ níhi-güedè, te xãhaⁿ-güedè:

—Ñá túú cuèchi-dé, te cudana te ní cãháⁿ ndîhi-dé ñⁿ espíritú xínú cuèchi núú Yã Ndiòxí te vã ngóo vã cúú váha iní-ó núú-gá —cãchí cue tée cùu fariséú xãhaⁿ-güedè xii-güedè.

10 Te cuèndá sá ío xínàá-güedè, xiãⁿ ní yúhú tée cùu capitáⁿ cúnúu-gá sá cãhní-güedè té Pãblú, núu xiãⁿ ní xãhaⁿ-dè sá quihíⁿ-güedè cúnúcuaca ñaha-güedè candeca ñaha-güedè nùhú cuàrtél.

11 Te ndéé niú cúú ùú ní quexio Xítóhó Jesucristú núú ndécú té Pãblú, te ní xãhaⁿ-gã:

—Ñíi cunduu-n, vã yúhú-n, chi nàcuáa ní cãháⁿ-n ní cacunehe ñaha-n xii-í iha, te ðiu-n ducaⁿ cãháⁿ-n cãcunehe ñaha-n xii-í quihíⁿ-n ñúú Rómá —cãchí-gã xãhaⁿ-gã xii-dé.

Cahni-güedè té Pãblú ní cùu

12-13 Te nduu tnéé ní nataká vihi-gá údico cue tée israél ní ndatnúhu-güedè sá cãhní-güedè té Pãblú, te ní xitnáha-güedè:

—Ní dítá vã cãxí-ó te ní ndüte vã cohó-ó ndéé ndacu-o cãhni-o té Pãblú, te ðãtnùni caxi-o dítá, te cohó-o ndüte, chi sa ní sani iní-ó sã cádá-ó, te cuu cuèchi xii-o nùu vã cádá-ó —cãchí-güedè xitnáha-güedè.

14 Te ní sáháⁿ-güedè núú ndécú nchaa dütú cúnúu ndîhi nchaa cue tée cùu sacuéhé, te ní xãhaⁿ-güedè:

—Ní cachí-ndí sá ní dítá vã cãxí-ndí ndéé nùu ní ndacu-ndí ní sahni-ndí té Pãblú, chi sa ní sani iní-ndí sã cádá-ndí, te cuu cuèchi nùu vã cádá-ndí.

15 Te duha cada-ndo ndîhi dava-gá cue tée cúnúu, chi cúnaha-ndo xii tée cùu capitáⁿ cúnúu-gá: “Quixi ndîhi-n té Pãblú núú ndécú-ndí cuèndá ndatnúhu ndîhi-ndí-dé, chi cuiní-ndí nducu tnúhu váha-gã-ndí ná cúú sã ní quide-dé”, duha cúnaha-ndo xii tée tàxi tnuni sandadú. Te ducaⁿ-ni cúnaha-ndo ðandahú-ndó-güedè cuèndá quixi ndîhi-güedè té Pãblú, te nchúhú sa cundetu-ndí-güedè ichi, chi quiní té Pãblú ná cahni-ndí-dé —cãchí-güedè xãhaⁿ-güedè xii cue tée cùchiuⁿ.

16 Te déhe cùha té Pãblú ní níhi-dè tnúhu nàcuáa cada-güedè dító-dé. Te ní sáháⁿ-dè cuàrtél, te ní xãhaⁿ-dè xii dító-dé nàcuáa cãháⁿ-güedè cada ñaha-güedè.

17 Te ní cana té Pãblú ñⁿ tée cùu capitáⁿ, te ní xãhaⁿ-dè:

—Vã cündèe iní-n, quihíⁿ ndîhi-n tée-a na cãháⁿ ndîhi-dé tée cúnúu-gá, chi ndècu ñⁿ cuèndú cúnaha-dè cuiní-í —cãchí té Pãblú xãhaⁿ-dè xii tée cùu capitáⁿ.

18 Te ðãtnùni ní xica tée cùu capitáⁿ ndécá-dè ðáxíⁿ té Pãblú cuáháⁿ núú ndécú tée cúnúu-gá, te òrè ní quexio-güedè núú-dé, te ní xãhaⁿ tée cùu capitáⁿ xii-dé:

—Té Pãblú tée yîhi vècaá ní cana ñaha-dè xii-í, te ní cachí-dé véxi-í ndîhi tée-a cuèndá cachí tnúhu-dé ñⁿ cuèndú cuiní-dé —cãchí-dé xãhaⁿ-dè xii tée cúnúu-gá.

19 Te tée cúnúu-áⁿ ní tñii-dé ndaha ðáxíⁿ té Pãblú, te tànehe ñaha-dé cuáháⁿ ñⁿ xio, te ní xicáⁿ tnúhú-dè núú-dé, te xãhaⁿ-dè:

—¿Ná cuèndú cuiní-n cãháⁿ-n? —cãchí-dé xãhaⁿ-dè xii ðáxíⁿ té Pãblú.

20 Te ní xãhaⁿ-dè xii tée cúnúu-áⁿ:

—Cue tée isráel ní ndatnúhu ndáá-güedé sá quixí-güedé tneé cáháⁿ ndáhú-güedé núu-n cándeca-n té Páblú quíhíⁿ jündá, te yacáⁿ cacáⁿ tnúhú ndáá-güedé núu-dé ná cúu sá ní quide-dé, cächí-güedé xítnàha-güedé.

²¹ Te vá quindáá iní-n chí dicó dandáhú ñàhá-güedé, chí vihi-gá údico-güedé ndátnúhu-güedé cundedí-güedé ichi cahni ñaha-güedé. Te xítnàha-güedé sá ní dítá vâ caxí-güedé, te ní ndüte vá cóhó-güedé ndéé núu ní ndacu-güedé ní sahni ñaha-güedé, te dátmní caxí-güedé dítá, te coho-güedé ndüte, chí sa ní sani iní-güedé sá cádá-güedé, te cuu cuéchi núu vá cádá-güedé, cächí-güedé xítnàha-güedé. Te cundecu túha-ná-güedé cundetu ñaha-güedé tneé, te núu na quindáá iní-n cándeca-n-dé quíhíⁿ jündá —cächí-dé xáhaⁿ-dê xii tée cūnuu-áⁿ.

²² Te tée cūnuu-áⁿ ní xáhaⁿ-dê:

—Cuanùhú, te vá yóo tnàhí cūñaha-n sá ní quixi-n ní cächí tnúhu-n nàcuáa cáháⁿ-güedé cada-güedé té Páblú —cächí-dé xáhaⁿ-dê.

Ndèca-güedé té Páblú cuáháⁿ núu té Juéli tée cūu gobiernú

²³ Te tée cūnuu-gá ní cana-dé úu cue tée cūu capitáⁿ, te xáhaⁿ-dê:

—Tava-ndo úú ciendú sandádú cue tée xica saha, ndihí únídico úxí sandádú cue tée yódo cuayú, ndihí úú ciendú sandádú mee-ni cué tée xínehe lánzá. Te cada túha-ndo chí caca-ndo òré caá íⁿ níu quíhíⁿ-ndó ñúú Cèsareá ndihí té Páblú.

²⁴ Te nducu-ndo cuèdicó íⁿ úú cuàyú codo-dê ndihí cue tée ndéé ñáhá xii-dé. Te cada cuedádú-ndó-dê ichi, te candeca-ndo-dê quíhíⁿ quíndeca-ndo-dê núu tée cūu gobiernú —cächí tée cūnuu-áⁿ xáhaⁿ-dê xii cue tée cūu capitáⁿ.

²⁵ Te tée cūnuu-áⁿ ní cadúha-dé tutú cuendá quíhíⁿ ndaha té Juéli tée cūu gobiernú. Te duha ní chídó tnúni-dé núu tütú cuáháⁿ:

²⁶ “Cóvaha díi-n, tătă gobernádór. Ío cada cāhnu iní, yúhú nání-í Cláudíu Lisías. Yúhú ní tendaha-í íⁿ tutú véxi ndaha-n cuendá quini tnúni-n nàcuáa ní cuu íha.

²⁷ Cue tée isráel ní tnúhí-güedé íⁿ tée nàni Páblú cūni-güedé cahni ñaha-güedé ní cūu, te ní níhí-í tnúhu sá tée ròmá cúu-dé núu ní sáháⁿ-í ndihí sandádú-í ní dácacu-ndí-dé.

²⁸ Te ní cūni-í quini-í ná cuendá tée ñaha-güedé cuéchi xii-dé, núu xíáⁿ ndécá-í-dé ní sáháⁿ núu ní quide cue tée cūchiuⁿ isráel jündá.

²⁹ Te yacáⁿ ní níhí-í tnúhu sá ñà túu ná cuéchi ní quide-dé, chí cuendá-ni sá ní níhí-güedé tnúhu sá ñà túu sàndáá iní-dé cada-dé nchaá sá ní xóo cada ñáyiú ní xíndecu ndéé sanaha nchícuⁿ nihnu-güedé quide-güedé, xíáⁿ ní cudééⁿ-güedé núu-dê.

Te ñá túu cuéchi cāhnu ní quide-dé núu quíhíⁿ-dé vecaá àdi cahni-í-dé.

³⁰ Te ní níhí-í tnúhu sá cué tée isráel ndúcú-güedé nàcuáa cada-güedé cahni ñaha-güedé xii-dé, xíáⁿ ní xáhaⁿ-í xii sandádú-í sá cándeca ñaha-güedé quixi xíáⁿ. Te ní xáhaⁿ-í xii cue tée tée ñaha cuéchi sá quixí-güedé ndéé xíáⁿ cáháⁿ-güedé núu ná cuéchi ní quide-dé. Te cada cāhnu iní-n chí duha-ni ndúu tnúhu cáháⁿ-í, te cundee iní-n quèheⁿ cuendá-n-dê”, duha ní chídó tnúni tée ní cadúha tutú cuáháⁿ ndaha té Juéli.

³¹ Te cue sandádú ní quide-güedé nàcuáa ní xáhaⁿ tée tàxi tnúni ñáhá xii-güedé chí ní xica-güedé ndihí té Páblú òré caá íⁿ níu, te díu-ni níu-áⁿ ní quexio-güedé ñúu Antipatris.

³² Te sátá ní tūndaá, te ní nacuíco cué tée xínehe lánzá ndihí dava-gá sandádú xicá sàha cuánuhú-güedé cuártel, te mee-nà sandádú cue tée yódo cuayú cuáháⁿ ndihí té Páblú.

³³ Te òré ní quexio-güedé ñúu Cèsareá, te ní sàha-güedé tée cūu gobiernú tutú nêhé-güedé cuáháⁿ. Te ní queheⁿ cuendá-dé té Páblú.

³⁴ Te sátá ní dácuhá tée cūu gobiernú-áⁿ tutú-áⁿ te ní xicáⁿ tnúhú-dê núu té Páblú, te xáhaⁿ-dê:

—¿Ndéé tée cūu-n? —cächí-dé xáhaⁿ-dê.

Te ní xáhaⁿ té Páblú:

—Tée Ciliací cúu-í —cächí-dé xáhaⁿ-dê.

³⁵ Te ní xáhaⁿ tée cūu gobiernú-áⁿ:

—Òré quexio cue tée tée ñaha cuéchi xii-n, te cáháⁿ-n nása ní cuu, chí níhí-í nàcuáa cada ndáá-í cuendá-n —cächí-dé xáhaⁿ-dê xii té Páblú.

Te ní xáhaⁿ-dê xii sandádú sá cūndèé-güedé té Páblú vehe cāhnu té Hèrodés.

24

Té Páblú xáhaⁿ-dê xii té Juéli sá ñà túu cuéchi-dé

¹ Te sátá ní cuu úhúⁿ nduu, te té Ananiás dútú cūnuu-gá cuáháⁿ-dê ñúu Cèsareá ndihí cue tée cūu sacudéⁿ ndihí íⁿ tée nàni Tértulú tée cáháⁿ yuhu-güedé. Te cuáháⁿ-güedé núu tée cūu gobiernú cuáháⁿ dácúandèhnde-güedé núu-dê sá ndécuéchi té Páblú.

² Te ní sánguaca-güedé té Páblú. Te òré ní quexio-dé núu-güedé, te ní ngúita té Tértulú xáhaⁿ-dê xii té Juéli nàcuáa cāa cuéchi tée-güedé té Páblú:

—Ío cāhnu cada iní tătă gobernádór. Duha ndúu chiuⁿ ndéé iní ñáhá-ndí xii-n véxi-ndí, núu nása cachí-n cūnduu. Távāhu xii-n, chí ío váha ndéu nchaá ñáyiú, te ñá túu nàa-yu chí ío váha quide-n.

³ Te ío cùdíí ínì-yu chí nchaa-ní nduu xíndecu váha-yu nchaa-yu, te ío táxáhu Ndióxi xii-n sá dúcáⁿ quíde-n.

⁴ Te cada càhnu ínì, cuínì-í ndatnúhu-o ìⁿ úú-ní cuèndú cuèndá sá vâ cùyaa-o dacuíta-í chíuⁿ-n.

⁵ Te ìⁿ tée iha ío dâsatú ínì ñáhá-dê, chí ndèni ní cuu cuáháⁿ-dé ndátnúhu-dé ndíhi ñáyíu isrâél dánáá-dé-yu. Te nèhé quíde-dê chí cuáháⁿ-dé dácáháⁿ-dé nchaa ñáyíu cuèndá quíndáá ínì-yu tnúhu tée ní xíndecu ñúú Nazâret.

⁶ Chí ducaⁿ càháⁿ cue tée iha sá ní sáháⁿ-dé veñúhu càhnu sá ío cùnunu, te cuínì-dé daquée tíhú-dê veñúhu cuèndá cuínì-dé xocani-dé sá ìí ndécú, núu xiáⁿ ní tñii ñaha-güedê ndécá ñaha-güedê cuáháⁿ núu cuè tée cùchiuⁿ cuèndá cácaⁿ tnúhú-güedê núu-dê núu ná cuèndá ducaⁿ cuínì-dé cada-dé, chí ducaⁿ càa leí ndécú ndíhi-güedê sá cáda ndáá-güedê núu ná ìⁿ sá cúú.

⁷ Te té Lisiú tée cùu capitáⁿ cúnunu-gá ní quexìo-dé ndíhi sandadú, te ní dácúnú-güedê nchaa cue tée nùtní ndíhi té Páblú, te dâtnúni ní tñii ñaha-güedê xii-dé ndécá ñaha-güedê cuáháⁿ.

⁸ Te sáta xiáⁿ, te ní xáhaⁿ-dê sá quixí-güedê ndéé ndíha cundáá cuéchi-dé. Te yohó cundee ínì-n cácaⁿ tnúhú-n núu-dê, te núu ndáá ducaⁿ ní quide-dé àdi ñáhá —càchí té Tértulú xáhaⁿ-dê xii té Juéllí tée cùu gobiernú.

⁹ Te dava-gá cue tée isrâél xínutnii xiáⁿ ní càháⁿ-güedê sá ndáá càháⁿ té Tértulú.

¹⁰ Te tée cùu gobiernú ní quide-dé ndaha-dé núu té Páblú cuèndá càháⁿ-dê, te té Páblú ní xáhaⁿ-dê:

—Yohó sa ní cuu titní cuía ndécú-n iha xehndé-n cuéchi nchaa ñáyíu xináa, núu xiáⁿ ío cùdíí ínì-í sá ndíha téhndé cuéchi tée ñaha-güedê xii-í. Te cundee ínì-n cùndedóho-n na càni-í cuèndú nàcuáa ní cuu.

¹¹ Te nducu tnúhu-n te quini-n nâ càháⁿ ndáá-í, chí sa ní cuu úxúu nduu sá ní sáháⁿ-í veñúhu càhnu sá ío cùnunu ñúú Jerusalén ní càháⁿ ndíhi-í Yá Ndióxi.

¹² Te ní ñà túú ní nàá-í ndíhi ñáyíu xití veñúhu, te ñà túú ní xáhaⁿ-í nàá-yu ní ìⁿ xichi, te ní ìⁿ veñúhu líhli ní sáháⁿ-í ñà túú ná ní xáhaⁿ-í cada-yu.

¹³ Te ní ñà túú quèñuhu-güedê cue tée càháⁿ ndáá te núu ndáá ducaⁿ ní quide-í.

¹⁴ Te yuhú càháⁿ ndáá-í sá càháⁿ ndíhi-í Yá Ndióxi, chí ñu-ni Yá Ndióxi ní xóo càháⁿ ndíhi ñáyíu ndéé sanaha, núu xiáⁿ ní tuha-í ichi-gá. Te cue tée-a càchí-güedê sá ñà díú ìⁿ ichi váha ní tuha-í. Te yuhú sàndáá ínì-í nchaa sá ní chídó tñúni ndíi Moisés ndíhi dava-gá cue tée ní xóo càháⁿ tnúhu Yá Ndióxi ndéé sanaha.

¹⁵ Te sàndáá tucu ínì-í sá ndótó nchaa ñáyíu ní xihí, cuèí ñáyíu váha ínì-xi, te cuèí ñáyíu úhú ínì-xi, dico ndótó-yu. Te ducaⁿ ní xóo quíndáá ínì nchaa ñáyíu ní xíndecu ndéé sanaha.

¹⁶ Te yuhú ío ndùcu ndee-í quíde-í nchaa sá càháⁿ Yá Ndióxi cuèndá sá vâ cúú càháⁿ núu-í núu-gá ndíhi núu ñáyíu ñuyíú-a.

¹⁷ Te sa ní cuu titní cuía sá ñà túú-gá sáháⁿ-í ñúú Jerusalén, te ní sáháⁿ tucu-í nèhé-í díhúⁿ ní taxi ñáyíu ñúú xicá cuèndá cuáñaha-í xii ñáyíu ñúú Jerusalén. Te ní ndúcú-í sá cuáha táhú-í Yá Ndióxi.

¹⁸ Te ní xíndecu-í veñúhu càhnu sá ío cùnunu ní quide-í nchaa nàcuáa ní xóo cada ñáyíu ní xíndecu ndéé sanaha cuèndá nduu vétú ínì Yá Ndióxi. Te ñà túú chítú-yu ní sáháⁿ, te ní ñà túú nâ ní cùu, te ní naníhi ñáhá ìⁿ úú cue tée isrâél xii-í, cue tée véxi distritú Ásia.

¹⁹ Te quixi mee-güedê iha càháⁿ-güedê, te núu sá ndáá ní xini-güedê sá yuhú ndécuéchi-í ní cùu,

²⁰ àdi ñáhá. Dico cachí tnúhu cue tée-án nása ní cuu òre ní xíndecu-í jündá-güedê núu ndécuéchi-í àdi ñà túú ndécuéchi-í.

²¹ Dico ñà túú cuéchi-í chí ìⁿ ñà ní tnúhu ní càháⁿ-í ní xáhaⁿ-í xii-güedê sá sàndáá ínì-í sá ndótó nchaa ñáyíu ní xihí, te ñu-ni núu xiáⁿ càchí-güedê sá ndécuéchi-í —càchí té Páblú xáhaⁿ-dê xii té Juéllí.

²² Te té Juéllí sa xini váha-dé nàcuáa cuáháⁿ tnúhu Jèsús, núu xiáⁿ ñà ní cuínì-gá-dé ndatnúhu-dé ndíhi té Páblú, te ní xáhaⁿ-dê:

—Sa ní cuu, cundetu-n na quèxio té Lisiú tée cùu capitáⁿ cúnunu-gá, te òre-án cundáá cuèndá-n —càchí té Juéllí xáhaⁿ-dê.

²³ Te ní xáhaⁿ-dê xii tée cùu capitáⁿ:

—Cundee-n té Páblú-án, te núu nása càchí-dé cada-n, te ñaña-n na càháⁿ ndíhi-dé cue tée xini tnáhá ndíhi-dé núu cuáñaha-güedê nchaa sá xini ñúhu-dé àdi nása cada-güedê —càchí té Juéllí xáhaⁿ-dê xii tée cùu capitáⁿ.

²⁴ Te ní cuu titní nduu, te ní sáháⁿ té Juéllí vechíuⁿ ndíhi ñadíhi-dé, te ñaha-án nání-án Drusilá, te ñaha isrâél cúú-án. Te ní xáhaⁿ-dê sá quíngueñuhu-güedê té Páblú, te òre ní quexio-dé vechíuⁿ, te ní càháⁿ-dê núu-yu nchaa-yu sá quíndáá ínì-yu tnúhu Xitohó Jesucristú.

²⁵ Te ní xáhaⁿ-dê:

—Mee-ni sá váha cada-ndo. Te coto-ndo mée-ndo, te vâ cáda-ndo ní ìⁿ sá cuèhé sá dúhá, chí ìⁿ nduu càháⁿ Yá Ndióxi ndédacáa ñáyíu váha ínì-xi, te ndédacáa ñáyíu úhú ínì-xi —càchí té Páblú xáhaⁿ-dê.

Te sá dúcáⁿ ní xáhaⁿ-dê, te ní yuhú té Juéllí, te ní xáhaⁿ-dê:

—Vá càháⁿ-gá-ó tnávii, cuáháⁿ, te òre cùyáchí-í, te cana ñaha-í xii-n —càchí-dé xáhaⁿ-dê.

²⁶ Te té Juélí ní quide-dé cuèndá sá cuãñaha té Páblú díhúⁿ te vá ndíhu-gá-dé vecaá ní cùu, núu xiãⁿ titní xito ní cana-dé té Páblú vechiúⁿ ní ndatnúhu ndíhi tnàha-güedé, dico ñá túú ní chãhu-dé.

²⁷ Te úú cuiá ducaⁿ ní quide-güedé, te dátñuní ní xínu té Juélí chiuⁿ-dé, te ní ngúnutñí té Pòrsiú Fèstú. Te òré ní xínu té Juélí chiúⁿ-dé, te ní dándoo-dé té Páblú yíhí-ní-dé vecaá. Te ducaⁿ ní quide-dé cuèndá ní cuiñí-dé cudíu-dé núu cuè téé isráél.

25

Té Páblú cãháⁿ ndíhi-dé té Fèstú

¹ Te ní cuu úní nduu sá ní quexio té Fèstú ñúú Cèsareá ní queheⁿ-dé chiúⁿ, te ní quee-dé cuáháⁿ-dé ñúú Jerusálén.

² Te yacáⁿ ní naníhi tnáhá-dé ndíhi nchaa dútú cúnúu ndíhi nchaa cue téé tàxi tñuní ñáhá xii ñáyiú isráél, te xãháⁿ-güedé xii té Fèstú sá ndáá ndècuéchi té Páblú.

³ Te ní cãháⁿ ndáhú-güedé núú-dé sá téndaha-dé sandádú-dé quíngueñuhu ñaha-güedé vecaá xii-dé ndéé ñúú Cèsareá te candeca ñaha-güedé quíhíⁿ. Te ducaⁿ ní cãháⁿ-güedé, chi ní ndatnúhu-güedé sá cãhí ñaha-güedé xii té Páblú ichi ní cùu.

⁴ Te té Fèstú ní xãháⁿ-dé:

—Vá cúú quíxi-dé ndéé ndíha. Na cündetu-dé ñúú Cèsareá chi sacú-ni nduu cuyaa-í iha te dátñuní nùhú-í yacáⁿ.

⁵ Te yáchí-gá quíhíⁿ ndíhi-í cue téé cúnúu-gá, te yacáⁿ cuu cãháⁿ-ndó núu ndáá ndècuéchi-dé ãdi cãháⁿ méé-dé núu ndáá ndècuéchi-dé ãdi ñáhá, te cutñuní iní-ndó —cãchí-dé xãháⁿ-dé.

⁶ Te ní xíndecu té Fèstú úná úxí nduu ñúú Jerusálén, te dátñuní cuánuhú-dé ñúú Cèsareá. Te nduu tnéé cuáháⁿ-dé vechiúⁿ, te òré ní quexio-dé, te ní xãháⁿ-dé xii cue sandádú xínú cuéchi sá quíhíⁿ-güedé queñuhu-güedé té Páblú vecaá te candeca ñaha-güedé quíhíⁿ vechiúⁿ.

⁷ Te òré ní quexio té Páblú vechiúⁿ, te sa ndècu cue téé isráél cue téé ní quee ñúú Jerusálén, te cuánguihu-güedé ndéé díñí té Páblú ní ngúnutñí-güedé, te xãháⁿ-güedé xii cue téé cùchiuⁿ sá ndècuéchi víhi-dé, dico ñá túú ní cündee tnúhu-güedé.

⁸ Te té Páblú ní xãháⁿ-dé xii té Fèstú:

—Ñá túú ndècuéchi-í, ñá túú ná ní quide-í, chi ñá túú tnáhá iní-í cada-í ñúú sá cãchí lèi sá vá cúú cada-o. Te ni xítí veñúhu cãhnu sá ïo cúnúu ñá túú ná quide-í, te ni té Cèsár téé yíndaha cuéhé nacióⁿ ñá túú cãháⁿ cuéhé-í cuèndá-dé —cãchí té Páblú xãháⁿ-dé xii-dé.

⁹ Te té Fèstú ní cuiñí-dé cada-dé ñacuáa cudíu-dé núu cuè téé isráél ní cùu, núu xiãⁿ ní xãháⁿ-dé xii té Páblú:

—¿Cündee ñí-n quíhíⁿ-n ñúú Jerusálén-ãⁿ? Te yacáⁿ cundáá cuéchi sá sáá díquí-n —cãchí té Fèstú xãháⁿ-dé xii té Páblú.

¹⁰ Te xãháⁿ té Páblú:

—Díu-ni ñúú vechiúⁿ téé cùchiuⁿ Cèsár ndècú-í iha, te díu-ni iha cada ndáá-n núu cuiñí-n ní cùu. ¿Te ná cuèndá candeca ñaha-n quíhíⁿ ingá xichi? Yòhó tnáhá-n xíní-n sã ñá túú ná quide-í ñáyiú isráél.

¹¹ Chi núu dícú yúhú ní quide-í ñúú cuéchi cãhnu, te ñá túú ná cada-xi cuéi na cãhni ñaha-ndo xii-í ní cùu. Te sa ní cutñuní iní-n sã ñá ndáá, chi mee-ni tnúhu ndehnde xicáháⁿ-güedé, te ñá túú ndúu váha-xi ducaⁿ cada-n cuñaha-n sá quíhíⁿ-í ndíhi-güedé ingá xichi. Te xiãⁿ cuiñí-í quíhíⁿ-í núú té Cèsár téé yíndaha cuéhé nacióⁿ, te yacáⁿ cãháⁿ méé-dé núu ndáá ndècuéchi-í —cãchí té Páblú xãháⁿ-dé xii té Fèstú.

¹² Te ní ndatnúhu té Fèstú ndíhi cue téé chíndee tnúhu ñaha xii-dé, te dátñuní ní xãháⁿ-dé xii té Páblú:

—Te sa ní cãháⁿ-n sã quíhíⁿ-n quítnahá-n té Cèsár te díu-ni quíhíⁿ-n, te quini-n ñasa cãháⁿ téé-ãⁿ yacáⁿ —cãchí-dé xãháⁿ-dé xii té Páblú.

Té Páblú cãháⁿ ndíhi-dé té Ágripá téé yíndaha nacióⁿ Isráél

¹³ Te sátá ní cuu cuéhé nduu, te ní quee té Ágripá téé yíndaha nacióⁿ Isráél cuáháⁿ-dé ñúú Cèsareá ndíhi ñadíhí-dé, te ñaha-áⁿ nání-áⁿ Berènicé te òré ní quexió-yu, te ní cãháⁿ ndíhi-yu té Fèstú.

¹⁴ Te sátá ní cuu titní nduu, te ní cãháⁿ té Fèstú cuèndá té Páblú ní xii-dé té Ágripá:

—Ndècu ñúú téé ní dándoo té Juélí vecaá nání-dé Páblú.

¹⁵ Te cútñhá ní sáháⁿ-í ñúú Jerusálén ní nanítnáhá-í ndíhi cue dútú cúnúu ndíhi cue téé cùu sacuéhé núú ñáyiú isráél. Te ní dáccá díquí-güedé té Páblú cuéchi, te ní cachí-güedé sá táuchiuⁿ-í cãhni ñaha-güedé xii-dé ní cùu.

¹⁶ Te ní xãháⁿ-í xii-güedé sá vá cúú, chi ñá túú dũcaⁿ quide nchúhú cue téé rómá cùtexínu cada castiú-ndí ñáyiú, chi díhna-gá ndúcú tnúhu-ndí núú ñáyiú sáa cuéchi díquí-xi cuèndá quini-ndí núu ñasa cãháⁿ méé-yu ndíhi ñáyiú sãcáⁿ cuéchi cuèndá-yu, te òré-áⁿ cútñuní iní-ndí núu ndáá ndècuéchi-yu ãdi ñáhá, te ducaⁿ te ñíhí-ndí ñacuáa quide ndáá-ndí cuèndá-yu, duha ní xãháⁿ-í xii-güedé —cãchí té Fèstú xãháⁿ-dé xii té Ágripá.

¹⁷ Te ní xãháⁿ túcu té Fèstú:

—Te sátá ní quexio-güedé ndéé ndíha, te nduu tnéé ní sáháⁿ-ni-ndí vechiúⁿ. Te ní xãháⁿ-í sá quíngueñuhu-güedé té Páblú candeca ñaha-güedé quixi, te òré ní quexio-dé,

¹⁸ te ní nguíta-güedé xáhaⁿ-güedé sá ndècuéchi-dé. Te ní sani iní-í sá ñíⁿ cuéchi cǎhnu tee ñaha-güedé dico ñáhá, chi dicó-ní sá ñíⁿ tnúhu ní cáháⁿ-dé, xíáⁿ ducaⁿ ní quide-güedé.

¹⁹ Te ní tenàá ñáhá-güedé xii-dé, chi cǎchí-güedé sá ñà túú cǎháⁿ váha-dé cuendá ndiòxi-güedé. Te tnáhá-ni cuendá ñíⁿ téé nàni Jesús cǎháⁿ-dé, chi cǎchí-dé sá ní xíhí téé-áⁿ te ní ndoto-dé cǎchí-dé xáhaⁿ-dè xii-güedé, cǎchí-güedé.

²⁰ Te ñá ní cùtnuní iní-í nása cùñaha-í xii-güedé cuendá téhndé cuéchi-dé. Te xíáⁿ ní xícáⁿ tnúhu-í núú té Páblú núu cundee iní-dé quíhíⁿ-dé ñúú Jerusalén, te ndéé ndiáácáⁿ cada ndáá-ndí cuendá-dé, te núu ndáá ndècuéchi-dé nàcuáa cǎháⁿ-güedé àdi ñáhá ní cùu.

²¹ Te dàtnuní té Páblú ní cǎchí-dé sá cùndècu tnaa-dé vecaá te dàtnuní quíhíⁿ-dé núú té Cèsár, te téé-áⁿ cada ndáá-dé cuendá-dé. Te cuendá sá dúcáⁿ ní cǎháⁿ té Páblú, xíáⁿ núu ní xáhaⁿ-í sá cùndéé ñáhá cuè sandadú xii-dé, nini na còto-í nása cada-í quíhíⁿ-dé núú té Cèsár, duha ní xáhaⁿ-í xii-güedé —cǎchí té Fèstú xáhaⁿ-dè xii té Àgripá.

²² Te té Àgripá ní xáhaⁿ-dè xii té Fèstú:

—Te tnáhá yúhú ío cudíí iní-í cundedóho-í tnúhu cǎháⁿ-dé —cǎchí-dé xáhaⁿ-dè.

Te ní xáhaⁿ té Fèstú:

—Tneé cana-í-dé te cundedóho-n nása cǎháⁿ-dé —cǎchí-dé xáhaⁿ-dè.

²³ Te nduu tneé ní quexio té Àgripá ndihi ñadihí-dé tá Berènicé vechi^u, te ío ní quide cǎhnu ñaha-güedé xii-yu. Te cuánguihú-yu vechi^u ndihi cue téé cùu capitáⁿ cùnnu-gá ndihi cue téé cùnnu ñúú Cèsaréa. Te té Fèstú ní xáhaⁿ-dè sá quíngueñuhu-güedé té Páblú vecaá, te òré ní quexio-dé,

²⁴ te ní xáhaⁿ té Fèstú xii té Àgripá ndihi nchaa ñáyiú xíndecu-áⁿ:

—Chí cùndèhe téé iha chí téé-a cǎchí cue téé isràél sá ndècuéchi-dé, te cùtnáhá ní xíndecu-í ñúú Jerusalén ní cǎchí-güedé sá ndáá ndècuéchi-dé, te diu-ni ducaⁿ cǎháⁿ-güedé iha. Te nchaa-güedé ní cuáá-güedé te cǎchí-güedé sá táuchiuⁿ-í cǎhni ñaha-güedé xii-dé ní cùu.

²⁵ Te sátá ní ndihi cuendú ní cáháⁿ-güedé, te ní cùtnuní iní-í sá ñà túú ní ñíⁿ cuéchi cǎhnu ní quide-dé, núu ñá túú ní tàuchiuⁿ-í cǎhni ñaha-güedé xii-dé. Te mee-dé ní cǎchí-dé sá quíhíⁿ-dé núú té Cèsár téé yíndaha cuéhé nacióⁿ, te ní xáhaⁿ-í sá cúú quíhíⁿ-dé.

²⁶ Te ñá túú ní xini váha-í nása ní quide-dé, núu xíáⁿ ñá ní ñihí-í nàcuáa cadúha-í tutú quíhíⁿ ndaha té Cèsár, te xíáⁿ ní cana-í-dé véxi-dé iha cuendá nchaa-ndo cǎháⁿ ndihi-ndo-dé. Te ducaⁿ cǎnuu cadíhna-gá

yòhó tátá Àgripá cǎcáⁿ tnúhu-n núu-dé núu nása cǎháⁿ-dé, te òré-áⁿ cùtnuní iní-í nása cada-í cadúha-í tutú quíhíⁿ ndaha té Cèsár.

²⁷ Chi sàni iní-í sá ñà túú ndúu váha-xi sá quíhíⁿ ñíⁿ téé tàú cuéchi te núu vá códó tnuní núú ñíⁿ tutú nàcuáa cǎa cuéchi tàú-dé —cǎchí té Fèstú xáhaⁿ-dè xii-güedé.

26

Te Páblú cǎháⁿ ndihi-dé té Àgripá

¹ Te dàtnuní ní xáhaⁿ té Àgripá téé yíndaha nacióⁿ Isràél xii té Páblú:

—Te vitna cǎháⁿ-n núu nása ní cuu cuendá-n —cǎchí-dé xáhaⁿ-dè.

Te té Páblú ní ndacani-dé ndaha-dé sá cùndedóho-güedé, te ní xáhaⁿ-dè xii té Àgripá téé yíndaha nacióⁿ Isràél:

²⁻³ —Tátá Àgripá, ío cudíí iní-í sá ní naníhí tnáhá-ó vitna, chí yòhó ío váha xini-n nchàa nàcuáa quide ñáyiú isràél quidé cǎhnu-yu Yá Ndiòxi, te ío váha xini-n nchàa tnúhu xitnàhà-yu. Te vitna cundee iní-n cùndedóho-n ñíⁿ úú tnúhu na cǎháⁿ-í. Na cǎchí tnúhu-í sá ñà ndáá ní quide-í nchaa sá cǎháⁿ cue téé isràél.

Té Páblú cǎháⁿ-dé nàcuáa ní quide-dé cùtnáhá vátá túhá-gá-dé ichi Yá Ndiòxi

⁴ Te sa náha nchaa cue téé cùnnu núu ñáyiú isràél nàcuáa ní quide-í ñúú-í ndihi ñúú Jerusalén cùtnáhá ní cuu landú-í.

⁵ Te mee-güedé náhá-güedé sá ndéé líhli-í ní chitnahá-í cue téé cùu fariséú. Te núu cùni-güedé cǎháⁿ-güedé sá téé fariséú cùu-í àdi ñáhá dico nchaa-güedé sa náha-güedé sá cuè téé-áⁿ ní chitnahá-í. Te cue téé cùu fariséú-áⁿ ío cùini-güedé cada-güedé nchaa nàcuáa nchicúⁿ nihnu ñáyiú quidé-yu. Te yúhú nchaa sá nchicúⁿ nihnú-yu quidé-yu-áⁿ ní quide-í.

⁶ Te vitna ndècu-í iha, te cǎháⁿ-n núu váha-ni quide-í àdi ñáhá, chí cue téé-áⁿ téé ñaha-güedé cuéchi xii-í cuendá sá sàndáá iní-í sá ndótó nchàa ñáyiú ní xíhí. Te diu-ni ducaⁿ ní xáhaⁿ Yá Ndiòxi xii nchaa ñani tnáhá-ó ní xíndecu ndéé sanaha.

⁷ Te nchaa ñáyiú-áⁿ xíndetu-yu nduu ndòto ñáyiú ní xíhí ní cùu. Te diu-ni ducaⁿ ndéu nchaa ñani tnáhá-ó ndècu ñuyú-a ndéé vitna, te xíáⁿ núu cuéí nduu cuéí níú cǎháⁿ ndihi-yu Yá Ndiòxi. Te sá sàndáá iní-í núu xíáⁿ ní cǎháⁿ-í, te téé ñaha cue téé isràél cuéchi xii-í.

⁸ ¿Te ná cuendá nchòhó cue téé isràél ñá túú cùini-ndó quíndáá iní-ndó sá dándòto Yá Ndiòxi nchaa ñáyiú ní xíhí? —cǎchí té Páblú xáhaⁿ-dè.

Té Páblú cǎni-dé cuendú sá ní xóo chihí-dé ñáyiú sàndáá iní tnúhu Jesús vecaá

⁹ Te ní xáhaⁿ túcu té Páblú:

—Ndée dává-án nǐ quide úhú-í ñáyiu sándáá iní-xi tnúhu Jèsús Yaá ní quee ñuú Nazàrét, te ní cáháⁿ-í sá vǎha-ni ní quide-í sá dúcáⁿ nǐ quide-í.

¹⁰ Te diu-ni ducaⁿ nǐ quide-í ñuú Jerusálén. Te cue dútú cúnúu ní taxi-güedé ñⁿ tutú cuendá tñi-í ñáyiu ní sándáá iní tnúhu Jèsús, te vai-yu ní chihi-í vecaá. Te òré ní cáháⁿ-güedé sá cáhni-güedé ñáyiu-án, te tñhá-í ní cáháⁿ-í sá cúu cáhni ñaha-güedé xii-yu.

¹¹ Te titní xito ní sáháⁿ-í nchaá veñúhu ñáyiu isráél, te ní cani-í-yu te ní xáhaⁿ-í sá dáñá-yu ichi Jèsús. Te cuendá ío ní cudèèⁿ-í núu-yu, xiǎⁿ ní sáháⁿ-í nchaá ñuú xicá nǐ sánúndúcú-í dává-gá ñáyiu sándáá iní tnúhu-gá cuendá dandóho ñaha-güedé xii-yu.

Té Páblú cáháⁿ tucu-dé nása ní cuu ní tuha-dé ichi Yá Ndióxi

(Hch. 9:1-19; 22:6-16)

¹² Te cuendá xiǎⁿ ní xica tucu-í cuáháⁿ-í ñuú Dámascú, nèhè-í tutú ní taxi cue dútú cúnúu cuáháⁿ, cuendá sá ndácú-í tñi-í nchaá ñáyiu sándáá iní tnúhu Jèsús ní cúu.

¹³ Te òré cauxúu nduu ñúhu-í ichi cuáháⁿ-í, te uuⁿ ní quee ñuhú andiu ní dáyèhé-xi ndée núu núnñ-í ndihi cue té ndéca tñaha ndihi-í, te níhi-gá ní dáyèhé-xi dàcúúxi nchíanchii.

¹⁴ Te nchaá-ndí ní nduá-ndí ndée ñúhu, te ní tecú dóho-í cáháⁿ ñⁿ sá cáháⁿ tnúhu ñáyiu isráél, te cachí-xi: “Yóhó Sàulú, ¿Ná cuendá cúu úhú iní ñáháⁿ xii-í dándóho ñaha-n? Te ío dándóho-n mee-n, chí dátná cuini-n quide ndicutu quide-n chí quiⁿ-í-án òré cúxi-güedé-di püyá te sáha-di patadá núu-xi, te sá dúcáⁿ quide-di te quide úhú-di mee-di. Te ducaⁿ sátnahá-xi cúu yohó chí ñá túú sándáá iní ñáháⁿ xii-í”, cachí sá ní cáháⁿ-án.

¹⁵ Te ní xáhaⁿ-í: “¿Ná cúu yóhó sá ní cáháⁿ-án?”, xáhaⁿ-í. Te cachí sá cáháⁿ-án: “Yúhú cúu-í Jèsús Yaá cúu úhú iní-n”, duha ní cachí sá cáháⁿ-án. Te xiǎⁿ ní cutnùnì iní-í sá Jèsús cáháⁿ.

¹⁶ Te ní cachí-gá: “Ndacuíñ-í chí yúhú cáháⁿ-í chí cuini-í quiñⁿ-n càda-n chiuⁿ-í, chí quiñⁿ-n cáháⁿ-n núu ñáyiu nàcuáa ní cuu ní xini ñáháⁿ xii-í vitna, te quixi tucu-í cáháⁿ ndihi ñaha-í xii-n, te cúñaha-n xii-yu nàcuáa cáháⁿ-í.

¹⁷ Chí cuini-í quiñⁿ-n cáháⁿ-n tnúhu-í núu ñáyiu isráél ndihi núu ñáyiu ñá túú cúu ñáyiu isráél, te coto ñaha-í xii-n cuendá vá cáhni ñáhá-yu xii-n.

¹⁸ Te cuini-í quiñⁿ-n cúñaha-n xii-yu sá dáñá-yu nchaá ichi cuèhé ichi duha ndécú-yu, te tuhá-yu ichi váha cuendá vá quindáá iní-yu cadá-yu sá cáháⁿ yucu ñáváha, te quindáá iní-yu cadá-yu nchaá

nàcuáa cáháⁿ Yá Ndióxi. Te núu na quindáá iní-yu tnúhu cáháⁿ-í, te cada càhnu iní-í nchaá cuèchi-yu, te naníhi tàhú-yu ndihi dává-gá ñáyiu sa ní xócuiñⁿ nchaá sá cuèhé sá dúhá ní xindecu iní-yu”, duha ní cachí-gá xii-í—cachí té Páblú xáhaⁿ-dè xii té Àgripá té yindaha nacióⁿ Isráél.

Té Páblú quide-dé nchaá nàcuáa ní xáhaⁿ Jèsús cada-dé

¹⁹ Te ní xáhaⁿ tucu té Páblú xii té Àgripá:

—Ná túú dáña ndeé-í quide-í nchaá nàcuáa ní cáháⁿ Jèsús òré ní cáháⁿ-gá andiu.

²⁰ Te díhna-gá ñáyiu ñuú Dámascú ní cáháⁿ-í tnúhu-gá núu-yu, te ní xáhaⁿ-í xii-yu sá dáñá-yu nchaá sá cuèhé sá dúhá quide-yu, te cáháⁿ ndihi-yu Yá Ndióxi, te cadá-yu mee-ni sá váha cuendá cutnùnì iní dává-gá-yu sá ní dáñá-yu nchaá sá ñá túú váha ní xóo cadá-yu. Te ducaⁿ-ni ní xáhaⁿ-í xii ñáyiu ñuú Jerusálén ndihi ñáyiu níhi nacióⁿ Isráél ndihi nchaá ñáyiu ñá túú cúu ñáyiu isráél.

²¹ Te cuendá sá dúcáⁿ ní cáháⁿ-í núu ní tñi ñaha cuè té isráél xii-í cutnàhá ní sáháⁿ-í veñúhu càhnu sá ío cúnúu cahni ñaha-güedé ní cúu.

²² Te diu-ni mee Yá Ndióxi ní chindee ñaha-gá xii-í núu ndécú-í iha tñaví cáháⁿ-í tnúhu-gá, te mee-ni tnúhu-gá cáháⁿ ndihi-í nchaá-yu, cuèi ñáyiu cuica, te cuèi ñáyiu ndáhú. Te ndí Moisés ndihi dává-gá cue té ní xóo cáháⁿ tnúhu Yá Ndióxi ndée sanaha ní cáháⁿ-güedé nàcuáa cada-xi vitna, te diu-ni ducaⁿ cáháⁿ-í nchaá-ni nduu.

²³ Te cue té-án ní cachí-güedé sá Cristú Yaá tendaha Yá Ndióxi quixi ñuyíu-a ndoho tñahá-gá, te cuú-gá, te dátnùnì ndoto-gá. Te ducaⁿ càda-xi nchaá ñáyiu ní xihí ndotó-yu núu na sáa nduu chí ducaⁿ càda-xi ní cachí méé Yá Ndióxi. Te cuendá sá dúcáⁿ ní ndoto-gá, xiǎⁿ cutnùnì sá cúu náníhi tàhú ñáyiu, cuèi ñáyiu isráél, te cuèi ñáyiu ñá túú cúu ñáyiu isráél. Te dátná-ni nduu tnúhu ní cáháⁿ cue té ní xóo cáháⁿ tnúhu-gá ndée sanaha-án, te diu-ni ducaⁿ cáháⁿ yúhú tucu—cachí té Páblú xáhaⁿ-dè.

Té Páblú xáhaⁿ-dè xii té Àgripá sá quindáá iní-dé tnúhu Jèsús

²⁴ Te sá dúcáⁿ ní cáháⁿ té Páblú, te ní cáháⁿ níhi té Fèstú, te xáhaⁿ-dè:

—Páblú, jío lúcú cáháⁿ-n! Cuendá ío vai ní dácúáháⁿ-n, núu xiǎⁿ ndadá lúcú ñáhá-xii-xii-n—cachí-dé xáhaⁿ-dè.

²⁵ Te ní xáhaⁿ té Páblú:

—Ñáhá, vá dúcáⁿ cáháⁿ-n chí ñá díú sá lúcú-í duha cáháⁿ-í, chí tnúhu ndáá cáháⁿ-í.

²⁶ Te té Àgripá-a sa ñaha-dé ndihi nchaá ñáyiu isráél nàcuáa ní cuu, chí sa ní níhi-dé tnúhu ndihi dává-gá-yu nàcuáa ní cáháⁿ-í,

núu xiáⁿ cúy-í cáháⁿ ndihi-í-dé —cächí-dé xáhaⁿ-dê xii té Fèstú.

²⁷ Te ní xáhaⁿ-dê xii té Àgripá:

—Yúhú sa xini-í sá sàndáá ini-n tnúhu ní chidó tnúni cue téé ní xóo cáháⁿ tnúhu Yá Ndiòxi ndéé sanaha —cächí-dé xáhaⁿ-dê.

²⁸ Te ní xáhaⁿ té Àgripá:

—¿Quide-n cuendá sá ñiⁿ úu tnúhu ní cáháⁿ-n te quindáá ini-í tnúhu Jèsús cáháⁿ-n-ã? —cächí-dé xáhaⁿ-dê.

²⁹ Te ní xáhaⁿ tucu té Páblu:

—Cuéi vitna te cuéi ndéé cuèè-gá dico cuini-í sá dacuití sá quindáá ini-n tnúhu Jèsús. Te diu-ni ducaⁿ xicáⁿ táhú-í núu Yá Ndiòxi sá ncháá ñáyu ndéu ndihi-o iha quindáá ini-yu tnúhu-gá dàtná cuini-n ní quide yúhú, ducaⁿ cadá-yu. Dico-ní sá núu vá quihíⁿ-ni-yu vecaá dàtná cuini-n ndòho yúhú —cächí-dé xáhaⁿ-dê xii té Àgripá.

³⁰ Te sátá ducáⁿ ní cáháⁿ-dê, te ní ngúnutní té Àgripá téé yindaha nacióⁿ Israél, ndihi té Fèstú téé cùu gobiernú, ndihi tá Berènicé ndihi dava-gá ñáyu xñucóo yatni.

³¹ Te ní tnahá-yu ndéca tnahá-yu cuáháⁿ ñiⁿ xio. Te ní xitnahá-yu:

—Téè-ãⁿ ñá túu ná cuéchi ní quide-dé núu chíhí ñaha-güedé vecaá àdi cahni ñaha-güedé —cächí-yu xitnahá-yu.

³² Te té Àgripá ní xáhaⁿ-dê xii té Fèstú:

—Cuéchi mee-dê chi ní cachí-dé sá quitnahá-dé té Cèsar, xiáⁿ núu ndihu tucu-dé vecaá, te núu ñá túu dùcaⁿ ní cáháⁿ-dê, te cácu-dé ní cùu —cächí-dé xáhaⁿ-dê xii té Fèstú.

27

Té Páblu cuáháⁿ-dê ñuu Rómá

¹⁻² Te ní ndatnúhu-güedé sá quihíⁿ té Páblu ndihi bàrcú nacióⁿ Italiá, te tnahá yúhú quihíⁿ-í ndihi-dé. Te tnahá ñiⁿ téé nani Aristarcú cuini-dé quihíⁿ ndihi-ndí-dé, te cùu-dé téé ñuu Tesalónica, te ñuu-ãⁿ yindèhu-xi distritú Macèdoniá. Te ní sáha cuendá-güedé té Páblu ndihi ñiⁿ úu-gá cue téé xixíhi vecaá ní queheⁿ cuendá ñhá té Jülüu téé cùu capitáⁿ, téé yindaha ncha sandadú nání Augustú, te ní queè-ndí ncha-ndí bàrcú ñuu Adràmitiú. Te ní xica bàrcú-ãⁿ cuáháⁿ-ndí ndihi-xi te cuita yáha-ndí ñiⁿ úu ñuu yindèhu distritú Àsiá quihíⁿ.

³ Te nduu tnéé ní quexio-ndí ñuu Sidón. Te io váu ní quide té Jülüu, chi ní dáñá-dé ní quene té Páblu ní sáháⁿ-dé ní cáháⁿ ndihi-dé cue téé io váha tnahá tnúhu ndihi-dé núu cudana cundáhú ini ñhá-güedé cuáñaha-güedé ncha sá xini ñúhu-dé.

⁴ Te dàtnúni ní ndéé tucu-dé bàrcú cuáháⁿ-ndí. Te io níhi táchí te ñá ní dàña-xi caca ndáá bàrcú, te ní sáháⁿ bàrcú ndéé yatni yuhu distritú Chìpré, te distritú-ãⁿ cáá

cuádava xití lámár, te xiáⁿ ñá túu cuèhé táchí ní yáha-ndí.

⁵ Te ta yáha-ndí cuáháⁿ, te ní yáha-ndí ñiⁿ xio yuhu distritú Ciliciá ndihi yuhu distritú Pánfilíá, te ní sáá-ndí ndéé ñuu Mirá ñiⁿ ñuu yindèhu distritú Liciá.

⁶ Te ní quene téé cùu capitáⁿ cuándúcú-dé ingá bàrcú, te ní níhi-dé ñiⁿ bàrcú téé ñuu Alejándriá, ñuhú ichi-xi quihíⁿ-xi nacióⁿ Italiá. Te ní ndicuaca ñaha-dê xii-ndí cuáháⁿ-ndí ní queè-ndí bàrcú-ãⁿ, te ní xica-xi cuáháⁿ-xi.

⁷ Te io cuèé cuáháⁿ bàrcú-ãⁿ, cuèhé nduu ní xúhu-xi ichi, te yica-ni ní quexio-ndí yuhu ñuu Nidú, te ñá ní dàña-gá táchí quihíⁿ ndáá bàrcú núu ní xícó ndúu-xi. Te ní yáha-ndí ñiⁿ xio yuhu distritú Crétá núu ñá túu quene vihi táchí, te diu-ni cuádava tucu lámár cáá distritú-ãⁿ. Te ní yáha-ndí yuhu ñuu Salmón, te diu-ni Crétá yindàha-xi ñuu-ãⁿ.

⁸ Te ní yáha-ndí cuáháⁿ-ndí mee-ná núu ràyá distritú Crétá, te io ní ndoho-ndí ní sáá-ndí ñiⁿ xichi núu nání Puèrtú Váha, yatni víi-ni-gá ñuu Laseá.

⁹ Te ní cuyaa vihi-ndí ichi, ducaⁿ-ni cùu-ndí ní tnahá yóo cùuⁿ dáu táchí, te io úhu yáha bàrcú núu na quihíⁿ-ni-xi.

¹⁰ Te ní xáhaⁿ té Páblu xii-güedé:

—Ncha-ndo cündédóho-ndo tnúhu na cáháⁿ-i-a. Io úhú núu na càda yica-o quihíⁿ-ó ndihi bàrcú chi cuita càrgá te cuita bàrcú, te cuu-ni ini-xi tnahá-ni mee-o cùu-ó chí cáháⁿ-ó núu na ngàunihu-o xití ndute —cächí-dé xáhaⁿ-dê xii-güedé.

¹¹ Te téé cùu capitáⁿ ñá ní sàndáá ini-dé tnúhu ní cáháⁿ té Páblu. Dico tnúhu ní cáháⁿ téé dàcaca bàrcú ndihi xitohó-xi chí ní sàndáá ini-dé.

¹² Te ñá ní tnahá ini-güedé Puèrtú Váha cuendá sá ní tnahá yóo cùuⁿ dáu táchí, te ñá túu dáu váha táchí xiáⁿ, núu vai-güedé ní cuini-güedé yáha-güedé quihíⁿ-güedé sáá-güedé ndéé ñuu Fènicé ní cùu. Te yacáⁿ cundecu-güedé yóo cùuⁿ dáu táchí cuéi ñá túu caváha vihi, chi nchíi nàcuáa yáha bàrcú, te yacáⁿ quihu táchí, dico dáu-gá. Núu xiáⁿ ndéé ndiácaⁿ nátàcá bàrcú yóo cùuⁿ dáu táchí, te diu-ni Crétá yindàha-xi ñuu-ãⁿ.

Nitúhu lámár cùuⁿ dáu táchí

¹³ Te duha ní quene nuu luha táchí, xiáⁿ ní sani ini-güedé sá ndácú-güedé quihíⁿ-güedé, núu ní natava-güedé caá ndètní ndéé bàrcú, te ní xica-xi cuáháⁿ-xi ní yáha-ndí yatni víi yuhu distritú Crétá.

¹⁴ Te tnaa-ni ní cuu sá ní xica bàrcú, te duha ní cunuu dáu táchí ñiⁿ xio yuhu ñuu-ãⁿ

¹⁵ te nchita ichi cuáháⁿ bàrcú. Te ñá ní ndacu-gá-xi quihíⁿ ndáá-xi nàcuáa cuáháⁿ-xi

ni cùu, núu ní dáñá-ndí cuáháⁿ méé-ná bàrcú.

16 Te ní yáha-ndí ìⁿ ñúú nání Cláudá, te ñúú-áⁿ caá cuádava xítí lámár. Te ìⁿ xio yuhu ñúú núú ñà túú quène víhi táchí ní yáha-ndí, te bàrcú líhli sá nchicúⁿ sáta bàrcú cáhnú, chí ní ndacu-ndí ní taxúha-ndí xítí bàrcú cáhnú.

17 Te sáta ní ndacu-ndí ní taxúha-ndí bàrcú líhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñúú Sirté, núu xiáⁿ ní ndihí dóó nchítá dǐquí bàrcú ní nuu nehe-güedé, chí dóó-áⁿ ío níhi chindaha táchí, núu xiáⁿ cuáháⁿ bàrcú ìⁿ xio. Te ní dáñá-güedé ñà túú-gá ní dàcaca-güedé, núu cuáháⁿ méé-ná-xi ta chindaha táchí cuáháⁿ.

18 Te ío níhi dáú táchí, te ñá ní cuíní tnàhí-xi yáha. Te nduu úú sá dúcáⁿ ñà túú-gá ní dàcaca-güedé bàrcú te ní ngüíta-güedé ní dǎngoyo-güedé sá nchidó-xí cuendá cuíní-güedé nduu ñamá-xi.

19 Te nduu úní ní dǎngoyo-güedé nchaa ndachiuⁿ cánehe chiúⁿ-güedé xítí bàrcú.

20 Te cuéhé nduu ñá túú ní xíní-ndí ní chòdíní ní nchíanchíi, chí ío níhi ní cuuⁿ dáú táchí, núu ní cáháⁿ-ndí sá vǎ cǎcu-ndí, chí ndihí-ndí cáhá ní cáháⁿ-ndí.

21 Te ní cuu títí nduu ñá túú-gá xéxí-ndí, núu xiáⁿ ní ngúnutní té Páblú núú-güedé, te xáhaⁿ-dé:

—Quindáá iní-ndó tnúhu ní cáháⁿ-í, te cundecu nahí-o Crétá ní cùu. Te núu ní tnúú-ndo tnúhu-í, te vǎ dǎcuíta-o cǎrgá ndihí dava-gá ndáchíuⁿ ní cuu.

22 Te vǎ yùhú-ndó chí vǎ cùú ní ìⁿ-ndo dico bàrcú chí cuíta.

23 Te náha-ndo sá yùhú cǎháⁿ ndihí-í Yǎ Ndióxi te quide-í nǎcuáa cǎháⁿ-gá. Te díu-ní mee-gá ní techíuⁿ-gá ìⁿ espíritú xínú cuèchi núú-gá ní quixi,

24 te ní cachí-xi xii-í: “Vǎ yùhú-n chí vǎ cùú-n, dico dacuití quǐhíⁿ-n cǎháⁿ ndihí-n tǎ Cèsár. Te ní ìⁿ tée ndihí-n vǎ cùú, chí ío cudíí ní ñáhá Yǎ Ndióxi xii-n”, duha ní cáháⁿ espíritú xínú cuèchi núú-gá ní cachí tnúhu-xi xii-í.

25 Núu xiáⁿ cǎchí tnúhu-í sá vǎ yùhú-ndó, chí sa cùtnuní iní-í sá cádá Yǎ Ndióxi nǎcuáa ní cáháⁿ espíritú xínú cuèchi núú-gá.

26 Te mee táchí chindaha-xi bàrcú daquǐhíⁿ-xi ndéé yuhu ndute —cachí té Páblú xáhaⁿ-dǎ xii-güedé.

27 Te sa ní cuu sáhúⁿ nduu sáhúⁿ núú sá ní ngüíta-xi cùuⁿ dáú táchí, te ñá túú-gá dàcaca-güedé bàrcú, chí mee-nǎ táchí tá chindaha-xi bàrcú cuáháⁿ núú ndute lámár Ádríá. Te sáta ní cuu dava núú, te ní quide cuendá cue tée dàcaca bàrcú sá tá cüyatni-güedé ñuhu yíchí.

28 Te ní chicuáhá-güedé ná daha-gá mètrú néhé-xí sá cùnú xítí ndute cuendá cùtnuní iní-güedé sá tá cüyatni-xi ndéé yuhu lámár, te nèhe-xi ócò sáhúⁿ ìⁿ-ni-gá mètrú. Te ní xica tucu bàrcú luha-gá, te dǎtnuní ní chicuáhá tucu-güedé, te xiáⁿ néhé-xí ócò úsá-ni-gá mètrú.

29 Te ní yùhú-güedé sá candaundeé-xi cava, te ní queheⁿ-güedé cúmí caá náhnú sá nchicúⁿ yoho, te ní dáquée-güedé xítí ndute ndàa sáta bàrcú, te dǎtnuní ní ngüíhí-xi ñá ní xica-gá-xi, te ní cuíní-güedé sá óré-ni tündáá ní cùu.

30 Te cue tée dàcaca bàrcú ní natava-güedé bàrcú líhli dǎndée-güedé núú ndute ní cùu, te ní cachí-güedé sá quǐhíⁿ-güedé ndàa núú bàrcú dàquée-güedé úú-gá caá cuendá cuita candeé-xi bàrcú cáhnú cuendá sá vǎ cǎcá-xí. Te cuíní-güedé dǎndáhú-güedé dava-gá nchúhú cue tée ñuhu ndihí-güedé bàrcú, chí ní ndatnúhu-güedé sá cùnú-güedé ní cùu.

31 Te té Páblú ní xáhaⁿ-dǎ xii tée cùu capitáⁿ ndihí dava-gá sandádú:

—Te núu na dǎndóo ñaha cuè tée dàcaca bàrcú cunu-güedé, te vǎ cǎcu-o —cǎchí-dé xáhaⁿ-dǎ.

32 Te sá dúcáⁿ ní xáhaⁿ-dǎ núu ní sáháⁿ sandádú ní xehndé-güedé yoho nchicúⁿ bàrcú líhli dǎngáuníhu-güedé xítí ndute cuáháⁿ-xi.

33 Te váha váha-ni ta tündáá cuáháⁿ, te ní xáhaⁿ tǎ Páblú:

—Sa ní cuu sáhúⁿ nduu ñá túú tnàhí xéxi-ndo sá ndíhú iní-ndó.

34 Te vitna yáchí-ndó, chí caxi-ndo cuendá naníhí ndéé-ndó, te vǎ yùhú-ndó chí ñá túú nǎ tnahá ní ìⁿ-ndo —cachí-dé xáhaⁿ-dǎ xii-güedé.

35 Te sáta dúcáⁿ ní cáháⁿ-dé, te ní queheⁿ-dǎ ìⁿ pǎá, te ní ndacáⁿ táhú-dǎ núú Yǎ Ndióxi, te núú-güedé nchaa-güedé ducaⁿ ní quide-dé, te dǎtnuní ní táhú-dǎ luha ní xexi-dé.

36 Te ducaⁿ te dǎtnuní ní cuyí-güedé ní xexi-güedé nchaa-güedé.

37 Te úú ciéndú únídico sáhúⁿ ìⁿ-ndí ñúhú bàrcú núú tnàhí tǎ Páblú, te nchaa-ndí ní xexi ndihí-ndí-dé.

38 Te ní xexi-ndí ní ndahá xítí-ndí. Te dǎtnuní ní ngüíta-güedé ní tava-güedé nchaa ngohnchi triú ní dǎngoyo-güedé xítí ndute cuendá nduu ñamá-gá bàrcú.

Ní dáhu bàrcú xítí lámár

39 Te sáta ní tündáá, te ñá ní cùtnuní-gá iní-güedé ndéé cùú-xi núú ní sáá-güedé, te ní xíní-güedé ìⁿ xichí núú ní xicó ndúú luha yuhu lámár, te vǎi víhi cùchí dǎndáá-xi yùhu ndute, te xiáⁿ ñà túú dàcandá víhí táchí ndute. Te ní ndatnúhu-güedé sá

ndacú-güedé dacàca-güedé bàrcú quihíⁿ-xi ndéé núú ñùhú cùhí.

⁴⁰ Te xíáⁿ núu ní sáháⁿ-güedé ní xehndé-güedé nchaa yoho nchicúⁿ caá tãcãndéè bàrcú ní ndóo xití lámár, te ní nadatáyá-güedé vitú sá dácũico-xi bàrcú, te ní nacata caa-güedé ìⁿ dóó díquí bàrcú, te ta chìndaha táchí cuáháⁿ yuhu lámár tá cüyatni-xi ñuhu yichí cuáháⁿ.

⁴¹ Te ndècu ìⁿ xichí ní natacá víhí cùhí xití ndute, te xíáⁿ ní nguindùxi nihnu bàrcú-güedé, te ní cuti-xi xití cùhí, te ñá ní ñihí-gã-güedé nãcuáa cada-güedé nene-xi. Te ío ñihí ní dácãndá táchí ndute, te ní chúcú ndéé-xi ndãa sátá bàrcú, te ní ndihi ní tãhú-xi.

⁴² Te cue sandádú ní xitnaha-güedé sá cãhni-güedé nchaa cue téé ní xihí vecaá cuendá sá vã quihíⁿ-güedé núú ndute te cunu-güedé.

⁴³ Te téé cùu capitáⁿ ñá ní dàña-dé cahni-güedé cue téé ní xihí vecaá, chi ñá ní cùndee iní-dé cahni-güedé tñháá té Pãblú. Te ní xáhaⁿ-dè xii-güedé sá cuè téé xĩcuu cada quihíⁿ núú ndute te na yãha-güedé ndute quene-güedé yuhu lámár.

⁴⁴ Te dava cue téé ñá cùú càda, ní xáhaⁿ-dè nanducu-güedé vitú ñí ãdi vitú ní tãhú sã ní xihí bàrcú, te núú xiãⁿ caundodo-güedé yãha-güedé ndute quene-güedé ndéé yuhu lámár. Núu duha ní cuu ní cácu-ndí nchaa-ndí.

28

Té Pãblú ndécú-dè ñuú Mãltá caá cuádava lámár

¹ Te sátá ní cácu-ndí ní nene-ndí ñuhu yichí, te ní ñihí-ndí tñuhu nãcuáa nàni ñuú núú ní sáá-ndí, te ñuú-áⁿ nání-xí Mãltá, te càa-xi cuádava lámár.

² Te ío quide víxiⁿ-xi cuendá ío cùuⁿ dáú. Te ñáyíu ñuú-áⁿ ní cundãhú iní ñáhã-yu xii-ndí, ní dátñahã-yu ñuhú te ní cana ñáhã-yu ní sáhãⁿ-ndí ní nacuidí-ndí.

³ Te té Pãblú dátãcã-dé nducú, te tñahã-ni ìⁿ cóó dééⁿ ní tñi nihnu-dé-di, te òré cuáhãⁿ ndaha-dé chucu-dé núú ñùhú, te ní ñãni-di cahni, te ní ndee-di xití nducú ní sãndú-di ndaha-dé, te ní xexihaⁿ-di xii-dé.

⁴ Te nchaa ñáyíu ndéhé-yu sá tãcãndéè-di ndaha-dé, te ní ngũíta-yu ní xitnaha-yu:

—Vãa ndíyí ní sahani téé-a, te ñá ní xihí-dé lámár, te dacuití sã cùú-dé vitna, chi sa ñaha Yã Ndióxi ná ní quide-dé ñuyíu-a —cãchí-yu xitnaha-yu.

⁵ Te té Pãblú ní quidi-dé ndaha-dé ní ngau-nihnu-di núú ñùhú, te ñá túú tñahí ná ní cùu núú ní xexi-di.

⁶ Te ñáyíu ñuú-áⁿ xindéhé-yu núu daquihíⁿ-xi chùhúⁿ ãdi nduá-dé cuú-dé. Te naha ní xindéhé ñáhã-yu núu nãsa cada ñaha-xi xii-dé, te ñá túú tñahí ná ní quide ñaha-xi, te ní xitnaha-yu:

—Vãa ndiòxi cùú téé-a núu dácãⁿ ñá túú tñahí ná ní quide-xi ndaha-dé núú ní xexi cóó —cãchí-yu xitnaha-yu.

⁷ Te yatni núú dúcãⁿ ní xexihaⁿ cóó-ãⁿ caá ñùhu xitu téé nàni Publiú, te téé-ãⁿ táxi tñuní-dé ñihí ñuú caá cuádava xití lámár núú ndécú-ndí nduu-ãⁿ. Te ío vãha iní-dé chi ní cana ñaha-dè ní sáhãⁿ-ndí ní xindecu-ndí úní nduu vehe-dé.

⁸ Te tátã té Pùbliú-ãⁿ caá-dè cùhú-dé ñùhú-dé cahni, te tñahã-dé daxi. Te té Pãblú ní sáhãⁿ-dè núú caá-dè, te ní cáhãⁿ ndihí-dé Yã Ndióxi, te ní sacãⁿ ndodo-dé ndaha-dé díquí téé cùhú-ãⁿ, te ducaⁿ-ní ní quide-dé, te ní ndúha téé cùhú-ãⁿ.

⁹ Te sátá dúcãⁿ ní quide té Pãblú, te ní quixi nchaa ñáyíu cùhú núú ndécú-ndí, te ní quide tãtña ñaha té Pãblú xii-yu te ní ndúha-yu.

¹⁰ Te òré ndécú-ndí xiãⁿ, te vãi sã ní taxi tãhú-güedé, te òré ní xica-ndí ní taxi tucu-güedé nchaa sá xíní ñuhu-ndí ichi.

Té Pãblú ní quexio-dé ñuú Rómã

¹¹ Te yacãⁿ ní xindecu-ndí úní yóó, te sa ndècu ìⁿ bàrcú téé ñuú Alejãndriã òré ní quexio-ndí, te ní xindecu-xi ñihí yóó cùúⁿ dáú táchí. Te núú-xi cãndodo sandú sã dánani-güedé Cãstór ndihí sãndú sã dánani-güedé Pólux, te xití bàrcú-ãⁿ ní quée-ndí cuáhãⁿ-ndí.

¹² Te ní quexio-ndí ñuú Sirãcusá, te yacãⁿ ní xindecu-ndí úní nduu.

¹³ Te ní xica tucu bàrcú cuáhãⁿ-xi, te ní quexio-ndí ñuú Règiú. Te nduu tñéé duha ní quene nuu táchí. Te ní xica bàrcú cuáhãⁿ-xi, te ndéé nduu úú ní quexio-ndí ñuú Pùteolí.

¹⁴ Te yacãⁿ ní nanihí tñahã-ndí ndihí ñáyíu sãndãá iní tñuhu Jësús, te ní cachí-yu sã cùndècu-ndí únã nduu, núu xiãⁿ ní xindecu-ndí únã nduu ndihí-yu. Te ní xica tucu bàrcú cuáhãⁿ-xi, te ní quexio-ndí ñuú Rómã.

¹⁵ Te ñáyíu rómã ñáyíu sãndãá iní tñuhu Jësús, ní ñihí-yu tñuhu sã cuáhãⁿ-ndí, te ní quixi-yu ní quixi tñahã ñáhã-yu ichi. Te davã-yu ní nanihí-ndí ñuú Fòrú Àpiú, te davã-yu ní nanihí-ndí ñuú Úní Tãbernás. Te òré ní xíní té Pãblú nchaa ñáyíu véxi tñahã ñáhã xii-ndí, te ndee ndèe ní cuu iní-dé, te ní ndacãⁿ tãhú-dè núú Yã Ndióxi sã dúcãⁿ ní quide-yu.

¹⁶ Te sátã ní quexio-ndí ñuú Rómã, te cue téé cùchíuⁿ ní xáhaⁿ-güedé xii té Pãblú sã

cúndècu ðiiⁿ-dé, te ní xíndeé ñáhá cuàa sandadú xii-dé.

Té Páblú càháⁿ-dé tnúhu Yá Ndiòxí ñuu Ròmá

17 Nduu úní sá ní quexio té Páblú, te ní cana-dé cue tée cùnuu núú ñáyíu isràél ndécú ñúú Ròmá, te ní sáháⁿ-güedé núú ndécú-dé, te ní xáhaⁿ-dè:

—Nchòhó cue tée isràél, càchí tnúhu-í sá ñá túú ná ní quide-í ní ñiⁿ ñáyíu cùtnáhá ní xíndecu-í ñúú Jerusalén. Te ñá túú ní càháⁿ cuèhé-í sá quidé-yu nchaa nàcuáa ní xóo cada cue ñaní tnáhá-ó ní xíndecu ndéé sanaha, te ñá túú ná ní quide-í te ní tñii ñaha-güedé ní sáha cuendá ñáhá-güedé xii-í núú cue tée rómá, cue tée ndècu yacáⁿ.

18 Te cue tée-áⁿ ní ndúcú tnúhu-güedé núú ndáá ndècuéchi-í, te ní cutnùní iní-güedé sá ñá túú ná ní quide-í, te xiáⁿ cuiní-güedé queñuhu ñaha-güedé xii-í vecaá ní cùu.

19 Te ðiu-ni cue tée isràél ñá ní dàña-güedé cácu-í, chí cuiní-güedé sá cáhí ñaha cue tée rómá, cue tée xíndecu yacáⁿ xii-í ní cùu, te xiáⁿ núú ní xáhaⁿ-í sá quixi-í càháⁿ ndihí-í té Cèsár cuendá iha cada ndáá méé-dé cuendá-í, te vá yóo ñiⁿ tee-í cuéchi.

20 Núu xiáⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyíu ní xihí, te ðiu-ni ducaⁿ càháⁿ dava-gá ñáyíu isràél, te sá dúcáⁿ ní càháⁿ-í, te ní chihí ñaha-güedé vecaá, te xíndeé ñáhá-güedé ndéé vitna —càchí té Páblú xáhaⁿ-dè xii-güedé.

21 Te ní xáhaⁿ-güedé xii-dé:

—Ñá túú tnàhí tutú ní tэндaha cue tée distritú Judeá quixi cuendá-n. Te ní cuè tée isràél ñá túú ní quixi-güedé càháⁿ cuèhé-güedé cuendá-n.

22 Te cuiní-ndí cundedóho-ndí nása cunduu tnúhu càháⁿ-n, chí sa ní níhí-ndí tnúhu sá ncháá xichi ío xicáháⁿ cuèhé-yu cuendá nchaa ñáyíu sàndáá iní tnúhu Jèsús —càchí-güedé xáhaⁿ-güedé xii té Páblú.

23 Te ní xáhaⁿ-güedé nduu cùyáchí-güedé te quixi-güedé cundedóho-güedé dava-gá cuendú càháⁿ té Páblú. Te ní tnáhá nduu ní ndatnúhu-güedé quihíⁿ-güedé núú quidé vèhe-dé, te vai-yu ní sáháⁿ-yu ní xíndecóho-yu tnúhu ní càháⁿ-dé, te ncháca nchaa ní càháⁿ ndihí-dé-yu. Te ní xáhaⁿ-dè xií-yu sá ndíi Moisés ndihí dava-gá cue tée ní xóo càháⁿ tnúhu Yá Ndiòxí ndéé sanaha ní chidó tnùní-güedé núú tütú-güedé sá díú-gá tendaha-gá Cristú quixi-gá ñuyú-a. Te ní chidó tnùní-güedé nchaa nàcuáa cada-gá, te ðiu-ni nàcuáa càháⁿ tutú-güedé cada Cristú, te ducaⁿ ní quide-gá cùtnáhá ní xica cuu-gá ñuyú-a, núu xiáⁿ ní cutnùní sá díú Jèsús cúú-gá Cristú Yá ní tendaha Yá Ndiòxí ní quixi ñuyú-a. Te núu quindáá iní-yu, te ndíhu ndaha ñaha Yá Ndiòxí xií-yu.

24 Te davá-yu ní sàndáá iní-yu tnúhu ní càháⁿ-dé, te davá-yu ñá túú ní sàndáá iní-yu.

25 Te cuendá sá ñá ñiⁿ-ní tnúhu ní càháⁿ-yu, núu xiáⁿ cuiní-yu núhu-yu ní cùu. Te ní xáhaⁿ té Páblú sá cündetu tnaa-yu càháⁿ-dé ingá tnúhu, te xáhaⁿ-dè:

—Ní xáhaⁿ Espiritú Yá Ndiòxí xii ndíi Chàia nàcuáa càháⁿ ndíi núú nchaa ñaní tnáhá-ó ní xíndecu ndéé sanaha. Te ní càháⁿ Espiritú-gá ñiⁿ sá ndáá ní xáhaⁿ-xi xii ndíi, te duha ní xáhaⁿ-xi:

26 Quihíⁿ-n te cùñaha-n xii ñáyíu:

Nchòhó mee-ni cündedóho-ndo tnúhu càháⁿ Yá Ndiòxí, dico ni vā tècú tnùní-ndó.

Te cada-gá titní núú sá vá yóo tnàhí ndacu cada, dico ni vā cùtnùní iní-ndó nàcuáa nduu sá cáda-gá,

27 chí cuendá sá ío sáa iní-ndó,

xiáⁿ ducaⁿ ñá túú sáha-ndo cuendá nása cuáháⁿ tnúhu càháⁿ-gá,

chí ñá cuiní-ndó cündedóho-ndo, te ní ñá sàndáá iní-ndó.

Te ní ñá cuiní-ndó dàña-ndo nchaa sá cuèhé sá dúhá quide-ndo

cuendá xocani-gá nchaa xiáⁿ iní-ndó,

duha cùñaha-n xií-yu.

Càchí Espiritú-gá xáhaⁿ-xi xii ndíi.

28 Te na càchí tnúhu-í sá quihíⁿ cue tée càháⁿ tnúhu Yá Ndiòxí càháⁿ-güedé tnúhu-gá núú ñáyíu ñá túú cùu ñáyíu isràél, chí ñáyíu isràél ñá túú cuiní-yu cundedóho-yu. Dico ñáyíu ñá túú cùu ñáyíu isràél chí cùdú iní-yu cundedóho-yu, núu xiáⁿ nanihí tãhú-yu —càchí té Páblú xáhaⁿ-dè xií-yu.

29 Te sáta ní ndihí cuendú ní xáhaⁿ-dè, te ní ndéé-yu cuánuhú-yu ta ndatnúhu-yu cuáháⁿ.

30 Te úu cuía ní xínu ní xíndecu té Páblú ñiⁿ vehe ní cháhu-dé. Te ní xóo càháⁿ váha-dé ndihí nchaa ñáyíu ní xóo quihíⁿ vehe-ndé.

31 Te ní xáhaⁿ-dè sá ndíhu ndaha ñaha Yá Ndiòxí xií-yu núu quindáá iní-yu tnúhu-gá, te vá yóo ñiⁿ ní sadi yuhu-dé. Te mee-ni tnúhu Xítoho Jesucristú ní càháⁿ-dè núu-yu.

TUTÚ NÍ CADÚHA TÊ PÁBLÚ QUIHIⁿ NDAHA ÑÁYIU ÑUÚ RÒMÁ

Tê Páblú cadúha-dé tutú quíhiⁿ ndaha ñáyiu xĩndecu ichi Xítóhó Jesucristú ndécú ñúú Rómá

¹ Yúhú té Páblú xínú cuèchi-í núú Xítóhó Jesucristú, chi mee Yá Ndióxi ní cachí-gá sá cùú-í ìⁿ tée cáháⁿ tnúhu-gá núú ñáyiu, te tnúhu-gá cùú-xí tnúhu sá cáháⁿ nàcuáa naníhí tãhú-ó, núu ñúú-gá ní tendaha ñaha-gá xii-í xicáⁿ cùu-í cãháⁿ-í tnúhu-gá.

² Te ndéé sanaha ní cachí Yá Ndióxi sá dàcutíí sàá nduu ngũndecu ndíhi ñáyiu tnúhu-gá. Te ducaⁿ ní xáhaⁿ-gá xii cue tée ní cáháⁿ tnúhu-gá dàvá-áⁿ ní chídó tnúú-güedé núú tutú-gá.

³ Te tnúhu-gá sá cãháⁿ-í a cãháⁿ-xi ñúu-ni cuëndá Xítóhó Jesucristú Yáá cùú Dêhe-gá. Te Dêhe-gá-áⁿ cùú-gá ìⁿ ñáyiu, te cùu-gá ñani tnáhá ndí Dávií.

⁴ Te cùu-gá Yáá ñá túú tnáhi cuèchi-xi. Te ní xihí-gá te ní ndoto-gá, te xiáⁿ cùtnúni iní-ó sá cùú-gá Dêhe Yá Ndióxi, te ío cãhnu cuu-gá.

⁵ Te ñúu-ni Xítóhó Jesucristú ní quide-gá ní nduu tãhú-í núú Yá Ndióxi sá cáháⁿ-í tnúhu-gá núú cuè ñáyiu ñuyíú-a cuëndá quíndáá iní-yu tnúhu-gá te canchicúⁿ ni-hnú-yu cadá-yu nchaa nàcuáa cãháⁿ-xi, te ducaⁿ ío cuu cãhnu-gá.

⁶ Te tnáhá nchòhó cùú-ndó ñáyiu sa nchicúⁿ ni-hnu quide-ndo nchaa nàcuáa cáháⁿ tnúhu-áⁿ, chi ní cachí Yá Ndióxi sá nchòhó tnáhá tnúhu-ndo ndíhi Xítóhó Jesucristú.

⁷ Te nchòhó ñáyiu xĩndecu ñúú Rómá, ñáyiu ío cùu iní ñáhá Yá Ndióxi, cadúha-í tutú-a daquixi-í ndaha-ndo. Te ñúu-ni nchòhó cùú-ndó cuè ñáyiu ní cachí Yá Ndióxi cada ndáá cundecu-ndo ñúú-gá. Te xicáⁿ tãhú-í núú Tãtá-ó Dütú Ndióxi ndíhi núú Xítóhó Jesucristú sá ío na chĩndee chitúu ñaha-gá xii-ndo, te ducaⁿ ndí ndúú-gá ná càda te ío váha cuu iní-ndó cundecu-ndo.

Tê Páblú cuini-dé quíhiⁿ ngoto-dé cue ñáyiu xĩndecu ichi Xítóhó Jesucristú ndécú ñúú Rómá

⁸ Te díhna nuu-gá cachí tnúhu-í xii-ndo sá ío ndácáⁿ tãhú-í núú Yá Ndióxi cuëndá sá ío sàndáá iní-ndó-gá, te nchaa ñáyiu nihi-yu tnúhu sá dúcáⁿ quide-ndo. Te Xítóhó Jesucristú dáváha-gá nchaa tnúhu cáháⁿ-í núú Yá Ndióxi.

⁹ Te ndí tnáhá òrè cáháⁿ ndíhi-í Yá Ndióxi ducaⁿ-ni xicáⁿ tãhú-í núú-gá cuëndá-ndó, te mee-gá náha-gá sá cáháⁿ ndáá-í, te ñúu-ni núú-gá xínú cuèchi-í ní yúhu ní iní-í, chí

cáháⁿ-í nàcuáa ní quide Dêhe-gá Xítóhó Jesucristú cuëndá naníhí tãhú-ó.

¹⁰ Te xicáⁿ tãhú-í núú Yá Ndióxi sá ñúu mee-gá ná cãchí te sáá ìⁿ nduu quixi coto ñaha-í xii-ndo.

¹¹ Chí ío cuini-í cundecu ndíhi ñaha-í xii-ndo dãnèhé ñáhà-í ìⁿ úú tnúhu nàcuáa ío-gá chĩndee ñaha Espiritú Yá Ndióxi xii-ndo, te ducaⁿ ío-gá cuita nducu ndèe-ndo cada-ndo nchaa nàcuáa cuini-gá.

¹² Te ío chí ná cuáha tnàha-o tnúhu ndee ñni cundecu-o ichi-gá, chí nchòhó ndíhi yúhú ío sàndáá iní-ó-gá.

¹³ Te nchòhó ñáyiu ndècu ndíhi-í ichi Xítóhó Jesucristú na cãchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuini-í sá òrè quixi coto ñaha-í xii-ndo, te vá cuita chiúⁿ quixi-í dàtná quidè-í òrè sãngoto-í nchaa ñáyiu dava-gá ñúú ñá túú xita chiúⁿ-í chí ío váha sãhúuⁿ-yu tnúhu cáháⁿ-í, dico ñá ndácú-í quixi-í quixi coto ñaha-í xii-ndo.

¹⁴ Te yúhú yídiqui-í cáháⁿ-í tnúhu Xítóhó Jesucristú núú nchaa ñáyiu cáháⁿ tnúhu griégú, ndíhi núú nchaa ñáyiu cáháⁿ dava-gá núú tnúhu, ndíhi núú nchaa ñáyiu túha, ndíhi núú nchaa ñáyiu ñá túú túha.

¹⁵ Te cuëndá sá dúhá yídiqui-í cáháⁿ-í tnúhu-gá, xiáⁿ ío cuini-í dãnèhé ñáhà-í xii nchaa nchòhó ñáyiu ñúú Rómá nàcuáa ndúu tnúhu sá cáháⁿ nàcuáa naníhí tãhú-ó.

Ío cùnuu tnúhu Xítóhó Jesucristú

¹⁶ Te yúhú ñá túú tnáhi cùcahaⁿ nùú-í cáháⁿ-í tnúhu Xítóhó Jesucristú, chí cùu-xi tnúhu ío cùnuu, chí Yá Ndióxi ní cachí-gá sá ncháá ñáyiu na quíndáá iní-xi tnúhu-áⁿ te naníhí tãhú-yu. Te ní cachí-gá sá díhnanuu-gá ñáyiu isràél ngũndecu ndíhi-yu tnúhu-áⁿ te dàtnúni ngũndecu ndíhi ñáyiu ñá túú cùu ñáyiu isràél.

¹⁷ Te tnúhu-áⁿ dãnèhé ñáhà-xi xii-o sá cùdúu-o núú Yá Ndióxi te núu mee-ni sá quíndáá iní-ó-gá dàtná cáháⁿ-xi núú tutú-gá núú cãchí-xi: “Nchaa ñáyiu sàndáá iní ñáhá xii Yá Ndióxi cùdúu-yu núú-gá, te ndècu ndíhi ñáhà-yu xii-gá”, duha cãchí-xi núú tutú-gá.

Nchaa ñáyiu ndècu ñuyíú ndècuèchi-yu

¹⁸ Te ndéé andíu tendaha Yá Ndióxi sá ùhú quixi sá cùú-xi nchaa ñáyiu ñá túú quide ndáá núú-gá, ñáyiu quide nchaa sá cuèhé sá dúhá. Te cuëndá nchaa sá quidè-yu-áⁿ xiáⁿ ñá túú cuini-yu tñí-yu tnúhu ndáá tnúhu Yá Ndióxi cuëndá cuu-xi ìⁿ sá váha sá cùú-xi-yu.

¹⁹ Te cuèi ducaⁿ quidè-yu dico cùtnúni ndáá iní-yu nàcuáa ndúu sá sání ñni Yá Ndióxi ndíhi nàcuáa ndúu sá quidè-gá dàtná cùtnúni iní nchaa dava-gá-yu, chí ñúu-gá dãnèhé ñáhà-gá xii-yu.

²⁰ Te ní vá ndácú-ó quini núú-ó nãsa cãa-gá, te ní vá ndácú-ó quini-ó nãsa cãa

iní-gá, te ni vâ ndácú-ó quíni-ó nâsa quíde-gá táxi tnúni-gá nchaa nduu nchaa quíú. Te cuéi ducaⁿ dico ndéé cutnâhá-ni ngáva ñuyíú ní ngúíta nchaa ñáyiú təcú tnúni váha-yu nâcuáa ndúú sá sání iní-gá ndihí nâcuáa ndúú sá quíde-gá te ducaⁿ təcú tnúni-yu cuendá nchaa sá ní cadúha-gá ndéhé-yu ío ñuyíú-a, núu xiáⁿ vá cächí-yu sá ñâ túú cuéchi-yu.

²¹ Te cuéi ducaⁿ ní cutnúni iní-yu cuendá Yá Ndióxi dico ñâ túú cuíni-yu canehé-yu sá yíñúhu núú-gá nâcuáa táú-xi cunduu. Te ní ñâ túú cuíni-yu ndacáⁿ táhú-yu núú-gá cuendá nchaa sá váha quíde ñaha-gá xií-yu, chi mee-ni nchâa sá ñâ túú vèdana nândihí ñihu iní-yu. Te quíde-yu datná quíde ñⁿ ñáyiú ñâ túú ndècu ndihí nchaa sá xini tnúni-xi. Te uuⁿ-gá uuⁿ-gá tá quíde-yu cuáháⁿ.

²² Te cächí-yu sá cúú-yu ñáyiú ío váha sâá sá xini tnúni-xi dico ñâ ndâá, chi cúú-yu ñáyiú ío ñⁿ díquí-xi.

²³ Te ñâ túú cuíni-yu cáháⁿ-yu sá ío càhnu cuu Yá Ndióxi Yâá ndécú nchâa nduu nchaa quíú, chi da nchaa sá ní cadúha meé-yu quíde cahnú-yu. Te ní cadúha-yu nchaa sá nâhá ñáyiú ñâ túú cùdí ndècu ñuyíú-a. Te ní cadúha-yu sá nâhá quiti ndâva, ndihí sá nâhá quiti sâcuíta ñuhu mee-xi, ndihí sá nâhá nchaa dava-gá quiti, nchaa xiáⁿ quíde cahnú-yu.

²⁴ Te xiáⁿ núu ní dáñá Yá Ndióxi quíde-yu nchaa sá cuéhé sá dúhá sâni iní-yu. Te xiáⁿ ío quíde ndihí tnâhá-yu sá cuéhé sá dúhá sâcúú-xi yiqui cuñú-yu.

²⁵ Te ducaⁿ quíde-yu chi ñâ túú sândâá iní-yu tnúhu ndâá tnúhu Yá Ndióxi. Te mee-ni tnúhu ndehnde sândâá iní-yu, te nèhé-yu sá yíñúhu núú dáva sá ní cadúha-gá ío ñuyíú-a ndihí dava sá ndéé andíu te quíde cahnú-yu, te ñâ túú cächí-yu sá meé-gá ío càhnu cuu-gá, dico mee-gá xini ñuhu-xi cáháⁿ-yu sá ío càhnu cuu-gá ní caa ní quíhíⁿ. Te ndâá ndisa sá ío càhnu cuu-gá.

²⁶ Te sá dúcáⁿ ñâ túú quíde váha-yu núu xiáⁿ ní dáñá-nâ Yá Ndióxi quíde-yu nchaa sá cuéhé sá dúhá sâni iní meé-yu. Te dava ñáyiú díhí cáháⁿ ndihí tnâhá-yu ndi mee díhí-yu te ñâ túú quíde-yu nâcuáa ní nduu táhú-yu cadá-yu.

²⁷ Te díu-ni ducaⁿ xíquide dava cue téé chi sâni cuéhé sání dúha iní-güedé sá cúú-xi yiqui cuñú-güedé ndi mée tnaha téé-güedé, chí cáháⁿ ndihí tnâha ndi mee-güedé te ñâ túú quíde-güedé nâcuáa ní nduu táhú-güedé cada-güedé, te sá dúcáⁿ quíde-güedé te ñâ túú tnâhí cùu váha iní-güedé ndécú-güedé, te ducaⁿ tnâhí táú-xi ndoho-güedé cundecu-güedé.

²⁸ Te ñâ túú tnâhí ñuhu iní-yu Yá Ndióxi núu xiáⁿ duuⁿ duuⁿ ní dáñá ñihu ñaha-gá

xií-yu sâni cuéhé sání dúha iní-yu, te quíde-yu nchaa sá ñâ túú táú-yu cadá-yu.

²⁹ Te nchaa núú sá cuéhé sá dúhá cùnuu quíde-yu. Te cue téé cáháⁿ ndihí-güedé ñáyiú díhí te ñâ díú ñâdihí-güedé cúú-yu. Te díu-ni ducaⁿ xíquide cue ñáyiú díhí chí cáháⁿ ndihí-yu cue téé te ñâ díú yíi-yu cùu-güedé. Te mee-ni sá ñâ túú váha quíde-yu sá cúú-xi tnâha ñáyiú-yu, te xihó-yu cundecu ndihí-yu sá ndécú ndihí dava-gá tnâha ñáyiú-yu, te ío sâni cuéhé sání dúha iní-yu sá cúú-xi tnâha ñáyiú-yu, te ío cuédú iní-yu, te sâhni tnâhá-yu, te ío plètú-yu, te dândahú tnâhá-yu, te cùu úhú iní-yu cue tnâha ñáyiú-yu, te ío yiti yùhú-yu.

³⁰ Te cáháⁿ cuéhé-yu cuendá nchaa dava-gá tnâha ñáyiú-yu, te cùu úhú iní-yu Yá Ndióxi, te xio xio cuíni-yu cunuu tnúhu-yu, te mee-ni sâni iní-yu sá ío váha cunduu-yu, te ío quíde cahnú-yu meé-yu, te ío sâni iní-yu sá cadá úhú-yu tnâha ñáyiú-yu, te ñâ túú sândâá iní-yu ní tâtá-yu ní nâná-yu.

³¹ Te ñâ túú təcú tnúni-yu sá váha, te ñâ túú quíde-yu ñⁿ sá cáháⁿ-yu, te ñâ túú cùu iní-yu ní ñáyiú cùu ndi meé-yu, te ní dáva-gá tnâha ñáyiú-yu, te ñâ túú quíde cahnu iní-yu ñⁿ sá cúmâni núú tnâhá-yu, te ní ñâ túú cündahú iní-yu tnâha ñáyiú-yu.

³² Te Yá Ndióxi ní cachí-gá sá ncháá ñáyiú ducaⁿ xíquide quíhíⁿ-yu núú úhú núú ndâhú. Te xini-yu sá Yá Ndióxi daquihíⁿ ñâhá-gá xií-yu núú úhú núú ndâhú sá dúcáⁿ quíde-yu, dico uuⁿ-gá quíde-yu chí váha-gá cúú iní-yu cue ñáyiú quíde datná quíde meé-yu.

2

Yá Ndióxi cada ndâá-gá cuéchi nchaa ñáyiú ndècu ñuyíú

¹ Te nchòhó ñáyiú cächí sá ío ndècu cuéchi dava-gá ñáyiú tnâhá-ndó ío ndècu cuéchi-ndo cuéi nâgá ñáyiú cùu-ndo, chí tnâhá-ndó quíde-ni-ndo nchaa nacuaá quíde dava-gá ñáyiú cächí-ndó ndècu cuéchi-xi, te sá dúcáⁿ cáháⁿ-ndó sá ndécú cuéchi ñáyiú-áⁿ te dàcaa-ndo cuéchi díquí-ndó chí tnâhá-ndó quíde-ndo datná quíde-yu.

² Te nchoo xini-ó sá Yá Ndióxi ío váha cùtnuní iní-gá nâcuáa cada ndâá-gá cuéchi ñⁿ ñⁿ nchoo ñáyiú ndècu ñuyíú-a, chí daquihíⁿ-gá nchaa ñáyiú quíde nacuaá ní cáháⁿ-í núú úhú núú ndâhú.

³ Te nchòhó ñáyiú ñⁿ-ni quíde ndihí ñáyiú cächí meé-ndó sá ndécú cuéchi-xi dacuitíí sá ná châhu-ndo núú Yá Ndióxi sá dúcáⁿ quíde-ndo.

⁴ Te ñâ túú cùu váha iní-ndó sá Yá Ndióxi cündahú iní ñâhá-gá xii-ndo, te ní ñâ túú cùu váha iní-ndó sá ío cuíni-gá cada càhnu iní-gá nchaa sá ñâ túú váha quíde-ndo, te ní ñâ túú

quide cuendá-ndó sá Yá Ndiòxi quidé vâha ñaha-gã xii-ndo cuendá cuini-gã sá nchòhó ndixi túu iní-ndó sá ñã túú quide váha-ndo ndècu-ndo.

⁵ Te nchòhó cúú-ndó ñáiyu ío sáá iní-xi, chí ñã túú cuini-ndó ndixi túu iní-ndó sá ñã túú quide váha-ndo ndècu-ndo, te xiãⁿ núu ío-gã tá cùu vai tnúndòho sá cúú-xi-ndó. Te na sáá nduu tnúhu ndòho tnúhu ndàhú te ío ndòho-ndo, chí Yá Ndiòxi cada ndáá-gã nàcuáa ndùu cuéchi-ndo.

⁶ Te dàvã-áⁿ cada ndáá Yá Ndiòxi nchaa nàcuáa ndùu nchaa sá ñi quide ìⁿ ìⁿ ñáiyu ndècu ñuyíú-a.

⁷ Te nchaa ñáiyu nchicúⁿ nihnu-ni quide mee-ni sá vâha, ñáiyu-áⁿ nduu táhũ-yu cundecú-yu ndihí Yá Ndiòxi ní caa ní quihíⁿ, te ducaⁿ quide váha-yu chí cuini-yu sá Yá Ndiòxi cuu váha iní ñáhã-gã xii-yu, te cuini tucú-yu nduu táhũ-yu núú ío váha càa ndècu Yá Ndiòxi cundecú-yu ní caa ní quihíⁿ.

⁸ Te ío cùdèéⁿ-gã núú nchaa ñáiyu ñùhu iní mee-ni sá cúú-xi mée-xi, te ñã túú sàndáá iní-yu tnúhu ndáá chí mee-ni sá cuèhé sá dúhá quidé-yu.

⁹ Te nchaa ñáiyu ducaⁿ xiquide ío ndihú iní-yu. Te díhna-gã ñáiyu isràél ngúita-xi ndohó-yu, te dàtnúni ngúita-xi ndohò nchaa ñáiyu ñã túú cùu ñáiyu isràél.

¹⁰ Te nchaa ñáiyu ní quide váha, te Yá Ndiòxi cada-gã te ngúndecú-yu núú ío váha càa ndècu-gã, te cachí-gã sá ní quide váha-yu, te ío váha cuu iní-yu cundecú-yu. Te díhna-gã ñáiyu isràél ñáiyu ní quide váha ducaⁿ càda ñaha-gã xii-yu, te dàtnúni ducaⁿ càda ñaha-gã xii ñáiyu ñã túú cùu ñáiyu isràél ñáiyu ní quide váha.

¹¹ Te ñã túú quide cuendá-gã cuèi náí ñáiyu cùú-yu.

¹² Te nchaa ñáiyu ndècu ndihí nchaa tnúhu ní chídó tnúni ndíi Moisés, Yá Ndiòxi cada ndáá-gã cuéchi-yu nàcuáa càháⁿ nchaa tnúhu-áⁿ. Te nchaa ñáiyu ñã túú ndècu ndihí tnúhu ní chídó tnúni ndíi-áⁿ, Yá Ndiòxi vá càdá ndáá-gã cuéchi-yu nàcuáa càháⁿ nchaa tnúhu-áⁿ. Dico nchaa ñáiyu quide nándi sá cuèhé sá dúhá dàcuítíi cuíta nihnú-yu cuèi ndècu ndihí-yu tnúhu ní chídó tnúni ndíi Moisés àdi ñã túú ndècu ndihí-yu.

¹³ Te nchaa ñáiyu dícò-ni sàcúndedóho nchaa tnúhu ní càháⁿ ndíi Moisés te ñã túú tñiⁿ-yu, ñáiyu-áⁿ ñã túú cùú-yu núú Yá Ndiòxi, dico nchaa ñáiyu tñiⁿ nchaa tnúhu ní càháⁿ ndíi, ñáiyu-áⁿ càchí Yá Ndiòxi sá cùú-yu núú-gã, chí ñã túú-gã cuéchi-yu ndècu núú-gã.

¹⁴ Te nchaa ñáiyu ñã túú ndècu ndihí tnúhu ní chídó tnúni ndíi Moisés, te núu quidé-yu nchaa nàcuáa ní càháⁿ ndíi te cùu-xi ìⁿ sá sání tñahí iní mée-yu cadá-yu, te sá

sání iní-yu-áⁿ cúú-xi ìⁿ tnúhu váha sá sání ichi ñaha xii-yu nàcuáa cada váha-yu cundecú-yu.

¹⁵ Te sá dúcãⁿ quidé-yu xiãⁿ cùtnúni sá sání iní-yu dàtnã càháⁿ tnúhu ní chídó tnúni ndíi Moisés cada ñáiyu isràél, te ío váha cùtnúni iní-yu nchaa nàcuáa quidé-yu chí ndixi túu iní-yu òrè ñã túú quide váha-yu.

¹⁶ Te sáá nduu te Yá Ndiòxi cùñaha-gã xii Xítòhó Jesucristú cada ndáá-gã nchaa cuéchi ñáiyu, nchaa sá sání iní mée-yu ndùu yuhu, te cada-gã dàtnã càháⁿ tnúhu sá sání ichi ñaha xii-o nàcuáa naníhí tãhú-ó, tnúhu sá dánhè ñáhã-í xii-ndo.

Cuendá ñáiyu isràél ndihí cuendá nchaa tnúhu ní chídó tnúni ndíi Moisés

¹⁷ Te nchòhó ñáiyu isràél nchaa-ndo cùu-ndo ndi mee-í, te càchí-ndó sá nchicúⁿ nihnu-ndo quide-ndo nchaa tnúhu ní càháⁿ ndíi Moisés núu xiãⁿ ndécú váha-ndo, te càchí-ndó sá ío càhmu cuu-ndo sá ndécú ndihí-ndo Yá Ndiòxi.

¹⁸ Te cùtnúni iní-ndó nchaa nàcuáa cuini Yá Ndiòxi cada-ndo, te sá dúcãⁿ nchicúⁿ nihnu-ndo quide-ndo nàcuáa càháⁿ tnúhu-áⁿ xiãⁿ cùtnúni iní-ndó nchaa sá ío-gã váha xini ñuhu-xi cada-ndo.

¹⁹ Te càchí-ndó sá ío váha xini-ndó cànuichi-ndo nchaa ñáiyu ñã túú cùtnúni iní-xi, te càchí tucu-ndo sá ío váha xini-ndó nà canu ichi-ndo nchaa ñáiyu ndècu ichi cuèhé ichi duha.

²⁰ Te sànu ichi-ndo nchaa ñáiyu ío nùú díquí-xi, ndihí nchaa ñáiyu vitna ta tècú tnúni nchaa sá vâha, te ducaⁿ quide-ndo chí ndècu ndihí-ndo nchaa tnúhu ní chídó tnúni ndíi Moisés, te tnúhu-áⁿ cúú-xi tnúhu ndáá, chí sànu ichi ñaha-xi xii-ndo nàcuáa cada-ndo.

²¹ Te nchòhó dàcuaha-ndo ñáiyu nàcuáa cadá-yu, te mee-ndo ñã túú dàcuaha-ndo cada-ndo nchaa nàcuáa tãú-xi cunduu, te xãhaⁿ-ndo xii-yu sá vã cúú dùhú-yu te mee-ndo dùhu-ndo.

²² Te dàcuaha-ndó-yu sá cuè téé vá cúú càháⁿ ndihí-güedé ñáiyu díhí te núu ñã díú ñãdihí-güedé cúú-yu, te ducaⁿ-ni cuè ñáiyu díhí, vá cúú càháⁿ ndihí-yu téé te núu ñã díú yíi-yu cùu-güedé. Te nchaa sá xãhaⁿ-ndo vã cúú càda ñáiyu te mee-ndo quide-ni-ndo, te xãhaⁿ-ndo xii-yu sá vã cànehé-yu sá yíñúhu núú nchaa sá càchí-yu cùu ndiòxi-yu, te mee-ndo nehé-gã quidé-ndó, chí dùhu-ndo nchaa sá ndécú vèñúhu.

²³ Te càchí-ndó sá ío cùnuu nchaa tnúhu ní chídó tnúni ndíi Moisés, te ñã túú quide-ndo nchaa nàcuáa ní càháⁿ ndíi, te sá dúcãⁿ quide-ndo-áⁿ te dàquee tihú-ndó Yá Ndiòxi.

²⁴ Te quèe ndáá-xi nàcuáa càháⁿ-xi núú tütú Yá Ndiòxi nàcuáa quide-ndo-áⁿ núú

càchí-xi sá ncháá ñáiyu ñá túú cùu ñáiyu isráél càháⁿ cuèhé-yu cuèndá Yá Ndiòxí sá cuèndá-ndó.

²⁵ Te nchòhò ñáiyu isráél nchaa-ndo cùu-ndo ndi mee-í, te tnàhá-ndó ndècu ndihi-ndo seña ñii-ndo, te vâha-ni sá dúcáⁿ te núu quide-ndo nchaa nacuaá ní cáháⁿ ndíi Moisés. Dico núu ñá túú quide-ndo nchaa nacuaá ní cáháⁿ ndíi ña, te ñá túú nândíhi-xi sá cúu-ndó ñáiyu isráél cuèi ndècu seña ñii-ndo.

²⁶ Te nchaa ñáiyu ñá túú ndècu ndihi seña ñii-xi, te núu quide-yu nchaa nacuaá ní cáháⁿ ndíi Moisés, te cùu-yu datná cue ñáiyu ndècu ndihi seña ñii-xi, chi quide-yu nchaa nacuaá ní cáháⁿ ndíi.

²⁷ Te ñáiyu ñá túú ndècu ndihi seña ñii-xi, te núu na càdá-yu nchaa nacuaá ní cáháⁿ ndíi Moisés, te ñáiyu-án cachí-yu sá ñá túú quide ndáá nchaa nchòhò ñáiyu ndècu ndihi seña ñii-xi, chi ndècu ndihi-ndo nchaa tnúhu ní chídó tnùn ndíi te ñá túú quide-ndo nacuaá cáháⁿ tnúhu-án.

²⁸ Te nchòhò ñáiyu isráél, ñáiyu nchicúⁿ nihnu-ni quide nchaa nacuaá ta quide tnahi-ndo véxi, ñá túú quide-ndo sá cúu-ndó ñáiyu isráél, te mee-ndo ndècu seña ñii-ndo dico ñá túú quide-ndo nacuaá tàù-xi cada nchaa ñáiyu ndècu seña ñii-xi, te mee-ni seña-án sâha-ndo ñii-ndo te ñá túú quide-ndo nacuaá cuini Yá Ndiòxí cada-ndo.

²⁹ Te nchaa ñáiyu sàndáá ndisa iní-xi Yá Ndiòxí, ñáiyu-án cúu ndisá-yu ñáiyu isráél, te sa ní nduu ndoo ní nduu nine iní-yu chi Espíritú Yá Ndiòxí ducaⁿ ní quide-xi, dico ñá díú sá sâha-yu seña ñii-yu datná ní cachí ndíi Moisés. Te ñáiyu-án cúu vâha iní ñáhá Yá Ndiòxí xii-yu cuèi ñá túú càháⁿ vâha tnàha ñáiyú-yu cuèndá-yu.

3

¹ Te sá dúhá càháⁿ-í te ió dava ñáiyu quesàhá-yu sá ñii-ní cùu ñáiyu ñá túú cùu ñáiyu isráél ndihi nchoo ñáiyu isráél, te quesaha tucú-yu sá ñii-ní quide tucú-xi cuèi na cuâha àdi vá cuâha seña ñii-yu.

² Dico yúhú càchí-í sá ncháá ñáiyu isráél ío-gá cúnúu-yu, chi ío titní núú sá vâha ní quide ñaha Yá Ndiòxí xii-yu, chi ní sáñaha-gá tnúhu-gá ndécú ndíhi-yu.

³ Te davá-yu ñá túú cuini-yu cada ndáá-yu, dico ñá díú sá xîáⁿ te cùyica iní Yá Ndiòxí ñá túú quide ndáá-gá.

⁴ Dico ñáhá chi xini ñuhu-xi sá ncháá ñáiyu cada cuèndá-yu sá Yá Ndiòxí cúu-gá Yá quidé ndáá cuiti, te cuèi nchaa-yu na càchí-yu sá ñá túú quide ndáá-gá, dico mee-gá chi quide ndáá-ni-gá. Te núu tütú-gá càháⁿ-xi nacuaá ní xáhaⁿ ñii-tée ní xíndecu ndéé sanaha xii-gá, te duha ní xáhaⁿ-dê:

Yòhó Dútú Ndiòxí, cùtnuní iní ñáiyu sá ío ndáá càháⁿ-n,

te cùnnu nahi-ni tnúhu-n cuèi òré càchí ñáiyu sá ñá túú càháⁿ ndáá-n.

Duha ní xáhaⁿ tée ndéé sanaha-án xii-gá càchí-xi núú tütú-gá.

⁵ Te cuèndá nchaa sá cuèhé sá dúhá quide ñáiyu, xîáⁿ cùtnuní iní-yu sá Yá Ndiòxí cúu-gá Yá ío vâha quide ndáá, chi mee-gá ñá túú dúcáⁿ quide-gá. Te cuèi ducaⁿ dico vá cáni iní-yu sá Yá Ndiòxí ñá túú quide ndáá-gá sá dándòho ñaha-gá xii-yu na sáá nduu, te núu ducaⁿ na càni iní-yu, te sàni iní-yu datná sàni iní cue ñáiyu ñá túú ndècu ichi-gá.

⁶ Te vá dúcáⁿ càni iní-yu, chi núu Yá Ndiòxí ñá túú quide ndáá-gá ñá, te vá cúu càda ndáá-gá nchaa cuèchi cue ñáiyu ñuyúú-a te núu ducaⁿ.

⁷ Te núu yúhú ná càni iní-í cáháⁿ-í ñii-í tnúhu ndehnde, te sá tnúhu-án te cani tucu iní-í sá quidé càhuu-gá-í tnúhu ndáá tnúhu Yá Ndiòxí, te sá dúcáⁿ ná cáháⁿ-í te cani tucu iní-í sá vá cúu càháⁿ Yá Ndiòxí sá ndécú cuèchi-í.

⁸ Te núu na càni tucu iní-í sá vâha-gá cada-í nchaa sá cuèhé sá dúhá cuèndá Yá Ndiòxí cada-gá sá vâha, dico ñá ndáá. Te ió ñáiyu càháⁿ cuèhé cuèndá-í te càchí-yu sá díú-ní dúcáⁿ dacuaa-í ñáiyu dico ñá ndáá sá dúcáⁿ dânehé-í-yu, te ñáiyu-án nacháhu-yu tnúhu càháⁿ-yu, chi ducaⁿ tàù-xi cunduu.

Nchaa ñáiyu ñuyúú-a ndècuèchi-yu

⁹ Te vitna càchí dava ñáiyu sá ío-gá cúnúu nchoo cue ñáiyu isráél dàcúúxi dàva-gá ñáiyu, dico yúhú càchí-í sá ñáhá, te sa ní cachí tnúhu ndáá-í xii-ndo sá nchaa ñáiyu ndècuèchi-yu cuèi ñáiyu isráél te cuèi ñáiyu ñá túú cùu ñáiyu isráél.

¹⁰ Te núu tütú Yá Ndiòxí càchí-xi:

Vá yóo ñiiⁿ quide ndáá,

¹¹ te ní vá yóo ñiiⁿ tēcú tnùní tnúhu vâha,

te ní vá yóo ñiiⁿ nànducu nihnu Yá Ndiòxí.

¹² Chi nchaa-yu ñá túú nchicúⁿ nihnú-yu ichi vâha, te nchaa-yu cùu-yu ñáiyu xíndecu neñúu sá cúu-xi Yá Ndiòxí.

Te ní ñiiⁿ-yu ñá túú quide-yu ñiiⁿ sá vâha.

¹³ Te cada iní-ndó sá yúhú-yu cùu-xi datná cúu ñiiⁿ yaú núu yíndúxi ndíyi núú ío ndehe sáháⁿ,

te ducaⁿ sátnahá-xi cùu yuhú-yu, chi ío càháⁿ cuèhé-yu, te mee-ni dândahú-yu nchaa tnàha ñáiyú-yu.

Te cada iní-ndó sá vènenú cóo yíhi yuhú-yu chi mee-ni càháⁿ úhú-yu cuèndá tnàha ñáiyú-yu.

¹⁴ Te ió iní-yu càháⁿ úhú tnáhá-yu.

¹⁵ Te àúⁿ ná cuu àúⁿ ná xîáⁿ xísahni tnáhá-yu.

¹⁶ Te nchaa núu xicá cùu-yu quide úhú iní-yu nchaa tnàha ñáiyú-yu nacuaá ndíhi iní ñáiyú-án.

17 Te ñá túú cuiní-yu cundecu ndihi tnàha váha-yu.

18 Te ñá túú sàni iní-yu canehé-yu sá yíñùhu núú Yá Ndiòxi.

Duha quidé-yu cächi-xi núú tùtù-gá.

19 Te cùtnuní iní-ó sá nchàa tnúhu ní chídó tnùní ndí Moisés cúú-xí cuendá nchaa ñáyiú nchicúⁿ nihnu nchaa tnúhu-áⁿ. Te tnúhu-áⁿ cúú-xí cuendá sá vā yōo tnàhi cächí sá ñá túú cuèchi-xi, te ducaⁿ te nchaandi túhú ñáyiú cutnùní iní-yu sá ná chāhu-yu nchaa sá quidé-yu núú Yá Ndiòxi.

20 Te ducaⁿ càda-xi chi ní ñⁿ ñáyiú vā cächí-ó sá vā cùndecu cuèchi-yu núú Yá Ndiòxi cuendá-ni sá nchicúⁿ nihnú-yu nchaa tnúhu sá ñí chídó tnùní ndí Moisés, te tnúhu-áⁿ cächí tnúhu-xi cuendá-ni sá cùtnuní iní-ó sá ndécú-ó ìchi cuehé ìchi duha.

Te núu na quindáá iní-ó Xítoho Jesucristú te naníhi táhú-ó

21 Te vitna ní cutnùní iní-ó sá ñá díú sá cadá-ó nchàa nacuaá ní cáháⁿ ndí Moisés cudíu-o núú Yá Ndiòxi, chi mee-gá quidé cudíu-o núú-gá. Te núú tùtù ndí Moisés ndíhi núú tùtù cue téé ní xóo cáháⁿ tnúhu Yá Ndiòxi ndéé sanaha càháⁿ-xi nacuaá cada ñaha-gá xii-o vitna.

22 Te ducaⁿ cudíu-o núú Yá Ndiòxi te núu na quindáá iní-ó Xítoho Jesucristú. Te díu-ni ducaⁿ cudíu nchaa ñáyiú ñuyúú te núu na quindáá iní ñáhā-yu xii-gá, chi ñⁿ-ni cùu-o nchaa-o sá cúú-xí Yá Ndiòxi.

23 Chi nchaá-yu ndècu cuèchi-yu, chi ñá ñⁿ-yu quidé-yu nacuaá cáháⁿ Yá Ndiòxi sá cúú-yu ñáyiú quide váha.

24 Dico Yá Ndiòxi io váha iní-gá chi ní quide ñaha-gá xii-o ñⁿ sá váha, chi dicó-ni ducaⁿ ní quide-gá nacuaá vā cùndecu-gá cuèchi-o núú-gá, chi Xítoho Jesucristú ní sati ñíñí-gá te ní xíhí-gá, te ducaⁿ ní yáha-gá cuendá sá vā cùndecu-gá cuèchi-o.

25 Te Yá Ndiòxi ní taxi ndecu-gá Xítoho Jesucristú núú ñáyiú ñuyúú-a, te ní xíhí-gá sá cuendá nchaa yíca cuèchi-yu, te ducaⁿ ní cuu cuendá sá ncháá ñáyiú na quindáá iní ñáhā xii-gá te vā náchāhu-yu cuèchi-yu núú Yá Ndiòxi. Te Yá Ndiòxi ní quide ndee iní-gá nchaa sá cuèhé sá dúhá ní quide cue ñáyiú ní xíndecu ndéé sanaha. Te xiáⁿ ní xíhí Xítoho Jesucristú cuendá cutnùní iní-ó sá Yá Ndiòxi cúú-gá Yaá io váha quide ndáá cuèi ducaⁿ ní quide ndee iní-gá nchaa sá ñí quide cue ñáyiú-áⁿ.

26 Núu xiáⁿ vitna ní cutnùní ndisa iní-ó sá quidé ndáá-gá, te quide-gá sá cuè ñáyiú vā cùndecu-gá cuèchi-yu núú-gá, te núu na quindáá iní-yu Xítoho Jesucristú.

27 Te vitna vā cächí-ó sá io càhnu cuu-o cuendá sá ñá túú-gá cuèchi-o ndècu núú Yá Ndiòxi, te ducaⁿ ñá túú-gá cuèchi-o ndècu

núú-gá cuendá sá sàndáá iní-ó Xítoho Jesucristú, te ñá díú sá cuendá nchaa tnúhu ní cáháⁿ ndí Moisés.

28 Te cùtnuní iní-ó sá ndèda-ni càa ñáyiú vā cùndecu-gá cuèchi-yu núú Yá Ndiòxi te núu na quindáá iní-yu Xítoho Jesucristú cuèi ní quidé-yu nchaa nacuaá ní cáháⁿ ndí Moisés àdi ñá túú ní quidé-yu.

29 Te cùtnuní iní-ó sá Yá Ndiòxi cúú-gá Ndiòxi nchaandi túhú ñáyiú, te ñá díú mèe-ni Ndiòxi ñáyiú israél cúú-gá.

30 Te ñⁿdi dí-gá cúú-gá Ndiòxi, te nchaa ñáyiú sàndáá iní ñáhā xii Xítoho Jesucristú te vā cùndecu-gá cuèchi-yu núú Yá Ndiòxi cuèi cúú-yu ñáyiú israél àdi ñá túú cúú-yu.

31 Te ñá díú sá sàndáá iní-ó Xítoho Jesucristú te cächí-ó sá ñá túú nàndíhi nchaa tnúhu sá sánú ìchi ñaha xii-o nacuaá cada-o, te ñáhā chi sá dúhá sàndáá iní-ó-gá te xiáⁿ nchicúⁿ nihnu-o quide-o nacuaá cáháⁿ tnúhu-áⁿ.

4

Cuendá ndí Àbrahám

1 Te vitna na cächí tnúhu-xi xii-ndo cuendá ndí Àbrahám téé ní cuu ñani tnáhā-ó ñí xíndecu ndéé sanaha.

2 Te ndí-áⁿ ñá túú ní xíndecu cuèchi ndí núú Yá Ndiòxi, dico ñá díú cuendá ñⁿ chiúⁿ ní quide ndí ducaⁿ ñá túú ní xíndecu cuèchi ndí núú-gá. Chi núu cuendá ñⁿ chiúⁿ ní quide ndí ducaⁿ ñá túú ní xíndecu cuèchi ndí núú Yá Ndiòxi ñá, te cada càhnu ndí mee ndí ni cùu, dico ñá díú núú Yá Ndiòxi cada càhnu ndí mee ndí te núu ducaⁿ ní quide ndí.

3 Te chí dándacu iní nacuaá càháⁿ-xi núú tùtù Yá Ndiòxi núú cächí-xi: “Té Àbrahám ní sàndáá iní-dé Yá Ndiòxi, te xiáⁿ ní cächí-gá sá cudíu-dé núú-gá”, duha cächí-xi núú tùtù-gá.

4 Te sá cúhúⁿ yāhu ñⁿ téé quide chiúⁿ, te vā cächí-ó sá xiáⁿ cúú-xí ñⁿ táhú sá cúú-xí-dé chi yāhu tnàhi-dé cúú-xí.

5 Te vā yōo ñⁿ ndacu cada ñⁿ chiúⁿ nacuaá cudíu-xi núú Yá Ndiòxi. Te ñá túú ñá chiúⁿ xini ñuhu-xi cada ñáyiú te cudíu-yu núú-gá, chi xini ñuhu-ni-xi sá quindáá-ni iní-yu-gá. Te díu-gá cächí-gá sá ñáyiú ndècu ìchi cuehé ìchi duha vā cùndecu-gá cuèchi-yu núú-gá, te núu na quindáá iní ñáhā-yu xii-gá.

6 Te díu-ni ducaⁿ ní cáháⁿ ndí Dàvíí, chi ní cächí ndí sá io váha táhú nchaa ñáyiú ní cächí Yá Ndiòxi cudíu núú-gá, dico ñá díú cuendá ñⁿ chiúⁿ quidé-yu cudíu-yu núú-gá.

7 Te duha ní cächí ndí:

Váha táhú nchaa ñáyiú quide cahnu iní Yá Ndiòxi nchaa cuèchi-xi, te ñá túú-gá quidé cuendá-gá nchaa sá cuèhé sá dúhá ñí quidé-yu.

⁸ Váha táhũ-yu chi Yá Ndióxi cächí-gá sá ñã tũú-gá cuéchi-yu.

Duha ní cachí ndíi Dávii.

⁹ Te ñã díu mēe-ni ñáiyu ngũndecu señá ñĩ-xi ducaⁿ váha táhũ-yu, chi tnáhá ñáiyu ñã tũú ngũndecu señá ñĩ-xi ducaⁿ váha táhũ-yu. Te sa náha-o sá Yá Ndióxi ní cachí-gá sá cúdiu ndíi Ábrahám núú-gá cuendá sá ní sándáá iní ñáhá ndíi xii-gá.

¹⁰ Te cunaha-ndo sá díhna-gá ní cachí Yá Ndióxi sá cúdiu ndíi Ábrahám núú-gá te dátnuní ngũndecu señá ñĩ ndíi.

¹¹ Te ní ngũndecu señá ñĩ ndíi cuendá xiãⁿ cuu-xi ñⁿ señá sá cúdiu ndíi núú Yá Ndióxi. Te ndéé cútñahá vátá ngũndecu-gá señá ñĩ ndíi, te sa cúdiu ndíi núú-gá chi ní sándáá iní ñáhá ndíi xii-gá. Te sá dúcáⁿ ñã tũú ndécu señá ñĩ ndíi cútñahá ní sándáá iní ndíi Yá Ndióxi xiãⁿ ní cuu ndíi dátñá ñⁿ díhí dütú nchaa ñáiyu sándáá iní ñáhá xii-gá, ñáiyu ñã tũú ní ngũndecu señá ñĩ-xi, te cúdiu-yu ntũú-gá.

¹² Te ndíi Ábrahám ní cuu tucu ndíi dátñá ñⁿ díhí dütú nchaa ñáiyu ní ngũndecu señá ñĩ-xi, dico ñã díu cuendá-ni sá ní ngũndecu señá ñĩ-yu cùu ndíi díhí dütũ-yu, chi cuendá sá sándáá iní-yu Yá Ndióxi nchicúⁿ niñnú-yu nàcuáa ní quide ndíi ní sándáá iní ñáhá ndíi xii-gá ndéé cútñahá vátá ngũndecu-gá señá ñĩ ndíi.

Yá Ndióxi cada-gá nchaa nàcuáa ní cachí-gá te núu na quindáá iní-ó-gá

¹³ Te Yá Ndióxi ní xáhaⁿ-gá xii ndíi Ábrahám sá ndúú táhú ndíi cunuu ndíi ñuyúú, ndíhi cue dēhe ndíi, ndíhi nchaa dava-gá cue ñani tnáhá ndíi vitna cacu tũu. Te ducaⁿ ní xáhaⁿ Yá Ndióxi xii ndíi ndíhi cue ñani tnáhá ndíi, chi ní sándáá iní ñáhá ndíi xii-gá núu xiãⁿ ní cudíu ndíi núú-gá. Te ducaⁿ ní xáhaⁿ-gá xii ndíi dico ñã díu cuendá sá ní quide ndíi nàcuáa ní xáhaⁿ Yá Ndióxi xii ndíi Moisés cada ñáiyu ndéé cuèè-gá.

¹⁴ Te núu mee-ni ñáiyu nchicúⁿ niñnu quide nacuaa ní cáháⁿ ndíi Moisés ní ndúu táhũ-yu cumúú-yu ñuyúú-a ní cùu ñã, te ñã tũú xini ñuhu-xi quindáá iní-ó Yá Ndióxi, te ñã tũú nandíhi tnúhu ní xáhaⁿ Yá Ndióxi xii ndíi Ábrahám ní cùu te núu ducaⁿ.

¹⁵ Te núu ñⁿ ñáiyu ñã tũú quide nacuaa cáháⁿ tnúhu sá sánú ichi ñaha xii-o nacuaa cada-o te nacháhu-yu sá dúcáⁿ quidé-yu. Te núu ñã tũú tnúhu sá sánú ichi ñaha-xi xii-o nacuaa cada-o ní cùu ñã, te ñã tũú cuéchi-o ní cùu.

¹⁶ Te ducaⁿ ní xáhaⁿ Yá Ndióxi xii ndíi Ábrahám nàcuáa cada-gá, chi cuendá sá ní sándáá iní ñáhá ndíi xii-gá. Te ducaⁿ ní quide-gá chi ío váha iní-gá, dico ñã díu sá ñⁿ chiúⁿ ní quide ndíi ducaⁿ ní xáhaⁿ-gá. Te

sá dúcáⁿ ní cuu te cùu-xi ñⁿ tnúhu ndáá sá cúú-xi nchaa ñani tnáhá ndíi, ñáiyu sándáá iní ñáhá xii-gá dátñá ní sándáá iní ñáhá mēe ndíi xii-gá, te ñã díu mēe-ni cuendá nchaa ñani tnáhá ndíi nchicúⁿ niñnu nchaa nàcuáa ní cáháⁿ ndíi Moisés, chi ndíi Ábrahám-áⁿ ní cuu ndíi dátñá ñⁿ díhí dütú cue ñáiyu sándáá iní ñáhá xii Yá Ndióxi.

¹⁷ Te núú tütú Yá Ndióxi cáháⁿ-xi nàcuáa ní xáhaⁿ-gá xii ndíi, te duha ní xáhaⁿ-gá: “Yóhó té Ábrahám ní quide ñaha-í xii-n dátñá ñⁿ díhí dütú cue ñáiyu xĩndecu niñí ñuyúú.” Duha ní xáhaⁿ Yá Ndióxi xii ndíi, cächí-xi núú tütú-gá. Te Yá Ndióxi náhá ndáá-gá sá cáda-xi nàcuáa ní xáhaⁿ-gá xii ndíi Ábrahám, te diu-ni-gá cúú Yáá ní sándáá iní ndíi, te diu-ni-gá dándoto-gá ñáiyu ní xihí, te diu-ni-gá quidé tá ngũndecu nchaa sá vátá cundecu-gá ñuyúú-a.

¹⁸ Te Yá Ndióxi ní xáhaⁿ-gá xii ndíi Ábrahám sá ío cuéhé dēhe ndíi coo, te ío ní sándáá iní ndíi nàcuáa ní xáhaⁿ-gá dico ñã tũú ní cútñuní iní ndíi nása cada-gá, chi ío ní sahnu ndíi. Te cuendá sá dúcáⁿ ío ní sándáá iní ndíi tnúhu ní xáhaⁿ-gá núu xiãⁿ ní cuu ndíi díhí dütú vai ñáiyu xĩndecu niñí ñuyúú.

¹⁹ Te ndíi Ábrahám ñúhu ndíi ñⁿ ciendú cuía cútñahá ducaⁿ ní xáhaⁿ Yá Ndióxi xii ndíi, te ní cútñuní iní ndíi sá ñã tũú táhú ndíi sá cóo dēhe ndíi ndíhi ñadíhi ndíi ndíi Sără, chi ndíi ndúu-yu sa ní sahnu vihi-yu, te cuéi ducaⁿ dico ní sándáá-ni iní ndíi nàcuáa ní xáhaⁿ Yá Ndióxi.

²⁰ Te ñã tũú ní sàni ñⁿ sani úú iní ndíi nàcuáa ní xáhaⁿ Yá Ndióxi cada-gá sá cúú-xi ndíi, chi da uuⁿ-gá váha ní sándáá iní ndíi nàcuáa ní xáhaⁿ-gá, te ní cachí ndíi sá ío cãhnu cuu-gá.

²¹ Te ní cútñuní ndáá iní ndíi sá Yá Ndióxi ndácú-gá quidé-gá nchaa sá cáháⁿ-gá.

²² Te sá ní sándáá iní ndíi nàcuáa ní cáháⁿ Yá Ndióxi, núu xiãⁿ ní cachí-gá sá cúú ndíi ñⁿ téé ñã tũú cuéchi-xi núú-gá.

²³ Te ní ngódó tnùní núú tütú Yá Ndióxi cuendá ndíi Ábrahám sá ní cachí-gá sá ñã tũú cuéchi ndíi núú-gá, te ñã díu-ni cuendá mēe ndíi ní ngódó tnùní núú tütú-gá.

²⁴ Chi tnáhá cuendá-ó nchaa-o ní ngódó tnùní núú tütú-gá. Te cächí-gá sá ñã tũú cuéchi-o núú-gá chi sándáá iní-ó-gá, te diu-gá cúú-gá Yáá ní dándotó ñaha xii Xitohó Jesucristú Yáá cúú Xitohó-ó.

²⁵ Te Yá Ndióxi ní cachí-gá sá díu Xitohó Jesucristú cuú-gá cuendá nacháhu-gá nchaa cuéchi-o. Te ní xihí-gá te ní ndoto-gá cuendá nchaa-o vã cundecu-gá cuéchi-o núú Yá Ndióxi te núu na quindáá iní-ó-gá.

5

Ío váha tnáhá ñáiyu cächí Yá Ndióxi sá ñã tũú cuéchi-xi

1 Te vitna, ñá túú-gá cuéchi-o ndècu núú Yá Ndiòxí chí sàndáá iní-ó Xítohó Jesucristú, te ío váha ndècu ndíhi-o Yá Ndiòxí vitna sá cuendá Xítohó Jesucristú.

2 Te cuendá sá ní sàndáá iní-ó Xítohó Jesucristú xiáⁿ diu-gá ní quide ní ngúndecu váha-o núú Yá Ndiòxí, te ducaⁿ-ni cùndecu-o, te ío cùdíí iní-ó chí ndècu ndíhi-o tnúhu ndee iní sá sáá nduu ngúndecu-o núú ío váha càa ndecu Yá Ndiòxí.

3 Te ñá díú-ní sá cuendá sá ndúú tǎhú-ó cùndecu-o núú ndécú-gá cùdíí iní-ó, chí cùdíí iní-ó ndòho-o cuendá-gá, chí cùtnuní iní-ó sá núu na ndòho-o cuendá-gá te cunduu càhnu-gá iní-ó,

4 te núu cùu-o ñáyiú ta quide cahnu-gá iní-xí te cùtnuní sá cùú-ó ñáyiú quide váha, te núu cùu-o ñáyiú quide váha te uuⁿ-gá tá ngúndecu ndíhi-o tnúhu ndee iní cuáháⁿ sá cadá váha ñaha Yá Ndiòxí xii-o.

5 Te núu ducaⁿ te vá ííⁿ nduu ndixi cuéchi iní-ó sá ndécú ndíhi-o tnúhu ndee iní ngúndecu váha-o. Te Espíritú sá ní taxi Yá Ndiòxí ndécú ndíhi-o xiáⁿ quidé-xí cùtnuní iní-ó sá ío cùu iní ñáhá Yá Ndiòxí xii-o.

6 Te nchoo ñá túú vèdana ná ní ndàcu-o cada-o cuendá dàcácu nihnu-o mèe-o, dico Xítohó Jesucristú ní xihí-gá cuendá-ó, ndíhi cuendá nchaa dava-gá ñáyiú ñá túú tnáhá tnúhu ndíhi Yá Ndiòxí, te ní xihí-gá mei nduu taú-xí cuú-gá.

7 Te cudana-ni núu xihí íiⁿ ñáyiú sá cuendá íiⁿ ñáyiú quide ndáá, te áma xihí tucu íiⁿ-yu sá cuendá ñáyiú quide váha tnàha ñáyiú-xí.

8 Te Yá Ndiòxí ní quide-gá sá nchóo cùtnuní iní-ó sá ío cùu iní ñáhá-gá xii-o, chí cùtnàhá ndécú-ó ìchi cuéhé ìchi duha te ní tendaha-gá Xítohó Jesucristú ní quixi-gá ñuyúú-a ní xihí-gá cuendá-ó.

9 Te sá cuendá sá ní xihí Xítohó Jesucristú xiáⁿ ñá túú-gá cuéchi-o ndècu núú Yá Ndiòxí, te vitna ní cùtnuní ndáá iní-ó sá vá dáquihíⁿ ñáhá-gá Yá Ndiòxí xii-o núú ùhú núú ndàhú sá cuendá Xítohó Jesucristú.

10 Te cùtnàhá ñá túú tnáhá tnúhu-o ndíhi Yá Ndiòxí ní cùu ní xihí Xítohó Jesucristú Yaa cùú Dèhe-gá cuendá cuu váha iní ñáhá-gá xii-o, te ducaⁿ te nduu tǎhú-ó cùndecu-o ndíhi-gá ní caa ní quihíⁿ cuendá sá ní ndoto Xítohó Jesucristú.

11 Te ndètu-o sáá nduu ngúndecu-o ndíhi-gá ní caa ní quihíⁿ, te ñá díú-ní xiáⁿ quidé-ó chí tnáhá cùdíí iní-ó Yá Ndiòxí, chí Xítohó Jesucristú ní quide-gá ducaⁿ cùdíí iní-ó-gá, te diu-ní Xítohó Jesucristú ní quide-gá ní nucúndecu váha-o ndíhi Yá Ndiòxí.

Nàcuáa ní quide ndíi Ádán ndíhi nàcuáa ní quide Xítohó Jesucristú

12 Te ndíi Ádán ñá túú ní quide ndáá ndíi núú Yá Ndiòxí núu xiáⁿ ní ngúndecu nchaa sá cuéhé sá dúhá ñuyúú-a, te sá cuendá nchaa sá cuéhé sá dúhá quide ñáyiú xiáⁿ xihí-yu, te nchaa-yu xihí-yu chí nchaa-yu quidé-yu nchaa sá cuéhé sá dúhá.

13 Te sa quide-gá-yu nchaa sá cuéhé sá dúhá te dàtnuní ní ngúndecu nchaa tnúhu sá ní chídó tnuní ndíi Moisés nàcuáa ní xáhaⁿ Yá Ndiòxí cada ñáyiú, te nchoo cùtnuní iní-ó sá núu ñá túú tnúhu sá sánú ìchi ñaha xii-o nacuáa cada-o, te ñá túú cuéchi-o sànuu.

14 Te ndéé cùtnàhá ní xíndecu ndíi Ádán ní quesaha-xi xihí ñáyiú, te ducaⁿ-ni xihí-yu ndéé ní sáá nduu ní xíndecu ndíi Moisés. Te ducaⁿ ní xihí-yu chí ní quidé-yu nchaa sá cuéhé sá dúhá cuéi ñá túú ní quidé-yu nàcuáa ní quide ndíi Ádán, chí ndíi-án ñá túú ní sàndáá iní ndíi nàcuáa ní xáhaⁿ Yá Ndiòxí cada ndíi. Te ndíi Ádán ní cuu ndíi íiⁿ téé cùu cahnu ní xíndecu ñuyúú-a, te sá tá dúcáⁿ te ní quixi Xítohó Jesucristú te Yaa-án ío-gá càhnu cuu-gá.

15 Te sá ní quide ndíi Ádán te vá càchí-ó sá íiⁿ-ní cùu-xi ndíhi sá ní cachí Yá Ndiòxí nduu tǎhú-ó vitna. Te sá ñá túú ní quide ndáá ndíi xiáⁿ nchaa ñáyiú xihí-yu, dico Yá Ndiòxí ío váha iní-gá chí ío váha ní quide-gá sá cùú-xí nchaa nchoo ñáyiú ndècu ñuyúú-a, chí dicó ducaⁿ ní cachí-gá sá nánihí tǎhú-ó, te íiⁿ-ni téé tnàhá-dé ío váha ní quide-dé sá cùú-xí-ó, te téé-án cùú-dé Xítohó Jesucristú.

16 Te sá ní quide íiⁿ-ni ndíi Ádán ñá túú íiⁿ-ni cuu-xi ndíhi sá ní quide Yá Ndiòxí sá cùú-xí-ó, chí ndíi-án ñá túú ní quide ndáá ndíi núú-gá. Te sá dúcáⁿ ní quide ndíi te xiáⁿ ní cuu-xí cuéchi díhna nuu ní quide ndíi, núu xiáⁿ ní cachí Yá Ndiòxí sá cué ñáyiú quihíⁿ-yu núú ùhú núú ndàhú nacháhu-yu nchaa sá cuéhé sá dúhá quidé-yu. Dico mee-gá ní quide sá cué ñáyiú naníhí tǎhú-yu dicó-ni ducaⁿ, te ducaⁿ te vá cùndecu-gá cuéchi-yu núú-gá cuéi ío vai cuéchi-yu.

17 Te sá dúcáⁿ ñá túú ní quide ndáá íiⁿ-ni ndíi Ádán-án núú Yá Ndiòxí, xiáⁿ ní quide-xi xihí nchaa ñáyiú. Te sá cuendá sá ní quide íiⁿ-ni Xítohó Jesucristú xiáⁿ ío váha ní quide ñaha Yá Ndiòxí xii ñáyiú, chí dicó-ni ducaⁿ ní nduu tǎhú-yu cùdíú-yu núú-gá. Te nchaa ñáyiú ducaⁿ cùdiu núú-gá nduu tǎhú-yu cunúú-yu ndíhi Xítohó Jesucristú cuendá sá ní quide-gá sá váha sá cùú-xí-yu.

18 Te sá dúcáⁿ ní quide ndíi Ádán ñá túú ní quide ndíi nàcuáa ní xáhaⁿ Yá Ndiòxí xii ndíi íiⁿ xito, núu xiáⁿ ní cachí-gá sá ncháá ñáyiú taú-yu nacháhu-yu nchaa cuéchi-yu, dico Xítohó Jesucristú ní quide-gá íiⁿ sá váha cuendá nchaa ñáyiú vá cùndecu-gá cuéchi-yu núú Yá Ndiòxí te núu na quíndáá iní ñáhá-yu xii-gá, te ducaⁿ te cundecú-yu

ndihi-gá ni caa ni quíhíⁿ.

¹⁹ Te sá ñá túú ní sándáá iní ìⁿndii-ni ndíi Ádán nàcuáa ní xáhaⁿ Yá Ndióxi xii ndíi, xíáⁿ ní nguínchicúⁿ nihnu nchaa ñáyiú quidé-yu nchaa sá cuéhé sá dúhá. Te ducaⁿ ìⁿndii-ni Xítohó Jesucristú ní quide-gá nàcuáa ní xáhaⁿ Yá Ndióxi cuendá sá Yá Ndióxi cachi-gá sá cúdiú-yu núú-gá.

²⁰ Te Yá Ndióxi ní xáhaⁿ-gá xii ndíi Moisés nàcuáa cada ñáyiú, te sá cuendá tnúhu-áⁿ uuⁿ-gá ní ngúta nchaa ñáyiú quidé-yu nchaa sá cuéhé sá dúhá, te Yá Ndióxi uuⁿ-gá cundáhú iní ñáhá-gá xii-yu tucu.

²¹ Te sá cuendá nchaa cuéchi ñáyiú xíáⁿ xihí-yu, dico Yá Ndióxi ío váha iní-gá chí diu-gá ní cachi-gá sá ncháá ñáyiú na tnáhá tnúhu ndihi ñaha xii-gá cudíú-yu núú-gá, te cundecú-yu ndihi-gá ni caa ni quíhíⁿ, te ducaⁿ chí Xítohó Jesucristú ní quide-gá sá váha sá cúú-xí-yu.

6

Ñáyiú ñá túú-gá ndécú ichi cuehé ichi duha ndécú-yu cuendá Xítohó Jesucristú

¹ Te sá dúcáⁿ quide Yá Ndióxi, te vá cání iní-ó cànchicúⁿ nihnu-ni-o ìchi cuehé ichi duha, chí ñá díú sá cànchicúⁿ nihnu-o ìchi-áⁿ te ngóo càni iní-ó sá ío-gá cundáhú iní ñáhá-gá xii-o.

² Te vá cúú cànchicúⁿ nihnu-o ìchi cuehé ichi duha, chí nchoo cùu-o datná cue ñáyiú sá ní xihí, núu xíáⁿ vá cúú-gá cànchicúⁿ nihnu-o ìchi-áⁿ.

³ Te sa nàha-o sá cuendá sá ní sandute-o quèe-xí sá tnáhá tnúhu-o ndihi Xítohó Jesucristú. Te sá ní sandute-o quèe tucu-xí sá cúú-ó datná ñáyiú ní xihí ndihi-gá.

⁴ Te ñá díú-ní sá ní xihí-ó ndihi-gá chí quèe tucu-xí sá ní nguínđuxi-o ndihi-gá te ní ndoto-o datná ní ndoto mee-gá ní dándótó ñaha Dútú Ndióxi Yá ío càhnu cuu, te ducaⁿ ní cuu cuendá sá vá cundècu-gá-ó datná ní xíndecu-o.

⁵ Te núu ìⁿ-ni cùu-o ndihi Xítohó Jesucristú cuendá sá cúú-ó datná ñáyiú ní xihí ndihi-gá, te ndáá sá cúú-ó datná ñáyiú ní ndoto ní ngúndecu váha datná ní ndoto mee-gá ní nucundecu váha-gá.

⁶ Te nchoo nàha-o sá cúú-ó ñáyiú ío ndècu cuéchi-xi ní cùu, dico sátá ní cuu-o datná ñáyiú ní xihí datná ní xihí Xítohó Jesucristú núú cùrúxí, te ndéé dàvâ-áⁿ ní dáñá-ó nchaa ìchi cuehé ichi duha ndècu-o ní cuu, te ñá túú-gá cúnúu sá cuéhé sá dúhá iní-ó.

⁷ Chí nchaa ñáyiú ní xihí ñá túú-gá ndécú-yu ìchi cuehé ichi duha.

⁸ Te núu cùu-o datná ñáyiú ní xihí datná ní xihí Xítohó Jesucristú ñá, te cùtnuní ndáá iní-ó sá cundècu-o ndihi-gá ni caa ni quíhíⁿ.

⁹ Te sa nàha-o sá Xítohó Jesucristú ní xihí-gá te ní ndoto-gá te vá ìⁿ ndúu ìⁿ quíú-gá te cuú-gá, chí ñá túú nágá sá cadá cúú-gá.

¹⁰ Te Xítohó Jesucristú ní xihí-gá ìⁿ xito-ni sá cuendá nchaa cuéchi nchoo ñáyiú ñuyúú, te vá ìⁿ ndúu-gá cuú-gá, te ndècu-ni-gá sá cúú-xí Yá Ndióxi.

¹¹ Núu xíáⁿ nchòhó cada iní-ndó sá datná sá ní xihí-ndó vá cundècu-gá-ndó sá cúú-xí ìchi cuehé ìchi duha, chí ndècu-ná-ndó sá cúú-xí Yá Ndióxi, chí ní tnáhá tnúhu-ndo ndihi Xítohó Jesucristú Yá cúú Xítohó-ó.

¹² Te núu xíáⁿ vá dáñá-gá-ndó cúnúu ní ìⁿ sá cuéhé sá dúhá iní-ndó cuendá sá vá cadá-gá-ndó ní ìⁿ sá cuéhé sá dúhá sàni iní-ndó.

¹³ Te vá dáñá-ndó tàxi tnuní ñáhá ní ìⁿ sá cuéhé sá dúhá-áⁿ xii-ndo cuendá sá vá cadá-gá-ndó, te chí dáñá ná tàxi tnuní ñáhá Yá Ndióxi xii-ndo, te chí dáñá ná chindee ñaha-gá cada-ndo mèe-ni sá váha, te ducaⁿ te cada iní-ndó sá cúú-ndó datná ñáyiú ní xihí te ní ndoto ndècu.

¹⁴ Te ducaⁿ cada-ndo chí vá ndácú-gá ní ìⁿ sá cuéhé sá dúhá tàxi tnuní ñáhá-xí xii-ndo, chí Yá Ndióxi cundáhú iní ñáhá-gá chindèe ñaha-gá xii-ndo. Te ducaⁿ chí ñá túú-gá cúnúu nchaa tnúhu sá ní chidó tnuní ndíi Moisés cada ñáyiú.

Ñáyiú nchicúⁿ nihnu sá váha

¹⁵ Te ñá díú sá cundáhú iní ñáhá Yá Ndióxi xii-o chindee ñaha-gá ndihi sá ñá túú-gá cúnúu nchaa tnúhu ní chidó tnuní ndíi Moisés, te cachi-ó sá cúú-ní cundècu-o ìchi cuehé ìchi duha.

¹⁶ Te nchoo xini-ó sá nñu na cuàha-o tnúhu cunu cuechi-o núú ìⁿ ñáyiú cuini cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiuⁿ tahu-yu. Te ducaⁿ sátnahá-xi cùu nchaa ñáyiú quide nchaa sá cuéhé sá dúhá chí tàxi tnuní ñáhá-ná-xi xii-yu, te diu nchaa xíáⁿ dácuíta nihnu ñaha-xi xii-yu, te diu-ní ducaⁿ sátnahá-xi cùu nchaa ñáyiú sándáá iní ñáhá xii Yá Ndióxi chí tàxi tnuní ñáhá-gá xii-yu, te quidé-yu nchaa sá váha nàcuáa cuini mée-gá cadá-yu.

¹⁷ Te nchòhó ducaⁿ ní xóo cada-ndo nchaa sá cuéhé sá dúhá ní cùu, dico táxáhu xii Yá Ndióxi chí vitna ní yùhu ní iní-ndó quide-ndo nchaa nacuaa càháⁿ tnúhu-gá sá ní ngúndecu ndihi-ndo.

¹⁸ Te vitna ñá túú-gá tàxi tnuní ñáhá ní ìⁿ sá cuéhé sá dúhá xii-ndo, te quide-ná-ndó nchaa sá váha tàuchiⁿ Yá Ndióxi cada-ndo.

¹⁹ Te duha càháⁿ-í cuendá cue ñáyiú xinu cuechi cuendá sá nchòhó tecú tnuní-ndó nàcuáa ndúu tnúhu càháⁿ-í. Te nchòhó ní dáñá-ndó ní taxi tnuní ñáhá nchaa sá cuéhé

sá dúhá xii-ndo, te ñá túú ní quide-ndo nacuaá ní cáháⁿ Yá Ndióxi cada-ndo chi dá vihi-gá ní quide-ndo, te ñu-ni ducaⁿ chí dáñá ná tàxi tñuní ñáhá Yá Ndióxi xii-ndo vitna cuendá cada-ndo mée-ni sá vâha nâcuáa cùnî mée-gá cada-ndo, te ducaⁿ te cuu-ndo ñâyiu quide ndáá cundecu núú-gá.

²⁰ Te nchoo cùtnàhá ní xóo cada-o nchâa sá cuèhé sá dúhá ñá túú ní xóo cada-o ñi ñⁿ sá vâha cùnî Yá Ndióxi cada-o.

²¹ Te dicó sácáⁿ núú sãñaha nchâa sá cuèhé sá dúhá-ãⁿ te núu na càda-o, te ni ñⁿ sá vâha vâ níhi-ó te núu na càda-o nchaa xiãⁿ, te ñu nchaa xiãⁿ dáculita nihnu ñaha-xi xii-o.

²² Te vitna ñá túú-gá cúú-ó ñâyiu ndècu ichi cuehé ichi duha, chi cùu-ná-ó ñâyiu quide nchaa nacuaá cáháⁿ Yá Ndióxi. Te sá dúhá quide-o cuu ndisa-xi ñⁿ sá vâha sá cúú-xi-ó, te cùu-o ñâyiu quide ndáá ndécú-ó núú-gá vitna, te sáá nduu cundecu-o ndihi-gá ni caa ni quíhíⁿ.

²³ Te nchaa sá cuèhé sá dúhá dicó dácuíta nihnu ñaha-xi xii-o, dico Yá Ndióxi ní quide-gá sá dicó-ni ducaⁿ ndùu táhú-ó cundecu-o ndihi-gá ni caa ni quíhíⁿ, chi ní tnahá tñuhu-o ndihi Xítóhó Jesucristú Yáá cúú Xítóhó-ó.

7

Cuendá ñâyiu tñândaha

¹ Te nchaa nchòhó ñâyiu ndècu ndihi-í ichi Xítóhó Jesucristú sa ñaha-ndo nacuaá cáháⁿ tñuhu sá dánèhé ñáhá xii-o nacuaá cada-o cundecu-o, chi tñuhu-ãⁿ cáháⁿ-xi dóho nchaa ñâyiu xindecu vívú ñuyúú-a.

² Te nchaa ñâyiu ñíhi sa ndècu yíi-xi, te ñu tñuhu-ãⁿ dánèhé ñáhá-xi xii-yu sá vâ dáñá-yu yíi-yu, dico núu na cúú yíi-yu te ñá túú-gá ná cáháⁿ tñuhu-ãⁿ cuendá-yu.

³ Dico núu vátá cúú-gá yíi-yu te ñá túú ndùu vâha-xi naquehéⁿ-yu ingá téé, dico núu na cúú yíi-yu te quendóo mée-yu, te ñá túú ñágá cáháⁿ tñuhu sá dánèhé ñáhá xii-yu nâcuáa cadá-yu te ducaⁿ te cuu naquehéⁿ-yu ingá téé, te ñá túú cùu-xi ñⁿ cuèchi.

⁴ Te nchòhó cue ñâyiu ndècu ndihi-í ichi Xítóhó Jesucristú cúú-ndó dàtná ñâyiu ní xihí dàtná ní xihí-gá. Te xiãⁿ ñá túú-gá táxi tñuní ñáhá nchâa tñuhu ní chidó tñuní ndíi Moisés xii-ndo. Te ducaⁿ ñi cuu cuendá nchòhó ngúndecu-ndo ndihi Xítóhó Jesucristú Yáá ní xihí ní cùu te ní ndoto-gá. Te ducaⁿ ñi cuu cuendá nchaa nchoo ñâyiu ndècu ichi-gá cada-o nchâa nacuaá cáháⁿ Yá Ndióxi.

⁵ Te nchoo ñi xindecu-o ichi cuehé ichi duha, te tñuhu sá sánú ichi ñaha xii-o nacuaá cada-o cundecu-o cachí-xi sá ñá túú vâha cundecu-o ichi-ãⁿ, te nchoo dà uuⁿ-gá ní quide-o nchâa sá cuèhé sá dúhá sá dúcáⁿ cáháⁿ tñuhu-ãⁿ, te sá dúcáⁿ ñi quide-o te ta xíta nihnu-o cuáháⁿ ní cùu.

⁶ Te vitna cada iní-ó sá cúú-ó dàtná ñâyiu ní xihí sá cúú-xi tñuhu sá dánèhé ñáhá xii-o nacuaá cada-o cundecu-o, chi ñá túú-gá cùnùu-xi, te vitna mee-ná Espiritú Yá Ndióxi chíndèe ñaha-xi xii-o xinu cuechi-o núú-gá, te ñá dúú cuendá nchaa tñuhu sá ñi ngúndèe ndéé díhna cada ñâyiu xinu cuechi-o núú-gá vitna.

Nchaa sá cuèhé sá dúhá ñuhu iní-í

⁷ Te cuèi duha cáháⁿ-í dico vá cúú tñáhí cáháⁿ-ó sá tñuhu sá sánú ichi ñaha xii-o nacuaá cada-o cundecu-o ñá díú tñuhu vâha cùu-xi. Te yúhú ñá túú cùtnuní iní-í ná cúú nchâa sá cuèhé sá dúhá ní cùu te núu ñá túú tñuhu-ãⁿ ní cächí tñuhu-xi xii-í, te ni ñá túú cùtnuní tucu iní-í núu vâha ñá ñá túú vâha sá nchidó iní-í sá ndécú ndihi tnahá ñâyiu-o ní cùu te núu ñá túú tñuhu-ãⁿ ní cächí-xi sá vâ cúú cùu iní-í sá ndécú ndihi-yu.

⁸ Te tñuhu-ãⁿ ñi dánèhé ñáhá-xi xii-í sá vâ cúú càda-í ni ñⁿ sá cuèhé sá dúhá, dico sá cuendá tñuhu-ãⁿ uuⁿ-gá ducaⁿ ñi sani iní-í ní quide-í. Te núu ñá túú tñuhu sá sánú ichi ñaha xii-o nacuaá cada-o cundecu-o ña, te ñá túú cùtnuní iní-í sá quide-í nándi sá cuèhé sá dúhá ní cùu.

⁹ Te cùtnàhá vátá nihí-gá-í tñuhu-ãⁿ te ñá túú tñáhí ná sání iní-í ndécú-í ní cùu, dico sáta ní nihí-í tñuhu-ãⁿ te ní cùtnuní iní-í sá ndécú cuèchi-í, te ta xíta nihnu-í cuáháⁿ ní cùu.

¹⁰ Te núu ñi quide-í nchaa nâcuáa cáháⁿ tñuhu-ãⁿ te sa ndéé ama-gá naníhí tàhú-í ní cùu, dico ñá túú ní quide-í núu ní cùtnuní iní-í sá tá xíta nihnu-í cuáháⁿ ní cùu.

¹¹ Te sá xii tñuhu-ãⁿ xiãⁿ uuⁿ-gá ní cunuu nchâa sá cuèhé sá dúhá ñi dándáñé ñáhá-xi xii-í te ní quide-í, te ta dácuíta nihnu ñaha-xi xii-í cuáháⁿ ní cùu.

¹² Te tñuhu sá sánú ichi ñaha xii-o nacuaá cada-o cundecu-o cuu-xi tñuhu ío yíñuhu ní taxi Yá Ndióxi, te ñⁿ ñⁿ tñuhu-ãⁿ cúú-xi mée-ni tñuhu vâha, te ni ñⁿ tñuhu cuèhé tñuhu duha ñá túú ñuhu tnahá.

¹³ Te vá cúú cächí-í sá tñuhu vâha-ãⁿ ñi quide-xi ta xíta nihnu-í cuáháⁿ ní cùu, chí nchaa sá cuèhé sá dúhá ní quide-í, xiãⁿ tá dáculita nihnu ñaha-xi xii-í cuáháⁿ ní cùu, te sá cuendá tñuhu vâha-ãⁿ ñi cùtnuní iní-í sá quide-í nchaa sá cuèhé sá dúhá, te xiãⁿ tá xíta nihnu-í cuáháⁿ ní cùu. Te sá cuendá nchaa nâcuáa cáháⁿ tñuhu sá sánú ichi ñaha xii-o nacuaá cada-o cundecu-o ní cùtnuní iní-í sá xidó ndécú cuèchi-í ní cùu.

¹⁴ Te tñuhu-ãⁿ ñi taxi Espiritú Yá Ndióxi ndécú ndihi-o cachí tñuhu-xi nâcuáa cada vâha-o. Te nchoo cùu-o mee-ni ñâyiu yíca cuèchi, te taxi tñuní ñáhá nchâa sá cuèhé sá dúhá xii-o ní cùu.

¹⁵ Dico nchoo tñàhá iní-ó càda-o nchaa sá vâha dico ñá túú quide-o, te da nchaa sá

ñã tũú tñáhã iní-ó càda-o quide-o, te ñã tũú cùtnuní iní-ó nã cuendá duca^a quide-o.

¹⁶ Te sã dúcã^a quide-o nchaa sã ñã tũú tñáhã iní-ó, te xiã^a ndixí tũu iní-ó sã tñũhu sã dúcã^a sãnu ichi ñaha xii-o nacuaá cada-o cùndecu-o cuu-xi tñũhu ío vãha.

¹⁷ Te cùtnuní iní-ó sã nchãa sã cuèhé sã dúhá ñũhu iní-ó, xiã^a quidé-xí dùca^a quide-o sã ñã tũú vãha, te ñã díú sã cáhu iní mee-ó dùca^a quide-o.

¹⁸ Te cùu-o cue ñãyiu sãni cuèhé sãni dùha iní-xi, te cuiní-ó càda-o nchaa sã vãha dico ñã tũú ñihí ndéé-ó càda-o.

¹⁹ Te cuiní-ó càda-o nchaa sã vãha dico ñã ndácú-ó, te ñã tũú cuiní-ó càda-o datná quidé nchãa ñãyiu ndècu ichi cuèhé ichi duha, chi ñãyiu-ãⁿ mee-ni nchãa sã cuèhé sã dúhá quidé-yu, dico diu-ni nchaa xiã^a quidé-ó tñáhã-ó.

²⁰ Te sã dúcã^a quide-o nchaa sã ñã tũú tñáhã iní-ó càda-o te ñã díú mēe-o duca^a cahu iní-ó quide-o, chi nchaa sã cuèhé sã dúhá ñũhu iní-ó xiã^a quidé-xí dùca^a quide-o.

²¹ Te duca^a tñáhí yãha-o òrè cuiní-ó càda-o sã vãha, chi da mee-ni nchãa sã cuèhé sã dúhá quide-o.

²² Te ío cùdí iní-ó càda-o nchaa nacuaá càhá^a Yã Ndióxi,

²³ te dicó-ni sã ncháá sã cuèhé sã dúhá ñũhu iní-ó, xiã^a quidé-xí ngãni ñaha-xi xii-o ñã tũú quide-o sã vãha sãni iní-ó càda-o, te duca^a yãha-o chi nchaa sã cuèhé sã dúhá-ãⁿ cùnũu-xi taxi tñuní ñáhã-xí xii-o.

²⁴ Te ndãhú ní cuu nchoo! Chi vã yõ ñⁿ ni ndãcu cada nacuaá vã táxi tñuní ñáhã-gã nchaa sã cuèhé sã dúhá xii-o sã tá dàcuíta nihnu ñaha xii-o cuáhã^a ní cùu.

²⁵ Te táxãhu xii Yã Ndióxi sã Xitohó Jesucristú ní quide-gã cuendá sã vã táxi tñuní ñáhã-gã ní ñⁿ sã cuèhé sã dúhá xii-o, sã tá dàcuíta nihnu ñaha xii-o cuáhã^a ní cùu. Te mee-o sãni iní-ó càda-o nchaa nacuaá càhá^a Yã Ndióxi, dico núu nchaa sã cuèhé sã dúhá nã cùnũu-xi taxi tñuní ñáhã-xí xii-o, te diu-ni nchaa xiã^a cada-o.

8

Ñãyiu quide nchaa nacuaá càhá^a Espiritú Yã Ndióxi

¹ Te vitna nchaa nchoo ñãyiu tñáhã tñũhu ndihi Xitohó Jesucristú vã cuíta nihnu-gã-ó, chi ñã tũú-gã ndécú-ó ichi cuèhé ichi duha, chi mee-nã nchaa nãcuáa càhá^a Espiritú Yã Ndióxi quidé-ó.

² Te Espiritú Yã Ndióxi-ãⁿ táxi tñuní ñáhã-xí xii-o, te duca^a chi ndècu ndihi-o Xitohó Jesucristú, te sã dúcã^a táxi tñuní ñáhã Espiritú-gã xii-o núu xiã^a ñã tũú-gã táxi tñuní ñáhã ní ñⁿ-gã sã cuèhé sã dúhá xii-o, te duca^a quide Espiritú-gã cuendá sã vã cuíta nihnu-o, te diu-ni Espiritú-gã quidé-xí cuendá sã

nchóo ndũu tãhú-ó cùndecu-o ndihi-gã ní caa ní quíhíⁿ.

³ Te nchoo ñã ní ndãcu-o cada-o nchaa nacuaá càhá^a tñũhu sã sãnú ichi ñaha xii-o nacuaá cada-o cùndecu-o, núu xiã^a tñũhu-ãⁿ ñã tũú ní ñihí ndéé-xí càda-xi cuendá sã nchóo vã cuíta nihnu-o. Dico Yã Ndióxi ní tendaha-gã Déhe mee-gã ní quixi ñuyú-a, te Yaá-ãⁿ cùú-gã ñⁿ ñãyiu, te cà-gã dàtná cáá ñãyiu ndècu cuèchi-xi xĩndecu ñuyú-a, te sã cuendá nchaa cuèchi nchaa nchoo ñãyiu xĩndecu ñuyú-a ní quixi-gã, te ndéé dàvã-ãⁿ ní quide-gã cuendá sã vã táxi tñuní ñáhã-gã ní ñⁿ sã cuèhé sã dúhá xii-o.

⁴ Te duca^a ní quide-gã cuendá nchoo nchicúⁿ nihnu-o quide-o nacuaá càhá^a tñũhu sã sãnú ichi ñaha xii-o nacuaá cada-o, chi ñã tũú-gã cùnũu ní ñⁿ sã cuèhé sã dúhá iní-ó, chi Espiritú Yã Ndióxi-nã táxi tñuní ñáhã-xí xii-o.

⁵ Te nchaa ñãyiu cùnũu nchaa sã cuèhé sã dúhá iní-xi mee-ni xiã^a ñũhú iní-yu te quidé-yu. Dico nchoo ñãyiu quide nchaa nacuaá cuiní Espiritú Yã Ndióxi ñũhú iní-ó mēe-ni nacuaá càhá^a Espiritú-gã-ãⁿ te quide-o.

⁶ Te núu mee-ni nchãa sã cuèhé sã dúhá cùnũu iní-ó, te cuíta nihnu-o, dico núu mee-ni nchãa tñũhu càhá^a Espiritú Yã Ndióxi cùnũu iní-ó, te ío vãha cuu iní-ó cùndecu-o ndihi-gã ní caa ní quíhíⁿ.

⁷ Te nchaa ñãyiu ñũhu iní mee-ni sã cuèhé sã dúhá cùu úhú iní-yu Yã Ndióxi, te ñã tũú cuiní-yu cadã-yu nãcuáa càhá^a-gã, te ní ñã ndácú-yu cadã-yu.

⁸ Te nchaa ñãyiu duca^a cùnũu nchaa sã cuèhé sã dúhá iní-xi-ãⁿ ñã tũú cùdiu-yu núú Yã Ndióxi.

⁹ Te nchóhó chi ñã tũú-gã cùnũu sã cuèhé sã dúhá iní-ndó, chi mee-nã nãcuáa càhá^a Espiritú Yã Ndióxi quidé-ndó, te duca^a quide-ndo chi ndècu ndihi-ndo Espiritú-gã, te diu-ni Espiritú-gã-ãⁿ ní tendaha Xitohó Jesucristú véxi ndècu ndihi-o, te nchaa ñãyiu ñã tũú ndècu ndihi Espiritú sã ní tendaha Xitohó Jesucristú véxi ndècu ndihi-o ñã tũú ndècu ndihi ñáhã-yu xii-gã.

¹⁰ Te núu ndècu ndihi-ndo Xitohó Jesucristú, te cuéi na cùú yiqui cùnũ-ndó sã cuendá nchaa sã cuèhé sã dúhá ío ñuyú-a, dico iní-ndó chi cundecu ndihi-xi Yã Ndióxi chi ñã tũú-gã cuèchi-ndo ndècu núú-gã.

¹¹ Te núu ndècu ndihi-ndo Espiritú Yã Ndióxi Yaá ní dándótó ñaha xii Xitohó Jesucristú, te diu-ni-gã cada te ndoto yiqui cùnũ-ndó sã tá xita nihnu cuáhã^a núu na cùú-xi, te duca^a chi ndècu ndihi-ndo Espiritú-gã.

¹² Te nchóhó ñãyiu ndècu ndihi-í ichi Xitohó Jesucristú, ñã tũú-gã tãu-ndó cùnũu

ni ñⁿ sá cuèhé sá dúhá íní-ndó nàcuáa vâ cùndècu-gá-ndó ìchi cuehé ìchi duha.

¹³ Chi núu na cùnuu sá cuèhé sá dúhá íní-ndó te cúta nihnu-ndo, chi quíhíⁿ-ndó núú ùhú núú ndàhú. Dico núu dañà-ndo mée-ndo chindee ñaha Espiritú Yá Ndióxi xii-ndo cuendá sá vâ cùnùu-gá sá cuèhé sá dúhá íní-ndó ñà, te nduu táhú-ndó cùndècu-ndo ndihi-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiu quide nchaa nacuaa sànu ìchi ñaha Espiritú Yá Ndióxi cùu-yu déhe-gá.

¹⁵ Te Espiritú sá nî taxi Yá Ndióxi ndécú ndihi-o ñà túú quide-xi sá nchóó yuhú-ó cùnu cuechi-o núú-gá, chi Espiritú-án quidé-xi sá nchóó cùu-o déhe-gá, te ñu-ni Espiritú-án quidé xàhaⁿ-o xii Yá Ndióxi: “¡Yòhó Dútú Ndióxi cùu-n Tàtá mée-ndí!”, duha xàhaⁿ-o xii-gá.

¹⁶ Te ñu-ni Espiritú-gá-án tnahá tñuhu-xi ndihi íní-ó, te càháⁿ ndáá-xi sá nchóó cùu-o déhe-gá.

¹⁷ Te sá dúcáⁿ cùu-o déhe Yá Ndióxi xiáⁿ ní cachí-gá sá tnahá-ó nduu táhú-ó sá nî nduu táhú Xitohó Jesucristú, te ducaⁿ nduu táhú-ó te núu na càda ndee íní-ó ndòho-o datná ní ndoho Xitohó Jesucristú, te núu ducaⁿ te ío cuu càhnu-o ndihi-gá ni caa ni quíhíⁿ.

¹⁸ Te yuhú càchí-í sá ñà túú nâ cada-xi cuéi ndòho-o cuendá-gá ndécú-ó ñuyúú-a, chi ío váha càa núú ndúú táhú-ó cùndècu-o na saá nduu.

¹⁹ Te nchaandi túhú sá nî cadúha Yá Ndióxi ní taxi ndecu-gá ñuyúú-a ndètu cahnu-ná-xi saá nduu càchí-gá sá ío càhnu cuu nchaa déhe-gá.

²⁰ Te nchaa sá nî cadúha Yá Ndióxi ní taxi ndecu-gá ñuyúú-a ní saá nduu ñà túú-gá cùu-xi sá váha sá cùu-xi-gá. Te ñà díú mée sá nî taxi ndecu Yá Ndióxi ñuyúú-a ducaⁿ ni sàni íní-xi cunduu, chi mee-gá ducaⁿ tnahí ní cachí-gá cunduu sá saá nduu vâ cùu-xi sá váha sá cùu-xi-gá, dico saá tucu nduu te nchaa xiáⁿ cuu tucu-xi sá váha sá cùu-xi-gá.

²¹ Te nchaa sá nî taxi ndecu-gá ñuyúú-a vâ cùnduu-gá-xi datná cáa-xi vitna te nî vâ dánàa-gá, chi nduu saa-xi te ngúndecu váha-xi datná ngúndecu váha nchaa cue déhe-gá.

²² Te ñaha-o sá ncháándi túhú sá nchító ní cadúha Yá Ndióxi ndécú ñuyúú-a ndòho-xi vitna datná ndóhó ñⁿ ñadihí sa ní tnahá òré cacu déhe-xi.

²³ Te ñà díú-ní nchàa sá dúcáⁿ ní cadúha-gá-án ducaⁿ ndòho-xi, chi tnahá nchoo dúcáⁿ ndòho-o ndecu-o ñuyúú-a tucu, te nchoo sá ní nduu táhú-ó Espiritú Yá Ndióxi Espiritú sá ní cachí mée-gá nduu táhú-ó ñhnanuu. Te ío ndòho tnahá-ó ndècu-o ñuyúú-a te ndètu cahnu-ná-ó saá

nduu ndàda saa-gá yiqui cùñú-ó, te càháⁿ-gá sá cùu-ó déhe-gá.

²⁴ Te Yá Ndióxi ní quide-gá ní naníhí tãhú-ó núu xiáⁿ ní ngúndecu ndihi-o tñuhu ndee íní ndétú-ó saá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vâ cùu càháⁿ-ó sá cùndètu-o sá ndúú táhú-ó chi sa ndècu ndihi-o.

²⁵ Dico sá ndétú-ó nduu táhú-ó cùu-xi sá vátá cùndècu ndihi-gá-ó, te xini ñuhu-ni-xi cada ndee-ni íní-ó cùndètu-o ndéé saá nduu nduu táhú-ó sá dúcáⁿ ní cachí Yá Ndióxi nduu táhú-ó.

²⁶ Te Espiritú-gá chindee ñaha-xi xii-o nacuaa níhí ndéé-ó cùndècu-o, te nchoo ñà túú xini-ó càháⁿ ndihi-o Yá Ndióxi nàcuáa tàu-xi cunduu dico Espiritú-gá càháⁿ ndàhú-xi núú-gá cuendá-ó cuéi òré ñà ñihí-ó tñuhu càháⁿ-ó cuendá nchaa sá ío cùñí-ó càcáⁿ-ó núú-gá.

²⁷ Te Yá Ndióxi sa ñaha ndáá-gá nchaa nàcuáa sàni íní-ó, te ducaⁿ sà ñaha ndáá-gá nchaa nàcuáa sàni íní Espiritú-gá. Te Espiritú-gá càháⁿ ndàhú-xi núú-gá cuendá nchoo ñáyiu yindaha-gá, te càháⁿ ndàhú-xi núú-gá nàcuáa cùñí mée-gá cunduu.

Nchaa sá ná càda ñaha ñáyiu te vâ ndácú-yu nadatùhú-yu íní-ó chi ndacu nahí-ni-o yàha-o nchàa sá ná càdá ñàhà-yu

²⁸ Te sa ñaha-o sá Yá Ndióxi quidé-gá sá ncháá sá yàha-o ndècu-o ñuyúú-a cùu-xi sá váha sá cùu-xi nchòo cue ñáyiu cùu íní ñàhá xi-gá, chi cùu-o ñáyiu ní càháⁿ-gá cundecu ndihi-gá datná ní cachí íní mée-gá.

²⁹ Te ndéé cùtnàhà vátá ngáva-gá ñuyúú, te Yá Ndióxi sa ñaha-gá nàndi cùu ñáyiu cundecu ndihi-gá, te ñu-ni ndéé dàvâ-án ní cachí-gá sá ñáyiu-án cunduu váha íní-yu datná váha íní Déhe mee-gá, te ducaⁿ ní cachí-gá cuendá sá Déhe mee-gá-án cunuu-gá núú nchàa ñáyiu cundecu ndihi-gá.

³⁰ Te nchaa ñáyiu ducaⁿ ní cachí-gá cundecu ndihi-gá ndéé cùtnàhà vátá ngáva-gá ñuyúú càháⁿ ñàhá-gá xií-yu vitna, te nchaa ñáyiu ducaⁿ càháⁿ-gá càchí-gá sá ñà túú-gá cuéchi-yu ndècu núú-gá, te ñu-ni ñáyiu-án cachí-gá sá ío càhnu cùu-yu.

³¹ Te vitna ní cutnùni íní-ó, te ñà túú nãgá cani íní-ó, chi Yá Ndióxi ndécú ndihi ñaha-gá xii-o, te vâ yòo ñⁿ-gá ndacu quehndé nihnu cuendá sá vâ chindèe ñaha-gá xii-o.

³² Te Yá Ndióxi ñà túú ní cùdí íní-gá Déhe-gá sá cùu-gá cuendá nchaa nchoo ñáyiu xindecu ñuyúú-a, te sá dúcáⁿ ndéé Déhe-gá ñà túú ní cùdí íní-gá xiáⁿ cùtnùni íní-ó sá táxi-gá nchaandi túhú sá xini ñuhu-o.

³³ Te vâ yòo ñⁿ ndacu cacáⁿ cuéchi núú Yá Ndióxi cuendá nchaa ñáyiu ní cachí-gá cundecu ndihi-gá te núu ná cùu cuéchi-yu

ndècu. Chi mee-gã cãchí-gã sã ñà túú ndècu cuèchi-yu núú-gã.

³⁴ Te vã yõo ìíⁿ ndacu daquihíⁿ ñáhã xii-o núú ùhú núú ndàhú, chi Xítohó Jesucristú ní xihí-gã te ní ndoto-gã, te cuándaa-gã núú ndécú Dütú Ndióxi núcõo-gã xio cùha-gã, te ducaⁿ ìo cùnuu-gã, te yacãⁿ càháⁿ ndàhú-gã núú Dütú Ndióxi cuendá-ó.

³⁵ Te vã yõo ìíⁿ ndacu cada ñaha xii-o ìíⁿ sã ñà túú vãha cuendá sã vã cúú ìní ñáhã-gã Xítohó Jesucristú xii-o, te ní tnúndõho tnúhu ndàhú, te ní sã ndìhú ìní-ó ñã cútñuní ìní-ó ñãsa cada-o càcu ñihnu-o ìíⁿ sã ná yãha-o, te ní nchãa sã càdá ñàha ñãyiu sã cuendá-gã, te cuèi-ní sã vã ñihí-ó dóo cuihnu-o, te cuèi ndècu-ná-ó sã yãha-o ìíⁿ sã yãha-o, te cuèi sa ndècu-ná-ó sã cãhni ñáhã-yu, dico Xítohó Jesucristú vã dàñã ndéé-gã sã cúú ìní ñáhã-gã xii-o.

³⁶ Te quee ndáá-xi ñacuáa ní càháⁿ ìíⁿ téé ní xóo càháⁿ tnúhu Yá Ndióxi ndéé sanaha ñi ngódo tnúni núú tütú-gã núú cãchí-xi: Yòhó Dütú Ndióxi nchaa-ni nduu nchaa-ni òré cuini ñãyiu cahni ñáhã-yu xii-ndí sã cuendá-n,

te cãchí-yu sã cúú-ndí dàtnã cue mbéé cue quiti sa ndècu tũha-nã cahni-yu.

Duha ní cãchí téé ní xóo càháⁿ tnúhu-gã-áⁿ, te ducaⁿ ñi ngódo tnúni núú tütú-gã.

³⁷ Te cuèi ducaⁿ ñãndí sã ná càda ñáhã-yu xii-o, dico vã ndácú-yu nadatũhú-yu ìní-ó chi ndacu nahi-ni-o yãha-o nchãa sã dúcãⁿ ná càda ñáhã-yu xii-o, te ducaⁿ chi Xítohó Jesucristú Yáa ìo cùu ìní ñáhã xii-o ndecu ndihí ñaha-gã chindéé ñaha-gã.

³⁸⁻³⁹ Te yúhú cútñuní ndáá ìní-í sã ñi ìíⁿ sã ìo ñuyú-a vã ndácú-xí càda-xi cuendá sã vã cúú ìní ñáhã-gã Yá Ndióxi xii-o, te ní sã cúú-ó, te ní sã cùndècu-o ñuyú-a, te ní ìíⁿ espíritú sã ìo cùnuu cundihí yucu ñávãha te ní ìíⁿ dava-gã cue espíritú cundihí-xi vã ndácú-xí càda-xi cuendá sã vã cúú ìní ñáhã Yá Ndióxi xii-o. Te ní sã cúú ñuyú-a vitna, te ní sã cúú ndéé cuéé-gã, te ní ìíⁿ sã ndécú àndũ, te ní ìíⁿ sã ndécú ñuyú-a, te ní ìíⁿ sã ñi cadúha mee Yá Ndióxi, ñi ìíⁿ xĩãⁿ vã ndácú-xí càda-xi cuendá sã vã cúú ìní ñáhã-gã xii-o chi ndècu ndihí-o Xítohó Jesucristú Yáa cúú Xítohó-ó.

9

Yá Ndióxi ní cãchí-gã sã ñãyiu isràel cuiú-yu ñãyiu canchicúⁿ ñihnu ñaha xii-gã

¹ Te yúhú càháⁿ ndáá-í chi cùu-í ìíⁿ téé ndècu ndihí Xítohó Jesucristú, te ndècu ndihí-í Espíritú Yá Ndióxi ñũu xĩãⁿ cútñuní ìní-í sã càháⁿ ndáá-í.

² Te nchaa-ni nduu nchaa-ni òré ìo ndìhú ìní-í, te ducaⁿ-ni ìo quide úhú-xi ìní-í

³ sã cuendá nchaa ñãyiu cùu ndi mee-í. Te núú dicó cúú-xi ìíⁿ sã chindéé ñaha xii-yu nucúndecu vãha-yu núú Yá Ndióxi ñã, te dàñã-í mée-í dàcuíta ñihnu ñaha Xítohó Jesucristú núú dicó sã cúú.

⁴ Te nchaa ñãyiu cùu ndi mee-í-áⁿ cúú-yu ñãyiu isràel, te Yá Ndióxi ní cãchí-gã sã cúú-yu déhe-gã, te ní quide-gã ñacuáa ní cutñuní ìní-yu sã ìo càhnu cuu-gã, te ní càháⁿ ndáá-gã núú-yu ñacuáa cada ñaha-gã xii-yu, te ní xãhaⁿ-gã xii ndii Moisés ní chidó tnúni ndii ñacuáa cadã-yu cundecú-yu. Te ní xãhaⁿ-gã xii-yu ñacuáa cadã-yu cada càhnu ñáhã-yu xii-gã, te ní xãhaⁿ tũcu-gã xii-yu nchaa ñacuáa cada-gã ndéé cuéé-gã.

⁵ Te nchaa ñãyiu-áⁿ cúú-yu ñani tnáhã nchãa cue téé ní cunuú ní xindecu ndéé sanaha, te diu-ni ñani tnáhã-yu cùu Xítohó Jesucristú Yáa ní tendaha Dütú Ndióxi ní quixi ñuyú-a, te tnáhã-gã cúú-gã Ndióxi te ìo cùnuu-gã, te nchaa nduu nchaa quíú ìo càhnu cuu-gã. Te ducaⁿ na cùnduu.

⁶ Te vã cãchí-ó sã Yá Ndióxi ñã túú ní quide-gã nchaa ñacuáa ní cãchí-gã cada-gã cuendá sã ñà túú sãndáá ìní ñáhã dàva ñãyiu isràel xii-gã. Te sã dúcãⁿ xiquide davã-yu te ñã túú quide-yu ñacuáa tàù-xi cadã-yu sã cúú-yu ñãyiu isràel. Te ñãyiu ducaⁿ xiquide-áⁿ cúú-yu ñãyiu ñã túú cùu cuendá ñáhã Yá Ndióxi.

⁷ Te cuèi nchaa-yu cùu-yu ñani tnáhã ndii Àbrãhã dico ñã túú quide-yu nchaa ñacuáa tàù-xi cunduu cadã-yu sã cúú-yu ñani tnáhã ndii. Te Yá Ndióxi ní xãhaⁿ-gã xii ndii Àbrãhã: “Nchaa cue ñani tnáhã tẽ Isãac téé cùu déhe ducuⁿ-n, mee-ni cuè ñãyiu-áⁿ cuu ñani tnáhã-n”, duha ní xãhaⁿ-gã xii ndii Àbrãhã.

⁸ Te xĩãⁿ cútñuní ìní-ó sã ñã nchãã ñãyiu cùu ñani tnáhã ndii Àbrãhã cúú-yu ñãyiu cùu cuendá Yá Ndióxi, chi mee-ni ñãyiu sãndáá ìní ñacuáa ní càháⁿ-gã cada-gã, ñãyiu-áⁿ cúú cuendá-gã.

⁹ Te duha nduu tnúhu ní xãhaⁿ Yá Ndióxi xii ndii Àbrãhã: “Sáa nduu te yúhú cada-í te coo ìíⁿ déhe-n ndihí ñadhí-n tã Sãrà”, duha ní xãhaⁿ-gã xii ndii.

¹⁰ Te ñã díú-ní xĩãⁿ ní quide Yá Ndióxi, chi tnáhã ní ndatũhú-gã ndihí ndii Rèbecã cútñahã vitna ñũhu úú déhe ndii ndihí ndii Isãac téé ní cuu ñani tnáhã-ó ní xindecu ndéé sanaha.

¹¹⁻¹³ Te cútñahã vitna ñũhu-gã déhe ndii Rèbecã, cútñahã vátã cadã-gã-gũxi ni ìíⁿ sã cuéhé sã dúhá, te ní ìíⁿ sã vãha, ní xãhaⁿ Yá Ndióxi xii ndii: “Déhe-n téé díhna na càcu te téé-áⁿ tñi-dé nchaa tnúhu càháⁿ déhe-n téé cùu úú ná càcu”, duha ní xãhaⁿ-gã xii ndii Rèbecã. Te ní quee ndáá-xi ñacuáa ní càháⁿ Yá Ndióxi núú tütú-gã núú cãchí-xi:

“Té Jácob ní cuu váha iní-í núú-dě, te té Esáú ñá túú ní cùu váha iní-í núú-dě”, duha càchí-gá núú tütú-gá. Te ducaⁿ ní cuu chi ducaⁿ ní cachí mée-gá cunduu sá càháⁿ-gá nchaa ñáiyu cuini mée-gá, te ñá díú cuendá ìⁿ chiúⁿ quidé-yu càháⁿ ñàhá-gá xii-yu.

¹⁴ Te vá cúú tñàhí càháⁿ-ó sá Yá Ndióxi ñá túú quide váha-gá sá dúcáⁿ quide-gá chi mee-gá ío ndáá quidé-gá!

¹⁵ Te mee-gá ní xáhaⁿ-gá xii ndíi Moisés: “Cundahú iní-í chindee-í mee-ni cué ñáiyu càchí iní-í”, duha ní xáhaⁿ-gá xii ndíi.

¹⁶ Te xiáⁿ cútñuní iní-ó sá cundahú iní-gá ñáiyu chi ducaⁿ cuini mée-gá cunduu, dico ñá túú cundahú iní ñàhá-gá xii-yu cuendá sá dúcáⁿ cuini-yu cada-gá, te ni ñá túú cundahú iní ñàhá-gá xii-yu cuendá sá ío ndúcu ndeé-yu quidé-yu ìⁿ sá quidé-yu.

¹⁷ Te núú tütú Yá Ndióxi càháⁿ-xi nàcuáa ní xáhaⁿ-gá xii téé ní cuu Faráon téé ní xindaha nàcióⁿ Ègiptú, te duha ní xáhaⁿ-gá: “Yúhú ní quide-í yindàha-n ñáiyu cuendá cada-í titní núú sá cadà-í núú-n cuendá cutnùní iní-n sá ío càhnu cuu-í, te ducaⁿ nchaa ñáiyu ñuyú cutnùní iní-yu sá yúhú cùú-í Ndióxi”, duha ní xáhaⁿ-gá xii téé ní cuu Faráon.

¹⁸ Te xiáⁿ cútñuní iní-ó sá Yá Ndióxi cundahú iní-gá mee-ni cué ñáiyu càchí iní mée-gá, te ducaⁿ ndàda díi-gá iní nchaa ñáiyu càchí iní mée-gá ducaⁿ cada-gá.

¹⁹ Te sá dúhá càháⁿ-í te dava-ndo quésaha-ndo: “Ná cuendá Yá Ndióxi dácà-gá cuéchi díquí ñáiyu núu ni ìⁿ-yu ñá ndácú-yu quehdé nihnú-yu cuendá sá vá cadá Yá Ndióxi nàcuáa cuini-gá”, quésaha-ndo.

²⁰ Te chí cuáha cuendá sá dicó ñáiyu ñuyú-a cùu-ndo te ñá túú nduu váha-xi sá nchòhó càháⁿ-ndó ìⁿ tñúhu sá ñá túú nduu váha sá cúú-xí Yá Ndióxi. Te duha na càháⁿ-í núú-ndó nàcuáa tecú tñuní-gá-ndó nàcuáa ndúu tñúhu càháⁿ-í. Te ñá túú xini-ó sá ìⁿ quídi ñuhu cùñaha-xi xii ñáiyu ní cadúha ñaha xii-xi: “Ná cuendá duha ní cadúha ñaha-n xii-í”, cùñaha-xi.

²¹ Chi ñáiyu cadúha nchaa quídi-áⁿ cuu-ni cadúha-yu ndihi ñuhu cuéi nása na cunduu quídi cadúha-yu canehe chiúⁿ-yu, chi ìⁿ-ni ñuhu cadúha-yu quídi cánehe chiúⁿ-yu ndi tñahá nduu sàcòo-yu vico ndihi quídi sá cánehe chiúⁿ-yu nduu cútexínu.

²² Te diu-ni ducaⁿ quide Yá Ndióxi, chi cuini-gá dandòho-gá ñáiyu ñá túú quide nchaa nàcuáa nduu vétú iní-gá, te cada-gá nàcuáa cutnùní iní-yu sá ío càhnu cuu-gá. Te sa ndecu túha-ná-yu sá quèhíⁿ-yu núú ùhú núú ndàhú, te cuéi ducaⁿ dico ío ta quide cahnu iní-gá cuáháⁿ.

²³ Te ducaⁿ quide-gá cuendá cutnùní iní nchaa ñáiyu ñuyú sá ío váha quide-gá sá

cúú-xi nchaa nchoo ñáiyu cundahú iní-gá, chi ní cachí-gá sá nchóo cué ñáiyu cundahú iní-gá nduu táhú-ó cundecu-o ndihi-gá núú ío váha càa ndecu-gá.

²⁴ Te dava nchoo ñáiyu ní càháⁿ Yá Ndióxi cùú-ó ñáiyu isràel, te dava-o cùu-o ñáiyu ñá túú cùu ñáiyu isràel.

²⁵ Te ní quee ndáá-xi nàcuáa ní xáhaⁿ Yá Ndióxi xii ndíi Òseás téé ní xóo càháⁿ tñúhu-gá ndéé sanaha ní chidó tñuní ndíi núú tütú-gá núú càchí-xi:

Ñáiyu ñá túú cùu cuendá-í ní cùu te nduu cuendá-í-yu,

te diu-ni ñáiyu-áⁿ ñá túú cùu váha iní-í núú-yu ni cùu, dico vitna cùu váha iní-í núú-yu.

²⁶ Te diu-ni ñuu núú dúcáⁿ ní cachí-í sá ñá túú ñáiyu cùu cuendá-í diu-ni ñuu-áⁿ coo ñáiyu cuu déhe yúhú Dútú Ndióxi Yáa ndécú tñu andiu.

Duha ní xáhaⁿ Yá Ndióxi xii ndíi Òseás ní chidó tñuní ndíi núú tütú-gá.

²⁷ Te ndíi Chàá téé ní xóo càháⁿ tucu tñúhu Yá Ndióxi ndéé sanaha ní càháⁿ ndíi cuendá ñáiyu isràel, te duha ní cachí ndíi: “Cuéi cuéhé víhí ñáiyu isràel dàtná cuéhé ñuhu cúchí lámár dico sacú-ni-yu vá quini-yu tñundòho tñúhu ndàhú.

²⁸ Te Yá Ndióxi ío ndíi cada-gá nchaa nàcuáa càháⁿ-gá ñuyú”, duha ní cachí ndíi.

²⁹ Te ní càháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndióxi Yáa táxi tñuní nchaandi túhú sá ío andiu ndíi ñuyú ñá túú ní dànaa-gá nchaa ñáiyu isràel, chi núu ni ndíi-yu danàa ñaha-gá,

te nchoo cùu-o datná ní cuu nchaa ñáiyu ní xindecu ñuu Sòdomá ndíi nchaa ñáiyu ní xindecu ñuu Gòmorrá, te ndíi-o nàa datná ní naa nchaa ñáiyu-áⁿ ní cùu.

Duha ní cachí ndíi.

Ñáiyu isràel ñá túú sàndáá iní-yu tñúhu Xítohó Jesucristú

³⁰ Te sá cuendá xiáⁿ núu vitna càchí tñúhu-í xii-ndo sá cué ñáiyu ñá túú cùu ñáiyu isràel ñá túú ní nànducu nihnú-yu nàcuáa cadá-yu cudíu-yu núú Yá Ndióxi, dico vitna cudíu-yu núú-gá chí ní sàndáá iní-yu Xítohó Jesucristú.

³¹ Te ñáiyu isràel nchicúⁿ nihnú-yu tñúhu sá dánéhé ñàhá xii-yu nàcuáa cadá-yu cudíu-yu núú Yá Ndióxi dico ñá túú cudíu-yu núú-gá chí ñá ndácú-yu cadá-yu nchaa nàcuáa càháⁿ-xi.

³² Te ducaⁿ ñá túú cudíu-yu núú Yá Ndióxi chí ñá túú sàndáá iní-yu Xítohó Jesucristú, te sàni iní-yu sá sá cuendá mee-ni nchaa sá quidé mée-yu cudíu-yu núú-gá, te sá dúcáⁿ quidé-yu te cùu-yu dàtná ìⁿ ñáiyu nguñenu ìⁿ yúú te ndúá-yu. Te ducaⁿ sàtnahá-xi

cúu-yu chi ñá túú cùu váha iní-yu núú Xítoho Jesucristú.

³³ Te quèe ndáá-xi nàcuáa ní cáháⁿ Yá Ndiöxí ìⁿ xichi núú tütú-gá núú cächí-xi:

Yúhú táxi ndècu-í ìⁿ tée ñuu Siòn, te cuu-dé dátná ìⁿ yúú, te yúú-áⁿ nguñenu ñáyiú te nduá-yu,

te nchaa ñáyiú na quindáá iní ñáhá xii-dé, te vá ndíxí cuèchi iní-yu sá dúcáⁿ ní sándáá iní ñáhá-yu xii-dé.

Duha cächí-gá núú tütú-gá.

10

¹ Te nchòho ñáyiú ndècu ndihi-í ichi Xítoho Jesucristú cächí tnúhu-í xii-ndo sá cáháⁿ ndihi-í Yá Ndiöxí cuendá ñáyiú isràél, chi ío cuini-í sá nánihí tãhú-yu.

² Te na cáháⁿ ndáá-í cuendá-yu sá ío ndücu ndeé-yu xinu cuechí-yu núú Yá Ndiöxí, te dicó-ní sá ñá túú quidè-yu nàcuáa cuini méé-gá cadá-yu.

³ Chi ñá túú quide cuendá-yu nàcuáa cuini Yá Ndiöxí cada ñaha-gá xii-yu nàcuáa cudü-yu núú-gá, te quide-ní-yu nàcuáa sàni iní méé-yu cudü-yu núú-gá te ñá túú cuini-yu tnú-yu tnúhu cáháⁿ-gá nàcuáa cudü-yu núú-gá.

⁴ Te Xítoho Jesucristú ní quide-gá cuendá sá vá cúnü-gá nchaa tnúhu ní chidó tnüni ndii Moisés, te nchaa ñáyiú na quindáá iní ñáhá xii-gá te diu-gá cada te cudü-yu núú Yá Ndiöxí.

⁵ Te ndii Moisés cáháⁿ ndii núú tütú ndii cuendá ñáyiú cuini cudü núú Yá Ndiöxí cuendá sá nchicúⁿ niñnú-yu nchaa nàcuáa ní cáháⁿ ndii. Te ní cächí ndii sá ncháá ñáyiú na cada nchaa nàcuáa ní xáhaⁿ Yá Ndiöxí xii ndii ní chidó tnüni ndii te nánihí tãhú-yu, te núú dicó ndacú-yu cadá-yu nchaa nàcuáa ní cáháⁿ ndii.

⁶ Dico vitna núú na quindáá iní-ó Xítoho Jesucristú, te cudü-o núú Yá Ndiöxí. Te duha cächí tnúhu ní chidó tnüni ndii núú tütú-gá: “Vá cáni iní-ndo sá xini ñuhu-xi cada-ndo ìⁿ sá vá yõo tnáhi ndàcu cada sá cáá tûu-ndo àndü te cúnaha-ndo xii Cristú cuuⁿ-ndo ndihi-gá núú ñuyú-a.

⁷ Te ní vá cáni tucu iní-ndo sá quihíⁿ tûu-ndo núú xñdecu nchaa ñáyiú ní xihí te cada-ndo sá Cristú ndoto-gá”, duha cächí tnúhu-áⁿ sá vá dúcáⁿ cáni iní-ó.

⁸ Te cächí tucu tnúhu-áⁿ: “Tnúhu Yá Ndiöxí sá ndécú ndihi ñaha-xi xii-ndo chi sàni iní-ndo cuendá tnúhu-áⁿ te cáháⁿ-ndó”, duha cächí tnúhu-áⁿ. Te tnúhu sá ndécú ndihi-ndo-áⁿ cúu-xí tnúhu cáháⁿ-ndí núú ñáyiú, te xini ñuhu-xi sá quindáá iní-yu tnúhu-áⁿ.

⁹ Te núu na nñuu-ndo cáháⁿ-ndó sá Xítoho Jesucristú cúu-gá Xítoho-ndó, te quindáá

iní-ndo ní yuhu ní iní-ndo sá Yá Ndiöxí ní dándótó-gá Xítoho Jesucristú, te nánihí tãhú-ndo te núu ducaⁿ na cada-ndo.

¹⁰ Te nchaa ñáyiú ducaⁿ sándáá iní te cáháⁿ-yu sá Xítoho Jesucristú cúu-gá Xítoho-yu, ñáyiú-áⁿ cudü-yu núú Yá Ndiöxí te nánihí tãhú-yu.

¹¹ Te núú tütú Yá Ndiöxí cächí-xi sá ní ìⁿ ñáyiú sándáá iní ñáhá xii Xítoho Jesucristú vá ndíxí cuèchi iní-yu sá dúcáⁿ sándáá iní ñáhá-yu xii-gá.

¹² Te sá cúu-xí Xítoho Jesucristú chi ìⁿ-ni cùu ñáyiú isràél ndihi ñáyiú ñá túú cùu ñáyiú isràél, chi diu-gá cúu-gá Yaá cúnüu taxi tnuni-gá nchaa ñáyiú, te ío váha quide-gá sá cúu-xí nchaa ñáyiú cáháⁿ ndihi ñaha xii-gá.

¹³ Te quèe ndáá-xi nàcuáa cáháⁿ-xi núú tütú Yá Ndiöxí núú cächí-xi: “Nchaa ñáyiú na cáháⁿ ndàhú núú Xítoho Jesucristú sá dácacu niñnu ñaha-gá xii-yu, te ñáyiú-áⁿ nánihí tãhú-yu”, duha cächí-xi núú tütú-gá.

¹⁴ Te ñáyiú-áⁿ vá nihi-yu nàcuáa cáháⁿ ndàhú-yu núú-gá te núu ñá túú sándáá iní ñáhá-yu xii-gá, te ní vá nihi-yu nàcuáa cadá-yu quindáá iní ñáhá-yu xii-gá te núu vátá cündèdòho-gá-yu tnúhu-gá, te ní vá nihi-yu tnúhu-gá te núu vá yõo quihíⁿ cütñuhu ñaha xii-yu.

¹⁵ Te ní vá yõo quihíⁿ ducaⁿ cütñuhu ñaha xii-yu tnúhu-gá te núu Yá Ndiöxí vá téndàha-gá ñáyiú quihíⁿ cütñuhu ñaha xii-yu. Te núú tütú Yá Ndiöxí cächí-xi: “Ío vii ío váha cùu iní-ó vèxi ñáyiú dānehé ñáhá xii-o nàcuáa ndüu tnúhu sá cáháⁿ nàcuáa nánihí tãhú-ó”, duha cáháⁿ-xi núú tütú-gá.

¹⁶ Te ñá ncháá-yu cuini-yu quindáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndii Chaiá xii Yá Ndiöxí te duha ní xáhaⁿ ndii xii-gá: “Yòho Dútu Ndiöxí na nàcani tnúhu-í núu-n sá ío sacú-ni ñáyiú sándáá iní-yu tnúhu cáháⁿ-ndí”, duha ní xáhaⁿ ndii xii-gá.

¹⁷ Te xini ñuhu-xi sá dñha-gá cundèdòho-yu tnúhu-áⁿ cuendá ducaⁿ te quindáá iní-yu, te tnúhu-áⁿ cúu-xí tnúhu Xítoho Jesucristú.

¹⁸ Te vá cúu cáháⁿ-ó sá ñá túú ní nihi ñáyiú isràél tnúhu-gá, chi nchaa-yu ní nihi-yu tnúhu-gá, chi núú tütú Yá Ndiöxí cächí-xi:

Cue tée ní cáháⁿ tnúhu Yá Ndiöxí ní cáháⁿ-güedé tnúhu-gá núú ñáyiú, te tnúhu-áⁿ ní xíté nuu-xi nihi ñuyú.

Duha cächí-xi núú tütú-gá.

¹⁹ Te ní vá cáháⁿ-ó sá ñáyiú isràél ñá túú ní cùu tnuni iní-yu nàcuáa ndüu tnúhu-gá chi ní tecu tnüni-yu. Te ndéé sanaha ní chidó tnüni ndii Moisés nàcuáa ní xáhaⁿ Yá Ndiöxí xii ñáyiú isràél, te duha ní xáhaⁿ-gá xii-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cütñuni

iní-xi nàcuáa cada váha cundecu núú-í,
te nchòhó cudééⁿ-ndó núú-yu te cuu cuédú
íní-ndó-yu.

Duha ní xáhaⁿ Yá Ndióxi xii-yu te ducaⁿ ní
chídó tnúni ndíi Moisés.

²⁰ Te ndíi Chàiaá ñá túú tnàhí ní yuhú ndíi
ní quide ndíi núú Yá Ndióxi ní cáháⁿ ndíi
tnúhu-gá, te ní cachí ndíi:

Ñáiyu ñá túú nànducu ñaha xii-í ní cùu ní
naníhí ñáhá-yu xii-í,

te ní ñá túú ndúcu tnúhu ñáhá-yu xii-í ní cùu
te ní xiní ñáhá-yu.

Duha ní cachí ndíi Chàiaá ní cáháⁿ ndíi tnúhu
Yá Ndióxi.

²¹ Te ní quide tucu ndíi núú Yá Ndióxi ní
cáháⁿ ndíi tnúhu-gá cuendá ñáiyu isràél, te
ní cachí ndíi: “Nchaa-ni nduu yihi-í cáháⁿ-í
ñáiyu isràél te ñá túú cuini-yu quindáá
ini-yu chi io sàá ini-yu”, duha ní cachí ndíi
Chàiaá ní cáháⁿ ndíi tnúhu Yá Ndióxi.

11

Cuendá ñáiyu isràél ñáiyu naníhí tàhú

¹ Te cuéi ducaⁿ dico vá cáháⁿ-ó sá Yá
Ndióxi dáqueé tihú-gá ñáiyu isràél chi ñu-ni
ñáiyu-án cúú cuendá-gá, chi yuhú tnàhá-í
cúú-í mei tée isràél, te ñani tnàhá-í ní cuu
ndíi Àbrahám tée ní xindecu ndéé sanaha
vìhi-gá, te ñu-ni ñani tnàhá-í ní cuu tucu ndíi
Benjamín.

² Te ndéé sanaha dùcaⁿ ní cachí Yá Ndióxi
sá nchúhú ñáiyu isràél cúú-ndí ñáiyu cùu
cuendá-gá, te ñá túú dàqueé tihú ñáhá-gá
xii-ndí, te nchòhó sa xiní-ndó nàcuáa
cáháⁿ-xi núú tütú Yá Ndióxi núú cächí-xi
nàcuáa ní quide té Eliás ní ndacáⁿ cuéchi-dé
núú-gá cuendá ñáiyu isràél.

³ Te duha ní xáhaⁿ-dè xii-gá: “Yòhó
Dútú Ndióxi, ná nàcani tnúhu-í núú-n sá
ní sahní-yu cue tée cáháⁿ tnúhu-n, te ní
dátanú-yu núú xihí quiti ndúu táhú-n,
te yuhú-ná ní cácu-í ndécú-í dico nànducu
ñáhá-yu chi tnàhá-í cuini-yu cahni ñáhá-yu
xii-í”, duha ní xáhaⁿ-dè xii Yá Ndióxi.

⁴ Te Yá Ndióxi ní xáhaⁿ-gá xii-dé: “Sa ní
dáqueé díi-í úsá míl cue tée cùu cuendá-í,
te ñá túú nèhe-güedé sá yíñuhu núú Bàál sá
cächí-yu cùu ndióxi-yu te ñá ndáá sá ndióxi
cúú-xí”, duha ní xáhaⁿ-gá xii té Èliás.

⁵ Te ducaⁿ sàtnahá-xi cùu vitna chi xindecu
ñáiyu ní cáháⁿ-gá ní chitnahá ñáhá xii-gá,
te ducaⁿ ní quide-gá chi ní cundáhú ini
ñáhá-gá xii-yu.

⁶ Te ducaⁿ ní cáháⁿ ñáhá-gá xii-yu sá
cúndáhú ini ñáhá-gá, te ñá díú cuendá
ñiⁿ chiúⁿ quide-yu ducaⁿ ní cáháⁿ ñáhá-gá
xii-yu, chi núú dícò cuendá ñiⁿ chiúⁿ quide-yu
ducaⁿ ní cáháⁿ ñáhá-gá xii-yu ña, te ñá díú-gá

sá cúú ini mée-gá ducaⁿ ní cáháⁿ ñáhá-gá
xii-yu te núu ducaⁿ.

⁷ Te na cächí tnúhu-í xii-ndo nàcuáa cùu
vitna sá ñáiyu isràél cuini-yu cudíu-yu núú
Yá Ndióxi dico ñá ndacú-yu, dico dava ñáiyu
ní cáháⁿ-gá ñáiyu-án cúdiú-yu núú-gá, te
ñáiyu ducaⁿ ñá túú cùdiu núú-gá-án io ní cuu
sáá ini-yu núú-gá.

⁸ Te ní quee ndáá-xi nàcuáa cáháⁿ-xi núú
tütú Yá Ndióxi núú cächí-xi: “Yá Ndióxi
ní cachí-gá sá cúu-yu ñáiyu io ní díquí-xi,
chi cuéi ndèhé-yu nàcuáa cáháⁿ tnúhu-gá
dico ñá cútñuní ini-yu nàcuáa cáháⁿ-xi, te
cuéi ndédóho-yu dico ñá túú queé díquí-yu,
te ducaⁿ-ni quide-yu ndéé vitna”, duha
cächí-xi núú tütú-gá.

⁹ Te ndíi Dàvíí ní cachí ndíi:
Ñáiyu io váha ndècu te cùdíí ini-yu quide-yu
vico,

dico yáha-yu dátñá yáha ñiⁿ quiti ngáva
trampá àdi ñiⁿ quiti ñá cútñuní ini-xi
queé xití ñumu,

chi cuíta nihnú-yu te nacháhu-yu nchaa sá
quide-yu.

¹⁰ Te cúu-yu ñáiyu ñá túú vèdana tècú tnúni,
te cùu tucú-yu dátñá ñiⁿ ñáiyu io ndòho
nchido ñiⁿ sá vèe.

Duha ní cachí ndíi Dàvíí.

Ñáiyu ñá túú cùu ñáiyu isràél naníhí tàhú-yu

¹¹ Te cuéi ducaⁿ dico vá cächí-ó sá sá
dúcáⁿ ñá túú ní quide ndáá ñáiyu isràél te
ní xita nihnu duúⁿ-yu, te ñáhá chi sá dúcáⁿ
ní quide-yu te ní ngúndecu ndíhi dava-gá
ñáiyu tnúhu sá cáháⁿ nàcuáa naníhí tàhú-yu,
te ñáiyu isràél quini-yu nàcuáa naníhí tàhú
ñáiyu ñá túú cùu ñáiyu isràél, te tnàhá-yu
cudíí ini-yu naníhí tàhú-yu.

¹² Te sá dúcáⁿ ní quide sáá ini-yu ñá túú
ní quide ndáá-yu núú Yá Ndióxi, te xiáⁿ ní
cúu-xi ñiⁿ sá váha sá cúu-xí ñáiyu nihíí ñuyúí,
dico sáá nduu te cada ñáiyu isràél nchaa
nàcuáa cáháⁿ Yá Ndióxi, te dává-án io-gá váha
cúu xii nchaa ñáiyu nihíí ñuyúí.

¹³ Te nchòhó ñáiyu ñá túú cùu ñáiyu is-
ràél cachí tnúhu-í xii-ndo sá Yá Ndióxi ní
cachí-gá sá cáháⁿ-í tnúhu-gá núú-ndó, te
yuhú cächí-í sá io càhnu cuu chiúⁿ quide-í.

¹⁴ Te duha cáháⁿ-í cuendá sá núu cudana
io dava ñáiyu cùu ndí mee-í cudíí ini-yu cada
váha ñaha Yá Ndióxi xii-yu dátñá quide váha
ñaha-gá xii-ndo, te naníhí tàhú-yu.

¹⁵ Te sá cuendá sá ní quee tihú ñáiyu is-
ràél ní nacáháⁿ cáhnú ini tnàhá ñáiyu nihíí
ñuyúí ndíhi Yá Ndióxi, dico na sáá nduu
núcúndecu váha ñáiyu isràél ndíhi Yá Ndióxi,
te io-gá váha tnàhá ñáiyu nihíí ñuyúí, te
ñáiyu-án cada ini-ó sá cúu-yu dátñá ñáiyu ní
xihí, dico dává-án cada tucu ini-ó sá cúu-yu

dàtná ñáyiú ní ndoto chí nucúndecu váha-yu ndihí-gá.

¹⁶ Te núu sá lúhá-ní ñ^m tílúú yusaⁿ cáváha te ñiú-ní ducaⁿ cáváha ñihí. Te núu cáváha yóho ñ^m yutnu te ñiú-ní ducaⁿ cáváha-xí cùu ñáyiú isràél, chí ñani tñáhá-yu ní xíndecu ndéé sanaha ní cuú-yu ñáyiú ní cuu cuendá ñáhá Yá Ndióxi, te ñiú-ní ducaⁿ cùu cuendá ñáhá-gá xii mée-yu ndéé vitna.

¹⁷ Te ió ñ^m yutnu váha ñani olívú, te dava dité yutnu-áⁿ ní téhndé te ní nucodó dité yutnu olívú cùtèxínu, te mee-ná yutnu olívú váha-áⁿ ío váha quide-xí nchito dité yutnu olívú cùtèxínu-áⁿ. Te dité nchaa yutnu olívú váha-áⁿ cùu-xí dàtná ñáyiú isràél, te nchaa dité-xí sá ní téhndé-áⁿ cùu-xí ñiú-ní ñáyiú isràél ñáyiú ñá túú tñáhá tñúhu ndihí Yá Ndióxi. Te dité yutnu olívú cùtèxínu sá ní nucodó tñáhá-áⁿ cùu-xí dàtná ñáyiú ñá túú cùu ñáyiú isràél tñáhá tñúhu ndihí Yá Ndióxi.

¹⁸ Te vá cání iní-ndó sá sá dúcáⁿ ndécu váha-ndo ndihí Yá Ndióxi te ío cùnuu-ndo dacúúxi ñáyiú isràél, te vá dúcáⁿ cání iní-ndó chí sá cuendá nchaa ñani tñáhá ñáyiú isràél ní xíndecu ndéé sanaha ducaⁿ ndécu váha-ndo ndihí Yá Ndióxi vitna, te ñá díú sá cuendá nchòhó ndécu ndihí váha ñáyiú-áⁿ Yá Ndióxi vitna.

¹⁹ Te cudana sàni iní-ndó te cächí-ndó sá ñáyiú isràél ní quee tñú-yu cuendá sá nchòhó nucuíñí-ndó nùú-yu nucúndecu váha-ndo ndihí Yá Ndióxi.

²⁰ Te ndáá sá ní quee tñú-yu chí ñá túú ní sàndáá iní ñáhá-yu xii-gá, te nchòhó ío váha cùu ndecu-ndo ndihí-gá chí ní sàndáá iní-ndó-gá, dico vá cächí-ndó sá ío càhnu cuu-ndo, te ío váha chí cuàha cuendá nàcuáa cundecu-ndo.

²¹ Te cue ñáyiú isràél cùu-yu ñáyiú cùu cuendá-gá ní cùu te ní dáquée tñú ñáhá-gá xii-yu cuendá sá ñá túú ní sàndáá iní ñáhá-yu xii-gá, te tñáhá nchòhó daquée tñú ñáhá-gá xii-ndo te núu na càda-ndo datná ní quide ñáyiú-áⁿ.

²² Te chí cáda cuendá sá Yá Ndióxi ío váha iní-gá, dico cùdéeⁿ-gá núu nchaa ñáyiú ñá túú sàndáá iní ñáhá xii-gá, dico sá cùu-xí nchòhó cue ñáyiú sàndáá iní ñáhá xii-gá chí ío váha iní-gá. Te ducaⁿ-ni cùnduu váha iní-gá sá cùu-xí-ndó te núu vá dáña ndéé-ndó càda-ndo nàcuáa càháⁿ-gá cuendá sá ío váha iní-gá, te núu ñáhá te tñáhá nchòhó quee tñú-ndó dàtná ní quee tñú ñáyiú isràél, ñáyiú ñá túú ní sàndáá iní ñáhá xii-gá.

²³ Dico núu ñáyiú isràél ñáyiú ní dáquée tñú ñáhá Yá Ndióxi quíndáá iní ñáhá-yu xii-gá te nduu cuendá ñáhá tucu-gá xii-yu, te ñáyiú-áⁿ cùu-yu dàtná dava dité yutnu olívú sá ní téhndé te ní nucodó tñáhá tucu. Te

ducaⁿ sàtnahá-xí cùu-yu te núu na quíndáá iní ñáhá-yu xii-gá.

²⁴ Te nchòhó cùu-ndó dàtná nchaa dité yutnu olívú cùtèxínu, chí ñá díú ñáyiú isràél cùu-ndó, te dité nchaa yutnu olívú cùtèxínu-áⁿ ní nucodó-xí núú dité yutnu olívú váha-áⁿ. Te yáchí-gá nucúndecu váha ñáyiú isràél ndihí Yá Ndióxi, chí cùu-yu dàtná nchaa dité yutnu olívú váha sá ní téhndé te ní nucodó tñáhá tucu. Te ducaⁿ sàtnahá-xí cùu-yu te núu na quíndáá iní ñáhá-yu xii-gá.

Sáa nduu te naníhí tànhú ñáyiú isràél

²⁵ Te nchòhó ñáyiú ndécu ndihí-í ichi Xitohó Jesucristú, na cächí tñúhu-í xii-ndo ñ^m tñúhu nduu yuhu ní cuu, cuendá sá vá cání iní-ndó sá ío-gá váha sáa díquí-ndó dácúúxi ñáyiú isràél, chí dava ñáyiú isràél cùu sáa iní-yu núú Yá Ndióxi ñani na ndihí ñáyiú ní cachí Yá Ndióxi ngúndecu váha ndihí ñáhá-yu xii-gá, ñáyiú ñá túú cùu ñáyiú isràél.

²⁶ Te nduu na ndihí ñáyiú-áⁿ ngúndecu váha-yu ndihí Yá Ndióxi, te dává-áⁿ naníhí tànhú ñáyiú isràél chí quee ndáá-xí nàcuáa càháⁿ Yá Ndióxi núú tütú-gá núú cächí-xi:

Ndàa ñuu Sión quixi Yaá cada naníhí tànhú nchaa ñáyiú,

te ñiú-ní Yaá-áⁿ cada-gá cuendá sá dáña nchaa ñáyiú isràél ichi cuéhé ichi duha.

²⁷ Te yúhú cada càhnu iní-í nchaa cuéchi ñáyiú isràél, chí cada-í dàtná ní cachí-í ndéé sanaha.

Duha cächí Yá Ndióxi núú tütú-gá.

²⁸ Te sá cuendá tñúhu sá càháⁿ nàcuáa naníhí tànhú-ó xíáⁿ cùu úhú iní ñáyiú isràél Yá Ndióxi, te sá dúcáⁿ quide-yu xíáⁿ nchòhó ní ñihí-ndó tñúhu sá càháⁿ nàcuáa naníhí tànhú-ndó. Te ní cachí Yá Ndióxi sá ñáyiú isràél cuu cuendá-gá, te cùu iní ñáhá-ní-gá xii-yu, te ducaⁿ quide-gá chí ducaⁿ ní xáhaⁿ-gá xii cue ñani tñáhá-yu ní xíndecu ndéé sanaha.

²⁹ Te Yá Ndióxi ñá túú nduu úhú iní-gá ñ^m sá táxi-gá, te ní ñá túú ndixi cuéchi iní-gá sá càháⁿ ñáhá-gá xii-o.

³⁰ Te nchòhó chí ñá túú sàndáá iní-ndó Yá Ndióxi ní cùu, dico vitna ñani ñá túú sàndáá iní ñáhá ñáyiú isràél xii-gá, te ní cundáhú iní ñáhá-gá ní dácacu ñihnu ñaha-gá xii-ndo núú úhú núú ndáhú.

³¹ Te vitna quide-yu dàtná ní xóo cada nchòhó cùtñáhá ñá túú ní xóo quíndáá iní-ndó-gá. Dico sáa nduu te natuha ñáhá-yu xii-gá te dácacu ñihnu ñaha-gá xii-yu sá cùndáhú iní ñáhá-gá dàtná ní quide ñaha-gá xii nchòhó.

³² Te Yá Ndióxi ní dáña-gá sá dúcáⁿ cùnduu saá iní nchaa ñáyiú cuendá cuíni-gá cundáhú iní ñáhá-gá xii-yu.

³³ Te súúni váha quide ñaha Yá Ndióxi xii-o, te ío váha xini-gá nchaa cuéi sá ío andiu te cuéi sá ío ñuyú-a, te ducaⁿ ío váha sáa nchaa sá xini tnúni-gá. Te ñá ndácú-ó cùtnuni iní-ó ná cúu nchaa sá sání iní-gá cada-gá, te ni ñá ndácú-ó cùtnuni iní-ó nacuaa nduu cuendá nchaa sá quidé-gá.

³⁴ Te núu tütú-gá cächí-xi: “Vá yóo ñⁿ cùtnuni iní-xi nacuaa sáni iní Yá Ndióxi, te ni vá yóo ñⁿ ndacu dacahu iní ñáhá xii-gá nacuaa cáháⁿ-gá.

³⁵ Te Yá Ndióxi ñá túu quide yica iní-gá cada-gá sá váha sá cúu-xí ñáiyu cuendá ñⁿ sá sáñhá-yu xii-gá chí ñá túu dùcaⁿ quide-gá”, duha cächí-xi núu tütú-gá.

³⁶ Te ducaⁿ chí mee Yá Ndióxi ní taxi ndecu-gá nchaandi túhú sá ío ñuyú, te diu-ni mee-gá táxi tnúni-gá nchaa sá ní taxi ndecu-gá, te nchaa cùu-xi cuendá-gá. Te vitna chí ná cächí-ó sá ío càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nacuaa nduu vétú iní Yá Ndióxi

¹ Te vitna nchòhò ñáiyu ndècu ndihi-í ichi Xítóhò Jesucristú cächí tnúhu-í xii-ndo sá Yá Ndióxi cùndàhú iní ñáhá-gá xii-o chindee ñaha-gá, núu xiáⁿ cáháⁿ ndáhú-í núu-ndo sá dáñá-ndo mèe-ndo núu ndáhá-gá, te cada iní-ndo sá cúu-ndo dátá ñⁿ táhú sá nchító-ó ní nduu táhú-gá. Te cuu-ndo ñáiyu váha ñáiyu cada nchaa nacuaa nduu vétú iní Yá Ndióxi chí ducaⁿ táu-ndo càda-ndo sá cúu-xi-gá.

² Te vá cáncicúⁿ nihnu-gá-ndo càda-ndo dátá xiquide nchaa ñáiyu ndècu ichi cuehé ichi duha ndècu ñuyú-a, te vá cúhúⁿ-gá iní-ndo ichi cuehé ichi duha-án, chí mee-ná sá váha cuhuⁿ iní-ndo, te ducaⁿ te cutnúni iní-ndo nchaa nacuaa cuini Yá Ndióxi cada-ndo, te nchaa sá cuini-gá cada-ndo cùu-xi mee-ni sá váha, sá ío váha nduu vétú iní-gá, te cùu-xi nchaa sá xini ñúhu-xi cada-ndo núu-gá.

³ Te sá cuendá chiúⁿ ní cundàhú iní ñáhá Yá Ndióxi ní taxi-gá xii-í xiáⁿ núu na cáháⁿ-í dóho-ndo vitna: Vá cáni iní-ndo ñⁿ sá ñá túu táu-ndo càni iní-ndo te cucahaⁿ-ndo sá ío càhnu cuu-ndo. Te nchòhò ní sándáá iní-ndo Yá Ndióxi núu chindee ñaha-gá xii-ndo, te vitna chí cuáha cuendá núu ná daha núu chiúⁿ-gá ndacu-ndo càda-ndo.

⁴ Te nchoo títá xichi cùu yiqui cuñú-ó, te ndi díⁿ ndi díⁿ chiúⁿ quide-xi ñⁿ ñⁿ-xi.

⁵ Te ducaⁿ sátnahá tucu-xi cùu nchoo ñáiyu ndècu ndihi Xítóhò Jesucristú chí cuéi ná daha tnáhá-ó dico ñⁿ-ni cùu-o ndihi-gá, te ducaⁿ mèe-o tucu ñⁿ-ni cùu-o.

⁶ Te mee Yá Ndióxi ní cundàhú iní ñáhá-gá xii-o ní taxi-gá chiúⁿ táu-ó càda-o ñⁿ ñⁿ-o te chindee ñaha-gá xii-o, te xini ñúhu-xi cada-o

nacuaa nduu chiúⁿ ní taxi-gá cada-o. Te núu ní nduu táhú-ó núu-gá sá cáháⁿ-ó tnúhu sá dácàhu iní ñáhá mèe-gá xii-o te cáháⁿ-ó nacuaa sándáá iní-ó chindee ñaha-gá xii-o,

⁷ àdi ní nduu táhú-ó núu-gá sá ío váha chindee-o tnàha ñáiyu-o te diu-ni ducaⁿ càda-o, àdi ní nduu táhú-ó dānehé-ó ñáiyu tnúhu-gá te diu-ni ducaⁿ càda-o,

⁸ àdi ní nduu táhú-ó núu-gá sá dácàháⁿ-ó ñáiyu canchicúⁿ nihnú-yu ichi-gá te diu-ni ducaⁿ càda-o, àdi ní nduu táhú-ó núu-gá sá cuáñaha-o xii tnaha ñáiyu-o sá ñihí-ó ndècu ndihi-o te diu-ni ducaⁿ càda-o, dico ni yuhu ni iní-ó cuáñaha-o xii-yu, àdi ní nduu táhú-ó núu-gá taxi tnúni-ó te diu-ni ducaⁿ càda-o, te ni yuhu ni iní-ó càda-o, àdi ní nduu táhú-ó núu-gá chindee-o cué ñáiyu ndècu ndihi tnúndòho tnúhu ndàhú te diu-ni ducaⁿ càda-o, te ío cudíⁿ iní-ó càda-o chiúⁿ-án.

Nchaa nacuaa táu-xi cada nchaa ñáiyu ndècu ichi Xítóhò Jesucristú

⁹ Te cuu iní tnáhá ndisa-ndo ñⁿ ñⁿ-ndo, te daña-ndo nchaa sá cuehé sá dúhá te cada-ndo mèe-ni sá váha.

¹⁰ Te ío cuu iní tnáhá-ndo, te cada-ndo cuendá sá ñⁿ-ni ñáiyu cùu-ndo, te ñⁿ ñⁿ-ndo cáni-gá iní-ndo cànehe yíñuhu núu tnáhá-ndo.

¹¹ Te nducu ndèe-ndo cada-ndo nchaa chiúⁿ tahu Xítóhò Jesucristú vá túhío-ndo, te cada-ndo ni yuhu ni iní-ndo sá cúu-xi-gá.

¹² Te ío cudíⁿ iní-ndo cùndecu-ndo chí ní ngùndecu ndihi-ndo tnúhu ndee iní sá cùndecu ndihi-ndo Xítóhò Jesucristú, te cada càhnu iní-ndo cuéi nándi na càda ñaha ñáiyu xii-ndo sá cuendá-gá, te vá dáñá ndèe-ndo cáháⁿ ndihi-ndo Yá Ndióxi.

¹³ Te chindee tnàha-ndo te núu ío dava nchòhò ñáiyu ndècu ichi-gá ío ñⁿ sá cúmání xii-ndo, te ío váha cuu iní-ndo còto-ndo ñáiyu véxi vehe-ndo.

¹⁴ Te cácaⁿ táhú-ndo núu Yá Ndióxi cuendá nchaa ñáiyu nándi quide ñaha xii-ndo, te cácaⁿ táhú-ndo núu-gá sá ná chindee ñaha-gá xii-yu te ñá díú dà cácaⁿ táhú-ndo núu-gá sá ná dácuta nihnu ñaha-gá xii-yu.

¹⁵ Te núu ío ñáiyu cudíⁿ iní-xi te cudíⁿ iní-ndo ndíhí-yu, te núu ío ñáiyu ndíhú iní-xi te ndíhú iní-ndo ndíhí-yu.

¹⁶ Te cuu ñⁿ-nuu-ndo cùndecu-ndo, te vá cáda càhnu-ndo mee-ndo, te tnáhá tnúhu-ndo ndihi nchaa ñáiyu ndàhú iní-xi, te vá cáni iní-ndo sá ío-gá túha-ndo.

¹⁷ Te vá nánchòcava-ndo nàchinaa-ndo ñⁿ sá quidé ñaha ñáiyu xii-ndo, te ío nducu ndèe-ndo cada-ndo mee-ni sá váha nacuaa cuu váha iní ñáiyu.

¹⁸ Te ío nducu ndèe-ndo cada-ndo sá ndácú-ndo cùndecu váha-ndo ndihi nchaa ñáiyu.

¹⁹ Te nchòhò ñáiyu ío cùu iní-í, vá cáni iní-ndó nàchinaa-ndo ììⁿ sá cádá ñàha ñáiyu xii-ndo, chí cundetu-ndo sá mée Yá Ndiòxí ná nàchinaa-gá sá quidé ñàhá-yu xii-ndo, chí quee ndáá-xi nàcuáa càháⁿ Yá Ndiòxí nùú tütú-gá nùú càchí-xi: “Yúhú dandòhò-í-yu chí nachinaa-í nchaa sá quidé-yu”, duha càchí-gá nùú tütú-gá.

²⁰ Te xini ñuhu tucu-xi cada-ndo nacuaá càháⁿ tucu-xi ingá xichí nùú tütú-gá nùú càchí-xi: “Te nùú ñáiyu cùu úhú iní ñàhá xii-ndo ñá túú sá cóhó sá cáxi-yu te cuáñaha-ndo xii-yu, te nùú ducaⁿ na cada-ndo te ío cucahaⁿ nùú-yu”, duha càchí-xi nùú tütú-gá.

²¹ Te nùú ío ììⁿ sá quidé ñàha tnaha ñáiyu-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chí cada-ndo sá vaha sá cúu-xí-yu, te ducaⁿ te vá cádá-ndó sá ñá túú tàù-ndó càda-ndo nùú Yá Ndiòxí dàtná quidé-yu.

13

¹ Te nchaa ñáiyu tàù-yu quindáá iní-yu nchaa cue téé cùchiuⁿ, chí Yá Ndiòxí ní cachí-gá sá cùndècu téé cùchiuⁿ ñuyú-á, nùú xiáⁿ xindècu-güedé vitna.

² Te nchaa ñáiyu ñá túú sàndáá iní ñàhá xii cue téé cùchiuⁿ ñá túú tnàhá iní Yá Ndiòxí sá dúcán quidé-yu, chí mee-gá ní cachí-gá sá cùndècu-güedé. Te nchaa ñáiyu ducaⁿ ñá túú sàndáá iní ñàhá xii cue téé cùchiuⁿ nacháhu-yu sá dúcán quidé-yu.

³ Te nchaa ñáiyu quide váha ñá túú yùhú-yu cue téé cùchiuⁿ chí quide váha-yu, dico nchaa ñáiyu ñá túú quide váha chí xiyùhú-yu cue téé cùchiuⁿ. Te vitna nùú nchòhò cuini-ndó sá vá yùhú-ndó cué téé cùchiuⁿ te chí cádá váha, te ducaⁿ te càháⁿ váha-güedé cuèndá-ndó.

⁴ Te Yá Ndiòxí ducaⁿ ní cachí-gá cundecu-güedé cuèndá cada-güedé sá ñá túú ná cuu cundecu-ndo, te nùú ñá túú quide váha-ndo ndècu-ndo te quiyùhú iní-ndó nùú-güedé, chí ñá túú àùⁿ ná cuu ndècu ndihí-güedé tnùhu ndee iní dandòhò-güedé nchaa ñáiyu ñá túú quide váha, chí Yá Ndiòxí ducaⁿ ní cachí-gá cundecu-güedé sá dúcán càda-güedé dandòhò-güedé nchaa ñáiyu ñá túú quide váha.

⁵ Nùú xiáⁿ ío xini ñuhu-xi sá quindáá iní-ndó nchàa cue téé cùchiuⁿ, te ñá díú sá yùhú-ndó dandòhò ñaha-güedé xii-ndo, chí cada-ndo sá cùtnùni iní-ndó sá cúu-xí ììⁿ sá váha.

⁶ Chí diu cuèndá xiáⁿ sàcán-ndó dñhúⁿ nùú cué téé cùchiuⁿ, te ducaⁿ chí Yá Ndiòxí ducaⁿ ní cachí-gá cundecu-güedé te diu-ná chiuⁿ ndeé-güedé ñùhú iní-güedé.

⁷ Te nacháhu-ndo nchàa sá tàù-ndó nùú nchàa ñáiyu tàù-ndó nùú-xi, te cuéi díhúⁿ

tàù-ndó cuèndá ñuhu-ndo nùú cué téé cùchiuⁿ àdi nágá díhúⁿ tàù-ndó nùú-güedé te nacháhu-ndo nùú-güedé. Te ío-gá canehe-ndo sá yíñuhu nùú nchàa ñáiyu cùnuu, te càháⁿ váha-ndo ndihí-yu.

⁸ Te vá dácuidò-ndó ndùu nacháhu-ndo sá tàù-ndó nùú tnàha ñáiyu-ndo, te cuu iní tnàhá-ndó ììⁿ ììⁿ-ndo. Te nùú ducaⁿ quide-ndo ndecu-ndo ña, te quide-ndo nchaa nacuaá càháⁿ tnùhu sá sánú ichi ñaha xii-o nacuaá cada-o cùndecu-o.

⁹ Te duha ndùu tnùhu càháⁿ Yá Ndiòxí cuèndá nchaa sá vá cúu càda-o: “Nchaa nchòhó cue téé vá càháⁿ ndihí-ndo ñáiyu díhí te nùú ñá díú ñàdihí-ndó cúu-yu, te ducaⁿ-ni nchàa nchòhó cue ñáiyu díhí tucu vá càháⁿ ndihí-ndo téé te nùú ñá díú yì-ndo cuu-güedé, te vá càhni-ndó tnàha ñáiyu-ndo, te vá dúhú-ndó sá ndécú ndihí-yu, te vá dácàcu-ndo cuéchi neñùu, te vá xihó-ndó sá ndécú ndihí tnaha ñáiyu-ndo”, nchaa xéhé càchí Yá Ndiòxí sá vá cúu càda-o. Te tnùhu-a quide-o ndihí nchaa dava-gá tnùhu sá sánú ichi ñaha xii-o nacuaá cada-o cùndecu-o, te nùú quide-o ingá tnùhu sá càchí-xi: “Cuu iní-ndó nchàa tnaha ñáiyu-ndo dàtná cúu iní-ndó mèe-ndo”, duha càháⁿ tnùhu-áⁿ. Te nchaa dava-gá quidé-ó te nùú quide-o nacuaá càháⁿ tnùhu-a.

¹⁰ Te nchaa ñáiyu cùu iní tnàha ñáiyu-xi te ñá túú quide úhú iní-yu tnàha ñáiyú-yu, te nùú ducaⁿ cùu iní-yu tnàha ñáiyú-yu te quidé-yu nacuaá càháⁿ tnùhu sá sánú ichi ñaha xii-o nacuaá cada-o cùndecu-o.

¹¹ Te ducaⁿ xini ñuhu-xi cada-ndo chí sa ní cutnùni iní-ndó nacuaá ta xica nduu cuahán ñuyú-á, te ní sáá nduu sá ío xini ñuhu-xi ndixi túu iní-ó càda-o nchaa nacuaá càháⁿ Yá Ndiòxí, chí vitna sa ní cuyatni-gá nduu nàcuaca ñaha Xitohó Jesucristú xii-o dácúúxi ndeé cùtnàhá ní sàndáá iní-ó tnùhu-gá.

¹² Te cada iní-ndó sá dàtná ììⁿ niú sá sá ta cuyatni tundaá, ducaⁿ sàtnahá-xi cùu ñuyú yíca cuéchi-a chí sa ta cuyatni nduu quixi tucu Xitohó Jesucristú, te nùú xiáⁿ xini ñuhu-xi dañ-a nchaa sá cuèhé sá dúhá te cada-o mèe-ni sá váha, te ducaⁿ te ni ììⁿ sá cuèhé sá dúhá vá cùnùu-xi taxi tnùni ñàhá-xi xii-o, te ducaⁿ te vá cúu-gá-ó dàtná ñáiyu ndècu nùú néé chí cuu-ná-ó dàtná ñáiyu ndècu nùú ditó.

¹³ Te cada-o nchàa nacuaá tàù-xi cunduu cundecu-o dàtná tàù-xi cada ñáiyu ndècu ichi Xitohó Jesucristú, te vá quihí-ó víco cuehé víco duha, te vá cúu-ó ñáiyu quihu, te ni vá càháⁿ ndihí-o ñáiyu díhí te nùú ñá díú ñàdihí-ó cúu-yu, te ducaⁿ-ni cué ñáiyu díhí tucu vá càháⁿ ndihí-yu téé te nùú ñá díú yí-yu cùu-güedé, te ni vá cùndècu-o ichi díí iní, te ni vá nàá-ó ndihí tnaha ñáiyu-o, te ni

vá cúu-ó ñáyiú cuédú íní.

¹⁴ Te vitna nchòhó ñàha-ndo mèe-ndo sá Xítóhó Jesucristú ná chìndee ñàha-gá xii-ndo càda váha-ndo cùndecu-ndo datná quidé mèe-gá ndécú-gá, te vá cání-gá íní-ndo càda-ndo datná ní xóo cada-ndo cùtnhá ní cunuú nchàa sá cuèhé sá dúhá íní-ndo.

14

Vá cuatnúhu tñaha-o nacuaa ndècu-o ichi Xítóhó Jesucristú

¹ Te núú ìñ ñáyiú ndècu ichi Xítóhó Jesucristú ñá túú tècú tñuní váha-yu nàcuáa cuiní Yá Ndiòxí cada-yu, te queheⁿ cuendá-ni-ndò-yu te vá ténáá tñhá-ndó ndíhí-yu.

² Chi íó ñáyiú sàni íní sá cúu váha íní Yá Ndiòxí sá cúu càxi-yu nání nihí-yu, te dava ñáyiú ñá túú cùtnuní váha íní-yu nàcuáa càháⁿ Yá Ndiòxí te mee-ni yúcú xéxi-yu.

³ Te ñáyiú xéxi nchaa núú sá nihí-yu te vá dáquèe tìhú-yu ñáyiú ñá túú xéxi, te ducaⁿ-ni ñáyiú ducaⁿ ñá túú xéxi-áⁿ vá cuatnúhú-yu nchaa ñáyiú ducaⁿ xéxi nchaa núú sá nihí-xi-áⁿ, chi tñhá ñáyiú ducaⁿ xéxi nchaa núú sá nihí-xi-áⁿ quèhéⁿ cuendá ñáhá Yá Ndiòxí xii-yu.

⁴ Te ñá túú ndècu ndíhi-o tñúhu ndee íní cuatnúhu-o ñáyiú xinu cuechi, chi mee ñáyiú cùu patródⁿ-yu tàú-yu cáháⁿ-yu te núú cundáá ñáyiú xinu cuechi núú-yu àdi ñá túú cundáá-yu. Te ducaⁿ sãtnahá-xi cùu ñáyiú xinu cuechi núú Yá Ndiòxí, chi mee-gá cáháⁿ-gá te núú nása quidé-yu, te ñiú-ni mee-gá cada te cundáá-yu cundecú-yu núú-gá.

⁵ Te na càchí tñúhu tucu-í xii-ndo sá íó ñáyiú càchí sá íó dava nduu ío càhu cuu-xi, te ío tucu dava ñáyiú càchí-yu sá ìñ-ni cuu-xi nchaa-ni nduu, te xini ñuhu-xi sá cùtnuní ndáá íní-yu sá ndáá cúu-xí nàcuáa càháⁿ-yu ìñ ìñ-yu.

⁶ Te ñáyiú cánehe íí dava nduu quidé-yu sá nêhé-yu sá yíñúhu núú Yá Ndiòxí, te ñáyiú càchí sá ìñ-ni cùu-xi nchaa-ni nduu quidé-yu sá nêhé-yu sá yíñúhu núú Yá Ndiòxí tñhá-yu. Te ñiú-ni ducaⁿ sãtnahá-xi cùu nchaa ñáyiú xéxi nchaa nání nihí-yu, chi quidé-yu sá nêhé-yu sá yíñúhu núú Yá Ndiòxí, chi ndácáⁿ tãhú-yu núú-gá cuendá nchaa sá nihí-yu. Te ñiú-ni ducaⁿ sãtnahá-xi cùu nchaa ñáyiú ñá túú xéxi nchaa núú sá nchító-ó chi quidé-yu sá nêhé-yu sá yíñúhu núú Yá Ndiòxí, te ndácáⁿ tãhú-yu núú-gá cuendá nchaa sá nihí-yu.

⁷ Te nchoo cuéi vitna ndècu vívú-ó àdi cuéi na cúu-ó dico ñá ñá cuendá mée-ó cúu-ó.

⁸ Chi vitna ndècu vívú-ó te ndècu-o sá cúu-xí Xítóhó Jesucristú àdi cuéi na cúu-ó dico cuú-ó ñiú-ni sá cúu-xí-gá, núú xiáⁿ cuéi

vitna ndècu vívú-ó àdi cuéi na cúu-ó dico ñiú-ni Xítóhó Jesucristú cúu cuendá ñáhá-gá xii-o.

⁹ Chi Xítóhó Jesucristú ní xihí-gá te ní ndoto-gá, te vitna cùu-gá Xítóhó nchaa ñáyiú, cuéi ñáyiú xíndecu vívú te cuéi ñáyiú ní xihí.

¹⁰ Te nchòhó, ñá túú nduu váha-xi cuatnúhu tñhá-ndo nacuaa ndècu-ndo ichi Xítóhó Jesucristú, te ní ñá túú nduu váha-xi daquèe tìhú tñhá-ndó, chi nchaa-o sáa nduu cùndecu-o núú Xítóhó Jesucristú, te mee-gá càchí-gá te núú ní quide ndáá-ó àdi ñá túú ní quide ndáá-ó.

¹¹ Te Yá Ndiòxí càchí-gá núú tütú-gá:

Yúhú Yá Ndiòxí ndécú-í càchí tñúhu ndáá-í xii-ndo sá nchaa ñáyiú ngüñí xití-yu núú-í,

te nchaa-yu cáháⁿ-yu sá yúhú cúu-í Ndiòxí.

Duha càchí Yá Ndiòxí núú tütú-gá.

¹² Núú xiáⁿ nchaa-o ndí ñiú nàcani tñúhu-o núú Yá Ndiòxí nchaa sá ní quide-o.

Vá dácuíta nihnu tñaha-o

¹³ Núú xiáⁿ vá cuatnúhu tñaha-gá-ndó, te cada yica-ndo càda-ndo mee-ni sá váha, te vá cáda-ndó ìñ sá ñá túú tàú-ndó càda-ndo cuendá sá vá cuíta nihnu dava ñáyiú ndècu ndíhi-ndo ichi Xítóhó Jesucristú.

¹⁴ Te yúhú ndécú ndíhi-í Xítóhó Jesucristú te cùtnuní ndáá íní-í sá nchaa núú sá cúu càxi-o cuu-ni caxi-o te vá cúu cuèchi. Te ñáyiú sàni íní sá vá cúu càxi-yu te núú na càxi-yu te cuu cuèchi xii-yu.

¹⁵ Te nchòhó, te núú cuendá sá xéxi-ndó nchaa núú sá cúu càxi-ndo, cuendá xiáⁿ ñá túú-gá cúu váha íní nchaa ñáyiú ndècu ndíhi-ndo ichi Xítóhó Jesucristú, te ñá túú-gá quidé-ndó sá cúu íní ndisa-ndò-yu te núú ducaⁿ na càda-ndo, te núú ìñ sá sání íní-ndó càxi-ndo te cùtnuní íní-ndó sá xiáⁿ cada-xi cuíta nihnu ñáyiú ndècu ndíhi-ndo ichi Xítóhó Jesucristú te vá càxi-ndó xiáⁿ te núú ducaⁿ, chi Xítóhó Jesucristú ní xihí-gá cuendá-yu.

¹⁶ Te núú ìñ sá quidé-ndó sàni íní-ndó sá cúu-xí ìñ sá váha, te ñáyiú càchí-yu sá ñá túú váha te vá cáda-ndó cuendá sá vá càháⁿ cuèhé-yu cuendá-ndó.

¹⁷ Te sá yíndáha ñaha Yá Ndiòxí xii-o xiáⁿ ío xini ñuhu-xi cada ndáá-ó cùndecu-o, te cundecu váha ndíhi tñaha-o, te cudíi íní-ó cùndecu-o chi Espiritú-gá ndécú ndíhi ñaha-xi xii-o, te nchaa xéhé ío-gá cùnuú dacúxí sá cóhó sá càxi-ó.

¹⁸ Te nchaa ñáyiú ducaⁿ quide nchaa sá ío-gá xini ñuhu-xi, xinu cuechí-yu núú Xítóhó Jesucristú, te sá dúcáⁿ quidé-yu te nduu vétú íní Yá Ndiòxí, te cudíu-yu núú ñáyiú.

19 Te nchoo chí ná ndùcu-o nacuaá cada-o cùndecu ndíhi váha ñàha-o, te nducu tùcu-o nacuaá cada-o chindee tnúhu ñàha-o nacuaá cuíta cundáá-gá-ó núú Xitohó Jesucristú quíhíⁿ.

20 Te ñá díú sá cuendá ìⁿ núú sá xéxí-ó, te dàquee tñú-ó sá váha ní quide ñaha Yá Ndióxi xii ñàha ñáiyu-o. Te na càchí tnúhu ndáá-í xii-ndo sá ncháá-ní núú sá cúú càxi-o, te dicó-ni sá ñá túú ndúu váha-xi núú sá cuendá-ni sá càxi-ó ìⁿ núú sá cúú càxi-o cuíta nihnu ìⁿ ñàha ñáiyu-o.

21 Te váha-gá sá vâ càxi-ó cùñú te vâ cohó ndidí, te ní ñá túú nágá cada-o te núu xito-o sá xiáⁿ cada te ngúita ñàha ñáiyu-o cádá-yu sá ñá túú váha, àdi xito-o sá xiáⁿ cada te ngúita-yu caní ìⁿ caní úú iní-yu cundecú-yu ichi Xitohó Jesucristú, te vâ cundáá-gá-yu núú-gá te núu ducaⁿ na càda-o.

22 Te núu ìⁿ sá váha sàni iní-ó càda-o, te vâ dátúu-o núú ñáiyu chí mee-ni núú Yá Ndióxi dátúu-o. Te nchoo cùu-o ñáiyu ío váha táhú-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñá díú ìⁿ cuéchi cùu-xi sá quidé-ó.

23 Te núu nchoo sàni iní-ó sá quidé váha-o àdi ñá túú quide váha-o òrè xéxí-ó ìⁿ núú sá xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chí ñá túú ìⁿ-ní sá sàni iní-ó, chí nchaa núú sá quidé-ó sàni ìⁿ sàni úú iní-ó núu váha-ni àdi ñá túú váha-ni, te cuu cuéchi xii-o sá dúcáⁿ quide-o.

15

Cada-o sá váha sá cúú-xi ñàha ñáiyu-o

1 Te nchoo ñáiyu ío váha sàndáá iní ñàhá xii Xitohó Jesucristú, xini ñuhu-xi cuáñaha-o tnúhu ndee iní xii ñáiyu ñá túú nihí ndéé cùndecu ichi-gá, te vâ cádá-ó mèe-ni sá cúú-xi mèe-o.

2 Te cada-o sá váha nàcuáa cuu váha iní ñàha ñáiyu-o cuendá cuu-xi sá váha sá cúú-xi-yu, te ducaⁿ cuíta nihí ndéé-gá-yu quindáá iní-yu Xitohó Jesucristú.

3 Te Xitohó Jesucristú ñá túú ní quide-gá mee-ni sá cúú váha iní méé-gá, te ní quee ndáá-xi nàcuáa càháⁿ-xi núú tùtú Yá Ndióxi nàcuáa ní xáhaⁿ Xitohó Jesucristú xii-gá, te càchí-xi: “Nchaa ñáiyu cùu úhú iní ñàhá xii-n ní xicuehè ní xiduha ñàhá-yu xii-í”, duha càháⁿ-xi núú tùtú Yá Ndióxi nàcuáa ní xáhaⁿ Xitohó Jesucristú xii-gá.

4 Te ndéé sanaha ní ngúndéé nchaa tnúhu Yá Ndióxi núú tùtú-gá, te ducaⁿ ní ngúndéé cuendá dacuàha-o, te tnúhu-án dánhé ñàhá-xi cùnduu cahnu iní-ó cuéi nándi nà yáha-o cùndecu-o ichi-gá, te sá xii tnúhu-án te vâ ndíhú-gá iní-ó cùndecu-o, te díu-ni sá xii tnúhu-án cundecu ndíhi-o tnúhu ndee iní.

5 Te Yá Ndióxi quidé-gá ndécú ndíhi-o tnúhu cahnu iní, te díu-ni-gá quidé-gá ñá

túú ndíhú iní-ó ndècu-o. Te xicáⁿ táhú-í núú-gá sá díú-gá ná cádá te cuu ìⁿnuu-ndo cùndecu-ndo datná ní quide mee Xitohó Jesucristú cùtnáhá ní xindecu-gá ñuyúú-a.

6 Te ducaⁿ ncháa-ndo cuu ìⁿnuu-ndo, te danihí ñàhá-ndó yócó táchí-ndó te cachí-ndó sá ío càhnu cuu Yá Ndióxi Yáá cúú Tátá Xitohó Jesucristú.

Ñáiyu ñá túú cùu ñáiyu isráel ní nñí-yu tnúhu Xitohó Jesucristú

7 Te núu xiáⁿ chí quéheⁿ cuendá ñàhá dàtná ní quide Xitohó Jesucristú ní queheⁿ cuendá ñàhá-gá xii-o, te núu ducaⁿ na càda-ndo te ío cuu càhnu Yá Ndióxi.

8 Te na càchí tnúhu-í xii-ndo sá Xitohó Jesucristú ní quixi-gá ní quide-gá sá váha sá cúú-xi ñáiyu isráel, te sá dúcáⁿ ní quide-gá xiáⁿ cùtnuní ndáá iní-ó sá Yá Ndióxi quidé-gá ìⁿ sá càháⁿ-gá, chí Xitohó Jesucristú ní quide-gá nchaa nàcuáa ní xáhaⁿ Yá Ndióxi xii cue ñani ñàhá-ó ní xindecu ndéé sanaha.

9 Te ducaⁿ ní quide Xitohó Jesucristú sá váha sá cúú-xi ñáiyu isráel cuendá nchaa ñáiyu ñá túú cùu ñáiyu isráel cachí-yu sá ío càhnu cuu Yá Ndióxi, te ducaⁿ quèshahá-yu chí ío cùndahú iní ñàhá-gá chùndèe ñaha-gá xii-yu, te quee ndáá-xi nàcuáa càháⁿ-xi núú tùtú Yá Ndióxi núú càchí-xi:

Yúhú cachí-í sá ío càhnu cuu-n núú ncháa ñáiyu ñá túú cùu ñáiyu isráel, te cata-í ndudú chíñuhu ñaha-í xii-n.

Duha càchí-xi núú tùtú-gá:

10 Te càchí tucu-xi núú tùtú-gá:
Te nchòhò ñáiyu ñá túú cùu ñáiyu isráel ío chí cùdí iní ndíhi ñáiyu isráel ñáiyu ndècu ndíhi-í.

Duha càchí-xi núú tùtú-gá:
11 Te càchí tucu-xi ingá xichi núú tùtú-gá:
Nchaa nchòhò ñáiyu ñá túú cùu ñáiyu isráel chí càháⁿ sá ío càhnu cuu Yá Ndióxi,

te nchaa ñáiyu na càháⁿ-yu sá ío càhnu cuu-gá.
Duha càchí-xi núú tùtú-gá.

12 Te ndí Chàíá càchí tucu ndí núú tùtú Yá Ndióxi:

Coo ìⁿ ñani ñàhá ndí Isàí téé ní xindecu ndéé sanaha,

te téé-án taxi tñuní-dé cue ñáiyu ñá túú cùu ñáiyu isráel,

te ñáiyu-án cundee cùu cahnu iní ñàhá-yu xii-dé.

Duha ní càháⁿ ndí Chàíá càchí-xi núú tùtú-gá.

13 Te xicáⁿ táhú-í núú Yá Ndióxi Yáá ní taxi tnúhu ndee iní ndécú ndíhi-o sá méé-gá ná càda ío cùdí iní-ndó cùndecu-ndo, te ducaⁿ ío váha cundecu iní-ndó núú-gá chí sàndáá iní-ndó-gá, te ducaⁿ Espiritú-gá ná càda te uuⁿ-gá uuⁿ-gá cuíta ngúndecu ndíhi-ndo tnúhu ndee iní quíhíⁿ sá cádá váha ñaha-gá xii-ndo.

14 Te nchòhò ñáiyu ndècu ndìhí-í ichi Xítóhó Jesucristú cùtnuní ndáá iní-í sá nchòhó ío váha iní-ndó, te ducaⁿ ío váha cùtnuní iní-ndó nchàa tnúhu váha, te ducaⁿ ío dásahú tnáhá-ndó nàcuáa cundecu-ndo.

15 Te dava tnúhu ní chídó tnùn-í núú tütú-a cùu-xi tnúhu sá ío càháⁿ-í dóho-ndo, te ducaⁿ ní tee-í cuèndá sá nchòhó dandàcu iní-ndó tnúhu-án, te ní tee-í chi Yá Ndióxi ní cundàhú iní ñáhá-gá xii-í ní taxi-gá chiuⁿ quide-í

16 xínú cuèchi-í núú Xítóhó Jesucristú càháⁿ-í tnúhu-gá núú ñáiyu ñá tütú cùu ñáiyu isràél. Te tnúhu-án cùú-xí tnúhu sá sánú ichi ñaha xii-o nacuáa naníhí tànhú-ó, te ducaⁿ dānehé-í ñáiyu ñá tütú cùu ñáiyu isràél tnúhu Yá Ndióxi cuèndá cuú-yu dàtná ìⁿ sá ndúú tànhú-gá, te Espiritú-gá quidé-xí cùu-yu ñáiyu cùdiu núú-gá, te cùu váha iní ñáhá-gá xii-yu.

17 Te ío váha cùu iní-í cuèndá nchaa chiuⁿ quide-í sá cùú-xí Yá Ndióxi, chi Xítóhó Jesucristú ndécú ndìhí ñaha-gá xii-í.

18 Te mee-ni nàcuáa quide Xítóhó Jesucristú chindèe ñaha-gá xii-í xiáⁿ-ni càháⁿ-í, te sá dúcáⁿ quide-gá xiáⁿ ní sándáá iní cue ñáiyu ñá tütú cùu ñáiyu isràél tnúhu-gá. Te ducaⁿ chí ní chindèe ñaha-gá xii-í ní càháⁿ-í tnúhu-gá te ducaⁿ-ni ní chindèe ñaha-gá xii-í ní quide-í titní núú sá ní quide-í núu-yu ní xiní-yu.

19 Te Espiritú Yá Ndióxi ní quide-xi ní quide-í titní núú sá vā yōo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáháⁿ-í ní càháⁿ-í tnúhu Xítóhó Jesucristú núú ñáiyu cuèi ndéé ñuú Jerusálén, te cuèi ndéé distritú Ilíricu, núu nchaa ñuú-án ní sáháⁿ-í ní càháⁿ-í núu-yu tnúhu sá càháⁿ nàcuáa naníhí tànhú-ó.

20 Te ducaⁿ ío ndècu ndee-í càháⁿ-í tnúhu sá càháⁿ nàcuáa naníhí tànhú-ó núú vátá ñhí-gá-yu tnúhu cuèndá Xítóhó Jesucristú, te ducaⁿ quide-í chi ñá tütú cuini-í quíhíⁿ-í càháⁿ-í tnúhu-gá núú sá xindecu ñáiyu càháⁿ tnúhu-gá.

21 Te quide-í nàcuáa càháⁿ-xi núú tütú Yá Ndióxi núú càchí-xi:

Ñáiyu vátá ñhí-gá tnúhu cuèndá Yaá quixi ñuyíú te ñhí-yu,

te ducaⁿ tècu tnùn-í-yu tnúhu-gá.

Duha càchí-xi núú tütú-gá.

Té Páblú cuini-dé quíhíⁿ-dé ñuú Rómá

22 Te sá dúcáⁿ càháⁿ-í tnúhu-gá núu xiáⁿ ñá tütú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í.

23 Te ní cuu titní cuía ducaⁿ-ni sàni iní-í quixi coto ñaha-í xii-ndo, te vitna ní ndìhí-í nchaa iha ní càháⁿ-í tnúhu Xítóhó Jesucristú núú nchàa ñáiyu.

24 Núu xiáⁿ sàni iní-í sá ndùu ná quíhíⁿ-í nàcióⁿ Èspaña te yáha càháⁿ-í quini-í nása ndècu-ndo, te dává-án ío cudíí iní-ó cùndecu tnaa-o, te ducaⁿ te òrè nucúhuⁿ tucu-í ichi te cada ndee iní-ndó chindèe ñaha-ndo xii-í.

25 Te vitna quíhíⁿ-í ñuú Jerusálén quínehe-í sá ndúú tànhú ñáiyu ndècu ichi Xítóhó Jesucristú xindecu yácaⁿ.

26 Te ñáiyu xindecu ichi Xítóhó Jesucristú ndécú distritú Macedoniá, ndìhí distritú Acáyá ní cuu ìⁿ núu-yu ní sacáⁿ tnáhá-yu sá ndúú tànhú ñáiyu ndàhú xindecu ichi-gá ndécú ñuú Jerusálén.

27 Te ducaⁿ tnàhí ní cudíí iní-yu cadá-yu, te ducaⁿ tnàhí tày-yu cadá-yu chindèe-yu ñáiyu xindecu ñuú Jerusálén. Te ñáiyu Macedoniá ndìhí ñáiyu Acáyá-án ñá tütú cùu-yu ñáiyu isràél. Te ñáiyu xindecu ñuú Jerusálén cùu-yu mee-ni ñáiyu isràél, te ducaⁿ tày-yu cadá-yu chí sá cuèndá ñáiyu isràél-án ní ñhí-yu tnúhu sá càháⁿ nàcuáa naníhí tànhú-yu, núu xiáⁿ tày-yu chindèe ñáhá-yu ndìhí nchaa sá ñhí-yu.

28 Te sátá ná yáha quínguáha cuèndá-í-yu sá ndúú tànhú-yu, te ducaⁿ te dàtnuní quee-í quíhíⁿ-í nàcióⁿ Èspaña, te ichi yáha-í yáha càháⁿ-í núú ndécú-ndó.

29 Te cùtnuní ndáá iní-í sá òrè ná quèxio-í núú ndécú-ndó, te Xítóhó Jesucristú ío chindèe ñaha-gá xii-í càháⁿ-í tnúhu-gá núu-ndó nàcuáa ío váha cundecu-ndo ichi-gá.

30 Te nchòhó ñáiyu ndècu ndìhí-í ichi Xítóhó Jesucristú càháⁿ ndàhú-í núu-ndó sá ío chindèe ñaha-ndo xii-í càháⁿ ndìhí-o Yá Ndióxi cuèndá-í, te ducaⁿ càda-ndo chí ndècu ndìhí-ndo Xítóhó Jesucristú. Te Espiritú Yá Ndióxi quidé-xí cùu iní tnáhá-ó ìⁿ ìⁿ-o.

31 Te ío chí càcáⁿ tànhú núú Yá Ndióxi sá ná còto ñaha-gá xii-í, te ñá tütú ná cada ñaha nchàa ñáiyu ñá tütú sándáá iní ñáhá xii-gá xindecu distritú Júdeá. Te càcáⁿ tànhú tucu-ndo núu-gá sá ncháá sá cānehē-í quíhíⁿ nduu tànhú ñáiyu ndècu ichi-gá ndécú ñuú Jerusálén ío váha cuu iní-yu queheⁿ cuèndá-yu.

32 Te ducaⁿ càda-ndo cuèndá sá núu Yá Ndióxi ná càchí-gá te ío cudíí iní-í òrè quèxio-í núú ndécú-ndó, te ío váha cuu iní-í cundecu ndìhí ñaha tñá xii-ndo.

33 Te vitna xicáⁿ tànhú-í núú Yá Ndióxi Yaá quidé ío váha cùu iní-ó ndècu-o sá ná chindèe chitúu ñaha-gá xii-ndo nchàa-ndo. Te ducaⁿ na cūnduu.

16

Té Páblú quidé ndèe iní-dé ñáiyu ndècu ñuú Rómá

1 Te yuhú tendaha-í tá Fèbé quixi-xi núú ndécú-ndó, te tnáhá-xi ndècu-xi ichi Xítóhó

Jesucristú, te quide-xi chiun Yá Ndiöxí sá cúu-xí ñáyi ndècu ichi Xítoho Jesucristú xíndecu ñúú Cèncreá.

² Te cuini-í sá io váha cuu ini-ndó quèheⁿ cuendá-ndó-xí, chi ndècu ndihi-xi Xítoho Jesucristú, te cada-ndo nàcuáa tàú-xi cunduu dàtná tàú-xi cada ñáyi ndècu ichi-gá, te io chindee-ndo-xi te núu ná cúú sá xini ñúhu-xi, chi tnàhá-xi io chindee-xi cue ñáyi ndècu ichi Xítoho Jesucristú, te tnàhá yúhú ducaⁿ io chindee-xi.

³ Te cúñaha-ndo io na càda ndee ini té Àquilú ndihi ñadihi-dé tá Priscilá, chi ñáyi-áⁿ ní quide chiun-í ndihi-yu ní quide-ndí chiun Xítoho Jesucristú.

⁴ Chi mèe-yu ní cácu cuu-yu sá cuendá sá ní dácácu ñàhá-yu xii-í sá ní yáha-í, núu xiáⁿ io ndácáⁿ tãhú-í núu-yu, te ñá díú-ní yúhú ducaⁿ io ndácáⁿ tãhú-í núu-yu chi tnàhá nchaa ñáyi ñá túú cùu ñáyi isràél xíndecu ichi-gá xíndecu nchaa xichi ducaⁿ io ndácáⁿ tãhú-yu núú té Àquilú ndihi núú ñadihi-dé tá Priscilá.

⁵ Te cúñaha tùcu-ndo sá io na càda ndee ini nchaa ñáyi xíndecu ichi Xítoho Jesucristú tàcá vehe té Àquilú ndihi tá Priscilá dácua^há-yu tnúhu-gá, te cúñaha tùcu-ndo sá io na càda ndee ini té Epènetú chi tnàhá-dé io ñúhu ini-í-dé, chi téé-áⁿ cúú-dé téé díhna nuu ní sándáá ini tnúhu Xítoho Jesucristú distritú Acáyá.

⁶ Te cúñaha tùcu-ndo sá io na càda ndee ini tá Màriá xichi ndécú ndihi-ndo, xichi io ndècu ndee xinu cuechi núú Xítoho Jesucristú.

⁷ Te cúñaha tùcu-ndo sá io na càda ndee ini cue téé cùu ndi mee-í té Andrónicú ndihi té Júnias, chi tnàhá-güedé ní xihí ndihi ñaha-güedé xii-í vecaá, te io cùdiu-güedé núu nchaa cue téé ní táuchíuⁿ Jesús càháⁿ tnúhu-gá. Te díhna-gá-güedé ní sándáá ini-güedé tnúhu Xítoho Jesucristú dácúúxí yúhú.

⁸ Te cúñaha-ndo sá ná càda ndee ini té Àmpliás chi tnàhá-dé io ñúhu ini-í-dé, te ndècu-dé tnàhá-dé ichi Xítoho Jesucristú.

⁹ Te cúñaha tùcu-ndo xii té Bánú té cündihi ñaha xii-o quide-o chiun Xítoho Jesucristú sá ná càda ndee ini-dé, te cúñaha tùcu-ndo xii té Èstaquís sá ná càda ndee ini-dé chi tnàhá-dé io ñúhu ini-í-dé.

¹⁰ Te cúñaha tùcu-ndo xii té Àpelés sá io na càda ndee ini-dé, chi téé-áⁿ io váha cündáá-dé núú Xítoho Jesucristú, te cúñaha tùcu-ndo xii ñáyi xíndecu vehe té Aristóbúl sá io na càda ndee ini-yu.

¹¹ Te cúñaha-ndo xii té Herodión téé cùu ndi mee-í sá io na càda ndee ini-dé, te cúñaha-ndo xii ñáyi ndècu ichi Xítoho Jesucristú xíndecu vehe té Nàrcisú sá io na càda ndee ini-yu.

¹² Te cúñaha-ndo xii tnàhá tá Trifená ndihi tá Trifosá sá io na càda ndee ini-yu, chi tnàhá-yu quidè-yu chiun Xítoho Jesucristú. Te tnàhá tá Pèrsidá xichi ndécú ndihi-o ichi Xítoho Jesucristú cúñaha-ndo xii-xi sá io na càda ndee ini-xi, chi tnàhá-xi io ndècu ndee-xi quide-xi chiun Xítoho Jesucristú.

¹³ Te cúñaha-ndo tnàhá té Rùfú téé io váha sándáá ini tnúhu Xítoho Jesucristú sá io na càda ndee ini-dé ndihi náná-dé, chi ñaha-áⁿ quidè ini-í sá cúú-áⁿ dàtná náná-í.

¹⁴ Te cúñaha-ndo sá io na càda ndee ini té Àsincritú, ndihi té Flègonté, ndihi té Hèrmás, ndihi té Pàtrobás, ndihi té Hèrmés, ndihi nchaa daga-gá cue ñáyi ndècu ndihi-o ichi Xítoho Jesucristú xíndecu ndihi-güedé.

¹⁵ Te cúñaha tùcu-ndo sá io na càda ndee ini té Filológó, ndihi tá Júliá, ndihi té Nèréú, ndihi cùha té Nèréú, ndihi tá Òlimpás, ndihi nchaa daga-gá ñáyi sándáá ini tnúhu Xítoho Jesucristú xíndecu ndihi-yu.

¹⁶ Te io yíñúhu cada ndee ini tnàhá-ndó ñⁿ ñⁿ-ndo. Te nchaa ñáyi tàcá nchaa iha dácua^hha tnúhu Xítoho Jesucristú quidè ndèe ini ñàhá-yu xii-ndo.

¹⁷ Te nchòhó ñáyi ndècu ndihi-í ichi Xítoho Jesucristú càháⁿ-í dóho-ndo sá càdá cuendá-ndó núu io ñáyi quide nacuaá vá cúú ñⁿmuu-ndo cundecu-ndo, chi ñáyi-áⁿ sánú ichi ñàhá-yu ñⁿ ichi ñá túú vãha, chi ñá túú ñⁿ-ni cuu-xi tnúhu càháⁿ-yu ndihi tnúhu sá ní nihi-ndó ndècu ndihi-ndo, te ñáyi ducaⁿ xíquide vá nihi tnàhá-gã-ndó ndihi-yu.

¹⁸ Chi ñáyi-áⁿ ñá túú quidè-yu chiun sá cúú-xí Xítoho Jesucristú, chi mee-ni sá cúú-xí mèe-yu quidè-yu, te mee-ni nchaa tnúhu sá io vii io váha cuáháⁿ càháⁿ-yu óré cuáháⁿ-yu dándahú-yu nchaa ñáyi io yáchí sándáá ini-xi ñⁿ tnúhu.

¹⁹ Te nchaa ñáyi nihi-yu tnúhu sá nchòhó sándáá ini-ndó tnúhu Xítoho Jesucristú, núu xiáⁿ io cùdíí ini-í. Te cuini-í sá nchòhó io váha cutnúni ini-ndó nàcuáa cada-ndo mèe-ni sá vãha, te vá cáni ini-ndó càda-ndo datná xíquide nchaa ñáyi ndècu ichi cuehé ichi duha.

²⁰ Te Yá Ndiöxí Yaá quidè io váha cùu ini-ó ndècu-o io ndihi cada-gá cuendá sá sàcúíhná ñá túú-gá ná cada ñaha-xi xii-ndo, te xicáⁿ tãhú-í núú Xítoho Jesucristú sá io na chindee chítúu ñaha-gá xii-ndo.

²¹ Te té Timùtéú téé quide ndihi-í chiun Xítoho Jesucristú iha quide ndee ini ñàhá-dé xii-ndo, te tnàhá té Lúciú, ndihi té Jásón, ndihi té Sosipàter cue téé cùu ndi mee-í quidè ndèe ini ñàhá-güedé xii-ndo.

²² Te tnàhá yúhú té Tèrciú téé càdúha tutú-a cuendá té Pãblú quidè ndèe ini ñàhá-í xii-ndo, chi ñⁿ-ni cùu-o ndihi Xítoho Jesucristú.

²³ Te tnàhá té Gǎyú téé dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítóhó Jesucristú. Te tnàhá té Èrastú téé yindahá díhúⁿ ñùú quidé ndèe iní ñáhá-dě xii-ndo, te tnàhá té Cuártú téé ndècu ndihí-o ichi Xítóhó Jesucristú quidé ndèe iní ñáhá-dě xii-ndo.

²⁴ Te xicáⁿ táhù-í núú Xítóhó Jesucristú sá ïo na chindee chitúu ñaha-gǎ xii-ndo nchàa-ndo. Te ducaⁿ na cùnduu.

Càháⁿ-ó sǎ ïo càhnu cuu Yá Ndiǒxí

²⁵ Te vitna chí ná càchí-ó sǎ ïo càhnu cuu Yá Ndiǒxí, chí mee-gǎ cada te ío-gǎ cuita níhí ndéé-gǎ-ndó cùndecu-ndo ichi Xítóhó Jesucristú dàtná càchí tnúhu sǎ càháⁿ nàcuáa naníhí tàhù-ó, tnúhu sǎ dánèhé-í ñáyiú cuèndá Xítóhó Jesucristú, te nchaa tnúhu-a ìⁿ-ni cùu-xi ndihí nchaa tnúhu sǎ ñí cachí Yá Ndiǒxí cuu yuhu ndéé cùtnàhá ní ngáva ñuyíú, te vitna ní quee túu-xi,

²⁶ chí mee Yá Ndiǒxí ní dátúu-gǎ núú-ó vitna, te càháⁿ-ndí nàcuáa ní chídó tnùní cue téé ní xóo càháⁿ tnúhu Yá Ndiǒxí ndéé sanaha. Te ducaⁿ tnúhu sǎ ndúú yùhu ní cuu ta xité nuu-xi nihí ñuyíú cuáháⁿ, chí ducaⁿ ní cachí Yá Ndiǒxí Yaá ndécú nchàa nduu nchaa quiú cunduu cuèndá sǎ quíndáá iní ñáhá ñáyiú xi-gǎ, te tní-yu nchaa tnúhu càháⁿ-gǎ.

²⁷ ;Te ìⁿ-ni Yá Ndiǒxí cúu-gǎ Yaá ío sàá sǎ xini tnùní-xi! ;Te nchaa-o chí ná càchí-ó sǎ ïo càhnu cuu-gǎ, chí ndècu ndihí-o Xítóhó Jesucristú, te ducaⁿ-ni càda-o ní caa ní quíhíⁿ! Te ducaⁿ na cùnduu. Te ío chí cáda ndèe iní-nǎ vitna.

TUTÚ DÍHNA NUU NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ CÒRINTÚ

Té Páblú cadúha-dé tutú quihiⁿ ndaha ñáyiu xĩndecu ichi Xítohó Jesucristú ndécú ñúú Còrintú

¹ Yúhú té Páblú ní cáháⁿ ñáhá Yá Ndióxi xii-í cuendá sá cáháⁿ-í tnúhu Xítohó Jesucristú núú ñáyiu, chi ducaⁿ ní cachí Yá Ndióxi cunduu. Te cadúha-í tutú-a ndihi té Sòstenés tée ndècu ndihi-o ichi Xítohó Jesucristú

² Cuendá daquixi-í ndaha nchòhó ñáyiu xĩndecu ichi Yá Ndióxi ndécú ñúú Còrintú, chi nchòhó cúu-ndó ñáyiu cùu cuendá Yá Ndióxi cuendá sá ndécú ndihi-ndo Xítohó Jesucristú. Te ñu-ndó cùu-ndo ñáyiu ní cáháⁿ ñáhá Yá Ndióxi cuendá cundecu yĩñùhu-ndo núú-gá, ndihi nchaa dava-gá ñáyiu ndècu nchaa xichi, ñáyiu cächí sá ïo càhnu cuu Xítohó Jesucristú. Te Yaá-áⁿ cúu-gá Xítohó-yu, te ñu-ndó cúu-gá Xítohó nchoo tùcu.

³ Te xicáⁿ tànhú-í núú Tàtá-ó Dütú Ndióxi ndihi núú Xítohó Jesucristú sá ndi nduú-gá ïo na chĩndee chitúu ñaha-gá xii-ndo, te ïo váha cuu iní-ndó cundecu-ndo.

Yá Ndióxi ïo chĩndee ñaha-gá xii-o cuendá sá ndécú-o ndihi Xítohó Jesucristú

⁴ Te ducaⁿ-ni ïo ndácáⁿ tànhú-í núú Yá Ndióxi cuendá-ndó, chi mee-gá ïo chĩndee chitúu ñaha-gá xii-ndo sá cuendá Xítohó Jesucristú.

⁵ Te cuendá sá ndécú-ndó ndihi Xítohó Jesucristú, núu xiáⁿ Yá Ndióxi ïo chĩndee ñaha-gá xii-ndo sáa díquí-ndó nàcuáa cáháⁿ-ndó, ndihi nàcuáa cùtnuní iní-ndó,

⁶ chi tnúhu sá ní ñihí-ndó cuendá Xítohó Jesucristú ní quée-xi iní-ndó.

⁷ Te xiáⁿ núu nchaa sá váha ñá túú tnàhí cùmání xii-ndo chi Yá Ndióxi ïo chĩndee ñaha-gá. Te ducaⁿ quide-gá ñini nchòhó ní yùhu ní iní-ndó ndètu-ndo sáa nduu quixi tucu Xítohó Jesucristú.

⁸ Te Yá Ndióxi ducaⁿ-ni ïo chĩndee ñaha-gá xii-ndo cuendá sá vá yòo teñaha cuéchi nduu na quixi tucu Xítohó Jesucristú.

⁹ Te nchaa sá cáháⁿ Yá Ndióxi dacuití quide-gá, te ñu-ndó cúu-gá Yaá ní cáháⁿ ñáhá xii-ndo cuendá cuu ñu-ndó ndihi Déhe-gá Xítohó Jesucristú Yaá cúu Xítohó-ó.

Ñá túú cùu ñu-ndó ñáyiu ndècu ichi Xítohó Jesucristú

¹⁰ Te nchòhó ñáyiu ndècu ndihi-í ichi Xítohó Jesucristú cáháⁿ-í dóho-ndo sá vá

ndi díⁿ càni iní-ndó, te ïo cuu ñu-ndó cundecu-ndo, te ñu-ndó càni iní-ndó, te ñu-ndó càda-ndo chi ducaⁿ cuini-gá cunduu.

¹¹ Te duha cáháⁿ-í dóho nchòhó ñáyiu ndècu ndihi-í ichi Xítohó Jesucristú, chi cue ñáyiu vehe té Clòe ní cachí tnúhu-yu xii-í sá ñá túú cùu ñu-ndó ndècu-ndo.

¹² Te duha nduu tnúhu ní ñihí-í nàcuáa cùu ndècu-ndo, chi dava-ndo cächí-ndó: “Yúhú cùu-í cuendá té Páblú.” Te dava-ndo cächí-ndó: “Yúhú cùu-í cuendá té Àpolós.” Te dava-ndo cächí-ndó: “Yúhú cùu-í cuendá té Pèlú.” Te dava tucu-ndo cächí-ndó: “Yúhú cùu-í cuendá Xítohó Jesucristú”, duha cächí-ndó.

¹³ Te vá dúcáⁿ cáháⁿ-ndó chi ñá túú ñá daha Xítohó Jesucristú ndécú chi ñu-ndó-ni-gá. Te ñá díú yùhú té Páblú ní xihí-í núú cùrúxi sá cuendá-ndó, te ní ñá túú ní sandute-ndo cuendá sá yùhú cuu cuendá ñáhá-í xii-ndo.

¹⁴ Te táxáhu xii Yá Ndióxi chi ñá díú nchàa-ndo ní dacuandute-í, chi té Crispú-ni ndihi té Gàyú-ni ní dacuandute-í-güedé.

¹⁵ Te xiáⁿ núu vá cúu tnàhí cáháⁿ-ndó sá ní sandute-ndo sá cúu cuendá ñáhá-í xii-ndo.

¹⁶ Te ní ndacu tucu iní-í sá tnàhá tucu ñáyiu cùu ndi mee té Estefanás ní dacuandute-í, te ñu-ndó ñáyiu-áⁿ te sànuu sá ñá túú-gá nágá ñáyiu ní dacuandute-í.

¹⁷ Te Xítohó Jesucristú ñá túú ní tendaha ñaha-gá xii-í sá dacuandute-í ñáyiu, chi ní tendaha ñaha-gá xii-í sá cáháⁿ-í tnúhu-gá núu-yu, tnúhu sá cáháⁿ nàcuáa naníhí tànhú-ó. Te ñá túú cáháⁿ-í dàtná cáháⁿ ñáyiu túha. Te ducaⁿ quide-í cuendá sá nchòhó quindáá váha iní-ndó tnúhu sá cáháⁿ nàcuáa ní xihí Xítohó Jesucristú núú cùrúxi. Chi núu na cáháⁿ-í dàtná cáháⁿ ñáyiu túha te nchòhó vá quindáá iní-ndó tnúhu-áⁿ nàcuáa tàu-xi cunduu.

Sá cuendá Xítohó Jesucristú cùtnuní iní-ó sá ïo càhnu cuu Yá Ndióxi

¹⁸ Te nchaa ñáyiu ta xita nihnu cuáháⁿ cächí-yu sá ñá túú nandíhi tnúhu sá cáháⁿ nàcuáa ní xihí Xítohó Jesucristú núú cùrúxi, dico sá cúu-xi nchòhó ñáyiu sá ní naníhí tànhú, chi tnúhu-áⁿ cúu-xi ñu-ndó tnúhu sá ní taxi Yá Ndióxi ndécú ndihi-o cuendá ndacu-gá cada-gá nchaa nàcuáa cuini-gá iní-ó,

¹⁹ te quèe ndáá-xi nàcuáa cáháⁿ-gá núú tütú-gá núú cächí-xi:

Yúhú cada-í te nchaa ñáyiu túha vá nandíhi-gá nchaa sá xini tnuní-yu,

te nchaa ñáyiu ïo váha sáa díquí-xi vá nandíhi-gá nchaa nàcuáa sàni iní-yu.

Duha cächí Yá Ndióxi núú tütú-gá.

²⁰ Te xiáⁿ cùtnuní iní-ó sá ncháá ñáyiu sàni iní-xi sá ïo túha ndècu ñuyúú-a, ndihi nchaa cue té dacuaha ñaha xii-yu nchaa tnúhu ní chídó tnuní ndí Moisés, ndihi nchaa ñáyiu

ío váha sáá díquí-xi cáháⁿ cuendá nchaa sá ío ñuyúú-a, te nchaa ñáyiú-áⁿ cächí Yá Ndióxi sá ña túú nándíhi nchaa sá xini tnúni-yu sá cúú-xí-gá.

²¹ Te Yá Ndióxi ío váha cùtnuní iní-gá nácuaá quide-gá, chí ña túú dàña-gá cundecu ndíhi ñáhá-yu xii-gá sá cuendá nchaa sá ní sáá díquí méé-yu, te ducaⁿ quide-gá chí cuini-gá sá cundédóho-yu tnúhu sá sání iní-yu ña túú nándíhi. Te sá cuendá tnúhu-áⁿ te naníhi tãhú-yu te núu na quindáá iní ñáhá-yu xii-gá.

²² Te cue ñáyiú isráel cuini-yu quini-yu sá vã yõ tnãhí ndàcu cada, te cue ñáyiú griégú nchicúⁿ nihnú-yu nchaa sá dácuaha ñáyiú ío túha.

²³ Dico nchoo yihi-o cáháⁿ-ó núú ñáyiú sá Xitohó Jesucristú ní xihí-gá núú cùrúxi. Te cue ñáyiú isráel ña túú tnãhí tnãhá iní-yu cundédóho-yu tnúhu-áⁿ. Te cue ñáyiú ña túú cúu ñáyiú isráel cächí-yu sá ña túú vèdana nándíhi tnúhu-áⁿ.

²⁴ Dico sá cúú-xí nchaa ñáyiú ní cáháⁿ ñáhá Yá Ndióxi chí cuèi cúu-yu ñáyiú isráel ádi ña túú cúu-yu, dico ñáyiú-áⁿ cächí-yu sá sá cuendá Xitohó Jesucristú cùtnuní iní-yu sá ío càhnu cuu Yá Ndióxi te ndècu ndíhi-gá nchaa sá xini tnúni-gá.

²⁵ Te sá quidé Yá Ndióxi cächí ñáyiú ñuyúú-a sá ña túú nándíhi, dico xiãⁿ ío-gá nándíhi dàcúúxi sá sání iní méé-yu. Te sá ní xihí Xitohó Jesucristú núú cùrúxi, xiãⁿ cächí ñáyiú sá ña túú ní níhi ndéé Yá Ndióxi cada-gá sá ní sani iní-gá cada-gá. Dico sá dúcáⁿ ní quide Yá Ndióxi, xiãⁿ cúú-xí sá ío-gá ní níhi ndéé-gá ní quide-gá ⁱⁱ sá ní sani iní-gá dàcúúxi sá sání iní méé ñáyiú ñuyúú-a.

²⁶ Te nchòhò ñáyiú ndècu ndíhi-í ichi Xitohó Jesucristú, chí dándacu iní nácuaá ndècu-ndo cùtnãhá ní cáháⁿ ñáhá Yá Ndióxi xii-ndo, chí sacú-ni-ndo túha dàcúúxi ñáyiú ña túú ndècu ichi-gá. Te ducaⁿ sacú-ni-ndo tàxi tnuní-ndó, te diu-ni ducaⁿ sacú-ndó nèhe ñáyiú sá yíñúhu núú-ndó.

²⁷ Te ñáyiú ña túú ndècu ichi Yá Ndióxi cächí-yu sá ña túú tnãhí túha dava-gá tnãha ñáyiú-yu, dico dava ñáyiú ña túú túha-áⁿ cáháⁿ ñáhá Yá Ndióxi xii-yu cundecú-yu ichi-gá, te cundecu ndíhi ñaha-gá xii-yu, te ducaⁿ dándóo canúú-yu nchaa ñáyiú cächí sá ío túha. Te cáháⁿ tucu-gá ñáyiú cächí dava-gá ñáyiú sá ña túú tnãhí tàú cunuu cundecú-yu ichi-gá, te ducaⁿ cundecu ndíhi ñaha-gá xii-yu, te dándóo canúú-yu nchaa ñáyiú cächí sá táxi tnuní.

²⁸ Te ducaⁿ Yá Ndióxi cáháⁿ-gá ñáyiú ña túú tnãhí cunuu cundecu ndíhi-gá, ndíhi ñáyiú quèe tíhú núú dàva-gá tnãha ñáyiú-xi, ndíhi ñáyiú cächí-yu sá ña túú vèdana nándíhi, nchaa ñáyiú-áⁿ cáháⁿ-gá cundecu

ndíhi-gá, te ducaⁿ quide-gá cuendá dándóo canúú-yu nchaa ñáyiú cächí sá ío cùnnu.

²⁹ Te núu xiãⁿ ní ⁱⁱ ñáyiú vã cúú cächí-yu sá ío càhnu cuu-yu núú Yá Ndióxi.

³⁰ Dico nchòhò chí mee Yá Ndióxi ní quide-gá ndècu-ndó ndíhi Xitohó Jesucristú, te Xitohó Jesucristú ní quide-gá ní cùtnuní iní-ó sã Yá Ndióxi cúú-gá Yáá ndécú ndíhi nchaa sá xini tnúni-gá. Te diu-ni Xitohó Jesucristú ní quide-gá cuendá sã nchóo vã cundècu-gá cuèchi-o núú Yá Ndióxi, te ducaⁿ cundecu yíñúhu-o núú-gá, te nduu tãhú-ó cundecu-o ndíhi-gá ní caa ní quíhiⁿ.

³¹ Te sá dúcáⁿ quide-gá núu xiãⁿ xini ñúhu-xi cada-o nácuaá cáháⁿ-xi núú tütú Yá Ndióxi núú cächí-xi: “Vã cächí-ndó sã méé-ndó ío càhnu cuu-ndo, chí cächí-ndó sã Yáá cúú Xitohó-ndó ío càhnu cuu-gá”, duha cächí-xi núú tütú-gá.

2

Tnúhu sá cáháⁿ nácuaá ní cuu ní xihí Xitohó Jesucristú núú cùrúxi

¹ Te nchòhò ñáyiú ndècu ndíhi-í ichi Xitohó Jesucristú sa ñaha-ndo sá cùtnãhá ní quixi-í ní cáháⁿ-í tnúhu Yá Ndióxi núú-ndó, te ña túú ní cáháⁿ-í dátña cáháⁿ ⁱⁱ ñáyiú ío váha sáá díquí-xi, ádi datná cáháⁿ ⁱⁱ ñáyiú ío túha.

² Chí cùtnãhá ní xíndecu ndíhi ñaha-í xii-ndo chí ní sani iní-í sá méé-ní cuendá Xitohó Jesucristú cáháⁿ-í núú-ndó ndíhi nácuaá ní cuu ní xihí-gá, te diu ducaⁿ ní quide-í.

³ Te cùtnãhá ní quexio-í núú ndécú-ndó te ní ña cùtnuní iní-í nása cada-í ní cúu, te ío ní quiyúhú iní-í ní cáháⁿ-í tnúhu-gá núú-ndó.

⁴ Te cùtnãhá ní cáháⁿ-í nácuaá ndúu tnúhu Xitohó Jesucristú núú-ndó, te ñaha-ndo sá Espiritú Yá Ndióxi ní chindee ñaha-xi xii-í ní cáháⁿ-í tnúhu-gá núú-ndó, te tnúhu-áⁿ ní quèe-xi iní-ndó. Te ña túú ní cáháⁿ-í ⁱⁱ tnúhu càhnu núú-ndó tnúhu sá cáháⁿ cue ñáyiú ío váha sáá díquí-xi.

⁵ Te ducaⁿ ní cuu cuendá sá nchòhò quindáá iní-ndó tnúhu Yá Ndióxi chí ní quide-gá sã váha sá cúú-xi iní-ndó, te ña díú sá cuendá tnúhu sá cáháⁿ ñáyiú cächí sá ío túha ducaⁿ ní sándáá iní-ndó tnúhu-gá.

Espiritú Yá Ndióxi quidé-xi cùtnuní iní-ó nácuaá sání iní-gá

⁶ Te nchoo cáháⁿ-ó tnúhu càhnu núú ñáyiú sa ní níhi ndéé ndècu ichi Xitohó Jesucristú. Te tnúhu-áⁿ ña túú cáháⁿ ñáyiú ña túú ndècu ichi-gá, te ní cuè téé yíndaha ñaha xii-yu ña túú cáháⁿ-güedé tnúhu-áⁿ chí cue téé-áⁿ naa-güedé.

⁷ Te tnúhu càhnu-áⁿ cúú-xi tnúhu Yá Ndióxi, te mee-gã ní cächí-gá ndéé cùtnãhá vátã ngáva-gá ñuyúú sã ncháá ñáyiú na quindáá iní tnúhu-áⁿ te nduu tãhú-yu

cundecú-yu ndihi-gá núú ïo váha càa ndecu-gá ni caa ni quíhíⁿ. Te tnúhu-áⁿ ndúú yúhu-xi ni cuu.

⁸ Te ni ïⁿ cue tée yíndaha cue ñáiyu ñuyú-a ñá túú təcú tnúni-güedé tnúhu-áⁿ, chí núú dicó təcú tnúni-güedé tnúhu-áⁿ te vá cáta càa-güedé Xítóhó Jesucristú núú cürúxí cahni ñaha-güedé xii-gá ní cuu. Te ñiu-ni Yaá-áⁿ ïo càhnu cuu-gá.

⁹ Dico ducaⁿ ní cuu chí ní quee ndáá-xi nàcuáa càháⁿ-xi núú tùtú Yá Ndióxi núú càchí-xi:

Yá Ndióxi sa ní sani iní-gá nchaa nàcuáa cada-gá sá cúu-xí cuendá nchaa ñáiyu cùu iní ñáhá xii-gá.

Te sá ní sani iní-gá cada-gá cúu-xí sá vátá quíni-gá ñáiyu te ní vátá cündèdóho-gá-yu,

te ni ñá túú tnàhí cùtnuní iní-yu nása cada-gá.

Duha càchí-xi núú tùtú-gá.

¹⁰ Te mee Yá Ndióxi ní càchí-gá sá Espíritú-gá cada-xi te nchoo cùtnuní iní-ó nchàa nàcuáa sàni iní-gá cada-gá, núu xiáⁿ ducaⁿ təcú tnúni-ó vítna, chí Espíritú-gá xini-xi nchaandí túhú nàcuáa sàni iní-gá cada-gá.

¹¹ Te ñá ïⁿ ñáiyu xini ndáá-yu nàcuáa sàni iní ingá ñáiyu, chí mee ñáiyu-áⁿ xini ndáá-yu nchaa nàcuáa sàni iní-yu. Te ducaⁿ sàtnahá-xi cùu Yá Ndióxi chí medii-ni Espíritú-gá xini-xi nchaa nàcuáa sàni iní-gá.

¹² Te nchoo chí Yá Ndióxi ní taxi-gá Espíritú-gá ndécú ndihi-o, te ñá díú ñuyú-a ducaⁿ ní quee espíritú ní ngündecu ndihi-o. Te ducaⁿ ní taxi-gá Espíritú-gá ndécú ndihi-o cuendá ducaⁿ cùtnuní iní-ó nàcuáa ndúu nchaa sá váha sá dicó ducaⁿ ní taxi-gá ndécú ndihi-o.

¹³ Te cuendá nchaa sá váha-áⁿ càháⁿ-ndí, te càháⁿ-ndí nàcuáa dàcahu iní ñáhá Espíritú Yá Ndióxi xii-ndí, te ñá túú càháⁿ-ndí nàcuáa càhu iní ñáiyu ñuyú-a càháⁿ-yu, te ñiu-ni nchaa tnúhu dàcahu iní ñáhá Espíritú-gá xii-ndí càháⁿ-ndí, ñiu-ni nchaa xiáⁿ dánhé-ndí nchaa ñáiyu ndècu ndihi tucu Espíritú-gá.

¹⁴ Te ñáiyu ñá túú ndècu ndihi Espíritú Yá Ndióxi ñá túú tnàhí iní-yu nàcuáa ndúu tnúhu dàtécú tnúhu ñaha Espíritú-gá xii-yu, te ni ñá túú təcú tnúni-yu, te càchí-yu sá ñá túú nándíhí-xi. Te ducaⁿ chí mee-ni nchàa ñáiyu ndècu ndihi Espíritú-gá təcú tnúni-yu nàcuáa ndúu tnúhu-áⁿ.

¹⁵ Te cue ñáiyu ducaⁿ ndècu ndihi Espíritú Yá Ndióxi cùtnuní ndáá iní-yu ná cúu nchàa sá váha, te vá yóo ïⁿ xini nchaa nàcuáa sàni iní-yu.

¹⁶ Te núú tùtú Yá Ndióxi càchí-xi: “Vá yóo ïⁿ xini nàcuáa sàni iní Yá Ndióxi, núu xiáⁿ vá

yóo ïⁿ ndacu ná danèhé ñáhá xii-gá”, duha càchí-xi núú tùtú-gá. Te nchoo chí ïⁿ-ní sàni iní-ó ndihi Xítóhó Jesucristú.

3

Cue tée xíquide chiúⁿ Yá Ndióxi

¹ Te nchóhó ñáiyu ndècu ndihi-í ichi Xítóhó Jesucristú càchí tnúhu-í xii-ndo sá ñá ní ñíhí-í nàcuáa cada-í càháⁿ-í tnúhu-gá núú-ndó dàtná càháⁿ-í núú nchàa ñáiyu quide nchaa nàcuáa càháⁿ Espíritú Yá Ndióxi, chí ní càháⁿ-í núú-ndó dàtná càháⁿ-í núú nchàa ñáiyu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáiyu íchí ní sándáá iní tnúhu Xítóhó Jesucristú, núu xiáⁿ ducaⁿ ní càháⁿ-í núú-ndó.

² Te ní quide ñaha-í xii-ndo dàtná ïⁿ déhe yiquíⁿ vítna sadi camá, te ñá túú ní quide ñaha-í xii-ndo dàtná cue landú sa xèxi dítá, chí ní dánhé ñáhá-í xii-ndo ïⁿ sá xiá-í sá vá təcú tnúni-ndó. Te quide cuendá-í sá díú-ní dúcaⁿ vá təcú tnúni-ndó ndéé vítna te níu na dánhé ñáhá-í xii-ndo nchàa dava-gá tnúhu.

³ Te ducaⁿ chí quide-ni-ndo nàcuáa sàni iní méé-ndó, chí ndècu-ni-ndo ichi cuédú iní, te naá ndíhí tnàha-ni-ndo, te ñá túú tnàhí cùu ïⁿ-nuu-ndo ndecu-ndo. Te xiáⁿ cùtnuní sá méé-ní nchàa nàcuáa sàni iní méé-ndó quide-ndo, te xíquide-ndo dàtná quidé nchàa ñáiyu ñá túú ndècu ichi Xítóhó Jesucristú.

⁴ Te dava-ndo càchí-ndó: “Yúhú cùu-í cuendá té Páblú.” Te dava-ndo càchí-ndó: “Yúhú cùu-í cuendá té Apolós”, duha càchí-ndó. Te sá dúcáⁿ càháⁿ-ndó xiáⁿ cùtnuní sá quidé-ní-ndó mée-ni nchaa nàcuáa sàni iní méé-ndó.

⁵ Te yúhú té Páblú càchí tnúhu-í xii-ndo sá ñá túú cùnuu-í, te ní té Apolós ñá túú cùnuu-dé chí dicó cue tée xinu cuechi núú Yá Ndióxi cúu-ndí, te ní càháⁿ-ndí tnúhu-gá núú-ndó, núu xiáⁿ ní sándáá iní-ndó. Te ndí dííⁿ ndí dííⁿ ndúu chiúⁿ ní táhú Yá Ndióxi cada-ndí.

⁶ Te yúhú cùu-í dàtná ïⁿ tée chíhí tatá chí dàcàháⁿ ñáhá-í xii-ndo túha-ndo ichi Yá Ndióxi. Te té Apolós cúu-dé dàtná ïⁿ té nàcuhñu chí té-áⁿ ndécú-dé dánhé ñáhá-dé xii-ndo tnúhu-gá. Te Yá Ndióxi cúu-gá Yaá quidé sàhnu tatá ní chíhí-í-áⁿ, te duha càháⁿ-í chí ñiu-gá quidé-gá tá ñíhí ndéé-ndó ndècu-ndo ichi-gá.

⁷ Te núu xiáⁿ ní tée chíhí tatá te ní té nàcuhñu ñá túú cùnuu-güedé, dico Yá Ndióxi ïo cùnuu-gá chí ñiu-gá quidé-gá xinu tatá-áⁿ te sàhnu-xi.

⁸ Te ïⁿ-ní cùu tée chíhí tatá ndihi té nàcuhñu. Te ducaⁿ sàtnahá-xi cùu nchúhú cue tée xíquide chiúⁿ Yá Ndióxi, te nàcuáa

nduu chiuⁿ ní quide-ndí te ducaⁿ cùnduu tǎhú taxi Yá Ndióxi nduu tǎhú-ndí.

⁹ Te nchóhó cúu-ndó dátá ìⁿ xichi núú ní quée tatá, te nchúhú cúú ìⁿnuu-ndí quidé chiuⁿ-ndí xiáⁿ. Te ducaⁿ sǎtnahá-xi cùu-ndo chi cùu cuendá ñhá Yá Ndióxi xii-ndo, te nchúhú cúú ìⁿnuu-ndí quidé-ndí chiuⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sǎtnahá-xi cùu-ndo chi Yá Ndióxi quidé-gá tá sǎhnu nihnu-ndo ichi-gá cuáháⁿ.

¹⁰ Te yúhú cúú-í dátá ìⁿ tée cùnuu daccaa vehe te ní tava-í cimiéntú-xi, te ìⁿ cue tée véxi dàcaa-güedé ndóho, te ìⁿ ìⁿ cue tée-áⁿ ò xini ñuhu-xi cada cuendá-güedé nàcuáa dàcaa-güedé. Núu ducaⁿ sǎtnahá-xi cùu yúhú chi Yá Ndióxi ní taxi-gá chiuⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xitohó Jesucristú núú-ndó, te ìⁿ cue tée véxi dàcuaha ñaha-ná xii-ndo tnúhu-gá, te ìⁿ ìⁿ cue tée-áⁿ ò xini ñuhu-xi cada cuendá-güedé nàcuáa dacuáha ñaha-güedé xii-ndo tnúhu-gá.

¹¹ Te cimiéntú vehe-áⁿ cada iní-ó sá cúu-xí mée Xitohó Jesucristú, te ducaⁿ chi yúhú ní dánèhé ñhá-í xii-ndo ní ngúndecu ndihi-ndo Xitohó Jesucristú, te vá yóo-gá cundecu ndihi-ndo chi ìⁿdii dí-í-gá ndécú.

¹² Te dava cue tée dàcaa-güedé vehe váha te chihí-güedé díhúⁿ cuááⁿ, ndihi díhúⁿ cuixíⁿ, ndihi yúú sá ò vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ.

¹³ Te sáá nduu te nchaa vehe-áⁿ cǎyú-xi, te vehe vítú-áⁿ ndihi vehe ité-áⁿ ndihi vehe tnuvixiⁿ-áⁿ ndoo ndoo cǎyú, te nchaa vehe váha-áⁿ vá cǎyú-xi cuéi na yáha ñuhú. Te nchaa cue tée ní dácáá vèhe váha-áⁿ cada iní-ó sá cúu-güedé ñáyiú ò váha quide chiuⁿ Yá Ndióxi. Te nchaa cue tée ní dácáá vèhe vítú, ndihi cue tée ní dácáá vèhe ité, ndihi cue tée ní dácáá vèhe tnuvixiⁿ cada iní-ó sá cúu-güedé ñáyiú ñá túú cuini cada chiuⁿ Yá Ndióxi nàcuáa táu-xi cunduu. Te sáá nduu te cutnúni nàcuáa nduu chiuⁿ ní quide ìⁿ ñáyiú, chi Yá Ndióxi cáháⁿ-gá nàcuáa nduu chiuⁿ ní quide ìⁿ ñáyiú ní quide chiuⁿ-gá.

¹⁴ Te cue ñáyiú ò váha xiⁿquide chiuⁿ Yá Ndióxi te cùdí chiuⁿ quidé-yu, te ñáyiú-áⁿ nihí-yu sá ndúú tǎhú-yu.

¹⁵ Te cue ñáyiú ñá túú quide chiuⁿ Yá Ndióxi nàcuáa táu-xi cunduu, te vá cùdí chiuⁿ ní quidé-yu chi cuíta te ndóo-ná-yu duha, dico mée-yu chi nanhí tǎhú-yu.

¹⁶ Te yúhú cáháⁿ-í dóho-ndo dándacu-í iní-ndó sá cúu-ndó dátá vehe Yá Ndióxi, chi Espiritú-gá ndécú ndihi ñaha-xi xii-ndo.

¹⁷ Te núu yoo na dánaa ñaha xii nchóhó ñáyiú cùu veñúhu-gá, te Yá Ndióxi danáa

ñaha-gá xii ñáyiú-áⁿ, te ducaⁿ càda-gá chi nchóhó cúu-ndó ñáyiú cùu cuendá-gá.

¹⁸ Te vá dándàhú-ndó mée-ndo sá ò túha-ndo. Te núu ò dáva-ndo sàni iní-ndó sá túha-ndo dátá sàni iní cue ñáyiú ñá túú ndécú ichi Yá Ndióxi, te cada-ndo sá cúu-ndó dátá ñáyiú ñá túú tnáhí túha, te ducaⁿ te cuu ndisa-ndo ñáyiú túha sá cúu-xí Yá Ndióxi.

¹⁹ Te nchaa sá xini tnúni nchaa ñáyiú cǎchí sá ò túha ñá túú ndécú ichi Yá Ndióxi ñá túú nándihi-xi sá cúu-xí-gá. Te cǎchí-xi núú tütú-gá: “Nchaa ñáyiú cǎchí sá ò túha te Yá Ndióxi dandóo canúú ñhá-gá xií-yu núú nchaa sá quidé-yu”, duha cǎchí-xi núú tütú-gá.

²⁰ Te cǎchí tucu-xi ingá xichi: “Yá Ndióxi cutnúni iní-gá nchaa nàcuáa sàni iní ñáyiú cǎchí sá ò túha. Te nchaa nàcuáa sàni iní-yu-áⁿ cǎchí-gá sá ñá túú vèdana nándihi-xi”, duha cǎchí-xi núú tütú-gá.

²¹ Núu xiáⁿ cáháⁿ-í dóho-ndo sá vá cǎchí-ndó sá nchúhú cue tée dānehé ñhá xii-ndo tnúhu-gá ò cǎhnu cuu-ndí. Te nchaa sá ò ñuyúú-a cùu-xi sá váha sá cúu-xí-ndó.

²² Te cuéi yúhú ndihi té Ápolos ndihi té Pèlú ndécú-ndí sá cúu-xí-ndó, te cuéi nchaa sá ò ñuyúú-a te cuéi nchaa nduu ndécú-ndo te cuéi sá cùu-ndó dico nchaa cùu-xi sá váha sá cúu-xí-ndó. Te cuéi nchaa sá ndécú tnáví, te cuéi nchaa sá cóo ndéé cuéé-gá nchaa cùu-xi sá váha sá cúu-xí-ndó.

²³ Te mee-ndo ndécú-ndo sá cúu-xí Xitohó Jesucristú, te mee Xitohó Jesucristú ndécú-gá sá cúu-xí Yá Ndióxi.

4

Nàcuáa nduu chiuⁿ quide cue tée ní tǎuchúⁿ Xitohó Jesucristú cáháⁿ tnúhu-gá

¹ Te cada cuendá-ndó sá nchúhú dicó-ni cue tée xinu cuéchi núú Xitohó Jesucristú cúu-ndí, te chiuⁿ-áⁿ ní taxi Yá Ndióxi quidé-ndí cáháⁿ-ndí tnúhu sá ní cǎchí-gá yiyúhu ni cuu.

² Te xini ñuhu-xi sá ncháá ñáyiú ducaⁿ ní sǎñaha Yá Ndióxi chiuⁿ quidé-yu cada ndáá-yu cadá-yu chiuⁿ-áⁿ.

³ Te yúhú ñá túú quide cuendá-í núu nása nduu tnúhu cáháⁿ-ndó cuendá-í núu cùu-í tée váha àdi ñá túú cùu-í. Te ñu-ni ducaⁿ ñá túú quide cuendá-í núu nása-gá cáháⁿ nchaa dáva-gá ñáyiú cuendá-í. Te ní mée-í ñá túú cáháⁿ-í núu cùu-í tée váha àdi ñá túú cùu-í.

⁴ Te sǎnuu iní-í sá ñá túú ná cùmǎn-í núú Yá Ndióxi, dico ñá díú sá xiáⁿ te cǎchí-í sá ñá túú cuéchi-í ndécú núú-gá, chi mee-gá náhá ndáá-gá te núu nása quide-í ndécú-í.

⁵ Te nchóhó vá cáháⁿ-gá-ndó sá ñá túú cùndáá ñáyiú núú Yá Ndióxi, chi vátá sáá-gá nduu cùndáá cuéchi-yu. Te na sáá nduu quixi tucu Xitohó Jesucristú te dáva-áⁿ dátúu-gá nchaa sá quidé-yu, nchaa sá ñá

túú xini-ó quidé-yu vitna, te ducaⁿ dátúu-gá nchaa nàcuáa sàni iní-yu. Te Yá Ndiöxí cáháⁿ váha-gá cuendá nchaa ñáyiú ní quide váha.

⁶ Te nchòhó ñáyiú ndècu ndihi-í ichi Xitohó Jesucristú, càcunehe-í té Àpolós ndihi yúhú núu-ndó dànehé ñàhà-í xii-ndo nàcuáa cada-ndo cuendá ducaⁿ cùu-xi ìⁿ sá váha sá cúu-xí-ndó, ndihi cuendá sá nchòhó canchicúⁿ nihnu-ndo càda-ndo mee-ni nchaa nacuaá yòdo tñuní núú tütú Yá Ndiöxí. Te ducaⁿ te vá cächí-ndó sá ìⁿ tée cáháⁿ tnúhu Yá Ndiöxí ío-gá càhnu cuu-dé dàcúxí ìngá-dé.

⁷ Te nchòhó vá cächí-ndó sá ío-gá cùnù-ndo dacúxí dàva-gá ñáyiú chí Yá Ndiöxí ní quide-gá ní ngúndecu ndihi-ndo nchaa sá xini tñuní-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ní quide-ndo dùcaⁿ ní ngúndecu ndihi-ndo nchaa sá xini tñuní-ndó.

⁸ Te nchòhó quidé-ndó sá ñà túú tnàhí-gá ná cùmàni-ndó núú Yá Ndiöxí, te quide-ndo sá ní nihí-ndó nchaa sá cuini-ndó núú-gá ndécú ndihi-ndo, te sànuu sá cúu-nà-ndó dàtná cue tée yindaha ñáyiú, te nchúhú ñà túú cùu ìⁿ nuu ndihi ñaha-ndí xii-ndo quindaha ndihi ñaha-ndí xii-ndo ñáyiú, jte váha-ni te núu dicó ndisa sá yindaha-ndo ñáyiú chí tnàhà nchúhú ní tnahá ndihi ñaha-ndí xii-ndo quindaha-ó-yu te núu dicó cúu-xí ìⁿ sá ndáá dico ñàhà!

⁹ Te yúhú quidé cuendá-í sá nchúhú cue tée ní táuchíúⁿ Xitohó Jesucristú cáháⁿ tnúhu-gá núú ñáyiú ní cachí Yá Ndiöxí sá cúu-ndí cue tée ñà túú nàndíhi sá cúu-xí dàva-gá ñáyiú. Te ní cachí tucu-gá sá cúu-ndí dàtná cue ñáyiú sa ní tnahá òré cuú-xi quíhíⁿ nacháhu cuéchi-xi, te nchaa ñáyiú cùñúhu ñàhà-yu xii-ndí sá dúcáⁿ ndòho-ndí, te tnahá nchaa espíritú cùñúhu ñaha-xi xii-ndí.

¹⁰ Te cuendá sá xínú cuèchi-ndí núú Xitohó Jesucristú, xiáⁿ cúu-ndí dàtná cue tée ñà túú vèdana nàndíhi sá cúu-xí ñáyiú. Te nchòhó quidé-ndó sá cúu-ndó ñáyiú ío túha ndècu ndihi Xitohó Jesucristú. Te ñáyiú cächí-yu sá nchúhú cúu-ndí cue tée ñà túú ndàcu cada ìⁿ sá cáda sá cúu-xí Yá Ndiöxí. Te nchòhó quidé-ndó sá cúu-ndó ñáyiú ío váha ndàcu quide ìⁿ sá sání iní-ndó sá cúu-xí-gá. Te cue ñáyiú dàquee tihú ñàhà-yu xii-ndí, te nchòhó nehé-yu sá yíñúhu núu-ndó.

¹¹ Te nchúhú chí nchaa-ni nduu ío ndòho-ndí, chí xihí-ndí docó, yìchí-ndí ndute, te ñà túú dòò-ndí, te nchaa ñáyiú quide úhú ñàhà-yu xii-ndí, te ní vèhe-ndí ñà túú ndéé cáá cùndecu-ndí.

¹² Te ío ndòho-ndí quidé chùuⁿ-ndí nihí-ndí

sá xéxí-ndí. Te cue ñáyiú xícuehé ñàhà-yu xii-ndí dico xicáⁿ tãhú-ndí núú Yá Ndiöxí cuendá-yu, te ñà cúu tnàhí quini ndéé ñàhà-yu xii-ndí dico quide cahnu iní-ndí nchaa sá quidé ñàhà-yu.

¹³ Te mee-ni tnúhu cuèhé tnúhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tnúhu váha. Te cächí-yu sá cúu-ndí dàtná ìⁿ sá ñà túú-gá vèdana nàndíhi, te nchaa-ni nduu ducaⁿ càháⁿ-yu xãhãⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñàhà-í xii-ndo, dico ñà díú tnúhu sá cúu càháⁿ núu-ndó càháⁿ-í. Te duha càháⁿ-í dóho-ndo chí quide iní-í sá sùuní dàtná déhe mee-í cúu-ndó chí ío cùu iní ñàhà-í xii-ndo.

¹⁵ Te nchaa-o ndècu-o ichi Xitohó Jesucristú vitna, dico yúhú cùu-í tée díhna nuu ní dànehé ñàhà xii-ndo nacuaá ndùu tnúhu sá càháⁿ nàcuáa naníhi tãhú-ó, núu xiãⁿ cùu-í dàtná tãtã-ndó. Te cuéi vai vihi cue tée na quixi-güedé danèhé ñàhà-güedé xii-ndo tnúhu-gá dico ìⁿ dii-ni yúhú cùu-í tée díhna nuu-gá ní dànehé ñàhà xii-ndo tnúhu-gá.

¹⁶ Núu xiãⁿ càháⁿ-í dóho-ndo sá cànchicúⁿ nihnu-ndo càda-ndo nchaa nacuaá quide-í.

¹⁷ Te xiãⁿ núu sa ní tendaha-í té Timùteú véxi coto ñaha-dé xii-ndo, te tée-án ío cùu iní-í-dé te quide ndáá-dé, te cùu-dé dàtná déhe-í chí yúhú ní sanu ichi-í-dé ichi Xitohó Jesucristú, te tée-án cachí tnúhu-dé xii-ndo nchaa nacuaá quide-í ndécú-í ichi-gá. Te diu-ni nàcuáa na cächí tnúhu-dé-án diu-ni ducaⁿ quide-í nchaa xichi núú tàcá ñáyiú dàcuaha tnúhu Xitohó Jesucristú.

¹⁸ Te dava nchòhó ío quide cahnu-ndo mee-ndo chí sání iní-ndó sá vá quixí-gá-í quixi coto ñaha-í xii-ndo.

¹⁹ Dico núu mee Yá Ndiöxí ná cächí-gá te ío ndíhi quixi coto ñaha-í xii-ndo, te dàvã-án quini-í te núu nása quide nchaa ñáyiú ducaⁿ ío xíquide càhnu mee-xi-án ndécú-yu ichi Xitohó Jesucristú. Te vá cáda cuendá-í tnúhu càháⁿ-yu chí chùuⁿ quidé-yu cada cuendá-í.

²⁰ Te vitna yindaha ñaha Yá Ndiöxí xii-o, te chùndee ñaha-gá xii-o quide-o nchaa sá váha sání iní-ó quide-o te ñà díú mèe-ni sá càháⁿ-ó.

²¹ Te ío chí cáni iní núu ndèdacãa sá váha-gá cada-í òré ná quéxio-í núu ndécú-ndó, núu sá ténãá ñàhà-í xii-ndo ádi sá càháⁿ ndihi ñaha-í xii-ndo ndihi tnúhu vii tnúhu váha nàcuáa cutnùni iní-ndó sá cúu iní ñàhà-í xii-ndo.

5

Èⁿ cuéchi càhnu vihi

¹ Te yúhú sa ní nihí ndáá-í tnúhu nàcuáa cùu ndecu-ndo, chí ìⁿ tée ndècu ndihi-ndo ndeca-dé nánã chàhã-dé. Te xiãⁿ cúu-xí ìⁿ cuéchi càhnu vihi, chí ndéé nchaa ñáyiú ñà

túu ndècu ichi Yá Ndióxi càchi-yu sá vâ cúú tñahí ducaⁿ càda-o.

² ¡Te nchòhó ío quide cahnu-ni-ndo mee-ndo xíndecu-ndo! ¡Te tau-ndó sá cundiyí-ndó ndixi cuèchi iní-ndó sá dúcáⁿ cúu ndècu-ndo ni cuu! Te tée ducaⁿ quide-áⁿ xíní ñuhu-xi sá vâ dáñá-gá-ndó nihí tñahá ndihi ñaha-dé xii-ndo ni cúu dico ñá túú ducaⁿ quide-ndo.

³ Te yúhú ñá túú ndècu ndihi ñaha-í xii-ndo dico dàtná tñuhu sá ndécú ndihi ñaha-í xii-ndo chi ducaⁿ-ni ío ñuhu iní ñáhà-í xii-ndo. Te yúhú càchi-í sá nácháhu tée-áⁿ cuèchi-dé sá dúcáⁿ quide-dé, te ñu-ni ducaⁿ càháⁿ-í núú-ndó te núu dicó ndécú ndihi ñaha-í xii-ndo.

⁴ Te òré nàtácá-ndó càháⁿ ndihi-ndo Yá Ndióxi te ñu-ni Xítohó Jesucristú ñá túú dáña ndéé-gá chíndèe ñaha-gá xii-ndo, te òré-áⁿ cada-ndo nàcuáa cuiñí Xítohó Jesucristú cada-ndo, te cada iní-ndó sá tñahá-í ndécú ndihi ñaha-í xii-ndo.

⁵ Chi tau-xi sá tée ducaⁿ quide-áⁿ daquèe tñúhú-ndó-dé, te ducaⁿ te sácuihná dandòho ñaha-xi xii-dé cuèi na cúú-dé, dico na sáa nduu te nduu tñúhú-dé cundecu-dé ndihi Xítohó Jesucristú.

⁶ Te nchòhó ñá túú nduu váha-xi sá càchi-ndó sá ío càhnu cuu-ndo. Te xíní-ndó sá cuèi luha-ni levadurá ná quíhu yuchi cuáha pàá dándaa-xi cuèi luha-ni ná quíhu te nihí-ni yuchi sàháⁿ ndoho-xi. Te ducaⁿ sàtnahá-xi cúu nchohó chi núu ndècu ndihi-ndo ñⁿ ñáyiú quide sá ñá túú váha te nchaa-ndo ñá túú-gá cúú váha iní-ndó ndècu-ndo.

⁷ Te xíní ñuhu-xi sá cáda-ndó dàtná quidé cuè ñáyiú quide vico pascuá, chi ñá túú chihí-yu levadurá yuchi cuáha pàá xéxi-yu nduu quidé-yu vico-áⁿ. Te sá quíhu pàá-áⁿ cada iní-ó sá cúú-xí nchaa sá cuèhé sá dúhá ní xóo cada-ndo. Te vâ cáda-gá-ndó ni ñⁿ sá cuèhé sá dúhá, te ducaⁿ te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sá cúú-güedé datná Xítohó Jesucristú nàcuáa ní xihí-gá núú cùrtúxi.

⁸ Te núu xíáⁿ xíní ñuhu-xi sá vâ cáda-gá-ndó ni ñⁿ sá cuèhé sá dúhá sá ní xóo cada-ndo, te ni vâ cúhúⁿ-gá iní-ndó te ni vâ cáda-gá-ndó, te ni yúhu ni iní-ná-ndó cáda-ndo mee-ni sá váha.

⁹ Te tutú sá sá ní dáquixí-í ndaha-ndo ní cachí-í sá vâ nihí tñahá-ndó ndihi cue ñáyiú ndècu ichi díí iní.

¹⁰ Te sá dúcáⁿ càháⁿ-í núú tütú ní dáquixí-í ndaha-ndo te vâ cáni iní-ndó sá yúhú càchi-í sá vâ cúú-gá tñahá tñuhu-ndo ndihi cue ñáyiú ndècu ichi cuèhé ichi duha, ndihi ñáyiú

ndècu ichi díí iní, ndihi ñáyiú xího nchaa sá ío ñuyúí, ndihi ñáyiú dùhu sá ndécú ndihi tñaha ñáyiú-xi, ndihi ñáyiú quide cahnu sá càchi-yu cúu ndiósí te ñá ndaa sá ndiósí cúú-xí chi dicó cue tée ñuyúí-a ní cadúha nchaa xíáⁿ, chi núu ducaⁿ na càda-ndo vâ tñahá tñuhu-gá-ndó ndihi-yu te xíní ñuhu-xi sá vâ cundècu-gá-ndó núú ndécú-yu.

¹¹ Te ñá túú ducaⁿ quee-xi nacuáa càháⁿ-í núú tütú-í, chi yúhú càchi-í sá vâ cúú tñahá tñuhu-ndo ndihi ñáyiú càchi sá ndécú ichi Xítohó Jesucristú te ñá ndaa sá ndécú-yu ichi-gá. Te núu cúu-yu ñáyiú ndècu ichi díí iní, àdi cuú-yu ñáyiú xího nchaa sá ío ñuyúí-a, àdi cuú-yu ñáyiú quide cahnu nchaa sá càchi-yu cúu ndiósí te ñá ndaa chi dicó cue tée ñuyúí-a ní cadúha nchaa xíáⁿ, àdi cuú-yu ñáyiú yiti yúhu-xi, àdi cuú-yu ñáyiú quíhu, àdi cuú-yu ñáyiú dùhu sá ndécú ndihi tñaha ñáyiú-xi, te nchaa ñáyiú ducaⁿ càchi sá ndécú ichi-gá te ñá ndaa te ducaⁿ xíquidè-yu, te ni vâ cúú nihí tñahá-ndó ndihi-yu caxi-ndo ndihi-yu.

¹²⁻¹³ Te ñá díí yúhú cúú-í tée càháⁿ cuendá nchaa ñáyiú ñá túú ndècu ichi Xítohó Jesucristú núu quide ndaa-yu àdi ñá túú quide ndaa-yu ndécú-yu, chi mee Yá Ndiósí càháⁿ-gá te núu nása quidé-yu ndécú-yu. Dico nchòhó chi tau-ndó cáda cuendá-ndó núu nása quide cue ñáyiú ndècu ndihi-ndo ichi Xítohó Jesucristú. Núu xíáⁿ xíní ñuhu-xi daquèe tñúhú-ndó tée ducaⁿ ñá túú quide váha ndècu ndihi-ndo-áⁿ, te vâ dáñá-gá-ndó nihí tñahá ndihi ñaha-dé xii-ndo.

6

Nàcuáa tau-xi cada ñáyiú ndècu ichi Xítohó Jesucristú te núu ñá túú ndècu ndihi váha tñahá-yu

¹ Te dava nchòhó òré ñá túú ndècu ndihi váha tñaha-ndo te cüyí-ndo cuáháⁿ-ndó núú cuè tée cùchiuⁿ ñá túú ndècu ichi Xítohó Jesucristú sàcáⁿ cuèchi-ndo, te ñá túú ducaⁿ tau-xi cada-ndo chi núú cuè tée ndècu ichi-gá ducaⁿ tau-ndó quíhíⁿ-ndó càcáⁿ cuèchi-ndo.

² Te nchòhó sa nàha-ndo sá ncháá ñáyiú cúu cuendá Yá Ndiósí sáa nduu càháⁿ-yu te núu ní quide ndaa nchaa dava-gá ñáyiú àdi ñá túú ní quide ndaa-yu, te nchòhó tñahá-ndó cúu-ndo ñáyiú ducaⁿ càháⁿ, te núu ducaⁿ te cutnùni iní-ndó sá ndácú-ndó cáda ndaa-ndó nchaa cuèchi sá ñá túú úhú cundáa vitna ndècu-ndo ñuyúí-a.

³ Te nchòhó sa nàha-ndo sá ncháá ndéé cue espíritú xínú cuèchi núú Yá Ndiósí sáa nduu càháⁿ-ó te núu nása quide-xi ndècu-xi. ¡Núu xíáⁿ cutnùni iní-ó sá úúⁿ-gá ndacu-ó cáda ndaa-ó nchaa cuèchi sá ío ñuyúí-a!

4 Te núu ió dava-ndo ió nása cùu ndecu-ndo te xinàá-ndó, te vá quihíⁿ-ndó càcáⁿ cuéchi-ndo núú cuè téé ndèhe-ndo sá ñá túú ndècu-güedé ichi Yá Ndióxi, dico nchòhó chi da núu cuè téé-áⁿ cuáháⁿ-ndó sàcáⁿ cuéchi-ndo.

5 Te duha càháⁿ-í cuèndá cucahaⁿ núu-ndó chi ñá túú quide váha-ndo sá dúcáⁿ quide-ndo. ¿Te náa dicó-ná ñá túú tnàhí ìⁿ téé cùtnuní iní-xi nàcuáa cada ndáá cuéchi-ndo ndècu ndihi-ndo ichi Xítohó Jesucristú-àⁿ?

6 Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítohó Jesucristú sàcáⁿ cuéchi-ndo cuèndá dava-gá cue ñáyiú ndècu ndihi-ndo ichi-gá.

7 Te ñá túú quide váha-ndo sá dúcáⁿ náa ndihi tnàha-ndo te cuáháⁿ-ndó sàcáⁿ cuéchi-ndo, te váha-gá sá cadá càhnu iní-ndó cuèi nándi na càda ñaha tnaha ñáyiú-ndo xi-ndo cuèi dùhú-yu sá ndécú ndihi-ndo dico cada càhnu-ni iní-ndó.

8 Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xi tnàha ñáyiú-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

9 Te nchòhó sa nàha-ndo sá ncháá ñáyiú ndècu ichi cuéhé ichi duha vá ndúú tãhú-yu cundecú-yu núú ndécú Yá Ndióxi táxi tnùní-gá, núu xiáⁿ vá cáni iní-ndó sá ñáyiú-áⁿ nduu tãhú-yu cundecú-yu ndihi-gá. Te ni cuè ñáyiú ndècu ichi díí ìní, te ni cuè ñáyiú quide cahnu nchaa sá càchí-yu cùu ndiòxi te ñá ndáa chi dicó cue téé ñuyúú-a ní cadúha nchaa xiáⁿ, te ni cuè téé càháⁿ ndihi ñadihí te ñá díú ñadihí-güedé cùú-yu, te ni cuè ñáyiú dihí càháⁿ ndihi téé te ñá díú yí-yu cùu-güedé, te ni cuè téé càháⁿ ndihi tnàha téé-xi,

10 te ni cuè ñáyiú dùhu, te ni cuè ñáyiú xihó sá ndécú ndihi tnaha ñáyiú-xi, te ni cuè ñáyiú quihu, te ni cuè ñáyiú càháⁿ úhú, te ni cuè ñáyiú ñanícuehé tnàha ñáyiú-xi te dùhu ñahá-yu, te ni ìⁿ cue ñáyiú duha xiquide vá ndúú tãhú-yu cundecú-yu núú ndécú Yá Ndióxi táxi tnùní-gá.

11 Te dava nchòhó ducaⁿ ni xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ni cuu-ndo ñáyiú cùu cuendá Yá Ndióxi, te ni cuu tucu-ndo ñáyiú ñá túú-gá cuéchi-xi ndècu núú-gá. Te ducaⁿ ní quide ñaha Yá Ndióxi xii-ndo sá váha sá cuèndá Xítohó Jesucristú, te ni ngúndecu ndihi-ndo Espiritú Yá Ndióxi.

Nàcuáa nduu cuendá yiqui cùñú-ó

12 Te càchí ñáyiú sá ncháá sá sání ìní-ó cuu cada-o, te ndáá càháⁿ-yu dicó-ní sá ñá ncháá

cùu-xi sá váha sá cùú-xí-ó. Te núu cùñí nchaa sá sání ìní-ó-àⁿ taxi tnùní ñahá-xi te vá cadá-ó.

13 Te nchòhó sa xiní-ndó sá ncháá sá xéxi-ó cuãnguee-xi xití-ó, te xití-ó ní cuáha tnàhí-xi sá cùhúⁿ nchaa sá caxí-ó, dico xití-ó ndihi nchaa sá xéxi-ó chi naa-xi. Te Xítohó Jesucristú néhé cuèndá-gá yiqui cùñú-ó, te ducaⁿ yiqui cùñú-ó cùu-xi cuendá-gá, te ñá túú ní cuáha yiqui cùñú-ó sá cùndècu-xi ichi díí ìní.

14 Te dátá ní quide Yá Ndióxi ní dándótó-gá Xítohó Jesucristú ducaⁿ cada ñaha-gá xii nchoo tucu chi dándoto ñaha-gá xi-o núu na cùú-ó, chi ndacu-gá quidé-gá nchaa sá váha.

15 Te nchòhó sa nàha-ndo sá yiqui cùñú-ó cùu-xi cuendá Xítohó Jesucristú chi ìⁿ-ni cùu-o ndihi-gá, núu xiáⁿ ñá túú tnàhí nduu váha-xi càháⁿ ndihi-o ñáyiú ndècu ichi díí ìní, chi yiqui cùñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sá cuèndá-ná ñáyiú-áⁿ cùú yiqui cùñú-ó, núu xiáⁿ ñá túú tnàhí nduu váha-xi ducaⁿ càda-o.

16 Te sa xiní-ndó sá núu ìⁿ téé na càháⁿ ndihi-dé ìⁿ ñadihí ndécú ichi díí ìní te cada iní-ó sá ìⁿ-ná yiqui cùñú cùú-yu. Te ducaⁿ càháⁿ-xi núú tütú Yá Ndióxi núú càchí-xi: “Ìⁿ téé na càháⁿ ndihi-dé ìⁿ ñadihí te ìⁿ-ná yiqui cùñú cùú-yu”, duha càchí-xi.

17 Te ducaⁿ sãtnahá-xi cùu nchaa ñáyiú tnàhá tnúhu ndihi Xítohó Jesucristú, chi ìⁿ-ná cùú-yu ndihi-gá.

18 Te núu xiáⁿ càháⁿ-í dóho-ndo sá vá cùndècu-ndo ichi díí ìní, chi núu ducaⁿ na càda-ndo te ñá túú tnàhí sá váha cùu-xi sá cùú-xí yiqui cùñú-ndó chi ío dàcuíta ni-hnu-xi yiqui cùñú-ndó. Te nchaa dava-gá sá cuéhé sá dúhá ñá túú quide-xi yiqui cùñú-ndó dátá quidé xiáⁿ.

19 Te nchòhó sa cùtnuní iní-ndó sá yiqui cùñú-ndó cùu-xi dátá ìⁿ vehe núú ndécú Espiritú Yá Ndióxi. Te ducaⁿ sãtnahá-xi cùu yiqui cùñú-ndó chi ndècu-ndo ndihi Espiritú-gá. Te mee-gá ní taxi-gá Espiritú-gá ndécú ndihi-ndo, te ñá díú mée-ndo cuu cuendá-ndó mée-ndo chi Yá Ndióxi cùú cuèndá ñahá-gá xii-ndo.

20 Te ducaⁿ cùu-ndo ñáyiú cùu cuendá Yá Ndióxi chi Xítohó Jesucristú ní nacháhu-gá nchaa yíca cuéchi-ndo. Te núu xiáⁿ xiní ñùhu-xi sá nihí ní ndúú-ndó càda-ndo nacuaa cuu càhnu Yá Ndióxi, te ducaⁿ tàu-xi cada-ndo chi espíritú-ndó ndihi yiqui cùñú-ndó cùu-xi cuendá-gá.

7

Sáhu sá cùú-xí ñáyiú ní tnándaha

1 Te ní quexio tütú sá ní dáquixí-ndó ndàha-í, te vitna na càchí tnúhu-í xii-ndo cuèndá tnúhu càháⁿ-ndó núú tütú-ndó. Te

váha cada-xi te núu vá cándèca tée ñadhí, te ducaⁿ-ni váha cada-xi te núu ñáyiú ñíhí vá cándècá-yu tée.

² Te dicó-ni sá núu ducaⁿ na càda-ndo te dava-ndo caní iní-ndó cùndecu-ndo ichi ñíhí iní. Núu xláⁿ xíní ñùhu-xi sá ncháá cuè tée ndi ñíhí cùndecu ñadhí-güedé, te ducaⁿ-ni tucu nchaa cue ñáyiú ñíhí ndi ñíhí cùndecu yíi-yu.

³ Te càchí tnúhu-í xii-ndo sá ncháá cuè tée vá cúú càchí-güedé sá vá cúú cãháⁿ ndihí-güedé ñadhí-güedé, te ñíu-ni ducaⁿ cuè ñáyiú ñíhí tucu, vá cúú càchí-yu sá vá cúú cãháⁿ ndihí-yu yíi-yu.

⁴ Te nchaa cue ñáyiú ñíhí chi ñá ñíú mèe-ní-yu cùu cuendá-yu yiqui cùñú-yu chi tnàhá cúú cuendá yíi-yu, te ducaⁿ-ni ncháa cue tée tucu chi ñá ñíú-ni mèe-güedé cúú cuendá-güedé yiqui cùñú-güedé chi tnàhá cúú cuendá cue ñadhí-güedé.

⁵ Te cue tée vá cúú càchí-güedé sá vá cúú cãháⁿ ndihí-güedé ñadhí-güedé. Te ni cuè ñáyiú ñíhí vá cúú càchí-yu sá vá cúú cãháⁿ ndihí-yu yíi-yu. Àdi te núu ní ndatnúhu-yu sá vá dúcáⁿ càdá-yu ñíú ùú nduu cuendá sá cuíní-yu ío cãháⁿ ndihí-yu Yá Ndiöxí, dico ná yáha núu ná daha nduu ducaⁿ ní ndatnúhu-yu sá vá dúcáⁿ càdá-yu te naníhí tnàhá tucú-yu, chi núu ñáhá te cudana te vá cuacàhnu iní-yu te sácuhlñá dacãháⁿ ñáhá-xí xii-yu cadá-yu sá ñá túú tàú-yu cadá-yu.

⁶ Te tnúhu cãháⁿ-í-a quèe-xi sá tée ndihí ñadhí cuu candeca tnàhá-yu dico ñá túú quide yica-í sá dúcáⁿ càdá-yu.

⁷ Te yúhú sání iní-í sá núu dicó sá cúú te nchaa-ndo cùndecu-ndo datná ndécú-í, dico ñáhá chi mee Yá Ndiöxí ní cachí-gá nacuáa nduu táhú-ó ñíú ñíú-ó cundecu-o, chi dava-o ní cutáhú-ó núú-gá sá cùndecu ñadhí-ó te dava-o ñáhá.

⁸ Te càchí tnúhu-í xii nchòhó cue tée vátá ñíhí-gá ñadhí-xi sá váha-gá sá núu vá cùndecu ñadhí-ndó datná yúhú. Te ducaⁿ-ni nchòhó cue ñáyiú ñíhí ñáyiú vátá ñíhí-gá yíi-xi sá váha-gá sá núu vá cùndecu yíi-ndo. Te ñíu-ni duha cãháⁿ-í sá cúú-xi ncháa nchòhó ñáyiú ñíhí ní quendóo quèe sá váha-gá sá núu vá cándèca-gá-ndó tée.

⁹ Te càchí tnúhu-í xii nchaa-ndo sá núu xito-ndo sá vá cùndèe iní-ndó cùndecu mee-ndo te váha-gá sá núu tnándaha-ndo, te ñá ñíú sá mèe-ní caní cuehé caní duha iní-ndó cùndecu-ndo.

¹⁰ Te nchaa nchòhó ñáyiú sa ní tnándaha cãháⁿ-í dóho-ndo, te ñá ñíú mèe-í duha càhu iní-í cãháⁿ-í dóho-ndo chi Xítohó Jesucristú ducaⁿ dàcahu iní ñáhá-gá xii-í, chi mee-gá cuíní-gá cada-ndo nacuáa na cãháⁿ-í-a.

Te nchaa nchòhó cue ñáyiú ñíhí cãháⁿ-í dóho-ndo sá vá dáñá-ndó yíi-ndo.

¹¹ Te núu ío dava-ndo sá ní dáñá-ndó yíi-ndo, te xini ñùhu-xi sá vá cándèca-gá-ndó tée, chi cundecu mee-ná-ndó àdi núu ñáhá te naqueheⁿ tucu-ndo tée ní cuu yíi-ndo. Te nchaa nchòhó cue tée ndècu ñadhí-xi cãháⁿ-í dóho-ndo sá vá dáñá-ndó ñáyiú cùu ñadhí-ndó.

¹² Te tnúhu na cãháⁿ-í-a cùu-xi sá ní sani iní mèe-í te ñá ñíú tnúhu sá ní cachí Xítohó Jesucristú cãháⁿ-í cúú-xi. Te núu dava nchòhó cue tée ndècu ichi Xítohó Jesucristú ndécá-ndó ñáyiú ñíhí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo.

¹³ Te núu dava nchòhó cue ñáyiú ñíhí ñáyiú ndècu ichi Xítohó Jesucristú ndécá-ndó cuè tée ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñáha-güedé xii-ndo.

¹⁴ Te núu ñíú tée ñá túú sàndáa iní-dé Xítohó Jesucristú te ñadhí-dé sàndáa iní ñáhá-áⁿ xii-gá, te tée-áⁿ ní cuu-dé ñíú tée sa ní cuyatni tnàhá tnúhu ndihí ñáha xii-gá sá cuendá ñadhí-dé. Te ducaⁿ sãtnahá-xi cùu tucu ñadhí ñá túú sàndáa iní ñáhá xii Xítohó Jesucristú te yíi-aⁿ sàndáa iní ñáhá-dé xii-gá, te ñáha-áⁿ sa ní cuyatni tnàhá tnúhu-aⁿ ndihí-gá sá cuendá yíi-aⁿ, te ñíu-ni ducaⁿ sãtnahá-xi cùu cue landú-yu chi sa ní cuyatni tnàhá tnúhu-güexi ndihí-gá. Te núu vá dúcáⁿ cùu te cue landú-yu-áⁿ ío xica cùndecu-güexi núú-gá.

¹⁵ Te núu ñíú tée ñá túú sàndáa iní ñáhá xii Xítohó Jesucristú cuíní-dé ñáha tnàha-dé ndihí ñadhí-dé ñáha sàndáa iní ñáhá xii Xítohó Jesucristú, te ñíu-ni na càda-dé nacuáa sãni iní-dé. Te ñíu-ni ducaⁿ tucu te núu ñadhí ñáha ñá túú sàndáa iní ñáhá xii Xítohó Jesucristú cuíní-aⁿ ñáha-aⁿ tée sàndáa iní ñáhá xii-gá, tée cùu yíi-aⁿ te ñíu-ni na càda-aⁿ nacuáa sãni iní-aⁿ. Chi tée sàndáa iní ñáhá xii Xítohó Jesucristú ñá túú tàú-dé cada yica-dé ñadhí-dé cundecu ndihí ñáha-aⁿ xii-dé te núu ñá túú cuíní-aⁿ. Te ñíu-ni ducaⁿ ñadhí ñáha sàndáa iní ñáhá xii-gá ñá túú tàú-aⁿ cada yica-aⁿ cùndecu ndihí ñáha yíi-aⁿ xii-aⁿ te núu ñá túú cuíní-dé cundecu ndihí ñáha-dé xii-aⁿ, chi Yá Ndiöxí cuíní-gá sá ncháá nchòhó ñáyiú ndècu ichi-gá cundecu váha-o vá nãá-ó.

¹⁶ Chi cue tée sàndáa iní tnúhu Xítohó Jesucristú ñá túú cùtnuní iní-güedé te núu ndacu-güedé canu ichi-güedé ñadhí-güedé ichi-gá àdi ñáhá te núu ñá túú sàndáa iní ñáhá-yu xii-gá, te ducaⁿ-ni cuè ñáyiú ñíhí sàndáa iní tnúhu Xítohó Jesucristú ñá túú cùtnuní iní-yu te núu ndacú-yu canu ichí-yu yíi-yu ichi-gá àdi ñáhá te núu ñá túú sàndáa

iní ñáhá-güedé xii-gá.

17 Te duha na cächí tnúhu-í xii-ndo, nchaa chiúⁿ ní nduu táhú-ndó núú Yá Ndióxi quidé-ndó ndéé cútñáhá ní cáháⁿ ñáhá-gá xii-ndo ní natuha-ndo ichi-gá te diu-ni chiúⁿ-áⁿ cada-ndo cündecu-ndo. Te nchaa xichí núú tàcá ñáyiú dâcuaha tnúhu-gá diu-ni duha cáháⁿ-í dóho-yu.

18 Te nchaa cue téé ndècu señá ñi-xi dátñá ní cachi ndíi Moisés, cue téé ní cáháⁿ Yá Ndióxi ndécú ichi-gá, te diu-ni ducaⁿ cünduu-güedé cundecu-güedé, te nchaa cue téé ñá túú ndècu señá ñi-xi ní cáháⁿ-gá cundecu ichi-gá, diu-ni ducaⁿ cünduu-güedé cundecu-güedé vá cuáha-güedé señá ñi-güedé.

19 Te iⁿ-ni cùu-xi cuéi na cuáha-o señá ñi-o àdi vá cuáha-o. Te sá ïo-gá xíní ñùhu-xi cada-o xiáⁿ cúu-xí sá cádá-ó ncháa nacuaá cuiní Yá Ndióxi.

20 Chi xini ñùhu-xi sá cündècu-ni-o datná ndécú-ó cútñáhá ní cáháⁿ ñáhá Yá Ndióxi xii-o ní ngündecu-o ichi-gá.

21 Te núu cùu-ndo ñáyiú ñá túú tnàhí dañá quee núú chíúⁿ patróóⁿ-xi cútñáhá ní cáháⁿ ñáhá Yá Ndióxi xii-ndo, te ñá túú nã caní iní-ndó, dico núu dañá ñaha patróóⁿ-ndó quèe-ndo núú chíúⁿ-ndó te váha-ni quee-ndo núú chíúⁿ-ndó.

22 Te sátá ní cáháⁿ ñáhá Xitohó Jesucristú xii nchòhó ñáyiú ducaⁿ ñá túú tnàhí dañá quee núú chíúⁿ patróóⁿ-xi-áⁿ, te ní cuu-ndo dátñá ñáyiú dañá queé núú chíúⁿ patróóⁿ-xi sá cúu-xí-gá, te ducaⁿ chí ñá túú-gá ndécú-ndó ichi cuehé ichi duha. Te nchòhó ñáyiú dañá queé núú chíúⁿ patróóⁿ-xi cùu-ndo datná ñáyiú ñá túú tnàhí dañá quee núú chíúⁿ patróóⁿ-xi sá cúu-xí Xitohó Jesucristú, te ducaⁿ chí xinu cuechi-ná-ndó núú-gá.

23 Te Yá Ndióxi ní nduu cuendá ñáhá-gá xii-o chí Xitohó Jesucristú ní nacháhu-gá nchaa yícá cuèchi-o sá ndécú núú Yá Ndióxi ní cùu, te vá dañá-ndó sá tnàha ñáyiú-ndo nàdatuhú iní ñáhá-yu xii-ndo vá cúnú cuèchi-ndo núú Xitohó Jesucristú nàcuáa tãu-xi cunduu.

24 Te núu xiáⁿ cächí tnúhu-í xii nchaa nchòhó ñáyiú ndècu ndihí-í ichi Xitohó Jesucristú sá cündècu-ni-ndo datná-ni ndècu-ndo ndéé cútñáhá ní cáháⁿ ñáhá-gá xii-ndo, te diu-ni ducaⁿ cündecu-ndo ichi-gá.

25 Te cächí tnúhu tucu-í xii-ndo sá Xitohó Jesucristú ñá túú cächí tnúhu-gá xii-í núu nása cáháⁿ-í cuendá nchaa ñáyiú vátá tnándaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu cáháⁿ-í chí Xitohó Jesucristú chindèe chítúu ñaha-gá xii-í.

26 Te yúhú cächí-í sá sá cuendá nchaa tnúndòho tnúhu ndàhú íó ñuyúú-a vitna,

te váha-gá sá ncháá ñáyiú te núu nása Xíndecú-yu te ducaⁿ-ni na cündecú-yu.

27 Te nchaa cue téé ndècu ñadihí-xi te ducaⁿ-ni na cündecu-güedé ndihí-yu, te nchaa cue téé ñá túú ñadihí-xi te ducaⁿ-ni na cünduu-güedé vá ndúcú-güedé ñadihí-güedé.

28 Dico nchaa cue téé na ndùcu ñadihí-xi te ñá díú iⁿ cuèchi cùu-xi sá dúcáⁿ ná ndùcu-güedé ñadihí-güedé, te diu-ni ducaⁿ cùu tucu cue ñáyiú dihí te núu na nihí-yu yí-yu chí ñá díú iⁿ cuèchi cùu-xi sá dúcáⁿ nihí-yu yí-yu. Te núu cue téé na nihí-güedé ñadihí-güedé te nándi ndohó-yu cundecú-yu ñuyúú-a, te núu xiáⁿ duha cáháⁿ-í cuendá sá vá ndúcú-güedé ñadihí-güedé cuendá sá vá ndòhó-yu.

29 Te nchaa nchòhó ñáyiú ndècu ndihí-í ichi Xitohó Jesucristú na cächí tnúhu-í xii-ndo sá ñá túú-gá vãi nduu cumání te quixi tucu Xitohó Jesucristú, núu xiáⁿ xíní ñùhu-xi sá ndéé vitna ngúita nchaa cue téé ndècu ñadihí-xi cada-güedé chiúⁿ Xitohó Jesucristú, te cada-güedé dátñá sá ñá túú ñadihí-güedé.

30 Te nchaa ñáyiú ndihú iní-xi te na cáda-ní-yu sá ñá túú ndihú iní-yu cada-yu chiúⁿ Yá Ndióxi. Te nchaa ñáyiú cùdíí iní-xi te na cáda-ní-yu sá ñá túú cùdíí iní-yu cada-yu chiúⁿ-gá, te nchaa ñáyiú ndècu ndihí nándi sá ndécú ndihí te na cáda-ní-yu sá ñá túú ná ndécú ndihí-yu cada-yu chiúⁿ-gá.

31 Te nchaa ñáyiú nèhe chiúⁿ nchaa sá íó ñuyúú-a te na cáda-ní-yu cuendá sá ñá túú ná nèhé chiúⁿ-yu cada-yu chiúⁿ Yá Ndióxi, chí nchaa sá íó ñuyúú-a sa ñùhu-xi ichi cuáháⁿ-xi núú ndíhí nihnu-xi.

32 Te cuiní-í sá vá cùhúⁿ iní-ndó nándi sá íó ñuyúú-a, te ni ñá túú tnàhí ná caní iní-ndó cündecu-ndo, chí nchaa cue téé ndècu ichi Xitohó Jesucristú Xíndecu mee ío ñùhu iní-güedé cada-güedé chiúⁿ-gá nàcuáa cudíu-güedé núú-gá.

33 Te nchaa cue téé sa ndècu ñadihí-xi cue téé ndècu ichi-gá ñùhu iní-güedé nàcuáa cada-güedé cundecu-güedé ñuyúú-a cuendá ducaⁿ cùdiu-güedé núú ñadihí-güedé.

34 Te diu-ni ducaⁿ cùu tucu cue ñáyiú dihí chí ñá túú iⁿ-ni cuu ñáyiú sa ndècu yí-xi ndihí ñáyiú vátá cündècu-gá yí-xi, chí ñáyiú ndècu ichi Xitohó Jesucristú ñá túú ndèca téé ío ñùhu iní-yu cada-yu chiúⁿ-gá nàcuáa nihí ní ndúú-yu cundecu yíñuhú-yu núú Yá Ndióxi, dico cue ñáyiú dihí ndécá téé ndècu ichi-gá ío ñùhu iní-yu nàcuáa cundecú-yu ñuyúú-a cuendá cudíu-yu núú yí-yu.

35 Te duha cáháⁿ-í cuendá cúu-xí iⁿ sá váha xii-ndo, te cudíu núú tnáhá-ndó, te cuu-ndo ñáyiú cada ndáá núú Xitohó Jesucristú, te

mee-ni-gã cuhuⁿ iní-ndó. Te ñá díú sã dúhá càháⁿ-í te quide yica-í sã cáda-ndó nãcuáa càháⁿ-í.

³⁶ Te núu ío dava-ndo sãni iní-ndó sã ñã túu ndũu váha-xi sã ío cuu sacuéhé dẽhe yoco-ndo cundecú-yu ñã, te núu sãni iní-ndó sã váha-gã candecá-yu tée te cada-ndo nãcuáa sãni iní-ndó, chi ñá díú ñⁿ cuéchi cùu-xí.

³⁷ Te núu dava-ndo ndècu déhe yoco-ndo, te vá yõo ñⁿ cada yica ñãha xii-ndo sã cándecá-yu tée. Te núu mee-ndo sãni váha iní-ndó nãcuáa cada-ndo, te núu vá dásáⁿ-ndó déhe yoco-ndo càndeca ñãha tée te quide váha-ndo sã dúcáⁿ quide-ndo.

³⁸ Te nchaa ñáyiu dásaⁿ déhe yoco-xi càndeca ñãha tée te váha-ni quidé-yu, te nchaa ñáyiu ñá túú dásaⁿ déhe yoco-xi càndeca ñãha tée te váha-gã tucu quidé-yu sã dúcáⁿ quidé-yu.

³⁹ Te nchaa ñáyiu ñã ní ndécú yí-xi xini ñũhu-xi sã cundècu-ní-yu ndíhi yí-yu nini ndècu vívú-güedé chi ducaⁿ càháⁿ tnũhu sã dãnèhé ñãhá xii-o nacuaá cada-o cundecu-o, dico núu na cùu-güedé te cuu naquehéⁿ-yu ingá tée candecá-yu dicó-ní sã ñã-ni tée ndècu ichi Xitohó Jesucristú.

⁴⁰ Te yúhú sání iní-í sã ío-gá váha cundecú-yu te núu vá nánducú-yu ingá tée candecá-yu, te duha càháⁿ-í chi Espiritú Yã Ndióxi ducaⁿ dàcahu iní ñãhá-xí xii-í càháⁿ-í.

8

Cuendá nchaa sã nchító-ó sãñaha ñáyiu ndũu táhú nchaa sã càchi-yu cùu ndiόxi

¹ Te vitna na càháⁿ-í cuendá nchaa sã nchító-ó sãñaha ñáyiu ndũu táhú nchaa sã càchi-yu cùu ndiόxi te ñã ndáa chi dicó ndaha cue tee ñuyúⁿ-a ní cuáha nchaa xiáⁿ. Te nchoo sã cùtnuní váha iní-ó cuendá nchaa xiáⁿ, dicó-ní sã cuendá nchaa sã cùtnuní váha iní-ó xiáⁿ quidé càhnu-o mee-o, dico núu cùu iní-ó tnãha ñáyiu-o te canu ichi-ò-yu ichi váha.

² Te núu dava-ndo sãni iní-ndó sã túha-ndo dico cùu-ndo ñáyiu vátã cútũha-gã nãcuáa tãú-xi cunduu.

³ Te núu nchòhó cùú iní-ndó Yã Ndióxi te mee-gã càháⁿ-gã sã cùu-ndó ñáyiu cùu cuendá-gã.

⁴ Te vitna na càchi tnũhu-í xii-ndo nãcuáa ndũu cuendá nchaa sã nchító-ó sãñaha ñáyiu ndũu táhú nchaa sã càchi-yu cùu ndiόxi te ñã ndáa chi dicó ndaha cue tée ñuyúⁿ-a ní cuáha nchaa xiáⁿ. Te nchoo cùtnuní iní-ó sã ncháa sã càchi ñáyiu cùu ndiόxi càdũha-yu ñuyúⁿ-a ñá túú cùu-xi ndiόxi, chi ñⁿdi díⁿ-ni Yã Ndióxi ndécú.

⁵ Te cue ñáyiu ñuyúⁿ-a càchi-yu sã cuéi andũu te cuéi ñuyúⁿ-a ndècu titní ndiόxi. Te ndáa sã ndèni ní cuu ndècu espíritú sã càchi

ñáyiu cùu ndiόxi te ñã ndáa sã ndiόxi cùu-xí, te nchaa xiáⁿ táxi tnuní ñãhá-xí xii-yu.

⁶ Te nchoo cùtnuní ndáa iní-ó sã ñⁿdi díⁿ-ni Yã Ndióxi ndécú te ñã-gã cùu-gã Tãtã-ó, te nchoo cùu-o ñáyiu cùu cuendá-gã. Te ñã-ni mee-gã ní táuchíⁿ-gã ní cuáha nchaa sã ío ñuyúⁿ-a, te cùtnuní tucu iní-ó sã ñⁿdi díⁿ-ni Xitohó Jesucristú ndécú, te Yaa-áⁿ ní quide-gã nchaa chũuⁿ ní táhú Dütú Ndióxi ní cadũha-gã nchaandi túhú sã ío ñuyúⁿ. Te ñã-ni mee Xitohó Jesucristú quidé ndècu-o ichi-gã vitna.

⁷ Te ñã ncháa nchòhó ñáyiu ndècu ichi Xitohó Jesucristú cùtnuní iní-ndó nãcuáa ndũu tnũhu càháⁿ-í. Chi sã ní cáaⁿ-ndo quide cahnu-ndo nchaa sã càchi-yu cùu ndiόxi ní cùu. Te cuendá xiáⁿ núu nãqueheⁿ-ni-ndo nchaa sã nchító-ó ndũu táhú nchaa sã càchi-yu cùu ndiόxi-áⁿ xéxi-ndó, te sãni-ni iní-ndó sã quidé càhnu-ndo nchaa sã càchi-yu cùu ndiόxi-áⁿ te ñã ndáa sã ndiόxi cùu-xí. Te núu sãni iní-ndó sã ñã túú váha caxi-ndo sã dúcáⁿ ndũu táhú-xi-áⁿ te xéxi-ndo te xiáⁿ ñá túú cùu váha iní-ndó cuendá sã dúcáⁿ quide-ndo.

⁸ Te ñã díú nchaa sã xéxi-ó quide-xi cudiú-o núú Yã Ndióxi, chi ñⁿ-ni quide-xi cuéi na càxi-o ádi vá càxi-ó chi ní ñⁿ sã càxi-ó vá chindèe ñãha-xi cudiú-o núú Yã Ndióxi. Te cuéi vá càxi-ó dico ñã díú xiáⁿ cada sã vá cudiú-o núú-gã.

⁹ Te cuu-ní caxi-ndo nchaa nání nihí-ndó. Te dicó-ni sã càda cuendá-ndó sã ñã díú cuendá sã xéxi-ndó-áⁿ cuíta nihnu dava ñáyiu ndècu ndíhi-ndo ichi Xitohó Jesucristú cada-yu nándi sã cáda-yu nãcuáa vá cùú váha iní Yã Ndióxi chi ñáyiu-áⁿ ñã túú cùtnuní iní-yu.

¹⁰ Te nchòhó ñáyiu xini váha cuendá nchaa sã càchi-yu cùu ndiόxi, te núu na quihíⁿ-ndó núu ndécú nchaa xiáⁿ te ngóo-ndo càxi-ndo nchaa sã ní cutáhu-xi, te quini ñáyiu ndècu ndíhi-ndo ichi Xitohó Jesucristú, ñáyiu vátã cùtnuní-gã iní-xi nãcuáa ndũu cuendá nchaa sã dúcáⁿ càchi-yu cùu ndiόxi-áⁿ, te cuéi sãni iní-yu sã ñã túú quide váha-ndo sã dúcáⁿ quide-ndo te cudana te cada yicá-yu caxi-yu tnãha-yu nchaa sã dúcáⁿ ní nduu táhú nchaa sã càchi-yu cùu ndiόxi-áⁿ te ñã ndáa sã ndiόxi cùu-xí.

¹¹ Te núu ducaⁿ cùtnuní iní-ndó nãcuáa ndũu cuendá nchaa xiáⁿ te ducaⁿ quide-ndo, te sã dúcáⁿ quide-ndo-áⁿ te dàcuíta nihnu-ndo dáva-gã ñáyiu ndècu ndíhi-ndo ichi Xitohó Jesucristú, ñáyiu vátã cùtnuní-gã iní-xi nãcuáa ndũu cuendá nchaa xiáⁿ, te ñã-ni cuendá tnãhá ñáyiu-áⁿ ní xihí Xitohó Jesucristú.

¹² Te sã dúcáⁿ quide-ndo-áⁿ cùu-xí ñⁿ cuéchi núú Xitohó Jesucristú, chi quide-ndo nãcuáa xinu iní-yu cada-yu ñⁿ sã sání iní-yu

ñá túú vâha, núu xiáⁿ ñá túú quide váha-ndo sá cúú-xí-yu.

¹³ Te núu yúhu cútñuní iní-í sá sá cuendá ìⁿ sá cáxi-í te ngóo ìⁿ ñáiyu ndècu ndihí-í ichi Xitohó Jesucristú cada-yu ìⁿ sá vâ cúú váha iní Yá Ndióxi, te váha-gá sá vâ cáxi-gá-í xiáⁿ cuendá sá vâ cáda-yu ìⁿ sá vâ cúú váha iní-gá.

9

Nchaa sá cúú càda cue téé ní táuchúúⁿ Xitohó Jesucristú cáháⁿ tnúhu-gá

¹ Te yúhu chi cuu cada-í nchaa sá sání iní-í, chi tnáhá-í ní táuchúúⁿ Xitohó Jesucristú cáháⁿ-í tnúhu-gá núú ñáiyu. Te yúhu ní ximí núú-í Xitohó Jesucristú Yáá cúú Xitohó-ó te nchòhò cúú-ndó ñáiyu ní sándáá iní tnúhu-gá sá cáháⁿ-í te ducaⁿ chi ndècu ndihí-í-gá.

² Te ió dava ñáiyu ñá túú sándáá iní-yu sá Xitohó Jesucristú ní táuchúúⁿ-gá cáháⁿ-í tnúhu-gá, dico nchòhò chi cútñuní ndáá iní-ndo sá díú-gá ní tendaha ñaha-gá xii-í xicá cùu-í cáháⁿ-í tnúhu-gá, te ducaⁿ chi yúhu ní cáháⁿ-í tnúhu-gá núú-ndó te ní sándáá iní-ndó-gá te xiáⁿ cútñuní sá díú-gá ní tendaha ñaha-gá xii-í xicá cùu-í cáháⁿ-í tnúhu-gá núú ñáiyu.

³ Te duha ndùu tnúhu cáháⁿ-í cuendá cundèdòho nchaa ñáiyu sàtnuhu ñaha xii-í.

⁴ Chi yúhu cuu-ni caxi-í nchaa núú sá cúú cáxi-o na taxi ñáiyu.

⁵ Te cuu-ni cundecu ñadhí-í te caca ndeca-í-yu nchaa núú xicá cùu-í cáháⁿ-í tnúhu Yá Ndióxi dàtná quidé dàva-gá cue téé cáháⁿ tnúhu-gá, ndihi cue téé cùu ñaní Xitohó Jesucristú, ndihi té Pèlù.

⁶ Te tnàhá yúhu ndihi té Bèé cuu dañá-ndí chiúⁿ quide-ndí te cada-ndí dàtná xiquide dava-gá-güedé cáháⁿ-güedé tnúhu Xitohó Jesucristú.

⁷ Te nchoo xini-ó sá ncháá cuè sandadú dacuití sá ñúhú yáhu-güedé xinú cuèchi-güedé, te ñá túú dicó ducaⁿ xinú cuèchi-güedé. Te ducaⁿ sàtnahá-xi cùu tucu ñáiyu xitu ìⁿ sá xítu chi dacuití ñihí-yu ìⁿ sá xítu-yu xéxi-yu, te ñá díú dicó ducaⁿ xitú-yu. Te ducaⁿ cùu tucu cue téé cùu toli chi quihni-güedé dícu quiti xito-güedé xihí-güedé te ñá túú dicó ducaⁿ xito-güedé-di.

⁸ Te vâ cání iní-ndo sá sá dúhá cáháⁿ-í te càhu iní mèé-í duha cáháⁿ-í, chi tnúhu cáháⁿ-í-a ìⁿ ni quèe-xi ndihi tnúhu ní cáháⁿ ndíi Moisés.

⁹ Chi ndí-áⁿ ní chidó tñuní ndíi núú tütú ndúú nàcuáa ní xáhaⁿ Yá Ndióxi xii ndíi, te càchí-xi: “Vâ chíhí-ndó ñunu yuhu ndicutu oré danchihí-di triú”, duha càchí-xi núú tütú ndíi. Te ñá díú sá dúcáⁿ ní cáháⁿ Yá Ndióxi te cáháⁿ-gá mee-ni cuendá ndicutu-áⁿ.

¹⁰ Chi ní cáháⁿ-gá cuendá nchoo cuè ñáiyu ndècu ichi-gá, te ndáá sá díú cuendá-ó dúcáⁿ ní cáháⁿ-gá. Te nchaa cue téé xitu chíhi tató sàni iní-güedé sá díú tátá chíhí-güedé-áⁿ cuu sá cáxi-güedé, te ñu-ni ducaⁿ cùu tucu cue téé xicani triú chi càni-güedé cuendá quee caxi-güedé.

¹¹ Te ducaⁿ sàtnahá-xi cùu nchúhú cue téé cáháⁿ tnúhu Xitohó Jesucristú, chi dānehé ñáhá-ndí xii-ndo cuendá nchaa sá váha quide ñaha Yá Ndióxi xii-o, núu xiáⁿ dai tǎu-xi sá nchòhò chindee-ndo nchúhú cue téé ní sanu ichi ñaha xii-ndo ichi-gá.

¹² Te núu dava cue téé cáháⁿ tnúhu Yá Ndióxi chindèe-ndo-güedé, te uuⁿ-gá ducaⁿ tǎu-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tǎu ndisa-ndo sá chindèe ñaha-ndo xii-ndí dico ñá túú dúcáⁿ cáháⁿ-ndí núú-ndó càda-ndo, te quide cahnu iní-ndí cuèi nāndi sá tá yāha-ndí véxi. Te ducaⁿ quide-ndí cuendá sá ñá túú nā caní iní ñáiyu cuendá-ndí te ducaⁿ cuita cutēnuu-gá tnúhu sá cáháⁿ nācuāa naníhí tǎhú-ó quihíⁿ.

¹³ Te nchòhò xini-ndó sá ncháá cuè téé xinú cuèchi veñúhu ñu-ni xiáⁿ ñihí-güedé xéxi-güedé, te ñu-ni cue téé-áⁿ xinú cuèchi-güedé núú xihí quiti ndùu tǎhú Yá Ndióxi, te ñu-ni xiáⁿ ñihí tucu-güedé sá xéxi-güedé.

¹⁴ Te ñu-ni ducaⁿ sàtnahá-xi cùu nchúhú cue téé cáháⁿ tnúhu sá cáháⁿ nācuāa naníhí tǎhú-ó, chi Xitohó Jesucristú ní cachí-gá sá díú-ní cuendá chiúⁿ quide-ndí ñihí-ndí caxi-ndí.

¹⁵ Te ñá ñⁿ ndùu cáháⁿ-í núú-ndó càda-ndo nācuāa tǎu-xi cunduu sá cúú-xi-í, te vā cání iní-ndó sá sá dúhá cáháⁿ-í te ñⁿ sá xicáⁿ-í núú-ndó. ¡Chi cuèi na cùú-í sá ndòhò-í te ñá díú sá cáháⁿ ñáiyu sá sá cuendá sá cáháⁿ-í tnúhu Xitohó Jesucristú ñihí-í xéxi-í!

¹⁶ Te yúhu ñá túú quide cahnú-í mèé-í sá cáháⁿ-í tnúhu sá cáháⁿ nācuāa naníhí tǎhú-ó, chi tǎu tnáhá-í sá cáda-í chi ducaⁿ ní cachí Yá Ndióxi cada-í. ¡Te ndáhú ní cuu yúhu te núu vā cáháⁿ-í tnúhu-áⁿ!

¹⁷ Te ñá túú cáháⁿ-í tnúhu-gá sá cúú iní mèé-í chi mee-gá ní táuchúúⁿ-gá cáháⁿ-í tnúhu-gá. Te núu cáháⁿ-í tnúhu-gá sá cúú ñni mèé-í te tǎu-í ñihí-í sá ndúú tǎhú-í ní cùu.

¹⁸ Dico sá sá ní nduu tǎhú-í cúú-xi sá ño cùdái ñni-í sá dicó ducaⁿ cáháⁿ-í tnúhu sá cáháⁿ nācuāa naníhí tǎhú-ó. Te cuèi tǎu-í queheⁿ-í sá táxi-ndó ndùu tǎhú-í sá cuendá sá cáháⁿ-í tnúhu Xitohó Jesucristú, dico ñá túú dúcáⁿ quide-í.

¹⁹ Te sá dúcáⁿ dicó ducaⁿ cáháⁿ-í tnúhu sá cáháⁿ nācuāa naníhí tǎhú-ó, xiáⁿ ní ñⁿ ñáiyu ñuyúú-a vā cúú càchí-yu sá táxi tñuní ñáhá-yu xii-í, te cuèi ducaⁿ dico mee-í ní sanu

iní-í sá cùu-í dàtná ìᵃ tée xinu cuechi núu nchàa ñáyiú cuendá ducaⁿ cuíta cuu vai-yu tuhá-yu ichi Xítohó Jesucristú quíhíⁿ.

²⁰ Te òrè ñúhú tñahí tnuú cue ñáyiú isràél te quide-í sá ìᵃ-ní cùu-í ndihí-yu cuèi ñá túú nchìcúⁿ nihnu-í tñuhu ní cáháⁿ ndíi Moisés, te ducaⁿ quide-í cuendá sá ñáyiú-áⁿ quindáá iní-yu tñuhu càháⁿ-í te tuhá-yu ichi Xítohó Jesucristú.

²¹ Te òrè ñúhú tñahí tnuú nchaa ñáyiú ñá túú nchìcúⁿ nihnu tñuhu ní cáháⁿ ndíi Moisés, te quide-ní-í sá quide-í dàtná quide mèe-yu cuendá quindáá iní-yu tñuhu càháⁿ-í, te tuhá-yu ichi Xítohó Jesucristú. Te cuèi ducaⁿ quide-í dico ñá túú dàña ndeé-í quide-í nchaa nàcuáa cuiní Yá Ndióxi cada-o, te ducaⁿ chi nchìcúⁿ nihnu-í quide-í nchaa nàcuáa càháⁿ Xítohó Jesucristú.

²² Te òrè ndécù-í ndihí nchaa ñáyiú ñá túú cùtnuní váha iní-xi nàcuáa cundecu ichi Xítohó Jesucristú, te tñahá-í quide-í dàtná quide-yu cuendá sá ná tedóho-yu nchaa tñuhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ìᵃ-ní cuu-í ndihí-yu cuendá ducaⁿ nihí-í nàcuáa cada-í te cundecóho-yu tñuhu càháⁿ-í te tñá-yu ichi Xítohó Jesucristú te naníhí tñáhu-yu.

²³ Te duha quide-í cuendá sá cuíta quindáá iní-yu tñuhu sá càháⁿ nàcuáa naníhí tñáhu-ó quíhíⁿ, te ducaⁿ te tñahá yúhú ío váha cundecu-í dàtná càháⁿ tñuhu-áⁿ.

²⁴ Te nchòhó sa xini-ndó sá ncháá cue tée xinu quíhu màrcúhyú nchaa-güedé xínú-güedé, dico ìᵃ-ní-dé cúú tée ndàcu ngodó núú te tée-áⁿ cúú tée nihí sá ndúú tñáhu-xi, te ducaⁿ xini ñuhu-xi cada nchohó tucu chi cada-ndo nchàa nàcuáa cuiní Yá Ndióxi cada-ndo cuendá ducaⁿ nihí-ndó sá ndúú tñáhu-ndó.

²⁵ Te nchaa cue tée xini dadíqui te váha váha quide cuendá-güedé núu ná cúú sá cáda tñèñu te xòcani-güedé cuendá sá ñà díú xíáⁿ cada te cuíta-güedé òrè dadíqui-güedé. Te ducaⁿ quide-güedé cuendá cuiní-güedé nihí-güedé sá ndúú tñáhu-güedé, te sá ndúú tñáhu-güedé-áⁿ cúú-xí ìᵃ sá ndíhí nihnu ñuyíú-a. Dico nchoo ndúcu ndee-o quide-o nàcuáa nihí-ó sá ndúú tñáhu-ó, te xíáⁿ cudí-xi cundecu ndihí-o ní caa ní quíhíⁿ.

²⁶ Te yúhú quide-í dàtná quide cue tée xinu, chi cue tée-áⁿ xini-güedé núú quéxio-güedé, te quide tucu-í dàtná xíquide cue tée sa ní cutúha naá, te ñá túú quide-í dàtná quide cue tée vitna dàcuaha naá. Te ducaⁿ chi yúhú quide-í nchaa nàcuáa cuiní Yá Ndióxi cunduu.

²⁷ Te yúhú ñá túú dàña-í taxi tñuní ñáhá ní ìᵃ sá cuèhé sá dúhá xii-í chi yòtní-í mèe-í. Te ducaⁿ quide-í chi yúhú càháⁿ-í tñuhu Xítohó

Jesucristú núú ñáyiú, te cuiní-í sá vā cuíta sá ní cachí Yá Ndióxi nduu tñáhu-í.

10

Cuendá nchaa sá ní cadúha cue tée ñuyíú-a quide cahnu ñáyiú

¹ Te nchòhó ñáyiú ndècu ndihí-í ichi Xítohó Jesucristú na càchí tñuhu-í xii-ndo cuendá nchaa ñani tñahá-ndí ñáyiú isràél ní xindecu ndéé sanaha, chi vitna tñahá nchòhó cúu-ndó dàtná cue ñani tñahá nchaa ñáyiú-áⁿ chi ndècu-ndo ichi-gá. Te nchaa ñáyiú-áⁿ ní taxi ndecu Yá Ndióxi ìᵃ vícò ní dánèhé ñáhá-xí xii-yu ichi quíhíⁿ-yu, te ní quée dava ndute lámár naní Mår Tícuèhé te nchaa-yu ní yáha-yu.

² Te sá dúcáⁿ ní cuu te nchaa-yu ìᵃ-ná ní cuú-yu ndihí ndíi Moisés, te ní xíhí ndaha ñàha ndíi xii-yu.

³ Te nchaa-yu ní xexí-yu sá ní sáñaha Yá Ndióxi xii-yu.

⁴ Te ducaⁿ nchàa tucú-yu ní xihí-yu ndute sá ní sáñaha-gá xii-yu, ndute sá ní quee yiqui ñaha cava. Te cava-xáⁿ cada iní-ó sá cúu-xí dàtná Xítohó Jesucristú te ducaⁿ chi ndihí ñaha-gá xii-yu ichi cuáháⁿ-yu dàvá-áⁿ.

⁵ Dico ío vái-yu ñá túú ní quide-yu nàcuáa càháⁿ Yá Ndióxi, te xíáⁿ ñá túú ní cúu váha iní ñáhá-gá xii-yu. Te sá dúcáⁿ ní quide-yu núu xíáⁿ òrè ñúhú-yu ichi cuáháⁿ-yu xití yucu ío vái-yu ní xihí.

⁶ Te ducaⁿ ní cuu cuendá nchoo vā cànchìcúⁿ nihnu-o càda-o nàcuáa ní quide-yu, chi ñáyiú-áⁿ mee-ní nchàa sá cuèhé sá dúhá ní sani iní-yu ní quide-yu. Te nchoo xini ñuhu-xi sá vā dúcáⁿ càda-o.

⁷ Te yúhú càháⁿ-í dóho-ndo sá vā quindáá iní-ndó te ní vā cáda càhnu-ndo ní ìᵃ sá càchí-yu cúu ndiòxi ní cadúha cue tée ñuyíú-a dàtná ní quide cue ñani tñahá-ndí ní xindecu ndéé sanaha. Chi ñáyiú-áⁿ ní quide-yu dàtná càháⁿ-xi núú tütú Yá Ndióxi núú càchí-xi: “Nchaa ñáyiú ní xexí-yu ní xihí-yu ní quide-yu vico, ní quide cahnú-yu sá càchí-yu cúu ndiòxi ní cadúha-yu te ñá ndàá sá ndiòxi cúu-xí”, duha càchí-xi núú tütú-gá.

⁸ Te ní vā cundècu-ndo ichi díí iní dàtná ní quide dava ñáyiú-áⁿ, chi sá dúcáⁿ ní quide-yu te ní xihí ócò úní míl-yu ìᵃ-ní ndúu.

⁹ Te vā caní iní-ndó sá sá cahnú iní Yá Ndióxi te nándi sá cuèhé sá dúhá càda-ndo cuendá cuiní-ndó quini-ndó núu nása cada ñaha-gá xii-ndo, chi ñáyiú ní xindecu ndéé sanaha-áⁿ ducaⁿ ní xóo cadá-yu, te ní xihí-yu ní xexihaⁿ cóó.

¹⁰ Te ní vā càháⁿ cuèhé-ndó cuendá Yá Ndióxi, chi dava ñáyiú ní xindecu ndéé sanaha-áⁿ ducaⁿ ní quide-yu ní càháⁿ cuèhé-yu cuendá-gá te ní quixi espíritu xínú cuèchi núú-gá ní sahni ñaha-xi xii-yu.

11 Te ducaⁿ ní cuu te ducaⁿ ní ngúndeé núú tütú Yá Ndióxi cuendá dacuàha-o vitna ta cuyatni nduu naa ñuyú-a. Te nchaa tnúhu sá ní ngódo tnúni-án cáháⁿ dóho ñaha-xi xii-o cuendá sá vā cādá-ó dàtná ní quide ñáyiú-án.

12 Te xiáⁿ núu nchaa nchòho ñáyiú sàni iní sá ïo váha cùndáá ndécú ichi Xítóhó Jesucristú cada cuendá-ndó sá dúcáⁿ-ní cùndáá-ndó núú-gá, te vā dáná cuendá-ndó càda-ndo sá ñà túú cùu váha iní Yá Ndióxi.

13 Te ñiu-ni dàtná quidé sácúlnhá dácáháⁿ-xi iní nchaa dava-gá ñáyiú nándi quidé-yu, te ñiu-ni ducaⁿ quide ñaha-xi xii-ndo. Dico mee Yá Ndióxi cúú-gá Yáá quidé ndáá chi quide-gá nchaa sá cáháⁿ-gá, te ñà dáñá-gá sá súúni cuídó sácúlnhá coto ndeé ñáhá-xí xii-ndo, chi neni-ní nacúaa cùndee iní-ndó dáña-gá ducaⁿ quide ñaha-xi xii-ndo. Te ñiu-ni-gá chindee ñaha-gá xii-ndo cùndee iní-ndó vā cādá-ndó cuéi nándi sá ná dàcahu iní ñáhá-xí xii-ndo.

14 Te xiáⁿ núu cáháⁿ-í dóho nchòho ñáyiú ïo cùu iní-í sá vā quindáá iní-ndó ní ñⁿ sá cächí-yu cùu ndiòxi te ñà ndáá chi dicó ndaha cue téé ñuyú-a ní cuáha nchaa xiáⁿ, te ni vā cādá càhnu-ndo.

15 Te duha cáháⁿ-í chi cùu-ndo ñáyiú tècú tnúni, te mee-ndo ïo váha cuáha-ndo cuendá te núu váha-ni cáháⁿ-í àdi ñà túú váha-ni.

16 Te nchoo ndacáⁿ táhú-ó núú Yá Ndióxi cuendá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-án, te xiáⁿ ndacú iní-ó sá ñⁿ-ní cùu-o ndihi Xítóhó Jesucristú cuendá sá ní sati níñi-gá ní xihí-gá núú cùrúxi, te ñiu-ni ducaⁿ sátnaha tucu-xi cùu paá sá xéxi-ó òré xihí-ó ndudí ndéhé yoho yàha stilé-án, chi sá dúcáⁿ xèxi-o paá-án xiáⁿ ndacú iní-ó sá ñⁿ-ní cùu-o ndihi Xítóhó Jesucristú sá cuendá yiqui cùñú-gá.

17 Te cuéi vāi vihi-o dico ñⁿ-dii-ni paá xéxi-ó, te sá dúcáⁿ ñⁿ-dii-ni paá xéxi-ó xiáⁿ ndacú iní-ó sá ñⁿ-ní cùu-o ndihi Xítóhó Jesucristú.

18 Te cada cuendá-ndó nacúaa quide ñáyiú isràél, chi ñáyiú-án xéxi-yu sá ndúú táhú Yá Ndióxi. Te sá dúcáⁿ quide-yu-án cùtnúni iní-ó sá tnàhá tnúhu-yu ndihi-gá.

19 Te vā cáni iní-ndó sá sá dúhá cáháⁿ-í te cachí-ndó sá cùnuu nchaa sá cächí-yu cùu ndiòxi ní cadúha cue téé ñuyú-a chi ñà túú ná cúú ní ñⁿ nchaa xiáⁿ. Te ñiu-ni ducaⁿ cùu tucu nchaa sá sáñaha ñáyiú ndúu táhú-xi chi ñà túú cùnuu-xi, chi ñⁿ-ní cùu-xi ndihi nchaa dava-gá sá xéxi-ó.

20 Te yúhú cächí-í sá sá dúcáⁿ quide nchaa ñáyiú ñà túú tnàhá tnúhu ndihi Yá Ndióxi, te dicó nchaa espíritu cùndihi yucu ñávaha sáñahá-yu sá ndúú táhú-xi sá dúcáⁿ quide-yu. Te ñà díú Yá Ndióxi sáñahá-yu sá

ndúú táhú-gá. Te yúhú cuini-í sá vā tnàhá tnúhu-ndo ndihi cue espíritu cùndihi yucu ñávaha.

21 Te ducaⁿ chi vā cúu tnàhá tnúhu-o ndihi cue espíritu cùndihi yucu ñávaha te tnàhá tnúhu-o ndihi Xítóhó Jesucristú, te ñà túú ndúu váha-xi ngóo cächí-o coho-o sá ndúú táhú cue espíritu cùndihi yucu ñávaha-án, te ngóo càda-o nacúaa ní dándóo tnúhu Xítóhó Jesucristú coho-o ndudí ndéhé yoho yàha stilé, te caxi-o paá cada-o sá ndacú iní-ó sá ní xihí-gá núú cùrúxi.

22 Te vā cáni iní-ó dúcáⁿ cada-o cuendá sá vā cùdèéⁿ Yá Ndióxi, chi ñà túú ná càhnu cuu-o núu cada-o nani véxi iní mée-ó, chi mee-gá ïo càhnu cuu-gá.

Cada-o nchàa nacúaa cuu càhnu Yá Ndióxi

23 Te ndáá sá ncháá sá cuini-ó càda-o te cuu cada-o dico ñà ncháá cùu-xi sá váha sá cúú-xi-ó, te ni ñà ncháá-xi chindee ñaha-xi nacúaa níhi ndée-gá-ó cùndecu-o ichi Xítóhó Jesucristú.

24 Te xini ñuhu-xi sá cādá-ó sá váha sá cúú-xi tnàha ñáyiú-o te ñà díú mée-ni sá cúú-xi mée-o cada-o.

25 Te nchòho cuu caxi-ndo nchàa cuñú sá cùyáhu cuñú sá xini caxi-ndo, te vā nducú tnúhu-ndo te núu cùu-xi cuñú sá ní nduu táhú sá cächí-yu cùu ndiòxi. Te ñà túú ná cani iní-ndó cächí-ndo,

26 chi ñuyú-a ndihi nchaa sá ïo cúú-xi cuendá Yá Ndióxi.

27 Te núu ñⁿ ñáyiú ñà túú ndècu ichi Xítóhó Jesucristú cáháⁿ ñáhá-yu xii-ndo quihíⁿ-ndó cächí-ndo díta vehé-yu, te núu sàni iní-ndó sá quihíⁿ-ndó te cuu quihíⁿ-ndó te caxi-ndo cuéi náí cùu sá táxi-yu dico vā càcáⁿ tnúhú-ndó núu-yu núu ndèé ní níhi-yu, te ducaⁿ te cuu váha iní-ndó cächí-ndo.

28 Te núu ñⁿ ñáyiú cächí-yu sá xiáⁿ cúú-xi sá ní nduu táhú sá cächí-yu cùu ndiòxi te vā cächí-ndó cuendá sá ñáyiú ducaⁿ cáháⁿ-án cuu váha iní-yu te ñà túú tnàhi ná cani iní-yu.

29 Te yúhú cáháⁿ-í cuendá nacúaa sàni iní mée ñáyiú ducaⁿ cáháⁿ-án te ñà díú sá nacúaa sàni iní mée-ndó quide-ndo.

Te dava-ndo cächí-ndó: “Cuu-ni cada-o nchàa nacúaa sàni iní mée-ó cuéi dava-gá ñáyiú sàni iní-yu sá ñà túú ndúu váha-xi sá dúcáⁿ càda-o”, duha cächí-ndó.

30 Te cächí tucu-ndo: “Ñà túú tàú-xi cáháⁿ cuéhé ñáyiú cuendá-ó sá cuendá nchaa sá xéxi-ó chí ndacáⁿ táhú-ó núú Yá Ndióxi òré xéxi-ó”, duha cächí-ndó.

31 Te cuéi nándi sá xini caxi-ndo níhi-ndó xéxi-ndo àdi quide-ndo, te cada-ndo nacúaa cáháⁿ váha ñáyiú cuendá Yá Ndióxi.

32 Te vā cādá-ndó sá ñà túú tàú-ndó càda-ndo cuendá sá vā cādá ñáyiú ñⁿ sá ñà túú cùu váha iní Yá Ndióxi. Te ni sá cúú-xi

cuè ñáiyu isráel, te ni sá cúu-xí cuè ñáiyu ñá túu cùu ñáiyu isráel, te ni sá cúu-xí cuè ñáiyu ndècu ichi-gá vá dúcáⁿ càda-ndo sá cúu-xí-yu.

³³ Te yúhú ío ndècu ndee-í quidè-í nàcuáa cudüi-í núu nchaa ñáiyu, te quide-í sá vâha sá cúu-xí-yu, te ñá túu quide-í mee-ni sá cúu-xí mée-í. Te ducaⁿ quide-í cuendá quindáá iní-yu tnúhu Xítóhó Jesucristú te naníhí tàhú-yu.

11

¹ Te chí cànchicúⁿ nihnu cada-ndo nchaa nacuaáa quide-í nchicúⁿ nihnu-í nchaa nacuaáa quide Xítóhó Jesucristú.

Nàcuáa tàu-xi cada nchaa ñáiyu dihí núu tàcá-yu dàcuahá-yu tnúhu Yá Ndióxi

² Te nchòhó ñáiyu ndècu ndihí-í ichi Xítóhó Jesucristú càchí tnúhu-í xii-ndo sá ío cùdúí iní-í, chí ndàcu iní ñáhá-ndó xii-í, te quide-ndo nchaa nacuaáa ní dánèhè ñáhà-í xii-ndo.

³ Te cuiní-í sá nchòhó cutnùnì iní-ndó sá ñⁿdii-ni Yá Ndióxi cúu-gá Yaá cúnúu taxi tnuní ñáhá xii Xítóhó Jesucristú, te ducaⁿ Xítóhó Jesucristú ñⁿdii-ni-gá cúnúu taxi tnuní-gá nchaa cue téé, te nchaa cue téé diu-ni mee-güedé cúnúu-güedé táxi tnùnì-güedé ñadhí-güedé.

⁴ Te núu nchoo cuè téé na dàdáhu-o díquí-ó òré càháⁿ-ó núu ñáiyu tnúhu sá dácàhu iní ñáhá Yá Ndióxi xii-o àdi òré càháⁿ ndihí-o-gá, te ñⁿsá cácaⁿ núu cúu-xí te núu ducaⁿ na càda-o dàdáhu-o díquí-ó.

⁵ Dico núu ñáiyu dihí vá dàdáhu-yu díquí-yu òré càháⁿ ndihí-yu Yá Ndióxi, àdi òré càháⁿ-yu tnúhu sá dácàhu iní ñáhá-gá xii-yu núu tnàhá ñáiyú-yu, te sácaⁿ núu cúu-xí te núu vá dàdáhu-yu díquí-yu, chí ñⁿ-ni cùu-xí te núu na deté ndí-yu díquí-yu.

⁶ Te núu ñá túu cuiní cue ñáiyu dihí dàdáhu-yu díquí-yu te váha-gá sá ná deté ndí-yu díquí-yu. Te núu cùcahaⁿ núu-yu sá deté díquí-yu te váha-gá sá ná dàdáhu-yu díquí-yu.

⁷ Te nchoo cuè téé vá cúu dàdáhu-o díquí-ó òré càháⁿ ndihí-o Yá Ndióxi ní òré càháⁿ-ó tnúhu sá dácàhu iní ñáhá-gá xii-o núu ñáiyu chí díhna-gá-ó ní cadúha ñaha Yá Ndióxi xii-o, te ní taxi ndecu-gá nchaa sá xini tnùnì-ó dàtná ndécú nchaa sá xini tnùnì mée-gá. Te ducaⁿ ní quide-gá chí cuiní-gá sá nchòhó càda-o nacuaáa càháⁿ nchaa dava-gá ñáiyu sá ío càhnu cuu-gá, te cue ñáiyu dihí quidè-yu nacuaáa cunuu nchòo cue téé.

⁸ Te Yá Ndióxi ní cadúha-gá téé, dico ñá díú yíqui naha ñadhí ní quenehe-gá

ní cadúha-gá téé chí yíqui naha téé ní quenehe-gá ní cadúha-gá ñadhí.

⁹ Te sá cuendá téé ducaⁿ ní cadúha-gá ñadhí-ánⁿ te ñá díú sá cuendá ñadhí ní cadúha-gá téé.

¹⁰ Núu xíáⁿ tàu-xi sá ncháá ñáiyu dihí dàdáhu-yu díquí-yu cuendá ducaⁿ cùtnunì sá ñá túu cúnúu-yu dàtná cúnúu nchoo cue téé. Te ducaⁿ xini ñuhu-xi cadá-yu sá cuendá nchaa espíritú xínú cuèchi núu Yá Ndióxi.

¹¹ Te vitna nchoo ñáiyu ndècu ichi Xítóhó Jesucristú, vá càchí-ó sá cuè téé ñá túu xini ñuhu-güedé cue ñáiyu dihí chindee ñáhá-yu, te ni vá càchí-ó sá cuè ñáiyu dihí ñá túu xini ñuhú-yu cue téé chindee ñàha-güedé xii-yu.

¹² Te ñⁿ yíqui naha téé ní queñuhu Yá Ndióxi ní cadúha-gá ñadhí, dico vitna chí ñáiyu dihí dácàcu-yu téé. Te téé, ñadhí ní cadúha Yá Ndióxi, te diu-ni ducaⁿ ní cadúha-gá nchaa dava-gá sá ío.

¹³ Te mee-ndo càda cuendá-ndó te núu ndúu váha-xi sá vá dàdáhu cue ñáiyu dihí díquí-yu òré càháⁿ ndihí-yu Yá Ndióxi àdi ñáhá.

¹⁴ Te nchaa ñáiyu càháⁿ-yu sá ñá túu ndúu váha-xi sá cuè téé cunduu nani idi díquí-güedé, chí ñⁿ sácaⁿ núu cúu-xí càchí-yu.

¹⁵ Te nchaa ñáiyu dihí ñáiyu nani idi díquí-xi càchí ñáiyu sá ñⁿ sá váha cùu-xi sá cúu-xí-yu sá dúcáⁿ nani idi díquí-yu. Te ducaⁿ chí Yá Ndióxi ní càchí-gá sá dúcáⁿ cundúu-yu cuendá quidáhu-xi díquí-yu.

¹⁶ Te núu ío ñáiyu cuiní dacáa cuendú cuendá sá ní càháⁿ-í-a, te na cùnahá-yu sá ncháá nchúhú cue téé càháⁿ tnúhu Xítóhó Jesucristú diu-ni ducaⁿ sàni iní-ndí cada nchaa ñáiyu dihí. Te diu-ni ducaⁿ sàni iní nchaa ñáiyu ndècu ichi-gá.

Cuendá ñáiyu ñá túu quide datná ní quide Xítóhó Jesucristú cùtnàhá ní cudini-gá ndihí cue téé ní xica cuu ndihí-gá

¹⁷ Te nchòhó ñá túu quide váha-ndo ndècu-ndo núu xíáⁿ duha na càháⁿ-í dóho-ndo, chí nchòhó òré tàcá-ndó ñá túu quide váha-ndo chí ñá túu chindee tnaha-ndo cada-ndo sá váha, chí da nàdatuhú iní tnàhá-ndó nacuaáa ndècu-ndo.

¹⁸ Te díhna-gá na càchí tnúhu-í xii-ndo sá nihí-í tnúhu sá òré tàcá-ndó quide-ndo nacuaáa ní càháⁿ Xítóhó Jesucristú, te ñá túu cùu ñⁿnuu-ndo òré ducaⁿ quide-ndo nacuaáa ní càháⁿ-gá. Te dava sá càháⁿ ñáiyu sàndáá iní-í te dava ñáhá.

¹⁹ Te ndáá sá dúcáⁿ tnàhí cada-xi vá cúu ñⁿnuu-ndo cuendá ducaⁿ cùtnunì núu ndédacàa-ndo sandáá ndisa iní-ndó tnúhu Xítóhó Jesucristú te ndédacàa-ndo ñáhá!

²⁰ Te ndi tnàhá òré tàcá-ndó quide-ndo datná ní quide Xítóhó Jesucristú cùtnàhá ní

cudini-gá ndihi cue téé ní xica cuu ndihi-gá, te ñá túú quide-ndo nacuaa tau-xi cunduu chi cùtexinu-ni quide-ndo.

²¹ Chi òrè tacá-ndó quide-ndo nacuaa ní cachí Xítohó Jesucristú, te dava-ndo ngódó núú-ndo ñhá-gá-ndó xèxi-ndo sá néhé-ndó te ñá túú sá cùndètu tñaha-ndo, te ñá túú càháⁿ tñhá-ndó núú xiáⁿ dava-ndo ñá túú xèxi-ndo ndahá xití-ndó, te dava-ndo xidó-ndó quide-ndo chi xini-ndo.

²² Te vá dúcáⁿ càda-ndo chi càa vehe-ndo núú dúcáⁿ caxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàque tihú-ndó nchàa dava-gá ñáyiú ndècu ndihi-ndo ichi Yá Ndióxi, te dándóo canúú-ndó nchàa ñáyiú ndàhú sá dúcáⁿ quide-ndo. ¡Núú xiáⁿ vá cúú cachi-í sá cúú-ndó ñáyiú quide váha chi ñá túú quide váha-ndo sá dúcáⁿ quide-ndo ndecu-ndo!

Xítohó Jesucristú ní dándóo tñuhu-gá sá cóhó-ó ndudí ndéhé yoho yàha stilé te caxi-o paa cuendá ndacu ini-ó sá ní xihí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñháá Xítohó Jesucristú xii-í te diu-ni ducaⁿ ní dánèhé ñháá-í xii-ndo, chi diu-ni núú cùtnàhá ní sáha cuendá ñháá ndí Judás Iscariote xii-gá núú cuè téé cùu úhú ini ñháá ní queheⁿ-gá paa,

²⁴ te ní ndacáⁿ tãhú-gá núú Yá Ndióxi, te ní tãhú cuèhi-gá, te ní xáhaⁿ-gá xii cue téé xica cuu ndihi-gá: “Chí quehéⁿ paa-a caxi-ndo te cada ini-ndó sá cúú-xí dàtná yiqui cùñú-í, chí yúhú cuú-í sàcuendá-ndó. Te ducaⁿ-ni càda-ndo cundecu-ndo cuendá ndacu ini ñháá-ndó xii-í”, cachi-gá xáhaⁿ-gá xii-güedé.

²⁵ Te sátá ní yáha ní xexi-güedé paa sá ní sãñaha-gá, te ní queheⁿ-gá tasãⁿ ñuhú ndudí ndéhé yoho yàha stilé, te ní ndacáⁿ tãhú tucu-gá núú Yá Ndióxi. Te ní xáhaⁿ-gá xii cue téé xica cuu ndihi-gá: “Chí cóhó ndudí ndéhé yoho yàha stilé-a, te cada ini-ndó sá cúú-xí dàtná ñíñi-í, te cuendá ñíñi-í sá cáti òrè cuú-í cutnùni ndáá sá Yá Ndióxi cada-gá ingá núú sá váha sá cúú-xí ñáyiú. Te ndi tñhá òrè coho-ndo ndudí ndéhé yoho yàha stilé-án te ndacu ini ñháá-ndó xii-í, te ducaⁿ-ni càda-ndo cundecu-ndo”, cachí-gá xáhaⁿ-gá xii-güedé.

²⁶ Te ndi tñhá òrè xexi-ndó paa te xihí-ndo ndudí ndéhé yoho yàha stilé, te xiáⁿ dàtúu-ndo núú ñáyiú sá Xítohó Jesucristú ní xihí-gá cuendá-yu, te ducaⁿ-ni càda-ndo cundecu-ndo ndéé ná sáá nduu quixi tucu Xítohó Jesucristú.

Nàcuáa cada-o òrè caxi-o paa ndihi òrè coho-o ndudí ndéhé yoho yàha stilé dàtná ní cachí Xítohó Jesucristú

²⁷ Te dava-ndo ñá túú quide-ndo nacuaa cuini Yá Ndióxi cada-ndo òrè xexi-ndó paa ndihi òrè xihí-ndó ndudí ndéhé yoho yàha

stilé, te sá dúcáⁿ quide-ndo-án te cucuèchi xii-ndo chí ñá túú nèhe-ndo sá yíñuhu sá cúú-xí yiqui cùñú Xítohó Jesucristú, te ní ñá túú nèhe-ndo sá yíñuhu sá cúú-xí ñíñi-gá.

²⁸ Te ío váha cada cuendá-ndó te núú ndècu váha ini-ndó núú Xítohó Jesucristú òrè cùmáni-gá caxi-ndo paa ndihi òrè cùmáni-gá coho-ndo ndudí ndéhé yoho yàha stilé. Te núú ndècu váha ini-ndó núú-gá te caxi-ndo te coho-ndo.

²⁹ Te dava nchòhó ñá túú sàni váha ini-ndó cuendá yiqui cùñú Xítohó Jesucristú te xèxi-ndo paa te xihí-ndo ndudí ndéhé yoho yàha stilé, te nacháhu-ndo sá dúcáⁿ ñá túú sàni váha ini-ndó.

³⁰ Te diu sá dúcáⁿ quide-ndo núú xiáⁿ vai-ndo huhú, te ío ndàhú ndécú-ndó, te dava ñáyiú ndècu ndihi-ndo sa ní xihí-yu.

³¹ Dico núú ío váha sáha-o cuendá nacuaa ndècu-o núú Yá Ndióxi, te vá dúcáⁿ dandoho ñaha-gá xii-o.

³² Te òrè ndéhé Yá Ndióxi sá ñá túú quide ndáá-ó ndècu-o te dandoho ñaha-gá xii-o. Te ducaⁿ quide-gá cuendá sá vá cuíta nihnu-o, chí núú ñháá te cuíta nihnu-o ndihi nchaa ñáyiú ndècu ichi cuèhé ichi duha.

³³ Te núú xiáⁿ càháⁿ-í dóho nchaa nchòhó ñáyiú ndècu ndihi-í ichi Xítohó Jesucristú sá òrè tacá-ndó càda-ndo nacuaa ní quide Xítohó Jesucristú cùtnàhá ní cudini-gá ndihi cue téé ní xica cuu ndihi-gá, te cundetu tñaha-ndo nduu nchaa-ndo te dàtnùni ducaⁿ càda-ndo.

³⁴ Te núú dava-ndo xihí-ndó dòcò te caxi duu-ndo vehe-ndo te dàtnùni nataká-ndó, cuendá òrè nataká-ndó te vá cáda-ndó ñiⁿ sá ñá túú tau-ndó càda-ndo cuendá sá vá dándóho ñaha Yá Ndióxi xii-ndo. Te òrè quixi coto ñaha-í xii-ndo te dàvá-án cachí tñuhu-í xii-ndo nchàa dava-gá sá cùmáni.

12

Nàcuáa chindee ñaha Espiritú Yá Ndióxi cada-o ñiⁿ ñiⁿ-o

¹ Te nchòhó ñáyiú ndècu ndihi-í ichi Xítohó Jesucristú cuini-í cachí tñuhu-í xii-ndo nacuaa chindee ñaha Espiritú Yá Ndióxi xii-o ñiⁿ ñiⁿ-o cuendá cutnùni ini-ndó.

² Te nchòhó sa ñaha-ndo sá cùtnàhá vátá cùndècu-gá-ndó ichi Xítohó Jesucristú ní xóo dandàhú ñháá yucu ñávàha xii-ndo, te ní xóo quindáá ini-ndó nchàa sá ní cadúha cue ñáyiú ñuyú-a nchaa sá cachi-yu cùu ndiódí te ñá ndáá sá ndiódí cúú-xí, te nchaa xiáⁿ ñá túú càháⁿ-xi.

³ Te cuini-í sá nchòhó cutnùni ini-ndó sá Espiritú Yá Ndióxi ñá túú chindee-xi ní ñiⁿ ñáyiú cuendá sá càháⁿ úhú-yu Xítohó Jesucristú. Te ní ñiⁿ ñáyiú ñá túú càhu ini-yu càháⁿ-yu sá Xítohó Jesucristú cúú-gá

Xítohó-yu te núu ñá túú Espíritú Yá Ndióxi dácáhu iní ñáhá-xí xii-yu.

⁴ Te ndi dííⁿ ndi dííⁿ nduu chiun ní cachí Espíritú Yá Ndióxi cada-o, te ñu-ni ñⁿdi-ni Espíritú-gá ndécú.

⁵ Te ndi dííⁿ nduu chiun quide-o xinu quechi-o núú ñⁿdi-ni Xítohó Jesucristú.

⁶ Te ndi dííⁿ ndi dííⁿ chindee ñaha Yá Ndióxi xii-o nácuaá cada-o chiuⁿ-gá, te ñu-ni ñⁿ dii-gá ndécú chindee-gá nchaa ñáyiu.

⁷ Te Espíritú Yá Ndióxi quidé-xi sá nchóó càda-o sá váha, te ducaⁿ chindee-o cue ñáyiu ndécú ndihi-o ichi Xítohó Jesucristú.

⁸ Te dava-o ní nduu táhú-ó núú Yá Ndióxi sá Espíritú-gá cada te ndacu-o cáháⁿ-ó tnúhu sá ío cáhuu cuu ñu-ni tnúhu mee Yá Ndióxi, te dava tucu-o ní nduu táhú-ó cútñuní iní-ó nácuaá cáháⁿ tnúhu-gá te cáháⁿ-ó nácuaá cúní Espíritú-gá.

⁹ Te dava tucu-o ní nduu táhú-ó sá ío quíndáá iní-ó Xítohó Jesucristú cuendá cada-gá ñⁿ sá cuíní-ó, te ducaⁿ chi Espíritú Yá Ndióxi chindee ñaha-xi xii-o. Te dava tucu-o ní nduu táhú-ó sá cacaⁿ táhú-ní-ó núú Xítohó Jesucristú cuendá ñáyiu tóhú te ndúha-yu.

¹⁰ Te dava tucu-o ní nduu táhú-ó sá ndácú-ó càda-o nchaa sá vá yóo tnáhi ndácu cada, te dava tucu-o ní nduu táhú-ó núú Yá Ndióxi sá cáháⁿ-ó tnúhu sá dácáhu iní ñáhá-gá xii-o, te dava tucu-o ní nduu táhú-ó sá cútñuní iní-ó núu ñu Espíritú Yá Ndióxi chindee ñaha-xi xii ñáyiu óré cáháⁿ-yu tnúhu-gá àdi cue espíritú cündihi yucu ñáváha. Te dava tucu-o ní nduu táhú-ó cáháⁿ-ó tnúhu sá dácáhu iní ñáhá Espíritú Yá Ndióxi xii-o tnúhu sá ñá túú xini-ó, te dava tucu-o ní nduu táhú-ó cáháⁿ-ó nácuaá quee-xi nchaa tnúhu-án.

¹¹ Te ñⁿdi díí-ni Espíritú Yá Ndióxi ducaⁿ chindee ñaha-xi, te ñu-ni Espíritú-gá dácáñu ñaha-xi xii-o ndi dííⁿ núú chiun sá cuíní mée-xí càda-o.

Nchaa-o ñⁿ-ni cuu-o ndihi Xítohó Jesucristú

¹² Te nchoo ñáyiu ndécú ñuyúú-a titní xichi cùu yiqui cuñú-ó dico ñⁿ-ni cùu-xi, te ñu-ni ducaⁿ sátnahá-xi cùu-o vitna ndecu-o ichi Xítohó Jesucristú chi ñⁿ-ni cùu-o ndihi-gá.

¹³ Te dava-o cùu-o ñáyiu isráel, te dava-o ñá túú cùu-o ñáyiu isráel, te dava-o cùu-o ñáyiu ñá túú tnáhi dañá quee núú chíúⁿ pàtróoⁿ-xi, te dava-o cùu-o ñáyiu dañá quee núú chíúⁿ pàtróoⁿ-xi. Te mee Espíritú Yá Ndióxi ní quide-xi sá ncháá-ó ñⁿ-ná cúu-ó ndecu-o ndihi Xítohó Jesucristú. Te Yá Ndióxi ní cachí-gá sá ncháá-ó cùndecu ndihi-o Espíritú-gá.

¹⁴ Te nchóhó xini-ndó sá titní xichi cùu yiqui cuñú-ó te ñá díú ñⁿ-ni xichi cuu-xi.

¹⁵ Te cuéi sáhá-ó ndihi ndaha-o ñá túú ñⁿ-ni cuu-xi dico vá cúu cächí-ó sá sáhá-ó ñá túú cùu-xi yiqui cuñú-ó.

¹⁶ Te cuéi lóho-o ndihi tinuu-o ñá túú ñⁿ-ni cuu-xi dico vá cächí-ó sá lóho-o ñá túú cùu-xi yiqui cuñú-ó.

¹⁷ Te núu ñihí ní ndúú yiqui cuñú-ó ní xindee mee-ni tinuu-o, te ñá túú ndée cundeé lóho-o cùndedóho ni cùu te núu ducaⁿ, àdi núu ñihí yiqui cuñú-ó ní xindee mee-ni lóho-o te ñá túú ndée cundeé dítní-ó ní cùu te núu ducaⁿ.

¹⁸ Dico mee Yá Ndióxi ní taxi ndecu-gá ñⁿ ñⁿ xichi yiqui cuñú-ó nácuaá ní cachí iní mée-gá.

¹⁹ Te núu ñⁿ-ni sá ní xindee ñihí yiqui cuñú-ó, te vá cùnduu-xi nácuaá tàú-xi cunduu ni cùu te núu ducaⁿ.

²⁰ Dico titní xichi cùu yiqui cuñú-ó, te ñⁿ-ni cùu-xi ñihí-xi.

²¹ Te sa nàha-o sá vá cúu cächí-ó sá tinuu-o ñá túú xini ñuhu-xi ndaha-o, àdi díquí-ó ñá túú xini ñuhu-xi sáhá-ó.

²² Te nchoo sá naha-o sá dává xichi yiqui cuñú-ó sá cächí-ó sá ñá túú cùu ío-gá xini ñuhu-xi.

²³ Te dava xichi yiqui cuñú-ó sá ñá túú quide cuendá cávhi-ó ncháa xiáⁿ sá quidáhu dóó sácuñhu-o, te dava xichi yiqui cuñú-ó ñá túú cùu chi dacuñí sá quidáhu.

²⁴ Te nchaa xichi yiqui cuñú-ó sá cúu cùtúu ñá túú xini ñuhu-xi quidáhu. Te Yá Ndióxi ní taxi ndecu-gá nchaa xichi yiqui cuñú-ó nácuaá tàú-xi cunduu. Te ní cachí-gá sá dává-gá xichi yiqui cuñú-ó núú vá cúu cùtúu quidáhu.

²⁵ Te ducaⁿ ní quide-gá cuendá sá ñⁿ-ní cùu yiqui cuñú-ó. Te ducaⁿ ndi tnahá ñⁿ ñⁿ xichi yiqui cuñú-ó chindee tnahá-xi. Te ducaⁿ sátnahá-xi cùu nchoo vitna ndecu-o ichi Xítohó Jesucristú chi chindee tnahá-o.

²⁶ Te núu ñⁿ xichi yiqui cuñú-ó ná tnáñhú te ñihí-ó lo váha ndécú-xi te ducaⁿ ñihí yiqui cuñú-ó cúu váha-xi. Te ducaⁿ sátnahá-xi cùu-o vitna ndecu-o ichi Xítohó Jesucristú.

²⁷ Te nchoo ndécú ndihi-o Xítohó Jesucristú, te cùu-o datná yiqui cuñú-ó te ñⁿ ñⁿ-o cùu-o datná ñⁿ ñⁿ xichi yiqui cuñú-ó-gá.

²⁸ Te ducaⁿ sátnahá-xi cùu-o chi Yá Ndióxi ní taxi-gá ndi dííⁿ ndi dííⁿ chiun quide-o sá cúu-xi ncháa ñáyiu ndécú ichi-gá. Te díhna-gá cue téé caca cuu cáháⁿ tnúhu-gá núú ñáyiu ní taxi ndecu-gá, te dátñuní ní taxi ndecu-gá cue téé cáháⁿ tnúhu-gá nácuaá dácáhu iní ñáhá mée-gá, te dátñuní ní taxi ndecu-gá cue téé dānehé ñáhá xii ñáyiu tnúhu-gá núú tàcá-yu, te dátñuní ní taxi ndecu tucu-gá cue téé ndácu quide sá vá yóo tnáhi ndácu cada. Te ní taxi ndecu tucu-gá

cue tée xicáⁿ táhú-ní núú Xítoho Jesucristú cuendá ñáiyu cùhú te ndúha-yu. Te ní taxi ndecu tucu-gá cue tée chindee cue ñáiyu ndecu ichi-gá. Te ní taxi ndecu tucu-gá cue tée yindaha ñaha xii ñáiyu ndecu ichi-gá, te ní taxi ndecu tucu-gá cue tée cáháⁿ tnúhu sá dácàhu iní ñáhá Espíritú-gá tnúhu sá ñà túú xini-güedé.

²⁹ Te ñá ncháá-ó cùu-o cue tée ní táuchíúⁿ Xítoho Jesucristú cáháⁿ tnúhu-gá núú ñáiyu, te ñá ncháá-ó cùu-o cue tée cáháⁿ tnúhu sá dácàhu iní ñáhá Yá Ndióxi xii-o. Te ñá ncháá-ó cùu-o cue tée dácàhu ñaha xii-yu. Te ñá ncháá-ó cùu-o cue tée quide sá vā yō tnáhi ndacu cada.

³⁰ Te ñá ncháá-ó cùu-o cue tée dicó-ni cacaⁿ táhú núú Xítoho Jesucristú cuendá ñáiyu cùhú te ndúha-yu. Te ñá ncháá-ó cùu-o cue tée cáháⁿ tnúhu sá dácàhu iní ñaha Espíritú Yá Ndióxi tnúhu sá ñà túú xini-ó, te ñá ncháá-ó cùu-o cue tée cùtnuní iní-xi cáháⁿ nacúa nduu tnúhu-án.

³¹ Te ío nducu ndèe-ndo cada-ndo nacúa nduu táhú-ndó núú Yá Ndióxi nchaá sá ío-gá cúnúu cada-ndo. Te vitna na dānehé ñáhá tūcu-í xii-ndo nacúa cada-ndo, dico sá dānehé ñáhá-í-a ío-gá cúnúu-xi.

13

Cuu iní-ó tnàha ñáiyu-o

¹ Te núu nchoo xini-ó cáháⁿ-ó tnúhu sá ío vii ío váha cuáháⁿ cáháⁿ ñáiyu ñuyíu-a, àdi xini-ó cáháⁿ-ó tnúhu sá ío vii ío váha cuáháⁿ cáháⁿ cue espíritú xínú cuèchi núu Yá Ndióxi, te núu xini-ó cáháⁿ-ó ncháa tnúhu-án te ñá túú cùu iní-ó cuè tnaha ñáiyu-o ña, te ñá túú nāndíhi-xi sá xini-ó cáháⁿ-ó tnúhu-án te cùu-o datná dāva caá sá ío dusaⁿ quide.

² Te núu cùu-o ñáiyu cáháⁿ tnúhu sá dácàhu iní ñáhá Yá Ndióxi, àdi cuu-o ñáiyu cùtnuní iní-xi nacúa cuáháⁿ nchaá tnúhu nduu yuhu ní cuu, àdi cuu-o ñáiyu ío váha cùtnuní iní-xi nchaá nacúa quide Yá Ndióxi, àdi cuu-o ñáiyu ío váha sādāá iní ñáhá xii Yá Ndióxi nacúa ndacu-o cùu-o ñáiyu xocuñí-xi núú ndécú-xi, te núu nchaá xiáⁿ xini-ó cada-o te ñá túú cùu iní-ó cuè tnaha ñáiyu-o ña, te ñá túú vèdana nāndíhi-xi te núu vā cùú iní-ó tnàha ñáiyu-o cuèi na cada-o nchaá xiáⁿ.

³ Te cuèi nchaá sá ndécú ndíhi-o na dācāhū-o, te cuèi na cuāha cuendá-ó mèe-o cáyú-ó sá cùú-xi Yá Ndióxi, dico ñá túú vèdana chindee ñaha-xi xii-o sá dúcáⁿ cada-o te núu ñá túú cùu iní-ó cuè tnaha ñáiyu-o.

⁴ Dico núu cùu iní-ó cuè tnaha ñáiyu-o, te cāhu iní-ó, te quide váha-o, te ñá túú cùu-o ñáiyu cuédú iní, te ní ñá túú cáháⁿ-ó núu cùu cāhu-o, te ní ñá túú sàni iní-ó cada cāhu-o mee-o,

⁵ te ní ñá túú ñūhu cuehé iní-ó, te ní ñá túú ndūcu-o mee-ni sá cùú-xi mèe-o, te ní

ñà túú-gā cùdèéⁿ-ó cuendá ñá sá cùú, te ní ñà túú-gā sácūhuⁿ iní-ó sá quidè ñàha tnaha ñáiyu-o xii-o.

⁶ Te ní ñà túú-gā cùdèé iní-ó ncháa sá ñà túú váha quide ñáiyu, chi mee-nā cuendá nchaá sá vāha cùdèé iní-ó.

⁷ Te nchaá sá yāha-o sācāhu iní-ó, te sàni váha iní-ó cuendá nchaá ñáiyu, te sàni iní-ó sá díú-ní ncháa sá vāha cuu xii nchaá tnàha ñáiyu-o ndèe cuèé-gā, te ío quide cāhu iní-ó cuèi nāndi sá yāha-o, te nchaá xiáⁿ quidè-ó te núu cùu iní-ó cuè tnaha ñáiyu-o.

⁸ Te ní caa ní quíhíⁿ duha-ni cuu iní-ó cuè tnaha ñáiyu-o. Dico sáá nduu te vā cóo-gā ñáiyu cáháⁿ tnúhu sá dácàhu iní ñáhá Yá Ndióxi, te ní vā cóo-gā ñáiyu cáháⁿ tnúhu sá dácàhu iní ñáhá Espíritú Yá Ndióxi tnúhu sá ñà túú xini-yu, te ní vā cóo-gā ñáiyu túha dātná túha ñáiyu vitna.

⁹ Te vitna ñá túú cùtnuní iní-ó ncháa nacúa sàni iní Yá Ndióxi chi sacú-ni cùtnuní iní-ó, te ducaⁿ sacú-ni cáháⁿ-ó nacúa nduu tnúhu-gā, dico cáháⁿ-ó tnúhu-gā nacúa dācāhu iní ñáhá-gā xii-o.

¹⁰ Te na sáá nduu cada Yá Ndióxi nchaá nacúa tū-xi cunduu, te dāvā-án te nchaá sá cāhí-gā ñá túú ndècu-xi nacúa tū-xi cunduu vā dúcáⁿ-gā cundecu-xi.

¹¹ Te yúhu cùtnáhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo caní iní-í, te ní xóo tecú tnūni-í dātná quidè cuè landú xīndecu vitna, dico sáá ní cuu-í ñá tée cùu sacuéhé te ñá túú-gā quidè-í dātná ní xóo cada-í cùtnáhá ní cuu landú-í.

¹² Te ducaⁿ sātñahá-xi cùu-o vitna ndecu-o ichi Xítoho Jesucristú, chi ñá túú cùtnuní váha iní-ó nacúa cùu cuendá Yá Ndióxi, te cùu-o datná ñáiyu ndèhe ñá túú tū váha núu-xi, te ducaⁿ sātñahá-xi cùu-o chi ñá túú cùtnuní váha iní-ó nāsa cùu cuendá-gā, dico sáá nduu quini iní-ó-gā. Te nchoo sacú-ni cùtnuní iní-ó nacúa nduu-gā vitna dico na sáá nduu te quini ndāá-ó nacúa cāa nacúa nduu-gā dātná xini ñáhá mèe-gā xii-o.

¹³ Te ní caa ní quíhíⁿ ducaⁿ-ni quindáá iní-ó Yá Ndióxi, te ducaⁿ-ni cūndecu ndíhi-o tnúhu ndee iní cundecu-o ndíhi-gā, te ducaⁿ-ni ío cuu iní-ó-gā ndíhi tnàha ñáiyu-o. Te sá cùú iní-ó Yá Ndióxi ndíhi sá cùú iní-ó tnàha ñáiyu-o xiáⁿ ío-gā cúnūu-xi dācúxí dāva-gā.

14

Ñáiyu cáháⁿ tnúhu sá dácàhu iní ñáhá Espíritú Yá Ndióxi

¹ Te vā dáñá ndèe-ndó cùu iní-ndó tnàha ñáiyu-ndo, te cuhuⁿ iní-ndó sá nduu táhú-ndó núú Yá Ndióxi titní núú chūu cada-ndo nacúa chindee ñaha Espíritú-gā

xii-ndo, te ío cuhuⁿ iní-ndó sã ndúú táhú-ndó cãháⁿ-ndó tnúhu sã dácãhu iní ñáhã Yã Ndióxi xii-ndo.

² Te cue ñáyíu cãháⁿ tnúhu sã dácãhu iní ñáhã Espíritú Yã Ndióxi tnúhu sã ñã túú xini-yu, te tnúhu cãháⁿ-yu-áⁿ cúú-xí sã cúú-xí Yã Ndióxi te ñã díú sã cúú-xí ñáyíu chí ñã túú təcú tnúni-yu, te mee Espíritú Yã Ndióxi quidé-xí ðucaⁿ cãháⁿ-yu tnúhu yíyuhu.

³ Te cue ñáyíu ní nduu táhú núú Yã Ndióxi cãháⁿ tnúhu sã dácãhu iní ñáhã-gã xii-yu, te ñáyíu-áⁿ dácãháⁿ-yu ñáyíu nãcuáa cuita níhí ndéé-gã-yu cundecú-yu ichi-gã, te ducaⁿ cuãñáhã-yu tnúhu ndee iní xii-yu òré ndíhú iní-yu.

⁴ Te ñáyíu cãháⁿ tnúhu sã dácãhu iní ñáhã Espíritú Yã Ndióxi xii-yu tnúhu sã ñã túú xini-yu-áⁿ, ñáyíu-áⁿ mee-ní-yu níhí ndéé-yu ndecú-yu ichi-gã. Dico ñáyíu cãháⁿ tnúhu sã dácãhu iní ñáhã-gã xii-yu, cãháⁿ-yu tnúhu-áⁿ nãcuáa níhí ndéé ðava-gã ñáyíu nchicúⁿ ni-nhu ichi-gã.

⁵ Te yúhú ío cudíí iní-í te núu nchaa-ndo cãháⁿ-ndó tnúhu sã dácãhu iní ñáhã Espíritú Yã Ndióxi xii-ndo tnúhu sã ñã túú xini-ndó. Dico ío-gã cudíí iní-í te núu nchaa-ndo cãháⁿ-ndó tnúhu sã dácãhu iní ñáhã-gã, chí ío-gã xini ñúhu-xi sã cãháⁿ-ndó tnúhu-áⁿ ðacúúxí sã cãháⁿ-ndó tnúhu sã dácãhu iní ñáhã Espíritú-gã cãháⁿ-ndó tnúhu sã ñã túú xini-ndó. Dico ñⁿ-ni nũtnahã-xi quide-ndo te núu nchòhò ñáyíu cãháⁿ tnúhu sã dácãhu iní ñáhã Espíritú-gã cãháⁿ-ndó nãcuáa quèe-xi tnúhu-áⁿ. Te ducaⁿ te nchaa ñáyíu ndècu ichi Yã Ndióxi cuita níhí ndéé-gã-yu quíhíⁿ cundecú-yu ichi-gã.

⁶ Te núu yúhú quexio-í núú ndecú nchòhò ñáyíu ndècu ndíhí-í ichi Xitohó Jesucristú, te ngúíta-í cãháⁿ-í mee-ni tnúhu sã dácãhu iní ñáhã Espíritú Yã Ndióxi xii-í tnúhu sã ñã túú xini-í, te ñã túú ñã sã vãha cuu-xi sã cúú-xí-ndó. Dico cuu-xi sã vãha xii-ndo te núu na cãháⁿ-í núú-ndó nchaa tnúhu sã ðánèhè ñáhã Yã Ndióxi xii-í tnúhu sã vãtã ðacuáha-gã-í, ndíhí nchaa tnúhu sã sã xini-í, ndíhí nchaa tnúhu sã dácãhu iní ñáhã-gã xii-í cãháⁿ-í, ndíhí nchaa ðava-gã tnúhu-gã.

⁷ Te na càda-o cuendã sã núu ñⁿ tée tíú-dé vílu àdi cani-dé àrpã te núu ñã túú sãhmú-dé ndíhí-xi ñⁿ yaá, te ñã cútñuní iní-ó ñã yaá caní-dé àdi ná yaá tíú-dé te núu ducaⁿ na càda-dé.

⁸ Te ðiu-ni ducaⁿ sãtnahã-xi cùu tucu tée cùu sandadú tíú cútú, chí núu vã tíú vãha-dé nãcuáa tàú-xi cunduu òré quíhíⁿ-güedé nãá-güedé, te vã ngündecu túha ðava-gã cue sandadú te núu ducaⁿ na càda-dé vã tíú vãha-dé.

⁹ Te ducaⁿ sãtnahã-xi cùu nchòhò te núu

vã cãháⁿ-ndó ñⁿ tnúhu nãcuáa tàú-xi cunduu núú ñáyíu te vã təcú tnúni-yu tnúhu cãháⁿ-ndó. ¡Chí áúⁿ ná cuu cãháⁿ-ndó te núu ducaⁿ na càda-ndó!

¹⁰ Te ío titní núú tnúhu ío ñuyúú, te ñⁿ ñⁿ núú tnúhu-áⁿ cútñuní iní ñáyíu nãcuáa quèe-xi.

¹¹ Te xíãⁿ núu nchoo ñã təcú tnúni-ó ñⁿ tnúhu cãháⁿ ñⁿ ñáyíu, te quide-ó-yu ñáyíu ñúú xicã chí ñã túú cãháⁿ-yu tnúhu cãháⁿ-ó, te ðiu-ni ducaⁿ quide ñahã-yu xii nchoo túcu.

¹² Te xíãⁿ núu cãhí tnúhu-í xii nchaa nchòhò ñáyíu ío cuini nduu táhú núú Yã Ndióxi sã Espíritú-gã chindee ñaha-xi xii-ndo cada-ndo ná daha núu chiúⁿ, te ío nducu ndèe-ndo cada-ndo chiúⁿ sã ní nduu táhú-ndó nãcuáa cuita níhí ndéé-gã ñáyíu ndècu ichi-gã quíhíⁿ.

¹³ Te núu cãháⁿ-ndó tnúhu sã ñã túú xini-ndó, tnúhu sã dácãhu iní ñáhã Espíritú Yã Ndióxi xii-ndo, te xini ñúhu-xi sã càcãⁿ táhú-ndó núú Yã Ndióxi cuendã sã ná chindee ñaha-gã xii-ndo cãháⁿ-ndó núú ñáyíu núu nãsa quèe-xi tnúhu-áⁿ.

¹⁴ Chí núu nchoo na cãháⁿ ndíhí-o Yã Ndióxi ndíhí tnúhu sã ñã túú xini-ó, te ni yúhu ni iní-ó cãháⁿ ndíhí-o-gã ðicó-ni sã ñã təcú tnúni-ó nãcuáa ndúu tnúhu cãháⁿ-ó.

¹⁵ Te xíãⁿ núu xini ñúhu-xi cãháⁿ ndíhí-o Yã Ndióxi ni yúhu ni iní-ó nãcuáa chindee ñaha Espíritú-gã xii-o te cãháⁿ-ó nãcuáa tecú tnúni-ó, te ðiu-ni ducaⁿ càda-o oré xitã yúhu-o chiñuhu-o Yã Ndióxi, chí ni yúhu ni iní-ó ðucaⁿ cada-o nãcuáa chindee ñaha Espíritú-gã xii-o, te cútñuní iní-ó nãcuáa cuãháⁿ nchaa tnúhu cãháⁿ-ó xita-o.

¹⁶ Chí núu nchoo na ndácãⁿ táhú-ó núú Yã Ndióxi ndíhí mee-ni tnúhu sã ñã túú xini-ó tnúhu sã dácãhu iní ñáhã Espíritú-gã xii-o, te ñáyíu ñã túú ní ndúu táhú cãháⁿ tnúhu cãháⁿ-ó ndedóho ñáhã-yu xii-o, te ñáyíu-áⁿ vã ndácú-yu cãháⁿ-yu tnúhu cãháⁿ-ó ndácãⁿ táhú-ó ndíhí-yu núú Yã Ndióxi chí ñã túú təcú tnúni-yu tnúhu cãháⁿ-ó.

¹⁷ Te vãha-ni quide-o sã ðúcãⁿ cãháⁿ-ó ndácãⁿ táhú-ó núú Yã Ndióxi, te ðicó-ni sã tnúhu-áⁿ ñã túú chindee-xi ñáyíu nãcuáa cuita níhí ndéé-gã-yu cundecú-yu ichi-gã.

¹⁸ Te yúhú ío ndácãⁿ táhú-í núú Yã Ndióxi chí cãháⁿ-í tnúhu sã ñã túú xini-í tnúhu sã dácãhu iní ñáhã Espíritú-gã xii-í, te cãháⁿ-gã-í ðacúúxí nchaa nchòhò.

¹⁹ Te òré tàcã ñáyíu ndècu ichi Yã Ndióxi ðacuáha-yu tnúhu-gã, te cãháⁿ-í tnúhu-gã núú-yu sã sã ní cútñuní iní meé-í nãcuáa ducaⁿ cútñuní iní-yu nãcuáa ndúu tnúhu cãháⁿ-í. Te tnãhá-gã iní-í cãháⁿ-í úhúⁿ-ni tnúhu-áⁿ núú-yu ðacúúxí sã cãháⁿ-í úxí mĩl tnúhu sã ñã túú xini-í, tnúhu sã dácãhu iní ñáhã Espíritú Yã Ndióxi xii-í cãháⁿ-í.

²⁰ Te nchòhò ñáyíu ndècu ndíhí-í ichi Xitohó Jesucristú, vã caní iní-ndó ðatnã sání

ini cue landú, chi cani ini-ndó dàtná tàù-xi cunduu chi sa sacuéhé-ndó. Dico cuu-ndo dàtná cue landú líhli vá cúndècu-ndo ichi cuehé ichi duha, chi cue landú-án ñà túú ndècu-güexi ichi-án.

²¹ Te núú tùtú Yá Ndióxi cáhán-xi nàcuáa ní cáhán-gá, te cächí-xi: “Cue téé ñuu xíca cáhán ndi dííⁿ núú tnúhu quíhíⁿ-güedé cáhán-güedé tnúhu-í núú ñáyiú isráel cada-güedé núú-í, te cuéi ducaⁿ dico vá quíndáá ini-yu tnúhu-í”, duha ní cachí Yá Ndióxi te ducaⁿ ní ngúndéé núú tùtú-gá.

²² Te tnúhu sá dácàhu ini ñáhá Espíritú Yá Ndióxi xii-o tnúhu sá ñà túú xiní-ó, xíáⁿ cúú-xí cuendá sá cútñuní ini cue ñáyiú ñá túú sàndáá ini tnúhu Yá Ndióxi sá ñà túú cùu váha ini ñáhá-gá xii-yu. Dico sá cúú-xí cué ñáyiú sàndáá ini tnúhu-gá ñà túú ná quidé-xí sá cúú-xi-yu. Te tnúhu sá dácàhu ini ñáhá Yá Ndióxi xii-o, xíáⁿ cúú-xí cuendá sá cútñuní ini cue ñáyiú sàndáá ini tnúhu-gá sá ndécú ndíhi ñaha-gá xii-yu, dico ñà túú ducaⁿ sani ini cue ñáyiú ñà túú sàndáá ini tnúhu-gá.

²³ Te núú ní tacá nchaa nchóhó ñáyiú ndècu ichi Yá Ndióxi, te nchaa-ndo ní ngúíta-ndo cáhán-ndó tnúhu sá dácàhu ini ñáhá Espíritú Yá Ndióxi xii-ndo tnúhu sá ñà túú xiní-ndó, te mei óré-án quexio cue ñáyiú ñà túú sàndáá ini tnúhu-gá, ndíhi cue ñáyiú vátá quíni dana-gá tnúhu-gá núú ndécú-ndó, te ñáyiú-án quesáhá-yu sá lúcú-ndó te núú ducaⁿ cáhán-ndó tnúhu sá dácàhu ini ñáhá Espíritú-gá xii-ndo óré quexió-yu.

²⁴ Dico núú nchaa-ndo cáhán-ndó tnúhu sá dácàhu ini ñáhá Yá Ndióxi xii-ndo, te mei óré-án quexio cue ñáyiú ducaⁿ ñà túú sàndáá ini-xi tnúhu-gá, ndíhi cue ñáyiú ducaⁿ ñà túú xiní dana tnúhu-gá-án, te ñáyiú-án cútñuní ini-yu sá ndécú cuéchi-yu núú-gá, te ngúíta-yu cuáha-yu cuendá sá ñà túú quide váha-yu ndécú-yu cuendá sá cáhán-ndó tnúhu-gá ndédóho-yu.

²⁵ Te nchaa sá cuehé sá dúhá ní quidé-yu sàni ini-yu yiyuhu ndacu ini-yu, te ngúíta-yu náhmá-yu nchaa sá ñà túú váha ní quidé-yu núú Yá Ndióxi, te cachí-yu sá ío cànhu cuu-gá, te cachí tucú-yu sá ndàá ndécú ndíhi-ndo-gá.

Cada-o nàcuáa tàù-xi cunduu

²⁶ Te vitna nchóhó ñáyiú ndècu ndíhi-í ichi Xitohó Jesucristú xini ñuhu-xi duha cada-ndo. Óré tàcá-ndó te dava-ndo càta yuhu-ndo chiñuhu-ndo Yá Ndióxi, te dava-ndo dásahú-ndó ñáyiú tnúhu-gá, te dava-ndo cáhán-ndó nàcuáa dàquixi túu Yá Ndióxi ini-ndó, te dava-ndo cáhán-ndó tnúhu sá dácàhu ini ñáhá Espíritú Yá Ndióxi xii-ndo tnúhu sá ñà túú xiní-ndó, te dava-ndo cáhán-ndó nàcuáa quèe-xi

tnúhu-án. Te nchaa sá quidé-ndó ná cùu-xi nàcuáa chindee-xi ñáyiú nàcuáa cuita níhí ndéé-gá-yu cundecú-yu ichi-gá.

²⁷ Te óré cáhán-ndó tnúhu sá dácàhu ini ñáhá Espíritú Yá Ndióxi xii-ndo tnúhu sá ñà túú xiní-ndó, te úú-ni-ndo àdi úní-ni tnàhá-ndó cáhán-ndó tnúhu-án te vá úúⁿ ní cáhán-ndó chi ndéé ndíhi ñⁿ-ndo te dàtnuní ngúíta ingá-ndó cáhán-ndó. Te xini ñuhu-xi sá ñⁿ ñáyiú cáhán-yu nàcuáa quèe-xi tnúhu cáhán-ndó-án.

²⁸ Te núú ñà túú ñáyiú tècú tnuní nàcuáa quèe-xi tnúhu cáhán-ndó-án, te núú mée núú ñⁿ-ní-ndó cáhán-ndó tnúhu-án cáhán ndíhi-ndo Yá Ndióxi te vá cáhán-ndó núú ñáyiú.

²⁹ Te óré cáhán-ndó tnúhu sá dácàhu ini ñáhá Yá Ndióxi xii-ndo te úú-ni-ndo àdi úní-ni tucu-ndo cáhán, te dava-gá-ndó cùndedóho-ndo tnúhu-án te cáhán-ndó núu váha-ni cáhán-güedé àdi ñà túú váha-ni.

³⁰ Te núú ñⁿ-ndo ní dácàhú ini ñáhá Yá Ndióxi xii-ndo ñⁿ tnúhu cáhán-ndó, te núú ñⁿ-ndo sá cáhán-ndó te ngúíñí-ndó te quíhu tucu ingá-ndó cáhán-ndó nàcuáa ní dácàhú ini ñáhá Yá Ndióxi xii-ndo.

³¹ Te nchaa nchóhó ñáyiú ní nduu táhú cáhán tnúhu sá dácàhu ini ñáhá Yá Ndióxi, te vá úúⁿ-ní cáhán-ndó chi díhna-gá ñⁿ-ndo cáhán te dàtnuní cáhán tucu ingá-ndó. Te ducaⁿ càda-ndo cuendá nchaa-ndo tècú tnuní-ndó nàcuáa nduu tnúhu cáhán ñⁿ ñⁿ-ndo, te ducaⁿ te cudíí-gá ini-ndó cànchicúⁿ nihnu-ndo ichi-gá.

³² Te nchaa ñáyiú cáhán tnúhu Yá Ndióxi sa ñaha-ná mée-yu nàcuáa quidé-yu cáhán-yu tnúhu-gá nàcuáa ñà túú quide cutexinu-yu.

³³ Te Yá Ndióxi cúú-gá Yaá quidé ío váha cùu ñⁿ-ndu-ndo ndecu-ndo, te ñà túú dàtica nuu ñaha-gá xii-ndo.

Te na cächí tnúhu-í xii-ndo nàcuáa cáhán-í nchaa núú tàcá cue ñáyiú ndècu ndíhi-o ichi Xitohó Jesucristú.

³⁴ Te yúhú cächí-í sá vá cúú cáhán cue ñáyiú díhí óré tàcá-ndó dàcuaha-ndo tnúhu-gá, chi ñà túú ducaⁿ cuiní-gá cadá-yu, te quíndáá-ni ini-yu cadá-yu nàcuáa tàù-xi cunduu.

³⁵ Te núú ñⁿ sá cuiní-yu nducu tnúhu-yu te ndéé óré nasáa-yu vehé-yu te nducu tnúhu-yu núú yí-yu, chi ñà túú nduu váha-xi sá cáhán-yu núú tàcá nchaa ñáyiú dàcuáha ndíhi-yu tnúhu-gá.

³⁶ Te chí dándacu ini sá ñà díú nchóhó cúú-ndó ñáyiú ní ngúndecu ndíhi tnúhu Yá Ndióxi díhna nuu nàcuáa datécú tnúhu-ndo dàva-gá ñáyiú, te ni ñà díú mée-ni nchóhó sa ní ngúndecu ndíhi-ndo tnúhu Yá Ndióxi vitna, núu xíáⁿ vá cächí-ndó sá ío cùnuu-ndo.

³⁷ Te núú dava nchóhó sání ini-ndó sá cáhán-ndó nàcuáa dàcahu ini ñáhá Yá Ndióxi xii-ndo àdi sani ini-ndó sá quidé-ndó nàcuáa

chindee ñaha Espíritú-gá xii-ndo, te cuáha váha-ndo cuendá sá ncháá tnúhu cãháⁿ-í-a cù-xi tnúhu sá ní cachí tnúhu mee Xítohó Jesucristú cada-o.

³⁸ Te ndéda-ni cãa ñáiyu ndècu ndihi-ndo te núu ñá túú sãndáá iní-yu tnúhu cãháⁿ-í, te vá cádá cuendá-ndó tnúhu cãháⁿ-yu.

³⁹ Te vitna nchòhó ñáiyu ndècu ndihi-í ichi Xítohó Jesucristú, ío caní iní-ndó cãháⁿ-ndó tnúhu sá dácãhu iní ñáhá Yã Ndióxi núú ñáiyu, te dañã-ndo na cãháⁿ cue ñáiyu ní nduu táhú núú Yã Ndióxi sá cãháⁿ-yu tnúhu sá dácãhu iní ñáhá Espíritú-gá xii-yu tnúhu sá ñá túú xini-yu.

⁴⁰ Te cada-ndo ncháa nacuaá tàu-xi cunduu nacuaá ñá túú nã cuu cundecu-ndo.

15

Ní ndoto Xítohó Jesucristú

¹ Te vitna nchòhó ñáiyu ndècu ndihi-í ichi Xítohó Jesucristú cuini-í sá dándacu iní-ndó nacuaá ní dánèhé ñáhã-í xii-ndo tnúhu sá cãháⁿ nacuaá naníhí tãhú-ó, chi ñu tnúhu-ãⁿ ní sãndáá iní-ndó te nchicúⁿ nihnu-ndo.

² Te sá xíú tnúhu-ãⁿ níhnu-ndó ichi cuáhãⁿ-ndó núú ndúú táhú-ndó cundecu-ndo ndihi Yã Ndióxi ní caa ní quíhíⁿ, te ducaⁿ ndúú táhú-ndó núú cundècu-ndo ní caa ní quíhíⁿ ndihi Yã Ndióxi te núu nchicúⁿ nihnu-ndo nacuaá ní dánèhé ñáhã-í xii-ndo, te núu ñá túú nchicúⁿ nihnu-ndo te ñá túú ní sãndáá iní-ndó nacuaá tàu-xi cunduu.

³ Te yúhú sa ní cachí tnúhu-í xii-ndo ñⁿ tnúhu sá ío cùnuu ní níhí-í, chi ní cachí tnúhu-í xii-ndo sá Xítohó Jesucristú ní xihí-gá cuendá nchaa yíca cuéchi-o, te ducaⁿ ní cuu chi ducaⁿ cãháⁿ-xi núú tütú Yã Ndióxi sá dúcãⁿ yãha-gá.

⁴ Te ní chindúxi ñaha-güedé xii-gá te nduu úní ní dándótó ñaha Yã Ndióxi xii-gá, te ducaⁿ ní cuu chi ducaⁿ cãháⁿ-xi núú tütú Yã Ndióxi.

⁵ Te sátá ní ndoto-gá te ní quee túu-gá núú tã Pèlú, te dátñuní ní quee túu-gá núú ñava-gá cue téé ní táuchíúⁿ-gã cãháⁿ tnúhu-gá.

⁶ Te sátá dúcãⁿ te dátñuní ní quee túu-gá núú úhúⁿ cièndú cue ñáiyu ndècu ichi-gá, te vái-yu xíndecu-ní-yu vitna chi sacú-ni-yu ní xihí.

⁷ Te dátñuní ní quee túu-gá núú tã Jacobó, te sátá dúcãⁿ te dátñuní ní quee túu-gá núú nchaa cue téé ní táuchíúⁿ-gã cãháⁿ tnúhu-gá.

⁸ Te ndéé núú ní ndihi-ná te ní quee túu-gá núú mée-í, te òré ní quee túu-gá núú-í te cùu-í dátñá ñⁿ déhe yiquíⁿ vátá saá-gá nduu càcu chi cùu-í ñⁿ téé ñá túú sãni váha iní-xi cuendá-gá ní cùu.

⁹ Te yúhú ñá túú cùnuu-í dátñá cùnuu cue téé ní táuchíúⁿ Xítohó Jesucristú cãháⁿ tnúhu-gá. Te cùu-í ñⁿ téé ní táuchíúⁿ-gã cãháⁿ tnúhu-gá, cuéi ñá túú tãú-í sá cãháⁿ-í

tnúhu-gá, chi ní xóo cuu úhú iní-í cue ñáiyu ndècu ichi Yã Ndióxi.

¹⁰ Dico Yã Ndióxi ío váha iní-gá chi ní quide ñaha-gá xii-í ñⁿ téé váha, chi ñá túú-gá quidè-í dátñá ní xóo cada-í. Te ío cundahú iní ñáhã-gá chindee ñaha-gá xii-í dico ñá túú ñⁿ ná cuu chindee ñaha-gá, chi ío-gá vai chiuⁿ-gá ní cuu sa ta quide-í cuáhãⁿ dácúúxi ñava-gá cue téé ní táuchíúⁿ-gã cãháⁿ tnúhu-gá te ñá díú mée-í ducaⁿ quide-í chi mee Yã Ndióxi ío cundahú iní ñáhã-gá chindee ñaha-gá xii-í quidè-í chiúⁿ-gá.

¹¹ Te ñá túú ná cada-xi cuéi ñava-gá-güedé sa ní cuu vai-gá chiúⁿ-gá quidè-güedé àdi yúhú, chi ñⁿ ní tnúhu cãháⁿ-ndí te tnúhu-ãⁿ cúú tnúhu ní sãndáá iní-ndó.

Cue ñáiyu ní xihí ndoto-yu

¹² Te nchúhú cue téé cãháⁿ tnúhu Xítohó Jesucristú cãháⁿ-ndí sá ní xihí-gá te ní ndoto-gá, çte ná cuendá ñava nchòhó cãchí-ndó sá vá ndótó cué ñáiyu ní xihí?

¹³ Te núu ducaⁿ sãni iní-ndó sã vá ndótó cué ñáiyu ní xihí te ní Xítohó Jesucristú ñá túú ní ndoto-gá te núu ducaⁿ.

¹⁴ Te núu dícó Xítohó Jesucristú ñá túú ní ndoto-gá ñá, te nchaa tnúhu sá dánèhé ñáhã-ndí xii-ndo ñá túú nãndíhí-xi te núu ducaⁿ, te ñⁿ ná cuu sãndáá iní-ndó-gá te núu ducaⁿ.

¹⁵ Te núu dícó cúu-xí ñⁿ sá ndáá tnúhu sãni iní ñava-ndo ña, te dácuañde-ndí sá cãháⁿ-ndí tnúhu Yã Ndióxi núú-ndó te núu ducaⁿ, te ñá túú cãháⁿ ndáá-ndí núú-ndó sá Yã Ndióxi ní dándótó-gã Xítohó Jesucristú, te núu ndáá nacuaá sãni iní ñava-ndo sã vá ndótó cué ñáiyu ní xihí, dico ñá ndáá nacuaá sãni iní-ndó.

¹⁶ Te núu vá ndótó cué ñáiyu ní xihí te ní Xítohó Jesucristú ñá túú ní ndoto-gá.

¹⁷ Te núu Xítohó Jesucristú ñá túú ní ndoto-gá ñá, te ñⁿ ná cuu sãndáá iní-ndó-gá te núu ducaⁿ, te ndècu-ni cuéchi-ndo núú Yã Ndióxi te núu ducaⁿ.

¹⁸ Te núu ndáá nacuaá sãni iní-ndó ñá te cue ñáiyu ní sãndáá iní ñáhã xii Xítohó Jesucristú ñáiyu ní xihí ní xita nihnú-yu te núu ducaⁿ.

¹⁹ Te núu nchoo ndècu ndihi-o tnúhu ndee iní núú Xítohó Jesucristú cuendá-ni sá cundècu-o ñuyíú-a ña, te cùu-o ñáiyu ío-gá duuⁿ duuⁿ ndáhú sá cúu-xí ñava-gá ñáiyu te núu ducaⁿ.

²⁰ Dico ndáá sá Xítohó Jesucristú ní xihí-gá te ní ndoto-gá núu xíáⁿ cùtñuní iní ñava-o sã ndótó cué ñáiyu ní xihí ñáiyu ní sãndáá iní tnúhu-gá.

²¹ Te sá cuéchi ñⁿ dñi-ni téé ní xíndecu ñuyíú-a xíáⁿ xihí ñáiyu, te sá cuendá ñⁿ dñi-ni tucu ingá téé te ndoto cue ñáiyu ní xihí.

²² Te nchaa ñáiyu xihí-yu sá cuéchi ñⁿ téé, te téé-ãⁿ cúu-dé ndí Adán téé díhna nuu ní cuu

ñani tnáha cuè ñáyiú ñuyúú. Te diu-ni ducaⁿ sá cuèndá ìⁿdi-ni téte te ndoto cue ñáyiú ní xihí, te té-áⁿ cúú-dé Xítohó Jesucristú chi nchaa ñáyiú ndècu ndihí-gá ndotó-yu.

²³ Te díhna-gá Xítohó Jesucristú ní ndoto-gá xiáⁿ cútñuní iní dawa-o sá ndúu na quixi tucu-gá ñuyúú-a te dàv-áⁿ ndoto nchaa ñáyiú ní xihí ñáyiú ní sándáá iní tnúhu-gá.

²⁴ Te dátñuní ducaⁿ te sáá nduu nàa nchaa sá ió ñuyúú, te Xítohó Jesucristú danàa-gá nchaa ndi túhú sá cúnúu ió ñuyúú-a, chi danàa-gá nchaa ñáyiú ió cúnúu, ndihí yucu ñáváha, ndihí nchaa espíritú xínu cuèchi núú-xi. Te ducaⁿ te cúñaha-gá xii Tátá-ó Dútú Ndióxi taxi tnúni-gá.

²⁵ Chi Xítohó Jesucristú dacuití taxi tnuni-gá ndéé ná sáá nduu danàa-gá nchaa sá cúú úhú iní ñáhá xii-gá.

²⁶ Te ndéé núú ní ndihí-ná te danàa-gá sá quidé xihí ñáyiú.

²⁷ Te ducaⁿ chi càháⁿ-xi núú tùtú Yá Ndióxi sá méé-gá ní nachihí-gá nchaa sá ió ndaha Xítohó Jesucristú cuèndá sá méé Xítohó Jesucristú taxi tnúni-gá, te vá yóo ìⁿ taxi tnuni ñáhá xii Yá Ndióxi, chi mee Yá Ndióxi cúú-gá Yáá ní nachihí-gá nchaa sá ió ndaha Xítohó Jesucristú.

²⁸ Te díhna-gá ní xáhaⁿ Yá Ndióxi xii Xítohó Jesucristú Yáá cúú Dèhe-gá sá quíndaha-gá nchaa sá ió, te òré ná quíndaha Xítohó Jesucristú nchaa sá ió, te cúñaha-gá xii Yá Ndióxi taxi tnúni ñáhá-gá xii-gá, te ducaⁿ te mee-ná Yá Ndióxi taxi tnúni-gá nchaandi túhú sá ió.

²⁹ Te núu ñá túú ndáá càháⁿ-í, ¿te ná cuèndá dawa ñáyiú sànduté-yu cuèndá ñáyiú ní xihí núu ñá túú ndáá sá ndótó ñáyiú ní xihí?

³⁰ Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xihí te àúⁿ ná cuu ducaⁿ quide cahnu iní-ndí ducaⁿ cuini-yu cahni ñáhá-yu xii-ndí te núu ducaⁿ.

³¹ Te nchòhó ñáyiú ndècu ndihí-í chi Xítohó Jesucristú ió váha sàni iní-í cuèndá-ndó, chi ndècu-o ichi-gá. Te na càchí tnúhu ndáá-í xii-ndo sá ìⁿ nduu ìⁿ nduu ndéé iní ñáhá ñáyiú cahni ñáhá-yu xii-í.

³² Te núu dícó ndáá sá vá ndótó ñáyiú ní xihí dátñá càchí dawa ñáyiú, te àúⁿ ná cuu ní xíndecu-í ñuú Éfesús ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ ní quidé-yu dátñá quidé ìⁿ quiti dééⁿ sá cúú-xi-í. Te núu ndáá sá vá ndótó ñáyiú ní xihí ñá, te váha-gá núu cachí-ó dátñá càchí ñáyiú: “Vitna na còho-o te na càxi-o chi tneé ldá cúú-ó”, duha càchí-yu.

³³ Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te ngüita-ndo càni iní-ndó dátñá sání iní-yu.

Chi quèe ndáá-xi nàcuáa càháⁿ tucu dawa-gá ñáyiú, chi càchí-yu sá núu ñáyiú quide váha na nihí tnáhá-yu ndihí ñáyiú ndècu ichi cuehé ichi duha, te ngüita ñáyiú quide váha-áⁿ cadá-yu tnàhá-yu nchaa sá cuèhé sá dúhá dátñá quidé ñáyiú-áⁿ.

³⁴ Te ió váha cuáha-ndo cuèndá nàcuáa cundecu-ndo, te vá cadá-gá-ndó dátñá quidé cue ñáyiú ndècu ichi cuehé ichi duha. Te dawa-ndo quide-ndo dátñá quidé cue ñáyiú ndècu ichi cuehé ichi duha chi ñá túú sándáá iní-ndó Yá Ndióxi. Te duha càháⁿ-í cuèndá sá cúcàhaⁿ núú-ndó cuèndá nchaa sá ñá túú váha quide-ndo.

Nàcuáa ndoto ñáyiú ní xihí

³⁵ Te cudana dawa-ndo ndècu tnúhu-ndo núu nása ndoto ñáyiú ní xihí, te nása cunduu yiqui cúnú-yu òré ndotó-yu.

³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cútñuní iní-xi, te duha na càháⁿ-í nàcuáa tecu tnúni-ndó. Te núu ìⁿ tatá ná chíhí-ó te tèhyú méé-xi te xínu déhe-xi.

³⁷ Dico ñá díú sá sá ní xínu ta sàhmu cuáháⁿ ní cūxi-o, te diu-ni ducaⁿ quide-o cueí tríu ndihí nchaa dawa-gá tatá xítú-ó.

³⁸ Te Yá Ndióxi quidé-gá sácúnduu tatá xínu-áⁿ dátñá cuini méé-gá cunduu. Te ndèda-ni càa tatá te diu-ni-gá quidé-gá sácúnduu-xi nàcuáa tàú-xi cunduu.

³⁹ Te ndi díⁿ ndáa nchaa yiqui cúnú, chi tucu càa yiqui cúnú nchoo cue ñáyiú, te tucu càa yiqui cúnú nchaa quiti xica núú ñúhú, te tucu càa yiqui cúnú nchaa quiti ndáva, te tucu càa yiqui cúnú nchaa chácá.

⁴⁰ Te ducaⁿ ñá túú ìⁿ-ni caa nchaa yiqui cúnú sá ió andiu ndihí nchaa yiqui cúnú ñáyiú ió ñuyúú-a, te ducaⁿ ñá túú ìⁿ-ni ndáa vii nchaa sá ió andiu ndihí ñuyúú-a.

⁴¹ Te ducaⁿ cùu tucu-xi nchícanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñá túú ìⁿ-ni dayehé nchaa chódíní.

⁴² Te ducaⁿ sátnahá-xi cùu ñáyiú ní xihí te ndoto, chi tucu càa yiqui cúnú-yu sá nguñdúxi te tucu cunduu yiqui cúnú-yu òré ndotó-yu, te yiqui cúnú sá ndótó ndihí-yu-áⁿ vá ndihí nihnu-gá-xi.

⁴³ Te yiqui cúnú ñáyiú xihí ñá túú nándíhi-xi, dico yiqui cúnú sá ndótó ndihí-yu te ió váha cunduu. Te nchaa yiqui cúnú ñáyiú xihí ñá túú tnàhí-gá ndee-xi, dico yiqui cúnú ndoto ndihí-yu xiáⁿ ió cunduu ndee-xi.

⁴⁴ Te yiqui cúnú nchaa ñáyiú xihí cúú-xi cuèndá ñuyúú-a, dico yiqui cúnú sá ndótó ndihí-yu xiáⁿ cundecu-ná-xi cuèndá Espíritú Yá Ndióxi. Te dátñá ió yiqui cúnú sá cúú-xi cuèndá ñuyúú-a, te ducaⁿ ió yiqui cúnú sá cúú-xi cuèndá mee-ná Espíritú Yá Ndióxi.

⁴⁵ Te núu tütü Yá Ndióxi càchí-xi: “Ndíi Ádán ndíi ní xíndecu ndéé díhna ní chíhi Yá Ndióxi iní ndíi”, duha càchí-xi núu tütü-gá. Te ingá tucu téé cùu-dé dàtná ndíi Ádán te téé-án cùú-dé Xítohó Jesucristú, te Yaá-án quidé-gá sá mée-ná Espírítu Yá Ndióxi quidé-xi ndècu-o ichi-gá vitna.

⁴⁶ Te díhna-gá yiqui cùñú cuendá ñuyú-a ní ngúndecu, te dàtnúni ngúndecu yiqui cùñú cundecu ndíhi mee-ná Espírítu Yá Ndióxi.

⁴⁷ Te téé díhna nuu ní xíndecu ñuyú-a chí ñuhu ní cadúha ñaha Yá Ndióxi xii-dé, te téé-án cùú-dé ndíi Ádán, te ingá tucu téé ní cuu-dé andíu te téé-án cùú-dé Xítohó Jesucristú.

⁴⁸ Te nchaá ñayiu càa yiqui cùñú-yu dàtná cáá yiqui cùñú té Ádán téé ducaⁿ ní cuáha ñuhu-án, te nchaá ñayiu ní nduu táhú cundecu ndíhi téé ducaⁿ vèxi cuuⁿ andíu-án, ñayiu-án nduu yiqui cùñú-yu dàtná cáá yiqui cùñú ní nduu táhú-dé ndécú ndíhi-dé vitna, te téé-án cùú-dé Xítohó Jesucristú.

⁴⁹ Te nchaá ñayiu ñuyú-a càa-yu dàtná-ni càa datná-ni ndúu téé ducaⁿ ní cuáha ñuhu-án. Te nchaá nchoo ñayiu ní nduu táhú cundecu ndíhi téé ducaⁿ vèxi cuuⁿ andíu-án nduu-o dàtná-ni càa datná-ni ndúu téé-án tucu.

⁵⁰ Te nchòhó ñayiu ndècu ndíhi-í ichi Xítohó Jesucristú càchí tnúhu-í xii-ndo sá ncháá nàcuáa càa yiqui cùñú ñayiu Xíndecu vitna vá sàá-xi cundecu-xi núu ndécú Yá Ndióxi táxi tnúni-gá, chí ñuyú-a ndíhi níhnu-xi. Dico sá táxi-xi sáá núu ndécú-gá táxi tnúni-gá xini ñuhu-xi cuu-xi sá cùdí cundecu.

⁵¹ Te na càchí tnúhu-í xii-ndo ñⁿ tnúhu sá yíyùhu ní cuu: Dava-o cùú-ó te dava-o cundecu-ni-o, dico nchaa-o nàdáma yiqui cùñú-ó.

⁵² Te uuⁿni ducaⁿ nàdáma yiqui cùñú-ó òré càháⁿ ñⁿ cútú, te cútú-án càháⁿ-xi òré sa ta cùyatni naa ñuyú. Te òré càháⁿ cútú-án te ndoto nchaá ñayiu ní xíhi ñayiu ní xíndecu ichi Xítohó Jesucristú, te ducaⁿ te vá ñⁿ ndúu ñⁿ quíú-gá cuú-yu. Te nchaá ñayiu ndècu vívú te nàdáma yiqui cùñú-yu tnàhá-yu.

⁵³ Te nchaá yiqui cùñú ndécú ndíhi nchaá ñayiu ndècu ñuyú-a vitna ñá túú cùdí-xi chí xihí-xi, dico yiqui cùñú nduu táhú nchoo ñayiu ndècu ichi Xítohó Jesucristú chí cùdí-xi ní caa ni quíhíⁿ chí vá cùú-gá-xi.

⁵⁴ Te òré ná ndúu táhú-ó yiqui cùñú sá dúcáⁿ cùdí ní caa ni quíhíⁿ-án, te vá cùndecu ndíhi-gá-ó yiqui cùñú sá ñá túú cùdí. Te dàvá-án te quee ndáá-xi nàcuáa càháⁿ-xi núu tütü Yá Ndióxi núu càchí-xi: “Vitna ñá túú-gá xihí ñayiu chí mee-ná Yá Ndióxi cúnú-gá táxi tnúni ñáhá-gá xii-yu.

⁵⁵ Te ñá túú tnàhí-gá ná ndoho ñayiu sá cuendá tnúhu xihí, chí vá cóo-gá tnúhu xihí”, duha càchí-xi núu tütü Yá Ndióxi.

⁵⁶ Te cue ñayiu ndècu ndíhi-yu tnúhu sá sánú ichi ñaha xii-yu nàcuáa cada-yu cundecu-yu dico uuⁿ-gá quidé-yu nchaá sá cuèhé sá dúhá. Te sá cuendá nchaá sá cuèhé sá dúhá quidé-yu-án, te xíáⁿ ní ngúndecu tnúhu xihí dándoho ñaha-xi xii-yu.

⁵⁷ Dico táxáhu xii Yá Ndióxi chí ní taxi-gá tnúhu ndee iní ndécú ndíhi-o sá sàá nduu te vá quini-gá-ó tnúhu xihí, te ducaⁿ chí ndècu ndíhi-o Xítohó Jesucristú.

⁵⁸ Te xíáⁿ núu càháⁿ-í dóho nchòhó cue ñayiu ndècu ndíhi-í ichi Xítohó Jesucristú chí ío cùu iní ñáhá-í xii-ndo, te càháⁿ-í dóho-ndo sá cànchícúⁿ níhnu-ni-ndo ichi Xítohó Jesucristú cuéi nándi na càa ñaha ñayiu xii-ndo sá cuendá-gá, te ío nducu ndèe-ni-ndo cada-ndo chiúⁿ-gá, chí sa ñaha-ndo sá ncháá chiúⁿ quide-o cuendá-gá ñá túú áúⁿ ná cuu quide-o.

16

Nàcuáa sàcáⁿ tnàhá ñayiu díhúⁿ

¹ Te na càchí tnúhu-í xii-ndo cuendá díhúⁿ sá sàcáⁿ tnàhá-ndó sá cùú-xí ñayiu ñúu Jerusàlén, chí díu-ni duha ní dánèhè-í cue ñayiu xíndecu ichi Xítohó Jesucristú ndécú ñⁿ ñⁿ xichi distritú Gálaciá.

² Te duha cada-ndo ndí tnàhá nduu ndumíngú, te ñⁿ ñⁿ-ndo dàquee díⁿ-ndo sacú díhúⁿ nàcuáa chindee ñaha Yá Ndióxi xii-ndo níhí-ndó cuendá òré quexio-í te sa cundecu túha díhúⁿ-á.

³ Te òré quexio-í te mee-ndo cãxi-ndó-yu núu ndèdacàa-yu sàni iní-ndó càda ndáá canehe díhúⁿ-án quíhíⁿ ndaha ñayiu xíndecu ichi Xítohó Jesucristú ndécú ñúu Jerusàlén. Te cadúha-í ñⁿ úú tutú canehè-yu quíhíⁿ cuendá cutnúni iní ñayiu ñúu Jerusàlén nàcuáa ndúu chiúⁿ cuáháⁿ-yu.

⁴ Te núu xini ñuhu-xi sá quíhíⁿ-í te can-deca-í-yu quíhíⁿ.

Té Páblú sáni iní-dé quíngoto-dé cue ñayiu ndècu ichi Xítohó Jesucristú

⁵ Te yúhú sáni iní-í yáha-í ñⁿ úú ñúu cáá distritú Macèdoniá, te dàtnúni ducaⁿ te sáá-í núu ndécú-ndó.

⁶ Te òré quexio-í te cudana cundecu ndíhi ñaha-í xii-ndo vái nduu, ádi cudana te cundecu ndíhi ñaha-í xii-ndo ndèé yáha nchaá yóo quidé víxiⁿ-xi. Te sáta dúcáⁿ te cada ndee iní-ndó chindee ñaha-ndo xii-í òré nucúhuⁿ ichi-í te núu ndèé ichi na quíhíⁿ-í.

⁷ Te duha càháⁿ-í chí núu Yá Ndióxi ná càchí-gá te cundecu ndíhi ñaha-í xii-ndo òré quexio-í te ñá díú dícò-ni ichi yáha-í.

⁸ Te cundecu-ni-í ñúu Éfesú-a ndéé tnàhá vico Pentecostés.

⁹ Te ducaⁿ chi iha ío tédóho ñáyiú tnúhu Xítoho Jesucristú sá cãháⁿ-í núú-yu. Núú xiãⁿ ío váha quèe cuendá cada-í chiúⁿ-gá cuèi ío vai ñáyiú ñá túú tnáhá iní-yu sá cãháⁿ-í tnúhu-gá.

¹⁰ Te núu na quixi coto ñaha té Timúteú xii-ndo, te ío váha cuu iní-ndó cãháⁿ ndihi-ndo-dê cuendá ducaⁿ ña túú nã cani iní-dé cundecu ndihi ñaha-dê xii-ndo, chi tnáhá-dé cúú-dê tée quide chiuⁿ Xítoho Jesucristú dàtná quidè-í.

¹¹ Te cuiní-í sá nĩ ñⁿ-ndo vá cãní cuèhé iní-ndó cuendá-dé, te chindee-ndo-dê nãcuáa cuu váha iní-dé órè quixi-dé quixi coto ñaha-dê xii-í, chi yúhú ndihi dava-gá ñáyiú ndècu ichi Xítoho Jesucristú ndétú-ndí-dé quexio-dé.

¹² Te ío ní cãháⁿ ndàhú-í núú tẽ Àpolós tée ndècu ndihi-o ichi Xítoho Jesucristú cuendá quixi-dé ndihi dava-gá cue tée ndècu ndihi-o ichi-gá quixi coto ñaha-güedê xii-ndo dico ñá túú ní cuiní-dé quixi-dé vitna, dico quixi-dé ndéé cuèé-gá.

Tnúhu ndéé núú nĩ ndihi-ná

¹³ Te ío quihí iní-ndó cundecu-ndo ichi Xítoho Jesucristú, te vá dáñá ndèé-ndó quindáa iní-ndó-gã, te ío yã cunduú iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá.

¹⁴ Te ío váha cuu iní tnáhá-ndó, te ducaⁿ ío váha cada tnàha-ndo te núu nãndi cùu sá váha sãni iní-ndó càda-ndo.

¹⁵ Te nchòhó ñáyiú ndècu ndihi-í ichi Xítoho Jesucristú sa nàha-ndo sá dñhanuu cuè ñáyiú cùu ndi mee té Èstéfanás ndécú distritú Acáyá ní sãndáa iní-yu tnúhu Xítoho Jesucristú. Te vitna ñá túú dàña ndeé-yu quidé-yu sá váha sá cúú-xí dàva-gá ñáyiú sãndáa iní tnúhu-gá.

¹⁶ Te cãháⁿ ndàhú-í núú-ndó sã quindáa iní-ndó nchãa ñáyiú ducaⁿ xiquide, ndihi nchaa dava-gá ñáyiú ío ndùcu ndee quide chiuⁿ ndihi-ndo cuendá Xítoho Jesucristú.

¹⁷ Te ío cùdíí iní-í sá nĩ quexio té Èstéfanás, ndihi té Fortunátú, ndihi té Acàicú, chi cue téé-áⁿ nĩ quide-güedé núú-ndó nĩ quide-güedé nchaa sá ña túú ndàcu-ndo cada-ndo cuendá-í ní cùu.

¹⁸ Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núu xiãⁿ xíní ñùhu-xi sá cãnehè-ndo sá yíñùhu núú nchãa cue téé duha xiquide váha.

¹⁹ Te nchaa ñáyiú xíndecu ichi Xítoho Jesucristú ndécú distritú Àsiá quide ndee iní ñáhã-yu xii-ndo, te ío cada ndee iní-ndó cãhí té Àquilú ndihi ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuàha tnúhu Yá Ndiòxí vehé-yu xii nchaa nchòhó ñáyiú ndècu ichi-gá.

²⁰ Te cada ndee iní tucu-ndo cãhí cue dava-gá ñáyiú ndècu ndihi-o ichi Xítoho Jesucristú. Te nĩ yùhu nĩ iní-ndó càda ndee iní tnáhá-ndó ñⁿ ñⁿ-ndo.

²¹ Te vitna ndaha mee yúhú té Pãblú tẽ-í tnúhu-a quide ndee iní ñáhã-í xii-ndo.

²² Te ñáyiú ñá túú cùu váha iní-xi núú Xítoho Jesucristú te na cuíta nihnú-yu. Te vitna nchaa-o chí ná cãhí-ó sã Xítoho Jesucristú quixi tucu-gá.

²³ Te xicãⁿ táhú-í núú Xítoho Jesucristú sá ná chindee chítúu ñaha-gã xii-ndo.

²⁴ Te ío cùu iní ñáhã-í xii-ndo nãcuáa ndècu-o ichi Xítoho Jesucristú, te ducaⁿ na cunduú, te ío chí càdá ndèe iní-nã vitna.

TUTÚ CÚÚ ÒÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑÚÚ CÒRINTÚ

Té Páblú cadúha-dé tutú quihiⁿ ndaha ñáyiu xĩndecu ichi Xitohó Jesucristú ndécú ñúú Còrintú

¹ Yúhú té Páblú cãháⁿ-í tnúhu Xitohó Jesucristú chi ducaⁿ ní cachí Yá Ndióxi cunduu. Te cadúha-í tutú-a ndihi té Timùteú tée ndècu ndihi-o ichi-gã cuendá daquixi-í ndaha nchòhó ñáyiu xĩndecu ichi Yá Ndióxi ndécú ñúú Còrintú, te tutú-a cuu-xi tnàhá cuendá nchaa ñáyiu cùu cuendá Yá Ndióxi xĩndecu nchaa ñúú yĩndèhu distritú Acáyá.

² Te xicáⁿ tãhú-í núú Tãtá-ó Dútú Ndióxi ndihi núú Xitohó Jesucristú sá ío na chĩndee chítúu ñaha-gã xii-ndo, te diu-ni ndi ndúu-gã ná cada te ío vãha cuu ini-ndó cùndecu-ndo.

Té Páblú cãháⁿ-dé nchaa nãcuáa ndòho-dé
³ Te chí ná cãchí-ó sã ío vãha ini Dútú Ndióxi Yá cúú Tãtá Xitohó Jesucristú, te diu-ni Dútú Ndióxi cúú-gã Yáá ío cùndahú ini ñáhá xii-o, te diu-ni-gã cúú-gã Yáá táxi tnúhu ndee ini.

⁴ Te cuèi nãndi ndòho-o ndecu-o dico diu-ni Dútú Ndióxi táxi-gã tnúhu ndee ini xii-o, te ducaⁿ quide-gã cuendá sá nchóo cuãñaha-o tnúhu ndee ini xii nchaa ñáyiu nãndi ndòho ndecu, te diu-ni nchaa tnúhu ndee ini táxi-gã xii-o diu-ni nchaa tnúhu ndee ini-áⁿ cuãñaha-o xii-yu.

⁵ Te Xitohó Jesucristú ío ní ndoho-gã, te ducaⁿ nchòo tucu ío ndòho-o, te ducaⁿ ío vãi tnúhu ndee ini ñihí-ó ndècu ndihi-o chi ndècu-o ndihi Xitohó Jesucristú.

⁶ Te nchúhú nãndi ndòho-ndí ndécú-ndí cuendá sá nchòhó ñihí-ndó tnúhu ndee ini cundecu ndihi-ndo te naníhí tãhú-ndó. Te Yá Ndióxi táxi-gã tnúhu ndee ini xii-ndí, te ducaⁿ quide-gã cuendá sá nchòhó tnàhá-ndó ñihí-ndó tnúhu ndee ini-áⁿ te naníhí tãhú-ndó, te ducaⁿ càda ndee cada cahnu ini-ndó ndòho-ndo datná ndòhó nchúhú.

⁷ Te nchúhú ío vãha sãni ndáá ini-ndí cuendá-ndó chi ndòho-ndo datná ndòhó-ndí, te ducaⁿ tàxi Yá Ndióxi tnúhu ndee ini xii-ndo datná táxi-gã xii-ndí.

⁸ Te nchòhó ñáyiu ndècu ndihi-ndí ichi Xitohó Jesucristú cuini-ndí cachí tnúhu-ndí xii-ndo nãcuáa ní yãha-ndí cùtnãhá ní xĩndecu-ndí distritú Asíá chi dává-áⁿ ío ní ndoho-ndí, te luha-ná te vá cùndèe ini-ndí yãha-ndí nchaa tnúndòho-áⁿ ní cùu chi ní xehndé ini-ndí sá vã càcu-ndí.

⁹ Chi ní sani ini-ndí sá ndíyi-ná cuu-ndí ní cùu, te ducaⁿ ní yãha-ndí cuendá sá ío-gã

quíndáá ini-ndí Yá Ndióxi sá díú-gã taunihu ñaha-gã xii-ndí, te ñá díú mèe-ndí taunihu-ndí mèe-ndí, te diu-gã cúú-gã Yáá dándòto cuèi ñáyiu sa ní xihí.

¹⁰ Te diu-ni-gã ní taunihu ñaha-gã ñá túú ní sãhni ñaha ñáyiu xii-ndí, te diu-ni-gã táunihu ñaha-gã xii-ndí cuèi vitna, te cùtnuní ndáá ini-ndí sá díú-ni-gã taunihu ñaha-gã xii-ndí núú cuaháⁿ núú vèxi te vá cãhni ñaha ñáyiu.

¹¹ Te nchòhó tnàhá-ndó chĩndee ñaha-ndo xii-ndí chi cãháⁿ ndihi-ndo Yá Ndióxi cuendá-ndí, te ío vãi ñáyiu cãháⁿ ndihi ñáhá-yu xii-gã cuendá-ndí, te ducaⁿ ío vãi ñáyiu ndácáⁿ tãhú-yu núú-gã cuendá nchaa sá vãha quide ñaha-gã xii-ndí.

Té Páblú cãháⁿ-dé ná cuendá ñá túú ní nãyãha-dé ñúú Còrintú

¹² Te ío vãha cùu ini-ndí chi cùtnuní ini-ndí sá cúú-ndí cue tée cùu ndáá datná cuini Yá Ndióxi cunduu ndècu-ndí ñuyúú-a, te diu-ni ducaⁿ quide-ndí sá cúú-xi-ndó chi mee-gã cùndahú ini ñáhá-gã xii-ndí chĩndèe ñaha-gã, te ñá túú quide-ndí datná sãni ini cue ñáyiu ñuyúú-a.

¹³⁻¹⁴ Nchaa nãcuáa ndúu tnúhu chĩdo tnuní-ndí daquixi-ndí ndaha-ndo cùu-xi mee-ni tnúhu sá ñá túú ùhú tecú tnuní-ndó. Te nchòhó sa cùtnuní luha ini-ndó nãcuáa quide-ndí ndécú-ndí, te cuini-ndí sá ío-gã vãha tecú tnuní-ndó cuendá sá òré ná quixi tucu Xitohó Jesucristú, te dává-áⁿ ío cada níu ñaha-ndo xii-ndí datná cada níu ñaha-ndí xii-ndo.

¹⁵ Te cuendá xiãⁿ núu ní sani ini-í yãha cãháⁿ-í úú xito núú ndécú-ndó cuendá ío cudíí ini-ndó.

¹⁶ Chi ní sani ini-í sá òré quihiⁿ-í distritú Macèdoniá te yãha cãháⁿ-í núú ndécú-ndó, te òré ndixi tucu-í te nayãha cãháⁿ tucu-í, te òré nayãha cãháⁿ-í te taxi-ndo sã cúú ichi-í cuendá quihiⁿ-í distritú Jùdeá, duha ní sani ini-í ní cùu.

¹⁷ Te sá dúcãⁿ ñá túú ní quixi coto ñaha-í xii-ndo te cudana sãni ini-ndó sã yúhú ñá túú ní sãha vãha-í cuendá nãcuáa ní sani ini-í cada-í, àdi cudana ñáyiu ndècu ichi cuehé ichi duha, chi cue ñáyiu-áⁿ tnaa cãchí-yu sá cúú cadá-yu íiⁿ sá sãni ini-yu cadá-yu te tnaa cãchí-yu sã ñáhá.

¹⁸ Dico Yá Ndióxi Yáá ío vãha quide ndáá ñaha ndáá náhá càxi-gã sá nchúhú ñá túú dàma-ndí sá cãháⁿ-ndí.

¹⁹ Te yúhú ndihi té Silvanú ndihi té Timùteú dánèhé ñáhá-ndí xii-ndo cuendá Xitohó Jesucristú Yáá cúú Dèhe Yá Ndióxi, te Xitohó Jesucristú cúú-gã Yáá ñá túú dàma-gã tnúhu cãháⁿ-gã, chi cùu-gã Yáá cãháⁿ mee-ni tnúhu ndáá tnúhu cuiti.

²⁰ Te ñi-ni Xítoho Jesucristú cúu-gã Yaa quidé nchãa nacuaã ní cachí Yã Ndiöxí. Te sã cuendã sã dúcãⁿ quide Xítoho Jesucristú xiãⁿ cachí-ó sã ño càhnu cuu Yã Ndiöxí. Te nchaa-o na cachí-ó sã ñú-ní ñúcaⁿ na cada-gã.

²¹ Te mee Yã Ndiöxí quidé-gã ndécú-ní-ó ñhi Xítoho Jesucristú. Te ñi-ni mee-gã ní cáháⁿ ñãhá-gã xii-o cuendã cunu cuechi-o núu-gã.

²² Te Yã Ndiöxí ní quide-gã sã nchóo cùu-o ñãyiu cùu cuendã-gã, te ní taxi-gã Espiritú-gã ní ngúndecu ndihi-o cuendã cutnùní iní-ó sã ndãá cada ñaha-gã xii-o nacuaã ní cachí-gã cada-gã.

²³ Te Yã Ndiöxí náhá-gã sã yúhú càháⁿ ndãá-í ná cuendã vátã quixí-gã-í quixi coto ñaha-í xii-ndo, te vátã quixí-gã-í chí ñã túú cuíní-í dandihú-í iní-ndó.

²⁴ Te nchúhú ñã túú tau-ndí cada yica ñaha-ndí xii-ndo nacuaã quindãá iní-ndó Yã Ndiöxí, chí sa sãndãá váha iní-ndó-gã, chí nchúhú cuíní-ndí chindee tñuhu ñaha-ndí xii-ndo nacuaã ío-gã cudíí iní-ndó cùndecu-ndo.

2

¹ Te ní sani ndãá iní-í sã vã quixí ndihí-ni-í quixi coto ñaha-í xii-ndo cuendã sã vã dandihú-í iní-ndó.

² Te nchóhó cúu-ndó ñãyiu tàxi tñuhu ndee ñni xii-í cudíí iní-í ndécú-í, te xiãⁿ núu ñã túú cuíní-í dandihú-í iní-ndó, chí núu ducaⁿ na cada-í te vã cùndecu váha-gã iní-ndó nacuaã taxi-ndo tñuhu ndee iní-xii-í.

³ Te xiãⁿ núu ní tendaha-í tutú véxi ndaha-ndo cuendã sã òré quixi coto ñaha-í xii-ndo, te ñávã-ãⁿ quini-í sã quidé-ndó nacuaã cudíí iní-í te ñã ñúú dà dandihú-ndó iní-í òré quexio-í, chí nchóhó tau-ndó càda-ndo sã yúhú cudíí iní-í. Te cutnùní ndãá iní-í sã núu yúhú cudíí iní-í te tñãhá nchóhó cudíí iní-ndó cuendã sã dúcãⁿ cudíí iní-í.

⁴ Te ndàhyú-í sã ndihú iní-í òré ní cadúha-í tutú ní dáquixí-í ndaha-ndo, chí ño cuhé sã sání iní-í, te ñã túú ní dáquixí-í tutú-ãⁿ ndaha-ndo cuendã sã dandihú iní ñãhá-í xii-ndo, chí ní dáquixí-í cuendã sã nchóhó cutnùní iní-ndó sã ño cùu iní ñãhá-í xii-ndo.

Nacuaã tau ñãyiu ñuu Còrintú cada-yu cuendã ñn ñãyiu ñã túú quide ndãá

⁵ Te na càchí tñuhu-í xii-ndo cuendã ñn téé ní quide ñn sã ñã túú tau-dé cada-dé ndécú ndihí-ndo, te ní quide ndàhú-xi luha iní-í cuendã sã ní quide-dé-ãⁿ dico nchóhó tñãhá-ndó ní dandihú-dé luha iní-ndó, te duha càchí-í sã lúhá-ní ní dandihú-dé iní-ndó cuendã sã vã cuidó-gã-í ná tñuhu càháⁿ-í.

⁶ Te nacuaã ní ndatnúhu-ndo ní quide ndãá-ndó cuéchi téé-ãⁿ te sa ndóí-gã cuu nacuaã ní quide-ndo-dé.

⁷ Te vitna tau-ndó càda cahnu iní-ndó sã ní quide-dé, te cuãñaha-ndo tñuhu ndee ñni xii-dé chí núu ñãhá-í te vã ñihí ndéé-gã-dé cada-dé sã váha cuendã sã ndihú iní-dé.

⁸ Te xiãⁿ núu càháⁿ ndàhú-í núu-ndó sã càdã tucu-ndo sã cúu iní-ndó-dé.

⁹ Te ñi-ni cuendã íha càháⁿ-í ñn núú tütú sã sã ní dáquixí-í ndaha-ndo, te ducaⁿ ní quide-í xitó ndéé ñãhá-í xii-ndo núu ndisa cuíní-ndó càda-ndo nchaa nacuaã càháⁿ-í.

¹⁰ Te ndéda-ní càa ñãyiu na càda cahnu iní-ndó ñn sã quidé-yu, te tñãhá yúhú cada càhnu iní-í sã quidé-yu tucu. Te núu ío ñn sã xini ñuhu-xi cada cahnu iní-í te quide cahnu iní-í, te mee Xítoho Jesucristú náhá-gã sã dúcãⁿ quide-í, te ducaⁿ quide-í cuendã sã nchóhó cuu-xi sã váha xii-ndo.

¹¹ Te ducaⁿ te sácufhã vã ñihí-xi ná cada ñaha-xi xi-o, chí nchoo sã xini-ó nacuaã quide-xi.

Té Pãblú ndihú iní-dé ndécú-dé ñuu Tróas

¹² Te ní xica-í cuáhã-í ñuu Tróas cuendã yacãⁿ càháⁿ-í tñuhu sã càháⁿ nacuaã naníhí ñãhú-ó tñuhu Xítoho Jesucristú, te òré ní quexio-í te ní ñihí-í ñn ñhi càhnu càháⁿ-í tñuhu-gã.

¹³ Dico ñã túú ní cùu váha iní-í chí ñã túú ní naníhí-í té Titú téé ndécú ndihí-o ñhi Xítoho Jesucristú, núu xiãⁿ ní quide ndee ñni tñãhá-í ndihí cue ñãyiu ñuu-ãⁿ, te ní xica-í cuáhãⁿ-í distritú Macèdoniã.

Dàquetíhú-ó yucu ñãvãha chí ndécú ndihí-o Xítoho Jesucristú

¹⁴ Te táxãhu xii Yã Ndiöxí chí ducaⁿ-ni sãnu ñhi ñaha-gã xii-ndí nacuaã cunu-ndí núu yucu ñãvãha chí ndécú ndihí-ndí Xítoho Jesucristú, te mee Yã Ndiöxí sáchiuⁿ ñaha-gã xii-ndí càháⁿ-ndí tñuhu-gã. Te cada iní-ó sã tñuhu-gã-ãⁿ cúu-xí ñãtã ñn yúcu sã ño váha sãháⁿ te ta xítenuu dicó-xi ndéni ní cuu cuáhãⁿ. Te ducaⁿ sãtnahã-xi cùu tñuhu-gã chí nchúhú quidé-ndí nacuaã ta xítenuu ndéni ní cuu cuáhãⁿ.

¹⁵ Te cúu-ndí ñãtã dicó ñn yúcu sã ño váha sãháⁿ, te ñãcãni cuendã Xítoho Jesucristú núu Yã Ndiöxí, te dicó yúcu-ãⁿ nchítã cuéi núu xíndecu cue ñãyiu sa ní naníhí ñãhú, te cuéi núu xíndecu cue ñãyiu ta xíta ñihnu cuáhãⁿ.

¹⁶ Te sã cúu-xí cué ñãyiu ta xíta ñihnu cuáhãⁿ-ãⁿ, dicó yúcu-ãⁿ cúu-xí ñãtã ñn sã sãhni ñaha xii-yu, dico sã cúu-xí cué ñãyiu sa ní naníhí ñãhú, dicó yúcu-ãⁿ cúu-xí ñãtã ñn sã ndécã iní-yu, ducaⁿ sãtnahã-xi cùu nchúhú. Te vitna chí cuãha cuendã núu ná cúu ñãyiu sãni iní-ndó ndãcu cada nacuaã ndúu tñuhu càháⁿ-í-a.

17 Chi nchúhú càháⁿ-ndí tnúhu Yá Ndióxi dico ñá túú ndáhú quidé-ndí ndihi tnúhu-gá dàtná xiquide dava-gá-güedé, chi quide ndáá-ndí càháⁿ-ndí tnúhu-gá, te mee-gá ní cachí-gá sá dúcáⁿ cada-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndihi-ndí Xítohó Jesucristú.

3

Cuendá ingá núú sã vãha ní cachí Yã Ndióxi cada-gã ñáyiu

1 Te cuéi duha càháⁿ-ndí núú-ndo dico ñá túú xini ñuhu-xi sá cñaha-ndí xii-ndo sá cúú-ndí cue téé váha danèhé ñáhá xii-ndo datná xiquide dava-gá-güedé, te ní ñá túú xini ñuhu-xi cacanehe-ndí ñá túú núú càháⁿ-xi sá cúú-ndí cue téé váha danèhé ñáhá xii-ndo datná xiquide dava-gá-güedé, te ní ñá túú xini ñuhu-xi sá nchóhó taxi-ndo ñá túú núú càháⁿ-ndo sá nchúhú cúú-ndí cue téé quide váha.

2 Te ñá túú xini ñuhu-xi ducaⁿ cada-ndí. Te cùtnuní ndáá iní-ndí sá nchóhó cúú-ndo dàtná ñá túú sá ñá váha càháⁿ cuendá-ndí. Te ducaⁿ sãtnahá-xi cùu-ndo chi nchaa ñáyiu nihí-yu tnúhu nàcuáa quide-ndo ndecu-ndo, te xiáⁿ cùtnuní iní-yu sá nchúhú cúú-ndí cue téé quide váha.

3 Te nchóhó cúú-ndo cuendá Xítohó Jesucristú, te cùu-ndo datná tutú-gá te tutú-án ní táuchúú-gá xii-ndí ní cadúha-ndí, te mee-ní ndihi Espiritú Yã Ndióxi ní ngúndéé tnúhu-án te ñá díú ndihi tindá ní ngúndéé. Te ñá díú ñá túú núú yúú ní ngúndéé chi iní-ndo cùu-xi núú dúcáⁿ ní ngúndéé tnúhu-án te ducaⁿ sãtnahá-xi cùu-ndo.

4 Te duha càháⁿ-ndí chi cùtnuní ndáá iní-ndí sá Yã Ndióxi quidé váha ñaha-gá xii-ndí, chi ndècu ndihi-ndí Xítohó Jesucristú.

5 Te nchúhú chi ndàcu-ndí quidé-ndí sá váha dico ñá díú mée-ndí ducaⁿ ndàcu-ndí quidé-ndí, chi mee Yã Ndióxi chindèe ñaha-gá xii-ndí nùu ndàcu-ndí quidé-ndí sá váha.

6 Te mee Yã Ndióxi ní quide-gá sá nchúhú ndacu-ndí cunu cuechi-ndí núú-gá càháⁿ-ndí núú ñáyiu cuendá ingá núú sá váha ní cachí-gá cada ñaha-gá xii-yu. Te sá váha ní cachí-gá cada ñaha-gá xii-yu-án ñá túú ñá túú-ñi cuu-xi ndihi nchaa tnúhu sá ní xáhaⁿ-gá xii ndí Moisés ní chídó tnùní ndí, te ducaⁿ chi espíritú Yã Ndióxi néhé chùu-xi nchaa tnúhu sá càháⁿ cuendá nchaa sá váha-án. Te nchaa tnúhu ní chídó tnùní ndí Moisés, dándixi túu-xi iní nchaa ñáyiu ndècu ndihi tnúhu-án sá cuíta nihnú-yu cuendá nchaa cuéchi-yu, dico cue ñáyiu ndècu ndihi

Espiritú Yã Ndióxi ñáyiu-án ndécú ndíhi-yu tnúhu ndee iní sá cãcu nihnú-yu.

7 Te tnúhu sá ní càháⁿ Yã Ndióxi ndéé díhna nàcuáa cada ñáyiu ní ngúndéé-xi ñá túú yúú quèhéⁿ. Te òré ní dátúu ndí Moisés nàcuáa càháⁿ tnúhu sá ní càháⁿ Yã Ndióxi ndéé núú yúú-án núú cué ñáyiu isràel, te súuní ní tásaⁿ núú ndí te ñá túú-gá ní cùu cundehé-yu núú ndí, te ducaⁿ-gá ducaⁿ-gá quidé-xi dátásaⁿ-xi núú ndí ní cùu ñá túú-gá ducaⁿ ní quide-xi. Te tnúhu ndéé núú yúú-án dándixi túu-xi iní cue ñáyiu sá cuíta nihnú-yu sá cuendá nchaa cuéchi-yu, te ñá váha ní quide-xi cùtnáhá ní ngúndecu ndihi cue ñáyiu isràel tnúhu-án.

8 Te sá dúcáⁿ ní quide-xi xiáⁿ cùtnuní sá tnúhu càháⁿ Espiritú Yã Ndióxi vitna uuⁿ-gá ducaⁿ ñá túú-gá váha quide-xi.

9 Te núu ducaⁿ ñá váha ní quide-xi cùtnáhá ní ngúndecu ndihi cue ñáyiu isràel tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uuⁿ-gá ducaⁿ váha quide-xi vitna ní ngúndecu ndihi-ó tnúhu sá càháⁿ nàcuáa quide Yã Ndióxi cuendá sá vá cùndècu-gá cuéchi ñáyiu túú-gá.

10 Te vá càchí-ó sá cùtnáhá ní ngúndecu ndihi cue ñáyiu isràel tnúhu ndéé núú yúú-án ñá túú-gá váha ní quide-xi, te ñáhá chi uuⁿ-gá váha quide-xi vitna cuendá tnúhu sá càháⁿ nàcuáa quide Yã Ndióxi.

11 Te núu ducaⁿ ñá váha ní quide-xi cùtnáhá ní ngúndecu ndihi ñáyiu isràel tnúhu sá ñá túú ní cùdí, te uuⁿ-gá ducaⁿ ñá váha quide-xi vitna ní ngúndecu ndihi-ó tnúhu sá vá ndíhi nihnu tnahí-gá.

12 Te cùtnuní iní-ndí sá vá ndíhi nihnu sá dúcáⁿ ñá váha quide-xi, núu xiáⁿ ñá túú-ó váha cùu iní-ndí càháⁿ-ndí tnúhu sá ní ngúndecu ndihi-ó.

13 Te ñá túú quide-ndí dàtná ní xóo cada ndí Moisés, chi ndí-án ní xóo dàdáhu ndí núú ndí òré dátásaⁿ-xi núú ndí cuendá sá vá quini cue ñáyiu isràel òré ñá túú-gá dátásaⁿ-xi núú ndí.

14 Te cue ñáyiu isràel ñá túú ní tècú tnùní váha-yu nàcuáa ní xóo danèhé ñáhá ndí Moisés xii-yu, te cuéi ndéé vitna ñá túú tècú tnùní-yu òré dácuahá-yu tnúhu sá ní càháⁿ Yã Ndióxi ndéé díhna nàcuáa cada-gá, te cada iní-ó sá dàtná sá ní xidáhu núú ndí Moisés yidáhu núú-yu cuendá sá vá cùtnuní núu-yu cundehé-yu te tecú tnùní-yu, dico núu tnahá tnúhu-yu ndihi Xítohó Jesucristú te tecú tnùní-yu.

15 Te cuéi ndéé vitna òré dácuahá-yu nchaa tnúhu sá ní chídó tnùní ndí Moisés nchaa núú túú ndí, te cada iní-ó sá dàtná sá ní xidáhu núú ndí yidáhu núu-yu chi ñá túú tècú tnùní-yu.

¹⁶ Dico cue ñáiyu na tùha ñaha xii Xítohó Jesucristú te tècu tnùnì-yu tnúhu-gá.

¹⁷ Te Xítohó Jesucristú ìn-ni cùu-gá ndihi Espiritú Yá Ndiòxí, te nchaa ñáiyu ndècu ndihi Espiritú-gá ñá túú-gá táxi tnùnì ñáhá nì ìn sá ñá túú vâha xii-yu.

¹⁸ Te dàtná cùú ìn yutátá sã dánèhé núú ñáhá-xí xii ñáiyu ìn sá vâha, ducaⁿ sãtnahá-xi cùu-o chí quide-o nacuaá cáháⁿ ñáiyu sá ìo càhnu cuu Xítohó Jesucristú, te ducaⁿ ùuⁿ-gá uuⁿ-gá tá cundáá-ó ndècu-o ichi-gá dàtná quidé mèe-gá quidé ndáá-gá. Te Espiritú-gá quidé-xi ducaⁿ ta cundáá-ó núú-gá cuáháⁿ.

4

¹ Te mee Yá Ndiòxí ní cundáhú iní ñáhá-gã xii-ndí ní taxi-gá chiúⁿ quide-ndí cáháⁿ-ndí tnúhu-gá, núu xiãⁿ ñá túú tnàhí nàtúhú iní-ndí cáháⁿ-ndí tnúhu-gá.

² Te nchúhú dàquee tihú-ndí nchaandi tihú sá ñá túú vâha quide dayuhu ñáiyu, chi nchaa xiãⁿ cùú-xí ìn sácáⁿnúú sá cùú-xí-yu, te nchúhú ñá túú sãni iní-ndí dandáhú-ndí ñáiyu te ni ñá túú sãni iní-ndí dama-ndí nãcuáa cáháⁿ tnúhu Yá Ndiòxí, chí cáháⁿ ndáá-ndí nãcuáa tàú-xi cáháⁿ-ndí, te mee Yá Ndiòxí nãhá-gã nãcuáa ndècu tnúhu cáháⁿ-ndí núú ñáiyu, te ñáiyu-án cùtnùnì iní-yu sá nchúhú cáháⁿ vâha-ndí.

³ Te cue ñáiyu ñá túú tècu tnùnì nãcuáa ndècu tnúhu sá cáháⁿ nãcuáa naníhí tãhú-ó cáháⁿ-ndí núú-yu, ñáiyu-án cùú-yu ñáiyu ta xita niuhu cuáháⁿ.

⁴ Te cue ñáiyu-án cùú-yu ñáiyu ìo sàá iní-xi chí ñá túú cuiní-yu quindáá iní-yu tnúhu Xítohó Jesucristú, te xiãⁿ núu sãcuíhna cùnù-xi núú-yu te nihí-xi nãcuáa quide-xi dadáhu ndodo iní ñáhá-xí xii-yu cuendá sá vã tècu tnùnì-yu tnúhu sá cáháⁿ nãcuáa naníhí tãhú-yu, te tnúhu-án cùú-xí tnúhu sá ìo vâha chí cáháⁿ-xi sá ìo càhnu cuu Xítohó Jesucristú, te cùu-gá dàtná mée Tãtã-gã Dútú Ndiòxí.

⁵ Te nchúhú ñá túú cáháⁿ-ndí cuendá sá cùú-xí mèe-ndí núú-ndó chí cáháⁿ-ndí cuendá Xítohó Jesucristú, te càchí-ndí xii-ndo sã díú-gã cùú-gã Yaá ìo cùnnu, te càchí-ndí xii-ndo sã mée-ndí cùú-ndí dicó-ni cue téé xinu cuechí sá cùú-xí-ndó, te ducaⁿ quide-ndí nãcuáa cuu vii cuu vâha iní Xítohó Jesucristú.

⁶ Te Yá Ndiòxí Yaá ní dáyèhé ndéé cùtnàhá nee ñuyú ní cùu, Yaá-án ní cachí-gá sã Xítohó Jesucristú cada-gã nãcuáa tecú tnùnì-ó sã ìo càhnu cuu mee Yá Ndiòxí. Te sã dúcáⁿ ní quide-gá te cada iní-ó sã dàtná tnúhu sá ní dáyèhé-gá iní-ó.

Ìo quindáá iní-ó Yá Ndiòxí

⁷ Te nchúhú ndécú ndihi-ndí tnúhu Xítohó Jesucristú, te tnúhu-gá cùú-xí dàtná ìn sá ìo vâha ñuhu ìn xití quídi ñuhu, te nchúhú cùú-ndí dàtná quídi-án. Te ducaⁿ sãtnahá-xi cùu-ndí chí tnúhu-gá ìo càhnu cuu-xi te mee-ndí ñáhá, te ducaⁿ cùu nacuaá cutnùnì sá mée Yá Ndiòxí quidé-gã nchaa sá vâha te ñá díú mèe-ndí.

⁸ Te cuèi ìo ndòho-ndí ndécú-ndí dico nihí-ndí nãcuáa quide-ndí tá yâha-ndí nchaa tnúndòho-án cuáháⁿ, cuèi áma sa ndècu vii-nã quehndé iní-ndí sá vã ndácú-ndí yâha-ndí nchaa tnúndòho-án, dico ndàcu-ndí yâha-ndí.

⁹ Te cuèi nànducu ñaha ñáiyu cuiní-yu ná cada ñáhá-yu xii-ndí dico ñá túú dàña ñaha Yá Ndiòxí xii-ndí, te cuèi cànihá-yu xii-ndí dico càcu-ndí ñá túú sãhni ñáhá-yu.

¹⁰ Te ndèni ní cuu cuáháⁿ-ndí xicá cùu-ndí, te càcu càcu cahni ñáhá-yu xii-ndí dàtná ní quidé-yu Xítohó Jesucristú, te ducaⁿ yâha-ndí cuendá cutnùnì sá ndécú tũu Xítohó Jesucristú andiu te chindee ñaha-gã xii-ndí.

¹¹ Te nchúhú nini ndècu-ndí ñuyú-a te nchaa-ni nduu càcu cahni ñaha ñáiyu xii-ndí sá cuendá Xítohó Jesucristú, te ducaⁿ yâha-ndí ndécú-ndí cuendá cutnùnì sá Xítohó Jesucristú ndécú ndihi ñaha-gã xii-ndí cuèi vã cùdii yiqui cùnù-ndí cundecu-xi.

¹² Te sã dúcáⁿ càcu càcu cahni ñaha ñáiyu xii-ndí xiãⁿ nchòhó uuⁿ-gá tá nihí ndéé-ndó cuáháⁿ ndécú-ndó ichi Xítohó Jesucristú.

¹³ Te ìn téé ní xindecu ndéé sanaha nã chídó tnùnì-dé núú tütú Yá Ndiòxí núú càchí-xi: “Yúhú ní sãndáá iní-í Yá Ndiòxí núu xiãⁿ ní cáháⁿ-í”, duha ní cachí téé-án. Te dàtná-ni ní sani iní téé-án nì cáháⁿ-dé te díu-ni ducaⁿ sãni iní nchúhú tucu núu xiãⁿ càchí-ndí: “Sãndáá iní-ndí Yá Ndiòxí núu xiãⁿ cáháⁿ-ndí”, duha càchí-ndí.

¹⁴ Te cùtnunì iní-ndí sá núu na cùu-ndí te Yá Ndiòxí dandòto ñaha-gã xii-ndí dàtná ní dándótó-gã Xítohó Jesucristú, te tnàhá nchòhó ducaⁿ càda ñaha-gã xii-ndo, te dàvã-án candeca ñaha-gã xii-o quihíⁿ nucundecu-o núú-gã.

¹⁵ Te nchúhú nãndi cùu sá tá yâha-ndí véxi cuendá nchòhó ngundecu vâha-ndo, te ducaⁿ cuíta cãyã-gã ñáiyu ngundecu vâha sá xití Yá Ndiòxí, te díu-ni ducaⁿ cuíta cuu vai-gã ñáiyu ndacáⁿ tãhú-yu núú-gã te cachí-yu sá ìo càhnu cuu-gã.

¹⁶ Te xiãⁿ núu nchúhú ñá túú tnàhí nàtúhú iní-ndí ndécú-ndí ichi Xítohó Jesucristú, te cuèi yiqui cùnù-ndí tá xàú-xi cuáháⁿ dico iní-ndí chí uuⁿ-gá uuⁿ-gá tá nihí ndéé-xi cuáháⁿ.

¹⁷ Te nchaa sã ndòhó-ndí ñuyú-a ñá túú càchí-ndí sá cùú-xí ìn tnúndòho cahnu

vihí, chí tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyú-a te Yá Ndióxi ío váha cada ñaha-gá xii-ndí nduu na sáa-ndí núu ndécú-gá, te diu-ni ducaⁿ càda ñaha-gá xii-ndí ni caa ni quíhíⁿ.

¹⁸ Te nchúhú ñá túu nchícúⁿ nihnu-ndí sá túu ndèhe-ndí ío ñuyú-a, chí nchícúⁿ nihnu-ndí sá vátá quíni-gá-ndí ndécú àndiu, te ducaⁿ quide-ndí chí nchaa sá túu ndèhe-ndí ío ñuyú-a vá cúdii-xi cundecu-xi, te nchaa sá ñá túu túu ndècu andiu xiáⁿ cudíi-xi cundecu-xi ni caa ni quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñá túu cúdii-xi, te ducaⁿ sàtnahá-xi cùu yiqui cuñú-ó chí vá cúdii-xi, te na sáa nduu vá cùndècu-gá-ó ndíhi yiqui cuñú-ó, te Yá Ndióxi taxi-gá ìⁿ yiqui cuñú sáa sá cúu-xi-ó, te xiáⁿ cúu-xi dátá ìⁿ vehe sá ñá túu ní càdúha cue ñáyiú ñuyú-a, chí mee Yá Ndióxi ní cadúha-gá vehe-áⁿ te vehe-áⁿ cudíi-xi cundecu-xi ni caa ni quíhíⁿ andiu. Te ducaⁿ sàtnahá-xi cùu yiqui cuñú sá táxi Yá Ndióxi xii-o chí cudíi-xi cundecu-xi ni caa ni quíhíⁿ.

² Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuíni-ndí sá ío ndíhi taxi Yá Ndióxi yiqui cuñú sáa cùndecu ndíhi-ndí.

³ Chí mee-gá vá dáñá-gá sá dúcáⁿ-ní cùnduu-ndí cundecu-ndí, chí dai taxi-gá yiqui cuñú sáa-áⁿ xii-ndí.

⁴ Te ñini ndècu-ndí ndíhi yiqui cùñú-ndí vitna ío sàni iní-ndí te ndíhú iní-ndí, dico ñá díú sá dúhá quide-ndí te ñá túu-gá tnàhá iní-ndí cundecu-ndí ndíhi yiqui cùñú-ndí, chí cuíni-ndí sá Yá Ndióxi ío ndíhi taxi-gá yiqui cùñú sáa nduu táhú-ndí, chí xiáⁿ cudíi-xi ni caa ni quíhíⁿ te yiqui cùñú-ndí sá tá ndíhi nihnu cuáháⁿ-a vá cúdii-xi cundecu-xi.

⁵ Te ducaⁿ tnàhí ní cachí Yá Ndióxi cunduu sá dúcáⁿ nduu táhú-ó yiqui cuñú sáa-áⁿ, te ní taxi-gá Espiritú-gá ní ngúndecu ndíhi-o cuendá cutnùnì iní-ó sá ndáa taxi-gá yiqui cùñú sáa-áⁿ nduu táhú-ó.

⁶ Te xiáⁿ núu nchúhú nihí ndéé-ndí ndécú-ndí, te cùtnunì iní-ndí sá ñini ndecu-ndí ndíhi yiqui cùñú-ndí sá ndécú ndíhi-ndí vitna te vátá sáa-gá-ndí cundecu-ndí mei núu ndécú Xítoho Jesucristú.

⁷ Te ducaⁿ cùtnunì iní-ndí chí sàndáá iní-ndí Yá Ndióxi ndécú-ndí ñuyú-a cuèi ñá túu xini-ndí-gá.

⁸ Te ío váha cùu iní-ndí ndécú-ndí, te sàni iní-ndí sá váha-gá sá núu vá cùndècu-gá-ndí

ndíhi yiqui cùñú-ndí sá ndécú ndíhi-ndí vitna. Te ducaⁿ sàni iní-ndí chí váha-gá cundecu-ndí mei núu ndécú Xítoho Jesucristú.

⁹ Te ío ndècu ndee-ndí quidé-ndí nàcuáa cuu vii cuu váha iní Xítoho Jesucristú vitna ndècu-ndí ñuyú-a, te diu-ni ducaⁿ càda-ndí cuèi òrè vá cùndècu-gá-ndí.

¹⁰ Te dacuitíi sá ncháá-ó cùndecu-o núu Xítoho Jesucristú ìⁿ nduu, te dàvá-áⁿ mee-gá càháⁿ-gá te núu nása nduu chiuⁿ ní quide-o ìⁿ ìⁿ-o, núu ní quide váha-o àdi ñá túu ní quide váha-o, te nàcuáa nduu chiuⁿ ní quide-o ìⁿ ìⁿ-o te ducaⁿ nduu sá táxi-gá nduu táhú-ó.

Nàcuáa ní cuu ní ngúndecu váha-o ndíhi Yá Ndióxi

¹¹ Te nchúhú quíyuhú iní-ndí nàcuáa cada Xítoho Jesucristú, núu xiáⁿ càháⁿ-ndí tnúhu-gá núu ñáyiú cuendá xinu iní-yu tuha ñahá-yu xii-gá. Te mee Yá Ndióxi sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí.

¹² Te sá dúhá càháⁿ-ndí te vá cánì iní-ndó sá nchúhú càháⁿ váha-ndí cuendá-ndí nàcuáa nchòhó cuu váha iní ñahá-gá-ndó xii-ndí te ñahá, chí duha càháⁿ-ndí cuendá sá nchòhó nihí-ndó tnúhu càháⁿ váha-gá-ndó cuendá-ndí núu ñáyiú. Te ducaⁿ nihí-ndó tnúhu cuñaha-ndo xii cue ñáyiú quide nínu mee-xi, chí cue ñáyiú-áⁿ ñá túu quide cuendá-yu nása ndècu iní-yu.

¹³ Te núu nchòhó sání iní-ndó sá lúcú-ndí cuendá nàcuáa quide-ndí ndécú-ndí te cùu-xi cuendá Yá Ndióxi, àdi núu sàni iní-ndó sá ñá túu lúcú-ndí cuendá nàcuáa quide-ndí ndécú-ndí te cùu-xi sá váha sá cúu-xi-ndó.

¹⁴ Te quide-ndí nàcuáa cuíni Xítoho Jesucristú chí cùtnunì iní-ndí sá ío cùu iní-gá nchaa ñáyiú, te ducaⁿ xini ndáá-ndí sá ní xihí-gá cuendá nchaa-yu, te xiáⁿ núu cada iní-ó sá dátá tnúhu sá ncháá ñáyiú ní xihí-yu ndíhi-gá.

¹⁵ Te ducaⁿ ní xihí Xítoho Jesucristú cuendá nchaa ñáyiú chí cuíni-gá sá ncháá-yu cundecu-yu cadá-yu nàcuáa cuíni mée-gá te vá cadá-yu nàcuáa cuíni mée-yu, chí mee-gá ní xihí-gá te ní ndoto-gá cuendá cuu-xi sá váha sá cúu-xi-yu.

¹⁶ Te xiáⁿ núu nchúhú ñá túu-gá ná sání iní-ndí cuendá tnàha ñáyiú-ndí núu nàndíhi-yu àdi ñá túu nàndíhi-yu dátá ní xóo canì iní-ndí cùtnàhá ní xindecu-ndí ichi cuèhé ichi duha, te dàvá-áⁿ ní xóo canì iní-ndí cuendá Xítoho Jesucristú dátá sání iní cue ñáyiú ndècu ichi cuèhé ichi duha vitna.

17 Te nchaa nchoo ñáyu ní tnahá tnúhu ndíhi Xítohá Jesucristú ní nduu-o dàtná ìᵐ ñáyu saa, te ducaⁿ chi ñá túú-gá quidé-ó dàtná ní xóo cada-o cùtnàhá ní xíndecu-o ìchi cuèhé ìchi duha, chi ní ngúíta-o quíde-o mee-ná sá vâha te nchaa xiáⁿ cúú-xí sá sáá sá cúú-xí-ó chi vátá quíni-gá-ó càda-o.

18 Te ducaⁿ quíde-o ndecu-o chi mee Yá Ndióxi quidé-gá sá dúcáⁿ càda-o cundecu-o. Te Xítohá Jesucristú ní quíde-gá ní ngúndecu vâha-o ndíhi Yá Ndióxi vitna, te ducaⁿ chi mee Yá Ndióxi ducaⁿ tnàhí ní cachí-gá cunduu, te diu-ni mee Yá Ndióxi ní taxi-gá chi^u quíde-ndí càháⁿ-ndí tnúhu-gá nàcuáa ngúndecu vâha cue ñáyu ndíhi-gá.

19 Te ducaⁿ chi mee-gá ní cachí-gá sá Xítohá Jesucristú cada-gá nàcuáa nucúndecu vâha nchaa nchoo cuè ñáyu ndècu ñuyúú-a ndíhi Yá Ndióxi. Te nchaa ñáyu ní tuha ñaha xì-gá ñá túú-gá sání ìni-gá sá ñáyu-áⁿ nacháhu-yu cuèchi-yu núú-gá. Te mee Yá Ndióxi ní taxi-gá chi^u quíde-ndí càháⁿ-ndí tnúhu-gá núú ñáyu nàcuáa ngúndecu ndíhi ñaha vâha-yu xii-gá.

20 Te Xítohá Jesucristú ní cachí-gá sá nchúhú càháⁿ-ndí tnúhu-gá núú nchaa ñáyu, te sá dúhá quíde-ndí càháⁿ-ndí tnúhu-gá te quíde-ndí núú Yá Ndióxi càháⁿ-ndí yuhu-gá, te xiáⁿ núu càháⁿ ndàhú-ndí núú-ndó sá tnàhá tnúhu-ndo ndíhi Yá Ndióxi cuèndá cundecu vâha-ndo ndíhi-gá, te duha càháⁿ-ndí chi ducaⁿ càchí Xítohá Jesucristú cada-ndí.

21 Te Xítohá Jesucristú cúú-gá Yaá ñá túú tnàhí cuèchi-xi, dico Yá Ndióxi ní quíde ñaha-gá xii-gá dàtná ìᵐ ñáyu ndècu cuèchi-xi, te ducaⁿ chi Xítohá Jesucristú ní xido-gá cuèchi nchaa nchoo ñáyu ñuyúú-a, te ducaⁿ ní xido Xítohá Jesucristú nchaa cuèchi-o cuèndá sá núu na tnàhá tnúhu-o ndíhi-gá te cudíu-o núú Yá Ndióxi, te ducaⁿ ní cuu chi mee Yá Ndióxi ducaⁿ ní cachí-gá cunduu.

6

1 Te nchoo ìᵐ-ni cùu-o quíde chi^u-o cuèndá Yá Ndióxi núu xiáⁿ càháⁿ ndàhú-ndí núú-ndó sá vâ dicó-ni ducaⁿ cùndedóho-ndo tnúhu Yá Ndióxi, chi cada-ndo nàcuáa na chindee ñaha-ni-gá.

2 Chi mee-gá càchí-gá ìᵐ xichi núú tütú-gá núú càchí-xi:

Sáá nduu te cundàhú ìni ñàhá-í xii-ndo chindee ñaha-í cuèndá naníhí tàhú-ndó,

te ní sáá nduu tàú-xi sá cundàhú ìni ñàhá-í xii-ndo chindee ñaha-í cuèndá naníhí tàhú-ndó, núu xiáⁿ ní xíndedóho-í tnúhu ní càháⁿ-ndó te ní chindee ñaha-í xii-ndo nàcuáa naníhí tàhú-ndó.

Duha càchí-gá núú tütú-gá. Te vitna cùu-xi nduu cundàhú ìni ñàhá Yá Ndióxi chindee ñaha-gá, te cùu-xi nduu naníhí tàhú-ó.

3 Te nchúhú ñá túú quíde-ndí ìᵐ sá ñá túú tàú-ndí cada-ndí sá cúú-xí ñáyu, chi cuíni-ndí sá vâ càháⁿ cuèhé-yu cuèndá chi^u quíde-ndí.

4 Te nchaa sá quíde-ndí cúú-xí nàcuáa cutnùni ìni cue ñáyu sá nchúhú xínú cuèchi-ndí núú Yá Ndióxi, te ío quíde cahnu ìni-ndí cuèndá nchaa sá ndóhó-ndí, chi nándi quíde ñaha ñáyu xii-ndí, te ducaⁿ-ni ta quíde cahnu ìni-ndí cuèí nándi-gá nchaa sá tá yâha-ndí véxi.

5 Te duha ta yâha-ndí véxi, núú cânha ñáyu xii-ndí, núú chíhí ñàhá-yu vecaá, núú cuáá ndeé ñàhá ñáyu xii-ndí xícuèhé ñàhá-yu, te ío ndóho-ndí quíde-ndí chi^u Yá Ndióxi, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí.

6 Te quíde ndáá-ndí ndécú-ndí, te cutnùni vâha ìni-ndí nàcuáa càháⁿ tnúhu Yá Ndióxi, te quíde cahnu ìni-ndí cuèí nándi quíde ñaha ñáyu xii-ndí, te cundàhú ìni-ndí tnàha ñáyu-ndí, te quíde-ndí nchaa sá vâha nàcuáa chindee ñaha Espíritú Yá Ndióxi xii-ndí, te ío ndisa ìni-ndí cúú ìni-ndí cue tnàha ñáyu-ndí.

7 Te dànehé-ndí ñáyu mee-ni tnúhu ndáá, te nchaa chi^u quíde-ndí te quíde-ndí nàcuáa chindee ñaha Yá Ndióxi xii-ndí, te cuèndá sá quíde ndáá-ndí ndécú-ndí núu xiáⁿ ñihí ndeé-ndí dáquèe tíhú-ndí nchaa sá cuèhé sá dúhá.

8 Te dava ñáyu quíde nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xàháⁿ-yu xii-ndí, te davá-yu xícáháⁿ vâha-yu cuèndá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáyu dico ñá ndáá chi càháⁿ ndáá-ndí.

9 Te davá-yu càchí-yu sá ñá túú xíní-yu ná ñáyu cùu-ndí, te davá-yu càchí-yu sá xíní-yu yoo cùu-ndí, te davá-yu cuíni-yu cahni ñàhá-yu xii-ndí dico vátá cahni ñaha-gá-yu chi ndècu-ni-ndí. Te ío ndóho-ndí ndécú-ndí ìchi Yá Ndióxi, te cuèí ndóho-ndí dico ñá túú cùu-xí sá cúú-ndí.

10 Te cuèí ndíhú ìni-ndí dico ñá túú dàña ndeé-ndí sá cúdíí ìni-ndí, te cùu-ndí cue téé ndàhú dico sànu ìchi-ndí vai ñáyu ìchi Yá Ndióxi cuèndá ngúndecu vâha-yu sá cuèndá-gá, te cuèí ñá túú nà ndécú ndíhi-ndí dico ñá túú nà cúmàni xii-ndí.

11 Te nchóhó ñáyu ndècu ndíhi-í ìchi Xítohá Jesucristú ndécú ñúú Còrintú ío

cùu iní ñáhá-ndí xii-ndo, te ni yùhu ni iní-ndí cùú iní-ndí càháⁿ-ndí nchaa tnúhu càháⁿ-ndí sá cùú-xi-ndó.

¹² Te nchúhú chi ni yùhu ni iní-ndí cùú iní ñáhá-ndí xii-ndo, dico nchòhó chi ñá túú ducaⁿ quide-ndo sá cùú-xi-ndí.

¹³ Te yúhú càháⁿ ndàhú-í núú-ndó dàtná quidé ñⁿ téé cùu tátá òré càháⁿ ndihi-dé cue déhe-dé sá ni yuhu ni iní-ndó cùu iní ñáhá-ndó xii-ndí dàtná quidé mèe-ndí cùú iní ñáhá-ndí xii-ndo.

Nchoo cùu-o datná ñⁿ vehe Yá Ndióxi

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cùú ñⁿnuu-ndo ndihí-yu cada-ndo dàtná xiquidé-yu, chi ñⁿ cuu nchaa sá vâha te ñⁿ cuu nchaa sá cuèhé sá dúhá, te ñúmi nchícanhii ndihi níú chi ñá túú ñⁿ-ni cuu-xi. Te ducaⁿ sátnahá-xi cùu nchaa sá vâha ndihi nchaa sá cuèhé sá dúhá chi ñá túú ñⁿ-ni cuu-xi.

¹⁵ Te ñⁿ ducaⁿ ñá túú ñⁿ-ni cuu Xítohó Jesucristú ndihi sácuihná, te ñⁿ ducaⁿ ñá túú ñⁿ-ni cuu ñáyiú sàndáá iní ñáhá xii Xítohó Jesucristú ndihi ñáyiú ñá túú sàndáá iní ñáhá xii-gá.

¹⁶ Te ñⁿ ducaⁿ sátnahá tucu-xi cùu vehe Yá Ndióxi ndihi nchaa sá càchí ñáyiú cùu ndióxi ní cadúha cue téé ñuyúú-a, chi vá cùú quíhi ni ñⁿ xiáⁿ xiti vehe-gá. Te nchoo cùu-o datná vehe Yá Ndióxi Yáá ndécú túu andiú, chi mee-gá càchí-gá núú tütú-gá núú càchí-xi:

Yúhú vá cùmáñi cundecu-í ndihi-yu ndèni ní cuu na cùndecú-yu,

te ñⁿ ducaⁿ yúhú cuu-í Ndióxi-yu,

te mèe-yu cuú-yu ñáyiú cùu cuendá-í.

Duha càchí-gá núú tütú-gá.

¹⁷ Te xiáⁿ núu càchí tucu-gá ingá xichi núú tütú-gá núú càchí-xi:

Chí tá quèe muú nchaa ñáyiú ñá túú sàndáá iní ñáhá xii-í,

te vá cáni iní-ndó càda-ndo ni ñⁿ sá cuèhé sá dúhá,

te ducaⁿ te queheⁿ cuendá ñáhà-í xii-ndo,

¹⁸ te yúhú cuu-í Tàtá-ndó,

te nchòhó cuu-ndo cue déhe ducuⁿ-í, ndihi cue déhe yoco-í,

duha càháⁿ yúhú Yáá ío càhnu cuu.

Duha càchí-gá núú tütú-gá.

7

¹ Te sá dúcáⁿ ío váha càháⁿ Yá Ndióxi sá cùú-xi-ó núu xiáⁿ càháⁿ-í dóho nchòhó ñáyiú ío cùu iní-í sá dùuⁿ duuⁿ daña-o nchaa sá cuèhé sá dúhá, chi nchaa xiáⁿ ñá túú cùu-xi sá vâha sá cùú-xi iní-ó ndihi yiqui cuúú-ó, te cada-o nàcuáa tàú-xi cunduu nàcuáa cundáá-ó núú Yá Ndióxi, te cada-o sá néhé-ó sá yíñúhu núú-gá.

Cue ñáyiú ñúú Còrintú quidé vâha-yu

² Te ni yùhu ni iní-ndó chí cùú iní ñáhá xii-ndí, chí nchúhú vá yóo ñⁿ quide úhú iní-ndí, te ni vá yóo ñⁿ dàcuíta nihnu-ndí, te ni vá yóo ñⁿ dándahú-ndí.

³ Te sá dúhá càháⁿ-í te vá cáni iní-ndó sá ñⁿ cuéchi dàcaa-í díquí-ndó, chí dàtná sa ní cachí-í xii-ndo sá yúhú ío cùu iní ñáhà-í xii-ndo, te cuéi vitna ndècu-gá-ó ñuyúú-a àdi cuéi na cùú-ó dico ñⁿ ducaⁿ cùu iní ñáhà-í xii-ndo.

⁴ Te yúhú ío váha sàni iní-í cuendá-ndó, te ducaⁿ ío váha càháⁿ-í cuendá-ndó, te ío ndècu ndihi-í tnúhu ndee iní cuendá-ndó, te ío cudíí iní-í sá cuendá-ndó cuéi nándi ndòho-í ndihi dava-gá-güedé ndécú-ndí.

⁵ Te nchúhu cùtnàhá ní sáháⁿ-ndí distritú Macèdoniá, te ñá túú tnàhi ní ndètatú-ndí cuendá nchaa sá ní yáhandi chí ío ní ndòho-ndí cuendá nchaa sá ní quidé-yu, chí ío ní cuandéé ñáhà-yu xii-ndí, te ío ní sani iní-ndí núu náa-gá yáha-ndí ní cùu.

⁶ Dico Yá Ndióxi ní taxi-gá tnúhu ndee iní xii-ndí òré ní quexio té Titú núú ndécú-ndí, te ñⁿ ducaⁿ Yáá-áⁿ cùú-gá Yáá sáñaha-gá tnúhu ndee iní xii cue ñáyiú ndihú iní-xi.

⁷ Te ducaⁿ ní taxi Yá Ndióxi tnúhu ndee iní xii-ndí cuendá sá ní quexio té Titú núú ndécú-ndí, te ñá díú-ní sá cuendá ní quexio-dé chí ní níhi tucu-ndí tnúhu ndee iní cuendá ní caní-dé cuendú núú-ndí sá nchòhó ní sáñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuini-ndó càháⁿ ndihi ñaha-ndo xii-ndí, te ní cachí tnúhu tucu-dé xii-ndí sá nchòhó ío ndihú iní-ndó cuendá nàcuáa cùu ndecu-ndo ní cuu, ndihi cuendá sá ío sàni iní-ndó cuendá-í, te sá dúcáⁿ ndúu cuendú ní caní-dé núú-ndí núu xiáⁿ ío ní cudíí iní-í.

⁸ Te nchòhó ní ndihú iní-ndó cuendá tnúhu càháⁿ-í núú tütú sá ní dáquixi-í ndaha-ndo, te òré ní níhi-í tnúhu sá ndihú iní-ndó te tnaa-ni ní ndixi cuéchi iní-í sá dúcáⁿ ní quidé-í te dàtnúni ñá túú-gá ní ndixi cuéchi iní-í.

⁹ Te vitna ní ndihú iní-ndó, te xiáⁿ ní quide-xi ní ndixi cuéchi iní-ndó sá ñá túú quide váha-ndo ndècu-ndo ní cuu, te ní cudíí iní-í dico ñá díú cuendá sá ní ndihú iní-ndó ní cudíí iní-í chí cuendá sá ní ndixi cuéchi iní-ndó, te ní ndihú iní-ndó nàcuáa ní cuu váha iní Yá Ndióxi, te xiáⁿ núu ní cuu-xi ñⁿ sá vâha sá cùú-xi-ndó cuendá tnúhu ní càháⁿ-í te ñá túú ní cùu-xi ñⁿ sá cuèhé sá cùú-xi-ndó.

¹⁰ Te nchoo núu na ndihú iní-ó nàcuáa cuu váha iní Yá Ndióxi, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nànihí tàhú-ó, te vá ndihú iní-ó sá dúcáⁿ ní quide-o, te dava ñáyiú Xíndecu ichi

cuéhé ichi duha ndihú iní-yu dico ñá túú ndixi cuéchi iní-yu cuendá nchaa sá ñá túú vâha quidé-yu, te sá dúcáⁿ quidé-yu te cuíta nihnú-yu.

¹¹ Te sá dúcáⁿ ní ndihú iní-ndo nâcuáa ní cuu váha iní Yá Ndióxi, te xíáⁿ núu ndücu ndee-ndo quide-ndo nchaa nâcuáa tâu-xi cunduu, te vitna ni yûhu ni iní-ndo cãháⁿ-ndó sã quidé vâha-ndo, te ío cüdééⁿ-ndó núu méé-ndó sã ñá túú quide vâha-ndo ndëcu-ndo ní cuu, te yûhú-ndó ndëcu-ndo cuendá sã ñá túú quide vâha-ndo ní cuu, te ío ní xûhuⁿ iní ñáhá-ndó xii-í, te ní ndücu ndéé-ndó ní quide ndáá-ndó cuendá téé ndëcuéchi ndëcu ndihi-ndo, te sá dúcáⁿ ní quide-ndo te xíáⁿ ní cutnûni sã méé-ndó ñá túú cuéchi-ndo.

¹² Te ní cadúha-í tutú ní dáquixi-í ndaha-ndo, te ní quide-ndo nâcuáa ní cãháⁿ-í, te sá dúcáⁿ ní quide-ndo xíáⁿ ní cutnûni iní-ndo sã ío cûu iní ñáhá-ndó xii-í. Te Yá Ndióxi nahá-gã sã díu cuendá xíáⁿ ní dáquixi-í tutú ndaha-ndo, te ñá díu-ní cuendá sã sání iní-í cuendá téé ndëcuéchi ndëcu ndihi-ndo, te ní ñá díu-ní cuendá ñáiyu ní dándihú téé ndëcuéchi-án iní-xi ní cadúha-í tutú ní dáquixi-í ndaha-ndo.

¹³ Te cuendá sã quidé vâha-ndo ndëcu-ndo xíáⁿ cúu-xí tnúhu ndee iní ndécú ndihi-ndí.

Dico ñá díu-ní xíáⁿ chi tnàhá ío cüdúú iní-ndí cuendá sã ío cüdúú iní té Titú, te ducaⁿ cüdúú iní-dé chi nchóhó ní sãnhaha-ndo tnúhu ndee iní xii-dé.

¹⁴ Te yûhú ñá túú cùcahaⁿ núu-í sã ní cãháⁿ vâha-í cuendá-ndó núú té Titú cutnâhá vátá quixi-gã-dé núú ndécú-ndó, chi ní cutnûni iní-dé sã ndáá cãháⁿ vâha-í nâcuáa quide-ndo datná cúu-xí sã ndáá nchaa tnúhu dàcuaha ñaha-í xii-ndo.

¹⁵ Te vitna ío-gá vâha cûu iní té Titú cuendá-ndó, chi ndâcu iní-dé sã nchâá-ndó ío vâha ní tni-ndo nchâa tnúhu ní cãháⁿ-dé núú-ndó, te ndâcu tucu iní-dé sã ní queheⁿ cuendá vâha-ndo-dé, te ní dátûu-ndo núú-dé sã ío ní quiyûhú iní-ndó sã vâ ndácú-ndó càda-ndo nchaa nâcuáa tâu-xi cunduu.

¹⁶ Te ío cüdúú iní-í cuendá-ndó chi cutnûni ndáá iní-í sã ñá túú dãña ndéé-ndó quide-ndo nchaa nâcuáa tâu-xi cunduu.

8

Ío vâha cuu iní-ó chindee tnaha-o

¹ Te nchóhó ñáiyu ndëcu ndihi-ndí ichi Xitohó Jesucristú cãchí tnúhu-ndí xii-ndo nâcuáa quidé ñaha Yá Ndióxi xii cue ñáiyu xindecu ichi-gá ndécú dîstrítu Macèdomiá, chi ío chindee ñaha-gã xii-yu cuendá sã quidé vâha-yu ndëcu-yu.

² Te cuéi ndóho vihi-yu ndëcu-yu dico ío-ni cüdúú iní-yu, te cuendá xíáⁿ núu ni yûhu ni iní-yu ní sacáⁿ tnáhá-yu díhúⁿ sã cúu-xí

tnàha ñáiyú-yu, te ñá túú tnàhí ní xînduu díi-yu cuéi ío ndâhú-yu.

³ Te ñá díu-ní nâcuáa ní sani iní-yu ndacú-yu cacáⁿ tnáhá-yu, chi ní quide yica iní-yu ní sacáⁿ tnáhá-gã-yu, te yûhú cãchí tnúhu ndáá-í xii-ndo sã ní yuhu ni iní-yu ducaⁿ ní quidé-yu.

⁴ Te ío ní cãháⁿ ndâhú-yu núu-ndí cuendá sã cuâha-ndí tnúhu sã tnáhá-yu chindéé-yu dava-gá cue ñáiyu cûu cuendá Yá Ndióxi.

⁵ Te ñá díu-ní nâcuáa ní sani iní-ndí ní quidé-yu, chi ní xídó-gã-yu ní quide vâha-yu, te ducaⁿ chi méé-yu ní sani iní-yu sã cãdá-yu nchaa nâcuáa cuíni Yá Ndióxi, te dátûni ducaⁿ te ní cachí-yu sã cúu càdá-yu nchaa nâcuáa na cûñaha-ndí xii-yu. Te ducaⁿ ní quidé-yu chi ducaⁿ ní cuíni méé Yá Ndióxi cunduu.

⁶ Te sá dúcáⁿ ní quide ñáiyu-án núu xíáⁿ cãháⁿ ndâhú-ndí núú té Titú sã quixi tûcu-dé núú ndécú-ndó cuendá dàxínu cava-dé chiúⁿ sã sã ní ngúita-dé quidé-dé dátâcã-dé díhúⁿ sã sã ní ngúita-ndo sacáⁿ tnáhá-ndó, te ducaⁿ quide-ndo chi cundahú iní-ndó tnàha ñáiyu-ndo.

⁷ Te nchóhó cúu-ndó ñáiyu ío ngòdónúu quide nchaa sã vâha, te ío vâha sãndáá iní-ndó Xitohó Jesucristú, te ío vâha cutnûni iní-ndó nâcuáa cãháⁿ tnúhu-gá, te ío vâha dàcuaha-ndo ñáiyu tnúhu-gá, te ío ndücu ndee-ndo quide-ndo mee-ni sã vâha, te ducaⁿ ío cûu iní ñáhá-ndó xii-ndí, te sá dúcáⁿ quide-ndo núu xíáⁿ cãháⁿ ndâhú-í núú-ndó sã ngòdó núu-gã-ndó càda-ndo sã cúu-xí tnàha ñáiyu-ndo.

⁸ Dico yûhú ñá túú tàuchiuⁿ-í sã dúcáⁿ càda-ndo, chi cuendá-ni sã cãchí tnúhu-í xii-ndo nâcuáa quide dava-gá cue ñáiyu ndëcu ichi Xitohó Jesucristú, chi cue ñáiyu-án ni yûhu ni iní-yu quidé-yu sã vâha sã cúu-xí tnàha ñáiyú-yu, te cãchí tnúhu-í xii-ndo nâcuáa quidé-yu cuendá cutnûni núu nása cada-ndo núu ndisa sã cúu iní-ndó cué tnaha ñáiyu-ndo.

⁹ Te nchóhó sa xini-ndó sã Xitohó Jesucristú ío cundahú iní ñáhá-gã xii-o, te ío vâha ndëcu-gã ní cûu te ní quixi-gã ñuyúú-a ní quide vâha ñaha-gã xii-o, te ñuyúú-a ñá túú ní xindecu vâha-gã, te ducaⁿ ní quixi-gã ñuyúú-a cuéi ñá túú ní xindecu vâha-gã cuendá sã nchóhó ngúndecu vâha-o núú ndécú-gã.

¹⁰ Te na cãchí tnúhu-í xii-ndo nâcuáa sãni iní-í. Chiúⁿ sã ní yuhu ni iní-ndó ní ngúita-ndo quide-ndo cuíni ní yáha chi cûu-xi sã vâha sã cúu-xi-ndó núu na dàxínu cava-ndo.

¹¹ Te dátâ-ni ni yûhu ni iní-ndó ní tausaha-ndo chiúⁿ-án te ducaⁿ-ni ni yuhu ni iní-ndó dàxínu cava-ndo, te cacáⁿ tnáhá-ndó

sá ndécú ndíhi-ndo nacuaa xito mee-ndo ndacu-ndo.

¹² Te núu nchòhò ni yùhu ni iní-ndó càcáⁿ tnàhá-ndó sá xító mèe-ndo ndacu-ndo ña, te cùu vâha iní Yâ Ndiòxí, chi mee-gã sa nâha-gã nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vâ cáni iní-ndó sá yùhú cuini-í sá nchòhò ndoho-ndo cùndecu-ndo te dava-gá-yu ngùndecu váha-yu sá cuendá-ndó.

¹⁴ Te vitna ndècu ndee iní-ndó nacuaa ndacu-ndo chindee-ndo cue ñáiyu xini ñuhu, te nduu ña túú ndècu ndee iní-ndó te cue ñáiyu-áⁿ chindee ñàhá-yu xii-ndo te núu ndècu ndee iní-yu, te ducaⁿ te ni nchòhò ñá túú ñá cumání xii-ndo te ni cuè ñáiyu-áⁿ ñá túú ñá cumání xii-yu.

¹⁵ Te ducaⁿ te quee ndáá-xi nacuaa càháⁿ-xi núú tütú Yâ Ndiòxí núú cächí-xi: “Cue ñáiyu ío vâi sá ni níhi ñá túú ní cùu sobrá xii-yu, te cue ñáiyu sacú ní níhi ñá túú ní cumání xii-yu”, duha cächí-xi núú tütú-gá.

Té Titú ndíhi cue té cùndíhi-dé

¹⁶ Te ndacáⁿ tãhú-í núú Yâ Ndiòxí chi mee-gã ní quide sá té Titú ío ñuhu iní ñàhá-dé xii-ndo dàtná ñùhú iní ñàhá-í xii-ndo.

¹⁷ Te yùhú ní xáhaⁿ-í xii-dé sá quixí còto ñàha-dé xii-ndo te ní sáha-dé tnúhu, te ñá díú mèe-ni sá dúcáⁿ ní xáhaⁿ-í xii-dé quixi coto ñàha-dé xii-ndo, chi mee-dé cùdíí tnàhí iní-dé quixi coto ñàha-dé xii-ndo.

¹⁸ Te tendaha-ndí ñⁿ té ndècu ndíhi-o ichi Xítohó Jesucristú quixi-dé ndíhi té Titú, te té quixi ndíhi té Titú-áⁿ cúú-dé ñⁿ té ío váha càháⁿ cue ñáiyu xindecu ichi Xítohó Jesucristú cuendá-dé cuendá sá ío váha quide-dé chiúⁿ Xítohó Jesucristú càháⁿ-dé tnúhu-gá tnúhu sá càháⁿ nacuaa naníhi tãhú-ó.

¹⁹ Te cue ñáiyu xindecu ichi Xítohó Jesucristú ñá díú-ní sá càháⁿ váha-yu cuendá-dé, chi tnàhá ní cãxi ñàhá-yu xii-dé cuendá sá càcá cùu ndíhi ñàha-dé xii-ndí chindee ñàha-dé tacá sá cúú-xí ñáiyu ndàhú, te quide-ndí chiúⁿ-a cuendá ío cuu càhnu Yâ Ndiòxí, te cue ñáiyu cutnùni iní-yu sá nchòhò ni yùhu ni iní-ndó quide-ndo nchaa sá váha sá cúú-xí cuè tnaha ñáiyu-ndo.

²⁰ Te cuini-ndí sá vâ càháⁿ cuèhé ñáiyu cuendá nacuaa quide-ndí ndíhi sá ngãutnàha sá cúú-xí cuè tnaha ñáiyu-o, te ío vâi cuu-xi.

²¹ Chi ndècu ndee-ndí quide-ndí nacuaa càháⁿ váha Xítohó Jesucristú cuendá-ndí, te quide tucu-ndí nacuaa càháⁿ váha ñáiyu sá quide váha-ndí.

²² Te tendaha tucu-ndí íngá tucu té ndècu ndíhi-o ichi Xítohó Jesucristú quixi-dé ndíhi cue téé úú quixi coto ñàha xii-ndo, te té quixi ndíhi-güedé-áⁿ ní cuu vâi xito

quide-dé nacuaa cutnùni iní-ndí sá ío ndècu ndee-dé quide-dé sá váha, te vitna ío-gá cuini-dé cada-dé sá váha vitna quixi-dé núú ndécú-ndó, chi cutnuni ndáá iní-dé sá cúú-ndó cue ñáiyu quide váha.

²³ Te cächí tnúhu-í xii-ndo sá té Titú cúú-dé ñⁿ té cùndíhi-í quide-ndí chiúⁿ Xítohó Jesucristú, te tnàhá-dé cúú-dé ñⁿ té xinu cuechi núú-ndó càháⁿ-dé tnúhu-gá. Te cächí tnúhu tucu-í xii-ndo cuendá cue téé úú quixi ndíhi-dé, chi cue téé-áⁿ cúú-güedé cue téé tendaha cuè ñáiyu xindecu ichi Xítohó Jesucristú quixi coto ñàha xii-ndo. Te cue téé-áⁿ quide-güedé nacuaa càhá ñáiyu sá ío càhnu cuu Xítohó Jesucristú.

²⁴ Te chí cadá sá cúú iní ndisa-ndo-güedé cuendá ducaⁿ na cutnuni iní nchaa dava-gá ñáiyu xindecu ichi Xítohó Jesucristú sá ndáá ndisa ducaⁿ quide-ndo, te ducaⁿ cutnuni iní-yu sá ndáá ndisa quide váha-ndo dàtná càháⁿ-ndí cuendá-ndó sá quide váha-ndo.

9

Cuendá sá ngãutnàha sá cúú-xí cuè ñáiyu xindecu ichi Xítohó Jesucristú

¹ Te cuendá sá ngãutnàha sá cúú-xí cuè ñáiyu ndècu ichi Xítohó Jesucristú ñá túú-gá xini ñùhu-xi cächí tnúhu-í xii-ndo núú tütú-a nacuaa cada-ndo,

² chi sa cutnuni iní-í sá ío cuini-ndó chindee-ndó-yu. Te ducaⁿ-ni ío váha càháⁿ-í cuendá-ndó núú ñáiyu xindecu ichi Xítohó Jesucristú ndécú distritú Macèdoniá, te xáhaⁿ-í xii-yu sá nchòhò ñáiyu xindecu ichi Xítohó Jesucristú ndécú distritú Acáyá sa ní cuu ñⁿ cuía ducaⁿ cuini-ndó càcáⁿ tnàhá-ndó sá cúú-xí cuè ñáiyu ndàhú ndécú ichi-gá. Te vâi cue ñáiyu distritú Macèdoniá cuini-yu cacáⁿ tnàhá-yu sá cúú-xí cuè ñáiyu ndàhú ndécú ichi Xítohó Jesucristú cuendá sá ní níhi-yu tnúhu sá nchòhò ío cuini-ndó dùcaⁿ cada-ndo.

³ Te cuendá sá sání iní-ndó càda-ndo xiáⁿ tendaha-í cue téé ndècu ndíhi-o ichi Xítohó Jesucristú quixi-güedé núú ndécú-ndó cuendá dàtúha ñàha-güedé xii-ndo, cuendá sá vâ quèé ndèhnde-í núú ñáiyu sá ní càháⁿ váha-í cuendá-ndó, te ducaⁿ cùndecu túha ndisa-ndo dàtná sa ní càháⁿ-í núú-yu.

⁴ Chi na cuáháⁿ ndéé quixi-í ndíhi ñⁿ úú cue ñáiyu distritú Macèdoniá núú ndécú-ndó te quini-yu sá ñá túú ndècu túha-ndo, te cucahaⁿ núú-í núú-yu sá ní càháⁿ váha-í cuendá-ndó te núú ñá túú ndècu túha-ndo, te tnàhá-ndó cùcahaⁿ núú-ndó.

⁵ Te xiáⁿ núu ní sani iní-í sá váha-gá codonúu cue téé ndècu ndíhi-o ichi Xítohó Jesucristú quixi coto ñàha-güedé xii-ndo cuendá chindee ñàha-güedé tacá sá ní sani iní-ndó càcáⁿ tnàhá-ndó cuendá sá cùndecu túha-xi, te cuu-xi dàtná ñⁿ tãhú sá ní quene

cuu iní méé-ndó càcáⁿ tnáhá-ndó sá cúú-xí cuè tnaha ñáyiú-ndo. Te ducaⁿ te vá yôo cani iní-xi quesáhá-yu sá nchúhú ní quide yica-ndí ducaⁿ ní sacáⁿ tnáhá-ndó.

⁶ Te nchòhó sa xini-ndó sá ñáyiú na chihhi vai tatá te vai niñí-yu cùu, te cue ñáyiú na chihhi sacú tatá te sacú niñí-yu cùu. Ducaⁿ sátnahá-xi cùu ñáyiú sacáⁿ tnáhá sá cúú-xí tnaha ñáyiú-yu.

⁷ Te ñⁿ ñⁿ-ndo càcáⁿ tnáhá-ndó nàcuáa quène cuu iní méé-ndó, te ío váha cuu iní-ndó òucaⁿ cada-ndo te vá cadá-ndó cuendá-ní sá quidé yica ñaha ñáyiú xii-ndo, chí Yá Ndióxi cúú váha iní-gá núú nchàa ñáyiú cùúí iní sacáⁿ tnáhá sá cúú-xí cuè tnaha ñáyiú-xi.

⁸ Te Yá Ndióxi ndacu-gá chindee ñaha-gá xii-ndo nàcuáa cundecu váha-ndo, chí òu-gá cada te níhí-ndó nchàa núú sá xini ñùhu-ndo cundecu ndihhi-ndo, te ñá túú tnàhí-gá ná cumání xii-ndo, te mee-gá chindee ñaha-gá xii-ndo níhí-ndó ío vai cundecu ndihhi-ndo cuendá ducaⁿ chindee-ndo cue tnaha ñáyiú-ndo.

⁹ Te núú tùtú Yá Ndióxi càchí-xi ñⁿ xichi:

Ñⁿ ñáyiú ío vai sá ní sàñàhá-yu xii ñáyiú ndàhú,

te sá ní quide ñáyiú-á ní cuu-xi sá váha sá vá yôo cùnaa.

Duha càchí-xi núú tùtú-gá.

¹⁰ Te mee Yá Ndióxi táxi-gá nchaa sá cúú tàtá nchaa nchòhó ñáyiú xitu nándi sá xítu cuendá cuu sá cúú nchìto-ndo, te òu-gá cada te ío vai sá níhí-ndó cundecu ndihhi-ndo, te ducaⁿ ío-gá vai sá váha cada-ndo sá cúú-xí cuè tnaha ñáyiú-ndo.

¹¹ Te Yá Ndióxi taxi-gá vai núú sá cùndècu ndihhi-ndo cuendá ducaⁿ ní yuhu ní iní-ndó vai cuñaha-ndo sá cúú-xí tnaha ñáyiú-ndo. Te cuendá nchaa sá sacáⁿ tnáhá-ndó quèheⁿ cuendá-ndí cuu xii tnaha ñáyiú-ndo, te cue ñáyiú-á ío ndacáⁿ táhù-yu núú Yá Ndióxi cuendá sá dúcáⁿ sacáⁿ tnáhá-ndó sá cúú-xí-yu.

¹² Te sá dúcáⁿ quide-ndo sacáⁿ tnáhá-ndó sá cúú-xí cuè ñáyiú cùu cuendá Yá Ndióxi, te ñáyiú-á ñà túú-gá ná cumání xii-yu, te ío ndacáⁿ táhù-yu núú Yá Ndióxi sá dúcáⁿ quide-ndo.

¹³ Te ñáyiú-áⁿ cutnùnì iní-yu sá nchòhó quidé-ndó sá sàndáá ndisa iní-ndó tnùhu Xitohó Jesucristú, te cuendá xiáⁿ te ñáyiú-áⁿ chiñùhú-yu Yá Ndióxi, te cuendá sá dúcáⁿ ní yuhu ní iní-ndó sacáⁿ tnáhá-ndó sá cúú-xí-yu ndihhi sá cúú-xí nchàa dava-gá ñáyiú, te cachí-yu sá ío càhnu cuu Yá Ndióxi.

¹⁴ Te ñáyiú-áⁿ càháⁿ ndihí-yu Yá Ndióxi cuendá-ndó, te ío cuu váha iní ñàhá-yu xii-ndo cuendá sá Yá Ndióxi chindee ñaha-gá

xii-ndo quide-ndo sá váha sá cúú-xí-yu ndihhi dava-gá ñáyiú.

¹⁵ Te ío ndacáⁿ táhù-ó núú Yá Ndióxi cuendá sá ní taxi-gá sá ío váha ndècu ndihhi-o, te ní ñà cùtnùnì iní-ó ñasa cunduu tnùhu càháⁿ-ó cuendá sá váha ní taxi-gá.

10

Té Pàblù ndécú ndihhi-dé tnùhu ndee iní sá càháⁿ-dé tnùhu Xitohó Jesucristú

¹ Te Xitohó Jesucristú ío càhnu iní-gá, te cùndahú iní ñàhá-gá xii-o chindee ñaha-gá, núú xiáⁿ yúhú té Pàblù ducaⁿ quide-í càháⁿ ndàhù-í núú-ndó nàcuáa cada-ndo. Te dava-ndo càchí-ndó sá yúhú ío ndàhú iní-í òré ndécú ndihhi ñaha-í xii-ndo, te òré ñà túú ndècu ndihhi ñaha-í xii-ndo te ío ñíí càá-í.

² Te càháⁿ ndàhù-í núú-ndó sá cadá-ndó nàcuáa vá càháⁿ ñíí-í núú-ndó òré quixi-í quixi coto ñaha-í xii-ndo. Te cuínì-í sá ndihhi tnùhu ñíí iní-xi càháⁿ ndihhi-í cue ñáyiú càchí sá ñⁿ-ni cuu-í ndihhi cue ñáyiú ñà túú sàndáá iní tnùhu Xitohó Jesucristú.

³ Te nchúhú cùu-ndí cue téé ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhù-ndí nchaa sá cuèhé sá dúhá, dico ñà díú mèe-ndí ducaⁿ ndàcu-ndí quidé-ndí,

⁴ te ni ñⁿ sá ío ñuyú-a ñà túú chindee ñaha-xi, chí mee Yá Ndióxi chindee ñaha-gá xii-ndí dáquèe tíhù duuⁿ-ndí nchaa núú sá cuèhé sá dúhá.

⁵ Te xiáⁿ núú níhí-ndí tnùhu càháⁿ-ndí sàdí-ndí yuhu cue ñáyiú càháⁿ tnùhu sá ñà túú cùu váha iní Yá Ndióxi, ñáyiú xiquide nínu mee-xi càchí sá ñà túú nàndihhi tnùhu-gá. Te quide-ndí sá ñáyiú-áⁿ quindáá iní-yu tnùhu Xitohó Jesucristú.

⁶ Te nchúhú sa ndècu túha-ndí sá dáquètíhù-ndí cue ñáyiú ñà túú cuínì cada nàcuáa cuínì Xitohó Jesucristú, dico díhna-gá xini ñùhu-xi sá nchàá nchòhó ñáyiú cuínì cada nàcuáa cuínì-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chí núú cùtnùnì ndáá iní-ndó sá cúú-ndó cuendá Xitohó Jesucristú, te òu-ni ducaⁿ tàú-ndó càni iní-ndó cuendá-ndí tucu.

⁸ Te Xitohó Jesucristú ní taxi-gá tnùhu ndee iní ndécú ndihhi-ndí sá dánhèhé ñàhá-ndí xii-ndo nàcuáa cuita cuehnu nihnu-ndo ichi-gá quíhí, te ñà díú sá dánhèhé ñàhá-ndí xii-ndo nàcuáa cuita nihnu-ndo, te cuèi na chido-gá-í càháⁿ-í cada nínu-í mèe-í cuendá tnùhu ndee iní ní taxi Xitohó Jesucristú ndécú ndihhi-ndí, dico vá cùcàhaⁿ núú-í chí càháⁿ ndáá-í.

⁹ Te ñá túú cuini-í sá nchòhó cani iní-ndó sá yúhú dáyúhú ñáhà-í xii-ndo nàcuáa ndùu tnúhu cáhàⁿ-í núú tütú-í.

¹⁰ Te dava-ndo cächí-ndó sá ténáá ñáhà-í xii-ndo núú tütú-í, te mee-ni tnúhu cahnú sá ío cùnnu cuu-xi, te cächí tucu-ndo sá òré ndécú ndíhi ñaha-í xii-ndo te ñá túú càa-í sá cùu-í ìⁿ tée cùu váha cùu dico iní-ndó, te cächí tucu-ndo sá ñá túú tnàhá iní-ndó nàcuáa quide-í òré dácuaà ñaha-í xii-ndo.

¹¹ Te nchòhó ñáyiu ducaⁿ cáhàⁿ cada cuendá váha-ndo sá dàtná-ni cáhàⁿ-ndí núú tütú-ndí òru-ni ducaⁿ quide-ndí òré ndécú ndíhi ñaha-ndí xii-ndo.

¹² Te nchúhú, vá cùú tnàhí cáhàⁿ-ndí sá ìⁿ-ni cuu-ndí ndíhi cue ñáyiu cáhàⁿ váha cuendá mée-xí, chí ñáyiu-áⁿ sání iní-yu ná cùú sá váha te quide-yu te xíá cächí-yu sá ío váha quide-yu, te cächí-yu sá quide váha-gá-yu dácúúxí tnàha ñáyíu-yu, te sá dúcáⁿ cáhàⁿ-yu te quide-yu dàtná quide cue ñáyiu ñá túú tnàhí cùnnumí iní-xi.

¹³ Te dico nchúhú ñá túú xidó-ndí cáhàⁿ váha-ndí cuendá-ndí, chí cáhàⁿ váha-ndí cuendá-ndí dico nàcuáa ndùu chiúⁿ ní taxi Yá Ndióxi cáhàⁿ-ndí, chí mee-gá ní cächí-gá ndée není sáa-ndí cáhàⁿ-ndí tnúhu-gá, te ní sáa-ndí ndée ñuú-ndó cáhàⁿ-ndí tnúhu-gá.

¹⁴ Te vitna ndècu ndíhi-ndí tnúhu ndee iní sá tnàhá nchòhó cuu cáhàⁿ ndíhi ñaha-ndí xii-ndo, chí díhna-gá nchúhú ní quixi-ndí ní cáhàⁿ-ndí tnúhu Xítohó Jesucristú ñuú-ndó, tnúhu sá cáhàⁿ nàcuáa naníhí tãhú-ó.

¹⁵ Te nchúhú ñá túú quide cahnú-ndí mée-ndí cuendá chiúⁿ quide dava-gá-güedé quesaha-ndí sá chiúⁿ mée-ndí cùú-xí. Te cuini-ndí sá nchòhó cuita quindáa-gá iní-ndó Xítohó Jesucristú, te ducaⁿ te níhi-gá-ndí nàcuáa cada-ndí chiúⁿ-gá nchaa dava-gá xichi núú ní cächí-gá cada-ndí chiúⁿ-gá.

¹⁶ Chí cáhàⁿ-ndí tnúhu-gá tnúhu sá cáhàⁿ nàcuáa naníhí tãhú-ó, te yáha-gá-ndí ñuú-ndó quíhíⁿ-ndí nchaa dava-gá xichi cáhàⁿ-ndí, te vá cáda cahnú-ndí mée-ndí cuendá chiúⁿ sá sá ní quide dava-gá-güedé.

¹⁷ Te cue ñáyiu cuini cada cahnú mee-xi te vá dúcáⁿ càda-yu, chí mee Xítohó Jesucristú ná càda cahnú-yu-gá.

¹⁸ Te nchaa ñáyiu na cáhàⁿ váha Xítohó Jesucristú cuendá-yu, ñáyiu-áⁿ cudiú-yu núú-gá, te ñá túú cudiú-yu núú-gá cuendá sá cáhàⁿ váha-yu cuendá mée-yu.

11

Cuendá té Páblú ndíhi cuendá cue tée cächí sá cáhàⁿ tnúhu Yá Ndióxi te ñá ndáa

¹ Te cuini-í sá nchòhó cada ndee iní-ndó cündedóhó-ndo tnúhu na cáhàⁿ-í, chí cáhàⁿ-í

dàtná cáhàⁿ cue ñáyiu ñá túú cùnnumí iní-xi, te cuéi nása-gá ná cùnndu tnúhu cáhàⁿ-í dico chí cáda ndee iní cündedóhó-ndo.

² Chí yúhú ío ñùhu iní ñáhà-í xii-ndo dàtná ñúhú iní ñáhà mée Yá Ndióxi xii-o, te ní cáhàⁿ-í tnúhu Xítohó Jesucristú núú-ndó núu xíáⁿ ní tnàhá tnúhu-ndo ndíhi-gá vitna, te sá dúcáⁿ ní quide-í te cada iní-ndó sá yúhú cùu-í dàtná ìⁿ tée xica ndáhú te nchòhó cùu-ndó dàtná ìⁿ xíhí cuéhí, te Xítohó Jesucristú cùu-gá dàtná ìⁿ tée tnándaha ndíhi xíhí cuéhí-áⁿ. Te ducaⁿ càda iní-ndó chí na sáa nduu te yúhú na cani cuendá ñáhà-í xii-ndo núú Xítohó Jesucristú, te cuu-ndo ñáyiu vá cündècu tnàhí-gá cuéchi-xi.

³ Te yúhú-í sá sácúhna dandáhú ñáhà-xí xii-ndo vá cani-gá iní-ndó cànchicúⁿ nihnu-ndo ní yuhu ní iní-ndó ichi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chí sácúhna ní nduu-xi cóo ní dándáhú ñáhà-xí xii-xi, chí sácúhna-áⁿ ío váha ní xito-xi nàcuáa ní quide-xi ní dándáhú-xi tá Èvá-áⁿ.

⁴ Te nchòhó, quide ndee iní-ndó sácündedóhó-ndo ncháa tnúhu cáhàⁿ cue tée cáhàⁿ ingá núú tnúhu cuendá Jësús tnúhu sá ñá túú dānehé ñáhà-ndí xii-ndo, te quide ndee tucu iní-ndó ndedóhó-ndo dānehé ñáhà-güedé xii-ndo cuendá ingá espíritú, te ñá díú cuendá Espíritú Yá Ndióxi sá ní ngūndecu ndíhi-ndo dānehé ñáhà-güedé xii-ndo, te quide ndee tucu iní-ndó ndedóhó-ndo dānehé ñáhà-güedé xii-ndo ingá núú tnúhu sá cächí-güedé cáhàⁿ nàcuáa naníhí tãhú-ndó, te ñá díú nàcuáa ndùu tnúhu sá ní sándáa iní-ndó cuendá naníhí tãhú-ndó cáhàⁿ-güedé.

⁵ Te cue tée ducaⁿ cáhàⁿ-áⁿ cächí-güedé sá Yá Ndióxi ní tendaha ñaha-gá xii-güedé xíca cùu-güedé cáhàⁿ-güedé tnúhu-gá te ío cùnnu-güedé, dico ñá ndáa sá cáhàⁿ-güedé tnúhu-gá. Te yúhú cùnnumí iní-í sá cué tée-áⁿ ñá túú cùnnu-güedé dàtná cùnnu yúhú.

⁶ Te cuéi ñá túú cáhàⁿ-í dàtná cáhàⁿ cue tée ío váha sáa díquí-xi dico ío váha cùnnumí iní-í cuendá nchaa sá dácuaà-í, te yúhú sa quide-í nàcuáa cutnuni iní-ndó sá ío váha cùnnumí iní-í nàcuáa ndùu nchaa tnúhu cáhàⁿ-í.

⁷ Te cudana te sání iní-ndó sá yúhú ñá túú ní quide váha-í sá ní quide-í mée-í dàtná ìⁿ tée ío ndáhú iní-xi, chí ñá túú ní xicáⁿ-í yáhu-í núú-ndó cuendá sá ní cáhàⁿ-í tnúhu Yá Ndióxi tnúhu sá cáhàⁿ nàcuáa naníhí tãhú-ó núú-ndó.

⁸ Te ní quehe-í díhúⁿ ní taxi dava-gá cue ñáyiu ndècu ichi Xítohó Jesucristú, te díhúⁿ-áⁿ ní dāndóñùhu-í ní saaⁿ-í nchaa sá ní xini ñùhu-í cùnñàh ní cáhàⁿ-í tnúhu Xítohó Jesucristú núú-ndó.

⁹ Te cútñahá ní xíndecu ndihi ñaha-í xii-ndo te áma ní xóo cumání sá xíní ñũhu-í, te ñá túú ná ní xicáⁿ-í núú ní ñⁿ-ndo. Chi cue ñáyiú xíndecu ichi Xítóhó Jesucristú ndécú distritú Macèdonia ní quixí-yu ní taxí-yu sá cumání xii-í, te ñá túú tñáhi ní dásatú iní ñáhà-í xii-ndo cãcãⁿ-í núú-ndó nõu ná cúú sá xíní ñũhu-í, te ñiu-ni ducaⁿ càda-í.

¹⁰ Te ñiu-ni duha cãháⁿ váha-í cuendá-í te ní ñⁿ cue ñáyiú distritú Acãyá vá ñihí-yu tñúhu cũñáhà-yu xii-í cuendá cadí-yu yuhu-í. Te mee Xítóhó Jesucristú ñáhà-gã sá ndáã cãháⁿ-í dàtná cãháⁿ ndáã mée-gã.

¹¹ Te cudana te sàni iní-ndó sá sá dúhá cãháⁿ-í te ñá túú cùu iní ñáhà-í xii-ndo, dico ñáhà chi mee Yã Ndiõxí ñáhà-gã sá yũhú ío cùu iní ñáhà-í xii-ndo.

¹² Te nãcuáa-ni ta quide-í véxi te ñiu-ni ducaⁿ càda-í cuendá sá cuè téé cuini cada nínu mee-xi càchí sá ñⁿ-ni cuu ndihi ñaha-güedé xii-í vá ñihí-güedé tñúhu cãháⁿ-güedé cachí-güedé sá ñⁿ-ni chiuⁿ quide ndihi ñaha-güedé xii-í.

¹³ Te cue téé-án càchí-güedé sá Yã Ndiõxí ní tendaha ñaha-gã xii-güedé xicá cùu-güedé cãháⁿ-güedé tñúhu-gã dico ñá ndáã, chi mee-ni dándahú-güedé ñáyiú ndihi tñúhu cãháⁿ-güedé, te quide-güedé dàtná quidé cuè téé cãháⁿ tñúhu Xítóhó Jesucristú dico ñá ndáã sá cúú-güedé cue téé cãháⁿ tñúhu-gã.

¹⁴ Te vá cũñũhu-o sá dúcãⁿ quide cue téé-án, chi mee sãculhná quidé-xí sá cúú-xí dàtná ñⁿ espíritú xínú cuèchi núú ío váha càa ndecu Yã Ndiõxí dico ñá ndáã sá xínú cuèchi-xi xiãⁿ.

¹⁵ Te xiãⁿ vá cũñũhu-o sá cuè téé xĩnu cuèchi núú-xi quide-güedé sá cúú-güedé cue téé quide váha chi ñá ndáã sá quidé váha-güedé chi dándahú-güedé ñáyiú. Te nãcuáa ndũu nchaa sá quidé-güedé te ducaⁿ nãchãhu-güedé núú Yã Ndiõxí.

Te Pãblú ío ndõho-dé cuendá sá cúú-dé téé cãháⁿ tñúhu Xítóhó Jesucristú

¹⁶ Te yúhú cãháⁿ tucu-í dóho-ndo sá vá caní iní-ndó sá yũhú cúú-í ñⁿ téé cãháⁿ lùcú cãháⁿ duha, te núu dava-ndo dùcaⁿ saní iní-ndó dico chí cadá ndée iní cundedóho-ndo tñúhu na cãháⁿ-í cuendá ducaⁿ tñáhà-í cada nínu-í mée-í.

¹⁷ Te vitna na cãháⁿ-í dàtná cãháⁿ ñⁿ téé ñá túú cùtnuní iní-xi, chí tñúhu cãháⁿ-í ñá túú ñⁿ-ni cuu-xi ndihi tñúhu Xítóhó Jesucristú, chí vitna cãháⁿ-í nãcuáa cada nínu-í mée-í.

¹⁸ Te ío cuéhé ñáyiú quide nínu mee-xi cuendá nchaa sá ío ñuyú-a te xiãⁿ nõu tñáhà-í cuini-í cada nínu-í mée-í.

¹⁹ Chi cùtnuní sá nchòhó quidé ndée iní-ndó sãcúndedóho-ndo nchaa tñúhu cãháⁿ cue téé cãháⁿ lùcú cãháⁿ duha, te ducaⁿ quide ndee iní-ndó sãcúndedóho-ndo tñúhu cãháⁿ-güedé chí càchí-ndó sá ío túha-ndo.

²⁰ Te nchòhó, quide ndee iní-ndó tñũ-ndo nchaa tñúhu cãháⁿ cue téé quide yica ñaha xii-ndo sá cúnú cuèchi-ndo núú-güedé, te xicáⁿ-güedé nãndí sá xicãⁿ-güedé núú-ndó, te tàxi tñuní ñáhà-güedé xii-ndo, te quide-güedé sá ío cùnuu-güedé ndécú ndihi ñaha-güedé xii-ndo, te cãniha-güedé xii-ndo, te cuèi nchaa xiãⁿ quidé ñaha-güedé xii-ndo dico quide ndee-ni iní-ndó.

²¹ Te nchòhó càchí-ndó sá cúú-ndí cue téé ñá túú ní cùyii cada nãndí sá cadá, te ndáã chí ñá túú ñⁿ-ni cuu-ndí ndihi cue téé ducaⁿ xiquide.

Dico núu cue téé-án cùyii-güedé quidé ñĩnu-güedé mée-güedé, te tñáhà-í cùyii-í ducaⁿ càda-í. Te sá dúhá cãháⁿ-í te cãháⁿ-í dàtná ñⁿ téé ñá túú cùtnuní iní-xi.

²² Te núu quide cahnu-güedé mée-güedé cuendá sá cãháⁿ-güedé tñúhu hèbreú, te yúhú tucu ñiu-ni téé cãháⁿ tñúhu hèbreú cúú-í, àdi quide cahnu-güedé mée-güedé cuendá sá cúú-güedé cue téé isrãél, te yúhú tucu tñáhà-í cúú-í téé isrãél, àdi quide cahnu-güedé mée-güedé cuendá sá cúú-güedé ñani tñáhà ndíi Àbrahã, te tñáhà yúhú cúú-í ñani tñáhà ndíi Àbrahã tucu.

²³ Àdi quide cahnu-güedé mée-güedé cuendá sá sãní iní-güedé sá díú nõu Xítóhó Jesucristú xínú cuèchi-güedé, dico yúhú ío-gã xínú cuèchi ndisa-í núú-gã. Te sá dúhá quide cahnu-í mée-í te cãháⁿ-í dàtná ñⁿ téé ñá túú cùtnuní iní-xi, te yúhú cúú-í ñⁿ téé ío-gã quidé chũu-gã dàcúúxí cuè téé-án, te vai xito ní cuu cãniha ñáyiú xii-í, te vai xito ní cuu chíhi ñáhà-yu vecaá xii-í, te vai xito ní cuu càcu càcu cahni ñaha ñáyiú xii-í.

²⁴ Te cue ñáyiú isrãél ní canihá-yu xii-í úhúⁿ xito, te ndi tñáhà ñⁿ ñⁿ xito ní canihá-yu ní dáquẽe-yu ócò sãhúⁿ cúmí ñĩ sãtã-í.

²⁵ Te úní xito ní caniha tucu ñáyiú xii-í ndihi carrùti, te ñⁿ xito ní sãha yúú ñáhà-yu xii-í, te ní cuu úní xito quẽe naa Bàrcú xití ndute órè sãcũhuⁿ-í, te ñⁿ xito ío ní ndõho-í ní xíndecu-í ñⁿ nduu ñⁿ núú ndute lámár.

²⁶ Te ío titní xichi ní cuu xica cuu-í, te dava xichi ní càcu cuidò ñaha ndùte ñũhu xii-í, te dava xichi ní càcu duhu ñadúhú nchaa ndachũuⁿ-í, te dava xichi ní càcu cada ñaha cuè ñáyiú cùu ndi mee-í ñⁿ sá cadá ñáhà-yu xii-í, te ñiu-ni ducaⁿ ní càcu cada ñaha tucu cue ñáyiú ñá túú cùu ndi mee-í ñⁿ sá cadá ñáhà-yu xii-í ní cùu, te cuèi xití ñuú te cuèi xití yucu càcu càcu cada ñaha ñáyiú xii-í ñⁿ sá cadá ñáhà-yu, te ñiu-ni ducaⁿ càcu càcu quini-í tñúndõho órè ñũhũ-í Bàrcú cuáhãⁿ núú ndute lámár. Te cue ñáyiú càchí sá ndécú ichi Xítóhó Jesucristú te ñá ndáã càcu càcu cada ñáhà-yu xii-í ñⁿ sá cadá ñáhà-yu.

²⁷ Te ío ndõho-í cuendá chũuⁿ quide-í chí ío xãu-í, te ní cuu vai xito ñá túú xidí-í, te titní

xito ní cuu xihí víhí-í docó, te titní xito ní cuu yichí-í ndute, te titní xito ní cuu ñá túú tñahí ná xéxi-í cuëndá chiúⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú nihí-í dóó cuihnu-í.

²⁸ Te ñá díú-ní xiǎⁿ chi ìⁿ nduu ìⁿ nduu ío sàni iní-í cuëndá nchaa ñáyiu ndécu ichi Xitohó Jesucristú xindecu nchaa xichí.

²⁹ Te ndéda-ni càa ñáyiu ñá túú nihí ndéé cùndecu ichi Xitohó Jesucristú, te ío cùndahú iní-í chí sànuu sá tñahá-í ñá túú nihí ndéé-í cùndecu-í ichi-gá sá dúcáⁿ quide-yu. Te núu ìⁿ ñáyiu quidé-yu sá ìⁿ nchóhó ñáyiu ndécu ichi Xitohó Jesucristú quidé-ndó ìⁿ sá ñá túú tàú-ndó càa-ndo te vá cúú vǎha iní-í chí cudéⁿ-í.

³⁰ Te núu xini ñuhu-xi sá cáda càhnu-í mée-í, te cuu ducaⁿ càda-í te càháⁿ-í mee-ni cuëndá nchaa sá quidé nàcuáa ñá túú nihí ndéé yiqui cuñú-í.

³¹ Te Dútú Ndióxi Yáa cúú Tátá Xitohó Jesucristú nǎhá-gǎ sá yúhú càháⁿ ndáá-í núú-ndó, te díu-gǎ tàú-gǎ cachí-ó sá ío càhnu cuu-gǎ ni caa ni quíhíⁿ.

³² Te cùtnáhá ní xindecu-í ñuu Dámascú te tée cùu gobiernú tée cùndihi tée yindaha ñáyiu nàni Aretás ní taxi ndecu-dé cue téé ní xindedí yuyèhe sá ñúhú dòco ñuu cuëndá òré quee-í te tñi ñaha-güedé xii-í ní cùu.

³³ Dico yúhú ní queé-í ìⁿ xití tídihí, te cue ñáyiu cùndihi ñaha xii-í ní queñuhu ñahá-yu ndáa ventaná nchí yiqui naha sá ñúhú dòco ñuu-áⁿ, te ducaⁿ te ní cácu-í ñá túú ní ndácu-güedé tñi ñaha-güedé xii-í.

12

Té Pǎblú càháⁿ-dé sá ío víi càa sá ní dánèhé núú ñáhá Xitohó Jesucristú xii-dé

¹ Te ñá túú ndéé nándihí-xi sá càháⁿ váha-o cuëndá mée-ó, dico vitna xini ñuhu-xi ducaⁿ cada-í chí càháⁿ-í nàcuáa ní quide ñaha Xitohó Jesucristú xii-í, chí ní quide-gǎ sá ní cutnúni iní-í nàcuáa ndúu tñuhu-gǎ, te vǎi núú sá ní dánèhé núú ñáhá-gǎ xii-í.

² Te yúhú xini-í ìⁿ téé sàndáá iní ñáhá xii Xitohó Jesucristú, te sa ní cuu úxícúmí cuǎ sá téé-áⁿ ní sáá-dé ndéé andúu cùu uní, te ñá túú xini-í te núu ndihí yiqui cuñú-dé ní sáá-dé àdi ñáhá, chí ìⁿ díi díi-ni Yá Ndióxi nǎhá-gǎ te núu nása càa-dé ní sáá-dé.

³ Te yúhú càháⁿ ndáá-í cuëndá téé-áⁿ, dico dàtná ní cachí-í sá ñá túú xini-í te núu ndihí yiqui cuñú-dé ní sáá-dé andúu àdi ñáhá, chí mee Yá Ndióxi nǎhá-gǎ te núu nása càa-dé ní sáá-dé.

⁴ Te téé-áⁿ ní sáá-dé ìⁿ xichi núú ío váha càa andúu, te yácáⁿ ní xindedóho-dé tñuhu mee-ni sá cúú-xi cuëndá mée-dé, te tñuhu-áⁿ vá cúú tñahí càháⁿ-dé núú ní ìⁿ ñáyiu.

⁵ Te yúhú quidé ñinu-í téé-áⁿ, dico mee-í ñá túú càháⁿ váha-í cuëndá-í cuëndá cada ñinu-í mée-í, chí càháⁿ-ni mee-ni cuëndá nchaa sá quidé nàcuáa ñá túú nihí ndéé yiqui cuñú-í.

⁶ Te núu díco yúhú cuini-í te cuu càháⁿ váha-í cuëndá-í cuëndá cada ñinu-í mée-í, te núu ducaⁿ na càháⁿ-í te ñá túú cùu-xi ìⁿ tñuhu neñúu càháⁿ-í, chí cùu-xi ìⁿ sá càháⁿ ndáá-í te núu na càháⁿ-í. Dico vá dúcáⁿ càda-í chí cuini-í sá nchóhó cada cuëndá-ndó nàcuáa ndúu tñuhu càháⁿ-í ndihí nàcuáa quide-í, te ducaⁿ mée-ndo càháⁿ-ndó te núu ná téé cùu-í, te ñá díú sǎ yúhú càháⁿ váha-í cuëndá mée-í cuëndá nchóhó cachí-ndó sǎ ío cùnuu-í.

⁷ Te sá ní dánèhé núú ñáhá Xitohó Jesucristú xii-í cúú-xi sá xidó ío váha, te cuëndá sá vá cáda càhnu-í mée-í núu xiǎⁿ Xitohó Jesucristú ní quide-gǎ duha ndòho yiqui cuñú-í vitna. Te sá dúcáⁿ quide ñaha-gǎ xii-í te xiǎⁿ sácúulmǎ ní nihí-xi ichi càhnu dandoho ñaha-xi xii-í.

⁸ Te ní cuu úní xito càháⁿ ndáhú-í núú Xitohó Jesucristú sá ná cáda-gǎ nàcuáa vá ndóhó-gǎ yiqui cuñú-í.

⁹ Dico mee-gǎ cáchi-gǎ xii-í: “Yúhú ío cùndahú iní ñáhá-í xii-n chindee ñaha-í, te ñá túú ná cùmǎni xii-n, te cùtnuni sá ío-gǎ chindee-í cue ñáyiu ñá túú nihí ndéé cùndecu”, duha ní cachí-gǎ xii-í. Te xiǎⁿ núu yúhú ío cùdíí iní-í sá ñá túú nihí ndéé-í ndécù-í, chí díu cuëndá xiǎⁿ Xitohó Jesucristú ñá túú dàña nihnu ñaha-gǎ xii-í chindee ñaha-gǎ.

¹⁰ Te xiǎⁿ núu cùdíí iní-í sá dúhá ñá túú nihí ndéé-í ndécù-í, te cùdíí tucu iní-í cuëndá nchaa tñuhu cuèhé tñuhu duha càháⁿ ñáyiu cuëndá-í, te cùdíí iní-í cuëndá nchaa sá ndóhó-í, te cùdíí tucu iní-í cuëndá sá quidé ñaha ñáyiu xii-í, te cùdíí tucu iní-í cuëndá nchaa dava-gǎ sá ndóhó-í cuëndá Xitohó Jesucristú. Te òré ñá túú nihí ndéé-í te Xitohó Jesucristú chindee ñaha-gǎ xii-í nihí ndéé-í.

Té Pǎblú ío sàni iní-dé cuëndá cue ñáyiu xindecu ichi Xitohó Jesucristú ndécú ñuu Còrintú

¹¹ Te cùu-í dàtná ìⁿ téé ñá túú cùtnuni iní-xi sá dúhá càháⁿ váha-í cuëndá-í, te ducaⁿ quide-í chí mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuëndá-í ní cùu. Te dava cue téé ío quide cahnu-güedé mée-güedé, te cáchi-güedé sá Xitohó Jesucristú ní táuchíuⁿ-gǎ sá càháⁿ-güedé tñuhu-gǎ, dico yúhú cùnuu-gǎ-í dàcúuxí cuè téé-áⁿ cuèi ñá túú védana ná cùu-í ndécù-í ñuyíú-a.

¹² Te cùtnáhá ní xindecu ndihí ñaha-í xii-ndo ío ní quide càhnu iní-í nándi sá ní yáha-í ní quide-í chiúⁿ Xitohó Jesucristú sá cúú-xi-ndó. Te ní chindee ñaha-gǎ xii-í ní

quide-í títí nùú sã vã yõ tnàhí ndàcu cada te ní cuñúhu-ndo, te sã dúcáⁿ ní chindee ñàha-gá xii-í ní cutnùní iní-ndó sã yùhú cùú ndisa-í ìⁿ téé ní cachí Xítóhó Jesucristú sã cáháⁿ-í tnúhu-gá.

¹³ Te yùhú ìⁿ-ní quide ndìhi ñàha-í xii-ndo ndìhi nchaa dava-gá cue ñáyiu ndècu ichi Xítóhó Jesucristú, te dicó-ni sã yùhú ñã túú ní cuñí-í taxi-ndo sã xíní ñùhu-í dàtná ní quide-í dava-gá-yu. Te núu ñã túú ní quide vâha-í sã dúcáⁿ ní quide-í ñã túú ní cuñí-í chindee ñàha-ndo te chí cádá càhnu iní ñàhá xii-í.

¹⁴ Te vitna sa ndècu túha-í sã quixí-í núú ndécú-ndó, te sã quixí còto ñaha tucu-í xii-ndo cùu-xi xito cuu úní sã quixí-í, te cuñí-í sã vã dándihú-ndó iní-ndó ndècu-ndo sã táxi-ndó cùu xii-í, chí ñã díú xiãⁿ ndéé iní-í chi mee-ndo ndéé iní-í quixí-í. Te duha càháⁿ-í chí nchòhó xini-ndó sã cuè téé cùu tátá sãñaha-güedé sã cùú-xí cuè déhe-güedé te ñã díú cuè déhe-güedé sãñaha-güedé sã cùú-xí mèe-güedé.

¹⁵ Te yùhú ío vâha cùu iní-í dandòñuhu-í sã ndécú ndìhi-í nàcuáa ndacu-í chindee ñàha-í xii-ndo cùndecu vâha-ndo sã cùú-xí Yã Ndiõxí chí ío cùdí iní-í, te cuèí na cùu-í sã cuendá-ndó, chí ío cùu iní ñàhá-í xii-ndo, te sã dúcáⁿ cùu iní ñàhá-í xii-ndo, te sànuu sã nchòhó ñã túú cùu iní ñàhá càvihi-ndo xii-í.

¹⁶ Te ñaha-ndo sã ñã túú ní dándihú-í iní-ndó nã taxi-ndo cùu xii-í, dico dava-ndo cachí-ndó sã ío vâha ní xito-í nàcuáa ní quide-í nàcuáa ní dándàhú ñàhá-í xii-ndo.

¹⁷ Te chí càháⁿ te núu yùhú ní dándàhú ñàhá-í xii-ndo ndìhi cue téé ní tendaha-í ní quixí coto ñaha xii-ndo.

¹⁸ Te ní cáháⁿ ndàhú-í núú tẽ Titú ndìhi núú ñngá tucu téé ndècu ndìhi-o ichi Xítóhó Jesucristú ní quixí coto ñaha-güedé xii-ndo. Te nchòhó cùtnùní iní-ndó sã tẽ Titú ñã túú ní dándàhú ñàhá-dẽ xii-ndo, te ducaⁿ chí ìⁿ-ní sàni iní-ndí te ìⁿ-ní quide-ndí.

¹⁹ Te cudana te sàni iní-ndó sã sã dúhá càháⁿ-ndí te tàumihnu-ndí mée-ndí, dico ñã díú dùcaⁿ quee-xi tnúhu càháⁿ-ndí, chí càháⁿ-ndí nàcuáa tàù-xi càháⁿ-ndí chí ndècu ndìhi-ndí Xítóhó Jesucristú, te mee Yã Ndiõxí nãhá ndáá-gá nàcuáa ndùu tnúhu càháⁿ-ndí, te nchaa sã càháⁿ-ndí cùú-xí cuendá nchòhó cue ñáyiu ío cùu iní-ndí, te càháⁿ-ndí nàcuáa cundecu vâha-ndo ichi Xítóhó Jesucristú.

²⁰ Te ío sàni iní-í cuendá-ndó chí na cuáháⁿ te òré quixí-í quixí coto ñaha-í xii-ndo, te ñã túú quide-ndo nàcuáa cuu vâha iní-í, te sã dúcáⁿ te yùhú cáháⁿ-í nàcuáa vã cùú vâha iní-ndó, te ducaⁿ ío sàni iní-í cuendá-ndó chí na cuáháⁿ òré quexio-í te nãá-ndó, àdi ndecu-ndo ichi cuédú iní, àdi cudééⁿ núú tnàhá-ndó, àdi ñã túú cùu ìⁿ-nuu-ndo

ndecu-ndo, àdi cáháⁿ cuèhé-ndó cuendá tnàha ñáyiu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo.

²¹ Te ío sàni iní-í cuendá-ndó chí na cuáháⁿ òré quixí-í, te Yã Ndiõxí cada-gá te cucahaⁿ núu-í sã cuendá-ndó, te ío ndìhú iní-í cuendá-ndó te núu vátá dàñá-gã-ndó nchàa sã cuèhé sã dúhá ní ngúita-ndo quide-ndo ndéé sanduu, te vâi-ndo ní ngúita-ndo dùcaⁿ quide-ndo, chí ndècu-ndo ichi díí iní te nãndi-gá nchaa sã cuèhé sã dúhá quide-ndo, te ducaⁿ ío ndìhú iní-í te núu vátá dàñá-gã-ndó nchàa xiãⁿ.

13

Tnúhu ndéé núú ní ndìhi-ndá

¹ Te sã quixí-í vitna núú ndécú-ndó cùu-xi xito cuu úní sã quixí còto ñaha-í xii-ndo. Te cachí tnúhu-í xii-ndo sã òré cundáa cuèchi-ndo te canehe núú úú àdi úní ñáyiu cáháⁿ ndáa nàcuáa ndùu cuèchi-ndo.

² Te yùhú sa ní cáháⁿ-í dóho-ndo cùtnàhá ní quixí-í ní quixí coto ñaha-í xii-ndo xito cuu úú, te díu-ni ducaⁿ cáháⁿ tucu-í dóho-ndo vitna vátá quixí tucu-gá-í quixí coto ñaha-í xii-ndo. Te nchòhó ñáyiu ní cunduu ní ngúita quide nchaa sã cuèhé sã dúhá, tenáa ñàhá-í xii-ndo òré quexio-í te núu vátá dàñá-gã-ndó nchàa sã cuèhé sã dúhá quide-ndo te tnàhá nchaa dava-gá-ndó tènáa ñàhá-í xii-ndo.

³ Te nchòhó cuñí-ndó quini-ndó núu ndáa sã quidè-í núú Xítóhó Jesucristú càháⁿ-í yuhu-gá, dico dàvã-ãⁿ cutnùní ndáa iní-ndó. Te Xítóhó Jesucristú quidè-gá nàcuáa cutnùní iní-ndó sã ío càhnu cuu-gá te ñã túú quide-gá dàtná quidè ìⁿ ñáyiu ñã túú nihí ndéé cùndecu.

⁴ Te Xítóhó Jesucristú ní ndoho-gá dàtná ìⁿ ñáyiu ñã túú nihí ndéé cùndecu, chí ní sahní ñaha-güedé xii-gá núú cùrúxí dico mee Yã Ndiõxí ní quide-gá ní nihí ndéé Xítóhó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñã túú nihí ndéé-ndí cundecu-ndí, dico mee Yã Ndiõxí chindèe ñaha-gá xii-ndí nihí ndéé-ndí ndécú-ndí cuendá sã ndécú ndìhi-ndí Xítóhó Jesucristú, te xiãⁿ núu ndàcu-ndí quidè-ndí nàcuáa tàù-xi cunduu sã cùú-xi-ndó.

⁵ Te chí cádá cuendá vâha te núu ndisa sã sàndáa iní-ndó tnúhu Xítóhó Jesucristú, te núu ndáa sã ndécú-ndó ichi-gá te cùtnùní iní-ndó sã ndécú-ndó ndìhi-gá.

⁶ Te cuñí-ndí sã nchòhó cutnùní ndáa iní-ndó sã nchúhú ndécú-ndó ndìhi ndisa-ndí Xítóhó Jesucristú.

⁷ Te nchúhú càháⁿ ndìhi-ndí Yã Ndiõxí cuendá-ndó cuendá sã vã cádá-ndó ní ìⁿ sã cuèhé sã dúhá, te vã cání iní-ndó sã sã dúcáⁿ

càháⁿ ndihi-ndí-gá cuèndá-ndó, te cuìní-ndí sá nchòhó cutnùní iní-ndó sã nchùhú ío ndècu yiñuhu-ndí núú-gã, te ñáhá chi càháⁿ ndihi-ndí-gá cuèndá-ndó chi cuìní-ndí sá nchòhó cada váha-ndo cùndecu-ndo cuéi sàni iní-ndó sã nchùhú cúú-ndí cue téé ñá túú ndècu yiñuhu núú-gã.

⁸ Te nchùhú mee-ni càháⁿ váha-ndí cuèndá tnúhu ndáá tnúhu Yá Ndiòxí, te ñá túú càháⁿ-ndí ìⁿ tnúhu sá ñà túú tàú-xi càháⁿ-ndí cuèndá tnúhu-áⁿ.

⁹ Te cùdí iní-ndí sá ñà túú-gã xíní ñùhu-xi cada-ndí nàcuáa níhí ndéé-ndí tenàá ñáhá-ndí xii-ndo càháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchùhú càháⁿ ndihi-ndí Yá Ndiòxí cuèndá-ndó cuèndá sá nchòhó cundáá-ndó cùndecu-ndo ñá túú-gã ná cumání-ndó núú-gã.

¹⁰ Te xíáⁿ núu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihi ñaha-í xii-ndo, cuèndá sá òré ná cùndecu ndihi ñaha-í xii-ndo te vá ío níhí càháⁿ-í dóho-ndo nàcuáa ndùu tnúhu ndee iní ní taxi Xitohó Jesucristú ndécú ndihi-í, chi ní taxi-gá tnúhu ndee iní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuèndá sá cánùichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyíu ndècu ndihi-ndí ichi Xitohó Jesucristú ío quide ndee iní ñáhá-ndí xii-ndo, te ío chí ndúcu nàcuáa cada-ndo cùndáá-ndó núú Yá Ndiòxí cuèndá sá ñà túú tnàhí-gá ná cùmání-ndó núú-gã, te ndee ndèe cada iní-ndó cùndecu-ndo, te chí cúú ìⁿ nuu cundecu ndihi tnaha, te ducaⁿ te Yá Ndiòxí cundecu ndihi ñaha-gã xii-ndo chi ío cùu iní ñáhá-gã xii-o, te díu-gá quidé-gã ío váha cùu iní-ó ndècu-o.

¹² Te ndihi tnúhu yiñuhu chí cádá ndèe iní tnáhá.

¹³ Te nchaa ñáyíu cùu cuendá Yá Ndiòxí ndécú iha quide ndee iní ñáhá-yu xii-ndo.

¹⁴ Te xicáⁿ táhu-ndí núú Xitohó Jesucristú sá ío na chìndee chitúu ñaha-gã xii-ndo. Te mee Yá Ndiòxí ná cádá-gã nàcuáa cutnùní iní-ndó sã ío cùu iní ñáhá-gã xii-ndo, te Espiritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ NÍ CADÚHA TĒ PĀBLŪ QUIHIⁿ NDAHA ÑÁYIU DISTRITÚ GÁLACIÁ

TĒ Pāblū cadúha-dé tutú quihiⁿ ndaha nchaa ñáyiú sándáá iní ñáhá xii Xítóhó Jesucristú ndécú distrítú Gálaciá

¹ Te yúhú té Pāblū ní tendaha ñaha Xítóhó Jesucristú, ndihi Dútú Ndióxi véxi-í cāháⁿ-í tnúhu-gá. Te diu Yá Ndióxi ní dándótó-gă Xítóhó Jesucristú Yáá ní xihí ní cūu. Te cāchí tnúhu-í xii-ndo sá ña diú ñáyiú ñuyiú-a ní tendaha ñaha xii-í véxi-í, te ní Yá Ndióxi te ní Xítóhó Jesucristú ñá túú ní xāhaⁿ-gá xii ñⁿ ñáyiú quixi-yu cāchí tnúhu-yu ñacuáa cada-í.

² Te yúhú té Pāblū cadúha-í tutú-a ndihi nchaa dava-gá ñáyiú ndécú ichi Yá Ndióxi ndécú ndihí-í iha cuendá daquixi-í ndaha nchóhó ñáyiú sándáá iní ñáhá xii Xítóhó Jesucristú ndécú distrítú Gálaciá.

³ Te xicáⁿ tǎhú-í núú Dútú Ndióxi, ndihi núú Xítóhó Jesucristú sá io na chindee chítúu ñaha-gá xii-ndo, te ducaⁿ ndi nduú-gá ná cádá te io váha cuu iní-ndó cūndecu-ndo.

⁴ Te Xítóhó Jesucristú ní xihí-gá sá cuendá nchaa cuéchi nchoo cué ñáyiú ndécú ñuyiú-a. Te ducaⁿ ní quide-gá, chí cuini-gá sá vǎ cūndécú-o ichi cuéhé ichi duha. Te ducaⁿ ní cuu, chí Dútú Ndióxi ducaⁿ ní cuini-gá cūnduu.

⁵ Te io chí ná ndacáⁿ tǎhú-ó núú Yá Ndióxi cuendá sá io cǎhnu cuu-gá, te diu-ni ducaⁿ cáda-o ni caa ni quihiⁿ! Te ducaⁿ na cūnduu.

Mee-ni tnúhu Xítóhó Jesucristú cúu-xi tnúhu sá cāháⁿ nacúda nanihí tǎhú-ó

⁶ Te io cūñúhu-í cúú chí io ndihi ní dáñá-ndó ichi Yá Ndióxi. Te Yáá-áⁿ ní cāháⁿ ñáhá-gă xii-ndo, chí Xítóhó Jesucristú io ní cundáhú iní ñáhá-gă ní quide váha ñaha-gă xii-ndo, te vitna dācuaha tucu-ndo ingá tnúhu, te cāchí-ndó sá xiǎⁿ dācācu nihnu ñaha-xi xii-ndo núú ùhú núú ndáhú.

⁷ Dico ñáhá, chí ña túú-gă tnúhu sá dācācu nihnu ñaha xii-o núú ùhú núú ndáhú. Te dícó-ní sá io ñáyiú véxi dāticá nuu ñahá-yu xii-ndo dānehé ñáhá-yu tnúhu sá dācuíta nihnu ñaha xii-ndo, chí tnúhu-áⁿ ña túú cūu-xi tnúhu Xítóhó Jesucristú.

⁸ Te yúhú cāháⁿ-í tnúhu Xítóhó Jesucristú, dico núú io ñáyiú véxi dānehé ñáhá xii-ndo ingá tnúhu sá ña túú ní dānehé ñáhá-í xii-ndo, te nchóhó cāchí-ndó sá ñáyiú-áⁿ nacháhu-yu núú Yá Ndióxi sá dúcáⁿ quidé-yu. Te cuéi yúhú, te núu na dāma-í tnúhu dānehé ñáhá-í xii-ndo, te diu-ni ducaⁿ cāháⁿ-ndó sá náchǎhu-í núú-gă te núu ducaⁿ na cáda-í. Ádi te núu ñⁿ espíritu xinu cuéchi

núú-gă véxi-xi cāháⁿ-xi ingá tnúhu sá ña túú ní dānehé ñáhá-í xii-ndo nacúaa nanihí tǎhú-ndó ñá, te diu-ni ducaⁿ cāháⁿ-ndó sá náchǎhu-xi núú Yá Ndióxi te núu ducaⁿ na cáda-xi.

⁹ Te diu-ni duha sa ní dānehé ñáhá-í xii-ndo sá ñu véxi ñáyiú dānehé ñáhá ingá tnúhu sá ña túú ní dānehé ñáhá-í xii-ndo nacúaa nanihí tǎhú-ndó ñá, te cāchí-ndó sá ñáyiú-áⁿ nacháhu-yu núú Yá Ndióxi sá dúcáⁿ quidé-yu, duha ní cāchí-í xii-ndo.

¹⁰ Te duha nduu tnúhu cāháⁿ-í chí nchóhó sa xini-ndó sá yúhú cuini-í sá Yá Ndióxi cāháⁿ-gá sá quidé váha-í ndécú-í, te ña diú sá ñáyiú ñuyiú-a cāchí-yu sá quidé váha-í, ádi sá io cūdíⁿ iní-yu nchaa nacúaa quidé-í ndécú-í. Te núu na cāni iní-í cudü-í núú ñáyiú ñuyiú-a, te ña túú cūu-í téé xinu cuéchi núú Xítóhó Jesucristú te núu ducaⁿ na cáda-í.

Nācuáa ní cuu ní ngüita té Pāblū cāháⁿ-dé tnúhu Yá Ndióxi

¹¹⁻¹² Te nchóhó ñáyiú ndécú ndihí-í ichi Xítóhó Jesucristú cāchí tnúhu-í xii-ndo sá tnúhu sá dānehé ñáhá-í xii-ndo nacúaa nanihí tǎhú-ndó cūu-xi tnúhu sá ní cāchí tnúhu mee Xítóhó Jesucristú xii-í, te ña diú ñⁿ ñáyiú ñuyiú-a ní cāhu iní-yu tnúhu-áⁿ, ádi dānehé ñáhá-yu xii-í, chí mee Xítóhó Jesucristú ní dānehé ñáhá-gă.

¹³ Te nchóhó sa nihí-ndó tnúhu nacúaa ní xóo cada-í cūtnáhá nchicúⁿ nihnu-í nchaa nacúaa dācuaha ñáyiú cūu ndi mee-í ñáyiú isrǎel ní cūu. Te dāvá-áⁿ io ní xóo cuu úhú iní-í nchaa ñáyiú ndécú ichi Yá Ndióxi, te nāndi sá ní xóo cada-í-yu, te ní cuini-í dānaá-í-yu ní cūu.

¹⁴ Te yúhú io-gá ní xóo quene cáva-í ní xóo dācuaha-í nchaa sá dācuaha ñáyiú cūu ndi mee-í dācúxí ñáyiú ñⁿ-ní cuia-í ndihí-yu ní cūu, te io-gá ní xóo cuini-í cada ndáá-í canchicúⁿ nihnu-í nchaa nacúaa ní dānehé ñáhá cué ñani tǎhǎ-í ní xindecu ndéé sanaha ní cūu.

¹⁵ Te ndéé cūtnáhá vátá cācú-gá-í Yá Ndióxi sa nēhe váha ñaha-gă xii-í cuendá sá cāháⁿ-í tnúhu-gă, núu xiǎⁿ ní cāháⁿ ñáhá-gă xii-í quidé-í chiúⁿ-gă vitna, te sá dúcáⁿ ní quide-gă te io váha ní quide ñaha-gă xii-í.

¹⁶ Te órē ní cāháⁿ ñáhá Yá Ndióxi xii-í te ní cāchí tnúhu-gă cuendá Dēhe-gă Xítóhó Jesucristú. Te ducaⁿ ní quide Yá Ndióxi cuendá sá cuini-gá sá cūñaha-í xii ñáyiú ña túú cūu ñáyiú isrǎel cuendá Yáá cúú Dēhe-gă. Te cūtnáhá ní cāháⁿ ñáhá Yá Ndióxi xii-í, te vá yóo ñⁿ diú núú-xi ní ndécú tnúhu-í nacúaa cada-í.

¹⁷ Te ní ña túú ní sǎháⁿ-í ñuu Jerusálén nducu tnúhu-í núú cué téé díhna nuu ní tendaha Xítóhó Jesucristú cāháⁿ tnúhu-gă núu nása cada-í, chí ndihí-ni ní sǎháⁿ-í distrítú

Àrabíá ní xíndecu tnaa-í te dàtnùní cuánuhú tucu-í ñuú Dàmascú.

¹⁸ Te núú ùní cuiá sá ní cáháⁿ ñáhá Yá Ndiòxí xii-í, te ní sáháⁿ tucu-í ñuú Jerusálén ní cáháⁿ ndihi-í té Pèlú, te ní xíndecu-í ndihi-dé sáhúⁿ nduu.

¹⁹ Te tnahá té Jàcobó ñani Xitohó Jesucristú ní cáháⁿ ndihi-í. Te ñá túú ní xini-í dava-gá cue tée ní tendaha Xitohó Jesucristú cáháⁿ tñuhu-gá.

²⁰ Te Yá Ndiòxí ndéhé ndùí ndehe caxi-gá sá ncháá tñuhu tée-í núú tütü-a sá cúú-xi-ndó cùu-xi ñí sá ndáá.

²¹ Te sáta ní sáháⁿ-í ñuú Jerusálén, te dàtnùní ní sáháⁿ-í distritú Siríá, ndihi distritú Ciliciá.

²² Te nchaa ñáiyu xíndecu ichi Xitohó Jesucristú ndécú distritú Júdeá ñá túú xini ñáhá-yu xii-í ní cùu.

²³ Dico ní xóo níhí-yu tñuhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáiyu ndècu ichi Xitohó Jesucristú cáháⁿ-dé tñuhu-gá núú ñáiyu cuendá quindáá iní ñáhá-yu xii-gá, te diu-dé nándi sá quidé ñaha-dé, te cuiñi-dé danáa ñaha-dé cuendá sá vā cóó-gá ñáiyu quindáá iní ñáhá xii-gá ní cùu”, duha ní cachí-yu cuendá-í.

²⁴ Te ní nguíta-yu ní cachí-yu sá ño càhnu cuu Yá Ndiòxí cuendá sá ñà túú-gá quidè-í dàtná ní xóo cada-í.

2

Té Pàblú ní níhí tnahá-dé ndihi dava-gá cue tée cáháⁿ tñuhu Yá Ndiòxí

¹ Te ní nútahá úxicúmi cuiá sá ní sáháⁿ-í ñuú Jerusálén ní cáháⁿ ndihi-í té Pèlú, te dàtnùní ndécá-í té Bèé ní sáháⁿ, te tnahá té Títú ní sáháⁿ ndihi-ndí-dé.

² Te ní sáháⁿ-í chi mee Yá Ndiòxí ní cachí-gá sá quíhíⁿ-í. Te yàcáⁿ ní tacá mee-ni cuè tée cùnuu. Te ní xáhaⁿ-í xii-güedé nàcuáa ndùu tñuhu dànehé-í ñáiyu ñá túú cùu ñáiyu isràél cuendá naníhí tñhú-yu. Te ducaⁿ ní quide-í cuendá cuiñi-í quini-güedé nàcuáa ndùu chiuⁿ quide-í, chí nacuáháⁿ cachí-güedé sá ñà túú nàndíhí-xi.

³ Te té Títú tée ndècu ndihi-í chi ñá díú tée isràél cúú-dé, dico ñá túú ní quide yica-güedé cuáha-güedé sèñá ñí-dé.

⁴ Te ñáiyu cächí sá ndécú ichi Xitohó Jesucristú te ñá ndáá sá ndécú-yu ichi-gá, ñáiyu-áⁿ ní chitnahá ñáhá-yu xii-ndí cuendá cuiñi-yu quini-yu nása quide-ndí ndécú-ndí ichi Xitohó Jesucristú. Te ducaⁿ ní quide-yu cuendá sá nchùhú sa ní cácu nihnu-ndí ñá túú-gá quidé-ndí nchaa nàcuáa ní cáháⁿ ndí Moisés. Te cuiñi-yu sá núcuíta saa tucu-ndí cada-ndí nchaa nàcuáa ní cáháⁿ ndí

nucúndecu-ndí dàtná ní xíndecu-ndí cùtnàhá vátá cácu nihnu-gá-ndí núú tñuhu-áⁿ ní cùu.

⁵ Te nchùhú ñá túú tnahí ní dàña-ndí méé-ndí dandàhú ñáhá-yu xii-ndí. Te ducaⁿ ní quide-ndí, chí cuiñi-ndí sá ñà túú nágá tñuhu dácánuu ndihi tñuhu sá cáháⁿ nàcuáa naníhí tñhú-ó ndècu ndihi-ndo.

⁶ Te ní ñíⁿ tñuhu sá vátá quini-gá-í ñá túú ní cächí tñuhu cue tée cùnuu núú ñáiyu cada-í. Dico yúhú chí ñá túú ní quide cuendá-í ñuú cùnuu-güedé àdi ñá túú cùnuu-güedé, chí núú Yá Ndiòxí ñíⁿ-ni cùu-o nchaa-o.

⁷ Te ní cutnùní iní-güedé sá Yá Ndiòxí ní cachí-gá xii-í sá cáháⁿ-í tñuhu-gá núú ñáiyu ñá túú cùu ñáiyu isràél dàtná ní quide-gá té Pèlú ní xáhaⁿ-gá cáháⁿ-dé tñuhu-gá núú ñáiyu isràél.

⁸ Te ducaⁿ ní cutnùní iní-güedé, chí diu-ni Yá Ndiòxí Yá chindèe ñaha xii té Pèlú cáháⁿ-dé tñuhu-gá núú ñáiyu isràél, diu-ni Yá-áⁿ chindèe ñaha-gá xii-í cáháⁿ-í tñuhu-gá núú ñáiyu ñá túú cùu ñáiyu isràél.

⁹ Te té Jàcobó, ndihi té Pèlú, ndihi té Juáa, cue tée ío cùnuu-gá ní cutnùní iní-güedé sá Yá Ndiòxí ío chindèe ñaha-gá xii-í quidè-í chiuⁿ-gá. Te ío váha ní cáháⁿ ndihi ñaha-güedé xii-í, ndihi té Bèé, te ní cuu ñíⁿ-nuu-ndí sá nchùhú quíhíⁿ-ndí cáháⁿ-ndí tñuhu Yá Ndiòxí núú ncháa ñáiyu ñá túú cùu ñáiyu isràél, te mee-güedé cáháⁿ-güedé tñuhu-gá núú ñáiyu isràél.

¹⁰ Te ñíⁿ-ni tñuhu ní cáháⁿ-güedé dóho-ndí te ní cachí-güedé xii-ndí sá chindèe-ndí cue ñáiyu ndàhú, te sa ducaⁿ tnahí sàni iní-ndí cada-ndí.

Té Pàblú cáháⁿ-dé dóho té Pèlú ñuú Antioquia

¹¹ Te cùtnàhá ní sáháⁿ té Pèlú ñuú Antioquia yàcáⁿ ní cáháⁿ-í dóho-dé, chí quide-dé ñíⁿ sá ñà túú tñhú-dé cada-dé ní cùu.

¹² Te quide váha-dé ní cùu chí xèxi-dé ndihi ñáiyu ñá túú cùu ñáiyu isràél, dico òré ní sáá ñíⁿ úú ñáiyu cùndíhí té Jàcobó, te òré-áⁿ ñà túú-gá ní cuiñi-dé caxi-dé ndihi ñáiyu-áⁿ. Te ducaⁿ ní quide-dé chí ní yùhú-dé cue ñáiyu nchicúⁿ nihnu quide nchaa nàcuáa ní cáháⁿ ndí Moisés sá vā cáháⁿ váha-yu cuendá-dé.

¹³ Te tnahá dava-gá ñáiyu isràél xíndecu ichi Yá Ndiòxí ñá túú quide váha-yu, chí quide-yu dàtná quidé té Pèlú ní cùu, te ndéé tnahá té Bèé ní nguíta-dé ducaⁿ quide-dé ní cùu.

¹⁴ Te òré ní xini-í sá ñà túú quide-güedé ndíhí-yu nàcuáa cáháⁿ tñuhu Yá Ndiòxí, te núú ncháa ñáiyu ndècu ichi Yá Ndiòxí ní xáhaⁿ-í xii té Pèlú: “Yòhó cúú-n tée isràél, te ñá túú quide-n nchaa nàcuáa quide ñáiyu isràél, chí quide-ni-n datná quidé ncháa ñáiyu ñá túú cùu ñáiyu isràél. Te núu ducaⁿ quide-n, çte ná cuendá dānehé-n ñáiyu ñá

túú cùu ñáyiú isràèl sá cádá-yu nchaa nàcuáa quide ñáyiú isràèl?", duha ní xáhaⁿ-í xii té Pèlú.

Èⁿ-ni nàníhí tàhú-ó ndíhi ñáyiú isràèl núu na quindáá iní-ó Xítohó Jesucristú ndíhi-yu

¹⁵ Te yúhú ndíhi té Pèlú cúú-ndí ñaní tnáhá ñáyiú isràèl, te ñá túú ndècu-ndí ichi cuèhé ichi duha dàtná ndécú nchaa ñáyiú ñá túú cùu ñáyiú isràèl.

¹⁶ Te xini-ó sá vǎ cùndècu-gá cuèchi-o núú Yǎ Ndióxi te núu na quindáá iní-ó Xítohó Jesucristú, te ñá díú sá cǎnchicúⁿ nihnu-o càda-o nchaa nacúáa ní cáháⁿ ndí Moisés. Te tnáhá dava nchúhú ñáyiú isràèl sàndáá iní-ndí Xítohó Jesucristú, te xiǎⁿ cùtnúni iní-ndí sá ñá túú-gǎ cuèchi-ndí ndécú núú-gǎ, dico ñá díú sá ní cǎnchicúⁿ nihnu-ndí ní quide-ndí nàcuáa ní cáháⁿ ndí Moisés, chi cuèndá sá sàndáá iní-ndí Xítohó Jesucristú. Te vǎ yǎo ìⁿ cachí-ó sá ñá túú ndècu cuèchi-xi núú Yǎ Ndióxi cuèndá sá nchicúⁿ nihnú-yu nchaa nàcuáa ní cáháⁿ ndí Moisés.

¹⁷ Te núu cuini-ó sá vǎ cùndècu cuèchi-o núú Yǎ Ndióxi cuèndá sá sàndáá iní-ó Xítohó Jesucristú, te xiǎⁿ cùtnúni iní-ó sá ñá túú quide váha-o. ;Te vǎ cúú tnáhí caní iní-ó sá Xítohó Jesucristú dǎnèhé ñáhá-gǎ xii-o sá vǎ cádá váha-o cùndècu-o!

¹⁸ Te yúhú cǎchí-í sá vǎ cǎnchicúⁿ nihnu-gǎ-ó nchaa nacúáa ní cáháⁿ ndí Moisés, dico núu vitna cǎchí-í sá xini ñíhu-xi cada-o nchaa nacúáa ní cáháⁿ ndí ña, te ñá túú quide váha-í núú Yǎ Ndióxi te núu ducaⁿ na càda-í.

¹⁹ Te yúhú duuⁿ duuⁿ ní cutnúni iní-í sá vǎ ndácù-í cada-í nchaa nàcuáa ní cáháⁿ ndí Moisés núu xiǎⁿ ní dàñà-í ñá túú-gǎ nchicúⁿ nihnu-í nchaa nàcuáa ní cáháⁿ ndí cuèndá sá cuini-í cùndècu-í sá cúú-xí Yǎ Ndióxi.

²⁰ Te Xítohó Jesucristú ní xihí-gǎ cuèndá-í, dico dàtná tnúhu sá tnáhá-í ní xihí ndíhi-gǎ, chi ñá cúú-gǎ cada-í nchaa nàcuáa sàni imí mée-í, chi Xítohó Jesucristú-nǎ ndécú ndíhi ñaha-gǎ xii-í táxi tnúni ñáhá-gǎ. Te vitna ndècu-í ñuyú-a, te ío sàndáá iní-í Xítohó Jesucristú Déhe Yǎ Ndióxi, te chindee ñaha-gǎ xii-í. Te ñu-ni Xítohó Jesucristú ío cùu iní ñáhá-gǎ xii-í núu ní xihí-gǎ núú cùrúxí sá cuèndá-í.

²¹ Te vitna ñá túú dàquee tíhú-í sá váha ní quide ñaha Yǎ Ndióxi xii-í, chi núu ní ndàcu-o vǎ cùndècu cuèchi-o núú Yǎ Ndióxi cuèndá sá nchicúⁿ nihnu-o quide-o nchaa nacúáa ní cáháⁿ ndí Moisés ní cùu ña, te àúⁿ ná cuu ní xihí Xítohó Jesucristú ní cùu te núu ducaⁿ.

3

Vǎ dàña ndèé-ó quindáá iní-ó tnúhu Xítohó Jesucristú

¹ Te nchòhó ñáyiú distritú Gálaciá, ñáyiú sa xĩndecu ichi Xítohó Jesucristú, ¿ná cuèndá ío ñíi iní-ndó ñá cuini-ndó tní-ndo nchaa tnúhu cáháⁿ-gǎ?, ¿te yoo ní dádáhu ndodo iní ñáhá xii-ndo núu ducaⁿ quide-ndo? Te naha-ndo sá ío váha ní dǎnèhé ñáhá-ndí xii-ndo nàcuáa ní cuu ní xihí Xítohó Jesucristú.

² Te vitna cáháⁿ-ndó núu sá nchicúⁿ nihnu-ndo nchaa nacúáa ní cáháⁿ ndí Moisés ní níhí-ndó Espiritú Yǎ Ndióxi ndécú ndíhi-ndo, àdi sá ní sàndáá iní-ndó tnúhu Xítohó Jesucristú sá ní dǎnèhé ñáhá-ndí xii-ndo ní níhí-ndó Espiritú-gǎ ndécú ndíhi-ndo.

³ Te nchòhó ío ní ñíquí-ndó chi Espiritú Yǎ Ndióxi tá quide váha ñaha-xi xii-ndo cuáháⁿ ní cùu. ¿Te náa vitna mee-nǎ-ndó cuini-ndó càda-ndo nacúáa ta quide ñaha Espiritú-gǎ cuáháⁿ xii-ndo ní cùu-áⁿ?

⁴ Te sàni ìⁿ sàni úú iní-í cuèndá-ndó sá àúⁿ ná cuu nándi váha-ndo ndècu-ndo ichi Yǎ Ndióxi.

⁵ Te xini-ndó sá Yǎ Ndióxi ní taxi-gǎ Espiritú-gǎ ní ngúndecu ndíhi-ndo, te ní quide-gǎ sá vǎ yǎo tnáhí ndàcu cada núú-ndó ní xini-ndó. Te ducaⁿ ní quide-gǎ, chi ní sàndáá iní-ndó-gǎ, dico ñá díú cuèndá nchaa nàcuáa ní cachí ndí Moisés cada ñáyiú ducaⁿ ní quide-gǎ.

⁶ Te ndí Abrahám ducaⁿ ío ní sàndáá iní ndí Yǎ Ndióxi, núu xiǎⁿ ní cachí-gǎ sá ní cudú ndí núú-gǎ sá dúcáⁿ ní quide ndí.

⁷ Te cǎchí tnúhu ndáá-í xii-ndo sá ncháá ñáyiú sàndáá iní ñáhá xii Yǎ Ndióxi dàtná ní sàndáá iní ñáhá ndí Abrahám xii-gǎ, ñáyiú-áⁿ ìⁿ-ni cùú-yu ndíhi ndí núú-gǎ.

⁸ Te núú tütú Yǎ Ndióxi ní ngódó tnúni tnúhu váha, tnúhu sá ní xáha Yǎ Ndióxi xii ndí Abrahám, te duha ní xáha-gǎ xii ndí: "Nchaa ñáyiú nihí ñuyú cada váha-í-yu sá cuèndá-n", duha ní xáha-gǎ xii ndí. Te sá dúcáⁿ ní ngódó tnúni núú tütú Yǎ Ndióxi ndéé dává-áⁿ, te xiǎⁿ cùtnúni sá sáa nduu, te cue ñáyiú ñá túú cùu ñáyiú isràèl vǎ cùndècu-gǎ cuèchi-yu núú-gǎ te núu na quindáá iní ñáhá-yu xii-gǎ.

⁹ Te xiǎⁿ núu nchaa ñáyiú sàndáá iní ñáhá xii Yǎ Ndióxi cada váha ñaha-gǎ xii-yu dàtná ní quide váha-gǎ ndí Abrahám, chi ndí-áⁿ ducaⁿ ní sàndáá iní ñáhá ndí xii-gǎ.

¹⁰ Te nchaa ñáyiú cuini cada nchaa nàcuáa ní cáháⁿ ndí Moisés cuèndá sá cuini-yu sá vǎ cùndècu-gǎ cuèchi-yu núú Yǎ Ndióxi, ñáyiú-áⁿ dàña nihnu ñaha-gǎ xii-yu, chi vǎ ndácù-yu cadá-yu nàcuáa sàni iní-yu, te ducaⁿ càda-gǎ chi quèe ndáá-xi nàcuáa

càháⁿ-xi núú tütú-gá núú càchí-xi sá ncháá ñáiyu ñá túú quide nchaandi tühú nàcuáa ní cáháⁿ ndíi Moisés te dañá nihnu ñaha-gá xii-yu.

¹¹ Te núu na càncicúⁿ nihnu-ni-o càda-o nacuáa ní cáháⁿ ndíi Moisés, te ñá túú vèdana chindee ñaha-xi xii-o nacuáa vá cùndècu-gá cuèchi-o núú Yá Ndiòxí. Te ndáá chí núú tütú-gá càchí-xi sá ncháá ñáiyu sàndáá iní ñáhá xii-gá, ñáiyu ñá túú-gá cuèchi-xi ndècu ío váha ndècú-yu núú-gá.

¹² Te núu dicó ío ñáiyu quide nchaandi tühú nàcuáa ní cáháⁿ ndíi Moisés ñá, te ñá túú xini ñuhu-xi quendáá iní-yu tachu Xitohó Jesucristú, chí núú tütú Yá Ndiòxí càchí-xi sá núu dicó ío ñáiyu ndacu cada ncha nàcuáa ní cáháⁿ ndíi Moisés ñá, te cundecu váha-yu núú Yá Ndiòxí.

¹³ Te tnúhu ní chídó tnùní ndíi Moisés càchí-xi sá ío ndècu cuèchi-o núú Yá Ndiòxí cuendá sá ñá ndácú-ó càda-o ncha nacuáa ní cáháⁿ ndíi, te cuendá xíáⁿ tá dañá nihnu ñaha-gá xii-o cuáháⁿ. Dico Xitohó Jesucristú ní xido-gá ncha cuèchi-o cuendá sá vá dañá nihnu ñaha-gá Yá Ndiòxí xii-o. Te càchí-xi núú tütú Yá Ndiòxí: “Íⁿ téé na càta caa-güedé íⁿ yutnu, te téé-áⁿ cúú-dé téé dañá nihnu ñaha Yá Ndiòxí”, duha càchí-xi núú tütú-gá.

¹⁴ Te ducaⁿ ní yáha Xitohó Jesucristú, chí cuiní Yá Ndiòxí sá ndùu táhú ncha ñáiyu ñá túú cùu ñáiyu israhèl cundecu váha-yu dàtná ní nduu táhú ndíi Àbrahám ndécú váha ndíi. Te ducaⁿ ní yáha-gá cuendá ncha nchoo ñáiyu sàndáá iní ñáhá xii-gá ngúndecu ndihi-o Espiritú Yá Ndiòxí sá ní cachí mée-gá taxi-gá.

Nàcuáa ní cachí Yá Ndiòxí cada-gá

¹⁵ Te nchòhó cue ñáiyu ndècu ndihi-í ichi Yá Ndiòxí na càchí tnúhu-í xii-ndo nàcuáa quide cue ñáiyu ñuyúú-a cuendá tecu tnùní-gá-ndó nàcuáa quide Yá Ndiòxí. Chí ñáiyu-áⁿ òré cuiní-yu cadá-yu íⁿ sá cadá-yu, te díhna-gá ndátnúhu-yu te òré cúú íⁿnuú-yu, te sáha firmá-yu íⁿ tutú te tutú-áⁿ vá yòo íⁿ ndacu cáháⁿ sá vá nándíhi-gá-xi, te ní vá yòo-gá ndacu nágá tnúhu chido tnùní núú-xi.

¹⁶ Te ducaⁿ ní quide Yá Ndiòxí ndíi ndíi Àbrahám, chí ní xáhaⁿ-gá xii ndíi nàcuáa cada-gá, te tnúhu-áⁿ cúú-xí cuendá mée ndíi ndíi cuendá íⁿ ñani tnáhá ndíi cundecu ñuyúú-a ndéé cuèé-gá. Te núú tütú-gá càchí-xi sá tnúhu-áⁿ cúú-xí cuendá íⁿ-ní ñani tnáhá ndíi te ñá díú cuendá nchaá-yu. Te ñani tnáhá ndíi téé cùu cuendá tnúhu-áⁿ cúú Xitohó Jesucristú.

¹⁷ Te na càchí tnúhu-í xii-ndo sá Yá Ndiòxí ní quide ndáá duuⁿ-gá ndíi ndíi Àbrahám nàcuáa cada-gá. Te sa ní cuu cúmí cièndú ócú úxí cuá sá dúcáⁿ ní xáhaⁿ Yá Ndiòxí xii ndíi Àbrahám, te dàtnùní ní xáhaⁿ-gá xii ndíi

Moisés chido tnùní ndíi nàcuáa cada ñáiyu, te ncha tnúhu ní chídó tnùní ndíi Moisés ñá túú dàquee tühú-xi tnúhu sá ní xáhaⁿ Yá Ndiòxí xii ndíi Àbrahám nàcuáa cada-gá.

¹⁸ Te núu dicó cuendá ncha tnúhu sá ní chídó tnùní ndíi Moisés ní náníhí tànhú-ó ñá, te ñá túú-gá xini ñuhu-xi cada cuendá-ó tnúhu ní xáhaⁿ Yá Ndiòxí xii ndíi Àbrahám cada-gá ní cùu te núu ducaⁿ. Te ndíi-áⁿ ní naníhí tànhú ndíi chí ducaⁿ ní cachí Yá Ndiòxí cada ñaha-gá xii ndíi.

¹⁹ Te ncha tnúhu ní cáháⁿ ndíi Moisés ní ngódó núú-xí nchicúⁿ nihnu ñáiyu cuendá ducaⁿ cùtnuní iní-yu sá ndécú cuèchi-yu, te nchicúⁿ nihnu-ní-yu ndéé ní sáá nduu ní quexio Yáá cúú ñani tnáhá ndíi Àbrahám, chí Yáá-áⁿ ducaⁿ ní xáhaⁿ Yá Ndiòxí quixi-gá cada váha-gá ncha ñáiyu. Te ncha tnúhu ní chídó tnùní ndíi Moisés, chí Yá Ndiòxí ní tendaha-gá cue espíritú xínú cuèchi núú-gá ní sáháⁿ-xí ní xítnúhu ñaha-xi xii ndíi nàcuáa danèhé ndíi ñáiyu.

²⁰ Te Yá Ndiòxí ñá túú ní cáháⁿ-gá núú mée ñáiyu, chí ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndíi-gá ndíi Àbrahám chí núú mée núú íⁿ ndíi ndíi-gá ní xáhaⁿ-gá xii ndíi nàcuáa cada-gá.

Nàcuáa ndíi ncha tnúhu ní chídó tnùní ndíi Moisés

²¹ Te ncha nàcuáa ní chídó tnùní ndíi Moisés, ndíi ncha nàcuáa ní xáhaⁿ Yá Ndiòxí xii ndíi Àbrahám cada-gá, ñá túú dàquee tühú tnáhá-xí. Te núu dicó naníhí tànhú ñáiyu nchicúⁿ nihnu ncha nàcuáa ní cáháⁿ ndíi Moisés ñá te cudíu-yu núú-gá cuendá-ní sá nchicúⁿ nihnú-yu ncha nàcuáa ní cáháⁿ ndíi ní cùu.

²² Te núú tütú Yá Ndiòxí càchí-xi: “Ncha nchòhó ñáiyu ndècu ñuyúú ndécú cuèchi-ndo”, duha càchí-xi. Te ducaⁿ cáháⁿ-xí cuendá quíndáa iní-ó Xitohó Jesucristú, te naníhí tànhú-ó chí ducaⁿ ní cachí Yá Ndiòxí cada-gá.

²³ Te cùtnáhá vátá cùndècu ndíi-gá-ó tnúhu Xitohó Jesucristú, te nchicúⁿ nihnu-o ncháa nacuáa ní cáháⁿ ndíi Moisés, te ní cùtnùní iní-ó sá ío ndècu cuèchi-o ní cùu. Te ducaⁿ-ní nchicúⁿ nihnu-o ndéé ní sáá nduu ní quexio Xitohó Jesucristú ñuyúú-a, te ní sàndáa iní-ó-gá.

²⁴ Te ncha tnúhu sá ní chídó tnùní ndíi Moisés ní sanu ichi ñaha-xi xii-o nacuáa cada-o cundecu-o, te ducaⁿ-ní sanu ichi ñaha-xi xii-o ndéé ní sáá nduu ní quexio Xitohó Jesucristú ñuyúú-a. Te ducaⁿ ní cuu cuendá quíndáa iní-ó-gá, te vá cùndècu-gá cuèchi-o núú Yá Ndiòxí.

²⁵ Te vitna ní ngúndecu ndíi-o tnúhu Xitohó Jesucristú, te ñá túú-gá xini ñuhu-xi

canu ichi ñaha nchaa tnúhu ní chídó tnùnì ndii Moisés.

²⁶ Te vitna tnàhá nchaa nchòhò cùu-ndó dèhe Yá Ndiòxí, chi ní sándáá iní-ndó Xitohó Jesucristú.

²⁷ Te nchòhò ní sandute-ndo dàtná cächí-gá, te ndècu-ndo ndihi-gá, te quide-ndo nchaa nacuaá ní cáháⁿ-gá ndécú-ndó, te ío ndècu yiñuhu-ndo núú Yá Ndiòxí dàtná ndécú yiñuhu mee Xitohó Jesucristú.

²⁸ Te vitna ìⁿ-ní cùu-o nchaa-o ndecu-o ndihi Xitohó Jesucristú cuèi cùu-o ñáyiú is-ràel àdi ñá túú cùu-o, te cuèi cùu-o ñáyiú ñá túú tnàhí dàhá quee núú chíúⁿ patróóⁿ-xi àdi cuu-o ñáyiú dàhá queé núú chíúⁿ patróóⁿ-xi, te cuèi tée te cuèi ñadihí ìⁿ-ní cùu-o nchaa-o ndecu-o ndihi Xitohó Jesucristú.

²⁹ Te nchòhò ndécú ndihi-ndo Xitohó Jesucristú, te cùu-ndo dàtná cue ñani tnàhá ndii Ábrahám, chi ní nduu táhú-ndó cùndecu váha-ndo núú Yá Ndiòxí dàtná ní nduu táhú ndi-áⁿ ndécú váha ndii núú-gá, te ducaⁿ chi mee-gá ducaⁿ ní cachí-gá cunduu.

4

¹ Te nchòhò xini-ndó sá ìⁿ té líhli chi vátá nágá cuañaha tátá-dè cuu cuendá-dé chi líhli-dé, te ìⁿ-ní cùu-dé ndihi téé xinu cuechi, dico na sáá nduu cuèhu-dé, te nduu táhú-dè nchaa sá ndécú ndihi tátá-dé.

² Te xitò-yu té líhli-áⁿ sáhnú-dé ndéé sáá nduu ní cachí tátá-dé sá cuañaha-dé sá ndúú táhú-dé.

³ Te ducaⁿ sátnahá-xi cùu nchoo, chi nchicúⁿ nihnu-o nchaa nacuaá ní cáháⁿ cue téé ní xindecu ndéé sanaha ní cùu.

⁴ Te ní sáá nduu ní quide Yá Ndiòxí dàtná ní cachí-gá, te ní tendaha-gá Déhe-gá Xitohó Jesucristú ní quixi-gá ñuyúyú-a, ní dácacú ñaha ìⁿ ñadihí te ní cuu-gá ñáyiú, te ní quide-gá nchaa nacuaá ní cáháⁿ ndii Moisés.

⁵ Te ducaⁿ ní tendaha Yá Ndiòxí Déhe-gá cuendá sá vá cánchezúⁿ nihnu-gá-ó nchaa nacuaá ní chídó tnùnì ndii Moisés cuendá ducaⁿ te cuu-o dèhe Yá Ndiòxí.

⁶ Te Yá Ndiòxí ní taxi-gá Espiritú Déhe-gá Xitohó Jesucristú ndécú ndihi-ndo chi cùu-ndo dèhe-gá, te Espiritú-áⁿ chindèe ñaha-xi xii-ndo te cächí-ndó: “Yòhó Dútú Ndiòxí cùu-n Tátá méé-ndí”, duha cächí-ndó.

⁷ Te xiáⁿ cùtnùnì iní-ndó sá cùú-ndó dèhe Yá Ndiòxí vitna, te ñá túú-gá cùú-ndó dàtná cue ñáyiú ñá túú tnàhí dàhá quee núú chíúⁿ patróóⁿ-xi. Te sá dúcáⁿ cùu-ndo dèhe-gá, te Xitohó Jesucristú taxi-gá nchaa sá váha ní cachí Yá Ndiòxí nduu táhú-ndó.

Te Páblú ío sàni iní-dé cuendá nchaa ñáyiú ndècu ichi Xitohó Jesucristú

⁸ Te cùtnàhá vátá quindáá-gá iní-ndó tnúhu Yá Ndiòxí ní xinu cuechi-ndo núú nchaa sá cächí-yu cùu ndiòxí te ñá ndáá sá ndiòxí cùú-xí.

⁹ Te vitna nchòhò càháⁿ ndihi-ndo Yá Ndiòxí, te mee-gá xini ñahá-gá xii-ndo, te ñá túú nduu váha-xi nanchòcáva iní-ndó càda tucu-ndo nacuaá ní xóo cada-ndo díhna, chi nchaa xiáⁿ ñá túú vèdana nàndíhi-xi.

¹⁰ Te nchòhò cànehe íi-ni-ndo nduu cachí-ndó íi, te ñu-ni ducaⁿ quide-ndo dava yóo ndihi dava cuáí, te ndi tnahá nduu sàcáo vico ñu-ni ducaⁿ quide-ndo cànehe íi-ndo nduu-áⁿ.

¹¹ Te ío sàni iní-í cuendá-ndó, chi na cuáháⁿ àúⁿ ná cuu ní dánèhé ñahá-í xii-ndo tnúhu Yá Ndiòxí.

¹² Te càháⁿ ndàhú-í núú nchòhò ñáyiú ndècu ndihi-í ichi Xitohó Jesucristú sá cáda-ndó dàtná quidè-í ñá túú nchicúⁿ nihnu-í nchaa tnúhu ní cáháⁿ ndii Moisés, chi yúhú quidè-í vitna dàtná ní quide nchòhò ñá túú ní cánchezúⁿ nihnu-ndo nacuaá ní cáháⁿ ndii. Te cùtnàhá ní xindecu ndihi ñaha-í xii-ndo ní quide váha ñaha-ndo xii-í.

¹³ Te sa ñaha-ndo sá cùtnàhá ní cáháⁿ-í tnúhu Xitohó Jesucristú núú-ndó ndéé díhna ní cuhú-í, núú xiáⁿ ní xindecu ndihi ñaha-í xii-ndo ní cáháⁿ-í tnúhu-gá núú-ndó.

¹⁴ Te cuéhé sá ní tnahá-í-áⁿ cùú-xí ìⁿ cuéhé sá vá yóo tnàhí cundee iní-xi cundecu ndihi ñaha xii-í ní cùu, dico nchòhò chi ío váha ní cáháⁿ ndihi ñaha-ndo xii-í, te ñá túú ní sàni cuéhé ní sàni duha iní-ndó cuendá-í, te ní cáháⁿ ndihi ñaha-ndo xii-í dàtná tnúhu sá yúhú cùú-í ìⁿ espíritú xínú cuèchi núú Yá Ndiòxí àdi dàtná méé Xitohó Jesucristú.

¹⁵ ¿Te ná ní tnahá-ndo núú ñá túú-gá sání váha iní-ndó cuendá-í dàtná ní xóo cada-ndo ndéé díhna ío váha ní xóo cani iní-ndó cuendá-í? Te na cächí tnúhu ndáá-í xii-ndo sá ío ní cuu iní ñahá-ndó xii-í cùtnàhá ní xindecu ndihi ñaha-í xii-ndo, te nándi sá ndécú ndihi-ndo taxi-ndo xii-í ní cùu, te núú dícó sá cùú te ndéé tinuu-ndo tava-ndo te taxi-ndo xii-í ní cùu.

¹⁶ ¿Te náa cùu úhú iní ñahá-ndó xii-í vitna cuendá sá càháⁿ-í tnúhu ndáá tnúhu Yá Ndiòxí núú-ndó-áⁿ?

¹⁷ Te ío ñáyiú ío váha càháⁿ ndihi ñaha xii-ndo, dico ñáyiú-áⁿ ñúhú cuéhé iní-yu, chi cuíní-yu sá vá cùú-gá càháⁿ ndihi tnàha-o, chi mee-ná-yu cundecu ndihi-ndo cuíní-yu.

¹⁸ Te váha quide ñáyiú càháⁿ ndihi ñaha xii-ndo ndihi tnúhu yiñuhu, te núu cuíní-yu cadá-yu ìⁿ sá váha sá cùú-xí-ndó. Te ducaⁿ-ní na càda-yu cuèi òré ñá túú ndècu ndihi ñaha-í xii-ndo.

¹⁹ Te nchòhò ñáyiú ní sanu ichi-í ichi Xitohó Jesucristú cächí tnúhu-í xii-ndo sá

quidé-xí iní-í dàtná quidé-xí iní ì# ñàdìhí ñaha sa ní tnahá òré cacu dèhe-xi, te ducaⁿ quide-xi iní-í, chi ío vài sani iní-í cuèndá-ndó dàtná ní xóo cada-í ndéé dīhna, te ducaⁿ-ni cada-í ndéé ná sàà nduu cada-ndo nchaa nacuaá càháⁿ Xítohó Jesucristú.

²⁰ Te ío váha cada-xi te núu dīcò tnavíi sa ndècu ndìhí ñaha-í xii-ndo cuèndá càháⁿ-í núú-ndó nàcuáa cada-ndo, te ñá cútñuní iní-í nása cada-í cuèndá-ndó!

Cuèndá ndíi Àgár ndìhí ndíi Sàrá

²¹ Te nchòhó ñáyiu cuiní canchicúⁿ nihnu nchaa tnúhu ní càháⁿ ndíi Moisés, ñáa ñá túú tècú tnùn-í-ndó nàcuáa càháⁿ-xi tnúhu ní chídó tnùn-í ndíi?

²² Chì cächí tnúhu ní chídó tnùn-í ndíi-án sà ndíi Àbrahám ní xīndecu úú dèhe ducuⁿ ndíi, te ì#-dé ní cuu dèhe ndíi ndìhí ñàdìhí mée ndíi ndíi Sàrá, te ìngá-dé ní cuu-dé dèhe ndíi ndìhí ì# ndíi ní xīnu cuechi nū-yu ní xīnani Àgár.

²³ Te sà dúcáⁿ ní cacu dèhe ndíi Sàrá, chi mee Yá Ndiòxí ní cundàhú iní ñáhá-gá xii-aⁿ, chi ducaⁿ ní cächí-gá cada-gá. Dico ndíi ní xīnu cuechi-án chi ducaⁿ tnahí ní nduu táhú ndíi-án sà cóo dèhe ndíi.

²⁴ Te na cächí tnúhu-í xii-ndo ná cúú sà nánèhé ndí ndúu cue ndíi dīhí-án. Te úú xito ní càháⁿ Yá Ndiòxí nàcuáa cada-gá, te ì# ndíi-án nánèhé ndíi nàcuáa ní càháⁿ Yá Ndiòxí xito dīhna nuu, te ìngá tucu ndíi-án nánèhé ndíi nàcuáa ní càháⁿ tucu-gá xito cúu úú. Te ndíi Àgár-án nánèhé ndíi nàcuáa ní xáhaⁿ Yá Ndiòxí xii ndíi Moisés yucu Sinài cada ñáyiu, te nchaa ñáyiu nchicúⁿ nihnu nchaa tnúhu-án cúu-yu dàtná dèhe ndíi Àgár téé ní xīnu cuechi, chi téé-án ñá túú tnahí ní dàñá-dé quee-dé núú chíúⁿ pàtróóⁿ-dè, te ducaⁿ sàtnahá-xi cúu-yu chi nchicúⁿ nihnú-yu nchaa nàcuáa ní xáhaⁿ Yá Ndiòxí xii ndíi Moisés.

²⁵ Te tnúhu Àgár quée-xi: Yucu Sinài, te yucu-án yíndèhu-xi nacióⁿ Àrabíá. Te ndíi Àgár-án nánèhé tucu ndíi cue ñáyiu ndècu ñúu Jerusalén, chi ñáyiu-án ndécú-ni-yu dàtná ní xīndecu ndíi Àgár ndìhí dèhe ndíi, chi cue ndíi-án ní cuu cue ndíi ñáyiu ñá túú tnahí ní dàñá quee núú chíúⁿ pàtróóⁿ-xi, te ducaⁿ sàtnahá-xi cúu ñáyiu-án chi nchicúⁿ nihnu-ni-yu nchaa nàcuáa ní càháⁿ ndíi Moisés.

²⁶ Dico nchoo ní nduu táhú-ó cūndecu-o ñúu Jerusalén sáá nūu ndécú Yá Ndiòxí, te vitna chi ñá túú-gá nchicúⁿ nihnu-o nchaa nacuaá ní càháⁿ ndíi Moisés.

²⁷ Te duha càháⁿ-í, chi núú tütú Yá Ndiòxí cächí-xi:

Yòhó ñaha ní nduu táhú vā cóo dèhe-xi ní cúu, vitna cana saa-n sà cūdīi

iní-n cuèi vátá quini-gá-n nása càcu ì# landú.

Te cuèi ní cuu táhú-n sà vā cóo dèhe-n ni cúu dico ío-gá titní dèhe-n cóo dacúúxi xīchí ní cuu táhú tnahí sà cóo dèhe-xi.

Duha cächí-xi núú tütú-gá.

²⁸ Te nchoo cuè ñáyiu ndècu ichi Xítohó Jesucristú vitna cúu-o datná ndíi Isàác, chi ndíi-án ní cacu ndíi, chi mee Yá Ndiòxí ní cächí-gá sà cacú ndíi. Te ducaⁿ sàtnahá-xi cúu nchoo chi ní nduu-o dèhe-gá vitna chi ducaⁿ ní cächí tucu-gá cunduu.

²⁹ Te dèhe ndíi Àgár ní nduu táhú tnahí ndíi sà cacú ndíi ñuyú-a, te ndíi-án ní cuu úhú iní ndíi ndíi Isàác, te ndíi Isàác-án chi Espiritú Yá Ndiòxí ní quide ní cacu ndíi. Te ducaⁿ sàtnahá-xi cúu vitna, chi nchaa nchoo ñáyiu ndècu ndìhí Espiritú Yá Ndiòxí cúú ùhú iní ñáhá ñáyiu xii-o.

³⁰ Te núú tütú Yá Ndiòxí cächí-xi: “Chí nàcúúⁿ xīchí xīnú cuèchi ndìhí dèhe-xi na nùhú-yu, chi dèhe xīchí xīnú cuèchi-án ñá túú ná níhí-dè nduu táhú-dè, chi mee-ni dèhe ñaha ndècu vehe-xi nduu táhú-dè sà cuáñaha tātá-dè”, duha cächí-xi núú tütú-gá.

³¹ Te nchoo cuè ñáyiu ndècu ichi Xítohó Jesucristú ñá túú-gá cúú-ó dàtná cúú dèhe ndíi ní xīnu cuechi-án, chi ní cuu-o vitna datná cúú ndíi ní nduu táhú nchaa sà ní sáñaha tātá-xi-án. Te ducaⁿ ní cuu, chi Yá Ndiòxí ní dácúu ñaha-gá xii-o cuèndá sà vā cānchicúⁿ nihnu-gá-ó nchaa nacuaá ní càháⁿ ndíi Moisés.

5

Canchicúⁿ nihnu-ni-o ichi Xítohó Jesucristú

¹ Te Xítohó Jesucristú ní quide-gá nàcuáa vā cāni iní-ó sà nānìhí tǎhú-ó te núu na cānchicúⁿ nihnu-o nàcuáa ní càháⁿ ndíi Moisés, te ñu-ni ducaⁿ cāni iní-ó cūndecu-o te vā ngōo cāni iní-ó sà nānìhí tǎhú-ó te núu na cānchicúⁿ nihnu-o càda-o nacuaá ní càháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cūtnahá vátá cūndecu-gá-ó ichi-a.

² Te yúhú té Pāblú cuiní-í sà cūndedòho-ndo ì# tnúhu na càháⁿ-í-a. Te núu nchòhó cuáho-ndo seña ñii-ndo cuèndá sà sàndáá iní-ndó nàcuáa ní cächí ndíi Moisés cada-ndo, te núu ducaⁿ na càda-ndo ña, te áúⁿ ná cuu ndècu-ndo ichi Xítohó Jesucristú te núu ducaⁿ.

³ Te dàtná ní cächí-í xii-ndo, te ñu-ni ducaⁿ càháⁿ tucu-í vitna sà núu ndèda-ni cāa ì# té na cuáha-dé seña ñii-dé, te xīni ñuhu-xi sà dācutití tǎu-dé cada-dé nchaa nacuaá ní càháⁿ ndíi Moisés.

⁴ Te nchaa nchòhó ñáyiu sàni iní sà ñá túú-gá cuèchi-xi ndècu núú Yá Ndiòxí cuèndá sà nchicúⁿ nihnu-ndo nchaa nacuaá

ní cáháⁿ ndíi Moisés, ñá túú-gã ndécú-ndo ndíhi Xítohó Jesucristú, te ni Yá Ndióxi ñá túú-gã cùndáhú iní ñáhá-gã xii-ndo càda váha ñaha-gã.

⁵ Dico nchaa nchoo ñáyiú sàndáá iní ñáhá xii-gá cùdiu-o núú-gã, chi chindee ñaha Espiritú-gá xii-o, te ndetu cahnu-ná-ó sàá nduu cùñaha núú Yá Ndióxi xii-o sã cùdiu-o núú-gã.

⁶ Te nchoo cuè ñáyiú ndècu ndíhi Xítohó Jesucristú ñⁿ-ni quide-xi cuéi na cuãha-o sèñá ñii-o àdi vá cuãha-o, chi ñá túú chindee ñaha-xi xii-o nacuaá cundecu váha-o ndíhi-gã. Te ñⁿdií díí-ni sã xini ñùhu-xi quindáá iní-ó Xítohó Jesucristú, te núu ducaⁿ na càda-o te cuu iní-ó cuè tñaha ñáyiú-o.

⁷ Te nchòhó ío váha quide-ndo ndecu-ndo ichi Yá Ndióxi ní cùu, te vitna cùñúhu-í sã ñá túú-gã sàndáá váha iní-ndo tñùhu-gã, te ducaⁿ quide-ndo chi ndècu ñáyiú sànu ichi ñaha xii-ndo ingá ichi.

⁸ Te ñá díú Yá Ndióxi Yáá ní cáháⁿ ñáhá xii-ndo ducaⁿ ni cachí-gã cada-ndo sã vá quindáá-gã iní-ndo tñùhu-gã.

⁹ Te nchòhó xini-ndo sã núu luha lev-adurá ná quíhu yuchi te dàndaa-xi. Ducaⁿ sãtnahá-xi cùu ñáyiú dàndahú ñáhá xii-ndo, chi cuiní-yu dàcuíta nihnu ñáhá-yu xii-ndo nchaa-ndo.

¹⁰ Te yúhú cùtnùní ndáá iní-í sã Xítohó Jesucristú chindee ñaha-gã xii-ndo cuendá sã ñá túú nãgã tñùhu quindáá iní-ndo, dico nchaa ñáyiú ducaⁿ dàndahú ñáhá xii-ndo nacháhu-yu núú Yá Ndióxi nchaa sã quidè-yu cuéi nái-gã ñáyiú cùu-yu.

¹¹ Te cachí tñùhu-í xii nchòhó ñáyiú ndècu ndíhi-í ichi Yá Ndióxi sã núu dicó dànehé-ni-í ñáyiú sã cuãha-yu sèñá ñii-yu dàtná ní cachí ndíi Moisés ñá, te vá yòo cuu úhú iní ñáhá xii-í ní cùu, te ni vá túú úhú iní-yu cuendá sã ní xihí Xítohó Jesucristú núú cùrúxi ní cùu.

¹² Te nchaa ñáyiú dàsatú iní ñáhá xii-ndo sã cuãha-ndo sèñá ñii-ndo, te váha-gã sã ná cáda-yu mèe-yu ñⁿ tñúndòho, te ñá díú sã dúcáⁿ cànuichi ñáhá-yu xii-ndo cundecu-ndo.

¹³ Te nchòhó ñáyiú ndècu ndíhi-í ichi Xítohó Jesucristú díu-gã ní taunihnu ñaha-gã xii-ndo cuendá sã vá cànchicúⁿ nihnu-gã-ndo nchaa nacuaá ní cáháⁿ ndíi Moisés, dico vá cání iní-ndo sã sã dúcáⁿ ní taunihnu ñaha-gã xii-ndo, te cuu-ni cada-ndo nándi sã cuèhé sã dúhá vèxi iní-ndo, dico cuu iní tñáhá-ndo ñⁿ ñⁿ-ndo te chindee tñaha-ndo.

¹⁴ Chi ducaⁿ cáháⁿ Yá Ndióxi sã cùu iní-ó cuè tñaha ñáyiú dàtná cùu iní-ó mèe-o. Te núu ducaⁿ na càda-o, te quide-o nchaa nacuaá tàù-xi cada-o dàtná cáháⁿ nchaa tñùhu ní chidó tñùní ndíi Moisés.

¹⁵ Te núu nchòhó cùu úhú iní tñáhá-ndo ndècu-ndo, te ñá túú quide váha-ndo te núu

ducaⁿ quide-ndo, dico yúhú càchí-í sã vá dúcáⁿ-gã cada-ndo cundecu-ndo cuendá sã vá dàcuíta nihnu tñaha-ndo.

Nacuáa sàni iní ñáyiú ndècu ichi cuèhé ichi duha ndíhi nacuaá sàni iní ñáyiú ndècu ndíhi Espiritú Yá Ndióxi

¹⁶ Te na càchí tñùhu-í xii-ndo sã cáda-ndo nchaa nacuaá cuiní mèe Espiritú Yá Ndióxi cada-ndo, te ducaⁿ te vá cání-gã iní-ndo càda-ndo nándi nchaa sã cuèhé sã dúhá sàni iní mèe-ndo.

¹⁷ Chi nchaa xiáⁿ ñá túú tñáhá tñùhu-xi ndíhi Espiritú Yá Ndióxi. Te díu-ni ducaⁿ quide Espiritú Yá Ndióxi, chi ñá túú tñáhá iní-xi nchaa sã cuèhé sã dúhá sàni iní-ndo. Te sã dúcáⁿ ñá túú tñáhá tñùhu tñaha-xi xiáⁿ ñá túú nihí ndéé-ndo càda-ndo ñⁿ sã váha sàni iní-ndo càda-ndo.

¹⁸ Te núu quide-ndo nchaa nacuaá sànu ichi ñaha Espiritú Yá Ndióxi, te ñá túú-gã táxi tñùní ñáhá nchaa tñùhu ní chidó tñùní ndíi Moisés xii-ndo.

¹⁹ Te nchaa ñáyiú xini-yu nchaa nacuaá quide ñáyiú quide cuèhé quidè dúha. Te duha quidè-yu: Cue tée cáháⁿ ndíhi-güedé ñáyiú díhi te ñá díú ñàdihí-güedé cùu-yu, te díu-ni ducaⁿ xiquide cue ñáyiú díhi, te nándi-gã nchaa sã cuèhé sã dúhá cuãháⁿ véxi-yu quidè-yu.

²⁰ Te quide cahnú-yu nchaa sã càchí-yu cùu ndiòxi te ñá ndáá sã ndiòxi cùu-xí, te quide nduu tñahá-yu, te cùu úhú iní tñáhá-yu, te nàá-yu, te cùu cuiní tñáhá-yu, te ío yáchí cüdèⁿ-yu, te ndúcú-yu mee-ni sã cùu-xí mèe-yu, te ñá túú cùu ñⁿnuú-yu cundecú-yu, te quide ñⁿ tñahá-yu.

²¹ Te cùu cuedú iní-yu nchaa sã ndécú ndíhi dava-gá-yu, te sàhni tñahá-yu, te ío quihú-yu, te ndi cuu ndi cùu-yu quidè-yu nchaa sã cuèhé sã dúhá, te nándi-gã nchaa sã cuèhé sã dúhá quidè-yu. Te sa càchí tñùhu-í xii-ndo sã ncháá ñáyiú ducaⁿ xiquide vá ndúú tñhú-yu cundecú-yu núú ndécú Yá Ndióxi táxi tñùní-gã.

²² Dico Espiritú Yá Ndióxi chindèe ñaha-xi xii-o cuu iní tñáhá-ó, te cùdíí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tñáhá-ó, te quide ndáá-ó ndècu-o.

²³ Te ndàhú iní-ó, te quide-o nchaa nacuaá tàù-ó càda-o, te nchaa xiáⁿ chindèe ñaha Espiritú Yá Ndióxi quidè-ó, te núu ducaⁿ quide-o, te vá yòo ñⁿ-gã cáháⁿ sã ñá túú quide váha-o ndècu-o.

²⁴ Te nchoo cuè ñáyiú ndècu ndíhi Xítohó Jesucristú, sa ñaha-o sã ní xihí-gã núú cùrúxi sã cuendá-ó, núu xiáⁿ duuⁿ duuⁿ ní dáñá-ó nchaa ichi cuèhé ichi duha, te ñá túú-gã táxi tñùní ñáhá ní ñⁿ sã cuèhé sã dúhá sã ní xóo caní iní-ó ní cùu.

²⁵ Te vitna ní ngúndecu ndihi-o Espíritú Yá Ndióxi chindée ñaha-xi, te xini ñuhu-xi sá cádá-ó nàcuáa sànu ichi ñaha Espíritú-gá cada-o.

²⁶ Te vá cádá cahnú-o mee-o, te vá ndúcú-ó plètú, te ni vá cúú cuèdú iní-ó sá ndécú ndihi tnaha ñáiyu-o.

6

Chindee tnàha-o ìñ ìñ-o

¹ Te nchòhó ñáiyu ndècu ndihi-í ichi Xítóhó Jesucristú cachi tnúhu-í xii-ndo sá núu ìñ ñáiyu ndècu ndihi-ndo ichi-gá ní quidé-yu ìñ sá ñà túú tàù-yu cada-yu núú-gá, te nchòhó ñáiyu quide váha ndècu ndihi Espíritú Yá Ndióxi cáháⁿ-ndó dôho cue ñáiyu ducaⁿ xiquide-áⁿ cuendá nucúnu ichi-yu, te vii vii cáháⁿ ndihi-ndó-yu, te ío coto-ndo mée-ndo cuendá sá vá cádá-ndó ìñ sá ñà túú tàù-ndó cáda-ndo núú-gá.

² Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sá yáha-ndo. Te núu ducaⁿ na cáda-ndo, te quide-ndo nchaa nacuaá ní cáháⁿ Xítóhó Jesucristú cada-o.

³ Te núu ío ìñ-ndo cachi-ndó sá ío váha quide-ndo ndecu-ndo ichi Yá Ndióxi te ñá ndáá ñá, te dicó dándahú-ndó mée-ndo sá dúcáⁿ quide-ndo.

⁴ Te ndi dñⁿ ndi dñⁿ càda cuendá-ndó núu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí iní-ndó sá cúú-xí mée-ndo, te vá cáni iní-ndó sá quide váha-gá-ndó dàcúúxi dàva-gá-yu.

⁵ Chi tàù-ó sá ndi dñⁿ ndi dñⁿ càda cuendá-ó nàcuáa ndècu-o.

⁶ Te nchaa nchòhó ñáiyu dàcuaha tnúhu Yá Ndióxi chindee-ndo cuè tée dàcuaha ñaha xii-ndo tnúhu-gá cuáñaha-ndo nãndi sá xini ñuhu-güedé.

⁷ Te vá dándahú-ndó mée-ndo cundecu-ndo, chi vá cúú cùdiquí ndeé-ó Yá Ndióxi, chi nchòhó xini-ndó sá núu na càda váha-o cundecu-o, te cùu-xi ìñ sá váha sá cúú-xí-ó, dico núu vá cádá váha-o ña, te ío ndoho-o te núu ducaⁿ na cáda-o.

⁸ Te núu quide-o nchaa sá cuèhé sá dúhá sàni iní-ó, te ñu-ni xíáⁿ dàcuíta nihnu ñaha-xi xii-o, dico núu quide-o nchaa nacuaá sànu ichi ñaha Espíritú Yá Ndióxi xii-o, te cundecu ndihi-o Yá Ndióxi ni caa ni quíhíⁿ.

⁹ Te xini ñuhu-xi vá dáñá ndèé-ó càda váha-o cundecu-o, te ducaⁿ te sáá nduu càda váha ñaha Yá Ndióxi xii-o, te núu vá ná tñhú iní-ó càda váha-o cundecu-o.

¹⁰ Te cada-o sá váha sá cúú-xí nchaa tnaha ñáiyu-o vitna ndecu-o ñuyíú-a, te ío-gá tàù-ó chindee-o cue ñáiyu ndècu ndihi-o ichi Xítóhó Jesucristú.

Tnúhu ndéé núú ní ndihi-ná

¹¹ Te cundehe-ndo sá ndaa ndaa lètrá tée-í núú tütú-a sá cúú-xí-ndó.

¹² Te nchaa ñáiyu quide yicá sá cuáha-ndo sèñá ññ-ndo dàtná ní cachí ndíi Moisés, ñáiyu-áⁿ cúú-yu ñáiyu cuiní cudíu núú tnàha ñáiyu-xi. Te ducaⁿ quidé-yu cuendá sá vá ndòhó-yu cuendá nchaa tnúhu sá dánèhé ñáhá sá ní xihí Xítóhó Jesucristú núú cùrúxi.

¹³ Te ni ñáiyu sa ní ngúndecu ndihi sèñá ññ-xi ñá túú quidé-yu nchaa nàcuáa ní cáháⁿ ndíi Moisés, dico mée-yu cuiní-yu sá cuáha-ndo sèñá ññ-ndo. Te ducaⁿ quidé-yu chi quide cahnú-yu mée-yu núú nchaa dava-gá ñáiyu.

¹⁴ Te yúhu chi ñá túú quide cahnú-í mée-í cuendá nchaa sá quidé-í, chi mee-ni sá ío cùu váha iní-í sá Xítóhó Jesucristú ní xihí-gá núú cùrúxi cuendá-ó. Te ñu cuendá sá ní xihí-gá ñá túú-gá ndécú-í ichi cuèhé ichi duha, te ni ñà túú-gá táxi tñuní ñáhá ní ìñ sá cuèhé sá dúhá xii-í.

¹⁵ Te ñá túú ná chindée ñaha-xi xii-o cuéi na cuáha-o sèñá ññ-o àdi vá cuáha-o, chi ndècu ndihi-o Xítóhó Jesucristú, te ní nduu-o dàtná ìñ ñáiyu saa, te xíáⁿ cúú-xí sá ío-gá xini ñuhu-xi.

¹⁶ Te xicáⁿ táhù-í núú Yá Ndióxi sá ncháá nchòhó ñáiyu quide nchaa nacuaá cáháⁿ-í-a cundecu nahí-ndo, nchòhó ñáiyu cùu cuendá Yá Ndióxi dàtná ñáiyu israhél chi ñáiyu-áⁿ ní cachí-gá sá cúú cuendá-gá. Te mee-gá ío cundahú iní ñáhá-gá xii-ndo chindee ñaha-gá.

¹⁷ Te není vitna cuiní-í sá vá yóo ìñ-gá chidácá nihnu ñaha xii-í cuendá chiúⁿ quide-í, chi yayacáⁿ sa ní nduu tñlòhó ññ-í cuendá sá ndòhó-í cuendá Xítóhó Jesucristú.

¹⁸ Te nchòhó ñáiyu ndècu ndihi-í ichi Xítóhó Jesucristú xicáⁿ táhù-í núú-gá sá ío na chindee ñaha-gá xii-ndo nchaa-ndo. Te ducaⁿ na cùndu. Te ío chí cádá ndèe iní-ná vitna.

TUTÚ NÍ CADÚHA TĒ PĀBLÚ QUIHIⁿ NDAHA ÑÁYIU ÑUÚ ÉFESÚ

Té Pāblú cādúha-dé tutú quihiⁿ ndaha ñáyiú xĩndecu ichi Xítóhó Jesucristú ndécú ñúú Éfesú

¹ Yúhú té Pāblú ní tendaha ñaha Yá Ndióxi cáháⁿ-í tnúhu Xítóhó Jesucristú núú ñáyiú, chí ducaⁿ ní cachí Yá Ndióxi cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndióxi xĩndecu ñúú Éfesú, te diu-ni nchòhó cúu-ndó ñáyiú sàndáá iní ñáhá xii Xítóhó Jesucristú.

² Te xicáⁿ táhú-í núú Dütú Ndióxi Yaá cúú Tátá-ó, ndihí núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cundecu-ndo.

Espiritú Yá Ndióxi chĩndee ñaha-xi xii-o chí ndècu ndihí-o Xítóhó Jesucristú

³ Te cachí-ó sá ío càhnu cuu Yá Ndióxi Yaá cúú Tátá Xítóhó Jesucristú, te ndéé andiú quide Yá Ndióxi nchaa sá váha sá cúú-xí-ó cuendá sá ndécú ndihí-o Espiritú-gá, te ducaⁿ quide-gá chí ndècu ndihí-o Xítóhó Jesucristú.

⁴ Te ndéé cùtnàhá vátá ngáva-gá ñáyiú ní cachí Yá Ndióxi sá nchóó cùu-o ñáyiú cùu cuendá-gá, te ducaⁿ ní cachí-gá sá cuendá Xítóhó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gá, te ducaⁿ te vá cundecu cuéchi-o.

⁵ Te Yá Ndióxi ío cùu iní ñáhá-gá xii-o núu xiáⁿ ducaⁿ ní cachí-gá ndéé cùtnàhá vátá ngáva-gá ñáyiú sá nchóó ndúu-o déhe-gá. Te sá cuendá nchaa sá cádá Xítóhó Jesucristú sá cúú-xí-ó, xiáⁿ ducaⁿ ní cachí Yá Ndióxi, te ducaⁿ ní cachí-gá chí ducaⁿ tnàhí ní sani iní-gá cunduu.

⁶ Te xiáⁿ núu xini ñuhu-xi sá nchóó càchí-ó sá ío càhnu cuu Yá Ndióxi, chí ío cundahú iní ñáhá-gá chĩndee ñaha-gá xii-o. Te ducaⁿ quide-gá chí ndècu ndihí-o Xítóhó Jesucristú Yaá ío cùu iní-gá.

⁷ Te Yá Ndióxi ío cùu iní ñáhá-gá xii-o núu xiáⁿ Xítóhó Jesucristú ní sati ñíhí-gá te ní xihí-gá cuendá dacáu nihnu ñaha-gá xii-o núu ùhú núú ndahú, te ducaⁿ càda cahnu iní-gá nchaa yicá cuéchi-o.

⁸ Te Yá Ndióxi ío cundahú iní ñáhá-gá chĩndee ñaha-gá xii-o, nàcuáa ngúndecu ndihí-o nchaa sá xini tnùni-ó te ducaⁿ te cuu-o ñáyiú tècú tnùni.

⁹ Te Yá Ndióxi ní dánèhé ñáhá-gá xii-o nchaa sá ndúú yúhu, nchaa sá ní sani iní-gá

cada-gá. Te ducaⁿ ní quide-gá chí ducaⁿ ní sani iní-gá cunduu.

¹⁰ Te sá ní sani iní-gá cada-gá te dacuití sá cádá-gá ná sáá nduu, te na sáá nduu-áⁿ te mee-gá cada sá Xítóhó Jesucristú quindaha-gá nchaa sá ío andiú, ndihí nchaa sá ío ñuyúú-a.

¹¹ Te nchoo ní nduu táhú-ó ní nduu-o ñáyiú cùu cuendá Yá Ndióxi chí ndècu ndihí-o Xítóhó Jesucristú. Te ducaⁿ ní cuu chí ducaⁿ tnàhí ní sani iní Yá Ndióxi cunduu. Te nchaandi túhú sá quidé-gá, quide-gá nàcuáa sàni iní meé-gá cunduu.

¹² Te ducaⁿ ní cuu cuendá sá nchúhú ñáyiú díhna nuu ní sàndáá iní tnúhu Xítóhó Jesucristú cáháⁿ-ndí sá ío càhnu cuu mee Yá Ndióxi cuendá nchaa sá váha quide-gá.

¹³ Te nchòhó tucu cùtnàhá ní xĩndedóho-ndo tnúhu ndáá tnúhu sá cáháⁿ nàcuáa naníhí táhú-ó ní cuu ñnuu-ndo ndihí Xítóhó Jesucristú chí ní sàndáá iní-ndó-gá. Te xiáⁿ cùtnùni sá nchòhó ní nduu-ndo ñáyiú cùu cuendá Yá Ndióxi, chí ní ngúndecu ndihí-ndo Espiritú-gá sá ní cachí-gá taxi-gá.

¹⁴ Te sá ndécú ndihí-o Espiritú Yá Ndióxi xiáⁿ cùtnùni sá ndáá nduu táhú-ó cundecu-o ndihí-gá ná sáá nduu nàcuaca ñaha-gá xii nchaa nchoo ñáyiú cùu cuendá-gá, te sá dúcáⁿ càda-gá núu xiáⁿ táu-ó càchí-ó sá ío càhnu cuu-gá.

Té Pāblú xicáⁿ táhú-dé núú Yá Ndióxi cuendá cue ñáyiú ndècu ichi-gá

¹⁵ Te yúhú nihí-í tnúhu sá nchòhó ío váha sàndáá iní-ndó Xítóhó Jesucristú, te nchaa ñáyiú cùu cuendá Yá Ndióxi ío cùu iní-ndó-yu.

¹⁶ Te xiáⁿ núu ñá túú dàña ndeé-í ndacáⁿ táhú-í núú-gá cuendá-ndó, te ío xicáⁿ táhú-í

¹⁷ núú Yá Ndióxi Yaá cúú Tátá Xítóhó Jesucristú cuendá-ndó. Te diu-ni Yá Ndióxi cúú-gá Yaá ío càhnu cuu. Te xicáⁿ táhú-í núú Yá Ndióxi sá meé-gá ná cádá sá Espiritú-gá chĩndee ñaha-xi xii-ndo cuendá cuu-ndo ñáyiú tècú tnùni, te na càda-xi sá cùtnùni iní-ndó nàcuáa sàni iní Yá Ndióxi.

¹⁸ Te ducaⁿ xicáⁿ táhú-í núú Yá Ndióxi cuendá-ndó, cuendá sá nchòhó tecú tnùni-ndó nàcuáa nduu tnúhu ndee iní ní taxi-gá ní ngúndecu ndihí-ndo cùtnàhá ní cáháⁿ ñáhá-gá xii-ndo. Te ducaⁿ cùtnùni tucu iní-ndó sá ncháá sá ní cachí-gá taxi-gá nduu táhú nchoo cué ñáyiú cùu cuendá-gá cúú-xí mèe cuii-ni sá ío-gá váha.

¹⁹ Te cùtnùni tucu iní-ndó sá Yá Ndióxi ío càhnu cuu-gá quidé-gá nchaa núú sá váha sá cúú-xí nchóo ñáyiú sàndáá iní ñáhá xii-gá, chí quide-gá sá vá yóo tnàhí ndacu cada sá cúú-xí-ó dàtná ní quide-gá

²⁰ ní dándótó-gá Xítohó Jesucristú cúnàhá ní xihí-gá. Te ní taxinucóo-gá Xítohó Jesucristú xio cùha-gá táxi tñuní-gá.

²¹ Te Xítohó Jesucristú ío-gá cúnùu-gá dàcúuxí nchàa núú cuè espíritú, ndìhi dàcúuxí nchàa cue tée yindaha ñáiyu, ndìhi dàcúuxí nchàa dava-gá cue tée cúnuu. Te cuèi vitna te cuèi ndéé núú cuàháⁿ núú vèxi ducaⁿ-ni ío cúnuu-gá taxi tñuní-gá.

²² Te mee Yá Ndiòxí ní quide-gá sá Xítohó Jesucristú taxi tñuní-gá nchaandi tùhú sá ío, te ñu-ni mee Yá Ndiòxí ní cachí-gá sá ncháá ñáiyu cùu cuendá-gá quindaha ñaha Xítohó Jesucristú.

²³ Te cada iní-ó sá ncháá ñáiyu cùu cuendá Yá Ndiòxí cúu-yu yiqui cùñú Xítohó Jesucristú, chí ìⁿ-ni cùu-yu ndìhi-gá, te mee-gá táxi tñuní-gá nchaandi tùhú sá ío.

2

Yá Ndiòxí ío cùndahú iní ñáhá-gá xii-o núu xiáⁿ ní dàcácu nihnu ñaha-gá

¹ Te nchòhó cúu-ndo dátna ñáiyu ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndo sá dátna ní ndoto-ndo chí ní nduu táhú-ndo cùndecu-ndo ndìhi Yá Ndiòxí ní caa ní quihíⁿ.

² Te ducaⁿ ní xíndecu-ndo ichi cuèhé ichi duha, chí ní cáncicúⁿ nihnu-ndo nchàa sá cuèhé sá dúhá ío ñuyíú-a, te ní xóo cada-ndo nchàa nacuaá càháⁿ sácúíhná, te ñu-ni sácúíhná-áⁿ táxi tñuní-xi nchaa dava-gá espíritú cùndìhi-xi, te ñu-ni-xi ndècu ndìhi-xi nchaa ñáiyu ñá túú cuini tñi tñuhu càháⁿ Yá Ndiòxí, te dàcàháⁿ ñáhá-xí xii-yu cuendá cundecu-ni-yu ichi cuèhé ichi duha.

³ Te nchaa-o òucaⁿ ní xóo cada-o dátna quidé cuè ñáiyu-áⁿ, chí ní xóo cada-o nchàa sá cuèhé sá dúhá ní xóo cani iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xiáⁿ tàú-ó sá dándòho ñaha Yá Ndiòxí xii-o ni cùu datná tàú-xi dandòho-gá nchaa ñáiyu ducaⁿ ndècu ichi cuèhé ichi duha-áⁿ.

⁴ Te Yá Ndiòxí ío cùu iní ñáhá-gá xii-o núu xiáⁿ ní cùndahú iní ñáhá-gá xii-o

⁵ cuèi cùu-o datná ñáiyu ní xihí sá cuendá nchaa sá cuèhé sá dúhá quide-o ni cuu. Te ducaⁿ ní quide-gá ní cundahú iní ñáhá-gá xii-o cuendá cundecu-o ndìhi Xítohó Jesucristú vitna, te cuu ìⁿ-nuu-o ndìhi-gá. Te sá cuendá-ni sá cùndahú iní ñáhá Yá Ndiòxí xii-o xiáⁿ ní quide-gá nàcuáa nchoo nàníhi tànhú-ó.

⁶ Te cada iní-ó sá dátna ní quide Yá Ndiòxí cúnàhá ní dándótó-gá Xítohó Jesucristú cúnàhá ní xihí-gá ducaⁿ ní quide ñaha-gá xii-o chí ndècu-o ndìhi-gá vitna. Te Xítohó Jesucristú sa ndècu-gá andiú núú ndécú Yá Ndiòxí. Te cada iní-ó sá Yá Ndiòxí

sa ní quide-gá sá nchóó ní ngúndecu túu-o ndìhi Xítohó Jesucristú, chí ío váha ndècu-o vitna.

⁷ Te Yá Ndiòxí quidé váha ñaha-gá xii-o vitna cuendá sá ná sàá nduu, te ñu-ni mee-gá cada te cutnúni iní nchaa ñáiyu sá ío cùu iní ñáhá-gá xii-o, te ducaⁿ ío chindee chítúu ñaha-gá xii-o cuendá sá ndécú ndìhi-o Xítohó Jesucristú.

⁸ Te Yá Ndiòxí ío cùndahú iní ñáhá-gá xii-ndo núu xiáⁿ ní quide-gá sá nchòhó nàníhi tànhú-ndo. Te ducaⁿ ní quide-gá chí ní sándáá iní-ndo-gá. Te ñá díú sá cuendá ìⁿ chiuⁿ ní quide-ndo ducaⁿ ní nàníhi tànhú-ndo, chí mee Yá Ndiòxí ní cuini-gá sá dicó-ni ducaⁿ nàníhi tànhú-ndo.

⁹ Te mee Yá Ndiòxí ní cachí-gá sá ñá díú cuendá ìⁿ chiuⁿ quide-o nàníhi tànhú-ó, te ducaⁿ ní cachí-gá cuendá sá vā cādā càhnu-o mee-o.

¹⁰ Te Yá Ndiòxí ní quide ñaha-gá xii-o dátna ìⁿ ñáiyu saa cuendá sá ní tnahá tñuhu-o ndìhi Xítohó Jesucristú, te ducaⁿ ní quide-gá cuendá sá cādá-ó mèe-ni sá váha. Te Yá Ndiòxí ducaⁿ tñàhí ní sani iní-gá cunduu sá nchóó cùu-o ñáiyu cada mee-ni sá váha.

Xítohó Jesucristú quidé-gá ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáiyu isràel, te ní ñá túú quide-ndo datná quidé ñáiyu-áⁿ, chí ñáiyu-áⁿ sàha-yu sèñá ñiⁿ-yu, te dàquee tìhú-yu nchaa ñáiyu ñá túú ndècu sèñá ñiⁿ-xi.

¹² Te chí dándàcu iní nàcuáa ní xíndecu-ndo, chí dàvá-áⁿ ñá túú ní xíndecu-ndo ndìhi Xítohó Jesucristú, te ní ñá túú ní xóo cuu tnahá tñuhu-ndo ndìhi ñáiyu isràel, te ní ñá túú ní xini tñuní-ndo nàcuáa ndiú tñuhu sá ní càháⁿ ndáá Yá Ndiòxí nàcuáa cada váha-gá ñáiyu, te ní ñá túú ní cùu-ndo ñáiyu quindaha-gá, te ní ñá túú ní xóo níhí-ndo tñuhu ndee iní sá cùndecu-ndo ndìhi-gá.

¹³ Te cuèi ní cuu-ndo ñáiyu ñá túú tnahá tñuhu ndìhi Yá Ndiòxí ní cuu, dico vitna ní tnahá tñuhu-ndo ndìhi-gá chí cùu ìⁿ-nuu-ndo ndìhi Xítohó Jesucristú, cuendá sá ní sati níhí-gá te ní xihí-gá te xiáⁿ ducaⁿ tnahá tñuhu-ndo ndìhi Yá Ndiòxí vitna.

¹⁴ Te Xítohó Jesucristú ní quide-gá sá nchóó ío váha cuu iní-ó cundecu-o, te ñu-ni-gá ní quide cuendá sá vā dàquee tìhú ñáhá ñáiyu isràel xii ñáiyu ñá túú cùu ñáiyu isràel, te ducaⁿ ìⁿ-ná cuú-yu cundecu-yu.

¹⁵ Te sá ní xihí Xítohó Jesucristú, xiáⁿ ñá túú-gá cúnùu nchaa tñuhu sá sánú ichi ñaha xii ñáiyu nàcuáa cadá-yu cundecu-yu ni cùu. Te ducaⁿ ní xihí Xítohó Jesucristú cuendá sá cuè ñáiyu isràel ndìhi cue

ñáyiú ñá túú cùu ñáyiú isràèl ì#-nã cuú-yu cundecú-yu ichi-gá, te duca^a te vá dáquèe tihú tnáhá-gá-yu, te ío váha cundecu ndihi tnáhá-yu.

¹⁶ Te duca^a ní quide Xítóhó Jesucristú ní xihí-gá núú cùrúxí cuèndá sá cuè ñáyiú cùu ñáyiú isràèl ndihi cue ñáyiú ñá túú cùu ñáyiú isràèl vá dáquèe tihú tnáhá-gá-yu. Te duca^a ní xihí-gá cuèndá ì#-nã cuú-yu tnahá tnúhu-yu ndihi Yá Ndióxi nácuáa cuu váha iní ñáhá-gá xii-yu.

¹⁷ Te cuèi cùu-ndo ñáyiú ñá túú tnáhí xini ndáa cuèndá Yá Ndióxi ní cùu, dico Xítóhó Jesucristú ní quixi-gá ñuyú-a ní càhá^a-gá tnúhu váha nácuáa ío váha cuu iní-ndo cùndecu-ndo ndihi Yá Ndióxi. Te diu-ni duca^a ní quide-gá sá cuú-xí ncháa ñáyiú sa xini cuèndá Yá Ndióxi, diu-ni ñáyiú isràèl.

¹⁸ Te cuèi cùu-o ñáyiú isràèl ádi ñá túú cùu-o dico diu-ni mee Xítóhó Jesucristú ní quide-gá sá ncháá-ó tnáhá tnúhu-o ndihi Dúrtú Ndióxi Yaa cúú Tátá-ó. Te duca^a ní tnahá tnúhu-o ndihi Yá Ndióxi chi ní ngúndecu ndihi-o Espiritú-gá.

¹⁹ Te nchòhó ñáyiú ñá túú cùu ñáyiú isràèl ní cuu-ndo ñáyiú ñá túú tnahá tnúhu ndihi Yá Ndióxi ní cùu, dico vitna chi ì#-nã ní cuu-ndo ndihi nchaa dava-gá ñáyiú cùu cuèndá-gá chi cùu-ndo déhe-gá.

²⁰ Te cada iní-ó sá cuè téé ní táuchíúⁿ Xítóhó Jesucristú càhá^a tnúhu-gá, ndihi cue téé ní xóo càhá^a tnúhu Yá Ndióxi ndéé sanaha cùu-güedé dátáa cimientú ì# vehe, te nchòhó cuú-ndo dátáa ndóhó sá sáa vehe-án, te cada tucu iní-ó sá Xítóhó Jesucristú cuú-gá ì# yúú cúnúu cuu cimientú vehe-án.

²¹ Te duca^a ío váha cùu ì#-nuu nchaa ndóhó-án ndihi yúú cúnúu-án, te duca^a tucu ío váha ta quèe tnàha nchaa ndóhó-án cuásaá. Te xíá^a cada iní-ó sá cuú-xí vèhe Yá Ndióxi, vehe sá ío ní cuu íí. Te duca^a sãtnahá-xi cùu nchaa ñáyiú ndècu ichi Xítóhó Jesucristú chi ní tnahá tnúhu-yu ndihi-gá, te ì# nduu ì# nduu ta cùu vii cuu váha-gá-yu núú Yá Ndióxi cuáhá^a.

²² Te tnáhá nchòhó duca^a sãtnahá-xi cùu-ndo chi ní ngúndecu ndihi-ndo Xítóhó Jesucristú, te duca^a ta cùu vii cuu váha tucu-ndo núú Yá Ndióxi cuáhá^a, te cùu-ndo datná vehe Yá Ndióxi chi ndècu ndihi-ndo Espiritú-gá.

3

Té Pãblú yihí ñáyiú ñá túú cùu ñáyiú Xítóhó Jesucristú núú ñáyiú ñá túú cùu ñáyiú isràèl

¹ Te yúhú té Pãblú yihí-í vecaá sá cuèndá sá càhá^a-í tnúhu Xítóhó Jesucristú núú nchòhó ñáyiú ñá túú cùu ñáyiú isràèl, núú xíá^a diu cuèndá-gá duha yihí-í vecaá vitna.

² Te nchòhó sa nàha-ndo sá Yá Ndióxi ní cundàhú iní ñáhá-gá xii-í, te ní cachí-gá sá yúhú quihi díqui-í càhá^a-í tnúhu Xítóhó Jesucristú núú-ndó, te cuèndá sá càhá^a-í tnúhu-gá núú-ndó te cuu-xi sá váha sá cuú-xi-ndó.

³ Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ní cuu, sá ní cachí tnúhu Yá Ndióxi xii-í.

⁴ Te òré dàcuaha-ndo tnúhu ndùu yuhu-án ní cùu te quini-ndó sá yúhú təcú tnùn-í nácuáa ndùu tnúhu-án, te tnúhu-án càhá^a-xi cuèndá Xítóhó Jesucristú.

⁵ Te tnúhu-án cuú-xi tnúhu sá vã yõ tnáhí xini ní cùu, dico cue téé ní táuchíúⁿ Xítóhó Jesucristú càhá^a tnúhu-gá, ndihi cue téé càhá^a nácuáa dàcahu iní ñáhá Yá Ndióxi ní níhí-güedé tnúhu ndùu yuhu-án, chi Espiritú Yá Ndióxi ní xáha^a-xi xii-güedé.

⁶ Te duha càhá^a tnúhu ndùu yuhu-án ní cùu: “Cuèi ñáyiú ñá túú cùu ñáyiú isràèl te cuèi ñáyiú cùu ñáyiú isràèl dico ì#-ni ndùu tãhú-yu sá váha núú Yá Ndióxi, te núu na quíndáa iní-yu tnúhu sá càhá^a nácuáa naníhí tãhú-yu, te ì#-nã cuú-yu cundecú-yu, te duca^a ì#-ni cada váha ñaha Yá Ndióxi xii-yu te núu na cùndecu ndihi-yu Xítóhó Jesucristú”, duha ndùu tnúhu ndùu yuhu-án ní cùu.

⁷ Te Yá Ndióxi ní cundàhú iní ñáhá-gá xii-í ní taxi-gá chiúⁿ quide-í càhá^a-í tnúhu-gá, te mee-gá quidè-gá sá yúhú ndacu-í càhá^a-í tnúhu-gá.

⁸ Te nchaa ñáyiú cùu cuèndá Yá Ndióxi cuú-yu ñáyiú ío-gá cúnúu cada-yu chiúⁿ-gá dàcúxí yúhú, te cuèi duca^a dico Yá Ndióxi ní cundàhú iní ñáhá-gá xii-í ní taxi-gá chiúⁿ quide-í càhá^a-í tnúhu-gá núú cuè ñáyiú ñá túú cùu ñáyiú isràèl. Te tnúhu-gá-án càhá^a-xi sá súuní ío váha cada ñaha Xítóhó Jesucristú xii-o.

⁹ Te duca^a ní cachí Yá Ndióxi sá càhá^a-í tnúhu-gá cuèndá danèhé-í nchaa ñáyiú. Te sá danèhé-í-yu-án cuú-xí tnúhu ndùu yuhu sá ní sani iní-gá ndéé sanaha nácuáa cada váha-gá cue ñáyiú. Te ndéé dàvã-án ní quesaha ndùu yuhu tnúhu-án ní cùu. Te diu-ni-gá cuú-gá Yaa ní cadúha nchaandi tihú sá ío.

¹⁰ Te duca^a ndùu yuhu tnúhu-án ní cùu cuèndá sá ncháa espíritu cúnúu ndecu andiu quini-xi vitna nácuáa quide nchaa ñáyiú ní tuha ñaha xii Yá Ndióxi cuèndá duca^a cùtnuní iní-xi sá ío váha cùtnuní iní-gá nácuáa cada-gá.

¹¹ Te Yá Ndióxi ní sani iní-gá ndéé sanaha nácuáa ní cuini-gá cada Xítóhó Jesucristú, te ní sáa nduu ní quide Xítóhó Jesucristú nácuáa ní cuini Yá Ndióxi cada-gá.

¹² Te vitna cùyi-ó càhá^a ndihi-o Yá Ndióxi cuèndá sá ndécú ndihi-o Xítóhó Jesucristú, te

sandáá iní-ó-gã.

¹³ Te núu xiãⁿ cãháⁿ-í dóho-ndo sã cuêi duha ndôho-í vitna dico vá ná tũhú iní-ndó cãchicúⁿ nihnu-ndo ichi Xítóhó Jesucristú. Te sã dúhá ndôho-í te cùu-xi sã vãha sã cùú-xi-ndó, chi cuu-ndo ñãyiu cùu cahnu núu Yã Ndiôxi.

Xítóhó Jesucristú ío cùu iní ñãhá-gã xii-o

¹⁴ Te sã cuendá nchaa sã ñi sani iní Dútú Ndiôxi quidé-gã xiãⁿ yúhú ngũĩni xítí-í núú-gã cãháⁿ ndihí-í-gã, te ñiu-ni-gã cùú Yã cùú Tãtã Xítóhó Jesucristú.

¹⁵ Te mee Yã Ndiôxi ní cachí-gã sã ncháá espíritú ndécú andiu cunduu-xi datná ní cachí meé-gã cunduu-xi. Te ní cachí tucu-gã sã nchóó cùu-o ñãyiu, te cunduu-o datná cuiní meé-gã cunduu-o.

¹⁶ Te xicáⁿ tãhú-í núú Dútú Ndiôxi sã Espíritú-gã ná cãdá nãcuáa cuita níhí ndéé-gã-ndó quĩhíⁿ cundecu-ndo ichi-gã, te ducaⁿ xicáⁿ tãhú-í núú-gã cada Espíritú-gã chí ío cãhnu cuu-gã.

¹⁷ Te xicáⁿ tãhú tucu-í núú Yã Ndiôxi sã Xítóhó Jesucristú ná cundecu ndihí ñaha-ni-gã xii-ndo chi sandáá iní-ndó-gã, te ducaⁿ te vá dáñã ndéé-ndó ío cuu iní tnãhá-ndó.

¹⁸ Te xicáⁿ tãhú tucu-í núú Yã Ndiôxi cuendá-ndó ndihí cuendá dava-gã ñãyiu cùu cuendá-gã, cuendá sã cùtũnì iní-ndó sã súuní cùu iní ñãhá Xítóhó Jesucristú xii-o.

¹⁹ Te duha xicáⁿ tãhú-í núú Yã Ndiôxi chi cuiní-í sã ncháá-ndó tècú tũnì-ndó sã ío cùu iní ñãhá Xítóhó Jesucristú xii-o cuêi vá ndácú cava-o quini-ó nãcuáa cùu iní ñãhá-gã xii-o. Te xicáⁿ tãhú tucu-í núú Yã Ndiôxi sã ío na cundecu ndihí ñaha-gã xii-ndo, te ducaⁿ cãchicúⁿ nihnu-ndo cãda-ndo nchaa nãcuáa quide mee-gã.

²⁰ Te Yã Ndiôxi ío-gã vai sã ndácú-gã táxi-gã dàcúúxi sã xicáⁿ-ó núú-gã, te cuêi ndéé nchaa sã ñã túú sãni iní-ó níhí-ó te táxi-gã, te ducaⁿ chi mee-gã ndécú ndihí ñaha-gã xii-o, te ndàcu-gã quidé-gã nãndi sã vãha sã cùú-xi-ó.

²¹ Te vitna nchaa nchoo ñãyiu ndècu ichi Xítóhó Jesucristú chí ná cãchí-ó sã ío cãhnu cuu Yã Ndiôxi, te ducaⁿ-ni cãháⁿ-ó sã ío cãhnu cuu-gã ñi caa ñi quĩhíⁿ chi ndècu ndihí-o Xítóhó Jesucristú. Te ducaⁿ na cunduu.

4

Espíritú Yã Ndiôxi quidé-xi cùu ñnuu-o ndecu-o

¹ Te yúhú té Pãblú yíhí-í vecaá sã cuendá Xítóhó Jesucristú, te cãháⁿ ndãhú-í núú-ndó sã cãdá vãha-ndo cundecu-ndo datná tãú-xi cada cue ñãyiu ní cãháⁿ Yã Ndiôxi cundecu ndihí-gã. Te nchóhó tnãhá-ndó cùu-ndo ñãyiu ní cãháⁿ ñãhá Yã Ndiôxi cundecu ndihí-gã.

² Te vá cãdá cãhnu-ndo mee-ndo, cunduu vãha iní-ndó, cunduu cãhnu iní-ndó, te cuu iní tnãhá-ndó nãcuáa ducaⁿ cundee iní-ndó núu ná cùú sã cùmãni núú tnãhá-ndó.

³ Te ío nducu ndèe-ndo cuu ñnuu-ndo cundecu-ndo, chí Espíritú Yã Ndiôxi chindee ñaha-xi xii-ndo, te ducaⁿ ío vãha cuu iní-ndó cundecu-ndo chí cùu ñnuu-ndo.

⁴ Te nchoo ñãyiu ndècu ichi Xítóhó Jesucristú ñni cùu-o, te ducaⁿ ñni Espíritú Yã Ndiôxi ndécú, te ñiu-ni ducaⁿ ñni tũhu ndee iní ní ngũndecu ndihí-o cùtũhã ní cãháⁿ ñãhá Yã Ndiôxi xii-o.

⁵ Te ñni Xítóhó Jesucristú ndécú tàxi tũni ñãhá-gã xii-o, te ñni cùu-o sandáá iní-ó tũhú-gã, te ñni ní sandute-o.

⁶ Te ñni Dútú Ndiôxi cùú Yã cùú Tãtã-ó nchãa-o, te ñiu-gã cùnuu-gã yíndãha ñaha-gã xii-o nchãa-o. Te Yã Ndiôxi dácãháⁿ-gã iní-ó quide-o chiuⁿ-gã, te ducaⁿ ndècu ndihí ñaha-gã xii-o nchãa-o.

⁷ Te nchoo ndi ñni ndi ñni chindee ñaha Yã Ndiôxi xii-o quide-o nãcuáa nduu chiuⁿ ní cachí Xítóhó Jesucristú cada-o.

⁸ Te quèe ndáá-xi nãcuáa cãháⁿ-xi núú tũtú Yã Ndiôxi núú cãchí-xi:

Xítóhó Jesucristú cuãndaa-gã andiu te ío cùnuu-gã,

chi nchaa cue espíritú cùú ùhú iní ñãhá xii-gã ñã túú ní ndàcu-xi naã ndihí ñaha-xi xii-gã,

te mee-gã ní cachí-gã nãcuáa nduu chiuⁿ nduu tãhú ñni ñãyiu cadã-yu.

Duha cãchí-xi núú tũtú-gã.

⁹ Te sã dúcãⁿ cãháⁿ-xi sã cuãndaa-gã andiu xiãⁿ cùtũnì iní-ó sã ñi cuuⁿ-gã ñuyú-a.

¹⁰ Te Xítóhó Jesucristú ní cuuⁿ-gã ñuyú-a, te ñiu-ni-gã cuãndaa-gã andiu cuendá ío cunuú-gã taxi tũnì-gã nchaandi tũhú sã ío.

¹¹ Te ní dácãhũu-gã cue tée xinu cuechi núú-gã ñni núú chiuⁿ cada-güedé. Te ní cachí-gã sã dãva-güedé cãháⁿ-güedé tũhú-gã, te dãva-güedé ní cachí-gã sã cãháⁿ-güedé nãcuáa dãcahu iní ñãhá Yã Ndiôxi xii-güedé. Te dãva-güedé ní cachí-gã sã cùú-güedé cue tée datècú tũhú cue ñãyiu nãcuáa cadã-yu nanhí tãhú-yu. Te dãva-güedé ní cachí-gã sã cùú-güedé cue tée quindaha ñaha xii ñãyiu dacuãha ñaha-güedé xii-yu tũhú-gã.

¹² Te ducaⁿ ní cachí-gã cada cue tée-ãⁿ cuendá canu ichi-güedé cue ñãyiu cùu cuendá Yã Ndiôxi cuendá ducaⁿ ñãyiu-ãⁿ níhí-yu nãcuáa cadã-yu chiⁿ-gã, te ducaⁿ cuita níhí ndéé-gã-yu cundecu-yu ichi Xítóhó Jesucristú.

¹³ Te ducaⁿ ní cachí Xítóhó Jesucristú cunduu ndéé sãá nduu cùu ñnuu-o quindáá iní-ó tũhú-gã, te ducaⁿ cùu ñnuu-o tecú tũnì-ó nãcuáa nduu cuendã-gã chí ñiu-gã cùú-gã Déhe Yã Ndiôxi, te cuu-o ñãyiu ío

quide ndáá dàtná quidé mèe Xítóhó Jesucristú. Te ducaⁿ te ñá túú tnáhí-gá ná cùmání-ó núú Yá Ndióxí.

14 Te ducaⁿ te vá cúú-gá-ó dàtná cue landú vátá cútñuní váha-gá iní-xi, te ni vá cádá-gá-ó dàtná quidé ndúte lamár, chi ndute-án óré quéné tächí te cuáháⁿ-xi duha cuáháⁿ-xi dàcáⁿ, te ducaⁿ chi vá quindáá-gá iní-ó tnúhu cáháⁿ nchaa ñáyiú dándahú ñáhá xii-o, chi ñáyiú-án ío váha xitó-yu nàcuáa dándahú ñáhá-yu xii-o chi cächí-yu sá cáháⁿ-yu tnúhu Yá Ndióxí dico ñá ndáá.

15 Te nchoo ío cuu iní tnáhá-ó, te vá dándahú tnáhá-ó, chi cáháⁿ-ó mèe-ni sá ndáá. Te xini ñuhu-xi sá ñⁿ nduu ñⁿ nduu cuita cada ndáá-gá-ó quíñⁿ dàtná quidé ndáá mèe-gá, te diu-ni-gá cúú-gá Yaá cúnúu cuu díhna táxi tñuní ñáhá-gá xii-o.

16 Te diu-ni Xítóhó Jesucristú quidé ñáha-gá xii nchaa nchoo ñáyiú ndecu ichi-gá dàtná yiqui cùñú mèe-gá, chi ñⁿ yiqui cùñú ío váha ní quée tnàha ñⁿ ñⁿ xichi, te ducaⁿ yíhi túchi yiqui cùñú-án yótnⁿ-xi nchaa nacuáa ní quée tnàha. Te ducaⁿ sátnahá-xi cùu nchoo chi ñⁿ-ni cùu-o ndecu-o ichi Xítóhó Jesucristú táxi tñuní ñáhá-gá xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta nihí ndée-gá-ó cuáháⁿ ndécú-ó ichi-gá.

Vá cádá-gá-ó dàtná ní xóo cada-o cütñahá ní xíndecu-o ichi cuehé ichi duha

17 Te vitna yúhu cáháⁿ-í dóho-ndo quide-í núú Xítóhó Jesucristú sá vá cündecu-gá-ndó dàtná xíndecu ñáyiú ñá túú sándáá iní ñáhá xii Yá Ndióxí, chi nchaa ñáyiú-án ñá túú vèdana nándíhi nchaa sá sání iní-yu.

18 Te ni ñá túú vèdana cütñuní iní-yu nàcuáa nduu tnúhu ndáá tnúhu Yá Ndióxí. Te ñáyiú-án ñá túú nduu táhú-yu cundecú-yu nàcuáa cuní Yá Ndióxí, chi ñá túú vèdana təcú tñuní-yu te ducaⁿ chi ío sáá iní-yu.

19 Te ñá túú tnáhí-gá ná sání iní-yu ndécú-yu ichi cuehé ichi duha, te ío cùdí iní-yu ndécú-yu ichi díí iní, te ñá díú-ní xiáⁿ chi nándí-gá nchaa sá cuehé sá dúhá quidé-yu ndécú-yu.

20 Dico tnúhu Xítóhó Jesucristú sá ní sándáá iní-ndó chi ñá túú dùcaⁿ sanu ichi ñáha-xi xii-ndo cada-ndo.

21 Te nchòhó ní cütñuní iní-ndó nàcuáa nduu cuendá Xítóhó Jesucristú, te dàcuaha-ndo tnúhu ndáá diu-ni tnúhu-gá nàcuáa ndecu-ndo ichi-gá.

22 Te vitna vá cání-gá iní-ndó càda-ndo datná ní xóo cada-ndo cütñahá ní xíndecu-ndo ichi cuehé ichi duha, chi núu nchaa-ni sá cuehé sá dúhá-án ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñáha-xi xii-ndo quíñⁿ, chi núu

nchaa-ni sá cuehé sá dúhá-án ná cùhuⁿ-ni iní-ndó te dàtcá nuu ñáha-xi xii-ndo.

23 Te nchòhó, xini ñuhu-xi sá vá dúcáⁿ-gá cani iní-ndó càda-ndo te tàú-ndó nduu-ndo datná ñⁿ ñáyiú ní cacu túu saa.

24 Te nduu iní-ndó dàtná cuní mèe Yá Ndióxí cunduu, chi nduu-xi nàcuáa càa iní mèe-gá, te ducaⁿ te cuu-ndo ñáyiú ío váha cada ndáá, te cuu ndisa-ndo ñáyiú ñá túú tnáhí ná cùmání cundecu núú-gá.

25 Te cuendá xiáⁿ núu cáháⁿ-í dóho-ndo sá nchòhó vá dàcuàndehnde-gá-ndó dàtná ní xóo cada-ndo, te mee-ná sá ndáá cáháⁿ ndíhi tnàha-ndo, chi ñⁿ-ni cùu-o ndecu-o ichi Xítóhó Jesucristú.

26 Te núu cùdéeⁿ-ndó te cada cuendá-ndó sá vá cádá-ndó ñⁿ cuèchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnúhu sàtú iní-án.

27 Te vá dáñá-ndó mèe-ndo dándahú ñáhá sàcúñná xii-ndo.

28 Te núu dava-ndo cùu-ndo ñadúhú te vá dúcáⁿ-gá cada-ndo, chi nducu-ná-ndó ñⁿ chiuⁿ váha cada-ndo nàcuáa ducaⁿ nihí-ndó sá chíndée-ndo cue ñáyiú ndáhú ñáyiú ñá túú ná ndécú ndíhi.

29 Te vá cáháⁿ-gá-ndó ni ñⁿ tnúhu cuehé, chi mee-ná tnúhu vii tnúhu váha cáháⁿ-ndó nàcuáa ducaⁿ ngúnu ichi cue ñáyiú ndédóho ñáha xii-ndo, te núu ducaⁿ na càda-ndo te cuu-xi sá váha sá cúú-xi ñáyiú ducaⁿ ndédóho ñáha xii-ndo-án.

30 Te vá cádá-gá-ndó ni ñⁿ sá ñá túú tàú-ndó càda-ndo cuendá sá vá dándíhú-ndó iní Espíritú Yá Ndióxí, chi diu Espíritú-gá ndécú ndíhi-ndo, te xiáⁿ cütñuní iní-ndó sá sáá nduu nàcuaca ñáha-gá xii-ndo cündecu-ndo ndíhi-gá ni caa ni quíñⁿ.

31 Te vá dásátú-gá-ndó iní tnàha ñáyiú-ndo, te ni vá cùhúⁿ iní-ndó tnúhu sàtú iní, te ni vá cùdéeⁿ-gá-ndó, te cuèi núú chítú núú tàcá vá cáháⁿ cana-ndo cùcùehé-ndó tnàha ñáyiú-ndo, te ni vá cuátñuhu-ndo tnàha ñáyiú-ndo, te ni vá cání cuehé cani duha iní-ndó cuendá tnàha ñáyiú-ndo.

32 Te cundáhú iní tnáhá-ndó, te cada tnàha-ndo sá váha, te cada càhnu iní tnáhá-ndó núu ná cúú sá cùmání núú tnáhá-ndó dàtná ní quide Yá Ndióxí ní quide càhnu iní-gá nchaa yícá cuèchi-ndo sá cuendá Xítóhó Jesucristú.

5

Nàcuáa tàú-xi cundecu nchaa ñáyiú cùu déhe Yá Ndióxí

1 Te nchòhó cúú-ndó ñáyiú ío cùu iní ñáhá Yá Ndióxí, te diu déhe-gá cúú-ndó núu xiáⁿ xini ñuhu-xi canchicúⁿ nihnu-ndo càda-ndo datná quidé mèe-gá.

2 Te ío cuu iní tnáhá-ndó cündecu-ndo datná cúú iní ñáhá Xítóhó Jesucristú xii-ndo,

chi diu-gá ní cachí-gá sá cùú-gá cuèndá nchaa cuéchi-o te ní xihí-gá, te sá dúcáⁿ ní xihí-gá te ní cuu-gá dátáⁿ ìⁿ táhú sá cúú-xí Yá Ndióxi, te ío váha ní cuu iní Yá Ndióxi sá dúcáⁿ ní quide-gá.

³ Te sá cuèndá sá nchòhó cúú-ndó ñáyiú cùu cuèndá Yá Ndióxi nùu xíáⁿ nchaa nchòhó cue téé vá càháⁿ ndihi-ndo ñáyiú ñíhí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñáyiú ñíhí tucu vá càháⁿ ndihi-ndo cuè téé te núu ñá díú yí-ndo cuu-güedé, te ni vá cání tnáhi iní-ndó cùndecu-ndo ichi díí iní, te ni vá xihó-ndó ñí ìⁿ sá ndécú ndihi tnaha ñáyiú-ndo, te ni ìⁿ nchaa xíáⁿ vá cání iní-ndó càda-ndo, te ni vá cacú nèhe-ndo.

⁴ Te ni vá càháⁿ-ndó ìⁿ tnúhu sá ni vá cúú cùndedóho ñáyiú, te ni vá càháⁿ-ndó ìⁿ tnúhu cùtèxínu, te ni dàva-gá nchaa tnúhu sá ñá túú vèdana nàndíhi vá càháⁿ-ndó, chi nchaa tnúhu-ánⁿ ñá túú tàú-xí càháⁿ-ndó, te xini ñuhu-xí sá váha-gá sá ndacáⁿ táhú-ndó nùú Yá Ndióxi cuèndá nchaa sá váha quide-gá.

⁵ Te nchòhó sa xini ndáá-ndó sá ncháá cuè téé càháⁿ ndihi ñáyiú ñíhí te ñá díú ñàdihí-güedé cúú-yu, ndihi cue ñáyiú ñíhí càháⁿ ndihi cue téé te ñá díú yí-yu cùu-güedé, nchaa ñáyiú-ánⁿ vá ndúú táhú-yu cundecú-yu núú ndécú Yá Ndióxi ndihi Xítohó Jesucristú táxi tnúni-gá. Te ni cuè ñáyiú xíndecu ichi díí iní, te ni cuè ñáyiú xihó nchaa sá ndécú ndihi tnaha ñáyiú-xí vá ndúú táhú-yu cundecú-yu ndihi-gá núú ndécú-gá táxi tnúni-gá. Te tnúhu sá cachí-ó xihó-o nchaa sá ndécú ndihi tnaha ñáyiú-o, ìⁿ-ni cùu-xí ndihi tnúhu sá cachí ñáyiú quide cahnú-yu nchaa sá cachí-yu cùu ndiósí te ñá ndáá sá ndiósí cúú-xí.

⁶ Te vá quíndáá iní-ndó ñí ìⁿ tnúhu sá ñá túú nàndíhi càháⁿ ñáyiú, chi ñáyiú-ánⁿ ío dandóho ñaha Yá Ndióxi xí-yu cuèndá nchaa sá cuèhé sá dúhá quide-yu chi ñá túú sàndáá iní ñáhá-yu xii-gá.

⁷ Núu xíáⁿ càháⁿ-í dóho-ndo sá vá ñíhí tnáhá-ndó ndihi cue ñáyiú-ánⁿ.

⁸ Te nchòhó ní cuu-ndo dátáⁿ cue ñáyiú ní xíndecu núú néé chi ní xíndecu-ndo ichi cuèhé ichi duha, dico vitna ní ngúndecu-ndo ichi Xítohó Jesucristú, te ñá túú-gá ndécú-ndó nùú néé dátáⁿ ní xíndecu-ndo ni cùu. Te vitna cada-ndo nchàa nacúáa tàú-xí cunduu chi ndècu-ndo ichi-gá.

⁹ Te sá cuèndá sá ndécú-ndó ichi-gá nùu xíáⁿ cúú-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá.

¹⁰ Te ío váha cada cuèndá-ndó nchàa sá cúú váha iní Xítohó Jesucristú, te xíáⁿ cada-ndo.

¹¹ Te vá cáncihíⁿ níhnu-ndo tnáhá-ndó càda-ndo dátáⁿ quide cuè ñáyiú ndècu ichi cuèhé ichi duha, chi nchòhó tàú-ndó càháⁿ-ndó dóho nchaa ñáyiú ducaⁿ ndècu ichi cuèhé ichi duha-ánⁿ cuèndá nchaa sá quide-yu.

¹² Te cucahaⁿ núú-ndó vá càháⁿ-ndó cuèndá ní ìⁿ sá cuèhé sá dúhá quide dayuhu nchaa ñáyiú-ánⁿ.

¹³ Dico òré dándixi túu tnúhu Yá Ndióxi iní-yu nacúáa quide-yu te cùtnuní iní-yu sá ñá túú quide váha-yu, te ducaⁿ ndixi cuéchi iní-yu cuèndá nchaa sá cuèhé sá dúhá quide-yu.

¹⁴ Te núú tütú Yá Ndióxi cáchi-xi:

Nchòhó cúú-ndó dátáⁿ ñáyiú xidí, te vitna ndiquúú iní-ndó,

te cùu tucu-ndo dátáⁿ ñáyiú ní xihí, te vitna ndoto-ndo,

te Xítohó Jesucristú chindee ñaha-gá xii-ndo nacúáa vá cùndecu-gá-ndó ichi cuèhé ichi duha.

Duha càháⁿ-xi núú tütú-gá.

¹⁵ Te ío váha cada cuèndá-ndó nacúáa cada-ndo cùndecu-ndo, te vá cáda-ndó dátáⁿ xíquide cue ñáyiú ñá túú təcú tnúni, chi cada-ndo dátáⁿ xíquide ñáyiú ío váha sáá díquí-xi.

¹⁶ Te ìⁿ nduu ìⁿ nduu cani iní-ndó càda-ndo nchaa nacúáa tàú-xí cunduu, chi vitna ío cùnuu nchaa sá cuèhé sá dúhá.

¹⁷ Te cuu-ndo ñáyiú təcú tnúni cuèndá ducaⁿ cùtnuní iní-ndó nacúáa cuiñí Yá Ndióxi cada-ndo, te vá cáda-ndó dátáⁿ xíquide cue ñáyiú ñá túú tnáhi cùtnuní iní-xi nacúáa cuiñí Yá Ndióxi cada-yu.

¹⁸ Te vá cúú-ndó ñáyiú quihu chi núu ducaⁿ na cada-ndo te dàcuíta níhnu-ndo mèe-ndo, te dañá-ndo mèe-ndo sá Espiritú Yá Ndióxi ná tàxi tnuni ñáhá-xí xii-ndo.

¹⁹ Te càháⁿ-ndó nacúáa-ni cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhú-yu Yá Ndióxi. Te càháⁿ-ndó nacúáa cuáháⁿ ndudú sá chíñuhu-ndo Yá Ndióxi, te cata-ndo. Te cuèhé nchaa dáva-gá ndudú diu-ni ducaⁿ càháⁿ-ndó te cata-ndo. Te ni yùhu ni iní-ndó càta-ndo nchaa ndudú-ánⁿ chíñuhu-ndo Yá Ndióxi.

²⁰ Te vá dáña ndèe-ndó ndacáⁿ táhú-ndó nùú Tàtá-ó Dütú Ndióxi cuèí ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihi-ndo Xítohó Jesucristú.

Tàú-xi sá quíndáá iní tnáhá cuè ñáyiú ndècu ichi Xítohó Jesucristú

²¹ Te nchòhó ñáyiú ndècu ichi Xítohó Jesucristú tàú-xi sá quíndáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndióxi.

²² Te nchaa nchòhò ñáyiú ðíhí ndécú yí-xi, xini ñuhu-xi sá quíndáá iní-ndó yí-ndo datná sàndáá iní-ndó Xítóhó Jesucristú.

²³ Chi yí-ndo tàxi tnuní ñáhá-güedé xii-ndo datná quidé Xítóhó Jesucristú táxi tnuní ñáhá-gá xii nchoo cué ñáyiú ndècu ichi-gá. Te ðiu-gá cúú-gá Yaa ní dácácu nihnu ñaha xi-o núú ùhú núú ndáhú, te cùu-o datná yiqui cuñú-gá.

²⁴ Te datná quidé nchòo ñáyiú ndècu ichi Xítóhó Jesucristú sàndáá iní-ó tñi-o nchaa tnúhu càháⁿ-gá, ducaⁿ tàú-xi cada nchaa nchòhò ñáyiú ðíhí quíndáá iní-ndó tñi-ndo nchaa tnúhu càháⁿ yí-ndo.

²⁵ Te tnàhá nchaa nchòhò cue téé tucu tàú-xi sá ío cuu iní-ndó ñàðihí-ndó datná quidé Xítóhó Jesucristú cúú iní ñáhá-gá xii nchaa nchoo ñáyiú ndècu ichi-gá, chi mee-gá ní xihí-gá sá cuèndá-ó sá cúú iní ñáhá-gá xii-o.

²⁶ Te ducaⁿ ní quide-gá cuèndá sá ncháá ñáyiú vitna ngúndecu ichi-gá cuu yíñùhú-yu núú Yá Ndióxi, te ducaⁿ ndáda ndoo ndada nine-gá iní-yu sá cuèndá sá quíndáá iní-yu tnúhu Yá Ndióxi, te cuanduté-yu.

²⁷ Te ducaⁿ ní quide-gá cuèndá sá ncháá ñáyiú na ngúndecu ichi-gá ío váha cundecu-yu núú-gá, te ducaⁿ vá cundècu-gá ní ñⁿ cuéchi-yu núú-gá, te ní ñⁿ-gá sá ñà túú-gá ná cumání-yu núú-gá chi ío cundecu yíñùhú-yu.

²⁸ Te sá dúcáⁿ quide Xítóhó Jesucristú sá cúú-xi cué ñáyiú ndècu ichi-gá, xiáⁿ tàú-xi sá nchòhò cue téé xíndecu ñàðihí-xi cuu iní-ndó ñàðihí-ndó, te coto-ndó-yu datná xító-ndó yiqui cuñú méé-ndó, te cada iní-ndó sá ncháá cué téé ío cùu iní ñàðihí-xi cuu iní-güedé méé-güedé chi ñⁿ-ná cúú-yu.

²⁹ Te nchoo sà naha-o sá ní ñⁿ ñáyiú ñà túú dàquee tñù-yu yiqui cuñú-yu, chi da uuⁿ-gá chíndéé-yu te xító-yu. Te ðiu-ni ducaⁿ quide Xítóhó Jesucristú ndihí nchaa ñáyiú ndècu ichi-gá,

³⁰ chi cùu-o datná yiqui cuñú méé-gá, te ducaⁿ chi ñⁿ-ni cùu-o ndihí-gá.

³¹ Te tnúhu Yá Ndióxi càchí-xi: “Sá cuèndá xiáⁿ núu nchaa cue téé na nihí ñàðihí-xi te ðíⁿ-ná cada-güedé tátá-güedé ndihí náná-güedé, te ñàðihí-ná-güedé cuu cuu ndihí-güedé, te ducaⁿ ñⁿ-ná cuu-güedé ndihí-yu”, duha càchí-xi.

³² Te tnúhu-a cùu-xi ñⁿ tnúhu càhnu vihi, te ducaⁿ sá tnàhá-xi cùu Xítóhó Jesucristú ndihí cue ñáyiú ndècu ichi-gá.

³³ Te càháⁿ-ni tucu-í dóho nchaa nchòhò cue téé xíndecu ñàðihí-xi sá ío cuu iní-ndó ñàðihí-ndó te coto-ndó-yu datná xító-ndó mèe-ndo, te ducaⁿ-ni ncháa nchòhò ñáyiú ðíhí tucu canehe-ndo sá yíñùhu núú yí-ndo.

6

¹ Te nchaa nchòhò cue landú, quíndáá iní-ndó tátá-ndó ndihí náná-ndó chi ducaⁿ cuíní Yá Ndióxi cunduu, te ðiu ducaⁿ tnàhí tàú-xi cada-ndo.

² Te Yá Ndióxi ní cachí-gá sá cànehe-ndo sá yíñùhu núú tátá-ndó ndihí núú náná-ndó. Te tnúhu-ánⁿ cúú-xi tnúhu cùnuu ní càháⁿ-gá cada cue ñáyiú cuèndá cada váha ñaha-gá xii-yu.

³ Te ní cachí-gá sá núu ducaⁿ na càda-ndo te ío váha cundecu-ndo, te ducaⁿ ío naha cùdíí-ndo cundecu-ndo ñuyúí-a.

⁴ Te nchaa nchòhò cue téé cùu tátá, vá dásátú-ndó iní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tnúhu váha nàcuáa cuíní Yá Ndióxi cunduu.

⁵ Te nchaa nchòhò cue ñáyiú xínu cuechi, quíndáá iní-ndó cué ñáyiú dii chiúⁿ-xi quide-ndo, te canehe-ndo sá yíñùhu núú-yu, te ío váha cuu iní-ndó càda-ndo chiúⁿ-yu, te ducaⁿ ní yuhu ní iní-ndó càda-ndo. Te cada iní-ndó sá datná tnúhu sá chiúⁿ Xítóhó Jesucristú quidé-ndó.

⁶ Te dava ñáyiú xínu cuechi, mee-ni òré ndéhé ñáyiú dii chiúⁿ-xi quidé-yu ío ndùcu ndéé-yu quide chiúⁿ váha-yu cuèndá cuíní-yu cudú-yu. Dico nchòhò vá dúcáⁿ càda-ndo, chi cuéi ndècu ñáyiú dii chiúⁿ-xi quide-ndo àdi ñà túú-yu dico cada chiúⁿ váha-ni-ndo, te cada iní-ndó sá datná tnúhu sá chiúⁿ Xítóhó Jesucristú quidé-ndó, te cada-ndo ní yuhu ní iní-ndó nàcuáa cuíní Yá Ndióxi cunduu.

⁷ Te ío váha cuu iní-ndó càda-ndo chiúⁿ-án, chi cada iní-ndó sá datná tnúhu sá chiúⁿ Xítóhó Jesucristú quidé-ndó te ñà díú chiúⁿ cue ñáyiú ñuyúí-a.

⁸ Te nchòhò sa cùtnuní iní-ndó sá nàcuáa ndùu chiúⁿ váha ní quide-ndo ñⁿ ñⁿ-ndo, te ducaⁿ cunduu sá táxi Xítóhó Jesucristú nduu táhú-ndó cuéi cùu-ndo ñáyiú dàñá queé núú chiúⁿ pàtróoⁿ-xi àdi cuu-ndo ñáyiú ñà túú tnàhí dàñá quee núú chiúⁿ pàtróoⁿ-xi.

⁹ Te nchaa nchòhò ñáyiú xíndecu ndihí ñáyiú xínu cuechi, tnàhá-ndó tàú-ndó càda váha-ndo sá cúú-xi cué ñáyiú xínu cuechi núú-ndó, te vá cunduu nínu iní-ndó núú-yu, te chí cuàha cuèndá sá díú-ní Xítóhó Jesucristú Yaa ndécú àndiu taxi tnuní ñáhá-gá xii-ndo ndihí-yu, te sá cúú-xi mèe-gá chi ñⁿ-ni cùu-ndo núú-gá, te ñⁿ-ni càda ñaha-gá xii-ndo.

Yá Ndióxi chíndèe-gá cue ñáyiú ndècu ichi-gá cuèndá sá vá ndácú sàcuíhà náà ndihí ñaha-xi xii-yu

¹⁰ Te vitna nchaa nchòhò ñáyiú ndècu ndihí-í ichi Xítóhó Jesucristú càchí tnúhu-í xii-ndo sá ío nducu-ndo nàcuáa cada-ndo

níhí ndéé-ndó cùu ìṣṣṣṣ-ndu-ndo ndiḥi Xítóhó Jesucristú, chí mee-gá ío càḡḡḡḡ cuu-gá, te chindee ñàḡḡ-gá xii-ndo.

11 Te diu-ni nchaá sá ní nduu táhú-ndó núú Yá Ndióxi diu-ni nchaá xiáⁿ cuhuⁿ iní-ndó, chí xiáⁿ chindee ñàḡḡ-xi xii-ndo níhí ndéé-ndó cùndecu-ndo cuendá sá vâ dândàhú ñàḡḡ sàcùlḡḡnâ xii-ndo.

12 Chí nchoo ñà diú cuè ñáyiú ñuyíú-a nàá ndiḥi-o, chí ndiḥi cue espíritú cùndiḥi yucu ñávàḡḡ, te diu-ni nchaá espíritú-án cùṣṣṣṣ-xi cuéi núú ñḡḡḡ-ḡḡ nchaá sá cuèhé sá dúhá, te diu-ni-xi cùṣṣṣṣ-xi ñuyíú-a sàḡḡ ichi-xi cue ñáyiú quidè-yu nchaá sá cuèhé sá dúhá.

13 Te ío cuhuⁿ iní-ndó nchàá sá ní nduu táhú-ndó núú Yá Ndióxi cuendá ducaⁿ níhí ndéé-ndó cùndecu-ndo, te vâ ndácú yùcu ñávàḡḡ ná cada ñàḡḡ-xi xii-ndo oré cuṣṣṣṣ-xi coto ndéé ñàḡḡ-xi. Te sàtá ná dàquee tíhú-ndó yùcu ñávàḡḡ te ñḡḡ-ni cunduu-ndo cùndecu-ndo ichi Yá Ndióxi.

14 Te ducaⁿ cùndecu-ni-ndo ichi Yá Ndióxi cada-ndo dàtná xiquide cue sandàdú, chí cue téé-án ío ñḡḡ xindáa-güedé. Te càḡḡḡḡ-ndó mèe-ni tñúḡḡ ndáá tñúḡḡ Yá Ndióxi, te cuu-ndo dàtná cue sandàdú cue téé ndàda tíi xití-xi oré quíḡḡḡ-güedé nàá-güedé. Te ducaⁿ sàtnahá-xi cuu-ndo te núu na càḡḡḡḡ-ndó mèe-ni tñúḡḡ ndáá tñúḡḡ Yá Ndióxi. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xixiḡḡḡ sá yidàḡḡ ñàḡḡ xii-güedé oré nàá-güedé cuendá sá vâ ñicuehé-güedé. Te ducaⁿ sàtnahá-xi cuu-ndo te núu na càda ndáá-ndó cùndecu-ndo ichi-gá.

15 Te cundecu túḡḡḡ-ndo càḡḡḡḡ-ndó tñúḡḡ Xítóhó Jesucristú, tñúḡḡ sá càḡḡḡḡ nàcuáa cuu vâḡḡ iní ñáyiú cundecú-yu, te cuu-ndo dàtná cue sandàdú cue téé ndiḡḡ zapàtú-xi quíḡḡḡ-güedé nàá-güedé. Te ducaⁿ sàtnahá-xi cuu-ndo te núu na cùndecu túḡḡḡ-ndo càḡḡḡḡ-ndó tñúḡḡ Xítóhó Jesucristú núú ñáyiú.

16 Te càchí tñúḡḡ tucu-í xii-ndo sá ío quindáá iní-ndó Yá Ndióxi cuendá sá vâ ndácú sàcùlḡḡnâ ná cada ñàḡḡ-xi xii-ndo, te ducaⁿ te cuu-ndo dàtná cue sandàdú cue téé xinehe vítú chínèe-güedé sàquidáḡḡ ñàḡḡ-xi xii-güedé cuendá sá vâ cuicúⁿ-güedé sá nchicúⁿ ñḡḡḡ téé ñàḡḡ cue téé nàá ndiḥi-güedé. Te ducaⁿ sàtnahá-xi cuu-ndo te núu na quindáá iní-ndó Yá Ndióxi.

17 Te ío cuhuⁿ iní-ndó sá ní naníḡḡ táhú-ndó, te cuu-ndo dàtná cue sandàdú cue téé ñḡḡḡ mbelú cáxíⁿ. Te ducaⁿ sàtnahá-xi cuu-ndo te núu na cùḡḡḡḡ iní-ndó sá ní naníḡḡ táhú-ndó. Te ío cuhuⁿ iní-ndó tñúḡḡ Yá Ndióxi, chí tñúḡḡ-án ní taxí Espiritú-gá ndécú ndiḥi-ndo chindee ñàḡḡ-xi xii-ndo, te cuu-ndo dàtná cue sandàdú cue téé xinehe

machití cuáháⁿ-güedé nàá-güedé. Te ducaⁿ sàtnahá-xi cuu-ndo te núu na cùḡḡḡḡ iní-ndó tñúḡḡ Yá Ndióxi.

18 Te vâ dàḡḡá ndéé-ndó càḡḡḡḡ ndiḥi-ndo Yá Ndióxi nàcuáa chindee ñàḡḡ Espiritú-gá xii-ndo, te cãcãⁿ táhú-ndó núú-gá núu ná cuṣṣṣṣ-ndó, te ío cundecu túḡḡḡ-ndo càḡḡḡḡ ndiḥi-ndo-gá, te vâ nátùḡḡ iní-ndó cãcãⁿ táhú-ndó núú-gá cuendá nchaá dava-gá cue ñáyiú cùu cuendá-gá.

19 Te tñàḡḡ cuendá-í cãcãⁿ táhú-ndó núú Yá Ndióxi cuendá sá ná chindee ñàḡḡ-gá xii-í ñiḡḡ-í tñúḡḡ càḡḡḡḡ-í oré càḡḡḡḡ-í tñúḡḡ-gá, te ducaⁿ vâ yùḡḡḡ-í càḡḡḡḡ-í nàcuáa nduu tñúḡḡ sá càḡḡḡḡ nàcuáa naníḡḡ táhú-ó núú ñáyiú tñúḡḡ sá vâḡḡ cùndèdòḡḡ-gá-yu.

20 Te Yá Ndióxi ní cachí-gá sá yùḡḡ cuu-í ìṣṣṣṣ téé cada-í núú-gá càḡḡḡḡ-í tñúḡḡ-gá núú ñáyiú, te diu cuendá tñúḡḡ-án yíḡḡ-í vecaá vitna. Te ío cãcãⁿ táhú-ndó núú Yá Ndióxi cuendá-í cuendá sá yùḡḡ cuyí-í ní yùḡḡ ní iní-í càḡḡḡḡ-í tñúḡḡ-gá núú ñáyiú nàcuáa táú-xi cunduu.

Tñúḡḡ ndéé núú ní ndiḥi-ná

21 Te té Tiquicú téé ío cùu iní-í ndécú ndiḥi-o ichi Xítóhó Jesucristú cùú-dè ìṣṣṣṣ téé ío vâḡḡ quidè ndáá xínú cuèchi-dé núú Xítóhó Jesucristú, téé-án cachí tñúḡḡ-dé xii-ndo nàcuáa cùu ndecu-í ndiḥi nchaá nàcuáa quidè-í cuendá ducaⁿ cùṣṣṣṣ iní-ndó.

22 Te cuendá xiáⁿ núu cuṣṣṣṣ-í tendaha-í-dé quixi-dé núú ndécú-ndó cuendá cachí tñúḡḡ-dé xii-ndo nchàa nàcuáa cùu ndecu-ndí iḡḡ, te ducaⁿ taxí-gá-dé tñúḡḡ ndee iní cundecu ndiḥi-ndo.

23 Te xicãⁿ táhú-í núú Tãtã-ó Dütú Ndióxi ndiḥi núú Xítóhó Jesucristú sá nchàá nchòḡḡ ñáyiú ndècu ndiḥi-í ichi-gá sá diu-gá ná càdá te ío vâḡḡ cuu iní-ndó cùndecu-ndo, te ducaⁿ ío cuu iní tñàḡḡ-ndó, te ío quindáá iní-ndó-gá.

24 Te nchòḡḡ ío cùu iní-ndó Xítóhó Jesucristú, te ñá túú dàḡḡá ndéé-ndó cùu iní-ndó-gá. Te mee Yá Ndióxi ío na chindee chitúḡḡ ñàḡḡ-gá xii-ndo. Te ducaⁿ na cùnduu. Te ío chí càdá ndèe iní-nâ vitna.

TUTÚ NÍ CADÚHA TÊ PÁBLÚ QUIHIⁿ NDAHA ÑÁYIU ÑUÚ FÌLIPÚ

Tê Páblú cadúha-dé tutú quihiⁿ ndaha ñáyiu quide ndáá xĩndecu ichi Xítóhó Jesucristú ndécú ñuú Filipú

¹ Yúhú tê Páblú ndihi té Timùteú cúu-ndí cue tée xĩnu cuechi núú Xítóhó Jesucristú, te tẽndaha-ndí tutú-a véxi ndaha nchòhó cue tée yĩndaha nchaa ñáyiu ndècu ichi Xítóhó Jesucristú, ndihi cue tée chĩndee ñaha xii-ndo, ndihi nchaa dava-gá ñáyiu xĩquide ndáá ndécú ichi-gá ñuú Filipú.

² Te xicáⁿ táhù-í núú Tãtã-ó Dütú Ndióxi ndihi núú Xítóhó Jesucristú sá ná chĩndee chítú ñaha-gá xii-ndo, te ducaⁿ ndí nduú-gá ná cáda te ío váha cuu iní-ndó cũndecu-ndo.

Tê Páblú cáháⁿ ndihi-dé Yã Ndióxi cuendá nchaa ñáyiu ndècu ichi-gá

³ Te ndí tnahá òré ndácú iní ñáhà-í xii-ndo, te ndácáⁿ táhù-í núú Tãtã-ó Dütú Ndióxi sá ndécú-ndó ichi-gá.

⁴ Te ndí tnahá òré ducaⁿ quide-í te ío cùdí iní-í cáháⁿ ndihi-í-gá cuendá-ndó.

⁵ Chi ndéé cúnáhá ní sándáá iní-ndó-gá ní nguíta-ndo tnahá-ndó quide váha-ndo ndècu-ndo cuendá sá quindáá iní ñáyiu tñúhu Xítóhó Jesucristú.

⁶ Te yúhú sàni ndáá iní-í sá Yã Ndióxi Yáá ní quesaha chĩndee ñaha xii-ndo quide váha-ndo ndècu-ndo, te ñuú-ndó chĩndee ñaha-gá xii-ndo cáda váha-ndo cũndecu-ndo ndéé ná sáá nduu quixi tucu Xítóhó Jesucristú.

⁷ Te ducaⁿ tnahí tàù-xi caní iní-í sá cúu-xi-ndó, chi ío cùu iní ñáhà-í xii-ndo. Te tnahá-ndó ío chĩndee chítú ñaha Yã Ndióxi xii-ndo ndècu-ndo, te ñuú-ndó ducaⁿ chĩndee ñaha-gá xii-ndo tnahá-ndó cuéi vitna yihí-í vecaá, te ñuú-ndó ducaⁿ chĩndee ñaha-gá xii-í cuéi òré cuáháⁿ-í núú cué ñáyiu ñá túú tnahá iní tñúhu-gá, chi ñihí-í tñúhu ñandanchocáva-í núú ná tñúhu cáháⁿ-yu cuendá-gá, te nchaa ñáyiu xãháⁿ-í xii-yu sá tñúhu-gá cúu-xi tñúhu ndáá cuiti.

⁸ Te mee Yã Ndióxi náhá ndáá-gá sá yúhú ío cùu iní ñáhà-í xii-ndo dàtná cúu iní ñáhà mée Xítóhó Jesucristú xii-o.

⁹ Te xicáⁿ táhù-í núú Yã Ndióxi sá díú-gá ná chĩndee ñaha-gá xii-ndo te uuⁿ-gá cuita cuu iní tnahá-gã-ndó quihiⁿ, te ducaⁿ ío váha cuita cutnuni iní-ndó nchaa nacuaá sàni iní-gá cada-ndo, te ducaⁿ ío váha cuita cutnuni tucu iní-ndó nacuaá cundecu-ndo.

¹⁰ Te ducaⁿ cùnuni tucu iní-ndó nchaa sá ío-gá váha xini ñuhu-xi cada-ndo, te ducaⁿ

te cuu-ndo ñáyiu cada mee-ni sá váha, te ducaⁿ ñá túú tnahí ná cùmání-ndó núú Yã Ndióxi ndéé ná sáá nduu quixi tucu Xítóhó Jesucristú.

¹¹ Te ñuú-ndó Xítóhó Jesucristú chĩndee ñaha-gá xii-ndo cáda-ni-ndo nchaa núú sá váha nacuaá cuini Yã Ndióxi. Te sá dúcáⁿ ná cáda-ndo te ío cada cáhnu-ndo-gá, te nchaa dava-gá ñáyiu cáháⁿ váha-yu cuendá-gá.

Xítóhó Jesucristú ío cùnuu-gá ndécú ndihi-gá té Páblú

¹² Te nchaa nchòhó ñáyiu ndècu ndihi-í ichi Xítóhó Jesucristú na cáhí tñúhu-í xii-ndo sá úúⁿ-gá tá xitè nuu tñúhu-gá vitna yihí-í vecaá.

¹³ Te nchaa cue tée cùu sandadú xĩndecu vechúⁿ núú ndécú tée cùnuu xini-güedé sá sá cuendá sá cáháⁿ-í tñúhu Xítóhó Jesucristú duha yihí-í vecaá, te ñuú-ndó ducaⁿ sá xini nchaa dava-gá ñáyiu sá sá cáháⁿ-í tñúhu-gá duha yihí-í vecaá.

¹⁴ Te cuendá sá dúhá yihí-í vecaá xiãⁿ ío-gá vai ñáyiu ndècu ichi Yã Ndióxi ta cùnuni-gá iní-yu sá cúu-gá ñuú Yáá ío quide ndáá, te uuⁿ-gá tá cùyí-yu cáháⁿ-yu tñúhu-gá, te ñá túú tnahí-gá yúhú-yu cáháⁿ-yu.

¹⁵ Te na cáhí-í tñúhu ndáá-í xii-ndo sá dáva ñáyiu cáháⁿ-yu tñúhu Xítóhó Jesucristú cuendá-ni sá cúu cuèdú iní ñáhà-yu xii-í sá ío chĩndee ñaha-gá xii-í cáháⁿ-í tñúhu-gá. Te ducaⁿ quide-yu chi cuini-yu náá ndihi ñáhà-yu xii-í, dico dáva-yu chi ío váha sàni iní-yu cáháⁿ-yu tñúhu-gá.

¹⁶⁻¹⁷ Te ñáyiu-án cáháⁿ-yu tñúhu-gá chi cùu iní ñáhà-yu xii-í, te sa nahá-yu sá sá cuendá sá cáháⁿ váha-í cuendá tñúhu-gá núú ñáyiu ñá túú tnahá iní tñúhu-gá, cuendá xiãⁿ yihí-í vecaá. Te dava-gá-yu cáháⁿ-yu tñúhu Xítóhó Jesucristú cuendá-ni sá cuini-yu cuu sá váha xii mée-yu, te ñá díú sá cáháⁿ-yu cuendá sá sàni váha iní-yu. Te ducaⁿ quide-yu chi cuendá cuini-yu sá ñandi-gá cada ñaha-güedé xii-í.

¹⁸ Dico ío cùdí iní-í sá cáháⁿ-yu tñúhu Xítóhó Jesucristú cuéi cùu váha iní-yu àdi ñá túú cùu váha iní-yu cáháⁿ-yu.

Te ñuú-ndó ducaⁿ cùdí iní-í núú cuáháⁿ núú vèxi.

¹⁹ Te cùnuni iní-í sá sá cuendá nchaa sá quide ñaha-güedé xii-í, cuendá xiãⁿ cada váha ñaha Yã Ndióxi xii-í, chi nchòhó ío cáháⁿ ndihi-ndo-gá cuendá-í, te Espiritú ní taxi Xítóhó Jesucristú ndécú ndihi-o ío chĩndee ñaha-xi xii-í.

²⁰ Te cuini-í sá ñá túú tnahí ná cùmání-í núú Yã Ndióxi cuendá sá vá cúu cáháⁿ núú-í, te cùnuni iní-í sá díú-gá chĩndee ñaha-gá xii-í. Te cuini tucu-í sá ío cùyí-í cáháⁿ-í tñúhu-gá vitna dàtná tá quide-í véxi, te ducaⁿ ío cada ñuú-í Xítóhó Jesucristú cuéi vitna

nini ndècu-í ñuyúú-a te cuèi na cùú-í ducaⁿ-ni càda nínu-í-gá.

²¹ Te nini ndècu-í ñuyúú-a te Xítoho Jesucristú ío cùnuu-gá ndécú ndìhi ñaha-gá xii-í, te na sáá nduu cùú-í te ío-gá váha tnahá-í chi nucúndecu-í ndìhi-gá.

²² Te núu na cùndecu-gá-í ñuyúú-a te cada-gá-í chiúⁿ sá cùú-xí Yá Ndióxi, te ñá cùtnúni iní-í nása cada-í núu sá cùndècu-í ádi sá cùú-í.

²³ Te ío vâi sani iní-í te cuini-í cuú-í chi ío-gá váha cundecu-í núú ndécú Xítoho Jesucristú.

²⁴ Dico sá cùú-xí nchòhò chi ío xini ñuhu-xi cundecu-í.

²⁵ Te cùtnuní ndáá iní-í sá ñⁿ tnúhu ndáá càháⁿ-í, te cùtnuní tucu iní-í sá cùndècu-ni-í cundecu ndìhi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gá iní-ndó Xítoho Jesucristú quíhíⁿ, te ducaⁿ ío cudúú iní-ndó cùndecu-ndo.

²⁶ Te ducaⁿ te uuⁿ-gá cachí-ndó sá ío càhnu cuu Xítoho Jesucristú cuendá sá ní dácácu ñaha-gá xii-í ndécú ndìhi ñaha-í xii-ndo.

²⁷ Te xini ñuhu-xi cada-ndo nchaa nacuaá càháⁿ tnúhu Xítoho Jesucristú. Te núu ní ndacu-í véxi coto ñaha-í xii-ndo, te dává-áⁿ quini ndáá-í sá ndécú-ní-ndó ichi Xítoho Jesucristú. Dico núu ñá túú ní ndacu-í quixi coto ñaha-í xii-ndo ña, te diu-ni nihí-í tnúhu sá ndécú-ní-ndó ichi-gá, te nihí tucu-í tnúhu sá ñⁿ-ní cùu-ndo ndecu-ndo, te nihí tucu-í tnúhu sá ñⁿnuu nducu ndee-ndo caháⁿ-ndó tnúhu Yá Ndióxi núú ñáyiú, tnúhu sá sàndáá iní-ndó.

²⁸ Te ñá túú yùhú-ndó nchàa sá quidé ñaha ñáyiú cùu úhú iní ñáhá xii-ndo, te sá dúcáⁿ quide-ndo ñá túú yùhú-ndó nchàa sá quidé ñáhá-yu xii-ndo, te ndixi túu iní-yu sá nchòhó ndécú-ndó ñⁿ ichi núú nánihí tãhú-ndó, te ñáyiú-áⁿ cuíta nihnú-yu, chi ducaⁿ ní cachí Yá Ndióxi cunduu.

²⁹ Te mee Yá Ndióxi ní taxi-gá tnúhu ndee iní sá quindáá iní-ó Xítoho Jesucristú, te ñá díú-ní sá quindáá iní-ó-gá chi tnahá ndoho-o cuendá-gá.

³⁰ Te tnahá nchòhó ndóhó-ndó cuendá-gá vitna, te nchòhó ní xini nuú-ndó nàcuáa ní ndoho-í, te vitna nihí-ndó tnúhu nchaa nàcuáa ndòho tucu-í.

2

Xítoho Jesucristú ñá túú ní quide nínu-gá mée-gá dico Yá Ndióxi ní quide nínu ñaha xii-gá

¹ Te Xítoho Jesucristú dácàhu iní ñáhá-gá xii-ndo nàcuáa cundecu-ndo, te cùu iní ñáhá-gá xii-ndo nàcuáa cuu váha iní-ndó cùndecu-ndo, te ndècu ndìhi-ndo Espiritú Yá Ndióxi, te ío cùndahú iní tnahá-ndó.

² Te xiáⁿ núu càháⁿ-í dóho-ndo sá ío cuu ñⁿnuu-ni-ndo cùndecu-ndo nacuaá ío-gá cudúú iní-í, te ñⁿ-ni cùu iní tnahá-ndó, te ñⁿ-ni càni iní-ndó, te ñⁿ-ni càda-ndo.

³ Te vá cáda nínu-ndo mée-ndo nducu-ndo mee-ni sá cùú-xí mée-ndo, chi cunduu ndáhú iní-ndó, te cani iní-ndó sá tnahá ñáyiú-ndo ío-gá cùnùú-yu dácúúxi mée-ndo.

⁴ Te ni vá càni iní-ndó nducu-ndo mee-ni sá váha sá cùú-xí mée-ndo, chi nducu-ndo sá cùú-xí tnahá cuendá tnahá ñáyiú-ndo.

⁵ Te ío váha cani iní-ndó nàcuáa cundecu-ndo dàtná quidé mée Xítoho Jesucristú.

⁶ Te ñⁿ-ni cùu Xítoho Jesucristú ndìhi Yá Ndióxi. Te cuèi ducaⁿ dico mee Xítoho Jesucristú ní sani iní-gá sá ñà túú cùyica cundecu-gá taxi tnùnì-gá ndìhi Yá Ndióxi.

⁷ Te ní dàñá-gá sá cùnùu-gá andiú te ní quixi-gá ñuyúú-a ní cuu-gá ñⁿ ñáyiú, te ní quide-gá dàtná quidé ñⁿ téé xinu cuechi.

⁸ Te ní cuu-gá ñⁿ téé dàtná ndàa cue téé xindecu ñuyúú-a, te ní cuu-gá ñⁿ téé ío ndáhú iní-xi chi ñá túú ní quide nínu-gá mée-gá, te ní sàndáá iní-gá ní quide-gá nchaa nàcuáa ní xáhaⁿ Yá Ndióxi xii-gá cùtnáhá ní quixi-gá ñuyúú-a. Te sá dúcáⁿ ní sàndáá iní-gá xiáⁿ ní xihí-gá núú cùrúxi.

⁹ Te xiáⁿ ío ní quide nínu ñaha Yá Ndióxi xii Xítoho Jesucristú cuendá ío cunuu-gá. Te ní xáhaⁿ Yá Ndióxi xii Xítoho Jesucristú sá cùú-gá Xítoho nchaa ñáyiú ndècu ñuyúú-a.

¹⁰ Te ducaⁿ ní quide Yá Ndióxi cuendá nchaa Espiritú ndécú andiú, ndìhi nchaa ñáyiú ndècu ñuyúú-a, ndìhi nchaa ñáyiú ní xihí nguúñi xítí-yu ndìhi nchaa espíritú-áⁿ te cachí-yu ndìhi-xi sá ío càhnu cuu Xítoho Jesucristú.

¹¹ Te nchaa-yu cachí-yu sá Xítoho Jesucristú cùú-gá Yáá taxi tnùnì. Te sá dúcáⁿ càda-yu, te quide cahnú-yu Dútú Ndióxi.

Ñáyiú ndècu ichi Xítoho Jesucristú cùu-yu dàtná ñⁿ ñuhu

¹² Te xiáⁿ núu nchaa nchòhó ñáyiú ío cùu iní-í cuini-í sá quindáá iní ñáhá-ndó xii-í dàtná ní quide-ndo cùtnáhá ní xindecu ndìhi ñaha-í xii-ndo, chi dává-áⁿ ñà túú tnahá ní dàña ndeé-ndó ní sàndáá iní ñáhá-ndó xii-í. Te cuini-í sá úúⁿ-gá quindáá iní ñáhá-ndó xii-í vitna ñá túú ndècu ndìhi ñaha-í xii-ndo. Te ío nducu ndèe-ndo cada-ndo nchaa nacuaá tãú-xi cunduu ndeé ná sáá nduu nduu tãhú-ndó cùndecu-ndo ndìhi Xítoho Jesucristú, te ío canehe-ndo sá yíñuhu núú-gá.

¹³ Te Yá Ndióxi ío váha dácàhu iní ñáhá-gá xii-ndo càda-ndo nchaa nacuaá cuini mée-gá, te diu-ni mee-gá chindee ñaha-gá xii-ndo dúcáⁿ quide-ndo.

14 Te vá cání iní-ndó nǎ tnúhu cáháⁿ-ndó cuèndá ñáyiú, te ní ñá túú nǎndi tnúhu cútñaha-ndo ndihí-yu,

15 te ducaⁿ te cuu-ndo ñáyiú ñá túú cuèchi-xi núú Yá Ndióxi. Te nchòhó ñáyiú cuu déhe Yá Ndióxi, ñá túú tnàhí-gá ná cumání-ndó núú-gá nini ndècu-ndo tnuú nchaa ñáyiú ndècu ichi cuehé ichi duha ñuyú-a, ñáyiú cuihna iní-xi. Te cuu-ndo dátñá chodíní sǎ dáyehé núú nee,

16 te ducaⁿ chí dácua-ha-ndo ñáyiú tnúhu Yá Ndióxi tnúhu sǎ cáháⁿ nàcuáa naníhí tǎhú-yu. Te núú ducaⁿ-ni na càda-ndo te òrè ná sǎá nduu càda ndáá Xitohó Jesucristú nchaa yicá cuèchi ñáyiú, te dǎvá-áⁿ vá cúú cáhaⁿ núú-í, chí ñá túú diò ducaⁿ ní sǎhni iní-í cada-í nchaa chiúⁿ ní tǎhú-gǎ.

17 Te nchòhó ío váha quide-ndo ndecu-ndo ichi Yá Ndióxi chí sǎndáá iní-ndó-gǎ, te yóhú cahni ñaha-güedé xii-í cuèndá nchaa sǎ váha quide-ó. Te xǎáⁿ ío cudíí iní-í te cudíí tucu iní-í dátñá cudíí iní-ndó cuèndá nchaa sǎ váha quide-ndo.

18 Te diu-ni ducaⁿ ío chí cudíí iní dátñá cudíí iní mée-í cuèndá nchaa sǎ yáha-í ndècù-í.

Té Timùteú ndihi té Epafrodítú

19 Te núú Xitohó Jesucristú ná càchí-gǎ te ndihí-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òrè ndixi-dé canaha-dé tnúhu ndixi núú nása cùu ndecu-ndo, te tnàhá yúhú ío cudíí iní-í tucu.

20 Te núú ncháá cuè téé ndècu ndihí-í te ìⁿdi-ni té Timùteú-a cùu-dé téé ío váha sǎni iní-xi dátñá sǎni iní-í, chí diu tnàhí-ni-dé ío sǎni iní-dé núú nása ndècu-ndo.

21 Chi dǎva-gǎ-güedé mee-ni sǎ cúú-xi mée-güedé ío sǎni iní-güedé, te ñá túú sǎni iní-güedé cada-güedé chiúⁿ tahu Xitohó Jesucristú.

22 Te nchòhó sa xini-ndó sǎ tē Timùteú-a cùu-dé ìⁿ téé quide váha chí nǎndi sǎ tá yáha-dé véxi te quide ndee iní-dé. Te cùu-dé dátñá ìⁿ déhe-í ndécú ndihí ñaha-dé xii-í xínú cuèchi-ndí núú Xitohó Jesucristú cáháⁿ-ndí tnúhu-quide-gǎ núú ñáyiú.

23 Te òrè ná cùtnuní núu nása cada ñaha-güedé xii-í te ndihí-ni tendaha-í-dé quixi coto ñaha-dé xii-ndo.

24 Te sǎni iní-í sǎ Xitohó Jesucristú cada-gǎ te tnàhá mée-í ío ndihí quixi coto ñaha-í xii-ndo.

25 Te tnàhá sǎni iní-í sǎ ío xini ñuhu-xi tendaha-í té Epafrodítú téé ndècu ndihí-o ichi Xitohó Jesucristú ndixi coto ñaha-dé xii-ndo, chí tnàhá-dé quide-dé chiúⁿ-gǎ te quide ndee iní-dé tnàhá-dé nǎndi yáha-dé sǎ cuèndá-gǎ, te diu mee-ndo ní tendaha-ndo-dé véxi-dé cuèndá coto ñaha-dé xii-í.

26 Te ducaⁿ cuini-í tendaha-í-dé ndixi-dé chí mee-dé ío sǎni iní-dé ndixi cáháⁿ ndihí ñaha-dé xii-ndo, te ío ndihú iní-dé sǎ ní ndihí-ndó tnúhu sǎ cùhú-dé ní cùu.

27 Te ndáá sǎ ní cùhú-dé chí luha ndiquiⁿ-ná cuú-dé ní cùu, dico Yá Ndióxi ní cundahú iní ñáhá-gǎ xii-dé ní quide tátña ñaha-gǎ te ní ndúha-dé. Te ñá diú-ni mée-dé ducaⁿ ní cundahú iní ñáhá-gǎ xii-dé chí tnàhá yúhú ío ní cundahú iní ñáhá-gǎ xii-í, chí núu ní xihí-dé te ío-gǎ ndihú iní ní cùu.

28 Te xǎáⁿ ío ndihí cuini-í tendaha-í-dé ndixi-dé cuèndá òrè nasáá-dé núú-ndó te ío cudíí iní-ndó, te ducaⁿ yúhú ñá túú-gǎ ná cani iní-í.

29 Te òrè nasáá-dé te ío cudíí iní-ndó nàqueheⁿ cuèndá-ndó-dé, te ducaⁿ ío ndacáⁿ tǎhú-ndó núú Xitohó Jesucristú cuèndá-dé. Te ío canehe-ndo sǎ yíñuhu núú nchaa cue téé quide dátñá quide-dé.

30 Chí téé-a sa luha ndiquiⁿ-ná cuú-dé ní cùu sǎ xínú cuèchi-dé núú Xitohó Jesucristú, te ní sani iní-dé sǎ ñá túú ná cada-xi cuèi na cùu-dé ní quide-dé nchaa chiúⁿ sǎ cumání cada-ndo cuèndá-í ní cùu.

3

Ñáyiú cùndáá núú Yá Ndióxi

1 Te vitna nchaa nchòhó ñáyiú ndècu ndihí-í ichi Xitohó Jesucristú cáháⁿ ndàhú-í núú-ndó sǎ ío cudíí iní-ndó sǎ yíndàha ñaha-gǎ xii-ndo. Te yúhú ñá túú cùu dusaⁿ-í tee tucu-í nchaa tnúhu sǎ sǎ ní dǎnèhé ñáhá-í xii-ndo, chí cùu-xi tnúhu sǎ ío chindee ñaha-xi xii-ndo.

2 Te ío quihi iní-ndó vá cáda cuèndá-ndó ní ìⁿ tnúhu cáháⁿ cue téé ío cuihna iní-xi ñá túú tnàhí cuini cada sǎ váha, chí cue téé-áⁿ nèhé-güedé iní iná chí càchí-güedé sǎ ncháá cuè téé xini ñuhu-xi cuáha-güedé sèñá ñi-güedé cuèndá ducaⁿ cùdiu-güedé núú Yá Ndióxi.

3 Dico nchoo chí cùdiu-o núú Yá Ndióxi cuèi dǎva-o sǎ ní ngúndecu sèñá ñi-o te dǎva-o ñáhá, chí Espiritú-gǎ chíndèe ñaha-xi xii-o quide-gǎ nchaa nacúaa tǎu-xi cunduu cuèndá cuu càhnu-gǎ. Te ío cudíí iní-ó càchí-ó sǎ ío càhnu cuu Xitohó Jesucristú, te ñá túú sǎni iní-ó sǎ sǎ cuèndá nchaa sǎ váha quide-o cùdiu-o núú Yá Ndióxi.

4 Te núú dicó cuèndá nchaa sǎ váha quide-o cùdiu-o núú Yá Ndióxi, te yúhú sa ama-gǎ cùdiu-í núú-gǎ cuèndá nchaa sǎ ní quide-í ní cùu te núú dicó ducaⁿ. Te ío cue téé càchí-güedé sǎ cùdiu-güedé núú Yá Ndióxi cuèndá nchaa sǎ váha quide-güedé. Te yúhú uuⁿ-gǎ ducaⁿ cáháⁿ-í núu dicó sǎ cúú chí yúhú ní xidó-gǎ-í ní quide-í dǎcúúxí dǎva-gǎ-güedé.

⁵ Te núú ùná-ni nduu sá ní cacu-í te ní sáha-güedé señá ñi-í, te yúhú cùu-í téé is-raél, te mei ñani tnáhá ndíi Benjamín téé ní xíndecu ndéé sanaha cùu-í. Te cáháⁿ-í tnúhu hëbreú tnúhu cáháⁿ tãtà-í ndíhi nãná-í, te ní cundíhi-í nchaa cue téé cùu fariséú, te ní cãncícuⁿ nihnu-í nchaa nãcuáa ní cáháⁿ ndíi Moisés dàtná xíquide mee-güedé.

⁶ Te yúhú ní sani iní-í sá ñiⁿ ichi ndáá ndécú-í ní cùu, te ío ní cuiñí-í cunu cuechi-í núú Yá Ndióxi, núu xiáⁿ ndúuⁿ nãndi sá ní quide-í nchaa ñáyiú ndécú ichi Xítohó Jesucristú, te vá yóo ñiⁿ ní xóo cùñaha ñiⁿ tnúhu xii-í cachí-yu sá ñà túú quide-í nãcuáa ní cáháⁿ ndíi Moisés ní cùu.

⁷ Te nchaa sá sání iní-í sá ñiⁿ nãndíhi nchícúⁿ nihnu-í ní cùu, ní cutnùni iní-í sá ñà túú tnáhi chindee ñaha-xi nacuaa cundáá-í núú Yá Ndióxi, núu xiáⁿ duuⁿ ní xehndé iní-í sá vá chindee ñaha-xi cuendá sá ní cuiñí-í cundecu ndíhi-í Xítohó Jesucristú.

⁸ Te nchaa sá cãchí ñáyiú chindee ñaha cundáá-ó núú Yá Ndióxi ní cutnùni iní-í sá ñà túú chindee ñaha-xi. Te yúhú ní cutnùni iní-í sá ñiⁿ gá váha tnáhá tnúhu-o ndíhi Xítohó Jesucristú. Te nchaa sá sání iní-í chindee ñaha xii-í ní cùu, ñà túú-gã sãndáá iní-í sá chindee ñaha-xi vitna chi ní cutnùni iní-í sá ñà túú nãndíhi-xi. Te ducaⁿ quide-í ñà túú-gã sãndáá iní-í nchaa xiáⁿ sá chindee ñaha-xi, chi cuiñí-í sá úuⁿ-gã cuita tnáhá tnúhu-o ndíhi Xítohó Jesucristú quíhiⁿ,

⁹ te cuu ñiⁿ nuu-í ndíhi-gã, te ducaⁿ-ni cundáá-í núú Yá Ndióxi dàtná cundáá-í vitna, dico ñà díú cuendá sá nchícúⁿ nihnu-í nãcuáa ní cáháⁿ ndíi Moisés ní cùu, chi cuendá sá sãndáá iní-í Xítohó Jesucristú. Te Yá Ndióxi ní quide-gã cundáá-í núú-gã, te ducaⁿ chi ní sãndáá iní-í Xítohó Jesucristú.

¹⁰ Te cuiñí-í cutnùni iní-í nchaa nãcuáa sání iní Xítohó Jesucristú, te cuiñí-í sá ñiⁿ chindee ñaha-gã, te diu-ni-gã cúu-gã Yáa ní xíhi te ní ndoto-gã, te ducaⁿ cuiñí-í cada-gã cuendá cada-í nchaa nãcuáa cuiñí-gã. Te cuiñí-í tnáhá-í ndoho-í dàtná ní ndoho-gã. Te yúhú cuiñí-í sá vá cada-í ní ñiⁿ sá ñà túú tnáhá iní Yá Ndióxi, chi diu cuendá-áⁿ ní xíhi Xítohó Jesucristú.

¹¹ Te cuiñí-í sá Yá Ndióxi cachí-gã te tnáhá-í ndoto na sãá nduu ndòto nchaa ñáyiú sa ní xíhi ní xíndecu ichi-gã.

Cada-o nchaa nãcuáa tãu-xi cunduu cuendá ñi-í ó sã ndúú tãhú-ó

¹² Te cãmáni-gã cada-í nchaa nãcuáa cáháⁿ-í-a, te cumáni-gã cada-í nchaa nãcuáa cáháⁿ Yá Ndióxi cuendá sá ñà túú-gã ná cumáni-í núú-gã. Te ío ndécú ndee-í nchícúⁿ nihnu-í quide-í nãcuáa ducaⁿ ñà túú-gã ná cumáni-í núú-gã, chi diu cuendá-áⁿ ní cáháⁿ ñáhá Xítohó Jesucristú xii-í.

¹³ Te nchaa nchòhó ñáyiú ndécú ndíhi-í ichi Xítohó Jesucristú cãchí tnúhu-í xii-ndo sá cutnùni ndáá iní-í sá vitná cãmáni-gã cada-í nchaa nãcuáa ñà túú-gã ná cumáni-í núú-gã. Te ní níhi-í ñiⁿ sá ío xíni ñuhu-xi cada-í te xiáⁿ quide-í, te ñà túú-gã quide cuendá-í nchaa sá ní xóo cada-í, te ío ndécú ndee-í quide-í nchaa nãcuáa cáháⁿ Yá Ndióxi.

¹⁴ Te ndécú ndee vihi-í nchícúⁿ nihnu-í quide-í nchaa nãcuáa cáháⁿ-gã, te diu-ni ducaⁿ cada-í ndéé ná sãá nduu sãá-í núú ndécú-gã taxi-gã sá ndúú tãhú-í. Te ducaⁿ tnáhi sa ní cáháⁿ ñáhá-gã xii-o cundecu-o ndíhi-gã, te ducaⁿ ní cáháⁿ ñáhá-gã xii-o sá cuendá Xítohó Jesucristú chi tnáhá tnúhu-o ndíhi-gã.

¹⁵ Te nchaa nchòhó ñáyiú quide váha ndécú ichi Yá Ndióxi xíni ñuhu-xi cani iní-ndo dàtná sání iní-í-a, ãdi núu dava-ndo ñà túú sání iní-ndo dàtná sání iní-í-a, dico mee Yá Ndióxi dandixi túu-gã iní-ndo te cutnùni iní-ndo nãcuáa cada-ndo.

¹⁶ Te xíni ñuhu-ni-xi cada-o nchaa nãcuáa ta quide-o véxi.

¹⁷ Te nchaa nchòhó ñáyiú ndécú ndíhi-í ichi Xítohó Jesucristú cáháⁿ-í dóho-ndo sá cãncícuⁿ nihnu-ndo cada-ndo dàtná quide-í. Te cundehe-ndo nãcuáa quide nchaa ñáyiú sa nchícúⁿ nihnu nchaa nãcuáa dãnehé ñáhá-í xii-ndo cuendá ducaⁿ cada-ndo tnáhá-ndo.

¹⁸ Te sa ní cuu vai xito cachí tnúhu-í xii-ndo sá ío ñáyiú ñà túú tnáhi cùu váha iní-xi sá ní xíhi Xítohó Jesucristú núú curúxi cuendá sá nãníhi tãhú-ó. Te ndíhi ndéhe núu-í dãndacu iní ñáhá-í xii-ndo cuendá-yu.

¹⁹ Te sãá nduu te nchaa ñáyiú ducaⁿ xíquide-áⁿ cuita nihnú-yu, chi mee-ni nchãa sá cuèhé sá dúhá ñuhu iní-yu te diu-ni nchaa xiáⁿ cúnúu quide-yu, te cucahaⁿ núu-yu cuendá nchaa sá quide-yu núu dicó sá cúu, dico ñáhá chi da quide cahnú-yu mée-yu cuendá nchaa xiáⁿ. Te mee-ni nchãa sá ío ñuyú-a ñuhu iní-yu.

²⁰ Dico nchoo chi andíu ndécú núú cúu ñúu-ó, te ndétu cahnu-o sãá nduu quíxi tucu Xítohó Jesucristú nacuaa ñaha-gã xii-o. Te diu-ni-gã cúu-gã Yáa ní dácacu nihnu ñaha xii-o núú ùhú núú ndàhú.

²¹ Te yiqui cùñú-ó chi vá cúdi-xi cundecu-xi dàtná cáá-xi vitna, dico mee Xítohó Jesucristú nadama-gã yiqui cùñú-ó te ndada-gã dàtná ní nduu yiqui cùñú mée-gã cùtnáhá ní ndoto-gã. Te ducaⁿ cada-gã chi ndacu-gã quide-gã nchaa sá váha cãchí iní-gã, te ducaⁿ tãxi tnuní-gã nchaandi túhú sá ío.

4

Ío cudíi iní-ó sã ndécú-ó ichi Xítohó Jesucristú

¹ Te nchaa nchòhò ñáyíu ío cùu iní-í ndécú ndìhi-í ichi Xìtòhò Jesucristú ío cuíní-í càháⁿ ndìhi ñàha-í xii-ndo. Te ío cùdíí iní-í cuèndá nchaa sá vâha quide-ndo chi ñá túú ní xíta chiúⁿ Yá Ndiòxí ní quide-í sá cùú-xí-ndó, te ñíu-ni nchòhò ñáyíu ío cùu iní-í càháⁿ-í dóho-ndo sá cànchícúⁿ nihnu-ni-ndo ichi Xìtòhò Jesucristú.

² Te yòhò tá Vòdiá ndìhi yòhò tá Síntiqué càháⁿ ndàhú-í núú-ndó sá cùú ñíⁿnuu-ndo cundecu-ndo ichi Xìtòhò Jesucristú.

³ Te yòhò té cùndìhi-í quide ndáá quidé nchaa chiúⁿ quide-í, càháⁿ ndàhú-í núú-n sá chindèe tnúhu-n úú ñáyíu ñíhí-áⁿ cuèndá sá ná cùu ñíⁿnuu-yu cundecú-yu, chi cùtnàhá ní xíndecu ndìhi ñàhá-yu xii-í ío ní chindèe ñàhá-yu xii-í, ndìhi té Clémenté, ndìhi nchaa dava-gá-yu ní quide-ndí chiúⁿ Xìtòhò Jesucristú, te nchaa ñáyíu-áⁿ sa yòdo tnuní-yu núú tütú Yá Ndiòxí sá ndúú tãhù-yu cundecú-yu ndìhi-gá ní caa ní quíhíⁿ.

⁴ Te nchaa-ni nduu ío cùdíí iní-ndó sá ndécú-ndó ichi Xìtòhò Jesucristú. Te càháⁿ-ni tucu-í dóho-ndo sá cùdíí ndisa iní-ndó!

⁵ Te ío vâha cuu iní-ndó càháⁿ ndìhi-ndo ñáyíu cuèndá ná cùtnuní iní-yu sá cùú-ndó ñáyíu vâha iní-xi, chi sa ta cùyatni nduu quixi tucu Xìtòhò Jesucristú.

⁶ Te ñá túú tnàhí ná cani iní-ndó te núu nása cùu ndecu-ndo, chi càháⁿ ndìhi-ndo Yá Ndiòxí cuèndá sá ná chindèe ñàha-gá xii-ndo. Te ío ndacáⁿ tãhú-ndó núú-gá.

⁷ Te núu ducaⁿ na càda-ndo te Yá Ndiòxí cada-gá te ío vâha cuu iní-ndó cundecu-ndo. Te nchoo ñáyíu ñá túú cùtnuní iní-ó nása quide-gá ndéé ducaⁿ ío vâha cùu iní-ó, te ducaⁿ ío vâha cùu iní-ó chi cùu ñíⁿnuu-o ndìhi Xìtòhò Jesucristú.

Mee-ni sá vâha cuhuⁿ iní-ó

⁸ Te càháⁿ ndàhú tucu-í núú nchaa nchòhò ñáyíu ndècu ndìhi-í ichi Xìtòhò Jesucristú sá mée-ní sá vâha cuhuⁿ iní-ndó. Te xini ñíhu-xi cuhuⁿ iní-ndó mée-ni nchaa tnúhu ndáá, ndìhi nchaa tnúhu yíñúhu, ndìhi nchaa tnúhu sá ío cùdíí iní-ó, ndìhi nchaa tnúhu sá ío víi ío vâha cuáháⁿ, ndìhi nchaa tnúhu sá ñá túú ñíhu tnàhá tnúhu cuèhé, ndìhi nchaa tnúhu sá càchí ñáyíu vâha, ndìhi nchaa dava-gá tnúhu sá sání iní mée-ndó sá ío vâha te ñíu-ni nchaa xiáⁿ cuhuⁿ iní-ndó.

⁹ Te cùtnàhá ní xíndecu ndìhi ñàhá-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xiáⁿ càháⁿ-í dóho-ndo sá vâ dáñá ndéè-ndó càda-ndo, te ñíu-ni ducaⁿ vâ dáñá ndéè-ndó càda-ndo nchaa nacuáa ní quide-í ní xini-ndó. Te núu ducaⁿ na càda-ndo te Yá Ndiòxí Yáá quidé ío vâha cùu iní-ó ndècu-o cundecu ndìhi ñàha-gá xii-ndo.

Ñáyíu ñíuú Filipú ndécú ichi Xìtòhò Jesucristú sãñàhá-yu sá ndúú tãhú té Pãblú

¹⁰ Te cùdíí víhí iní-í ndacáⁿ tãhù-í núú Xìtòhò Jesucristú sá ní ndacu iní ñàhá-ndó xii-í, dico ñá díú sá ñá túú ñíhu iní ñàhá-ndó xii-í chi dicó sá ñá ñíhí-ndó nàcuáa cada-ndo chindèe ñàha-ndo xii-í ní cùu.

¹¹ Te ñá díú sá dúhá càháⁿ-í te cani iní-ndó sá càchí tnúhu-í xii-ndo sá ío ñíⁿ sá cùmání xii-í, chi yúhú cùu vâha-ni iní-í ñíu-í xii-í àdi ñá túú ío.

¹² Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te ducaⁿ ní cutúhá-í quide-í cuèndá nchaa nàcuáa ta yâha-í véxi.

¹³ Te nchaa ndàcu-í quide-í chi Xìtòhò Jesucristú chindèe ñàha-gá xii-í.

¹⁴ Te nchòhò ío vâha ní quide-ndo ní cundàhú iní ñàhá-ndó xii-í ní chindèe ñàha-ndo vitna ndecu ndìhi-í tnúndòho.

¹⁵ Te nchòhò cue ñáyíu ñíuú Filipú sa ñàha-ndo nacuáa ní cuu cùtnàhá ní ngúita-í càháⁿ-í tnúhu Xìtòhò Jesucristú distritú Macèdoniá, te cùtnàhá ní ndee-í distritú-áⁿ te ñíu tnàhí-ni nchòhò ní taxi-ndo sá ndúú tãhù-í, te nchaa ñáyíu ndècu ichi Xìtòhò Jesucristú dava-gá xichi ñá túú tnàhí ni chindèe ñàhá-yu xii-í.

¹⁶ Te cuéí cùtnàhá ní xíndecu-í ñíuú Tesalònica titní xito ní tendaha-ndo sá ndúú tãhù-í sá ní cutnùní iní mée-ndó ní xini ñíhu-í.

¹⁷ Te vâ cání iní-ndó sá sá dúhá càháⁿ-í te cuíní-í nándi-gá taxi tãhù-ndó, te duha càháⁿ-í chi Yá Ndiòxí ío-gá vai sá vâha cada ñàha-gá xii-ndo sá dúcáⁿ quide-ndo.

¹⁸ Te ní xidó vai nchaa sá xini ñíhu-í ndécú ndìhi-í vitna, te ducaⁿ ío vai sá ndécú ndìhi-í ní cuu chi ní tendaha tucu-ndo sá ndúú tãhù-í véxi ndìhi té Epafrodítú. Te tãhú-a cùu-xi datná ñíⁿ tãhú sá ní sàha-ndo mée Yá Ndiòxí, te cùu víi cuu vâha iní-gá sá dúcáⁿ ní quide-ndo.

¹⁹ Te núu ná cùú sá xini ñíhu-ndo, te mee Yá Ndiòxí ío vai taxi-gá chi ío vai sá ndécú ndìhi-gá, te ducaⁿ càda-gá chi ndècu ndìhi-o Xìtòhò Jesucristú.

²⁰ Te vitna nchaa-o chí ná càchí-ó sá ío càhnu cuu Tátá-ó Dütú Ndiòxí ní caa ní quíhíⁿ. Te ducaⁿ na cùnduu.

Tnúhu ndéé núú ní ndìhi-ndá

²¹ Te cùñàha-ndo sá ío na càda ndee iní nchaa ñáyíu ndècu ichi Xìtòhò Jesucristú, ñáyíu cùu cuèndá Yá Ndiòxí. Te tnàhá nchaa ñáyíu xíndecu ichi Xìtòhò Jesucristú ndécú ndìhi-í quidé ndèe iní ñàhá-yu xii-ndo.

²² Te nchaá ñáyiú cùu cuendá Yă Ndiǒxí xínú cuèchi vehe té Cèsár té yíndaha cuéhé nàcióⁿ quidé ndèe iní ñáhâ-yu xii-ndo, ndihî nchaá ðava-gá ñáyiú cùu cuendá-gá.

²³ Te Xítóhó Jesucristú ío na chindee chítúu ñaha-gă xii-ndo nchâa-ndo. Te ducaⁿ na cùnduu. Te ío chí cádá ndèe iní-nâ vitna.

TUTÚ NÍ CADÚHA TĒ PĀBLÚ QUIHIⁿ NDAHHA ÑÁYIU ÑÚÚ CÒLOSÁ

Té Pāblú cadúha-dé tutú quihiⁿ ndaha ñáyiu xĩndecu ichi Xítóhó Jesucristú ndécú ñúú Còlosá

¹ Yúhú té Pāblú ní tendaha ñaha Yá Ndióxi cáháⁿ-í tnúhu Xítóhó Jesucristú núú ñáyiu chí ducaⁿ cuíní méé Yá Ndióxi cunduu, te cadúha-í tutú-a ndihi té Timùtéú

² Cuendá daquixi-í ndaha nchòhó ñáyiu ñúú Còlosá, ñáyiu cùu cuendá Yá Ndióxi, ñáyiu quide ndáá ndécú ichi Xítóhó Jesucristú, te xicáⁿ táhú-í núú Tátá-ó Dütú Ndióxi sá ío na chĩndee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndo cundecu-ndo.

Té Pāblú cáháⁿ ndihi-dé Yá Ndióxi cuendá ñáyiu sàndáá iní ñáhá xii Xítóhó Jesucristú

³ Te ducaⁿ-ni cáháⁿ ndihi-ndí Yá Ndióxi Yáá cúú Tátá Xítóhó Jesucristú ndácáⁿ táhú-ndí núú-gá cuendá nchaa nacuáa quide-ndo ndecu-ndo,

⁴ chí níhí-ndí tnúhu sá ío sàndáá iní-ndo Xítóhó Jesucristú, te ducaⁿ ío cùu iní-ndo nchaa ñáyiu cùu cuendá Yá Ndióxi.

⁵ Te ducaⁿ quide-ndo chí sàndáá iní-ndo sá ndúú táhú-ndo cundecu-ndo núú ndécú Xítóhó Jesucristú, te tnúhu-áⁿ ní níhí-ndo cútñhá ní xĩndedóho-ndo tnúhu ndáá tnúhu Xítóhó Jesucristú.

⁶ Te tnúhu Xítóhó Jesucristú tá xíté nuu-xi níhí ñuyú cuáháⁿ. Te vai ñáyiu ta sàndáá iní-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhó chí ndéé cútñhá ní tecú dóho-ndo tnúhu-gá ní quesaha-xi ta cùu vai ñáyiu ñúú-ndó tá quide ndáá-yu núú-gá cuáháⁿ. Te dàvá-áⁿ ní cutñúni ndáá ndisa iní-ndó sá Yá Ndióxi ío chĩndee chitúu ñaha-gá xii-ndo.

⁷ Te ducaⁿ ní dánèhè ñáhá tē Ēpafrás tēe ío cùu iní-ndí, chí tnàhá-dé ío quide ndáá-dé xínú cuèchi-dé núú Xítóhó Jesucristú quidé-dé núú-ndí dácúaha ñaha-dé xii-ndo tnúhu-gá.

⁸ Te càhí tnúhu-dé xii-ndí sá ío cùu iní ñáhá-ndó xii-ndí, te ducaⁿ quide-ndo chí Espiritú Yá Ndióxi chĩndee ñaha-xi xii-ndo.

⁹ Te ndéé cútñhá ní níhí-ndí tnúhu nacuáa quide-ndo ndecu-ndo ndéé dàvá-áⁿ ní ngúíta-ndí ñá túú dàña ndee-ndí xicáⁿ táhú-ndí núú Yá Ndióxi cuendá-ndó sá Espiritú-gá ná tàxi-xi nchaa-gá sá cùmáni quíní tnúni-ndó, te ducaⁿ te cutñúni váha-gá iní-ndó nacuáa cuíní Yá Ndióxi cada-ndo.

¹⁰ Te sá dúcáⁿ te ndacu-ndo càda-ndo mee-ni sá váha dàtná cuíní Xítóhó Jesucristú cada nchaa ñáyiu ndécú ichi-gá. Te ducaⁿ ío nduu vétú iní-gá te núu na càda-ndo nchaa núú sá váha. Te ducaⁿ ío-gá cuita cutñúni iní-ndó nchaa nacuáa cuíní Yá Ndióxi cada-ndo.

¹¹ Te mee-gá cúú-gá Yáá ío cùnuu, te diu-gá ío chĩndee ñaha-gá xii-ndo, te cudíⁿ iní-ndó cuéi nándi na càda ñaha ñáyiu xii-ndo sá cuendá-gá, te ducaⁿ ío cunduu càhnu iní-ndó.

¹² Te ndacáⁿ táhú-ó núú Dütú Ndióxi chí ní quide túha ñaha-gá xii-o cuendá nduu táhú-ó cundecu-ndo ndihi nchaa dava-gá ñáyiu yĩndaha-gá xĩndecu núú cándòo canine ñá túú tnàhí-gá ní ñⁿ cuèchi ío.

¹³ Te diu-gá ní quide ní dáñá-ó nchaa ichi cuehé ichi duha núú tàxi tnúni yucu ñávaha, te ní nachihí ñaha-gá xii-o ndàha Déhe-gá Yáá ío cùu iní-gá.

¹⁴ Te Déhe-gá ní xihí-gá cuendá sá nchóo cǎcu nihnu-o núú ùhú núú ndàhú, te ní quide càhnu iní-gá nchaa sá cuehé sá dùhá ní quide-o.

Ñáyiu cùu ñⁿnuu ndihi Yá Ndióxi cuendá sá ní xihí Xítóhó Jesucristú

¹⁵ Te Yá Ndióxi cúú-gá Yáá vá cúú quíní-ó dico Xítóhó Jesucristú chí ní quixi túu-gá ñuyú-a, te ní quide-gá nchaa nacuáa sàni iní-gá. Te dàtná-ni sàni iní-gá te ducaⁿ sàni iní Yá Ndióxi, te Yáá-áⁿ ducaⁿ-ni ndécú-gá ndéé cútñhá vátá ngáva-gá ñuyú.

¹⁶ Te Xítóhó Jesucristú ní quide-gá núú Yá Ndióxi ní cadúha-gá nchaa sá ío andiu ndihi nchaa sá ío ñuyú-a, te ní cadúha-gá nchaa sá cúú quíní núú-ó cundehe-o, ndihi nchaa sá vá quíní tnàhí-o, ndihi nchaa espíritú cùnùu vihí xinu cuechi núú Yá Ndióxi, ndihi nchaa dava-gá espíritú xínú cuèchi. Te nchaa ní cadúha Xítóhó Jesucristú chí ducaⁿ ní cachí Yá Ndióxi cunduu. Te ducaⁿ ní cachí Yá Ndióxi cunduu cuendá nchaa cuu-xi mee-ni sá váha sá cúú-xi Xítóhó Jesucristú.

¹⁷ Te Xítóhó Jesucristú ducaⁿ-ni ndécú-gá ndéé cútñhá vátá ngáva-gá ñuyú-a, te diu núú ndáhá-gá cándòo ñuyú-a, ndihi andiu, ndihi nchaandi túhú sá ío.

¹⁸ Te diu Xítóhó Jesucristú cùnùu-gá yĩndaha ñaha-gá xii nchaa nchoo ñáyiu ndécú ichi-gá, te diu-gá quidé-gá ndécú váha-o núú-gá. Te núú ncháá ñáyiu ndoto diu-gá cúú-gá Yáá ío càhnu cuu sa ní ndoto, te sá dúcáⁿ ní ndoto-gá te xiáⁿ cúú-gá Yáá ío tàxi tnúni nchaandi túhú sá ío ñuyú-a ndihi andiu.

¹⁹ Te ducaⁿ ío cùnùu-gá tàxi tnúni-gá chí ndáá sá ñⁿ-ni cuu-gá ndihi Yá Ndióxi.

²⁰ Te Xítóhó Jesucristú ní xihí-gá núú cùrúxi, chí ducaⁿ ní cuíní Yá Ndióxi cunduu cuendá sá vá yóo ñⁿ-gá cuu ùhú iní ñáhá

xii-gá cuéi ñáiyu xĩndecu ñuyú-a, te cuéi cue espíritu ndécú àndiu.

²¹ Te nchòhò cùtnàhá vátá cùndecu-gá-ndó ichi Xitohó Jesucristú ñá túú tñàhí ní xóo cáháⁿ ndihí-ndo-gá, chí mee-ni ní xóo cuu úhú iní-ndó-gá, te mee-ni ncháa sá cuèhé sá dũhá ní xóo cunuú ní xóo cada-ndo ní cùu, dico Xitohó Jesucristú ní quide-gá ní tnahá tñúhu-ndo ndihí Yá Ndiòxí vitna.

²² Chí diu cuendá-án ní xihí Xitohó Jesucristú núú cùrúxí cuendá sá nchóo ndùu ndoo nduu nine iní-ó ngũndecu-o núú Yá Ndiòxí, te ducaⁿ te ñá túú tñàhí-gá ná cumání-ó núú-gá, te vá yóo ñ-gá cachí sá nchóo ndécú cuéchi-o.

²³ Te núu vá dáñá ndèé-ndó quindáá iní-ndó Xitohó Jesucristú, te cundecu-ni-ndo ichi-gá, te vá cáni iní-ndó dáñá-ndo tñúhu ndee iní ní taxi-gá ndécú ndihí-o. Te ncháa tñúhu-gá-án tá xitè nuu-xi nihíi ñuyúú cuáháⁿ, te diu-ni tñúhu-án cáháⁿ yúhú té Páblú dánèhé-í ñáiyu.

Té Páblú yihí díquí-dé cáhá-dé tñúhu Xitohó Jesucristú núú ñáiyu ndécú ichi-gá

²⁴ Te vitna ío cùdíí iní-í ndóhò-í cuendá-ndó, chí Xitohó Jesucristú ío ní ndoho-gá cuendá-ó, te tñàhá yúhú ndóhò-í cuendá ncháa ñáiyu ndécú ichi-gá, dico vitna cùmání-gá ndoho-í cuendá-yu.

²⁵ Te Yá Ndiòxí ní cachí-gá sá yúhú quihí díquí ñàhá-í xii ncháa nchòhò ñáiyu ndécú ichi-gá cuendá danèhé ñàhá vaha-í xii-ndo tñúhu-gá cuendá cuu-xi sá vaha sá cúú-xi-ndó.

²⁶ Te ncháa tñúhu sá dánèhé ñàhá-í xii-ndo ñá túú ní təcú dóho ncháa ñáiyu ní xĩndecu ndéé sanaha, te mee-gá ní cuini-gá sá ncháá nchòo ñáiyu yĩndaha-gá vitna cundecu ndihí-o tñúhu-án.

²⁷ Te mee-gá ní cachí-gá sá dátũu-gá ncháa tñúhu sá ío víi ío vaha cuáháⁿ núú ncháa ñáiyu yĩndaha-gá. Te tñúhu-án cúú-xi cuendá tñàhá ncháa nchòhò ñáiyu ñá túú cùu ñáiyu israhél. Te tñúhu-án dánèhé ñàhá-xi xii-ndo sá Xitohó Jesucristú ndécú ndihí ñàhá-gá xii-ndo. Te cuendá xĩáⁿ ní ngũndecu ndihí-ndo tñúhu ndee iní cundecu-ndo ndihí-gá ní caa ní quihíⁿ.

²⁸ Te nchúhu mee-ni cuendá Xitohó Jesucristú cáháⁿ váha-ndí, te dásahú-ndí ñáiyu nàcuáa cadá-yu. Te váha víhi danehé-ndí ncháa ñáiyu nàcuáa tecú tñuní-yu tñúhu-gá, te ducaⁿ danehé-ndí-yu nàcuáa cundáá-yu núú Yá Ndiòxí, te ducaⁿ chí tñàhá tñúhu-yu ndihí Xitohó Jesucristú.

²⁹ Te cuendá xĩáⁿ ío ndécú ndee-í quidè-í chiuⁿ Xitohó Jesucristú, te mee-gá ío chĩndee ñàhá-gá xii-í núu xĩáⁿ ndácú-í quidè-í chiuⁿ-gá.

2

¹ Te cuini-í sá nchòhò cutnùnì iní-ndó sá ío sàni iní-í cuendá-ndó, ndihí cuendá ncháa ñáiyu ndécú ñuú Laodiceá, ñáiyu xĩndecu ichi Xitohó Jesucristú. Te ducaⁿ-ni ío sàni iní-í cuendá ncháa ñáiyu vátá quini ñàhá-gá xii-í.

² Te cuini-í sá nchòhò ndihí ncháa ñáiyu-án ío nducu ndèe-ndo canchicúⁿ nihnu-ndo ichi Xitohó Jesucristú, te ío cuu iní tñàhá-ndó, te ducaⁿ cùu ñ-nuu-ndo cundecu-ndo. Te cuini-í sá nchòhò ndihí dava-gá ñáiyu-án ío váha sáá sá xini tñuní-ndó cuendá tecú tñuní-ndó ncháa nàcuáa ndùu cuendá Xitohó Jesucristú chí ío ndùu yuhu ní cuu, dico vitna ní dátũu-gá núú-ó.

³ Te Xitohó Jesucristú néhé váha-gá ncháa tñúhu sá ío xini ñuhu-xi tecú tñuní-ó.

⁴ Te duha cáháⁿ-í chí cuini-í sá vá quindáá iní-ndó ní ñ-n tñúhu cáháⁿ ncháa ñáiyu cuini dandáhú ñàhá xii-ndo cuéi ío váha cáháⁿ-yu.

⁵ Te cuéi ñá túú ndécú ndihí ñàhá-í xii-ndo dico ducaⁿ-ni ío ñuhu iní ñàhá-í, te ío cùdíí iní-í chí nihí-í tñúhu sá ío cùu ñ-nuu-ndo ndecu-ndo, te ñá túú dáñá ndeé-ndó sándáá iní-ndó Xitohó Jesucristú.

⁶ Te dátñá-ni ní sándáá iní-ndó Xitohó Jesucristú, te ducaⁿ-ni quindáá iní-ndó-gá canchicúⁿ nihnu-ndo ichi-gá.

⁷ Te ní yúhu ní iní-ndó cànchicúⁿ nihnu-ndo ichi-gá, te ducaⁿ cuita cutnuni-gá iní-ndó ncháa nàcuáa cáháⁿ-gá quihíⁿ. Te vá dáñá ndéé tñàhí-ndo quindáá iní-ndó ncháa tñúhu sá ní dánèhé ñàhá cuè téé cáháⁿ tñúhu-gá xii-ndo. Te xini ñuhu-xi ndacáⁿ táhú víhi-ndo núú Yá Ndiòxí cuendá ncháa tñúhu-án.

Ñáiyu ío váha tñàhá tñúhu ndihí Xitohó Jesucristú

⁸ Te ío quihí iní-ndó cundecu-ndo chí xica cuu ñáiyu cuini dandáhú ñàhá xii-ndo, te ñáiyu-án cáháⁿ-yu mee-ni ncháa tñúhu ní cahu iní ncháa cue téé ñuyúú-a, te ncháa tñúhu-án ñá túú védana nàndíhí-xi. Te ducaⁿ quidè-yu chí nchicúⁿ nihnu-ni-yu ncháa nàcuáa ní xóo cada ñáiyu ní xĩndecu ndéé sanaha. Te cáháⁿ-yu nàcuáa sàni iní yucu ñávàha, te ñá túú cáháⁿ-yu nàcuáa cuini méé Xitohó Jesucristú.

⁹ Te Xitohó Jesucristú cúú-gá ñ-n ñáiyu dico ñ-n ní cùu-gá ndihí Dútú Ndiòxí.

¹⁰ Te nchòhò chí ñá túú tñàhí-gá ná cùmání-ndó núú-gá chí ndécú ndihí-ndo Xitohó Jesucristú. Te ío cunuú-gá te tàxi tñuní-gá ncháa núú cuè espíritu cùnùu.

¹¹ Te mee-gá ní ndada ndoo ní ndada nine-gá iní-ndó chí ní ngũndecu ndihí-ndo-gá te ducaⁿ ñá túú-gá ndécú-ndó ichi cuèhé ichi duha, te cada iní-ndó sá ní ngũndecu ndihí-ndo ñ-n señá, chí ní ndada ndoo ní ndada nine-gá iní-ndó, dico ñá díú

ñiⁿ-ni cuu-xi ndihi señá sá sáha cue téé israèl ñii-güedé.

¹² Te nchòhò sa ní sandute-ndo te cada iní-ndó sá datná tnúhu sá ní xihí-ndó ndihi Xítohó Jesucristú, te ní nguindúxi-ndo ndihi-gá, te ní ndoto-ndo ndihi-gá, te ducaⁿ cada iní-ndó chi ñá túú-gá ndécú-ndó ichi cuehé ichi duha. Te ducaⁿ chi sándáá iní-ndó ncháa nacuaá quide Yá Ndióxi, te diu-gá ní dándótó-gá Xítohó Jesucristú.

¹³ Te nchòhò cútñahá ndécú-ndó ichi cuehé ichi duha cùu-ndo datná ñáiyu ní xihí, chi ñá túú tnáhá tnúhu-ndo ndihi Yá Ndióxi ní cùu, te ní ñá díú ñáiyu israèl cùu-ndó. Te Yá Ndióxi ní cachi-gá sá nchóó ío váha tnahá tnúhu-ndo ndihi Xítohó Jesucristú vitna. Te ducaⁿ ní quide-gá chi sa ní quide cahnu iní-gá ncháa sá cuehé sá dúhá ní xóo cada-o.

¹⁴ Te vitna duuⁿ duuⁿ ñá túú-gá cuéchi-ó ndécú núú-gá. Te nchoo ñá túú cuini-ó cada-o nacuaá caháⁿ-gá, te cuendá xiáⁿ ío ndécúechi-o, te vai nacháhu-o núú-gá ní cùu. Te vitna ñá túú-gá ní ñá cuéchi-ó ndécú núú-gá, chi diu cuendá-áⁿ ní xihí Xítohó Jesucristú núú cùrúxi.

¹⁵ Te sá dúcáⁿ ní xihí Xítohó Jesucristú núú cùrúxi, te duuⁿ duuⁿ ní dáqueé tihú-gá sácuihná ndihi ncháa espíritu cündihí-xi, te ní quendóo canúú-xi, te mee-gá ío cunu-gá táxi tnúni-gá.

Nanducu nihnu-o mee-ni sá váha cächí Xítohó Jesucristú

¹⁶ Te núu dava ñáiyu xícuehé ñáhá-yu xii-ndo cuendá sá ñá túú xèxi-ndo xihí-ndo datná quidé mèe-yu te vá cada cuendá-ndó, te ní vá cada cuendá-ndó te núu xícuehé ñáhá-yu xii-ndo cuendá sá ñá túú cànehe íí-ndó vico quide meé-yu núú cuiá núú cuiá, ndihi vico quidé-yu ndi tnahá yóó, ndihi cuendá sá ñá túú cànehe íí-ndó nduu ndetatú-yu.

¹⁷ Te nacuaá quidé-yu ndi tnahá òré quidé-yu ncháa vico-áⁿ, ndihi nacuaá quidé-yu ndi tnahá ncháa nduu cànehe íí-yu-áⁿ, te cada iní-ó sá sá quidé-yu-áⁿ dānehé núú ñáhá-xí nacuaá cada Xítohó Jesucristú núú cuaháⁿ núú vèxi.

¹⁸ Te vá quindáá iní-ndó ní ñá tnúhu caháⁿ ñáiyu cächí sá cuíta nihnu-ndo cuendá sá ñá túú tná-ndo tnúhu caháⁿ-yu, chi cächí-yu sá ío xini ñuhu-xi cada cahnu-o ncháa cue espíritu xínú cuéchi núú Yá Ndióxi, te ní yùhu ní iní-ó cànehe-o sá yíñùhu núú-xi. Te ñáiyu-áⁿ cächí-yu sá ndáá caháⁿ-yu chi dàcoto ñaha saní-yu nacuaá caháⁿ-yu, te ío quide cahnú-yu mèe-yu cuendá ncháa sá saní iní mèe-yu quidé-yu, te ñá túú vèdana nāndihí ncháa sá quidé-yu.

¹⁹ Te ncháa ñáiyu ducaⁿ xíquide-áⁿ ñá túú tnahá tnúhu-yu ndihi Xítohó Jesucristú.

Te mee-gá cùú-gá Yáá cúnúu taxi tnúni ñáhá-gá xii ncháa nchoo ñáiyu ndécú ichi-gá, te chindee ñaha-gá xii-o ndécú-o ichi-gá, te mee-gá quidé-gá cùú ñánuu-o ndécú-o, te ta quide-o ncháa nacuaá cuini Yá Ndióxi cuaháⁿ.

²⁰ Te nchòhò cùú-ndó datná ñáiyu ní xihí ndihi Xítohó Jesucristú cuendá sá vá cānchicúⁿ nihnu-gá-ndó nacuaá caháⁿ ñáiyu ñá túú ndécú ichi-gá. Te núu ducaⁿ ña, ¿te ná cuendá tníi-ní-ndó tnúhu caháⁿ ñáiyu-áⁿ te quide-ni-ndo datná quidé-yu?

²¹ Chi ñáiyu-áⁿ cächí-yu sá ío sá ní vá cùú tèe ndaha-o, te dava ní vá cùú càxi-o, te dava ní vá cùú tnii-o.

²² Te ncháa xiáⁿ, núú néhé chiúⁿ-ni-o ndihi nihnu-xi. Te ncháa sá dúcáⁿ caháⁿ-yu-áⁿ cùú-xí mèe-ni sá ní cahu iní mèe ncháa ñáiyu ñuyúú-a nacuaá cada-yu cundécú-yu.

²³ Te ncháa tnúhu caháⁿ-yu-áⁿ sánúu sá cùú-xí ñá tnúhu caháⁿ ñá téé ío váha sáá díquí-xi, chi cächí-yu sá cada cahnu-o Yá Ndióxi nacuaá véxi iní mèe-ó, te cunduu ndáhú iní-ó dico ñá túú dānehé ñáhá-yu nacuaá tàú-xi cunduu. Te cächí tucú-yu sá cada úhú-ó mèe-o, chi ducaⁿ cuini Yá Ndióxi cada-o cächí-yu. Te ncháa xiáⁿ ñá túú vèdana chindee ñaha-xi xii-o cuendá sá vá taxi tnúni ñáhá ní ñá sá cuehé sá dúhá sáni iní-ó.

3

¹ Te nchòhò cada iní-ndó sá ní xihí-ndó ndihi Xítohó Jesucristú te ní ndoto-ndo ndihi-gá, núu xiáⁿ táu-ndó cada-ndo ncháa sá váha datná cuini mèe-gá chi mee-gá núcóo-gá xio cùha Dútú Ndióxi chi tnahá-gá ío cunu-gá.

² Te ío cuhuⁿ iní-ndó ncháa sá váha cächí Xítohó Jesucristú nduu táhú-ndó cundecu ndihi-ndo, te vá cùhúⁿ iní-ndó mèe-ni ncháa sá ío ñuyúú-a.

³ Te ducaⁿ cada-ndo chi cùu-ndo datná ñáiyu ní xihí ndihi Xítohó Jesucristú, chi ñá túú-gá ndécú-ndó ichi cuehé ichi duha. Te Yá Ndióxi néhé cuendá ñáhá-gá xii-ndo chi tnahá tnúhu-ndo ndihi Xítohó Jesucristú.

⁴ Te Xítohó Jesucristú cùú-gá Yáá ndécú ndihi ñaha xii-o vitna, te sáá nduu quèe túu ndihi ñaha-gá xii-o àndiu, te tnahá-ó ío cunu-o ndihi-gá.

Duuⁿ duuⁿ daña-o ncháa sá cuehé sá dúhá ñúhu iní-ó te cada-o mèe-ni sá váha

⁵ Te duuⁿ duuⁿ daña-ndo ncháa sá cuehé sá dúhá ñúhu iní-ndó. Te ncháa nchòhò cue téé vá caháⁿ ndihi-ndo ñáiyu ñáiyu ní xihí te núu ñá díú ñāndihí-ndó cùú-yu, te ducaⁿ-ni ncháa nchòhò cue ñáiyu ñáiyu ní xihí tucu vá caháⁿ ndihi-ndo cuè téé te núu ñá díú yí-ndo cuu-güedé, te ncháa-ndo vá cáni-gá iní-ndó cada-ndo ní ñá sá cuehé sá dúhá ndihi tnaha

ñáiyu-ndo. Te vá cání cuèhé cani duha-gá iní-ndó sá cúu-xí-ndó ndíhí-yu, te vá cání-gá iní-ndó nì ìⁿ sá cuèhé sá dùhá, te nì vâ xihó-ndó ìⁿ sá ndécú ndíhi tñaha ñáiyu-ndo, chí núu ducaⁿ na càda-ndo xiho-ndo sá ndécú ndíhí-yu te ìⁿ-nì cùu-ndo ndíhi ñáiyu chíñuhu nchaa sá càchí-yu cùu ndiòxí te ñá ndàá sá ndiòxí cúu nchàa xiáⁿ.

⁶ Te nchaa ñáiyu ducaⁿ xiquide ío dandòho ñaha Yá Ndiòxí xii-yu na sáá nduu tñundòho tñuhu ndàhú, chí ñá túú sàndáá iní ñáhá-yu xii-gá.

⁷ Te nchòhó cùtnàhá ní xíndecu-ndo ichi cuèhé ichi duha, te tñáhá-ndó nì xóo cada-ndo dàtná quidé nchàa ñáiyu-áⁿ.

⁸ Te vitna duuⁿ duuⁿ dañá-ndo nchàa sá ná càchí tñuhu-í-a: Vá cùdèéⁿ-gá-ndó, te nì vâ cùndùu líhli-gá iní-ndó, te nì vâ cúu ùhú-gá iní-ndó tñaha ñáiyu-ndo, te nì vâ cùcuèhé-gá-ndó-yu, te nì ìⁿ-gá tñuhu cuèhé vâ càháⁿ-ndó.

⁹ Te nì vâ dácuandehnde-gá-ndó, chí nchòhó sa ní dàñá-ndó nchàa ichi cuèhé ichi duha, te ñá túú-gá sání cuèhé sání dùha iní-ndó nã cada-ndo vitna datná ní xóo cada-ndo.

¹⁰ Te vitna nchòhó ní nduu-ndo ñáiyu váha, te uuⁿ-gá tá cùtnuú iní-ndó nchàa nacuaáa cuíni Yá Ndiòxí cada-ndo, te ducaⁿ ta ndùcu ndee-ndo quide-ndo mee-nì sá vâha dàtná quidé mée-gá.

¹¹ Te vitna ní ngúndecu ndíhi-ndo Xítohó Jesucristú, te vá cáda cuèndá-gá-ndó núu cùu-ndo ñáiyu israhél àdi ñá túú cùu-ndo, te nì vâ cáda cuèndá-ndó núu cùu-ndo ñáiyu ní ngúndecu sèñá ñii-xi àdi ñáhá, te nì vâ cáda cuèndá-ndó núu cùu-ndo ñáiyu véxi ñuú xicá, te nì vâ cáda cuèndá-ndó núu cùu-ndo ñáiyu cùu neñuú, te nì vâ cáda cuèndá-ndó núu cùu-ndo ñáiyu ñá túú tñáhí dàñá quee núu chíúⁿ pàtróóⁿ-xi, te nì vâ cáda cuèndá-ndó núu cùu-ndo ñáiyu dàñá queé núu chíúⁿ pàtróóⁿ-xi, chí Xítohó Jesucristú cùnuu-gá ndécú ndíhi ñaha-gá xii-o nchàa-o.

¹² Te Yá Ndiòxí ní dáquée ðiⁿ ñaha-gá xii-ndo cuèndá cundecu-ndo ndíhi-gá, te vitna cùu-ndo ñáiyu quide ndáá ndécú ichi-gá. Te mee-gá ío cùu iní ñáhá-gá xii-ndo núu xiáⁿ tàú-ndó cùndahú iní tñáhá-ndó, te ío váha cuu iní-ndó chindee tñaha-ndo, te cuu-ndo ñáiyu ndàhú iní-xi, te ío víi ío váha cuu iní-ndó cùndecu ndíhi tñaha-ndo, te ío càhnu cunduu iní-ndó cuèndá nchaa sá quidé ñaha ñáiyu xii-ndo.

¹³ Te ducaⁿ cànehe-ndo tñuhu càhnu iní núu ndi mée-ndo nacuaáa ndècu-ndo ichi-gá, te cada càhnu tucu iní-ndó núu ná cúu sá cùmání núu tñáhá-ndó. Te dàtná ní quide càhnu iní Xítohó Jesucristú nchaa sá ñá túú váha ní xóo cada-ndo ducaⁿ càda-ndo

cada cahnu iní-ndó nchàa sá cùmání núu tñáhá-ndó ndècu-ndo.

¹⁴ Te xini ñuhu vihi-xi sá ío cuu iní tñáhá-ndó cùndecu-ndo, chí núu ducaⁿ na càda-ndo, te quide-ndo nchaa dava-gá sá càháⁿ-í, te ñá túú tñáhí-gá ná cùmání-ndó.

¹⁵ Te dañá-ndo sá Yá Ndiòxí ná chindee ñaha-gá nacuaáa ío váha cuu iní-ndó cùndecu-ndo, chí diu cuèndá-áⁿ nì càháⁿ ñáhá Yá Ndiòxí xii-ndo cuèndá cuu ìⁿ-nuu-ndo ndíhi nchaa dava-gá ñáiyu ndècu ichi-gá, te ducaⁿ-nì ío ndacáⁿ táhú-ndó núu-gá.

¹⁶ Te ío cuhuⁿ iní-ndó tñuhu Xítohó Jesucristú, te ío váha cuáha-ndo cuèndá nacuaáa càháⁿ tñuhu-gá te ducaⁿ dànehé tñáhá-ndó. Te ío càháⁿ dóho tñaha-ndo nacuaáa cada-ndo càncicúⁿ nihnu-ndo càda-ndo nchaa nacuaáa càháⁿ tñuhu-gá, te cata-ndo ndùdú ndéé núu tùtú Yá Ndiòxí, ndíhi nchaa dava-gá ndudú sá xini méeⁿ-ndó xita-ndo te nchaa xiáⁿ cata-ndo chíñuhu-ndo Yá Ndiòxí. Te òré xítá-ndó te nì yùhu nì iní-ndó ndacáⁿ táhú-ndó núu-gá.

¹⁷ Te cuhuⁿ iní-ndó Xítohó Jesucristú òré sání iní-ndó càda-ndo ìⁿ chiuⁿ àdi ná tñuhu cuíni-ndó càháⁿ-ndó, te diu-nì-gá cuhuⁿ iní-ndó. Te xini ñuhu-xi ndacáⁿ táhú-ndó núu Yá Ndiòxí, te diu-nì Xítohó Jesucristú chindee ñaha-gá xii-ndo ndacáⁿ táhú-ndó núu Tátá-ó Dùtú Ndiòxí.

Nacuáa tàú ñáiyu ndècu ichi Xítohó Jesucristú cada-yu sá cúu-xi ndi mée-yu

¹⁸ Te nchaa nchòhó ñáiyu ðihí ñáiyu ndècu yii-xi quindáá iní-ndó yii-ndo, chí ducaⁿ tàú-xi cada nchaa ñáiyu ðihí ndécú ichi Xítohó Jesucristú.

¹⁹ Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu.

²⁰ Te nchaa nchòhó ñáiyu ndècu tátá-xi ndíhi náná-xi quindáá iní-ndó-yu, chí núu ducaⁿ na càda-ndo te ndùu vérú iní Yá Ndiòxí.

²¹ Te nchaa nchòhó ñáiyu cùu tátá ndíhi náná vâ dásàtú-ndó iní cue déhe-ndo, chí núu ducaⁿ na càda-ndo te nì vâ quíxí-gá iní-güexi cada-güexi sá váha.

²² Te nchaa nchòhó ñáiyu xinu cuechi quindáá iní-ndó nchàa ñáiyu cùu pàtróóⁿ-ndó, te nì yùhu nì iní-ndó càda-ndo nchaa chiuⁿ tahú-yu cuéi òré ndécú-yu àdi òré ñá túú-yu, te ñá díú òré-nì ndéhe-yu cada-ndo cuèndá-nì sá cuíni-ndó cùdiu-ndo núu-yu, chí cada-ndo sá néhé-ndó sá yíñuhu núu Xítohó Jesucristú.

²³ Te nchaa chiuⁿ sani iní-ndó càda-ndo te cada-ndo nì yuhu nì iní-ndó, te sá dúcáⁿ càda-ndo-áⁿ te cada-ndo cuèndá sá xínú

cuèchi-ndo núú Xítohá Jesucristú te ña díú núú ñáyiú ñuyíú-a xínu cuechi-ndo.

²⁴ Te nchòhó sa nàha-ndo sá Xítohá Jesucristú taxi-gá sá ndúú táhú-ndó te núu ducaⁿ na càda-ndo, chi cùu-ndo ñáyiú xínu cuechi núú-gá.

²⁵ Te nchaa ñáyiú quide nchaa sá cuèhé sá dúhá nàcháhu-yu núú Yá Ndiòxi cuendá nchaa sá quidè-yu, te mee-gá vâ cáda cuendá-gá cuèi náí ñáyiú cùu-yu, chi ncháa-yu nacháhu-yu nchaa sá ña túú vâha quidè-yu núú-gá.

4

¹ Te nchaa nchòhó ñáyiú cùu patróóⁿ cuu-ndo ñáyiú vâha, te cada-ndo nchàa nacuaá tàù-xi cunduu ndihi nchaa ñáyiú xínu cuechi núú-ndó, te cunaha-ndo sá àndiu ndecu Yaá cùú Xítohá-ndó tàxi tñuní ñáhá-gá xii-ndo.

² Te nchaa nchòhó ñáyiú ndècu ichi Xítohá Jesucristú, vâ dáñá ndèé-ndó cáháⁿ ndihi-ndo Yá Ndiòxi, te ío cuhuⁿ iní-ndó-gá òré cáháⁿ ndihi-ndo-gá, te òré-áⁿ ío ndacáⁿ táhú-ndó núú-gá.

³ Te cácaⁿ táhú-ndó tnàhá cuendá-ndí núú-gá cuendá sá díú-gá ná cáda te ndacu-ndí cáháⁿ-ndí tnúhu-gá núú nchàa dava-gá ñáyiú, te ducaⁿ cáháⁿ-ndí tnúhu Xítohá Jesucristú sá ña túú ní xíndecu ndihi nchaa ñáyiú ní xíndecu ndéé sanaha, te diu cuendá tnúhu-áⁿ yíhi-í vecaá vitna.

⁴ Te cáháⁿ ndihi-ndo Yá Ndiòxi cuendá cáháⁿ-í nacuaá tàù-xi cunduu te tecú tñuní-yu.

⁵ Te cada-ndo nchàa nacuaá tàù-xi cunduu sá cùu-xí nchàa ñáyiú ña túú ndècu ichi-gá, te ducaⁿ-ni ío nducu ndèe-ndo cada-ndo nchaa nacuaá tàù-xi cunduu.

⁶ Te cada cuendá-ndó sá ío vii ío vâha cunduu tnúhu cáháⁿ ndihi-ndó-yu, te cáháⁿ-ndó ñⁿ tnúhu nacuaá cuu vâha iní-yu, te ío vâha cundehe-ndo nacuaá cunduu tnúhu cúñaha-ndo xii ñⁿ ñⁿ-yu.

Tnúhu ndéé núú ní ndihi-ná

⁷ Te té Tiquicú téé ío cùu iní-ó ndècu ndihi-ó ichi Xítohá Jesucristú, téé-áⁿ cachí tnúhu-dé nchaa nacuaá cùu ndecu-í. Te tnàhá-dé xínú cuèchi-dé núú Xítohá Jesucristú te ío vâha quide ndáá-dé.

⁸ Te tendaha-í-dé quixi-dé cachí tnúhu-dé nchaa nacuaá cùu ndecu-ndí iha, te taxi-dé tnúhu ndee iní cundecu ndihi-ndo.

⁹ Te tnàhá tucu té Ònésimú téé ío cùu iní-ó ndècu ndihi-ó ichi Xítohá Jesucristú quixi ndihi-dé, te diu-ni téé ñuú-ndó cùu-dé te tnàhá-dé ío vâha quide ndáá-dé. Te ndi ndúú-güedé cachí tnúhu-güedé nchaa nacuaá cùu iha.

¹⁰ Te té Aristarcú téé yíhi ndihi-í vecaá quidè ndèe iní ñáhá-dé xii-ndo ndihi té Mãcú ñani primú tè Bèé. Te sa nàha-ndo nchaa nacuaá ní cáháⁿ-í cada-ndo quèheⁿ cuendá-ndó tè Mãcú, te núu na quixi-dé quixi coto ñaha-dé xii-ndo, te ío vâha cuu iní-ndó quèheⁿ cuendá-ndó-dé.

¹¹ Te tnàhá téé nani Jesús, àdi Bustú chi úú diu-dé, quidè ndèe iní ñáhá-dé xii-ndo. Te cue téé-a cùu-güedé cue téé isràél ní chit-nahá ñáhá-güedé xii-í cáháⁿ-ndí núú ñáyiú nacuaá ndíhu ndaha ñaha Yá Ndiòxi xii-yu, te ni ñⁿ-gá ñáyiú isràél ña túú quide datná quidè-güedé. Te ío vâha tàxi-güedé tnúhu ndee iní xii-í.

¹² Te tnàhá téé ñuú-ndó tè Èpafrás quidè ndèe iní ñáhá-dé xii-ndo, te cùu-dé tnàhá-dé téé xínu cuechi núú Xítohá Jesucristú. Te ducaⁿ-ni ní yuhu ni iní-dé xicáⁿ táhú-dé núú Yá Ndiòxi cuendá-ndó cuendá sá cànchicúⁿ nihnu-ni-ndo ichi-gá, te ducaⁿ te ío vâha tecú tñuní-ndó nchàa nacuaá cuini Yá Ndiòxi cada-ndo, te diu-ni ducaⁿ cànchicúⁿ nihnu-ndo càda-ndo.

¹³ Te yúhú cáchi tnúhu ndáá-í xii-ndo sá sùuní sàni iní-dé sá meé-ní sá vâha cuu xii-ndo cundecu-ndo ndihi nchaa ñáyiú xíndecu ichi Xítohá Jesucristú ndécú ñuú Laodiceá, ndihi nchaa ñáyiú xíndecu tucu ichi-gá ndécú ñuú Hièrápolis.

¹⁴ Te tnàhá té Lùcá téé xíní nchaa núú yúcu sá quidè tátna quide ndee iní ñáhá-dé xii-ndo téé ío cùu iní-ó, te tnàhá tucu té Dèmás quidè ndèe iní ñáhá-dé xii-ndo.

¹⁵ Te cúñaha-ndo na càda ndee iní nchaa ñáyiú ndècu ndihi-ó ichi Xítohá Jesucristú ndécú ñuú Laodiceá, ndihi tá Minfás, ndihi nchaa ñáyiú ndècu ichi-gá tàcá vehe-xi dàcuahá-yu tnúhu-gá.

¹⁶ Te tutú cadúha-í-a tendaha-í quixi ndaha-ndo, te òré ná ndíhi dàcuaha-ndo te tendaha-ndo quíhiⁿ ndaha ñáyiú xíndecu ichi-gá ndécú ñuú Laodiceá cuendá dacuahá-yu tnàhá-yu. Te diu-ni ducaⁿ dàcuaha-ndo tutú tendaha-í quíhiⁿ ndaha ñáyiú ñuú Laodiceá òré ná dándixi-yu ndaha-ndo.

¹⁷ Te na cáchi tnúhu-í xii-ndo nacuaá cúñaha-ndo xii té Arquipú, te duha cúñaha-ndo xii-dé: “Yá Ndiòxi ní taxi-gá chíuⁿ quide-n, te ío vâha cada cuendá-n càda-n nchaa nacuaá ní cachí-gá”, duha cúñaha-ndo xii-dé.

¹⁸ Te yúhú té Páblú ndihi ndaha mee-í tètè-í ñⁿ úú tnúhu-a quide ndee iní ñáhá-í xii-ndo, te cunaha-ndo sá yúhú yíhi-í vecaá. Te Yá Ndiòxi ío na chíndee chítúu ñaha-gá xii-ndo. Te ducaⁿ na cunduu. Te ío chí cáda ndèe iní-ná vitna.

TUTÚ DÍHNA NUU NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ TESALÓNICÁ

Té Pāblú ndihi cue tée cùndihi-dé cādúha-güedé tutú quíhiⁿ ndaha ñáyiú xĩndecu ichi Xítoho Jesucristú ndécú ñúú Tesalónica

¹ Yúhú té Pāblú cādúha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítoho Jesucristú ndécú ñúú Tesalónica, chi cùu ñⁿnuu-ndo ndihi Tátá-ó Dütú Ndióxi, ndihi Xítoho Jesucristú. Te xicáⁿ táhú-í núú Dütú Ndióxi, ndihi núú Xítoho Jesucristú sá ío na chĩndee chítúú ñaha-gá xii-ndo, te ducaⁿ ndí nduú-gá ná càda te ío váha cuu iní-ndó cùndecu-ndo.

Ñáyiú ñúú Tesalónica ío váha sàndáá iní-yu Yá Ndióxi

² Te ndi tnahá òrè càháⁿ ndihi-ndí Yá Ndióxi ndácáⁿ táhú-ndí núú-gá sá ío quide váha-ndo ndècu-ndo, te ducaⁿ xicáⁿ táhú-ndí núú-gá sá ná còto ñaha-gá xii-ndo.

³ Te ío ndácáⁿ táhú-ndí núú Tátá-ó Dütú Ndióxi sá ní yuhu ní iní-ndó sàndáá iní-ndó-gá, te xĩnu cuechi-ndo núú-gá, te cùu iní tnahá-ndó nàcuáa ndècu-ndo ichi-gá núu xĩáⁿ ío xito tnahá-ndo. Te cùtnmín ndáá iní-ndó sá quíxí tucu Xítoho Jesucristú núu xĩáⁿ ñá túú ñàna ndeé-ndó ndètu-ndo-gá.

⁴ Te nchòhó ñáyiú ndècu ndihi-ndí ichi Xítoho Jesucristú sa ñaha-ndí sá Yá Ndióxi ío cùu iní ñáhá-gá xii-ndo, te diu-gá ní càháⁿ ñáhá-gá xii-ndo cuendá cundecu-ndo ichi-gá.

⁵ Te cùtnàhá ní dànèhé ñáhá-ndí xii-ndo tñúhu-gá, chi ñá díú sá cùú iní mée-ndí ducaⁿ ní dànèhé ñáhá-ndí xii-ndo, chi mee Espiritú Yá Ndióxi ní chĩndee ñaha-xi ní càháⁿ-ndí ní yuhu ní iní-ndí tñúhu-gá núú-ndó. Te ñaha-ndo sá cùtnàhá ní xĩndecu ndihi ñaha-ndí xii-ndo ní quide-ndí nàcuáa càháⁿ Yá Ndióxi cuendá sá cùú-xí sá váha sá cùú-xí-ndó.

⁶ Te nchòhó nchicúⁿ nihnu-ndo quide-ndo vitna datná quidé-ndí, chi quide váha-ndo dàtná quidé mée Xítoho Jesucristú, te díú iní ní tñú-ndo ichi-gá cuéi ní ndoho ní tnahá-ndó, chi mee Espiritú-gá ní chĩndee ñaha-xi xii-ndo.

⁷ Te sá dúcáⁿ quide váha-ndo núú Yá Ndióxi, xĩáⁿ yínchicúⁿ nihnu ñáyiú distritú Macèdoniá, ndihi ñáyiú distritú Acáyá xĩquide váha-yu tnahá-yu, ñáyiú xĩndecu ichi-gá.

⁸ Te diu-ndo ní sanu ichi-ndo ñáyiú distritú Macèdoniá, ndihi ñáyiú distritú Acáyá, te ñá díú-ní ñáyiú nchaa ñuú-áⁿ chi nchaa ñáyiú dava-gá ñuú ñihí-yu tñúhu sá ío sàndáá iní-ndó Yá Ndióxi. Te ñá túú-gá ná tñúhu càháⁿ-ndí cuendá-ndó, chi nchaa-yu sa ñihí-yu tñúhu sá ío váha quide-ndo ndecu-ndo.

⁹ Te mée-yu xicáháⁿ váha-yu cuendá-ndó sá ío váha ní queheⁿ cuendá ñáhá-ndó xii-ndí cùtnàhá ní quixi-ndí díhna nuu. Te ní ñàhá-ndó nchaa sá cachi-ndó cùu ndiόxi-ndó chi ñá díú ndiόxi cùú-xí, te ní tñú-ndo ichi Yá Ndióxi Yaá ndécú tñu andiu chi diu-gá cùú-gá Ndiόxi ndisa, te xĩnu cuechi-ndo núú-gá vitna,

¹⁰ te ndètu-ndo quixi tucu Xítoho Jesucristú Déhe Yá Ndiόxi Yaá ndécú andiu, chi diu-ni-gá ní quixi-gá ñuyú-a ní xihí-gá, te ní ndoto-gá ní dàndótó ñaha Yá Ndiόxi xii-gá. Te diu-ni Xítoho Jesucristú dácacu nihnu ñaha-gá xii-o núú úhú núú ndáhú, chi sàndáá iní-ó-gá.

2

Nàcuáa ndiúu chiuⁿ ní quide té Pāblú ñúú Tesalónica

¹ Te nchòhó ñáyiú ndècu ndihi-ndí ichi Xítoho Jesucristú ñaha-ndo sá ñá díú áúⁿ nã cuu ní quixi coto ñaha-ndí xii-ndo, chi ní sàndáá iní-ndó tñúhu Yá Ndiόxi.

² Te ñaha-ndo sá cùtnàhá ní xĩndecu-ndí ñuú Filipú ío ní xúhuⁿ tñúhu cuéhé tñúhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yuhú-ndí ní càháⁿ-ndí tñúhu Yá Ndiόxi núú-ndó, chi mee-gá ní chĩndee ñaha-gá xii-ndí cuéi ío chitu ñáyiú ní cuu úhú iní ñáhá xii-ndí.

³ Te ñá túú ní dàndahú ñáhá-ndí xii-ndo chi mee-ni tñúhu ndáá ní càháⁿ-ndí núú-ndó, te ní ñá túú ní ñⁿ tñúhu cuéhé ñúhú iní-ndí ní càháⁿ-ndí tñúhu-gá núú-ndó chi sa ní nduu ndoo ní nduu nine iní-ndí.

⁴ Te mee Yá Ndiόxi ní cachi-gá sá càháⁿ-ndí tñúhu-gá, te càháⁿ-ndí nàcuáa cùu iní mée-gá, chi sa ñaha-gá nàcuáa càa iní-ndí, te ñá túú càháⁿ-ndí nàcuáa cùu iní ñáyiú.

⁵ Te ñaha-ndo sá ñá díú ñⁿ tñúhu cudíú iní-ndó cùndecu-ndo ichi ñuyúú ní càháⁿ-ndí núú-ndó cuendá taxi-ndo díhúⁿ. Te Yá Ndiόxi sa ñaha-gá sá càháⁿ ndáá-ndí.

⁶ Te ñá ñⁿ ndiúu ní quide-ndí ñⁿ sá càdá-ndí cuendá-ni sá càdá càhnu ñaha-ndo xii-ndí, àdi cada cahnu ñaha dava-gá ñáyiú, te cuéi tàú ndisa-ndí sá càdá càhnu ñaha-ndo xii-ndí ní cùu, chi chiúⁿ Xítoho Jesucristú quidé-ndí,

te dicó-ni sá nchúhú ñá túú ní cuíní-ndí sá dúcáⁿ càda-ndo.

⁷ Te ío víi ío váha ní cáháⁿ-ndí núú-ndó, dàtná quidé ìⁿ ñaha cuu náná víi víi cáháⁿ ndihi cue déhe-aⁿ dácuehnu ñaha-aⁿ xii-güexi.

⁸ Te ducaⁿ ío cùu iní ñáhá-ndí xii-ndo, dico ñá díú-ní sá ní cáháⁿ-ndí tnúhu Yá Ndióxi núú-ndó, chí ndéé iní-ndí taxi-ndí ní dácótó ñàhá-xi, te núu dicó ní cùu-xi sá cúú, cuèndá sá ío cùu iní ñáhá-ndí xii-ndo.

⁹ Te nchòhó ñáiyu ndècu ndihi-ndí ichi Xítohó Jesucristú ñàha-ndo sá ío ní quide chiúⁿ-ndí cuèndá ní níhí-ndí sá ní xexi-ndí. Te cuèi nduu cuèi niú ní quide chiúⁿ-ndí ní níhí-ndí sá ní xexi-ndí ní cáháⁿ-ndí tnúhu Yá Ndióxi núú-ndó cuèndá sá ñá túú ní cuíní-ndí chichíuⁿ ñaha-ndí xii-ndo.

¹⁰ Te nchòhó ñáiyu sàndáá iní tnúhu Yá Ndióxi xini ndáá-ndó sá cúú-ndí cue téé váha te ducaⁿ sá naha Yá Ndióxi tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te díu-ni ducaⁿ quide-ndí vitna. Te vá yóo ìⁿ cáháⁿ sá ñá túú quide ndáá-ndí ndécú-ndí.

¹¹ Te ñaha tucu-ndo sá ní dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ìⁿ tátá ndihi cue déhe-dé ní quide-ndí.

¹² Te ní cachí-ndí xii-ndo sá cáda ndáá-ndó cùndecu-ndo nacuaá tàù-xi cada nchaa ñáiyu tnàhá tnúhu ndihi Yá Ndióxi, chí mee-gá ní cáháⁿ ñáhá-gá xii-o cuèndá nduu táhú-ó cùndecu-o ndihi-gá núú ío váha càa ndecu-gá táxi tnúni-gá.

¹³ Te xiáⁿ ío ndacáⁿ táhú-ndí núú Yá Ndióxi sá nchòhó òré ní tedóho-ndo tnúhu-gá ní cáháⁿ-ndí, te ní sàndáá iní-ndó chí ní cutnúni iní-ndó sá díú tnúhu Yá Ndióxi cúú-xí, te ñá díú tnúhu ñáiyu ñuyítú-a cùu-xi. Te ndáá sá cúú-xí ìⁿ sá ío váha sá cúú-xí nchòo cue ñáiyu ní sàndáá iní tnúhu-gá.

¹⁴ Te nchòhó ñáiyu ndècu ndihi-í ichi Xítohó Jesucristú, ío ní ndoho ní tnàhá-ndó sá ní quide ñaha ñáiyu ñúú-ndó. Te nchòhó ní ndoho-ndo dàtná ní ndoho nchaa ñáiyu tàca dácuaà tnúhu Xítohó Jesucristú ndécú distritú Jùdeá, chí tnàhá-yu ío ní dándóhó ñàhá ñáiyu ñúú-yu.

¹⁵ Te díu-ni ñáiyu distritú Jùdeá-áⁿ ní sahní-yu cue téé ní xóo cáháⁿ tnúhu Yá Ndióxi ndéé sanaha. Te díu-ni ñani tnàhá-yu cùu cue ñáiyu ní sahní ñaha xii Xítohó Jesucristú, te sáta xiáⁿ te ní nguíta-yu ní cuu úhú iní ñáhá-yu xii-ndí, núu xiáⁿ ñá túú tnàhá iní Yá Ndióxi nchaa sá quidé-yu, te ndéé nchaa dava-gá ñani tnàhá-yu cùu úhú iní-yu.

¹⁶ Te ío chidácá nihnu ñàhá-yu xii-ndí òré cáháⁿ-ndí tnúhu Yá Ndióxi núú ñáiyu ñá túú cùu ñáiyu israhél, te ducaⁿ quide ñáiyu-áⁿ

cuèndá cuíní-yu sá vǎ cáháⁿ-ndí tnúhu-gá, sá cáda cuèndá naníhí tǎhú ñáiyu ñá túú cùu ñáiyu israhél-áⁿ, te sá dúcáⁿ quidé-yu te ío ta cùu vai-gá cuèchi-yu cuháⁿ. Te Yá Ndióxi ío cùdéeⁿ-gá núú-yu, te tendaha-gá ìⁿ tnúndòho quixi sá cúú-xí-yu te ío ndohó-yu.

Té Pǎblú cuíní-dé quíngoto-dé ñáiyu xǎndecu ichi Xítohó Jesucristú ndécú ñúú Tesalónicá

¹⁷ Te nchòhó ñáiyu ndècu ndihi-ndí ichi Xítohó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñúhu iní ñáhá-ndí xii-ndo, te ío ñúhu iní-ndí sá quixi còto ñaha tucu-ndí xii-ndo.

¹⁸ Te yúhú té Pǎblú ducaⁿ-ni ñúhu iní-í sá cuèdicó mée-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í.

¹⁹ Te nchoo ñáiyu ndècu ichi Xítohó Jesucristú ndètu-ni-gá-ó quèxio-gá candeca ñaha-gá xii-o ndáa andíu cundecu-o ndihi-gá. Te cùdíí víhí iní-ndí sá cuèndá-gá chí ní chindee ñàhá-gá ní sanu ichi ñaha-ndí xii-ndo ichi-gá, te ío vǎi ñáiyu cáháⁿ váha-yu cuèndá-ndí ná sáá nduu quixi tucu-gá.

²⁰ Te ducaⁿ ío vǎi ñáiyu cáháⁿ váha-yu cuèndá-ndí cuèndá sá ní sanu ichi ñaha-ndí xii-ndo ichi-gá, te quide váha-ndo. Te xiáⁿ ío cùdíí iní-ndí.

3

¹⁻² Te sa ní cunduu ñá túú-gá cáháⁿ ndihi tnàha-o, núu xiáⁿ ñá ní cùndee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñúú Àtenás, chí tnàhá-dé xínú cuèchi-dé núú Yá Ndióxi, ndihi núú Xítohó Jesucristú cáháⁿ-dé tnúhu-gá núú ñáiyu. Te ní quixi-dé ní taxi-dé tnúhu ndee iní xii-ndo cuèndá sá ío quindáá-ni iní-ndó Xítohó Jesucristú, te canchicúⁿ nihnu-ni-ndo ní yuhu ní iní-ndó ichi-gá.

³ Te vá nátùhú iní-ndó càncchicúⁿ nihnu-ndo ichi-gá sá dúhá cùu úhú iní ñáhá ñáiyu xii-o, te nchòhó sa ñaha-ndo sá dàcuítíí sá ndóhó víhí-o cuèndá-gá.

⁴ Te ndéé cùtnàhá ndécú ndihi ñaha-gá-ndí xii-ndo ní cachí tnúhu ndáá-ndí sá ío ndoho-o, te ducaⁿ ndisa quide-xi.

⁵ Te xiáⁿ núu ñá ní cùu váha-gá iní-í chí cuèndá ñá túú-gá ní níhí-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núú-ndó núu ndècu-ni-ndo ichi Xítohó Jesucristú, chí ní sani ìⁿ ní sani úú iní-í sá cúú-xí-ndó, chí ná ndéé chidácá nihnu ñaha yucu ñávàha xii-ndo te cuíta chiúⁿ ní quide-ndí sá cúú-xí-ndó ní cáháⁿ-í.

6 Te ñáhá, chí ní ndexio té Timùteú sá nì quixi-dé ñúú-ndó, te ñàhá-dé tnúhu ní nasáá sá nì yuhu ní iní-ni-ndo sàndáá iní-ndó Yá Ndiòxí, te cùu iní-ndó cuè tnaha ñáyiu-ndo. Te càchí-dé sá ío ñúhu iní ñáhá-ndó xii-ndí, te ío cuíní-ndó cáháⁿ ndihí ñàhá-ndo, te ñúu-ndó ducaⁿ ío cuíní nchúhú cáháⁿ ndihí ñàhá-ndí xii-ndo tùcu.

7 Te ío ndòho-ndí chí ío cùu úhú iní ñáhá ñáyiu xii-ndí, dico sá nì níhí-ndí tnúhu sá nchòhó ñáyiu ndècu ndihí-ndí ichi Xítohó Jesucristú ñá túú dàña ndéé-ndó sàndáá iní-ndó Yá Ndiòxí, te xíáⁿ cúu-xí ñúú tnúhu càhnu iní ní níhí-ndí chí ní naníhí ndéé-ndí.

8 Te ní nduu vétú iní-ndí sá nì níhí-ndí tnúhu ndècu-ni-ndo ichi-gá.

9 Te òrè cáháⁿ ndihí-ndí Yá Ndiòxí, te ío ndácáⁿ táhú-ndí núú-gá cuèndá sá ñá túú dàña nihnu-ndo ichi-gá, núu xíáⁿ ío cùdúú iní-ndí.

10 Te cuèí nduu cuèí níú xicáⁿ táhú-ndí núú Yá Ndiòxí sá mée-gá ná càda te sáá ñúú nduu naníhí tnáhá-ó cuèndá danèhé ñáhá vàhá-gá-ndí tnúhu-gá sá cùmání-gá xii-ndo.

11 Te mee Tàtá-ó Dütú Ndiòxí, ndihí Xítohó Jesucristú chindee ñàhá-gá xii-ndí te quixi-ndí quixi coto ñàhá-ndí xii-ndo.

12 Te mee Xítohó Jesucristú ná chindee ñàhá-gá xii-ndo, te ío-gá cuíta cuu iní tnáhá-gá-ndó nàcuáa ndècu-ndo ichi-gá ndihí nchaa dava-gá ñáyiu dàtná cúu iní ñáhá-ndí xii-ndo.

13 Te xicáⁿ táhú tùcu-ndí núú Tàtá-ó Dütú Ndiòxí sá nì yuhu ní iní-ndó càncicúⁿ nihnu-ni-ndo ichi-gá, te ducaⁿ te cundáá-ndó núú-gá, te ñá túú-gá ná cùmání-ndó òrè ná sáá nduu quixi tucu Xítohó Jesucristú ndihí nchaa ñáyiu sa ndècu ndihí-gá.

4

Nàcuáa cuíní Yá Ndiòxí cada-o

1 Te nchòhó ñáyiu ndècu ndihí-í ichi Xítohó Jesucristú cáháⁿ ndàhú-í núú-ndó sá cùndédòho-ndo na càháⁿ-í nàcuáa ndúu tnúhu càháⁿ Xítohó Jesucristú, chí mee-gá cuíní-gá sá càdá-ndó nàcuáa ní dánèhé ñáhá-ndí xii-ndo cuèndá cuu vàhá iní Yá Ndiòxí núú-ndó, te ducaⁿ-ni càda-ndo ndéé núú cuáháⁿ núú vèxi.

2 Te nchòhó sa ñàhá-ndo nàcuáa ní cáháⁿ-ndí núú-ndó, chí ní cáháⁿ-ndí nàcuáa ní táuchíúⁿ Xítohó Jesucristú te ní cachí-gá sá

3 Yá Ndiòxí cuíní-gá sá càdá ndáá-ó cùndecu-o ichi-gá. Te nchoo cuè téé vá càháⁿ ndihí-o ñáyiu dìhí te núu ñá díú ñàdihí-ó cùu-yu, te ní cuè ñáyiu dìhí vá càháⁿ ndihí-yu téé núu ñá díú yíi-yu cùu-güedé.

4 Te núu xíáⁿ nchaa nchòhó tnàhá téé-í ndí dííⁿ cùndecu ñàdihí-ndó, te ñúu-ndó ducaⁿ nchòhó cue ñáyiu dìhí tucu ndí dííⁿ cùndecu yíi-ndo, te mee-ni tnúhu yíiñúhu cáháⁿ ndihí tnàhá-ndo.

5 Te vá cání cuèhé caní duha iní-ndó dàtná quidé cuè ñáyiu ñá túú sàndáá iní tnúhu Yá Ndiòxí.

6 Te ní ñúu-ndo vá cání iní-ndó dàndahú-ndó tnàhá téé-ndo cáháⁿ ndihí-ndo ñàdihí-güedé. Te ducaⁿ-ni nchòhó cue ñáyiu dìhí tucu vá cání iní-ndó dàndahú-ndó tnàhá dìhí-ndó cáháⁿ ndihí-ndo yíi-yu. Chí núu ducaⁿ na càda-ndo, te Yá Ndiòxí ío dàndòho ñàhá-gá xii-ndo dàtná ní cachí-ndí ndéé díhna.

7 Chí Yá Ndiòxí ní cáháⁿ ñáhá-gá xii-o cuèndá sá càdá-ó mèe-ni sá vàhá, te ñá díú sá cuèhé sá dùhá.

8 Te nchaa ñáyiu na càda sáá iní-xi tnúhu càháⁿ-ndí, te quide sáá iní-yu núú Yá Ndiòxí, chí ñá díú tnúhu téé ñuyúú-a cùu-xi, chí tnúhu Yá Ndiòxí, Yaa ní taxi Espiritú-gá ndéécú ndihí-o cuu-xi.

9 Te nchòhó ñáyiu ndècu ndihí-í ichi Xítohó Jesucristú, ñá túú-gá xini ñúhu-xi cachí tnúhu-í xii-ndo sá cúu iní tnáhá-ndó, chí Yá Ndiòxí sa ní dánèhé ñáhá-gá xii-ndo nàcuáa cuu iní tnáhá-ndó, ndihí nàcuáa cuu iní-ndó dàva-gá tnàhá ñáyiu-ndo.

10 Te ducaⁿ xíquide-ndo ndihí nchaa ñáyiu ndècu ndihí-ndo ichi Xítohó Jesucristú ndéécú dístítú Macèdoniá. Te cáháⁿ ndàhú-ndí núú-ndó sá càdá ndáá-gá-ndó, te cuíta cuu iní-gá-ndó cuè tnaha ñáyiu-ndo quíhíⁿ.

11 Te cada ndee iní-ndó cùndecu ñucaxi iní-ndó, te cuhuⁿ iní-ndó chùuⁿ mee-ndo, te xíáⁿ cada-ndo dàtná ní dánèhé ñáhá-ndí xii-ndo.

12 Te ducaⁿ te tnàhá nchaa ñáyiu ñá túú sàndáá iní tnúhu Yá Ndiòxí cáháⁿ vàhá-yu cuèndá-ndó, te ducaⁿ te ñá túú tnàhí-gá ná cùmání xii-ndo.

Nàcuáa cada-xi òrè quixi tucu Xítohó Jesucristú

13 Te vitna na càchí tnúhu-ndí xii nchòhó ñáyiu ndècu ndihí-ndí ichi Xítohó Jesucristú cuèndá nchaa ñáyiu sa ní xihí, ñáyiu ní sàndáá iní tnúhu Yá Ndiòxí cuèndá sá vá ndihí iní-ndó cuèndá-yu dàtná xíquide nchaa ñáyiu ñá túú yíhí iní-xi sá quixí tùcu Xítohó Jesucristú ñuyúú-a.

14 Te nchoo sàndáá iní-ó sá ní xihí Xítohó Jesucristú te ní ndoto-gá ní dàndótó ñàhá Yá Ndiòxí, te sàndáá tucu iní-ó sá dàtná ní dàndótó Yá Ndiòxí Xítohó Jesucristú, ducaⁿ dàndoto-gá nchaa ñáyiu ní xihí ñáyiu ní sàndáá iní ñáhá xii-gá.

¹⁵ Te na cächí tnúhu tucu-ndí ingá tnúhu nàcuáa ní cáháⁿ Xítohó Jesucristú, chí ní cachí-gá sá ná sáá nduu quixi tucu-gá te nchaa ñáyiú sàndáá iní tnúhu-gá ndécú vívú ñuyíú-a vá códó nùú-yu núú ñáyiú ní xíhí ndaa andiú, chí jündú candeca ñaha-gá xíí-yu ndaa.

¹⁶ Chí Xítohó Jesucristú quee túu-gá andiú, te cana-gá nchaa ñáyiú ní sàndáá iní tnúhu-gá, te òré-ánⁿ Yá Ndiòxí cada-gá te òré-ánⁿ, cáháⁿ ìⁿ cútú te òré-ní-ánⁿ ndoto nchaa ñáyiú ní xíhí, ñáyiú ní sàndáá iní tnúhu-gá.

¹⁷ Te dátñuní nchaa nchoo ñáyiú xñdecu vívú ñuyíú-a naníhí tnáhá-ó ndihí-yu, te ndanchita-o ndihu-o xítí vícò naníhí tnáhá-ó ndihí Xítohó Jesucristú, te candeca ñaha-gá xii-o ndaa andiú cundecu ndihí-o-gá ní caa ní quíhíⁿ.

¹⁸ Núu xíáⁿ chí cuáha tnàha tnúhu ndee iní, te vá ndíhú iní-ndó chí naníhí tãhú-ndó núú-gá.

5

¹ Te nchòhò ñáyiú ndècu ndihí-í ichi Xítohó Jesucristú ñá túú-gá xíní ñùhu-xi sá cächí tnúhu-í xii-ndo sá quixí tucu-gá, te ní ñá túú-gá xíní ñùhu-xi sá cächí tnúhu-í xii-ndo nãsa cada-xi òré quixi-gá.

² Chí nchòhò sa nàha ndáá-ndó sã Xítohó Jesucristú quixi-gá nduu ñá túú yíhí iní-ó, chí dátñá quidé ìⁿ ñadúhú cada-gá òré quixi-gá, chí nduu ñá túú ná yíhí iní-ó quixi tucu-gá.

³ Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gá ná cùmáñi xii-o”, duha quesáhá-yu. Te ñáyiú-ánⁿ òré ñá túú ná yíhí iní-yu, te quèxio tnúndòho tnúhu ndáhú sá cúú-xí-yu. Chí cada-xi dátñá quidé-xí ìⁿ ñáyiú dihí ní tnáhá òré cacu déhe-xi, chí na iní-yu ní dátñhúhú ñáhá-xí te vá cãcu-yu núú tnúndòhó-yu, te ducaⁿ sã tnáhá-xi yáha nchaa ñáyiú ñá túú ndècu ichi-gá, chí na iní-yu quèxio tnúndòho sá cúú-xí-yu te vá cãcu-yu núú tnúndòho-ánⁿ.

⁴ Te nchòhò ñáyiú ndècu ndihí-í ichi Xítohó Jesucristú, ñá túú-gá ndécú-ndó ichi cuehé ichi duha, núu xíáⁿ sa yíhí-ná iní-ndó ndúu quixi-gá te vá yáha-ndo dátñá yáha nchaa ñáyiú ñá túú ndècu ichi-gá, chí ñáyiú-ánⁿ ñá túú ná yíhí iní-yu sá quixí-gá. Te na iní-yu quèxio-gá dátñá quidé ñadúhú na iní-ó quíhu-güedé vehe-o dùhu-güedé ducaⁿ cada-gá òré quixi-gá.

⁵ Te nchoo ñá túú-gá ndécú-ó ichi cuehé ichi duha, te ichi-ánⁿ cúú-xí dátñá ìⁿ ichi nee ndècu-o ní cuu, te vitna sa ní ngúndecu-o ichi váha, te ducaⁿ chí Yá Ndiòxí ní dándíxí

túu-gá iní-ó cuendá cutñuní iní-ó nàcuáa ndúu cuendá-gá.

⁶ Te xñi ñùhu-xi dandixi túu-o iní-ó, te cada váha-o cùndecu-o ichi-gá, te vá cadá-ó dátñá quidé nchaa ñáyiú ñá túú sàndáá iní ñáhá xii-gá, chí ñáyiú-ánⁿ ñá túú-gá quidé cuendá-yu te núu quide váha-yu àdi ñá túú quide váha-yu ndècu-yu.

⁷ Te nchaa ñáyiú quide cuehé quidé dùha cuú-yu dátñá ìⁿ ñáyiú xidí àdi xíní, chí ñá túú quide cuendá-yu nàcuáa cada-yu ìⁿ sá váha dátñá cuñí Yá Ndiòxí.

⁸ Te nchòhò ñáyiú sa ní cutñuní iní-xi nàcuáa ndúu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiòxí, te cuu iní-ndó cuè tnaha ñáyiú-ndo te ducaⁿ te vá táxi tnúni ñáhá ní ìⁿ sá cuehé sá dúhá xii-ndo. Te ío cuhuⁿ iní-ndó sá cùndècu-ndo ndihí-gá ní caa ní quíhíⁿ.

⁹ Chí Yá Ndiòxí ní cachí-gá sá vá quíhíⁿ-ó núú úhú núú ndáhú, chí mee-gá nacuaca ñaha-gá xii-o cùndecu-o ndihí-gá, chí ní sàndáá iní-ó Xítohó Jesucristú.

¹⁰ Te mee Xítohó Jesucristú ní xíhí-gá sá cuendá nchaa yícá cuèchi-o, te ní ndoto-gá cuendá nduu táhú-ó cùndecu-o ndihí-gá andiú na sáá nduu cuèi sa ní xíhí-ó, àdi vátá cúú-gá-ó.

¹¹ Núu xíáⁿ chí cuáha tnàha tnúhu ndee iní, te chindee tnàha-ndo cundecu-ndo ichi-gá dátñá tá quide-ndo vèxi.

Té Pãblú dáquini sàhú-dé ñáyiú ndècu ichi Xítohó Jesucristú

¹² Te nchòhò ñáyiú ndècu ndihí-ndí ichi Xítohó Jesucristú, cáháⁿ ndáhú-ndí núú-ndó sã cánèhe-ndo sá yíñùhu núú cuè téé cùnuu xinu cuechi núú Yá Ndiòxí, cue téé dànehé ñáhá xii-ndo nacuáa cundecu-ndo ichi-gá.

¹³ Te cáháⁿ váha-ndo ndihí-güedé, te cuu iní-ndó-güedé, chí nàha-ndo sá chíúⁿ Yá Ndiòxí quidé-güedé. Te cundecu ndihí váha tnàha-ndo nchaa-ndo.

¹⁴ Te cáháⁿ ndáhú tucu-ndí núú-ndó sã cáháⁿ-ndó dòho nchaa ñáyiú ñá túú cuñí cada chíuⁿ, te ducaⁿ cuãñaha-ndo tnúhu ndee iní xii nchaa ñáyiú quíyuhu iní-xi canchicúⁿ nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu càhnu iní-ndó núú-yu ncháá-yu.

¹⁵ Te cada ndee iní-ndó te núu ndècu tnaha ñáyiú-ndo cùu úhú iní ñáhá-yu xii-ndo, te vá tnáhá-ni-ndo cùu úhú iní-ndó-yu. Te mee-ní sá váha cada-ndo sá cúú-xí nchaa tnaha ñáyiú-ndo.

¹⁶ Te nchaa nduu ío cudíⁿ iní-ndó cùndecu-ndo.

¹⁷ Te ìⁿ nduu ìⁿ nduu cáháⁿ ndihí-ndo Yá Ndiòxí.

¹⁸ Te ndacáⁿ táhú-ndó núú-gá te núu nándi cùu sá yáha-ndo ndècu-ndo, chí ducaⁿ

cùiní-gá cada-o, te ñu ducaⁿ ndùu tnúhu càháⁿ Xítohó Jesucristú.

¹⁹ Te vá quèhndé nihnu-ndo chiùⁿ quide Espiritú Yá Ndiòxí iní-ndó.

²⁰ Te vá cáda sáá iní-ndó núú cuè téé càháⁿ tnúhu Yá Ndiòxí nàcuáa dàcahu iní ñáhá-gá xii-güedé.

²¹ Te cada cuendá váha-ndo nàcuáa càháⁿ-güedé, te tnü-ndo nchàa tnúhu váha càháⁿ-güedé.

²² Te dañá-ndo nchàa ichi cuehé ichi duha.

²³ Te mee Yá Ndiòxí quidé-gá ío váha cùu iní-ó ndècu-o ichi-gá. Te xicáⁿ táhú-í núú-gá sá ná càda íí ñáhá-gá xii-ndo, te na còto ñaha-gá xii-ndo ndíhi iní-ndó cuendá sá vá cáda-gá-ndó nì ñⁿ sá cuèhé sá dúhá, te ñu-ni ducaⁿ na càda-gá sá cúú-xi-ndó ndéé ná sáá nduu quixi tucu Xítohó Jesucristú ñuyíú-a.

²⁴ Chi Yá Ndiòxí Yaa ní càháⁿ ñáhá xii-o cada-gá nàcuáa ní càháⁿ-gá, te chindee ñàha-gá xii-ndo.

Té Páblú quidé ndèe iní-dé ñáyiú xñdecu ichi Xítohó Jesucristú ndécú ñùú Tesalónica

²⁵ Te nchòhó ñáyiú ndècu ndíhi-í ichi Xítohó Jesucristú, cácaⁿ táhú-ndó núú Yá Ndiòxí sá ná chindee ñaha-gá xii-ndí.

²⁶ Te cúñaha-ndo xii nchaa ñáyiú ndècu ndíhi-o ichi Xítohó Jesucristú sá nì yuhu ni iní-ndí quidé ndèe iní ñáhá-ndí xii-ndo ndíhi-yu.

²⁷ Te vitna mee Yá Ndiòxí ndéhé-gá sá càháⁿ ndáhú-í núú-ndó sá dácuàha-ndo tutú-a núú nchàa ñáyiú ndècu ndíhi-o ichi-gá.

²⁸ Te Xítohó Jesucristú ío na chindee chítúu ñaha-gá xii-ndo núú cuàháⁿ núú vèxi. Te ducaⁿ na cùnduu. Te ío chí cáda ndèe iní-ná vitna.

TUTÚ CÚÚ ÒÚ NÍ CADÚHA TÉ PÁBLÚ QUIHÍⁿ NDAHA ÑÁYIU ÑÚÚ TESÀLÓNICÁ

Té Páblú ndihi cue tée cùndihi-dé cádúha-güedé tutú quihíⁿ ndaha ñáyiú xñdecu ichi Xítohó Jesucristú ndécú ñúú Tesàlónicá

¹ Yúhú té Páblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiú ndècu ndihi-ndí ichi Xítohó Jesucristú ndécú ñúú Tesàlónicá, chi tnàhá tnúhu-ndo ndihi Tátá-o Dütú Ndiòxí, ndihi Xítohó Jesucristú.

² Te xicáⁿ táhú-ndí núú Dütú Ndiòxí, ndihi núú Xítohó Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Yá Ndiòxí cada ndáá-gá cuéchi nchaa ñáyiú ndècu ichi cuhé ichi duha na sàá nduu quixi tucu Xítohó Jesucristú

³ Te nchòhó ñáyiú ndècu ndihi-ndí ichi Xítohó Jesucristú, cächí tnúhu-í xii-ndo sá cùnàha-ndo sá ñà túú dàña ndee-ndí ndácáⁿ táhú-ndí núú Yá Ndiòxí cuendá-ndó, chi dacuití dūcaⁿ taú-xi cunduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cuu iní tnàhá-ndó nàcuáa ndècu-ndo ichi Yá Ndiòxí.

⁴ Núú xiáⁿ nchúhú ío váha cáháⁿ-ndí cuendá-ndó núú nchaa ñáyiú sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñà túú dàña ndee-ndó nchicúⁿ nihnu-ndo ichi-gá, te quide cahnu-ni iní-ndó cuéí nándi sá yáha-ndo ndècu-ndo ichi-gá.

⁵ Te sá dúcáⁿ quide váha-ndo ndècu-ndo xiáⁿ cùtnúni nàcuáa cada ñaha Yá Ndiòxí xii-ndo na sàá nduu, chi nduu táhú-ndó cùndecu-ndo núú táxí tnùní-gá, te ducaⁿ càda-gá chi cùu-gá Yáá quidé ndáá cuiti. Te vitna ndòho-ndo nàcuáa ndíhu ndaha-gá dava-gá ñáyiú.

⁶ Te Yá Ndiòxí ío váha ndáá quidé-gá, chi mee-gá nachinaa-gá nchaa sá quidé ñaha ñáyiú cùu úhú iní ñáhá xii-ndo,

⁷ te nchoo ñáyiú ndòho cuendá Xítohó Jesucristú nucúndecu váha-o na sàá nduu núu túu-gá andiu, te tnàhá cue espíritu xínú cuéchi núú Yá Ndiòxí cuuⁿ ndihi-gá, te cue espíritu-áⁿ quidé-xi nchaa núú chiúⁿ tahu-gá. Te òre nuu túu-gá andiu ndihi cue espíritu-áⁿ, te ío dátásaⁿ-xi andiu.

⁸ Te dandòho-gá nchaa ñáyiú ñà túú tnàhá tnúhu ndihi Yá Ndiòxí, ñáyiú ñà túú sàndáá iní tnúhu Xítohó Jesucristú tnúhu sá cáháⁿ nàcuáa naníhí tàhú-yu.

⁹ Te nchaa ñáyiú-áⁿ ío dandòho ñaha-gá xii-yu, chi ndohó-yu ni caa ni quíhíⁿ, te vá cùndécú-yu núú ío váha càa ndecu-gá táxí tnùní-gá.

¹⁰ Te ducaⁿ càda ñaha-gá xii-yu na sàá nduu, te dàvá-áⁿ ío cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ío cuñúhu-o-gá dàvá-áⁿ.

¹¹ Te cuendá xiáⁿ núú ío xicáⁿ táhú-ndí núú Dütú Ndiòxí sá ná chindee ñaha-gá xii-ndo cùndecu váha-ndo ichi-gá dàtná cuimí mée-gá cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tùcu-ndí núú-gá sá ío na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gá.

¹² Te núu ducaⁿ na càda-ndo, te cáháⁿ váha ñáyiú cuendá Xítohó Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiòxí ndihi Xítohó Jesucristú cùndahú iní ñáhá-gá chùndee ñaha-gá xii-ndo.

2

Tée quixi dandahú ñáyiú

¹ Te nchòhó ñáyiú ndècu ndihi-ndí ichi Xítohó Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nàcuaca ñaha-gá xii-o, núu xiáⁿ cáháⁿ-ndí dóho-ndo.

² Te ñà díú sá ñⁿ tnúhu tecú dóho-ndo te ngúta-ndo càni ñⁿ caní úú iní-ndó, te ni vá yúhú-ndó te núu véxi ñⁿ tée cächí-dé sá cáháⁿ-dé tnúhu Yá Ndiòxí, te cächí-dé sá sá véxi Xítohó Jesucristú, te vá quindáá iní-ndó tnúhu cáháⁿ-dé chi ñà ndáá, àdi véxi ñⁿ tée nèhe ñⁿ tutú núu-ndó te cächí-dé sá yúhú ní tendaha-í véxi, te núú tùtú-áⁿ cáháⁿ-xi sá sá véxi Xítohó Jesucristú, te diu-ni vá quindáá iní-ndó nàcuáa cáháⁿ-xi, te ndèda-ni càa ñáyiú cáháⁿ-yu dàvá-áⁿ sá sá véxi-gá dico vá quindáá tnàhí iní-ndó.

³ Núu xiáⁿ dátúha ñaha-í xii-ndo cuendá sá vá dàña tnàhí-ndo mée-ndo dandahú ñáhá ñáyiú. Chi cùmání-gá sáá nduu quixi tucu Xítohó Jesucristú, te ngúta nchaa ñáyiú cuu úhú iní-yu Yá Ndiòxí, te dàvá-áⁿ quini-yu ñⁿ tée xidó quidé nchaa sá cuéhe sá dúhá, te téé-áⁿ quíhíⁿ-dé núú úhú núú ndáhú ni caa ni quíhíⁿ.

⁴ Te diu-ni téé-áⁿ vá ndèe iní-dé nchaa sá cächí ñáyiú cùu ndiòxí-yu ndihi nchaa dava-gá sá quidé càhnu-yu, te cächí-dé sá ío cùnuu-dé, te quíhu-dé ndéé xití veñúhu núú ndécú cué ñáyiú chiñúhu ñaha xii Yá Ndiòxí coo-dé, te cùñaha-dé xii-yu sá cúú-dé Yá Ndiòxí.

⁵ Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xíndecu ndíhi ñaha-í.

⁶ Te nchòhó sa cùtnuní iní-ndó nã cúú sã ngání ñaha xii té-áⁿ núu ñã túú-dě vitna, dico na sãá nduu tãú-xi quee-dě caca cuu-dé te dává-áⁿ quini ñáhá nchaa ñáyiu.

⁷ Te ío titní núú sã cuèhé sã dúhá quide yucu ñávãha dicó-ni sã vátã quini-gã ñáyiu, dico ndècu ñⁿ sã ñã dãñã càda-xi nchaandi túhú nãcuáa cãchí iní-xi, dico sãá nduu xòcuíñí sã ñã dãñã-ãⁿ te dává-áⁿ cada-xi nchaa nãcuáa cãchí iní-xi.

⁸ Te sãá nduu quini-yu tée quide nchaa sã cuèhé sã dúhá-áⁿ ñuyiú-a. Te óré ná quixi túu Xítohó Jesucristú, te mee-ni sã dátãsaⁿ-xi, ndíhi yócó yuhu-gã cuú té-áⁿ.

⁹ Te sãcuíñá tendaha-xi té-áⁿ quixi-dé, te cuãñaha-xi tnúhu ndee iní cada-dé nãndí sã cáda-dě. Te cada-dé sã ñã túú tnàhí ndàcu ní ñⁿ ñáyiu ñuyiú-a cada-yu, dico mee-ni dãndahú ñáhá-dě xii-yu caca cuu-dé.

¹⁰ Te nchaa núú sã cuèhé sã dúhá càda-dé dandáhú-dé nchaa ñáyiu sa ñùhu ichi cuáhãⁿ núú ùhú núú ndàhú, chi ñã túú ní cuini-yu quindáá iní-yu tnúhu ndáá tnúhu Yá Ndióxi cuendá naníhí tãhú-yu.

¹¹ Te sã dúcãⁿ ñã túú ní cuini-yu quindáá iní-yu tnúhu ndáá, núu xiãⁿ daña Yá Ndióxi dacáhãⁿ yucu ñávãha iní-yu quindáá iní-yu nchaa tnúhu ndehne

¹² cuendá cuíta nihnú-yu, te ducaⁿ yãha-yu chi ñã túú sãndáá iní-yu tnúhu ndáá càhãⁿ Yá Ndióxi, chi mee-ni nchaa sã cuèhé sã dúhá cudiñí iní-yu quidé-yu, te cuíta nihnú-yu chi ducaⁿ ní cachí Yá Ndióxi cunduu.

Ñáyiu ní cachí Yá Ndióxi naníhí tãhú

¹³ Te nchòhó ñáyiu ndècu ndíhi-ndí ichi Xítohó Jesucristú, ñáyiu ío cùu iní-gã cãchí tnúhu-ndí xii-ndo sã ñã túú daña ndee-ndí ndacãⁿ tãhú-ndí núú Yá Ndióxi cuendá-ndó, chi ducaⁿ tãú-xi cunduu, chi Yá Ndióxi ní cachí-gã ndéé cùtnàhá vátã ngãva-gã ñuyiú sã naníhí tãhú-ndó, te ñu Espiritú-gã dácáhãⁿ-xi iní-ndó ndècu yíñuhu-ndo núú-gã, te sãndáá iní-ndó tnúhu ndáá càhãⁿ-gã núu xiãⁿ ní naníhí tãhú-ndó.

¹⁴ Chi cuendá tnàhí-a ní càhãⁿ ñáhã Yá Ndióxi xii-ndo, te ducaⁿ ní naníhí tãhú-ndó chi ní sãndáá iní-ndó tnúhu Xítohó Jesucristú ní càhãⁿ-ndí núú-ndó, te sãá nduu te cundecu-ndo tnàhã-ndó núú ío vãha cãa ní nduu tãhú Xítohó Jesucristú ndécú-gã.

¹⁵ Núu xiãⁿ nchòhó ñáyiu ndècu ndíhi-ndí ichi Xítohó Jesucristú ío càhãⁿ-ndí dóho-ndo sã vã dãñã nihnu-ndo ichi-gã, te ní vã nãcuãnaa-ndo nchaa tnúhu ní càhãⁿ-ndí núú-ndó cùtnàhá ní xíndecu ndíhi ñaha-ndí xii-ndo, te ñu-ni ducaⁿ càda-ndo nchaa tnúhu tẽndaha-ndí véxi.

¹⁶⁻¹⁷ Te xicãⁿ tãhú-ndí núú-gã sã ná dácáhãⁿ-gã iní-ndó cundecu-ni-ndo ichi-gã, te ducaⁿ ío na chĩndee ñaha-gã xii-ndo càhãⁿ-ndó mēe-ni tnúhu vãha, te cada vãha-ndo cundecu-ndo nãcuáa cuu vãha iní-gã, chi mee Dütú Ndióxi ío cùu iní ñáhã-gã xii-o, te ñu-gã ní taxi-gã tnúhu ndee iní cundecu ndíhi-o ní caa ní quíhíⁿ, te ní cachí tnúhu tucu-gã ingã tnúhu vãha sã cundètu-o Xítohó Jesucristú.

3

Cáhãⁿ ndíhi-ndo Yá Ndióxi cuendá-ndí

¹ Te nchòhó ñáyiu ndècu ndíhi-ndí ichi Xítohó Jesucristú, ndéé núú ndíhi-ñã cãchí tnúhu-í xii-ndo sã càhãⁿ ndíhi-ndo Yá Ndióxi cuendá-ndí cuendá sã ná chĩndee ñaha-gã xii-ndí, te ducaⁿ ndíhi-ni cutènuu tnúhu Xítohó Jesucristú nchaa xichi, te cuñí iní-yu tnúhu-gã dàtnã quidé nchòhó.

² Te càhãⁿ ndíhi tucu-ndo Yá Ndióxi cuendá sã ná còto ñaha-gã xii-ndí, te ñã túú nã cada ñaha ñáyiu cuñna iní-xi ndècu ichi cuèhé ichi duha xii-ndí, chi ñã nchãã-yu sãndáá iní-yu tnúhu-gã.

³ Dico Xítohó Jesucristú quidé-gã nchaa sã càhãⁿ-gã, te ñu-gã cada te nchòhó cundecu-ni-ndo ichi-gã, te coto ñaha-gã xii-ndo cuendá sã ñã túú nã cada ñaha yucu ñávãha.

⁴ Te Xítohó Jesucristú quidé-gã cùtnuní iní-ndí sã nchòhó quidé-ndó nchaa nãcuáa ní dãnèhé ñáhã-ndí xii-ndo, te ñu-ni ducaⁿ càda-ndo cundecu-ndo.

⁵ Te xicãⁿ tãhú-ndí núú Yá Ndióxi sã ná chĩndee ñaha-gã xii-ndo cùu iní-ndó-gã, te ñu-ni-gã ná chĩndee ñaha-gã xii-ndo cunduu cahnu iní-ndó, chi Xítohó Jesucristú ducaⁿ ío cãhnu iní-gã.

Tãú-ó càda chiuⁿ-o

⁶ Te nchòhó ñáyiu ndècu ndíhi-í ichi Xítohó Jesucristú, càhãⁿ-í dóho-ndo sã mēé-gã cuini-gã sã vã nihí tnàhã-gã-ndó ndíhi ndéda-ni cãa ñáyiu cãchí sã sãndáá iní tnúhu-gã, ñáyiu ñã túú cuini cada chiⁿ, chi ñáyiu ducaⁿ xiquide ñã túú cuini-yu tñú-yu tnúhu sã ní dãnèhé ñáhã-ndí xii-ndo.

⁷ Te nchòhó sa xini-ndó nãcuáa cada-ndo cundecu-ndo canchicúⁿ nihnu-ndo nãcuáa quide-ndí. Te cùtnàhá ní xíndecu ndíhi ñaha-ndí xii-ndo chi ní ñⁿ nduu ñã túú ní tũhío-ndí.

⁸ Te ní ñã túú dicó ducaⁿ ní quèheⁿ-ndí sã ndécú ndíhi ñáyiu caxi-ndí àdi canehe-ndí, chi cuéi nduu cuéi níú ío ní quide chiⁿ-ndí ní nihí-ndí díhúⁿ ní saaⁿ-ndí nchaa sã ní nãndíhi-ndí cuendá sã ñã túú ní cuini-ndí chichúⁿ ñaha-ndí xii-ndo.

⁹ Te cuéi tãú ndisa-ndí cachí tnúhu-ndí xii-ndo sã chĩndee ñaha-ndo xii-ndí ní cùu,

dico ní quide chiùⁿ-ndí cuèndá ní cuiní-ndí danèhé ñáhá-ndí xii-ndo nàcuáa cada-ndo cùndecu-ndo.

¹⁰ Te cútnàhá ní xíndecu ndihí ñaha-ndí xii-ndo ní cachí-ndí sá ncháá ñáyiú ñá túú cuiní cada chiùⁿ te vá cuáha-ndö-yu sá cáxí-yu.

¹¹ Te vitna nihí-ndí tnúhu sá ío dava nchòhó ñá túú tnàhí quide chiùⁿ-ndo, chí àúⁿ nã cuu ndí cuu ndí cuu-ni-ndo núú ndécú dâva-gá tnàha ñáyiú-ndo.

¹² Te yúhú cáháⁿ-í dóho nchaa nchòhó ñáyiú ducaⁿ ñá túú cuiní cada chiùⁿ sá cádá chiùⁿ-ndo cuendá nihí-ndó ncháa sá cóhó sá cáxí-ndó, te duha cáháⁿ-í dóho-ndo, chí ducaⁿ cuiní Xítohó Jesucristú Yaa táxí tnùní ñáhá xii-o cada-ndo, te òré cada chiùⁿ-ndo te vá ío cada dusaⁿ-ndo.

¹³ Te nchòhó ñáyiú ndècu ndihí-í ichi Xítohó Jesucristú, vá dáñá ndèè-ndó càda-ndo mee-ni sá vâha.

¹⁴ Te núú ìⁿ ñáyiú ndècu ndihí-ndo ñá túú cuiní-yu tní-yu tnúhu cáháⁿ-ndí núú tùtú-a, te cundehe-ni-ndo núú ndèda cáá-yu, te vá nihí tnàhá-gã-ndó ndihí-yu cuèndá sá ná cùcahaⁿ núú-yu,

¹⁵ dico vá cúú ũhú iní-ndö-yu, chí cáháⁿ-ndó dóho-yu cada-ndo sã ndécú-ndó ichi Xítohó Jesucristú ndihí-yu.

Tnúhu ndée núú ní ndihí-ná

¹⁶ Te mee Xítohó Jesucristú ío váha cùú iní-gá ndécú-gã, te xicáⁿ táhù-í núú-gã sá mée-gã ná cádá te ío váha cuu iní-ndó tnàhá-ndó cùndecu-ndo cuéi nása-gã ná cùndecu-ndo. Te mee-gã ná cùndecu ndihí ñaha-gã xii-ndo ncháa-ndo.

¹⁷ Te vitna yúhú té Páblú téé-í tnúhu-a quide ndee iní ñáhá-í xii-ndo, te ñiu-ni duha càa nchaa letrá-í nchaa núú tùtú cádüha-í.

¹⁸ Te xicáⁿ táhù-í núú Xítohó Jesucristú sá ío na chindee chítúú ñaha-gã xii-ndo ncháa-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ DÍHNA NUU NÍ CADÚHA TÉ PĀBLÚ QUIHⁿ NDAHA TÉ TIMŪTEÚ

Té Pāblú cādūha-dé tutú quihⁿ ndaha té Timūteú

¹ Yúhú té Pāblú ní tendaha ñaha Yá Ndióxi cāháⁿ í tnúhu Xítoho Jesucristú núú ñáiyu chí ducaⁿ ní cachí Yá Ndióxi cunduu, te diu-gá cúú-gá Yaá ní dácácu nihnu ñaha xii-o núú úhú núú ndahú. Te tnàhá Xítoho Jesucristú ducaⁿ ní cachí-gá sá cāháⁿ-í tnúhu-gá, te diu-gá ní taxi-gá tnúhu ndee iní xii-o sá cundécú-o ndihi-gá ní caa ní quihⁿ.

² Te yóhó té Timūteú cúú-n ñⁿ téé ní sanu ichi ndisa-í ichi Xítoho Jesucristú chí ío váha ní sándáá iní-n-gá. Te cādūha-í ñⁿ tutú daquixi-í ndaha-n. Te xicáⁿ táhú-í núú Tátá-ó Dútú Ndióxi ndihi núú Xítoho Jesucristú sá ío na chindee chitúú ñaha-gá xii-n, te ducaⁿ ndí nduú-gá ná cādá te ío váha cuu iní-n cundecu-n.

Cuendá nchaa ñáiyu dāndahú tnàha ñáiyu-xi

³ Te nàha-n nacuaá ní cāháⁿ-í cútnàhá ní quee-í ñuú Éfesú véxi-í distritú Macèdoniá, chí ní cachí-í sá quéndóo-n ñuú-áⁿ cāháⁿ-n dōho nchaa ñáiyu dāndahú ñáhá cachí sá cāháⁿ tnúhu Yá Ndióxi te ñá ndáá sá cāháⁿ-yú tnúhu-gá, te diu-ni ducaⁿ cāháⁿ-í vitna cada-n cundecu-n.

⁴ Te cúñaha-n xii-yu sá vā cādá cuendá-yu nchaa cuendú ñihi-yu nācuáa ní xóo cada ñáiyu ní xindecu ndéé sanaha, te nchaa cuendú-áⁿ dico chínàá ñáhá-xi chí ñá túú vèdana nāndihi-xi, te ní ñá túú chindee ñaha-xi cada-o nacuaá cuini Yá Ndióxi, chí mee-ni sá quindáá iní-ó-gá quidè-xi quide-o nchaa nacuaá cuini-gá.

⁵ Te duha cāháⁿ-í cúñaha-n xii-yu cuendá sá ná cūu iní-yu ñáha ñáiyú-yu, te xini ñuhu-xi nduu ndoo nduu iní-yu, te cunduu váha iní-yu, te quindáá iní-yu Yá Ndióxi, te vā cáni ñⁿ caní úú iní-yu, te núu ducaⁿ na cādá-yu te cuu iní ndisá-yu nchaa tnàha ñáiyú-yu.

⁶ Chí dāva ñáiyu ñá túú-gá quidè-yu nchaa nācuáa cāháⁿ-í-a, chí mee-nā nchaa cuendá sá ñá túú vèdana nāndihi xicāháⁿ-yu.

⁷ Te cuini-yu cāháⁿ-yú nchaa tnúhu ní cāháⁿ ndíi Moisés dico ñá ndācū-yu, chí cuèi ní yūhu ní iní-yu cāháⁿ-yú dico ñá tècú tnūnī-yu nācuáa ní cāháⁿ ndíi, te ní tnúhu cāháⁿ mēe-yu ñá cútnūnī iní-yu nācuáa ndū-xi.

⁸ Te sa nàha-o sá nchāá tnúhu ní cāháⁿ ndíi Moisés váha, te núu na tècú tnūnī-ó nā cuendá ducaⁿ ní ngūndecu nchaa tnúhu-áⁿ.

⁹ Te cūtnūnī iní-ó sá ñá díú sá cúú-xi nchāa ñáiyu quide váha ndècu ñuyúú-a ní ngūndecu nchaa tnúhu-áⁿ, chí ní ngūndecu-xi sá cúú-xi nchāa ñáiyu ñá túú quide váha, ndihi cuendá nchaa ñáiyu ío sáá iní-xi, ndihi cuendá nchaa ñáiyu quide cuehé quidè dūha, ndihi cuendá nchaa ñáiyu ío ndècu cuèchi-xi, ndihi cuendá nchaa ñáiyu ñá túú nèhe vèdana sá yíñūhu núú Yá Ndióxi, ndihi cuendá nchaa ñáiyu ñá túú cāháⁿ váha cuendá ichi Yá Ndióxi, ndihi cuendá nchaa ñáiyu sàhni tátá-xi ndihi nāná-xi, ndihi cuendá nchaa dāva-gá ñáiyu sàhni tnaha,

¹⁰ ndihi cuendá nchaa cue téé cāháⁿ ndihi ñáiyu dihi te ñá díú ñāndihi-güedé cúú-yu, ndihi cuendá tucu nchaa ñáiyu dihi cāháⁿ ndihi cue téé te ñá díú yíi-yu cūu-güedé, ndihi cuendá nchaa cue téé cāháⁿ ndihi tnàha ndi mee téé-xi, ndihi cuendá nchaa ñáiyu chívāha tnàha ñáiyu-xi cuendá sá cuini-yu níhi-yu díhú, ndihi cuendá nchaa ñáiyu ndehnde, ndihi cuendá nchaa ñáiyu cācunehe ndéé Yá Ndióxi cuendá cuini-yu cutnūnī iní tnàha ñáiyú-yu sá cāháⁿ ndāá-yu, te ñá ndāá sá cāháⁿ ndāá-yu, ndihi cuendá nchaa ñáiyu quide nchaa dāva-gá sá ñá túú tūchiuⁿ Yá Ndióxi cādá-yu. Cuendá nchaa ñáiyu ducaⁿ xiquide ní ngūndecu nchaa tnúhu-áⁿ.

¹¹ Te nchaa tnúhu-áⁿ ñⁿ-ni cūu-xi ndihi nchaa tnúhu sá ní cachí Yá Ndióxi cāháⁿ-í, te tnúhu-áⁿ cúú-xi tnúhu váha vihi, chí mee-gá ío váha iní-gá.

Té Pāblú ndācáⁿ táhú-dé núú Yá Ndióxi sá ní cundāhú iní ñáhá-gá xii-dé

¹² Te Xítoho Jesucristú ní cutnūnī iní-gá sá cādá ndāá-í cada-í nchaa chíuⁿ tahu-gá. Te ndācáⁿ táhú-í núú-gá sá ní taxi-gá chíuⁿ-gá quidè-í, te ío chindee ñaha-gá xii-í.

¹³ Te ní taxi-gá chíuⁿ-gá quidè-í cuèi ní xóo cāháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáiyu ndècu ichi-gá, te cuèi nāndi-gá sá ní xóo cada-í-yu dico ní cundāhú iní ñáhá Yá Ndióxi xii-í, chí vátá quindáá-gá iní-í Xítoho Jesucristú cútnàhá ducaⁿ ní xóo cada-í, te ní ñá cútnūnī iní-í nchaa sá quidè-í ní cūu, te cuèi ducaⁿ ní xóo cada-í.

¹⁴ dico Yá Ndióxi ío ní cundāhú iní ñáhá-gá xii-í te chindee ñaha-gá. Te mee Xítoho Jesucristú chindee ñaha-gá xii-í sāndāá iní-í-gá, te cūu iní-í nchaa tnàha ñáiyu-í.

¹⁵ Te ñihi-ó tnúhu sá Xítoho Jesucristú ní quixi-gá ñuyúú-a cuendá sá dácácu nihnu-gá nchaa ñáiyu ndècu ichi cuehé ichi duha. Te tnúhu-áⁿ cúú-xi ñⁿ tnúhu ndāá, te xini ñuhu-xi quindáá iní nchaa nchoo ñáiyu

ndècu ñuyúú-a. Te yúhú cùú-í tée ío-gá ndécú cuèchi-xi núú Yá Ndióxi ní cùu.

¹⁶ Te Yá Ndióxi ní cundàhú iní ñàhá-gã ní dácácu nihnu ñaha-gã xii yúhú tée xidó ndécú cuèchi-xi ní cùu, cuendá cutnùní iní nchaa ñáyúú sá Xítohó Jesucristú ío cànhu iní-gá. Te sá dúcáⁿ ní quide ñaha-gã xii-í, te xíáⁿ cutnùní iní-yu sá núu na quindáá iní ñàhá-yu xii-gá te cundecú-yu ndihi-gá ní caa ní quíhíⁿ.

¹⁷ Te nchaa-o chí ná cächí-ó sá ío cànhu cuu Yá Ndióxi, te canehe-o sá yíñùhu núú-gã ní caa ní quíhíⁿ, chí mee-gã cùú-gã Yá táxi tnùní nchaa nduu nchaa quíú. Te cùu-gã ìⁿ Yáá ñá túú xini núú-ó, te ìⁿdií díí-ni-gã ío ndècu ndihi-gá nchaa sá xini tnùní-gá.

¹⁸ Te yòhó té Timùtéú tée cùu datná ìⁿ déhe mee-í sa ñaha-n nacuaá ní cãháⁿ dava-gá cue tée cãháⁿ tnúhu Yá Ndióxi cuendá-n, te ñiu-ni ducaⁿ cãháⁿ-ú tucu, te cada-n nchaa nacuaá cãháⁿ tnúhu-áⁿ chí ñiu nchaa tnúhu-áⁿ canu ichi ñaha-xi xii-n cada-n nchaa nacuaá cuini Yá Ndióxi.

¹⁹ Te ío quindáá iní-n Xítohó Jesucristú, te cada váha-n cundecu-n nacuaá cundecu váha iní-n, chí dava ñáyúú ñá túú-gã ducaⁿ quidè-yu núu xíáⁿ ñá túú-gã sàndáá iní-yu nacuaá cãháⁿ tnúhu-gá.

²⁰ Te ñiu-ni ducaⁿ ní quide té Himènéú ndihi té Lijandru ní dáñá ndèé-güedé ñá túú-gã sàndáá iní-güedé nacuaá cãháⁿ tnúhu Xítohó Jesucristú, te ní xáhaⁿ-í xii-güedé sá ná cundoho-ná-güedé núu nása cada ñaha sàcuihná xii-güedé, te ducaⁿ ní xáhaⁿ-í cuendá sá vá cãháⁿ cuèhé-gã-güedé cuendá Yá Ndióxi.

2

Nacuaá cãháⁿ ndihi-o Yá Ndióxi

¹ Te na cächí tnúhu-í xii-n nchaa nacuaá cada-n. Te díhna-gá cächí tnúhu-í sá cãháⁿ ndihi-n Yá Ndióxi cuendá nchaa ñáyúú te núu nása cùu xindecú-yu, te cãcáⁿ tãhú-n núú-gã cuendá-yu, te ducaⁿ ío ndacáⁿ tãhú-n núú-gã cuendá nchaa sá váha quide ñaha-gã xii-yu.

² Te ducaⁿ cãháⁿ ndihi-n Yá Ndióxi cuendá nchaa cue tée cùnuu ndihi cuendá nchaa dava-gá cue tée cùchiuⁿ cuendá cada váha-güedé, te ducaⁿ nchòo ñá túú ná cuu cundecu-o, te ñá túú tnáhi ná caní iní-ó cundecu-o, te ío cundecu yíñùhu-o núú Yá Ndióxi, te cada-o nchaa nacuaá tàú-xi cunduu.

³ Te núu ducaⁿ na càda-o cãháⁿ ndihi-o Yá Ndióxi cuendá nchaa ñáyúú te quide váha-o, te nduu vétú iní Yá Ndióxi Yáá ní dácácu nihnu ñaha xii-o núú ùhú núú ndàhú.

⁴ Te mee-gã cuini-gá sá nchaa ñáyúú tecú tnùní-yu nchaa tnúhu cãháⁿ-gã, chí cuini-gá sá nánihí tãhú-yu.

⁵ Te ìⁿ-ni Dútú Ndióxi ndécú, te ìⁿ-ni Xítohó Jesucristú, te medi-ni Xítohó Jesucristú quidè-gã tnàhá tnúhu-o ndihi Yá Ndióxi.

⁶ Te Xítohó Jesucristú ní dáñá-gã méé-gã ní sahní ñaha-güedé xii-gã cuendá sá cuini-gã sá cácu nihnu nchaa ñáyúú ndècu ñuyúú núú ùhú núú ndàhú. Te Yá Ndióxi cuini-gá sá nchaa ñáyúú ñuyúú ndécú vitna níhí-yu tnúhu nacuaá ní cuu ní xihí Xítohó Jesucristú.

⁷ Te Yá Ndióxi ní cächí-gã sá cãháⁿ-í tnúhu-áⁿ ndèni ní cuu núú xindecu ñáyúú ñá túú cùu ñáyúú isràél, te mee-ni tnúhu ndáá dánèhé-í-yu nacuaá quindáá iní ñàhá-yu xii-gã, te yúhú cãháⁿ ndáá-í sá Yá Ndióxi ní cächí-gã sá cãháⁿ-í tnúhu-gã chí ndècu ndihi-í Xítohó Jesucristú, te ñá túú dándahú ñàhá-í xii-n.

⁸ Te yúhú cuini-í sá nchaa xichi cãháⁿ ndihi cue tée Yá Ndióxi, te na cunduu ndoo cunduu nine iní-güedé òré ndonehe-güedé ndaha-güedé cãháⁿ ndihi ñaha-güedé xii-gã, chí vá cùú cùdèéⁿ-güedé cuendá nchaa sá quidè ñaha ñáyúú xii-güedé, te ní vá caní iní-güedé cùcuèhé tnàhá-güedé ndihi-yu.

⁹ Te cächí tnúhu-í xii-n sá nchaa ñáyúú ñíhí ná cunduu dío-yu nacuaá tàú-xi cunduu, te vá cundúu cuèhé cunduu duha dátna cáá dío nchaa ñáyúú ndècu ichi cuèhé ichi duha, te na ndádá-yu díquíⁿ-yu nacuaá tàú-xi cunduu, te vá ndádá cuèhé ndada duhá-yu, te vá caní iní-yu cunduu víi-yu ndihi sá ío ndèyáhu, te ní vá caní iní-yu cuihnú-yu dóó sá ío ndèyáhu.

¹⁰ Te mee-ni sá váha cadá-yu, chí ducaⁿ tàú-xi cada nchaa ñáyúú ñíhí ndécú ichi Yá Ndióxi.

¹¹ Te òré tàcá-yu núú dácuahá-yu tnúhu Yá Ndióxi, te cue ñáyúú ñíhí-áⁿ na ñàhi dacuahá-yu tnúhu-gã, te cadá-yu nchaa nacuaá cãháⁿ cue tée dácuaaha ñaha xii-yu tnúhu-gã.

¹² Te yúhú cächí-í sá vá cùú dácuaaha ñáyúú ñíhí cue tée, te ní vá cùú tàxi tnuní ñàhá-yu xii-güedé chí cunduu tnávíi-ni yuhú-yu cundedóho-yu.

¹³ Te ducaⁿ xini ñuhu-xi cadá-yu, chí Yá Ndióxi ní cadúha-gã díhna-gã té Àdán te dátñuní ní cadúha-gã tá Évá.

¹⁴ Te ñá díú mée té Àdán ní dándahú ñàhá sàcuihná xii-dé, chí tá Évá ní dándàhú-xi, te ñá túú ní quide váha-xi núú Yá Ndióxi sá dúcáⁿ ní sàndáá iní-xi tnúhu ní cãháⁿ sàcuihná-áⁿ.

¹⁵ Dico ñáyúú ñíhí ní nduu tãhú-yu sá cóó dèhe-yu, te nanihí tãhú-yu te núu vá dáñá ndèé-yu canchicúⁿ nihnú-yu ichi Yá Ndióxi, te cundecu yíñùhú-yu núú-gã, te cuu iní-yu nchaa tnàha ñáyúú-yu, te cadá-yu nchaa nacuaá tàú-xi cunduu cundecú-yu.

3

Nàcuáa tàu cue tée yìndaha ñaha xii ñáyiu ndècu ichi Yá Ndióxi cada-güedé

¹ Te ió ñⁿ trñuhu càháⁿ ñáyiu sá núu ñⁿ tée cuiní quindaha ñaha xii ñáyiu ndècu ichi Yá Ndióxi, te ñⁿ sá váha cuiní-dé cada-dé càchí-yu, te ndáá quée-xí trñuhu càháⁿ-yu.

² Te yúhú càchí-í sá cuè téé ducaⁿ na quindaha ñaha xii ñáyiu te xini ñuhu-xi cuu-güedé cue téé quide ndáá cuendá sá vá càháⁿ ñáyiu cuendá-güedé sá ñá túú quide ndáá-güedé. Te na cùu-güedé cue téé ndèca ñⁿ caa-ni ñadihí, te na cùu-güedé cue téé ñá túú quide cutexínu ndècu, te na cùu-güedé cue téé quide nchaa nacuaáa tàu-xi cunduu, te na cùu-güedé cue téé sãñaha núu vehe ndetatú nchaa ñáyiu ñuhu ichi, te na cùu-güedé cue téé dānehé ñáhá váha xii ñáyiu trñuhu Yá Ndióxi.

³ Te vá cúu-güedé cue téé quihu, te ni vá cúu-güedé cue téé ndècu pletú, te ni vá cúu-güedé cue téé dicó-ni ducaⁿ nihí dñhúⁿ, te ni vá cúu-güedé cue téé sãni iní nãá, te ni vá cúu-güedé cue téé ñuhu iní mee-ni dñhúⁿ. Chi na cùu-güedé cue téé váha iní-xi te cunduu càhnu iní-güedé.

⁴ Te na cùu-güedé cue téé ío váha sãnu ichi ñadihí-xi ndihí landú-xi, te na cùu-güedé cue téé quide nacuaáa sãndáá iní ñáhá landú-xi cuendá canehe-güexi sá yíññuhu núu-güedé.

⁵ Chi núu cùu-güedé cue téé ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiu ndècu ichi Yá Ndióxi.

⁶ Te vá cúu-güedé cue téé íchí ní sãndáá iní-xi trñuhu Yá Ndióxi, chi na cuáháⁿ te cada nínu-güedé mée-güedé te cuíta nihnu-güedé dátá ní xíta nihnu sãculhã.

⁷ Te xini ñuhu-xi cuu-güedé cue téé càháⁿ váha ñáyiu cuendá-xi, cuéi ñá díú ñáyiu ndècu ichi Yá Ndióxi cuendá sá vá cuatñuhu ñaha ñáyiu xii-güedé, chi núu ñáhá te cudana te sãculhã quesaha-xi tàxi tñuní ñáhá-xi xii-güedé.

Cue téé chindee ñaha xii cue téé yìndaha ñaha xii ñáyiu ndècu ichi Yá Ndióxi

⁸ Te trñáha cue téé chindee ñaha xii cue téé yìndaha ñaha xii ñáyiu ndècu ichi Yá Ndióxi xini ñuhu-xi cuu-güedé cue téé quide nchaa nacuaáa tàu-xi cunduu, te vá cúu-güedé cue téé càchí sá càháⁿ ndáá te ñá ndáá, te ni vá cúu-güedé cue téé quihu, te ni vá cúu-güedé cue téé sãni iní-xi dicó-ni ducaⁿ nihí dñhúⁿ.

⁹ Te xini ñuhu-xi cuu-güedé cue téé ñá túú dàña ndeé sãndáá iní trñuhu Yá Ndióxi, te na cùu-güedé cue téé ío váha cùu iní-xi cuendá nchaa sá váha quide-güedé.

¹⁰ Te xini ñuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te

cuu chindee-güedé cue téé yìndaha ñaha xii ñáyiu ndècu ichi Yá Ndióxi.

¹¹ Te trñáhá tucu nchaa ñáyiu dñhí ná càdá-yu nchaa nàcuáa tàu-xi cunduu, te vá cundúu yiti yuhú-yu, te ni vá cúu-yu ñáyiu quide cutexínu ndècu, te na cùu-yu ñáyiu ío váha quide ndáá.

¹² Te nchaa cue téé chindee ñaha xii cue téé yìndaha ñaha xii ñáyiu ndècu ichi Yá Ndióxi, xini ñuhu-xi cuu-güedé cue téé ndècu ñⁿ caa-ni ñadihí-xi, te na cùu-güedé cue téé sãnu ichi váha ñadihí-xi ndihí landú-xi.

¹³ Te núu na càda ndáá-güedé chindee-güedé cue téé yìndaha ñaha xii ñáyiu ndècu ichi Yá Ndióxi, te canehé-yu sá yíññuhu núu-güedé, te ducaⁿ te vá cúu càháⁿ núu-güedé càháⁿ-güedé núu ñáyiu trñuhu Xitohó Jesucristú sá sãndáá iní-güedé.

Ío càhnu cuu trñuhu càháⁿ Yá Ndióxi

¹⁴ Te cuiní-í ndihí-ni quixi coto ñaha-í xii-n dico dñhna-gá càdũha-í tutú-a daquixi-í ndaha-n

¹⁵ Chi na cuáháⁿ cuyaa-í. Te xíaⁿ núu càdũha-í tutú-a daquixi-í ndaha-n cuendá cutnuni iní-n nãsa cada-n cundècu-n ndihí nchaa ñáyiu ndècu ichi Yá Ndióxi. Te ñáyiu-áⁿ cúu-yu dátá ñⁿ vehe cùu cuendá Yá Ndióxi Yáá ndécú nchaa nduu nchaa quúú, chi ndècu ndihí ñaha-gá xii-yu, te cúu-yu ñáyiu càháⁿ váha cuendá trñuhu-gá.

¹⁶ Te cùtñuní ndáá iní-ó sá ío càhnu cuu trñuhu càháⁿ Xitohó Jesucristú, trñuhu sá càháⁿ nãcuáa nduu ichi ndecu-o, te duha càháⁿ trñuhu-áⁿ:

Te ní quixi Yá cúu Ndióxi ñuyúú-a ní cuu-gá ñⁿ ñáyiu,

te Espiritú Yá Ndióxi ní càháⁿ ndáá-xi sá cúu-gá ñⁿ Yáá ío váha quide ndáá, te cue espíritú xínú cuèchi núu Yá Ndióxi ní xini ndáá-xi nchaa nàcuáa ní quide Yáá ní quixi ñuyúú-a.

Te ní xité nuu trñuhu-gá nihí ñuyúú-a, te ndèni ní cuu ní ngúita-yu sãndáá iní ñáhá-yu xii-gá, te mee-gá cuánda-gá andiu. Duha càchí trñuhu-áⁿ.

4

Ñáyiu dàña nihnu vá quindáá-gá iní-yu Yá Ndióxi

¹ Te Espiritú Yá Ndióxi càháⁿ ndáá-xi sá sáá nduu dàña nihnu dava ñáyiu ndècu ichi-gá vá quindáá iní ñáhá-gá-yu xii-gá, te ducaⁿ chi cue espíritú cundihí yucu ñávãha dandahú ñáhá-xi xii-yu, te mee-nã nchaa trñuhu càháⁿ nchaa ñáyiu cundihí nchaa espíritú-áⁿ cuhuⁿ iní-yu.

² Te nchaa ñáyiu ducaⁿ cundihí cue espíritú cundihí yucu ñávãha-áⁿ cúu-yu ñáyiu ío dandahú mée-xí chi càchí-yu sá càháⁿ

ndáá-yu te ñá ndáá, te ñá túú tñahí-gá ná quidé-xí iní-yu cuendá nchaa sá cuèhé sá dúhá quidé-yu.

³Te ñáyiú-áⁿ quesàhá-yu sá vã cúú càndeca tñaha ñáyiú, te ni vã cúú càxí-yu dava núú sã xini-yu caxi-yu, dico Yá Ndióxi ní cadúha-gá nchaa sá nchító-ó cuendá caxi-o, te cuini-gá sá ncháá nchò ñáyiú sàndáá iní tñuhu-gá ndacáⁿ táhú-ó núú-gã òré caxi-o.

⁴Te nchaa sá ní cadúha Yá Ndióxi cúú-xí sã vaha te vã dáquèe tihú-ó, te xini ñuhu-xi ndacáⁿ táhú-ó núú-gã cuendá nchaa xiáⁿ.

⁵Te Yá Ndióxi càchí-gá sá mée-gã quidé-gã cúú-xí sã vaha sá cúú-xí-ó te núu na ndacáⁿ táhú-ó núú-gã.

Tée quide ndáá xínú cuèchi núú Xítoho Jesucristú

⁶Te núu na dàcuaha-n ñáyiú ndècu ndihi-o ichi Xítoho Jesucristú nchaa nacuaá càháⁿ-í-a ña, te cuu-n ñⁿ tée quide ndáá xínú cuèchi núú-gã, te nducu ndèe-ni-n dacuaha-n tñuhu Yá Ndióxi sá sàndáá iní-n, te canchicúⁿ nihnu-ni-n càda-n nchaa nacuaá càháⁿ-gã, te núu ducaⁿ na cada-n, te níhí ndèe-n cùndecu-n ichi-gã.

⁷Te vã cáda cuendá-n nchaa cuendú cuèhé cuendú duha càháⁿ ñáyiú, ndihi nchaa dava-gã cuendú sá ñá túú nàndíhi cuendá sá ñá túú nã cumáni-n cùndecu-n núú Yá Ndióxi.

⁸Te núu ñⁿ chiúⁿ cada-o te nacaá luha yiqui-o te nàndíhi-xi luha, dico ío-gã nàndíhi-xi te núu cada-o sã cùndecu yiñuhu-o núú Yá Ndióxi. Te núu ducaⁿ na càda-o te cùu-xi ñⁿ sã vaha sá cúú-xí-ó vitna, te ni caa ni quihíⁿ ducaⁿ cùu-xi ñⁿ sã vaha sá cúú-xí-ó.

⁹Te xini ñuhu-xi sá ncháá-ndó quindáá iní-ndó nchaa tñuhu càháⁿ-í-a chí cùu-xi tñuhu ndáá.

¹⁰Te vitna ío ndècu ndee-o quide-o chiúⁿ Yá Ndióxi Yáá ndécú nchaa nduu nchaa quíú te quide ndee iní-ó cuendá nchaa sá quidé ñaha ñáyiú xii-o, chí sàndáá iní-ó sã díú-gã chindèe ñaha-gã xii-o. Te nchaa ñáyiú cùndahú iní ñáhá-gã te chindèe ñaha-gã xii-yu, dico ñáyiú sàndáá iní ñáhá xii-gã ío-gã cùnùú-yu chindèe ñaha-gã xii-yu, chí dàcucu nihnu ñaha-gã núú ùhú núú ndàhú.

¹¹Te nchaa tñuhu-áⁿ cññaha-n xii-yu, te càháⁿ-n dõho-yu sá ná càdà-yu nchaa nacuaá càháⁿ-xi.

¹²Te ío cada vaha-n cùndecu-n cuendá sã vã yõ daquèe tihú ñáhá xii-n cuendá sã cúú-n tée cuechi, te ío vaha cada-n nchaa sã tãu-n càda-n cuendá ducaⁿ cànchicúⁿ nihnu nchaa ñáyiú ndècu ichi Yá Ndióxi, te vii vii càháⁿ ndihí-n-yu, te cuu iní-n-yu, te ío quindáá iní-n Yá Ndióxi, te mee-ni sã vaha cani iní-n, te ducaⁿ càda-n cuendá canchicúⁿ nihnú-yu.

¹³Te nini cùyaa-í quixi-í, te ío nducu ndèe-n càháⁿ ndodo-n tñuhu Yá Ndióxi núú-yu, te dacuahá-n-yu nacuaá càháⁿ tñuhu-gã, te càháⁿ-n dõho-yu nacuaá cuu vii cuu vaha iní-yu cundecú-yu ichi Yá Ndióxi.

¹⁴Te vã dáñá ndèe-n càda-n nacuaá ndùu táhú ní taxi Yá Ndióxi ní ngùndecu ndihi-n cùtñahá ní sacáⁿ ndodo cue tée yindaha ñaha xii ñáyiú ndècu ichi Yá Ndióxi ndaha-güedé díquí-n, te ní cachí tñuhu-güedé sá dúcáⁿ ní cuini Yá Ndióxi cunduu.

¹⁵Te ni yùhu ni iní-n càda-n nchaa nacuaá càháⁿ-í-a cuendá sá ná quini ñáyiú sá ío-gã vaha ta quide-n cuaháⁿ.

¹⁶Te ío vaha cundehe-n nchaa nacuaá quide-n, ndihi nchaa nacuaá dànehé-n-yu, te vã dáñá ndèe-n dùcaⁿ cada-n. Te núu ducaⁿ na càda-n te nduu táhú-n cùndecu vaha-n núú Yá Ndióxi ni caa ni quihíⁿ ndihi nchaa ñáyiú na tédõho nchaa tñuhu càháⁿ-n.

5

Nacuáa tàú-xi cada-o cùndecu-o ndihi ñáyiú sàndáá iní tñuhu Yá Ndióxi

¹Te vã ténáá-n nchaa cue tée cùu sacuéhé chí vii vii càháⁿ-n dõho-güedé, te cada iní-n sã dàtná tãtá-n cùu-güedé, te diu-ni ducaⁿ vii vii càháⁿ-n dõho nchaa cue tée cuechi, te cada iní-n sã dàtná cue ñani-n cùu-güedé.

²Te diu-ni ducaⁿ vii vii càháⁿ tucu-n dõho nchaa ñáyiú dñí ñáyiú cùu sacuéhé, te cada iní-n sã dàtná nãnã-n cùu-yu, te diu-ni ducaⁿ vii vii càháⁿ tucu-n dõho nchaa ñáyiú dñí ñáyiú cuechi, te cada iní-n sã dàtná cue cùha-n cùu-yu, te ío cuu vaha iní-n òré ducaⁿ càháⁿ-n dõho nchaa ñáyiú cuechi-ãⁿ.

³Te canehe-n sã yiñùhu núú ñáyiú dñí ní quèndò quèé, te chindèe-n-yu núu ndàhú-yu.

⁴Te núu ñⁿ ñaha quèé ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi nchaa nacuaá tàú-xi cunduu núu-aⁿ chí ducaⁿ cuini Yá Ndióxi cada-güexi. Te núu ducaⁿ na càda-güexi te nãnchocáva-güexi quide-güexi sã vaha sã cúú-xi ñáyiú ní dàcùéhnú ñaha xii-güexi. Te núu ducaⁿ na càda-güexi te quide vaha-güexi te ío nduu vétú iní Yá Ndióxi.

⁵Te ñáyiú quèé ñáyiú ndàhú ndécú ichi Yá Ndióxi sàndáá iní-yu sã díú-gã chindèe ñaha-gã xii-yu, te cuèi nduu cuèi niú ñá túú dàña ndèe-yu càháⁿ ndihi ñáhá-yu xii-gã.

⁶Te nchaa ñáyiú quèé cúdí iní quidé nchaa sá cuèhé sá dúhá cùu-yu dàtná ñáyiú ní xihí cuèi ndècu vívú-yu.

⁷Te cññaha-n xii nchaa ñáyiú sá ná càdà-yu nchaa tñuhu càháⁿ-í-a cuendá sã ñá túú nã cumáni-yu cundecú-yu, te ducaⁿ vã yõ càháⁿ cuèhé cuendá-yu.

⁸ Te ío xini ñuhu-xi chindeé-yu cue tnàha ñáyíu-yu, dico ío-gá xini ñuhu-xi chindeé-yu cue ñáyíu cùu ndi meé-yu ndècu ndihí-yu, te núu vá dúcáⁿ cadá-yu te ñá túú-gá sándáá iní-yu cadá-yu nàcuáa càháⁿ Yá Ndióxi. Te sá dúcáⁿ ná cadá-yu te vihi-gá quidé-yu dàcúúxi ñáyíu ndècu ichi cuehé ichi duha.

⁹ Te chido tnùn-n mèe-ni ñáyíu quèé ñáyíu sa ndècu únidico cuía-xi àdi vihi-gá cuèndá ñáyíu-áⁿ cadá-yu nchaa nàcuáa cuini Yá Ndióxi núu ncháa ñáyíu ndècu ichi-gá, te ñáyíu-áⁿ xini ñuhu-xi cuú-yu mee-ni ñáyíu ní quide ndáá ní xindecu ndihí yíi-xi.

¹⁰ Te na cùu-yu ñáyíu quèé quidé vâha cùdiu núu ncháa ñáyíu, te na cùu-yu ñáyíu quèé xini canu ichi váha cue landú-xi, te na cùu-yu ñáyíu sãñaha núu vehe ndetatú cue ñáyíu ñuhu ichi, te na cùu-yu ñáyíu ndècu túha quide náni chiúⁿ cuendá cue ñáyíu ndècu ichi Yá Ndióxi, te na cùu-yu ñáyíu chindee nchaa ñáyíu ndècu ndihí tnúndóho tnúhu ndáhú, te na cùu-yu ñáyíu ñá túú dàña ndeé quidé ncháa núu sã vâha.

¹¹ Te vá chidó tnùn-n ñáyíu quèé ñáyíu ñá túú ndècu únidico cuía-xi cada chiúⁿ Yá Ndióxi, chi núu cuechi-gá-yu ña, te vá cùndáá-yu cadá-yu chiúⁿ-gá, chi quesáhá-yu natnándaha tucú-yu.

¹² Te sá cuèndá xíáⁿ te nacháhu-yu núu Yá Ndióxi, chi vá cadá-gá-yu nàcuáa ní cuu tnúhu cadá-yu ní cùu.

¹³ Te nguíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñáyíu ducaⁿ quide ío cùu cuhndú-yu, te cùyiti yuhú-yu, te ndèni ní cuu cuaháⁿ-yu chinee díquíⁿ-yu vehe tnàha ñáyíu-yu ndèhé-yu núu nása ndècú-yu, te ñá túú tauú-yu ducaⁿ cadá-yu, te càháⁿ-yu mee-ni tnúhu sá ñá túú nándíhi.

¹⁴ Núu xíáⁿ cuini-í sá ncháá ñáyíu quèé ñáyíu cuechi na natnándaha tucú-yu cuèndá cuú-yu náná, te ducaⁿ cadá-yu nchaa sá xini ñuhu-xi cadá-yu vehé-yu, te núu ducaⁿ na cadá-yu, te nchaa ñáyíu cùu úhú iní ñáhá xii-o vá nihí-gá-yu tnúhu càháⁿ cuehé-yu cuèndá tnúhu Yá Ndióxi.

¹⁵ Te dava ñáyíu quèé ndècú ichi Yá Ndióxi ní cùu ní dàñá-yu te ní tnií-yu tnúhu càháⁿ sácuhná.

¹⁶ Te núu dava ñáyíu ndècu ichi Yá Ndióxi ndècú ndihí-yu ñⁿ ñaha quèé cúu ndi meé-yu ña, te tauú-yu chindee ñáhá-yu xii-aⁿ cuèndá sã vá ío chi chiúⁿ-aⁿ nchaa ñáyíu ndècu ichi Yá Ndióxi, te ducaⁿ te nchaa ñáyíu ndècu ichi-gá-áⁿ nihí ndeé-gá-yu chindee-yu dava-gá ñáyíu quèé ñá túú vèdana ndècu ndihí.

¹⁷ Te nchaa cue téé ío váha quide yindaha ñaha xii ñáyíu ndècu ichi Yá Ndióxi ío xini ñuhu-xi canehe sá yíhi ñuhu núu-güedé, te chindee ñaha xii-güedé. Te uuⁿ-gá tauú ñáyíu

ducaⁿ cadá-yu sá cúu-xí ncháa cue téé ní yuhu ní iní càháⁿ tnúhu-gá.

¹⁸ Te núu tútú Yá Ndióxi càchí-xi: “Vá chíhi-ndó ñunu yuhu ndicutu oré danchihí-di triú”, duha càchí-xi. Te càchí tucu-xi ingá xichi: “Fiⁿ téé quide chiúⁿ dacuitíⁿ tauú-xi sá cúhúⁿ yáhu-dé”, duha càchí-xi núu tútú-gá.

¹⁹ Te núu ío ñáyíu véxi sàcáⁿ cuèchi núu-n cuèndá ñⁿ téé yindaha ñaha xii ñáyíu ndècu ichi Yá Ndióxi ñá, te cada cuèndá-n tnúhu càháⁿ-yu te núu véxi-yu ndihí úú àdi úní ñáyíu càháⁿ ndáá nàcuáa ní cuu, áⁿ núu ñáhá te vá cadá cuèndá-n tnúhu càháⁿ-yu.

²⁰ Te núu cue téé yindaha ñaha xii ñáyíu-áⁿ ndècú cuèchi-güedé, te càháⁿ-n dóho-güedé núu ncháa ñáyíu ndècu ichi-gá cuèndá sá dává-gá-yu vá cùyíi-yu ducaⁿ cadá-yu.

²¹ Te Yá Ndióxi ndihí Xítóhó Jesucristú náhá-gá ndihí cue espíritu xinu cuèchi núu-gá sá yúhú càháⁿ-í dóho-n sá cadá-n ncháa nàcuáa càháⁿ-í-a, te ñⁿ-ni càháⁿ ndihí-n cue téé xini tnáhá ndihí-n, ndihí cue téé ñá túú xini tnáhá ndihí-n.

²² Te vá ío cundihí iní-n táxi ndecu-n ñⁿ téé quindaha ñaha xii ñáyíu, chi díñha-gá cada cuèndá-n te núu cùu-dé ñⁿ téé quide ndáá, chi núu cuèndá-ni na táxi ndecu-n-dé te vá cadá ndáá-dé, te yóhó ndaa díquíⁿ-n cuèndá nchaa sá cuèhé sá dúhá càda-dé, te ío coto-n mèe-n vá cadá-n ni ñⁿ sá cuèhé sá dúhá.

²³ Te ducaⁿ ío mee-ni cùhú xití-n te vá cóhó-n mèe-ni ndute, chi tnáhá luha vñú ndèhé yoho yáha stilé coho-n cuèndá cada tátna-xi.

²⁴ Te dava ñáyíu cùtnuní nchaa sá cuèhé sá dúhá quidé-yu, te cùtnuní tucu sá nácháhu-yu na sáá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sáá nduu cùndáá cuèchi-yu te dává-áⁿ cùtnuní.

²⁵ Te ducaⁿ sãtnahá-xi cùu nchaa sá vâha quide davá-yu chi cùtnuní, te cuèi ñá túú cùtnuní oré-ni dico dacuitíⁿ sá sáá nduu cùtnuní.

6

¹ Te nchaa ñáyíu ndècu tnuú quidé chiúⁿ ndihí ñⁿ patróoⁿ xini ñuhu-xi ío canehé-yu sá yíñuhu núu-dé cuèndá sá vã càháⁿ cuèhé ñáyíu cuèndá Yá Ndióxi, te ni vã càháⁿ cuèhé-yu cuèndá tnúhu-gá.

² Te núu patróoⁿ cue ñáyíu xinu cuechi-áⁿ sándáá iní-dé Yá Ndióxi, te ñá díú sã dúcáⁿ sándáá iní-dé Yá Ndióxi te vá canehé-yu sá yíñuhu núu-dé, chi uuⁿ-gá tauú-yu cada váha-yu cunu cuèchí-yu núu-dé, te ducaⁿ na cadá-yu chi xinu cuèchí-yu núu téé sándáá iní ndihí-yu tnúhu Yá Ndióxi. Te vá dàñá ndeé-n dānehé-n-yu nchaa nàcuáa càháⁿ-í-a, te cùñaha-n xii-yu sá ná cadá-yu.

Nduu vétú iní-ó cùndecu-o

³ Te ío cue tée ñá túú tn̄h-güedé nàcuáa càháⁿ tn̄hu Xítóhó Jesucristú, te cue tée-áⁿ cächí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tn̄hu-gü. Te nchaa tn̄hu Xítóhó Jesucristú cúú-xí mèe-ni tn̄hu ndáá, te chĩndee ñaha-xi cada ndáá-ó cùndecu-o ichi-gá.

⁴ Te nchaa cue tée ducaⁿ xĩquide quide cahnu-güedé méé-güedé dico ñá túú vèdana xiní-güedé, te cue tée-áⁿ ñá túú ndècu vaha iní-güedé chi nãndi tn̄hu sá ñá túú nãndĩhi cuiñí-güedé cùtnãha-güedé. Te ngũta-güedé cúú cuèdú iní tnãhá-güedé, te naã ndĩhi tnãhá-güedé, te xicuehé tnãhá-güedé, te ñá túú-gá cúú vaha iní núú tnãhá-güedé.

⁵ Te cue tée-áⁿ mee-ni nãá-güedé chi ñá túú sãni vaha iní-güedé, te ni ñá túú xiní-güedé nàcuáa cuáháⁿ tn̄hu ndáá tn̄hu Yá Ndióxi, te cächí-güedé sá ío vaha cundecu-güedé ichi-gá chi sãni iní-güedé sá ío vai díhúⁿ nihí-güedé cundecu ndĩhi-güedé. Te yúhú càháⁿ-í dõho-n sã vá nihí tnãhá-n ndĩhi nchaa cue tée ducaⁿ xĩquide.

⁶ Te ndáá sá ichi Yá Ndióxi cúú-xí ñⁿ ichi sá ío vaha cundecu-o, dico xiní ñuhu-xi nduu vétú iní-ó nàcuáa ndècu-o ñuyú-a.

⁷ Te nchoo cuè ñáyihi chi ñá túú vèdana nèhe-o ní quexiò ñuyú-a, te diu-ni ducaⁿ ñá túú vèdana canehe-o quĩhĩⁿ òré ná cúú-ó.

⁸ Te ío xiní ñuhu-xi nduu vétú iní-ó te núu ndècu-ni sá cunchito-o ndĩhi dóo cuihnu-o.

⁹ Te ío ñáyihi ío cuiñí-yu cuu cuicá-yu, te ñáyihi-áⁿ dácàhu iní ñáhá yùcu ñávaha xii-yu cadá-yu nãndi sá cuèhé sá dúhá, te nãndi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-áⁿ ñá túú vèdana nãndĩhi-xi chi uu-gá ndádá ndàhú ñáhá-xi xii-yu, te dácũta nihnu ñaha-xi.

¹⁰ Chi nchaa ñáyihi ñuhu iní mee-ni díhúⁿ, te xiãⁿ quidè-xi ngũta-yu sãni iní-yu cadá-yu nãndi sá cuèhé sá dúhá. Te ío ñáyihi ndècu ichi Yá Ndióxi te sá tn̄hu ducaⁿ ñuhu iní mee-ni díhúⁿ nĩ dáñá-yu ñá túú-gá sãndáá iní ñáhá-yu xii-gá, te vitna ñá túú tnãhí-gá ndécú vaha iní-yu.

Cahni iní-ó càda-o nchaa nacuáa càháⁿ Yá Ndióxi chi sãndáá iní-ó-gá

¹¹ Te yòhó tée quide chiuⁿ Yá Ndióxi xiní ñuhu-xi vá cadá-n dàtná quidè nchaa ñáyihi ní cachí-í sá ñá túú quide ndáá, te vá dáñá ndèe-n càda ndáá-n cundecu-n, te cada-n nàcuáa nduu vétú iní Yá Ndióxi, te ío quindáá iní-n-gá, te cuu iní-n nchaa tnaha ñáyihi-n, te cada càhnu iní-n nchaa sá ná yãha-n cundecu-n ichi-gá, te cunduu ndàhú iní-n.

¹² Te cahni iní-n càda-n nchaa nacuáa cuiñí Yá Ndióxi chi sãndáá iní-n-gá, te ío cuhúⁿ iní-n sá cùndècu-n ndĩhi Yá Ndióxi ní

caa ni quĩhĩⁿ, chi diu cuendá tnãhí-áⁿ ní càháⁿ ñáhá-gá xii-n, te ní càháⁿ ndáá-n núú vai ñáyihi sá ío vaha sãndáá iní-n-gá.

¹³ Te Yá Ndióxi Yáá quidè nchito nchaandi túhú sá ío ñuyú ñaha-gá sá càháⁿ-í dõho-n vitna, te diu-ni ducaⁿ naha tuca Xítóhó Jesucristú Yáá ní càháⁿ tn̄hu ndáá núú tẽ Pilatú

¹⁴ sá quindáá iní-n càda-n nchaa nacuáa càháⁿ Yá Ndióxi, te nchaa tn̄hu càháⁿ-gá cada-n nacuáa vá dàquèe tíhú ñáhá ñáyihi xii-n, te ducaⁿ ní càda-n ndéé ná sãá nduu quixi tucu Xítóhó Jesucristú.

¹⁵ Te quixi tucu-gá chi ducaⁿ nĩ cachí Yá Ndióxi cunduu, te mee Yá Ndióxi nãhá-gá ná nduu quixi tucu Xítóhó Jesucristú. Te Yá Ndióxi ío vaha cùu iní-gá te ñⁿ dũí dí-ni-gá ío-gá cùnũu-gá dàcúúxi cuè tée tàxi tnuñí ñⁿ ñⁿ nacióⁿ ndĩhi nchaa dava-gá cue tée cùnũu, chi tàxi tnuñí ñáhá-gá xii-güedé, te nchaa ñáyihi ndècu ñuyú-a tàxi tnuñí-gá.

¹⁶ Te diu-gá cúú-gá Yáá ndécú nchaa nduu nchaa quíu, te ío càhnu cuu-gá chi dàtná dàyèhé nchicanchi dàyèhé-xi núú ndécú-gá, te vá yõo ñⁿ cùyi dayatni núú ndécú-gá, te ni ñá túú ni ñⁿ ñáyihi xiní ñáhá xii-gá te ni vá ndácũ-yu quini ñáhá-yu xii-gá. Te ío na cànehe nchaa ñáyihi sá yĩñũhu núú-gá ni caa ni quĩhĩⁿ, te ducaⁿ ío na tàxi tnuñí-gá ni caa ni quĩhĩⁿ. Te ducaⁿ na cùnduu.

¹⁷ Te càháⁿ-n dõho nchaa ñáyihi cuica ndècu ndĩhi nchaa sá ío ñuyú-a cuendá sá vá cadá càhnú-yu mèe-yu, te duuⁿ duuⁿ vá cùndèé iní-yu ni ñⁿ sá ndécú ndĩhi-yu chi vá cùdĩ-xi, te càháⁿ-n dõho-yu sá ná cùndèé iní-yu Yá Ndióxi chi diu-gá cúú-gá Yáá ndécú nchaa nduu nchaa quíu, te chitu núú ndáhá tàxi-gá nchaa sá xini ñuhu-o, chi cuiñí-gá sá ío cuu vaha iní-ó cùndecu-o.

¹⁸ Te càháⁿ tucu-n dõho-yu sá ná cadá-yu mee-ni sá vaha, te cuendá nchaa sá vaha cadá-yu-áⁿ te cuú-yu ñⁿ ñáyihi cuica sá cúú-xí Yá Ndióxi, te na cùndecu túha-yu chindèé-yu cue ñáyihi ndàhú cuãñáhá-yu sá xiní ñuhú-yu.

¹⁹ Te núu ducaⁿ na càdá-yu te Yá Ndióxi cuãñaha-gá sá ndúú tãhú-yu na sãá nduu, te ngũndecu vaha-yu ndĩhi-gá ni caa ni quĩhĩⁿ.

Tnúhu ndéé núú ní ndĩhi-ná

²⁰ Te yòhó té Timùteú càháⁿ-í dõho-n sã ío cada cuendá-n vá dàma tn̄hu ní taxi Yá Ndióxi danèhé-n ñáyihi, te vá cadá cuendá-n nchaa cuendú cuèhé cuendú duha ío ñuyú-a chi ñá túú nãndĩhi-xi, te ni vá cadá cuendá-n nchaa tn̄hu xĩtnãha ñáyihi cächí sá xicá naha tn̄hu cue tée túha chi ñá díú ñⁿ tn̄hu ndáá cúú-xi.

²¹ Te ío ñáyihi ñá túú-gá sãndáá iní-yu tn̄hu Yá Ndióxi, chi ní quide cuendá-yu nchaa tn̄hu xica naha ñáyihi-áⁿ.

Te Yá Ndiǒxí ná ch̀ndee chitúu ñaha-gǎ
xii-n. Te ducaⁿ na c̀nduu. Te ío cada ndee
ìní-nǎ vítna.

TUTÚ CÚÚ ÒÚ NÍ CADÚHA TÉ PÁBLÚ QUIHÍⁿ NDAHA TÉ TIMÛTEÚ

Té Páblú cádúha-dé tutú quihíⁿ ndaha té Timùteú

¹ Yúhú té Páblú ní tendaha ñaha Yá Ndióxi cáháⁿ-í tnúhu Xítóhó Jesucristú núú ñáyiú, chi ducaⁿ ní cachí Yá Ndióxi cunduu. Te cáháⁿ-í dátá ní cachí Yá Ndióxi sá ncháá nchò ñáyiú ndècu ndíhi Xítóhó Jesucristú naníhí táhú-ó.

² Te yúhú té Páblú cádúha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ichi Xítóhó Jesucristú, te xicáⁿ táhú-í núú Dítú Ndióxi ndíhi núú Xítóhó Jesucristú sá ío na chindee chítú ñaha-gá xii-n, te cundáhá iní ñáhà-gá, te ducaⁿ ndí nduú-gá ná cádá te ío váha cuu iní-n cùndecu-n.

Cáháⁿ váha-o cuendá Xítóhó Jesucristú

³ Te cuéi nduu cuéi niú ducaⁿ-ní cáháⁿ ndíhi-í Yá Ndióxi cuendá-n, te ndácáⁿ táhú-í núú-gá, te xinu cuechi-í núú-gá dátá ní quide cue ñaní tñáhà-í ní xindecu ndéé sanduu, te cùtnuní iní-í sá quidé ndáá-í núú-gá dátá ní xóo cada-güedé.

⁴ Te ío sàni iní-í naníhí tñáhà-ó cuendá ío cudú iní-í, chi ndacu iní-í sá ío ní ndáhyú-n sá ndíhú iní-n cùtnáhá ní quide ndee iní-í tñáhà-ó.

⁵ Te ñaha-í sá sàndáá ndisa iní-n Yá Ndióxi dátá ní nguíta díhna-gá xítná-n tá Lòidá ndíhi náná-n tá Èunicé quidé-yu, te cùtnuní ndáá iní-í sá díú tñáhà-n ío váha sàndáá iní-n-gá.

⁶ Te xíáⁿ dándacu iní ñáhà-í xii-n cuendá sá ío-gá nducu ndèe-n cada-n chiuⁿ ní nduu táhú-n núú Yá Ndióxi cada-n, chi ní taxi-gá tnúhu ndee iní ní ngúndecu ndíhi-n cùtnáhá ní sacáⁿ ndodo-í ndaha-í díquí-n sá díú chiuⁿ-gá cada-n.

⁷ Te Espiritú sá ní taxi Yá Ndióxi ndécú ndíhi-o ñá túú cùu-xi ìⁿ Espiritú sá cádá nàcuáa yùhú-ó, chi cùu-xi ìⁿ Espiritú sá táxi tnúhu ndee iní cada-o chiuⁿ-gá, te diu-xi quide cuu iní tñáhà-ó ìⁿ ìⁿ-o, te diu-ní tucu-xi quide cutnuní iní-ó nàcuáa cada-o cùndecu-o.

⁸ Te xíáⁿ núú vá cùcahaⁿ núú-n cáháⁿ váha-n cuendá Xítóhó Jesucristú, te ní vá cùcahaⁿ núú-n sá dúhá yíhi-í vecaá sá cuendá-gá, te xini ñuhu-xi sá tñáhà-n ndòho-n sá cuendá tnúhu-gá, te cundee iní-n ndòho-n, chi Yá Ndióxi chindee ñaha-gá xii-n.

⁹ Te Yá Ndióxi ní dácacu nihnu ñaha-gá xii-o núú ùhú núú ndáhú, te ní cachí-gá sá cádá-ó ncháa nacuáa cùiní mée-gá cunduu, te ducaⁿ ní quide-gá chi ducaⁿ ní sàni iní mée-gá cunduu sá cádá váha ñaha-gá xii-o, te ñá díú sá ío váha quide-o ndecu-o ducaⁿ ní quide-gá. Te ndéé cùtnáhá vátá ngáva-gá ñuyíú ní cachí-gá sá cádá váha ñaha-gá xii nchaa nchoo ñáyiú ní ngúndecu ndíhi Xítóhó Jesucristú vitna.

¹⁰ Te vitna cùtnuní iní-ó sá ío váha quide ñaha-gá xii-o, chi ní quixi Xítóhó Jesucristú ñuyíú-a ní dácacu nihnu ñaha-gá xii-o núú ùhú núú ndáhú, te Yaá-áⁿ ní quide-gá cuendá sá vá cùú-gá-ó cùú dúcáⁿ-ó, chi ní cachí-gá sá cùndecu-o ní caa ní quihíⁿ te núu na quindáá iní-ó tnúhu-gá.

¹¹ Te ní cachí-gá sá cáháⁿ-í tnúhu-gá núú ñáyiú ñá túú cùu ñáyiú israhél te dacuáha váha-í-yu tnúhu-gá, te cuéi ndèni ní cuu ndécú-yu te quihíⁿ-í cáháⁿ-í tnúhu-gá núú-yu chi ducaⁿ ní cachí-gá cunduu.

¹² Te cuendá xíáⁿ nándi sá ndòhò-í vitna cuendá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítóhó Jesucristú Yaá sàndáá iní-í, te yúhú ní dáñá-í mée-í núú ndáhà-gá, te cùtnuní ndáá iní-í sá cóto ñaha-gá xii-í ndéé ná sáá nduu nàcuca ñaha-gá.

¹³ Te vá dáñá ndéé-n cada-n nchaa nacuáa cáháⁿ tnúhu váha ní dánèhé ñáhà-í xii-n, te ío quindáá iní-n Yá Ndióxi, te nchaa-o nàcuáa ndècu-o ndíhi Xítóhó Jesucristú ío cuu iní tñáhà-ó ìⁿ ìⁿ-o.

¹⁴ Te cada cuendá váha-n sá vá dáma tnúhu Yá Ndióxi sá ní taxi-gá ndécú ndíhi-n, te Espiritú-gá sá ní taxi-gá ndécú ndíhi-o chindee ñaha-xi xii-n.

¹⁵ Te yòhó sa xini-n sá ncháa ñáyiú ndècu distritú Àsiá, ñáyiú ní sàndáá iní tnúhu Xítóhó Jesucristú ní dáñá ñáhà-yu xii-í, te tñáhà té Fígeló ndíhi té Hèrmógenés ní dáñá ñaha-güedé xii-í.

¹⁶ Te xicáⁿ táhú-í núú Xítóhó Jesucristú sá ná chindee-gá cue ñáyiú cùu ndí mee té Onèsifóro, chi diu-dé ío vai xito ní quixi-dé ní quide cuendá ñáhà-dé xii-í, te ní taxi-dé tnúhu ndee iní, te ñá túú ní cùcahaⁿ núú-dé sá yíhi-í vecaá.

¹⁷ Te cùtnáhá ní xindecu-dé ñuu Rómá ducaⁿ-ní ní xóo nanducu ñaha-dé xii-í ndéé ndéé naníhí ñáhà-dé.

¹⁸ Te xicáⁿ táhú tucu-í núú Xítóhó Jesucristú sá ná cùndahú iní ñáhà-gá xii-dé nduu na sáá cundáá cuéchi nchaa ñáyiú. Te yòhó sa xini ndáá-n sá ío ní chindee ñaha-dé xii-o cùtnáhá ní xindecu-o ñúú Èfestú.

2

Té quide ndáá xinu cuéchi núú Xítóhó Jesucristú

1 Te yòhò téé cùu datná ìᵐ déhe mee-í ío nducú ndèe-n cada-n nacuáa níhí ndéé-gá-n cùndecu-n ichi Xítòhó Jesucristú chi ñáyu-gá chindee ñaha-gá xii-n.

2 Te nchaa tnúhu sá ní dánèhé ñàhá-í xii-n ndìhi nchaa dava-gá ñáyu, xiáᵐ danèhé-n dàva-gá cue téé quide ndáá cuèndá danèhé-güedé dava-gá ñáyu.

3 Te cahni iní-n ndòho-n cunu cuechi-n núu Xítòhó Jesucristú datná cuení-n ndòho ìᵐ sandadú sàhni iní-dé xínú cuèchi-dé.

4 Chi ní ìᵐ sandadú ñá túú nágá sání iní-dé cada-dé òrè xínú cuèchi-dé cuèndá cudúu-dé núu téé tàxi tnuní ñáhá.

5 Te ñáyu-ni ducaᵐ sàtnahá-xi cùu tucu ìᵐ téé dàdiqui, chi núu vá dàdiqui-dé nacuáa tàu-xi cundúu te vá níhí-dé sá ndúú tãhú-dé.

6 Te núu ìᵐ téé xínu cuechi ío nducú ndee-dé quidé chiᵐ-dé chíhí-dé tatá, te ñáyu-dé tàu-dé díhna-gá-dé níhí-dé sá cùhúᵐ yãhu-dé.

7 Te cani iní-n nchaa tnúhu càháᵐ-í-a, te Xítòhó Jesucristú chindee ñaha-gá xii-n te tecú tnuní-n nchaa.

8 Te ndacu iní-n sã Xítòhó Jesucristú ní cuu-gá ñani tnáhá ndíi Dávü, te ní xihí-gá te ní ndoto-gá, te ñáyu ducaᵐ ndúu tnúhu dànehé-í ñáyu.

9 Te ío dândoho ñaha ñáyu xii-í cuèndá sá càháᵐ-í tnúhu-gá, te quide ñahá-yu xii-í datná quidé-yu ìᵐ téé ní quide ìᵐ cuèchi càhnu, chi ní chíhí ñahá-yu vecaá xii-í, dico tnúhu Yá Ndióxi chi vá ndácú-yu nghaní-yu.

10 Te xiáᵐ núu cuèi nándi cùu nchaa sá quidé ñahá-yu xii-í, dico quide cahnu iní-í cuèndá sá nánihí tãhú tnáhá nchaa dava-gá ñáyu cuení Yá Ndióxi cundecu ndihí-gá, chi nchaa ñáyu na tnáhá tnúhu ndihí Xítòhó Jesucristú nduu tãhú-yu cundécú-yu ndihí-gá núu ío váha càa ndecu-gá ni caa ni quíhíᵐ.

11 Te xéhé cùu-xi ìᵐ tnúhu ndáá cuiti: Nchoo cùu-o datná ñáyu ní xihí ndihí Xítòhó Jesucristú chi ñá túú-gá ndécú-ó ichi cuèhé ichi duha, te xiáᵐ núu cuèi na sáa nduu cùu-ó ñyúyú-a, dico ñáyu-ni cundecu-o ndihí-gá.

12 Te núu na cùndee iní-ó ndòho-o nándi sá ndóhó-ó sá cuèndá-gá, te sáa nduu te cunu-o ndihí-gá.

Te núu na càháᵐ-ó sá ñá túú xini-ó-gá, te ñáyu-ni ducaᵐ cùñaha-gá xii-o sá ñá túú xini ñahá-gá ná sáa nduu càa ndáá-gá cuèchi nchaa ñáyu.

13 Te núu nchoo ñá túú quide ndáá-ó ndècu-o núu-gá ñá, dico mee-gá chi ío ndáá quidé-gá, chi Yá Ndióxi nchaa sá sání iní-gá quidé-gá.

Tée quide nacuáa nduu vétü iní Yá Ndióxi

14 Te dandacu iní-n nchaa ñáyu ndècu ndihí-o ichi Xítòhó Jesucristú nchaa tnúhu

càháᵐ-í-a, te cùñaha-n xii-yu sá Xítòhó Jesucristú cuení-gá sá ñá túú-gá nándi tnúhu cùtnáhá-yu, chi nchaa tnúhu càháᵐ-yu-áᵐ dácuíta nihnu-xi ñáyu ndèdóho ñaha xii-yu, chi ñá túú vèdana nándihí nchaa tnúhu-áᵐ.

15 Te ío nducú ndèe-n cada ndáá-n cundecu-n núu Yá Ndióxi, te cada-n chiᵐ-gá nacuáa nduu vétü iní-gá, te càháᵐ ndáá-n tnúhu-gá, cuèndá sá vá cùcãhaᵐ núu-n núu-gá.

16 Te vá cáda cuèndá-n nchaa tnúhu sá ñá túú vèdana nándihí càháᵐ ñáyu cuèndá Yá Ndióxi, chi nchaa ñáyu càháᵐ tnúhu-áᵐ ndihí nchaa ñáyu sácundédoho ñaha xii-yu uuᵐ-gá quidé-yu nchaa sá cuèhé sá dúhá.

17 Te nchaa tnúhu-áᵐ cùtnènu-xi datná quidé ìᵐ cuèhé sá ñani ñaha xii ñáyu xité nuu-xi nihí yiqui cùñú-yu. Te tnáhá té Himènuᵐ ndihí té Filetú càháᵐ-güedé tnúhu-áᵐ quidé-güedé datná quidé ñáyu-áᵐ.

18 Te cue téé-áᵐ ñá túú-gá càháᵐ ndáá-güedé datná càháᵐ tnúhu Yá Ndióxi, chi càchi-güedé sá nchaa nchòho ñáyu ndècu ichi Yá Ndióxi cùu-ó datná cue ñáyu sa ní ndoto, dico na cùu ndisa-o te vá ndótó-gá-ó càchi-güedé. Te dava ñáyu ní dáñá-yu sá sàndáá iní-yu tnúhu Yá Ndióxi sá dúcáᵐ càháᵐ-güedé.

19 Te cuèi ducaᵐ quide davá-yu, dico Yá Ndióxi ní taxi ndecu-gá cue ñáyu ni yùhu ní iní ndécú ichi-gá, te cùtnuní sá ndécú ndihí ñaha-gá xii-yu, chi ìᵐ xichi núu tütü-gá càchi-xi sá méé-gá xini-gá cue ñáyu cùu cuèndá-gá. Te ingá tucu xichi núu tütü-gá càchi-xi sá nchaa ñáyu sàndáá iní ñahá xii Xítòhó Jesucristú xini ñáyu-xi sá vá cundècu-gá-yu ichi cuèhé ichi duha.

20 Te ñáyu cuica chi ndècu ndihí-yu vehé-yu cóhó sá ní cuáha mee-ni ñáyu cuááᵐ, ndihí cóhó sá ní cuáha mee-ni ñáyu cuixiᵐ, te nchaa cóhó-áᵐ cùu-xi datná cue ñáyu ñá túú ná cùmání núu Yá Ndióxi. Te ndècu ndihí tucú-yu cóhó sá ní cuáha mee-ni ñáyu, ndihí cóhó sá ní cuáha mee-ni yùtnu, te nchaa cóhó-áᵐ cùu-xi datná cue ñáyu ñá túú quide ndáá núu Yá Ndióxi.

21 Te nchaa ñáyu ío ndècu yíñuhu núu Yá Ndióxi cùu-yu ñáyu ñá túú níhí tnáhá ndihí cue ñáyu ñá túú quide ndáá núu-gá, te cue ñáyu ndècu yíñuhu núu-gá-áᵐ ñá túú tnáhi quée cáva-yu quidé-yu nchaa chiᵐ tahu-gá.

22 Te ío cada cuèndá-n vá cáda-n nacuáa quide cue téé cuechi ndècu ichi cuèhé ichi duha, te cada-n nacuáa cundáá-n cundecu-n ichi Yá Ndióxi, te quindáá iní-n-gá, te cuu iní-n nchaa tnaha ñáyu-n, te cundecu nahí-n, chi ducaᵐ tàu-xi cada-n ndihí nchaa dava-gá ñáyu sa ní nduu ndoo ní nduu nine iní-xi ñáyu càháᵐ ndihí ñaha xii Yá Ndióxi.

23 Te vá cáda cuèndá-n ní ìᵐ tnúhu xitnáha ñáyu chi ñá túú vèdana nándihí-xi, chi núu

na cada cuendá-ó te dícó dánáá ñáhá-xí.

²⁴ Chi nchaa cue téé xínu cuechi núú Yá Ndióxi xíni ñùhu-xí cáháⁿ váha-güedé ndíhi nchaa ñáiyu, te danèhé ñáhá váha-güedé tnúhu-gá, te cunduu càhnu iní-güedé te vá nàá-güedé.

²⁵ Te víi víi cáháⁿ-güedé dóho nchaa ñáiyu sáá iní-xí, ñáiyu ñá túú tnáhá iní tnúhu ndáá tnúhu Yá Ndióxi, te ducaⁿ te cudana Yá Ndióxi cada-gá te ndixi túú iní-yu sá ñá túú quide váha-yu ndécú-yu te quindáá iní-yu tnúhu-gá.

²⁶ Te ducaⁿ te cutnùni iní-yu sá sàcùlhná cùnù-xí taxi tnuni ñáhá-xí xii-yu, chi dàcahu iní ñáhá-xí xii-yu quide-yu nchaa nàcuáa cùu iní-xí ni cùu.

3

Nàcuáa cada ñáiyu òré sa ta cùyatni sáá nduu quixi tucu Xitohó Jesucristú

¹ Te càchi tnúhu-í xii-n cuendá cunaha-n nàcuáa cada-xí òré sa ta cùyatni sáá nduu quixi tucu Xitohó Jesucristú, chi dàvá-áⁿ ío cada úhú-xí.

² Chi ngúita ñáiyu cuhuⁿ iní-yu mee-ni sá cúú-xí meé-yu, te cuhuⁿ iní-yu mee-ni díhúⁿ, te ío cada càhnú-yu meé-yu, te cunduu yíchi iní-yu, te cáháⁿ cuèhé-yu cuendá Yá Ndióxi, te vá quindáá-gá iní-yu ni tátá-yu ni náná-yu, te ní vá ndàcáⁿ táhú núú tnáhá-yu cuendá nchaa sá váha cada tnáhá-yu, te cadá-yu mee-ni sá ñá túú tnáhá iní Yá Ndióxi.

³ Te vá cúú iní tnáhá ndí meé-yu, te nàá-yu te vá cuánáá-yu, te tee tnáhá-yu cuéchi neñúú, te vá cuánáá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnáhá iní-yu nchaa sá váha.

⁴ Te dayuhu cuáha cuendá tnáhá-yu núú cué téé cùchiuⁿ, te ío cunduu yíi iní-yu cadá-yu nándi sá ñá túú váha, te ío cada nínu-yu meé-yu, te mee-ni nchaa sá cúdíi iní-yu cadá-yu, te vá cúdíi iní-yu nanducu níhnú-yu Yá Ndióxi.

⁵ Te quesáhá-yu sá tnáhá-yu ndécú-yu ichi Yá Ndióxi dícó vá cadá-yu nchaa nàcuáa cáháⁿ-gá.

Te yúhu càchi tnúhu-í xii-n sá vá ñihí tnáhá-n ndíhi nchaa ñáiyu ducaⁿ quide.

⁶ Te dava ñáiyu-áⁿ quíhíⁿ-yu dava vehe núú xíndecu ñáiyu, te ngúita-yu dandáhú-yu ñáiyu díhí ñá túú xíni dana cuendá Yá Ndióxi, te ñáiyu díhí-áⁿ cúú-yu ñáiyu ndécú víhi cuéchi-xí, chi ío cúdíi iní-yu quide-yu nchaa náni sá cuèhé sá dúhá sàni iní-yu.

⁷ Te cuéi ío dàcuahá-yu, dícó ñá túú cùtnuní iní-yu nása cuáháⁿ tnúhu ndáá tnúhu Yá Ndióxi.

⁸ Te ñáiyu ducaⁿ dandáhú ñáhá xii cue ñáiyu díhí-áⁿ ñá túú cáháⁿ váha-yu cuendá

tnúhu Yá Ndióxi, chi quide-yu dátá ní quide ndíi Jánés ndíhi ndíi Jámbrés chi cue ndíi-áⁿ ñá túú ní cùu váha iní cue ndíi núú ndíi Moisés cuendá tnúhu ní cáháⁿ ndíi. Te ñáiyu-áⁿ cúú-yu ñáiyu sàni iní mee ñine-ni nchaa sá cuèhé sá dúhá, te cuéi càchi-yu sá sàndáá iní-yu Yá Ndióxi dícó ñá ndáá sá sàndáá iní ñáhá-yu xii-gá.

⁹ Dícó vá ndácú-gá-yu dandáhú-yu vai ñáiyu, chi nchaa ñáiyu cutnùni iní-yu sá ío ñi díquí-yu, te ñá túú cáháⁿ ndáá-yu dátá ní quide cue téé úú ñá túú ní tnáhá iní tnúhu ní cáháⁿ ndíi Moisés.

Té Páblú dásàhú-dé té Timùteú

¹⁰ Te yòhó quide-n nchaa nàcuáa ní danèhé ñáhá-í xii-n, te ní xíni-n nchaa nàcuáa quide-í ndécú-í, te cùtnuní iní-n nàcuáa sàni iní-í ndécú-í ñuyúú-a, te xíni-n sá ío sàndáá iní-í Yá Ndióxi, te ío càhnu iní-í, te cùu iní-í nchaa ñáiyu, te xíni tucu-n sá ío quide cahnu iní-í cuéi nándi sá yáha-í ndécú-í dícó ñá túú dàña ndeé-í ichi-gá.

¹¹ Te ío vai sá quide ñàha ñáiyu xii-í dándòho ñàha-yu sá ndécú-í ichi Xitohó Jesucristú, te sa ñàha tucu-n datná ní quide ñàha-yu xii-í cùtnáhá ní xíndecu-í ñuú Antióquia, ndíhi ñuú Iconiu, ndíhi ñuú Lístá, chi ío ní dándòhó ñàha-yu xii-í sá cuendá-gá. Dícó Xitohó Jesucristú ío ní xito ñàha-gá xii-í te ní chindee ñàha-gá cuéi nándi cùu sá ní yáha-í.

¹² Te na càchi tnúhu ndáá-í xii-n sá ío vai sá ñá túú váha cada ñàha ñáiyu xii nchaa ñáiyu cuíni sá ñá túú ná cumáni núú Yá Ndióxi cuendá sá ndécú ndíhi-yu Xitohó Jesucristú.

¹³ Dícó dava ñáiyu càchi-yu sá cáháⁿ-yu tnúhu Yá Ndióxi te ñá ndáá sá cáháⁿ-yu tnúhu-gá, ñáiyu-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ío dandáhú tnáhá-yu.

¹⁴ Te yòhó chi ío váha ní sàndáá iní-n tnúhu Yá Ndióxi sá dácuaⁿ-n, te vítna cáháⁿ-í dóho-n sá vá dàña ndeé-n quindáá iní-n tnúhu-áⁿ, te yòhó sa ñàha-n ná cúú ñáiyu ní danèhé ñáhá xii-n tnúhu-gá.

¹⁵ Te yòhó chi ndéé cùtnáhá cúú lándú-n ní ngúita-n dàcuaha-n tnúhu ndéé núú tútú Yá Ndióxi, te díu-ni nchaa tnúhu-gá canu ichi ñàha-xí xii-n te naníhí táhú-n, chi sàndáá iní-n Xitohó Jesucristú.

¹⁶ Te nchaa cue téé ní tee tnúhu Yá Ndióxi, chi díu-ni mee-gá ní dácáhú iní ñáhá-gá xii-güedé nàcuáa tee-güedé, te tnúhu-gá ío váha dacuaⁿ-o nchaa dava-gá ñáiyu, te cáháⁿ-xí dóho-o sá vá cùndécú-gá-ó ichi cuèhé ichi duha, te núú ñá túú quide ndáá-ó ndécú-o te nàcanu ichi ñàha-xí, te danèhé ñáhá-xí nàcuáa cada-o cùndáá-ó núú Yá Ndióxi.

17 Te diu-ni tnúhu-gá dátúha ñaha vâha-xi xii nchoo cuê ñâyiu ndècu ndihi-gá cuèndá cada-o nchâa núú sã vâha.

4

1 Te Xítoho Jesucristú quixi-gá taxi tnúni-gá ñuyú-a, te cada ndáá-gá cuéchi nchaa ñâyiu sa ní xihí, ndihi cuéchi nchaa ñâyiu xĩndecu vívú. Te mee-gã ndihi Yã Ndióxi náhá-gã sã ío càháⁿ-í dõho-n vítna

2 sã ío dacuahã-n ñâyiu tnúhu-gá, te vã dãnã ndéè-n dacuahã-n-yu ndèda-ni cãa oré cuèi ñã túú cuini-yu cundedõho-yu, te nchaa ñâyiu ñã túú cuini cada ndáá cúñaha ndáá-n nchâa nacuaã quidè-yu. Te cúñaha tucu-n xii-yu sã vã dúcãⁿ-gã cadã-yu, te cáháⁿ-n dõho-yu cuèndá cada ndáá-yu cundecú-yu. Te ío cunduu cãhnu iní-n òrè cáháⁿ-n dõho-yu, te ío dacuahã-n-yu tnúhu-gã.

3 Chi sãá nduu te vã càchí-gã-yu cundedõho-yu nchaa tnúhu sã sãnú ichi ñaha cundecu vâha-o núú Yã Ndióxi, chi mee-nã nchaa sã cùdí iní mée-yu cundedõho-yu, te nducú-yu cue tée danèhè ñáhã xii-yu nchaa tnúhu cùu iní-yu-ãⁿ.

4 Te vã cadã cuèndá tnàhí-gã-yu tnúhu ndáá tnúhu Yã Ndióxi, chi mee-nã tnúhu sã ñã túú nãndíhi cada cuèndá-yu.

5 Dico yõhó ío quíhi iní-n cundecu-n, te cahni iní-n cuèi nãndi na ndõho-n, te dacuahã-ni-n ñâyiu tnúhu Yã Ndióxi, ñâyiu vátã quĩndáá iní ñáhã-gã xii-gã, te cada-ni-n nchãa chiúⁿ ní táhú-gã cada-n.

6 Te yúhú sa ñũhu ichi-nã-í quíhíⁿ-í núú ndécú Yã Ndióxi cundecu-í, chi sa ní cuyatni cahni ñaha-güedé xii-í cuèndá sã xĩnú cuèchi-í núú-gã.

7 Te ní quidè-í nchaa chiúⁿ ní táhú Yã Ndióxi cada-í te vítna ní xĩnu cava nchaa chiúⁿ ní táhú-gã-ãⁿ ní quidè-í, te ñã túú ní dãnã ndéè-í ní sãndáá iní-í-gã, te ducaⁿ-ni sãndáá iní-í-gã ndéè vítna.

8 Te vítna sa ndècu túha-nã sã ndúú táhú-í cuèndá sã quidè ndáá-í núú Yã Ndióxi, te Xítoho Jesucristú taxi-gá táhú-ãⁿ nduu táhú-í ná sãá nduu, chi cùu-gã ñã Yã Ndióxi quidè ndáá cuiti, te ñã díú-ni yúhú taxi-gá táhú-ãⁿ cuu cuèndá-í, chi tnãhá nchaa ñâyiu ndètu cahnu-nã sãá nduu quixi tucu-gã ñuyú-a cuãñaha-gã táhú-ãⁿ nduu táhú-yu.

Chiúⁿ tahu té Pãblú cada té Timùteú

9 Te cuini-í sã ío ndíhi quixi-n quixi coto ñaha-n xii-í.

10 Chi té Dêmás ñã túú-gã quidè cuèndá ñáhã-dé xii-í, chi mee-nã nchaa sã ío ñuyú-a ío cùdí iní-dé. Te ní dãndõ ñaha-dé cuáhãⁿ-dé ñuu Tesalónica, te té Crèscenté cuáhãⁿ-dé cundecu-dé distritú Gàlaciá, te té Titú cuáhãⁿ-dé cundecu-dé distritú Dàlmaciá.

11 Te ñⁿdii-nã té Lùcã ndécú ndíhi ñaha-dé xii-í, te cúñaha-n xii té Mácú quixi-n ndíhi-dé, chi tée-ãⁿ ndacu-dé cada-dé ñⁿ chiúⁿ-í.

12 Te té Tiquicú ní tendaha-í-dé cuáhãⁿ-dé ñuu Èfesú.

13 Te òrè quixi-n te yãha-n vèhe té Càrpú cáá ñuu Tróas canehe-n ñã dóó tĩcachí ní dãndõ-í vèhe-dé quixi, ndíhi nchaa librí-í, te tnãhá nchaa dava-gã tutú-í ndécú vèhe-dé canehe-n quixi chi xĩãⁿ ío-gã xini ñũhu-í.

14 Te té Lijandrú tée cùu rerú ío vai sã ñã túú vãha ní cuu quidè ñaha-dé xii-í, dico mee Yã Ndióxi náhá-gã ñãsa cada ñaha-gã xii-dé cuèndá sã dúcãⁿ quidè-dé.

15 Te vã nihí tnãhá-n ndíhi-dé chi ío càháⁿ cuèhè-dé cuèndá nchaa tnúhu càháⁿ-ó.

16 Te cútãhá ndécã ñaha-güedé xii-í ní sãháⁿ núú cuè tée cùchiúⁿ xito díhna nuu, chi mee díi ní sãháⁿ te ñã túú ní sãháⁿ ní ñãⁿ cue tée cundíhi-í, chi nchaa-güedé ní dãndõ ñaha-güedé xii-í, te yúhú xicãⁿ táhú-í núú Yã Ndióxi sã vã cadã cuèndá-gã sã dúcãⁿ ní quidè-güedé.

17 Dico Xítoho Jesucristú ní chindee ñaha-gã xii-í, chi ní taxi-gã tnúhu ndee iní ní cáháⁿ-í tnúhu-gã ñacuãa tàú-xi cunduu núú cue tée-ãⁿ ndíhi núú nchãa ñâyiu, dico ñã díú ñâyiu israhèl cùu-yu, te diu-gã ní dácãcu nihnu ñaha-gã xii-í ñã túú ní sãhni ñaha-güedé.

18 Te mee Xítoho Jesucristú coto ñaha-gã xii-í te ñã túú ná cuu cuèi nãndi sã ná cadã ñaha ñâyiu xii-í te diu-ni-gã coto ñaha-gã xii-í ndéè ná sãá nduu sãá-í andiu núú ndécú-gã táxi tnúni-gã. Te nchaa-o chí ná càchí-ó sã ío cãhnu cuu-gã ní caa ní quíhíⁿ. Te ducaⁿ na cunduu.

Tnúhu ndéè núú ní ndíhi-nã

19 Te ío cúñaha-n na càda ndee iní tá Priscá, ndíhi té Àquilú, ndíhi cue ñâyiu cùu ndi mee té Onèsiforó.

20 Te té Erastú ní quendõo-dé ñuu Còrintú, te té Trõfimú ní dãndõo-í-dé ñuu Miletú chi cùhú-dé.

21 Te ío cundíhí iní-n quixi-n oré vátã sãá-gã yóo quidè víxiⁿ-xi. Te ío cada ndee iní-n càchí té Èubulú, ndíhi té Pudenté, ndíhi té Linú, ndíhi tá Claudiá, ndíhi nchaa dava-gã ñâyiu sãndáá iní tnúhu Xítoho Jesucristú.

22 Te xicãⁿ táhú-í núú Xítoho Jesucristú sã ná cundecu ndíhi ñaha-gã xii-n ndíhi nchaa dava-gã-yu. Te ducaⁿ ío na chindee chítuu ñaha-gã xii-ndo nchãa-ndo. Te ducaⁿ na cunduu. Te ío chí cadã ndèe iní-nã vítna.

TUTÚ NÍ CADÚHA TĒ PĀBLÚ QUIHⁿ NDAHA TĒ TĪTÚ

Té Pāblú cadúha-dé tutú quihⁿ ndaha té Titú

¹ Yúhú té Pāblú xínú cuèchi-í núú Yá Ndióxi, te diu-gá ní tendaha ñaha-gá xii-í cáháⁿ-í tnúhu Xitohó Jesucristú núú ñáyiú cuèndá quíndáá iní nchaa ñáyiú ní cachí Yá Ndióxi naníhí tǎhú, ndihí cuèndá sá tēcú tnúni váha-yu tnúhu-gá, te ñáyiú na quíndáá iní tnúhu-gá cada ndáá-yu cundécú-yu ichi-gá.

² Te yúhú dácuaá-í-yu tnúhu-gá cuèndá cundecu ndihí-yu tnúhu ndee iní sá cundécú ndihí-yu Yá Ndióxi ní caa ní quihⁿ, chi ndéé cútñahá vátá ngáva-gá ñuyúú-a ní cachí-gá sá cundécú ndihí ñaha-gá xii-yu, te ñá túú dándahú ñáhá-gá, chi quide-gá ⁿ sá cáháⁿ-gá.

³ Te ní sáá nduu ní cachí-gá sá nihí-yu tnúhu nácuaá cuáháⁿ tnúhu-gá, te diu-ni tnúhu-áⁿ ní cachí Yá Ndióxi Yáá dácácu nihnu ñaha xii-o núú ùhú núú ndáhú sá dácuaá-í ñáyiú.

⁴ Te tutú-a cadúha-í cuèndá daquixi-í ndaha yòhó té Titú, téé ní sanu ichi ndisa-í ichi Xitohó Jesucristú, chi ⁿ tnúhu sándáá iní-ó. Te xicáⁿ tǎhú-í núú Tǎtá-ó Dütú Ndióxi sá ío na chindee chitúú ñaha-gá xii-n, te diu-ni-gá ná càda te ío váha cuu iní-n cundecu-n. Te xicáⁿ tǎhú tǎcú-í núú Xitohó Jesucristú Yáá dácácu nihnu ñaha xii-o núú ùhú núú ndáhú sá díú-ní dúcáⁿ na cada ñaha-gá xii-n.

Chiuⁿ quide té Titú distritú Crétá

⁵ Te yúhú ní dándoo ñaha-í xii-n distritú Crétá, chi cuini-í cada-n nchaa chiuⁿ cumání, te cuini-í taxi ndecu-n cuè téé quíndaha ñaha xii cue ñáyiú sándáá iní tnúhu Yá Ndióxi xindecu ⁿ ⁿ ñuú yíndèhu distritú-áⁿ, te cada-n nácuaá ní cachí-í cada-n.

⁶ Te cue téé cada chiuⁿ-áⁿ xíní ñuhu-xi cuu-güedé mee-ni cuè téé ío váha quide ndáá nácuaá vá yoo cáháⁿ dóho-güedé, te na cuu-güedé cue téé ndècu ⁿ dii-ni ñadihí-xi. Te ducaⁿ nchaa landú-güedé ná cuu-güexi landú sándáá iní ñáhá xii Yá Ndióxi cuèndá sá vá yoo cuatnuñaha xii-güexi quesahá-yu sá ío sáá iní-güexi te quide-güexi nándi sá ñá túú tǎu-güexi cada-güexi.

⁷ Chi xini ñuhu-xi sá ncháá cuè téé quíndaha ñaha xii ñáyiú sándáá iní tnúhu Yá Ndióxi ío cundecu yíñuhu-güedé, chi ducaⁿ tǎu-xi cada nchaa cue téé quide chiuⁿ Yá Ndióxi, te xini ñuhu tucu-xi sá vá cúú-güedé

cue téé ñáí iní-xi, te ní vá cúú-güedé cue téé líhli iní-xi, te ní vá cúú-güedé cue téé quihu, te ní vá cúú-güedé cue téé plètú, te ní vá cúú-güedé cue téé dicó-ni ducaⁿ níhí díhúⁿ.

⁸ Te xini ñuhu-xi cuu-güedé cue téé sǎñaha núu vehe ndetatú cue ñáyiú ñuhu ichi, cue téé quide váha sá cúú-xi tnàha ñáyiú-xi, cue téé ío váha cútñuní iní-xi nácuaá cada cundecu ñuyúú-a, cue téé quide ndáá xindecu, cue téé quide nchaa nácuaá nduu vétú iní Yá Ndióxi, cue téé xito mee-xi ñá túú quide cutexínu.

⁹ Te na cuu-güedé cue téé ío váha sándáá iní tnúhu váha tnúhu Yá Ndióxi sá ní dánéhé ñáhá-í xii-ndo cuèndá ducaⁿ te cue téé-áⁿ ndacu-güedé cáháⁿ-güedé dóho ñáyiú cuèndá cádá-yu nchaa nácuaá cáháⁿ Yá Ndióxi, te níhí-güedé tnúhu cáháⁿ váha-güedé núú ncháa ñáyiú dàquee tǎhú tnúhu Yá Ndióxi, te mee-ni cuè téé ducaⁿ quide váha taxi ndecu-n quíndaha-güedé ñáyiú sándáá iní tnúhu-gá.

¹⁰ Te na càchí tnúhu-í xii-n sá váí ñáyiú sáá iní-xi ío, te cáháⁿ-yu mee-ni tnúhu sá ñá túú nándihí, te dándahú-yu tnàhá ñáyiú-yu, te ñáyiú isràél ío-gá váí-yu ducaⁿ xiquide.

¹¹ Te nchaa ñáyiú ducaⁿ xiquide xini ñuhu-xi nducu-o tnúhu cúñaha-o xii-yu cuèndá cadí-yu yuhú-yu, chi dánéhé-yu dava-gá ñáyiú ⁿ sá ñá túú tǎu-yu dacuaá-yu, te ducaⁿ quide-yu cuèndá-ni sá nihí-yu díhúⁿ, te ío titní xichi ní cuu dándahú-yu nchaa ñáyiú xindecu ⁿ-ni vehe.

¹² Te ní cachí ⁿ téé ío váha sáá díquí-xi ndècu mei ñuú distritú Crétá sá ncháá ñáyiú ñuú-dé-áⁿ ío ndèhndé-yu, te ío cuihna iní-yu, te ío vai xexi-yu, te cùhndú-yu.

¹³ Te ndáá ní cáháⁿ-dé chi ducaⁿ quide-yu, te xǎⁿ ío cáháⁿ-n dóho-yu cuèndá sá ná quíndáá váha iní-yu tnúhu Yá Ndióxi.

¹⁴ Te cúñaha-n xii-yu sá vá cádá cuèndá-yu nchaa tnúhu ndehnde cáháⁿ ñáyiú isràél, te ní vá cádá cuèndá-yu nchaa tnúhu cáháⁿ ñáyiú ñá túú cuini quíndáá iní tnúhu Yá Ndióxi.

¹⁵ Te nchaa sá ní cadúha Yá Ndióxi ío ñuyúú-a cuu-xi mee nine-ni sá váha sá cúú-xi ncháa ñáyiú sa ní nduu ndoo ní nduu nine iní-xi ndècu ichi Yá Ndióxi. Dico nchaa sá ní cadúha-gá ñá túú cuu-xi sá váha sá cúú-xi ncháa ñáyiú ndècu ichi cuehé ichi duha, chi ñá túú sándáá iní-yu tnúhu-gá, chi mee-ni sá cuehé sá dúhá ñuhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècu-yu.

¹⁶ Te càchí-yu sá sándáá iní-yu Yá Ndióxi, dico nchaa sá quide-yu-áⁿ càchí tnúni-xi sá ñá ndáá. Te Yá Ndióxi chí duuⁿ duuⁿ ñá túú tnàhá iní-gá nchaa nácuaá quide-yu, chi ío sáá iní-yu, te ñá túú quide-yu ní ⁿ sá váha.

2

Tnúhu váha tnúhu Yá Ndióxi

1 Te yòhó òrè dānehé-n ñāyiu, te danéhé-n-yu mee-ni nācuáa cāháⁿ tnúhu váha tnúhu Yá Ndióxi.

2 Te nchaa cue tée cùu sacuéhé ná cāda cuendá-güedé vá cādá cùtēxīnu-güedé cundecu-güedé, te na cundecu yiñuhu-güedé, te na cuāha váha-güedé cuendá nācuáa cada-güedé cundecu-güedé, te na quindáá váha iní-güedé Yá Ndióxi, te na cùu iní-güedé tnàha ñāyiu-güedé, te na cunduu cahnu iní-güedé cuéi nāndi sá ná yāha-güedé.

3 Te vitna cāháⁿ tucu-í sá cùu-xí nchāa ñāyiu dīhí ñāyiu cùu sacuéhé sá ná cundecu yiñuhú-yu, te vá cùu-yu ñāyiu yiti yùhu-xi, te ní vá cùu-yu ñāyiu quihu, te na dānehé-yu nchaa dāva-gá ñāyiu cada váha-yu.

4 Te na dāsahú-yu nchaa ñāyiu dīhí ñāyiu cuechi cuendá ná cùu iní-yu yí-yu, ndihí cue landú-yu,

5 ndihí cuendá sá ná cāni váha iní-yu nācuáa cundecu-yu, ndihí cuendá sá vá cāni iní-yu cadá-yu ní ñⁿ sá cuéhé sá dúhá, ndihí cuendá sá ná cādā-yu nchaa chiuⁿ ñuhu vehé-yu, ndihí cuendá sá cādā váha-yu nchaa tnàha ñāyiu-yu, ndihí cuendá sá ná cādā-yu nchaa nācuáa cāháⁿ yí-yu, te ducaⁿ xini ñuhu-xi cadá-yu cuendá sá vá yōo cāháⁿ cuéhé cuendá tnúhu Yá Ndióxi. Duha cūñaha-n xii cue ñāyiu dīhí ñāyiu cùu sacuéhé cuendá ducaⁿ dāsahú-yu nchaa ñāyiu dīhí ñāyiu cuechi.

6 Te yòhó cāháⁿ-n dōho nchaa cue tée cuechi cuendá sá ná cāni váha iní-güedé nācuáa cundecu-güedé,

7 te cada-n mēe-ni sá váha cuendá ducaⁿ cānchicúⁿ nihnu-güedé cada-güedé, te òrè danéhé-n-güedé te ío váha cuu iní-n dānehé-n-güedé, te ndihí tnúhu yiñuhu cāháⁿ ndihí-n-güedé.

8 Te cāháⁿ-n mēe-ni tnúhu váha, te ducaⁿ te vá yōo ñⁿ cāháⁿ cuéhé cuendá tnúhu cāháⁿ-n, te nchaa ñāyiu cùu úhú iní ñāhá xii-o cu-caháⁿ núu-yu, te vá nihí-yu tnúhu cāháⁿ cuéhé-yu cuendá-ó.

9 Te ío cāháⁿ-n dōho nchaa cue tée xīnu cuechi sá ná quindáá iní-güedé cada-güedé nchaa chiuⁿ tahu patróóⁿ-güedé nācuáa cuñu-güedé núu cué tée-áⁿ, te vá cāháⁿ sáá iní-güedé.

10 Te vá cāni iní-güedé duhu-güedé, te cada ndáá-güedé cuendá sá ñā túu nā caní iní ñāhá cué patróóⁿ-güedé, te ducaⁿ te cutnūmí iní ñāyiu sá tnúhu Yá Ndióxi ío váha dānehé ñāhá-xí nācuáa cada-o cundecu-o, te diu-gá cùu-gá Yá dácācu nihnu ñaha xii-o núu úhú núu ndāhú.

11 Te nchoo ní cutnūmí iní-ó sá Yá Ndióxi ío cundahú iní-gá nchaa nchoo ñāyiu ndēcu

ñuyú-a, te ní taxi-gá tnúhu ndee iní sá nānihí tǎhú nchaandi túhú ñāyiu te núu na quindáá iní ñāhá-yu xii-gá.

12 Te ní cachí-gá sá dáñá-ó nchāa ichi cuehé ichi duha chi ñā tnàhá iní-gá cundecu-o ìchi-án, te vá ío cuhuⁿ iní-ó nchāa sá ío ñuyú-a, te ní cachí tucu-gá sá ío caní iní-ó nācuáa cundecu-o vitna ndecu-o ñuyú-a te cada ndáá-ó cundecu-o cuendá nduu vetú iní-gá.

13 Te cundetu-o sáá nduu cāhnu vihi, nduu quixi tucu Xitohó Jesucristú Yáá cùu Ndióxi-ó, te diu-gá ní dácācu nihnu ñaha-gá xii-o núu úhú núu ndāhú. Te nduu-áⁿ ío cudú iní-ó.

14 Te mee-gá ní xihí-gá chi ducaⁿ ní cuiní-gá cunduu, te ducaⁿ ní quide-gá cuendá nchoo vá cundēcu-gá-ó ichi cuehé ichi duha, te nduu ndoo nduu nine iní-ó, te ducaⁿ te cuu-o cué ñāyiu quindaha-gá, te ní yùhu ní iní-ó cāda-o mee-ni sá váha.

15 Te nchaa tnúhu-áⁿ danéhé-n-yu te cūñaha-n xii-yu nācuáa cadá-yu, te cāháⁿ-n dōho-yu te núu ñā túu quide ndáá-yu. Te cada-n sá cùu-n ñⁿ tée xīnu cuechi núu Yá Ndióxi, te vá dáñá-n mēe-n daquee tǎhú ñāhá ñāyiu xii-n.

3

Nchaa sá tàu ñāyiu ndēcu ichi Yá Ndióxi cadá-yu

1 Te cūñaha-n xii-yu sá ná quindáá iní-yu cadá-yu nchaa nācuáa cāháⁿ nchaa cue tée cūchiuⁿ, te tàu-yu chindee ñāhá-yu xii-güedé nchaa chiuⁿ váha quide-güedé.

2 Te vá cāháⁿ cuéhé-yu cuendá ñāyiu, te vá cundūu pletú-yu, te na cùu-yu ñāyiu ndāhú iní-xi, te na cundahú iní-yu nchaa tnàha ñāyiu-yu.

3 Te tnàhá-ó ní xōo cada-o dātná quidé ñāyiu-áⁿ vitna, chi ío ní dīquí-ó chi ñā tēcu tnūn-ó nācuáa cāháⁿ tnúhu Yá Ndióxi ní cùu, te ío ní xīnduu sáá iní-ó núu-gá, te ní xīndecu-o ñⁿ ichi sá ñā túu tàu-ó cundecu-o ní cuu, te nāndi sá cuéhé sá dúhá ío ñuyú-a ní xōo cudú iní-ó ní xōo cada-o chi ní xōo taxi tnūmí ñāhá-xí xii-o, te ní xōo cada cuehé ní xōo cada duha-o ní cùu, te ní xīndecu-o ìchi cuedú iní, te cuendá nchaa sá ní xōo cada-o-áⁿ xiáⁿ ío ní xōo cuu úhú iní ñāhá ñāyiu xii-o, te ducaⁿ-ni nchōo tucu ní xōo cuu úhú iní-ó-yu.

4 Te Yá Ndióxi Yáá ní dácācu nihnu ñaha xii-o núu úhú núu ndāhú ní dāndíxi tūu-gá iní-ó nācuáa cutnūmí iní-ó sá ío váha iní-gá, te cùu iní ñāhá-gá xii nchaa nchoo ñāyiu ndēcu ñuyú-a.

5 Te Yá Ndióxi ní dácācu nihnu ñaha-gá xii-o núu úhú núu ndāhú, dico ñā díu cuendá ñⁿ sá váha quide-o ndecu-o ñuyú-a

ducaⁿ nĩ quide-gá, chi mee-gă ducaⁿ tnáhí ní cundáhú iní ñáhá-gă xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyiú saa, chi Espiritú Yá Ndióxi ducaⁿ nĩ quide ñaha-xi xii-o.

⁶ Te Espiritú-gá ní taxi-gá ni yùhu ni iní-gá ndécú ndihí-o, te ducaⁿ nĩ quide-gá chi ní sándáá iní-ó Xitohó Jesucristú Yaa ní dácácu nihnu ñaha xii-o núú ùhú núú ndàhú.

⁷ Te ío cùndahú iní ñáhá-gă xii-o nũu sa ní quide ndáá-gá cuéchi-o te ní cuu-o dèhe-gá, núú xiáⁿ vitna ndètu-ná-ó sáá nduu ndùu táhú-ó cùndecu-o ndihí-gá ni caa ni quihíⁿ.

⁸ Te tnúhu ní cáháⁿ-í-a cùu-xi tnúhu ndáá cuiti, te cuini-í sá ni yuhu ni iní-n cáháⁿ-n tnúhu-gá núú-yu cuendá sá ncháá ñáyiú sándáá iní ñáhá xii Yá Ndióxi nducu ndéé-yu cadá-yu mee-ni sá váha, te tnúhu-áⁿ cúú-xí mèe-ni tnúhu váha, te ío váha sá cúú-xí-yu.

⁹ Te vá cadá cuendá-n nchàa tnúhu sá ñà túú nándihí xitnáha ñáyiú, te vá cadá cuendá-n ñáyiú nándi cáháⁿ cuendá nchaa sá ní xóo cada cue ñáyiú ní xindecu ndéé sanaha, te vá cadá cuendá-n nchàa tnúhu xitnáha ñáyiú xicuehé tnáhá cuendá tnúhu ní chídó tnúni ndí Moisés, chi nchaa tnúhu xitnáhá-yu-áⁿ ñà túú tnáhí nándihí-xi, te dàcuíta ñaha-xi xii-o.

¹⁰ Te núú ío ñáyiú ní ngúita-yu nándi tnúhu cáháⁿ-yu cuendá sá vā cúú ìⁿnuu cue ñáyiú ndècu ichi Yá Ndióxi ñá, te ñáyiú-áⁿ cáháⁿ sàhú-n dōho-yu ìⁿ úú xito, te núú vá tnúú-yu tnúhu cáháⁿ-n ñá, te vá nihí tnáhá-gă-n ndihí-yu.

¹¹ Te ducaⁿ càda-n, chi ñáyiú-áⁿ duuⁿ duuⁿ ñá túú-gă cuini-yu cadá-yu sá váha, chi mee-ná sá cuèhé sá dúhá tnáhá iní-yu cadá-yu, te cùtnuní iní mèé-yu sá ñà túú quide ndáá-yu, te sáá nduu te nacháhu-yu nchaa sá quidè-yu.

Nàcuáa cada té Titú

¹² Te cuini-í tendaha-í té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ìⁿ cue tée-a núú ndécú-n, te ío nducu ndèe-n quihíⁿ-n ñùú Nicópolis núú quihíⁿ-í cundecu-í, chi yàcáⁿ cuini-í quihíⁿ-í cundecu-í yóó quidé vixiⁿ-xi.

¹³ Te ío cuáñaha-n nchàa sá xíní ñùhu té Zénás tée ío váha xini nchaa nàcuáa cáháⁿ lèí, ndihí té Àpolós cuendá sá ñà túú nà cumání xii-güedé ichi.

¹⁴ Te cuini-í sá ncháá ñáyiú ndècu ndihí-o ichi Yá Ndióxi cada váha-yu, te cuáñáhá-yu ìⁿ sá xíní ñùhu ñáyiú, te ío váha chiúⁿ cadá-yu te núú ducaⁿ na cadá-yu.

Tnúhu ndéé núú nĩ ndihí-ná

¹⁵ Te vitna ío cada ndee iní-n càchí nchaa ñáyiú ndècu ndihí-í iha, te cúñaha-n sá ío na càda ndee iní nchaa ñáyiú cùu iní ñáhá xii-o, ñáyiú sándáá iní ñáhá xii Yá Ndióxi. Te Yá

Ndióxi ío na chindee chitúú ñaha-gă xii-ndo nchàa-ndo. Te ducaⁿ na cùnduu. Te ío chí cadá ndèe iní-ná vitna.

TUTÚ NÍ CADÚHA TÉ PĀBLÚ QUIHIⁿ NDAHA TÉ FILEMÓN

*Té Pāblú cādúha-dé tutú quihiⁿ ndaha té
Filèmon*

¹ Te yúhú té Pāblú tée yihi vecaá sá cuendá Xítohó Jesucristú cādúha-í ìⁿ tutú ndihi té Timíteú cuendá daquixi-í ndaha yòhó té Filèmon, te ío cùu iní ñáhà-í xii-n chí tnàhá-n quide-n chiúⁿ Yá Ndiòxi. Te tutú-a tëndaha-í quixi ndaha-n

² ndihi ndaha ñaha nani Apía ñaha ndècu ndihi-o ichi Xítohó Jesucristú, ndihi ndaha té Àrquipú, chí tnàhá-dé quidé-dé chiúⁿ Yá Ndiòxi, ndihi ndaha nchaa ñáyiú tàcá vehe-n dàcuahá-yu tnúhu-gá.

³ Te xicáⁿ táhù-í núú Tátá-ó Dütú Ndiòxi ndihi núú Xítohó Jesucristú sá ío na chindee chítúu ñaha-gá xii-ndo, te ducaⁿ ndi nduú-gá ná cádá te ío váha cuu iní-ndó cùndecu-ndo.

Té Filèmon ío sàndáá iní-dé Xítohó Jesucristú te cùu iní-dé tnàha ñáyiú-dé

⁴ Te ndi tnahá òré cāháⁿ ndihi-í Yá Ndiòxi cuendá-n ndacáⁿ táhù-í núú-gá.

⁵ Chí ñihí-í tnúhu sá ío sàndáá iní-n Xítohó Jesucristú, te cùu iní-n cuè ñáyiú ndècu ichi-gá.

⁶ Te xicáⁿ táhù-í núú Yá Ndiòxi sá dàtná-ni sàndáá iní-n-gá ducaⁿ-ni dànehé-n ñáyiú cuendá ducaⁿ ngñu ichi-yu tnàhá-yu, te cutnuni iní-yu nacuaá nduu nchaa sá váha tàxi Xítohó Jesucristú xii-o, te tnàhá-yu nduu táhù-yu nchaa sá váha-án.

⁷ Te yòhó té Filèmon cùu-n tée ndècu ndihi-í ichi Xítohó Jesucristú cāchi tnúhu-í xii-n sá ío cùdúú iní-í cuendá sá ío váha quide-n ndecu-n, chí cùu iní-n nchaa ñáyiú ndècu ichi Yá Ndiòxi, te uuⁿ-gá ñihí ndéé-í sá dúcáⁿ quide-n, te diu-n ío sáhá-n-yu tnúhu ndee iní ndécú ndihí-yu.

Té Pāblú chindèe tnúhu-dé té Ònésimú

⁸ Te yúhú té Pāblú ní taxi Xítohó Jesucristú tnúhu ndee iní ndécú ndihi-í sá táxi tnuni ñáhà-í xii-n te tahu-í chiúⁿ cada-n, dico vá táxi tnuni ñáhà-í xii-n,

⁹ chí váha-gá sá cāháⁿ ndàhù-í núú-n sá cádá-n nchaa nacuaá cāháⁿ-í chí ío cùu iní ñáhà-í xii-n. Chí yúhú sa ta yii-í cuaháⁿ, te yihi-í vecaá cuendá sá cāháⁿ-í tnúhu Xítohó Jesucristú.

¹⁰ Te cāháⁿ ndàhù-í núú-n sá ñà túú nã caní iní-n cuendá té Ònésimú, chí ní cuu-dé vitna dàtná ìⁿ déhe-í, chí ní sàndáá iní-dé tnúhu Yá Ndiòxi ní xáhaⁿ-í xii-dé vitna yihi-í vecaá.

¹¹ Te nàha-n sá cùtnàhá ní xindecu ndihi-n-dé ñà túú ní quide ndáá-dé, dico vitna ío váha quide-dé ndécú ndihi-í-dé, te diu-ni ducaⁿ càda-dé òré cundecu ndihi tucu-n-dé.

¹² Te vitna tendaha-í-dé ndixi-dé cundecu tucu-n ndihi-dé, te òré queheⁿ cuendá-n-dé, te cada iní-n sá yúhú ní queheⁿ cuendá-n.

¹³ Te vitna yihi-í vecaá sá cuendá tnúhu Xítohó Jesucristú, te cuini-í ngani-í-dé cunu cuechi-dé núu-í cuendá cada-dé núu-n ní cùu.

¹⁴ Dico ñà túú ní ngani-í-dé, chí vátá ndàtnúhu ndihi ñaha-gá-í xii-n núu nása cāchí-n cùnduu. Te ñà cùndèe iní-í cada yica-í cada-n ìⁿ sá váha sá cúu-xi-í, chí cuini-í sá méé-n caní iní-n núu cuu àdi sá vã cúu.

¹⁵ Te ní cunduu ní quee té Ònésimú vehe-n, te cudana te mee Yá Ndiòxi ducaⁿ ní cāchí-gá cunduu cuendá dacuaha-dé cada váha-dé. Te ndixi tucu-dé cundecu ndihi ducaⁿ-nã-n-dé.

¹⁶ Te vá cúu-gá-dé dàtná ìⁿ tée xinu cuechi chí ní cuu-dé dàtná ìⁿ ñani-ó chí ní sàndáá iní-dé Yá Ndiòxi, te yúhú ío cùu iní-í-dé, dico yòhó uuⁿ-gá cuu iní-n-dé, chí cùu-dé ìⁿ tnàha ñáyiú-o, te ndècu-dé ichi Yá Ndiòxi.

¹⁷ Te ìⁿ-ni cùu-o ndecu-o ichi Yá Ndiòxi núu xíãⁿ cāháⁿ ndàhù-í núú-n sá quéhéⁿ cuendá-n-dé dàtná quéhéⁿ cuendá-n yúhú òré quéxi-í vehe-n.

¹⁸ Te núu ío ìⁿ sá ní cumáni-dé núu-n ñà túú ní quide ndáá-dé cùtnàhá ní xindecu-n ndihi-dé, àdi ío ìⁿ sá táu-dé te vá ndacáⁿ cuendá-n núu-dé, chí yúhú ndacáⁿ cuendá-n núu-í.

¹⁹ Te ndaha mee yúhú té Pāblú cādúha-í tutú-a cāchí tnúhu-í xii-n sá ná chāhu-í nchaa sá ní quide-dé. Dico dandacu saú iní-n sá yúhú ní sanu ichi ñaha-í xii-n ichi Xítohó Jesucristú.

²⁰ Dico yòhó tée ndècu ndihi-í ichi Xítohó Jesucristú cada ndee iní-n càda-n tnúhu ndàhù cāháⁿ-í núú-n chí ndècu-o ichi-gá. Te ducaⁿ càda-n nacuaá cuu-xi dàtná ìⁿ tnúhu ndee iní sá cúu-xi-í, chí ndi ndúú-ó ndècu-o ichi-gá.

²¹ Te cùtnuni iní-í sá cádá-n nchaa nacuaá cāháⁿ-í, te cùtnuni tucu iní-í sá ío-gá vài sá váha cada-n dàcúxí tnúhu ndàhù cāháⁿ-í núú-n, núu xíãⁿ tëndaha-í tutú-a véxi ndaha-n.

²² Te vitna cuini-í cada túha-n ìⁿ vehe cundecu-í, chí sàni iní-í sá quíxí còto ñaha-í xii-ndo, te ndètu-í sáá nduu-án chí nchòhò xicáⁿ táhù-ndó núú Yá Ndiòxi cuendá-í.

Tnúhu ndéé núú ní ndihi-ná

²³ Te ío cada ndee iní-n cāchí té Ēpafrás tée yihi ndihi-í vecaá sá cuendá tnúhu Xítohó Jesucristú.

²⁴ Te ío cada ndee iní tucu-n càchí té Mácú, ndihí té Aristarcú, ndihí té Dēmás, ndihí té Lùcá, chí tnàhá cue tée-ãⁿ quide-güedé chiuⁿ Xítohó Jesucristú.

²⁵ Te Xítohó Jesucristú ío na chindee chítúu ñaha-gã xii-ndo nchàa-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ QUIHⁿ NDAHA CUE ÑÁYIU HÈBREÚ

Dútú Ndióxi ní cachí-gá sá Dêhe-gá cada núu-gã

¹ Te ndéé sanaha, Yá Ndióxi ní xáhaⁿ-gã xii cue téé ní cachí iní mée-gã cada núu-gã cáháⁿ-güedé tnúhu-gã núu nchaa ñaní tnáhá-ó ní xindecu ndéé dàvã-ãⁿ te diu ducaⁿ ní quide-güedé. Te titní xito ducaⁿ ní xáhaⁿ-gã xii-güedé ní cáháⁿ-güedé tnúhu-gã. Te ndí dññⁿ ndí dññⁿ ní xitnúhu ñaha-gã xii-güedé nãcuáa cáháⁿ-güedé tnúhu-gã núu-yu.

² Te sátá ní cuu vai nduu ta yáha cuáháⁿ, te ní saá nduu ní cachí Yá Ndióxi sá Dêhe-gá cada núu-gã cáháⁿ-gã tnúhu-gã núu-ó. Te diu-ní mee-gã ní táuchíuⁿ ní cadúha Dêhe-gã ñuyú ndíhi nchaa sá ío, te ní cachí-gá sá ncháa cùu-xi cuendá Dêhe-gã.

³ Te Dêhe Yá Ndióxi ío càhnu cuu-gã dàtná càhnu cuu mee-gã, te dàtná-ní sàni iní mée-gã diu-ní ducaⁿ sàni iní Dêhe-gã chí tnáhá-gã cúu-gã Ndióxi, te sá cuendá tnúhu cáháⁿ Dêhe-gã xiãⁿ ndécú-ní nchaa sá ío ñuyú, te ducaⁿ chí ío càhnu cuu Dêhe-gã, te diu-ní Dêhe-gã ní quide nãcuáa vá cündecu-gã cuèchi-o. Te sátá dúcáⁿ te ní ngóo-gã xio cùha Tátá-gã Dútú Ndióxi Yáa ío cùnno ndecu andiu.

Dêhe Dútú Ndióxi ío-gã cùnno-gã dàcúuxí cue espíritu xínú cuèchi núu-gã

⁴ Te Dêhe Yá Ndióxi ío-gã cùnno-gã dàcúuxí cue espíritu xínú cuèchi núu-gã, te ducaⁿ chí ní nduu táhú-gã núu Tátá-gã Dútú Ndióxi sá ío-gã cunuu-gã dàcúuxí cue espíritu-áⁿ.

⁵ Chí Yá Ndióxi ñá túú ní xáhaⁿ-gã xii ní ñⁿ cue espíritu xínú cuèchi núu-gã dàtná ní xáhaⁿ-gã xii Dêhe-gã, te duha ní xáhaⁿ-gã: Yòhó cúu-n Dêhe mee-í,

te ducaⁿ-ní cündecu-n núu ndécú-í. Duha ní xáhaⁿ-gã. Te ní cachí tucu Yá Ndióxi: Yúhú cúu-í Tátá Yáa-ãⁿ, te mee-gã cúu-gã Dêhe-í. Duha ní cachí-gã.

⁶ Te cútñahá ní tendaha-gã Dêhe-gã Yáa ío cùnno ní quixí-gã ñuyú-a, te ní cachí-gã: Táu-xi sá ncháa cue espíritu xínú cuèchi núu-í chiñuhu-xi Dêhe-í.

Duha ní cachí-gã.

⁷ Te Yá Ndióxi ní cáháⁿ-gã cuendá cue espíritu xínú cuèchi núu-gã, te ní cachí-gã: Yúhú quidè-í sá ncháa cue espíritu xínú cuèchi núu-í cúu-xí dàtná táchí,

te diu-ní cue espíritu-áⁿ quidè-í sá cúu-xí dàtná itá ñuhú.

Duha cáchí-gã.

⁸ Dico Dêhe-gã chí ñá túú dùcaⁿ ní xáhaⁿ-gã, chí duha ní xáhaⁿ-gã:

Yòhó tnáhá-n cùu-n Ndióxi dàtná cúu yúhú Yáa cúu Tátá-n,

te ducaⁿ-ní tàxi tnuní-n ní caa ní quíhíⁿ, te ío váha ndáá quidè-n tàxi tnuní-n.

⁹ Te dàquee tíhu-n nchaa sá cuèhé sá dúhá, te cùu iní-n nchaa sá váha,

núu xiãⁿ yúhú Yáa cúu Tátá-n ní quide-í sá ío-gã vii ío-gã váha cuu iní-n,

dàcúuxí nchaa dava-gã ñáyiu ndécú ndíhi-n. Duha ní xáhaⁿ-gã xii Dêhe-gã.

¹⁰ Te ní xáhaⁿ tucu Yá Ndióxi xii Dêhe-gã: Yòhó cúu-n Yáa ío cùnno, chí ndéé cútñahá ñá túú vèdana ná ío te ní cadúha-n ñuyú ndíhi andiu.

¹¹ Te andiu ndíhi ñuyú chí naa-xi, dico yòhó chí cündecu-ní-n ní caa ní quíhíⁿ.

Te andiu ndíhi ñuyú chí ndíhi-xi dàtná ndíhi ñⁿ dóó,

¹² te dàtná cùnín-n quide ñáyiu ndíhi ñⁿ dóó òré ndacáⁿ tnáhnú-yu tàxi ndecú-yu ñⁿ xio, ducaⁿ càda-n ñuyú ndíhi andiu,

te dàtná nádama dóó ñáyiu ducaⁿ càda tucu-n ñuyú ndíhi andiu.

Te yòhó dàtná-ní càa-n ndecu-n vitna ducaⁿ-ní cünduu-ñ cündecu-n ní caa ní quíhíⁿ, chí vá yíⁿ tnáhi-n.

Duha ní xáhaⁿ Yá Ndióxi xii Dêhe-gã.

¹³ Te Yá Ndióxi ñá túú ní xáhaⁿ-gã xii ní ñⁿ cue espíritu xínú cuèchi núu-gã dàtná ní xáhaⁿ-gã xii Dêhe-gã, te duha ní xáhaⁿ tucu-gã:

Ngóo xio cùha-í taxi tnuní-n,

te yúhú cada-í te nchaa sá cúu úhú iní ñáhá xii-n canehe-xi sá yíñuhu núu-n.

Duha ní xáhaⁿ-gã xii Dêhe-gã.

¹⁴ Te nchaa espíritu xínú cuèchi núu Yá Ndióxi mee-ní chiñu-gã quidè-xí, chí tendaha-gã cue espíritu-áⁿ cuáháⁿ-xi nchaa núu ndécú cue ñáyiu ní nduu táhú cündecu ndíhi-gã chindee ñaha-xi xii-yu.

2

Vá dàñá ndèè-ó tnúhu sá cáháⁿ nãcuáa naníhí táhú-ó

¹ Te sá cuendá sá ío cùnno Xítohó Jesu-ristú, núu xiãⁿ ío xini ñuhu-xi cada cuendá-ó nchaa tnúhu cáháⁿ-gã sá sá ní xindedóho-o cuendá sá vá dàñá ñihnu-o.

² Te cue espíritu xínú cuèchi núu Yá Ndióxi ní cáháⁿ-xi tnúhu-gã ndéé sanaha, te tnúhu ní cáháⁿ cue espíritu-áⁿ cúu-xí sá ndáa cuíti.

Te nchaa ñáyiu ñá túú ní cùnín tññ nchaa tnúhu ní cáháⁿ cue espíritu-áⁿ, te ní ñá túú ní cùnín-yu cündedóho-yu, nchaa ñáyiu-áⁿ ní nacháhu-yu nãcuáa nduu nchaa cuèchi ní quidè-yu ñⁿ ñⁿ-yu.

³ Te sátá dúcáⁿ ní yáha cue ñáyiu-áⁿ, xiãⁿ cútñuní ndáá iní-ó sá vá cácu ñihnu-o

te núu na dǎña nihnu-o tnúhu sǎ cǎháⁿ nǎcuáa naníhí tǎhú-ó, tnúhu sǎ ío cúnuu, chí nacháhu-o te núu ducaⁿ na cǎda-o, Te díhna-gǎ Xítoho Jesucristú ní cǎháⁿ-gǎ tnúhu-áⁿ te nchaa ñáyiú ní xíndedóho nchaa nǎcuáa nduu tnúhu-áⁿ ní cǎháⁿ ndáá-yu tnúhu-áⁿ núú-ó.

4 Te tnáhá Yǎ Ndióxi cundíhi-gǎ nchaa ñáyiú-áⁿ quidé-gǎ nǎcuáa cutnùni iní-ó sǎ tnúhu-áⁿ cúu-xí tnúhu ndáá, chí quide-gǎ titní núu sǎ vǎ yóo tnáhí ndǎcu cada te ío cúnúhu-o. Te Espíritú Yǎ Ndióxi quidé-xí nǎcuáa nduu tǎhú-ó ndí díiⁿ núu chiúⁿ cada-o nǎcuáa cuní méé-gǎ. Te sǎ dúcǎⁿ quide Yǎ Ndióxi nchaa xiǎⁿ, xiǎⁿ cutnùni iní-ó sǎ tnáhá-gǎ cǎháⁿ-gǎ sǎ tnúhu-áⁿ cúu-xí tnúhu ndáá.

Xítoho Jesucristú ní xínduu yiqui cúnú-gǎ dátǎ cá yiqui cúnú nchoo cué ñáyiú ñuyúú-a

5 Te Yǎ Ndióxi vǎ táxi ndéu-gǎ cue espíritú xínú cuéchi núú-gǎ taxi tnùni-xí ñuyúú sǎá sǎ vǎtǎ quini-gǎ-ó, te díu cuendá xiǎⁿ cǎháⁿ-í.

6 Te núu tǔtú Yǎ Ndióxi cǎchí-xí: Yòhó Dútú Ndióxi ñá tǔú nǎ cúu cué ñáyiú ñuyúú núu ndacu iní-n-yu, àdi chíndéé-n-yu.

7 Te yòhó ní cǎchí-n sǎ nchaa ñáyiú ñuyúú-a vǎ cúnúú-yu dátǎnǎ cúnúu cue espíritú xínú cuéchi núú-n,

dico ní cǎchí-n sǎ sǎá nduu te ío cúnúú-yu tnáhá-yu, te mee-n cǎháⁿ-n sǎ ío cǎhnu cuú-yu,

te ní cǎchí tucu-n sǎ táxi tnùni-yu nchaa sǎ ní cadúha-n.

8 Te ducaⁿ nchàandi tǔhú sǎ ío quindáhá-yu. Duha cǎchí-xí núu tǔtú-gǎ. Te sǎ dúcǎⁿ ní cǎchí Yǎ Ndióxi sǎ quindàha ñáyiú ñuyúú nchaa sǎ ío, xiǎⁿ cutnùni sǎ ncháandi tǔhú sǎ ío taxi tnùni-yu, dico vǎtǎ sǎá-gǎ nduu dúcǎⁿ quini-ó cǎda-xí.

9 Te nchoo sa nàha-o sǎ tnáá-ní ní quide Yǎ Ndióxi cuendá sǎ vǎ cúnúu Xítoho Jesucristú dátǎnǎ cúnúu cue espíritú xínú cuéchi núú-gǎ. Te ducaⁿ ní quide Yǎ Ndióxi chí ní cundáhú iní-gǎ nchaa ñáyiú ñuyúú-a, chí ní cǎchí-gǎ sǎ Déhe-gǎ cuú cuendá ncháa-yu, te Xítoho Jesucristú ío ní ndoho-gǎ òré ní xíhí-gǎ, núu xiǎⁿ ní nduu tǎhú-gǎ cúnúu vihi-gǎ vitna. Te mee Yǎ Ndióxi cǎchí-gǎ sǎ ío cǎhnu cuu Déhe-gǎ.

10 Te Yǎ Ndióxi ní cadúha-gǎ nchaandi tǔhú sǎ ío nǎcuáa ní cǎchí iní méé-gǎ, te sǎ dúcǎⁿ ní quide-gǎ núu xiǎⁿ vǎha-ní sǎ ní cǎchí-gǎ sǎ Xítoho Jesucristú nándi ndoho-gǎ te cuú-gǎ cuendá ducaⁿ ñá tǔú tnáhí-gǎ ná cùmáni-gǎ núu Yǎ Ndióxi. Te sǎ dúcǎⁿ ní cuu núu xiǎⁿ ní níhí Yǎ Ndióxi nǎcuáa cada-gǎ cǎndeca-gǎ nchaa ñáyiú cùu déhe-gǎ quíhíⁿ núu ío vǎha cǎa cundecú-yu ndíhi-gǎ ní caa ní quíhíⁿ. Te Xítoho Jesucristú cúu-gǎ Yáá

ní quide nǎcuáa nduu tǎhú cue ñáyiú cundecú-yu ndíhi Yǎ Ndióxi.

11 Te Xítoho Jesucristú cúu-gǎ Yáá quidé ndéu yíñuhu ñáyiú núu Yǎ Ndióxi ñáyiú sàndáá iní ñáhá xí-gǎ, te Xítoho Jesucristú ndíhi cue ñáyiú-áⁿ ìiⁿ-ní Yáá cúu Tǎtǎ-yu ndíhi-gǎ, núu xiǎⁿ Xítoho Jesucristú Yáá cúu Déhe Dútú Ndióxi ñá tǔú cùcahaⁿ núú-gǎ cǎháⁿ-gǎ sǎ ñàni-gǎ ndíhi cúha-gǎ cúu nchaa ñáyiú-áⁿ.

12 Te quèe ndáá-xí nǎcuáa cǎháⁿ-xí núu tǔtú Yǎ Ndióxi núu cǎchí-xí nǎcuáa ní xáhaⁿ Xítoho Jesucristú xii Tǎtǎ-gǎ Dútú Ndióxi, te duha ní xáhaⁿ-gǎ:

Cǎháⁿ vǎha-í cuendá-n núu nchaa cue tée cùu dátǎnǎ ñàni-í ndíhi núu nchaa cue ñáyiú díhí cúu dátǎnǎ cúha-í,

te cata-í ndudú chíñuhu ñaha-í xii-n núu tǎcá-yu.

Duha yódo tnuni núu tǔtú-gǎ nǎcuáa ní xáhaⁿ Déhe-gǎ xii-gǎ.

13 Te íngǎ tucu xichi núu tǔtú Yǎ Ndióxi cǎháⁿ-xí nǎcuáa ní cǎháⁿ Xítoho Jesucristú cuendá-gǎ, te duha ní cǎchí-gǎ:

Yúhú nchaa-ni nduu quindáá iní-í Tǎtǎ-í Dútú Ndióxi.

Duha cǎchí-xí núu tǔtú Yǎ Ndióxi nǎcuáa ní cǎháⁿ Xítoho Jesucristú. Te íngǎ tucu xichi núu tǔtú Yǎ Ndióxi cǎháⁿ-xí nǎcuáa ní cǎháⁿ tucu Xítoho Jesucristú, te duha ní cǎchí-gǎ:

Iha ndéu ndíhi-í nchaa ñáyiú cùu déhe Tǎtǎ-í Dútú Ndióxi, te díu-ni ñáyiú-áⁿ ní taxi cuendá Tǎtǎ-í cuu cuendá-í.

Duha cǎchí-xí núu tǔtú-gǎ nǎcuáa ní cǎháⁿ Xítoho Jesucristú.

14 Te sǎ cuendá nchaa ñáyiú cùu déhe Yǎ Ndióxi cúu-yu yiqui cúnú, núu xiǎⁿ ducaⁿ tnáhá Xítoho Jesucristú ní cuu-gǎ yiqui cúnú, te ducaⁿ ní cuu-gǎ yiqui cúnú cuendá cuú-gǎ, te sǎ dúcǎⁿ cúu-gǎ te ndacu-gǎ daquèe tǔhú-gǎ sǎcúihná, te díu sǎcúihná-áⁿ quidé-xí xíhí ñáyiú.

15 Te ducaⁿ ní quide-gǎ cuendá sǎ cué ñáyiú ñuyúú-a vǎ yúhú-gǎ-yu sǎ cúu-yu, chí nchaa-ni nduu yúhú-yu sǎ cúu-yu.

16 Te na cǎchí tnúhu ndáá-í sǎ Xítoho Jesucristú ní quixí-gǎ cuendá chindee-gǎ cue ñáyiú cùu ñàni tnáhá ndí Abrahám, te ñá díú cuendá sǎ chíndèe-gǎ cue espíritú xínú cuéchi núu Yǎ Ndióxi.

17 Te cuendá xiǎⁿ núu dai ní xini ñuhu-xí sǎ cúu-gǎ ñáyiú cuendá yǎha-gǎ nándi sǎ yǎha-gǎ dátǎnǎ yǎha cue ñáyiú cùu ndí mee-gǎ cuendá ducaⁿ cùu-gǎ dútú ío cúnuu te cuu ndáá-gǎ núu Yǎ Ndióxi, te cundáhú iní-gǎ nchaa ñáyiú te cuú-gǎ cuendá sǎ vǎ cundéu-gǎ cuéchi-yu núu Yǎ Ndióxi.

18 Te mei òré ndóhó Xítoho Jesucristú ní xito ndéé ñáhá sǎcúihná xii-gǎ te núu ndisa sǎ vǎ cadá-gǎ ní ìiⁿ sǎ ñá tǔú tǎu-gǎ cada-gǎ,

te sá dúcáⁿ ní ndoho-gá xíãⁿ núu ndácú-gá chĩndée-gá nchaa ñáyiú ducaⁿ yáha.

3

Xitohó Jesucristú ío-gá cúnúu-gá dàcúúxí ndĩi Moisés

1 Te nchòhó cúú-ndó ñáyiú ndècu ndihí-í ichi Xitohó Jesucristú ñáyiú cùu cuendá Yá Ndiòxí, te tñáhá-ndó cùu-ndo ñáyiú ní cáháⁿ ñáhá-gá cuendá cundecu-ndo ndihí-gá. Te yúhú cächí tñúhu-í xii-ndo sá ïo váha cada cuendá-ndó nàcuáa ndúu cuendá Xitohó Jesucristú, chí diu-gá cúú-gá Yáa ní tendaha ñàha Dútú Ndiòxí ní quixi-gá ñuyiú-a, te diu-gá cúú-gá Dútú ïo cùnúu chí quide-gá núú Yá Ndiòxí. Te diu-ni cuendá Xitohó Jesucristú cáháⁿ tñúhu sá ní sàndáá iní-ó.

2 Te mee Yá Ndiòxí ní sáha chiúⁿ-gá Xitohó Jesucristú, te ío ndáá quidé-gá chiúⁿ-án sá cúú-xí Yá Ndiòxí, te diu-ni ducaⁿ ní quide ndíi Moisés ní quide ndíi chiúⁿ ní táhú Yá Ndiòxí, te ío ndáá ní quide ndíi chiúⁿ-gá sá cúú-xí nchaa ñáyiú cùu cuendá-gá, te cue ñáyiú-án cúú-yu dátá vehe mee-gá.

3 Te ñⁿ téé dàcaa ñⁿ vehe váha ío càhnu-gá cúú-dé dàcúúxí vehe dacaa-dé. Te ducaⁿ sàtnahá-xi cùu Xitohó Jesucristú chí ío-gá càhnu cuu-gá dàcúúxí ndíi Moisés.

4 Te nchoo sá naha-o sá ncháá vèhe dacúúxí ndècu cue téé ní dácáá, dico sa naha tucu-o sá Yá Ndiòxí quidé-gá ndécú nchaa sá ïo ñuyiú-a.

5 Te ndíi Moisés-án ío ndáá ní quide ndíi chiúⁿ ní táhú Yá Ndiòxí ní quide ndíi sá cúú-xí nchaa ñáyiú cùu cuendá-gá. Te sá dúcáⁿ ní quide ndíi xíãⁿ ní cuu ndíi ñⁿ téé ní xinu cuechi núú Yá Ndiòxí. Te ní xáhaⁿ ndíi xii nchaa ñáyiú cùu cuendá-gá nàcuáa cáháⁿ-gá ndéé cuéé-gá.

6 Dico Xitohó Jesucristú cúú-gá Déhe mee Yá Ndiòxí, te cùu-gá Yáa ío quide ndáá yíndàha-gá nchaa ñáyiú cùu cuendá Yá Ndiòxí. Te tñáhá-ó cùu-o ñáyiú cùu cuendá-gá, te diu-ni ducaⁿ cùu cuendá ñáhá-gá xii-o te núu na càncicúⁿ nihnu-ni-o càni ndáá iní-ó cuendá-gá ndéé ná sáá nduu ngũndecu-o ndihí-gá.

Cue ñáyiú cùu cuendá Yá Ndiòxí ío váha cùu iní-yu ndécú-yu ndihí-gá

7 Te núú tütú Yá Ndiòxí yódó tñùni nàcuáa ní cáháⁿ Espiritú-gá, te duha ní cachí-xi: Te núu nchòhó ndédóho-ndo nchaa tñúhu cáháⁿ Yá Ndiòxí vitna,

8 te vá cùndúu sáá iní-ndó dátá ní xínduu sáá iní ñáyiú ní dáquéé tìhú tñúhu Yá Ndiòxí, ñáyiú ní xíndecu xití yucu,

chí ñáyiú-án ní xito ndéé-yu Yá Ndiòxí núu nása cada ñaha-gá xii-yu.

Duha ní cachí Espiritú-gá.

9 Te cächí tucu Espiritú Yá Ndiòxí nàcuáa ní cáháⁿ méé-gá, te duha ní cachí-gá:

Xití yucu ní xito ndéé ñáhá cué ñani tñáhá-ndó ní xíndecu ndéé sanaha xii-í,

te ducaⁿ ní quide ñáhá-yu cuéí ní xini-yu nchaa sá ní quide-í ndéé ùdico cuíá ní xíndecu-yu xití yucu-án.

10 Te sá dúcáⁿ ní quidé-yu núu xíãⁿ ní cudéèⁿ-í núú-yu,

núu xíãⁿ ní cáháⁿ-í cuendá-yu, te ní cachí-í:

“Ñáyiú-a quide-ní-yu nchaa sá ñà túú tâu-yu cadá-yu te ní ñà túú cuini-yu cadá-yu nchaa nàcuáa sàni iní-í,

te ní ñà túú cuini-yu cadá-yu nàcuáa cáháⁿ-í”,

duha ní cáháⁿ-í cuendá-yu.

11 Te xíãⁿ núu ní cudéèⁿ-í núú-yu te ní xáhaⁿ ndáá-í xii-yu sá vá ndúú táhú-yu cundecu váha-yu núú ndécú-í.

Duha ní cachí Yá Ndiòxí cächí Espiritú-gá.

12 Te nchòhó ñáyiú ndècu ndihí-í ichi Xitohó Jesucristú, cáháⁿ-í dóho-ndo sá ío cada cuendá-ndó vá cáni cuèhé iní-ndó te ngó-ndo vá quindáá-gá iní-ndó Yá Ndiòxí te dañá-ndo ichi-gá, te diu-gá cúú-gá Yáa ndécú nchaa nduu nchaa quíú.

13 Te ñⁿ nduu ñⁿ nduu ío chí cuáha tñaha tñúhu ndee iní cundecu-ndo ñini ndecu-ndo ñuyiú-a cuendá sá vá xinu iní-ndó càda-ndo nándi sá cuèhé sá dúhá, te ducaⁿ te vá cúú sáá iní-ndó núú Yá Ndiòxí.

14 Te vá dañá ndéé-ó càni ndáá iní-ó nàcuáa cada ñaha Yá Ndiòxí xii-o, te dátá-ni ní sani iní-ó ndéé cúnáhá ní tuha-o ichi Yá Ndiòxí, te diu-ni ducaⁿ càni iní-ó ndéé ná sáá nduu vá cùndecu-gá-ó ñuyiú-a, te núu ducaⁿ na càda-o te cùu ñⁿnuu-o ndihí Xitohó Jesucristú.

15 Te duha cáháⁿ-xi ñⁿ xichi núú tütú Yá Ndiòxí:

Te núu nchòhó ndédóho-ndo nàcuáa cáháⁿ Yá Ndiòxí vitna,

te vá cùndúu sáá iní-ndó dátá ní xínduu sáá iní cue ñáyiú ní dáquéé tìhú tñúhu-gá ndéé sanaha.

Duha cächí-xi núú tütú-gá.

16 Te cue ñáyiú ducaⁿ ní xínduu sáá iní-xi cúú-yu ñáyiú ní ndèñuhu ndíi Moisés nàcióⁿ Ègíptú, te ñáyiú-án ní xíndedóho-yu tñúhu ní cáháⁿ Yá Ndiòxí te ní quide sáá iní-yu ní dáquéé tìhú-yu tñúhu-gá.

17 Te ndí ùdico cuíá ní xúhuⁿ-yu ichi ío ní cudééⁿ Yá Ndiòxí núú-yu cuendá sá ní quidé-yu nándi nchaa sá cuèhé sá dúhá, te ñáyiú-án ní xihí-yu xití yucu.

18 Te nchaa ñáyiú-án ñà túú ní cuini-yu tñú-yu tñúhu ní cáháⁿ Yá Ndiòxí núu xíãⁿ ní cáháⁿ ndáá-gá sá vá ndúú táhú-yu cundecu-yu núú ío váha càa ndecu-gá.

19 Te xiãⁿ nõu nchoo cùtnuní iní-ó sã nchãa ñãyi-u-ãⁿ ñã túú ní ndũu táhũ-yu cundecu váha-yu núú ndécú-gã, chi ñã túú ní sãndáá iní-yu tnũhu ní cáháⁿ-gã.

4

1 Te vitna ndècu ndihi-gã-ó tnũhu Yã Ndiõxí tnũhu sã dánèhé ñãhá xii-o sã cúú cundecu váha-o núú ndécú-gã, te tàú-xi quíyuhú iní-ó chi na cuáhãⁿ te vá ndúú táhũ-ó cundecu váha-o núú ndécú-gã.

2 Te tnãhá nchoo nĩ ngũndecu ndihi-o tnũhu sã cáháⁿ nãcuãa naníhí táhũ-ó dàtnã ní xĩndecu ndihi cue ñãyi-u ndéé sanaha, dico ñãyi-u-ãⁿ chi ñã túú vèdana nĩ nãndíhí-xi cuèi nĩ xĩndedóho-yu tnũhu-ãⁿ chi ñã túú ní sãndáá iní ñãhá-yu xii-gã.

3 Dico nchoo cù-o ñãyi-u ní sãndáá iní tnũhu Yã Ndiõxí, núu xiãⁿ nduu táhũ-ó cundecu váha-o núú ndécú-gã, te ní quee ndáá-xi nãcuãa cáháⁿ-gã núú tũtũ-gã núú cãchí-xi:

Yúhu ní cudèèⁿ-í núu-yu, te ní cáháⁿ ndáá-í sã vá ndúú táhũ-yu cundecu váha-yu núú ndécú-í.

Duha ní cachí-gã. Te cuu nduu táhũ-yu cundecu váha-yu núú ndécú Yã Ndiõxí ní cùu, chi sa ní xĩnu cava nchaa chũⁿ ní quide-gã sã nĩ cadũha-gã ñũyíú.

4 Te núú tũtũ Yã Ndiõxí cáháⁿ-xi nãcuãa ní quide-gã nduu úsã, te duha cãchí-xi:

Yã Ndiõxí ní quide chiũⁿ-gã iní nduu ní quide-gã nchaa chiũⁿ-gã te ní ndetátũ-gã nduu úsã.

Duha cãchí-xi núú tũtũ-gã.

5 Te cãchí tucu-xi núú tũtũ Yã Ndiõxí nãcuãa ní cáháⁿ-gã cuendã cue ñãyi-u ndéé sanaha, te duha ní cachí-gã:

Cue ñãyi-u-a vá ndúú táhũ-yu cundecu váha-yu núú ndécú-í ndetátũ-í.

Duha ní cachí-gã.

6 Te ñãyi-u ní xĩndedóho tnũhu sã cáháⁿ nãcuãa naníhí táhũ-ó ndéé sanaha, ñã túú ní ndũu táhũ-yu cundecu váha-yu núú ndécú Yã Ndiõxí ndetátũ-gã, te ducaⁿ chi ñã túú ní sãndáá iní ñãhá-yu xii-gã, dico ió-gã ñãyi-u nduu táhũ cundecu váha núú ndécú-gã ndetátũ-gã.

7 Te ní xica cuéhé nduu sã dúcãⁿ ñã túú ní sãndáá iní ñãhá ñãyi-u-ãⁿ xii-gã, te dàtnuní ní cáháⁿ ndíi Dãvíi yuhu-gã nãcuãa cada-gã vitna, te diu-ni nãcuãa sa yodo tnuní diu-ni ducaⁿ chido tnuní tucu-í nãcuãa ní cáháⁿ ndíi yuhu-gã, te duha ní cachí-gã:

Te núu nchòhó ndèdóho-ndo tnũhu cáháⁿ-í te vá cádá sãã iní-ndó.

Duha ní cachí-gã.

8 Te ndíi Jòsué ní sanu ichi ndíi ñãyi-u núú quíhíⁿ-yu cundecu váha-yu, dico ñã diú cuendã xiãⁿ ní cáháⁿ Yã Ndiõxí, chi cuendã nãcuãa cada-gã vitna ní cáháⁿ-gã.

9 Núu xiãⁿ sãã nduu ndũu táhũ nchaa ñãyi-u cùu cuendã Yã Ndiõxí ngũndecu váha-yu núú ndécú-gã ndetátũ-gã.

10 Te nchaa ñãyi-u ducaⁿ na ndũu táhũ cundecu váha núú ndécú Yã Ndiõxí ndetátũ-gã, te tnãhá-yu ndetátũ-yu cuendã nchaa sã váha ní quidé-yu dàtnã ndetátũ méé-gã.

11 Te xini ñũhu-xi sã nchóó ió nducu ndèe-o nducu-o nacuãa cada-o cuendã nduu táhũ-ó ngũndecu váha-o núú ndécú Yã Ndiõxí ndetátũ-gã, chi na cuáhãⁿ dava-ndo càda-ndo dàtnã ní quide cue ñãyi-u ñã túú ní sãndáá iní ñãhá xii-gã, te vá ndúú táhũ-ndó cundecu váha-ndo núú ndécú-gã te núu ducaⁿ na càda-ndo.

12 Te tnũhu Yã Ndiõxí cúú-xi dàtnã ìⁿ sã nchító-ó chi quide-xi nãndi sã quidé-xi, te cùu-xi dàtnã ìⁿ sã dééⁿ víhí-gã dàcúúxí ìⁿ yuchí sã ndéé úú xio núú-xi. Te ducaⁿ sãtnahã-xi cùu tnũhu-gã chi quée-xi iní-ó, te dãndixi tũu-xi nchaandi tũhú sã sãní iní-ó te núu quide váha-o àdi ñã túú quide váha-o ndècu-o.

13 Te ni ìⁿ sã ní cadũha Yã Ndiõxí vá cãní iní-ó sã ndácú-xi nguivãha-xi núú-gã, chi nchaandi tũhú sã sãní iní-ó ndècu tũu-xi núú-gã, te diu núú Yãã-ãⁿ na cãni cuendã-ó nchaa sã quidé-ó.

Xitohó Jesucristú cúú-gã Dútú ìo cùnũu

14 Te Xitohó Jesucristú cúú-gã Dútú ìo cùnũu ndecu ndihi-o, te diu-gã cúú-gã Déhe Dútú Ndiõxí, te Yãã-ãⁿ cuãndaa-gã andiu ní nucũndecu-gã núú Yã Ndiõxí, núu xiãⁿ tàú-xi sã cãncicúrⁿ nihnu-ni-o quĩndáá iní-ó-gã.

15 Te mee Yãã-ãⁿ ìo cùnũu-gã cúú-gã dútú-ó ndècu ndihi-o, te ió na cundahú iní ñãhá-gã xii-o cuendã sã ñã nihí ndéé-ó cundecu-o. Te ducaⁿ càda-gã chi ní yãha-gã dàtnã yãha mee-o, chi nchaa sã ní yãha-gã-ãⁿ ní cuu-xi sã cádá-gã nãndi nchaa sã cuéhé sã dúhá ní cùu dico ni ìⁿ ñã túú ní quide-gã.

16 Núu xiãⁿ tàú-ó sã nchóó nĩ yuhu ni iní-ó cáháⁿ ndihi-o Yã Ndiõxí Yãã ìo cundahú iní ñãhá xii-o chindee ñãha-gã, te ducaⁿ càda-o te cundahú iní ñãhá-gã chindee ñãha-gã xii-o ndèda-ni càa oré xini ñũhu-o-gã.

5

1 Te nchaa cue dútú cùnũu núú ñãyi-u isrãél diu-ni ñãyi-u cùu-güedé, te ducaⁿ nĩ ngũndecu-güedé cuendã cada-güedé chiũⁿ sã cúú-xí Yã Ndiõxí cuendã-yu, chi diu cue téé-ãⁿ ní xóo nacani cuendã-güedé núú-gã quiti ní xóo cahni-güedé ní xóo nduu táhũ-gã, te ducaⁿ ní xóo cada-güedé cuendã sã cádá cãhnu iní Yã Ndiõxí cuéchi-yu, te ducaⁿ ní xóo nacani cuendã tucu-güedé núú-gã nchaa dava-gã sã ní xóo nihí-güedé ní xóo nduu táhũ-gã.

2 Te nchaa cue dútú-ãⁿ ní xóo cundee iní-güedé nchaa sã ní xóo cada nchaa ñãyi-u

ñá túú ní quide ndáá ñáiyu ñá túú cùtnuní iní-xi, te ducaⁿ ní xóo cada cue dútú-áⁿ chi tnáhá-güedé ñá túú ní xóo níhi ndéé-güedé cundecu-güedé cuendá nchaa sá ní xóo yáha-güedé.

³ Te sá cuendá sá dúcáⁿ ñá túú ní xóo níhi ndéé-güedé nüu xiáⁿ dai ní xini ñuhu-xi sá tnáhá-güedé cuáha-güedé Yá Ndióxi sá ndúú tǎhú-gǎ cuendá mée-güedé datná quidé-güedé cuendá ñáiyu.

⁴ Te ni ñⁿ tée vá ndácú-dě cuu-dé dútú cúnúu cuendá-ni sá cǎchí iní mée-dě te núu ñá díú mée Yá Ndióxi ducaⁿ cuini-gǎ sá cúú-dě dútú cúnúu datná ní quide-gǎ ndíi Áron.

⁵ Te cuéi Xítoho Jesucristú chi ñá díú mée-gǎ ní quide-gǎ mée-gǎ ñⁿ dútú cúnúu nacuaa cada ñinu-gǎ mée-gǎ, chi mee Tǎtá-gǎ Dútú Ndióxi ducaⁿ ní cǎchí-gǎ sá cúú-gǎ Dútú cúnúu, te ducaⁿ chi Yá Ndióxi ní xáhaⁿ-gǎ:

Yòhó cúú-n Dēhe-í,

te cuini-í sá dúhá-ní cundecu-n núu ndécú-í. Duha ní xáhaⁿ-gǎ xii Xítoho Jesucristú.

⁶ Te núú tütú Yá Ndióxi yódó tnúni nàcuáa ní xáhaⁿ tucu-gǎ xii Xítoho Jesucristú, te duha ní xáhaⁿ-gǎ:

Yòhó cúú-n dütú cundecu ni caa ni quíhⁿ, te cùu-n datná ní cuu ndíi Melquisédéc.

Duha ní xáhaⁿ-gǎ xii Xítoho Jesucristú.

⁷ Te cúnàhá ní xíndecu Xítoho Jesucristú ñuyíú-a te níhi ní xóo cǎháⁿ ndíhi-gǎ Yá Ndióxi te ní xóo cǎháⁿ ndáhú-gǎ núú-gǎ, te ní xóo ndáhyú-gǎ órē ducaⁿ ní xóo cǎháⁿ ndíhi-gǎ Yá Ndióxi, te ducaⁿ ní quide-gǎ chí náha-gǎ sá Yá Ndióxi cúú-gǎ Yá ndacu dácácu ñihnu ñaha xii-gǎ cuendá sá vá cúú dúcáⁿ-gǎ. Te Yá Ndióxi ní xíndedóho-gǎ nchaa tnúhu ní cǎháⁿ Xítoho Jesucristú cuendá sá ní quide-gǎ nchaa nàcuáa ní xáhaⁿ Yá Ndióxi cada-gǎ.

⁸ Te sá cuendá nchaa sá ní ndoho Xítoho Jesucristú xiáⁿ ní cutnúni iní-gǎ cada-gǎ nchaa dava-gǎ sá váha nàcuáa cuini mée Yá Ndióxi cada-gǎ. Te ducaⁿ ní cuu cuéi cùu-gǎ Déhe Yá Ndióxi.

⁹ Te sá dúcáⁿ ní quide-gǎ nchaa nàcuáa cuini mée Yá Ndióxi, xiáⁿ núu vitna cùu-gǎ Yá dácácu ñihnu nchaa ñáiyu sándáá iní ñáhá xii-gǎ núú ùhú núú ndáhú.

¹⁰ Te mee Yá Ndióxi ní cǎchí-gǎ sá Xítoho Jesucristú cúú-gǎ dütú cúnúu datná ní cunuu ndíi Melquisédéc cúnàhá ní cuu ndíi dütú ñuyíú-a.

Cuendá ñáiyu cuini daña ñihnu ichi Yá Ndióxi

¹¹ Te vai-gǎ tnúhu ndècu cǎháⁿ-í nàcuáa ndúu cuendá Xítoho Jesucristú, ndíhi ndíi Melquisédéc, te dicó-ni sá nchóhó ío cuéé tēcú tnúni-ndó, te yúhú ío ùhú níhi-í nàcuáa cǎháⁿ-í nàcuáa tecú tnúni-ndó.

¹² Te nchóhó sa ní cuu cuéhé nduu ndècu-ndo ichi Xítoho Jesucristú, te tǎú-ndó dānehé-ndó cué ñáiyu ndècu ichi-gǎ tnúhu-gǎ núu dicó sá cúú, dico xini ñuhu-ni-xi sá cundècu ñáiyu danèhé ñáhá tnúhu-gǎ xii-ndo, tnúhu sá ní dácúhá-ndó ndéé díhna sá ñá túú ùhú tecú tnúni-ndó. Te sá dúcáⁿ quide-ndo núu xiáⁿ cúú-ndó datná cue landú vitna sàdi camá, landú vǎtá cúú-gǎ caxi dítá.

¹³ Chi nchaa ñáiyu cùu datná landú vitna sàdi, ñáiyu-áⁿ cúú nēñuú-yu ñá túú cùtnuní iní-yu nàcuáa cǎháⁿ tnúhu sá cǎháⁿ nàcuáa cada ndáá-yu cundecu-yu.

¹⁴ Te nchaa sá vǎtá cúú-gǎ caxi cue landú yíquⁿ xiáⁿ cúú-xi cuendá cue ñáiyu sacuéhé, te xiáⁿ cúú-xi datná tnúhu sá dácúaha ñáiyu sa ní níhi ndéé ndècu ichi-gǎ, ñáiyu sa ní cutnúni váha iní-xi nándi cùu nchaa sá cuéhé sá dúhá, ndíhi nándi cùu nchaa sá váha.

6

¹ Te xiáⁿ núu vitna xini ñuhu-xi dacuaha-o dava-gǎ tnúhu Yá Ndióxi cuendá ducaⁿ te cuu-o ñáiyu tēcú tnúni nchaa tnúhu-gǎ. Te xini ñuhu-xi sá ncháá tnúhu Xítoho Jesucristú sá ní dácúhá-ó ndéé díhna vá dácúhá-gǎ-ó datná ní dácúhá-ó chi sa tēcú tnúni-ó. Te ñá túú-gǎ xini ñuhu-xi dacuaha-o datná ní dácúhá-ó ndéé díhna nàcuáa cada-o ndíxi cuéchi iní-ó cuendá nchaa sá cuéhé sá dúhá quide-o, sá tá dácúita ñihnu ñaha xii-o cuáháⁿ ní cùu. Te ducaⁿ vá dácúaha-gǎ tucu-o datná ní dácúhá-ó ndéé díhna nàcuáa cada-o quindáá iní-ó Yá Ndióxi,

² ndíhi cuendá nàcuáa ní dácúhá-ó nàcuáa cuandute-o, ndíhi cuendá nàcuáa cada-o cǎcáⁿ ndodo-o ndáha-o díquí ñáiyu ní sándáá iní ñáhá xii-gǎ. Te ducaⁿ ñá túú-gǎ xini ñuhu tucu-xi dacuaha-o datná ní dácúhá-ó ndéé díhna cuendá nàcuáa ndoto cue ñáiyu ní xíhi, ndíhi cuendá nàcuáa ní dácúhá-ó sá Yá Ndióxi daquihíⁿ-gǎ ñáiyu núú ùhú núú ndáhú ní caa ni quíhⁿ.

³ Te núu Yá Ndióxi ná cǎchí-gǎ, te cuita dacuaha-gǎ-ó ncháa dava-gǎ tnúhu sá cúmǎni quíhⁿ.

⁴ Te cue ñáiyu sa tēcú tnúni tnúhu Yá Ndióxi, ñáiyu sa xini nchaa nàcuáa ndúu nchaa sá váha quide ñaha Yá Ndióxi xii-o ndíhi-yu, ñáiyu sa chĩndee ñaha Espíritú Yá Ndióxi,

⁵ ñáiyu sa cùtnuní iní-xi sá ío váha tnúhu Yá Ndióxi, ñáiyu sa xini nàcuáa ta quide Yá Ndióxi véxi nchaa sá vá yóo tnáhí ndàcu cada,

⁶ te núu ñáiyu-áⁿ ná ngüita tucu-yu daquèe tǎhú duúⁿ-yu tnúhu Yá Ndióxi, te vá ndácú-gǎ-ó nà canu ichi-ó-yu nàcuáa ndíxi cuéchi iní-yu te núu ducaⁿ na cǎdá-yu, te sá dúcáⁿ ná cǎdá-yu te tnáhá-yu cùu-yu datná

cue téé ní sahní ñaha xii Xítóhó Jesucristú Déhe Yá Ndióxi núú cùrúxi. Te sá dúcáⁿ ná càdá-yu te ngóo dava-gá ñáyiú cáháⁿ cuèhé-yu cuèndá Xítóhó Jesucristú.

⁷ Te nchaa ñáyiú cùú-yu dàtná ñuhu, chi ñuhu-án ndi tnahá óré cùúⁿ dáu te xihí-xi ndute, te dava ñuhu váha cùú sá xítú ñáyiú, te sá cùú núú ñuhu-ánⁿ ño nándíhi-xi, te mee Yá Ndióxi quidé-gá cùú sá váha núú ñúhú-ánⁿ.

⁸ Dico núú da iñu na ndaa núú ñuhu-án te ñá túú védana nándíhi-xi te núú ducaⁿ, te Yá Ndióxi vá cùú váha iní-gá cuèndá ñuhu-án sá dúcáⁿ dà iñu ndaa núú-xi, te iñu-ánⁿ ndíhi-xi cáyú. Te ducaⁿ sátnahá-xi cùú ñáyiú dàquee tñhú tñuhu Yá Ndióxi chi ñá túú cùú váha iní-gá núú-yu.

Ñíhí-ó sá ndétú-ó ndiúu táhú-ó

⁹ Te cuéi duha cáháⁿ-í dico nchòhó cue ñáyiú ío cùú iní-í, chi cùtnuní ndáá iní-í sá vá càdá-ndó dàtná Xiquide dava-gá ñáyiú, te mee-ni sá váha cuu xii-ndo chi cùu-ndo ñáyiú sa ní naníhí tãhú.

¹⁰ Te ducaⁿ chi Yá Ndióxi cùú-gá Yaá ío váha quide ndáá, te vá dáná ndòdo iní-gá nchaa sá váha quide-ndo, te ní vá dáná ndòdo iní-gá nacuáa quide-ndo cuu iní-ndó-gá, te sá dúcáⁿ quide-ndo cuu iní-ndó-gá xiáⁿ chindèe-ndo cue ñáyiú ndécú ndíhi-ndo ichi Xítóhó Jesucristú, te ducaⁿ-ni ta quide-ndo véxi ndéé vitna.

¹¹ Te cuiní-í sá ñíⁿ ñíⁿ-ndo nducu ndee-ndo cada-ndo nacuáa cuiní Yá Ndióxi dàtná tá quide-ndo véxi, te ñíu-ni ducaⁿ càda-ndo ndéé ná sàá nduu ndiúu táhú-ndó cùndecu-ndo ndíhi-gá núú ndécú-gá, te ducaⁿ te níhí-ndó nchãandi tñhú sá ndétú-ndó ndiúu táhú-ndó cùndecu ndíhi-ndo ní caa ní quíhíⁿ.

¹² Te yúhú cuiní-í sá nchòhó vá tühío-ndo càda-ndo nchaa nacuáa cuiní Yá Ndióxi, te cada-ndo dàtná quidé ñáyiú sàndáá iní tñuhu-gá, ñáyiú càhnu iní-xi. Te sá dúcáⁿ quidé-yu xiáⁿ nihí-yu nchaa sá ní cachí Yá Ndióxi nduu táhú-yu.

¹³ Te cùtnahá ní xáhaⁿ Yá Ndióxi xii ndíi Àbrahám nacuáa cada-gá, te ní cacunehe-gá méé-gá nacuáa cutnùní iní ndíi sá ndáá cada-gá nacuáa ní xáhaⁿ-gá xii ndíi, te vá yóo ñíⁿ ní cacunehe-gá cuèndá sá quindáá iní ndíi tñuhu ní cáháⁿ-gá. Te ducaⁿ ní quide-gá chi ñíⁿ díi-ni mee-gá ío cùnuu-gá.

¹⁴ Te duha ní xáhaⁿ-gá xii ndíi Àbrahám: “Yòhó té Àbrahám na càchí tñuhu ndáá-í xii-n sá ío chindee ñaha-í xii-n, te cáyá cuéhé víhí ñàní tñahá-n”, duha ní xáhaⁿ-gá xii ndíi.

¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndióxi ní quide-gá nacuáa ní xáhaⁿ-gá cada-gá sá cùú-xí ndíi.

¹⁶ Te núú ñíⁿ ñáyiú cáháⁿ ñíⁿ tñuhu ndáá cuiti te càcu nehé-yu Yá Ndióxi cuèndá quindáá iní tñaha ñáyiú-yu tñuhu cáháⁿ-yu, te óré ducaⁿ na cáháⁿ-yu te ñá túú-gá sá dácáa ñáyiú cáháⁿ ndíhi-yu cuèndú.

¹⁷ Te ducaⁿ ní quide Yá Ndióxi ní cáháⁿ ndáá-gá sá càdá-gá nacuáa ní cachí-gá, te ducaⁿ ní cáháⁿ-gá cuèndá nchaa ñáyiú ní cachí-gá nduu táhú sá càdá-gá nacuáa cutnùní iní-yu sá quidé-gá ñíⁿ sá cáháⁿ-gá, te ní ñá túú nadáma-gá ñíⁿ sá cáháⁿ-gá.

¹⁸ Te nchoo ní natuha-o Yá Ndióxi cuèndá dácácu nihnu ñaha-gá xii-o núú ùhú núú ndáhú, te ní níhí-ó tñuhu ndee iní ndécú ndíhi-o cuèndá sá vá dàñá ndee-ó cùndetu-o sáá nduu ndiúu táhú-ó cùndecu-o ndíhi-gá. Te ducaⁿ ní níhí-ó tñuhu ndee iní chi Yá Ndióxi ní cáháⁿ ndáá-gá sá càdá-gá nacuáa ní cachí-gá, te ñá túú dàndahú ñahá-gá, te ní ñá túú nadáma-gá ñíⁿ sá ní cachí-gá cada-gá.

¹⁹ Te tñuhu ndee iní ndécú ndíhi-o xiáⁿ quidé-xí cùtnuní ndáá iní-ó sá ndúú táhú-ó cùndecu-o ndíhi Yá Ndióxi núú ndécú-gá, te ducaⁿ cùtnuní ndáá ndisa iní-ó sá cuèndá Xítóhó Jesucristú Yaá ndécú núú Yá Ndióxi.

²⁰ Te ducaⁿ ní nucúndecu Xítóhó Jesucristú núú Yá Ndióxi cuèndá ducaⁿ cànchicúⁿ nihnu-o càda-o, te ducaⁿ ní nucúndecu-gá núú Yá Ndióxi chi cùu-gá dútú cùnùu datná ní cunuú ndíi Melquisèdec ñuyú-a, te ducaⁿ-ni cùu-gá dútú cùnùu ní caa ní quíhíⁿ.

7

Xítóhó Jesucristú cùú-gá dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiú ñúú Sàlém, te ní cuu ndíi dútú ní xinu cuechi ndíi núú Dútú Ndióxi Yaá ío cùnuu. Te ndíi Melquisèdec-ánⁿ ní xicáⁿ táhú ndíi núú Yá Ndióxi cuèndá ndíi Àbrahám cùtnahá ní sáháⁿ ndíi Àbrahám-ánⁿ ní nàá ndíi ndíhi cue dava-gá cue téé yíndaha ñáyiú. Te cue téé-ánⁿ ñá túú ní ndacu-güedé nàá-güedé ndíhi ndíi Àbrahám-ánⁿ chi ní xita-güedé.

² Te nchaa sá ní níhí ndíi Àbrahám-ánⁿ núú ní nàá ndíi, te ní quide ndíi ùxí xichi te ñíⁿ xichi núú ùxí-ánⁿ ní sáñaha ndíi xii ndíi Melquisèdec. Te ñíu ndíi Melquisèdec-ánⁿ quée-xí: Téé ío váha quide ndáá yíndaha ñaha xii ñáyiú, duha quèe-xi. Te ní xóo danàni ñahá-yu xii ndíi Téé yíndaha ñúú Sàlém, duha ní xóo danàni ñahá-yu. Te tñuhu Sàlém-ánⁿ quée-xí: Ñúú ndécú nàhi, duha quèe-xi tñuhu-ánⁿ. Núú xiáⁿ quée tucu-xi nacuáa nàni ndíi Téé yíndaha ñúú ndécú nàhi, duha quèe tucu-xi ñíu ndíi.

³ Te ñá túú tñuhu núú yoo cùú tátá ndíi ndíhi náná ndíi, te ní ñá túú tñuhu núú yoo cùú xíí ndíi ndíhi xítná ndíi, te ní ñá túú tñuhu núú nándi cùú ñáyiú ní cuu ñàní tñahá

ndii ní xíndecu ndéé sanaha-gã, te ni ñà túú tnúhu núu ná ama ní cacu ndii, te ni ñà túú tnúhu núu ná ama ní xihí ndii. Te ndii-án ducaⁿ-ni ní cuu ndii dútú ní xíndecu ndii, te ducaⁿ sátnahá-xi cùu Xítóhó Jesucristú déhe Yá Ndióxi chi cuu-gá dútú ní caa ni quíhíⁿ.

⁴ Te vitna chí cuáha váha cuendá sá ndii Melquisédéc ní cuu ndii ⁱⁱ tée ío ní cuu càhnu ní xíndecu ñuyíú-a, chi ndii Àbrahám tée ní cuu ñani tnáhá-ó ní xíndecu ndéé sanaha ní quide ndii úxi xichi nchaa sá ní níhí ndii núu ní nàa ndii. Te ⁱⁱ xichi núu úxi-án ní sáñaha ndii xii ndii Melquisédéc.

⁵ Te ndii Moisés ní chíóo tnùnii ndii nàcuáa cada nchaa dútú, cue tée ní cuu ñani tnáhá ndii Lévi sá cuè tée-án queheⁿ-güedé ⁱⁱ xichi núu úxi xichi sá níhí cue ñáyiu isráèl ñáyiu cùu ñani tnáhá-güedé cuu cuendá-güedé. Te ducaⁿ quide-güedé cuèi ñani tnáhá-güedé ndihí-yu ní cuu ndii Àbrahám.

⁶ Te cuèi ñá díú ñani tnáhá ndii Melquisédéc cúu ndii Àbrahám dico ní queheⁿ ndii Melquisédéc-án ⁱⁱ xichi núu úxi xichi nchaa sá ní níhí ndii Àbrahám. Te ndii Melquisédéc-án ní xicáⁿ táhú ndii núu Yá Ndióxi cuendá ndii Àbrahám. Te diu-ni ndii Àbrahám-án ní xáhaⁿ Yá Ndióxi xii ndii sá cada váha ñaha-gã xii ndii.

⁷ Te sa cùtnuní iní-ó sá núu ⁱⁱ tée na càcáⁿ táhú-dé núu Yá Ndióxi cuendá ⁱⁱ ñáyiu, te tée-án cùnùu-gá-dé.

⁸ Te cue dútú ñáyiu isráèl quehéⁿ-güedé ⁱⁱ xichi núu úxi xichi nchaa sá níhí-yu cùu cuendá-güedé, te cue tée-án cuú-güedé. Te núu tütú Yá Ndióxi càchí-xi sá ndii Melquisédéc ndécú-ní ndii, te ducaⁿ càháⁿ-xi chí ñá túú tnúhu sá ní xihí ndii.

⁹⁻¹⁰ Te sá dúcáⁿ ní sáñaha ndii Àbrahám sá ní nduu táhú ndii Melquisédéc, te xiáⁿ cada iní-ó sá sá ndecu ndihí ndii Àbrahám cue ñani tnáhá ndii Lévi cue tée cùu dútú, cue tée queheⁿ ⁱⁱ xichi núu úxi xichi nchaa sá níhí ñáyiu isráèl cuèi vátá cáci-gã-güedé. Te cada iní-ó sá tnáhá-güedé ní sáha-güedé ndii Melquisédéc ⁱⁱ xichi núu úxi xichi nchaa sá ní níhí ndii Àbrahám núu ní nàa ndii. Te ducaⁿ cada iní-ó chí cue tée-án cuú-güedé ñani tnáhá ndii Àbrahám cuèi vátá cáci-gã-güedé dáva-án.

¹¹ Te sá cuendá cue dútú cue tée cùu ñani tnáhá ndii Lévi ní ngúndecu ndihí cue ñáyiu isráèl tnúhu sá sánú ichi ñaha xii-yu nàcuáa cada-yu cundecú-yu. Te ñani tnáhá ndii Àrón cúu cuè dútú-án. Te núu dico cue dútú-án ní ndàcu-güedé cada-güedé nàcuáa cudüu ñáyiu isráèl núu Yá Ndióxi, te ñá túú-gã xini ñuhu-xi ngúndecu ingá dútú dàtná ndii Melquisédéc ní cùu. Te dútú-án ñá túú ní cùu-dé dàtná ní cuu cue ñani tnáhá ndii Àrón.

¹² Te núu cuè dútú cue tée cùu ñani tnáhá ndii Lévi-án ní ngúndecu ingá dútú. Te sá dúcáⁿ ní ngúndecu ingá dútú xiáⁿ dacuítí ní xini ñuhu-xi sá dáma nàcuáa nduu tnúhu sá sánú ichi ñaha xii-yu nàcuáa cada-yu cundecú-yu.

¹³⁻¹⁴ Te diu-ni cuendá dútú-án sa níhí-ó tnúhu, te dútú-án cúu Xítóhó Jesucristú, te ñá díú ñani tnáhá ndii Àrón cúu-gã chí ñani tnáhá ndii Jüdá cúu-gã. Te nchaa-o tà xini ndáá-ó sá ñani tnáhá ndii Jüdá cúu-gã, te ndii Moisés ñá túú tnáhí ná ní càchí ndii cuendá cue ñani tnáhá ndii Jüdá sá cúu-güedé dútú, chí ni ⁱⁱ-güedé ñá túú ní cùu-güedé dútú ní cùu.

¹⁵ Te vitna cùtnuní ndáá iní-ó nàcuáa ní cuu, chí Xítóhó Jesucristú cúu-gã ingá dútú dàtná ní cuu ndii Melquisédéc.

¹⁶ Te ñá díú cuendá tnúhu sá sánú ichi ñaha xii ñáyiu nàcuáa cada-yu cundecú-yu ducaⁿ ní cùu-gã dútú, chí ni cuu-gã dútú cuendá sá cúu-gã Yáa cundecu ni caa ni quíhíⁿ chí vá ⁱⁱ nduu te ndihí nihnu-gã.

¹⁷ Te duha ní xáhaⁿ Yá Ndióxi xii-gá:

Yòhó cúu-n dütú dàtná ní cuu ndii Melquisédéc,

te cundecu-n nchaa nduu nchaa quíú.

Duha ní xáhaⁿ Yá Ndióxi xii-gá.

¹⁸ Te xiáⁿ núu nchaa tnúhu ndéé díhna, tnúhu sá ní xíndecu ndihí cue dútú ñá túú-gã cùnùu-xi vitna chí ñá túú-gã xini ñuhu-xi te ní ñá túú ná chindée ñaha-xi.

¹⁹ Te diu-ni tnúhu-án cúu-xi tnúhu sá ní chíóo tnùnii ndii Moisés canu ichi ñaha xii ñáyiu nàcuáa cada-yu cundecú-yu. Te tnúhu-án ñá túú vèdana ní quide-xi nàcuáa chindee-xi ñáyiu cudüu-yu núu Yá Ndióxi. Dico vitna ní ngúndecu ndihí-o tnúhu ndee iní sá ío-gã váha dàcütúxi tnúhu ndéé díhna, chí ndecu ndihí-o Xítóhó Jesucristú Yáa cúu dútú-ó. Te Yáa-án quidé-gã tnáhá tnúhu-o ndihí Yá Ndióxi vitna.

²⁰ Te Yá Ndióxi ní càháⁿ ndáá cuiti-gã sá Xítóhó Jesucristú cuu-gá dútú.

²¹ Dico ñá túú dùcaⁿ ní càháⁿ-gã cuendá cue ñani tnáhá ndii Lévi cue tée ní cuu dútú, cuèi mei órè ní chisaha-güedé ní cuu-güedé dútú. Te cùtnàhá ní chisaha Xítóhó Jesucristú cúu-gã dútú, te Yá Ndióxi ní xáhaⁿ ndáá cuiti-gã xii-gã, te duha ní xáhaⁿ-gã:

Yúhú Dütú Ndióxi càháⁿ ndáá cuiti-í te vá dàmá-í tnúhu càháⁿ-í:

“Yòhó cúu-n dütú dàtná ndii Melquisédéc,

te cundecu-n ni caa ni quíhíⁿ.”

Duha ní xáhaⁿ Yá Ndióxi xii Xítóhó Jesucristú.

²² Te Xítóhó Jesucristú quidé-gã nàcuáa cùtnuní ndáá iní-ó sá Yá Ndióxi cada-gã ingá núu sá váha sá cúu-xi-ó dàtná ní cachí-gã, te

xiãⁿ cúu-xí sã ão-gã váha dácúúxí tnúhu ní cáháⁿ-gã ndéé díhna.

²³ Te ão cuéhé cue ñani tnáhã ndíi Lèví ní cuu-güedé dútú, te ducaⁿ cuendã sã ñã túú ní cüdíi-güedé cundecu-güedé chi ní ndíi-güedé ní xihí.

²⁴ Dico Xítóhó Jesucristú chi vá cùu-gã, chi cundecu-gã ni caa ni quíhíⁿ núu xiãⁿ ñiu-ni-gã cuu-gã dútú, te vá yõo ñⁿ-gã cuu dútú cada núu-gã.

²⁵ Te núu xiãⁿ Xítóhó Jesucristú dácãcu nihnu ñaha-gã xii nchoo ñãyiú núú ùhú núú ndáhú, nchoo ñãyiú sãndaá ñi ñáhã xii-gã, te ñiu-ni nchoo cùu-o ñãyiú tnáhã tnúhu ndíi Yã Ndiõxí, te vá ñⁿ ndüu-gã te cuíta nihnu-o. Te ducaⁿ chi Xítóhó Jesucristú ñã túú xõcuíñi-gã núú Yã Ndiõxí cáháⁿ ndáhú-gã cuendã-ó.

²⁶ Te Xítóhó Jesucristú cúu-gã Yaá cúú dütú cúnúu xini ñuhu-o cundecu ndíi-o, te ñiu-gã cúu-gã Yaá chindéé chitúu ñaha xii-o, te cùu-gã Yaá ão quidé ndãã núú Yã Ndiõxí, te cùu-gã Yaá cándõo canine chi ñã túú tnáhí cuéchi-gã. Te ñã túú tnáhí quidé-gã dàtnã quidé ncháa cue ñãyiú ndecu ichi cuéhé ichi duha, te cùu-gã Yaá ní nacúndecu andíu núú ndécú Yã Ndiõxí te yãcã táxí tnùní-gã.

²⁷ Te ñã túú quidé-gã dàtnã ní quide cue dütú ní cunuu ní xindecu, chi cue dütú-ãⁿ ñⁿ nduu ñⁿ nduu ní xõo cahni-güedé quiti ní xõo nduu táhú Yã Ndiõxí, te díhna-gã cuendã ncháa cuéchi mee-güedé ducaⁿ ní xõo cada-güedé te dàtnúni ducaⁿ ní xõo cada tucu-güedé cuendã ncháa cuéchi ñãyiú. Dico Xítóhó Jesucristú chi ñⁿ xito-ni ní xihí-gã sã cúu-xí ncháa ñãyiú chi ducaⁿ ní sani ñi-gã, te vá ñⁿ ndüu-gã ducaⁿ càda tucu-gã.

²⁸ Te sã cuendã ncháa tnúhu ní chidó tnùní ndíi Moisés xiãⁿ ní xindecu cue téé ní cuu dütú cúnúu, te cue téé-ãⁿ ní cuu-güedé cue téé yíca cuéchi-xi. Te sátã dúcãⁿ ní chidó tnùní ndíi Moisés nacúãa cada ñãyiú, te ní xica cuéhé víhí ndüu te dàtnùní ní cáháⁿ ndãã cuiti Yã Ndiõxí sã Dêhe-gã cuu-gã dütú cúnúu. Te Yaá cúú Dêhe-gã-ãⁿ ní quide-gã ncháa nacúãa tàú-xi cunduu, te ñiu-ni ducaⁿ càda-gã ni caa ni quíhíⁿ.

8

Xítóhó Jesucristú cúu-gã dütú cúnúu

¹ Te Xítóhó Jesucristú Yaá cúú dütú cúnúu ndecu ndíi-o cuãnda-gã andíu, te ní ngõo-gã xio cùha Dütú Ndiõxí Yaá ão cúnúu, te tnáhã-gã cúnúu-gã. Te ñiu cuendã-a cùu-xi sã ão-gã cúnúu ta cáháⁿ-ndí véxi.

² Te núú ndécú Yã Ndiõxí cúu-xí núú ñi víhí. Te cada ñi-ó sã cúu-xí ñⁿ vehe te xiãⁿ ndécú Xítóhó Jesucristú cúu-gã dütú, te vehe-ãⁿ ní dácãã mèe Yã Ndiõxí te ñã díú cué téé ñuyíú-a.

³ Te sã cuendã ncháa tnúhu ní chidó tnùní ndíi Moisés xiãⁿ ní xindecu cue dütú cúnúu cuendã sã cáhni-güedé quiti nduu táhú Yã Ndiõxí, te nacani cuendã-güedé núú-gã ncháa daga-gã sã ñihí-güedé nduu táhú-gã. Te xiãⁿ núu dai ní xini ñuhu-xi sã tnáhã Xítóhó Jesucristú cuãñaha-gã ñⁿ sã ndúú táhú Yã Ndiõxí, te táhú-ãⁿ cúu-xí mèe-gã chi ní xihí-gã ní cuu-gã dàtnã ñⁿ táhú sã cúu-xí Yã Ndiõxí.

⁴ Te núu ní xindecu-ni Xítóhó Jesucristú ñuyíú-a te vá cúu-gã dütú ní cùu, chi sa ndecu cue dütú sãñaha ncháa sã ndúú táhú Yã Ndiõxí dàtnã cáháⁿ ncháa tnúhu ní chidó tnùní ndíi Moisés.

⁵ Te ncháa sã quidé cué dütú ñãyiú isràél nùtnahã-xi luha ncháa sã quidé Xítóhó Jesucristú Yaá cúú dütú cúnúu ndecu andíu. Te quèe ndãã-xi nacúãa ní xáhaⁿ Yã Ndiõxí xii ndíi Moisés cùtnahã tá cùyatni ngüita ndíi dacãa ndíi vehe-gã, te duha ní xáhaⁿ-gã: “Ío váha cada cuendã-n nacúãa dacãa-n vehe-í dàtnã cáã sã ní dánèhè ñáhã-í xii-n xití yucu”, duha ní xáhaⁿ-gã xii ndíi.

⁶ Dico vitna chi Xítóhó Jesucristú cúu-gã dütú cúnúu, te ão-gã cáhnu nduu chiuⁿ quide-gã dácúúxí cué dütú cue ñãyiú isràél. Te ñiu Xítóhó Jesucristú cúu-gã Yaá quidé tnáhã tnúhu-o ndíi Yã Ndiõxí, te ducaⁿ chi Yã Ndiõxí ão-gã váha ndüu tnúhu ní cáháⁿ-gã xito cùu uú dácúúxí tnúhu ní cáháⁿ-gã ndéé díhna, te ducaⁿ ão váha ndüu tnúhu ní cáháⁿ-gã xito cùu uú chi ní cachí-gã sã ñngã núú sã ão-gã váha cada ñaha-gã xii-o vitna.

⁷ Te núu nacúãa ní cachí Yã Ndiõxí cada ñaha-gã xii-o ndéé díhna ní quide-xi ncháa nacúãa tàú-xi cunduu nacúãa nduu táhú-ó cundecu váha-o núu-gã ñã, te ñã túú xini ñuhu-xi cáháⁿ tucu-gã sã cáda-gã ñngã núú sã váha sã cúu-xí-ó vitna ní cuu.

⁸ Te Yã Ndiõxí ñã túú ní cùu váha ñi-gã núú ñãyiú isràél núu xiãⁿ ní cáháⁿ-gã cuendã-yu, te duha ní cachí-gã: Yúhú cúu-í Dütú Ndiõxí, te duha ndüu tnúhu na cáháⁿ-í: Sáã nduu te cada-í ñngã núú sã váha sã cúu-xí cué ñani tnáhã ñãyiú isràél, ndíi cue ñani tnáhã ndíi Júdã ñiu-ni ñãyiú isràél.

⁹ Te tnúhu sã cáháⁿ-í-a ñã túú ñⁿ-ni cuu-xi ndíi tnúhu sã ní xáhaⁿ-í xii cue ñãyiú ní cuu ñani tnáhã-yu ní xindecu ndéé sanaha càda-í-yu,

te ñiu-ni dàvá-ãⁿ ní quide yica-í ní ndeñuhu-í-yu nacìõⁿ Ègíptú,

te ñã túú ní cuini-yu tñi-yu tnúhu ní xáhaⁿ-í xii-yu cuendã ducaⁿ càda váha-í-yu,

te xiãⁿ núu ní dàñã nihnu-í-yu ñã túú-gã ní quide cuendã-í-yu.

¹⁰ Te na sãã nduu te duha ndüu tucu ñngã núú sã váha cada-í cue ñãyiú isràél.

Te yúhú cada-í nàcuáa cutnùnì váha iní-yu
nàcuáa cuñn-í cada-yu,

te ducaⁿ nì yuhu nì iní-yu cada-yu.

Te yúhú Yá Ndiòxí quindaha-í-yu,

te meé-yu cuú-yu ñáyiú cùu cuendá-í.

¹¹ Te dává-áⁿ chí nì ñáyiú cùu ndi meé-yu,

te nì cué dává-gá ñáyiú vá cùtnùhu tñahá-yu
sá nátùha ñahá-yu xii-í,

chì dává-áⁿ nchaa ñáyiú cundecu ndihi
ñahá-yu xii-í,

cuéi ñáyiú cùnuu te cuéi ñáyiú ñá túú cùnuu.

¹² Te dává-áⁿ cada càhnu iní-í nchaa sá cuéhé
sá dúhá quidé-yu,

te vá ñⁿ ndùu-gá ndacu iní-í nchaa sá
quidé-yu.

Duha nì cachí Yá Ndiòxí cuendá ñáyiú isràél.

¹³ Te sá dúcáⁿ nì cáháⁿ Yá Ndiòxí sá cadá-gá
ingá núú sá váha sá cúú-xí ñáyiú xiáⁿ cùtnùnì
sá tñùhu sá nì cáháⁿ-gá díhna ñá túú-gá xínì
ñùhu-xi. Te cada iní-ó sá tñùhu-áⁿ cúú-xí ñⁿ
sá nì cunaha ndècu te ñá túú-gá nándíhi-xi te
cuíta-ná-xi, ducaⁿ sátnahá-xi cùu tñùhu sá nì
cáháⁿ-gá ndéé díhna.

9

Cuendá vehe Yá Ndiòxí

¹ Te tñùhu sá nì cáháⁿ Yá Ndiòxí ndéé
díhna cùu-xi cuendá nàcuáa cada ñáyiú is-
ràél chifñuhu ñahá-yu xii-gá, ndihi cuendá
vehe-gá caa ñuyúú-a.

² Te ñáyiú isràél ní dácáa-yu vehe Yá
Ndiòxí, te vehe-áⁿ nì cuu-xi vehe dóó te
ní xúhuⁿ nehu xití-xi. Te cuartú díhna ní
xínani-xi cuartú ní cuu íí, te xiáⁿ nì xíndecu
ñⁿ sá ndéé dité-xi sá nì cándodó ñⁿ caa candíl
núú dité-xi, te ní xínutnñⁿ ñⁿ mèsá ní xóo códó
páá ní xóo nduu táhú Yá Ndiòxí.

³ Te cuartú cúú úú ní xínani-xi cuartú ní
cuu íí víhi-gá.

⁴ Te xití cuartú-áⁿ nì xínutnñⁿ ñⁿ sá ní
cuáha mee-ni díhúⁿ cuááⁿ te núú xiáⁿ ní xóo
cahmi-güedé dúsa sá saháⁿ tnámì. Te ñⁿ-ni
xiáⁿ nì xíndecu tucu ñⁿ cájá ní cuu mee-ni
díhúⁿ cuááⁿ te xití cájá-áⁿ ní xúhuⁿ ñⁿ lítu ní
cuáha mee-ni díhúⁿ cuááⁿ, te xití lítu-áⁿ ní
xúhuⁿ mànáá sá ní xóo caxi-yu dává-áⁿ. Te
ñⁿ-ni xití cájá-áⁿ ní xúhuⁿ tñudì ndí Àrón sá
ní saa itá-xi, ndihi yúú sá ní xíndé tñùhu ní
cáháⁿ Yá Ndiòxí nàcuáa cada ñáyiú. Te duha
ní xínani cájá-áⁿ: Cájá sá ñùhú tñùhu ní cáháⁿ
Yá Ndiòxí sá cúú-xí ñáyiú, duha ní xínani-xi.

⁵ Te núú cájá-áⁿ ní cándodó úú tñahá sá ní
cadúha-yu, te xiáⁿ cáá-xí dàtná cáá espíritú
xínú cuéchi núú Yá Ndiòxí. Te cuendá úú xiáⁿ
ní cutnùnì iní-yu sá ío càhnu cuu Yá Ndiòxí,
te sá ní cadúha-yu-áⁿ ndéé ndíxiⁿ-xi, te
ndíxiⁿ-xi-áⁿ dàhu-xi xio xio núú quidé càhnu
iní Yá Ndiòxí nchaa yicá cuéchi ñáyiú, dico
vá cúú-gá cáháⁿ-í cuendá nchaa dává-gá xiáⁿ
vitna.

⁶ Te nchaa xiáⁿ ní xíndecu xití vehe Yá
Ndiòxí, te cue dútú ní xóo quíhu-güedé
ñⁿ nduu ñⁿ nduu xití cuartú díhna ní xóo
cada-güedé nàcuáa tàú-güedé cada-güedé sá
cúú-xí Yá Ndiòxí.

⁷ Te cuartú cúú úú-áⁿ chí mee-ni dútú
cùnùu ní xóo quíhu-dé ñⁿ xito-ni ndi tñahá
cuía. Te ndi tñahá òré ducaⁿ ní xóo quíhu
dútú cùnùu-áⁿ te ní xóo canehe-dé ñíñí ní
xóo quíhu ní xóo nduu táhú Yá Ndiòxí. Te
ducaⁿ ní xóo cada dútú-áⁿ cuendá sá Yá
Ndiòxí cada càhnu iní-gá nchaa yicá cuéchi
mee-dé, ndihi nchaa yicá cuéchi ñáyiú.

⁸ Te sá dúcáⁿ mée-ni dútú cùnùu ní xóo
quíhu-dé xití cuartú ní cuu íí-gá-áⁿ, xiáⁿ
Espíritú Yá Ndiòxí quidé-xi cùtnùnì iní-ó sá
nini ducaⁿ ní xíndecu vehe-áⁿ ní xóo cadá-yu
nàcuáa ní xóo cùñaha Yá Ndiòxí cadá-yu.
Te xiáⁿ cùtnùnì sá vátá sàá-gá nduu cáháⁿ
ndihi-yu Yá Ndiòxí nàcuáa tàú-xi cunduu.

⁹ Te sá dúcáⁿ ní xíndecu vehe-áⁿ, ndihi sá
dúcáⁿ ní xóo cada nchaa cue dútú-áⁿ, xiáⁿ
cùtnùnì iní-ó nàcuáa quide Yá Ndiòxí vitna,
chì nchaa quití ní xóo cahni cue dútú-áⁿ
ní xóo nduu táhú Yá Ndiòxí, ndihi nchaa
dává-gá sá ní xóo nduu táhú-gá ñá túú ní
quide-xi nacuaá nduu ndoo nduu nine iní
cue ñáyiú nàcuáa cutnùnì iní-yu sá ñá túú-gá
cuéchi-yu ndècu núú Yá Ndiòxí.

¹⁰ Te sá dúcáⁿ ní xóo cada nchaa dútú-áⁿ
ní níhi tñahá-xi ndihi nchaa tñùhu sá dánhé
ñáhá xii ñáyiú ná cúú sá caxi-yu ndihi ná
cúú sá cúú còhó-yu ndihi nàcuáa ndáhá-yu.
Te tñùhu-áⁿ ní cuu-xi mee-ni sá ní sanu ichi
ñaha xii-yu nàcuáa cundecu-yu ñuyúú-a. Te
tñùhu-áⁿ ní nándíhi-xi ndéé ní sáá nduu ní
nadama Yá Ndiòxí tñùhu-áⁿ cuendá sá vá
dúcáⁿ-gá cadá-yu cundecu-yu.

¹¹ Te Xitohó Jesucristú ní quixi-gá ñuyúú-a,
te ñⁿ-ni-gá cúú-gá Yaa cúú dútú cùnùu, te xiáⁿ
núu quide-gá nchaa sá váha sá cúú-xi-ó. Te
vitna ní nucúndecu-gá núú ío víi ío váha càa,
te núú ndécú-gá-áⁿ ñá túú cùu-xi ñⁿ vehe sá
ní dácáa cué tee ñuyúú-a.

¹² Te cada iní-ó sá Xitohó Jesucristú
cuánguihu-gá xití cuartú núú ní cuu íí
víhi dàtná ní xóo cada dútú cùnùu ní
xíndecu ndéé sanaha, chí ní nucúndecu-gá
núú ndécú Yá Ndiòxí. Dico ñá túú ní
quide-gá dàtná ní xóo cada dútú cùnùu ní
xíndecu ndéé sanaha, chí dútú-áⁿ òré ní xóo
quíhu-dé xití cuartú ní cuu íí-gá-áⁿ, te ní xóo
canehe-dé ñíñí chivá ndihi ñíñí chèhlu ní
xóo quíhu. Dico Xitohó Jesucristú chí ñíñí
mégé ní sati ní xihí-gá núú cùrúxí, te xiáⁿ
duuⁿ duuⁿ cuáháⁿ-gá ní nucúndecu-gá núú
ndécú Yá Ndiòxí. Te sá dúcáⁿ ní quide-gá
xiáⁿ ní naníhi táhú-ó.

¹³ Te nchaa ñáyiú ní xóo cada nàcuáa
vá cúú-gá-yu ñáyiú ní cuu íí, ñáyiú-áⁿ ní

xóo códo ñáhá cuè dútu ñíñi ndicutu, ndihi ñíñi chivá, ndihi yáá cuñú chéhlu quiti sàhni-güedé cuendá nduu íí tucú-yu.

14 ¡Dico ñíñi Xítoho Jesucristú chi ío-gá nándihi-xi sá cúu-xí nchòo ñáyiu xíndecu vítna! Te cuendá ñíñi-gá-á, chi Espíritú Yá Ndióxi sá ndécú ncháa nduu ncháa quíu ní cuu ñíñi-xi ndihi Xítoho Jesucristú sá cúu cúu-gá cuendá cuu-gá dátá ñíñi táhú sá cúu-xí Yá Ndióxi cuéi cùu-gá Yáá ñá túu tñáhi cuéchi-xi, te ní sati ñíñi-gá te ní xíhi-gá. Te quendá xíá ñí cutnñi iní-ó sá Yá Ndióxi ní quide càhnu iní-gá ncháa sá ñá túu váha ní quide-o, te ní nduu ndoo ní nduu nine iní-ó. Te duca ñí nduu ndoo ní nduu nine iní-ó cuendá sá ndácú-ó cùnu cuéchi-o núu Yá Ndióxi Yáá ndécú ncháa nduu ncháa quíu.

15 Te Xítoho Jesucristú ní quide ndáá-gá núu Yá Ndióxi cuendá cue ñáyiu ndécú ñuyú-a. Te cuendá xíá Yá Ndióxi cada-gá íngá núu sá váha sá cúu-xí-yu dátá ní cachí-gá, te duca cada-gá sá cuendá ncháa ñáyiu ní cáhá-gá cundecu ndihi-gá, chi ñáyiu-á nduu táhú-yu cundecu ndihi váha ñáhá-yu xii-gá ní caa ní quíñi chi duca ñí cachí-gá, te duca ñí Xítoho Jesucristú ní xíhi-gá núu cùrúxi cuendá sá Yá Ndióxi cada càhnu iní-gá ncháa yíca cuéchi-yu, ncháa cuéchi sá ní quide-yu cutnñá ní cunuu tñuhu sá ní cáhá-gá díhna.

16 Te nchoo xini-ó sá núu ñí tée na càdúha ñí tutú nàcuáa cada ñáyiu dàcàhñu-yu ncháa sá ndécú ndihi-dé, te tutú-á xini ñùhu-xi ndéé ná yáha nduu cù-dé.

17 Te ñá túu tàu-xi cada ñáyiu nàcuáa cáhá-xi núu tütú-á ní nini ndécú tée ní cadúha, dico sátá ná yáha cuú-dé te cadá-yu nàcuáa cáhá-xi.

18 Te cuéi tñuhu ní cáhá Yá Ndióxi ndéé díhna nàcuáa cada váha-gá ñáyiu, te diu-ni ndihi ñíñi ní cundáá-xi chi ní sahni-güedé quiti te ní sati ñíñi-güedi.

19 Te ndíi Moisés ní cáhá ndodo ndúu ncháa ñáyiu nàcuáa ní cachí Yá Ndióxi cada-yu, te nàcuáa-ni nduu tñuhu ní chidó tñuní ndíi núu tütú ndíi ní cáhá ndíi, te ní dácá ndíi ndute ñíñi chéhlu ndihi ñíñi chivá líhli, te ní quehe ndíi ñíñi dité yutnu nàni hisópó ndihi luha idi ticuèhé, te ní chindóyo ndíi ñíñi-á. Te ní sódo ndíi núu tütú ndéé tñuhu Yá Ndióxi sá ní chidó tñuní ndíi-á, te tñáhá cue ñáyiu xíndecu-á ní chúcú ndíi.

20 Te ní xáha ndíi Moisés xii-yu: “Cuendá ñíñi-a ní cundáá sá Yá Ndióxi cada ñáha-gá xii-ndo sá váha chi duca ñí cachí-gá cada-gá sá cúu-xí-ndó”, duha ní xáha ndíi xii-yu.

21 Te diu-ni duca ñí quide tucu ndíi ní chúcú ndíi ñíñi vehe-gá ndihi ncháa sá nándihi-güedé órè chífñuhu-güedé Yá Ndióxi

ndécú xití vehe-gá-á.

22 Te tñuhu ní chidó tñuní ndíi Moisés càchi-xi sá méé-ní ñíñi chucu-güedé ncháa sá cànehe chiñu-güedé órè chífñuhu-güedé Yá Ndióxi, te sacú-ñá te ndihi ndoo ncháa xíá chucu-güedé ñíñi ní cuu. Te dacuití ní xini ñuhu-xi sá cáti ñíñi cuendá duca cada cahnu iní Yá Ndióxi ncháa yíca cuéchi ñáyiu.

Xítoho Jesucristú ní xíhi-gá núu cùrúxi cuendá sá vá cùndecu-gá cuéchi-o núu Yá Ndióxi

23 Te sá cuendá sá ní xíhi Xítoho Jesucristú núu cùrúxi, xíá ñá túu-gá cuéchi-o ndécú núu Yá Ndióxi. Te cuendá ncháa sá ní xíhi xití vehe-gá sá ní dácáá ñáyiu isráel xíá cutnñi iní-ó nàcuáa quide-xi núu ndécú-gá. Te dacuití ní xini ñuhu-xi sá cáhni-güedé cue quiti ní cachí Yá Ndióxi cuendá nduu íí ncháa sá ní xíhi xití vehe-gá-á. Te cuéi duca ñí sahni-güedé cue quiti-á dico ñá túu ní quide-xi nàcuáa ngúndecu váha-o núu Yá Ndióxi. Dico Xítoho Jesucristú ní xíhi-gá, te sá ní xíhi-gá xíá ní quide-gá nàcuáa ngúndecu váha-o núu Yá Ndióxi.

24 Te Xítoho Jesucristú cuándaa-gá andiu núu ndécú Yá Ndióxi cáhá ndáhú-gá cuendá-ó, te Xítoho Jesucristú chi ñá díu ñí vehe ní dácáá cuè tée ñuyú-a cuánguihu-gá. Te vehe Yá Ndióxi sá ní dácáá cuè ñáyiu isráel ñuyú-a ndéé sanaha, ndihi ncháa nàcuáa ní xóo cada-güedé xití vehe-gá-á xíá cutnñi iní-ó nàcuáa quide-xi núu ndécú-gá.

25 Te dútu cùnunu núu ñáyiu isráel ní xóo quíhu-dé núu cuiá núu cuiá xití cuártú ní cuu íí víhi-gá-á, te ní xóo canehe-dé ñíñi ní xóo quíhu xití cuártú-á dico ñá díu ñíñi méé-dé. Dico Xítoho Jesucristú chi ñá túu dùca ñí quide-gá chi ñíñi-xito-ni ní sati ñíñi-gá te ní xíhi-gá.

26 Chi núu ní xíhi-gá nuu núu te ndéé cutnñá ní ngáva ñuyú duca ngüita-gá cada-gá ní cuu, te vítna ta ndihi nduu cuáhá ñí quixi-gá ñuyú-a ní xíhi-gá ñíñi xito-ni cuendá cuu-gá dátá ñíñi táhú sá cúu-xí Yá Ndióxi, te duca ñí quide-gá cuendá sá vá cùndecu-gá cuéchi ñáyiu núu Yá Ndióxi.

27 Te nchoo cuè ñáyiu ñuyú-a chi ñíñi-xito-ni cuú-ó te dátñuní duca te cada ndáá Yá Ndióxi cuéchi-o.

28 Te duca sátnhá-xi cùu Xítoho Jesucristú chi ñíñi-xito-ni ní xíhi-gá cuendá sá vá cùndecu-gá cuéchi ñáyiu núu Yá Ndióxi, te duca ñí cuu ní xíhi-gá chi mee-gá duca ñí cachí-gá cunduu. Te quixi tucu Xítoho Jesucristú ñuyú-a dico ñá díu-gá sá cadá-gá cuendá sá vá cùndecu-gá cuéchi ñáyiu núu Yá Ndióxi, chi quixi-gá nàcuaca-gá ncháa ñáyiu ndètu ñáha xii-gá cuendá cundecú-yu ndihi-gá ní caa ní quíñi.

10

1 Te nchaa tnúhu ní xáhaⁿ ndii Moisés xii ñáiyu isráel cada-yu, nchaa tnúhu-áⁿ ní quide-xi ní cutnùni luha iní-yu nàcuáa cada Yá Ndióxi cada váha ñaha-gá xii-o vitna. Dico ñá dáu mèi nacuaa ní xáhaⁿ ndii Moisés xii ñáiyu quide Yá Ndióxi vitna chi dáma quide-gá. Te nchaa tnúhu ní cáháⁿ ndii Moisés ñá túú ní ndàcu-xi cada-xi nacuaa cundáa nchaa ñáiyu tùha ñaha xii Yá Ndióxi cuéi ní xóo cahni-güedé quiti ní xóo nduu táhú-gá núu cuiá núu cuiá.

2 Te núu dicó sá ní xóo cahni-güedé quiti ní xóo nduu táhú Yá Ndióxi ní quide-xi nacuaa nduu ndoo nine iní cue ñáiyu, te vá cáhni-gá-güedé cue quiti-áⁿ nduu táhú-gá ní cùu, te ducaⁿ te cutnùni iní-yu sá ñá túú-gá cuéchi-yu ndècu núu Yá Ndióxi ní cùu.

3 Te sá dúcáⁿ ní xóo cahni-güedé quiti ní xóo nduu táhú Yá Ndióxi núu cuiá núu cuiá, xiáⁿ ní xóo ndacu iní cue ñáiyu nchaa sá cuéhé sá dúhá ní xóo cada-yu.

4 Te ducaⁿ chi ñíni ndicutu-áⁿ ndihi ñíni chivá-áⁿ ñá túú ní xóo ndacu-xi cada-xi nacuaa vá cundècu cuéchi-yu núu Yá Ndióxi.

5 Te xiáⁿ núu cutnàhá ní quexio Xitohó Jesucristú ñuyúú-a ní xáhaⁿ-gá xii Yá Ndióxi: Yohó Tàtá-i, ñá túú nduu vétú váha iní-n sá sáhní-güedé quiti nduu táhú-n,

te ni ñá túú nduu vétú váha tucu iní-n cuendá nchaa dava-gá sá táxi-güedé ndúú táhú-n,

núu xiáⁿ ní quide túha-n yiqui cuñú-í cuendá yúhú cuú-í te nduu táhú ñahá-n xi-í.

6 Te ni ñá túú nduu vétú váha iní-n cuendá quiti sáhní-güedé ndúú táhú-n te ni ñá túú nduu vétú váha iní-n cuendá nchaa dava-gá sá táxi-güedé ndúú táhú-n cuendá sá vá cundècu-gá cuéchi ñáiyu núu-n.

7 Núu xiáⁿ yúhú ní cachí-í xii yohó Tàtá-i Dútú Ndióxi sá yúhú véxi-í ñuyúú-a cada-í nchaa sá cuini-n cada-í dátá yódó tnùni cuendá-í núu tutú-n.

Duha ní xáhaⁿ Xitohó Jesucristú xii Tàtá-gá Dútú Ndióxi.

8 Te Xitohó Jesucristú díhna-gá ní xí-gá Yá Ndióxi Yaá cúu Tàtá-gá: “Yohó Tàtá-í ñá túú nduu vétú váha iní-n cuendá quiti sáhní-güedé ndúú táhú-n, ndihi cuendá quiti sáhní-güedé ndúú táhú tucu-n cuendá sá vá cundècu-gá cuéchi ñáiyu núu-n, ndihi cuendá nchaa dava-gá táhú sá táxi-güedé xii-n ñá túú nduu vétú váha iní-n cuendá nchaa xiáⁿ”, duha ní xáhaⁿ Xitohó Jesucristú xii Tàtá-gá Dútú Ndióxi. Te ducaⁿ ní xáhaⁿ-gá cuéi núu tutú ndii Moisés yódó tnùni sá dúcáⁿ cada-güedé.

9 Te sáta dúcáⁿ te ní xáhaⁿ tucu-gá xii Tàtá-gá Dútú Ndióxi: “Yohó Tàtá-í Dútú Ndióxi, mee-í véxi-í ñuyúú-a cuendá cada-í

nchaa nàcuáa cuini-n”, duha ní xáhaⁿ-gá xii Tàtá-gá. Te sá dúcáⁿ ní cáháⁿ Xitohó Jesucristú xiáⁿ ní cutnùni sá ñá túú-gá xini ñuhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xitohó Jesucristú ní xíhí-gá ní cuu-gá dátá ñá túú sá cúu-xí Yá Ndióxi, te ducaⁿ ní cuu chi ducaⁿ tnàhi ní cachí Yá Ndióxi cunduu.

10 Te Xitohó Jesucristú ní quide-gá nàcuáa ní cuini Yá Ndióxi cada-gá, chi ní xíhí-gá núu cùrúxi chi ducaⁿ ní cuini méé-gá cunduu, te ñá xito-ni ní xíhí-gá sá cuendá nchaa ñáiyu, te cuendá xiáⁿ núu ndècu yíñuhu-o núu-gá vitna.

11 Te cue dútú ñáiyu isráel chi ñá nduu ñá nduu ní xóo cahni-güedé quiti ní xóo nduu táhú-gá, te ñá túú ní dáma-güedé nàcuáa ní xóo cada-güedé. Te nchaa sá ní xóo cada-güedé-áⁿ ñá túú ní quide-xi nacuaa vá cundècu-gá cuéchi ñáiyu núu Yá Ndióxi.

12 Dico Xitohó Jesucristú ní cachí-gá sá cúu cúu-gá, te ní xíhí-gá núu cùrúxi cuendá nchaa yicá cuéchi nchaa nchoo ñáiyu ndècu ñuyúú-a. Te sáta dúcáⁿ te dátùnini ní ngóo-gá xio cùha Dútú Ndióxi táxi tnùni-gá, te vá ñá nduu ñá quíú-gá te cuú-gá.

13 Te diu-ni xiáⁿ cundècu-gá cundetu-gá ndéé sáa nduu cànehe nchaa sá cúu ùhú iní ñahá xii-gá sá yíñuhu núu-gá.

14 Te cuendá sá ní xíhí Xitohó Jesucristú ñá xito-ni xiáⁿ ní cuu-gá dátá ñá túú sá cúu-xí Yá Ndióxi, xiáⁿ ní quide-xi sá ncháá ñáiyu cùu cuendá-gá ñá túú-gá ná cumáni-yu núu-gá ní caa ni quíhí.

15 Te mee Espiritú Yá Ndióxi cáháⁿ ndáa-xi nàcuáa ní cáháⁿ-gá cuendá-ó, te duha ní cáháⁿ-gá:

16 Sáa nduu te cada-í nchaa ñáiyu nàcuáa ná cáháⁿ-í-a,

te cada-í nàcuáa cutnùni iní-yu tnúhu sá dánèhé-í-yu tnúhu sá cànùichi ñaha xii-yu nàcuáa cada-yu cundècu-yu,

te cada tucu-í sá tná-yu nchaa tnúhu-áⁿ.

Duha ní cachí-gá.

17 Te ní cachí tucu-gá:

Te vá ñá nduu ñá quíú-gá ndacu iní-í sá quidé sáa iní-yu tnúhu-í,

te ni vá ñá nduu ñá quíú-gá te ndacu iní-í nchaa sá cuéhé sá dúhá quidé-yu.

Duha ní cáháⁿ Yá Ndióxi cáhí Espiritú-gá.

18 Te sá dúcáⁿ quide cahnu iní Yá Ndióxi nchaa cuéchi-o, núu xiáⁿ ñá túú-gá xini ñuhu-xi cúu quiti nduu táhú-gá cuendá nchaa sá cuéhé sá dúhá quide-o.

Táu-ó sá tnàhá tnúhu-o ndihi Yá Ndióxi

19 Te cue dútú ní xóo cunuu núu ñáiyu isráel cue téé-áⁿ ní xóo quíhu-güedé xiti cuàrtú ní cuu íí víhí-gá. Dico nchoo cué ñáiyu ndècu ichi Xitohó Jesucristú vitna tau-ó sá ní yuhu ní iní-ó tnàhá tnúhu-o ndihi Yá Ndióxi. Te

cuu tnahá tnúhu-o ndíhi-gá chi Xítohá Jesucristú ní sati níni-gá te ní xíhi-gá núú cùrúxi.

20 Te cada iní-ó sá dđó sá ní xíndedí nàcuáa ní xóo quíhu-güedé xítí cuártú ní cuu íí víhi-gá-á" ní xócuíni, te duca" càda iní-ó chi Xítohá Jesucristú ní xíhi-gá cuendá nchoo níhi-ó nàcuáa cada-o ngündecu váha-o sá cúú-xí-gá.

21 Te diu-gá cúú-gá Yaá cúú dütú-ó, te diu-gá cúú-gá Dütú cúnúu ndecu-gá núú ndécú Yá Ndióxi.

22 Núu xiá" xíni ñúhu-xi sá ío tnahá tnúhu-o ndíhi Yá Ndióxi, te vá cáni ñ" cani úú iní-ó, te ío váha quindáa iní-ó-gá chi diu-gá ní ndada ndoo ní ndada nine-gá iní-ó cuendá nchoo cútuní iní-ó sá ñà túú-gá cuéchi-o ndecu núú-gá. Te ní sandute-o cuendá sá dúcá" ní nduu ndoo ní nduu nine iní-ó.

23 Te nchoo càhá" ndáá-ó sá ndécú ndíhi-o tnúhu ndee iní sá ndúú táhu-ó cündecu ndíhi-o Yá Ndióxi, te xíni ñúhu-xi sá vá dáñá ndéé-ó càncicú" nihnu-o tnúhu ndee iní-á" chi Yá Ndióxi cada-gá nàcuáa ní cachí-gá sá cúú-xí-ó.

24 Te xíni ñúhu-xi cuhu" iní tnahá-ó te chindee tñaha-o nacuáa duca" cùu iní tnahá-gá-ó, te cada-o mèe-ni sá váha.

25 Te nchoo vá dáñá ndéé-ó nàtacá-ó núú dácua-ha-o tnúhu Yá Ndióxi, te vá càdá-ó dàtná xíquide davá-yu ñá túú-gá cuíni-yu quixí-yu núú dácua-ha-o tnúhu-gá. Chi xíni ñúhu-xi sá cuáha tñaha-o tnúhu ndee iní canchicú" nihnu-o íchi-gá, te uu"-gá duca" tàú-xi cada-o vítna ta cuyatni nduu quixi tucu Xítohá Jesucristú ñuyíú-a.

26 Te cue ñáiyu sa ní tecú tnùnì nàcuáa càhá" tnúhu Yá Ndióxi te núu na ngüita-yu ñucúu" cadá-yu nándi sá cuèhé sá dúhá, te áu" nã cuu ní xíhi Xítohá Jesucristú cuendá-yu, te ni vá yóo ñ"-gá cuú cuendá sá vá cündecu-gá cuéchi-yu núú Yá Ndióxi.

27 Te núu duca" na càdá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndióxi xii-yu. Chi nchaa ñáiyu cùu úhú iní ñáhá xii-gá daquèh" ñáhá-gá xii-yu núú ñúhú núú càyú núú ío ndohó-yu.

28 Te nchaa ñáiyu ní xóo daquèe tíhú tnúhu ní càhá" ndíi Moisés, te núu ndècu úú àdi úní ñáiyu càhá" ndáá sá dúcá" ní dáquèe tíhú-yu tnúhu ní càhá" ndíi, te vá yóo ní xóo cundáhú iní ñáhá xii nchaa ñáiyu duca" ní xóo cada chí ní xóo cahni ñaha-güedé.

29 Te núu duca" ní ndoho cue ñáiyu duca" ní dáquèe tíhú tnúhu ní càhá" ndíi Moisés-á", te uu"-gá ndoho cue ñáiyu dàquèe tíhú ñáhá xii Xítohá Jesucristú Yaá cúú Dèhe Yá Ndióxi diu-ni ñáiyu càchi sá ñà túú nàndíhi níni-gá. Te níni-gá-á" ní sati, te ní xíhi-gá, te duca" ní cuu cuendá cada Yá Ndióxi íngá núú sá váha sá cúú-xí nchò ñáiyu ndecu ñuyíú-a

dàtná ní cachí-gá cada-gá. Te diu-ni cuendá níni-gá-á" ní nduu ndoo ní nduu nine iní cue ñáiyu-á" ní cùu, te diu-ni ñáiyu-á" càhá" úhú-yu Espíritú Yá Ndióxi sá chindèe chítúu ñaha xii-o.

30 Te nchoo sà naha-o sá Yá Ndióxi càchi-gá ñ" xichi núú tütú-gá: "Yúhú cada-í te nacháhu ñáiyu nchaa sá quidè-yu, te duha càhá"-í chi nachinaa-í cuendá nchaa sá quidè-yu-á", duha càchi-gá. Te sa ñaha tucu-o nacuáa càhá"-xi núú tütú-gá núú càchi-xi: "Yá Ndióxi cada ndáá-gá cuendá nchaa sá quidè ñáiyu cùu cuendá-gá", duha càchi-xi núú tütú-gá.

31 Te ío ndáhú ndoho cue ñáiyu na dàndoho ñaha Yá Ndióxi, te diu-gá cúú-gá Yaá cúnúu nchaa nduu nchaa quíú!

32 Te chí dándacu iní nàcuáa ní quide-ndo cùtnáhá vítna cuu saa ní tecú tnùnì-ndó tnúhu Yá Ndióxi, chí dàvá-á" ní quide càhnu iní-ndó cuèi nándi sá ní yáha-ndo cuendá-gá.

33 Te dava-ndo ní quide úhú ñáhá ñáiyu xii-ndo núú chítú núú tàc, te nándi tnúhu cuèhé tnúhu duha ní xáhá"-yu xii-ndo. Te dava-ndo ní cuyí-ni-ndo ní xíndecu ndíhi tñaha-ndo cuèi nándi ní ndoho dava-gá-ndó.

34 Te ní cundáhú iní-ndó cuè ñáiyu yíhi vecaá, te cuèi ní quendeé ñáiyu sá ndécú ndíhi-ndo dico ñá túú ní ndíhú iní-ndó chí ní cudíi-ni iní-ndó. Te duca" ní quide-ndo chí sa ñaha-ndo sá ndúú táhu-ndó sá ío-gá váha, te xiá" cundecu ndíhi-ndo ní caa ní quíhi".

35 Te xiá" vá dáñá ndéé-ndó quindáa iní-ndó nàcuáa ní cachí Yá Ndióxi cada ñaha-gá xii-ndo, chí sáa nduu te ío váha cada ñaha-gá xii-ndo.

36 Te nchòhò xíni ñúhu-xi ío cada ndee iní-ndó càda-ndo nchaa nacuáa càhá" Yá Ndióxi, te duca" te nduu táhú-ndó sá ní cachí-gá nduu táhú-ndó cündecu ndíhi-ndo ní caa ní quíhi".

37 Te Yá Ndióxi càchi-gá núú tütú-gá: Ta cuyatni víi-nã nduu quixi Yaá quixi ñuyíú-a, te vá cùyaa-gá.

38 Te nchaa ñáiyu cundáa núú-í ñá túú dàña ndeé-yu sàndáa iní ñáhá-yu xii-í,

te cuendá xiá" cundecu-ní-yu ichi-í, dico núu na dàñá-yu ichi-í te vá cúú váha iní-í núú-yu.

Duha càchi Yá Ndióxi núú tütú-gá.

39 Dico nchoo chí ñá túú cùu-o ñáiyu duca" xíquide dàñá-ó íchi Yá Ndióxi, chí cùu-o ñáiyu nchicú" nihnu-ni sàndáa iní-ó-gá, te sá dúcá" te nduu táhú-ó cündecu-o ndíhi-gá ní caa ní quíhi", te ñá túú cùu-o ñáiyu dàña nihnu ichi-gá te xita nihnú-yu.

11

Ñáiyu sàndáa iní ñáhá xii Yá Ndióxi

¹ Te núu sàndáá ndisa iní-ó Yá Ndióxi te ducaⁿ cùtnuní ndáá iní-ó sá nìhí-ó sá cuiní-ó nũú-gá. Te núu sàndáá iní-ó-gá te ducaⁿ cùtnuní ndáá tucu iní-ó sá cáháⁿ ndáá-gá cuendá nchaa sá ñã tũú xini-ó.

² Te ducaⁿ nĩ quide ñáyiu ní xindecu ndéé sanaha ío ní sàndáá iní-yu Yá Ndióxi te xiáⁿ núu ío váha ní cuu iní ñáhá-gá xii-yu.

³ Te núu nchoo sàndáá ndisa iní-ó Yá Ndióxi te cùtnuní ndáá iní-ó sá sá cuendá tnũhu ní cáháⁿ-gá ní cuáha andiu ndihi ñuyúú-a. Te cùtnuní iní-ó sá ñã díú sá cuendá ìⁿ sá tũu ndehe-o ío ñuyúú-a ní cuáha andiu ndihi ñuyúú-a.

⁴ Te ndii Àbél ío ní sàndáá iní ndii Yá Ndióxi núu xiáⁿ ío-gá ní cuu iní-gá sá ní sáñaha ndii ní nduu táhú-gá dàcúúxi sá ní sáñaha ndii Cãin xii-gá ní nduu táhú-gá. Te ndii Àbél-án nĩ cutnùní iní ndii sá ní cudíu ndii núú Yá Ndióxi cuendá sá ní queheⁿ cuendá-gá sá ní sáñaha ndii ní nduu táhú-gá. Te cuéi ñã tũú-gá ndii ndècu ñuyúú-a dico yòdo tnuní sá ní sàndáá iní ndii Yá Ndióxi cuendá ducaⁿ càda-o canchicúⁿ nihnu-o.

⁵ Te té Ènóc téé ní xindecu ndéé sanaha ñã tũú ní xihí-dé chí ní nacuaca ñaha tũu Yá Ndióxi xii-dé cuendá sá ní sàndáá iní ñáhá-dé xii-gá. Te vá yòo ní nànihí ñáhá xii-dé chí mee-gá ní nacuaca ñaha-gá xii-dé. Te núu tũtũ Yá Ndióxi cãchí-xi sá cùtnàhá vátá nãcuàca ñaha-gá xii té Ènóc, te ní quide-dé mee-ní nãcuáa ní cuu váha iní ñáhá-gá xii-dé.

⁶ Te nchaa ñáyiu ñã tũú sàndáá iní ñáhá xii Yá Ndióxi ñã ndácũ-yu cadá-yu nãcuáa cudíu-yu núú-gá, chí nchaa ñáyiu cuiní tuha ñaha xii-gá xini ñũhu-xi sá quindáá iní-yu sá ndécú-gá, te quindáá iní-yu sá núu na nãnducu nihnu ñáhá-yu xii-gá te cuáñaha-gá xii-yu sá ndũú táhú-yu.

⁷ Te Yá Ndióxi ní dátũha-gá ndii Nõé nchaa nãcuáa cada-gá. Te ní quide ndii nchaa nãcuáa ní xáhaⁿ Yá Ndióxi cada ndii, te ní cadũha ndii ìⁿ bàrcú cuendá xití bàrcú-án quée ndii ndihi nchaa ñáyiu vehe ndii cuendá cácu nihnú-yu. Te ducaⁿ nĩ quide ndii chí ní sàndáá iní ndii Yá Ndióxi. Te sá dúcáⁿ nĩ sàndáá iní ndii-án Yá Ndióxi xiáⁿ ní cutnùní sá ncháá ñáyiu ío ndècu cuéchi-yu, chí ñã tũú ní cãchicúⁿ nihnú-yu cadá-yu nãcuáa ní quide ndii. Te sá dúcáⁿ nĩ quide ndii ní sàndáá iní ndii Yá Ndióxi xiáⁿ ío ní cundáá ndii núú-gá.

⁸ Te Yá Ndióxi ní xáhaⁿ-gá xii ndii Àbráhã sá quée ndii ñũu núu ndécú ndii quihíⁿ ndii ingá xichí cundecu ndii. Te ní quide ndii nãcuáa ní xáhaⁿ Yá Ndióxi chí ní quee ndii cuáháⁿ ndii núu cuáñaha Yá Ndióxi cundecu ndii. Te òré ní quee ndii núu ndécú ndii te ñã tũú ní cùtnuní iní ndii ndéé cúu núu cuáháⁿ

ndii cundecu ndii. Te ducaⁿ nĩ quide ndii chí ní sàndáá iní ndii Yá Ndióxi.

⁹ Te sá dúcáⁿ nĩ sàndáá iní ndii Yá Ndióxi núu xiáⁿ ní xindecu ndii núu ní sáñaha-gá cundecu ndii, te cuéi ducaⁿ dico ñã tũú ní quide ñũu ndii xiáⁿ. Te ní xóo cundecu ndii vehe cùtexínu vehe dóó. Te ñu-ni ducaⁿ nĩ quide ndii Isàác ndihi ndii Jãcób chí tnáhá cue ndii-án nĩ cãchí Yá Ndióxi sá ndũú táhú cue ndii xiáⁿ cundecu cue ndii.

¹⁰ Te ducaⁿ nĩ quide ndii Àbráhã chí ní xindetu ndii ndéé ní sáá nduu ndũu táhú ndii cundecu ndii núu ndécú Yá Ndióxi. Te núu ndécú-gá-án cúu-xi ñũu ní cadũha mee-gá, te ñũu-án cudíu-xi ní caa ní quihíⁿ.

¹¹ Te ndii Sãrá, sa ní xidó cuá ndii sá cóó dèhe ndii chí sa ní sahnu vihi ndii, dico Yá Ndióxi ní quide-gá te ní xóo ìⁿ dèhe ndii. Te ducaⁿ chí ní sàndáá iní ndii Yá Ndióxi te ní cutnùní ndáá iní ndii sá cadá-gá nãcuáa ní xáhaⁿ-gá xii ndii.

¹² Te cuéi ío ní sahnu ndii Àbráhã ndihi ñadihi ndii, ndii Sãrá dico dacutíi ní nduu táhú-yu ní xóo ìⁿ dèhe-yu. Te xiáⁿ núu ío cuéhe ndiquíⁿ yávã ndii Àbráhã ní cáyã dàtnã cuéhe chòdini ndéé andiu, ndihi dàtnã cuéhe ñũhu cúchí làmãr, chí ní vá yòo ìⁿ ndacacuhã ñaha xii-yu sá cuéhe-yu.

¹³ Te cue ndii-án ducaⁿ-ni ní sàndáá iní cue ndii Yá Ndióxi ndéé ní sáá nduu ní xihí cue ndii. Te cue ndii-án ñã tũú ní ndũu táhú cue ndii quini cue ndii nchaa nãcuáa ní cãchí Yá Ndióxi cada-gá, dico ní cutnùní ndáá iní cue ndii-án nãcuáa cada-gá núu cuáhãⁿ núu vèxi. Te ío ní cudíi iní cue ndii, te ní cãchí cue ndii sá dicó-ni ichi váha cue ndii ñuyúú-a, chí ñã díú ñuyúú-a cundecu ducaⁿ cuè ndii.

¹⁴ Te sá dúcáⁿ ndũu tnũhu ní cáháⁿ cue ndii-án, xiáⁿ ní cutnùní sá cuiní cue ndii ingá xichí núu cundècu cue ndii.

¹⁵ Te ní ñã díú ñũu núu ní quee cue ndii ní cuiní cue ndii núhú cue ndii. Chí núu ducaⁿ ní sãni iní cue ndii te núhú cue ndii ní cùu.

¹⁶ Dico ñáhã chí cuiní cue ndii quihíⁿ cue ndii ìⁿ xichí núu váha-gá cáá cundecu cue ndii. Te núu dúcáⁿ ío-gá váha càa-án cúu-xi ñũu núu ndécú Yá Ndióxi, te sá dúcáⁿ ní sãni iní cue ndii xiáⁿ núu ío váha cùu iní Yá Ndióxi cãchí-gá sá ñã tũú cùcahaⁿ núu-gá cúu-gá Ndióxi cue ndii-án, te cùtnuní iní-ó sá ndáá sá dúcáⁿ cãháⁿ-gá chí ní quide túha-gá ìⁿ xichí núu cundècu cue ndii-án.

¹⁷ Te ndii Àbráhã ní xindecu ìⁿ dèhe ndii ndihi ñadihi ndii, te cùtnàhá ní xito ndéé ñáhã Yá Ndióxi xii ndii ní xicáⁿ-gá dèhe ndii, ndii Isàác cuendá nduu táhú ñáhã-gá xii ndii. Te ní xáhaⁿ ndii sá cúu ndũu táhú-gá dèhe ndii, te ducaⁿ nĩ quide ndii chí ní sàndáá iní ñáhã ndii xii-gá. Te sa ndècu túha ndii sá cuáñaha ndii dèhe ndii xii-gá cuéi mee Yá Ndióxi ní xáhaⁿ ndáá-gá xii ndii

18 sá sã cuendá ndii Isàac te ngúndecu cue ñani tnáhá ndii.

19 Te duca^a ñi quide ndii Àbrahám, chi ní cutnùní ndáá iní ndii sá Yá Ndiöxí ndácú-gã dándòto-gã cuèi ñáiyu sa ní xihí. Te sá dúcá^a ñi xáha^a ndii xii Yá Ndiöxí sã cúú ndùu táhú-gã déhe ndii, te xiá^a cada iní-ó sã sã ní xihí ndii Isàac te ní ndoto tucu ndii ní nucúndecu ndii ndihi tãtá ndii, ndii Àbrahám.

20 Te ndii Isàac ní xicá^a táhú ndii núu Yá Ndiöxí cuendá sã cáda vaha-gã cue déhe ndii, ndii Jácób ndihi ndii Esáu núu cuahá^a núu vèxi. Te duca^a ñi quide ndii chi ní sándáá iní ndii Yá Ndiöxí.

21 Te sa ta cùyatni-ná nduu cùu ndii Jácób, te ní xicá^a táhú ndii núu Yá Ndiöxí cuendá cue déhe ñani ndii déhe ndii Chèè. Te yituu-ná ndii tatnu ndii ní chihuhu ndii Yá Ndiöxí. Te duca^a ñi quide ndii chi ní sándáá iní ñahá ndii xii-gã.

22 Te cùtnàhá sa ta cùyatni vii-nã nduu cùu ndii Chèè, te ní cachí ndii sã cuè ñáiyu isràèl sáá nduu quèè-yu núu xíndecú-yu-á^a. Te ní cáhá^a tucu ndii ñacuáa cadá-yu yiqui cùñú ndii na sáá nduu quèè-yu núu ndécú-yu-á^a. Te duca^a ñi quide ndii chi ní sándáá iní ndii Yá Ndiöxí.

23 Te cùtnàhá ní cacu ndii Moisés te ní chiváha ñaha nãná ndii ndihi tãtá ndii úní yóó. Te duca^a ñi quide cue ndii-á^a chi ní sándáá iní cue ndii Yá Ndiöxí. Te ní quide cuendá cue ndii-á^a sã ïo vaha càa ndii Moisés déhe cue ndii, te ñá túu ní yuhú cue ndii ñacuáa ní cáhá^a tée cùu Faraón sã cáhni-dè cue landú.

24 Te sátá ñi sahnu ndii Moisés te duu^a duu^a ní cachí ndii sã vã cáhá^a ñáiyu sã déhe yoco tée cùu Faraón cúu nãná ndii. Te duca^a ñi quide ndii chi ní sándáá iní ndii Yá Ndiöxí.

25 Te duca^a ñi quide tucu ndii chi ní tnahá-gã iní ndii ndoho ndii ndihi nchaa ñáiyu cùu cuendá Yá Ndiöxí dàcúxí sã cùdñí iní ndii cundecu tnaa ndii ichi cuèhé ichi duha.

26 Chi ní sani iní ndii sã vaha-gã ndoho ndii cúcuèhé ñahá cuè ñáiyu xii ndii sã cuendá Yaá quixi ñuyíu-á-dàcúxí sã cùndecu ndihi ndii nchaa sã ïó Ègiptú. Te duca^a ñi quide ndii chi ní xúhu^a iní ndii sã Yá Ndiöxí cuãñaha-gã sã ndúú táhú ndii.

27 Te ndii Moisés ní quee ndii nació^a Ègiptú te ñá túu ní quide cuendá ndii sã ïo cùdèé^a tée cùu Faraón núu ndii. Te duca^a ñi quide ndii chi ní sándáá iní ndii Yá Ndiöxí. Te ní quide càhnu iní ndii cuendá nchaa sã ñi yáha ndii, te ní quide iní ndii sã Yá Ndiöxí ndécú ndihi ñaha túu-gã xii ndii cuèi ñá túu ní xini núu ñahá ndii xii-gã. Te duca^a ñi sani iní ndii chi Yá Ndiöxí ndécú ndihi ñaha-gã xii ndii.

28 Te ndii Moisés cúu ndii tée ní tausaha ñi quide vico páscaú ndihi cue ñáiyu isràèl,

te dàvã-á^a ñi táuchíú^a ndii ní sahní-yu mbéè te ñíñi quiti-á^a ñi dácánúu-yu yuyéhe-yu. Te duca^a ñi quide ndii chi ní sándáá iní ndii Yá Ndiöxí. Te duca^a ñi quide tucu ndii cuendá sã espíritu sã ní tendaha Yá Ndiöxí cahni-xi mee-ni déhe tée déhe díhna cue ñáiyu Ègiptú, te vá cáhni-xi ní ïi^a déhe cue ñáiyu isràèl.

29 Te ndute lámár sã nání Mãr Tícuèhé ní quèe dava-xi ní natúu ñuhu yìchí ní ñihí ní yáha cue ñáiyu isràèl. Te duca^a ñi cuu chi ní sándáá iní-yu Yá Ndiöxí. Te cue tée Ègiptú tnàhã-güedé nchicú^a-güedé cuahá^a dico ñá túu ní ndàcu-güedé yáha-güedé chi ní ndihi-güedé ní cáhá.

30 Te cue ñáiyu isràèl ní dúcú^a ndèè-yu úsá nduu ñuu Jericó te ní ngoyo nchaa sã ñúdòco. Te duca^a ñi cuu chi ní sándáá iní-yu Yá Ndiöxí.

31 Te ïi^a ñaha ní xíndecu ichi díí ñi ní xínani-a^a Ràháb, ñaha-á^a ñá túu ní xihí-a^a dàtná ní xihí nchaa ñáiyu ïo ní cuu sáá iní-xi núu Yá Ndiöxí, chi ní cuu vaha iní-a^a núu cuè tée ní tendaha cuè ñáiyu isràèl ní sãngoto dayuhu ñuu-a^a. Te duca^a ñi quide-a^a chi ní sándáá iní-a^a Yá Ndiöxí.

32 Te núu dicó sã cúu te cáhá^a-í cuendá ndii Gedèon, ndihi cuendá ndii Bàràc, ndihi cuendá ndii Sãnsón, ndihi cuendá ndii Jèftè, ndihi cuendá ndii Dàvií, ndihi cuendá ndii Sãmuél, ndihi cuendá nchaa cue tée ní xóo cáhá^a tnúhu Yá Ndiöxí ndéé sanaha, te nchaa cuendá cue tée-á^a cáhá^a-í te núu dicó cùyächí-í dico ñá túu cùyächí-í.

33 Te nchaa cue ndii-á^a ñi sándáá iní cue ndii Yá Ndiöxí ñuu xiá^a ní xóo ndacu cue ndii ní xóo nãá cue ndii ndihi nchaa ñáiyu dava-gã ñuu. Te nchaa ñáiyu-á^a ñá túu ní xóo ndacú-yu nãá-yu ndihi cue ndii, te ní xóo cada cue ndii nchaa ñacuáa tà-i-xi cunduu, te ní quide vaha ñaha Yá Ndiöxí xii cue ndii dàtná ní cachí-gã cada ñaha-gã xii cue ndii. Te cuèi nchaa cue quiti déé^a ñá túu ní ndàcu-güedí nã cada ñaha-güedí xii cue ndii.

34 Te ní xóo ndacu cue ndii ní xóo ndahvá cue ndii ñuhú sã vã yóo tnàhí ndàcu ndahvá, te ní cácu cue ndii vá yóo ní ndàcu cahni ñaha xii cue ndii. Te cue ndii-á^a ñá túu ñihí ndéé cuè ndii ní cùu, dico ní ñihí ndéé cuè ndii chi Yá Ndiöxí ní chindee ñaha-gã xii cue ndii, te nchaa ndii-á^a ïo ní ñihí ndéé cuè ndii ní nãá cue ndii ndihi nchaa ñáiyu ní cuu úhú iní ñahá xii cue ndii, te nchaa ñáiyu duca^a ñi xóo nãá ndihi cue ndii-á^a ñá túu ní xóo ndacú-yu nãá ndihi ñahá-yu xii cue ndii chi ní xóo cunú-yu. Te duca^a ñi cuu chi ní sándáá iní cue ndii Yá Ndiöxí.

35 Te dava ñáiyu díhí ní nduu táhú-yu ní ndoto cue ñáiyu ní xíndecu ndihi-yu ní nucúndecu ndihi ñaha túcú-yu.

Te dava ñáiyu ïo ní dándóhó ñaha tnaha ñáiyú-yu te ní xihí-yu, dico ñá túu ní

dãñá-yu ichi váha nàcuáa cácu nihnú-yu núu tñaha ñáyiú-yu, te ducaⁿ chi ní cuini-yu sá ndótó-yu ndéé cuèé-gá nàcuáa ngúndecu váha-yu núu ndécú Yá Ndiöxi.

³⁶ Te dava cue ndíi ío ní ndoho cue ndíi chi ío ní cudíqui ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihí ñáhá-yu xii cue ndíi vecaá.

³⁷ Te dava cue ndíi ní sahni ñáhá-yu ndihi yúu. Te dava cue ndíi ní chidava ndáá ñáhá-yu ní xehndé ñáhá-yu ndihi sierrá. Te dava cue ndíi ní xito ndéé ñáhá-yu te núu ndisa sá sándáá íni cue ndíi Yá Ndiöxi, te dava cue ndíi ní sahni ñáhá-yu ndihi machítí. Te mee-ni ññi mbéé ndihi ññi chivá, ní xóo cuu dóo cue ndíi. Te mee-ni ññi cue quití-ánⁿ ní xóo cuu dóo cue ndíi cuéi ndéni ní cuu ní xóo caca cuu cue ndíi. Te mee-ni cué téé ndàhú ní cuu cue ndíi. Te ío ní xóo dandihú-yu íni cue ndíi, te nándi sá ní xóo cada ñáhá-yu xii cue ndíi ní xóo dandòho ñáhá-yu.

³⁸ Te cue ndíi-ánⁿ ío-gá ní xínduu váha íni cue ndíi dácúuxí ncháa dava-gá ñáyiú. Te nchaa cue ndíi-ánⁿ ní xica cuu cue ndíi cuéi nchaa núu ñá túú vá yóo tñahí ndécu, te cuéi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndéni ní cuu nchíi yaú ní xóo cundecu cue ndíi.

³⁹ Te ío ní cudíu cue ndíi núu Yá Ndiöxi cuendá sá ní sándáá íni ñáhá cué ndíi xii-gá. Te cuéi ducaⁿ ní quide cue ndíi dico ñá túú ní xini cue ndíi nchaa sá ní cachí Yá Ndiöxi cada-gá.

⁴⁰ Te ducaⁿ ní cuu chi ññⁿ sá ío-gá váha ní cachí Yá Ndiöxi cada-gá. Te sá dúcáⁿ ío-gá váha ní cachí-gá cada-gá cúu-xí cuendá nchoo ndíhi cuendá cue ndíi-ánⁿ cuendá sá ñá díú mée-ni cue ndíi-ánⁿ cundáa cue ndíi núu-gá, chi tñahá nchoo cundáá-ó núu-gá.

12

Ío cuhuⁿ íni-ó Xitohó Jesucristú

¹ Te cue ñáyiú ní xíndecu ndéé sanaha ní quidé-yu nàcuáa ní cutnuni sá ní sándáá íni-yu Yá Ndiöxi. Te cada íni-ó sá ncháa ñáyiú-ánⁿ xíndéhé ñáhá-yu xii-o vitna. Núu xíáⁿ xini ññu-xi sá vá cáda-ó ní ññⁿ sá cuèhé sá dúhá chi díu nchaa xíáⁿ quidé-xí ñá túú cundáá-ó núu Yá Ndiöxi. Te vá cáda cuendá-ó ncháa sá quidé tñeñu íni-ó nàcuáa ndacu-o cáda-o nchaa nacuáa cáháⁿ-gá. Te ío cáhu cunduu íni-ó càncicúⁿ nihnu-o cáda-o nchaa nacuáa ní cachí-gá cada-o cundecu-o ñuyíú-a.

² Te ío cuhuⁿ íni-ó Xitohó Jesucristú, chi díu-gá ní quide ní sándáá íni-ó Yá Ndiöxi, te díu-ni ducaⁿ quide-gá cuéi vitna te cuéi ndéé núu cuaháⁿ núu véxi díu-ni ducaⁿ cáda-gá

sá quíndáá íni-ó Yá Ndiöxi. Te Xitohó Jesucristú ío ní quide ndee íni-gá ní ndoho-gá te ní xihí-gá núu cùrúxi, te ñá túú ní quide cuendá-gá cuéi ññⁿ sácáⁿ núu cúu-xí sá dúcáⁿ ní ndoho-gá. Te ducaⁿ ní quide-gá chi sa ñaha-gá sá ná váha sá dúcáⁿ ndòho-gá te ío cudíí íni-gá. Te vitna nùcòo-gá xio cùha núu nùcòo Yá Ndiöxi te tàxi tñuni-gá.

³ Te xini ññu-xi sá ío cada cuendá-ndó nàcuáa ní quide Xitohó Jesucristú chi Yáa-ánⁿ ío ní quide cáhu íni-gá nchaa sá ní ndoho-gá ní quide ñaha ncháa ñáyiú ndécu ichi cuèhé ichi duha xii-gá. Te ducaⁿ cáda cuendá-ndó nàcuáa ní quide-gá cuendá sá vá túu dusaⁿ-ndo, te ní vá nátúhú íni-ndó cáda-ndo nchaa nacuáa cáháⁿ-gá.

⁴ Te nchòhó dáqueé tihú-ndó ncháa sá cuèhé sá dúhá dico vátá cáhni ñaha-gá-yu xii-ndo sá dúcáⁿ quide-ndo.

⁵ Te ndacu íni-ndó nàcuáa cáháⁿ Tátá-ó Dütú Ndiöxi dásahú ñáhá-gá xii nchoo cué ñáyiú cùu déhe-gá. Te duha cáchí-gá núu tütú-gá:

Nchòhó cue déhe mee-í, vá cáni íni-ndó sá àúⁿ ná cuu dandoho ñaha-í xii-ndo, te ní vá nátúhú íni-ndó òré cáháⁿ-í dòho-ndo nàcuáa cada-ndo cùndecu-ndo.

⁶ Chi mee-í dándòho-í nchaa ñáyiú cùu íni-í cuendá sá cùndáa-yu núu-í, te quide úhú-í-yu, te díu-ni-yu cùu-yu ñáyiú cáchí-í cùu déhe-í.

Duha cáchí-gá núu tütú-gá.

⁷ Te ío cada ndee íni-ndó sá dúcáⁿ dandoho ñaha Yá Ndiöxi xii-ndo, chi quide-gá sá cúu-gá Tátá-ó. Te ñá túú ní ññⁿ téé cùu tátá te cachí-ó sá ñá túú sànu ichi-dé cue déhe-dé nàcuáa tàù-xi cunduu.

⁸ Te núu Yá Ndiöxi ñá túú dandoho ñaha-gá xii-ndo dátna dándòho-gá cue ñáyiú cáchí-gá cúu déhe-gá, te ñá díú déhe mee-gá cúu-ndó te núu ducaⁿ, chi cùu-ndo dátna cue ñáyiú ñá túú cutnuni yoo cùu tátá-xi.

⁹ Te nchoo sá naha-o sá cutnàhá ní cuu landú-ó ní sanu ichi ñaha tátá-ó nàcuáa tàù-xi cunduu, te ducaⁿ ní xóo canéhe-o sá yíññu núu-güedé te díu-ni ducaⁿ nèhe-o sá yíññu núu-güedé vitna. Te núu ducaⁿ ní sándáá íni-ó tátá-ó, te ío-gá xini ññu-xi quíndáá íni-ó Tátá-ó Dütú Ndiöxi cuendá ducaⁿ nduu táhú-ó cundecu-o ndíhi-gá ní caa ní quíhiⁿ, chi díu-gá cúu-gá Yáa ní chihí íni-ó.

¹⁰ Te cutnàhá ní cuu landú-ó, ñá túú tíni nduu ní cániha tátá-ó ní sanu ichi ñaha-güedé xii-o nàcuáa ní cuu íni mée-güedé. Te Yá Ndiöxi ducaⁿ dandoho ñaha-gá xii-o sànu ichi ñaha-gá cuendá cúu-xí sá váha sá cúu-xí-ó, te ducaⁿ quide-gá cuendá nchoo cáda ndáá-ó dátna quidé mée-gá.

¹¹ Te òré véxi ññⁿ tñundòho sá cúu-xí-ó te ñá túú cudíí íni-ó chi dandihú íni ñáhá-xí xi-o. Te nchaa ñáyiú ngúnu ichi sá cuendá nchaa

tnúndòho-án te ngüíta-yu quide ndáá-yu, te ío váha cùu iní-yu ndècú-yu.

Vá dáquèe tìhú-ó tnùhu Yá Ndiòxi

12 Te núu xián ío chí ndúcú ndèe-gá canchicúⁿ nihnu-ndo ichi Xítóhó Jesucristú, te vá dícó yica cùu iní-ndó cànchicúⁿ nihnu-ndo ichi-gá.

13 Te cada váha-ndo cùndecu-ndo ichi-gá cuèndá nchaa ñáyiú sàni ìⁿ sàni úú iní-xi níhí ndèé-yu cundecú-yu ichi-gá te vá ná tùhú iní-yu canchicúⁿ nihnú-yu.

14 Te nducu-ndo nàcuáa cada-ndo cùndecu váha-ndo ndìhi cue tnahá ñáyiú-ndo, te ío cada váha-ndo cùndecu-ndo nacuáa cundáá-ndó núú Yá Ndiòxi chí núu vá dúcáⁿ càda-ndo te vá ndúú tãhú-ndó cùndecu-ndo ndìhi-gá.

15 Te ío váha cada cuèndá-ndó nàcuáa cada-ndo cùndecu-ndo, chí núu ñáhá te vá chindèe ñaha-gá Yá Ndiòxi xii-ndo. Te ío váha cada cuèndá tucu-ndo nàcuáa cundecu-ndo vá cáni cuèhé iní-ndó cuèndá Yá Ndiòxi, chí núu ducaⁿ na càda-ndo te dava-gá ñáyiú ndècu ndìhi-ndo ichi-gá tnahá-yu ngüíta-yu ducaⁿ càdá-yu, te vá cùndecu váha-gá-ndó ndìhi-yu ichi-gá.

16 Te cada cuèndá tucu-ndo sá vá cùndecu-ndo ichi díí iní, te ní vá dáquèe tìhú-ndó ní ìⁿ sá cùú cuèndá Yá Ndiòxi dàtmá ní quide ndíi Esàú, chí sá cuãñaha tãtá ndíi-án nduu tãhú ndíi ní cùu ní dama ndíi ìⁿ cóhó comidá.

17 Te nchòhó sa ñaha-ndo sá cùtnáhá ní cuini ndíi Esàú cacáⁿ tãhú tãtá ndíi núú Yá Ndiòxi cuèndá nchaa sá ndúú tãhú ndíi ní cùu, te ñá túú ní xicáⁿ tãhú tãtá ndíi núú Yá Ndiòxi nàcuáa cuini mée ndíi ní cùu. Te ní ndáhyú víhí ndíi, te cuéi ducaⁿ ní quide ndíi dico ñá túú ní ndàcu-gá ndíi nànhí ndíi tãhú sá ní dama ndíi comidá.

18 Te cue ñáyiú isràel ní sátuhá-yu ìⁿ yucu núú càyú ñuhú, te nchòhó ñá túú ndèé ducaⁿ sàháⁿ tuha-ndo ìⁿ yucu núú càyú ñuhú dàtmá ní quide cue ñáyiú-án. Te cùtnáhá ducaⁿ ní sátuhá-yu yucu-án te ní cunee víhi nihíi yucu-án, te ní quene táchi níhi.

19 Te ní tecú dóho-yu ní cãháⁿ ìⁿ cútú, te ní tecú tucu dóho-yu ní cãháⁿ Yá Ndiòxi ní cãháⁿ ndìhi ñaha-gá xii-yu. Te nchaa ñáyiú ní tecú dóho-xi ní cãháⁿ-gá te ní cuini-yu sá vá cãháⁿ-gá.

20 Te ducaⁿ ní quidé-yu chí ñá túú ní cùndee iní-yu nàcuáa ní cãháⁿ-gá, te duha ní cachí-gá: “Te cuéi ìⁿ quití nà yáha xití yucu-a, te cahni-ndo-di ndíhi yúú àdi ndìhi ìⁿ yutnu puyá”, duha ní cachí-gá.

21 Te sá dúcáⁿ ní quide-xi ní xini-yu xián ío ní dáyuhú ñáhá-xi xii-yu. Te tnahá té Moisés ní yùhú-dé, te ní cachí-dé: “Quídi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-án ní sàháⁿ tuhá-yu yucu-án, dico cada iní-ndó sá sá ní tuha-ndo yucu Sión sá ndécú núú ndécú Yá Ndiòxi, ndìhi ñuu-gá ñuu Jerusalem sá caá àndiu te diu-gá cùú-gá Yá ndécú nchaa nduu nchaa quíú. Te diu-ni xián xindecu cuèhé víhi cuè espirítú xínú cuèchi núú-gá

23 chíñuhu ñaha-xi xii-gá. Te nchòhó cùú-ndó cuè ñáyiú cùu cuèndá Yá Ndiòxi, te ní tnahá tnùhu-ndo ndìhi nchaa dava-gá ñáyiú cùu cuèndá-gá, ñáyiú yòdo tnuní núú tütú-gá ndécú àndiu, te diu-ni ñáyiú-án cuãñaha-gá xii-yu sá ndúú tãhú-yu. Te nchòhó ní tuha-ndo Yá Ndiòxi Yáa cada ndáá yicá cuèchi nchaa ñáyiú. Te cada iní-ndó sá ní tnahá tnùhu-ndo ndìhi cue ñáyiú ní quide ndáá ní xindecu ichi Yá Ndiòxi ñuyíú-a. Te ñáyiú-án ñá túú tnahí-gá ná cùmání-yu vitna ndècú-yu núú-gá.

24 Te ní tnahá tnùhu-ndo ndìhi Xítóhó Jesucristú Yáa ní quide nàcuáa cada Yá Ndiòxi ingá núú sá váha sá cùú-xi nchaa nchoo ñáyiú ndècu ñuyíú-a, chí ní sati ñiñí-gá te ní xihí-gá núú cùrúxi. Te níñí Xítóhó Jesucristú ñá túú ìⁿ-ni cuu-xi ndìhi níñí ndíi Àbél, chí diu cuèndá ñiñí-gá-án ní quide càhu iní Yá Ndiòxi nchaa cuèchi-o.

25 Núu xián ío cada cuèndá-ndó vá dáquèe tìhú-ndó tnùhu cãháⁿ Yá Ndiòxi, chí nchaa ñáyiú ní xindecu ndéé sanaha dùcaⁿ ní quidé-yu ní dáquèe tìhú-yu tnùhu ní cãháⁿ-gá ñuyíú-a sá cùú-xi-yu. Te ñá túú ní cãcu-yu chí ní nacháhu-yu sá dúcáⁿ ní quidé-yu. Te uuⁿ-gá tucu nchoo chí vá cãcu-o te nùu ducaⁿ na dàquee tìhú-ó tnùhu cãháⁿ Yá Ndiòxi ndéé àndiu sá cùú-xi-ó.

26 Te cùtnáhá ní cãháⁿ Yá Ndiòxi ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú ducaⁿ quidi-í chí tnahá àndiu quidi-í”, càchí-gá.

27 Te sá dúcáⁿ cãháⁿ-gá sá ingá xito tucu ducaⁿ càda-gá xián cùtnúni sá ncháándi tìhú sá tùu ndèhe-o danaa-gá. Te nchaa sá ñá túú ndèé tùu quini-ó ñuyíú-a xián vá quidi-xi te ní vá náá-xí.

28 Te núú ní cachí Yá Ndiòxi nduu tãhú-ó cùndecu-o chí mee-gá táxi tnùnì-gá xián, te ní vá quidi-xi te ní vá náá-xí. Te xián ío xini ñuhu-xi ndacáⁿ tãhú-ó núú-gá, te yiñuhu yiñuhu cunu cuechi-o núú-gá nàcuáa cuu váha iní-gá, te ducaⁿ cùhuⁿ iní-ó sá ìo càhu cuu-gá.

29 Te Tãtá-ó Dütú Ndiòxi cùú-gá dàtmá ìⁿ ñuhú chí danàa-gá nchaa sá ñá túú quide nàcuáa cuu váha iní-gá.

Nàcuáa tàù-xi cada-o cuèndá cuu váha ini Yá Ndióxi

¹ Te nchaa nchòhó ñáyiú ndècu ichi Xítohó Jesucristú, vá dáñá ndéè-ndó cùu ini tnáhá-ndó nàcuáa ndècu-ndo ichi-gá.

² Te cunaha-ndo sá núu íó ñáyiú ñùhu ichi ní quexió-yu vehe-ndo te cuáñaha-ndo vèhe ndetatú-yu, te cuáñaha-ndo sá cáxi-yu. Chì davá-yu ndéé espíritú xínú cuèchi núu Yá Ndióxi ní sáháⁿ vehé-yu ní queheⁿ cuèndá-yu te ñá túú ní cùtnuní ini-yu sá díú espíritú xínú cuèchi núu-gá cúu-xí.

³ Te ndacu tucu ini-ndó cuè ñáyiú xixíhi vecaá, te cada ini-ndó sá tnáhá-ndó yíhi-ndo vecaá ndíhi-yu. Te ndacu tucu ini-ndó nchàa ñáyiú ío ndòho, te cada ini-ndó sá tnáhá-ndó ndòho-ndo ndíhi-yu.

⁴ Te nchaa ñáyiú na càchí-yu sá ñⁿ sá váha cùu-xi sá ñⁿ tée ndíhi ñⁿ ñadhí ná nihí tnáhá-yu candeca tnáhá-yu. Te nchòhó cue tée vá cání ini-ndó cáháⁿ ndíhi-ndo ñadhí te núu ñá díú ñadhí-ndó cúu-yu. Te ducaⁿ-ni nchòhó cue ñáyiú díhi tucu vá cání ini-ndó cáháⁿ ndíhi-ndo tée te núu ñá díú yí-ndo cuu-güedé, chí Yá Ndióxi dandòho-gá nchaa ñáyiú ndècu ichi díú ini.

⁵ Te vá cúhúⁿ ini-ndó mèe-ni díhúⁿ. Te núu nándi cùu nchaa sá ndécú ndíhi-ndo te díu-ni nchaa xíⁿ sa nduu vétú ini-ndó, chí Yá Ndióxi ní cachí-gá: “Ní ñⁿ nduu vá dáñá nihnu ñaha-í xii-ndo, chí nchaa-ni nduu chindee ñaha-í”, duha ní cachí-gá.

⁶ Te xíⁿ núu nchoo ñá yuhu ní ini-ó cáháⁿ-ó ñⁿ ñⁿ-o, te cachí-ó:

Yá Ndióxi cúu-gá Yáá chindèe ñaha xii-í, núu xíⁿ ñá túú yùhú-í cuèi nándi cáháⁿ ñáyiú cada ñáhá-yu xii-í. Duha cachí-ó.

⁷ Chí ndácú ini cue tée ní sanu ichi ñaha xii-ndo ichi Xítohó Jesucristú cue tée ní cáháⁿ tnúhu Yá Ndióxi núu-ndó, te ío váha chí nàcuáha cuèndá nàcuáa ní quide nchaa cue tée-áⁿ ní xíndecu-güedé ndéé ní sáá nduu ní xíhi-güedé. Te ío quindáá ini-ndó Yá Ndióxi dátñá ní xóo cada cue tée-áⁿ.

⁸ Te dátñá-ni ní quide Xítohó Jesucristú ndéé sanaha díu-ni ducaⁿ quide-gá vitna, te díu-ni ducaⁿ càda-gá ndéé núu cuaháⁿ núu vèxi.

⁹ Te vá dáñá-ndó mèe-ndo dandahú ñáhá ñáyiú dacáháⁿ ñáhá xii-ndo natuha-ndo ingá ichi, ñáyiú dānehé tnàha ñáyiú-xi nándi sá ní cutúha-yu, te nchaa xíⁿ ñá túú ñⁿ-ni caháⁿ-xi ndíhi tnúhu sá ndécú ndíhi-ndo. Te Yá Ndióxi chindèe ñaha-gá xii-o nàcuáa nihí ndéé-ó cùndecu-o ichi-gá, te ducaⁿ te cuu-xi sá váha sá cúu-xí-ó, te ñá díú cuèndá ñⁿ sá xéxi-ó nihí ndéé-ó ndècu-o ichi-gá. Te dava ñáyiú càchí-yu sá dáva núu comidá

cuu caxi-o te dava ñáhá nàcuáa nihí ndéé-ó cùndecu-o ichi-gá, dico ñá ndáá sá sá dúcáⁿ vá cáxi-ó nchaa núu comidá nihí ndéé-ó cùndecu-o ichi-gá.

¹⁰ Chì Xítohó Jesucristú ní xíhi-gá cuèndá-ó núu cùrúxi, te nchaa ñáyiú nchicúⁿ nihnu-ni quide nchaa nacuáa ní quide nchaa dútú ní xinu cuechi núu Yá Ndióxi ndéé sanaha, ñáyiú-áⁿ vá cúu tnáhá tnúhu-yu ndíhi Xítohó Jesucristú Yáá ní xíhi núu cùrúxi sá dúcáⁿ quidè-yu.

¹¹ Chì dútú cùnùu-gá ní xíndecu ndíhi cue ñáyiú isráél, tée-áⁿ ní xóo canehe-dé ñíhi nchaa quiti ní xóo cahni-dé ní xóo quíhu ndéé xiti cuartú ní cuu íi-gá. Te ducaⁿ ní xóo cada dútú-áⁿ cuèndá cada càhnu ini Yá Ndióxi nchaa yícá cuèchi ñáyiú, te cuñú nchaa quiti-áⁿ ní xóo cahmi-güedé ñⁿ xio yuhu ñúu.

¹² Te ducaⁿ ní yáha Xítohó Jesucristú chí ndéé ñⁿ xio yuhu ñúu ní sahni ñaha-güedé xii-gá. Te cuèndá ñíhi-gá sá ní sati núu cùrúxi núu ní xíhi-gá, ní nduu ndoo ní nduu nine ini cue ñáyiú sandáa ini ñáhá xii-gá.

¹³ Te vitna chí ná tùha-o Xítohó Jesucristú te cada ndee ini-ó ndòho-o datñá ní ndòho-gá.

¹⁴ Te ñuyú-á ní ñⁿ xichi ñá túú ndéè cáá ñⁿ ñúu cudí ní caa ní quíhiⁿ cuèndá cundecu-o, dico ducaⁿ-ni ñùhu ini-ó ñⁿ xichi núu ndúú táhú-ó cùndecu-o ní caa ní quíhiⁿ.

¹⁵ Te núu xíⁿ xíní ñùhu-xi sá vá dáñá ndéé-ó chihuhu-o Dútú Ndióxi chí Xítohó Jesucristú ní quide-gá nàcuáa ndacu-o tnáhá tnúhu-o ndíhi Yá Ndióxi, te òrè cáháⁿ ndíhi-o-gá te nuu núu ndacáⁿ táhú-ó núu-gá. Te nchaa tnúhu cáháⁿ-ó òrè cáháⁿ ndíhi-o-gá cúu-xí dátñá ñⁿ táhú sá cúu-xí-gá.

¹⁶ Te vá dáñá ndéè-ndó càda-ndo mee-ni sá váha cundecu-ndo, te ducaⁿ chindee tnaha-ndo ñⁿ ñⁿ-ndo ndíhi sá ndécú ndíhi-ndo. Te núu ducaⁿ na càda-ndo te caní ini-ndó sá cúu-xí dátñá ñⁿ táhú sá ío váha cùu ini Yá Ndióxi.

¹⁷ Te quindáá ini-ndó càda-ndo nchaa nacuáa cáháⁿ cue tée yindaha ñaha xii-ndo nacuáa ndècu-ndo ichi Xítohó Jesucristú, chí díu cue tée-áⁿ quidè cuèndá ñáhá-güedé xii-ndo nàcuáa cundecu váha-ndo núu-gá. Te sáá nduu ñacani tnúhu-güedé núu-gá núu ní quide váha-güedé àdi ñá túú ní quide váha-güedé ní xíndecu ndíhi ñaha-güedé xii-ndo. Te núu ducaⁿ na càda-ndo quindáá ini-ndó-güedé te cudíⁿ ini-güedé cundecu ndíhi ñaha-güedé xii-ndo, te vá ndíhú ini-güedé. Te núu vá dúcáⁿ càda-ndo te vá cúu-xí sá váha xii-ndo nchaa sá quidè-güedé sá cúu-xí-ndó.

¹⁸ Te cáháⁿ ndáhú-í núu-ndó sá cáháⁿ ndíhi-ndo Yá Ndióxi cuèndá-ndí. Te

nchúhú cútñúni ndáá iní-ndí sá ñà túú nã cùmání-ndí núú Yá Ndióxi, te ducaⁿ chi ndücu-ndí nàcuáa quide-ndí cundáá-ndí núú-gã.

¹⁹ Te cãháⁿ ndàhú tucu-í núú-ndó sã ïo cãcãⁿ táhú-ndó núú Yá Ndióxi cuendá sá mée-gã ná cádá te ïo ndíhi quixi coto ñaha tucu-í xii-ndo.

Tnúhu ndée núú ní ndíhi-ná

²⁰ Te Yá Ndióxi Yaá quidé cùu váha iní-ó ndècu-o, Yaá-áⁿ ní dándótó-gã Xítohó Jesucristú. Te Xítohó Jesucristú-áⁿ cúu-gã dátñá ìⁿ toli ïo-gã quéné cãva xito mbéé. Te ducaⁿ sãtnahá-xi cùu-gã cuendá sá ní sati níñí-gã te ní xihí-gã, te ducaⁿ ní cuu cuendá sá ní quide ndáá-gã ndíhi Yá Ndióxi sá cádá-gã ingá núú sã váha sá cúu-xí nchòo cue ñáyiú ndècu ñuyíú-a. Te nàcuáa ní quide ndáá-gã ndíhi Yá Ndióxi te ñiú-ni ducaⁿ càda-xi núú cuáhãⁿ núú vèxi.

²¹ Te xicáⁿ táhú-í núú Yá Ndióxi sá mée-gã ná chindee ñaha-gã xii-ndo cuendá cada-ndo mée-ni sá váha nàcuáa cuini mée-gã, te mee-gã ná cádá ñaha-gã xii-o nchãa sá váha sá sání iní-gã. Te ñiú-ni ducaⁿ na tàuchiuⁿ-gã cada Xítohó Jesucristú sá cúu-xí-ó, ñuha xicáⁿ táhú-í núú-gã. Te vitna nchaa-o chí ná càchí-ó sã ïo cãhnu cuu Xítohó Jesucristú ni caa ní quíh^ñ. Te ducaⁿ na cùnduu.

²² Te cãháⁿ ndàhú-í núú nchòhó ñáyiú ndècu ndíhi-í ichi Xítohó Jesucristú sá cádá cãhnu iní-ndó nàcuáa ndüu nchaa tnúhu cãháⁿ-í dásàhú ñáhà-í xii-ndo, chi ñá túú vãi tnúhu chido tnuní-í núú tütú-a sá cúu-xí-ndó.

²³ Te càchí tnúhu-í xii-ndo sã tè Timùteú téé ndècu ndíhi-o ichi Xítohó Jesucristú ní cácu-dé ñá túú-gã yihí-dé vecaá. Te núu na quèxio ndíhi-dé núú ndécú-í te quixi-í ndíhi-dé núú ndécú-ndó quixi coto ñaha-ndí.

²⁴ Te cúñaha-ndo sã ïo na càda ndee iní nchaa cue téé yindaha ñaha xii-ndo nacuaá ndècu-ndo ichi Yá Ndióxi. Te ducaⁿ cññaha tucu-ndo xii nchaa dava-gã ñáyiú cùu cuendá-gã sã ïo na càda ndee iní-yu. Te cue ñáyiú nacióⁿ Itàliá ñáyiú ndècu ndíhi-o ichi-gã càchí-yu sã ïo cada ndee iní-ndó.

²⁵ Te Yá Ndióxi ïo na chindee chítúú ñaha-gã xii-ndo nchãa-ndo. Te ducaⁿ na cùnduu. Te ïo chí cádá ndèe iní-nã vitna.

TUTÚ NÍ CADÚHA TÉ SANTIAÚ

Té Santiaú cadúha-dé tutú quíhíⁿ ndaha ñáiyu isráel nchíté nuu nñhí ñuyú

¹ Yúhú té Santiaú xínú cuèchi-í núú Yá Ndióxi ndíhi núú Xítohó Jesucristú, te tèe-í tnúhu-a quide ndee iní ñáhà-í xii nchòhó ñáiyu isráel nchíté nuu nñhí ñuyú-a.

Yá Ndióxi táxi-gá sá xini tnúni-ó

² Te nchòhó ñáiyu ndècu ndíhi-í ichi Xítohó Jesucristú, ío cudíí iní-ndó cùndecu-ndo cuéi ná cùu sá ùhú véxi cuèndá-ndó,

³ chi ducaⁿ te cutnùni iní-ndó sá sàndáá ndisa iní-ndó-gá, te cunduu càhnu iní-ndó cuéi ná ná yáha-ndo.

⁴ Te cunduu càhnu-ni iní-ndó te ducaⁿ te cuu-ndo ñáiyu váha, te cundáá-ndó núú Yá Ndióxi, te ducaⁿ te ñá túú-gá ná cumání-ndó núú-gá.

⁵ Te núu cùmání sá xini tnúni-ó, te cacaⁿ-ó núú Yá Ndióxi te mee-gá taxi-gá, chi ío váha iní-gá, te ñá túú cùnini iní-gá núú-ó.

⁶ Te ní yùhu ní iní-ó cacaⁿ-ó núú-gá, te quindáá ndisa iní-ó sá táxi-gá sá cùmání quini tnúni-ó, te vá caní ñⁿ caní úú iní-ó. Chi nchaa ñáiyu sàni ñⁿ sàni úú iní-xi cùu-yu dàtná ndute lámár cuáháⁿ-xi duha cuáháⁿ-xi dàcáⁿ nàá-xi òré quéné táchi.

⁷ Te nchaa ñáiyu ducaⁿ sàni iní-xi, te vá caní iní-yu sá nñhí-yu sá xicáⁿ-yu núú-gá.

⁸ Chi nchaa ñáiyu sàni ñⁿ sàni úú iní-xi ñá cùnùni iní-yu ndèdaca sá sání iní-yu cadá-yu.

⁹ Te nchaa ñáiyu ndàhú ñáiyu ndècu ichi-gá, xini ñuhu-xi ñá túú-gá ná caní iní-yu, mee-ná cudíí iní-yu, chi Yá Ndióxi chindèe ñaha-gá xii-yu.

¹⁰ Te nchaa ñáiyu cuica xini ñuhu-xi cundecu váha iní-yu núú Yá Ndióxi cuéi ná ná yáha-yu. Chi ñáiyu-áⁿ cùu-yu dàtná itá nchaa cùhú sá ñá túú cùdii naha.

¹¹ Chi òré ní cuu níhi cahni nchíanchii, te ní dádii-ni-xi nchaa cùhú cuí-áⁿ te ní cóyo-ni nchaa itá-xi, te ñá túú-gá cáá vii. Te ducaⁿ sàtnahá-xi cùu ñáiyu cuica chi núú chíúⁿ-ní-yu xihí-yu.

Nchaa ñáiyu quide cahnu iní-xi nchaa sá yáha-yu

¹² Te váha táhú nchaa ñáiyu quide cahnu-ni iní-xi cuéi nándi sá yáha-yu ndècú-yu ichi Yá Ndióxi, chi òré ná ndíhi nchaa xíáⁿ yáha-yu, te cuáñaha Yá Ndióxi ñⁿ coróná váha vihi cundecu ndíhi-yu, te ndáá chi ducaⁿ caháⁿ Yá Ndióxi sá táxi-gá xii nchaa nchoo ñáiyu ñuhu iní ñáhá xii-gá.

¹³ Te nchaa ñáiyu sàni iní-xi cada nándi sá cuèhé sá dúhá, te vá caní iní-yu sá Yá Ndióxi táuchiuⁿ-gá ducaⁿ cadá-yu, chi Yá Ndióxi ñá quíú te caní iní-gá cada-gá ñⁿ sá cuèhé sá dúhá, te ní ñá túú tàuchiuⁿ-gá sá dúcáⁿ cadá-yu.

¹⁴ Te cuini-yu cadá-yu nchaa sá cuèhé sá dúhá chi ducaⁿ véxi iní-yu.

¹⁵ Te nchaa ñáiyu ío ñuhu iní nchaa sá cuèhé sá dúhá te quide-yu, te núu na cada-ní-yu te cuíta nihnú-yu.

¹⁶ Te nchòhó ñáiyu ío cùu iní-í ndècú ndíhi-í ichi Xítohó Jesucristú, vá dáñá-ndó mée-ndo dandahú ñáhá ñáiyu xii-ndo.

¹⁷ Chi nchaa sá váha véxi-xi núú Yá Ndióxi Yáá ndècú àndiu, chi diu mee-gá ní cadúha-gá andiu ndíhi nchaa chodíni, ndíhi yóó, ndíhi nchíanchii. Te Yá Ndióxi ñá túú ndí queheⁿ ndí queheⁿ-gá sá caní iní-gá, te ní ñá túú cùu-gá dàtná ñⁿ cuándahú cuáháⁿ-xi duha cuáháⁿ-xi dàcáⁿ, chi ñⁿ-ní sá sání iní-gá.

¹⁸ Te Yá Ndióxi ní cuini-gá sá cùu-ó dèhe-gá, te ndáá sá cùu-ó dèhe-gá chi sàndáá iní-ó tnúhu-gá. Te nchoo ñáiyu sàndáá iní-xi tnúhu-gá cùnù-gá-ó chi ní nduu-o dèhe-gá.

Ichi ndáá cuiti

¹⁹ Te nchòhó ñáiyu ío cùu iní-í ndècú ndíhi-í ichi Xítohó Jesucristú, cundedóho-ndo ñⁿ tnúhu na caháⁿ-í-a. Te cuini-í sá cundecu túha-ndo cùndedóho-ndo tnúhu Yá Ndióxi, te caní váha iní-ndó nàcuáa caháⁿ-ndó, te cunduu càhnu iní-ndó te vá cùdèéⁿ-ndó.

²⁰ Chi núu na cùdèéⁿ-ó te ñá túú quide váha-o núú Yá Ndióxi.

²¹ Te daña-ndo nchaa sá cuèhé sá dúhá ío ñuyú-a. Te quindáá iní-ndó tnúhu Yá Ndióxi ndècú ndíhi-ndo, te vá cunduu sáá iní-ndó, te ducaⁿ te naníhí tàhú-ndó.

²² Te quindáá iní-ndó tnúhu-gá te vá cuèndá-ni cundedóho-ndo, chi núu na cùndedóho-ndo te vá tníⁿ-ndó ñá, te dicó-ni dandahú-ndó mée-ndo te vá naníhí tàhú-ndó.

²³ Chi nchaa ñáiyu dicó-ni sàcùndedóho tnúhu-gá te ñá túú sàndáá iní-yu, ñáiyu-áⁿ cùu-yu dàtná ñⁿ ñáiyu sàcùndèhé-ni núú-xi núú yutátá.

²⁴ Chi nini ndèhé-yu ní xini-yu núú-yu, te ní xócáni-yu te ní nacuanaa-ni-yu nàcuáa caa núú-yu. Te ducaⁿ sàtnahá-xi cùu ñáiyu sàcùndedóho tnúhu Yá Ndióxi, te ñá túú tníⁿ-yu.

²⁵ Te nchaa ñáiyu dàcuaha ndisa tnúhu ní dándóo Yá Ndióxi nihnu-ni-yu ichi-gá, chi ñá díú ñⁿ sá vèe cùu-xi. Te ñáiyu-áⁿ ñá túú dicó-ni sàcùndedóho-yu chi quide ndáá-yu núú-gá, te cùdii iní-yu xindècú-yu.

²⁶ Te nchaa ñáyiú cächí sá ndécú ichi ndáá te cùtexinu-ní cáháⁿ-yu, te xiáⁿ dicó-ní dándahú-yu mée-yu sá ndécú-yu ichi ndáá.

²⁷ Te núu ndècu-o ichi ndáá cuíti ichi Dútú Ndióxi, te chindee-o nchaa ñáyiú ní ndóo ndàhú, ndihi ñáyiú quèé ndécú ndihi tnúndoho tnúhu ndàhú, te vâ cádá-ó nãndi sá cuèhé sá dúhá ió ñuyúú-a.

2

Èⁿnuu-ni cùu iní-ó nchaa tnaaha ñáyiú-o

¹ Te nchòhó ñáyiú ndècu ndihi-í ichi Xítóhó Jesucristú Yáá cùnùu, èⁿnuu-ni cáháⁿ ndihi váha-ndo nchaa tnaaha ñáyiú-ndo.

² Te núu núu nátácá-ndó chiñuhu-ndo Yá Ndióxi ní sáá èⁿ tée ío váha càa dóo ñihnú-dé, te ní sáá tucu èⁿ tée ñihnu dóo ndàhú,

³ te núu tée ñihnu dóo váha-ní-áⁿ néhé-ndó sá yíñùhu núú-dé, te taxinucóo-ndo-dé èⁿ núú xilé váha, te tée ndàhú-áⁿ daxócóo-ndo-dé èⁿ xio àdi canucóo-ndo-dé núú ñùhú,

⁴ te núu ducaⁿ na càda-ndo te ñá túú quide váha-ndo. Chi èⁿ-ni-dé cúú ñní-ndó, te èⁿ-dé ñá túú cùu iní-ndó.

⁵ Te nchòhó ñáyiú ío cùu iní-í ndécú ndihi-í ichi Xítóhó Jesucristú, chí cùndedóho tucu tnúhu na cáháⁿ-í-a. Yá Ndióxi cáháⁿ-gá vâi ñáyiú ndàhú cuendá tnahá tnúhu ndihi ñàhá-yu xii-gá, te ndècu váha-gá-yu dàcúúxi ñáyiú cuica ñáyiú ñá túú sándáá ñní tnúhu-gá, chí ní cächí-gá sá ncháá ñáyiú na cùu iní ñàhá xii-gá nduu táhù-yu cundecú-yu ndihi-gá ní caa ní quíhúⁿ.

⁶ Te nchòhó, ñá túú nèhe-ndo sá yíñùhu núú ñáyiú ndàhú, chí núú ñáyiú cuica-ni nèhe-ndo sá yíñùhu. ¿Te náa ñá cùtnùní iní-ndó sá ñáyiú cuica dándoho ñaha-gá-yu xii-ndo, te cãndeca ñàhá-yu sàháⁿ núú cuè tée cùchiuⁿ-áⁿ?

⁷ Te diu-ní-yu ío cáháⁿ cuèhé-yu cuendá Xítóhó Jesucristú, te nchòhó sa ní nduu-ndo dèhe-gá.

⁸ Te èⁿ ndudú cùnùu-gá ní cáháⁿ Yá Ndióxi ní ngódó tnùnì núú tùtú-gá cächí-xi sá cúú ñní-ó tnaaha ñáyiú-o dàtná cúú ñní-ó mée-o. Te núu ducaⁿ na càda-o te quide váha-o.

⁹ Dico núú ñá túú cùu iní èⁿnuu-o cuè tnaaha ñáyiú-o, te cuu cuèchi xii-o chí ñá túú quide-o nacuaá cáháⁿ Yá Ndióxi.

¹⁰ Te núu èⁿ ñáyiú ndàunihnu èⁿ sá cáháⁿ Yá Ndióxi, te dava-ni quidé-yu ña, te ñáyiú-áⁿ ñá túú quidé-yu nacuaá cáháⁿ ndudú Yá Ndióxi.

¹¹ Te Yá Ndióxi ní cächí-gá sá tée ndècu ñadihí-xi vâ cáháⁿ ndihi-dé ñngá ñadihí. Te diu-ni-gá ní cächí-gá sá vâ cáhni-ó tnaaha ñáyiú-o. Te cuèí ñá túú cáháⁿ ndihi-o ñngá ñadihí, te núu sàhni-o tnaaha ñáyiú-o te ñá túú quide-o nacuaá cáháⁿ ndudú Yá Ndióxi.

¹² Te nchoo xini ñihu-xi cáháⁿ-ó tnúhu váha te cada ndáá-ó, chí ñá díú èⁿ sá vèe cùu-xi sá ní cächí Yá Ndióxi cada-o. Te mee-gá ní cächí-gá sá cádá ndáá-gá cuèchi-o na sàá nduu.

¹³ Te nchaa ñáyiú ñá túú cùndahú ñní tnaaha ñáyiú-xi, te vâ cùndahú ñní ñàhá-gá xii-yu na sàá nduu càda ndáá-gá cuèchi-yu. Te nchaa ñáyiú cùndahú ñní tnaaha ñáyiú-xi te Yá Ndióxi cùndahú ñní ñàhá-gá xii-yu na sàá nduu-áⁿ.

Quindáá iní-ó Yá Ndióxi te cada váha-o

¹⁴ Te nchòhó ñáyiú ndècu ndihi-í ichi Xítóhó Jesucristú, te núu cächí-ó sá sándáá iní-ó Yá Ndióxi te ñá túú quide-o sá váha, te ñá túú ndèé nãndihi-xi, chí vâ nãnihí tàhù-ó te núu ducaⁿ na càda-o.

¹⁵ Te núu ndèhe-o èⁿ tnaaha ñáyiú-o ñá túú dõo-yu àdi ñá túú sá cùchitó-yu,

¹⁶ te xàhaⁿ-o: “Núhú-n te nducu-n dóo cuihnu-n te nducu-n sá cãxiⁿ”, xàhaⁿ-o, te ñá túú nã sãñaⁿ-o, te sá dúcãⁿ quide-o te ñá túú quide váha-o.

¹⁷ Te núu cächí-ó sá sándáá iní-ó Yá Ndióxi te ñá túú quide váha-o ndècu-o, te vèdana nãndihi-xi.

¹⁸ Te ío ñáyiú cächí-yu sá sándáá iní-yu Yá Ndióxi, te ío ñáyiú cächí-yu sá mée-ní sá váha quidé-yu. Te yúhú cächí-í sá núu ñá túú quide-o sá váha, te ñá túú sándáá iní-ó Yá Ndióxi. Te nchoo quide-o sá váha núu xiáⁿ cùtnùní iní-ó sá sándáá iní-ó-gá.

¹⁹ Te ío ñáyiú cächí sá èⁿdii-ni Yá Ndióxi ndécú, te váha-ni cáháⁿ-yu. Te tnahá yucu ñávàha ndihi nchaa espíritu cùndihi-xi xini-xi sá ndécú èⁿdii-ni Yá Ndióxi, te yúhú-xi dico ñá túú tñi-xi tnúhu-gá.

²⁰ Te ío ñí díquí-ó te núu na cächí-ó sá sándáá iní-ó Yá Ndióxi, te vâ cádá-ó sá váha.

²¹ Te ñani tnahá-ó ndii Ábrahám tée ní xindecu ndéé sanaha ní ngúndecu váha ndii núú Yá Ndióxi, chí ní xito ndéé ñàhá-gá xii ndii núu ndisa sá cáhni ndii dèhe ndii té Isàac nduu táhú-gá ní cùu, te dàvã-áⁿ ní cùtnùní iní-gá sá ío sándáá iní ñàhá ndii xii-gá, núu ñá ní dàña-gá cahni ndii dèhe ndii.

²² Te ñaha-o sá ndii Ábrahám ñá díú-ní sá mée-ní sá ní sándáá iní ñàhá ndii xii-gá, chí ní tñi ndii tnúhu-gá.

²³ Te ducaⁿ ní quee ndáá-xi nacuaá cáháⁿ-xi núú tùtú Yá Ndióxi núú cächí-xi: “Ndii Ábrahám ní sándáá iní ndii ní quide ndii nchaa nacuaá ní xàhaⁿ Yá Ndióxi, te ní ngúndecu váha ndii núú-gá, te ní cächí-gá sá cúú ndii èⁿ tée ío váha tnahá tnúhu ndihi-gá”, duha cächí-xi núú tùtú-gá.

²⁴ Te xiáⁿ cùtnùní iní-ó sá ñá díú mée-ni sá quindáá iní-ó Yá Ndióxi, chí núu na càda-o nacuaá cuu váha iní-gá te ngúndecu váha-o núú-gá

²⁵ dàtná ní quide-gá tá Ràháb ìᵐ ñàdìhí ní xíndecu ndéé sanaha, chí xíchí-áᵐ ní xíndecu-xi ichi díí ìní, dico ní tuha-xi ichi Yá Ndiòxí te ní ngúndecu váha-xi núú-gá, chí ní chindee-xi cuè téé isráèl cue téé ní xica chíuᵐ-gá, te ní sanu ichi ñaha-xi xii-güedé ìᵐ ichi núú vâ nánihí ñáhá cuè téé cùu úhú ìní ñáhá xii-güedé.

²⁶ Te nchaa ñáyiú cächí sá sàndáá ìní Yá Ndiòxí, te ñá túú quidé-yu nácuáa càháᵐ-gá ñáyiú-áᵐ cùu-yu dàtná ìᵐ ñáyiú ní xíhí. Chí ñá túú-gá ndíxí tùu ìní-yu nchaa sá cuèhé sá dúhá quidé-yu. Duha sátnahá-xi cùu nchaa ñáyiú ñá túú cuini tñiᵐ tñúhu càháᵐ Yá Ndiòxí.

3

Nàcuáa quide yaa-o

¹ Te nchòhò ñáyiú ndècu ndihí-í ichi Xítóhò Jesucristú, vâ ncháá-ndó càni ìní-ndó cùu-ndo mestrú dacuàha-ndo ñáyiú tñúhu Yá Ndiòxí chí íí cáá-xí. Chí na quítnahá nduu nácuáha-o cuendá núú-gá, te núu ñá túú ní quide ndáá-ó ñá, te vâ cùú váha ìní-gá núú-ó.

² Te nchaa-o ío cuèhé sá ñá túú váha quide-o. Te nchaa ñáyiú ñá túú càháᵐ tñúhu cuèhé tñúhu duha cùu-yu ñáyiú ñá túú nâ cùmání chí ío ndáá quidé-yu. Te xini-yu cotñiᵐ-yu mèe-yu, te quide váha-yu núú Yá Ndiòxí.

³ Te dàtná cuini-ndó cùu ìᵐ quiti te núu na chíhi-o frenú yuhu-di, te cotñiᵐ-o-di te ngúnu ichi-di, te ducaᵐ sátnahá-xi cùu ñáyiú sacótniᵐ mee-xi, chí ñá túú càháᵐ-yu tñúhu cuèhé tñúhu duha.

⁴ Te dàtná cuini-ndó cùu barcú cuèi nàhnu vihi-xi, dico óré quéné ñihí táchí te tündaha-xi ìᵐ xio, dico téé dàcaca ndacu-dé dáquihíᵐ-dé-xi ndihí ìᵐ yutnu sá dánani-güedé tímú ndáa núú cächí ìní-dé quihíᵐ-xi.

⁵ Te ducaᵐ cùu tucu yaa-o chí ío líhli-xi dico ío cuèhé tñúhu càháᵐ-ó ndihí-xi. Te ducaᵐ-ni sátnahá-xi cùu tucu sá lúhá ñúhú chí sàhmi-xi ìᵐ yucu.

⁶ Te diu-ni ducaᵐ sátnahá-xi cùu yaa-o chí ío cuèhé tñúhu cuèhé tñúhu duha càháᵐ-ó ndihí-xi, te dàcuíta nihnu ñaha-xi xii-o. Te ío cuèhé cuèchi quide-o ndihí-xi cuendá sá ñúyíú-a ñúhu tnahá ñúhú tñiᵐ yucu ñávàha dàtácá nihnu ñaha-xi.

⁷ Te ndacu-o càda masú-ó nchaa núú quiti ío ñúyíú cuèi quiti dééᵐ quiti xica núú ñúhú, te cuèi quiti ndáva, te cuèi cóó, te cuèi quiti ñúhu xití ndute lámár, chí ducaᵐ quide dava cue téé ñúyíú-a.

⁸ Dico yaa-o chí vâ yò ìᵐ ndàcu cada masú ñáhá xii-xi nacuáa càháᵐ-ó mèe-ni tñúhu váha ndihí-xi, chí mee-ni tñúhu cuèhé tñúhu duha cùnuu-gá càháᵐ-ó ndihí-xi. Te cùu-xi dàtná ìᵐ venénú chí dàtiu-xi ìní-ó.

⁹ Te diu-ni ndihí yàa-o quide cahnu-o Dútú Ndiòxí Yá cùú Tàtá-ó, te diu-ni ndihí yàa-o càháᵐ úhú-ó cuè tnahá ñáyiú-o. Te xini ñúhu-xi vâ dúcáᵐ càda-o, chí mee-gá ní chíhi-gá sá xini tñuni-ó ndihí ìní-ó, dàtná cáá mèe-gá ñúhú ìní-gá.

¹⁰ Te diu-ni yuhu-o quèe tñúhu váha càháᵐ-ó, te diu-ni yuhu-o quèe tñúhu cuèhé tñúhu duha. Te nchòhò ñáyiú ndècu ndihí-í ichi Xítóhò Jesucristú cunaha-ndo sá ñá túú nduu váha-xi ducaᵐ càda-o.

¹¹ Te ñá túú xini-ndó sá ìᵐ núú quèe ñihni ndute, te quèe ndute váha te quèe ndute úá-áᵐ.

¹² Te nchòhò ñáyiú ndècu ndihí-í ichi Xítóhò Jesucristú, te ñá túú xini-ndó sá ìᵐ yutnu ngúxí, te cùuᵐ aceitúná, àdi xini-ndó sá ìᵐ yoho yaha stilé te cùuᵐ ngúxí. Te ducaᵐ cuèi ìᵐ núú quèe ñihni ndute, vâ cùú quèe ndute váha te quee ndute úhá. Te ducaᵐ sátnahá-xi cùu yuhu-o chí vâ cùú càháᵐ-ó tñúhu váha te càháᵐ-ó tñúhu cuèhé tñúhu duha.

Nchaa sá vâha xini tñuni-ó tàxi Yá Ndiòxí

¹³ Te núu ndècu ñáyiú túha tñuu-ndó ñáyiú cùtnumí ìní-xi, te xini ñúhu-xi mee-ni sá vâha cadá-yu, ducaᵐ te cutñuni ìní-ó sá túha ndisá-yu, te vâ cadá càhnú-yu mèe-yu.

¹⁴ Te núu nchoo cuèdú ìní-ó te cuini-ó cùnuu-o núú tñàha ñáyiú-o, te vâ cächí-ó sá túha-o, chí ñá túú quide ndáá-ó te núu ducaᵐ na càda-o.

¹⁵ Chí ñá díú xiáᵐ ní dànehé ñáhá Yá Ndiòxí, chí ñuyíú iha ní cacu ñihnu-xi cuendá sá yùcu ñávàha dàcahu ìní ñáhá-xi.

¹⁶ Te núú ndécú ñáyiú cuèdú ìní ñáyiú cuini cunuú, te yacáᵐ mee-ni ndáhu nàá xíndecú-yu, te ñá túú quide váha-yu, chí mee-ni nchaa sá cuèhé sá dúhá quidé-yu.

¹⁷ Te núu ní taxi Yá Ndiòxí sá xini tñuni-ó, te cada váha-o, te càháᵐ ndihí váha-o nchaa tnahá ñáyiú-o, te tñiᵐ-o tñúhu váha càháᵐ-yu, te cundáhú ìní-ó-güè-yu te chindee-ò-yu, te vâ cáni ìᵐ cani úú ìní-ó, te ío cunduu ndáá ìní-ó.

¹⁸ Te núu cuini-ó ñá túú nâ cuu cundecu-o ñúyíú-a, te cada váha-o sá cùú-xí tñàha ñáyiú-o cuendá sá ñá túú nâ cuu cundecu-o ndihí-yu. Te ducaᵐ te nguínchicúᵐ dava-gá tñàha ñáyiú-o càda váha-yu.

4

Vâ cùú cundecu-o ichi Yá Ndiòxí te cada-o nándi sá cuèhé sá dúhá

¹ ¿Te xini-ndó nâ cuendá nàá ñáyiú te xisahni tñàhá-yu-áᵐ? Te nàa-yu sá tñúhu cuèdú ìní, chí diu-ni xiáᵐ ñúhú ìní-yu, te ñá túú ndècu váha ìní-yu.

² Chí cuini-yu cundecu ndihí-yu ìᵐ sá ñá túú ndècu ndihí-yu, te ñá túú ñihí-yu núu

xiáⁿ xícuu cuédú iní tnáhá-yu, te xícuehé tnáhá-yu, te càni tnáhá-yu, te xísahni tnáhá-yu. Te ñá túú nihí-yu sá cuini-yu chi ñá túú xicáⁿ-yu núú Yá Ndióxi.

³ Te cuéi xicáⁿ-yu ñⁿ sá cuini-yu núú-gá te ñá túú sãñaha-gã, chi ñá túú xicáⁿ-yu ñⁿ sá cúú xii-yu sá vãha, chi ñⁿ sá ná ndiñi-yu núú cáda-yu nchaa sá cuéhé sá dúhá xicáⁿ-yu, núú xiáⁿ ñá nihí-yu.

⁴ Te nchaa ñáiyu ducaⁿ xíquide ío cùu sáá iní-yu núú Yá Ndióxi. Te ñaha-ndo sá ncháá ñáiyu cùdí iní-xi cundecu ichi cuéhé ichi duha cùu úhú iní-yu Yá Ndióxi, chi vá cúú cundecu-o ichi cuéhé ichi duha, te cundecu-o ichi-gá.

⁵ Te ñá túú dió ducaⁿ càháⁿ-xi núú tùtú Yá Ndióxi núú càchí-xi: “Yá Ndióxi ní taxi-gá Espiritú-gá ndécú ndiñi-o. Te Espiritú-gá-áⁿ cuini-xi sá meé-ní-gá cuhuⁿ iní-ó”, duha càchí-xi núú tùtú-gá.

⁶ Te Yá Ndióxi ío chindee ñaha-gá cuendá cada ndáá-ó núú-gá dátaná càchí tucu-xi núú tùtú-gá núú càchí-xi: “Yá Ndióxi ñá túú cùu vãha iní-gá núú ncháa ñáiyu quide cahnu mee-xi, dico chindee-gá cue ñáiyu ndáhú iní-xi”, duha càháⁿ-xi núú tùtú-gá.

⁷ Te cada-ndo nãcuáa càháⁿ Yá Ndióxi. Te vá cáda-ndo nãcuáa cuini yucu ñãvãha, ducaⁿ te xóo cóo ndéé ñáhá-xi xii-ndo.

⁸ Te tñi-ndo tnúhu càháⁿ Yá Ndióxi te cundecu ndiñi ñaha-gá xii-ndo. Te nchaa nchóhó ñáiyu ndècu ichi cuéhé ichi duha daña-ndo ichi-áⁿ te cada vãha-ndo. Te nchaa nchóhó ñáiyu sãni iní cunu cuechi núú Yá Ndióxi te quide-ni-ndo nchaa sá cuéhé sá dúhá, te ñá túú quide vãha-ndo núú ducaⁿ, chi xini ñuhu-xi sá càcáⁿ-ndó núú Yá Ndióxi sá ná ndadá ndòo ndada nine-gá iní-ndó.

⁹ Te ndixi cuéchi iní-ndó ncháa sá quidé-ndó ndéé ndáhyú ndisa-ndo sá ndihú iní-ndó, te ñá díú dà cudí iní-ndó.

¹⁰ Te náhmá-ndó núú Yá Ndióxi nchaa sá ní quide-ndo, te ngúndecu vãha-ndo núú-gá.

Vá càháⁿ-ó ncháa sá quidé tnàha ñáiyu-o

¹¹ Te nchóhó ñáiyu ndècu ndiñi-í ichi Xítoho Jesucristú, vá cuátnúhu tnaha-ndo, chi nchaa ñáiyu sãtnúhu tnaha dicó-ni ndàa nuú-yu ndèhe tnáhá-yu, te ñá túú càháⁿ vãha-yu cuendá tnúhu Yá Ndióxi sá sãnú ichi ñaha xii-yu nãcuáa cundecu-yu, chi dàquee tñú-yu tnúhu-áⁿ. Te núú càchí-ndó sã ñá túú càháⁿ vãha tnúhu Yá Ndióxi, te xiáⁿ quéé-xí sã ñá túú sãndáá iní-ndó tnúhu càháⁿ-gá, te cuini-ndó cùnuu tnúhu-ndo núú tnúhu-gá.

¹² Te mee Yá Ndióxi ní càchí-gá nãcuáa cada-o, te diu-ni mee-gã càháⁿ-gá te núú ní quide vãha-o, àdi ñá túú ní quide vãha-o. Te diu-ni mee-gã dàcácu nihnu ñaha-gá xii-o núú úhú núú ndáhú, te diu-ni-gá daquihíⁿ ñáhá-gá xii-o núú úhú núú ndáhú-áⁿ te núú

vá cáda vãha-o. Te nchoo ñá túú ná cúú-ó, te núú mee-ni ncháa sá quidé tnàha ñáiyu-o cùndehe-o.

Ñá túú cùmuní iní-ó nãsa túndaá-ó ñngá nduu

¹³ Te dava nchóhó càchí-ndó sã vítná àdi tneé quihíⁿ-ndó ñⁿ ñuú, te yacáⁿ cundecu-ndo ñⁿ cúú cada-ndo ñⁿ ndáhú te nihí-ndó díhúⁿ.

¹⁴ Te ní ñá xini-ndó ná cúú sã yãha-ndo vítna àdi tneé. Te nchoo cùu-o datná ñⁿ vícò núhú, chi vícò-áⁿ tnáví ndéhé-ó te tna tnaa-gá sa ní ndóñuhú-xi. Ducaⁿ sãtnahá-xi cùu nchoo chi ñⁿ úú nduu duha vèxi-o ñuyúú-a te ndoñuhu-o.

¹⁵ Te núú sãndáá iní-ó Yá Ndióxi te duha càháⁿ-ó: “Te núú Ndióxi ná càchí-gá sá cùndècu tnaa-o ñuyúú-a te cada chiùⁿ-o”, duha càchí-ó.

¹⁶ Dico mee-ndo chi ío ñí iní-ndó cuini-ndó cùnuu tnúhu-ndo núú Yá Ndióxi, te ñá túú nduu vãha-xi sá dúcáⁿ quide-ndo.

¹⁷ Te núú xini-ó cáda-o sã vãha te ñá túú quide-o, te cùu-xi ñⁿ cuéchi núú-gá.

5

Tnúhu sá dátúha ñaha xii nchaa ñáiyu cuica ñá túú sãndáá iní tnúhu Yá Ndióxi

¹ Te nchóhó ñáiyu cuica ñáiyu cuihna iní-xi cundedóho-ndo tnúhu na càháⁿ-í-a. Vitna ngúita-ndo ndihú iní-ndó, te ndáhyú víhí-ndó, chi quixi ñⁿ tnúndóho cuendá-ndó te ndoho víhi-ndo.

² Te nchaa sã ndécú ndiñi-ndo ndiñi cuita tiu quihíⁿ, te quee tiquidi dóó-ndó,

³ te díhúⁿ-ndó caxi cudi ñuhu. Te xiáⁿ cuita naquini ndéé-ndó tnúndóho sã ñá túú quide vãha-ndo. Te ndiñi-ndo ndiñi díhúⁿ-ndó sã ní taxúha-ndo, chi vitna sa ta cùyatni sáá nduu ndiñi ñuyúú-a.

⁴ Te nchaa cue téé ní quide chiùⁿ núú chíúⁿ-ndó ní ndatnúhu-ndo ndiñi-güedé nãcuáa cháhu-ndo-güedé ní cùu, te ñá túú ní cháhu-ndo-güedé nãcuáa ní xáhaⁿ-ndo xii-güedé, núú xiáⁿ ío ndécucúchi-ndo. Te Yá Ndióxi Yaá ndécú àndiu ní tecú dóho-gá nãcuáa càháⁿ-güedé sá ní dándáhú-ndó-güedé.

⁵ Te nchóhó ñáiyu cuica, sã ndécú vãha-ni-ndo cùndee iní-ndó, núú quide-ni-ndo nchaa sã vèxi iní-ndó. Te cùu-ndo datná ñⁿ quiti núcúhnu mee-ni xèxi-di, te sáá nduu sãhni-güedé-di. Te ducaⁿ sãtnahá-xi cùu nchóhó chi ndècu vãha-ndo vítna, te sáá ñⁿ nduu nãcháhu-ndo ncháa sã quidé-ndó núú Yá Ndióxi te núú vá quindáá iní-ndó-gá.

⁶ Te quide úhú iní-ndó sãhni-ndo cue ñáiyu quide ndáá núú Yá Ndióxi, te ñá túú ná quidé-yu.

Cunduu càhnu iní-ó te cáháⁿ ndihi-o Yá Ndióxi

⁷ Te nchòhò ñáyiú ndècu ndihi-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyíú-a, te cada-ndo dàtná quidé nchàa ñáyiú chihí tatá chi sàcùndetú-yu ndéé cúúⁿ dáú te chihí-yu. Te cùndee-ni iní-yu sàcùndetú-yu ndéé cúúⁿ-gá dáú te cùu itú-yu, te ndùdíí iní-yu.

⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú.

⁹ Te duha ndùu tnúhu cáháⁿ-í núú nchòhò ñáyiú ndècu ndihi-í ichi Xítohó Jesucristú, vá ndácáⁿ cuéchi núú tnáhá-ndó te núú nása cùu ndecu-ndo, chi ñá cuéhé-gá nduu cùmání te quixi Cristú nacuaca ñaha-gá xii-o cùndecu-o núú Yá Ndióxi, te mee-gá cada ndáá-gá cuéchi-o.

¹⁰ Te nchòhò ñáyiú ndècu ndihi-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndióxi ndéé sanaha sá ïo càhnu ní xínuu iní-güedé cuéi nándi ní ndoho-güedé.

¹¹ Te cùtnuní iní-ó sá cúú-ó ñáyiú ío váha táhú-xi te núu na càda cahnu iní-ó nchàa sá ná yáha-o cuèndá Yá Ndióxi. Te nàha-ndo sá ndíí Jób ducaⁿ ní quide ndíí, chi nándi sá ní yáha ndíí te ní quide càhnu iní ndíí. Te sátá ní yáha ní ndoho ndíí, te ío cuéhé sá ní sáñaha Yá Ndióxi xii ndíí. Chi ío váha iní-gá te ío cùndahú iní-gá nchaa ñáyiú ío càhnu iní-xi.

¹² Te nchòhò ñáyiú ndècu ndihi-í ichi Xítohó Jesucristú, chí cùndedòho tucu tnúhu na cáháⁿ-í-a, chí ío xini ñuhu-xi. Vá cácu nèhe-ndo Yá Ndióxi òré cuíní-ndó sá cùtnuní iní ñáyiú sá ndáa cada-ndo ïⁿ sá cáháⁿ-ndó. Te ní vá cácu nèhe-ndo sá càchí-yu cùu ndióxi cáduha cue téé ñuyíú-a. Te núu ïⁿ sá xicáⁿ tnàha ñáyiú-ndo núú-ndó te cúñaha-ni-ndo te núu cuu àdi sá vá cúú. Te vá cácu nèhe-ndo Yá Ndióxi, ducaⁿ te vá dándòho ñaha-gá xii-ndo.

¹³ Te núu ndòho-ndo te cáháⁿ ndihi-ndo Yá Ndióxi, àdi te núu ndècu váha-ndo te cudíí iní-ndó te chiñuhu-ndo-gá,

¹⁴ àdi núu cùhú-ndó te cana-ndo cuè téé yindaha ñaha xii-ndo nacuáa ndècu-ndo ichi Yá Ndióxi cuèndá tee-güedé acití díqui-ndó, te cácaⁿ táhú-güedé núú-gá cuèndá-ndó dàtná ní cachí méé-gá cunduu.

¹⁵ Te núu quindáa ndisa iní-ndó sá ndúha-ndo, te ndúha-ndo chí Yá Ndióxi cada tátna ñaha-gá xii-ndo, àdi núu ní quide-ndo ïⁿ sá ñà túú tàú-ndó càda-ndo núú-gá te cada càhnu iní-gá cuéchi-ndo.

¹⁶ Te xini ñuhu-xi cùtnúhu tnàha-ndo oré ñá túú cùndáa-ndó núú Yá Ndióxi cuèndá chindee tnúhu tnàha-ndo cáháⁿ ndihi-ndo-gá te xocàni-gá cuéhé-ndó, te

cada càhnu iní-gá nchaa sá ñà túú váha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndióxi na càcáⁿ-yu ïⁿ sá cuíní-yu núú-gá te nihí-yu, chí sáa tnúhu-yu núú-gá.

¹⁷ Te té Èliás, téé ní xínecu ndéé sanaha ní cáa-dé dàtná cáa nchòo. Te ní cáháⁿ ndihi-dé Yá Ndióxi ní yùhu ní iní-dé ní xáhaⁿ-dè xii-gá sá vá dácùuⁿ-gá dáú, te ní tnúú-gá tnúhu ní cáháⁿ-dé, te ñá ní dàcuuⁿ-gá dáú ùní cuá dava.

¹⁸ Te dàtnuní ducaⁿ te ní cáháⁿ ndihi tucu té Èliás-áⁿ Yá Ndióxi sá dácùuⁿ-gá dáú te ní cuuⁿ, te ní cuu tucu nchaa sá ní xitu-güedé.

¹⁹ Te nchòhò ñáyiú ndècu ndihi-í ichi Xítohó Jesucristú, te núu dava-ndo sá ndecu-ndo ichi Yá Ndióxi ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcùndecu tucu-ndo ìchi-gá,

²⁰ te núu ducaⁿ na càda-ndo te dácacu ni-hnu tnàha-ndo núú ùhú núú ndàhú, te mee Yá Ndióxi cada càhnu iní ñáhá-gá xii-ndo cuéi ío cuéhé cuéchi ní quide-ndo.

TUTÚ DÍHNA NUU NÍ CADÚHA TÉ PÈLÚ

Té Pèlú cadúha-dé tutú sá cùu-xí cuè ñáyiú sàndáá iní ñáhá xii Yá Ndióxi

¹Yúhú té Pèlú ní tendaha ñaha Xítohó Jesucristú xicá cùu-í cáháⁿ-í tnúhu-gá, te cadúha-í tutú-a sá cùu-xí nchòhó ñáyiú xínchíté nuu ndècu distritú Pòntó, ndihí distritú Gàlaciá, ndihí distritú Capadociá, ndihí distritú Asíá, ndihí distritú Bitiniá.

²Chi Dútú Ndióxi ní cachí-gá sá cùu-ndó dèhe-gá ndéé cùtnàhá vátá ngáva-gá ñuyíú, te Espiritú-gá ní quide-xi ndècu yíñuhu-ndo núu-gá vitna. Te ní cachí-gá sá cùu-ndó dèhe-gá cuendá tnii-ndo ncháa tnúhu cáháⁿ Xítohó Jesucristú, ndihí cuendá nduu ndoo nduu nine iní-ndó, chi diu cuendá-áⁿ ní xihí Xítohó Jesucristú. Te xicáⁿ tànhú-í núú Yá Ndióxi sá io na chindee chítuu ñaha-gá xii-ndo cuèi vitna te cuèi núú cuaháⁿ núú vèxi, te diu-ni-gá ná cadá te io váha cuu iní-ndó cùndecu-ndo.

Tnúhu ndee iní sá ndécú ndihí ñáyiú sàndáá iní ñáhá xii Yá Ndióxi

³Te vitna chí ná cächí-ó sá io cànhu cuu Yá Ndióxi Yaá cùu Tátá Xítohó Jesucristú, chi diu-gá io ní cundàhú iní ñáhá-gá xii-o núu xiáⁿ ní quide-gá sá nchóó ní nduu-o dàtná ñⁿ ñáyiú saa vitna. Te ducaⁿ ní quide ñaha-gá xii-o cuendá sá Xítohó Jesucristú ní xihí-gá te ní ndoto-gá. Te cuendá sá ní nduu-o dàtná ñⁿ ñáyiú saa, xiáⁿ ní ngúndecu ndihí-o tnúhu ndee iní

⁴sá cùndecu ndihí-o-gá ní caa ní quíhíⁿ, chí ducaⁿ ní cachí-gá cunduu. Te yacáⁿ vá quini-gá-ó ní ñⁿ sá cuèhé sá dúhá, te io cudíí iní-ó cùndecu-o ndihí-gá ní caa ní quíhíⁿ.

⁵Te sá sàndáá iní-ó Yá Ndióxi, núu xiáⁿ coto ñaha-gá xii-o ndéé ná sáa nduu ñaqueheⁿ cuendá ñáhá-gá chí io cànhu cuu-gá.

⁶Te xiáⁿ io cudíí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo.

⁷Te òré ná cadá cànhu iní-ndó yáha-ndo ncháa sá ná cada ñaha ñáyiú xii-ndo, te ducaⁿ te cutnùni sàndáá ndisa iní-ndó Yá Ndióxi, te sá dúcáⁿ sàndáá iní-ndó Yá Ndióxi io-gá váha dàcùxí dikhⁿ cuaháⁿ chí xiáⁿ ñá túú cudíí-xi. Te cuèi ducaⁿ dico xito ndéé náhí-ni-güedé núu ndisa cùu-xí díhúⁿ cuaháⁿ. Te ducaⁿ sátnahá-xi cùu nchóhó cuendá ncháa sá ndóhó-ndó, te na sáa nduu quixi tucu Xítohó Jesucristú te cùñaha-gá xii-ndo: “Ío váha ní quide-ndo, te vitna io cànhu cuu-ndo, te tãu-ndó nùcùndecu váha-ndo”, duha cùñaha-gá xii-ndo.

⁸Te vitna io cùu iní-ndó Xítohó Jesucristú cuèi vátá quini-gá-ndó-gá, te ducaⁿ io sàndáá iní-ndó-gá, te io cudíí iní-ndó te sùúni ní ñá cùtnùni iní-ndó ñása cunduu tnúhu cáháⁿ-ndó sá dúcáⁿ io cudíí iní-ndó

⁹cuendá sá ní nanihí tànhú-ndó, chí ní sàndáá iní-ndó-gá.

¹⁰Te cue téé ní xóo cáháⁿ tnúhu Yá Ndióxi ndéé sanaha ní cachí-güedé nàcuáa cada-gá cundàhú iní ñáhá-gá xii-o vitna. Te cue téé-áⁿ io váha ní dàcuahá-güedé nàcuáa cada Yá Ndióxi dàcácu nihnu ñaha-gá xii-o vitna.

¹¹Te Espiritú Xítohó Jesucristú ní ngúndecu ndihí cue téé-áⁿ ní xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sáta ná yáha ndoho-gá te io cunuu-gá ndihí Yá Ndióxi. Te io ní sani iní-güedé núu ná nduu sáa ducaⁿ cada-xi, ndihí ncháa nándi-gá cùu sá cadá-xi.

¹²Te Yá Ndióxi ní xáhaⁿ-gá xii-güedé sá ncháa tnúhu váha cáháⁿ-güedé vá cùu-xí cuendá mée-güedé, chí cuendá nchoo cuè ñáyiú ndècu ñuyíú-a vitna cùu-xi. Te diu-ni tnúhu-áⁿ cùu tnúhu cáháⁿ nchúhú cue téé cáháⁿ tnúhu Yá Ndióxi núu-ndó. Te Espiritú sá ní taxi Yá Ndióxi ndécú ndihí-o chindee ñaha-xi xii-ndí cáháⁿ-ndí tnúhu-gá. Te cue espíritú xínú cuèchi núú Yá Ndióxi io cuini-xi quini ndáá-xi ncháa nàcuáa cuaháⁿ tnúhu-áⁿ.

Yá Ndióxi cächí-gá sá cadá-ó mée-ni sá vãha

¹³Te sá dúcáⁿ io váha ní quide ñaha Yá Ndióxi xii-ndo xiáⁿ xíni ñuhu-xi io váha cuáha-ndo cuendá nàcuáa cundecu-ndo te vá cání iní-ndó cada-ndo ní ñⁿ sá cuèhé sá dúhá, te io quindáá iní-ndó sá Yá Ndióxi cada váha ñaha-gá nduu na quixi tucu Xítohó Jesucristú.

¹⁴Te io tnii-ndo ncháa tnúhu cáháⁿ Yá Ndióxi, te vá cùhúⁿ-gá iní-ndó nándi sá cuèhé sá dúhá sá ní xúhuⁿ iní-ndó cùtnàhá vátá cùndecu-gá-ndó ichi-gá te ni vá cadá-ndó.

¹⁵Te cada-ndo mée-ni sá váha cundecu-ndo dàtná quidé mée Yá Ndióxi Yaá ní cáháⁿ ñáhá xii-o cundecu-o ndihí-gá.

¹⁶Te cächí-gá núú tütú-gá: “Cada-ndo mée-ni sá váha cundecu-ndo, chí ducaⁿ quide yúhú”, duha cächí-gá núú tütú-gá.

¹⁷Te Yá Ndióxi cada ndáá-gá cuèchi ncháa ñáyiú, te vá cadá cuendá-gá cuèi nái ñáyiú cùu-yu, te nchòhó cächí-ndó sá díú Tátá-ndó cùu-gá te ndáá, núu xiáⁿ xíni ñuhu-xi canehe-ndo sá yíñuhu núu-gá ndi ncháa nduu cundecu-ndo ñuyíú-a.

¹⁸Te diu-gá ní dàcácu nihnu ñaha-gá xii-ndo ñⁿ ichi sá ñá túú nándihí ní sanu ichi ñaha cuè ñani tnáhá-ndó ní xíndecu ndéé sanaha ní cùu, te nchòhó sa náha-ndo sá sá dúcáⁿ ní quide ñaha Yá Ndióxi ní

dácacu nihnu ñaha-gã xii-ndo ìchi-án ñà túú ní chãhu-gá ní ñà dîhúⁿ cuàáⁿ, te ní ñà dîhúⁿ cuixíⁿ sá ndîhî nihnu ñuyúú-a cuendá-ndó.

¹⁹ Chi Xítóhó Jesucristú ní quixi-gá ní sati ñíí-gã, te ní xihî-gá núú cûrúxi cuendá sá nchóhó nânîhî tãhú-ó, te cûu-gá dàtná ñà mbéé quiti ío váha iní-xi, quiti càndoo canine.

²⁰ Te ducaⁿ ní ndoho Xítóhó Jesucristú, chi ducaⁿ tnàhî ndéé tnunî ndoho-gá ndéé cûtnàhá vátá ngáva-gá ñuyúú. Te ducaⁿ ní yáha-gá cûtnàhá ní quixi-gá òré vitna cùmání sáá nduu náa ñuyúú-a cuendá nchoo cûu-xi sá váha xii-o vitna.

²¹ Te nchóhó sa nihî-ndó tnúhu nàcuáa ní yáha Xítóhó Jesucristú cûtnàhá ní quixi-gá ñuyúú-a, núú xiãⁿ sàndáa iní-ndó Yá Ndióxi. Te Yá Ndióxi ní dándótó-gã Xítóhó Jesucristú, te sáta ní dándótó ñaha-gá te ní cachî-gá sá ío càhnu cuu Xítóhó Jesucristú. Te sá dúcáⁿ ní cuu, xiãⁿ ío sàndáa iní-ndó Yá Ndióxi, te ní taxi-gá tnúhu ndee iní ndécú ndîhî-ndo sá sáá nduu cûndecu-ndo ndîhî-gá ní caa ní quíhîⁿ.

²² Te Espiritú Yá Ndióxi ní quide-xi te ní sàndáa iní-ndó tnúhu-gá, te xiãⁿ ní nduu ndoo ní nduu nine iní-ndó, te cûu iní tnáhá ndisa-ndo nàcuáa ndècu-ndo ichi Yá Ndióxi, te xini ñuhu ndisa-xi sá ío ní yùhu ní iní-ndó cûu iní tnáhá-ndó ñà ñà-ndo.

²³ Te nchóhó ní nduu-ndo dàtná ñà ñáyiu saa sá cuendá tnúhu Yá Ndióxi, te tnúhu-án candeca-xi iní-ndó ní caa ní quíhîⁿ, te vá ñà ndúu ndîhî nihnu-xi, te ñà dîú cuendá ñáyiu ñuyúú-a ní ndúu-ndo ñà ñáyiu saa chi cuendá tnúhu-gá.

²⁴ Chi núú tûtú Yá Ndióxi càchî-xi: Nchaa ñáyiu ndècu ñuyúú-a cûu-yu dàtná cûhú, chi cûhú-án tnaa-ni cûdí-xi te xihî-xi, ducaⁿ sãtnahá-xi cûu-yu.

Te nchaa sá ndécú ndîhî-yu cûu-xi datná ñà itá cûhú-án, chi itá-án tnaa-ni tucu cûdí-xi te ndáhvá-xi, ducaⁿ sãtnahá-xi cûu nchaa sá ndécú ndîhî-yu.

²⁵ Dico tnúhu Yá Ndióxi chi vá náa tnàhî-xi, chi duha-ni ndècu-xi, te ñu-ni duha cûndecu-xi ní caa ní quíhîⁿ.

Duha càchî-xi núú tûtú-gá. Te ñu tnúhu-án ní dánhé ñáhá nchúhú cue téé càháⁿ tnúhu Yá Ndióxi xii-ndo.

2

¹ Te xiãⁿ xini ñùhu-xi dañá-ndo nchaa núú sá cuéhé sá dúhá, te dañá-ndo ichi tnúhu ndehnde, te dañá-ndo vá dándáhú-gá-ndó mèe-ndo sá quidé váha-ndo, te dañá-ndo ichi cuedú iní, te dañá-ndo nchaa tnúhu yiti.

² Te cada-ndo cuendá sá cûu-ndó dàtná cue landú yíquîⁿ vitna sadi camá, chi landú-án mee-ni sãdi-güexi te sãhnu-güexi. Te cada iní-ndó sá dúcáⁿ càda-ndo chi xini ñuhu-xi sá ío cuhuⁿ iní-ndó dàcuaha-ndo

tnúhu Yá Ndióxi, chi xiãⁿ cûu-xi mèe-ni tnúhu váha, te ducaⁿ te cuita cuehnu nihnu-ndo ichi-gá quíhîⁿ ndéé ná sáá nduu cûndecu-ndo núú ndécú-gá.

³ Te ducaⁿ xini ñuhu-xi cada-ndo, chi nchóhó sa ní cûtnunî ndisa iní-ndó sá Yá Ndióxi ío váha iní-gá.

Xítóhó Jesucristú cûu-gã dàtná ñà yúú

⁴ Te ío nanducu nihnu-ni-ndo Xítóhó Jesucristú Yá quidé nàcuáa naníhî tãhú-ó. Te ñu-gá ní cuu-gá dàtná ñà yúú sá ñà túú nândîhî sá cûu-xi ñáyiu ñuyúú-a, chi ní dáquéé tîhú ñáhá-yu xii-gá. Dico Yá Ndióxi ní cachî-gá sá Xítóhó Jesucristú cûu-gã dàtná ñà yúú sá ío-gá váha, chi ío cûnuu-gá.

⁵ Te nchóhó sa ní naníhî tãhú-ndó, te ío-gá chí nánducu nihnu Yá Ndióxi cuendá cuu ñà nuu-ndo cûndecu-ndo ndîhî Espiritú-gá. Te núu ducaⁿ na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dútú ní xinu cuechî núú Yá Ndióxi ndéé sanaha, nàcuáa ñà túú ná cùmání-ndó núú-gá, chi nchaa cue téé-án ní xóo cuáha ñaha-güedé sá ní xóo nduu tãhú-gá. Te nchóhó vitna tãu-ndó càda-ndo nchaa nàcuáa càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndîhî Xítóhó Jesucristú.

⁶ Te Yá Ndióxi càchî-gá núú tûtú-gá:

Yúhú taxi ndecu-í ñà Yáá ñuú Slón,
te cuu-gá dàtná ñà yúú váha sá sánútnî-güedé xíquí cimièntú ñà vehe, chi yúhú ní cachî-í sá Yáá-án ío cûnuu-gá.

Te nchaa ñáyiu quindáa iní ñáhá xii-gá vá ñà ndúu ndixi cuechî iní-yu sá dúcáⁿ sàndáa iní ñáhá-yu xii-gá.

Duha càchî-gá núú tûtú-gá.

⁷ Te nchóhó ñáyiu sàndáa iní ñáhá xii Xítóhó Jesucristú ío cûu iní-ndó-gá, te nchaa ñáyiu ñà túú sàndáa iní ñáhá xii-gá quidé-yu dàtná càháⁿ-xi núú tûtú Yá Ndióxi núú cachî-xi:

Yúú sá ní dáquéé tîhú cue téé dàcaa vehe, xiãⁿ cûu-xi yúú sá ío-gá nândîhî vitna.

Duha càchî-xi núú tûtú-gá. Te yúú-án cada iní-ó sá cûu-xi Xítóhó Jesucristú, chi ní dáquéé tîhú ñáhá-güedé xii-gá.

⁸ Te cachî tucu-xi ingá cachî núú tûtú Yá Ndióxi:

Yúú-án nguínenu ñáyiu te ndúá-yu.

Duha càchî-xi núú tûtú-gá. Te tnúhu-án quée-xi sá ío quide sáá iní ñáyiu núú-gá, chi ñà túú cuínî-yu tnî-yu tnúhu càháⁿ-gá, te ducaⁿ tnàhî ndéé tnunî sá ncháa ñáyiu ñà túú cuínî tnî tnúhu càháⁿ-gá, te ío cûu sáá iní-yu núú-gá.

Ñáyiu ndècu ndîhî Yá Ndióxi

⁹ Te nchoo cûu-o ñáyiu sa ní dáquéé ñà ñaha Yá Ndióxi xii-o cuendá cûndecu-o

ndihi-gá, te cùu-o dútú xínú cuèchi-o nùú-gá, te mee-gá cùú-gá Yáá ío cùnuu, te cùu-o ñáyiú quide ndáá xĩndecu ichi-gá te cùu tucu-o ñáyiú yĩndaha-gá. Te ducaⁿ ní quide ñaha-gá xii-o cuendá sá cũñaha-o xii nchaa ñáyiú sá ío càhnu cuu-gá, te ío vài núú sá vaha quide-gá, te ñu-gá ní quide ní dáñá-ó nchàa ichi cuehé ichi duha ndècu-o ní cuu, te ní sanu ichi ñaha-gá xii-o ñiⁿ ichi váha, te vitna cùtnuní iní-ó sá ío càhnu cuu-gá.

¹⁰ Te nchoo cùu-o ñáyiú ñá túú ndècu ndihi Yá Ndióxi ní cùu, dico vitna ní ngũndecu ndihi-o-gá, te ðává-áⁿ vátá sáa-gá nduu càda váha ñaha-gá xii-o, dico vitna sa ní sáá nduu quide váha ñaha-gá xii-o, chi ío cùndahú iní ñahá-gá.

Cada váha-o cùndecu-o cunu cuechi-o núú Yá Ndióxi

¹¹ Te nchòhó ío cùu iní ñahá-í xii-ndo, te càchi tnúhu-í xii-ndo sá nchóhó cùu-o datná cue ñáyiú ndècu tñaduha ñiⁿ ñuu, te ducaⁿ sátnahá-xi cùu-o chi tnaa-ni ndècu-o ñuyú-á, te sáá nduu nduu táhú-ó cùndecu-o núú ndécú Yá Ndióxi táxi tnúni-gá, te xiáⁿ càháⁿ ndáhú-í núú-ndó sá vā càdá-ndó ní ñiⁿ sá cuèhé sá dúhá sàni iní-ndó, chi nchaa xiáⁿ ñá túú cùu-xi sá váha sá cùú-xi-ndó.

¹² Te cada váha-ndo cùndecu-ndo núú nchàa ñáyiú ñá túú ndècu ichi Yá Ndióxi, te cuéi na càháⁿ ñáyiú sá nchòhó nchìcúⁿ nihnu-ndo ichi cuehé ichi duha, dico quini-yu nchaa sá váha quide-ndo, dico na sáá nduu dándixi túú Yá Ndióxi iní-yu sá ñá túú quide váha-yu ndécú-yu, te ðává-áⁿ cachí-yu sá quide váha-ndo ndècu-ndo, te cada càhnú-yu Yá Ndióxi.

¹³ Te Xitohó Jesucristú cuini-gá sá nchòhó ío quindáá iní-ndó nchàa cue téé cùchiuⁿ taxi tnuní ñahá xii-ndo, te ducaⁿ-ni quindáá iní-ndó cuéi mee téé cùnuu vihi-gá yĩndaha ñaha xii ñáyiú.

¹⁴ Te ducaⁿ-ni quindáá iní-ndó nchàa ðava-gá cue téé cùnuu, chi Yá Ndióxi ducaⁿ ní cachí-gá cunduu sá cué téé-áⁿ cada ndáá-güedé nchaa cuéchi ñáyiú quide cuehé quide dúha ndecu, te càháⁿ váha-güedé cuendá nchaa ñáyiú xĩquide váha ndècu.

¹⁵ Te Yá Ndióxi cuini-gá sá càdá váha-ndo cùndecu-ndo cuendá nchaa ñáyiú ío ñiⁿ ðĩquí-xi càháⁿ cuèhé cuendá-ndó sá ndécú-ndó ichi Yá Ndióxi vá nihí-gá-yu tnúhu càháⁿ-yu.

¹⁶ Te nchòhó, Yá Ndióxi ní quide-gá sá cùú-ndó ñáyiú cuu cada nàcuáa vèxi iní mée-xí, dico ñá díú sá dúcáⁿ ní quide ñaha-gá xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sá cùú-ndó ñáyiú xĩnu cuechi núú Yá Ndióxi.

¹⁷ Te canehe-ndo sá yĩñuhu núú nchàa ñáyiú, ndihi núú téé cùnuu vihi yĩndaha ñaha

xií-yu, te cuu iní tnáhá ndí mee-ndo nacuaá ndècu-ndo ichi Yá Ndióxi, te ío canehe-ndo sá yĩñuhu núú-gá.

Nchaa nàcuáa ndoho-o cùndecu-o ichi Xitohó Jesucristú

¹⁸ Te nchaa nchòhó ñáyiú xĩnu cuechi canehe-ndo sá yĩñuhu núú cué patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ñiⁿ-ni càda-ndo núú cué téé váha iní-xi, ndihi núú cué téé ío cuihna iní-xi.

¹⁹ Te núu nchòhó ná càda ndee iní-ndó ndòho-ndo nchaa sá ñá túú tãú-ndó ndòho-ndo cuendá sá cuini-ndó cùndáá-ndó núú Yá Ndióxi ñá, te ío nduu vétú iní-gá.

²⁰ Te núu nchòhó ní quide-ndo ñiⁿ cuéchi, te sàhni iní-ndó dándoho ñaha ñáyiú xii-ndo, çte ná sá váha cùu xiáⁿ-í? Dico núu nchòhó ná càdá ndèe iní-ndó ndòho-ndo nchaa sá càdá ñaha ñáyiú xii-ndo sá cuendá sá quide-ndó sá váha ña, te núu ducaⁿ na càda-ndo te cùu-xi ñiⁿ sá váha núú Yá Ndióxi.

²¹ Te Yá Ndióxi ní cachí-gá sá càdá ndèe iní-ó ndòho-o nándi ndòho-o sá cuendá sá quide-ó sá váha, chi ío ní ndoho Xitohó Jesucristú cuendá-ó, te ducaⁿ tãú-ó càncichúⁿ nihnu-o càda ndee iní-ó ndòho-o nándi ndoho-o, chi ducaⁿ ní quide-gá.

²² Te mee-gá ñá túú quide-gá ní ñiⁿ sá cuèhé sá dúhá, te ní ñiⁿ tnúhu ndehnde ñá túú càháⁿ-gá.

²³ Te òré ní xóo cúcuèhé ñahá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dándoho ñaha-güedé xii-gá, te ñá túú ní xáhaⁿ-gá xii-güedé sá ío ná cada ñaha-gá, chi núú ndáhá Yá Ndióxi ní xóo nachihí-gá mée-gá, ndihi nchaa sá sání iní-güedé cada ñaha-güedé xii-gá. Te Yá Ndióxi cùú-gá Yáá ío váha cada ndáá cuéchi nchaa ñáyiú na sáá nduu.

²⁴ Te Xitohó Jesucristú cùú-gá Yáá ní xihí núú cùrúxi cuendá nchaa cuéchi nchoo ñáyiú ndècu ñuyú-á. Te ducaⁿ ní xihí-gá cuendá nchoo dùuⁿ duuⁿ ðaña-o nchaa ichi cuehé ichi duha, te cada ndáá-ó cùndecu-o ichi-gá. Te ní dánícuèhé ñahá-güedé xii-gá, te sá dúcáⁿ ní ndoho-gá xiáⁿ ní ngũndecu váha nchoo vitna.

²⁵ Te nchoo cùu-o datná cue mbéé cue quiti ní xita ní cùu, dico vitna ní tuha-o Xitohó Jesucristú, te Yáá-áⁿ cùú-gá ðatná ñiⁿ toli xito ñaha-gá xii-o vitna cuendá sá vā cuíta nihnu-o.

3

Nàcuáa tãú ñáyiú tnãndaha cadá-yu cundecú-yu

¹ Te nchaa nchòhó ñáyiú ðihí ní tnandaha ío quindáá iní-ndó yĩ-ndo cuendá sá núu ñá túú sãndáá iní-güedé tnúhu Yá Ndióxi te quindáá iní-güedé cuendá sá ndéhé-güedé

quidé ndáá-ndó ndècu-ndo, te ni ñà túú xini ñuhu-xi cáháⁿ-ndó tnúhu-gá núú-güedê.

² Chi ndèhe mee-güedê sá nchòhó quidé ndáá-ndó ndècu-ndo, te nèhe-ndo sá yíñuhu núú Yá Ndióxi.

³ Te vá cáni íni-ndó mèe-ni cunduu vii-ndo, te ndada-ndo ñiquí-ndó nàcuáa tàù-xi cunduu, te vá cáni íni-ndó nándi canehe-ndo, te ni vâ cáni íni-ndó cuihnu-ndo mee-ni dóó vâha sá ïo vii ndáa.

⁴ Chi íni-ndó xini ñuhu-xi cunduu vii cunduu váha-xi núú Yá Ndióxi cuéi vitna te cuéi núú cuháⁿ núú vèxi, te cuu-ndo ñâyiu ío cáhnu íni-xi, te núu ducaⁿ na càda-ndo te ío cuu váha íni Yá Ndióxi.

⁵ Te ducaⁿ ío vii ío váha ní xinduu íni nchaa ñâyiu ñíhi ní xindecu ndéé sanaha, te ñâyiu-áⁿ ío ní sándáa íni-yu Yá Ndióxi te ní cudúu-yu núú-gá, te ní tñii-yu nchaa tnúhu ní cáháⁿ yí-yu.

⁶ Te ducaⁿ ní xóo cada ndíi Sárá ní xóo quindáa íni ndíi yí ndíi, ndíi Abrahám, te ní cánehe ndíi ñíhi-áⁿ sá yíñuhu núú yí ndíi. Te núu nchòhó quidé váha-ndo ndècu-ndo te ñá túú yùhú-ndó nâ cada ñaha tnàha ñâyiu-ndo xii-ndo, te núu ducaⁿ quide váha-ndo ndècu-ndo te quide-ndo datná ní quide ndíi Sárá.

⁷ Te nchòhó cue téé ndècu ñadíhi-xi ío váha cuáha-ndo cuendá nàcuáa cundecu váha-ndo ndíhi-yu, te ío vii cáháⁿ ndíhi-ndó-yu, chi ñâyiu-áⁿ íi-gá-yu dàcúxí nchòo cue téé, te ducaⁿ càda-ndo chi ndí ndúu-ndó ndúu táhú-ndó cundecu-ndo ndíhi Yá Ndióxi, te núu ducaⁿ na càda-ndo te òré cáháⁿ ndíhi-ndo Yá Ndióxi te tedóho ñaha-gá xii-ndo.

Ñâyiu quide sá váha ndòhó-yu

⁸ Te càchi tnúhu tucu-í xii-ndo sá ío cuu ñnuu-ndo cundecu-ndo, te cundàhú íni tnàhá-ndó ñⁿ ñⁿ-ndo, te cuu íni tnàhá tucu-ndo nàcuáa ndècu-ndo ichi Yá Ndióxi, te cuu-ndo ñâyiu ndàhú íni-xi.

⁹ Te núu ñⁿ sá ñà túú váha quide ñaha ñâyiu xii-ndo, te ñá díú-ní ñⁿ nanchocáva-ndo càda-ndó-yu, àdi xícuèhé ñáhá-yu xii-ndo, te vá ná dâncocáva-ndo ñⁿ ní tnúhu cuèhé, chi cácaⁿ táhú-ndó núú Yá Ndióxi cuendá sá ná cáda váha ñaha-gá xii-yu, te ducaⁿ càda-ndo chi Yá Ndióxi ní cáháⁿ ñáhá-gá xii-ndo cuendá sá cáda váha ñaha-gá xii-ndo tnàhá-ndó.

¹⁰ Te núú tùtú Yá Ndióxi càchi-xi:

Nchaa ñâyiu cuíni cundecu váha ndi nchàa nduu ñini cundecu-yu ñuyíú-a, xini ñuhu-xi sá vâ cáháⁿ-yu tnúhu cùtxinu, te ni vâ dàcuàndehndé-yu.

¹¹ Te xini ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sá váha,

te ío ndúcú-yu nàcuáa cadá-yu cundecu váha-yu ndíhi tnàha ñâyíú-yu te ñⁿ ducaⁿ càncícuⁿ ñihnú-yu cadá-yu.

¹² Te Yá Ndióxi xító-gá nchaa ñâyiu quide ndáa núú-gá

te tedóho-gá nchaa tnúhu cáháⁿ-yu, dico nchaa ñâyiu ñá túú cuíni cada ndáa, ñâyiu-áⁿ ñà túú cùu váha íni-gá núú-yu.

Duha càchi-xi núú tùtú-gá.

¹³ Te vá yòo ñíhi ndéé càda ñaha xii-o ñⁿ sá ñà túú váha te núu mee-ni sá váha na càda-o cundecu-o.

¹⁴ Àdi núu ná cúú sá ná cáda ñaha ñâyiu xii-o sá cuendá sá quidé váha-o ndècu-o ña, te sá dúcáⁿ ná cáda ñáhá-yu xii-o cùu-xi ñⁿ sá váha sá cúú-xi-ó núú Yá Ndióxi. Te na càchi tnúhu-í xii-ndo sá vâ yùhú-ndó-yu, te ni vâ cùndiyí-ndó cuendá nchaa sá ná càda ñáhá-yu xii-ndo.

¹⁵ Te nèhe-ndo sá yíñuhu núú Xítoho Jesucristú. Te ío cundecu túha-ndo ñanehé-ndó ñâyiu vèxi ndècu tnúhu núu-ndó nàcuáa ndúu tnúhu ndee íni ní taxi Xítoho Jesucristú ndécú ndíhi-ndo, te cuu vii cuu váha íni-ndó cáháⁿ ndíhi-ndó-yu, te cáháⁿ-ndó núu-yu mee-ni tnúhu yíñuhu nàcuáa cùu váha íni Yá Ndióxi.

¹⁶ Te ío cada váha-ndo cundecu-ndo cuendá sá vâ cùndiyí-ndó, te núu ducaⁿ na càda-ndo, te nchaa ñâyiu xícuèhé ñáhá xii-ndo cuendá sá quidé váha-ndo ndècu-ndo ichi Xítoho Jesucristú quendóo canúu-yu ndíhi nchaa tnúhu cáháⁿ-yu, chi nchòhó quidé váha-ndo ndècu-ndo.

¹⁷ Te váha-gá sá ndòhó-ó cuendá sá quidé-ó sá váha te núu mee Yá Ndióxi ducaⁿ cuíni-gá cunduu, te ñá díú sá ndòhó-ó cuendá sá ñà túú quide-o sá váha.

¹⁸ Te Xítoho Jesucristú ní xíhi-gá sá cuendá nchaa cuéchi nchaa nchoo ñâyiu ndècu ñuyíú-a, te ñⁿ xito-ni ducaⁿ ní xíhi-gá te ducaⁿ te vá cùu tnàhi-gá, te mee-gá cúú-gá Yá ñá túú tnàhi cuéchi-xi, te ducaⁿ ní ndòho-gá cuendá nchaa cuéchi ñâyiu ndècu ñuyíú-a ñâyiu ñá túú cuíni cada ndáa núú Yá Ndióxi, te ducaⁿ ní cuu cuendá sá núcundecu váha-yu núú Yá Ndióxi te núu na quindáa íni ñáhá-yu xii-gá. Te mee-gá ní xíhi-gá dico Espíritú-gá chi ní xindecu-ni-xi,

¹⁹ te Espíritú-gá ní sáháⁿ-xi ní cáháⁿ-xi tnúhu Yá Ndióxi núu nchaa espíritú ñâyiu ndècu núu ùhú núu ndàhú.

²⁰ Te ñâyiu-áⁿ cúú ñâyiu ní xindecu ndéé sanaha cùtnàhá ní xindecu ndíi Nòé, chi ñâyiu-áⁿ ío ní quide sáa íni-yu núú Yá Ndióxi. Te Yá Ndióxi ío váha íni-gá, chi ní dácáca-gá nduu ní xindecu ndíi Nòé ní cadúha ndíi bàrcú cuendá ndétú-gá ndixi cuéchi íni-yu sá ñà túú quide váha-yu ndècu-yu ní cùu. Te dàvá-áⁿ ní ndaa ndute ñuyíú te ní cácu

úná duha ná tnàhá ñáiyu, chi ní quée-yu xití bàrcú-á, te ñá túú ní cáhá-yu.

²¹ Te sá dúcáⁿ ní cácu ñáiyu úná-án ñà túú ní cáhá-yu ndute ní ndaa ñuyúú dàvá-á. Te xiáⁿ quée-xí sá cuándute ñáiyu vitna, te naníhí tǎhú-yu te núu na quíndáá iní-yu tnúhu ndáá tnúhu Yá Ndióxi. Te ñá díú sá cuándute-o te nduu ndoo nduu nine yiqui cǔñú-ó te naníhí tǎhú-ó, chi xini ñuhu-xi náhmá-ó ndúú Yá Ndióxi nchaa yíca cuéchi-o, te nduu ndoo nduu nine iní-ó, te ducaⁿ te naníhí tǎhú-ó, chi Xítoho Jesucristú ní xihí-gá cuendá-ó te ní ndoto-gá.

²² Te Yaá-án cuándaa-gá andiu, te ní ngó-gá xio cǔha Yá Ndióxi, te taxi tnumí-gá nchaa espíritú cǔnunu ndíhi nchaa dava-gá cue espíritú xínú cuéchi.

4

Cada-o nàcuáa cuíni méé Yá Ndióxi

¹ Te Xítoho Jesucristú ní ndoho-gá cǔtnàhá ní xíndecu-gá ñuyúú-a, te vitna nchòhó cǔndecu túha-ndo ndòho-ndo cuendá-gá, chi nchaa ñáiyu ndòho nándi sá ndòhó cuendá-gá dáñá-yu nchaa sá cuéhé sá dúhá.

² Te ducaⁿ ñà túú-gá ndécú-yu ichi cuéhé ichi duha, chi mee-nà nàcuáa cáháⁿ Yá Ndióxi quidé-yu ndécú-yu ñuyúú-a.

³ Te nchòhó sa nàha-ndo sá io cuéhé núú sá cuéhé sá dúhá ní xóo cada-o cǔtnàhá vátá cǔndecu-gá-ó ichi Yá Ndióxi, chi ní xóo cada-o nchaa sá cuéhé sá dúhá cǔdíí iní nchaa ñáiyu ñà túú sàndáá iní tnúhu-gá, te dàvá-áⁿ ní xóo cada-o nchaa núú sá cuéhé sá dúhá, te ní xóo caní cuéhé ní xóo caní duha iní-ó, te ní cuu-o cué ñáiyu quihu, te ní xóo cǔndecu-o víco núú ní xóo cada-o nchaa sá ñà túú váha, te ní xóo níhí tnàhá-ó ndíhi nchaa tnaha quihu-o, te ní xóo chiñuhu-o nchaa sá cáchi-yu cǔu ndiúxi te ñà ndáá sá ndiúxi cúú nchaa xiáⁿ, te nándi-gá nchaa sá cuéhé sá dúhá ní xóo cada-o dàvá-áⁿ.

⁴ Te ñáiyu-án cǔñúhu-yu vitna sá ñà túú-gá níhí tnàhá-ó ndíhi-yu cada-o nchaa sá cuéhé sá dúhá quidé-yu, te xiáⁿ cáháⁿ cuéhé-yu cuendá-ó vitna.

⁵ Dico sáá nduu te ñáiyu-án náhmá-yu nchaa sá quidé-yu núú Xítoho Jesucristú, chi diu-gá sa ndècu túha-gá sá cáda ndáá-gá cuéchi nchaa ñáiyu sa ní xihí, ndíhi cuéchi nchaa ñáiyu xíndecu vívú.

⁶ Te cue ñáiyu sa ní xihí ní xíndedòho tnúhu Xítoho Jesucristú, te cuéi ní xihí-yu dátá xihí dava-gá ñáiyu, dico espíritú-yu chi ní nduu tǎhú-xi ndècu váha-xi dátá ndécú Yá Ndióxi.

⁷ Te vitna ta cǔyatni danaa Yá Ndióxi ñuyúú-a núú xiáⁿ io váha cuáha-ndo cuendá nàcuáa cǔndecu-ndo, te cáháⁿ ndíhi-ndo-gá.

⁸ Te xini ñuhu-xi sá io cuu iní tnàhá-ndó ñiⁿ-ndo, chi núú ducaⁿ na cǔu iní tnàhá-ndó

ñiⁿ-ndo, te vá cáni-gá iní-ndó càda cuendá-ndó nchaa sá ñà túú váha quide ñaha ñáiyu xii-ndo,

⁹ te nchòhó ñáiyu xíndecu vehe-xi cuáha núu-ndo vehe xii cue ñáiyu ñuhu ichi na ndetatú-yu, te io váha cuu iní-ndó dùcaⁿ cada-ndo.

¹⁰ Te Yá Ndióxi ní taxi-gá ndí dííⁿ núú tǎhú ndécú ndíhi-ndo ñiⁿ-ndo, te nàcuáa nduu tǎhú ní nduu tǎhú-ndó ñiⁿ-ndo te ducaⁿ chindee tnaha-ndo, te vá dáñá ndéé-ndó càda-ndo nchaa nàcuáa tǎuchiⁿ Yá Ndióxi cada-ndo, te chindee ñaha-gá xii-ndo.

¹¹ Te dava nchòhó ñáiyu cáháⁿ tnúhu Yá Ndióxi núú ñáiyu, xini ñuhu-xi cáháⁿ-ndó nàcuáa nduu tnúhu-gá núú-yu, te dava nchòhó ñáiyu quide nchaa núú chiⁿ chindee tnaha ñáiyu-xi, xini ñuhu-xi cada-ndo sá Yá Ndióxi chindèe ñaha-gá xii-ndo, te ducaⁿ càda-ndo nchaa núú sá váha, chi Xítoho Jesucristú tnàhá-gá chindèe ñaha-gá xii-ndo, te ducaⁿ io cuu cáhnu Yá Ndióxi. Te vitna tǎu-ó cáháⁿ-ó sá io cáhnu cuu Xítoho Jesucristú, chi diu-gá cǔnunu-gá nchaa nduu nchaa quíú, te ducaⁿ na cǔnduu.

Ndoho tnàhá-ó cǔndecu-o ichi Xítoho Jesucristú

¹² Te nchòhó ñáiyu io cǔu iní-í, vá cǔñúhu-ndo sá io ndòho-ndo ndecu-ndo ichi Xítoho Jesucristú, chi sá dúcáⁿ ndòho-ndo-án cǔtnúni ndisa sá sàndáá iní-ndó-gá, te vá cáni iní-ndó ná cuendá ducaⁿ ndòho-ndo.

¹³ Chi da cudíí iní-ndó te núu ndòho-ndo dátá ní ndoho Xítoho Jesucristú, te ducaⁿ sǔúni cǔdíí iní-ndó òré ná quixi tucu-gá ñuyúú-a te dàvá-áⁿ quini-ndó sá io cáhnu cuu-gá.

¹⁴ Te núu xícuéhé ñáhá ñáiyu ndècu ichi cuéhé ichi duha xii-ndo cuendá sá ndécú-ndó ichi Xítoho Jesucristú, te xiáⁿ cúú-xi ñiⁿ sá váha sá cúú-xi-ndó núú-gá, te ducaⁿ chi Espíritú Yá Ndióxi sá io cǔnunu ndecu ndíhi ñaha-xi xii-ndo, te nchaa ñáiyu ndècu ichi cuéhé ichi duha-án cáháⁿ cuéhé-yu cuendá Xítoho Jesucristú, dico nchòhó cáchi-ndó sá io cáhnu cuu-gá.

¹⁵⁻¹⁶ Te núu nchòhó dándòho ñaha ñáiyu xii-ndo sá cuendá sá ndécú-ndó ichi Xítoho Jesucristú ñà, te vá cúú cáháⁿ núú-ndó, chi ndacáⁿ tǎhú-ndó núú Yá Ndióxi cuendá sá ndécú-ndó ichi-gá. Te cuéi ndòho-ndo ndecu-ndo, dico ñà túú cǔu-ndo ñáiyu sàhni ndíyi te ní ñà túú cǔu-ndo ñáiyu dùhu, te ní ñà túú cǔu-ndo ñáiyu quide cuéhé quidè dùha, te ní ñà túú cǔu-ndo ñáiyu chindee tnúhu tnàha ñáiyu-xi ñiⁿ sá ñà túú tǎu-ndó càda-ndo.

¹⁷ Te vitna sa quèsaha Yá Ndióxi cada ndáá-gá nchaa sá quidè nchòho ñáiyu ndècu ndíhi-gá, te núú ducaⁿ te ndéé-gá cada-gá

nchaa ñáiyu ñá túú sàndáá iní ñáhá xii-gá òré ná sáá nduu dùcaⁿ cada ñaha-gá xii-yu.

¹⁸ Te nchòhó xini-ndó sá ñáiyu quide váha ndècu ichi Xítóhó Jesucristú ndòho tnahá-yu ndècú-yu, dico sáá nduu te nduu táhù-yu cundecú-yu ndihí-gá. Te núu ducaⁿ ndòho nchaa ñáiyu quide váha ña, ζte nása-gá yáha nchaa ñáiyu ndècu ichi cuehé ichi duha na sáá nduu càda ndáá Yá Ndióxi cuéchi-yu-i?

¹⁹ Te nchaa nchòhó ñáiyu ndòho nacuaá cuini Yá Ndióxi xini ñuhu-xi sá vā dáñá ndèé-ndó càda váha-ndo cundecu-ndo, te ío quindáá iní-ndó sá xító ñaha-gá xii-ndo. Te ñu-gá cúu-gá Yáá ní cadúha ñaha xii-o, te quide-gá ñⁿ sá cāháⁿ-gá.

5

Nacuáa tàù-xi cada ñáiyu ndècu ichi Xítóhó Jesucristú

¹ Te yúhú cāháⁿ-í dóho nchaa nchòhó cue téé yindaha nchaa dava-gá ñáiyu ndècu ichi Xítóhó Jesucristú, chi tnahá yúhú yindaha-í ñáiyu ndècu ichi-gá, te sàndáá iní-í tnúhu-gá, te ní xini-í nchaa nacuaá ní ndoho-gá, te sáá nduu te tnahá-í cunuu-í ndihí-gá.

² Te ío canehe cuendá-ndó nchaa ñáiyu ndècu ichi Yá Ndióxi yindaha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuendá-ndó-yu sá cúu iní mée-ndó te ñá díú sá ío ñⁿ ñáiyu cada yica ñaha xii-ndo, te ní ñá díú sá cuini-ndó cùhuⁿ yáhu-ndo, chi ní yùhu ní iní-ndó còto-ndó-yu, chi ducaⁿ cuini Yá Ndióxi cunduu.

³ Te vā cadá-ndó sá ío cunuu-ndo núu-yu, chi cada-ndo mée-ní sá váha cuendá ducaⁿ cānchicúⁿ niñnú-yu cadá-yu tnahá-yu.

⁴ Te òré ná quixí tùcu Xítóhó Jesucristú Yáá néhé cuendá ñáhá xii-o nchaa-o ñuyú-a, te taxi-gá sá ío váha nduu táhù-ó, te cunuu-o ndihí-gá ní caa ní quihíⁿ.

⁵ Te nchòhó ñáiyu ndècu ichi Xítóhó Jesucristú cāháⁿ-í dóho-ndo sá ío quindáá iní-ndó cuè téé yindaha ñaha xii-ndo nacuaá ndècu-ndo ichi-gá, te nchaa-ndo tàù-ndó quindáá iní tnahá-ndó ñⁿ ñⁿ-ndo, chi núú tütú Yá Ndióxi cāchí-xi ñⁿ xichí:

Nchaa ñáiyu quide cahnu mee-xi ñá túú cùu váha iní Yá Ndióxi núu-yu,

dico nchaa ñáiyu ndàhú iní-xi te chindee ñaha-gá xii-yu.

Duha cāchí-xi núú tütú-gá.

⁶ Te daña-ndo mée-ndo núú ndáhá Yá Ndióxi, chi mee-gá ío cunuu-gá. Te núu ducaⁿ na càda-ndo, te sáá nduu te cada nínu ñaha-gá xii-ndo.

⁷ Te nchaa sá yáha-ndo ndècu-ndo te nachihí-ndo ndàha Yá Ndióxi, chi mee-gá xító ñaha-gá xii-ndo.

⁸ Te ío váha cuáha-ndo cuendá cundecu-ndo, te quihí iní-ndó chi sácufhná xicá cùu-xi cuini-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ñⁿ quiti dééⁿ xicá ndècu sá cāxí-xí.

⁹ Te ío quindáá iní-ndó Xítóhó Jesucristú, te vā dáñá-ndó mée-ndo dandahú ñáhá sácufhná xii-ndo càda-ndo nacuaá cuini-xi, chi ñaha-ndo sá ncháá ñáiyu ndècu ichi Xítóhó Jesucristú xindecu nihí ñuyú ndóhó-yu dàtná ndóhó nchòo ndecu-o ichi-gá.

¹⁰ Dico sacú-ni nduu duha cundoho-o te dàtnúni ñá túú-gá ná cumání-ó cundecu-o núú Yá Ndióxi, te dàvā-áⁿ vā cāni ñⁿ cani úú iní-ó cundecu-o ichi-gá. Te ío-gá ngúndecu ndihí-o tnúhu ndee iní cada-o nchaa nacuaá cāháⁿ-gá, te ducaⁿ càda-o chi mee Yá Ndióxi ío chindee ñaha-gá xii-o, te ñu-ni Yáá-áⁿ ío cùu iní ñáhá-gá xii-o, chi ní cāháⁿ ñáhá-gá xii-o cundecu-o núú ío váha cāa ndecu-gá cundecu-o ní caa ní quihíⁿ, te ducaⁿ ní quide-gá chi ní sàndáá iní-ó Xítóhó Jesucristú.

¹¹ Te ío ndacáⁿ táhù-ó núú Yá Ndióxi chi ío cāhnu cuu-gá, te cunuu-gá nchaa nduu nchaa quíú. Te ducaⁿ na cunduu.

Tnúhu ndéé núú ní ndihí-ná

¹² Te té Silvanú xini-í sá cúu-dé ñⁿ téé quide ndáá ndécú ichi Xítóhó Jesucristú, te ñu-dé ní cāháⁿ ndàhú-í núú-dé ní tee-dé ñⁿ úú tnúhu sá ní xāháⁿ-í xii-dé núú tütú-a cuendá daquixí-í ndaha-ndo, te núú tütú-a cāchí tnúhu ndáá-í xii-ndo sá Yá Ndióxi ío cùu iní ñáhá-gá, te chindee ñaha-gá xii-ndo ndècu-ndo, te cāchí tnúhu tucu-í xii-ndo sá ío quindáá iní-ndó sá ndáá ducaⁿ quide ñaha-gá xii-ndo.

¹³ Te cue ñáiyu ndècu ñuu Babiloniá, ñáiyu ndècu ichi Yá Ndióxi, ñu-ni ñáiyu ní cāchí Yá Ndióxi sá nānihí tàhú dàtná cúu nchòhó, ío quide ndee iní ñáhá-yu xii-ndo, te tnahá té Mácú téé cùu datná ñⁿ déhe-í quidé ndèe iní ñáhá-dé xii-ndo.

¹⁴ Te ndihí tnúhu yíñùhu cada ndee iní tnahá-ndó ñⁿ ñⁿ-ndo, te xicáⁿ táhù-í núú Yá Ndióxi sá ío na cundecu nahi nchaa nchòhó ñáiyu ndècu ndihí Xítóhó Jesucristú. Te ducaⁿ na cunduu. Te ío chí cadá ndèe iní-ná vitna.

TUTÚ CÚÚ ÒÚ NÍ CADÚHA TÉ PÈLÚ

Té Pèlú cadúha-dé tutú quíhⁿ ndaha ñáyiú sàndáá iní tnúhu Yá Ndióxi

¹ Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gá ní tendaha ñaha-gá xii-í xícá cùu-í càháⁿ-í tnúhu-gá. Te cadúha-í tutú-a sá cúu-xí nchàa nchóhó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tátá-ó Dùtú Ndióxi ní dácáháⁿ-gá iní-ó ní sàndáá iní-ó-gá, chi cùu-gá Yáá ío váha quide ndáá ndíhi Xítóhó Jesucristú Yáá dácácu nihnu ñaha xii-ó núú ùhú núú ndáhú.

² Te xicáⁿ táhú-í núú Yá Ndióxi sá ùuⁿ-gá uuⁿ-gá ná cuita chindee chitúu ñaha-gá xii-ndo quíhⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndúu cuendá-gá, te ducaⁿ ta cùtnuní tucu iní-ndó nchàa nacuáa ndúu cuendá Xítóhó Jesucristú Yáá cúú Xítóhó-ó.

Nàcuáa quide ñáyiú ndècu ichi Xítóhó Jesucristú

³ Te Yá Ndióxi ío càhnu cuu-gá chi chindee ñaha-gá xii-ó quide ndáá-ó ndècu-ó datná cuíní mée-gá, te ducaⁿ chi cùtnuní iní-ó nàcuáa sàni iní Xítóhó Jesucristú Yáá ní càháⁿ ñáhá xii-ó. Te òré ní càháⁿ ñáhá-gá xii-ó te ní cùtnuní iní-ó sá ío càhnu cuu-gá te ío váha quide-gá.

⁴ Te ducaⁿ ní cùtnuní tucu iní-ó nàcuáa ní càháⁿ-gá cada ñaha-gá xii-ó, te tnúhu ní càháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xiáⁿ ñá túú-gá ndécú-ó ichi cuèhé ichi duha te ní ñá túú-gá sání iní-ó càda-ó nándi sá cuèhé sá dúhá, te ní cuu vii ní cuu váha iní-ó vitna.

⁵ Te sá dúcáⁿ quide-gá te xiáⁿ ío nducu ndèe-ndo cada-ndo nchaa nacuáa càháⁿ-í-a, te nchóhó sàndáá iní-ndó-gá dico ñá díú mèe-ni xiáⁿ chi tnàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini ñuhu-xi tecú tnuní-ndó tnúhu-gá.

⁶ Te núu tècú tnuní-ndó te cùu-ndo ñáyiú xini cotnii mee-xi, te xinu cùu-ndo ñáyiú sácóo tnii mee-xi te xini ñuhu-xi cunduu cahnu iní-ndó cuèi nándi sá ná yáha-ndo cùndecu-ndo, te núu càhnu iní-ndó te xini ñuhu-xi cada ndáá-ndó cùndecu-ndo datná cuíní mée Yá Ndióxi cada-ndo.

⁷ Te núu quide ndáá-ndó ndècu-ndo, te xini ñuhu-xi ío cuu iní tnáhá ndí mee-ndo nacuáa ndècu-ndo ichi-gá, te núu cùu iní tnáhá ndí mee-ndo te xini ñuhu-xi cuu iní-ndó nchàa dava-gá tnàhá ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhⁿ núú cuaháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnuní-gá iní-ndó nchàa nacuáa sàni iní Xítóhó Jesucristú quíhⁿ.

⁹ Te nchaa ñáyiú ñá túú cuíní ducaⁿ càda cuu-yu ñáyiú ñá túú tnàhí ndixi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cada-yu, te ñáyiú-áⁿ cúu-yu dàtná ñⁿ ñáyiú cuáá àdi datná ñⁿ ñáyiú ñá túú cùtnuní váha núú-xi, te ducaⁿ sàtnahá-xi cúu-yu cuendá sá dúcáⁿ quide-yu.

¹⁰ Te xiáⁿ núu yúhú càháⁿ-í dóho nchaa nchóhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnuní ndáá iní-ndó sá Yá Ndióxi ní càháⁿ ñáhá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá ñⁿ ndúu caní iní-ndó dàña-ndo ichi-gá, te núu vá dáña ndèé-ndó càda-ndo nchaa nacuáa càháⁿ-í-a.

¹¹ Te núu ducaⁿ na càda-ndo cùndecu-ndo, te ío vii ío váha cada Yá Ndióxi quehⁿ cuendá ñáhá-gá xii-ndo òré ná sàá-ndó núú ndécú Xítóhó Jesucristú táxi tnuní-gá nchaa nduu nchaa quíú, te díu-ni Yáá-áⁿ cúú Xítóhó-ó te ní dácácu nihnu ñaha-gá xii-ó núú ùhú núú ndáhú.

¹² Te ducaⁿ-ni quíhí-í dandácu iní ñáhá-í xii-ndo nchàa tnúhu càháⁿ-í-a cuèi sa xini-ndó tnúhu-áⁿ, te cuèi sàndáá váha iní-ndó nchàa tnúhu ndáá dácúaha-ndo.

¹³ Te yúhú quide cuendá-í sá ío tàú-xi càháⁿ-í dóho-ndo nini ndecu-í ñuyíú-a cuendá sá vǎ nàcuànaa-ndo nacuáa cada-ndo cùndecu-ndo.

¹⁴ Chi Xítóhó Jesucristú ní cachí-gá sá ñá túú-gá vǎi nduu cùndecu-í ñuyíú-a te cuú-í.

¹⁵ Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càháⁿ-í-a, te cuèi na yáha cuú-í dico vǎ nàcuànaa-ndo cada-ndo nchaa nacuáa càháⁿ tnúhu sá dánèhé ñáhá-í xii-ndo vitna.

Cue tée ní xini núú sǎ ío càhnu cuu Xítóhó Jesucristú

¹⁶ Te sa ní dánèhé ñáhá-ndí xii-ndo sǎ ío càhnu cuu Xítóhó Jesucristú. Te ní cachí tnúhu tucu-ndí nàcuáa cada-gá òré quixi tucu-gá, te tnúhu-áⁿ cúu-xi tnúhu ndáá cuiti te ñá díú tnúhu sá ní sani iní cue ñáyiú ñuyíú-a cùu-xi, chi nchúhú ní xini núú-ndí nàcuáa ní quide-xi cùtnahá ní cùtnuní iní-ndí sǎ ío càhnu cuu Xítóhó Jesucristú.

¹⁷ Chi dàvá-áⁿ ío váha ní quide Tátá-ó Dùtú Ndióxi ní quide càhnu-gá Xítóhó Jesucristú, te díu-ni dàvá-áⁿ ní càháⁿ Dùtú Ndióxi ndéé andiu ní xáhaⁿ-gá xii Xítóhó Jesucristú:

“Yòhò cúu-n Dèhe-í tée ío cùu iní-í, te ío cùdíí iní ñàhà-í xii-n”, duha ní xáhaⁿ Yá Ndióxi xii Xítohó Jesucristú.

¹⁸ Te nchúhú ní tecú dóho-ndí ní cáháⁿ Yá Ndióxi ndéé andiu cùtnhá ducaⁿ ñí xáhaⁿ-gá xii Xítohó Jesucristú, chi tnàhà-ndí ndécú-ndí ndihi-gá yucu núú dúcáⁿ ñí quide cahnu ñaha Yá Ndióxi xii-gá.

¹⁹ Te ndècu ndihi-o nchaa tnúhu ní cáháⁿ cue tée ní xóo cáháⁿ tnúhu Yá Ndióxi ndéé sanaha te nchaa tnúhu-án cáháⁿ-xi nchaa nàcuáa cada-xi vitna, te cùtnuní iní-ó sá tnúhu ndáá cúu-xí, te xini ñuhu-xi cada cuendá váha-ndo nchaa nacuaa cáháⁿ tnúhu-án, chi tnúhu-án cúu-xí dàtná ìⁿ ñuhú dáyehé-xi ndéé òrè véxi túndaá quéné chòdíní cáhnú dáyehé-di. Te ducaⁿ sàtnahá-xi cùu tnúhu-án chi quide-xi nacuaa cutnùní iní-ó cuendá Xítohó Jesucristú.

²⁰ Te xini ñuhu-xi sá ío-gá cada cuendá-ndó sá ñá túú ñáyíu tecú tnùní ní ìⁿ tnúhu sá ní chídó tnùní cue tée ní cáháⁿ tnúhu Yá Ndióxi ndéé sanaha, te núu Yá Ndióxi vá cádá-gá nàcuáa cutnùní iní-yu nàcuáa cáháⁿ nchaa tnúhu-án.

²¹ Te cue tée-án ío ní xindecu yíñuhu-güedé núú Yá Ndióxi, te nchaa tnúhu sá ní cáháⁿ-güedé-án ñá túú cùu-xi tnúhu sá ní cahu iní meé-güedé, chi Espiritú Yá Ndióxi ní dácáhu iní ñáhá-xí xii-güedé nàcuáa cunduu tnúhu cáháⁿ-güedé.

2

Cue tée cächí sá cáháⁿ tnúhu Yá Ndióxi te ñá ndáá

¹ Te ndéé sanduu chi ní xindecu cue tée ní xóo dandáhú ñáhá xii ñáyíu isràél cächí sá cáháⁿ tnúhu Yá Ndióxi te ñá ndáá sá cáháⁿ-güedé tnúhu-gá, te diu-ni ducaⁿ tucu cundecu cue tée dandáhú ñáhá xii-ndo vitna, chi cachí-güedé sá cáháⁿ-güedé tnúhu Yá Ndióxi te ñá ndáá. Te cue tée-án ío yidáhu cáháⁿ-güedé, te nchaa tnúhu cáháⁿ-güedé-án dacuíta nihnu ñaha-xi xii-ndo te núu na tédóho-ndo, chi cue tée-án vá nūnuu-güedé sá Xítohó Jesucristú ní xihí-gá cuendá-güedé. Te sá dúcáⁿ cáda-güedé ío-gá ndíhi dacuíta nihnu-güedé meé-güedé.

² Te vai ñáyíu xinu iní-yu cada-yu nándi sá cuèhé sá dúhá cuendá sá dúcáⁿ cáda cue tée-án, te cuendá xiáⁿ ngóo ñáyíu cáháⁿ úhú-yu cuendá ichi Yá Ndióxi.

³ Te mee-ni tnúhu sá ní cahu iní cue ñáyíu ñuyíú-a danèhé ñáhá-güedé xii-ndo, te que-saha-güedé sá cúu-xí tnúhu ndáá te ñá ndáá cuendá-ni sá cuñaha-ndo díhúⁿ xii-güedé, chi diu-ni xiáⁿ tnàhí culuⁿ iní-güedé, dico Yá Ndióxi sa ní cunaha ndècu túha-gá cuendá cada ndáá-gá cuèchi-güedé, te na sáa nduu te cuíta nihnu duuⁿ-güedé, chi Yá Ndióxi vá nàcuànaa-gá ìⁿ sá ní cachí-gá cada-gá.

⁴ Te Yá Ndióxi ñá túú ní quide cahnu iní-gá sá ní quide cue espíritu ñá túú ní cùní cada ndáá xínú cuèchi núu-gá ní cùu, chi ní dáquihíⁿ ñáhá-gá xii-xi ìⁿ xichi núú ío ndòho-xi ndecu-xi, te xiáⁿ cundedí nihnu-xi ndéé sáa nduu cuíta nihnu duuⁿ-ná-xi.

⁵ Te Yá Ndióxi ñá túú ní quide cahnu tucu iní-gá nchaa sá ní quide ñáyíu ñuyíú díhna, chi dàvã-án ní dándáá-gá ndute ñuyíú ní cáhá nchaa ñáyíu ndècu ichi cuèhé ichi duha te ìⁿ díi-ni té Nòé ndíhi úsã-gá tucu cue ñáyíu cùu ndi mee-dé ní dácãcu nihnu-gá. Te té Nòé-án cúu-dè tée ní cáháⁿ dóho-yu nàcuáa cada váha-yu cundecu-yu ni cùu te ñá túú ní cùní-yu.

⁶ Te Yá Ndióxi ní dängávã-gá ñuhú ní dánaá-gá ñáyíu ñuú Sòdomá ndíhi ñáyíu ñuú Gòmorra te mee-nã yáá ní nduu ñuú-án. Te sá dúcáⁿ ní cuu xiáⁿ cùtnùní iní-ó nàcuáa cada ñaha Yá Ndióxi xii nchaa ñáyíu ñá túú quide váha.

⁷ Dico té Lót tée ní quide ndáá ní xindecu ìⁿ ñuú-án dàvã-án chi ní dácãcu nihnu ñaha-gá xii-dé. Te nchaa ñáyíu ñuú núú ní xindecu-dé-án ío ní xinduu cuíhna iní-yu, te mee-ni ichi díí iní ní xindecu-yu, te sá dúcáⁿ ní xóo cada-yu xiáⁿ ío ní ndíhú iní té Lót.

⁸ Te ìⁿ nduu ìⁿ nduu ní xóo cada ndáhú-xi iní té Lót-án cuendá nchaa tnúhu cuèhé tnúhu duha ní xóo cáháⁿ-yu ní xóo cund-edóho-dé, ndíhi cuendá nchaa sá cuèhé sá dúhá ní xóo cada-yu ní xóo quini-dé, te mee-dé ní cuu-dé ìⁿ tée ní xinduu vii ní xinduu váha iní-xi núú Yá Ndióxi.

⁹ Te sá dúcáⁿ ní yáha té Nòé ndíhi té Lót, xiáⁿ cùtnùní iní-ó sá Yá Ndióxi ío chindee-gá cue ñáyíu quide ndáá ndécú ichi-gá cuendá sá vá cáda-yu nándi sá cuèhé sá dúhá cuèí nándi na ndòhó-yu cundecu-yu. Te Yá Ndióxi cächí-gá sá ncháá ñáyíu ndècu ichi cuèhé ichi duha sa ndècu túha-yu sá quíhíⁿ-yu núú úhú núú ndáhú nduu ná yáha cundáá cuèchi-yu.

¹⁰ Te uuⁿ-gá cada ñaha Yá Ndióxi xii nchaa cue tée ndècu ichi díí iní, te dàquee tíhú-güedé nchaa tnúhu sá sánú ichi ñaha xii-o nacuaa cada-o cundecu-o, te cùu-güedé cue tée ñí iní-xi, te yí iní-güedé, te ñá túú yuhú-güedé cáháⁿ úhú-güedé cuendá nchaa espíritu cùnúu.

¹¹ Te cue espíritu xínú cuèchi núú Yá Ndióxi ío cùnuu-xi dacúúxi cuè tée-án, dico ñá túú cùyí-xi cáháⁿ-xi dàtná cáháⁿ cue tée-án òrè ndácáⁿ cuèchi-xi núú Yá Ndióxi cuendá nchaa sá quidé cuè espíritu cùndíhi yucu ñávãha.

¹² Te nchaa cue tée dandáhú ñáhá xii-ndo-án cúu-güedé dàtná cue quíti, chi cue quíti-án ñá túú ndècu sá xini tnùní-güedí, chi cue quíti-án ní cacu-güedí sá tníí-ó-güedí te cahni-o-güedí. Te ducaⁿ sàtnahá-xi cùu

nchaa cue téé-án, chi càháⁿ cuèhé-güedé cuèndá ndédani càa espíritu cuèi ñá túú xini-güedé ná espíritu cúu-xí, te ñu-ni mee-güedé dácuíta nihnu-güedé meé-güedé sá dúcáⁿ quide-güedé,

¹³ Te sáá nduu te nacháhu-güedé nchaa sá quidé-güedé-án, te cuèi nduu cuèi niú cúdíi ini-güedé quidé-güedé nchaa núú sá cuèhé sá dúhá sáni ini-güedé. Te òré nàtacá-ndó càda-ndo ñⁿ vico chiñuhu-ndo Yá Ndióxi te chitnahá ñáhá-güedé xii-ndo, te cada dusaⁿ-güedé sá cúdíi ini-güedé sá dándàhú ñáhá-güedé xii-ndo, te dicó sácáⁿ-núú cuàha ñaha-güedé xii-ndo ñucaⁿ na cada-güedé.

¹⁴ Te nchaa cue téé-án òré xini-güedé ñⁿ ñáiyu ñíhi te ndíhi-ni sáni ini-güedé cáháⁿ ndíhi ñaha-güedé xii-yu, te ñá túú nduu vétú ini-güedé cuèndá nchaa sá cuèhé sá dúhá quide-güedé chi uuⁿ-gá uuⁿ-gá sáni ini-güedé cada-güedé. Te cuáháⁿ-güedé dándàhú-güedé nchaa ñáiyu ñá túú ñíhi ndéé càda ndáá cuèndá canchicúⁿ nihnú-yu nchaa tnúhu càháⁿ-güedé. Te mee-ni nchàa sá ndécú ndíhi tnaha ñáiyu-güedé cúu ini-güedé, te cue téé-án cúu-güedé cue téé duuⁿ duuⁿ sa ní xita nihnu núú Yá Ndióxi.

¹⁵ Chi cùu-güedé cue téé vā cání-gá ini-xi cada ndáá, te nchicúⁿ nihnu-ná-güedé quidé-güedé nàcuáa ní xóo cada ndíi Balaám déhe ndíi Bèór, chi ndíi Balaám-án ní xóo tnahá ini ndíi cada ndíi chiúⁿ cuèhé nàcuáa ní xóo ñíhi ndíi díhúⁿ.

¹⁶ Te Yá Ndióxi ní quide-gá ní cáháⁿ búrru ndíi ní tenáá ñáhá-dí xii ndíi cuèndá sá vā càdá ndíi ñⁿ cuèchi sáni ini ndíi cada ndíi ní cùu. Te sá dúcáⁿ ní cuu xiáⁿ ní nguítuu ndíi ñá túú ní quide ndíi ñⁿ sá ñá túú nándíhi sáni ini ndíi ní cùu.

¹⁷ Te nchaa cue téé ducaⁿ xíquide cùu-güedé dàtná ñⁿ doco yichí, te cùu tucu-güedé dàtná ñⁿ vico sá xidó táchí te ñá túú dàú nchidó-xí, te sa ndècu túha ñⁿ xichi núú io nee quíhíⁿ-güedé cundecu-güedé ní caa ní quíhíⁿ.

¹⁸ Te cue téé-án càháⁿ-güedé dàtná càháⁿ ñⁿ téé io cùu cahnú dico ñá túú vèdana nándíhi nchaa tnúhu càháⁿ-güedé, te cue téé-án dándàhú-güedé nchaa ñáiyu íchí ní dàñá ichi cuèhé ichi duha, te xáhaⁿ-güedé xii-yu sá cúu-ní càdá-yu nchaa sá cuèhé sá dúhá quide nchaa ñáiyu ndècu ichi díi ini,

¹⁹ Te xáhaⁿ tucu-güedé sá cúu-ní càdá-yu nání véxi ini-yu cuèi sá vāha te cuèi sá cuèhé, dico mee-güedé chi mee-ni sá cuèhé sá dúhá cùnuu quide-güedé. Te nchaa ñáiyu ñá ndácú dàña nándi sá cuèhé sá dúhá cúu-yu dàtná ñⁿ ñáiyu xinu cuèchi ñá túú tnahí dàña quee núú chíúⁿ patróóⁿ-xi. Te ducaⁿ sátnahá-xi cúu-yu chi ñá ndácú-yu dàñá-yu nándi sá cuèhé sá dúhá quide-yu.

²⁰ Te núu ñáiyu sa ní dàñá nchàa ichi cuèhé ichi duha cuèndá sá ní cutnúni ini-yu nàcuáa nduu tnúhu Xitohó Jesucristú, Yáá ní dácácu nihnu ñaha xii-o núú ùhú núú ndàhú ná nanchocavá ini-yu cundecu tucú-yu ichi cuèhé ichi duha, te mee-ñá sá cuèhé sá dúhá tàxi tnuní ñáhá-xí xii-yu, te núu ducaⁿ te vā-gá tucu cadá-yu dàcúxí dàtná ní xóo cadá-yu cùtnahá vátá cùtnúni-gá ini-yu nàcuáa nduu tnúhu-gá.

²¹ Te vāha-gá sá vā ngúnu ichi-yu ichi ndáá ní cùu te ñá díú sá sá ní ngúnu ichi-yu te ní dàñá-yu nchaa tnúhu-gá sá sá ní ñíhi-yu ndècu ndíhi-yu sànu ichi ñaha-xi nacuáa cundecú-yu ní cùu.

²² Te ñáiyu ducaⁿ xíquide quèe ndáá-xi nàcuáa cuáháⁿ ñⁿ cuèndú sá cāchí-xi: “Iná ní nacaxi-dí sá ní ndusa-dí, te cūchí quiti íchí ní xichi ndute cāndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-án.

3

Xitohó Jesucristú quixi tucu-gá

¹ Te nchaa nchòhó ñáiyu ío cùu ini-í cùtnuní ini-í sá ío vāha sáni ini-ndó, te xéhé cúu-xí tútú cúu ùú càdúha-í sá cúu-xí-ndó, te ñⁿ-ni càháⁿ-í dándàcu ini ñáhá-í xii-ndo nchàa tnúhu sá sá ní xindédòho-ndo.

² Chi cuini-í sá vā nàcuánaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndióxi ndéé sanaha, te ní vā nàcuánaa-ndo nchaa tnúhu ní cáháⁿ cue téé ní cáháⁿ tnúhu Xitohó Jesucristú Yáá ní dácácu nihnu ñaha xii-o núú ùhú núú ndàhú, chi ñu nchaa tnúhu-án sánú ichi ñaha-xi xii-o nacuáa cada-o cùndecu-o.

³ Te ío-gá xini ñúhu-xi cutnúni ini-ndó nàcuáa cada-xi òré vátá sáá-gá nduu quixi tucu Xitohó Jesucristú ñuyú-a, te cāchí tnúhu-í xii-ndo sá cùndècu ñáiyu cuhuⁿ ini mee-ni nchàa sá cuèhé sá dúhá te mee-ni xiáⁿ cadá-yu, te càháⁿ cuèhé càháⁿ duhá-yu cuèndá tnúhu Yá Ndióxi.

⁴ Te cāchí-yu: “Ñá ndáá sá quixí Xitohó Jesucristú ñuyú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna ñu-ni duha ní quesaha-xi quide-xi ndéé cùtnahá ní ngáva ñuyú, te ñu-ni duha quide-xi ndéé cùtnahá ní xindecu cue ñaní tnahá-ó ndéé sanaha, te ñu-ni duha quide-xi ndéé ní sáá nduu ní xíhí-güedé, te ñu-ni duha quide-xi ndéé vitna”, duha càháⁿ-yu.

⁵ Te ñucúuⁿ cadá-yu vā càdá cuèndá-yu sá Yá Ndióxi ní càháⁿ-gá te ní ngúndecu andíu ndíhi ñuyú-a, te ñu-gá ní quide ní quene ñuhu yichí xiti ndute ní ngúndecu-xi ñⁿ xio.

⁶ Te ñⁿ xito ní dándáá Yá Ndióxi ndute ñuyú-a ní dàñáá-gá nchaa sá ío.

7 Te Yá Ndióxi ní cachí-gá sá cùndècu-ni ñuyú-a ndihi andiu ndéé ná sáá nduu càda-gá nchaa nàcuáa ní cahá-gá sá cúu-xí nchàa ñayiu ndècu ichi cuehé ichi duha, te dàv-áⁿ danàa-gá nchaa ñayiu-áⁿ chi cáyú andiu ndihi ñuyú-a.

8 Te nchaa nchòhó ñayiu ío cùu iní-í, ío cuhuⁿ iní-ndó tnúhu na càháⁿ-í-a, chi Yá Ndióxi ñá túú sàni iní-gá dàtná sàni iní méé-ó, te ìⁿ nduu cùu-xí datná úxí cièndú cuíá, te úxí cièndú cuíá-áⁿ cúu-xí dàtná ìⁿ nduu sá cúu-xí-gá.

9 Te Yá Ndióxi ñá túú dàna ndodo iní-gá vá cada-gá ìⁿ sá càháⁿ-gá dàtná càchi cue ñayiu sá dáná ndòdo iní-gá cada-gá ìⁿ sá càháⁿ-gá, chi ñucùⁿ tnahí dàcaca-gá nduu cuèndá sá ío cùndahú iní ñáhá-gá xii-o, te cuiní-gá sá ncháa ñayiu ndixi túu iní-yu sá ñá túú quide váha-yu ndècú-yu te tuhá-yu ichi-gá, te ducaⁿ quide-gá chi cuiní-gá sá vá cuíta nihnu ni ìⁿ-yu.

10 Te dàtná quidé cue ñadúhú quíhu-güedé ìⁿ vehe dùhu-güedé òré ñá túú yíhi iní xítóhó vehe-áⁿ, te ducaⁿ càda Xítóhó Jesucristú chi nduu ñá túú yíhi iní ñayiu ñuyú-a quixi tucu-gá, te dàv-áⁿ cada-xi andiu dàtná quidé-xí òré níhi víhi caháⁿ ñúhu, te ñiu-ni òré-áⁿ ndoñuhu àndiu, te cáyú nchaa chódíní, te cáyú tucu tnàhá ñuyú-a ndihi nchaa sá ío.

11 Te vitna nchòhó sa xini-ndó sá náá ñuyú-a te xiáⁿ ío xini ñuhu-xi cada váha-ndo cùndècu-ndo, te cada-ndo nàcuáa cuini méé Yá Ndióxi cunduu.

12 Te ío nducu ndèe-ndo ducaⁿ cada-ndo cuèndá ducaⁿ ndihi-ni sáá nduu càda-gá nchaa nàcuáa càháⁿ-gá, te ducaⁿ nchòhó cundecu túha-ndo sáá nduu-áⁿ. Te ñiu-ni nduu-áⁿ ndoñuhu àndiu chi cáyú-xi, te ñiu-ni ducaⁿ ndoñuhu tucu nchaa chódíní chi ndihi-di cáyú.

13 Te nchoo ndètu-o sáá nduu cùndècu-o ìⁿ ñuyú sáá, te quini-ó ìⁿ andiu saa datná ní cachí Yá Ndióxi, te yacáⁿ chi mee-ná cue ñayiu quide váha cundecu.

14 Te nchòhó ñayiu ío cùu iní-í, nini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndióxi, te cundecu nahi-ndo, te cada-ndo nchàa nàcuáa vá cùndècu cuéchi-ndo núú-gá.

15 Te ío cada cuèndá-ndó sá dàcaca-gá nduu dùcaⁿ cada-gá chi cuini-gá sá ncháa ñayiu naníhi tãhú-yu. Te té Pãblú téé ío cùu iní-ó ndècu ndihi-o ichi Xítóhó Jesucristú ñiu-ni nàcuáa càháⁿ-í-a ñiu-ni ducaⁿ ní tee-dé ìⁿ núú tütú ní dáquixí-dé ndaha-ndo, te ní tee-dé nàcuáa ní dácáhú iní ñáhá Yá Ndióxi xii-dé.

16 Te ñiu-ni ducaⁿ càháⁿ-dé nchaa dava-gá núú tütú cadũha-dé, te dava tnúhu càháⁿ-dé ío úhú tecú tnùni-ó, núú xiáⁿ ñayiu ñá túú

cùtnuni váha iní-xi, ñayiu ío yáchi sàndáá iní-xi ìⁿ tnúhu, ñayiu-áⁿ təcú tnùni dátñi-yu nchaa tnúhu ní chídó tnùni-dé, ndihi nchaa dava-gá tnúhu yòdo tnuní núú tütú Yá Ndióxi, te sá dúcáⁿ quidé-yu te dacuíta nihnú-yu meé-yu.

17 Te nchòhó ñayiu ío cùu iní-í, sa cùtnuní iní-ndó nàcuáa quide dava ñayiu, núú xiáⁿ ío xini ñuhu-xi quíhi iní-ndó cùndècu-ndo cuèndá ducaⁿ cùndècu-ni-ndo ichi-gá, te vá dáñá-ndó mèe-ndo dandahú ñáhá nchàa cue téé ndècu ichi cuehé ichi duha, chi cue téé-áⁿ ñá túú sàni váha iní-güedé cuèndá tnúhu Yá Ndióxi. Te núú na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna.

18 Te nchòhó uuⁿ-gá uuⁿ-gá cuíta cutnùni-gá iní-ndó quíhíⁿ nchaa nàcuáa ta chindee ñaha Xítóhó Jesucristú xii-ndo cuáháⁿ. Te ducaⁿ ío-gá cuíta cutnùni iní-ndó nchàa nàcuáa sàni iní-gá, te ñiu-gá cúu-gá Yaa ní dácácu nihnu ñaha xii-o núú ùhú núú ndáhú. Te chí ná càchi-ó sá ío càhnu cuu-gá cuéi vitna té cuéi ndéé núú cuáháⁿ núú vèxi. Te ducaⁿ na cùnduu. Te ío chí cada ndéé iní-ná vitna.

TUTÚ DÍHNA NÍ CADÚHA TÉ JUÀÁ

Tnúhu sá cãháⁿ nãcuáa naníhí tãhú-ó

¹ Te yúhú té Juàá cãchí tnúhu-í xii-ndo cuendá Cristú Yaá cãháⁿ nãcuáa cundecu ndíhi-o Yá Ndióxi. Te Cristú-áⁿ sa ndëcu-gá ndéé cútñahá ní ngáva ñuyúú. Te yúhú ní xini nùú-í ndíhi cue téé ní xica cuu ndíhi-í nãcuáa cãa nãcuáa ndùu-gá. Te ní xindedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúú-gá.

² Te ní quixi túu-gá ñuyúú-a, te ní xini-ndí-gá, te xiãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gá ndíhi Tãtã-gá Dútú Ndióxi ní cùu, te ní quixi-gá ñuyúú-a ní xindecu-ndí ndíhi-gá. Te ní cachí tnúhu-gá xii-ndí sá ndúú tãhú-ó cundecu ndíhi-o Yá Ndióxi ní caa ní quíhíⁿ te núu na quindáá iní-ó-gá.

³ Te xiãⁿ dátúu-ndí núu-ndó nchaa sá ní xini-ndí, ndíhi nchaa sá ní xindedóho-ndí cuendá cuu ñⁿnuu-o nchaa-o datná nchúhú cúú ñⁿnuu-ndí ndíhi Tãtã-ó Dútú Ndióxi, ndíhi Déhe-gá Xítoho Jesucristú.

⁴ Te xiãⁿ núu tèe-í nchaa tnúhu-a cuendá cudí iní-ó nchaa-o.

Yá Ndióxi cúú-gá datná ñⁿ ñuhú

⁵ Te nchaa tnúhu ní dánèhé ñãhá Xítoho Jesucristú xii-ndí, xiãⁿ dánèhé ñãhá-í xii-ndo. Te ní cachí-gá sá Yá Ndióxi cúú-gá datná ñⁿ ñuhú dáyhé-gá iní-ó, te ducaⁿ sãtnahá-xi cùu-gá chí ío váha quide-gá, te ñã túú quide-gá ní ñⁿ sá cuèhé sá dúhá.

⁶ Te núu cãchí-ó sá ndécú-ó ichi Yá Ndióxi, te quide-ni-o nchaa sá cuèhé sá dúhá, te dàcuandehnde-o te ñã túú quide ndáá-ó núú-gá.

⁷ Te núu na càda váha-o datná quidé mée-gá, te cuu ñⁿnuu-o nchaa-o. Te ndada ndoo ndada nine-gá iní-ó, chí cada càhnu iní-gá nchaa sá cuèhé sá dúhá quide-o, chí ñu cuendá-áⁿ ní xihí Déhe-gá Xítoho Jesucristú núu cùrúxi.

⁸ Te núu cãchí-ó sá ñã túú quide-o ní ñⁿ sá cuèhé sá dúhá, te dàndahú-ó mée-o, te ñã túú quide ndáá-ó núú Yá Ndióxi.

⁹ Te núu na ñãhmá-ó nchaa yíca cuèchi-o núú-gá, te mee-gá cada càhnu iní-gá, te ndada ndoo-gá iní-ó, cuendá cada ndáá-ó cundecu-o ichi-gá, chí mee-gá ío váha quide-gá te ío ndáá quidé-gá, ducaⁿ ní cãháⁿ-gá te ducaⁿ quide-gá.

¹⁰ Te núu na cãchí-ó sá ñã túú quide-o ní ñⁿ sá cuèhé sá dúhá, te quide-o Yá Ndióxi ñⁿ ñãndéhdé, dico ñã túú ndèhnde-gá. Te ñã

túú ndëcu tnúhu-gá iní-ó te núu ducaⁿ na càda-o.

2

Xítoho Jesucristú cãháⁿ ndãhú-gá cuendá-ó

¹ Te nchòhò ñãyiu cùu datná déhe-í, chído tnuní-í nchaa tnúhu-a cuendá sá vã cáda-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nándí sá cuèhé sá dúhá, te ndëcu ñⁿ Yaá cãháⁿ ndãhú cuendá-ó núú Yá Ndióxi. Te Yaá-áⁿ cúú-gá Xítoho Jesucristú Yaá quidé ndáá.

² Te ní xihí-gá sá cuendá nchaa yíca cuèchi-o cuendá ngundecu váha-o núú-gá te núu na quindáá iní-ó-gá. Te ñã díú-ní sá cuendá yíca cuèchi nchoo ní xihí-gá, chí tnãhá cuendá nchaa yíca cuèchi ñãyiu ní caa xico ñuyúú.

³ Te núu cada-o nchaa nãcuáa cãháⁿ Yá Ndióxi, te cutnùní iní-ó sá ndécú-ó ichi-gá.

⁴ Te núu cãchí-ó sá ndécú-ó ichi-gá te ñã túú quide-o nãcuáa cãháⁿ-gá, te dàcuandehnde-o, te ñã túú quide ndáá-ó núú-gá.

⁵ Te núu sãndáá ndisa iní-ó tnúhu-gá, te quide-o nchaa nãcuáa cãháⁿ-gá, te ducaⁿ te cùu iní ndisa-o-gá, te cùtnuní ndáá iní-ó sá ndécú-ó ichi-gá.

⁶ Te núu cãchí-ó sá ndécú-ó ichi Yá Ndióxi, te xini ñuhú-xi cada ndáá-ó cundecu-o ñuyúú-a datná ní quide ndáá Xítoho Jesucristú cútñahá ní xindecu-gá ñuyúú-a.

Nduú sáá

⁷ Te nchòhò ñãyiu ndëcu ndíhi-í ichi Xítoho Jesucristú, ñã túú chído tnuní-í ñⁿ tnúhu saa sá cúú-xi-ndó, chí ñu-ni tnúhu sá ní ngundecu ndíhi-ndo ndéé díhna, tnúhu ní xindedóho-ndo ndéé cútñahá ní sãndáá iní-ndó-gá, xiãⁿ chídó tnuní-í.

⁸ Te tnúhu-a cùu-xi datná ñⁿ tnúhu saa tèe-í dándacu iní ñãhá-í xii-ndo nãcuáa ní quide Xítoho Jesucristú cútñahá ní quixi-gá ñuyúú-a ní quide váha-gá, te tnãhá nchòhò ní tnúu-ndo tnúhu-gá te quide váha-ndo tnãhá-ndó. Te vitna ñⁿ nduu ñⁿ nduu ta cùu vai ñãyiu ta ñãhá nchaa sá cuèhé sá dúhá cuáhãⁿ, chí Xítoho Jesucristú tá dàndixi túu-gá iní-yu cuendá cutnùní iní-yu nãcuáa ndùu cuendá Yá Ndióxi.

⁹ Te núu cãchí-ó sá quidé váha-o, te cùu úhú iní-ó tnãhá ñãyiu-o, te xiãⁿ ñã túú quide ndáá-ó, chí ndëcu-ni-o ichi cuèhé ichi duha sá dúcãⁿ quide-o.

¹⁰ Te núu na cùu iní-ó tnãhá ñãyiu-o datná cúú iní ñãhá mée Yá Ndióxi xii-o ñã, te quide ndáá-ó núú-gá, te vã cãntúichi-o tnãhá ñãyiu-o ñⁿ ichi cuèhé ichi duha.

¹¹ Te núu cùu úhú iní-ó tnãhá ñãyiu-o, te ñã túú quide váha-o núú Yá Ndióxi, chí ndëcu-ni-o ichi cuèhé ichi duha, te ñã túú

cútnuní iní-ó sá quidé-ó. Chi cùu-o datná ìᵐ tée ndècu núú nées chi ñá cútñuní núú-dé ndéé ichi quíhíⁿ-dé. Ducaⁿ sátnahá-xi cùu nchoo chi ñá cútñuní iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tñaha ñáyi-u.

¹² Te nchòhò ñáyi-u cùu datná déhe-í, yúhú chídó tñuní-í tñúhu-a ìᵐ núú tütú càchí tñúhu-í xii-ndo sá ñí quide càhnu iní Yá Ndióxi nchaa cuéchi-ndo, chi diu cuendá-áⁿ ní xihí Xítohó Jesucristú.

¹³ Te nchòhò ñáyi-u sacuéhé, yúhú tée-í tñúhu-a sá cùu-xí-ndó chi càháⁿ ndihí-ndo Jèsús, te Yaa-áⁿ sa ndècu-gá ndéé cútñahá ní ngáva ñuyúú. Te nchòhò ñáyi-u nchicúⁿ-gá téé tucu-í tñúhu-a sá cùu-xí-ndó chi ñá túú sàndáá iní-ndó tñúhu càháⁿ yucu ñávaha.

Te nchaa nchòhò ñáyi-u cùu datná déhe-í, tée tucu-í tñúhu-a sá cùu-xí-ndó, chi sa càháⁿ ndihí-ndo Tátá-ó Dütú Ndióxi.

¹⁴ Te nchòhò ñáyi-u ní sàhnu, yúhú chídó tñuní-í tñúhu-a ìᵐ núú tütú chi càháⁿ ndihí-ndo Jèsús, te Yaa-áⁿ sa ndècu-gá ndéé cútñahá ní ngáva ñuyúú. Te nchòhò ñáyi-u nchicúⁿ-gá, yúhú chídó tñuní-í tñúhu-a chí io nihí ndéé-ndó ndècu-ndo, chí tñi-ndo tñúhu càháⁿ Yá Ndióxi. Te ñá túú sàndáá iní-ndó tñúhu càháⁿ yucu ñávaha.

¹⁵ Te vá cùhúⁿ iní-ndó ní ìᵐ sá cuèhé sá dúhá íó ñuyúú-a, te ní vā cání iní-ndó càda-ndo. Chí núu na cùhuⁿ iní-ó nchàa sá cuèhé sá dúhá íó ñuyúú-a ña, te ñá túú Tátá-ó Dütú Ndióxi ñúhú iní-ó te núu ducaⁿ na càni iní-ó.

¹⁶ Te nchaa ñáyi-u ñuyúú-a quidé-yu nchaa sá cuèhé sá dúhá, chí diu nchaa xiáⁿ cúdíí iní-yu cadá-yu. Te nchaa sá cuèhé sá dúhá sání iní-yu, ndihí nchaa sá xini-yu quidé-yu. Te xiquide ñinu-yu mée-yu cuendá nchaa sá ndécú ndihí-yu. Te nchaa sá ñá túú vaha ní cacu nihnu-xi ñuyúú-a.

¹⁷ Te nchaa sá ñá túú vaha íó ñuyúú-a, ndihí nchaa sá sání cuèhé sání dùha iní-yu cuita ndihí nihnu-xi quíhíⁿ. Te nchaa ñáyi-u tñi tñúhu càháⁿ Yá Ndióxi cundecú-yu ndihí-gá ní caa ní quíhíⁿ.

Tnúhu ndáá tñúhu Yá Ndióxi ndihí tñúhu ndehnde

¹⁸ Te nchòhò ñáyi-u cùu datná déhe-í, sa nihí-ndó tñúhu sá quíxí ìᵐ tée cunu-u-gá-dé cuu úhú iní-dé Cristú. Te sa xindecu-gá ñáyi-u cùu úhú iní ñáhá xii-gá, núu xiáⁿ cútñuní iní-ó sá sa ta cuyatni nduu naa ñuyúú-a.

¹⁹ Te ñáyi-u-áⁿ ní xindecu ndihí ñáhá-yu xii-o, te ní quee-yu cuaháⁿ-yu chí ñá túú ní cùu ìᵐnu-u-o ndihí-yu. Chí núu dícó ní cùu ìᵐnu-u-o ndihí-yu te cundecu ndihí ñáhá-yu xii-o ní cùu. Te dùha ní cuu cuendá cutñuní ndáá iní-ó nchàa-o sá ñá túú cùu ìᵐnu-u-o ndihí-yu, chí ñá túú sàndáá iní-yu Yá Ndióxi.

²⁰ Te Xítohó Jesucristú ní taxi-gá Espíritú Yá Ndióxi ndécú ndihí-o, núu xiáⁿ təcú tñuní-ó tñúhu-gá.

²¹ Te cuendá sá xini-ndó tñúhu ndáá tñúhu Yá Ndióxi núu xiáⁿ tée-í tñúhu-a, te ñá díú ìᵐ sá ñá cútñuní iní-ndó cùu-xi. Te sa naha-ndo sá ní ìᵐ tñúhu ndehnde ñá túú ñùtnahá-xi núú tñúhu Yá Ndióxi, chí mee ñine-ni tñúhu ndáá cùu-xi.

²² Te nchaa ñáyi-u càchí sá ñá díú Jèsús cùú Cristú Yaa ní tendaha Yá Ndióxi ní quixi ñuyúú-a dàcuandehnde-yu, te cùu úhú iní-yu Jèsús. Te diu-ni-yu càchí-yu sá ñá díú Déhe Yá Ndióxi cùú Jèsús, te sá dúcáⁿ quidé-yu te cùu úhú iní-yu Yá Ndióxi ndihí Déhe-gá Jèsús.

²³ Te nchaa ñáyi-u ñá túú sàndáá iní sá Déhe Yá Ndióxi cùú Jèsús, ñáyi-u-áⁿ ñá túú ndécú-yu ichi Tátá-ó Dütú Ndióxi. Te nchaa ñáyi-u càháⁿ sá Déhe Yá Ndióxi cùú Jèsús, ñáyi-u-áⁿ ndécú-yu ichi Tátá-ó Dütú Ndióxi.

²⁴ Te nchaa tñúhu Yá Ndióxi ní tecú dóho-ndo ndéé díhna, tñúhu-áⁿ cuhuⁿ iní-ndó. Te núu nchaa tñúhu-áⁿ ná cùhuⁿ-ní iní-ndó, te cundecu ndihí-ndo Yá Ndióxi ndihí Déhe-gá cuéí vá cundecu túu-ndo ndihí-gá ñuyúú-a.

²⁵ Te Jèsús ní cachí-gá sá ndúú tãhú-ó cundecu ndihí-o-gá ní caa ní quíhíⁿ andiu.

²⁶ Te cuendá nchaa ñáyi-u dàndahú ñáhá xii-ndo ní chídó tñuní-í tñúhu-a,

²⁷ dico nchòhò chí ndècu ndihí-ndo Espíritú Yá Ndióxi sá ní taxi Xítohó Jesucristú. Núu xiáⁿ ñá túú xini ñuhu-ndo ñáyi-u danèhé ñáhá xii-ndo, chí mee Espíritú-gá danèhé ñáhá-xi nchàa sá vaha. Te nchaa sá danèhé ñáhá-xi xii-ndo cuu-xi sá ndàá, te ñá díú ìᵐ tñúhu ndehnde. Te vitna chí cànchicúⁿ nihnu-ni ichi Yá Ndióxi dàtná ní sanu ichi ñaha mée Espíritú-gá xii-ndo.

²⁸ Te nchòhò ñáyi-u cùu datná déhe-í, chí cànchicúⁿ nihnu-ni ichi Xítohó Jesucristú, chí cuendá òrè ná quíxí tucu-gá ñuyúú-a te vá yùhú-ndó te ní vá cùú càhaⁿ núú-ndó núú-gá.

²⁹ Te nchòhò sa naha-ndo sá mée-gá quidé ndáá-gá, te sa xini-ndó sá nchàá ñáyi-u quide ndáá cùu-yu déhe Yá Ndióxi.

3

Ñáyi-u cùu déhe Yá Ndióxi

¹ Te chí cuáha cuendá sá ío cùu iní ñáhá Tátá-ó Dütú Ndióxi xii-o cuendá sá cùú-ó déhe-gá, chí ducaⁿ ní cachí-gá, te déhe ndisa-gá cùú-ó. Te núu xiáⁿ ñáyi-u ndècu ichi cuèhé ichi dùha ñá cùú quini ñáhá-yu xii-o, chí ñá túú xini-yu nàcuáa ndùu cuendá Yá Ndióxi.

² Te nchòhò ñáyi-u ío cùu iní-í, vitna cùu-o déhe Yá Ndióxi, te vátá cútñuní vaha-gá iní-ó nàsa cunduu-o ndéé núú cuaháⁿ núú vèxi. Dico sa cútñuní iní-ó sá òrè ná

quixi tucu Xítoho Jesucristú te nduu-o dátaná cáá mée-gá, chí quini-ó-gá nàcuáa-ni càa nacuáa-ni ndùu-gá.

³ Te nchaa ñáiyu sa ndètu ñaha xii-gá sa ta ngündecu túha-yu cuáhán, chí ta ndùu ndoo nduu nine iní-yu cuáhán dátaná cáá ndòo caa nine mee-gá.

⁴ Te nchaa ñáiyu quide nándi sá cuèhé sá dúhá ñá túú quide váha-yu núú Yá Ndióxi, chí ní cachí-gá sá vâ dúcáⁿ càda-o.

⁵ Te sa nàha-ndo sá ní quixi túú Xítoho Jesucristú ñuyúú-a cuendá cada cànu iní-gá nchaa sá cuèhé sá dúhá quide-o, chí mee-gá ñá túú quide-gá ní ñⁿ sá cuèhé sá dúhá.

⁶ Te nchaa ñáiyu ndècu ichi Yá Ndióxi ñá túú ñùhu-yu ichi cuèhé ichi duha. Te nchaa ñáiyu ñùhu ichi cuèhé ichi duha ñá túú xini-yu nàcuáa ndùu cuendá Xítoho Jesucristú te ní ñá túú xini-yu nàsa càa-gá.

⁷ Te nchòhó ñáiyu cùu datná déhe-í, vâ dáñá-ndó mée-ndo dandahú ñáhá ñáiyu ndècu ichi cuèhé ichi duha, chí càchí-yu sá cúú cündecu-o ichi Yá Ndióxi te cada-o nándi sá cuèhé sá dúhá dico ñá ndáá. Te nchaa ñáiyu quide váha quide ndáá-yu dátaná quidé mée Jesús.

⁸ Te nchaa ñáiyu ndècu ichi cuèhé ichi duha ndècu ndihi-yu yucu ñávàha, chí ducaⁿ quide mee-xi ndéé cùtnáhá vátá ngáva-gá ñuyúú. Te xiáⁿ ní quixi Jesús Déhe Yá Ndióxi ní dáquée ùhú-gá nchaa sá quidé yucu ñávàha.

⁹ Te nchaa ñáiyu ní natuha ichi Yá Ndióxi ní nduú-yu déhe-gá, te ñá túú-gá quidè-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xiáⁿ ñá túú-gá quidè-yu nándi sá cuèhé sá dúhá, chí ní ngündecu ndihi ñaha-gá xii-yu.

¹⁰ Te cùtnuní iní-ó nándi cùu ñáiyu cùu déhe Yá Ndióxi, te cùtnuní iní-ó nándi cùu ñáiyu cùu déhe yucu ñávàha. Te nchaa ñáiyu ñá túú quide ndáá, te cùu úhú iní-yu tñaha ñáiyú-yu, te ñáiyu-áⁿ ñá díú déhe Yá Ndióxi cúu-yu.

Cuu iní tnáhá-ó ñⁿ ñⁿ-o

¹¹ Te ndéé órè ní natuha-o ichi Yá Ndióxi ní tecú dóho-o sá cúú iní-ó tñaha ñáiyu-o.

¹² Te vâ cünduu úhú iní-ó dátaná ní quide ndíi Càn, chí ndíi-áⁿ ní xíndecu ndíi ndihi yucu ñávàha núu xiáⁿ ní sahni ndíi ñaní ndíi. Te ducaⁿ ní quide ndíi chí ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

¹³ Te nchòhó ñáiyu ndècu ndihi-í ichi Xítoho Jesucristú, vâ cáda cuendá-ndó sá cúú úhú iní ñáhá nchaa ñáiyu ndècu ichi cuèhé ichi duha xii-ndo.

¹⁴ Te cunaha-ndo na càchí tñuhu-í xii-ndo sá núu na cùu iní-ó tñaha ñáiyu-o, te cùtnuní iní-ó sá sá ní dáñá-ó ichi sá tá dàcuíta nihnu

ñaha xii-o cuáhán ní cùu, te vitna ní tñu-ó ichi váha. Te nchaa ñáiyu ñá túú cùu iní tñaha ñáiyu-xi ñùhu-ní-yu ichi cuáhán-yu núú ùhú núú ndàhú.

¹⁵ Te nchaa ñáiyu ñá cúú quini ndeé tñaha ñáiyu-xi cúu-yu dátaná ñⁿ ñáiyu sahni ndíyi. Te nchòhó sa nàha-ndo sá ní ñⁿ ñáiyu sahni ndíyi ñá túú ndècu ndihí-yu tñuhu ndee iní sá nánihí tànhú-yu.

¹⁶ Te Xítoho Jesucristú ní xihí-gá cuendá nchaa yicá cuèchi-o, núu xiáⁿ cùtnuní iní-ó sá ño cùu iní ñáhá-gá xii-o. Te xiáⁿ cùtnuní iní-ó nàcuáa cada-o cùu iní-ó tñaha ñáiyu-o, te cuèi na cùu-ó cuendá sá cúú-xi ñⁿ-yu, cuendá-ná sá ná dàcácu nihnu-ó-yu núú tñùndòho ndècú-yu.

¹⁷ Te núu ndècu ndihi-o sá cóhó sá cáxí-ó ndihi nchaa sá nándihí-o, te ndècu ñáiyu ndàhú ñá túú vèdana ná ndécú ndihi, te ñá túú chindee-ó-yu, te ñá túú cùu iní-ó Yá Ndióxi te núu ducaⁿ na càda-o.

¹⁸ Te nchòhó ñáiyu cùu datná déhe-í vâ cuendá-ni cùnàha cáháⁿ-ndó sá cúú iní tñáhá-ndó, chí cuu iní tñáhá ndisa-ndo te coto tñaha-ndo.

Vá yùhú-ó núú Yá Ndióxi

¹⁹ Te núu ducaⁿ na càda-o, te cùtnuní iní-ó sá ndécú-ó ichi ndáá ichi Yá Ndióxi, te ñá túú-gá ná quihí iní-ó núú-gá.

²⁰ Te núu ndihí iní-ó cuendá ñⁿ sá ní quide-o, te sa nàha Yá Ndióxi te núu ní quide váha-o àdi ní quide cuèhé-ó, chí sa nàha ndáá-gá nàcuáa càa iní-ó.

²¹ Te nchòhó ñáiyu ío cùu iní-í, na càchí tñuhu-í xii-ndo, te núu ñá túú ná sání iní-ó te ñá túú ná quidè-ó, te vâ yùhú-ó núú Yá Ndióxi.

²² Te nchaa sá vâha na càcáⁿ-ó núú Yá Ndióxi, te mee-gá taxi-gá chí tñu-ó tñuhu càháⁿ-gá, te quide-o nchaa nacuáa cùu iní-gá.

²³ Te ní cachí Yá Ndióxi sá quindáá iní-ó Déhe-gá Xítoho Jesucristú, te cuu iní-ó tñaha ñáiyu-o dátaná ní cachí-gá.

²⁴ Te nchaa ñáiyu tñu tñuhu-gá ndécú-yu ichi-gá, te ndècu ndihi ñaha-gá xii-yu. Te cùtnuní iní-ó sá ndécú-ó ndihi-gá chí ní taxi-gá Espiritú-gá ndécú ndihi-o.

4

Ñáiyu ndècu ndihi Espiritú Yá Ndióxi ndihi ñáiyu cùu úhú iní ñáhá xii Xítoho Jesucristú

¹ Te nchòhó ñáiyu ío cùu iní-í, vâ cùtexínu quindáá iní-ndó tñuhu càháⁿ nchaa ñáiyu càchí sá ndécú ndihi Espiritú Yá Ndióxi. Chí díhna-gá cada cuendá váha-ndo te núu càháⁿ ndáá-yu nàcuáa càháⁿ tñuhu Yá Ndióxi, chí ío vâi ñáiyu ñuyúú-a cachí-yu sá càháⁿ-yu tñuhu-gá dico ñá ndáá.

² Te duha cutnùnì iní-ó nándì cùu ñáiyu ndècu ndihi Espiritú Yá Ndióxi. Nchaa ñáiyu càháⁿ ndáá sá Xítohó Jesucristú ní quixi-gá ñuyíú-a te ní cuu-gá ñⁿ yiqui cùñú, ñáiyu-áⁿ cùú-yu ñáiyu cùu cuendá Yá Ndióxi.

³ Te nchaa ñáiyu ñá túú càháⁿ nacúaa càa Jesús cùtnàhá ní quixi-gá ñuyíú-a ñáiyu-áⁿ dándahú ñáhà-yu, chi ñá túú cùú-yu ñáiyu cùu cuendá Yá Ndióxi. Te ñu-ní-yu cùu úhú iní-yu Jesús. Te nchòhó sa nàha-ndo sá cùndècu ñáiyu cuu úhú iní ñáhà xii-gá, dico yùhú càchì tnùhu-í xii-ndo sá sà ndecú-yu.

⁴ Te nchòhó ñáiyu cùu datná déhe-í, ndècu ndihi-ndo Yá Ndióxi, te ñá dāñá-ndó dāndahú ñáhà nchaa ñáiyu càchì sá càháⁿ tnùhu-gá te ñá ndáá. Te ñá túú sàndáá iní-ndo chi Yá Ndióxi Yáa ndécú ndihi-ndo taxi tnuní vñí-gá dàcúxí yùcu ñávàha ndècu ndihi nchaa ñáiyu ñùhu ichi cuehé ichi duha.

⁵ Te nchaa ñáiyu dāndahú ñáhà sá càháⁿ tnùhu Yá Ndióxi ndécú-yu ichi cuehé ichi duha, te mee-ni cuendá nchaa sá íó ñuyíú-a càháⁿ-yu. Te tédòho ñaha nchaa dava-gá ñáiyu ndècu ñu-ni ichi cuehé ichi duha.

⁶ Te nchoo cùu-o ñáiyu cùu cuendá Yá Ndióxi. Te nchaa ñáiyu xīndecu ichi-gá tnñⁿ-yu tnùhu càháⁿ-ó, te nchaa ñáiyu ñá túú ndècu ichi-gá ñá túú tnñⁿ-yu tnùhu càháⁿ-ó. Te duha te cùtnuní iní-ó nándì cùu ñáiyu càháⁿ ndáá, te cùtnuní tucu iní-ó nándì cùu ñáiyu dāndahú ñáhà.

Cuu iní-ó tnàha ñáiyu-o datná cùú iní ñáhà mèe Yá Ndióxi xii-o

⁷ Te nchòhó ñáiyu ío cùu iní-í, xini ñuhu-xi cuu iní tnáhà-ó datná cùú iní ñáhà mèe Yá Ndióxi xii-o, chi mee-gá táxi-gá sá xini tnùnì-ó cuendá cuu iní-ó tnàha ñáiyu-o. Te nchaa ñáiyu cùu iní tnàha ñáiyu-xi cùú-yu déhe Yá Ndióxi, te cùtnuní ndáá iní-yu sá ndécú ndihi ñaha-gá xii-yu.

⁸ Te nchaa ñáiyu ñá túú cùu iní tnàha ñáiyu-xi ñá túú ndècu ndihi-yu Yá Ndióxi. Te nchaa ñáiyu ndècu ndihi Yá Ndióxi, ñáiyu-áⁿ sáñaha-gá sá xini tnùnì-yu cuendá cuu iní-yu tnàha ñáiyú-yu.

⁹ Te cùtnuní iní-ó sá cùú iní ñáhà Yá Ndióxi xii-o nchaa-o, chi ní tendaha-gá ñⁿdií díí-ni Déhe-gá Xítohó Jesucristú ní quixi-gá ñuyíú-a cuendá sá díú-gá cada te naníhí tãhú-ó, te núu na quindáá iní-ó tnùhu-gá.

¹⁰ Te ío cùu iní ñáhà Yá Ndióxi xii-o nchaa-o. Te ñá díú sá mèe-ó cùu iní-ó-gá, chi díhna-gá mèe-gá sa cùu iní ñáhà tnàhí-gá xii-o, núu xíⁿ ní tendaha-gá Déhe-gá ní quixi-gá ñuyíú-a ní xihí-gá sá cuendá nchaa yíca cuèchi-o.

¹¹ Te nchòhó ñáiyu ío cùu iní-í, xini ñuhu-xi cuu iní tnáhà-ó, chi mee Yá Ndióxi ío cùu iní ñáhà-gá xii-o.

¹² Te ní ñⁿ nchoo ñáiyu ndècu ñuyíú-a ñá túú xini-ó nacúaa càa Yá Ndióxi, dico nchoo ñáiyu ní tuha ichi-gá chi cùtnuní iní-ó sá ndécú ndihi ñaha-gá xii-o. Núu xíⁿ cùú iní tnáhà-ó ñⁿ ñⁿ-o, te cùtnuní iní-ó sá cùú iní ndisa-o-gá.

¹³ Te cùtnuní iní-ó sá ndécú-ó ichi-gá, te ndècu ndihi ñaha-gá xii-o, chi ní taxi-gá Espiritú-gá ndécú ndihi-o.

¹⁴ Te yùhú ndihi dava-gá cue téé ní xica cuu ndihi-gá càháⁿ-ndí sá ní xini-ndí Jesús Déhe Yá Ndióxi ní quixi-gá ñuyíú-a, chi Tãtá-ó Dütú Ndióxi ní tendaha ñaha xii-gá ní quixi-gá cuendá dàcácu nihnu-gá nchaa nchoo ñáiyu ndècu ñuyíú-a núu úhú núu ndàhú.

¹⁵ Te nchaa ñáiyu càháⁿ ní yùhu ní iní-xi sá Déhe Yá Ndióxi cùú Jesús, ñáiyu-áⁿ ndécú-yu ichi-gá te ndècu ndihi ñaha-gá xii-yu.

¹⁶ Te sàndáá iní-ó ní yuhu ní iní-ó sá Yá Ndióxi cùú iní ñáhà-gá xii-o, chi ducaⁿ iní-gá. Te nchaa ñáiyu cùu iní ñáhà xii Yá Ndióxi ndécú ndihi ñaha-gá xii-yu.

¹⁷ Te núu ndisa cùu iní-ó Yá Ndióxi te vá yùhú-ó órè ná sáá nduu tàudñⁿ ñaha-gá xii-o tnùú nchaa ñáiyu ndècu ichi cuehé ichi duha, chi quide ndáá-ó ndècu-o núú-gá ñuyíú-a datná ní quide mee Jesús.

¹⁸ Chi nchaa ñáiyu cùu iní ñáhà xii Yá Ndióxi ñá túú-gá yùhú-yu, te núu cùu iní ndisá-yu-gá. Te núu yùhú-yu te xíⁿ sa ndòhò-yu, chi ñùhú-yu ichi cuaháⁿ-yu núu úhú núu ndàhú, chi nchaa ñáiyu yùhú ñá túú cùu iní ndisá-yu Yá Ndióxi.

¹⁹ Te cuu iní-ó Yá Ndióxi, chi mee-gá ndéé cùtnàhá vátá quindáá-gá iní-ó tnùhu-gá sa cùu iní ñáhà-gá xii-o.

²⁰ Te nchaa ñáiyu càchì sá cùú iní-yu Yá Ndióxi, te cùu úhú iní-yu tnàha ñáiyú-yu, ñáiyu-áⁿ dàcuandehndé-yu. Te núu ñá túú cùu iní-yu tnàha ñáiyú-yu ndècu ñuyíú-a ña, te uuⁿ-gá quidè-yu Yá Ndióxi Yáa ñá túú xini núú-yu.

²¹ Te càchì-gá núú tnùhu-gá sá ñáiyu na cùu iní ñáhà xii Yá Ndióxi, te ducaⁿ-ni cùu iní-yu tnàha ñáiyú-yu.

5

Nchaa ñáiyu ní ndacu ní dāñá ichi cuehé ichi duha

¹ Te nchaa ñáiyu sàndáá iní sá Jesús cùú-gá Crístú Yáa ní quixi ñuyíú-a, ñáiyu-áⁿ cùú-yu déhe Yá Ndióxi. Te cùu iní-yu Tãtá-ó Dütú Ndióxi, te cùu iní-yu Déhe-gá.

² Te núu cùu iní-ó Yá Ndióxi te quide-o nacúaa càháⁿ-gá, te cùtnuní iní-ó sá cùú iní tnáhà ndisa-o nacúaa ndècu-o ichi-gá.

³ Te núu cùu iní-ó Yá Ndióxi te tnñⁿ-o tnùhu càháⁿ-gá, chi cùtnuní iní-ó sá ñá díú ñⁿ sá úhú cùú-xi datná càchì ñáiyu.

⁴ Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús nũu xiáⁿ ní ndacu-o ní dáñá-ó ichi-áⁿ.

⁵ Te nchaa ñáyiú sàndáá iní sá Dèhe Yá Ndióxi cúu Jèsús ní ndacu-yu ní quee-yu ichi cuehé ichi duha.

Nàcuáa ní cáháⁿ Yá Ndióxi cuèndá Jèsús

⁶ Te Xítoho Jesucristú ní quixi-gá ñuyú-a, te ní sandute-gá. Te ñá díú-ní xiáⁿ, chi ní xihí-gá sá cuèndá nchaa yíca cuèchi-o. Te Espiritú Yá Ndióxi cáháⁿ-xi mee-ni sá ndáá, chi cáháⁿ Espiritú-gá-án sá Jèsús cúu-gá Cristú Yáa ní quixi ñuyú-a.

⁷ Te úní testíu ndécú àndiú, Tátá-ó Dütú Ndióxi, ndihi Déhe-gá Xítoho Jesucristú, ndihi Espiritú-gá. Te ñⁿ-ni tnúhu cáháⁿ ndi núní testíu-áⁿ.

⁸ Te ducaⁿ cùu-xi ñuyú-a tucu, chi cáháⁿ Espiritú Yá Ndióxi sá Jèsús cúu-gá Cristú. Te ní sandute-gá, te ní xihí-gá sá cuèndá nchaa yíca cuèchi-o. Te xiáⁿ cútñuní ndáá iní-ó sá díú Jèsús cúu-gá Cristú.

⁹ Te núu tnì-o tnúhu váha cáháⁿ ñáyiú, te váha-gá tnì-o tnúhu cáháⁿ Yá Ndióxi, chi cáháⁿ ndáá-gá sá Déhe-gá cúu Jèsús.

¹⁰ Te nchaa ñáyiú sàndáá iní sá Jèsús cúu-gá Déhe Yá Ndióxi, ñáyiú-án cútñuní iní-yu sá cúu-xi ñⁿ sá ndáá. Te nchaa ñáyiú ñá túú sàndáá iní tnúhu cáháⁿ Yá Ndióxi quidé-yu-gá ñⁿ ñándéhné, dico ñá túú ndéhné-gá, chi mée-yu ñá túú sàndáá iní-yu sá Déhe-gá cúu Jèsús dátñá cáchi mée-gá.

¹¹ Te Yá Ndióxi cáchi tnúhu ndáá-gá sá cùndecu-o ndihi-gá ní caa ní quíhíⁿ. Te duha cáháⁿ-gá chi sàndáá iní-ó Déhe-gá.

¹² Te nchaa ñáyiú na quíndáá iní ñáhá xii Déhe-gá cundecu-yu ndihi-gá ní caa ní quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndecu-yu ndihi-gá.

Sáhú ndéé núu ní ndihi-ná

¹³ Te cuèndá sá sàndáá iní-ndó Dèhe Yá Ndióxi nũu xiáⁿ chídó tnùní-í tnúhu-a cuèndá cutñuní iní-ndó sá cùndecu ndihi-o-gá ní caa ní quíhíⁿ.

¹⁴ Te ñá túú tnúhu yùhú cáháⁿ ndihi-o Yá Ndióxi, chi tedóho ñaha-gá xii-o núu ñⁿ-ná sá ná cácaⁿ-ó núu-gá dátñá cuíní mée-gá.

¹⁵ Te cútñuní iní-ó sá táxi-gá sá xicáⁿ-ó núu-gá, chi ñaha-o sá tedóho ñaha-gá xii-o núu na cácaⁿ-ó nàcuáa cùu iní-gá.

¹⁶ Te núu xini-ó ñáyiú ndecu ichi Yá Ndióxi te quidé-yu sá ñá túú váha núu-gá, te ndéhe-o sá ñá túú ní xíta nihnu duúⁿ-yu, te cáháⁿ ndihi-o Yá Ndióxi cuèndá-yu, te dácácu nihnu ñaha-gá xii-yu te núu na núcunu ichi váha-yu. Chi ió ñáyiú xidó quidé nándi sá ñá

túú váha te xíta nihnu duúⁿ-yu, te vá cáháⁿ ndihi-gá-ó Yá Ndióxi cuèndá-yu.

¹⁷ Te nchaa sá cuehé sá dúhá cùu-xi yíca cuèchi, dico ñá ncháá-xí cùu-xi sá dácúita nihnu ñaha dùuⁿ.

¹⁸ Te ñaha-o sá nchóó ñáyiú cùu déhe Yá Ndióxi ñá túú-gá sání iní-ó cada-o nándi sá cuehé sá dúhá. Te ducaⁿ chi mee Jèsús déhe Yá Ndióxi xító ñaha-gá xii-o, núu xiáⁿ ñá ndácú-gá yucu ñávaha dácínu iní ñáhá-xí xii-o cada-o sá ñá túú váha.

¹⁹ Te nchoo ñaha-o sá ndécú ndihi-o Yá Ndióxi. Te nchaa ñáyiú ndecu ichi cuehé ichi duha táxi tnuni ñáhá-ná yucu ñávaha xii-yu.

²⁰ Te ñaha tucu-o sá ñuyú-a ní quixi Jèsús Déhe Yá Ndióxi ní taxi-gá sá xini tnùní-ó cuèndá cutñuní iní-ó sá mée-gá cúu-gá Ndióxi-ó. Te ndecu ndihi-o mee-gá ndihi Déhe-gá Jèsús, te ñⁿdií díí-ni mee-gá cúu-gá Yá Ndióxi, te ndecu dava-gá sá nàcuáca ñaha-gá xii-o cùndecu-o ndihi-gá ní caa ní quíhíⁿ.

²¹ Te nchóhó ñáyiú cùu datñá déhe-í, vá quíndáá iní-ndó ncháa sá cáchi-yu cùu ndióxi, chi dicó ndaha cue téé ñuyú-a ní cuáha nchaa xiáⁿ. Te ducaⁿ na cùnduu. Te ió chí cádá ndéé iní-ná vitna.

TUTÚ CÚÚ ÒÚ NÍ CADÚHA TÉ JUÁÁ

Tnúhu Yá Ndióxi ndihi nàcuáa cuu ini tnáhá-ó

¹ Te yúhú té Juáá téé yindaha ñaha xii ñáiyu sàndáá ini tnúhu Jèsús, tée-í tnúhu-a ìⁿ núú tütú daquixi-í ndaha yòhó ñaha ní cáháⁿ ñáhá Yá Ndióxi, te nchaa tnúhu-a cùu-xi tnahá cuèndá cue déhe-n, chi ío cùu ini ñáhá-í xii-ndo, chi ndècu-ndo ichi Yá Ndióxi. Te ñá díú-ní mée-í cùú ini ñáhá-í xii-ndo, chi nchaa-ndí nàcuáa sàndáá ini-ndí tnúhu-gá cùú ini ñáhá-ndí xii-ndo.

² Te cùu ini ñáhá-ndí xii-ndo chi ndècu ndihi-ndo tnúhu ndáá tnúhu Yá Ndióxi, te duçaⁿ-ni cùndecu-o ndihi tnúhu-áⁿ ni caa ni quíhíⁿ.

³ Te xicáⁿ táhù-í núú Tátá-ó Dütú Ndióxi, ndihi núú Déhe-gá Xítohó Jesucristú sá ná chindèe ñaha-gá xii-ndo, te coto ñaha-gá te ío váha cuu ini-ndó cùndecu-ndo. Te duha xicáⁿ táhù-í núú-gá chi ndècu ndihi-o tnúhu ndáá tnúhu Yá Ndióxi, te cùu ini-ó-gá.

⁴ Te ío cùdí ini-í, chi ní naníhí-í ìⁿ òú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mée Tátá-ó Dütú Ndióxi.

⁵ Te vitna yòhó ñaha ní cáháⁿ ñáhá Yá Ndióxi, cächí tnúhu-í xii-n sá xíní ñùhu-xi cuu ini-ó tnàha ñáiyu-o. Te ñá díú ìⁿ tnúhu saa cùu-xi, chi díu-ni tnúhu sá ní ngúndecu ndihi-o ndéé cútñahá ní tuha-o ichi Yá Ndióxi.

⁶ Te núu cùu ini-ó Yá Ndióxi, te cùu ini-ó tnàha ñáiyu-o dàtná ní cachí mée-gá, te tñii-o nchaa tnúhu cáháⁿ-gá. Te ní cachí-gá sá cùú ini-ó-gá, te cuu ini-ó tnàha ñáiyu-o. Te tnúhu-a ní tecú dóho-o ndéé cútñahá ní tuha-o ichi-gá.

Cue téé dàndahú tnàha ñáiyu-xi

⁷ Te ío vai ñáiyu dàndahú ñáhá xica cuú-yu ñuyíú-a, te cächí-yu sá ñá ndáá sá Xítohó Jesucristú ní cuu-gá ìⁿ ñáiyu ndisa. Te nchaa ñáiyu duha cáháⁿ dácuàndehndé-yu, te cùu ùhú ini-yu Jèsús.

⁸ Te quíhí ini-ndó sá vǎ dándahú ñáhá ñáiyu-áⁿ xii-ndo cuèndá sá vǎ cuíta chiúⁿ Yá Ndióxi ní quide-o. Te òré ná quíxí tucu Jèsús ñuyíú-a te taxi-gá nchaa sá váha cùu ini mée-gá cundecu ndihi-o.

⁹ Te nchaa ñáiyu dàña tnúhu Xítohó Jesucristú, te nàtní-yu ingá ichi, ñáiyu-áⁿ ñà túú ndècu ndihí-yu Yá Ndióxi. Te nchaa ñáiyu ñá túú dàña tnúhu Xítohó Jesucristú ndècu ndihí-yu Yá Ndióxi ndihi Déhe-gá Xítohó Jesucristú.

¹⁰ Te núu véxi ñáiyu núu ndécú-ndó cächí-yu sá cáháⁿ-yu tnúhu Yá Ndióxi te ñá ndáá, te vǎ cuáha-ndo tnúhu danèhé ñáhá-yu xii-ndo, te ní vǎ cuáha-ndó-yu tnúhu ndee ini cuèndá chiúⁿ quidé-yu.

¹¹ Chi núu na cáháⁿ ndihi váha-ndó-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndéé núú ní ndihi-ná

¹² Te ío vai-gá tnúhu cuini-í cachí tnúhu-í xii-ndo, dico vǎ téé-gá-í chi cuini-í quixi-í núú ndécú-ndó ndàtnúhu-o cuèndá cudíí víhí ini-ó nchaa-o.

¹³ Te nchaa cue déhe cùhú-n, ñáiyu ní cáháⁿ ñáhá Yá Ndióxi quidé ndèe ini ñáhá-yu xii-n.

TUTÚ CÚU ÒNÍ NÍ CADÚHA TÉ JUÁÁ

Càháⁿ váha-yu cuendá té Gǎyú

¹ Te yúhú té Juáá té yindaha ñaha xii ñáiyu sàndáá iní tnúhu Jèsús, chido tnuni-í tnúhu-a ñⁿ núú tütú sá cúu-xí yòhó té Gǎyú téé ío cùu iní-í, chí ndècu ndihi-n tnúhu ndáá tnúhu Yá Ndiòxí.

² Te yòhó téé ío cùu iní-í, xicáⁿ tǎhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chí sa nàha-í sá ndècú váha-n núú Yá Ndiòxí.

³ Te ío ní cudíí iní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá diu-ni tnúhu-gá te tñi-n nchaa nacuaá càháⁿ tnúhu-áⁿ.

⁴ Te ío cùdíí iní-í ní níhí-í tnúhu sá ncháá-ní ñáiyu ní sanu ichi-í ichi Yá Ndiòxí ndècú-ñí-yu ichi-gá, te quide-ní-yu nchaa nacuaá càháⁿ-gá.

⁵ Te yòhó téé ío cùu iní-í, ío váha quide-n núú Yá Ndiòxí, chí chindee-n nchaa ñáiyu véxi dava-gá ñúu xicá, ñáiyu sàndáá iní tnúhu Yá Ndiòxí.

⁶ Te nchaa ñáiyu-áⁿ càháⁿ-yu núú tàcá ñáiyu càháⁿ ndihí Yá Ndiòxí iha sá ío cùu iní-n ncháa tñaha ñáiyu-n dàtná càháⁿ Yá Ndiòxí. Te yúhú càháⁿ ndàhú-í núú-n sá cádá ndèe-ni iní-n chindee-n nchaa ñáiyu-áⁿ nchaa sá xini ñùhú-yu ichi. Te núu ducaⁿ na càda-n te quide-n nacuaá cùu iní Yá Ndiòxí, te xinu cuechi-n tñahá-n núú-gá.

⁷ Chí nchaa ñáiyu-áⁿ ní tñí-yu ichi cuáháⁿ-yu càháⁿ-yu tnúhu Jèsús. Te ñà túú tñí-yu ní ñⁿ sá sǎñaha ñáiyu ñà túú ndècu ichi Yá Ndiòxí.

⁸ Te núu xiáⁿ nchoo xini ñuhu-xi chindee-o nchaa ñáiyu xinu cuechi núú-gá ñáiyu càháⁿ tnúhu-gá, te ducaⁿ te cutnuni iní-ó sá tñahá-ó xinu cuechi-o ndihí-yu núú-gá.

Ñà túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáiyu chíñuhú-yu Yá Ndiòxí, dico ñⁿ téé ndècu-áⁿ nání-dé Diótrefés, te ñà sàndáá iní-dé nchaa tnúhu càháⁿ-í, chí cuini-dé cunu-dé núú-yu.

¹⁰ Te òré quixi-í te cada ndáá-ó ncháa tnúhu cuèhé tnúhu duha càháⁿ-dé cuendá-í. Te ñà díú-ní xiáⁿ quidé-dé, chí nchaa ñáiyu véxi ingá ñúu càháⁿ tnúhu Yá Ndiòxí ñà túú càháⁿ ñáhá-dé vehe-dé, te ní ñà dáñá-dé càháⁿ ndihí ñaha dàva-gá ñáiyu xii-yu. Te nchaa ñáiyu cuini càháⁿ ndihí ñaha xii-yu, te queñuhu ñaha duuⁿ-ni-dé ñà dáñá-gá-dé níhí tñahá-yu ndihí nchaa ñáiyu tàcá dácuaá tnúhu Yá Ndiòxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quidé ncháa dava-gá ñáiyu, cada-n mèe-ni sá váha. Chí nchaa ñáiyu quide váha ndècú-yu ichi Yá Ndiòxí. Te nchaa ñáiyu quide nchaa sá cuèhé sá dúhá ñà túú ndècú-yu ichi Yá Ndiòxí.

Nchaa ñáiyu càháⁿ váha-yu cuendá té Demètriú

¹² Te nchaa ñáiyu càháⁿ váha-yu cuendá té Demètriú, chí quide ndáá-dé dàtná càháⁿ Yá Ndiòxí. Te tñahá yúhú càháⁿ-í cuendá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndéé núú ní ndihí-ná

¹³ Te vai-gá tnúhu cuini-í cachí tnúhu-í xii-n ni cùu, dico ñà ní tète-gá-í,

¹⁴ chí cuini-í quixi ndíhí-í, te càháⁿ-ó núú núú-ó.

¹⁵ Te ío cada ndee iní, te xicáⁿ tǎhù-í núú Yá Ndiòxí sá ná cùndècu váha-n ñà túú nǎ cuu cùndècu-n. Te nchaa cue ñáiyu xini tñahá ndihí-o ndècu iha quide ndee iní ñáhá-yu xii-n. Te yòhó cuñaha-n ncháa ñáiyu xini tñahá ndihí-í ndècú xiáⁿ ná càda ndee iní-yu. Te ío cada ndee iní-nǎ vitna.

TUTÚ NÍ CADÚHA TÉ JÛDÁS

Té Júdás cadúha-dé tutú quíhíⁿ ndaha ñáyíu ní cachi Yá Ndióxi nduu cuendá-gá

¹ Yúhú té Júdás ñani té Jacobó xínú cuèchi-í núú Xítohó Jesucristú, te cadúha-í tutú-a sá cúú-xí nchòhó ñáyíu ní cachi Yá Ndióxi Yaá cúú Tátá-ó ndúu cuendá-gá, ñáyíu ío cùu iní-gá. Te dàtná-ni xito ñaha-gá xii-ndo vitna ñi-ni ducaⁿ còto ñaha-gá xii-ndo ndéé ná sàá nduu quíxi tucu Xítohó Jesucristú ñuyíú-a.

² Te xicáⁿ táhú-í núú Yá Ndióxi sá ño-gá ná chindee chítúu ñaha-gá xii-ndo, te na cùtnuní-gá iní-ndó sá ño cùu iní ñáhá-gá xii-ndo, te ducaⁿ ío váha cuu iní-ndó cùndecu-ndo.

Ñáyíu ñá túú càháⁿ tnúhu ndáá tnúhu Yá Ndióxi

(2 Pedro 2:1-17)

³ Te nchòhó ñáyíu ío cùu iní-í, ducaⁿ-ni ío sàni iní-í cadúha-í ñⁿ tutú sá cúú-xí-ndó cuendá danéhé ñáhà-í xii-ndo nàcuáa ní cuu ní naníhí táhú-ó dico ñá túú cadúha-í, dico vitna quide cuendá-í sá xíní ñuhu-gá-xi càháⁿ-í núú tütú-í sá nchòhó ío cundehe-ndo tnúhu càháⁿ-ndó ndíhi ñáyíu, te càháⁿ-ndó nàcuáa ndúu tnúhu sàndáá ní méé-ndó, chi ñi-ni tnúhu-án ní càháⁿ Yá Ndióxi sá cúú-xí nchàa ñáyíu ndécu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sá ní càháⁿ duuⁿ-gá.

⁴ Te duha càháⁿ-í núú tütú-a sá cúú-xí-ndó, chi níhí-í tnúhu sá xicá cùu ñáyíu chùtnahá ñáhá xii-ndo, te ní ñá túú xíní-ndó ná ñáyíu cùú-yu, te ñáyíu-án cùú-yu ñáyíu cùu úhú iní ñáhá xii Yá Ndióxi. Te ñⁿ xichi núú tütú Yá Ndióxi càchí-xi sá ñáyíu-án quíhíⁿ-yu núú ùhú núú ndáhú, te ñi-ni ñáyíu-án càchí-yu sá ño váha iní Yá Ndióxi núu xíáⁿ cuu-ni cadá-yu nchaa sá cuèhé sá dúhá. Te dàquee tñhú-yu Yá Ndióxi Yaá ío cùnuu, ndíhi Xítohó Jesucristú.

⁵ Te nchòhó sa xíní váha-ndo nàcuáa ní quide Yá Ndióxi ndéé sanaha dico dàndacu iní ñáhà-í xii-ndo, chi dàvá-án ní queñuhu-gá ñáyíu israhéel nacióⁿ Égíptú, te dava ñáyíu-án ñá túú ní sàndáa iní ñáhá-yu xii-gá te ní dàndáá ñaha-gá xii-yu.

⁶ Te nchaa espíritú ñá túú ní cuíni cada ndáá cunu cuechi núú Yá Ndióxi ní quee-xi núú ndécu-xí, te mee-gá ní sadí nihnu ñaha-gá xii-xi ñⁿ xichi núú néé te vá cäcu-xi, chí sáá nduu te nayáha-xi cundecu-xi núú ùhú núú ndáhú ní caa ní quíhíⁿ.

⁷ Te dàndacu iní ñáhá tucu-í xii-ndo nàcuáa ní yáha ñáyíu ñúú Sòdomá, ndíhi ñáyíu ñúú Gòmorrá, ndíhi nchaa ñáyíu ñúú ní

cáa yatni xiáⁿ, chi tnàhá-yu ñá túú ní quide váha-yu dàtná ní quide nchaa cue espíritú-án. Chi cue téé ní xóo càháⁿ ndíhi tnàha ndí mee-güedé, te ñi-ni ducaⁿ ní xóo cada cue ñáyíu ñá túú tucu. Te sá dúcáⁿ ní quide-yu núú ní dängóyó Yá Ndióxi ñuhú ñúú-yu ní dàndá ñaha-gá xii-yu. Te xiáⁿ cùtnuní iní-ó sá nchàa ñáyíu ñá túú cuíni cada váha núú-gá quíhíⁿ-yu núú ùhú núú ndáhú ní caa ní quíhíⁿ.

⁸ Te ñi-ni ducaⁿ quide ñáyíu chùtnahá ñáhá xii-ndo cuíni-yu dandáhú ñáhá-yu, chí càchí-yu sá dàcòto ñaha saní-yu nàcuáa cadá-yu, núu xíáⁿ nándi nchaa sá cuèhé sá dúhá quide-yu sá cúú-xí yiqui cuñú-yu, te dàquee tñhú-yu nchaa nàcuáa càháⁿ Yá Ndióxi cada-o, te càháⁿ úhú-yu cuendá nchaa espíritú cùnuu.

⁹ Te mee espíritú cùnuu-gá xínú cuèchi núú Yá Ndióxi nání Miguél ní nàa-xi ndíhi sáculhá cuendá yiqui cuñú ndí Moisés. Te espíritú-án ñá túú ní cùyí-xi càháⁿ úhú-xi sáculhá-án, chí ní xáhaⁿ-ní-xi: “Mee Yá Ndióxi ñáhá-gá te núu nása cada ñaha-gá xii-n”, duha ní xáhaⁿ-xi.

¹⁰ Te nchaa ñáyíu ducaⁿ dàndáhú ñáhá xii-ndo-án càháⁿ cuèhé-yu cuendá nchaa sá vátá cùtnuní-gá iní-yu nása ndúu, te quide-yu dàtná quide cue quiti chi cue quiti-án quide-güedi nání véxi iní-güedi, te ní ñá túú cùtnuní iní-güedi nchaa sá quide-güedi. Te ducaⁿ sà tnahá-xi cùú-yu, chí nchaa sá cuèhé sá dúhá véxi iní-yu quide-yu, te sá dúcáⁿ quide-yu xiáⁿ tá xita nihnú-yu cuáháⁿ.

¹¹ Te ndáhú ní cuú-yu chí ío ndohó-yu!, chí quide-yu dàtná ní quide ndíi Cáin. Te nándi sá quide-yu cuendá sá cuíni-yu díhúⁿ dàtná ní xóo cada ndíi Balaám. Te ío cùu sáá iní-yu núú Yá Ndióxi dàtná ní xóo cada ndíi Còrè, núu xíáⁿ tá xita nihnú-yu cuáháⁿ.

¹² Te dico sácáⁿ núú sáha ñáhá-yu xii-ndo òré nátácá-ndó quide-ndo vico chíñuhu-ndo Yá Ndióxi. Te òré xéxi ndíhi ñáhá-yu xii-ndo te mee-ni sá cúú-xí mee-yu quide cuendá-yu, te ñá túú nehé-yu sá yíñuhu núú Yá Ndióxi. Te cùú-yu dàtná ñⁿ vícò sá cuáháⁿ-xi duha cuáháⁿ-xi dàcáⁿ te ñá túú dáú nchídó-xí, ducaⁿ sá tnahá-xi cùú-yu. Te cùu tucú-yu dàtná ñⁿ yutnu vídí sá ñá túú tnáhí cùuⁿ sávidí-xi, te nchaa yutnu ducaⁿ ñá túú cùuⁿ sávidí-xi te tnúhu-güedé ndéé yóho-xi te xihí duuⁿ-xi. Te ducaⁿ sàtnahá-xi cùú-yu, chí ñá túú quide váha-yu.

¹³ Te cùu tucú-yu dàtná ndute lámár, chí ndute-án òré càndá-xi te quecòo tññú-xi ñⁿ xio. Te cùu tucú-yu dàtná ñⁿ chódíní cuáháⁿ-di duha cuáháⁿ-di dàcáⁿ. Te ducaⁿ sàtnahá-xi cùú-yu, chí ñá túú cuíni-yu cada váha-yu. Te ñáyíu-án daquihíⁿ ñáhá Yá

Ndiõxí xii-yu ìⁿ xichi núú néé núú sà ndecu tñha cundecú-yu ni caa ni quíhíⁿ.

¹⁴ Te ndíquíⁿ yává ndíi Adán téé cùu usá ní xínani Ënóc ní dácáhú iní ñáhá Yá Ndiõxí xii-dé ní cáháⁿ-dé diu-ni cuendá nchaa ñáyiú-áⁿ. Te ní cachí-dé: “Na càchí tnúhu-í xii-ndo sá Yá Ndiõxí quixi-gá ndihi cuéhé víhí espíritú xínú cuéchi núú-gá.

¹⁵ Te dàvá-áⁿ cada ndáá-gá cuéchi nchaa ñáyiú te daquíhíⁿ-gá nchaa ñáyiú ndècu ichi cuéhé ichi duha núú ùhú núú ndàhú, te ducaⁿ càda ñaha-gá xii-yu, chi mee-ni sá cuéhé sá dúhá quidé-yu, te càháⁿ ùhú ñáhá-yu xii-gá”, duha ní cachí te Ënóc.

¹⁶ Te ñáyiú-áⁿ ìo yica iní-yu chi ñá túú ndúu vétú iní-yu nàcuáa ndècú-yu ñuyúú-a, te sàtnuhú-yu tnàha ñáyiú-yu te mee-ni sá cuéhé sá dúhá sàni iní-yu quidé-yu, te quide cahnú-yu mée-yu, te mee-ni càháⁿ váha-yu núú tnàha ñáyiú-yu cuendá cuini-yu sá cáda váha ñaha ñáyiú-áⁿ xii-yu.

Té Judás càháⁿ-dé dóho ñáyiú ndècu ichi Yá Ndiõxí

¹⁷ Te nchòhó ñáyiú ìo cùu iní-í, càháⁿ ndàhú-í núú-ndó sá ìo cuhuⁿ iní-ndó tnúhu sá sá ní dánèhé ñáhá cué téé ní tendaha Xítohó Jesucristú càháⁿ tnúhu-gá núú ñáyiú.

¹⁸ Te sa nàha-ndo sá ní cachí-güedé sá cùmání-gá quixi tucu Xítohó Jesucristú ñuyúú-a, te coo ñáyiú càháⁿ cuéhé càháⁿ duha cuendá tnúhu-gá. Te ñáyiú-áⁿ cadá-yu mee-ni sá cuéhé sá dúhá vèxi iní mée-yu.

¹⁹ Te ñáyiú-áⁿ cúú-yu ñáyiú càháⁿ nándi tnúhu sá ñá túú nándíhi cuendá sá vā cúú ìⁿnuu-ndo cundecu-ndo, te mee-ni sá cuéhé sá dúhá ñùhu iní-yu, te ñá túú ndècu ndihí-yu Espíritú Yá Ndiõxí.

²⁰ Te nchòhó ñáyiú ìo cùu iní-í, ìo dacuàha-ndo tnúhu Yá Ndiõxí sá ní sándáá iní-ndó cuendá ducaⁿ cuita cuehnu nihnu-ndo ichi-gá quíhíⁿ, te càháⁿ ndihí-ndo Yá Ndiõxí nàcuáa dàcahu iní ñáhá Espíritú-gá xii-ndo.

²¹ Te ìo coto-ndo mèe-ndo cundecu-ndo cuendá cuu váha iní ñáhá Yá Ndiõxí xii-ndo, te cundetu-ndo sàá nduu quixi Xítohó Jesucristú ñuyúú-a nacuaca ñaha-gá xii-ndo cùndecu-ndo ndihí-gá ni caa ni quíhíⁿ, chi Yaá-áⁿ ìo cùndahú iní ñáhá-gá xii-o.

²² Te ñáyiú sàni ìⁿ sàni úú iní-xi cúñaha-ndo xii-yu nàcuáa cadá-yu cundecú-yu ichi Yá Ndiõxí.

²³ Te nchaa ñáyiú ta xíta nihnu ñùhu ichi cuáháⁿ núú ùhú núú ndàhú, ìo cundihí iní-ndó cúñaha-ndo xii-yu tnúhu Yá Ndiõxí cuendá sá ná càcu nihnú-yu, te cundàhú iní-ndó-yu, te quíhi iní-ndó vā cáda-ndó tnàhá-ndó nàcuáa quidé-yu, chi daquèe tíhú-ndó nchaa sá cuéhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiõxí

²⁴ Te Yá Ndiõxí chindee ñàha-gá xii-ndo cuendá sá vā cùndècu-ndo ichi cuéhé ichi duha, te cunduu ndoo cunduu nine iní-ndó càndeca ñaha-gá xii-ndo quíhíⁿ cundecu-ndo núú ìo váha càa ndecu-gá, te ìo cudíⁿ iní-ndó.

²⁵ Te Yá Ndiõxí ìo ndècu ndihí-gá nchaa sá xini tnúni-gá te diu-gá ní dácàcu nihnu ñaha-gá xii-o núú ùhú núú ndàhú, te ducaⁿ ní quide ñaha-gá xii-o chi ndècu ndihí-o Xítohó Jesucristú. Te ìo ndacáⁿ táhú-ó núú Yá Ndiõxí, chi ìo càhnu cuu-gá ndècú-gá táxi tnúni-gá, te súúni váha iní-gá, te ndàcu-gá quidé-gá nchaa sá váha, te ducaⁿ-ni ìo càhnu cuu-gá ndéé cùtnàhà vátá ngáva-gá ñuyúú, te ducaⁿ-ni ìo càhnu cuu-gá ndéé vitna, te diu-ni ducaⁿ ìo càhnu cuu-gá ni caa ni quíhíⁿ, duha xini ñuhu-xi ndacáⁿ táhú-ó núú-gá. Te ducaⁿ na cùnduu. Te ìo chí cáda ndèe iní-ná vitna.

NCHAA SÁ NĪ XINÍ TĒ JUÀÁ NDIHI NCHAA SÁ NĪ TECÚ DÓHO-DE

Xítohó Jesucristú xáhaⁿ-gá xii té Juàá nchaa nàcuáa cada-xi ñuyúú

¹ Te Yá Ndióxi ní xáhaⁿ-gá xii Xítohó Jesucristú nchaa sá tá cüyatni víi-ná cada-xi ñuyúú-a cuendá sá cūñaha-gá xii cue tée xīnu cuechi núú-gá, te Xítohó Jesucristú ní tenda-gá ^h espíritú xīnú cuèchi núú-gá ní quixi-xi ní cachí tnúhu-xi nchaa tnúhu-áⁿ xii yúhú té Juàá tée xīnu cuechi núú-gá, te nchaa tnúhu-áⁿ ndéé núú tütú-a.

² Te yúhú cächí tnúhu ndáá-í xii-ndo nàcuáa ní cáháⁿ Yá Ndióxi, te cáháⁿ ndáá tucu-í cuendá Xítohó Jesucristú, ndihi cuendá nchaa sá nĪ xini-í.

³ Te váha táhú ñáyiú dācuaha nchaa tnúhu ndéé núú tütú-a, te váha tucu táhú ñáyiú ndéðohó, te váha tucu táhú nchaa ñáyiú tnĪ nacuáa cáháⁿ-xi, chí sa ta cüyatni víi-ná nduu càda-xi nchaa nacuáa cáháⁿ-xi.

Té Juàá cādūha-dé tutú quíhⁿ ndaha ndi usá xichi cue ñáyiú ndècu ichi Yá Ndióxi

⁴ Te yúhú té Juàá cādūha-í tutú daquixi-í ndi usá xichi núú ndécú nchòhò ñáyiú ndècu ichi Yá Ndióxi ndécú distritú Asíá. Te mee-gá ná chindee chítúu ñaha-gá xii-ndo, te ío váha cuu iní-ndó cūndecu-ndo. Te cuéi ndéé sanaha diu-ni-gá ndécú, te diu-ni-gá ndécú cuéi vitna, te ducaⁿ-ni cūndecu-gá cuéi ndéé núú cuáháⁿ núú vĕxi, te diu-ni ducaⁿ ío na chindee chítúu ñaha ndi usá cue espíritú ndécú núú-gá xii-ndo, te ío váha cuu iní-ndó cūndecu-ndo.

⁵ Te diu-ni ducaⁿ na càda tucu Xítohó Jesucristú, te diu-gá cúú-gá Yá cáháⁿ ndáá, te diu-ni-gá ní xíhí-gá te díhna-gá ní ndoto, te dátñúni ndéé cuéé-gá te ndoto cue ñáyiú ní xíhí, te diu-ni-gá táxi tnūni-gá nchaa cue tée yindaha ñaha xii ñáyiú ndècu ñuyúú-a. Te ío cūu iní ñáhá-gá xii-o, te mee-gá ní sati níñí-gá te ní xíhí-gá núú cūrúxí sá cuendá nchaa sá cuéhé sá dúhá quide-o, te ní ndada ndoo ní ndada nine-gá iní-ó.

⁶ te vitna ní quide ñaha-gá xii-o dátñá cue tée yindaha ñáyiú, te ní quide ñaha tucu-gá xii-o dátñá cue dútú xīnú cuèchi-o núú Tátá-gá Dútú Ndióxi. Te vitna nchaa-o chí ná cächí-ó sá ío cāhnu cuu Xítohó Jesucristú, te ío cūnuu-gá, te ducaⁿ-ni na cūnuu-gá ní caa ní quíhⁿ. Te ducaⁿ na cūnduu.

⁷ Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiú ndècu ñuyúú-a quini ñáhá-yu xii-gá, te tnáhá nchaa ñáyiú ^h-ni cūu ndihi ñáyiú ní dánicuéhé ñáhá

xii-gá quini ñáhá-yu, te nchaa ñáyiú xīndecu níhí ñuyúú, ñáyiú ñá túú cūu váha iní ñáhá xii-gá ndíhú iní-yu òré quini ñáhá-yu xii-gá, te ndáá sá dúcáⁿ càda-xi.

⁸ Te Yá Ndióxi cächí-gá: “Yúhú ío cūnuu-í chí diu-í sa ndècu ndéé cūtnáhá ní ngáva ñuyúú, te diu-ni-í cūndecu ndéé ná sáá nduu nàa-xi ndihi nchaa sá ío, chí yúhú cūndecu-í ní caa ní quíhⁿ”, duha cächí Yá Ndióxi Yáá ndácú quide nchaandi túhú sá váha. Chí diu-ni-gá sa ndècu ndéé cūtnáhá ní ngáva ñuyúú, te diu-ni-gá ndécú-gá vitna, te ducaⁿ-ni cūndecu-gá ní caa ní quíhⁿ.

Té Juàá ní xini-dé Xítohó Jesucristú Yáá ío cūnuu

⁹ Te yúhú té Juàá tée ndècu ndihi-ndo ichi Xítohó Jesucristú, tnáhá-í ndóhò-í cuendá-gá dátñá ndóhò-ndó, te tnáhá-í nduu táhú-í cūndecu ndihi ñaha-í xii-ndo núú ndécú Yá Ndióxi táxi tnūni-gá. Te ío quide cahnu iní-ó cuéi nándi yáha-o ndècu-o sá cuendá Xítohó Jesucristú. Te yúhú ní ngáva-í vecaá ^h ñuu nání Pátmós, te ñuu-áⁿ cáá xití ndute lámár. Te ducaⁿ ní cuu cuendá sá cáháⁿ-í tnúhu Yá Ndióxi, te cáháⁿ váha-í cuendá Xítohó Jesucristú.

¹⁰ Te ^h nduu ndumíngú nduu nàtacá-ó chíñuhu-o Yá Ndióxi ní quide ñaha Espíritú-gá xii-í nàcuáa cächí iní-xi, te ní tecú dóho-í níhi ní cáháⁿ ^h sá ní cáháⁿ ndáa sáta-í te dátñá níhi cáháⁿ ^h cútú ducaⁿ níhi ní cáháⁿ-xi.

¹¹ Te cächí sá cáháⁿ-áⁿ:

—Yúhú sa ndècu-í ndéé cūtnáhá ní ngáva ñuyúú, te diu-ni-í cūndecu-í ndéé ná sáá nduu nàa-xi ndihi nchaa sá ío, te chido tnūni-n ^h núú tütú sá ná dānehé núú ñáhá-í xii-n, te daquihⁿ-n tütú-áⁿ ndi usá xichi núú xīndecu cue ñáyiú ndècu ichi Yá Ndióxi xīndecu distritú Asíá, ndaha ñáyiú ñuu Éfesú, ndaha ñáyiú ñuu Èsmirná, ndaha ñáyiú ñuu Pĕrgamú, ndaha ñáyiú ñuu Tiátirá, ndaha ñáyiú ñuu Sárdís, ndaha ñáyiú ñuu Filadelfiá, ndaha ñáyiú ñuu Laodiceá, nchaa ñáyiú ñuu-áⁿ daquihⁿ-n tütú-áⁿ ndahá-yu —cächí sá cáháⁿ-áⁿ.

¹² Te ní nchócuíhnu-í ndéhè-í núu ná cúú sá cáháⁿ-áⁿ, te ní xini-í xīnutnĪ usá tnáhá sá ní cuáha mee-ni díhúⁿ cuáaⁿ sá ndéé díté-xi, te núú díté-xá-áⁿ yindòdo ^h caa candí.

¹³ Te cuádava tnuú nchaa xiáⁿ ní xini-í nūtnĪ Yáá cáá dátñá cáá nchaa nchoo ñáyiú ndècu ñuyúú-a, te níhnu-gá ^h dóó cāhí càa-xi ndéé núú sáhá-gá, te yidúcúⁿnuu ^h sínchú ní cuáha mee-ni díhúⁿ cuáaⁿ pèchú-gá.

¹⁴ Te idi díquí-gá cuixⁿ quiyí dátñá cuixⁿ idi dava mbéé, àdi yúhá sá quéé òré quidé víxiⁿ-xi, te tnūnu-gá quidé-xí dátñá quidé-xí òré sáá itá ñuhú.

15 Te sáhá-gá súúni dátásaⁿ-xi dátná dátásaⁿ sá nání bròncé òré càyú-xi ducaⁿ dátásaⁿ-xi sáhá-gá, te dónđaha tnúhu cáháⁿ-gá quidé-xí dátná quidé-xí dónđaha titíni víhi yúte.

16 Te xio ndaha cùha-gá nùndàha-gá úsá tñàhà chódíní, te mei yùhu-gá quéné ìⁿ yuchí cahnú ndéè úú xio núú-xi, te núú-gá quidé-xí dátná quidé-xí núú nchícanchii òré súúni ngòyo cahni.

17 Te sá dúcáⁿ cãa Yaá-áⁿ ní xiní-í núu xíⁿ ní yùhú-í ní nduá-í núú-gá, te ní cuu-í dátná ìⁿ téé ní xihí sá dúcáⁿ ò ní yùhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachi-gá:

—Vá yùhú-n, chí ñu-ni yùhú sa ndècu-í ndéè cùtnàhà ní ngáva ñuyúú, te ñu-ni yùhú cundecu-í ndéè ná sáá nduu nàa-xi ndihí nchaa sá íó.

18 Te yùhú cùú-í Yaá ní xihí te ní ndoto-í, te vitna ndècu vívù-í, te ducaⁿ-ni cundecu-í ní caa ní quíhⁿ. Te yùhú cùnù-í núú nchàa ñàiyu ní xihí te ñu-ni-í cùnù-í núú ndécú-yu.

19 Te chído tñùni-n nchàa sá ní xiní-n-áⁿ ìⁿ núú tútù, ndihí nchaa nàcuáa cùu vitna, ndihí nchaa sá cádá-xí ndéè núú cuàháⁿ núú vèxi-gá.

20 Te na cãchí tnúhu-í xii-n nàcuáa quèe-xi ndi usá chódíní ní xiní-n yòtni-í xio ndaha cùha-í, ndihí nàcuáa quèe-xi ndi usá sá ní cuáha mee-ni ñhúⁿ cuááⁿ, sá ndéè ditè-xi te yíndodo ìⁿ caa candil núú ditè-xi-áⁿ. Te ndi usá chódíní-áⁿ, xíⁿ cùú-xí sá cùtnùni iní-ó sá ndécú usá cue téé xinu cuechi núú Yá Ndióxi, te ndi usá cue téé-áⁿ ndécú-güedè ndi usá xichí núú ndécú ñàiyu ndècu ichi Yá Ndióxi. Te cuendá ndi usá sá ndéè ditè-xi-áⁿ, xíⁿ cùú-xí sá cùtnùni iní-ó sá ndécú usá xichí ñàiyu ndècu ichi Yá Ndióxi —duha cãchí Yaá cáháⁿ-áⁿ.

2

Tnúhu sá cùú-xí ñàiyu xíndecu ichi Yá Ndióxi ndécú ñùú Éfesú

1 Te ní cachi tucu Yaá cáháⁿ-áⁿ xii-í sá chído tñùni-í nchaa tnúhu sá vítná cáháⁿ-gá ìⁿ núú tútù, te tendaha-í quíhⁿ ndaha téé xinu cuechi núú Yá Ndióxi ndécú ñùú Éfesú sá cùú-xí cuè ñàiyu xíndecu ichi-gá ndécú ñùú-áⁿ, te duha ní cachi-gá: “Yùhú cùú-í Yaá nùndàha usá chódíní xio ndaha cùha-í, te xica cuu-í núú ndécú ndi usá sá ní cuáha mee-ni ñhúⁿ cuááⁿ, sá ndéè ditè-xi te yíndodo ìⁿ caa candil núú ditè-xi.

2 Te yùhú xiní-í nchaa nàcuáa quide nchóhó ñàiyu xíndecu ichi Yá Ndióxi ndécú ñùú Éfesú, te xiní-í sá ío ndècu ndee-ndo quide chiuⁿ-ndo cuendá-gá, te ío quide cahnu iní-ndó ndècu-ndo quide-ndo chiuⁿ-gá. Te xiní-í sá ñà túú tñàhí tñàhà

iní-ndó nàcuáa quide nchaa ñàiyu ndècu ichi cuehé ichi duha. Te xiní tucu-í sá xító ndéè-ndó cuè téé cãchí sá ní tendaha-í véxi cáháⁿ tnúhu-í te ñà ndàá sá cáháⁿ-güedé tnúhu-í, te ducaⁿ te cùtnúni iní-ndó sá ñà ndàá sá cáháⁿ-güedé tnúhu-í.

3 Te xiní tucu-í sá ío ndòho-ndo quide-ndo chiuⁿ cuendá-í, te ducaⁿ ío quide cahnu iní-ndó cuèi nándi yàha-ndo, te ñà túú cùu dusaⁿ-ndo quide-ndo chiuⁿ-áⁿ.

4 Dico ñà túú cùu váha iní-í chi nchóhó ñà túú-gá quidé-ndó dátná ní xóo cada-ndo cùtnàhà vitna cùu vív-í ní sándáá iní ñàhá-ndó xii-í, chí vitna ñà túú-gá cùú iní ñàhá víhi-ndo datná ní xóo cada-ndo dàvá-áⁿ.

5 Te chí dándacu iní nàcuáa ní xóo cada-ndo cùtnàhà vitna cùu saa ní sándáá iní ñàhá-ndó xii-í, te ndixi cuèchi iní-ndó sá ñà túú-gá quidé váha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéè ñhna. Te nchóhó cada iní-ndó sá ndécú ndihí-ndo ìⁿ sá ní cuáha mee-ni ñhúⁿ cuááⁿ, sá ndéè ditè-xi te yíndodo ìⁿ caa candil núú ditè-xi. Te núu vá ndixi cuèchi iní-ndó nàcuáa quide-ndo ndecu-ndo ña, te quixi-í xocani-í xíⁿ, te ducaⁿ sãtnahá-xi cada ñaha-í xii-ndo te núu vá ndixi cuèchi iní-ndó nàcuáa quide-ndo ndecu-ndo, te ducaⁿ te vá yóo-gá nãtacá chíñuhu ñaha xii-í ñuú-ndó.

6 Dico quide váha-ndo ìⁿ xichí chí dàquee tihú-ndó nchaa sá quidé cuè ñàiyu cùu nicolaitás, te yùhú tñàh-í dáquèe tihú-í nchaa sá quidé ñàiyu-áⁿ.

7 Te nchóhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñàiyu ndècu ichi-gá xíndecu nchaa xichí. Te duha ndùu tnúhu xáhaⁿ-í xii Espíritú-gá xáhaⁿ-xi xii-yu: Cúñaha-n xii nchaa ñàiyu sá núu na càda ndee iní-yu yàha-yu nándi sá ná yàha-yu sá cuendá-í, te yùhú cada-í te nduu táhú-yu cundecu váha-yu núú ndécú Yá Ndióxi, duha xáhaⁿ-í xii Espíritú-gá cùu-xi ñàiyu”, duha cãchí Yaá cáháⁿ-áⁿ. Te nchaa tnúhu-áⁿ ní chído tñùni-í sá cùú-xí ñàiyu xíndecu ichi Yá Ndióxi ndécú ñùú Éfesú.

Tnúhu sá cùú-xí ñàiyu xíndecu ichi Yá Ndióxi ndécú ñùú Èsmirná

8 Te ní cachi tucu Yaá cáháⁿ-áⁿ xii-í sá chído tñùni-í nchaa tnúhu sá vítná cáháⁿ-gá ìⁿ núú tútù, te tendaha-í quíhⁿ ndaha téé xinu cuechi núú Yá Ndióxi ndécú ñùú Èsmirná sá cùú-xí cuè ñàiyu xíndecu ichi-gá ndécú ñùú-áⁿ, te duha cãchí-gá: “Yùhú ndécú-í ndéè cùtnàhà ní ngáva ñuyúú, te ñu-ni-í cundecu-í ndéè ná sáá nduu nàa-xi ndihí nchaa sá íó, te ñu-ni-í ní xihí te ní ndoto-í ndécú-í vitna.

9 Te yùhú xiní-í nchaa nàcuáa quide nchóhó ñàiyu ndècu ichi Yá Ndióxi ndécú

ñùú Èsmirná. Te xini-í sá ño ndòho-ndo ndecu-ndo sá cuendá-í, te xini tucu-í sá ño ndáhú-ndó dico cùu-ndo ñáyiu xĩndecu váha núú Yá Ndióxi. Te xini tucu-í sá ño cãháⁿ cuèhé ñáyiu isrâel cuendá-ndó, dico ñá túú quidé-yu nãcuáa tàu-yu cadá-yu sá cùu-yu ñáyiu isrâel, chi cùu-yu ñáyiu xĩnu cuechi mee-ni núú sãcũhná.

¹⁰ Dico nchòhó vá yùhú-ndó cuèi nãndi cùu nchaa sá ná ndòho-ndo cuendá-í, chi sãcũhná cada-xi te ngava dava-ndo vècaá, te ducaⁿ càda-xi chi cuini-xi coto ndeé ñáhá-xi xii-ndo núu ndisa sá vã ná tũhú iní-ndó sã nchicúⁿ nihnu-ndo ichi Yá Ndióxi. Te ndòho-ndo ùxi nduu dico vá dãná ndèé-ndó cãchicúⁿ nihnu-ni-ndo ichi-gá cuèi na cùu-ndó sã cuendá-gá, te yùhú cada-í te nduu táhú-ndó cùndecu-ndo ndih-gá ni caa ni quíhíⁿ.

¹¹ Te nchaa nchòhó cada cuendá váha-ndo nãcuáa xãhaⁿ-í xii Espiritú Yá Ndióxi xãhaⁿ-xi xii cue ñáyiu ndecu ichi-gá xĩndecu nchaa xichi, te duha ndùu tñuhu xãhaⁿ-í xii Espiritú-gá xãhaⁿ-xi xii-yu: Cũñaha-n xii nchaa ñáyiu sá núu na cundee iní-yu yãha-yu nãndi sá ná yãha-yu sã cuendá-í te vá cũta nihnú-yu na sãá nduu cũta nihnu nchaa dava-gá ñáyiu, duha xãhaⁿ-í xii Espiritú-gá cùu-xi ñáyiuⁿ, duha ní cachí Yá cãháⁿ-áⁿ. Te nchaa tñuhu-áⁿ ní chidó tñuni-í sá cùu-xi ñáyiu xĩndecu ichi Yá Ndióxi ndécú ñùú Èsmirná.

Tñuhu sá cùu-xi ñáyiu xĩndecu ichi Yá Ndióxi ndécú ñùú Pèrgamú

¹² Te ní cachí tucu Yá cãháⁿ-áⁿ xii-í sá chidó tñuni-í nchaa tñuhu sá vítná cãháⁿ-gá ñⁿ núú tũtũ, te tendaha-í quíhíⁿ ndaha tée xĩnu cuechi núú Yá Ndióxi ndécú ñùú Pèrgamú sá cùu-xi cuè ñáyiu xĩndecu ichi-gá ndécú ñùú-áⁿ, te duha cãchí-gá: “Yùhú cùu-í Yá nèhé ñⁿ yuchí caní te ndeé úú xio núú-xi.

¹³ Te yùhú xini-í nchaa nãcuáa quide nchòhó cue ñáyiu xĩndecu ichi Yá Ndióxi ndécú ñùú Pèrgamú, te xini tucu-í sá ndécú-ndó núú ño cũnuu yucu ñávãha, te ñá túú dãnã ndeé-ndó nchicúⁿ nihnu-ndo ichi-í, te ducaⁿ ño sãndáá iní ñáhá-ni-ndó xii-í, te ñu-ni ducaⁿ ñi quide-ndo cũtnãhá ní sahní-güedé té Àntipás núú ndécú-ndó ñu-ni núú dúcáⁿ ño cũnuu yucu ñávãha. Te ndí-áⁿ ñi quide ndáá ndí ñi xĩndecu ndí ichi-í chi ní cãháⁿ váha ndí cuendá-í.

¹⁴ Dico ñá túú cùu váha iní-í cuendá ñⁿ úú sá quidé-ndó, chi ndecu ndih-ni-ndo ñáyiu nchicúⁿ nihnu-ni nchaa nãcuáa ní cãháⁿ ndí Balaám. Chi ndí-áⁿ ñá túú ní quide váha ndí chi ní dácãhú iní ndí ingá tée ní xĩnani Bálac nãcuáa cada-dé canu ichi-dé cue ñáyiu isrâel ingá ichi sá ñá túú váha, chi ní xãhaⁿ tã Bálac-áⁿ xii-yu sá cãxi-yu nchaa sá ndúú

tãhú nchaa sá ní cadúha cue tée ñuyiú-a dãnani ñáyiu ndióxí te ñá ndáá sá ndióxí cùu-xi, te ní dácãhú iní ñáhá-dẽ xii-yu sá cùndecú-yu ichi dí iní.

¹⁵ Te ndecu ndih tucu-ndo ñáyiu nchicúⁿ nihnu sá dácũha cue ñáyiu cùu nicolaitás.

Te nchaa sá dácũha ñáyiu-áⁿ dáquèe tĩhú-í, ¹⁶ te nchòhó chí dándixi cuechi iní sá ñá túú quide váha-ndo ndecu-ndo, chi núu ñáhá te quixi-í nãá-í ndih cue ñáyiu-áⁿ ndih yuchí caní sá quèné yùhú-í.

¹⁷ Te nchaa nchòhó cada cuendá váha-ndo nãcuáa xãhaⁿ-í xii Espiritú Yá Ndióxi xãhaⁿ-xi xii cue ñáyiu ndecu ichi-gá xĩndecu nchaa xichi. Te duha ndùu tñuhu xãhaⁿ-í xii Espiritú-gá xãhaⁿ-xi xii-yu: Cũñaha-n xii nchaa ñáyiu sá núu na càda ndee iní-yu yãha-yu nãndi sá ná yãha-yu sã cuendá-í, te yùhú cuãñaha-í sá ndúú yùhu xii-yu cãxi-yu ñⁿ sá vãtã quini-gá-yu cãxi-yu. Te xĩãⁿ cùu-xi mánáá sá ní xóo cãxi cue ñáyiu ní xĩndecu ndeé sanaha, te cuãñaha tũcu-í ñⁿ caa yũú cuixíⁿ xii-yu, te núú yũú-áⁿ cundee ñⁿ ñu saa. Te ñu-áⁿ vá yóo tñãhí xini chi ñⁿ di díd-ni ñáyiu na quèheⁿ cuendá ñu-áⁿ quini-yu, duha xãhaⁿ-í xii Espiritú-gá cùu-xi ñáyiuⁿ, duha cãchí Yá cãháⁿ-áⁿ. Te nchaa tñuhu-áⁿ ní chidó tñuni-í sá cùu-xi ñáyiu xĩndecu ichi Yá Ndióxi ndécú ñùú Pèrgamú.

Tñuhu sá cùu-xi cuè ñáyiu xĩndecu ichi Yá Ndióxi ndécú ñùú Tiàtirá

¹⁸ Te ní cachí tucu Yá cãháⁿ-áⁿ xii-í sá chidó tñuni-í nchaa tñuhu sá vítná cãháⁿ-gá ñⁿ núú tũtũ, te tendaha-í quíhíⁿ ndaha tée xĩnu cuechi núú Yá Ndióxi ndécú ñùú Tiàtirá sá cùu-xi cuè ñáyiu xĩndecu ichi-gá ndécú ñùú-áⁿ, te duha cãchí-gá: “Yùhú cùu-í Déhe Yá Ndióxi, te cãa tinuu-í dàtná cáá itã ñuhú, te sãhá-í cáá dàtná cáá sá nãní brõncé òré ñũhú-xi núú ñũhú càyú-xi.

¹⁹ Te yùhú xini-í nchaa nãcuáa quide nchòhó ñáyiu xĩndecu ichi Yá Ndióxi ndécú ñùú Tiàtirá. Te xini tucu-í sá ño cùu iní-ndó Yá Ndióxi te sãndáá iní-ndó-gã. Te xini tucu-í nãcuáa ndùu chiuⁿ quide-ndo sá cùu-xi-gã. Te xini tucu-í sá ño quide cahnu iní-ndó cuèi nãndi cùu sá yãha-ndo ndecu-ndo. Te xini tucu-í sá ño-gã ndúcú ndeè-ndo quide váha-ndo vitna dacúúxi cũtnãhá vitna cùu saa ní sãndáá iní-ndó Yá Ndióxi.

²⁰ Dico ñá túú cùu váha iní-í cuendá ñⁿ sá quidé-ndó, chi ñá túú tñãhí ná sãní iní-ndó ndecu ndih-ni-ndo ñáyiu nchicúⁿ nihnu nchaa nãcuáa dànehé ñáhá ñãha nani Jez-abél. Te ñãha-áⁿ cãchí-aⁿ sá cãháⁿ-aⁿ tñuhu Yá Ndióxi dico ñá ndáá sã cãháⁿ-aⁿ tñuhu-gá, te cuáhã-aⁿ dãndahú-aⁿ nchaa ñáyiu xĩnu cuechi núu-í ndih nchaa sá dànehé ñáhã-áⁿ cuendá cundecú-yu ichi dí iní, te cãxi-yu nchaa sá ndúú táhú nchaa sá ní cadúha cue

tée ñuyúú-a dānani ñāyiu ndiōxí te ñā ndāá sá ndiōxí cúú nchāa xiāⁿ.

²¹ Te ní cuu vai nduu ta dacaca-í ndécú-án cuèndá ndixi cuéchi iní-aⁿ sá ñā túú quide váha-aⁿ ndècu-aⁿ, te cuèi ducaⁿ quide-í dico ñā túú cuiní-aⁿ dañ-aⁿ ni ìⁿ sá cuèhé sá dúhá quide-aⁿ.

²² Te vitna yúhú ío dandòho-í-aⁿ chi tñi ñaha cuèhé xii-aⁿ, te ñiu-ni ducaⁿ ío dandòho-í nchaa ñāyiu quide datná quidé-án te núu vá ndíxí cuéchi iní-yu sá ñā túú quide váha-yu ndécú-yu, te dañā-yu nchaa sá cuèhé sá dúhá quidé-yu.

²³ Te nchaa ñāyiu cündihí ñaha xii ñaha-án cahni-í-yu, te ducaⁿ te nchòhó ndihí dava-gá nchaa ñāyiu xīndecu ichi Yá Ndiōxí ndécú nchāa xichi cutnuni iní-ndó ndihí-yu sá yúhú cuú-í Yáá xini ndāá nchaa nācuáa sāni iní ñāyiu, ndihí nchaa nācuáa quide-xi iní-yu. Te nchòhó nācuáa nduu sá quidé-ndó ìⁿ ìⁿ-ndo te ducaⁿ cūnduu sá táxi-í nduu táhú-ndó.

²⁴ Te dava nchòhó ñāyiu ndècu ñuu Tiātirá, ñāyiu ñā túú nchicúⁿ nihnu nācuáa dānehé ñāhá ñaha nani Jezabel-án ñā túú xini-ndó nā cúú sá cāchí ñāyiu nduu yuhu dacahu iní ñāhá yūcu ñāvāha. Te nchòhó, ñā túú nāgá cachí tñuhu-í xii-ndo càda-ndo

²⁵ ñiu-ná sá ío nducu ndèe-ndo cada-ndo nchaa nācuáa cāháⁿ tñuhu sá ndécú ndihí-ndo, te ducaⁿ-ni càda-ndo ndéé òré quixi tucu-í.

²⁶ Te nchaa nchòhó ñāyiu na càda ndee iní yāha nāndí sá ná yāha sá cuèndá-í, te núu na càda-ni-ndo nchaa nācuáa cuiní-í cada-ndo ndéé nduu vā cūndècu-gá-ndó ñuyúú-a, te yúhú taxi-í tñuhu ndee iní xii-ndo sá táxi tñuni-ndó nchāa ñāyiu ñuyúú

²⁷ datná ní quide mee Tātā-í Dútú Ndiōxí ní taxi-gá tñuhu ndee iní ndécú ndihí-í, te ducaⁿ càda ñaha-í xii-ndo táxi-í tñuhu ndee iní xii-ndo cuèndá ío taxi tñuni-ndó, te cada iní-ndó sá cādā-ndó cuè ñāyiu datná quidé-xi ìⁿ quidi òré tǎhú-xi cāchi duuⁿ-xi, te ducaⁿ chi nchòhó cada-ndo sá nchāá ñāyiu ñā túú quide váha cuíta nihnú-yu.

²⁸ Te cada iní-ndó sá datná dāyèhé chódiní quiti quène òré sa ta tūndaá-nā cuáhⁿ ducaⁿ càda-xi òré ná sàá nduu ngūita-xi cada váha-xi, te ducaⁿ chi yúhú cada-í nācuáa nduu táhú-ndó cūndecu ndihí ñaha-ndo xii-í núu ío váha càa ndecu-í.

²⁹ Te nchaa nchòhó cada cuèndá váha-ndo nācuáa xāhaⁿ-í xii Espiritú Yá Ndiōxí xāhaⁿ-xi xii cue ñāyiu ndècu ichi-gá xīndecu nchaa xichiⁿ, duha cāchí Yáá cāháⁿ-án. Te nchaa tñuhu-án ní chídó tñuni-í sá cúú-xí ñāyiu xīndecu ichi Yá Ndiōxí ndécú ñuu Tiātirá.

3

Tñuhu sá cúú-xí ñāyiu xīndecu ichi Yá

Ndiōxí ndécú ñuu Sárdís

¹ Te ní cachí tucu Yáá cāháⁿ-án xii-í sá chídó tñuni-í nchaa tñuhu sá vitná cāháⁿ-gá ìⁿ núu tütú, te tendaha-í quíhíⁿ ndaha téé xīnu cuechi núu Yá Ndiōxí ndécú ñuu Sárdís sá cúú-xí cuè ñāyiu xīndecu ichi-gá ndécú ñuu-án te duha cāchí-gá: “Yúhú cuú-í Yáá ndécú ndihí ndi usá espíritu cúú cuèndá Yá Ndiōxí, te ñiu-ni-í cuú-í Yáá ndécú ndihí ndi usá chódiní. Te yúhú xini-í nchaa nācuáa quide nchòhó ñāyiu xīndecu ichi Yá Ndiōxí ndécú ñuu Sárdís, te xini-í sá cúú-ndó datná ñāyiu ní xihí cuèi cāchí ñāyiu sá ñāhá.

² Te chí cuáha cuèndá nācuáa quide-ndo ndecu-ndo vitna, te nducu ndèe-ndo cada-ndo ìⁿ úú-gá nchaa sá váha nchicúⁿ nihnu-ndo vitna, chi sa ndètu vii-nā dañā-ndo nchāa-ndi túhú sá váha quide-ndo ni cuu, te quide cuèndá-í sá ñā túú quide-ndo nchaa nācuáa cuiní Yá Ndiōxí cada-ndo.

³ Te chí dāndacu iní nācuáa cāháⁿ tñuhu sá ní xīndedóho-ndo cūtnāhá ní tuha-ndo ichi Yá Ndiōxí, te canchicúⁿ nihnu-ndo càda-ndo nācuáa cāháⁿ tñuhu-án, te ndixi cuéchi iní-ndó sá ñā túú quide váha-ndo ndècu-ndo, te núu vá nācuáha-ndo cuèndá nācuáa quide-ndo ndecu-ndo ñā, te cada-í datná quidé ñādúhú, chí òré ñā túú nā yihí iní-ndó quèxio-í núu ndécú-ndó.

⁴ Dico ndècu ndihí-ndo ìⁿ úú ñāyiu càndoo caa nine iní-xi, chí ñāyiu-án ní nduu táhú-yu cuihnú-yu dóo cuixíⁿ cuèndá cūndecu ndihí-í-yu, te ducaⁿ chí cūdiú-yu núu-í.

⁵ Te nchaa ñāyiu na càda ndee iní-xi yāha nāndí sá ná yāha sá cuèndá-í, te ñāyiu-án nduu táhú-yu cuihnú-yu dóo cuixíⁿ, te vā náquète-í ñiu-yu núu tütú núu yódó tñuni cue ñāyiu ní nduu táhú ndecu ndihí-í ni caa ni quíhíⁿ, te cūñaha-í xii Tātā-í Dútú Ndiōxí ndihí cue espíritu xīnú cuéchi núu-í sá ñāyiu-án cúú-yu ñāyiu cūu cuèndá-í.

⁶ Te nchaa nchòhó cada cuèndá váha-ndo nācuáa xāhaⁿ-í xii Espiritú Yá Ndiōxí xāhaⁿ-xi xii cue ñāyiu ndècu ichi-gá xīndecu nchaa xichiⁿ, duha cāchí Yáá cāháⁿ-án. Te nchaa tñuhu-án ní chídó tñuni-í sá cúú-xí ñāyiu xīndecu ichi Yá Ndiōxí ndécú ñuu Sárdís.

Tñuhu sá cúú-xí cuè ñāyiu xīndecu ichi Yá Ndiōxí ndécú ñuu Filadelfía

⁷ Te ní cachí tucu Yáá cāháⁿ-án xii-í sá chídó tñuni-í nchaa tñuhu sá vitná cāháⁿ-gá ìⁿ núu tütú, te tendaha-í quíhíⁿ ndaha téé xīnu cuechi núu Yá Ndiōxí ndécú ñuu Filadelfía sá cúú-xí cuè ñāyiu xīndecu ichi-gá ndécú ñuu-án, te duha cāchí-gá: “Yúhú cuú-í Yáá ío váha quide ndāá te ñā túú tñahí cuéchi-í. Te dīhna-gá ndí Dávíí ní taxi tñuni ndí ñāyiu, te vitna yúhú táxi tñuni-í-yu, te yúhú cāháⁿ-í te núu ndèndida càa ñāyiu

ndihu ndaha-í te ndëndida cãa ñáyiú vã ndihu ndaha-í.

⁸ Te yúhú xini-í nchaa nãcuáa quide nchohó ñáyiú xĩndecu ichi Yá Ndióxi ndécú ñúú Filãdelfiã, te yúhú ní quide-í nãcuáa ní níhi-ndó ñi ichi cahnu quide-ndo chiúⁿ-í, te vã yóo ñi cada nãcuáa vã níhi-gã-ndó nãcuáa cada-ndo chiúⁿ-í. Te cuéi ñã túú ïo níhi ndéé-ndó cũndecu-ndo ichi Yá Ndióxi dico tñi-ndo nchaa tñuhu cãháⁿ-í, te ni ñi xito ñã túú cãháⁿ-ndó sã ñã túú ndècu ndihi ñaha-ndo xii-í.

⁹ Te nchaa ñáyiú quide nchaa nãcuáa cuini yucu ñãvãha, ñáyiú-ãⁿ cùu-yu ñáyiú isràél, te cuéi cùu-yu ñáyiú isràél dico ñã túú quidé-yu nãcuáa tàù-yu cadã-yu, te yúhú cada-í sã nchãá ñáyiú-ãⁿ canehé-yu sã yĩñhu núú-ndó, te cutnùni iní-yu sã yúhú ïo cùu iní ñãhá-í xii-ndo.

¹⁰ Te ïo quide ndee-ni iní-ndó nchicúⁿ nihnu-ndo quide-ndo nchaa nãcuáa ní cãháⁿ-í, te xiãⁿ coto ñaha-í xii-ndo ñã túú ñã tñahã-ndó ndũu na quixi nchaa tñũndóho tñuhu ndãhú ñuyiú-a. Te òrè quexlo nchaa tñũndóho-ãⁿ ñuyiú-a te dãvã-ãⁿ cutnùni nãcuáa ndũu sã quidé ñi ñi ñáyiú.

¹¹ Te ïo ndihi quixi tucu-í. Te vã dãñã ndéé-ndó càda-ndo nchaa sã vãha nchicúⁿ nihnu-ndo quide-ndo cuendã sã vã cuita sã ní cachí Yá Ndióxi nduu táhú-ndó.

¹² Te nchaa nchòhó ñáyiú na càda ndee iní yãha nãndi sã ná yãha sã cuendã-í, te yúhú cada-í sã nchòhó ïo cuu cãhnu-ndo cundecu-ndo núú ndécú Tãtã-í Dútú Ndióxi, te vã ñi ndũu-gã xocuñi-ndó núú ndécú-gã. Te cada iní-ndó sã datná sã chidó tñuni-í ñi Tãtã-í Dútú Ndióxi ñi-ndo chi ducaⁿ-ni cundecu-ndo ndihi-gã, te cada tucu iní-ndó sã datná sã chidó tñuni-í nãcuáa ñani ñuú-gã ñi-ndo, chi ñi ñuú-gã-ãⁿ cundecu-ndo, te ñuú-ãⁿ nãni-xí Jërusalén Sáã, duha ñani ñuú-gã. Te ñuú-ãⁿ quee-xi andiú núú ndécú Yá Ndióxi Yáã cùú Tãtã-í quee-xi ñuyiú. Te cada tucu iní-ndó sã datná sã chidó tñuni-í ñi mee-í ñi-ndo, te xiãⁿ cùú-xí ñi ñi saa, te ducaⁿ càda iní-ndó chi cundecu ndihi ñaha-ndo xii-í.

¹³ Te nchaa nchòhó cada cuendã vãha-ndo nãcuáa xãhaⁿ-í xii Espiritú Yá Ndióxi xãhaⁿ-xi xii cue ñáyiú ndècu ichi-gã xĩndecu nchaa xichiⁿ, duha cãchí Yáã cãháⁿ-ãⁿ. Te nchaa tñuhu-ãⁿ ní chidó tñuni-í sã cùú-xí ñáyiú xĩndecu ichi Yá Ndióxi ndécú ñúú Filãdelfiã.

Tñuhu sã cùú-xí ñáyiú xĩndecu ichi Yá Ndióxi ndécú ñúú Laodiceã

¹⁴ Te cãchí tucu Yáã cãháⁿ-ãⁿ xii-í sã chidó tñuni-í nchaa tñuhu sã vítã cãháⁿ-gã ñi núú tütú, te tendaha-í quíhiⁿ ndaha tée xĩnu cuechi núú Yá Ndióxi ndécú ñúú Laodiceã sã cùú-xí cué ñáyiú xĩndecu ichi-gã ndécú

ñuú-ãⁿ, te duha cãchí-gã: “Yúhú cùú-í Yáã quidé núú Yá Ndióxi, te cùu-í Yáã quidé ndãã chi cãháⁿ ndãã cuiti-í nãcuáa cãháⁿ Yá Ndióxi. Te yúhú cùú-í Yáã ní quide ní ngũndecu nchaa sã ní cadũha Yá Ndióxi.

¹⁵ Te yúhú xini-í nchaa nãcuáa quide nchohó ñáyiú xĩndecu ichi Yá Ndióxi ndécú ñúú Laodiceã, te xini-í sã ñã túú cuini-ndó cãchicúⁿ nihnu-ndo nchãa nãcuáa cãháⁿ-í, te ni ñã túú cuini-ndó dãña duuⁿ-ndo. Te vãha-gã sã dúúⁿ dùuⁿ cada-ndo nchaa nãcuáa cãháⁿ-í ãdi núú ñãhá te duuⁿ duuⁿ dãña-ndo.

¹⁶ Te sã dúcãⁿ quide-ndo ñã túú cuini-ndó dùuⁿ duuⁿ-ni cada-ndo nãcuáa cãháⁿ-í, te ni ñã túú cuini-ndó dùuⁿ duuⁿ-ni dãña-ndo te sãã nduu vã cũndèe-gã iní-í cuendã nchaa sã quidé-ndó-ãⁿ, te daquèe tíhú ñãhá-í xii-ndo.

¹⁷ Te cãchí-ndó sã cuicã-ndó, te ïo vãha ta yãha-ndo nchãa nduu cuáhãⁿ, te ñã túú tñãhi ná cãmãni xii-ndo, te ñã túú cutnùni iní-ndó sã cùú-ndó datná cue ñáyiú ïo ndãhú yãha, te cùu-ndo datná ñáyiú ndãhú, ñáyiú ïo cũndahú iní ñãhá tñaha ñáyiú-xi, te cùu-ndo datná cue ñáyiú cuãã, te cùu tucu-ndo datná cue ñáyiú ndãhú ñã túú tñãhi dóó-xi.

¹⁸ Te na cãchí tñuhu-í xii-ndo sã càdã-ndó datná xiquide cue ñáyiú sããⁿ ñi sã ní cuãha mee-ni ñiⁿ cuããⁿ sã ïo vãha cãa, te ducaⁿ quidé-yu te ïo-gã cùú cuicã-yu. Te cada tucu-ndo datná xiquide cue ñáyiú sããⁿ dóó cuixiⁿ sãcũñhu-yu cuendã sã vã cùú-yu datná ñáyiú ndãhú ñã túú dóó-xi, te cada tucu-ndo datná quidé cue ñáyiú sããⁿ yúcu quèe núú-xi nãcuáa cutnùni vãha núú-yu, te duha cãháⁿ-í xãhaⁿ-í xii-ndo chi cuini-í sã nãtuha ñaha-ndo xii-í, te ïo vãha cundecu-ndo sã cùú-xí Yá Ndióxi.

¹⁹ Te cãháⁿ-í dóho nchaa ñáyiú cùu iní-í òrè ñã túú quide ndãã-yu, te dãndohó-í-yu, núu xiãⁿ cuini-í sã nchòhó ndixi cuéchi iní-ndó sã ñã túú quide vãha-ndo ndècu-ndo.

²⁰ Te na cãchí tñuhu-í xii-ndo sã yúhú cùú-í datná ñi tée nùtñi yuyèhe ndaa quehé te cãháⁿ-í ñáyiú yìhi xití vehe, te núu na càda cuendã-yu sã cãháⁿ-í te nacaãⁿ-yu yuyèhe te quíhu-í xití vehe cudini-í ndihi-yu, te duha cãháⁿ-í chi cuini-í cundecu ndihi ñaha-í xii-ndo.

²¹ Te nchaa nchòhó ñáyiú na càda ndee iní-xi yãha nãndi sã ná yãha sã cuendã-í, te yúhú taxi-í xii-ndo ñi xichi núú ndécú-í cundecu-ndo te cunu-ndo tñahã-ndó datná cùnũu-í, chi yúhú ducaⁿ ní quide ndee iní-í ní yãhá-í nãndi sã ní yãhá-í te vítã ní nduu táhú-í ndécú-í núú ndécú Tãtã-í Dútú Ndióxi cùnũu-í.

²² Te nchaa nchòhó cada cuendã vãha-ndo nãcuáa cãháⁿ Espiritú Yá Ndióxi xãhaⁿ-xi xii cue ñáyiú ndècu ichi-gã xĩndecu nchaa xichiⁿ, duha cãchí Yáã cãháⁿ-ãⁿ. Te nchaa

tnúhu-án ní chídó tnùn-í sá cúu-xí ñáiyu xĩndecu ichi Yá Ndióxi ndécú ñùù Laodiceá.

4

Nacuáa chiñuhu ñáiyu Yá Ndióxi andiu

1 Te sátá ní yáha ducaⁿ ní cuu te ní xiní-í nchii andiu, te ní cáháⁿ tucu Yaá ní cáháⁿ ndihi ñaha xii-í díhna, te Yaá-án ní cáháⁿ níhi-gá dàtná cáháⁿ níhi ìⁿ cútú, te ní cachí-gá xii-í:

—Taquène iha te na dànehé ñàhà-í xii-n nchàa nacuáa cada-xi ndéé núu cuaháⁿ núu vèxi —cachí-gá.

2 Te òrè-ni-án ní quide ñaha tucu Espiritú Yá Ndióxi xii-í nacuáa cachí iní-xi, te ñu-ni òrè-án ní xiní-í nútñi ìⁿ xilè váha andiu te càa datná cáá xilè sáçoo nchihí cue ñáiyu ío cùnunu, te núu xilè váha-án núcõo Yaá táxi tnùn-í.

3 Te Yaá-án cáá-gá dàtná cáá yúu chàhnchí yúu váha sá nání jáspe, te càa tucu-gá dàtná cáá yúu váha sá nání cõmalíná, te ñùhu doco ñaha ìⁿ cóo yáhnchí xii-gá, te tãsaⁿ-di dàtná tãsaⁿ ìⁿ yúu váha sá nání èsmeraldá.

4 Te ní xiní tucu-í nútñi òcò cùmí xilè váha ní càndéé núu núcõo-gá, te núu xilè-án xĩnucõo òcò cùmí cue tée cùu sacuéhé te xixĩhnu-güedé mee-ni dóó cuixiⁿ, te ìⁿ caa coróná sá ní cuáha mee-ni díhⁿ cuááⁿ xixúhuⁿ díquí-güedé.

5 Te núu núcõo Yaá táxi tnùn-í-án sáá nduté, te cáháⁿ ñùhu te xica chíhi-xi dõndaha, te càyú úsá iti núu núcõo-gá, te sá úsá iti-áⁿ xiáⁿ cútñi sá ndécú úsá espíritú cúu cuèndá-gá.

6 Te ndécú ìⁿ sá ndécú ndàa núu-gá te xiáⁿ cáá dàtná cáá lámár, te dàtná cáá vidriú cáá ñhií.

Te ní càndéé díñi Yaá núcõo-án xĩnutñi cùmí quiti te titní víñi tinuu-güedi ndéé ndàa sátá-güedi ndihi ndàa núu-güedi.

7 Te quiti díhna nuu cáa-di datná cáá ndicaha, te quiti cùu uú cáa-dí dàtná cáá ndicutu, te quiti cùu uní néhé-dí núù tée, te quiti cùu cumí cáa-dí dàtná cáá yàcolo oré cuaháⁿ-di núu tàchí.

8 Te ndi cùmí quiti-án ndéé ññú ndíxiⁿ-güedi ìⁿ ñⁿ-güedi, te ñhií xiti ndíxiⁿ-güedi ndihi ndàa sátá ndíxiⁿ-güedi ndéé tinuu-güedi, te nduu núu chíñuhu-güedi Yá Ndióxi, te xáhaⁿ-güedi xii-gá:

Yòhó Dútú Ndióxi ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te ñu-ni ducaⁿ càda ndáá-n núu cuaháⁿ núu vèxi,

te cùu-n Yaá quidé nchàa-ndi túhú sá váha, te ñu-ni-n sà ndecu-n ndéé cútñahá ní cuáha ñuyíú,

te ñu-ni-n ndécú-n cuéi vitna, te ñu-ni-n cùndecu-n cuéi ndéé núu cuaháⁿ núu vèxi.

Duha xáhaⁿ cuè quiti-án xii Yaá núcõo núu xilè váha-án chíñuhu ñaha-güedi.

9 Te cue quiti-án ño ndácáⁿ táhu-güedi núu Yáá núcõo núu xilè váha-án cuèndá nchaa sá quidé-gá. Te Yaá-án cúu-gá Yaá ndécú nchàa nduu nchaa quíu. Te cue quiti-án cachí-güedi sá ío càhnu cuu-gá te nèhe-güedi sá yíñuhu núu-gá. Te ndi tnahá òrè ducaⁿ cáháⁿ-güedi,

10 te ndi òcò cùmí cue tée cùu sacuéhé xĩnucõo-án ngüñí xiti-güedé núu Yáá núcõo-án, chí ñu-gá cúu-gá Yaá ndécú nchàa nduu nchaa quíu te chíñuhu ñaha-güedé xii-gá, te tàva-güedé coróná ñùhú díquí-güedé te tàxi ndecu-güedé núu-gá, te xáhaⁿ-güedé xii-gá:

11 Yòhó cúu-n Dútú Ndióxi Yaá cúu cuèndá ñàhá xii-ndí,

te ío càhnu cuu-n, te ío váha quide-n,

te nèhe-ndí sá yíñuhu núu-n, chí ducaⁿ tàù-xi cada-ndí,

chí yòhó cúu-n Yaá ní cadúha nchaandi túhú sá ío,

te ducaⁿ ní ngúndecu nchaa xiáⁿ chí mee-n ducaⁿ ní sani iní-n càda-n.

5

Cuèndá Yaá cáá dàtná cáá ìⁿ mbéé quiti ní dánícuèhé-güedé ndihi cuèndá ìⁿ tutú

1 Te ní xiní tucu-í sá Yáá núcõo núu xilè váha-án nùndàha-gá ìⁿ tutú ní nacauunu xio ndaha cùha-gá, te ndéé lètrá ndàa sátá-xi ndihi ndàa xiti-xi, te úsá tnahá tutú líhli ñùhu seyú ndéé sátá tutú-án cuèndá sá vâ dáñá-xi nàcá.

2 Te ní xiní-í ìⁿ espíritú xínú cuèchi núu Yá Ndióxi, te ndee víhi-xi te níhi cáháⁿ-xi, te cachí-xi:

—çYoo tàù-xi xocàni nchaa tutú líhli ñùhu seyú ndéé sátá tutú-a te nadacáá-xi? —cachí espíritú-án.

3 Dico ní àndiu, te ní núu ñuyíú-a, te ní ndàa xiti ñùhu ñá túú ìⁿ ñáiyu tàù-xi nadacáá tutú-án te cundèhé-yu.

4 Te yúhú ní ngüíta-í ndàhyú víhi-í cuèndá sá ñá túú ní ìⁿ ñáiyu tàù-xi nadacáá tutú-án cundèhé-yu.

5 Te ìⁿ cue tée cùu sacuéhé xĩnucõo xiáⁿ ní cachí-güedé xii-í:

—Vá ndàhyú-gá-n, te cada cuèndá-n chí Yaá ío cùnunu cuu ndi mee cue ñáiyu cùu ñani tnahá ndii Júdá, ñu-ni Yaá cúu ñani tnahá ndii Dáví, Yaá-án cúu-gá Yaá ní ndacu ní yáha nchaa nándi sá ní yáha, núu xiáⁿ ñu-gá táù-gá xocàni-gá nchaa tutú líhli ñùhu seyú ndéé sátá tutú-án te nadacáá-gá —duha cachí tée cùu sacuéhé-án.

6 Te tnuú ndi òcò cùmí cue tée cùu sacuéhé xĩnucõo-án, ndihi tnuú ndi cùmí quiti xĩnutñi-án, ndihi núu núcõo Yaá táxi tnùn-í-án ní xiní-í nútñi ìⁿ Yaá cáá dàtná cáá

ɪ̃n mbéé quiti ní dánicuehé-güedé te ní xihí-di ní cùu te ní ndoto-di, te ndéé úsá ndiqui-di, te ndéé úsá tinùu-di, te sá úsá tinùu-di-áⁿ cútñuní sá ndécú úsá espíritu cùu cuendá Yá Ndióxi, ducaⁿ cãa Yaá-áⁿ ní xiní-í. Te cue espíritu-áⁿ ní tendaha-gã xicã cùu-xi ní caa xico ñuyúu.

7 Te Yaá cáá dàtná cáá ɪ̃n mbéé quiti ní dánicuehé-güedé-áⁿ ní sáhã-gã núú Yáa núcõo núú xilé váha-áⁿ.

8 Te òré ní queheⁿ-gã tutú-áⁿ te ndi cùmi quiti xĩnutnĩ xíáⁿ ní ngüñĩ xitĩ-güèdi núú-gã, te ducaⁿ ní ngüñĩ xitĩ tucu ndi òcõ cùmi cue tée cùu sacuéhé xĩncuó-áⁿ, te ndi díiⁿ núú-güedé xĩnehe-güedé yaá sá nãní ãrpã, te xĩnehe tucu-güedé ndí díiⁿ núú-güedé ɪ̃n caa tĩcùu ní cuáha mee-ni díhúⁿ cuááⁿ, te chĩtu dũsa sá sáhãⁿ tnãmí. Te ñũhmã dũsa sá sáhãⁿ tnãmí-áⁿ cùu-xi dàtnã nchaa tnũhu càháⁿ nchaa ñáyiu ndècu ichi Yá Ndióxi òré càháⁿ ndihĩ ñàhá-yu xii-gã.

9 Te xita-güedé ɪ̃n ndudú sáá ndihĩ cue quiti-áⁿ chíñũhu ñaha-güedé xii-gã, te càchĩ-güedé ndihĩ cue quiti-áⁿ:

Yòhõ tàù-n queheⁿ-n tutú-a te xocàn-n nchaa tutú lihli ñũhu seyú ndéé sátã-xi,

chi yòhõ ní sati ñĩñi-n te ní xihí-n, te cuendá xíáⁿ ní nduu cuendá Yá Ndióxi cue ñáyiu ɪ̃nⁿ ñacióⁿ, ndihĩ ñáyiu xĩndecu ɪ̃nⁿ ñuú, ndihĩ ñáyiu càháⁿ ndí díiⁿ ndí díiⁿ núú tnũhu, ndihĩ ñáyiu xĩndecu ɪ̃nⁿ xichi.

10 Te ní quidè-n-yu dàtnã cue tée yĩndaha ñáyiu, te ní quide tucú-n-yu dàtnã cue dútú sã cùu-xi Yá Ndióxi.

Te sáá nduu te taxi tñuní-yu ñuyúu-a. Duha càháⁿ cue tée-áⁿ ndihĩ cue quiti-áⁿ chíñũhu-güedé ndihĩ-güèdi Yaá-áⁿ.

11 Te sátã dúcãⁿ te ní tecú dóho-í ní càháⁿ cuéhé víhĩ espíritu xínú cuèchi ní candéé núú núcõo Yaá táxi tñuní-áⁿ, ndihĩ núú xĩnutnĩ ndi cùmi cue quiti-áⁿ, ndihĩ núú xĩncuóo cue tée cùu sacuéhé-áⁿ, te ní xiní-í sã sũtũní cuéhé víhĩ espíritu-áⁿ xĩndecu xíáⁿ,

12 te níhi ní càháⁿ cue espíritu-áⁿ, te càchĩ-xi:

Yòhõ Yaá cáá dàtnã cáá ɪ̃n mbéé quiti ní dánicuehé-güedé te ní xihí ní cùu te ní ndoto,

te yòhõ ío càhnu cuu-n, te ndècu ndihĩ-n nchaandi túhú,

te ío ndècu ndihĩ-n sã xini tñuní-n, te ndãcu-n quide-n nchaa sã cuimí-n,

te nèhe-ndí sã yĩñũhu núu-n, te ío váha quide-n,

te chíñũhu ñaha-ndí xii-n, chi ducaⁿ tàù-ndí cada-ndí chí ío càhnu cuu-n.

Duha càchĩ nchaa cue espíritu-áⁿ xãhaⁿ-xi xii-gã chíñũhu ñaha-xi.

13 Te ní tecú dóho-í ní càháⁿ nchaandi túhú sã ní cadúha Yá Ndióxi ndécú ãndu, ndihĩ nchaa sã ndécú ñuyúu, ndihĩ nchaa sã ndécú xitĩ ñũhu, ndihĩ nchaa sã ñũhú xitĩ ndute lámãr, te xicãchĩ-xi:

Yòhõ Yaá núcõo núú xilé váha, ndihĩ yòhõ Yaá cáá dàtnã cáá ɪ̃n mbéé quiti ní dánicuehé-güedé táxi tñuní-ndó, te nèhe-ndí sã yĩñũhu núu-ndó,

te ducaⁿ ío ndãcãⁿ táhú-ndí núu-ndó, chí ío váha quide-ndo te ío cùnuu-ndo,

te diu-ni duha càháⁿ váha-ndí cuendá-ndó ní caa ní quíhĩⁿ.

Duha càchĩ nchaa sã ní cadúha Yá Ndióxi.

14 Te ndi cùmi cue quiti xĩnutnĩ-áⁿ càchĩ-güèdi:

—jDucaⁿ na cùnduu! —cachĩ-güèdi.

Te ndi òcõ cùmi cue tée cùu sacuéhé xĩndecu-áⁿ ní ngüñĩ xitĩ-güèdè chíñũhu-güedé Yaá ndécú nchaa nduu nchaa quíu.

6

Cuendá úsã tutú lihli ñũhu seyú

1 Te sátã dúcãⁿ te ní xiní-í sã Yáa cáá dàtnã cáá ɪ̃n mbéé quiti ní dánicuehé-güedé-áⁿ ní xócãní-gã ɪ̃n tutú lihli ñũhu seyú ndéé sátã tütú sã ní nadúcúⁿ nuu-áⁿ, te ní tecú dóho-í ní càháⁿ ɪ̃nⁿ quiti cùmi xĩnutnĩ-áⁿ, te níhi ní càháⁿ-di dàtnã càháⁿ ñũhu, te càchĩ-di:

—jTaqui xĩ cundehe-n! —cachĩ-di.

2 Te òré-ni-áⁿ ní xiní-í ɪ̃nⁿ cuáyú cuixiⁿ yódó ñaha ɪ̃nⁿ sã yódó ñaha xii-di, te sã yódó ñaha xii-di-áⁿ nèhé-xi ɪ̃nⁿ arcú sã cùu tñuxi-xi, te ní nduu táhú-xi ɪ̃nⁿ coròná, te ní ndacu-xi ní cunu-xi te ducaⁿ-ni ta cùnuu-xi cuáhãⁿ.

3 Te òré ní xócãní-gã tutú lihli cùu uní ñũhú seyú ndéé sátã tütú sã ní nadúcúⁿ nuu-áⁿ, te ní tecú dóho-í ní càháⁿ tucu ingã quiti cùu uní xĩnutnĩ-áⁿ, te càchĩ-di:

—jTaqui xĩ cundehe-n! —cachĩ-di.

4 Te òré-ni-áⁿ ní xiní tucu-í ɪ̃nⁿ cuáyú tícuéhé ní quee-di cuáhãⁿ-di, te yòdo ñaha ɪ̃nⁿ sã yódó ñaha xii-di, te sã yódó ñaha xii-di-áⁿ ní níhi-xi tñũhu ndee ñni sã dáticãnuu-xi ñáyiu vá cùndècu ndihĩ tñaha váha-gã-yu, te ngüita ñáyiu cahni tñahã-yu, te ní nduu táhú-xi ɪ̃nⁿ yuchi càhnú vhi.

5 Te òré ní xócãní tucu Yaá-áⁿ ingã tutú lihli cùu uní ñũhú seyú ndéé sátã tütú sã ní nadúcúⁿ nuu-áⁿ, te ní tecú dóho-í ní càháⁿ quiti cùu uní xĩnutnĩ xíáⁿ, te càchĩ-di:

—jTaqui xĩ cundehe-n! —cachĩ-di.

Te òré-ni-áⁿ ní xiní tucu-í ɪ̃nⁿ cuáyú tñúu te yòdo ñaha tucu ɪ̃nⁿ sã yódó ñaha xii-di, te sã yódó ñaha-áⁿ nùndãha-xi úu yaxiⁿ libré.

6 Te ní tecú dóho-í ní càháⁿ ɪ̃nⁿ sã ní càháⁿ tñúu cue quiti xĩnutnĩ-áⁿ, te càchĩ-xi:

—ɪ̃nⁿ cuártú-nã triú níhi-ndó sã ɪ̃nⁿ díhúⁿ denãriú, te úní cuártú-nã cebãdá níhi-ndó sã

ññ tucu díhúⁿ denàriú, dico acití ndíhi ndudí ndéhé yoho yàha stilé chí vá ndíhí ñlñmu — duha càchí sá càháⁿ-án.

7 Te òré ní xócání tucu Yaa-án tutú líhli cùu cumí ñhúhú sèyú ndéé sáta tütú sá ní nadúcúⁿ nuu-án, te ní tecú tucu dóho-í ní cáháⁿ tucu ingá quiti cùu cumí xñnutñí-án, te càchí-dí:

—¡Taquixi cundehe-n! —cachí-di.

8 Te òré-ni-án ní xiní tucu-í ññ cuáyú yàhá, te yòdo ñaha tucu ññ sá yódó ñaha xii-di, te sá yódó ñaha xii-di-án nání-xí Sà xihí, te xiáⁿ sáhní-xí ññyiu, te sáta xiáⁿ nchícúⁿ sá nèhé núú ndécú ññyiu ní xihí. Te cúmí xichí cùu ñuyú, te sá sáhní ñaha xii ññyiu-án ní ñhí-xi tñuhu ndee ñni danàa-xi ññyiu ññ xichí ñuyú, te davá-yu cahni ñaha-xi ndíhi yuchí, te cada-xi sá cóo tñamá te cuú-yu, te cada tucu-xi sá cóo cuéhé cahni-xi ññyiu, te diu-ni tucu-xi cada sá ncháá quiti dééⁿ cahni-di ññyiu.

9 Te òré ní xócání tucu Yaa-án tutú líhli cùu uhúⁿ ñhúhú sèyú ndéé sáta tütú sá ní nadúcúⁿ nuu-án, te òré-án ní xiní-í nñtñí ññ núú sácódó sá ndúú tñhú Yá Ndióxi, te ndaa caha xiáⁿ ní xiní-í xñdecu nchaa álmá ññyiu ní sahní-güedé núú ñuyú sá cuendá tñuhu Yá Ndióxi, ndíhi sá cuendá sá ní cáháⁿ váha-yu cuendá-gá.

10 Te nchaa álmá-án ñhí xicáháⁿ-xi, te xáhaⁿ-xi xii Yá Ndióxi:

—Yohó Dútú Ndióxi cúu-n Yaa ñá túú tñáhí cuéchi-xi, te ñá túú tñáhí quée cáva-n quide-n ññ sá cáháⁿ-n. ¿Te ná ndéé ama dándòho-n ññyiu ndècu ñuyú nachinaa-n cuendá sá ní quide ñáhá-yu xii-ndí-í? —càchí cue álmá-án xáhaⁿ-xi xii-gá.

11 Te sáta dúcáⁿ te nchaa cue álmá ññyiu-án ní ñhí-xi dóo cuixíⁿ ní quée cuíñmu-xi, te ní xñtñuhu ñaha xii-xi sá ná ndètátú-xi te cundetú tñaa-xi ndéé ná xñnu cava cuú ññyiu nàcuáa ndéé tñuní dàtná ní xihí cue ññyiu dii álmá-xi cùu-xi. Te ññyiu sá ní xihí-án ññ-ni cúu-yu ndíhi ññyiu vitna cuú-án chí mee-ñi chiúⁿ Xítóhó Jesucristú quidé-yu, te diu-ni ichi-gá ndécú-yu.

12 Te òré ní xócání tucu Yaa-án tutú líhli cùu ññú ñhúhú sèyú ndéé sáta tütú sá ní nadúcúⁿ nuu-án, te ní xiní-í sútní ñhí ní quidi-xi ññyú, te ní cutnuu ñhíí núú nchíanchii dàtná ññ dóo tñúú, te ní cuu ticuèhé ññí ñhíí núú yóó.

13 Te ní xiní-í ní ngoyo chódíní ññyú-a dàtná ngóyó ngúxi yíhí òré quéné tächí ñhí.

14 Te ní xiní-í ní nadúcúⁿ nuu andíu dàtná nádúcúⁿ nuu ññ tutú te ní ndóñhúhú-xi, te nchaa tñdúú ní xica ndehe-xi núú ndécú-xi, te ducaⁿ ní xica ndehe tucu nchaa tñdúú yichí ndécú xití ndute lámár.

15 Te nchaa cue téé yñdaha ññyiu ní nguíváha-güedé, ndíhi nchaa dava-gá cue

tée ío tàxi tñuní, ndíhi nchaa ññyiu cuica, ndíhi nchaa cue téé tàxi tñuní sandádú, ndíhi cue sandádú cue téé ío váha sáa díqui-xi nàcuáa cada-güedé nàa-güedé, ndíhi nchaa ññyiu ñá túú tñáhí dàñá quée núú chíúⁿ patróóⁿ-xi, ndíhi nchaa ññyiu dàñá quée núú chiúⁿ patróóⁿ-xi. Te dava ññyiu-án ní nguíváha-yu xití yaú, te davá-yu ní nguíváha-yu nchaa tñúú cava.

16 Te xáháⁿ-yu nchaa tñdúú ndíhi nchaa cava:

—Chí təcúⁿ chiváha ñaha-ndo xii-ndí cuendá sá vá quimí ñáhá Yaa ío tàxi tñuní núcóo núú xilé váha, ndíhi cuendá sá vá dándòho ñaha Yaa cáa dàtná cáa ññ mbéé quiti ní dñnicuèhé-güedé, chí Yaa-án ío cùdééⁿ-gá núú-ndí —duha càchí nchaa ññyiu-án xáháⁿ-yu xii nchaa tñdúú-án ndíhi nchaa cava-án.

17 Te vitna ní sáa nduu ío cùu cahnu nduu tñúndòho tñuhu ndáhú, te vá yóo ññ cundee ññ-xi yáha nchaa tñúndòho-a.

7

Ññyiu isráel ññyiu naníhí tñhú

1 Te sáta xiáⁿ te ní xiní-í cúmí tñáhá espíritú xínú cuéchi núú Yá Ndióxi xñnutñí-xi ndí cúmí xio ñuyú, te cue espíritú-án ní ngani-xi tächí cuendá sá vá cuicó-gá-xi ní lámár, te ní díqui yutnu, te ní ññ xichí ñuyú vá cuicó-gá-xi.

2 Te cue espíritú-án ndécú ndíhi-xi tñuhu ndee ñni danàa-xi sá ío lámár ndíhi sá ío ñuhu yichí, te ní xiní tucu-í ingá espíritú xínú cuéchi núú Yá Ndióxi ní quée nchíta-xi ndaa nacúa quène nchíanchii, te nùndaha-xi seyú Yá Ndióxi Yaa ndécú nchaa nduu nchaa quíú, te ñhí ní cáháⁿ-xi xáhaⁿ-xi xii ndí cumí cue espíritú-án:

3 —Vá dánàa-ndo sá ío lámár, te ní vá dánàa-ndo yutnu, te ní ññ sá ío ñuyú vá dánàa-ndo, chí cundetú-ndo ndéé ná tàxi ndecu-ndí ññ seña tñee nchaa ññyiu xñnu cuéchi núú Tátá-ó Dútú Ndióxi —duha càchí espíritú-án xáhaⁿ-xi xii ndí cumí espíritú xñnutñí ndí cúmí xichí ñuyú.

4 Te ní tecú dóho-í ní cáháⁿ ññ sá ní cáháⁿ, te ní cachí-xi sá núú ndí úxúú xichí cue ññyiu isráel te ní xñnu ññ cièndú údico cúmí mñl-yu ní ngúndecu seña tñee-yu.

5 Te núú ññ cièndú údico cúmí mñl ññyiu-án, te ní xñnu úxúú mñl cue ññaní tñáhá ndíi Jùdá ní ngúndecu seña tñee-yu, te úxúú mñl cue ññaní tñáhá ndíi Rùbèn, te úxúú mñl cue ññaní tñáhá ndíi Gád,

6 te úxúú mñl cue ññaní tñáhá ndíi Àser, te úxúú mñl cue ññaní tñáhá ndíi Neftálí, te úxúú mñl cue ññaní tñáhá ndíi Manasés,

7 te úxúú mĩl cue ñani tnáhá ndii Mió, te úxúú mĩl cue ñani tnáhá ndii Leví, te úxúú mĩl cue ñani tnáhá ndii Isacár,

8 te úxúú mĩl cue ñani tnáhá ndii Zabúlón, te úxúú mĩl cue ñani tnáhá ndii Chèé, te úxúú mĩl cue ñani tnáhá ndii Benjamín, nchaandi túhú ñáyiu-án nĩ ngúndecu sèñá tneé-yu.

Cuéhé víhí ñáyiu nihnu dóó cuixín

9 Te sátá xiáⁿ te ní xiní-í cuéhé víhí ñáyiu, ñáyiu ìⁿ ìⁿ nàcióⁿ, ndihi ñáyiu ìⁿ ìⁿ ñuu, ndihi ñáyiu càháⁿ ndi dííⁿ ndi dííⁿ núú tnúhu, ndihi ñáyiu ní xĩndecu ìⁿ ìⁿ xichi, te nchaa ñáyiu-án xĩnutnĩ-yu ndaa núú Yáá táxí tnùnĩ núcóo núú xilé váha, ndihi núú Yáá cáá dàtná cáá ìⁿ mbéé quiti ní dánicuehé-güedé, te vá yóo ìⁿ ndàcu cahu ñaha xií-yu chí cuéhé víhí-yu, te nchaá-yu xĩxĩhnu-yu mee-ni dóó cuixín, te nundahá-yu nchaá-yu ìⁿ caa ndàha yutnu ñúú.

10 Te nchaá-yu níhi xicáháⁿ-yu, te càchí-yu: Yáá táxí tnùnĩ núcóo núú xilé váha cùu-gá Ndióxi-ó,

te diu-gá ndihi Yáá cáá dàtná cáá ìⁿ mbéé quiti ní dánicuehé-güedé ní dácäcu nihnu ñaha-gá xii-o núú ùhú núú ndáhú.

Duha càchí nchaa ñáyiu-án.

11 Te nchaa espíritú xínú cuèchi núú Yá Ndióxi ní nadúcuⁿndèé-xi xĩnutnĩ-xi ní càndéé núú núcóo Yáá núcóo núú xilé váha, ndihi núú xĩnucóo cue téé cùu sacuéhé, ndihi cue ndi cùmi quiti xĩnutnĩ-án, te nchaa-xi ní ngúñí xití-xí te ní ngúnu ndeyi-xi núú Yáá núcóo núú xilé váha-án, te nchaa-xi ní ngúnta-xi chíñuhu ñaha-xi xii-gá,

12 te càchí-xi:

Na càháⁿ ndáá-ndí núú yohó Tátá-ndí Dútú Ndióxi sá ío càhnu cuu-n, te ndàcu-n quide-n nchaa sá váha cuiní-n, te ío váha quide-n, te ndècu ndihi-n nchaa sá xiní tnùnĩ-n,

te chíñuhu ñaha-ndí xii-n, te ducaⁿ ndàcáⁿ táhú-ndí núú-n cuendá nchaa sá quide-n, te nèhe-ndí sá yíñuhu núú-n,

te tnúhu càháⁿ-ndí-a cùu-xi tnúhu ndáá, te diu-ni duha càháⁿ-ndí ndéé núú cuaháⁿ núú véxi.

Duha càchí nchaa cue espíritú-án xáhaⁿ-xi xii Yáá núcóo núú xilé váha-án.

13 Te ìⁿ cue téé cùu sacuéhé xĩndecu-án nĩ xicáⁿ tnúhú-dé núú-í, te càchí-dé:

—Yóndi cùu ñáyiu dácáⁿ xĩxĩhnu dóó cuixín-án, te ndéé véxi-yu núú dácáⁿ xĩndáá-yu-i? —càchí-dé.

14 Te yúhú ní xáhaⁿ-í:

—Tátá, ñá túú xiní-í, dico mee-n xiní-n — duha ní xáhaⁿ-í xii-dé.

Te dàtnùnĩ ní cachí tnúhu-dé xii-í ná cúú ñáyiu-án, te càchí-dé:

—Nchaa ñáyiu-a cùu-yu ñáyiu ní quee núú ío víhí tnúhu ndòho tnúhu ndáhú sá vā cùndèe iní-ó te véxi-yu iha, te cùu-yu ñáyiu sa ní nduu ndoo ní nduu nine iní-xi cuendá sá ní sati níñi Yáá cáá dàtná cáá ìⁿ mbéé quiti ní dánicuehé-güedé, cuendá xiáⁿ vitna ní ndihí-yu ní nduu cuixín dóó xĩxĩhnu-yu.

15 Te núú xiáⁿ vitna ní nduu táhú-yu ndècu-yu núú ndécú Yá Ndióxi Yáá táxí tnùnĩ núcóo núú xilé váha, te cuèi nduu cuèi núú xínú cuèchí-yu núú-gá vitna, te diu-gá xitó ñaha-gá xií-yu.

16 Te vitna ní sáa-yu núú-gá cundecú-yu te vá ndóhó-gá-yu docó, te ní vā quini-gá-yu ndohó-yu yichí-yu ndute, te ní vā quini-gá-yu ndohó-yu cahni nchíanchii, te ñá túú-gá ná cahni ndohó-yu.

17 Te ducaⁿ chí Yáá cáá dàtná cáá ìⁿ mbéé quiti ní dánicuehé-güedé ndécú-gá núú núnñi xilé váha núcóo Yá Ndióxi Yáá táxí tnùnĩ, Yáá-án coto ñaha-gá xií-yu dàtná quidé ìⁿ toli oré xitó-dé mbéé-dé, te candeca ñaha-gá xií-yu quihíⁿ núú tóo ndute, te ndute-án cùu-xí ndúte candeca iní-yu, te Yá Ndióxi cada-gá sá vā quini-gá-yu tnúhu ndáhyú —duha ní cachí tnúhu téé cùu sacuéhé-án xii-í.

8

Cuendá tícuú sá nĩ cuáha mee-ni dñhúⁿ cuááⁿ

1 Te sátá dúcáⁿ te Yáá cáá dàtná cáá ìⁿ mbéé quiti ní dánicuehé-güedé ní xócáni-gá tutú líhli cùu usá ñúhú sèyú ndèé sátá tütú sá ní nadúcuⁿnuu-án, te òrè-án nĩ cunahi súúni návif-ná ní cuu andiu dàtná cuádava òrè.

2 Te ní xiní-í usá tnáhá espíritú xínú cuèchi núú Yá Ndióxi xĩnutnĩ-xi núú núcóo-gá, te ní níhí-xi ìⁿ caa cütú xĩnehe-xi.

3 Te dàtnùnĩ ní xiní tucu-í ingá espíritú xínú cuèchi núú-gá ní quexio-xi nehe-xi ìⁿ tícuú ní cuáha mee-ni dñhúⁿ cuááⁿ te ñuhu vai dusa sá sàháⁿ tnámí, te ní ngúnutnĩ espíritú-án núú ndécú sá ní cuáha mee-ni dñhúⁿ cuááⁿ núú sácódo sá ndúú táhú Yá Ndióxi, te xiáⁿ núnñi-xi ndaa núú-gá, te dusa sá sàháⁿ tnámí-án cahmi espíritú-án núú sácódo sá ndúú táhú-gá-án cuendá ñúhmá dusa-án cundihi-xi nchaa tnúhu càháⁿ ñáyiu càháⁿ ndihi ñaha xii-gá, nchaa ñáyiu cùu cuendá-gá.

4 Te nundaha espíritú-án tícuú ñúhú dusa sá sàháⁿ tnámí càyú, te quène ñúhmá núnñi-xi núú Yá Ndióxi, te ñúhmá-án cündihí-xi nchaa tnúhu càháⁿ ñáyiu càháⁿ ndihi ñaha xii-gá, nchaa ñáyiu cùu cuendá-gá.

5 Te ní queheⁿ espíritú-án tícuú te ní dächitú-xi ñuhú yódó núú sácódo sá ndúú táhú Yá Ndióxi, te ní xitènuu-xi ñuyú, te òrè ducaⁿ ní quide-xi te ní càháⁿ víhí ñuhu, te ío

dusaⁿ ní quide-xi ñuyúú, te ní sáá nduté, te níhi víhi ní tnáa.

Ndi úsá espíritu ní tiú-xi ñⁿ caa cútú xñehe-xi

6 Te ndi úsá cue espíritu xñehe ñⁿ caa cútú-áⁿ ní ngúndecu túha-xi cuendá tiú-xi.

7 Te espíritu díhna nuu ní tiú-xi cútú néhé-xí, te ñuyúú-a ní ngoyo ñiñi dácánuu-xi ndiñi ñuhú ndiñi níñi, te luha-ná te cuu dava ñuyúú ní cáyú, te luha-ná te cuu dava tucu nchaa yutnu ió ñuyúú ní cáyú, te luha-ná te cuu dava tucu nchaa cúhú ió ñuyúú ní cáyú.

8 Te espíritu cúú úú ní tiú-xi cútú néhé-xí, te dátá cáá ñⁿ tindúú cáá ñⁿ sá ní ngava xití lámár te nchicúⁿ ñuhú, te luha-ná te cuu dava ndute lámár-áⁿ ní nduu-xi níñi.

9 Te luha-ná te cuu dava nchaa quití xixúhuⁿ xití lámár-áⁿ ní xihí-güedi, te luha-ná te cuu dava nchaa bàrcú ní quée naa-xi xití ndute.

10 Te espíritu cúú ùni ní tiú-xi cútú néhé-xí, te ní ngava ñⁿ chódíni cáhnú ndéé andiu ñuyúú te nchicúⁿ ñuhú-dí, te ñuhú-áⁿ cáá dátá cáá ñuhú iti. Te luha-ná te cuu dava nchaa yúte ní ngava chódíni-áⁿ, te luha-ná te cuu dava tucu nchaa núú quéñihni ndute ní ngava-di.

11 Te chódíni-áⁿ nání-dí: Yúcú Úá. Te ndute xica nchaa yúte-áⁿ ndiñi nchaa ndute quéñihni-áⁿ ní cuu úa-xi dátá yúcú úá, te ió cuéhé ñáyiú ní xihí sá dúcáⁿ ní cuu úa ndute-áⁿ.

12 Te espíritu cúú cùmi ní dácáhá-xi cútú néhé-xí, te luha-ná te cuu dava nchicanchii ñá túú ní dàyehé-xi, te ducaⁿ lùha-ná tucu cuu dava yóó ñá túú ní dàyehé-di, te ducaⁿ lùha-ná te cuu dava tucu nchaa chódíni ñá túú ní dàyehé-güedi, te luha-ná te cuu dava nduu ñá túú ní dàyehé nchicanchii, te ducaⁿ lùha-ná te cuu dava niú ñá túú ní dàyehé yóó ndiñi nchaa chódíni.

13 Te sátá dúcáⁿ te ní xiní-í xicó ñⁿ espíritu xinú cuéchi núú Yá Ndióxi núú táchí, te ní tecú dóho-í níhi cáhá-xi, te càchí-xi:

—jío ndàhú ndoho nchaa ñáyiú xñdecu ñuyúú òré ná dácáháⁿ úní-gá cue espíritu cùmáni cútú xñehe-xi, chi sá xñdecu túha-ná-xi sá dácáhá-xi!— duha càchí espíritu-áⁿ.

9

1 Te espíritu cúú ùhúⁿ ní tiú-xi cútú néhé-xí, te òré-áⁿ ní xiní-í ní quee ñⁿ espíritu andiu te càa-xi dátá cáá ñⁿ chódíni, te ní ngava-xi ñuyúú, te ní níhi-xi ñⁿ ndacaá néhé-xí cuendá nacaá-xi yuyèhe yaú cùnú víhi.

2 Te ní nacaá-xi yaú-áⁿ te ní ngúita-xi ní queene ñúhmá dátá quéné ñúhmá ñⁿ xitnú cáhnú víhi, te ní queene táchí ní xiténuu-xi

ñúhmá-áⁿ te ní sadí-xi núú nchicanchii, te ní cunee ñuyúú.

3 Te xití ñúhmá-áⁿ ní queene tíca làngóstá, te ní xiténuu-di ñuyúú, te dééⁿ-güedi dátá dééⁿ nchacua.

4 Te ní ngúndecu ndiñi-güedi tnúhu ndee iní cuendá sá dándòho-güedi mee-ni ñáyiú ñá túú ndéé seña Yá Ndióxi tneé-xi, te ñá túú ná cada-di nchaa yutnu ndiñi nchaa cúhú.

5 Te ñá túú tnúhu ndee iní ndécú ndiñi-güedi sá cáhní-güedi ñáyiú, chi mee-ni sá dándòho ñaha-güedi xií-yu úhúⁿ yóó. Te òré ní ngúita-güedi dándòho ñaha-güedi xií-yu te tãhú tnúhú núú dáquée-güedi iñu-güedi dátá quidé-xí núú dáquée nchacua iñu-güedi.

6 Te ñáyiú-áⁿ xicáⁿ tãhú-yu sá ndiñi cuú-yu cuendá sá ió ndòhó-yu dáquée ñaha nchaa quití-áⁿ iñu-di xií-yu te ñá cuéni-xi cuú-yu, te ñⁿ nduu ñⁿ nduu sàni iní-yu cuú-yu te ñá túú cuíni-xi cuú-yu chi ñá túú tnúhu xihí sá cúú-xí-yu.

7 Te nchaa tíca làngóstá-áⁿ xíndaa-güedi dátá ndáa nchaa cuáyú cue téé cuáháⁿ nàá, te díquí-güedi ñúhu ñⁿ sá cáá dátá cáá còroná ní cuáha mee-ni díhúⁿ cuááⁿ, te núú-güedi càa datná cáá núú cué téé.

8 Te idi díquí-güedi càa datná cáá idi díquí ñáyiú díhi, te núhu-güedi càa datná cáá núhu ndicaha.

9 Te yidúcúⁿnuu-güedi ñⁿ sá cáá dátá cáá càa, te ndíxíⁿ-güedi quide-xi dátá quidé-xí núú vèxi cuéhé víhi càrretá sá tãñuhu cuáyú cuáháⁿ-güedé ndiñi-güedi núú nàá-güedé.

10 Te ndéé iñu núú lùhmá-güedi dátá ndéé iñu núú lùhmá nchacua, te iñu núú lùhmá-güedi-áⁿ dáquée-güedi ñáyiú dándòho ñaha-güedi xií-yu, te ducaⁿ-ni càda-güedi dándòho ñaha-güedi xií-yu ndéé xinú úhúⁿ yóó.

11 Te nchaa tíca làngóstá-áⁿ táxi tnúni ñáhá espíritu sá táxi tnúni yaú cùnú víhi, te espíritu-áⁿ nání-xi Àbadón tnúhu hèbreú, te tnúhu griégú nání-xi Àpoliòn, te ndi ndúú tnúhu-áⁿ quée-xí: Sá dánáa ñáyiú.

12 Te tnúndòho-a cuu-xi tnúndòho díhna nuu, te vitna cùmáni úú-gá.

13 Te espíritu cúú iñú ní tiú-xi cútú néhé-xí. Te núú Yá Ndióxi nítñⁿ ñⁿ sá ní cuáha mee-ni díhúⁿ cuááⁿ núú sácódó sá ndúú tãhú-gá, te ndi cùmí xíquí-xi xñdecu ñⁿ caa ndiqui, te ní tecú dóho-í ní cáháⁿ ñⁿ sá ní cáháⁿ ñihnu ndi cùmí ndiqui-áⁿ.

14 Te sá cáháⁿ ñihnu ndiqui-áⁿ xãha-xi xii espíritu cúú iñú sá ní tiú cútú-áⁿ:

—Cuáháⁿ nandaxi-n ndi cùmí espíritu ndútú ndècu yúte càhnu nani Eúfratés —càchí sá cáháⁿ-áⁿ xãha-xi xii espíritu-áⁿ.

15 Te sátá dúcáⁿ te ní nandáxi ndi cùmí cue espíritu-áⁿ cuendá cahni-xi cuéhé víhi ñáyiú,

te sa yatni dàtná cuádava ñáyiú xĩndecu ñuyú cahni-xi, te ducaⁿ chi sa ndècu túha tnàhí cue espíritú-án ndétú-xi sàá òré, àdi nduu, àdi yóó, àdi cuíá ducaⁿ càda-xi cahni-xi ñáyiú.

¹⁶ Te ní xiní-í nchaa cue sandàdú cundihí-xi xixódó-güedé cuàyuú, te ní nìhí-í tnúhu sá xĩnu úú cièndú millón-güedé.

¹⁷ Te duha xĩndáa cue cuàyuú-án ndihí cue tée yòó ñaha-án ní xiní-í: Te cue tée-án yidúcúⁿ nuu ñⁿ sá yidúcúⁿnuu pèchú-güedé, te luha ticuèhé te luha cuii datná cuii andiú, te luha cuááⁿ, te nchaa cuàyuú-án cáá díquí-güedi dàtná cáá díquí ndicaha, te yuhu-güedi quène ñuhú ndihí ñúhmá, ndihí àzufré nchicúⁿ ñuhú.

¹⁸ Te ío cuèhé ñáyiú ñuyú ní xihí chi luha-ná te cudavá-yu ní xihí sá cuèndá ñuhú-án ndihí ñúhmá-án ndihí àzufré-án.

¹⁹ Te ndihí núú lùhmá-güedi ndihí yuhu-güedi dàndoho-güedi ñáyiú, te núú lùhmá-güedi nèhe-xi díquí cóó, te ñu-ni dàtná cáá cóó cáá nìhí lùhmá-güedi.

²⁰ Te nchaa dava-gá ñáyiú ní cácu ñá túú ní xihí núú nchaa tnúndóho-án ñá túú ní cuiñi-yu dàñá-yu ichi cuèhé ichi duha ndécú-yu, chi quide cahnu-ní-yu nchaa espíritú cundihí yucu ñávaha, ndihí nchaa sá càchí-yu cùu ndiòxí ní cadúha cue tée ñuyú-a, te nchaa xiáⁿ ní cuáha mee-ni dñhúⁿ cuááⁿ, te dava ní cuáha mee-ni dñhúⁿ cuixíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xiáⁿ ñá túú cùtnuñi núú-xi, te ní ñá túú tècu dóho-xi, te ní ñá ndácú-xi càca-xi.

²¹ Te ní sá sáhní tnàhá-yu, te ní sá sáhní nduu tnàhá-yu, te ní sá ndécú-yu ichi díí ñni, te ní sá dúhú ndàchiiⁿ tnàhá-yu ñá túú ní cuiñi-yu dàñá-yu.

10

Ñⁿ espíritú xĩnú cuèchi núú Yá Ndiòxí nèhé-xi ñⁿ libré

¹ Te sáta dúcáⁿ te ní xiní tucu-í ñⁿ espíritú cùnúu xinu cuechi núú Yá Ndiòxí ní quee-xi andiú, te yihí-xi xití vícò cuànguee-xi ñuyú te ndàa díquí-xi ndècu ñⁿ cóó yáhnchí, te núú-xi súúni chàhnchí dàtná chàhnchí núú nchĩcanchii, te ndi ndúú dñhíⁿ-xi càa datná cáá itá ñuhú.

² Te nùndaha-xi ñⁿ libré lihli ní nandicá, te sáhá cùha-xi ní sani-xi núú ndute lámár, te sáhá dàtni-xi ní sani-xi núú ñuhu yichí.

³ Te espíritú-án nìhí vihi ní cáháⁿ-xi, te ní quide-xi dàtná quidé ñⁿ ndicaha oré cánásaa-di, te òré ducaⁿ nìhí vihi ní cáháⁿ-xi te úsá xito ní cáháⁿ ñúhu.

⁴ Te sáta ní yáha ní cáháⁿ ñúhu-án úsá xito, te chido tnùn-í ñⁿ núú tütú nàcuáa ní

cáháⁿ-xi ní cùu, te mei òré-án ní tecú dóho-í ní cáháⁿ ñⁿ sá ní cáháⁿ andiú te càchí-xi:

—Vá chídó tnùn-í nàcuáa ní cáháⁿ ñúhu-án, ini mee-ní-ná ná cùhuⁿ —duha càchí sá ní cáháⁿ-án.

⁵ Te espíritú sá nùtnñi ñⁿ xio sáhá-xi núú ndute lámár-án ndihí ingá xio sáhá-xi núú ñuhu yichí-án ní xiní-í ní ndonehe-xi ndaha cùha-xi,

⁶ te càchí-xi:

—Yá Ndiòxí Yáá ndécú nchaa nduu nchaa quúú Yáá ní cadúha ñuyú, ndihí andiú, ndihí lámár, ndihí nchaa sá ío, Yáá-án nàhá ndáá-gá sá yùhú cáháⁿ ndáá-í, te vá cùyaa vihi

⁷ te cada-xi nchaa nàcuáa nduu tnúhu nduu yuhu ní cáháⁿ-gá, tnúhu ní xáhaⁿ-gá xii cue tée ní xinu cuechi núú-gá, cue tée ní xóo cáháⁿ tnúhu-gá ndéé sanaha, chi òré ná tíú espíritú cùú úsá cútú nèhé-xi, te òré-án cada-xi nchaa nàcuáa nduu tnúhu nduu yuhu sá ní xáhaⁿ-gá xii nchaa cue tée-án —duha càchí espíritú-án.

⁸ Te sáta dúcáⁿ te ní tecú tucu dóho-í ní cáháⁿ tucu sá ní cáháⁿ andiú-án, te càchí-xi xii-í:

—Cuáháⁿ te queheⁿ-n libré lihli sá ní nandicá nùndaha espíritú-án, espíritú sá nùtnñi ñⁿ xio sáhá-xi núú ndute lámár, te ñⁿ xio sáhá-xi núú ñuhu yichí —duha càchí sá ní cáháⁿ-án.

⁹ Te yùhú ní sáhá-í núú ndécú espíritú-án xicáⁿ-í libré lihli nèhe-xi-án, te ní càchí-xi:

—Iha te caxi-n, te cuvidí yuhu-n dàtná cuvidí òré xihí-n ndudí ñúñú, dico xití-n chi cada úá-xi —càchí-xi.

¹⁰ Te ní queheⁿ-í libré lihli nùndaha espíritú-án ní xexi-í, te yuhu-í ní quide vidí-xi dàtná vidí ndudí ñúñú, dico sáta ní ngava-xi xití-í te ní quide úá-xi.

¹¹ Te ní càchí tucu espíritú-án xii-í:

—Dacuñí cáháⁿ tucu-ñ nàcuáa càchí Yá Ndiòxí cuèndá ñáyiú titní vihi nacióⁿ, ndihí cuèndá ñáyiú titní vihi ñúú, ndihí cuèndá ñáyiú cáháⁿ ndí díñⁿ ndí díñⁿ núú tnúhu, ndihí cuèndá cue tée yìndaha ñáyiú.

11

Cuèndá úú cue tée cáháⁿ nàcuáa càchí Yá Ndiòxí

¹ Te ní nìhí-í ñⁿ tnuyoo nàcuáa chicùhá-í ñⁿ sá chicùhá-í, te ní cáháⁿ ñⁿ sá ní cáháⁿ, te càchí-xi:

—Ndacuñí te chicùhá-n vèhe Yá Ndiòxí, te chicùhá tucu-n núú sácódó sá ndúú tãhú-gá, te cahu-n ná dahaná ñáyiú chĩñuhu ñaha xii-gá xĩndecu.

² Dico vá chicùhá-n ndàa quehé vehe-gá, chi xiáⁿ ní nduu cuèndá cue ñáyiú ñá túú cùu ñáyiú israhél, te ñáyiú-án nduu nuu-ná-yu

núu ní cuu ñúú-gá, te cada-yu dàtná càchí iní mée-yu, te údico úú yóo ducaⁿ càdá-yu.

³ Te yúhú tendaha-í úú tnàhá cue tée cáháⁿ yuhu-í nàcuáa càchí Yá Ndióxi, te úxúú cièndú únídico nduu ducaⁿ cáháⁿ-güedé yuhu-í cada-güedé núú-í, te cuihnu-güedé dóó tnúú sá sácuíhnu cue ñáyiu ndihú iní-xi —duha càchí sá cáháⁿ-án.

⁴ Te ndi ndúú cue tée-ánⁿ cúú-güedé dàtná úú yutnu òlívú sá xínutnii núú Yá Ndióxi, ndihi dàtná úú sá ndèè dité-xi, sá yíndòdo ñⁿ caa candí núú dité-xi ndècu tucu núú-gá, te diu-gá cúú-gá Yáá yíndàha ñuyúú.

⁵ Te ñáyiu na càni iní-xi ná cada ñaha xii-güedé te yuhu-güedé quene ñuhú cahni ñaha-xi xii-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xii-güedé.

⁶ Te ndi ndúú-güedé ndécú ndihi-güedé tnúhu ndee iní cada-güedé sá vā cúúⁿ dāú, te ducaⁿ càda-güedé nini cáháⁿ-güedé nàcuáa càchí Yá Ndióxi, te ndacu-güedé nadatiu-güedé ndute nduu-xi níñi, te ndacu-güedé dandòho-güedé nchaa ñáyiu titní núú tnúhu ndòho, te ducaⁿ càda-güedé ná daha xito càchí iní mée-güedé.

⁷ Te ná yáha sá cáháⁿ-güedé nàcuáa ní cachí Yá Ndióxi, te dàvā-ánⁿ quene ñⁿ quiti dééⁿ yàú cùnú vñí sá ío nèhé cáá, te quiti-ánⁿ ngüita-di nàà-di ndihi ndi ndúú cue tée-ánⁿ te cahni ñaha-di xii-güedé.

⁸ Te yiqui cùñú cue tée-ánⁿ cautùu-xi ñⁿ tnuú ñúú cahnú núu ní sahani-güedé Xítohó Jesucristú núú cùrúxi, te diu Yáá-ánⁿ cúú Xítohó-ó ndihi-güedé, te càchí ñáyiu sá ñúú-ánⁿ cúú-xí dàtná ñúú Sodomá ndihi nacióⁿ Egiptú.

⁹ Te úní nduu dava cautùu yiqui cùñú-güedé xiáⁿ, te ñáyiu nchaa nacióⁿ, ndihi ñáyiu nchaa ñúú, ndihi ñáyiu cáháⁿ ndí dííⁿ ndí dííⁿ núú tnúhu, ndihi ñáyiu xíndecu nchaa xichi quini-yu yiqui cùñú-güedé, te vā dāñā-yu nguindúxi.

¹⁰ Te nchaa ñáyiu-ánⁿ nduu vétú iní-yu sá dúcáⁿ cúú cue tée cáháⁿ nàcuáa càchí Yá Ndióxi-ánⁿ, te ío cudíí iní-yu, te nándi sá cuàha táhú tnàhá-yu sá cudíí iní-yu sá dúcáⁿ ní xihí-güedé, te ducaⁿ chí diu-güedé ní quide ío ní ndohó-yu.

¹¹ Te sátá ná yáhá úní nduu dava sá dúcáⁿ cúú-güedé te Yá Ndióxi dandòto ñaha-gá xii-güedé, te ndacóo-güedé, te nchaa ñáyiu na quini sá ndótó-güedé te yúhú vñí-yu.

¹² Te ndi ndúú cue tée-ánⁿ tecú dóho-güedé cáháⁿ ñⁿ sá cáháⁿ ndéé andiu, te cùñaha-xi xii-güedé:

—Chí táquene iha —duha cùñaha sá cáháⁿ-ánⁿ xii-güedé.

Te cue tée-ánⁿ quíhu-güedé ñⁿ xití vícò caa-güedé andiu, te nchaa ñáyiu cùu úhú

iní ñáhá xii-güedé quini ñáhā-yu xii-güedé caa-güedé andiu.

¹³ Te òrè-ánⁿ nihi vihi tnáa ñuyúú, te úxi xichi cùu-xi ñúú núú cùndècu-güedé-ánⁿ te ñⁿ xichi ñúú-ánⁿ naa, te cuú úsá míl ñáyiu, te nchaa dava-gá ñáyiu cácu vā cúú yúhú vñí-yu, te cachí-yu sá ío cahnú cuu Yá Ndióxi Yáá ndécú andiu.

¹⁴ Te tnúndòho-a cuu-xi tnúndòho cuu úú yáha, te vitna sa ndètu vñí-nā tucu sáá tnúndòho cuu úní.

Espiritú cúú úsá tìu-xi cútú nèhé-xí

¹⁵ Te espíritu cúú úsá ní tiú-xi cútú nèhé-xí, te òrè-ánⁿ ní tecú níhi ní cáháⁿ titní sá ní cáháⁿ andiu, te càchí-xi:

Nchaa sá cúú cuèndá nchaa ñáyiu ñuyúú táxi tnúni-yu ní cùu ní nduu cuèndá Tātá-ó Dútú Ndióxi táxi tnúni-gá, Te tnàhá Yáá ní tendaha-gá ní sáháⁿ ñuyúú táxi tnúni-gá nchaa xiáⁿ,

te diu-gá taxi tnúni-gá ní caa ní quíhíⁿ. Duha ní cáháⁿ nchaa sá ní cáháⁿ-án.

¹⁶ Te ndi ócò cúmi cue tée sacuéhé xínucóo núú xilè váha ní ngüññi xití-güedé núú Yá Ndióxi, te ní nuu núú-güedé ndàa núú ñuhú te ní ngüita-güedé chíññu ñaha-güedé xii-gá,

¹⁷ te càchí-güedé:

Ío ndacáⁿ táhú-ndí núú yòhò Dútú Ndióxi, Yáá ndácú quide nchaandi túhú sá váha, te diu-ni-n ndècu-n ndéé cùtnháá ní ngáva ñuyúú, te diu-ni-n ndècu-n vitna, te diu-ni-n cùndecu-n ndéé núú cuaháⁿ núú vèxi,

te ío cahnú cuu-n te ní ngüita-n ío-gá táxi tnúni-n.

¹⁸ Te nchaa ñáyiu xíndecu ñuyúú xícudéⁿ-yu núú-n,

te vitna ní sáá nduu dāndohó-n-yu chí ñā túú cùu váha iní-n núú-yu,

te cada ndáá-n cuèchi nchaa ñáyiu sa ní xihí, te ní sáá tucu nduu cuññaha-n sá ndúú táhú nchaa ñáyiu ní xinu cuechi ntúú-n ní cáháⁿ-yu tnúhu-n, ndihi nchaa dava-gá ñáyiu cùu cuèndá-n, chí ñáyiu-ánⁿ nèhé-yu sá yíññu núú-n,

te cuéi ñáyiu cùnuu ndihi ñáyiu ñā túú cùnuu cuññaha-n sá ndúú táhú-yu,

te ní sáá tucu nduu dānaa-n nchaa ñáyiu sàhni tnaha ñáyiu-xi.

Duha càchí ndi ócò cúmi cue tée sacuéhé-ánⁿ xáhaⁿ-güedé xii Yá Ndióxi.

¹⁹ Te ní xini-í ní nacaáⁿ yuyèhe vehe Yá Ndióxi andiu, te xití vehe-gá-ánⁿ ní xini-í ndécú cājá ñuhú sá yódo tnúni nàcuáa ní cundáá cada-gá sá cúú-xí ñáyiu, te òrè-ánⁿ ní xini-í ní sáá nduté, te ní cáháⁿ ñuhú te ío dusaⁿ ní quide-xi, te níhi vihi ní tnáa, te súuni cahnú dáú ñíñi ní cuuⁿ.

12

Cuèndá ìᵀ ñàdìhí ndìhì cuèndá ìᵀ quiti dééᵀ nánì dràgón

¹ Te ío vìhì ní quide-xi ìᵀ sá ní quide-xi andiù, te ní xini-í ìᵀ ñàdìhí te dóó ñihnú-áᵀ quide-xi datná quidé-xí núú nchìcanchì, te ndàa núú sàhá-aᵀ quide-xi datná quidé-xí núú yóó, te ñùhu ìᵀ coroná díquí-aᵀ te ndèé ùxúú chódínì.

² Te ñùhu déhe-aᵀ te càna saa-aᵀ sá quidé ùhú ñàhá-xí xii-aᵀ chí sa ndètu vii-nà cacu déhe-aᵀ.

³ Te dātñunì ní quide tucu-xi sá ní quide-xi andiù, te ní xini-í ìᵀ quiti càhnu quiti ticuehé, quiti dééᵀ nánì dràgón, te ndèé úsá díquí-dì ndìhì úxí ndiqui-dì, te ìᵀ caa coroná ñùhú ìᵀ caa díquí-dì-aᵀ.

⁴ Te quiti-áᵀ ìᵀ luha-ná te cuu dava nchaa chódínì dāngoyo-dì ñuyúú ndìhì lúhmá-dì, te quiti-áᵀ ñì ngúnu tñí-dì núú ñaha ndètu vii-nà cacu déhe-xi-áᵀ cuèndá caxi-dì déhe-aᵀ òrè cacu ní cùu.

⁵ Te ñaha-áᵀ ñì cacu déhe-aᵀ te téé cùu-dé, te té lìhli-áᵀ ìo cunuu-dé taxi tñunì-dé nchaa ñáyiù ñuyúú, te mee Yá Ndióxi ní nacuaa ñaha-gá xii té lìhli-áᵀ cuèndá cundecu ndìhì ñaha-dé xii-gá núú ndécú-gá táxi tñunì-gá.

⁶ Te ñàdìhí-áᵀ ñì xinu-aᵀ cuáháᵀ-aᵀ xití yucu núú ní quide túha Yá Ndióxi cundecu-aᵀ cuèndá xián ñihí-aᵀ caxi-aᵀ, te ducaᵀ ñihí-aᵀ sá caxi-áᵀ ùxúú cièndú únidico nduu chí ducaᵀ nduu cundecu-aᵀ xián.

⁷ Te sáta dúcáᵀ te andiù ní xini-í espíritú cúnúu xinu cuèchi núú Yá Ndióxi nánì Miguél, ndìhì nchaa dava-gá espíritú cúndìhì-xi, te nchaa espíritú-áᵀ nàá-xi ndìhì quiti dééᵀ nánì dràgón ndìhì nchaa espíritú cúndìhì-dì.

⁸ Te quiti-áᵀ ñà túú ní ndàcu-dì ndìhì nchaa espíritú cúndìhì-dì, te ñà túú ní ñihí-gá-dì núú cúndecu-dì andiù ndìhì nchaa espíritú cúndìhì-dì-aᵀ.

⁹ Te cue espíritú xínú cuèchi núú Yá Ndióxi-áᵀ ñì dāngává-xí quiti dééᵀ nánì dràgón-áᵀ ndìhì nchaa espíritú cúndìhì-dì ñuyúú, te quiti-áᵀ cùú-dí mèi sácuihná àdì sá càchí-ó cùu yucu ñávàha, te ñiù xián ní dāndàhú-xi ñáyiù ñihí ñuyúú, te ñiù-ni xián ní nduu-xi cóó ñì dāndàhú-xi ñáyiù ndéé sanaha.

¹⁰ Te ní tecu dóho-í ñihì ní cáháᵀ tucu ìᵀ sá ní cáháᵀ andiù, te càchì-xí:

—Vitna te Yá Ndióxi ní quide-gá ní ngúndecu ñáyiù ndìhì-gá, te ío càhnu cuu-gá, te ío tàxi tñunì-gá, te tñàhá Cristú Yáá ní tendaha Yá Ndióxi ní quixi ñuyúú-a ío tàxi tñunì-gá, te ducaᵀ chí sa ní xócuñí sácuihná sá sùúni núnúu sacáᵀ cuèchi núú Tātá-ó Dütú Ndióxi cuèndá nchaa ñáyiù ndècu ndìhì-o

ichi-gá, te nduu niú ducaᵀ sàcáᵀ cuèchi-xi núú-gá cuèndá-yu ní cùu.

¹¹ Dico ní ndacú-yu ní cunúu-yu núú sácuihná sá dúcáᵀ sàcáᵀ cuèchi cuèndá-yu-áᵀ ní cùu, te ducaᵀ ní cunúu-yu sá cuèndá Yáá cáá datná cáá ìᵀ mbéé quiti ní dāñicuehé-güedé, chí Yáá-áᵀ ñì sati ñihí-gá te ní xihí-gá sá cuèndá-yu, te ducaᵀ ní cunuu tucú-yu sá cuèndá sá sàndáá ñì ñàhá-yu xii Yáá-áᵀ, te ñà túú ní yùhú-yu cuú-yu sá cuèndá-gá.

¹² Te vitna ío chí cùdǐ ñì nchaa nchòhó espíritú xínú cuèchi núú Yá Ndióxi, ndìhì nchaa nchòhó ñáyiù ndècu andiù, dico ñndàhú ní cuu nchaa ñáyiù xīndecu ñihí ñuyúú! Chí sùúni cùdèéᵀ sácuihná ñì ngava-xi te nāndi cada ñaha-xi xii-yu, te ducaᵀ chí cūtnunì ñì-xi sá sácú duha-ná nduu cudí-xi cundecu-xi —duha càchí sá ní cáháᵀ andiù.

¹³ Te sáta ní quee quiti dééᵀ nánì dràgón-áᵀ andiù ñì ngava-dì ñuyúú quiti cùu mèi sácuihná-áᵀ, te quiti-áᵀ ñì chinchicú-dì ñàdìhí ñaha ní cacu déhe téé-xi-áᵀ.

¹⁴ Te ñàdìhí-áᵀ ñì nduu tǎhú-aᵀ ní quene úú ndíxí-aᵀ, te càa datná cáá ndíxíᵀ ìᵀ yacòlo càhnu vihi cuèndá ndava-aᵀ ñùhú-aᵀ yucu núú ní cachí Yá Ndióxi cundecu-aᵀ, te yàcáᵀ cundecu-aᵀ ùni cuíá dava cuèndá sá vǎ ñihí ñàhá quiti dééᵀ quiti nāni dràgón-áᵀ te xián ñihí-aᵀ sá caxi-áᵀ, te quiti-áᵀ cùú tucu-dì datná ìᵀ cóó dééᵀ.

¹⁵ Te quiti-áᵀ ñì quene cuéhé ndute yuhu-dì, te ndute ní quene yuhu-dì-áᵀ ñì cuu-xi ìᵀ yúte, te ducaᵀ ñì quide-dì cuèndá ndute-áᵀ cuido-xi ñàdìhí-áᵀ ní cùu.

¹⁶ Te ñùhu yìchí ní chindee-xi ñàdìhí-áᵀ, chí ní ndátá te ñì quee naa-ni ndute ní quene yuhu quiti-áᵀ.

¹⁷ Te sá dúcáᵀ ñì quide-xi xián ní cudééᵀ víhì quiti-áᵀ núú ñàdìhí-áᵀ, te ní xica-dì cuáháᵀ-dì núú xīndecu nchaa dava-gá cue déhe ñàdìhí-áᵀ cuèndá nàa ndiàhì ñaha-dì, te ñáyiù-áᵀ cùú-yu ñáyiù tñí nchaa tñuhu càháᵀ Yá Ndióxi, te nchicúᵀ ñihnú-yu nchaa tñuhu sá càháᵀ váha cuèndá Xítòhó Jesucristú.

13

Cuèndá úú quiti

¹ Te yùhú ní ngúnu tñí-í yuhu làmár, te ní xini-í ní quene ìᵀ quiti te ndèé úsá díquí-dì te úxí ndiqui-dì, te núú ìᵀ ñì ndiqui-dì-áᵀ ndécú ìᵀ caa coroná. Te ìᵀ ñì díquí-dì-áᵀ ndéé tñuhu sá cáháᵀ úhú-xi cuèndá Yá Ndióxi.

² Te quiti-áᵀ cáá-dí datná cáá cuñí, te sáhá-dì càa datná cáá sáhá óso, te yuhu-dì càa datná cáá yùhu ndicaha. Te quiti dééᵀ nánì dràgón ñì sǎnaha-dì tñuhu ndee ñì xii quiti-áᵀ cuèndá taxi tñunì víhì-dí, te dràgón-áᵀ ñì sǎñaha-dì núú ndécú-dí tàxi

tnuní-di xii quití ní quene xítí lámár-án, te ducaⁿ ní quide-di cuendá sá nihí ndéé quití-án cunuu-di.

³ Te ñⁿ díquí quití ní quene xítí lámár-án cáhú víhí cãa ní nícuèhé, te sa ndètu vii-nã cuú-di sãnuu dico ní ndúha-di, te nihí ñuyú ní nihí ñáyiu tnúhu sã dúcãⁿ ní cuu, te ío ní cuñúhu-yu te ní tuhá-yu quití-án.

⁴ Te nchaa ñáyiu-án ní cachí-yu sã ío cãhnu cuu quití dééⁿ quití ñãni dragón-án cuendá sã ní sãñaha-di tnúhu ndee ñí sá táxí tnuní quití ní quene xítí lámár-án, te ní ngúta-yu ní chiñuhú-yu quití ní quene xítí lámár-án, te cachí-yu:

—Vã yõo ñⁿ nũtnahã ñáhã xii quití-a, te ní vã yõo ñⁿ ndacu naã ndihi ñaha xii-di — cachí-yu.

⁵ Te ní níhí-di tnúhu ndee ñí sã cãháⁿ úhú-di Yã Ndiõxí, te cada cãhnu-di mee-di, te údico úú yóo ducaⁿ ní níhí-di tnúhu ndee ñí-án cunuu-di.

⁶ Te ducaⁿ ní quide-di ní cãháⁿ úhú-di Yã Ndiõxí ndihi cuendá nchaa sã quidé-gã, te ñiu-ni ducaⁿ ní cãháⁿ úhú-di núu ndécú-gã, te ní cãháⁿ úhú tucu-di nchaa ñáyiu ndècu ndihi-gã andiu.

⁷ Te ducaⁿ ní níhí-di tnúhu ndee ñí sã naã-di ndihi nchaa ñáyiu cùu cuendá Yã Ndiõxí, te ducaⁿ naã ndihi ñaha-di xii-yu ndéé òré vã ndácú-gã-yu naã ndihi ñáhã-yu xii-di, te tnãhá ní ngúndecu ndihi-di tnúhu ndee ñí sã táxí tnuní-di ñáyiu nchaa ñacióⁿ, ndihi ñáyiu nchaa ñuú, ndihi nchaa ñáyiu cãháⁿ ndí dííⁿ ndí dííⁿ núu tnúhu, ndihi ñáyiu xíndecu nchaa xíchi.

⁸ Te cue ñáyiu nihí ñuyú ní cachí-yu sã ío cãhnu cuu quití-án, te ñáyiu-án cuú-yu ñáyiu ñã túú yòdo tnuní núu tütú Yaa cáá dàtnã cáá ñⁿ mbéé quití ní dãnícuehé-güedé Yaa ní xihí ní cùu te ní ndoto. Te ndéé cùnãhá ní ngáva ñuyú sa yòdo tnuní ñáyiu naníhí tãhú, dico ñáyiu cãchí sã ío cãhnu cuu quití-án ñã túú yòdo tnuní-yu núu tütú-gã.

⁹ Te nchaa nchòhó ñáyiu xíndedóho chí cündedóho vãha nchaa ñacuãa cuáhãⁿ tnúhu-án.

¹⁰ Te nchaa ñáyiu na chihí tnaha ñáyiu-xi vecaá te sáá nduu te quíhíⁿ-yu tnãhá-yu vecaá, te nchaa ñáyiu sãhni tnaha ñáyiu-xi ndihi yuchí te ñiu-ni ndihi yuchí cuú-yu tnãhá-yu, te xiãⁿ núu ío xini ñuhu-xi sã nchãá ñáyiu cùu cuendá Yã Ndiõxí cunduu cãhnu ñi-yu, te quindáá ñí ñáhã-yu xii-gã.

¹¹ Te ní xini tucu-í ingá quití ní quene-di núu ñuhu yíchi, te ndéé úú ndíqui-di te cãa datná cáá ndíqui canerú, te cãháⁿ-di dàtnã cãháⁿ quití dééⁿ naní dragón.

¹² Te dàtnã ndécú ndihi quití ní quene xítí lámár-án tnúhu ndee ñí sã táxí tnuní-di ducaⁿ ndècu ndihi quití ní quene ñuhu

yíchi-án tnúhu ndee ñí taxi tnuní-di cada-di núu quití ní quene xítí lámár-án, te quití ní quene ñuhu yíchi-án ní quide yica-di sã nchãá ñáyiu xíndecu nihí ñuyú chiñuhú-yu quití ní quene xítí lámár-án, quití cãhú víhí ní tnahã ní nícuèhé te ní ndúha-di.

¹³ Te quití ní quene xítí ñuhu yíchi-án ní quide-di titní núu sã vã yõo tnãhí ndacu cada, te nchaa ñáyiu ní xini-yu sã ndéé andiu ní dãngóyó-di ñùhú ñuyú.

¹⁴ Te sã dúcãⁿ ní ngúndecu ndihi-di tnúhu ndee ñí ní quide-di nchaa xiãⁿ ní quide-di núu quití ní quene xítí lámár-án, te sã dúcãⁿ ní quide-di te xiãⁿ ní dándàhú-di nchaa ñáyiu xíndecu nihí ñuyú, te ní xáhaⁿ-di xii-yu sã ndúcú-yu ñⁿ sã cãdúha-yu ñacuãa-ni cãa nacuãa-ni nduu quití ní quene xítí lámár-án, quití cãhú víhí ní tnahã ní nícuèhé díquí-xi-án ní quée machití te ñã túú ní xihí-di chí ní xíndecu-ni-di.

¹⁵ Te quití ní quene xítí ñuhu yíchi ní ngúndecu ndihi tucu-di tnúhu ndee ñí sã chíhí-dí ñí sã ní cadúha-yu-án, sã ní natavã-yu dàtnã cáá quití ní quene xítí lámár-án, te ducaⁿ ní quide quití-án cuendá cãháⁿ sã ní cadúha-yu-án, te xiãⁿ cada-xi cuú nchaa ñáyiu ñã túú ní cùní chiñuhu ñaha xii-di.

¹⁶ Te quití ní quene xítí ñuhu-án quidé-dí sã nchãá ñáyiu ngúndéé ñⁿ tnuní ndaha cùhá-yu àdi tneé-yu, te ducaⁿ ní quide-di cuéi ñáyiu cùnuu te cuéi ñáyiu ñã túú cùnuu, te cuéi ñáyiu cuica te cuéi ñáyiu ndàhú, te cuéi ñáyiu ñã túú dàñã quée núu chíúⁿ pãtróóⁿ-xi, te cuéi nchaa ñáyiu dàñã quée núu chíúⁿ pãtróóⁿ-xi nchaa-yu ducaⁿ ní ngúndéé tnuní ñi-yu.

¹⁷ Te ní quide-di sã nchãá ñáyiu ñã túú ndéé tnuní ñi-xi vã cuú cuããⁿ-yu sã cãchí ñi-yu te ní vã cuú dicó-yu ñⁿ sã cùní-yu dicó-yu, te tnuní-án cuú-xi ñi quití ní quene xítí lámár-án àdi número-di.

¹⁸ Te xini ñuhu-xi sã nchãá ñáyiu ío vãha cùtnuní ñi-xi ío vãha cuãha-yu cuendá ñacuãa quèe-xi número quití-án, te número-án cuú-xi ñi cìendú úndico ñiⁿ, te cùu-xi cuendá ñⁿ ñáyiu ñuyú.

14

Cuendá ñⁿ cìendú údico cúmí mĩ ñáyiu

¹ Te sãtã dúcãⁿ te ní xini-í Yaa cáá dàtnã cáá ñⁿ mbéé quití ní dãnícuehé-güedé nũtnã-gã ñⁿ yucu ñuú naní Sión ndécú andiu, te nutrã-gã ndihi ñⁿ cìendú údico cúmí mĩ ñáyiu, te tneé-yu ndéé ñi-gã ndihi ñi tãtã-gã Dútú Ndiõxí.

² Te ní tecú dóho-í ní quide-xi andiu dàtnã quidé-xi núu xicã cuéhé víhí ndüte, te quide tucu-xi datná quidé-xi òré níhí víhí cãháⁿ

ñuhu, te guide tucu-xi datná quidé-xí òrè cuèhé víhí ñáiyu càní-yu àrpá.

³ Te ní tecú dóho-í xíxita yuhu sá xítá yùhu núú Yáá núcõo núú xilé váha, ndihí núú ndi cùmí cue quití xínutñí-án, ndihí núú ncháa cue téé cùu sacuéhé xínucõo-án, te xíxita-xi ìñ ndudú sáá. Te mee-ni cuè ñáiyu ìñ cièndú údico cùmí ml-án quèe díquí-yu ndudú-án, te ñáiyu-án cùú-yu ñáiyu ní dácacu nihnu ñaha Yáá cáá dàtná cáá ìñ mbéé quití ní dánícuèhé-güedé núú ñáiyu ndècu ichi cuèhé ichi duha xíndecu ñuyúú, te vá yõ ìñ-gá quèe díquí-xi ndudú sáá-án chi mee-ni ñáiyu ní cácu nihnu-án quèe díquí-yu.

⁴ Te ñáiyu ní cácu nihnu-án cùú-yu ñáiyu ñá túú ní xíndecu ichi díí ìní, te cùú-yu ñáiyu càndoo canine ìní-xi, te ndèní ní cuu cuahán Yáá cáá dàtná cáá ìñ mbéé quití ní nícuèhé-án, te duca-ni ndèndaha ñahá-yu xii-gá cuahán, te ñáiyu-án ní cácu nihnú-yu núú ncháa ñáiyu ñuyúú, ñáiyu ndècu ichi cuèhé ichi duha, te ñáiyu ní cácu nihnu-án cùú-yu ñáiyu díhna nuu ní nduu táhú Yá Ndiõxí cuu cuèndá-gá ndihí Yáá cáá dàtná cáá ìñ mbéé quití ní dánícuèhé-güedé.

⁵ Te cùú-yu ñáiyu ñá túú càhán ìñ ññ trñhu ndehnde, te càndoo canine ìní-yu ndècú-yu núú núcõo Yá Ndiõxí táxi tñnì-gá.

Cuèndá úní cue espíritu xínú cuèchi núú Yá Ndiõxí

⁶ Te sátá dúcáⁿ te ní xiní-í ìñ espíritu xínú cuèchi núú Yá Ndiõxí xicó-xí cuádava andiu, te ndècu ndihí-xi trñhu sá càhán nàcuáa naníhí tãhú-ó, trñhu sá ñá túú trñhí ndihí nihnu te trñhu-án danèhé espíritu-án ncháa ñáiyu ndècu ñuyúú, ñáiyu ncháa nacióⁿ, ndihí ñáiyu ncháa ñuú, ndihí ncháa ñáiyu càhán núú dííⁿ ndí dííⁿ núú trñhu, ndihí ñáiyu xíndecu ncháa xichi.

⁷ Te níhí ní càhán-xi te càchí-xi:

—Ncháa nchòhò ñáiyu ndècu ñuyúú canehe-ndo sá yíññhu núú Yá Ndiõxí, te cachí-ndó sá ìo càhnu cuu-gá chi sa ní sáá nduu càda ndáá-gá ncháa cuèchi-ndo, te chiññhu-ndo-gá chi ñu-gá ní cadúha-gá andiu, ndihí ñuhu yìchi, ndihí làmár, ndihí ncháa ndóhoyo —duha càchí espíritu-án.

⁸ Te nchicúⁿ tucu ingá espíritu xínú cuèchi núú Yá Ndiõxí, te càchí-xi:

—Vitna ní naa ñuú Babiloniá ñuú ìo cùnuu, te ducaⁿ ní naa chi cue ñáiyu ñuú-án ní guide-yu ní xíta nihnu ncháa ñáiyu nihí ñuyúú, chi ní sanu ichi ñahá-yu ichi cuèhé ichi duha —duha càchí espíritu-án.

⁹ Te nchicúⁿ tucu ingá espíritu xínú cuèchi núú Yá Ndiõxí te níhí càhán-xi, te càchí-xi:

—Ncháa ñáiyu chiññhu ñaha xii quití ní quene xití làmár, ndihí sá ní natava ñahá-yu

nàcuáa càa-di-án, ñáiyu ní dáñá mèe-xi ní ngúndéé tñnì ndahá-yu àdi tneé-yu,

¹⁰ ñáiyu-án súñní dàndoho ñaha Yá Ndiõxí xii-yu chi ìo cùdèéⁿ-gá, te ducaⁿ ìo dàndoho ñaha-gá xii-yu chi daquihíⁿ ñahá-gá xii-yu núú ñùhú núú ñùhú àzufréè càyú-xi, te núú cuè espíritu xínú cuèchi núú-gá ducaⁿ dàndoho ñaha-gá xii-yu, ndihí núú Yáá cáá dàtná cáá ìñ mbéé quití ní dánícuèhé-güedé.

¹¹ Te ní caa ní quíhíⁿ quene ñùhmá núú dúcáⁿ cùndecú-yu ndohó-yu-án, te cuèí nduu cuèí núú ducaⁿ ndohó-yu. Te ducaⁿ ndòho ncháa ñáiyu chiññhu ñaha xii quití ní quene xití làmár, ndihí sá ní natava ñahá-yu nàcuáa càa-di-án, te ñu-ni ñáiyu-án cùú-yu ñáiyu ní ngúndéé tñnì ndaha-xi àdi tneé-xi —duha càchí espíritu-án.

¹² Te xíáⁿ xiní ñùhu-xi sá ncháá ñáiyu cùu cuèndá Yá Ndiõxí cunduu càhnu ìní-yu, chi ñu-ni-yu cùú-yu ñáiyu tññ ncháa trñhu càhán-gá, te ní yùhu ní ìní-yu sàndáá ìní-yu Xitohó Jesucristú.

¹³ Te sátá dúcáⁿ te ní tecú dóho-í ní càhán ìñ sá ní càhán andiu, te càchí-xi:

—Chido tñnì-n ìñ núú túú nàcuáa na càhán-í-a. “Není vitna ìo váha táhú ncháa ñáiyu sàndáá ìní trñhu Xitohó Jesucristú te xihí-yu” —duha càchí sá ní càhán-án.

Te Espíritu Yá Ndiõxí ní càhán-xi, te càchí-xi:

—Ndáá, chi ndetatú-yu chi ñá túú-gá nágá chiⁿ ndohó-yu cadá-yu, te Yá Ndiõxí sa ñaha-gá ncháa nàcuáa ndùu chiⁿ ní quidé-yu —duha càchí Espíritu-gá.

Ncháa sá cùú núú ñùhú

¹⁴ Te sátá dúcáⁿ te dàtnnú ní xiní-í ìñ vícò cuixíⁿ, te núú vícò-án ní xiní-í núcõo ìñ Yáá, te càa-gá dàtná cáá ìñ téé ñuyúú, te díquí-gá ñùhú ìñ coroná ní cuáha mee-ni díhúⁿ cuááⁿ, te nùndaha-gá ìñ yuchí ndíquí te súñní dèéⁿ.

¹⁵ Te ní xiní-í ìñ espíritu xínú cuèchi núú Yá Ndiõxí ní quèe-xi xití vehe-gá, te níhí ní càhán-xi xáhaⁿ-xi xii Yáá núcõo núú vícò-án.

—Sa ní cuu nàquehndé-n ncháa sá ní cuu ñuyúú ndihí yuchí ndíquí-n, chi sa ní cuu núcõo trñaha-xi —duha càchí espíritu-án xáhaⁿ-xi xii Yáá-án.

¹⁶ Te Yáá núcõo núú vícò-án ní dáyaha ndodo-gá yuchí ndíquí-gá núú ñuyúú ní nataxi trñaha-gá ncháa sá ní cuu.

¹⁷ Te ní xiní tucu-í ingá espíritu xínú cuèchi núú Yá Ndiõxí ní quèe-xi xití vehe-gá sá cáá àndiu, te nùndaha-xi trñahá-xi ìñ yuchí ndíquí dèéⁿ.

¹⁸ Te ní xiní tucu-í ní quèe tucu ingá espíritu xínú cuèchi núú Yá Ndiõxí núú nùtní núú sácódó sá ndúú tãhú-gá, te ndècu ndihí-xi trñhu ndee ìní táxi tñnì-xi ñùhú,

te espíritú-án níhi ní cáháⁿ-xi xáhaⁿ-xi xii espíritú néhé yùchí ndíquí dēéⁿ-áⁿ:

—Ngúita naquehndé-n ndihi yuchi ndíquí-n ndéhé yoho yàha stilé sá ío ñyúyú chí sa ní cuu nàtehndé —duha càchí espíritú-án xáhaⁿ-xi xii espíritú néhé yùchí ndíquí-áⁿ.

19 Te espíritú néhé yùchí ndíquí-áⁿ ní dáyàha ndodo-xi yuchi ndíquí-xi núú ñyúyú ní nàquehndé-xi nchaa ndéhé yoho yàha stilé, te ní chíhi-xi ìⁿ xichi núú ní chíhi-xi cuèndá xiáⁿ quihni-xi quee nudú-xi, te sá dúcáⁿ ní quide-xi xiáⁿ cútñuní iní-ó sá ío cùdéeⁿ Yá Ndióxi núú ñáyú ñyúyú.

20 Te ndéhé yoho yàha stilé-án ní quihni-xi ìⁿ xio yuhu ñúú, te ndudí ndéhé yoho yàha stilé-án ní nduu-xi níñí te ní quee-xi núú quíñi ñihnu espíritú-án. Te úní cièndú mǐl mǐtrú ní xica níñí-áⁿ, te dàtná ìⁿ mǐtrú dava ní sáá cuehnu níñí-áⁿ ní xica-xi.

15

Úsá tnúndòho

1 Te ío víhi ní quide-xi ìⁿ sá ní quide-xi andiu te ní cuñúhu víhi-í, te ní xini-í úsá tnàhá espíritú xínú cuèchi núú Yá Ndióxi, te ìⁿ ìⁿ cue espíritú-án ndécú ndíhi-xi tnúhu ndee iní dandòho-xi ñáyú ñyúyú, te nà yàha nchaa tnúndòho-áⁿ, te vá cùdéeⁿ-gá Yá Ndióxi núú-yu dándoho ñaha-gá xii-yu.

2 Te ní xini-í ìⁿ lámár te ndute lámár-áⁿ cáá dàtná cáá vidriú, te dàcánuu-xi ndíhi ñúhu, te yuhu lámár-áⁿ xínutñí nchaa ñáyú ní ndacu ní dáqueé tǐhú ñáhá xii quiti ní quene xití lámár-áⁿ, te ducaⁿ ní ndacu-yu ní dáqueé tǐhú-yu sá ní natava ñáhá-yu nàcuá càa-di-áⁿ, te ducaⁿ ní ndacu tucú-yu ní dáqueé tǐhú tucú-yu númerú-di sá cúú dàtná diu-di, te nchaa ñáyú-áⁿ ní nduu táhú-yu núú Yá Ndióxi àrpá xínehé-yu cuèndá caní-yu.

3 Te xixitá-yu ndudú sá ní xita ndí Moisés ndí ní xinu cuechi núú Yá Ndióxi ndéé sanaha, te xita tucú-yu ndudú Yá cáá dàtná cáá ìⁿ mbéé quiti ní dánícuèhé-güedé, te càchi-yu:

Yòhó Dútú Ndióxi ío càhnu cuu-n, chí quide-n nchaa sá vá yòo tnàhi ndàcu cada, te cùu-n Yáa ndácú quide nchaandi túhú sá vàha,

te ío ndáá quidé-n te ío ndáá càháⁿ-n, te yíndaha-n nchaa ñáyú nihí ñyúyú.

4 Te nchaa ñáyú nèhé-yu sá yíñuhu núú-n, te ncháa-yu càchi-yu sá ío càhnu cuu-n, chí ìⁿ dǐi ní yòhó cúú-n Yáa ío vàha quide ndáá,

te nchaa ñáyú nihí ñyúyú nataká-yu chíñuhu ñáhá-yu xii-n,

te ducaⁿ càdá-yu chí ndèhé-yu nchaa sá vàha quide-n.

Duha càchí ñáyú-áⁿ xixitá-yu.

5 Te sáta dúcáⁿ te ní xini-í ní nacaáⁿ yuyèhe vehe Yá Ndióxi andiu, te xití vehe-gá-áⁿ ndécú sá ndéè tnúhu-gá.

6 Te xití vehe-gá-áⁿ ní quee úsá tnàhá espíritú xínú cuèchi núú-gá, te ìⁿ ìⁿ-xi ndécú ndíhi-xi tnúhu ndee iní dandòho-xi ñáyú, te xixihnu-xi mee-ni dóó vàha, te súni vàha càndoo, te chàhñchí, te yidúcuⁿnuu cinchú ní cuáha mee-ni dǐhúⁿ cuááⁿ pèchú ndi úsá cue espíritú-áⁿ.

7 Te ìⁿ quiti cúmi xínutñí núú núnñí xilé vàha ní sáñaha-di ìⁿ caa sá nàhá tícuú ní cuáha mee-ni dǐhúⁿ cuááⁿ xii ìⁿ ìⁿ espíritú-áⁿ, te xití nchaa tícuú-áⁿ ñúhú ìⁿ sá ñúhú te xiáⁿ cútñuní sá Yá Ndióxi dandòho-gá ñáyú ñyúyú, te diu-gá cúú-gá Yáa ndécú nchaa nduu nchaa quíú.

8 Te xití vehe-gá-áⁿ ní chítú ñúhmá, te ducaⁿ ní quide-gá cuèndá cútñuní iní ñáyú sá ío càhnu cuu-gá táxi tnúni-gá, te vá yòo ìⁿ cuu quíhu xití vehe-gá-áⁿ ndéè ndíhi ndi úsá tnúndòho cada ndi úsá cue espíritú-áⁿ ñyúyú.

16

Tnúndòho cada-xi ñyúyú

1 Te sáta dúcáⁿ te ní tecú dóho-í níhi ní cáháⁿ ìⁿ sá ní cáháⁿ xití vehe Yá Ndióxi, te xáhaⁿ-xi xii ndi úsá cue espíritú-áⁿ:

—Chí cuáháⁿ coyo-ndo sá ñúhú xití nchaa tícuú néhé-ndó-áⁿ núú ñyúyú, chí sá ñúhú-áⁿ cúú-xi tnúndòho tendaha Yá Ndióxi sá cúú-xi nchaa ñáyú ñyúyú —duha càchí sá càháⁿ-áⁿ.

2 Te espíritú díhna ní sáháⁿ-xi ní coyo-xi sá ñúhú xití tícuú néhé-xi-áⁿ ñyúyú, te nchaa ñáyú ñúhu tnuní quiti ní quene xití lámár ñáyú ní chíñuhu sá ní natava ñáhá-yu xii-di, nchaa ñáyú-áⁿ ní quené-yu ndíhiyí tèhyú te súni dándoho ñaha-xi xii-yu.

3 Te espíritú cúú úú ní coyo-xi sá ñúhú xití tícuú néhé-xi núú lámár, te ndute lámár-áⁿ ní nduu-xi níñí te càa-xi dàtná cáá níñí ñáyú sa ní xíhí, te nchaa quiti ñúhu xití lámár-áⁿ ní xíhí-güedi.

4 Te espíritú cúú úní ní coyo-xi sá ñúhú xití tícuú néhé-xi nchaa yúte ndíhi nchaa núú quèñihni ndute, te ndute nchaa yúte-áⁿ ndíhi nchaa ndute quèñihni-áⁿ ní nduu-xi níñí.

5 Te sáta dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndióxi, espíritú yíndaha ndute, te xáhaⁿ-xi xii Yá Ndióxi:

—Yòhó Dútú Ndióxi cúú-n Yáa quidé ndáá cuiti núu duha quide-n tendaha-n tnúndòho-a, te diu-ni-n cùu-n Yáa ndécú ndéè cútñáhá ní ngáva ñyúyú, te diu-ni-n

cùu-n Yaá ndécú vitna te ñá túú tnàhí cuéchi-n.

⁶ Chi cue ñáyiú ñuyúú ní dácacá-yu níñi nchaa ñáyiú ní cáháⁿ tnúhu-n ndihi nchaa dava-gá ñáyiú cùu cuendá-n, te ní sahní-yu nchaa ñáyiú-áⁿ, te vitna ní dátíu-n ndüte ní nduu-xi níñi te ducaⁿ-ni cáa ndute-áⁿ xihí-yu, te ducaⁿ tàù-xi ndohó-yu cuendá sá ní sahní-yu cue ñáyiú cùu cuendá-n —duha càchí espíritú-áⁿ xáhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ní cáháⁿ núú nùtná núú sácódo sá ndúú táhú Yá Ndióxi, te xáhaⁿ-xi xii-gá:

—Ndáá sá yòhó Dútú Ndióxi Yaá ndácú quide nchaandi túhú sá váha dándoho-n ñáyiú nàcuáa tàù-xi cunduu —duha càchí sá cáháⁿ-áⁿ xáhaⁿ-xi xii-gá.

⁸ Te espíritú cúú cùmí ní coyo-xi sá ñúhú xití tícúú néhé-xí núú nchíanchii cuendá nchíanchii-áⁿ cahmí-xi nchaa ñáyiú ñuyúú.

⁹ Te nchaá-yu ní ndoho vihi-yu ní cáyú-yu, te cuéi ducaⁿ ní ndohó-yu dico ñá túú ní cùiní-yu ndixi cuéchi iní-yu cuendá nchaa sá ñá túú váha quidé-yu, te ní ñá túú ní càchí-yu sá ío càhnu cuu Yá Ndióxi chi da ní cáháⁿ úhú-yu cuendá-gá, te diu-gá cúú-gá Yaá ducaⁿ ní tendaha tnúndòho-áⁿ sá cúú-xí-yu.

¹⁰ Te espíritú cúú ùhúⁿ ní coyo-xi sá ñúhú xití tícúú néhé-xí núú ndécú quiti ní quene xití lámár-áⁿ táxí tnúni-di, te nchaa núú táxí tnúni-di ní cuu nee, te nchaa ñáyiú ñuyúú ndéé yáá-ná-yu nàcaxi nihnú-yu sá ndòhó-yu.

¹¹ Dico ní dùcaⁿ ñá túú ní cùiní-yu ñáñá-yu ní ìⁿ sá cuéhé sá dúhá quidé-yu, chi da ní cáháⁿ úhú-yu cuendá Yá Ndióxi Yaá ndécú àndiu sá cuendá sá dándòho ñaha ndíhyi tèhyú ndéé-yu-áⁿ ndihi nchaa dava-gá sá yáha-yu.

¹² Te espíritú cúú ìñú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-áⁿ ní yichí cuendá yáha cue téé yindaha ñáyiú xíndecu ndáa xio nacúaa quène nchíanchii.

¹³ Te ní xiní-í ní quee ìⁿ espíritú cùndíhi yucu ñáváha yuhu quiti dééⁿ nání dragón, te ní xiní tucu-í ní quee tucu ingá espíritú cùndíhi yucu ñáváha yuhu quiti ní quee tucu ingá espíritú cùndíhi yucu ñáváha yuhu téé dándahú ñáyiú càchí sá cáháⁿ tnúhu Yá Ndióxi te ñá ndáa, te ndi nùni espíritú-áⁿ xíndáa-xi dàtná cáá làhvá.

¹⁴ Te ndi nùni espíritú-áⁿ quidé-xí sá vǎ yǎo tnàhí ndàcu cada, te xica datacá-xi nchaa cue téé yindaha ñaha xii ñáyiú xíndecu nihí ñuyúú cuendá nàá-güedé mei nduu cachí Yá Ndióxi coo tnúndòho cahnu vihi-gá, te diu mee Yá Ndióxi cúú-gá Yaá ío càhnu cuu.

¹⁵ Te Yaá cúú Xítohó-ó ní cachí-gá: “Cunaha-ndo chi nduu ñá túú yíhi iní-ndó quixi-í núú ndécú-ndó, te cada-í dàtná quidé ñádúhú. Te váha táhú nchaa nchòhó ñáyiú xíndecu túha, chi cùu-ndo datná cue ñáyiú xíndecu túha xixihnu-ni dóo-xi cuendá sá vǎ cúcáhaⁿ núú-yu dàtná cúcáhaⁿ núú cué ñáyiú ñá túú nihnu dóo-xi, te duha cáháⁿ-í cuendá sá nchòhó cundecu túha-ndo òré quexio-í”, duha càchí-gá.

¹⁶ Te ndi nùni cue espíritú cùndíhi yucu ñáváha-áⁿ ní dátacá-xi nchaa cue téé yindaha ñaha xii ñáyiú, te ní taxi ndecu ñaha-xi ìⁿ xichi núú nání Àrmagedón, duha nani xiáⁿ tnúhu hèbreú.

¹⁷ Te espíritú cúú usá ní coyo-xi sá ñúhú xití tícúú néhé-xí núú tàchí, te ní tecú dóho-í níhi ní cáháⁿ Yaá núcóo núú xilé váha xití vehe-gá, te càchí-gá:

—Xéhé-ná cùmání te xínu cava nchaa tnúndòho tnúhu ndàhú —duha càchí-gá.

¹⁸ Te sátá dúcáⁿ te ní sátá ndúté te ní cáháⁿ ñúhu, te súuní dùsaⁿ ní quide-xi, te níhi vihi ní tnáa ñuyúú, te ndéé cùtnàhá ní ngúndecu ñáyiú ñuyúú te vátá ìⁿ xitò-gá níhi tnáa dàtná ní quide-xi.

¹⁹ Te ñúú cáhnu ío cùnuu nani Babiloniá ní quee dava-xi ní cuu-xi úní xichí, te nchaa ñúú cáá níhi ñuyúú ní ngoyo nchaa vehe, chi Yá Ndióxi ní ndacu iní-gá nchaa sá cuéhé sá dúhá quide nchaa ñáyiú ñúú Babiloniá-áⁿ, te ducaⁿ ní quide ñaha-gá xií-yu chi ío cudééⁿ-gá núú-yu.

²⁰ Te nchaa tindúú ní ndóñúhú-xí cuéi nchaa tindúú ñuhu yichí ndécú xití lámár.

²¹ Te ní xiní-í ní cuuⁿ ñíñi nàhnu vihi ní ngaundodo-xi cue ñáyiú ñuyúú, te nchaa ñíñi-áⁿ vèe-xi dàtná údico kílu, te cue ñáyiú ñuyúú ní cáháⁿ úhú-yu cuendá Yá Ndióxi sá dúcáⁿ ní dácúúⁿ-gá ñíñi nàhnu vihi-áⁿ, chi ní cuu-xi ìⁿ tnúndòho cahnu vihi sá cúú-xí-yu.

17

Ñadíhi ndécú ichi díi iní

¹ Te núú usá espíritú néhé tícúú-áⁿ, te ìⁿ-xi ní quixi-xi núú ndécú-í, te càchí-xi xii-í:

—Néhé ná quíhíⁿ-ó dānehé ñáhà-í xii-n nchaa tnúndòho sá ndóhó ñadíhi ñaha ndécú ichi díi iní, te ñaha-áⁿ cúnúu-aⁿ nucóo-aⁿ núú ñúhú vihi ndute.

² Te ñaha-áⁿ ndécú díi iní-aⁿ ndihi nchaa cue téé yindaha ñaha xii ñáyiú xíndecu nihí ñuyúú, te nchaa dava-gá ñáyiú ñuyúú ío iní-yu nchícuⁿ nihnú-yu quidé-yu nchaa nacúaa quide ñaha-áⁿ —duha càchí espíritú-áⁿ.

³ Te òré ducaⁿ quide ñaha Espíritú Yá Ndióxi xii-í nàcuáa càchí iní-xi, te ìⁿ espíritú xínú cuéchi núú-gá ndécá ñaha-xi xii-í cuáháⁿ ìⁿ xití yucu, te xití yucu-áⁿ ní xiní-í ìⁿ ñadíhi yódó-áⁿ ìⁿ quiti ticuehé, te ndéé

úsá díquí-di te úxí ndiqui-di, te nihí-di ndéé tñuní-di mee-ni tñúhu sá cáhá^a úhú cuendá Yá Ndióxi.

4 Te ñadihí-án níhnu-án dóó muradú ndihi dóó tícuéhé, te mee-ni sá ni cuáha díhúⁿ cuááⁿ, ndihi yúú váha sá nání pèrlá, ndihi nchaa dava-gá núú yúú váha, mee-ni ncháa xiáⁿ ní cuáha sá yíhí lóho-aⁿ, ndihi sá ñúhú dúcúⁿ-aⁿ, ndihi sá ñúhú dúcúⁿ ndáhá-án, te nundaha-aⁿ ñⁿ tícuú ní cuáha mee-ni díhúⁿ cuááⁿ te ñúhu mee-ni sá cuéhé sá dúhá, te xiáⁿ cútñuní iní-ó sá cúú-án ñⁿ ñadihí ñaha ndécu ichi cuéhé ichi duha.

5 Te tneé-aⁿ ndéé tñuní ñⁿ tñúhu, te cachí-xi: “Nuú Babiloniá ñúú ío cunuú, cada iní-ndó sá cúú-xí mèi ñadihí-a, te diu ñadihí-a cùu-aⁿ ñaha sanu ichi ñaha xii nchaa ñáyiu díhí ñáyiu ndécu ichi díí iní, te nándi-gá nchaa sá cuéhé sá dúhá sanu ichi-aⁿ nchaa ñáyiu cadá-yu”, duha cáháⁿ tñúhu ndéé tñuní tneé ñadihí-án. Te vá yóo tècú tñuní ná cuendá ducaⁿ cáháⁿ tñúhu-án.

6 Te ní cutñuní iní-í sá díú ñaha-án ní dácáca-án níñí ñáyiu cùu cuendá Yá Ndióxi ní sahní ñaha-aⁿ xii-yu, te ñáyiu ní xihí-án cùu-yu ñáyiu ní cáháⁿ váha cuendá Xitohó Jesucristú, te sá dúcáⁿ ní quide-aⁿ te ní nduu-aⁿ dátñá ñⁿ ñáyiu quihu. Te ío ní cuñúhu-í sá dúcáⁿ ní cuu ní xiní-í.

7 Te sáta dúcáⁿ te espíritu xínú cuèchi núú Yá Ndióxi-án cáchi tucu-xi xii-í:

—Vá ndéé dúcáⁿ cuñúhu-n, chi vitna na cáchi tñúhu-í xii-n nácuáa quèe-xi cuendá quiti ndéé úsá díquí-xi ndihi úxí ndiqui-xi-án, ndihi nácuáa quèe-xi cuendá ñadihí ñaha yódo ñaha xii-dí-án.

8 Te quiti ní xiní-n-án cúú-dí ñⁿ quiti sa ní xindecu te vitna ñá túú-gá-di ndécu, te sáá nduu te quene-di yaú cùnú víhí sá ío nèhé cáá, te dátñuní sáá nduu te quíhíⁿ-di núú ùhú núú ndáhú ní caa ní quíhíⁿ, te cue ñáyiu xindecu ñuyú cuñúhu víhí-yu quiti-án chí cùu-di ñⁿ quiti sa ní xindecu ní cùu te sáá nduu cùndecu tucu-di, te ñáyiu ducaⁿ cuñúhu ñaha xii-dí-án ñá túú yódo tñuní-yu núú tütú núú yódó tñuní cue ñáyiu naníhí tàhú, chí ndéé cútñahá vátá ngáva-gá ñuyú ducaⁿ sa yódo tñuní cue ñáyiu naníhí tàhú.

9 Te nchaa ñáyiu tècú tñuní xini ñuhu-xi caní váha iní-yu cuendá tñúhu-a. Te ndi úsá díquí quiti-án cada iní-ó sá cúú-xí úsá tñdúú núú núcúo ñadihí-án.

10 Te ndi úsá díquí quiti-án cada iní-ó sá cúú-xí úsá tñahá cue téé yíndaha ñaha xii ñáyiu, te úhúⁿ cue téé-án ñá túú-gá cùnúu-güedé vitna, te ñⁿ téé-án cùnúu-dé vitna te ingá-dé vátá sáá-gá nduu cùnúu-dé, te na sáá nduu dùcaⁿ cunuú-dé te sacú-ni nduu cunuú-dé.

11 Te quiti ní xindecu ní cùu te ñá túú-gá-di ndécu vitna, cùu-di datná téé cùu uná yíndaha ñaha xii ñáyiu, te ñⁿ-ni cùu-di ndihi cue téé úsá yíndaha ñáyiu-án, te quiti-án sáá nduu cuíta nihnu-di quíhíⁿ-di núú ùhú núú ndáhú ní caa ní quíhíⁿ.

12 Te ndi úxí ndiqui quiti-án cada iní-n sá cúú-xí úxí tñahá cue téé quíndaha ñaha xii ñáyiu, dico vátá sáá-gá nduu cùnúu-güedé quíndaha ñaha-güedé xii-yu. Te cue téé-án níhí-güedé tñúhu ndee ímí taxi tñuní-güedé ndihi quiti-án, dico tñaa-ni taxi tñuní-güedé ndihi quiti-án.

13 Te ndi úxí cue téé-án cuu ñⁿnuu-güedé taxi tñuní-güedé, te chindee-güedé quiti-án cuendá cuu ñⁿnuu-güedé ndihi-di cuendá taxi tñuní-gá-di.

14 Te cue téé-án nàá-güedé ndihi Yaá cáá dátñá cáá ñⁿ mbéé quiti ní dánícuéhé-güedé dico vá ndácú-güedé nàá-güedé ndihi-gá chí cuíta-güedé. Te diu-gá cúú-gá Yaá ío cùnúu taxi tñuní cuèi nchaa téé yíndaha ñaha xii ñáyiu, te ducaⁿ-ni tàxi tñuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáyiu cùndecu ndihi Yaá cáá dátñá cáá ñⁿ mbéé quiti ní dánícuéhé-güedé-án, te diu-ni ñáyiu-án cúú-yu ñáyiu ní cáháⁿ-gá te cùu-yu ñáyiu quide ndáá ndécú ichi-gá —duha cáchi espíritu xínú cuèchi núú-gá.

15 Te ní cachí tucu espíritu-án xii-í:

—Ndute ñúhu núú núcúo ñadihí ñaha ndécu ichi díí iní-án, ndute-án cada iní-n sá cúú-xí ñáyiu nchaa nacióⁿ, ndihi ñáyiu nchaa ñúú, ndihi ñáyiu xindecu nchaa xichi, ndihi ñáyiu cáháⁿ ndí dííⁿ ndí dííⁿ núú tñúhu.

16 Te dátñá ní cachí-í sá ndi úxí ndiqui quiti ní xiní-n-án cúú-xí úxí tñahá cue téé quíndaha ñaha xii ñáyiu, te cue téé-án cuu úhú iní-güedé ñadihí ñaha ndécu ichi díí iní-án, te ní vā cadá cuendá ñahá-gá-güedé xii-aⁿ, te ndada ndáhú ñahá-güedé, te dacáchi ñaha-güedé xii-aⁿ, te cahmí ñaha-güedé.

17 Te mee Yá Ndióxi ducaⁿ dàcaháⁿ-gá iní cue téé-án cuendá cada-güedé nácuáa cuní méé-gá, te xiáⁿ núu cuu ñⁿnuu-güedé cuendá cúñaha-güedé xii quiti-án cada-di núú-güedé taxi tñuní-di, te ducaⁿ-ni càda-di núú-güedé taxi tñuní-di ndéé ná sáá nduu càda Yá Ndióxi nácuáa ní cachí-gá.

18 Te ñadihí ñaha ní xiní-n-án cada iní-n sá cúú-án ñúú cáhnú ñúú ío cunuú, te ñúú-án ndécú téé ío-gá cùnúu taxi tñuní nchaa cue téé yíndaha ñaha xii ñáyiu xindecu ñuyú —duha ní cachí espíritu xínú cuèchi núú Yá Ndióxi xii-í.

18

Ní naa ñúú Babiloniá

¹ Te ducaⁿ te dătnŭnî ní xinî tucu-í ingá espírítú xínú cuèchi núú Yă Ndiôxí, te ndéé andiu nî dátăsaⁿ-xi te ní dáyehé-xi ñuyú, te espírítú-ánⁿ io cūnuu-xi.

² Te níhi ní cáháⁿ-xi, te cächí-xi:

—Ní sáá nduu năa ñúú cáhnú ñúú cūnuu nani Babiloniá, te xiáⁿ-ná nataká nchaa núú espírítú cūndîhi yucu ñávăha cundecu-xi, te vá queé-gă-xi xiáⁿ, te diu-ni xiáⁿ nataká nchaa quiti ndăva núú tâchí nchaa quiti ndehe quide, quiti ñă tûú tnăhá iní ñăyiu te xiáⁿ-ná cundecu-güedi.

³ Te ducaⁿ chi ñăyiu ñúú-ánⁿ sánú ichí-yu nchaa ñăyiu níhi ñuyú ichi cuèhé ichi duha, te ducaⁿ-ni xínchíctúⁿ nihnu nchaa ñăyiu ñuyú xíquidé-yu, te nchaa cue téé cūnuu yindaha ñaha xii ñăyiu, cue téé-ánⁿ cúú ñⁿnuu-güedé ndihi nchaa ñăyiu ñúú-ánⁿ quidé-güedé ndihí-yu nândi sá cuèhé sá dúhá. Te nchaa ñăyiu dico nândi sá díco quèheⁿ ñăyiu ñúú-ánⁿ io cūu cuicá-yu, te ducaⁿ quèheⁿ nchaa ñăyiu ñúú Babiloniá-ánⁿ nchaa sá díco ñăyiu-ánⁿ cuëndá xiáⁿ cănehé-yu ndécú-yu ichi cuèhé ichi duha —duha cächí espírítú-ánⁿ.

⁴ Te sátá dúcáⁿ te ní tecú dóho-í ní cáháⁿ ñⁿ sá ní cáháⁿ andiu, te cächí-xi:

—Nchaa nchôhó ñăyiu cūu cuendá-í quee-ndo ñúú Babiloniá cuëndá sá vá cūndecu-ndo tnăhá-ndó ichi cuèhé ichi duha dătnă ndécú ñăyiu ñúú-ánⁿ, te ducaⁿ te vá quini-ndó tnăndôho tnăhu ndăhú sá quixí cūu xii ñăyiu-ánⁿ.

⁵ Chi io cuèhé cuèchi-yu ní cuu ndécú núú Yă Ndiôxí, te mee-gă năhá-gă năcuăa ndūu nchaa sá quidé-yu.

⁶ Te nchôhó ñăyiu cūu cuendá-í, chi nănchôcăva dandôho-ndo ñăyiu-ánⁿ dătnă quidé mēe-yu dândohó-yu cue ñăyiu, te úú xito nanchôcăva-ndo dândohó-ndó-yu, te ducaⁿ căda-ndo cuendá io-gă ndohó-yu.

⁷ Te io quide cahnú-yu mēe-yu, te io cūđđi iní-yu quidé-yu nchaa núú sá cuèhé sá dúhá, te sá dúcáⁿ xidó-yu quidé-yu nchaa sá cuèhé sá dúhá nūu xiáⁿ nchôhó io dândohó-ndó-yu, te ducaⁿ chi ñăyiu ñúú-ánⁿ sánî iní-yu, te cächí-yu: “Nchúhú cúú-ndí dătnă ñⁿ ñadîhi ñă túú quèé, ñaha io cūnuu yindaha ñaha xii ñăyiu. Te ducaⁿ sătnăhá-xi cūu-ndí chi nchaa-ni nduu io váha cūu iní-ndí ndécú-ndí, te ní vá sáá ñⁿ nduu te ndihú iní-ndí”, duha cächí ñăyiu ñúú-ánⁿ.

⁸ Te sá cuëndá nchaa sá quidé-yu-ánⁿ nūu xiáⁿ ñⁿ-ni nduu sáá tnăndôho sá cúú-xi-yu, te io ndohó-yu chi ñúú-yu coo tnămă, te coo cuèhé cahni ñaha-xi xií-yu, te io ndihú iní-yu, te cáyú ñúú-yu, te ducaⁿ ndôhó-yu chi Dútú Ndiôxí io cūnuu-gă, te diu-gă ducaⁿ dândohó ñaha-gă xií-yu —duha cächí sá ní cáháⁿ andiu-ánⁿ.

⁹ Te nchaa cue téé cūnuu yindaha ñaha xii ñăyiu io ndăhyú-güedé sá ndihú iní-güedé ôré ná quini-güedé quene ñúhmă cáyú ñúú cue ñăyiu Babiloniá, chi diu cue téé-ánⁿ cúú-güedé cue téé cūu ñⁿnuu ndihí-yu quide-güedé nchaa núú sá cuèhé sá dúhá ndihí-yu, te ducaⁿ chi io tnăhá iní-güedé cundecu-güedé ndihí-yu ichi dđi iní.

¹⁰ Te cue téé-ánⁿ xica-nă cundecu-güedé cundehe-güedé năcuăa ndoho nchaa ñăyiu ñúú-ánⁿ sá yuhú-güedé nchaa tnăndôho-ánⁿ, te cächí-güedé:

—[Ndăhú nchôhó ñăyiu ñúú cáhnú ñúú cūnuu nani Babiloniá! Chi uuⁿni ní sáá nchaa tnăndôho tnăhu ndăhú sá cúú-xi-ndó —duha cächí-güedé.

¹¹ Te nchaa ñăyiu dico nchaa sá nândîhi ñăyiu ñúú Babiloniá tnăhá-yu io ndăhyú-yu sá ndihú iní-yu chi vá yô-gă cuaaⁿ nchaa sá díco-yu.

¹² Te dicó-yu nchaa sá ní cuăha mee-ni dîhúⁿ cuăáⁿ, ndihí nchaa sá ní cuăha mee-ni dîhúⁿ cuăxíⁿ, te dico tucú-yu sá ní cuăha mee-ni yúú văha yúú nánî pĕrlă, ndihí nchaa dăva-gă sá ní cuăha dăva-gă yúú văha, te dicó-yu tnăhá dóó sĕdă, ndihí ingá núú dđó văha sá nánî línú, ndihí dóó murădú, ndihí dóó ticuèhé te mee-ni dóó văha cūu-xi, te dico tucú-yu tnăhá yutnu sá sâháⁿ tnămî, te dico tucú-yu sá ní cuăha sá ní nănî mărĕl, te dico tucú-yu sá ní cuăha mee-ni yutnu văha sá io ndĕyăhu, te dico tucú-yu sá ní cuăha mee-ni căă, ndihí sá ní cuăha mee-ni sá nánî brôncĕ, ndihí sá ní cuăha mee-ni yúú văha yúú nánî mărĕmól.

¹³ Te dico tucú-yu canĕlă, ndihí yúcu sá sâháⁿ tnămî, ndihí dŭsa sá sâháⁿ tnămî, ndihí yúcu sá nánî mĕrră, te dico tucú-yu ingá núú dŭsa sá sâháⁿ tnămî năni olivănú, te dico tucú-yu ndudî ndĕhé yoho yăha stilĕ, ndihí acitî yutnu năni olívú, ndihí yuchi triú văha, te dico tucú-yu nchaa dăva-gă núú triú, te dicó-yu tnăhá mbĕé, ndihí cuăyú, ndihí nchaa dăva-gă quiti tată, te dico tucú-yu tnăhá carrĕtă, te dico tucú-yu tnăhá ñăyiu xinu cuèchi, ñăyiu ñă túú tnăhi dăňă quee núú chíúⁿ pătřóóⁿ-xi.

¹⁴ Te nchaa ñăyiu dico-ánⁿ cŭñăhá-yu xii ñăyiu ñúú Babiloniá:

—[Nchaa sá io cūđđi iní-ndó cūndecu ndihí-ndo ni cuu vá ndăcú-gă-ndó nihi-ndó vitna, te nchaa sá sánî iní-ndó să io văha căă ndecu ndihí-ndo ndihí nchaa dăva-gă sá ndécú ndihí-ndo ní ndihí nihnu-xi vitna, te ni ñⁿ nduu-gă vá nihi-ndó ni ñⁿ xiáⁿ cundecu ndihí-ndo! —duha cŭñăha ñăyiu-ánⁿ xií-yu.

¹⁵ Te nchaa ñăyiu ní cuu cuica ní xóo dico nândi nchaa sá ní xóo dico ní queheⁿ cue ñăyiu ñúú Babiloniá, nchaa ñăyiu-ánⁿ xica-nă cundecú-yu cundĕhé-yu sá yuhú-yu cuëndá

nchaa tnúndòho sá yáha cue ñáyiu ñuú-áⁿ, te io ndáhyú-yu sá ndihú iní-yu sá dúcáⁿ ndòho ñáyiu-áⁿ.

16 Te cúñaha tùcú-yu:

—¡Ndàhú nchòhò ñáyiu xĩndecu ñuú cáhnú ñùú nání Babiloniá! Chi nchòhò cùú-ndó dàtná ìⁿ ñadihí ñaha ñihnu dóó váha dóó muradú, ndihí dóó tícuèhé, te mee-ni sá ní cuáha díhúⁿ cuááⁿ, ndihí mee-ni sá ní cuáha yúú váha yúú nání pèrlá, ndihí sá ní cuáha dava-gá yúú váha sá io vii ndáa mee-ni ncháa xiáⁿ ní cuáha sá yíhí lôho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-áⁿ.

17 ¡Te uuⁿ ní ndihí ñihnu nchaandi túhú sá ndécú ndihí ñadihí-áⁿ, te ducaⁿ sátnahá-xi cùu nchohó ní cùu! —duha cúñahá-yu xii cue ñáyiu ñuú Babiloniá.

Te nchaa cue tée dàcaca barcú ndihí nchaa cue tée tàxi tnuní bàrcú-áⁿ, ndihí nchaa ñáyiu ñùhu xití bàrcú-áⁿ, ndihí nchaa dava-gá cue tée nándi chiúⁿ quide ndecu lámár, nchaa ñáyiu-áⁿ xica cùndecú-yu

18 te quini-yu òré quehe ñúhmá càyú ñuú cue ñáyiu Babiloniá, te níhi cáháⁿ-yu, te cachí-yu:

—Ní ìⁿ ñuú ñá túú nùtnahá-xi ñuú Babiloniá —duha cáháⁿ-yu.

19 Te nchaa ñáyiu-áⁿ chidó-yu ñuhu díquí-yu, te nguíta-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndàhú nchòhò ñáyiu xĩndecu ñuú cáhnú ñùú nání Babiloniá! Chi io cuica-ndo ní cùu, te ñuú-ndo ní quide ní cuu cuica ncháa ñáyiu ndècu ndihí barcú, te vitna uuⁿ ní ní naa-ndo ndihí ñuú-ndó —duha cachí-yu.

20 Te nchaa nchòhò ñáyiu ndècu andiu ío chí cúdǎ iní sá dúcáⁿ dàndoho Yá Ndiòxi nchaa ñáyiu ñuú Babiloniá-áⁿ, te ñuú-ni ducaⁿ chí cúdǎ iní nchaa nchòhò cue téé ní cachí Xitohó Jesucristú cáháⁿ tnúhu-gá, te ñuú-ni ducaⁿ chí cúdǎ iní nchaa nchòhò cue téé cáháⁿ tnúhu Yá Ndiòxi nàcuáa dàcahu iní ñáhá-gá xii-ndo, te ñuú-ni ducaⁿ chí cúdǎ iní nchaa dava-gá nchòhò ñáyiu cùu cuendá-gá cuèndá sá dúcáⁿ dàndoho-gá nchaa ñáyiu ñuú-áⁿ. Te ducaⁿ càda ñaha-gá xii cue ñáyiu-áⁿ cuèndá nchaa sá quidé ñáhá-yu xii-ndo.

21 Te sáta dúcáⁿ te ní xiní-í ìⁿ espíritú xinú cuèchi núú Yá Ndiòxi, te espíritú-áⁿ ío ndee-xi te ní quehe-xi ìⁿ yúú cáhnú dàtná càhnu yódó te ní dáquèe-xi xití ndute lámár, te cächí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cáhnú ñuú Babiloniá, chi ñáyiu ñuú-áⁿ ío ndihí naá-yu ndihí ñuú-yu, te vá ìⁿ ndùu ìⁿ quíú-gá quini ñáhá ñáyiu xii-yu.

22 Te ní ìⁿ-gá ñáyiu càni arpá, te ní ìⁿ-gá ñáyiu tíú vǐlu, te ní ìⁿ-gá ñáyiu tíú cútú, te ní ìⁿ-gá yaá vá cóó ñuú-áⁿ, te ní ìⁿ-gá cue ñáyiu xini cada ìⁿ núú chiúⁿ vá cóó-gá, te ní vá yóo-gá canehe chiúⁿ yúú cùú yódó mulinú.

23 Te ní ìⁿ-gá ñuhú vá cùndècu ñuú-áⁿ, te ní ìⁿ nduu-gá vá cóó víco tnándaha, te ñáyiu ñuú-áⁿ ñáyiu quide ndáhú cùú-yu ñáyiu ío-gá cuicá-yu dàcúúxí ñáyiu quide ndáhú xĩndecu níhí ñuyúú, dico ncháa-yu naá-yu chí quide nduú-yu te ío dàndahú-yu cue ñáyiu ñuyúú sá dúcáⁿ quidé-yu.

24 Te ñuú-ni ñuú-áⁿ ní dácacá-yu níhí cue téé ní cáháⁿ tnúhu Yá Ndiòxi, te ñuú-ni ducaⁿ ní quidé-yu nchaa dava-gá cue ñáyiu cùu cuendá-gá, te ñuú-ni-yu quide Xisani tnàha ñáyiu ñuyúú —duha cächí espíritú-áⁿ.

19

1 Te sáta dúcáⁿ te ní tecú dóho-í níhi ní cáháⁿ cuèhé víhí ñáyiu andiu, te cächí-yu:

¡Ío càhnu cuu Yá Ndiòxi!, chí ñuú-gá cùú-gá

Yaá ní dàcacu ñihnu ñaha xii-o núú ùhú núú ndáhú, te ío cùnuu-gá, te mee-ni sá váha quide-gá,

2 te mee-gá ío váha ndáá quidé-gá quidé ndáá-gá cuèchi nchaa ñáyiu,

chí ñuú-gá ní dáquihíⁿ-gá ñadihí ñaha ndècu íchi díú iní núú ùhú núú ndáhú,

chí ñuú-áⁿ ní sanu íchi-áⁿ ñáyiu ñuyúú íchi cuèhé íchi duha,

te ducaⁿ ní dáquihíⁿ ñáhá-gá xii-aⁿ núú ùhú núú ndáhú chí nàchinaa-gé sá ní sahní-aⁿ cue ñáyiu ní xinu cuèchi núú-gá.

Duha cächí-yu.

3 Te cächí tucú-yu:

—¡Ío càhnu cuu Yá Ndiòxi!, chí nchaa nduu nchaa quíú ducaⁿ-ni quène ñúhmá núú ñúhú ñaha-áⁿ càyú-aⁿ —duha cächí-yu.

4 Te ndí òcò cùmí cue téé cùu sacuéhé xĩndecu-áⁿ ní nguíñí xití-güedé núú Yá Ndiòxi núú núcòo-gá táxi tnuní-gá, te tnàhá cue quiti cùmí xinutnii-áⁿ ní nguíñí xití-güedé núú-gá, te cue téé-áⁿ cächí-güedé ndihí cue quiti-áⁿ:

—Sá ndáá sá ío càhnu cuu Yá Ndiòxi —duha cächí-güedé ndihí cue quiti-áⁿ.

5 Te sáta dúcáⁿ te ní tecú dóho-í ní cáháⁿ ìⁿ sá ní cáháⁿ meí núú nùtmí xilé váha núcòo Yá Ndiòxi, te cächí sá cáháⁿ-áⁿ:

Nchaa nchòhò ñáyiu xinu cuèchi núú Yá Ndiòxi, ñuú-ni nchòhò ñáyiu nèhe sá yíñùhu núú-gá,

cáháⁿ-ndó sá ío càhnu cuu-gá cuèi cùnuu-ndo àdi ñá túú cùnuu-ndo.

Duha cächí sá cáháⁿ-áⁿ.

Íⁿ víco cùu datná víco tnándaha

6 Te sáta dúcáⁿ te ní tecú dóho-í ní cáháⁿ cuèhé víhí ñáyiu andiu, te òré ducaⁿ ní

cáháⁿ-yu te ní quide-xi dàtná quidé-xí núú xicá cuèhé víhí ndùte, te ní quide tucu-xi dàtná quidé-xí òré cáháⁿ níhi víhi ñúhu, te cächí-yu:

1]o cáhnu cuu Dútú Ndiòxí Yáá cúú Tátá-ó! Te ío cùnuu-gá táxi tñuní-gá, te quide-gá nchaandi túhú sá vâha.

7 Te ío chí ná cùdîî ìní-ó, te chí ná cächí-ó sã ío cáhnu cuu Yá Ndiòxí,

chí vitna ní sáá nduu càda Yáá cáá dàtná cáá ìⁿ mbéé quiti ní dânicuèhé-güedé ìⁿ vico, te cùu-xi datná vico tñândaha.

Te nchaa ñâyü cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sã ñâyü-áⁿ cùu-yu dàtná ìⁿ ñadhí xíchí tñândaha ndihí-gá,

8 te ñâyü-áⁿ ní nduu táhü-yu cuihnü-yu dóó vâha dóó chàhnchí sã ío vâha càndoo.

Duha cächí-yu.

Te sã dúcáⁿ ní nduu táhü ñâyü cùu cuendá Yá Ndiòxí dóó vâha ñihnú-yu, xiáⁿ cútñuní iní-ó sã cùu-yu ñâyü quide ndáá núú-gá.

9 Te ìⁿ espíritú xínu cuèchi núú Yá Ndiòxí ní cächí tñúhu-xi xî-í, te cächí-xi:

—Chido tñuní-n ìⁿ núú tütú nâcuáa na cáháⁿ-í-a: “Vâha táhü nchaa ñâyü ní cáháⁿ ñáhá Yáá cáá dàtná cáá ìⁿ mbéé quiti ní dânicuèhé-güedé cundecú-yu vico, te vico-áⁿ cúú-xí dàtná vico tñândaha cada-gá”, te duha chido tñuní-n chí tñúhu-a cùu-xi tñúhu ndáá tñúhu Yá Ndiòxí —duha cächí espíritú-áⁿ.

10 Te ní ngüñí xítí-í núú espíritú-áⁿ cuendá chiñuhu-í-xi ní cùu, te ní cächí-xi:

—Vá dúcáⁿ càda-n, chí tñahá-í dicó xínu cuèchi-í núú Yá Ndiòxí dàtná quidé-n xínu cuechi-n núú-gá ndihí nchaa dava-gá ñâyü ndècu ndihí-n ichi-gá, ñâyü nchicúⁿ ñihnu quide ní yuhu ní iní nchaa nâcuáa cáháⁿ Xitohó Jesucristú, te núú xiáⁿ cächí-í sã vá dúcáⁿ càda-n, chí mee Yá Ndiòxí chiñuhu-n —duha cächí espíritú-áⁿ.

Te nchaa cue téé cáháⁿ tñúhu Yá Ndiòxí cáháⁿ-güedé nâcuáa nduu tñúhu cáháⁿ Xitohó Jesucristú.

Cuendá Yáá yódó ìⁿ cuayú cuixíⁿ

11 Te ní xini-í nchí andü, te ní xini-í ní quee ìⁿ Yáá yódó-gá ìⁿ cuayú cuixíⁿ. Te Yáá-áⁿ nání-gá Yáá quidé ndáá cuiti, duha nani-gá. Te quide-gá nchaa sã cáháⁿ-gá, te ío vâha quide ndáá-gá cuèchi nchaa ñâyü, te nchaa ñâyü nâá ndihí ñaha xii-gá ío vâha xini-gá nâcuáa cada ñaha-gá xii-yu chí ío ndáá quidé-gá.

12 Te tinüu-gá dáyehé-xi dàtná dáyehé ñúhu, te titní coróná ñúhú díquí-gá, te nèhe-gá ìⁿ sã ndéé ñü-gá, te vá yóo ìⁿ cütñuní iní-xi nása cuáháⁿ tñúhu-áⁿ, chí ìⁿ ñúhú díí-ní mee-gá ñahá-gá nâcuáa cáháⁿ-xi.

13 Te Yáá-áⁿ ñihnú-gá ìⁿ dóó ní cuu mee-ni ñíñí, te Yáá-áⁿ cächí tñúhu-gá nchaa nâcuáa

sàni iní Yá Ndiòxí, núú xiáⁿ nání-gá Tnúhu Yá Ndiòxí.

14 Te sáta-gá nchicúⁿ nchaa espíritú xínu cuèchi núú Yá Ndiòxí, te cue espíritú-áⁿ cúú-xí dàtná sandadú, te xixihnu-xi dóó cuixíⁿ dóó vâha sã càndoo, te xixódó-xi cuayú cuixíⁿ.

15 Te yuhu Yáá yódónüu-áⁿ quené ìⁿ yuchi cáhnu, te ndihí yuchi-áⁿ dânicuèhé-gá nchaa ñâyü xindecu ñuyú, te ío dandòho ñaha-gá xii-yu, te dàtná quidé téé quihni ndéhé yoho yâha stilé ducaⁿ sãtnahá-xi cada ñaha-gá xii-yu, chí ío dandòho ñaha-gá xii-yu cuendá sã ío cùdèéⁿ-gá. Te mee-gá ío cùnuu-gá táxi tñuní-gá, te quide-gá nchaandi túhú sã vâha.

16 Te sáta dóó ñihnú Yáá-áⁿ ndihí núú ticácáⁿ-gá yódó tñuní nâcuáa nani-gá, te duha cáháⁿ-xi: “Téé ío cùnuu taxi tñuní ñáhá xii nchaa cue téé yindaha ñaha xii ñâyü ndihí nchaa dava-gá ñâyü”, duha ndéé tñuní sáta dóó-gá-áⁿ ndihí ticácáⁿ-gá-áⁿ.

17 Te dàtnüni ní xini-í ìⁿ espíritú xínu cuèchi núú Yá Ndiòxí nütñü-xi núú nchíanchii, te níhi ní cáháⁿ-xi, te xâhaⁿ-xi xii nchaa quiti ndava núú táchi:

—Nchaa nchòhó quiti ndáva, chí táquixi chí caxi-ndo nchaa sã ní quide túha Yá Ndiòxí,

18 chí caxi-ndo cuñü nchaa cue téé yindaha ñaha xii ñâyü, ndihí cuñü nchaa cue téé táxi tñuní ñáhá xii cue sandadú, ndihí cuñü nchaa cue téé ío ñí xindáa, ndihí cuñü nchaa cuayú, ndihí cuñü nchaa cue téé ní xódó ñaha xii-güedi, ndihí cuñü nchaa dava-gá ñâyü, ñâyü ñá túu tñahí ní ñáhá quee núú chíúⁿ patróoⁿ-xi, ndihí cuñü nchaa ñâyü ní ñáhá ní quee núú chíúⁿ patróoⁿ-xi, ndihí cuñü nchaa ñâyü cùnuu, ndihí cuñü nchaa ñâyü ñá túu cùnuu, te nchaa cuñü-áⁿ caxi-ndo —cächí espíritú-áⁿ xâhaⁿ-xi xii nchaa quiti-áⁿ.

19 Te sáta dúcáⁿ te ní xini tucu-í quiti ní quene xití lámár, ndihí nchaa cue téé yindaha ñaha xii ñâyü, ndihí nchaa cue téé cùu sandadú-güedé ní naníhí tñahá-güedé ndihí quiti-áⁿ cuendá cuu ìⁿ nuu-güedé ndihí-ñi nâá-güedé ndihí Yáá yódó cuayú-áⁿ, ndihí nchaa cue espíritú cúú sandadú ndihí-gá.

20 Te cue espíritú cúú sandadú ndihí Yáá-áⁿ ní tñü-xi quiti-áⁿ, ndihí téé ío dandahú ñáhá xii ñâyü cächí sã cáháⁿ tñúhu Yá Ndiòxí te ñá ndáá sã cáháⁿ-dé tñúhu-gá, te ñü-ni téé-áⁿ ní quide-dé titní núú sã vá yóo tñahí ndacu cada núú quiti-áⁿ. Te sã dúcáⁿ ní quide téé-áⁿ xiáⁿ ní dândahú-dé ñâyü ní sandáá iní-yu ní quèé-yu tñuní quiti-áⁿ, te ní chiñúhü-yu sã ní dândácú ñahá-yu xii-ñi, te cue espíritú-áⁿ ní dáquée-xi quiti-áⁿ núú ñúhü núú ñúhü ázufré càyú-xi, ndihí téé ducaⁿ dandahú ñáhá xii ñâyü-áⁿ, te xiáⁿ

cuhuⁿ téé-án ndihi quití-án, te ío ndoho-dé ndihi-dí.

²¹ Te ndihi yuchí cáhnú sǎ quéné yùhu Yaá yódó cuáyú-án ní sahní-gá nchaa dava-gá cue téé cùndihi quití-án, te nchaa cue quití ndáva ní chítú xítí-güedi ní xexi-güedi cuñú nchaa cue téé-án.

20

Úxí cièndú cuía

¹ Te sátá dúcáⁿ te ní xiní-í ìⁿ espíritú xínú cuèchi núú Yá Ndiòxí ní quee-xi andíu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sácuihná, te nùndaha tucu-xi ìⁿ cadená cáhnú.

² Te espíritú-án ní tñi-xi quití dééⁿ nání drágón, te diu-ni quití-án cúú-dí mèi yucu ñávaha sá nání sácuihná, te diu xiáⁿ ní nduu-xi cóo ndéé sanaha. Te espíritú-án ní dácútú ñaha-xi xii-dí, te ducaⁿ-ni cùndutu-dí ndéé xínu úxí cièndú cuía.

³ Te sátá ní dácútú ñaha espíritú-án xii-dí te ní dáquée ñaha-xi xii-dí yaú-án chi diu yaú-án tàú-dí quée-dí cùndecu-dí. Te ní nacadí-xi yuyèhe yaú-án, te ní tee-xi sèyú yuyèhe-án cuèndá sá vǎ quéné-gǎ-dí dandàhú-dí cue ñáyíu ñuyíú, te xiáⁿ cundedí nihnu-dí ndéé xínu úxí cièndú cuía. Te sátá ná yáha úxí cièndú cuía-án te nandáxi-dí te quene-dí yaú núú ñúhú-dí-án caca cuu tnaa-dí ìⁿ úú nduu.

⁴ Te dátñuní ní xiní-í xínutñí títñí xilé váha, te xiáⁿ xínucóo nchaa ñáyíu ní ngùndecu ndihi tnúhu ndee iní cada ndáa cuéchi nchaa ñáyíu, te ní xiní-í xíndecu tnàhá cue ñáyíu ní xehndé-güedé dúcúⁿ-xi cuèndá sá ní cáháⁿ-yu tnúhu Yá Ndiòxí, ndihi cuèndá sá ní cáháⁿ váha-yu cuèndá Xítóhó Jesucristú. Te diu-ni ñáyíu-án cúú-yu ñáyíu ñá túú ní chihúhú-yu quití ní quene xítí lámár-án, te ní ñá túú ní chihúhú-yu sá ní dándácú ñáyíu ní natava ñahá-yu xii-dí, te ní ñá túú ní dǎhá-yu mée-yu quée-yu tñuní quití-án chí ní tnée-yu te ní ndáhá-yu ñá túú ní dǎhá-yu quée tñuní-dí. Te ní xiní-í ní ndoto cue ñáyíu-án cuèndá tnàhá-yu cunúú-yu taxi tñuní-yu ndihi Xítóhó Jesucristú úxí cièndú cuía.

⁵ Te dava ñáyíu ní xihí ñá túú ní ndótó-yu, chí ndéé yáha úxí cièndú cuía te dátñuní ndótó-yu. Te ñáyíu ní xiní-í ní ndoto-án cúú-yu ñáyíu ní ndoto díhna nuu.

⁶ Te ío váha ní tnahá nchaa ñáyíu ní nduu táhú ní ndoto díhna nuu!, chí cue ñáyíu-án ío cudiú-yu núú Yá Ndiòxí, te nchaa ñáyíu-án vǎ quíhíⁿ-yu núú ùhú núú ndáhú, te ñáyíu-án cúú-yu dútú ndécú-yu núú Yá Ndiòxí ndihi núú Xítóhó Jesucristú, te ñáyíu-án cunúú-yu dátñá cúnúu Xítóhó Jesucristú, te cunuu ndihi ñahá-yu xii-gǎ úxí cièndú cuía.

⁷ Te sátá ná yáha úxí cièndú cuía-án te sácuihná quee-xi núú yíndedí nihnu-xi-án,

⁸ te ngúíta tucu-xi dandàhú-xi nchaa ñáyíu xíndecu nihíi ñuyíú, te cuèi ñáyíu ñuú Góg, te cuèi ñáyíu ñuú Mágóg ducaⁿ quíhíⁿ-xi dandàhú ñahá-xi xii-yu, te datacá-xi nchaa ñáyíu cuèndá náá-yu, te cuéhé víhí-yu dátñá cuéhé ñuhu cúchí lámár.

⁹ Te nchaa ñáyíu-án tñiⁿ-yu ichi quíhíⁿ-yu ìⁿ ichi sá cuaháⁿ núú cáá ìⁿ yodo cahnu víhí, te sáa-yu núú xíndecu ñáyíu cùu cuendá Yá Ndiòxí, te ñáyíu-án chidócó-yu cue ñáyíu cùu cuendá-gǎ-án ndihi ñuú-yu, te ñuú-án ío cùu iní-gǎ, dico mee Yá Ndiòxí dangóyo-gǎ ñuhú cahmí-gǎ nchaa ñáyíu ducaⁿ chidoco ñaha xii ñáyíu cùu cuendá-gǎ-án, te nchaa ñáyíu-án cuú.

¹⁰ Te sácuihná sǎ dúcáⁿ dandàhú ñahá xii ñáyíu chidoco ñaha xii ñáyíu cùu cuendá Yá Ndiòxí-án dáquée ñaha-gǎ xii-xi núú ñúhú núú ñúhú àzufré càyú-xi, te diu-ni xiáⁿ sa ñúhu quití ní quene xítí lámár, ndihi téé ní dandàhú ñáyíu ní xáhaⁿ-dé xii-yu sá cáháⁿ-dé tnúhu Yá Ndiòxí te ñá ndáa sá cáháⁿ-dé tnúhu-gǎ, te xiáⁿ cuhuⁿ-xi ndoho-xi ní caa ní quíhíⁿ ndihi quití ní quene xítí lámár, ndihi téé cǎchí sá cáháⁿ tnúhu Yá Ndiòxí te ñá ndáa sá cáháⁿ-dé tnúhu-gǎ.

Cùndáa cuéchi ñáyíu

¹¹ Te ní xiní-í nútní ìⁿ xilé váha xilé cuixíⁿ, te núú xilé-án núcócó ìⁿ Yaá. Te ndéhe Yaá-án ní ndóñúhú àndiu ndihi ñuyíú-a, te ducaⁿ ní ndóñúhú-xi chí vǎ cùndècu-gǎ-xi.

¹² Te sátá dúcáⁿ te ní xiní-í nchaa ñáyíu ní xihí ní cùu, ñáyíu cùnuu ndihi ñáyíu ñá túú cùnuu xínutñí-yu núú Yáa núcócó núú xilé váha-án, te Yaá-án cúú-gǎ Yá Ndiòxí, te òré-án ní nandicá nchaa tutú núú yódó tñuní nchaa nàcuáa ndùu sá ní quide ìⁿ ìⁿ ñáyíu-án, te ní nandicá tucu ingá tutú núú yódó tñuní nchaa ñáyíu ní naníhí tàhú, te nchaa ñáyíu ní xihí ní cùu xínutñí-yu núú Yá Ndiòxí cundáa cuéchi-yu, te nchaa nàcuáa ndùu nchaa cuéchi-yu yódo tñuní núú ncháa tutú-án ducaⁿ cùndáa.

¹³ Te nchaa ñáyíu ní xihí xítí ndute lámár, ndihi nchaa ñáyíu ní xihí núú ñuhu yichí nchaa ñáyíu-án cundáa cuéchi-yu nàcuáa ní quidé-yu ìⁿ ìⁿ-yu.

¹⁴ Te vitna te vǎ cùu-gǎ ñáyíu chí ñá túú-gǎ tnúhu xihí, te nchaa ñáyíu ñuhu núú ñúhú núú càyú ñáyíu-án cúú-yu ñáyíu ní xíta nihnu ní caa ní quíhíⁿ.

¹⁵ Te ducaⁿ chí nchaa ñáyíu ñá túú yódo tñuní núú títú núú yódó tñuní nchaa ñáyíu naníhí tàhú ní dáquée ñaha Yá Ndiòxí xii-yu núú ñúhú núú càyú.

21

Andiu sà ndihi ñyíyú sáá

¹ Te sáta dúcáⁿ te ní xini-í andiu sàa ndihi ñyíyú sáá, te andiu sàa ndécú díhna ndihi ñyíyú sà ndécú díhna ní ndóññuhú-xí, te tñáhà lámár ní ndóññuhú-xí.

² Te yúhú té Juáá ní xini-í ñuú Jerusálén sáá ní quee-xi núú ndécú Yá Ndióxi, te ñuú-án cùú-xí ñuú méé-gã, te ío vii càa chi càa datná cáá ñi ñadihi xíchi tñándaha.

³ Te ní tecú dóho-í níhi ní cáháⁿ ñi sá ní cáháⁿ andiu, te càchi-xi:

—Chí cùndèdóho ñi tñuhu na càháⁿ-í-a: Yá Ndióxi ndécú ndihi-gá cue ñáyiú vitna, te ducaⁿ-nã cundecu ndihi ñaha-gã xii-yu, te diú-yu cùú-yu ñáyiú cùu cuendá-gá, te vã ñi nduú ñi quíú-gá te daña ñaha-gá xii-yu.

⁴ Te mee Yá Ndióxi cada-gá sá ñà túú tñáhí-gá ná caní iní-yu cundecú-yu, te ní vã quini-gá-yu tñuhu xíhi, te ní vã quini-gá-yu tñuhu ndàhyú, te ní vã quini-gá-yu tñuhu ndíhú iní-xi, te ní vã quini-gá-yu tñuhu cùhú, chí nchaa sá ní xini-yu ñyíyú díhna vã quini-gá-yu vitna —duha càchi sá ní cáháⁿ-án.

⁵ Te Yáá núcõo núú xilé váha-án ní cachí tñuhu-gá xii-í, te càchi-gá:

—Yúhú quidè-í nãcuáa nduu saa nchàa sá cùndècu vitna. Te vitna chido tñuni-n ñi núú túú nchaa tñuhu sá ní cáháⁿ-í-a, chí nchaa tñuhu-a cùu-xi tñuhu ndáa cuiti —duha càchi-gá.

⁶ Te dàtñuni ní cachí tñuhu tucú-gá xii-í:

—Sa ní xínu cava nchaa chiⁿ ní sani iní-í cada-í, te diu-ni yúhú cùú-í Yáá sá ndècu ndéé cùtñahá ní ngáva ñyíyú, te diu-ni-í cundecu-í ní caa ní quíhíⁿ. Te nchaa ñáyiú cùini tuha ñaha xii-í te cada iní-yu sá datná ndute cùu-xi sá cuãñaha tãhù-í xii-yu candeca-xi iní-yu ní caa ní quíhíⁿ.

⁷ Te nchaa ñáyiú na cùndee iní yáha nándi sá ná yáha-yu sá cuendá-í, te ñáyiú-án nduu tãhù-yu cundecu váha-yu, te yúhú cuu-í Ndióxi-yu, te ducaⁿ meé-yu cùú-yu déhe-í.

⁸ Te nchaa ñáyiú na yúhú ndoho cuendá-í quíhíⁿ-yu núú ñuhú núú càyú ndihi ñáyiú ñá túú sàndáá iní ñáhá xii-í, ndihi ñáyiú quide nándi nchaa sá cuéhé sá dúhá, ndihi ñáyiú sàhni tñaha, ndihi ñáyiú ndècu ichi díí iní, ndihi ñáyiú quide nduu, ndihi ñáyiú chíñuhu nchaa sá càchi-yu cùu ndióxi ní cadúha cue téé ñyíyú-a, ndihi ñáyiú dàcuandehnde, nchaa ñáyiú ducaⁿ xíquide-án cùita nihnú-yu chí quíhíⁿ-yu núú ñuhú núú ñuhú àzufe càyú-xi —duha ní cáháⁿ Yá Ndióxi ní cachí tñuhu-gá xii-í.

Ñuú Jerusálén sáá

⁹ Te núú úsá espíritú xínehe tícùú ñuhú tñuhu ndòho, te ñi-xi ní quixi-xi te càchi-xi:

—Taqùixi, te na dànehé ñáhà-í xii-n nchàa ñáyiú cùu cuendá Yáá cáá datná cáá ñi mbéé quiti ní dánícuéhé-güedé, ñáyiú-án cada iní-n sá cùú-yu datná ñi xíchi cuéchi vitna tñándaha, te ducaⁿ càda iní-n sá cùú-yu chí cundecu-yu ndihi-gá —duha ní cachí tñuhu espíritú-án xii-í.

¹⁰ Te òré quidé ñaha espíritú Yá Ndióxi xii-í nãcuáa càchi iní-xi, te espíritú néhé tícùú-án ndécá ñaha-xi xii-í cuásá ñi tñdúú ducúⁿ, te xiáⁿ ní dánèhé núú ñáhá-xi xii-í ñuú Jerusálén te ñuú-án ní quee-xi núú ndécú Yá Ndióxi, te ñuú-án cùú-xí ñuú méé-gã.

¹¹ Te ñuú-án ío càhnu cuu-xi chí ducaⁿ ío càhnu tucú mee-gã, te dátásaⁿ-xi datná dátásaⁿ yúú váha sá nání jãspé yúú cáá datná cáá vidiúú sá túu ingá xio ndàa sáta-xi.

¹² Te ní càndéé yuhu ñuú-án sùúni ducúⁿ nchaa sá ñuhú dòco, te nchii úxúú yuyèhe-xi, te ndi tñahá ñi ñi yuyèhe-án xíndecu ñi caa espíritú xínu cuéchi núú Yá Ndióxi. Te ndi tñahá ñi ñi yuyèhe-án yódó tñuni diu ñi caa xíchi cue ñáyiú israhél.

¹³ Te úní yuyèhe-xi nchii ndàa xio nacuaáa quène nchíanchii, te úní tucu yuyèhe-xi nchii ndàa nacuaáa quène nchíanchii, te úní tucu yuyèhe-xi nchii ndàa xio cuha nacuaáa quène nchíanchii, te úní tucu yuyèhe-xi nchii ndàa xio datni nacuaáa quène tucu nchíanchii.

¹⁴ Te sá ñuhú dòco-án chí úxúú tñahá yúú cùú cìmentú-xi, te ndi tñahá ñi ñi yúú-án ndéé ñi caa diu cue téé ní cáháⁿ tñuhu Yáá cáá datná cáá ñi mbéé quiti ní dánícuéhé-güedé, te diu mee-gã ní táuchíúⁿ-gã ní cáháⁿ-güedé tñuhu-gá.

¹⁵ Te espíritú sá cáháⁿ ndihi ñaha xii-í-án néhé-xi ñi sá caní ní cuáha mee-ni díhúⁿ cuááⁿ, te ndihi xiáⁿ chícùhá-xi ñuú-án, ndihi sá ñuhú dòco ñuú-án, ndihi nchaa yuyèhe-xi.

¹⁶ Te ñuú-án ñi-ñi néhe-xi cuendá quèhéⁿ-xi ndihi cuendá caní-xi, te espíritú-án ní chícùhá-xi ndihi sá néhé-xi-án ñuú-án, te néhe-xi ócò úú ciendú mĩ mètrú sá caní te diu-ni ducaⁿ néhe-xi cuendá quèhéⁿ-xi, te diu-ni ducaⁿ néhe-xi sá ducúⁿ nchaa vehe càa ñuú-án.

¹⁷ Te dàtñuni ní chícùhá-xi sá ñuhú dòco ñuú-án, te xiáⁿ néhé-xi únidico cùmi mètrú sá ducúⁿ, te ní chícùhá-xi datná chícùhá cue ñáyiú ñyíyú-a.

¹⁸ Te sá ñuhú dòco-án ní cuáha mee-ni yúú váha yúú sá nání jãspé, te nihí ñuú-án cùú-xi mèe-ni díhúⁿ cuááⁿ, te càa datná cáá vidiúú sá ío váha càndoo te túu ndàa ingá xio.

¹⁹ Te ndi úxúú yúú cùú cìmentú sá ñuhú dòco-án ndéé ndí dííⁿ núú yúú vii caa sáta-xi, te yúú díhna ndéé mee-ni yúú váha sá nání jãspé sáta-xi, te yúú cùú úú ndéé tucu ingá núú yúú váha sá nání zãfirú sáta-xi, te yúú cùú úní ndéé tucu ingá núú yúú váha sá nání

áगतá sátá-xi, te yúú cúú cùmi ndèè ingá núú yúú vâha sá nâni ésméraldá sátá-xi.

²⁰ Te yúú cúú ùhúⁿ ndèè tucu ingá núú yúú vâha sá nâni ònicé sátá-xi, te yúú cúú ìñú ndèè tucu ingá núú yúú vâha sá nâni còrnaliná sátá-xi, te yúú cúú úsá ndèè tucu ingá núú yúú vâha sá nâni crìsólítu sátá-xi, te yúú cúú ùná ndèè tucu ingá núú yúú vâha sá nâni bèrilú sátá-xi, te yúú cúú ìⁿ ndèè tucu ingá núú yúú vâha sá nâni tòpacíú sátá-xi, te yúú cúú ùxí ndèè tucu ingá núú yúú vâha sá nâni crìsopásá sátá-xi, te yúú cúú ùxí ìⁿ ndèè tucu ingá núú yúú vâha sá nâni ñacintú sátá-xi, te yúú cúú ùxúú ndèè tucu ingá núú yúú vâha sá nâni amatístá sátá-xi.

²¹ Te ndi ùxúú yuyèhe sá ñúhú dòco-áⁿ cúú-xí mèe-ni yúú vâha sá nâni pèrlá, te ndúu ñi yúú cúú ìⁿ ìⁿ yuyèhe-áⁿ. Te tnuú cáhnú ndècu xití ñúú-áⁿ cúú-xí mèe-ni díhúⁿ cuááⁿ, te cáa-xi datná cáá vídriú sá túu ndàa ingá xio.

²² Te ní xiní-í sá ñà túú vèhe núú chíñúhu ñáyiú Dútú Ndióxi cáá ñúú-áⁿ, chi mee-ná Dútú Ndióxi Yáá quidé ncháa-ndi túhú sá vâha ndècu ñúú-áⁿ, ndihi Yáá cáá datná cáá ìⁿ mbéé quiti ní dâñicuehè-güedé.

²³ Te ñúú-áⁿ ñà túú-gá xíní ñúhu-xi nchíanchii dayèhé-xi, te ní yóó ñà túú-gá xíní ñúhu-xi, chi mee-ná Yá Ndióxi dayèhé-gá ñúú-áⁿ ndihi Yáá cáá datná cáá ìⁿ mbéé quiti ní dâñicuehè-güedé.

²⁴ Te cue ñáyiú ncháa ñúú cáá ñúyúú, ñáyiú ní naníhí tàhú xíndecu ñúú-áⁿ dayèhé-gá núú-yu, te ncháa cue téé yíndaha ñaha xii-yu nèhe-güedé sá yíñúhu sá cúú-xí ñúú-áⁿ, te quide cahnu ñaha-güedé xii-gá.

²⁵ Te yuyèhe ñúú-áⁿ ñà túú tñahí nàndedí, te ñúú-áⁿ ñà túú tñahí cùndiquíⁿ.

²⁶ Te ncháa ñáyiú nèhé-yu sá yíñúhu sá cúú-xí ñúú-áⁿ te quide cahnú-yu Yá Ndióxi.

²⁷ Te ñúú-áⁿ vâ cúú cùndecu ní ìⁿ ñáyiú ndècu ichi cuehé ichi duha, te ní ìⁿ ñáyiú ndehnde, te ní ìⁿ ñáyiú quide sá ñà túú cùu vâha iní Yá Ndióxi vâ cúú cùndecú-yu ñúú-áⁿ, chí mee-ni ñáyiú naníhí tàhú ñáyiú yódo tñuni núú tütú Yáá cáá datná cáá ìⁿ mbéé quiti ní dâñicuehè-güedé, mee-ni ñáyiú-áⁿ cùndecú-yu ñúú-áⁿ.

22

¹ Te sátá dúcáⁿ te ñu-ni espíritú-áⁿ ní dánèhé núú ñáhá-xí xii-í yúte núú ñúhú ndúte candoo canine, te ndute-áⁿ candeca-xi iní ñáyiú ní caa ní quíhíⁿ, te ndute-áⁿ quéé-xí mèi núú núcòo Yá Ndióxi ndihi Yáá cáá datná cáá ìⁿ mbéé quiti ní dâñicuehè-güedé.

² Te cuádava tnuú cáhnú yâha xití ñúú-áⁿ cáá yúte-áⁿ, te xio xio yuhu yúte-áⁿ ñíhnú yutnu cuuⁿ sávidí-xi, te sávidí ncháa

yutnu-áⁿ cúú tùcu-xi sá cándèca iní ñáyiú ní caa ní quíhíⁿ, te ncháa yutnu-áⁿ cúúⁿ sávidí-xi úxúú xito ìⁿ cuía chí ndi tñahá yóó cúúⁿ sávidí-xi, te ncháa ndaha-xi cùu-xi tátna sá cúú-xí ncháa ñáyiú.

³ Te vâ yóo ìⁿ-gá cada ìⁿ sá ñà túú cùu vâha iní Yá Ndióxi ñúú-áⁿ. Chí ñúú-áⁿ núcòo mee Yá Ndióxi ndihi Yáá cáá datná cáá ìⁿ mbéé quiti ní dâñicuehè-güedé xítaxi tñuni-gá, te ncháa ñáyiú xinu cuechi núú-gá cada cáhnu ñáhá-yu xii-gá.

⁴ Te ncháa ñáyiú-áⁿ cundehe núú-yu Dútú Ndióxi, te tñeé-yu cundeé ñu-gá.

⁵ Te ñúú-áⁿ vâ quini-gá-yu núú, te ní vâ cánehè chiuⁿ-gá-yu ñúhu cutnùni núú-yu, te ní nchíanchii ñà túú-gá xíní ñúhu-xi dayèhé ñúú-áⁿ chí mee Dútú Ndióxi dayèhé-gá, te ní caa ní quíhíⁿ cunúú-yu cundecú-yu ñúú-áⁿ.

Sa ta cüyatni nduu quixi tucu Xitohó Jesu-crístú

⁶ Te sátá dúcáⁿ te ní cachí tñúhu espíritú xínú cuèchi núú Yá Ndióxi-áⁿ xii-í:

–Nchaandi túhú tñúhu-a cùu-xi mee-ni tñúhu ndáá cuiti. Te Yá Ndióxi Yáá dácâhu iní ncháa cue téé cáháⁿ tñúhu-gá nâcuáa cáháⁿ-güedé ní tendaha-gá ìⁿ espíritú xínú cuèchi núú-gá ní quixi-xi ní dánèhé-xi ncháa ñáyiú xinu cuechi núú-gá ncháa nâcuáa cada-gá, te vâ cüyâa-gá ducaⁿ cáda-gá –duha cáchí espíritú-áⁿ.

⁷ Te ní cáháⁿ Xitohó Jesucristú, te cáchí-gá: –Ílo ndihi quixi tucu-í!

’Íte ío vâha tñahá ncháa ñáyiú tñi ncháa tñúhu cáháⁿ Yá Ndióxi yódo tñuni núú tütú-a! –duha cáchí-gá.

⁸ Te yúhú té Juáá ní tecú dóho-í ncháa nâcuáa ní ngódo tñuni núú tütú-a, te ní xiní núú-í ncháa nâcuáa cada-xi ndéé cuèé-gá. Te sátá dúcáⁿ ní cuu te ní ngúñí xití-í núú espíritú sá ní dánèhé núú ñáhá ncháa xíáⁿ cuéndá chíñuhu-í-xi ní cùu.

⁹ Te ní cachí-xi:

–Vá dúcáⁿ cáda-n, chí yúhú dícò xínú cuèchi-í núú Yá Ndióxi datná cúú yóhò ndihi ncháa dava-gá ñáyiú ndècu ndihi-n ichi-gá cáháⁿ-ndó tñúhu-gá, ndihi ncháa ñáyiú tñi ncháa tñúhu ndèé núú tütú-a, te xíáⁿ cáchí-í sá vâ dúcáⁿ cáda-n, chí mee Yá Ndióxi ducaⁿ chíñuhu-n-gá –cáchí espíritú-áⁿ xii-í.

¹⁰ Te ní cachí tñúhu tucu-xi xii-í, te cáchí-xi:

–Vá chídáhu-n ní ìⁿ tñúhu Yá Ndióxi ndèé núú tütú-a, chí sa ní cuyatni cada-xi ncháa nâcuáa ndèé tñuni.

¹¹ Te dañá sá ncháá ñáyiú ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dañá-n ncháa ñáyiú quide nándi-gá ncháa sá cuèhé sá dúhá ná cáda nahi-ní-yu ncháa sá cuèhé sá dúhá sâni iní-yu, te ncháa ñáyiú quide vâha te ducaⁿ-ni na cáda vâha-yu

cundecú-yu, te nchaa ñáyiú guide nchaa nacuaa cùu váha iní Yá Ndióxi te diu-ni ducaⁿ na càdá-yu cundecú-yu —duha càchí espíritú-áⁿ.

12 Te ní cachí Xítohó Jesucristú:

—Cundedóho-n tnúhu na càháⁿ-í-a. Ío ndíhi quixi tucu-í, te canehe-í nchaa sá ndúú tǎhú ñáyiú quixi, te nacuaa nduu chiuⁿ ní quidé-yu ìⁿ ìⁿ-yu te ducaⁿ cùnduu sá cuañaha-í nduu tǎhú-yu.

13 Te yúhú cùú-í Yáa sa ndècu ndéé cùtnáhá ní ngáva ñuyúú, te diu-ni-í cundecu-í ni caa ni quíhíⁿ —duha càchí-gá.

14 Te váha tǎhú nchaa ñáyiú sa ní nduu ndoo ní nduu nine iní-xi, chí ñáyiú-áⁿ ní nduu tǎhú-yu quíhu-yu xití ñuú-áⁿ, te caxí-yu sávidí yutnu nùtní-áⁿ te xiáⁿ candeca-xi iní-yu ni caa ni quíhíⁿ.

15 Te ñuú-áⁿ vǎ cùú quíhu ni ìⁿ ñáyiú ndècu ichi cuehé ichi duha, ni cue ñáyiú guide nduu, te ni cue ñáyiú ndècu ichi díí iní, te ni cue ñáyiú sǎhni tnaha ñáyiú-xi, te ni cue ñáyiú chíñuhu nchaa sá ní cadúha cue téé ñuyúú-a càchí-yu cùu ndiόxi, te ni cue ñáyiú tnáhá iní dacuàndehnde, te ni ìⁿ ñáyiú ducaⁿ xíquide vǎ ndúú tǎhú-yu quíhu-yu xití ñuú-áⁿ.

16 Te ní càháⁿ tucu Xítohó Jesucristú, te càchí-gá:

—Yúhú Xítohó Jesucristú ní tendaha-í espíritú xínú cuèchi núú-í cuendá cachí tnúhu-xi xii-n nacuaa nduu tnúhu cùñaha-n xii nchaa ñáyiú ndècu ndíhi-n ichi-í dácuaaha tnúhu-í ìⁿ ìⁿ ñuú. Te yúhú cùú-í mei ñàní tnáhá ndí Dàvíí, te cada iní-n sǎ cùú-í dàtná ìⁿ chódíní quiti quène datneé —duha càchí-gá.

17 Te nchaa ñáyiú cùu cuendá Xítohó Jesucristú Yáa cáá dàtná cáá ìⁿ mbéé quiti ní dānicuèhé-güedé, diu-ni ñáyiú-áⁿ cùú-yu ñáyiú cada iní-ó sǎ cùú-yu ìⁿ ñadíhí xíchí tnāndaha ndíhi ñaha xii-gá, te ñáyiú-áⁿ ìⁿ-ni càháⁿ-yu ndíhi Espíritú Yá Ndiόxi, te xǎháⁿ-yu ndíhi Espíritú-gá xii nchaa dava-gá ñáyiú:

—Chí táquixi —cachí-yu xǎháⁿ-yu ndíhi Espíritú Yá Ndiόxi.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ càháⁿ-yu tnáhá-yu cùñáhá-yu xii nchaa dava-gá ñáyiú-áⁿ, te nchaa ñáyiú cuíni tuha ichi-gá te na quixí-yu, te dicó ducaⁿ cùu tǎhú-yu sá cándeca iní-yu ni caa ni quíhíⁿ.

18 Te nchaa nchóhó ñáyiú ndèdóho nchaa nacuaa càháⁿ tnúhu Yá Ndiόxi ndéé núú tütú-a càháⁿ-í dóho-ndo. Te núu ìⁿ ñáyiú na còdo-gá tnúhu chido tnúni-yu núú tütú-a, te Yá Ndiόxi ío dandóho ñaha-gá xii-yu chí yáha-yu nchaa tnúndóho yodo tnuni núú tütú-a te núu ducaⁿ na càdá-yu.

19 Te núu ìⁿ ñáyiú na chidáhu dava tnúhu Yá Ndiόxi ndéé núú tütú-a te ñáyiú-áⁿ vǎ ndúú tǎhú-yu cundecú-yu ñuú-gá, te ni vǎ ndúú tǎhú-yu sǎ cándeca iní-yu ni caa ni quíhíⁿ dàtná yódó tnúni núú tütú-a.

20 Te Xítohó Jesucristú Yáa càháⁿ sǎ ncháá tnúhu-a cùu-xi tnúhu ndáá ní càháⁿ-gá ní tecú dóho-í, te càchí-gá:

—Ndáá sǎ ío ndíhi quixi tucu-í —duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítohó Jesucristú —duha ní xáhaⁿ-í xii-gá.

21 Te Xítohó Jesucristú ío na chindee chitúu ñaha-gá xii-ndo ncháa-ndo. Te ducaⁿ na cùnduu. Te ío chí càdá ndèe iní-nǎ vitna.